


El Nuevo Testamento
en mixe de Coatlán



New Testament in Mixe, Coatlán (MX:mco:Mixe, Coatlán)

El Nuevo Testamento en mixe de Coatlán

New Testament in Mixe, Coatlán (MX:mco:Mixe, Coatlán)

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files dated 29 Jan 2022
4190de74-18ab-52cf-ba4e-5f99ab05892f

Contents

SAN MATEO	1
SAN MARCOS	60
SAN LUCAS	102
SAN JUAN	163
HECHOS	216
ROMANOS	271
1 CORINTIOS	301
2 CORINTIOS	330
GÁLATAS	350
EFESIOS	362
FILIPENSES	373
COLOSENSES	380
1 TESALONICENSES	387
2 TESALONICENSES	393
1 TIMOTEO	397
2 TIMOTEO	404
TITO	409
FILEMÓN	413
HEBREOS	415
SANTIAGO	435
1 PEDRO	442
2 PEDRO	450
1 JUAN	455
2 JUAN	463
3 JUAN	465
JUDAS	467
APOCALIPSIS	470

SAN MATEO

Jaayhu:my Jadu'n Nej Jesucristo Ytun Yjajti

Je Jesucristo ymij'ap ymijteedy

¹ Cham ngapxa'ñ nmiydäga'ñich pin Jesucristo y'ap'ajt yteedy'ajt jadu'n nej yhu:my jaybety. Jesucristo je' oy ap'adyii teedy'adyii David etz Abraham.

² Abraham oy ung'adyii Isaac. Isaac oy ung'adyii Jacob. Jacob oy ung'adyii Judá etz y'ajchytijc y'uchytijc. ³ Judá etz Tamar oy ung'adyii Fares etz Zara. Fares oy ung'adyii Esrom. Esrom oy ung'adyii Aram. ⁴ Aram oy ung'adyii Aminadab. Aminadab oy ung'adyii Naasón. Naasón oy ung'adyii Salmón. ⁵ Salmón etz Rahab oy ung'adyii Booz. Booz etz Rut oy ung'adyii Obed. Obed oy ung'adyii Isaí. ⁶ Isaí oy ung'adyii rey David. Je rey David je' oy ytöxyjic'adyii huidi anajty Urías ytöxyjic'ajtpy. E je' ajcxy y'ung'ajti Salomón.

⁷ Salomón oy ung'adyii Roboam. Roboam oy ung'adyii Abías. Abías oy ung'adyii Asa. ⁸ Asa oy ung'adyii Josafat. Josafat oy ung'adyii Joram. Joram oy ung'adyii Uzías. ⁹ Uzías oy ung'adyii Jotam. Jotam oy ung'adyii Acaz. Acaz oy ung'adyii Ezequías. ¹⁰ Ezequías oy ung'adyii Manasés. Manasés oy ung'adyii Amón. Amón oy ung'adyii Josías. ¹¹ Josías oy ung'adyii Jeconías miid y'ajchytijc y'uchytijc. Huin'it Babilonia jäy oy mach je israelitas jäy. Chi minicxy jim Babilonia y'it.

¹² Jim ma je Babilonia y'it, jim Jeconías oy ung'adyii Salatiel. Salatiel oy ung'adyii Zorobabel. ¹³ Zorobabel oy ung'adyii Abiud. Abiud oy ung'adyii Eliaquim. Eliaquim oy ung'adyii Azor. ¹⁴ Azor oy ung'adyii Sadoc. Sadoc oy ung'adyii Aquim. Aquim oy ung'adyii Eliud. ¹⁵ Eliud oy ung'adyii Eleazar. Eleazar oy ung'adyii Matán. Matán oy ung'adyii Jacob. ¹⁶ Jacob oy ung'adyii José huidi oy ñäy'adyii María. E je María oy ung'adyii Jesús huidi yxii Cristo.

¹⁷ Jadu'n oy ñicxy majmactz najtzquëxi' Abraham ixti David. Ma je David jamajmactz najtzquëxi' chi je israelitas jäy yajtzimy yajmajch ma Babilonia y'it, e nañ jamajmactz najtzquëxi' chiiñi oy ymiñ yja'ty je Cristo.

Jesucristo yma'xung'ajtin

¹⁸ Jadayab capxy ayuc jadu'n nej ymiñ yja'ty je Jesucristo. Jesús ytaj, huidi anajty yxii María, yi' ti anajty ycapxytungixy co ypigaangixy miid José; e ma anajty ca'ni ñaybudigiiyigixy, chi María oy y'ungdzimigy miid yi Dios yjihui'ñ ymic'ajt. ¹⁹ José, yi' ñäy, hue' anajty yi' yajpaty janch tudägy. Ca' anajty xihua'ñ María mayjäyoty. Hue' janchtiy yhuinma'ñybaty co ixmadza'ñ ayüch ameech ca' pin yajnejhuühua'ñ. ²⁰ Huin'it ma jadu'n anajty nihuinmayiy, chi Huindzin Dios tüg y'ángel ñayquëxi'ci cumäyoty ma José, chi ñimaayi:

—José, David y'ap y'oc, ca' mijcajee mdzachhuinmay nej m'octöxyjic'adiyb María, com yi' y'ung huidibi yajma'xung'adamy hue' miid Dios yjihui'ñ ymic'ajt ycixpi. ²¹ Yi' ypadamy tüg y'ung e mximöhuipy Jesús. Jadu'n yi' xii'adiyb com jëgix co yi' yajpocyniñhuädzam ñaax ycajp.

²² Tüg'öciy jada ytundaayi yajtaayi ycijxy yca'pxy jadu'n nej je Dios anajty ti nimäy je profeta, je jäy huidi Dios y'ayuc najtzcapxyiyip ma anajty jadu'n yjaybetyity:

²³ Je töxyjäy huidibi ca' yëydijc miiddzinäy hue' je' ung tzimicip. Chi ypadamyb tüg je y'ung hue' je' yxii'adaanip Emanuel.

Emanuel hue' yhuimbizimiy Dios miid #ch ajt.

²⁴ Co José ymäyhuijy, chi cuyduñ jadu'n nej anajty Dios y'ánel ti nimäyii, chi huoy María jadu'n nej jihuiy töxyijc'adyii. ²⁵ Per ni ca' ajcxy jadu'n chinaay jadu'n nej jāy ypicy chināy ixti cooni oy María y'ung yajma'xung'aty. Chi yxiimoy Jesús.

2

Madza' ni'ixpigüby oy co'ixygyxy pi'c'ung

¹ Jesús yma'xung'ajty ma tüg cajp huidi yxi Belén, jim ma Judea ñaaxjot, huin'it co anajty Herodes yrey'aty ma yi jimbí naaxjot. Chi huin'it yja'ty ma Jerusalén cajp nijéjty yéydijctjc huidibi anajty ti choñ ma xi ypidzimy, yi huidibi anajty ajcxy xi madza' ti ni'ixpigügyxy. ² Chi ajcxy yajtyy:

—¿Ma je judío jāy yrey tüibi yma'xung'aty? Ti #ch ajcxy n'ijxi yi' ymadza' jim ma xi ypidzimy, e yi' #ch ajcxy ya miñ nhuindzigihuaangixy.

³ Co je rey Herodes jadu'n midooy, chi ooy ytigüy tajpi maybi miid tüg'óciy cajpjāy jim Jerusalén. ⁴ Huin'it je rey huomujctay tüg'óciy teedytjc huindzindijc huidibi anajty yaj'ixpijcp yi Dios yley, chi yajtyy ma anajty yma'xung'ada'ñ yi Cristo. ⁵ Chi ajcxy y'adzooy:

—Jim Belén ma Judea ñaaxjot, com Dios y'ayucnajtzcaxüybi jadu'n je' cojaay:

⁶ E miich Belén, mabi Judea ñaaxjot, mij'ajtp mgix'ajtp ca'ydi jac huidi naax jac huidi cajp, com ma miich chona'ñ tüg Huindzin huidi ane' mam yi israeljāy.

⁷ Huin'it Herodes oy yajhuoyii ameech huidibi anajty ti ijxcixy yi madza'. Chi tiybijcy yajxon mina anajty oga'n ti ijxcixy je madza'. ⁸ E huin'it ajcxy quejxy jim Belén. Chi jadu'n nimay:

—Níxcix jim e onciadiu ocyajtugüxy je pi'c'anäg; e co anajty ti mbatcixy, miñ miich ajcxy xyajnimáaygixyich jaydēbi #ch nicxy nañ jadu'n nhuindzigüyich.

⁹ Co jadu'n rey najtzcaxüyday, chi ajcxy choñ. E je madza' tüibi anajty ijxcixy ma xi ypidzimy, chi ajcxy ijxy jayijp je' anajty ñicxy ma je' ajcxy, ixti coní oy je madza' yhuäcxipy ma anajty je pi'c'anäg yajpaady. ¹⁰ Co je rey ixpicytjc jadu'n ijxy yi madza', chi ajcxy oy janch jotcuyc ñayjihüyii.

¹¹ Co ajcxy ytijctigüy, chi ajcxy ijxy je pi'c'anäg miid ytaj je María. Chi jada' ajcxy ñaygojtinaydaaci huindzigüy ojadajty ajcxy je pi'c'anäg. Chi ajcxy yaj'ahuach yxuummy aguejtucy abijctucy, chi ajcxy yajpidzimy oori, poom, etz tüg tzoxy huidi yxi mirra. Chi ajcxy moy je pi'c'anäg. ¹² Chi cumäjoty ajcxy nimaayí co ca' huaad yhuimbijcticy ma Herodes, chi ajcxy ñicxni ma ycajp, jüyöñaxy ajcxy je Herodes, huingbi tü'aa ajcxy ycuñicx.

Co José etz María yqueegyñicxixy Egipto

¹³ Co je rey ixpicytjc ajcxy yhuimbijtaayñi, chi cumäjoty José ijxy tüg Dios y'ánel, chi nimaayí:

—Pidíg, nicx jim Egipto ñaaxjot miid yi pi'c'anäg etz miid yi' ytaj, e jim mhui'mipy ixti cooni #ch miich nimähüipy. Com yi Herodes y'ixtáhuamy yi' yi pi'c'anäg e yaj'oga'ñ yi'.

¹⁴ Chi huin'it José ypidígy miid tzoñ coodz je pi'c'anäg miid ytaj, chi ajcxy ñicxy jim Egipto. ¹⁵ Jim ajcxy y'ijty ixti cooni oy y'ögy je Herodes. Jada je' jadu'n yajcuydun jadu'n nej Dios anajty ti yminañ ma yi' y'ayucnajtzcaxüybi: “Jim Egipto #ch n'ung ti nhuoy.”

Herodes pidacy y'ane'min co huen pi'c'anäg yaj'öctäyii ajcxy

16 Co Herodes oy huinma'n jayjyöy co ti anajty ooy yhuin'ññyii je rey ixpicytjic ajcxy co ca' anajty ti ñihuimbidyii, chi ooy yjot'ambijcy, chi n'ane'mdiy co huen nicxy jim Belén etz majaty cajp mihuingon Belén, yaj'öctaaygixy tüg'óciy yí pi'c'anäg huídibi mejtz jimajt etz huídibi ca'ni ni-gooty mejtz jimajt. 17 E jadu'n jada yajcyduñ jadu'n nej anajty Dios y'ayucnajtzcaxñyibi, je Jeremías, anajty ti cojaay:

18 Jim Ramá yajmidoy co anajty chachjñy chachyäxy jäy ajcxy; yí Raquel tzachjñyb tzachyaaxp mñd y'ung ajcxy ycixpi, ca' ajcxy anajty yjotcujc'aty mñd co anajty y'ung ti y'öctäy.

19 Co oy y'öcni Herodes huin'it jim Egipto, Dios tüg y'ánel ñayguëxici cumäyjoty ma José. Chi ñimayí:

20 —Pidäg, mñdnicx yí pi'c'anäg etz yí ytaj jim ma yí Israel ñaaxjot jadügtecy com ti y'öctaayñi yí huídibi anajty yaj'ögam yí pi'c'anäg.

21 Huin'it José ypidigy, mñd nicxy yí pi'c'anäg etz yí ytaj jim ma Israel ñaaxjot. 22 Per co José nejhuñy co je Arquelao yí anajty jim ane'mb jadu'n nej anajty je yteedy Herodes, ooy chigñy nej ñicxip jim. E co jadu'n anajty ti ycumäy co ca' jim ñicxip, chi ajcxy ñicxy jim Galilea ñaaxjot. 23 Co jim yjäty, chi jim chinaydacpijcy ma je cajp huídí yxñ Nazaret. Jadayaabi je' jadu'n tun jajtí jadu'n nej anajty ycojaayty ma Dios y'ayucnajtzcaxñyibi ñecy co Jesús xñ'adiyb Nazareno.

3

Juan el Bautista y'ayuc capxhuäcxy ma tidz naax it

1 Huin'it tiempo nañ jadu'n Juan je Bautista (huídibi jäy yajnñbejtpí) ymiñ tüg tigídum ma Judea ñaaxjot capxhuäcx Dios y'ayuc, 2 ymiñañ:

—Jothuimbjtcix ma Dios com yí Dios y'ane'min huingonñ yí.

3 Jada Juan yí je' huídibi je profeta Isaías nigapxy ymiñañ:

Jim mjtigídum yajmidoy tüg ayuc mina'n: “Ni'ixñyigixy yí mHuindzin ytü'aa, ni'ixñyigixy tüg tü'aa tñyibi.”

4 Je Juan hue' anajty yhuít'ajtpy iyujc ññbjc (huídibi jäy ytipty camello) e hue' anajty yhuññip iyujc ac, e yí anajty yñicxy'ajtpy mu' etz tijaty iyujc päg jim tüg tigídum. 5 Chi choon jim Jerusalén jäy etz tüg'óciy huídijaty tzinaayb ma Judea ñaaxjot, nañ jadu'n huídijaty tzinaayb ma Jordán mijññba', ñicx ajcxy ma Juan amido'ljtyi yí y'ayuc. 6 Co anajty ajcxy nigapxtaaygixy yí ypocy huídí anajty ti tundigooygixy, huin'it anajty ajcxy Juan yajnñbedyii ma Jordán mijññ.

7 Per yí Juan y'ix co may fariseo jäy etz saduceo jäy miñ anajty ajcxy ññbejtcixy, chi ajcxy ñimay:

—iMiich ajcxy, m'ajuugy m'amigüg ahua'n iyujc! ¿Pñn ti xyajni'ixñyigixy nej jébi huaad mgögueeccixy yí ayo'n huídibi huingomb? 8 Yajxon jäy'ajtcix tydudägy huen niguëxigy co ti mjothuimbjtcixy. 9 Ca' jadu'n mdzachmínaangixy co Abraham xy'ap'adyii xy'oc'adyii. Hich miich ajcxy yam ndñmímaayb co Dios ixti jébi yí yaj'ap'adyii yaj'oc'adyii Abraham jada tzaajot ca'ydí miich ajcxy. 10 Yi jach ni'ixí yí y'ljtni ma quipy y'ijx, tüg'óciy quipy huídí ca' oy ytim'aty yajpujxp yí, e chi jada' yajnögy jñnjoty. 11 Hich, janch yajnñbejtpich mñd ññ, yí yí jadu'n nej tüg ixpejt co ti mjothuimbjtcixy; per jacmínamb tzojc huídí ajcxy xyajññbedipy mñd Dios yjihu'i'n etz mñd

jiin. Je' ym'iid mic'ajt'in etz cõtujcin, nīgi ca'ydi iich, ni xycapaadyich nicxy yčig nyajtecyjendügyich. ¹² Ym'iid mic'ajt'in piic-huäcxamy yi jäy jadu'n nej jäy huimbojy moc, abicy pidäga'n actz, abicy moc pajc. Yujcpiga'n moc pajc ma tze'x ninöghua'n yi moc actz moc jaam jijnjoty ma je jiin huidibi nicaminaaxi ycapich.

Co Jesús nibejty

¹³ Huin'it Jesús chooñ ma Galilea ñaaxjot, chi ñicxy ma Jordán mij nñi ma anajty Juan yjäyajnibety, nibebedam anajty yi' nañ jadu'n. ¹⁴ Juan ca'jadim'a'ixiy, chi nimay Jesús:

—Ich miich ixypy xyajniibejtpich, ze miich mimb ma iichi?

¹⁵ Chi Jesús y'adzooy:

—Jadachambi oc'a'ixi jadu'n, com ooy yi' ycopityity co nguydundayim tüg'óciy tübi Dios xyaj'ane'mim.

Huin'it Juan a'ixiy chi yajniibejty Jesús. ¹⁶ Co Jesús nibejtay, chi Jesús ijxy Dios yjihui'n ñigidägyii jadu'n nej tüg pi'cmuuxy. ¹⁷ E huin'it yajmidooy tzajpcixy tüg ayuc ym'ina'n:

—Jada je' iich n'ung'ajtypich huidibi ooy ndzocyich huidibi ooy m'iid jotcujc nayjihuijich.

4

Je mujcu' tuñ ijxta'ni Jesús

¹ Chi Dios yjihui'n yajnicxy Jesús migtig'duum jaydëbi je ca'oybi yjot'ixi'iyb yhuinma'n'ixi'iyb. ² Jim y'ijty jaygay huixchigui'px xñ huixchigui'px tzuum, e huin'itni ooy yiböccodyii. ³ Chi je ca'oybi nimijhuägy Jesús ocjot'ixa'n oc-huinma'n'ixa'n, chi nimay:

⁴—Pen Dios miich xy'ung'ajtp, nima' jada tzaa huen naygojyii tzajcaagy.

Chi Jesús y'adzooy:

—Jaybety jadu'n ymiñ ma Dios ñecy: “Ca'p jäy tzajcaagyt'ajty nitzinähui'py, nañ jadu'n nitzinähui'py tüg'óciy yi ayuc huidibi Dios ycapxp.”

⁵ Chi je ca'oybi müdnicxy Jesús jim Jerusalén, chi ym'iidpejty tzajptijc cöduum. ⁶ Chi nimay:

—Pen janch co miich Dios xy'ung'adyii, cödi'pnax jii'by naaxcixy, ca' yi' nej mjadipy com jaybety jadu'n ymiñ co jadu'n ym'ina'n:

Dios yquexyp yi' y'angeles jigix xycuend'adipy xyhuizipy müd yci', ca'ydi ninej mgönepy ma tzaagop.

⁷ Chi Jesús y'adzooy:

—Nañ jadu'n ymiñ jaybety: “Ca' mjot'ixi'ipy mhuinma'n'ixi'ipy yi mhuindzin Dios.”

⁸ Jadüg'oc je ca'oybi ym'iid'ajty Jesús ma tüg copn'icx janch cijxpi, e jim yajni'ixi'iyday tüg'óciy naax cajp co ooy müdity oy'ajt'in etz mic'ajt. ⁹ E chi nimay:

—Ich jada miich nmoydähui'py tüg'óciy, pen miich cojxtina' xyhuindzigiyich xy'ojadatyich.

¹⁰ Huin'it Jesús y'adzooy:

—Huinhüäctucich miich mujcu', com jadu'n yjaybetyity: “Tüg'pajc yi mhuindzin Dios yi' mhuindzigihui'py m'ojadadipy.”

¹¹ Huin'it je ca'oybi huinhüäctucy Jesús, chi Jesús ñimiini ängeles ycuend'ajti.

Jesús ytung yajtzondacy jim Galilea

¹² Co Jesús nejhuiy co Juan ti anajty yajpidägy pujxtigoty, chi yhuimbijtni jadüg'oc jim Galilea. ¹³ E ni ca' yhui'miyy jim Nazaret, chi ñicxy jim Capernaum, jim ma Zabulón etz Neftalí y'it. ¹⁴ Jada je' jadu'n tuni jajtí jadu'n nej Dios y'ayucnajtzcapxñiybi Isaías anajty ti cojaay:

¹⁵ Zabulón etz Neftalí ñaaxjot. Je tü'aa huidibi mejypa' huidibi a'oy'amy ma Jordán mij ñi. Jim Galileajäy chinäy huidibi ca' yjudiojäyty.

¹⁶ Yi jäy ajcxy huidibi jim tzinaayb agootztuuby ijxpaty ajcxy tüg tüicxin jajin. Je huidijaty anajty ajcxy tzinaayb ma je jibicpi y'anicíy, chi ajcxy ycodicxñiy tugi tüicxin jajin.

¹⁷ Ixti huin'it Jesús ytigñiy ayuccapxhuäcxp yminañ:

—Jothuimbijtcix, yajmingix yajmejtzcix mjot mhuinma'ñ ma Dios, com yi Dios y'ane'min huingonip yi'.

Jesús nimay nimidaax je acxmajtzpi: “Pajamgich”

¹⁸ Jesús tüyöyb anajty ma Galilea mejypa', co ijxpaty metz yëydjic ac tüg quëxpi, hue' anajty yi' je' je Simón, huidibi nañ jadu'n yxi Pedro, e je jadügpi hue' je' anajty Andrés. Acxmadzñ anajty ajcxy yi' ytung'ajty e jim anajty ajcxy yi' tzachñigöhuich y'acxmadzñ. ¹⁹ Chi Jesús nimay ajcxy:

—Pajamgich, ñch müich ajcxy nyajni'ixñihuipy nej jäy myaj'ixpigipy je Dios ytiy'ajt.

²⁰ Huin'it je' ajcxy ixmajtztay tüg'óciy yi' y'acxtzaay, chi ajcxy panicxy Jesús.

²¹ Hueeni jac'amijci'm Jesús ijxy janimetz Zebedeo ajcxy ymang, je Jacobo etz Juan. Jim anajty yi' ajcxy ma tüg barco müid yteedy, yi' anajty ajcxy yi' jim chach'adagñiyb yi' huidibi mi'acxmajtzcixy. Chi ajcxy Jesús yhuoohui. ²² E huin'it ajcxy ixmajtztay je barco etz yi' yteedy, chi ajcxy panicxy Jesús.

Jesús yaj'ixpicy mayjäy

²³ Huidijttay Jesús ma tüg'óciy Galilea ñaaxjot, yaj'ixpicy jäy majaty je naymujctac cajp cajp. Capxhuäcxy yi' Dios ytiy'ajt etz nañ jadu'n pa'mjäy yajtzocy huen ytimyhuidipá'mity anajty ajcxy ymiid. ²⁴ Chi Jesús oy yajnejhuñyñi ma tüg'óciy yi' Siria ñaaxjot, e chi ajcxy müidmiñ ma Jesús tüg'óciy huidijaty anajty ajcxy ca'oybi müid, etz huidijaty anajty ajcxy cixuxy tecyxuxy, chi Jesús yajtzoooy. ²⁵ Huin'it Jesús ypanicxi mayjäy huidijaty anajty ajcxy tzinaayb ma Galilea ñaaxjot etz yi' Decapolis jäy, nañ jadu'n Jerusalén jäy etz huidijaty tzinaayb ma Judea ñaaxjot, nañ jadu'n huidijaty anajty ajcxy tzinaayb a'oy'amy ma Jordán mij ñi.

5

Je tiy'ajt huidibi Jesús ycapx ma tüg cögop

¹ Co Jesús ijxy tüg'óciy je mayjäy, chi ñicxy ma tüg copñicx, e chi jim y'ixtacy. E huin'it je' y'ixpijcpidjic ajcxy yjübigñiy. ² Chi Jesús ytigñiy yaj'ixpijcp yminañ jadu'n:

Je pinjaty ajcxy jotcújcip

³—Janch jotcujc je jäy ajcxy huidibi nejhuiy co yajmayjajtpy Dios y'oy'ajt, yi' ajcxy paatip Dios y'ane'min.

⁴ Janch jotcujc je jäy ajcxy huidi yajpatp taj may, yi' ajcxy yajmöhnam jotcujc'ajtin.

⁵ Janch jotcujc je jäy ajcxy huidibi yung naxpy jäy'ajtp, yi' ajcxy padaamb tüg'óciy je huidi Dios ti yaj'ahuanñiyii.

6 Janch jotcujc je jäy ajcxy huidibi cuydunamb huidibi Dios chojpcy, Dios yi' ajcxy pubediib.

7 Janch jotcujc je jäy ajcxy huidibi pa'ayoob huenyimpinjäyity, Dios nañ jadu'n ajcxy pa'ayohuüib.

8 Janch jotcujc je jäy ajcxy huidibi huädz yjot yhuinma'ñ, yi' ajcxy y'ixipy yi Dios.

9 Janch jotcujc je jäy ajcxy huidibi ca' ti tzip tzojccixy, com yi' ajcxy Dios ung'adiib.

10 Janch jotcujc je jäy ajcxy huidibi yajnixiicp yajnigapxp müid je Dios ytiy'ajt ycixpi. Yi' ajcxy idamb ma Dios y'ane'min.

11 Janch jotcujc miich ajcxy co jäy jibic xytungixy co nigoob xyñihuambejtcixy etz capxcixy huidijaty ca' ytiy'ajtity müid iich ycixpi. 12 Xondaaccix jotcuj'ajtcix co mbadaangixy tüg oy'ajtin jüby tzajpjoty. Nañ jadu'n ajcxy ixhuidijty pahuidijty je Dios y'ayucnajtzcaxixybi jecy'ajty.

Miich ajcxy je tudägyjäy ya naaxhuiñ

13 Jadu'n nej caan ca' yajpüch je tzüch jüicy tim jadu'n miich ajcxy myajpaady ya naaxhuiñ. Pen je caan ca' müid ti xücx'ajtin, ¿nej jëbi nyajtuunim? Ca' y'oc'ooyajtunity, chi yajnajtzcixidiñyñi, chi yhuaani tembejt hua'cpejt.

14 Oc'ix tüg je cajp jim copcix, ca' jëbi mhuitzyüdzim mgoyüdzim. 15 Co tüg jün nyajtoyicim, ca' huaad tu'tz ngöjupim. Hue janchty co nyajticxim cix, huin'it jëbi xycodicxtaayim jadu'n nej ajt nyajpaatim ma tijc. 16 Nañ jadu'n miich ajcxy mdzinaaygixy tudägy ma ajcxy je mayjäy jaydëbi ajcxy ixipy je oybi huidi miich ajcxy mdumyb. Huin'it ajcxy ojadadipy je mDios teedy huidibi jüby tzajpjoty.

Jesús yaj'ixpicy nej yi' yi Dios ycötujcin

17 Ca' mhuinmay co iich ti nmiñich ya co nbiganich je Dios y'ayuc je' huidibi anajty ti jaay Moisés etz je profetitjc. Ca' iich nyajmijaagixa'ñ je cötujcin, iich ti nmiñich co nguyduna'ñich jadu'n nej ymiñ jaaybety. 18 Janch tiy'ajt jadu'n nej nimaaygixy, je huidibi mimb jaaybety jadu'n tundähuam jajtähuam. Ni tüg letra oy mabaad ymüdzity nicxy ycayajcuyduñ. 19 Je jäy huidibi ca' nimidooy je Dios ytiy'ajt oy yjadim mutzjaty etz yaj'ixpicy jäy jadu'n, je' ajcxy padamb je mutzpi tigiydac ma Dios y'ane'min. Paady je jäy huidibi yaj'ixpijcp jadu'n nej tiy'ajt ymina'ñ, e paduñ jadu'n nej yaj'ixpicy, je' ajcxy padamb tüg je mijpi tigiydac ma Dios y'ane'min. 20 Iich miich ajcxy nimaayb, pen ca' miich ajcxy jac'oy mdúngixy ca'ydí fariseos etz escribas ajcxy, ca' nimina mdigihuiipy ma Dios y'ane'min.

Jesús yaj'ixpicy co ca'p huaad pin yjotmädy

21 Miich ajcxy mnejhuüiygixy jadu'n nej yi' m'ap mdeedy ajcxy ayuc yajhui'my: "Ca' jäy myaj'ogip; e pin anajty jäy yaj'öcp ypaadip je tzaachypi." 22 Iich miich ajcxy jadu'n nimaayb pinjaty ymigügitjc mijotma'tp, je' Dios tiydunaanipy; e pin ymigüg xüdiijp tzuudijp, yajtydunipy je' ma Dios tiydundac; e pin ymigüg tzuudijp locidijp ayo'ndumb, je' y'ity co ñicxip ayoodactuuby.

23 Pen myajnicxpy miich mhuindzigi'ñ ma Dios ytijc, e pen jim jäy metzgydyii co mmigüg ti xyhuin'innaxy ti xyhuincapxynaxy yinjaty hueenjaty, 24 jim myajhui'm je huindzigi'ñ ma je altar yhuinduu, e nicx jayijp nayyaj'oyihui müid je migüg, huin'it mhuimbedip e chimgüyecy je mhuindzigi'ñ.

²⁵ Tzoc naygapxjotcidägi mïd je midzip, pen yam mïd tÿöy nï'am tÿ'am, ca' jecyity co je midzip xycÿegip ma juez, e je juez xycÿegip ma je policia, e je' nicxy xypidägy pujxtigoty. ²⁶ Janch tÿ'ajt ïch müch nimäy co ca' jibby mbidzimipy ixti cooni mgüejtahuipy je meefi.

Jesús yaj'ixpicy co ca'p ndundigóoyimipy mïd huingbi töxyjäy

²⁷ Müch ajcxy mnejhuüyb co jecyip tÿ'ajt ymïna'ñ: "Ca' mmidundigoyipy huingbi töxyjäy." ²⁸ ïch müch ajcxy nïmaayb, pen ji pïn huindicxy tÿg töxyjäy, e jot'adiyb nejyaty, ti je' anajty ñitundigooyñi ma yjot yhuinma'ñ.

²⁹ Pen yi mhuin a'oy'amybi xyajtundigoyamb tim yajpidzim; jac'oy co tÿg'idu'mbi mhuin ytigoyipy ca'ydi co cixyca'px mnicxipy jünjoty. ³⁰ E pen yi mgi' a'oy'amybi xyajtundigoyamb tim ixpux etz najtzjibibi' jiguem; jac'oy co tÿg mgi' ytigoyipy ca'ydi co mminicxipy metz mgi' jünjoty.

Jesús yaj'ixpicy co jäy ca'p huaad ytöxyjic ixmach mañ'ajtingixy

³¹ Nañ jadu'n ymiñ jaabyety: "Pïn ixmajtzp ytöxyjic, huen möhuipy tÿg necy ti ycixpi co ñay'ixmajtzigixy." ³² ïch müch ajcxy nïmaayb, pen ji pïn ixmach ytöxyjic, e ca' anajty ti ytundigooy müd huingbi yëydjic, je yëydjic anajty nigiydeyüyb ytöxyjic co anajty ytundigooy müd huingbi yëydjic; pïn yëydjic pijcp müd je töxyjäy huidibi anajty ti yaj'ixmach, pocytumyb je' anajty.

Jesús yaj'ixpicy nej nguyduunim tïibi n'ahuaniyim ma Dios yhuinduu

³³ Müch ajcxy mnejhuüyb nej jecy'ajty m'aptijc mdeedytjic ajcxy yajnimay: "Ca' nigo ti m'ahuanihuipy, mguydunipy jadu'n nej anajty ti mïna'ñ." ³⁴⁻³⁶ Per ïch müch ajcxy nïmaayb: ni mga'ïbaadip ni mgacpxpaadip; ni mgamïna'nip; "y'ijxpy tzajpjoty," com yi' Dios chinaydac. E ni mgamïna'nip; "y'ijxpy naaxhuifibi," com Dios yajpatp oy ytimyaaajity. E ni mgamïna'nip; "y'ijxpy Jerusalén," com jim je' Dios chajptjic; ni mga'ïbaadip ni mgacpxpaadip mgohuajc, com ca' mjaty myaj'ahuimbity poob o tzixy tÿg cöhuay. ³⁷ Hue' janchtÿy, tidydägy mïnaangixy: "oy" o "ca'." E pen müch ajcxy anaxy jaccapxp jadu'n mujcu' y'ayuc je' anajty ajcxy mgapxpy.

Jesús yaj'ixpicy co ca'p huaad jibic nyajhuimbijim

³⁸ Müch ajcxy mnejhuüyb co jecy'ajty yajmïnañ: "Pen ji jäy mhuin xyajpidzimi, nañ tim jadu'n yhuin myajpidzimipy; pen ji migüg mdiitz xyajpidzimi, nañ jadu'n myaj'ahuimbidity." ³⁹ Per ïch müch ajcxy nïmaayb: Ca' myaj'ahuimbidity jibicpi ma migügtjic; pen ji pïn xycoxy ma mhuifijjip tÿg adu'mbi, jac tim mo' jadüg adu'm'amybi. ⁴⁰ Pen ji pïn xyxÿy e xypigaani yi mnien, najtz'ixi', huen xyajnicxi nañ jadu'n mjocx huit. ⁴¹ Pen ji pïn adzip tzimy xyajmïncxa'ñ tÿg kilómetro jiguemity, yajnicx jac tim jadüg kilómetro. ⁴² Pen tijaty xypjctzoohi, mo'. E pen ji pïn xymïnuucxa'ñ, yajnuucx.

Co ndzojcm nmidzip

⁴³ Jadu'n ymiñ jaabyety nej jecyip Moisés yjay: "Migüg'adii yi' huidibi xymigüg'ajtp, e midzip'adii yi' huidibi xymidzip'ajtp." ⁴⁴ ïch müch ajcxy nïmaayb: Tzoc yi' huidibi ajcxy xymidzip'ajtp, etz mibijctzoohi ma Dios huen y'oy'ajtin paady yi' huidibi xynigapx xyni'ojüyb, e nañ mi'oyjäy'at yi' huidibi xyca'ixamb. ⁴⁵ Huin'it müch ajcxy xy'ung'adiiby yi' Dios tzajpjoty'p hidibi yxi' yajtïcxp yajjajp ma oyjäydjic etz ma jibicjäydjic, nañ jadu'n yajtÿy ma jibicjäydjic etz ma oyjäydjic. ⁴⁶ Pen müch ajcxy mdzojcpy je hidibi xychojcp, çti jäygidaacin yi' m'ocpadamyb? Nañ jadu'n yi' ajcxy yja'iditzp yi' pocyjäydjic etz yi' yajcogüejtpidjic. ⁴⁷ Pen müch ajcxy mgapxpocxyp yi'

mjugymigüg, ¿ti oybi yi'? Nañ jadu'n ajcxy yi' yja'idüitzp yi huidibi' ajcxy ca' Dios nejhuüiygixy. ⁴⁸ Jäy'ajtcix tudägy jadu'n nej ajcxy yi mdeedy tzajpjoty y tudägy.

6

Jesús yaj'ixpicy co nduunim oy yjä'ajtín

¹ Ca' mdungixy je oybi ma jäy y'ixy yhuindicxy müd co mdzachya-yhuindicxaangixy co mdungixy oybi. Pen jadu'n m'idüitzcixy mDios Teedy huidi jüby tzajpjoty tzinaayb, ca' ajcxy xymöhua'ñ je oy'ajtín. ² Paady co mbubedüpy mmigüg, je ayoobi jäy huidi yajmayjajtpy tijaty, ca' huaad mnigapxy mnimiydägy o mnaygömayii co anajty ti mmöy tijaty. Yi' jadu'n idüitzp je jäy huidi mij cix nayjihuüiyip huidi anidaacp co huen jäy y'ixyüi mijpidägyüi co anajty jadu'n y'idüich. Janch üch miich ajcxy jadu'n nimaaygix co yi' ti patcixy je oy'ajtín. ³ Co miich mmöhüipy mmigüg tijaty yajmayjajtpy, hue' janchtiy mdunüpy ca' myajnejhuüipy huidi müd mnaymigüg'adyii. ⁴ E co miich amoñ m'idüpy, mDios Teedy huidi ijxp co amoñ tijaty mduñ, je' xymöhuamb tüg oy'ajtín mayjäyduum.

Jesús yaj'ixpicy nej Dios mmibijctzoohuim

⁵ Co miich ajcxy Dios mmibijctzoy, ca' jadu'n m'idüitzcixy jadu'n nej je jäy huidibi' capxtacp ma Dios huin aguy ahuac aguy. Yi' ajcxy capxtacp ma Dios huäctina' jüby tzajptigoty jaydëbi jäy y'ixüiyb etz ymijpidägyüyb. Hich jëyi jadu'n nimaayb, co jadu'n oy'ajtín'adüby. ⁶ E co miich Dios mmibijctzoy, nicx tigoty etz m'agühuüpy je mdijc aguu. Huin'it Dios mbijctzou. E je Dios y'ijxpy ymidooyb co jadu'n mmibijctzoy, e je' je m'oy'ajtín xymöhüipy mayjäyduum.

⁷ Com Dios mmibijctzoy, ca' m'agapxiyo'cip je huidi anajty ti m'occapxi, jadu'n nej ajcxy y'idüitzcixy huidi ca' nejhuüiygixy Dios ytiy'ajt. Yi' ajcxy huinma'ñypidägy co müd ajcxy ymay'ayuc huin'it ajcxy ymidoohüiyb. ⁸ Ca' jadu'n m'idüitzcixy jadu'n nej je' ajcxy; mDios ñejhuüiyb ti miich ajcxy myajmayjajtpy ma anajty ca'ni mbijctzooñi. ⁹ E jadu'n miich ajcxy Dios mbijctzohüipy, jadu'n mina'nip:

Dios Teedy, miich huidibi' tzajpjoty tzinaayb; huindzigüy miich mxüi y'ity.

¹⁰ Huen miñ ya miich yi' m'ane'min. Huen mdzojcin yajcuyduñ ma je jäy yjot yhuinma'ñ jadu'n nej yajcuyduñ jüby tzajpjoty.

¹¹ Mooygich ajcxy ngaayin n'uucin jabom jabom.

¹² Méecxibich ajcxy nbocy ngaydey huidibi' üch ajcxy ndundigooyb, jadu'n nej üch ajcxy meecyich huidey ajcxy xymidundigooybich.

¹³ Ca' m'a'ixüy co üch ajcxy nhuinma'ñ tigoyipich. Yajnihuaatzcich ajcxy ma yi jibicpi. Co miich yi' mje' je cötujcin, je mic'ajtín etz je oy'ajtín huinixüi huinütiempo. Amén.

¹⁴ Pen miich ajcxy mhuinmeecxp je huidey xymidundigooygixp, je mDios Teedy huidey tzajpjoty je' nañ jadu'n xyhuinmeecxp miich ajcxy mbocy. ¹⁵ E pen miich ajcxy ca' pin jäy mhuinmeecxy nej xymidundigooygixy, nañ jadu'n mDios ca' xyhuinmeecxp ajcxy ma ti mdundigooygixy.

Jesús yaj'ixpicy nej huaad n'ijtim jaygaay

¹⁶ Com ajcxy m'ida'nip jaygaay jay'ügy (mina Dios mmibijctzooigixy), ca' mnaybidäaccigixy tajy may, jadu'n nej ajcxy idüitzcixy yi' huidey ajcxy minamb co Dios mbijccixy e ca' yjanchüty. Yi' ajcxy yajtigajchpy yhuinüijp jigix jäy ajcxy oc'ixüyb co jaygaay jay'ügy y'ijtcixy; jëyi jadu'n oy'ajt'adüyb.

¹⁷ Miich ajcxy co m'idipy jaygaay jay'ügy jotcuyc naybidägi, caax mgohuajc etz puj mhuin mjijp, ¹⁸ ca'ydí myajniguéxígy mayjäyjoty co m'ity jaygaay jay'ügy, hue' janchtiy myajniguéxígy ma je mDeedy huidibi ca' yaj'ixy; e je mDeedy huidibi ijxp huidibi miich ajcxy ca' mduñ ijxna' quéxna' yi' xymöhuipy oy'ajtín mayjäydum.

Je jugy'ajtín tzajpjoty

¹⁹ Ca' nīgi m'adzocy huidibi ya naaxhuiñ, je' co ya huindigooyb oy ytimtijity huidibi yi' huech yajhuindigooyb, huidibi tougaayip etz ma je meetzpi ajcxy meetzcxy pigiccxy tijaty. ²⁰ Je' miich nijot'ajtcxy je' oy'ajt' huidibi miich ajcxy Dios xymöhuamb jiiy tzajpjoty ma ca' huech yajhuindigooy ni ti, e nañ ni ycatougaayii ni ti, etz ma je meetzpi ca' ajcxy meetzcxy pigiccxy tijaty. ²¹ Ma miich ajcxy m'idity je oy'ajt' nañ jiiy ajcxy mjot mhuinma'ñ pidäg.

Yi' mhuin jadu'n yi' nej tüg tücxin

²² Yi' mhuin yi' yi' jadu'nip nej tüg tücxin jain ma mnin'cx, e paady pen ca' miich yi' mhuin xyajtundigoy, tüg'ócxy mjot mhuinma'ñ huadz yi'. ²³ Pen miich mhuin xyajtundigoyb nañ jadu'n mjot mhuinma'ñ huidi miich m'id ca' y'oyity, jadu'n yi' nej coodzpi jac tim nīgi ca' y'oyity ca'ydí je coodzpi!

Dios etz je comeñ'ajtín

²⁴ Ni tüg pin ca' huaad m'id tuñ metz huindzin com mijotma'ti tüg je', e jadügpí chogipy; o ixtijipy tüg e jadüg ymigüg'adiyb. Nañ jadu'n ca' huaad miich ajcxy metz m'ojadajtcxy, Dios etz je meeñ.

Dios ycuend'ajtpy yi' yjáy

²⁵ Paady iich miich ajcxy nimaaygixy: Ca' mdzachhuinmaaygixy ti ajcxy mnitzináhuipy, ti ajcxy mgayipy m'ügipy o ti ajcxy mhuit'adiyb mducky'adiyb. MDios yi' ti xymooygixy je mjogy'ajtín, e paady ycixpi yi' nejhuüyb ti ajcxy myajmayajtpy. ²⁶ Oc'ix miich ajcxy yi' joon huidi queechuidijtp. Yi' ajcxy ycaniipcxy ycatungixy, nañ ni ca' yi' ajcxy yujcpjccxy ma tze'x. Miich ajcxy mDios Teedy huidi tzajpjoty tzinaayb, je' moydaayb huidi ajcxy yi' yjicxyp. E miich ajcxy mjactzoobatp ca'ydí yi' joon. ²⁷ ¿Pin ji ma miich ajcxy, ooy mij'ahuinmay, jébi tüg nuux yjacyeegyí?

²⁸ ¿E na'amy co miich ajcxy mdzachnidajy mdzachnimay m'id je mhuit' mducky'ycixpi? Oc'ix miich ajcxy nej yoñ tüg je pijy huidi yajpatp tun nīgap. Ni yi' ycatuñ ni piidy. ²⁹ Per janch tiy'ajt' jadu'n nej nimaaygixy, ni je comeñyjäy huidi yxii rey Solomón, ni ycaquipxíy je' yxojxin m'id je pijy. ³⁰ E pen mDios xojxpy jadu'n je aay ujtz cham etz tzojcy ytiitztäy ñicxtäy, jac nīgi miich ajcxy Dios xymöhua'ñ huidibi myajmayajtpy, miich ajcxy huidibi hueeni mmibijcin. ³¹ Paady ca' nigoobi mdzachhuinmaaygixy ma ajcxy mbaadip ti mgayipy m'ügipy o ti mhuit'adiyb mducky'adiyb. ³² Yi' jäy ajcxy huidibi ca' mibicy yi' Dios oy tzach nijot'ajtcxy jadayaabi, per miich mDeedy huidibi tzajpjoty je' ñejhuüyb ti miich ajcxy myajmayajtpy. ³³ E pen miich ajcxy mbidacpy Dios jayijp ma mjot mhuinma'ñ etz mguydun ajcxy yi' y'ane'min, huin'it miich ajcxy Dios xymöhuipy tijaty myajmayajtpy. ³⁴ Paady ca' mhuinmaaygixy cham m'id je jabom cixpi, je' co je jabombi ymimiñ je tajin mayin. Tzoc mijotcuyc'ajtim je tajin mayin huidi cham mninajx nyanajxim.

1 Ca' m'ix'ijxpy mba'ijxpy ti mmigügtijc ytundigooyb, jigix ca' Dios xytyidunipy chaachytunipy. 2 Pen miich m'ix'ijxpy mba'ijxpy mmigügtijc ti ytundigooyb, nañ jadu'n miich Dios xytyidunipy xychaachytunipy, e yi quipxi'ñ huidibi miich mhuamyb quipxi'ñ, nañ yi' Dios yajtunamyb ma miich. 3 ¿Nej co miich m'ixy huidibi mmigüg ytumyb e hueeni ytundigooyb, e ca' mnay'ixyii huidibi miich jac mij mdundigooybi? 4 ¿Nej jëbi mmigüg m'ocnimäy: "Nbubedamybich miich ca'ydi mjacpocytuñ", e miich yam m'ocni#dpi jac mij pocy? 5 Miich ci'm mnayhuin'ñnyii. Nicx jayijp mbocy mgaydey ocyajhuadz, huin'it jëbi mbubety je mmigüg.

6 Ca' mmöy yi jibicjäydijc huidibi Dios yjë'ajty co nicx camij'ijx camijpidaaccixy; ni mgayegipy Dios y'ayuc ytiy'ajt ma yi jäy ajcxy huidibi ca' tzojccixy Dios y'ayuc ytiy'ajt.

Nbijctzoohuim n'amidoohuim Dios

7 Mibijctzougix yi Dios e yi' xymöhuipy ajcxy; ixtaaygix, huin'it mbaatcixipy; cogapxiyigix e ahuädzip ajcxy mdijc aguu. 8 Com pin tijaty pijctzoo ypaatyp yi'; e pin tijaty ixtaayb ypaatyp yi'; e pin cogapxiyib ma tijc aguu, yaj'ahuaatzip ytiyc aguu.

9 ¿Nej ji jada' miich ajcxy nidügti co m'ung pijctzoohuipy tzajcaagy nej mmöhuipy tüg tzaaji? 10 ¿O pen ypijctzoo by tüg acx nej mmöhuipy tüg tza'ñi? 11 Miich ajcxy oy mjibicjäyity e mjaipity ajcxy nej m'ung m'anäg mmöhuipy je oybi. iNigi Dios Teedy tzajpjoty pi möhua'ñ je oybi pinjaty pijctzoo!

12 Tzinaaygix tydudägy miid je mmigügtijc, pen miich ajcxy mdzojczy co je mmigügtijc chinähuipy tudägy miid miich ajcxy; com jadu'n y'ane'my Moisés yley etz yi Dios y'ayuc najtzcapxiyib ajcxy ñecy.

Je xützpi tü'aa

13 Tigiyigix ma yi tigiyyidac xützpi: yi tigiyyidac etz yi tü'aa huidibi ja'tp ca'oydactuuby mij huin yi', e may jäy ajcxy oy ji ytigiyyigixy. 14 E janch je tigiyyidac etz yi tü'aa huidibi ja'tp ma je jugy'ajtin huinixiibi, xüdz je' etz tzip naxiyyi; janch tim hueeni jäy huidibi ji nicxiyib.

Yi jäy yhuinma'ñ miid ñiguëxig y pen oyjäy o pen ca'

15 Nayguend'ajtigix miid yi jäy anijaty pi huidibi ajcxy minamb co Dios ytiy'ajt yaj'ixpijcp, huidibi ajcxy huidijtp janch yung janch naxy ñaybidaaccixy nejihuüy ooy oy huinma'ñ midity; nigoobi ajcxy jadu'n ñaybidägyii, ymiid ajcxy jibic-huinma'ñ. 16 Miich ajcxy jëbi m'ijxapy nejaty ajcxy midity chinaayin yjugy'ajtin; ca' pin caamuxy cha'm tucy ma apy quipy, e nañ jadu'n ca' pin higo tim tucy ma jaam'apy quipy. 17 Je quipy huidibi ooy y'oyity, oy yi' ytiim'aty. Je quipy huidibi ca' y'oyity, ca' yi' oy ytiim'aty. 18 E je oybi quipy ca' huaad ytiim'aty jibic. E je quipy huidibi ca' y'oyity ca' ytiim'aty oy. 19 Tüg'óciy je quipy huidi ca' oy ytiim'aty, cixy yajpujxp je'. Chi jada' yajnögy. 20 Nañ jadu'n miich ajcxy jëbi mnejhuüy jadu'n nej jäy yjäy'aty co m'ixipy nej chinäy.

Ca' nidüg'óciy jäy ajcxy ytiği huipy ma Dios

21 Ca' nmänaanim nidüg'óciy jäy ajcxy ytiği huipy jii by tzajpjoty huidibi xyñmaaybich: "Huindzin, Huindzin", jëda'ajty ajcxy tigi huamb huidibi ycapxymidooyb je Dios chojcin y'ane'min. 22 Mayjäy oy mina'na'ñ huin'it xii huin'it tiempo: "Huindzin, Huindzin", ti iich ajcxy ngapxhuäcxy miich m'ayuc, e miid miich mxii ti iich ajcxy nyajpidzimy je ca'oybi; etz miid miich

mxii ti nduñ iich ajcxy mij huinma'ñ. ²³ Huin'it nimähuipy: “Caminaabi miich ajcxy ti nga'ixy'adyii; huinhuäctutcich miich jibic tumbidijc ajcxy.”

Je mejtznajxpi je tiy'ajt cop

²⁴ Nidüg'óciy pinjäy huidibi xymibijcpich etz midooyb jadu'n nej iich n'ane'myich yi' ajcxy quipxyjaty müid je jäy huidibi cohuinma'ñ huidibi ytijc ycojy ma yhuingixity. ²⁵ Co ymicpojtüy etz ycomy je mij nüi, ca' ypadyii nügom je tijc, je' co anajty cixy je' ycojyity. ²⁶ Per yi' ajcxy huidibi midoob e ca' cuyduñ huidibi ngaxpich, je' jadu'nip nej tüg jäy huidi janch loci huidi ytijccoj ma pu' jot. ²⁷ Co ymiñ je mic poj tuu, chi ycomy je mij nüi. Chi yciday je ytijc; mij ayo'n oy yjati.

²⁸ Co Jesús ycapxtay ymiydactay, chi je jäy ooy huinmay jadu'n nej anajty ti yaj'ixpicy. ²⁹ Com je' co Jesús anajty yaj'ixpicy nej tüg huidibi cötujcin müid, ca' yjadu'nity nej je escribas ajcxy.

8

Jesús yajtzögy tüg jibic nübützpa'mmüidpi

¹ Co Jesús oy chooni ma je cögop, chi ypagidaci mayjäy. ² Huin'it ñimiini tüg jäy jibic pützpa'mmüidpi. Chi ycojxtinay'ahuüy ma Jesús yhuinduu. Chi minañ: —Huindzin, pen m'a'ixiyy jébi xyajtzögyich.

³ Huin'it Jesús nīdooñ je jäy. Chi nimay:

—Ndzojcpyich, jébi mdzögy.

Co Jesús jadu'n nimay je pa'mjäy huin'ityi je ypützpa'm oy ytigooy. ⁴ Chi Jesús nimay:

—Ca' pin myajnimäy; nicx janchtiy ma je teedy. Minicx tüg huindzigi'ñ huidi Moisés y'ane'my. Huin'it jébi yi' jäy ajcxy ixipy co ti m'agidägy.

Jesús yajtzögy tüg capitán romano ymang

⁵ Co Jesús yja'ty jim Capernaum huin'it tüg capitán ñimiini e ycohuanüy.

⁶ Chi ñimaayi:

—Huindzin, jim iich tüg ndumbi ma iich ndijc huidi tim cöcnaayñip, ca' y'ocyücxni.

⁷ Chi Jesús minañ:

—Iich nicxy nyajtzögy.

⁸ Chi je capitán y'adzooy:

—Huindzin, ca'p iich n'oyjäyity, ca' yhuaadity mdigihuipy ma iich ndijc, jéyi müich nigoo capxy e ti anajty iich ndumbi chögy. ⁹ Iich nañ jadu'n ane'my n'ityich, e nañ nmüidich soldadtijc c'am. Co iich nimäy: “Nicx”, nicxp; e co iich nimäy: “Min”, mimb; e co n'ane'myich je nbödumbich huen tijaty tun, ytumyb.

¹⁰ Co Jesús jadu'n midooy, chi nigooobi ycijxy ycuejty. Chi ajcxy nimay huidi pahuidijtip:

—Janch tiy'ajt jadu'n nej nimaaygixy, ma Israeljäy ymiñ, ca' jadu'n ti nbaadyich huidi oy mibicy jadu'n nej jadyaabi yëydijc. ¹¹ Iich jadu'n nimaayb co mayjäy oy miinaangixy xüpidzim'y'amy xücidägy'amy, chi ixtäga'ñ quipxy müid Abraham, Isaac etz Jacob jüby ma Dios y'ane'min. ¹² Je judiojäy huidibi ixipy ajcxy jébi yjatzinäy jüby tzajpjoty, je' ajcxy nicxam agootztuuby, jüby ajcxy yjihuipy yäxipy etz y'äztmúcixpy ytüitzqueedipy.

¹³ Huin'it Jesús nimay je capitán:

—Nicx ma mdijc. Jadu'n nej müich xymibicyich, ti iich yam nguyduñ.

Chi je tumbi oy chögy tim huin'it hora.

Jesús yajtzögy Pedro ymüd töxyjäybi

¹⁴ Chi Jesús ñicxy ma Pedro ytijc. Chi ijxy je Pedro ymüd co jim cijx'am ycoñnäy müid je toyba'm. ¹⁵ Co Jesús cññxajy huin'it je toyba'm ñajxy. Chi pidígy. Chi mic'amy ni'ixñy je caayin uucin.

Jesús yajtzögy mayba'mjäy

¹⁶ Co oy chu'ñyñi ycoodzyñi huin'it yajmimiñ ma Jesús may je huidi ca'oybi müid. E müid yi' y'ayuc yjéda'ajty ypidzimday je ca'oybi, e huin'it tüg'ócxy je pa'mjäy chooctay. ¹⁷ Jadayaabi je' ytuni yjajti jigix yajcuyduñ jadu'n nej je profeta Isaías mñañ: "Yi' ci'm ajt nyuu nba'm ti xayjzooctayim etz yi pijcin ixin ti yajñicxtäy."

Je pinjaty anajty panixcam Jesús

¹⁸ Co Jesús ijxy janch mayjäy anajty ti yjübigíyii, chi ñimay co huen nájxcixy jim'amy mejy ññaxy. ¹⁹ Huin'it ñimiini tüg escriba. Chi ñimay:

—Huindzin, nbanixamybich müich oy janch tim ma'amy ma anajty mñicxy.

²⁰ Chi Jesús y'adzooy:

—Je huaax ymüd je' ajcxy yjut, e je joon ymüd je' ajcxy ype'ñ. Per ñich, je jäy huidibi tzoon jilby tzajpjoty, ca' nmüdidyich ma nmähuibich ma nbócxibich.

²¹ E jadügpí ydiscípulo ymñañ:

—Huindzin, nicx jayijp ndeedyich n'ocyajnaaxtigíyich huin'it nbanixcip.

²² Huin'it Jesús y'adzooy:

—Pamiingich, ixmajtzcix yi öcpi huen ymü'öcpi yajnaaxtigíyii.

Jesús jijpcogapxy je micpoj etz je mejy co anajty ooy ypidígy

²³ Huin'it Jesús oy ybarcotigíyñi. Chi ypadzooni je ydiscípulos ajcxy.

²⁴ E jim anajty ytüöy mejyhuingíxy, huin'it mic poj ñaymibidzimi. Janch mic y'ocpidíchni je mejy jigo jigo je barco cayajñidigoy, pero Jesús anajty chachmaab. ²⁵ Huin'it oy ymígapxyii yajmäybídígíyii je' ydiscípulos ajcxy. Chi ñimaayi:

—¡Huindzin, ocyajtzooqich ajcxy! ¡Cheeby ñich ajt n'ocquiniñ!

²⁶ Huin'it Jesús y'adzooy:

—¿Na'amy co mdzachtzigíyigixni? ¡Müich ajcxy hueeni müidity mibijcin!

Huin'it Jesús ypidígy. Chi mígapxy je poj etz je mejy. Huin'it je mejy etz je poj yhua'cxijptay. ²⁷ E je' ydiscípulos ajcxy nigooobi y'occix y'occuejtni chachmínaangixy:

—¿Pin yëydijc jada jada', co je mejy je poj ti ycapxymídooyii?

Je Gadara jäy ajcxy huidibi anajty ca'oybi müid

²⁸ Co Jesús yja'ty ma yi ñiba' ma yi Gadara ñaax ycajp, chi metz yëydijc, huidi anajty ca'oybi müid oy yjijpcoyöyíyii anajty ajcxy, ti choon ma je öcpi jut. Yi jäy ajcxy ooy janch ahua'n, e ca' anajty huaad jim ni pin ñaxy ma je tü'aa. ²⁹ E co anajty Jesús jim ñaxy huin'it janch ahua'n ymígapxqueeci:

—¿Ti müich mdunamyb müid ñich ajcxy, Jesús, müich Dios y'ung? ¿Nej ti mmiñ jayijp co xyhaachytüngixich ma ca'ni xii tiempo paady?

³⁰ Jiguem ma anajty ajcxy je' yajpaady jim anajty may'idzim y'ocjicxy. ³¹ Chi je ca'oybi ymñañ:

—Pen miich xyajpidzim ñich ajcxy, xyaj'adigñygixy xyajjottigñygixy yi may'idzim.

³² Chi Jesús ñimay yi' ajcxy:

—Ñicxcix.

Huin'it ñihuaatzje je yëdyjc je ca'oybi. Chi oy ytigñygixy je ca'oybi ma je idzim. Huin'it je idzim oy ñigöbooyctäy. Jüby ajcxy yjicxtäy.

³³ E je jäy ajcxy huidibi anajty idzim ycuend'ajtp, huin'it ajcxy yqueegy müid je tzig'iñ. Chi co ajcxy yja'ty cajpjoty, huin'it ajcxy ytigñy miydaacpi jadu'n nej anajty ti ytuñyii ti yjadyii. ³⁴ E huin'it chonday je mayjäy ma je cajp. Chi ajcxy ninicxy je Jesús. E co ajcxy ijxpaty, huin'it ajcxy cohuanñy co huen pidzimni ma je naax je cajp.

9

Jesús yajtzögy tüg jäy cämätpi tecymätpi

¹ Chi Jesús ybarcitiñy. Chi ñicxy jim'amy mejyñaxy. Chi oyjäty ma yci'mgajp. ² E jim yajmimiñ tüg yëdyjc huidibi anajty cämät tecymät. Yajcñy ymiñ ma'ndzaayjoty. E co Jesús ijxy co ymüid je mibijcin, chi ñimay je pa'mjäy:

—Jotcugi' miich, ti je mbocy nhuinmeecxyich.

³ Huin'it nijëjty je escribas ajcxy, je ley yhuindzin, jot'ajti: “Jadayaabi yëdyjc capxtigooyb yi' ma Dios co jadu'n yminañ.” ⁴ Com Jesús ñejhuñy jadu'n nej anajty ajcxy je jäy tzachjot'ajtigixy, chi ajcxy ñimay:

—¿Nej co ajcxy jibic mdzachjot'ajtigixy jotjoty huinma'ñyjoty? ⁵ ¿Huidibi ca' chipity, co nminá'ñibich: “Ti yi mbocy nhuinmeecxich”, o co nminá'ñibich: “Pidig etz tüyöy”? ⁶ Ich ndzojpcyich co miich ajcxy mhuinjihuiñy co ñich ti ndzoñich tzajpjoty e paady nmüidich je cötujcin ya naaxhuiñ e jëbi nhuinméexibich pocyjäy ajcxy.

Huin'it Jesús ñimay je cämätpi tecymätpi:

—Pidig, huijtzig yi mdögy etz nicxni ma mdijc.

⁷ Chi je cämätpi tecymätpi ypidigy. Chi ñicxy ma ytijc. ⁸ E co je mayjäy jadu'n ijxy, huin'it ajcxy ooy jihuiñy huinmay. Chi ajcxy ooy ojadaty yi Dios co anajty ti yecy je mic'ajtin ma mayjäy.

Jesús ñimay Mateo: “Pajamgich”

⁹ Co Jesús oy chooni jim, huin'it ijxy tüg yëdyjc, yxi Mateo, huidibi anajty iñaayb ma yajcogüejttac. Chi ñimay:

—Pajamgich.

Huin'it Mateo ytinayigy. Chi panicxy Jesús.

¹⁰ Jadu'n ytuni yjajti co Jesús jim ycaay ma Mateo ytijc, e may ñañ jadu'n ymiñ yajcogüejtpidijc etz pocyjäydyjc. Chi ajcxy jim tú'ciy y'ixtactay müid Jesús etz müid yi' ydiscipulos. ¹¹ Co je fariseos jadu'n ijxy ajcxy, chi ñimay ajcxy je' ydiscipulos:

—¿Na'amy co yi mHuindzin ycaymucy müid je yajcogüejtpidijc je pocyjäydyjc?

¹² Co Jesús jadu'n midooy huin'it ñimay ajcxy:

—Ca' yajmayjaty tzozydumbi huidi ca' ajcxy ypigyii, jëyi huidi ajcxy pijcip.

¹³ Nicx ixpijccxy nej ymiñ jaaybety ma Dios ñecy: “Ich ndzojpcyich co miich ajcxy müid'adipy je pa'ayo'n, ca'ydí co myajhuindzigñy tijaty iyujc.” Ca' ñich ti nmüñich ma je jäy ajcxy huidibi ca' pocy müidity. Ich ti nmüñich müid yi pocyjäy ycxipi co huen jothuimbijttaaygixy ma Dios.

Amidoogixy Jesús mïid je' ycixpi co jaygay y'ijtcixy

¹⁴ Huin'it ajcxy ymiñ Juan ydiscípulos ma Jesús. Chi je ajcxy nimay Jesús:
—¿Na'amy co ñich ajcxy etz fariseo ajcxy ayuu'ijtcixy, e yi' ajcxy huidibi xymïidhuidijtp ca' ajcxy ayuu'ijtcixy?

¹⁵ Huin'it Jesús y'adzooy:

—¿Nej jëbi yaj'ayuu'aty jây ajcxy huidi yajpaatpi ma je pijcpi yajnixïduñyi, pen quipxyi yam yajpaady mïid je huidibi pijcp? Minamb je xii je tiempo mina je pijcpi yajtzonïyb, huin'it janchtiy ajcxy jëbi y'ayuu'ajtcixy.

¹⁶ Ni pin tue huit ca' agiyïy mïid tûg pedas jemyhuit, com nïgi je tue huit ñajtzïidziy, chi nïgi o'ctiy yajtñi. ¹⁷ Ca' pin pidägy vino nïi ma tuepi cochac, ycïidzip je', e tûg'óciy anajty ti y'ayoodäy je vino nïi mïid ñigochac. Pidägy ay ajcxy jemy vino ma jemy cochac, chi jadu'n ca' ayoohuipy je vino, ni huindigoyipy je cochac.

Je Jairo ñïx, etz je töxyjäy huidibi Jesús yhuitt nïdoni

¹⁸ Ma anajty Jesús jim ycapxy ymïydägy huin'it ymiñ tûg mijjäy. Chi ñaygojtinay'ahuy ma Jesús yhuinduu. Chi yminañ:

—Nnïxich ti y'ögy. Nicx ma ñich ndïjc etz mgïnixajipy, jugypigipy ya.

¹⁹ Huin'it Jesús ypidägy. Chi ñicxy mïid je ydiscípulos ajcxy. ²⁰ Ma anajty ajcxy jim ytüyöy huin'it ymiñ jixci'py'amy tûg töxyjäy huidi yxi ybo' ti m'ijtiyñi majmetz jimijt. Chi nïdoni Jesús yhuitpa'. Huin'it ñajxy je' ypa'm. ²¹⁻²² Jadu'n anajty ti yjot'adyii: “Oy Jesús jëda'ajty yhuitpa' nnïdónibich, ti ñich anajty n'agidäyigich.” Huin'it Jesús yhuac-huimbijty. Chi huindicxpejty je töxyjäy. Chi nimay:

—Jotcujc'at miich, ti m'agidägy jigix co xymibicyich.

E tim huin'it hora oychoögy je pa'mjäy. ²³ Chi Jesús oy yjaty ma je mijjäy ytijc. Chi ijxy je xuuxpidijc mïid je ymïgütijc ajcxy huidi chachyaaxcixy co anajty ti y'ögy je töxy'anäg. ²⁴ Huin'it Jesús nimay ajcxy:

—Queccix ya, yi pi'ctöxy'anäg ca' yi' ti y'ögy. Hue' yi' maab.

Huin'it ajcxy nigo nixiicy yajxiicy Jesús. ²⁵ Co anajty je jây ti ixquejxtäy, chi Jesús ytijctigïy ma anajty je töxy'anäg huijtznäy. Chi majch ma yci'. Chi ypidigy. ²⁶ Chi je jây oy yajnejhuïydaayni ma je jimbi naax cajp nej anajty ti ytuñyi ti yjadyii.

Jesús yajtzögy metz jây huintzpi

²⁷ Ma anajty jim ti choñ huin'it metz jây huintzpi ypamiini. Chachñimäyii jadu'n:

—iPa'ayoogich ajcxy, miich David y'ap y'oc!

²⁸ Chi Jesús yajpajaty ma anajty ti yjättägy. Co ytigïy tigoty, chi Jesús yajtiy:

—¿Nej mmibijcpi miich ajcxy co jëbi nyajhuindicxïccixy?

Huin'it je' ajcxy y'adzooy:

—Mibijcy ñich ajcxy, Huindzin.

²⁹ Huin'it Jesús nïdoni je jây ajcxy huintzpi ma yhuin. Chi nimay ajcxy:

—Jadu'n nej miich ajcxy mmibicy, jadu'n ytunïb yjadïb.

³⁰ Chi je' ajcxy y'ijxïgy. Huin'it Jesús y'ane'min pidacy:

—Ca' huaad pin myajnejhuïygyxy.

³¹ Co je' ajcxy ñicxni, chi ajcxy ooy nigapxy nimïydacy co Jesús anajty ti yaj'ijxïcgixy.

Jesús yajtzögy tûg jây uumbi

³² Co anajty je' jim ti chongixy, huin'it ajcxy mimiñ ma Jesús tüg yëdyjc huídibi uum huídibi anajty ca'oybi müd. ³³ E co Jesús yajpidzimy je ca'oybi, chi je mayjäy ooy ycixy ycuejty ajcxy. Chi ajcxy minaangixy:

—Ni camina jadu'n ycayaj'ixy ya ma jada Israel naax cajp.

³⁴ Per je fariseos jadu'n yminaangixy co Jesús je' müd je ca'oybi ymic'ajt yajpidzimy ca'oybi ma jäy.

Jesús ymüid pa'ayo'n ma mayjäy

³⁵ Jesús jadu'n yhuídijty cajp cajp yaj'ixpijcy majaty tzajptijc. Yajhuin-gapxïy je jäy Dios y'ayuc. Etz nañ jadu'n yaj'agidacy huen ytim huídidi yuu huen ytim huídidi pa'mity. ³⁶ Co Jesús jadu'n ijxy je mayjäy, chi oy pa'ayooni co yi' ajcxy ca' müidity ni pin huídibi jëbi ñajtzcapxïy Dios y'ane'min. Yi' ajcxy jadu'n yajpatp nej cöbixy huídidi ca müidity cuend'ajtpi. Ca' nejhuiyigixy pin y'ane'mip e pin ypanicxip. ³⁷ Huin'it Jesús nimay yi' ydiscipulos ajcxy:

—Tiy'ajt yi', janch mij je tung e hueeni je tumbidijc. ³⁸ Paady pijctzou miich ajcxy ma Dios co huen quexy tumbidijc ma yi' ytung.

10

Jesús huin'ixy je majmetz ydiscipulos

¹ Huin'it Jesús huoy je nimajmetz discipulos. Chi moy ajcxy cötujcin jëbi huaad yajñihuäch je huídidi ca'oybi müd. Etz nañ jadu'n yaj'agidägiç huen ytim huídidi yuu huen ytim huídidi pa'mity.

² Jada je' je nimajmetzp yxñ: Simón, huídidi nañ jadu'n yajtijp Pedro, etz ymiguëx Andrés; Jacobo etz y'uch Juan, Zebedeo ymang; ³ Felipe, Bartolomé, Tomás, Mateo, je yajcogüejtpi; Jacobo, Alfeo ymang; Lebeo, huídidi nañ jadu'n yajtijp Tadeo; ⁴ Simón, je cananista; e Judas Iscariote, je huídidi yçieyjc Jesús agojix.

Jesús quejxy je' ydiscipulos ajcxy ayuccapxhuäcxi

⁵ Chi Jesús quejxy yi' nimajmetzpi, e jadu'n najtzcapxiy ajcxy:

—Ca' ajcxy mnicxipy ma je naax cajp ma ajcxy je jäy chinäy huídibi ca' ajcxy Israeljäyity. Ni mgatigihuiipy ajcxy ma Samaria naax cajp. ⁶ Nigi jac'oy co ajcxy mnicxipy ma je Israeljäy huídibi ca' nejhuiy huídibi ca' paduñ Dios ytiy'ajtín. ⁷ Nicx miich ajcxy capxhuäch Dios y'ayuc co ti yhuingoni Dios y'ane'min. ⁸ Yaj'agidaaccixy yuujäy pa'mjäy huídijaty pützpa'm ymüid. Myajjugypijccixy tiibi ögy. Myajñihuädzip huídidi ca'oybi ymüid. Ninigoobi miich jada cötujcin ti myajmooygixy, nañ ninigoobi yejccixy.

⁹ Ca' ni ti meeñ mminicxcixy. ¹⁰ Ca' mbijty mminicxcixy tü'amgixpi. Mminicxcixy jëda'ajty yi' mhuit huídidi müd ma mminicx. Ni mgaminicxip huingbi mgig etz mdajc; com ycopicity co je cajpjäy xyajcáaygixipy xyaj'uuccixipy miich ajcxy.

¹¹ Co anajty mjäty miich ajcxy ma tüg cajp nidiu yajtiu pinjäy jim tudäcyip. Jim ajcxy mhui'mipy ma je' ytijc ixti cooni ajcxy mdzoonip. ¹² Co anajty miich ajcxy mdigiy tigoty huin'it mgapxpócxixipy je codijc jadu'n nej tzocy. ¹³ E pen je codijc ymihuaad'ajtpy, yejccixy jim übocxin capxpooxin. E pen je jäy ca' ytudägyity, ñaadigi'adip huídidi anajty ti mgapxcixy. ¹⁴ E pen ca' pin xycöbigaangixy, e ni pin xycamidohuaani ajcxy m'ayuc, pidzimgix jim ma je tijc o ma je cajp. Chi ajcxy mdocy huinnebipy, je' je' je tiy'ajt co ca' miich ajcxy ti pocy müidity. ¹⁵ Janch tiy'ajt jadu'n nej nimaaygixy co anajty je xñ tiempo paady ma anajty yajtiyduna'ñ je naaxhuiñjäy, jac nigi yajtzaachytuna'ñ yi'

ajcxy ca'ydi yi jäy ajcxy huídibi tzinaayb ma Sodoma cajp etz ma Gomorra cajp.

Ixhuídijtín pahuídijtín

¹⁶ ¡Ocmídoogix! Hich yam miich ajcxy nguexyp majaty yi jäy huídi jibic-huinma'n mñid. Jadu'n nipaady nej ñich nguexyich cóbixy ma je lobi. Huijy cujc ajcxy mnaypidägiib jadu'n nej tza'n, per yung naxy jadu'n nej muuxy. ¹⁷ Mnayguend'adüib ajcxy je' co yi jäy ajcxy xyciyegaangixy ma ajcxy mijtungmñidpi etz myajhuobaangixy ma je judiojäy ajcxy ñaymujctac, ¹⁸ ixti xyajnicxaangixy ajcxy ma je gobernador etz je reydiyc ajcxy mñid ñich ycxipi; e jim ñich miich ajcxy xyñigapxipy ma je jäy ajcxy yhuinduu, e nañ jadu'n majaty anajty je jäy ajcxy huídibi ca' yjudiojäyity. ¹⁹ Co anajty ajcxy xyajc'idigiy je mijtungmñidpi, ca' ajcxy oy mhuinmaayipy nej m'ocnimähuiipy. Co anajty paady je tiempo, huin'it ñich miich ajcxy myajnimähuiipy nej ajcxy mgapxipy. ²⁰ E je ayuc huídibi miich anajty ajcxy mgapxpy, ca' miich anajty je' ajcxy m'ayuc'ajtigixy, je Dios Teedy anajty yjihui'n, je Espíritu Santo, xyajcapxp miich ajcxy.

²¹ Huin'it yi jäy ajcxy ñaygyegáanigixy miñ xyipy tüg quextijc co huen yaj'ögyii. E je ungedeedy ciyega'n y'ung; je ung'anäg mibidiga'n je ytaj yteedy etz yaj'ócip ajcxy. ²² Tüg'óciy je jäy ajcxy ca' ajcxy xy'ix'anipy xychoga' nipy mñid ñich nxi ycxipi. E pin xymibijcpich amumdügiot ixti mabaad y'ögy, yi' ajcxy y'alma tzögipy. ²³ E co anajty miich ajcxy jäy xy'ixhuidity xypahuidity ma tüg cajp, nicxcix ma huingibi cajp. Janch tiy'ajt jadu'n nej nimaaygixy co ca'ni anajty mgapxhuäcxtäy ayuc tiy'ajt ma tüg'óciy je Israelcajp co nhuim-bidipyich, ñich, je jäy huídibi tzoön tzajpjoty.

²⁴ Tüg yaj'ixpijcpí jac nigi mij'ajtin mñidity ca'ydi je huídi ixpijcp, e tüg huindzin jac nigi mij'ajtin mñidity ca'ydi je' ytumbi. ²⁵ Jéb jotcuyc idipy je discípulo co jadu'n yajpaadipy jadu'n nej yhuindzin, e je tumbi jotcuyc idipy nej yhuindzin. Pen jäy minamb co ñich nmñidich ca'oybi, jac nigi ymina'nañ co miich ajcxy mñidity.

Pin jëbi yajtzigiy

²⁶ Ca' ajcxy mdzigiy yi jäy ajcxy. Ca' ji ni ti yüch ity nicx ycanigüexigy; nañ ni ti ji ycayajtuñ ayüch ameech nicx ycayajnejhuíy. ²⁷ Huídi ñich miich ajcxy ayüch nyajnimaaayb, capxpidzimgix miich yi' mayjäyjoty, e huídi ajcxy midooyb ameech, capxpidzimgix miich yi' mic ma tüg cógop. ²⁸ Ca' ajcxy mdzigihuip je jäy huídib ninícx yaj'öcp etz ca' huaad yi' ajcxy yaj'ögy je alma. Yi' miich ajcxy mdzigiygixy je Dios huídib pidacp je alma etz je ninícx mijjinjoty.

²⁹ ¿Nej ca' jäy ajcxy toogy metz pi'cjoon mñid tügpi pi'cmeeni? Per ca' ni tüg huaad ycäy naaxhuiñ, pen ca' tzocy je mDios Teedy huídi jüby tzajpjoty. ³⁰ Miich ajcxy mgöhuay ac michoy yi'. ³¹ Paady miich ajcxy ca' mdzigihuipy, jac nigi miich ajcxy mdzoubaady ca'ydi je joon.

Pinjaty ca'p midzöydu'n Jesucristo mayjäyjoty

³² Yi' jäy ajcxy huídi xymibijcpich etz xyñidiy'ajtyich ma jäy yhuinduu, nañ jadu'n ñich yi' nidiy'ajtyich ma ñich nDeedy huídibi jüby tzajpjoty. ³³ Per je jäy ajcxy huídi ñich xycoyützpich ma mayjäy ajcxy yhuinduu, nañ jadu'n yi' ngoyützip ma ñich nDeedy yhuinduu huídibi jüby tzajpjoty.

Mñid Jesús ycxipi yijity naymidzip'adi

³⁴ Ca' miich ajcxy mhuinmay co ñich ya ti nmiñich miid co nmöhuaangixy jotcujc'ajtín ya naaxhuiñ. ³⁵ ñich ti nmiñich co nyajtziptunipyich jáy miid yteedy; töxyjäy miid ytaj etz xecy miid yxecy. ³⁶ E jadu'n miich ajcxy mdzip'adiyb mgi'mjuugy mgi'mmigü.

³⁷ Yi jáy ajcxy huidibi tzojcp ytaj yteedy jac nigi ca'ydi ñich, ca' yi' ypaadyii co njáy'adiybich; e pin ymang o ñix tzojcp nigi ca'ydi ñich, ca' ypaadyii co njáy'adiybich; ³⁸ e pin ca' yci'mdzocin y'ijxmajztáy etz ca' ñaybidágyii ycixjot huinjot ma ñich, ca' mihuaadity nicx njáy'adiybich. ³⁹ Pin yjugy'ajtín najtzt-zogiyb, yajtigoyipy yi'; e pin yjugy'ajtín tigooyb miid ñich ycixpi, ypaadipy jugy'ajtín huinixi tzajpjoty.

Premio nganar'ajtim

⁴⁰ Pin miich ajcxy xycöbijcp, ñich yi' anajty xycöbijcp; e pin ñich anajty xycöbijcp, nañ ycöbijcypy anajty je huidibi ñich ti xyquejxyich ya naaxhuiñ. ⁴¹ Je huidibi cöbijcp je jáy huidibi Dios y'ayuc capxhuacxip, je' co yi' ymiñ miid Dios ycixpi, yi' jadu'mbi je oy'ajtín ypaadipy. Nañ jadu'n je huidi cöbijcp je oybi jáy miid co oy yjäyity, yi' jadu'mbi oy'ajtín ypaadipy. ⁴² Je huidi yaj'ucp tüg vaso ñi ma huenyimpinjáy miid co xymibicyich, janch ñich miich nimaagyixy, ypaadipy oy'ajtín.

11

Juan je Bautista yquexyöybi

¹ E co Jesús anajty ti najtzcapyidáy je tiyy'ajt ma je nimajmetzpi ydiscípulos ajcxy, chi Jesús ñicxy yaj'ixpijcp etz ayuccapxhuäcxp majaty cajp huinduy agonbi.

² E Juan je Bautista hue' je' anajty yajpaady pujxtigoty. E co nejhuiy tijaty mijhuinma'ñ anajty Jesús ytumyib, chi quejxy metz je' ydiscípulos ajcxy ma Jesús yajpaady. ³ Chi Juan ydiscípulos ajcxy y'amidooy Jesús:

—¿Nej miich je' je Cristo huidibi anajty minamb o jébi ñich ajcxy huingbi n'ahuixcixy?

⁴ Chi Jesús y'adzooy:

—Ñicxcix miich ajcxy nimaagyix yi Juan, je Bautista, tijaty miich ajcxy m'ixpy mmidooyb co ndumyibich. ⁵ Miich ajcxy yajm'idmiydäg je Juan, jadu'n nej je huintzpi nyajhuindicxigiyich; je címät tecymät nyajtzoocypich; je huidibi jibic nibützpa'm ymiid nyajtzoocypich; je' ajcxy huidibi cönat nyajmidohuicpyich; je öcpi ajcxy nyajjugypijcypich; etz je ayoobtjc, je huidibi yung naxy yjothuinma'ñ nyajm'idmiydacypich Dios y'ayuc. ⁶ Jotcujc yi' ajcxy pinjaty xymibijcypich amumdügjot etz ca' ni nej yjotmetzci' miid ñich.

⁷ Co Juan je Bautista ydiscípulos ajcxy ñicxni, chi Jesús ytigüy nimiydaccoty Juan je Bautista ytung ma je mayjäy, chi yminañ:

—¿Ti miich ajcxy oy m'ixy jim mijtigüduum? ¿Tüg nähuaax huidibi poj xijpi?

⁸ ¿Ti ajcxy oy m'ixy? ¿Ti oy m'ixy, tüg jáy huidibi ooy y'oyxöxyity? ⁹ ¿Ti miich ajcxy oy m'ixy? ¿Nej ti m'ixy tüg Dios y'ayucnajtzcaxiybi? Janch co ti m'ixcixy tüg jáy jac maj ca'ydi tüg Dios y'ayucnajtzcaxiybi. ¹⁰ Je' jada je jáy huidibi Dios nigapxy ma ñecy co Dios jadu'n yminañ:

Cham nguexyich ñich nguexyöyp jayijp ma miich. Je' yaj'oyihuij je jáy yjot yhuinma'ñ miid ñich ycixpi, tim jadu'n nipaady nej jihuiy jáy tü'aa yaj'oyiy co rey ymiinañ.

11 Co yi jāy ajcxy huídibi ti chinaaygixy ixti chambaad ni pín ti ca' yajpaady mij jadu'n nej Juan je Bautista; per pínjaty ìich xymìbijcp, yí' jac mij naxam ma Dios y'ane'my ca'ydi Juan.

12 Maabi Juan je Bautista ytundigíy, ixti chamni janch mayjäy amumdügiot ñejhuíhua'ñ Dios y'ayuc, je' co ajcxy ytigíhua'ñ ma Dios y'ane'my. 13 Tüg'óciy ajcxy je Dios y'ayucnajtzcaxíybi etz Moisés ycotujcin ñigapxy ajcxy je ane'min ixti cooni Juan oy ymiñ. 14 Pen miich ajcxy mibijcxy Moisés ycotujcin etz Dios y'ayucnajtzcaxíybi ajcxy, Juan je Bautista je' je' je Elías huídibi anajty miinamb. 15 Pínjaty mido'n miid huen mido'mbigípy ìich n'ayuc.

16 Jesús yjacmínañ:

—¿Pín miid n'ocyajtügíhuíbyich yi jāy huídi ajcxy cham tzinaayb? Tim jadu'n yí' ajcxy nej pí'ctíjc huídibi ajcxy iyíy ma mayjäy yjuygixy ytooccixy, miyaaxcixy midinaaygixy ymígügtíjc: 17 “Ti njayajxüxyich flauta e ni ca' ti m'ejtzcixy; ti ìich ajcxy ócpi njahuinyáxich, e miich ajcxy ca' ti myáxy.” 18 Chi Juan, je Bautista, anajty miin, e je' ca' yca'y'ügy. E miich ajcxy mínaangixy co Juan ca'oybi ymiidíty. Jada pí'c'anáctíjc nipaady nej miich ajcxy. 19 Chi ìich je' je jāy huídibi tzoon tzajpjoty nmiñich, e caaybich uucpich, e miich ajcxy mínaangixy: “Ijxcix, cha tüg yéydíjc, janch cax janch vino'ucp huídibi mígü'ajtpy yajcuetpidíjc etz pocyjäydíjc.” Je Dios tíy'ajt jí je' ñiguéxígy.

Je cajn huídibi ca'ycapxymidoogixy

20 Chi Jesús ojcoty je maygajpjäy ma anajty may mijhuinma'ñ ti tuñ, com je mayjäy ca' anajty yjothuimbidaangixy ma Dios. Chi Jesús ymínañ:

21 —¡Ay miich ayoob ajcxy huídibi tzinaayb jim Corazín! ¡Ay miich ayoob ajcxy huídibi tzinaayb jim Betsaida! Co ixypy ìich ti nduñich jecy'ajty je mijhuinma'ñ mijtzög'ajtin ma je Tiro etz Sidón cajn, jadu'n nej ìich ti nduñich ma miich ajcxy, ti ixypy je Tiro jāy etz Sidón jāy nijothuimbijtcixy etz ñaaygixy saco ñjen ñicuyjam ixcuyjam, je' je tíy'ajt co ooy ytajcixy ymaygixy miid ypocy ycixpi. 22 Paady miich ajcxy yam nimaaygixy. Co anajty Dios tíyduna'ñ je naaxhuínybi jāy, huin'it miich ajcxy Dios xychaachytuna'ñ jac ñígi, ca'ydi je jāy ajcxy huídibi jecy'ajty tzinaay jim Tiro etz Sidón.

23 Miich ajcxy, Capernaum jāy, mnaybídáacigixy jadu'n nej jihuíy mdigíhuaangixy jíiby tzajpjoty. Per ca' yjadu'níty. Mdigíhuam miich ajcxy ayoodactuuby. Ayo'n tzaachypí mbadaangixy. Co ixypy ìich ti nduñich jecy'ajty je mijhuinma'ñ mijtzög'ajtin ma Sodoma cajn, jadu'n nej ti nduñich ma miich ajcxy mgajp, chambaad ixypy ity yi jadu'mbi cajn, ca' ixypy Dios cayajtígooy. 24 Paady ìich miich yam nimaaygixy. Co anajty Dios tíyduna'ñ je naaxhuínyjäy, huin'it miich ajcxy myajtzaachytuna'ñ jac ñígi, ca'ydi je jāy huídibi jecy'ajty tzinaay ma Sodoma ñaaxjot.

Mingíxy ma ìich e mbóocxcixípy

25 Chi Jesús ytigíy Dios mibíjctzooyb, ymínañ:

—Dios Teedy, ìich miich n'íibaatpich ngapxpaatpich. Miich miid je mij cötujcin jíiby tzajpjoty etz ya naaxhuíñ. Com miich ti mnajtzcaxíy yi m'ixpíjcín ma je ayoobtíjc huídibi tzinaayb jotxeemy, e ti myüch yi m'ixpíjcín ma yi xpicytíjc cohuinma'ñydíjc. 26 Jadu'n, Tat, ti mduñ, com jadu'n miich ti mdzocy ti mjäygidägy.

27 Jesús yjacmínañ:

—Íich nDeedy ti xyajcídígydäyich tüg'óciy mic'ajt oy'ajt. Ni pín ca' ijxcapy pín je' y'ung, jéyi nDeedyich tügpaic. Ni pín ca' ijxcapy pín je' nDeedy'ajtpyich,

jëyi ïich, je Dios y'ung tÿgpajc, etz jacjadyii huïdibi ïich, je Dios y'ung, nya-niguëxïgamyich. ²⁸ Min ma ïich nidÿg'ócïy miich ajcxy huïdijaty taj mayb myajpatp ma mjot mhuinma'n, ïich miich ajcxy nmòhuamyb jotcujc'ajtïn. ²⁹ Còbic miich ajcxy ïich n'ane'mïn ïich ngötujcïn, jadu'n nej huaj yuub ajcxy còbicy ycögï'. Ijxpïc ajcxy ïich ndïy'ajt etz cuydun ïich n'ayuc, com ïich nmïdich mecxtujcïn etz ca' ïich amïj agix nayjihuiyïijich. ³⁰ Ca' ïich n'ane'mïn ymicity, e ïich ndung ca' nimïjaajity.

12

Je discïpulos ajcxy moc cojc yajmujcp pocxxïduum

¹ Chi tÿg xïi Jesús yhuïdity mïd ymïgÿgtïjc ma tÿg camjot. E hue' anajty sábadò xïi, je poccxïn xïi. Chi Jesús ydiscïpulos ajcxy oy anajty yubògyii. Chi ajcxy ytigïy trigo tïim nïxajztutp etz yjïcxy ajcxy je ypajc. ² E co je fariseos ajcxy ijxy nej Jesús ydiscïpulos ajcxy y'idïtzcïxy, chi ajcxy nimay Jesús:

—Oc'ix nej miich mdiscïpulos ajcxy y'idïch. Hue' ajcxy tumyb huïdibi ca' huaad ma sábadò xïi yajtuñ.

³ Per Jesús mïnañ:

—¿Nej ca' miich ajcxy mgapxyñi ma Dios ñecy, jadu'n nej David etz ymïgÿgtïjc ajcxy idïch jecy'ajty co yubòccoti? ⁴ Pues yi' ajcxy tigïy ma Dios ytïjc. Chi cay ajcxy je tzajcaagy huïdibi anajty jây ajcxy ti yajhuindzïgïy Dios. Je' je tzajcaagy huïdibi teedy ajcxy anajty paatïp cayïpy. ⁵ ¿Nej ca' miich ajcxy ti mgapxyñi Moïsésc ycötujcïn necy co je teedy ajcxy jëbi ytuñ ma Dios ytïjc sábadò xïi, e ca' nan tundïgooyb je' ajcxy?

⁶ ïich miich ajcxy nïmaaygïxyp, jac nïgi mij cötÿjcin nmïdïdyïch, ca'ydi je cötÿjcin huïdibi je teedy ajcxy yajtuñ ma Dios ytïjc. ⁷ Pen miich ajcxy ti mhuinjïhuïy nej yhuimbïdzïmy jada Dios y'ayuc, co Dios jadu'n ymïnañ: “ïich ndzøjcpy co miich ajcxy mïd'idïpy pa'ayo'n ca'ydi co ajcxy myegïpy huïndzïgï'ñ.” Pen miich ajcxy ti mhuinjïhuïy jada ayuc, ca' ixyïpy mbocy'ixy ma ïich nmïgÿgtïjc huïdibi ca' ma ti ytundïgooy. ⁸ ïich, je jây huïdibi tzoon tzajpjoty, nmïdich ane'mïn, jaydëbi nïmâyïch je jây ajcxy ti jëbi tungïxy sábadò xïi.

Je yëdyjc huïdibi anajty ycïtïdzïp

⁹ Chi Jesús choñ jïm, ñïcxy ma je judïojây ñaymujctac. ¹⁰ E jïiby ma je naymujctac anajty tÿg yëdyjc huïdibi ycïtïtz. Je fariseo ajcxy xïhuamyb Jesús, paady ajcxy y'amïdooy, ymïnañ:

—¿Nej jëbi tÿg pa'mjäy chögy sábadò xïijï?

¹¹ Chi Jesús y'adzooy:

—Pen ya ma miich ajcxy ji tÿg jây huïdibi còbïxy jÿtccögäy sábadò xïi, ¿nej ca' je' nïcxy yajpidzïmy mïc'amy? ¹² Nïgi tzoabaatp tÿg yëdyjc ca'ydi tÿg còbïxy, paady Moïsésc ycötujcïn ca' capx'aducy co tÿg oy'ajtïn nduunïm sábadò xïi, je poccxïn xïi.

¹³ Chi Jesús nimay je yëdyjc:

—Xajtiu yi mgi'.

¹⁴ Co xajtiy yci', chi choocy, e huï'my quïpxyjaty mïd je yci' oybi. Chi je fariseos ajcxy yjotmätccoty, yhuinma'n ixtaaygïxy ajcxy nej huaad Jesús ocyaj'o'ccïxy.

Tÿg ayucnajtzcaxïyïn mïd Jesús ycïxpi

- 15 E co Jesús nejhuiy nej yi' ajcxy yhuinma'n müidity, chi jim choñ. E ooy mayjä ypanicxi Jesús, Jesús yajtzoocpy anajty tüg'óciy pinjaty pa'm müid.
- 16 Jesús ane'my je pa'mjäy ajcxy co ca' huaad nigapxy nimiydägy co yi' je' je Cristo. 17 Jadu'n Jesús ane'my je pa'mjäy jigix ycixipy yca'pxipy je ayuc huídibi je profeta Isaías yjaay jecy'ajty, co Dios jadu'n ymíñañ:
- 18 Jada je' ñich ndumbi huídí ti nhuin'ixyich. Yi' ñich ooy ndzocycich njihuíyich etz ooy njotujcich müid yi'. ñich yi' nmóhuamybich ñich njihuí'ñ mic'ajt. Yi' capxhuäcxip ñich n'ayuc jadu'n nej ndzaachytuna'ñich naaxhuíñyäjy ajcxy müid ajcxy ypocycixpi.
- 19 Yi' ni ymigügtijc ca' oja'ñ, ni ycayäxa'ñ, ni ycatinähua'ñ, ni pin ca' midoohuipy ma cajp cujc.
- 20 Ca' yi' tzaachytuna'ñ ayoobitijc etz huídibi ayo'ndumb ijtp. Etz nañ ni ca' yajtigoya'ñ huídibi ayoobitijc yco'ögy'ungdijc yjijp'ixpy. Jadu'n nej jäy cayajhuindigoy tzajcapy huídí huídyip etz ni cayajpich je mecha huídibi uuxy uuxy tücxp. Ixti mabaad anajty yajcopicy y'ane'min tudägypi.
- 21 E yi' mayjäy ooy yjijp'ixa'ñyii.

X'igixy Jesús co müidity mujcu' ymic'ajt

22 Chi müid miñ ajcxy ma Jesús tüg jäy huídibi huintzip etz uum. Je' anajty müid ca'oybi. Chi Jesús yajtzoogy, e chi y'ixxigy etz ycapxigy. 23 Co Jesús jadu'n tuñ, chi je mayjäy ytigíy huinmay'ahuídijt, chi ajcxy ymíñañ:

—¿Nej jada je', je David y'ap y'oc huídibi rey'adam?

24 Per co je fariseos ajcxy nejhuiy nej je jäy huinmay, chi ajcxy ymíñañ:

—Jadaabi yédyjc yajpidzimy ca'oybi müid je mujcu' huindzin ymic'ajt (ca' yi' yjéjity je Cristo).

25 Per Jesús ñejhuíyib anajty ti je fariseos ajcxy yhuinmaayb, chi ymíñañ:

—Pen tügpicy tungmüidpi ixipy ñaybijc-huäcxigixy, etz ñaymidziptzóonigixy ixipy ac jéyi, pues cixipy yi' ajcxy y'ane'min. Pen tüg cajp o tügpicy jugymigüg ixipy ñaybijc-huäcxigixy, pues ca' ajcxy y'idaangixy tügmucy. 26 Pen Satanás, je ca'oybi huindzin, yajpidzimy ixipy ca'oybi ma je jäy ajcxy, chi ci'm ixipy je ca'oybi ti ñaybijc-huäcxigixy, e je Satanás ymic'ajt ca' y'ida'ñ. 27 Miich ajcxy minamb co ñich nyajpidzimyich ca'oybi müid je ca'oybi huindzin, je Beelzebú ymic'ajt. Pen tiy'ajt jadu'n nej miich ajcxy mína'ñ, je jäy ajcxy huídibi xymijnicxpejt miich ajcxy, ¿nej yi' ajcxy paady mic'ajt ma je mujcu' co ajcxy yajpidzimy ca'oybi ma je pa'm jäy? Pues ca', paady yi' ajcxy tiy'ajt yejcp co miich ajcxy ti mgapxtigoy co ymínaangixy co ñich nyajpidzimyich ca'oybi müid Satanás ymic'ajt. 28 Per ñich nyajpidzimyich ca'oybi ma pa'mjäy müid Dios yjihui'ñ ymic'ajt. Paady miich ajcxy nejhuiyib co ti ymiñ yjaty je Dios y'ane'min ma miich ajcxy.

29 (Dios ycötujcin jac mic ca'ydi je ca'oybi ycötujcin, paady jébi nyajpidzimyich ca'oybi.) ¿Nej jébi tüg jäy ytigíy ma tüg micpi jäy ytijc etz pigaani tijaty yi' ymiid, pen ca' jayijp yci' ytecy xojtzity? Pues ca'. Cooni jayijp yci' ytecy xojtzity, huin'it jéb pijcip tijaty ymüid. 30 Pinjaty ca' xymijnicxpeyiche, xymidzipich yi'. Pinjaty ca' tuñ müid ñich co jäy nyaj'ixpicyich, hue' je' ajcxy jäy yajhuinma'ñyigooyb.

31 Janch ñich miich ajcxy nimäy co Dios jébi huinmecxip tüg'óciy pocy huídibi jäy ytungixp etz tüg'óciy jibicpi huídibi jäy ycapxcixp. Jéyi janchtiy co pinjaty capxtigooyb müid je Espíritu Santo, je Dios yjihui'ñ ymic'ajt, ca' Dios

huinmecxp̄ nimina. ³² Pinjaty jibic xyñigapxp̄ich xyñimiydacp̄ich, je' huinmecxam. Per je huidibi jibic ñigapxy je Esp̄ritu Santo, je' ca' huinmecxa'ñ ni jadachambi tiempo, etz ni camina x̄i.

Yi quipy yi' yt̄im yi' m̄id yaj'ijxcapy

³³ Pen miich ajcxy mnejhuñhuamy je quipy pen oy quipy, o pen ca', jēbi mnejhuñhuipy co je quipy ñicxy yt̄im'aty. Pen oy je yt̄im, miich m̄ina'ñip co oy je quipy. E pen ca' oy yt̄im'aty, huin'it miich ajcxy m̄ina'ñip co ca' y'oyity je quipy. ³⁴ Jibic jāy miich ajcxy, jadu'n nipaady nej jihuñy ahua'n iyujc xy'ung'ajtp. Pen miich ajcxy jibic jāy'ajtp, ζnej jēbi miich ajcxy oybi ayuc mgapx̄ipy? Jadu'n nej jāy ajcxy yjot yhuinma'ñ m̄id̄ity, ac t̄im jadu'n ajcxy ycapxy. ³⁵ Je jāy huidibi oy ayuc ycapxy, ym̄id̄ oyjot oyhuinma'ñ paady oy ayuc capxy. Je jāy huidibi jibic ayuc capxp̄, ym̄id̄ jibic jot jibic huinma'ñ, paady jibic ayuc capxy. ³⁶ Ich miich ajcxy nimay co anajty paady je x̄i je tiempo m̄ina Dios tiyduna'ñ je naaxhuñj̄yāy, huin'it ajcxy y'adzohuipy m̄id̄ huen t̄im huidibi ayuc huidibi anajty ajcxy ti mgapxy. ³⁷ Com nejaty miich anajty ajcxy ti mgapxy je m'ayuc jadu'n miich ajcxy Dios xyt̄iydunip. Com m̄id̄ yi' m̄ḡi'm ayuc yi' m̄id̄ m'oybidzimipy mhuāt̄p̄id̄zimipy. E nañ jadu'n m̄id̄ yi' m̄ḡi'm ayuc yi' m̄id̄ mbocycāhuipy.

Jibicj̄ȳdj̄c ajcxy p̄jctzooḡy t̄uḡ ijxpejt m̄jhuinma'ñybi

³⁸ Chi nijējity fariseos ajcxy etz escribas ajcxy Jesús nimayi:

—Huindzin, n'ixamy ich ajcxy miich t̄uḡ m'ijxpejt.

³⁹ Chi Jesús y'adzooy:

—Yi jibic j̄ȳdj̄c ajcxy etz ajcxy huidibi ca' m̄ibiga'ñ Dios yp̄jctzooyb t̄uḡ ijxpejt huidibi tzomb tzajpjoty. Per Dios ca' yega'ñ jad̄uḡ ijxpejt. T̄i Dios yecy t̄uḡ ijxpejt ma Jonás. ⁴⁰ Com jadu'n nej Jonás jecy'ajty ijxpejt yecy co y'ijty tuḡiḡ x̄i tuḡiḡ tzuom meyjoty ma acx ymoxac, nañ t̄im jadu'n ich, je jāy huidibi tzoon tzajpjoty, nyegamy ijxpejt jadachambi tiempo co n'id̄ipyich tuḡiḡ x̄im̄ etz tuḡiḡ tzuom naaxjoty. ⁴¹ Je mayj̄ȳ huidibi anajty tzinaayb ma N̄inive cajp̄, t̄i jothuimbijtc̄ixy etz t̄i ixmach ajcxy huñdijaty jibicp̄i ajcxy ytumyb co Jonás capxhuācxy Dios y'ayuc ma yi' ajcxy. Cha ich ngapxhuācxyich Dios y'ayuc ma miich ajcxy, etz jac ñiḡi cōtujc̄in nm̄id̄idyich, ca'ydi Jonás; e ca' miich ajcxy m̄jothuimbity. Paady co anajty Dios tiyduna'ñ je naaxhuñj̄yāy, je N̄inive jāy miich ajcxy x̄yajpocycāhuam. ⁴² Nañ jadu'n je t̄oxyj̄ȳ reina huidibi tz̄inay jecy'ajty ma madza'cruudz ypidzimy, yi' je' x̄id̄ahuam je jāy ajcxy huidibi tzinaayb jadachambi tiempo, etz yajpocycāhuib ajcxy. Je reina tzoon jiḡueḡy ñicxy co amido 'ida'ñ je rey Salomón ma capxhuācxi Dios y'ayuc. Ji naaxhuñ jadachambi t̄uḡ Dios yt̄iy'ajtm̄id̄pi jac ñiḡi ym̄ijity, ca'ydi Salomón anajty, e ca' je jāy ajcxy m̄jpid̄āga'ñ.

Je jibic esp̄ritu co jad̄uḡ'oc yhuimbity

⁴³⁻⁴⁴ Yi jāy ajcxy huidibi cham tzinaayb, quipxyjaty ajcxy m̄id̄ je ca'oybi.

Co je ca'oybi ypidzimy ma je jāy, chi je' ñicxy jim m̄jtḡid̄uum y'ijxtacy. Co ca' paty ypocxtac, huin'it ym̄ina'ñ: “Huimbidaambich ma je jāy yjot yhuinma'ñ ma ich t̄i n'octzombi.” Co je ca'oybi yj̄aty ma anajty t̄i chināy, chi paty je jāy yjot yhuinma'ñ ooy yhuāt̄zity etz yajxon ypediḡity oy oyduñ. ⁴⁵ Chi je ca'oybi ñicxy oy yajtzoñ jahuixtujc ca'oybi jac jibicp̄i ca'ydi je'. Chi ajcxy yt̄iḡiy ma je jāy yjot yhuinma'ñ, e chinay ajcxy jilby. Huin'it je jāy jac'ōctiy oy yjajtni, ca'ydi jadu'n nej anajty jayj̄p'aty.

Jesús ytaj etz y'uch m̄iguēx ajcxy

⁴⁶ Jesús yaj'ixpijcpy anajty je mayjäy, co oy yja'ty je' ytaj etz y'uch miguëx ajcxy. Hue' ajcxy yhu'i'my tiba'y. Je' ajcxy anajty ymigaqxamy Jesús. ⁴⁷ Chi jäy yajnimay Jesús:

—Yi mdaj etz m'uch miguëx ajcxy, chiiby ajcxy tiba'y, miich xyjamigaqxamb.

⁴⁸ Jesús y'adzooy, nimay je jäy huidibi ytaj y'ayuc yajnajxi ma yi':

—¿Pin jäy miich ajcxy mdijy co ñch ndaj'adyii etz ñch n'uch'adyii nmigüg'adyii?

⁴⁹ Huin'it Jesús nitziihuüy je' ydiscípulos ajcxy e yminañ:

—Jada ñch ndiscípulos ajcxy jadu'n nipaady nej ñch ndaj etz ñch n'uch nmiguëx. ⁵⁰ Huen ytimpinity huidibi ytumyb ñch nDeedy chojcín, huidibi jiiiby tzajpjoty, pues jadu'n yi' ajcxy nipaady nej ñch ndaj etz ñch n'uch miguëx.

13

Je ayuccapxhuäcxpi y'ixpejt (niipi i'xpejt)

¹ Je huin'it xii Jesús choñ ma je tijc. Chi ñicxy ma je mejypa' jim oy y'iñay'ihuüy. ² E co mayjäy ooy ñaymujci jim ma anajty Jesús iñay, chi Jesús ytiçiy barcojoty. Per tüg'óciy je mayjäy yhu'i'mday ma mejypa'. ³ Jesús ytiçiy jäy yaj'ixpijcp miid jihuimbit ayuc, yminañ:

—Tüg jäy choñ trigotim huijp. ⁴ E ma anajty jim ytiimhuüy, huin'it je ytiim oy naagity ycäy ma tü'aa. Chi jada' je joon ajcxy oy ymiiñ etz ypiihuüy je tiim. ⁵ Nijëjity ytiim ycäy ma tzaanícx ma anajty hueeni naax. Jada tiim tzojc ymujxy. ⁶ Com hueeni anajty je naax ma je tzaanícx, chi co oy xi'an ypydii, chi ytiitztay, com ca' anajty je ytictz yeegity. ⁷ Nijëjity tiim oy ycäy ma ujtz'aayjot ma apyjot, e ujtz'öctay je trigo mang. ⁸ Per je tiim huidibi ca'u ma oy ñaax, je' yon yajxon e tiim'ajt may'amy; tüg ypi'cpajc iipxmajc oy yco'ity, jadüg pi'cpajc tugi'px oy yco'ity, jadüg pi'cpajc migo'px oy yco'ity. ⁹ Pinjaty mido'n miid huen mido'mbicy jada ayuc.

Ti ycxpi je i'xpejt

¹⁰ Chi je' ydiscípulos ajcxy nimijhua'cy Jesús, chi ajcxy yajtiy:

—¿Na'amy co myajtuñ jihuimbit ayuc co myaj'ixpicy je mayjäy?

¹¹ Chi Jesús y'adzooy, yminañ:

—Miich ajcxy jaydëb mnejhuühuüpy huidibi Dios ñigapxyp ñimiydacpy coyüch'amy ma y'ane'min. Jacjadyii jäy ca' ajcxy huinjihuühuüpy. ¹² Pinjaty ymiid yajmõhuip nigí, pinjaty hueen miid yajpigipy nigí, oy ixypy hueen jadim miidity. ¹³ Paady jihuimbit'amy nyajnimaa'yich; jaydëb pinjaty ijxcixy, ñipatpy nejihuüy ca' ti ijxcixy; etz co ajcxy midoogixy, ca' ajcxy huinjihuüy, ñipatpy nejihuüy ca' ti midoogixy. ¹⁴ Jadayaabi ytunyii yjadyii jadu'n nej je profeta Isaías jaaybejty yajhu'i'my ma jadu'n yminañ: Miich ajcxy midoahuamy, per ca' mhuinjihuühuangixy. Miich ajcxy m'ixamy, nañ ca' mhuinjihuühuaangixy huidibi ti m'ijxcixy.

¹⁵ Com jadayaabi jäy ooy ajcxy yjot yhuinma'ñ ti y'ahuimbity juuñ. Nej ajcxy yjamidoy, ca' ajcxy ymidohui'mgixy. Nej ajcxy ja'ixy, ca' y'ijxhui'mgixy. Nej ajcxy yjahuinjihui'yigixy, per ca' yhuinjihuüy ma yjot yhuinma'ñ. Yi' ajcxy ca' yjothuimbidaangixy ma ñch, jaydëb nyajnidzögibich ajcxy.

¹⁶ Per jotcuyc miich ajcxy, co miich ajcxy ijxhui'my miid mhuin hidibi ndumybich, e mmido'mbicy ajcxy ñch n'ayuc. ¹⁷ Janch tiy'ajt jadu'n nej

iiich miich nimaaygixy. Janch tiy'ajit co may profetas ajcxy etz tudägy jäy ajcxy huidibi tziinaayb jecy'ajty, ooy ajcxy ja'ixañ huidibi miich ajcxy m'ijxyp cham, per ca' ajcxy icy. E ooy ajcxy jamidohuañ je ayuc huidibi miich ajcxy midooyb cham, per ca' ajcxy midoy.

Jesús najtzcapxiy je ijxpejt ma je niipi

¹⁸ Amido'it miich ajcxy, jadu'n nej yhuimbizimy jada jihuimbit ayuc maabi je tiiim huijpi. ¹⁹ Je jäy ajcxy huidibi amido'ijtp Dios y'ayuc, e mic'amy je ca'oybi yajpidzimy Dios y'ayuc ma ajcxy yjot yhuinmañ, jadu'n ajcxy nipaady nej trigo tiiim huidibi cáb tügujc, e je joon ajcxy mic'amy ypiimujctay. ²⁰⁻²¹ Je jäy ajcxy huidibi amido'ijtp Dios y'ayuc janch jotcujc, per co agapxiyb paady, co tzaachypi minaxy yajnaxy miid Dios y'ayuc ycixpi, chi mic'amy ajcxy ixmajtzi Dios y'ayuc, jadu'n ajcxy nej je trigotiiim huidibi ti ycäy ma tzaanix, huidibi ca' oy ytictz müidity. ²² Je jäy ajcxy huidibi amido'ijtp Dios y'ayuc, e co ñicxni, chi jäy digooyñi Dios y'ayuc miid jotcujc'ajtin tziinaayin, comeeñ'ajtin etz adzojcín. Jadu'n ajcxy nipaady nej trigotiiim huidibi ti ycäy ujtzjoty, e ca' ytiiim'aty miid co oy y'ujtz'ögy. ²³ Je jäy ajcxy huidibi amido'ijtp etz cöbijcp yajxon Dios y'ayuc amundügjot etz Dios y'ayuc ytumyib ma ajcxy yjot yhuinmañ, jadu'n ajcxy nipaady nej je tiiim huidibi ti ycäy ma oy ñaax etz ti ytiiim'aty may'amy. Tüg pi'cpajc iipx majc oy yco'ity, etz jadüg pi'cpajc tug'px oy yco'ity, etz jadüg pi'cpajc migo'px oy yco'ity.

Je ijxpejt co je jibic ujtz ymuxy ma je trigo cam

²⁴ Chi Jesús yaj'ixpijcy jadüg jihuimbit ayuc, ymiñañ:
—Je Dios y'ane'min jadu'n nipaady nej tüg yéydijc huidibi trigo tiiim huijp ma je' ycam. ²⁵ Per co ajcxy yma'öctay nidüg'óciy je cogam, chi ytigüy tüg ymidzip ma je ycamjot. Chi je midzip jibic ujtz tiiim oy huijy ma je trigo cam. Chi ñicxñi. ²⁶ E co je trigo oy yooñ, chi ypijy. Nañ jadu'n je jibic ujtz oy yooñ. ²⁷ Chi je ytumbidijc oy yhuindzin yajnimay: “Huindzin, ¿nej ca' ti mniipy ac trigotiiim? ¿Nej co jim nañ jadu'n jibic ujtz yajpaady?” ²⁸ Chi je cogam ymiñañ: “Huen jada' nmidzipich jadu'n ti y'idich.” Chi je tumbidijc y'amidoohui: “¿Nej mdzojocy co iiich ajcxy nhuijxiibich je jibic ujtzi?” ²⁹ Chi je cogam ymiñañ: “Ca'. Pen miich ajcxy mhuijxiicpy je jibic ujtz, ca' jecyity co m'ahuixmugipy nañ jadu'n je trigo. ³⁰ Ixmatz, huen je jibic ujtz yeegy tügmucy miid je trigo, ixti cooni anajty ypidigý je cosecha. Co cosecha paty, huin'it nguexañich je ndumbidijc co huen jayijp pujxigý je jibic ujtz etz axotzipy etz nöigipy. E co yajpidictay je jibic ujtz, chi yajpidigipy je trigo e pidägipy ma je tze'x.”

Je ijxpejt ma je mostazapajc

³¹⁻³² Nañ jadu'n Jesús yaj'ixpijcy jadüg jihuimbit ayuc, ymiñañ:
—Je Dios y'ane'min jadu'n nipaady nej tüg mostazapajc huidibi tüg jäy ñiip ma je' ycam. E je mostaza ytiiim je' jac tim mutz ca'ydi ni huidibi ujtz tiiim. Per co je mostaza ytiiim ymuxj etz yoñ, chi y'ahuimbijty jac mij ca'ydi jacjadyii ujtz. E hue' nicxy yjaty janch mij, ixti joon ajcxy oy yqueec miiñ yqueec xijpy jim, pidägy je ypeñ ma je mostaza y'aacx.

Je ijxpejt ma je levadura huidibi ca' y'oyity

³³ Nañ jadu'n Jesús yaj'ixpijcy jadüg jihuimbit ayuc, ymiñañ:
—Je Dios y'ane'min jadu'n nipaady nej levadura huidibi tüg töxyjäy ypidacpy miid je harina, jigix je harina oy ypidigý.

Nej anajty Jesús yajtuñ je ijxpejt

³⁴ Tüg'óciy Jesús yaj'ixpijc je mayjäy, jihuimbit'amy yaj'ixpijc, e ni ti ca' jäy yaj'ixpijcy cayajnimäy jihuimbit ayuc. ³⁵ Jadu'n Jesús ytuuñ, jigix yajcuyduñ je ayuc huidibi je profeta Isaías yjaayhui'm jecy'ajty, co jadu'n yminañ: fích ngapxamyich ac tím jihuimbit ayuc. fích nigapxamybich tijaty huidibi ca' pin nejhuñy, mabaad Dios oga'n yajcojy je naaxhuiñybi.

Jesús capxticxni nej yhuimbizimy je jibic ujtz ma je trigo cam

³⁶ Chi Jesús capxycijxy miid je mayjäy, chi ñicxy ma tüg tijc. Chi ytigiy tigoty miid je' ydiscipulos ajcxy. Chi Jesús ydiscipulos ajcxy nimijhua'cy Jesús, yminañ ajcxy:

—Tun may'ajt ñich ajcxy xyajhuinjihuñyig je jihuimbit ayuc co ti mnigapxy je jibic ujtz ma je trigo cam.

³⁷ Chi Jesús yajnimay:

—fích, je jäy huidibi tzoon tzajpjoty, jadu'n ñich nipaady nej je jäy huidibi niip je oybi tím ma je ycam. ³⁸ Je cam jadu'n nipaady nej tüg'óciy naaxhuiñyjäy. Je oybi tím jadu'n nipaady nej je jäy ajcxy huidibi cöbijcp Dios y'ane'min. Je jibic ujtz jadu'n nipaady nej je jäy ajcxy huidibi cöbijcy ajcxy je mujcu' y'ane'min. ³⁹ Je jäy huidibi niipy je jibic ujtz, jadu'n yí' nipaady nej je ca'oybi. Je jibic ujtz cosecha, jadu'n nipaady nej je tiempo co anajty je naaxhuiñ ycixy ytigoy. Je ajcxy huidibi yajpidic je cosecha, nipaady nej je ángeles ajcxy. ⁴⁰ Jadu'n nej je jibic ujtz oy yajpuxigiy etz yajpidacy jünjoty, nañ tím jadu'n ñicxy yjaty miid je jäy ajcxy huidibi cöbijcp je mujcu' y'ane'min co anajty je naaxhuiñ cixy ytigoy. ⁴¹ Co anajty je naaxhuiñ ycixy ytigoy, chi ñich, je jäy huidibi tzoon tzajpjoty, nguexamyich n'ángeles huen yajmujctäy je jäy huidibi je ymigüg yajtundigooyb, etz yí huidibi ajcxy jibic-huinma'ñ tumb. ⁴² Co yajmujctähüpy je jibicjäydijc, chi ajcxy yajpidägipy mijünjoty, jilby ajcxy yäxa'ñ etz ytützmucxy ytützqueecy miid je ayo'n ycixpi. ⁴³ Per je jäy ajcxy huidibi cuydumb Dios chojcñ, idam ajcxy miid Dios Teedy jilby tzajpjoty. Ymi'idamy ajcxy tüg oy'ajti, jadu'n nipaadip nej je xii ytiçxin yjajin. Pen miich ajcxy mido'n miid, mido'mbijc ajcxy ñich n'ayuc.

Je y'ijxpejt je meeñ huidii yüchíp

⁴⁴ Je Dios y'ane'min jadu'n nipaady nej meeñ huidibi yüch ijtp ma tüg cam. Per co tüg jäy paady je meeñ, chi mic'amy jadüg'oc yüdzt tigach. Chi ooy yxondägy. Chi ñicxy etz tooctäy tüg'óciy huidibi ymiid etz juy je naax.

Je y'ijxpejt je perla huidibi tzoohuip

⁴⁵ Nañ jadu'n Dios y'ane'min jadu'n nipaady nej tüg ajuuyb adoocpi huidibi ijxtaayb tüg oybi perla huidibi tzoobatp. ⁴⁶ E co anajty paady tüg perla huidibi janch tzou, chi ñicxy tooctigoydäy tüg'óciy huidibi ymiid etz juy je perla.

Je acxmadzi'ñ y'ijxpejt

⁴⁷ E nañ jadu'n Dios y'ané'min jadu'n nipaady nej tüg acxmadzi'ñ huidibi jäy miid ycojibüby mejyjoty. Chi jilby ytigiy huen ytim huidibi acxity. ⁴⁸ E co anajty je acxmadzi'ñ y'uch miid je acx, chi je jäy ajcxy yajpidzimy ma mejypa'áy. Chi ññay ajcxy jim mejypa'áy etz huin'ijxy ajcxy je oyjatypi acx etz pidaaccixy ma ycach. Je acx huidijaty ca' y'oyity, je' ajcxy y'ixjibijp. ⁴⁹ Tim jadu'n nej ti yjaty miid je acx, nañ jadu'n jada'ñ, co anajty ycixy ytigoy je naaxhuiñ. Huin'it je ángeles ajcxy ñicxa'ñ huindu'my naaxhuiñ huin'ixa'ñ je jibic jäydijc e pidäga'ñ ajcxy abicy, nañ jadu'n huin'ixa'ñ je oy jäydijc, e pidäga'ñ ajcxy nañ jadu'n abicy. ⁵⁰ Chi je ángeles ajcxy pidäga'ñ je jibicjäydijc

mij jünjoty. Jiiby jünjoty ajcxy yäxa'n ytinähua'n etz ytützmucxaangixy ytützqueedaangixy müid je ayo'n müid je tzaachypi ycxipi.

Je jäy huidibi jajtp nej oybi etz nej jibicpi yajpidzimity

⁵¹ Chi Jesús y'amidooy ajcxy:

—¿Nej mhujnhuüyb müich ajcxy tüg'óciy huidibi ñich ti ngapxich?

Chi ajcxy y'adzooy:

—Huindzin, ti nhujnhuüy ñich ajcxy.

⁵² Chi Jesús ajcxy nimay:

—Nidüg nidüg escriba co ti ixpicytäy tüg'óciy Dios ytiy'ajt y'ane'min huidibi tzajpjoty tzoon, hue' jadu'n nipaady nej tüg codijc comeeñybi huidijaty ymüid yjajty nej yajpidzimipy jemybi etz tucpi.

Jesús yajpaady jim Nazaret

⁵³ Co Jesús yaj'ixpijctay jada jihuimbit ayuc, chi chooñ jim. ⁵⁴ Co Jesús chooñ jim, chi ñicxy ma yci'mnaax yci'mgajp. Chi Jesús ytigüy ma je judio ñaymujctac, e ytigüy yaj'ixpijcp. Chi je mayjäy jiiby ooy jihuüy huinmay nej y'i' yaj'ixpicy, ymíñañ ajcxy:

—¿Ma jada' jada yëydijc ti paady jada ixpijcin? ¿Ma mic'ajt paady co ooy mijhuinma'n tzachtuñ? ⁵⁵ Jadayaabi yëydijc hue' yteedy'ajtpy je tzejtzpi, etz ytaj'ajtpy Maria. E ñich ajcxy ni'ix'ajtpyich je y'uch ajcxy; Jacobo, José, Simón, etz Judas. ⁵⁶ Nañ jadu'n ya chinay ma ñich ajt je' y'uch ajcxy töxyjäy. ¿Ma oy ti paady jada ixpijcin jada mic'ajtin?

⁵⁷ Paady je maycogajpi ajcxy ca' ytunicuend. Paady Jesús ajcxy nimay:

—Huen ma'amayty tüg'óciy je mayjäy ajcxy ooy yajmij'aty y'i' jäy ajcxy huidibi najtzcapxüyb Dios y'ayuc, ca'ydí huidibi y'ayucnajtzcapxüyb ma yci'mnaax yci'mgajp yci'mjün yci'mdjic.

⁵⁸ Ma yci'mnaax yci'mgajp Jesús ca' jaty nej mijhuinma'n tunip anajty, müid co je jäy ajcxy ca' mijpidägyii.

14

Juan el Bautista co y'ögy

¹ Je huin'it tiempo Herodes huidibi anajty ane'mb jim Galilea tiy'ajt paty nej Jesús ytuñ. ² E y'i' nimay je ymidungmüidpidijc:

—Yijibi jäy huidibi tzachtumb mijhuinma'n, y'i' je' je Juan, je Bautista. Juan ti jugypicy jadüg'oc ma anajty ti y'ögy, paady mic'ajt müid jaydeb mijhuinma'n tuñ.

³ Herodes ti anajty ni'ane'mdüy co Juan huen yajmach, e yajpidägipy pujxtigoty. Jadu'n Herodes tuñ müid Herodías ycxipi. Je Herodías je' anajty müid jayjip'aty ti ypicy Felipe, je Herodes y'ajch, chi ti ixmajch Felipe, chi ypicy müid Herodes. ⁴ Juan ti anajty nimäy Herodes co ti ytundigooy co ti picy müid Herodías.

⁵ Je rey Herodes ooy anajty jayaj'öga'n y'i' Juan, per tzigüyb anajty müid je mayjäy. Com je mayjäy ti anajty mübicy ajcxy co Juan hue' anajty tügi Dios tiy'ajt müidpi, tüg profeta. ⁶ Co Herodes yjimijtpejty, chi anajty ñayñixüiduñyüi, e chi Herodías ñix ñicxy ejtzp ma Herodes yhuinduu. Je rey ooy jäygidacy nej anajty Herodías ñix y'ejch. Paady Herodes Herodías ñix nimay:

⁷—Dios ñich yam ngapxpatpy co nmöhuamyb ti mdimypijctzooyb.

⁸ Chi Herodías nimay je' ñix co huen pijctzoohui je Juan, je Bautista, ycohuajc ma tüg texy. Chi Herodías ñix je rey nimay:

—Ndzojcy pich co müich xymöhuip Juan, je Bautista, ycohuajc ma tüg texy.

9-10 Co jadu'n midooy je rey, chi ytigüy tajp maybi mij cajee. Per co ti anajty Dios capxpaatni, ymınaani mayjäy yhuinduu co ymóhuambyb tijaty ypijctzooyb. Paady ane'my tüg soldado co huen nicxy yajtzoñyii Juan ycohuajc, e möhuipy Herodías ñix. ¹¹ Huin'it je soldado oy je Juan ycohuajc yajminajci jibby pujxtigoty. Chi moy je töxy'anäg, e je töxy'anäg yejcnajxni ma ytaj.

¹² Huin'it xii je Juan ydiscípulos ajcxy yja'ty. Chi ajcxy oy yajnaaxtigüy je Juan ñinix. Chi ajcxy oy Jesús yajnimäy.

Jesús yajcay migoox mil jäy

¹³ Co Jesús nejhuüy ti anajty ti ytuñyii ti yjadyii müd Juan, chi ytigüy ma tüg barco naydüg, e nicxni ma tüg it ma ca' pin chinäy. Co je mayjäy nejhuüy co Jesús ti ñicxy, chi ajcxy choday canaag agajp, nicxy ajcxy ma Jesús yajpaady, hue' tecygi'm ajcxy nicxy. ¹⁴ Co Jesús ypidzimy barcojoty, chi ijxy mayjäy. Jesús ooy pa'ayoy je mayjäy, e yajtzoocy je pa'mjäy huídibi anajty ajcxy jim ymüid müñ. ¹⁵ Com ti anajty chuu'ññi, paady je' ydiscípulos ajcxy nimijhua'cy Jesús, e nimay ajcxy:

—Ti chuu'ññi, e ca' ya pin china'y, paady capxcíxy müd jada mayjäy ajcxy, jaydëb ajcxy nicxy ixtäy ycaayin y'uucin ma yi mutz cajp ajcxy huíngonbi.

¹⁶ Chi Jesús ymınañ:

—Ca' ycopicyty co ajcxy nicxy jicxy ixtäy. Miich ajcxy möhuip caayin uucin.

¹⁷ Chi je' ajcxy ymınañ:

—Per iich ajcxy jëy yeeby nmüidity migoox tzajcaagy etz metz acx.

¹⁸ Chi Jesús ymınañ:

—Mimiingix yam'amy.

¹⁹ Chi Jesús nimay je mayjäy co huen iñay'ihuیداaygixy ma pi'cmüy'ung ñix. Huin'it Jesús je migooxpi tzajcaagy conügy etz je metzpi acx. Chi ypa'tijxy jibby tzajpcíxy, e yajnajxy Dioscojuyipy. Chi tujc-huäcxy je tza-jaagy etz moy je' ydiscípulos ajcxy, co huen yajhuäcxycíxy ma je mayjäy. ²⁰ Nidüg'óciy je mayjäy ajcxy ycaý cüxyi. Co je mayjäy ycaýday, chi je discípulos ajcxy yajmujcy je cayduc jixtuc, e yaj'ujch ajcxy majmetz cach. ²¹ Migoox mil anajty ajcxy je yëydijctjc huídibi cay uuc. E ca' ajcxy michoy je töxyjäydijc ajcxy etz je y'ung y'anäg ajcxy.

Jesús yöy ñihuingíxy

²² Chi Jesús ane'my yi' ydiscípulos ajcxy co huen barco tigüygixy mic'amy, jigix ñicxipy ajcxy jim mejy ñinaxy. Nami yi' ydiscípulos ajcxy choñ barcojoty, Jesús ycapxcíjxy müd je mayjäy huen nicxcixni. ²³ Co anajty Jesús ti ycapxcíxy müd je mayjäy, chi ñicxy naydüg ma tüg cögop Dios mibijctzoobi. Co ycoodzññ Jesús naydüg anajty yajpaady. ²⁴ Co ycoodzññ, mejy cujc anajty je barco cujc nicxy. E je ñii ooy anajty ymijjëtzpety ma je barco, je' co ooy anajty mic yjanchpojy. ²⁵ E co oy ymoñy, huin'it Jesús ymijhua'cy ma je' ydiscípulos ajcxy, ñicxy adüyöyb mejyhuingíxy. ²⁶ E co je discípulos ajcxy ijxy co Jesús anajty ymüñ mejyhuingíxy, chi ajcxy ooy ñay'adzigüy. Ooy ajcxy yaaxqueecy ymınañ ajcxy:

—Hue' iich ajt ijxmanüyim.

²⁷ Chi Jesús mic'amy ymigapxy ajcxy etz nimay:

—Huinmic jotmic naybidáacigixy, iich yi'. Ca' mdzigüygixy.

²⁸ Chi oy Pedro Jesús ymigapxyii, nimaayi:

—Huindzin, pen janch miichity, ane'ngich co huen ich miich ninicxip adüyöyip mejyhuingíxy.

²⁹ Chi Jesús Pedro nimay:

—Min.

Huin'it Pedro yminajcy ma je barco etz ñicx ma Jesús adüyöyip mejyhuingíxy. ³⁰ Per co Pedro jihu'ñybijcy jadu'n nej anajty ooy mic yjanchpojy, chi ooy chigiy, chi oy oga'n ytigiiyñi quimbi, chi yaaxqueecy, yminañ:

—iHuindzin, ich yajtzóocigich!

³¹ Huin'it Jesús oy yci' mimajtzí, chi nimay:

—Miich, janch hueeni mmibijcin. ¿Nej co ca' yajxon xymibicyich?

³² Co Pedro etz Jesús ytigiiy barcojoty, huin'it je mic poj ñajxy. ³³ Huin'it je' ajcxy jibby barcojoty ycojxtinay ihuیداay ma Jesús yhuinduu. Chi yminañ ajcxy:

—Janch tiy'ajt co miich Dios xy'ung'adyii.

Jesús yajzooctay je pa'mjäy ajcxy jim Genesaret

³⁴ Co ajcxy ymejñajxtay, chi ajcxy oy ja'ty ma je Genesaret naaxjot. ³⁵ E co je jäy ajcxy nejhuuy co Jesús ti yjäty ma yi' ajcxy naaxjot, chi ajcxy tiy'ajt quejxy ma tüg'óciy cajp etz rancho huinduy agonbi co Jesús yjimity. Chi je mayjäy mäid miin tüg'óciy je pa'mjäy ma Jesús. ³⁶ Chi ajcxy cohuanüy Jesús, pen jeb je pa'mjäy ñidoñyii je yhuit. E tüg'óciy je huidijaty ñidonip je' yhuit, je' ajcxy chooctay y'agidactay.

15

Huidi jäy yaj'ahuimbijty janch jibic

¹ Chi ymiin ma Jesús nijëjity fariseo jäy ajcxy, je huindzindijc huidibi tzachpadumb judío ycostumbre. Nañ jadu'n miin nijëjity escribas, je huindzindijc huidibi ajcxy nijaydutr anajty Dios ñecy. Je fariseos etz escribas ajcxy ti choongixy anajty jim Jerusalén, chi ajcxy y'amidooy Jesús:

² —¿Na'amy co miich mdiscípulos ajcxy ca' cuydungixy judío ñi'ap costumbre? Yi' ajcxy ycaaygixy y'uuccixy, e ca' jayjip ycöbucixy, ca' ixpujicixy ixjëtzcixy ypocy.

³ Chi Jesús y'adzooy, yajtiy:

—¿Na'amy co miich ajcxy mgapxycömidodägy Dios? Mdzachcuydungixy mgi'ngostumbre ma yjapadyii mgyudungixy ixypy Dios ycotújin. ⁴ Com Dios ti y'ane'my ma ycotújin: “Yajmij'at mdaj mdeedy, e pinjaty jibic nigapxy ni'ojiiyb ytaj yteedy, ögipy yi'.” ⁵ Per miich ajcxy minamb co tüg je yëydijc jëbi nimäy ytaj yteedy: “Ca' ich miich ajcxy nbubedañ, com ti n'ahuanüyich ma Dios tüg'óciy tijaty nmüidich.” ⁶ Chi huen yimpinüty jadu'n minamb, ca' ocpubedaanip ytaj yteedy, e jadu'n miich ajcxy myajtigoy Dios y'ane'min com tzachtunaangixy mgi'ngostumbre. ⁷ Miich ajcxy naybidaacip jadu'n nej jihuüy tudägy jäy, e ca' yjanchity. Janch tiy'ajt jadu'n nej jecyip Isaías jaaybejty yajhu'i'my co Dios jadu'n yminañ:

⁸ Jadayaabi jäy xyajmij'ajtpich ahuac aguy, per ca' ajcxy xyajmij'atyich cixy jot huinijot.

⁹ Naadigi' co ajcxy xyhuin'iiyigixyich xyhuinyáaxcixyich. Mnayyaj'ixpijicixy ayuc tiy'ajt huidibi jäy ajcxy ti cojy ti maacxy.

¹⁰ Huin'it Jesús huomujctay je mayjäy, yminañ:

—Amidoo'ijtcixy ich n'ayuc etz mhuinjihuüygixip. ¹¹ Ca' ji ni ti jicxxy huidi jäy ypidacpy ma y'ahuac nicxxy yajpocycäyii. Yi' janchtiy je jibic ayuc huidibi pidzim ma jäy ajcxy y'ahuac, yi' ajcxy yajpocycähuüb.

¹² Chi ymiñ ma Jesús je' ydiscípulos ajcxy, chi ajcxy ñimaay:

—¿Nej miich mnejhuüyb co je fariseos ajcxy ñijotma'tpy co ajcxy midoy je ayuc jadu'n nej miich minañ?

¹³ Chi Jesús y'adzooy, yminañ:

—Huen tim huidibi ane'min huidibi ca' Dios ti pidägy, Dios yajtigoyam, tim jadu'n nej jäy ajcxy huijxigy ujtz huidibi ca' y'oy'ujtzity. ¹⁴ Ixmajtcix yi fariseos etz escribas ajcxy. Ca' ajcxy huinjihuü Dios ytiy'ajt. Jadu'n ajcxy nipaady nej jäy huintzpi, e co tüg huintzpi huijtzhuidity jadüg huintzpi, chi nimetz nicxxy yjutcögägixy.

¹⁵ Huin'it Pedro nimay Jesús:

—Yajhuinjihuüyg ich ajcxy jada jihuimbit ayuc.

¹⁶ Chi Jesús yminañ:

—¿Nej miich ajcxy nañ jadu'n ca' mhuinjihuüy jada jihuimbit ayuc? ¹⁷ ¿Nej ca' miich ajcxy mnejhuüy co tüg'ócixy huidibi tigüyb ma miich ajcxy m'ahuac, je' nicxp ma miich ajcxy mjot etz ypidzimy ma ajcxy mninixc? ¹⁸ Per je jäy huidibi jibic capxp, capxp je' je jibic ayuc huidibi ymiid ma yjot yhuinma'ñ. Jada jibic ayuc yajpocychimicp je jäy. ¹⁹ Yi jibicpi huidibi tzomb ma jäy ajcxy yjot yhuinma'ñ, yi' je' jäyyaj'ögii huinma'ñ, je töxyjäy migapxtigoyii huinma'ñ, meedzii huinma'ñ, je indägii huinma'ñ, je piitz capx huinma'ñ. ²⁰ Yijadu'mbi jibic-huinma'ñ yajpocycäb jäy ajcxy ma Dios. Per co jäy ajcxy ycaay y'ügy, ma ca'ni ajcxy pocy ixpujicxy jayijp, ca' je' ypcocäy ajcxy ma Dios.

Tüg töxyjäy huidibi ca' judíoäy mibijc Jesús

²¹ Chi Jesús jim chooñ, nicxxy ma je Tiro etz Sidón naaxjot. ²² Jim anajty tüg töxyjäy chinäy. Jada töxyjäy hue' anajty cananeajäy, canan judíoäy. Chi yi' nimiiñ Jesús, chi nimay:

—Huindzin, David y'ap y'oc, pa'ayoogich. Ich nmüdich tüg niix huidibi ymiid ca'oybi etz oy tzaachypi paady.

²³ Per ca' ni nej Jesús y'adzoohui. Huin'it je' ydiscípulos ajcxy miiñ ma Jesús, e ycohuaniiy, minañ ajcxy:

—Capxcix miiid jada töxyjäy, com nigo xypayaax xypadinaayim.

²⁴ Chi Jesús yminañ:

—Dios ich ti xyquexyich jëda'ajty ma je israelitasjäy huidibi y'alma tigoyam.

²⁵ Chi je töxyjäy ymijhua'ci ma Jesús, e ycojxtinay'ihuiy ma je yhuinduu, chi yminañ:

—Huindzin, tun may'ajt pubejtcich.

²⁶ Chi Jesús yminañ:

—Ca' jadu'n y'oyity co n'ixmadzipich je israelitasjäy (Dios yjäy), e nbubedipich miich ajcxy. Co jadu'n ndunipich, jadu'n nipaadip nej jäy ajcxy y'idich co ajcxy pijci je ajcxy y'ung ycaagy, e möy je uc.

²⁷ Huin'it je töxyjäy y'adzooy:

—Janch tiy'ajt jadu'n nej miich minañ, per ixti ycaayb je uc je tzajcaagy y'abu'x huidibi cäb ma yhuindzin mesa.

²⁸ Chi Jesús je töxyjäy nimay:

—Janch mij mmibijcin. Ich ndunaamybich jadu'n nej miich mdzocy. Huin'it hori je töxyjäy ñiix choocy.

Jesús yajtzögy mayba'mjäy

²⁹ Chi Jesús jim chooñ. Chi ñajxy ma Galilea mejypa'. Chi ypejty ma tüg cögop, jim iñay'ihuiy. ³⁰ E huin'it oy mayjäy müdmüñ pa'mjäy huidibi huintz, uum, címucy tecymucy, etz huen tim huidibi pa'mjäy. Pidacy ajcxy je pa'mjäy ma Jesús yhuinduu, e y' yajtzoocay. ³¹ E je mayjäy ooy tzachjihuiy tzachhuinmaay ajcxy co anajty je uumbi ti capxígy, je huintzpi ti y'ijxígy, je címucy tecymucpyi ti yöyígy. Chi je mayjäy ytiğiyy iibaady capxpaady Dios, je Dios huidibi je Israel jäy ymijpidacy.

Jesús yajcay mīdaax mil jäy

³² Chi Jesús mijhuoy je' ydiscípulos ajcxy, nimay:

—Ooy nba'ayooyich jadayaab jäy ajcxy. Com cujc midugig xii ijtcixy ya müd iich etz ca' ajcxy müdity ti ycaayipy. Ca' nguexhuimbida'ñich ajcxy ayuu ma ytijc, ca' yjetyty yajpa'mgojip ajcxy tü'am.

³³ Chi je' ydiscípulos ajcxy mīnañ:

—¿Per ma n'ocpatim ti jada jäy ajcxy ycaayipy yjicxipy ya ma jada abac it ma ca' pīn chinäy? Co ooy mayjäyity.

³⁴ Chi Jesús yajtiy:

—¿Naag jilby tzajcaagy miich ajcxy mjacmüdity?

Chi ajcxy y'adzooy:

—Jēyi huixtujc tzajcaagy etz hueen acx.

³⁵ Chi Jesús nimay je mayjäy co huen iñay'ihuiydaagyixy naaxcíxy. ³⁶ Chi Jesús conígy je huixtujcpi tzajcaagy etz je hueenip acx, e yajnax Dioscojuyip ma Dios. Chi tujc-hua'cx etz moy je' ydiscípulos ajcxy. E y' ajcxy yajhua'cx je jicxy picy ma je mayjäy. ³⁷ Chi je mayjäy nidüg'ócay ycaay cūxi. Jesús ydiscípulos ajcxy yajpidígy huixtujc cach cayduc uuctuc tiibi anajty yconaxy. ³⁸ E je huidibi ajcxy cay hue' anajty naybáatigixy nimīdaax mil, abicy je töxyjäydijc etz pi'ctijc ajcxy. ³⁹ Chi Jesús ycapxycíxy müd je mayjäy huen ajcxy nīcxixyñi ma ytijc. Chi Jesús ytiğiyy barcojoty etz ñicxni ma Magdala naax jot.

16*Je fariseos etz je saduceos ajcxy pijtzoogixy tüg ijxpejt mijhuinma'ñybi*

¹ Chi je fariseos etz saduceos y'oy ajcxy ixxy Jesús. Y' ajcxy ijxta'n octu-naangixy müd Jesús, paady ajcxy pijtzooy co Jesús huen yaj'ixyii ajcxy tüg ijxpejt huidibi tzomb tzajpjoty. ² Chi Jesús y'adzooy je' ajcxy:

—Co miich ajcxy m'ixy tzuu y' ajcxy y'ajp tzaptz, chi miich ajcxy mīna'ñ com jabom oy tiempo yajpada'ñ. ³ Per co miich ajcxy m'ixy jopy je tzajp tzaptz etz huimbicy, chi ajcxy mīna'ñ co ca' y'oyity y' tiempo. Miich ajcxy ooy mnaybidägyii nejihuüy ooy m'ixpicyity ma Dios ytiy'ajt, e ca' yjanchity. Miich ajcxy jēbi y' ajcxy myajcapxy, per ca' mnejhuüygyixy nej yhuimbizimy y' mijhuinma'ñ ijxpejt huidibi Dios ytumyb ma jadachambi xii tiempo. ⁴ Y' jäy ajcxy huidibi cham tzīnaayb, ooy yjibicjāyity ajcxy, ca' ajcxy capxymidoy Dios. Y' ajcxy chojocy co nyaj'ixipyich tüg ijxpejt mijhuinma'ñ huidibi tzomb tzajpjoty. Ca' Dios yaj'ixa'ñ ajcxy jadüg mijhuinma'ñ, com müd miich ajcxy jaybetyity je mijhuinma'ñ ijxpejt huidibi Dios ytuun müd Jonás jecy'ajty.

Chi Jesús ixmajch je fariseos etz saduceos ajcxy, chi ñicxni.

Fariseos jäy ajcxy y'ixpicin

⁵ Co Jesús etz ydiscípulos ajcxy yja'ty ma jadüg nība', chi je' ajcxy yjäydígyooy je tzajcaagy. ⁶ Chi Jesús ymīnañ:

—Naygüend'ájtigix mïid yi fariseos etz saduceos ajcxy, ca' mijpidaaci yi' ajcxy y'ayuc ytiy'ajt, com jadu'n yi' nipaady nej levadura.

⁷ Chi Jesús ydiscípulos ñayñimáayigixy miñ xyipy:

—Paady jadu'n yminañ, je' co ti ñich ajt je tzajcaagy njäydiigooyim.

⁸ Jesús nejhuüy nej ajcxy nayñimáayigixy miñ xyipy, chi ñimay ajcxy:

—¿Na'amy co miich ajcxy minaangixy co ca' ajcxy tzajcaagy mïidity? Janch hueeni miich ajcxy mmibjcin. ⁹ ¿Nej ca'ni miich ajcxy mhuinjihuüy? ¿Nej ca' mjäymechyii co ñich migoox tzajcaagy nyajhuäcxy etz ni migoox mil je yëydjctjic anajty huídibi ajcxy cay? ¿E ni mga'ajihuüyii ajcxy naag cach cayduc uuctuc ti myajpidigy? ¹⁰ ¿E ni mga'ajihuüyii ajcxy co huixtuc tzajcaagy nyajhuäcxyich ma nimidaax mil yëydjic ajcxy huídibi caay etz naag cach cayduc uuctuc myajpidigy ajcxy? ¹¹ ¿Nej co ca' miich ajcxy mhuinjihuüy, co ti nyajnimaygixy je levadura huídibi je fariseos etz saduceos ajcxy ymiid?

¹² Huin'it Jesús ydiscípulos ajcxy huinjihuüy co Jesús ca' anajty je' ti yajnimäyii ajcxy co huen naygüend'ájtigixy mïid tzajcaagy levadura. Hue' janchtiy Jesús yajnimay ajcxy co huen naygüend'ájtigixy mïid je fariseos etz saduceos ajcxy y'ixpjin.

Pedro nid'y'aty co Jesús yi' je' je Cristo

¹³ Co Jesús yja'ty ma Cesarea Filipo naaxjot, chi Jesús y'amidooy je' ydiscípulos ajcxy:

—¿Nej jäy ajcxy ymina'ñ, pínic ñich?

¹⁴ Chi ajcxy ymina'ñ:

—Nijëjity jäy ymina'ñ co miich je' Juan je Bautista. Nijëjity jäy ymina'ñ co miich je' Elías, e nijëjity ymina'ñ co miich je' Jeremías o jadüg profeta (huídibi tzinay jecy'ajty).

¹⁵ Chi Jesús yminañ:

—¿E miich ajcxy nej minaangixy, pin ñich?

¹⁶ Huin'it Simón Pedro y'adzooy:

—Miich je' je Cristo, je Dios y'ung.

¹⁷ Chi Jesús y'adzooy:

—Jotcujc miich Simón, Jonás y'ung, je' co ni pin xycayajnimäy jada tiy'ajt, tügpajc je Dios Teedy nDeedyich huídibi jilby tzajpjoty, yi' ti xyajnejhuüy jada tiy'ajt. ¹⁸ ñich miich nimaayb co miich mxii'adiyib Pedro, e hue' yhuimbizimy tzaa (hue' je', je tzaa tija'ñ je ayuc huídibi Simón ycapxy co je Cristo hue' je' anajty Dios), e ma jada tzaa ji ngoja'ñich ñich ndzajptjic (hue' yhuimbizimy, ma ñich n'ane'min chondäga'ñ), e ni ca' oybi ymic'ajt ycamimadägyipy. ¹⁹ ñich miich nmöhuamyb je cötujcin jadu'n nipaady nej tüg ahuaast huídibi mïid myaj'ahuädzipy Dios y'ayuc ytiy'ajt. Tüg'óciy huídibi miich mgapx'adujcypya ya naaxhuiñ, Dios nañ jadu'n capx'adugipy jilby tzajpjoty, e huídibi miich ya naaxhuiñ ca' capx'aducy, Dios nañ ca' capx'adugipy jilby tzajpjoty.

²⁰ Huin'it Jesús ñimay je' ydiscípulos ajcxy, co ca' huaad ni pin nimäy co yi' je' je Cristo.

Jesús nigapxy je' y'öcin

²¹ Ixti huin'itni Jesús ytigüy yajnimay je' ydiscípulos ajcxy co nicxamb jim Jerusalén etz co jim ooy y'ayoohua'ñ. Jim Jerusalén je judío mijjäydjic, je teedytjic huídibi tungmïidpi, etz yi' escribas ajcxy ooy chaachytuna'ñyii etz

yaj'ōga'ñyii. Per codugüg xii huin'it yjugypiga'ñ jadüg'oc. ²² Huin'it Pedro müdnicy Jesús ahuingujc, e oy oiy, yminañ:

—Huindzin, ca' Dios tzocy nicx jadu'n mjaty. Müd müch ca' jēbi jadu'n mjadipy.

²³ Per Jesús yhuāc-huimbijty, chi nimay Pedro:

—Huinhuāctuatcich Pedro, je mujcu' müch jadu'n xyajcapxp. Ca' nigoo xy'adzipyich. Ca' müch mhuinma'ñybidāgy nej Dios tzocy. Yi' janchtiy müch mhuinma'ñ'ajtpy nej jāy ajcxy tzocy.

²⁴ Huin'it Jesús je' ydiscipulos ajcxy nimay:

—Pen je pinjaty xypamina'ñich, huen yci'mdzojcin ixmajtztāy etz huen yhuinma'ñybidāgy co ayoohipy müd iich ycixpi, ixti mabaad y'ōgy. ²⁵ Huen pinjāy huidibi ca' ayoohua'ñ müd iich ycixpi, hue' je' yajtigoyamy yi' yjugy'ajtin. Per pinjaty xypanicxpich oy nej ytimyjadipy, hue' je' ypadamyb yjugy'ajtin huidibi ca' ycixipy ytigoyipy nimina. ²⁶ ¿Ti jāygidacacn yi' co tüg jāy y'ocnayajpadāyib yi' meēñ etz mic'ajtin huindu'my ñaaxhuiñybi, e yjugy'ajtin cixipy tigoyipy tücciy? ¿Jadu'ñyi jēbi jāy y'alma yjugy'ajtin occojuyi? Nigi choohuity jāy ajcxy y'alma yjugy'ajtin, ca'ydi jac ni ti. ²⁷ Iich, je jāy huidibi tzoon tzajpjoty, münaambich jadüg'oc ya naaxhuiñ müd je āngeles ajcxy etz müd nDeedyich y'oy'ajtin. Huin'it micuejtāhua'ñ tüg'ōcīy je jāy nej anajty ti ytuungixy, pen oy, o ca' y'oyity. ²⁸ Janch tiy'ajt jadu'n nej nimaaygixy co ji ya naagity huidibi ca' y'ōga'ñ ixti cooni xy'ixipyich jadüg'oc co iich anajty nmüñ ane mbi.

17

Co Jesús ñinicx yajtigach

¹ Codudujc xii huin'it Jesús müdnicy Pedro, Jacobo, etz y'uch Juan ma tüg mijcop, ma tüg cop huidibi ooy ycixity. ² E jim copcīxy Jesús ñinicx ñaygojtigajtzī ma Pedro, Jacobo etz Juan ajcxy yhuinduu. Jesús yhuiñyijp ytigūy adicxp nej je xii ytiicxin. E Jesús yhuīt y'ahuimbijty janch poob jadu'n nej tüg tiicxin. ³ E timetiini oy ijxcixy Moisés etz Elías ycapxy miydāgy anajty müd Jesús. ⁴ Chi Pedro nimay Jesús:

—Huindzin, oy y'oyity co iich ajt ya. Pen müch mdzojcpy jēbi iich ajcxy nyaj'oyiy tugüg tijcquemy. Tüg müch mje', tüg Moisés yje', etz tüg Elías yje'.

⁵ Pedro capxp anajty, tim huin'itiy tüg joc yajnīdigoyday je' ajcxy huidibi ooy adicxp anajty. E ma je joc yajmidoy tüg ayuc huidibi yminañ:

—Jadayaabi yēydijc iich je' n'ung'ajtpy huidibi ooy ndzocy njhuiñyich etz yi' iich müd njotcujcity. Amīdoo'it müch ajcxy yi' y'ayuc.

⁶ Co Pedro, Jacobo, etz Juan jadu'n midooy je ayuc chooñ jocjoty, chi ajcxy ooy chigūy etz ñayñitziitcīdaaci ajcxy.

⁷ Huin'it ajcxy Jesús ñimiini etz nīdoñ ajcxy, e yminañ:

—Pidicxix, ca' mdzigūyigixy.

⁸ E co ajcxy y'ijxīgy, ca' anajty jim Elías etz Moisés. Naydūgpajc Jesús yjac-hui'my müd je' ajcxy. ⁹ E co ajcxy yminajcy ma je cop, chi ajcxy Jesús nimay:

—Ca' ni pin müch ajcxy nyajnimāhuipy jadu'n nej ti m'ijxcixy cham, ixti cooni iich anajty ti njugypicyich jadüg'oc ma anajty ti n'ōgich.

¹⁰ Huin'it je' ydiscipulos ajcxy yajtiy Jesús:

—¿Nej co yi' escribas, yi' ajcxy huidibi nijaydtp etz yajnīguejp Dios y'ayuc, yminaangixy co Elías yi' miinaam jayijp etz axam je Cristo?

¹¹ Chi Jesús y'adzooy:

—Janch tɨy'ajt co Elías ymiina'n̄ etz yaj'oyɨydáhuamy tüg'óciy m̄id Dios yciɨpi. ¹² Per ñich miich ajcxy n̄imaayb co Elías ti y'oy. E je jāy ajcxy ca' nejhuȳ pin yi', e ooy jibic tuuñ ajcxy, nej tim tzojccixy. E nañ jadu'n̄ ñich, je jāy huiðibi tzoon tzajpjoty ayoohuaambich ma yi' ajcxy.

¹³ Huin'it je' ydiscípulos ajcxy huinjihuuy co Jesús hue' anajty ñigapxyp je Juan, el Bautista.

Jesús yajtzögy tüg jāy mo'tpa'mm̄d̄pi

¹⁴ Co Jesús, Pedro, Jacobo etz Juan yjāty jim ma je mayjāy ajcxy, chi ñimiini tüg jāy. Chi je jāy ycoxtinay'ihuuy ma Jesús yhuinduu, chi ymiinañ:

¹⁵ —Huindzin, ñich nmang pa'ayoohuic. Je' co ymiid mo'tpa'm etz oy yaj'yooyii. Canaag'oc ti ycāy j̄injoty n̄ijoty. ¹⁶ Paady ñich ti nm̄idmiñich ma miich mdiscípulos ajcxy, per ca' ajcxy ymadacy yajtzögipy.

¹⁷ Chi Jesús y'adzooy:

—Miich ajcxy huiðibi jugy'ajtp jadachambi x̄i tiempo, ca' miich ajcxy mm̄ibiga'n̄ Dios, ca' miich ajcxy mgapxymidoohua'n̄ Dios. ¿Naag x̄i naag tiempo ñich miich ajcxy njacm̄imecxtugipy? Yajmiingix yi yeeg'anäg.

¹⁸ Co je yeeg'anäg yajm̄idja'ty ma Jesús, huin'it Jesús ane'my je ca'oybi co huen pidzim ma je yeeg'anäg. E mic'amy je' chögy.

¹⁹ Jac co hueeñi, je' ydiscípulos ajcxy m̄idm̄iydac Jesús ahuingujc, chi ajcxy yajtāy ma Jesús:

—¿Nej co ñich ajcxy ca' ti nmadägy nicx nyajpidz̄im̄gixyich je ca'oybi ma je yeeg'anäg?

²⁰ Chi Jesús ymiinañ:

—Je' co miich ajcxy hueeni mm̄ibijcin. Janch tɨy'ajt jadu'n̄ nej n̄imaaygixy, co ixypy miich ajcxy xy'ocm̄ibicyich, ooy ixypy jēda'ajty jadu'n̄ nej je jac mutzpi ujtz t̄im, huin'it jēbi ixypy mm̄imāy jadayaabi cop co huen j̄ihuācy ya etz huen nicxy huingduum, chi ñicxip je cop. Ni ti ji ycatzpit̄y pen janch miich ajcxy m̄idty m̄ibijcin. ²¹ Jadayaabi picy ca'oybi pidzim̄py co Dios nm̄ibjctzoohuim̄ mictägy etz ayuu'ijt, ca' jac ti huinma'n̄.

Jesús nigapxy jadüg'oc y'öcin

²²⁻²³ Co anajty ajcxy yhuidity tūgmucy jim ma Galilea y'it, chi Jesús nimay je' ydiscípulos ajcxy:

—Ñich, je jāy huiðibi tzoon tzajpjoty, yajc̄iyegipyich ma jāy. E yi' ajcxy xyaj'ögibich etz coduḡig x̄i njugypigipyich jadüg'oc. Co je' ydiscípulos ajcxy jadu'n̄ midooy, chi ajcxy ooy yjotmaybaty.

Je cogüeñin ma je tzajptijc

²⁴ Co Jesús yja'ty m̄id je' ydiscípulos ajcxy jim ma je Capernaum cajp, chi huiði anajty ajcxy meñ yajmujcp m̄id tzajptijc yciɨpi, oy ajcxy ijxcixy je Pedro, chi ajcxy y'amidooy:

—¿Nej miich mhuindzin ycuejcpy meñ m̄id tzajptijc yciɨpi?

²⁵ Chi Pedro y'adzooy:

—Cuejtpy.

E huin'it hora co anajty Pedro ytiḡy tigoty, chi Jesús jayjip ym̄igapxy, ñimay:

—Simón, ¿nej m̄ina'n̄? ¿Pin je rey ajcxy yajcuejcpy? ¿Yi' yjāy o huingjāyi?

²⁶ Chi Pedro y'adzooy:

—Ma huingjāy huiðibi ane'my ijtp.

Chi Jesús y'adzooy:

—Ah, ca'tz yi' yjáy huaad ti cuejtcixy. ²⁷ Per ca' ndzocyich co je cogüejtpi nyajcapxmayiyim, nicx miich ma yi mij laguun e cohuidzi' jiiiby mxu'ñ, e je acx huidibi anajty jayijp huoomb, je' myajpidzimipy, e ma y'ahuac jiiiby mbaadipy tüg meen, yajpidzim je meen e nicx cuet miid ich ycixpi etz miid miich ycixpi.

18

¿Pin je' jac nigí mijip?

¹ Je huin'it hora je' ydiscipulos ajcxy ymijhuactay Jesús etz yajty:

—¿Pinjáy je' jac nig ymiid je mij'ajtín ma Dios y'ane'my jiiiby tzajpjoty?

² Chi Jesús mijhuoy tüg je pi'c'anäg. Chi pidacy je pi'c'anäg cujc'amy ma yi' ajcxy. ³ Chi Jesús yminañ:

—Janch tiy'ajt ich miich ajcxy nimäy, pen ca' miich ajcxy jothuimbijtcixy etz naybidaaccixy mhuinma'ñ jadu'n nej jada pi'c'anäg huinma'ñ miid, pues ca' mdigihuipy ma Dios Teedy y'ane'my jiiiby tzajpjoty. ⁴ Paady, pinjaty miid yhuinma'ñ yung nax jadu'n nej jadayaabi pi'c'anäg miid yhuinma'ñ yung nax, je' je' je' huidiib jac nigí mij'ajtín ymiid jiiiby ma Dios y'ane'my. ⁵ Hueñypinity huidibi miid ich ycixpi cöbigipy etz tzogipy tüg pi'c'anäg, jadu'n nej jada pi'c'anäg ti ndzocyich ti ngöbicyich, hue' jadu'n nipaady nej jihuiy ti xycöbicyich ti xychocyich.

Je huidibi ooycojotmayty co nbocycáhuim

⁶ Hueñypinity huidibi jibic-huinma'ñ ymibidzimy, e yajpocycäy yi' jadu'mbi pi'ctjic huidibi ajcxy xymijnixpejtpich, jac'oy ixxyipy co yi' jadu'mbi jäy ytimyñayöcxodziyüi tüg paandzaa etz ñayñajtjibibihiuipy mejyoty. ⁷ Ooy ayo'ñity ooy jibicity co ji naaxhuiñybi yajpaady tjaty huidibi yajtundigooby jäy ajcxy. Ni mina xii ca' tigoy y'idipy tjaty huidi yajtundigoy je jäy ajcxy. Per mij ayo'n pada'ñ miid yi' Dios pinjaty cojp tundigooyii. ⁸ Pen miich mgi' o miich mdecy xyajtundigooyb, jac'oy ixxyipy co mdim'ixpuxy etz ixjibipy jiguem. Nigí oy co mdigihuipy ciduc tecytuc jiiiby tzajpjoty etz ca'ydí co mdigihuipy miid metz mgi' etz metz mdecy mijjijnjoty huidibi nimina ycapich. ⁹ E pen yi' mhuiin tug xyajpocycáhuamb, tim yajpidzim etz ixcätz jiguem. Com jac'oy mdigihuipy miid tüg mhuiin ma jugy'ajtín huinixibi, ca'ydí co mdigihuipy miid metz mhuiin ma yi' jiiin huidibi camina xii ycapich.

Je y'ixxejt, je cöbixy huidibi tigooy

¹⁰ Ca' m'ixtijcixy ni tüg pi'c'anäg huidibi xymibijcpich. Yi' ajcxy je' y'ángeles tim ijtiiib jiiiby tzajpjoty ma Dios Teedy, ich nDeedy yhuinduu. ¹¹ Ich je jäy huidibi tzoon tzajpjoty, ti nmiiñich ya naaxhuiñ, je' co nyajnitzöga'ñich je jäy ajcxy y'alma huidibi tigooyam. ¹² ¿Nej miich ajcxy mina'ñ? Pen tüg jäy ymiid migo'px cöbixy, etz pen yöyigooyb nidügti cöbixy, ¿nej ca' jébi ixmach je nimida'px majmox mdaax cöbixy etz nicxy ixtäy je jadügpí huidibi yöyigooy? ¹³ E pen ypatpy je tügpí huidibi yöyigooyb, chi ooy xondägy miid co anajty ti paady huidibi anajty ti ytigooy, ca' jadu'n yxondägy miid je nimida'px majmox mdaax huidibi ca' anajty ti yöytigooygixy. ¹⁴ Tim jadu'n nipaady miid Dios Teedy jiiiby tzajpjoty, ca' tzocy co ni tüg jäy y'alma tigooyipy.

Nej huaad tüg mmigüg nhuinmeecim

¹⁵ Pen miich mmigüg xytuñ jibic, miidmiydac ahuingujc e yajhuinjihu'i' ma ti ytundigooy, pen xy'ayuchuinjihuuiyb ti anajty mminaymigügpigyii je mmigüg. ¹⁶ Pen ca' xy'ayuc-huinjihuuiy, chi huominipy tüg o metz mmigüg

huidibi jēbi nidiy'ajt'adipy miich m'ayuc. ¹⁷ E pen nañ ca' je' ajcxy ayuc-huinjihuihua'ñ, miidnıcxıp ma mibıjcpıdıjcy yōymujctac e jim ajcxy myajnaıxıpy jadu'n nej tūg huidibi ca' Dios mibıcy etz jadu'n nej tūg yajcgōıejtpı huidibi ooy pocymıdıty. ¹⁸ Janch tıy'ajt ıch miich ajcxy nımäy, tūg'ōcıy huidibi miich ajcxy mgapx'adujcpy ya naaxhuiñ, Dios nañ jadu'n capx'adugıpy jııby tzajpjoty, e huidibi miich ajcxy ya naaxhuiñ ca' capx'aducy, Dios nañ ca' capx'adugıpy jııby tzajpjoty. ¹⁹ E nañ jadu'n ıch miich ajcxy nımäy, pen ya naaxhuiñ miich ajcxy nimetz mnaygāpxıgıxy co tijaty mmıbjıctzohuaangıxy ma Dios, Dios, ıch nDeedy huidibi jııby tzajpjoty, xymōhuıpy huidibi ajcxy mbıjctzooyb. ²⁰ Com ma miich ajcxy nimetz o nidugıgıgı naymıjıgıxy, jim ıch nıty cujc'amy ma miich ajcxy.

²¹ Chi Pedro y'amıdooy Jesús ymınañ:

—Huındzin, ¿naag'oc huaad nhuinmeecxyıch yı' ajcxy huidibi xymıdındıgōoybıch? ¿Nej nmēcxıbıch ıxtı coonı huıxtujc'oci?

²² Chi Jesús y'adzooy:

—Ca' yhuıxtujc'ōcıty, hue' meecxıpy mıdaax mıgo'px jamıda'px majmıcx mıdaax'oc.

Je tumbı y'ıjxpejt huidibi ca'p ymıgüg huınmeecxy

²³ Dios y'ane'mın jııby tzajpjoty jadu'n nıpaady nej tūg rey huidibi huıjtz'oyııyb mıid je ytumıdıjcy jajadu'ñı ajcxy yjacmınuıcxıy'adyıı. ²⁴ Je rey ytimyhııjtz'oyııychındacyñı anajty cuentas, co oy yjädy tūg ytumbı huıdıbı anajty mınuıcxıy'ajtıp canaag mıllón. ²⁵ Com je' ytumbı ca' anajty mııdıty tı mıid mıgüedııb je' yhuındzin. Huın'ıt je huındzin ane'my co huen je' ytumbı yajtoocnax quıpxıyı mıid y'ungdōxyıjcy etz tūg'ōcıy tijaty ymııd, jaydēb ñuıcxı y'adujctāhuıpy. ²⁶ Huın'ıt ytumbı ycoxtınay'ıhuııy ma yhuındzin yhuındıu etz nımay: “Huındzin, pa'ayoogıch, etz ıch miich nmıgüejtāhuıpy.” ²⁷ Chi je tumbı yhuındzin yajtuñ pa'ayo'n, chi huınmeecxıp je nuıcxı, e yajpıdzımy pujxtıgoty. ²⁸ E mıc'amy co je' ypıdzımy pujxtıgoty, chi ymınaybatı tūg ymıgüg huıdıbı anajty mııd quıpxıyı tı ytuñ. Je' anajty mınuıcxı'ajtıp tım hueenı, chi je' yōcmımadzıy je' ymıgüg huıdıbı mııd ytuñ, chi nımay: “Cuet huıdıbı mnıucxı'ajtpy ma ıch.” ²⁹ Huın'ıt ymıgüg ycoxtınay'ıhuııy ma je' yhuındıu. Chi mınuıcxıtaacy nımay: “Pa'ayoogıch. ıch miich nmıgüejtāhuıpy.” ³⁰ Chi je jadügpı ca' mecxtujcın yajtuñ. Chi oy ymıgüg pıdıgy pujxtıgoty, ıxtı coonı anajty mıcuedyıı. ³¹ Co je jacjadyıı ymıdumbıdıjcy oy ıxy jadu'n nej tı yajtuñ je' ymıgüg, chi ooy ajcxy jıhuııy. Chi ajcxy nıcx ma je yhuındzin etz yajnimayday tūg'ōcıy nejyaty anajty tı ıjxcıxy. ³² Huın'ıt je' ajcxy yhuındzin oy yajhuoyıı je huıdıbı mınuıcxı'ajtıp canaag mıllón. Chi nımay: “Miich ooy mdzachııbıcjıyıty. Tı ıch miich nhuinmeecxı tūg'ōcıy je mnıucxıy, mııd co miich pa'ayoohuın mbıjctzooy ma ıch. ³³ E miich nañ jadu'n ıxyıpy tı mba'ayoy je mıgüg huıdıbı mııd mmıduñ, huıdıbı xymınuıcxıy'ajtp, jadu'n nej ıch miich tı nba'ayooy.” ³⁴ Chi je huındzin ooy chachjotma'ty, chi pıdıcy ane'mın co huen yajtzaachytuñ je' ytumbı mabaad cuejtıy tūg'ōcıy huıdıbı ñıucxıy'ajtpy. ³⁵ Chi Jesús ycapxıycıjxnı, mınañ:

—Tım jadu'n nej jada rey tı tuñ mııd je ytumbı, nañ tım jadu'n Dios tunıpy mııd miich ajcxy, pen ca' nıdüg nıdügı tı miich ajcxy ca' mhuınmeecxy je mmıgügtıjcy amumdügjot.

¹ E co Jesús capxtay jada ayuc, chi choñ Galilea, chi oy yjady ma Judea it jim Jordán mij niñ nĩnaxy. ² Chi ooy mayjäy ypanicxi, e jim yajtzoocy huĩdijaty anajty yuu miid pa'm miid.

³ Huin'it nijëjity je fariseos ajcxy nimiñ Jesús co yajmachcähuaangixy anajty. Chi ajcxy y'amidooy:

—¿Nej janch co Dios ti xymooyim cõtujcin co jëbi tüg yëydijc ixmadzip ytöxyijc miid tim hueeni ti capxy ti ayuc?

⁴ Chi Jesús y'adzooy:

—¿Nej ca'ni miich ajcxy m'ixy mgapxy ma ymiñ jaybety ma Dios ñecy co je naaxhuĩnybi chondacy, co Dios oga'ñ yajcojy tüg'óciy tijaty huĩdibi ji'ajtp co “Dios yajcojy tüg yëydijc etz tüg töxyjäy”? ⁵ Nañ jadu'n Dios yminañ: “Je yëydijc y'ixmadzip ytaj yteedy etz pudigihuiy je' ytöxyijc. E je yëydijc etz ytöxyijc tú'ciy idaangixy.” ⁶ Paady ca' ñimetzity ajcxy, com je yëydijc etz ytöxyijc tüg mucy y'idaangixy. Com Dios ti huijtz mucy je yëydijc miid je töxyjäy, paady ca' huaadity co jäy ajcxy huijtzhuäcxp tiibi Dios huijtz mucy.

⁷ Huin'it je fariseos ajcxy y'amidooy Jesús:

—¿Na'amy co Moisés cõtujcin ti yejcy jecy'ajty co tüg yëydijc jëbi huaad ixmach ytöxyijc, e möhuipy ñinecy ñidiy'ajt e jadu'n jëbi ixmach?

⁸ Chi Jesús yminañ:

—Moisés jada cõtujcin ti xymoogyixy co jëbi m'ixmajtcixy mdöxyijc miid co miich ajcxy mdzachcöjuuñity, ca' mgapxymidohuaangixy Dios. Per co je naaxhuĩnybi chondacy ca' anajty jadu'nity. ⁹ Janch tiy'ajt jadu'n nej iich miich ajcxy nimaagyixy co je yëydijc huĩdibi yajjayhuäcxp miid je ytöxyjäy, e je ytöxyjäy ca' anajty ti ytundigooyb miid huingbi yëydijc, hue' je' yëydijc ytundigooy co ixmach ytöxyijc etz ypijctigach miid huingbi. Nañ tim jadu'n pen tüg yëydijc ypicy miid tüg töxyjäy huĩdibi ñäy ti y'ixmachyii, hue' tundigooyb anajty je yëydijc.

¹⁰ Co Jesús ydiscípulos ajcxy midooy jada ayuc, chi ajcxy yminañ:

—Pen jadu'n jëdu'n je tiy'ajt co je yëydijc ca' huaad ixmadzip ytöxyjäy, jac'oy co ca' nbijcim.

¹¹ Chi Jesús yminañ:

—Ca' tüg'óciy je jäy huinjihuĩy jadayaabi tiy'ajt. Jëyi ajcxy huinjihuĩhuip pin ajcxy Dios pidaaci co huinjihuĩhuip. ¹² Ji canaagnax je ayuc je huinma'ñ nej ca' yjëbity ypigipy je yëydijc. Naagity pi'ctijc yma'xung'aty e ca' yca'pxity ñinĩcxy, paady ca' picy ajcxy. E nijëjity je yëydijc ca' huaad ypicy, miid jëgixpi co anajty je' ti ymijaapigiyi. E nijëjity yëydijc hu' my jaybicy miid jëgixp co ajcxy ytuñ ma Dios ytung, je Dios huĩdibi ane'myb tzajpjoty. Pinjaty cöbigamy iich n'ayuc huen cöbicy.

Jesús conucxy maybi'ctijc

¹³ Chi naagity je jäy mĩdnĩcxy y'ung y'anäg ma Jesús jaydëb yajcñixajipy etz Dios miibijctoy miid yi' ajcxy ycixpi. Chi Jesús ydiscípulos ajcxy oiy je jäy ajcxy huĩdibi anajty miid miimb je y'ung y'anäg, nimaagyixy co ca' jadu'n y'oyity.

¹⁴ Per Jesús yminañ:

—Huen miid miñ ajcxy pi'c'anäg ma iich, ca' mijjpcogapxiyigixy. Com pinjaty ymibijcp iich ngapxy n'ayuc, jadu'n nej jadayaabi pi'c'anäg ajcxy ymibicy, je' ajcxy tigihuaam ma Dios y'ane'my jiiyb tzajpjoty.

¹⁵ Chi Jesús cñixajy je pi'c'anäg ajcxy. Chi ñicxni.

Tüg yeeg'anägnip comeeñybi mĩdmĩydägy Jesús

16 Chi tüg yëdyjc oy icy Jesús. Chi y'amidooy:

—Huindzin, ¿ti jada' co oy ñich ndunipyich jaydeb nbaadibich jugy'ajtin huidibi ca' ycixipy ytigoyipy?

17 Chi Jesús y'adzooy:

—¿Na'amy co xyñimäyich co oy huindzin ñich? Dios tügpajc oyip, ca' jac pin. Pen miich mdzojpcy co mbadañ jugy'ajtin huidibi ca' ycixipy ytigoyipy nimina mguydunipy je Dios ycötujcin huidibi Moisés ycojaay jecy'ajty.

18 Chi je yeeg'anäg yajtihuimbijty:

—¿Huidibi cötujcin miich mdijp?

Chi Jesús yminañ:

—Ca' migüg myaj'ögipy. Ca' migüg ytöxyjc migapxtigooyipy. Ca' mmeedzip. Ca' mmigüg mhuin'iniip. 19 Yajmij'at mdaj mdeedy. Mdzogipy mjihuñhuip miich mmigügtijc, tim jadu'n nej miich ci'm mnaychogyii.

20 Chi je yeeg'anäg Jesús nimaaay:

—Ti nguydundäyich jadaayaabi cötujcin ajcxy maabi ñich nbi'c'atyich. ¿Ti jada njacyajtigoyijtyich?

21 Chi Jesús jadüg'oc y'adzooy:

—Pen miich m'idam tudägy, nicx tooctigoyda' huidijaty miich müid, etz mo' je meñ je jäy ajcxy huidijaty ayoob. Co jadu'n mdunipy, chi mbaadipy oy'ajtin jiihy tzajpjoty. Co jadu'n mdooctähuipy tijaty miich müid, chi miinip jadüg'oc ma ñich nyajpaadyich, e pajamgich.

22 Co je yeeg'anäg jadu'n midooy, chi ñicxni taj may com ooy anajty chachcomeñity.

23 Huin'it Jesús nimay je' ydiscipulos ajcxy:

—Janch tiy'ajt jadu'n nej nimaaagyxy co ooy ymijhuinmañity co tüg comeñyjäy ytigihuipy ma Dios y'ane'my jiihy tzajpjoty. 24 Jadüg'oc nmínañich co ooy chipity co tüg comeñyjäy tigihuipy ma Dios y'ane'my, ñigi ca' chipity co tüg camello ñaxipy ma tüg xu'ñ'ijx yxutity.

25 Co Jesús ydiscipulos ajcxy jadu'n midoy, chi ajcxy ooy jihuñy huinmay. Chi ajcxy ñay'amidoohi miñ xyipy:

—¿Pin jëbi paady je' y'alma nidzoocin?

26 Chi Jesús ajcxy huindicxpejty etz nimay:

—Je huidibi jäy ajcxy chipijhuñy, müid Dios ca' ni ti chipity.

27 Huin'it Pedro yminañ:

—Huindzin, ñich ajcxy ti n'ixmajtztäyich tüg'óciy huidijaty anajty ñich ajcxy nmüid etz nbanicx ñich ajcxy miich. ¿E ti jada' ñich ajcxy nbaadaamybich?

28 Chi Jesús y'adzooy:

—Janch tiy'ajt nmínañich co anajty je xü je tiempo paady mina Dios yajtigajztähuipy je tzajp etz naaxhuñybi, co anajty ñich, je jäy huidibi tzoon tzajpjoty, n'ityich ma ngötujctacich oybi jiihy tzajpjoty, chi müich ajcxy huñi ti xypahuidityich, miich ajcxy mbadamy majmetz cötujctac, e miich ajcxy mdiydunipy je majmetz picypí Israeljäy ajcxy. 29 E tüg'óciy jäy ajcxy huidibi ti ixmajtztäy yjin ytiyc, y'uch ymigüg, y'ung ytöxyjc, y'ung y'anäg, ytaj yteedy, o ycam ytu' müid ñich ycixpi, yi' ajcxy ypadamyb migo'px'oc, ca'ydi huidibi ti ixmach. E ypadamy je jugy'ajtin huidibi ca' ycixipy ytigoyipy ni mina.

30 Mayjäy ajcxy huidibi cham ymüid mij'ajtin cötujcin, tzajpjoty ca' ajcxy müid'adañ mij'ajtin cötujcin. E mayjäy huidibi cham ca' müidity ajcxy mij'ajtin cötujcin, tzajpjoty ymüid'adamy ajcxy mij'ajtin cötujcin.

20

Je naymiduniptijc y'ijxpejt

¹ Jadu'n Jesús yminañ:

—Je Dios y'ane'min jilby tzajpjoty jadu'n nipaady nej tüg cogambi huidibi ooy mij cam müidity. Chi je cogam jopyñi choñ ma oy nicxy ixtây tumbidijc ajcxy huidibi yajpidigipy yi uva cosecha. ² Chi ycapxytuñ müid nidüg nidüg ytumbi co mujuyañ tüg denario meeñ tüg xiibi. Chi quejxy nidüg nidüg ytumbi ma je uva cam. ³ Chi petyxi je cogam ñicxy jadüg'oc tumbi ixtaayb. Chi paty cajp cujc nijëjity tumbi huidibi ca' ti tung müidity. ⁴ Chi je cogam je tumbi ajcxy nimay: “Ñicx miich ajcxy tuñ ma ñich ngosecha. Cham nmujuyipy jadu'n nej ytiy'ajtity.” Chi ñicxy ajcxy midumbi. ⁵ Chi je cogam ñicxy jadüg'oc cujcxii tumbi ijxtaayb. Nañ jadu'n nicxy jadüg'oc minacyxi. ⁶ Nañ tim jadu'n tzuu jadüg'oc je cogam ñicxy tumbi ijxtaayb, chi paty nijëjity cajpcujc huidibi ca' ti tung müidity ajcxy, chi ajcxy nimay: “¿Na'amy co miich ajcxy myaajity? ¿Nej co ca' mnicxy mdungixy?” ⁷ Chi je' ajcxy y'adzooy: “Je' co ca' ñich ajcxy pin ti xycapxytuñ.” Chi je cogam ajcxy nimay: “Ñicx miich ajcxy tun ma ñich nnaaxjot. Cham iya nmujuyipy jadu'n nej ypaadyii.” ⁸ Co oy ycodzñyñi, chi je huindzin nimay je huidibi nigop'ajtp je tung: “Ñicx mijhuodäy je tumbidijc etz mujuyipy. Mujuy jayijp huidibi ti ymiñ axam tumbi etz jim nicxy myajcogixiy ma huidibi anajty ti miñ jayijp tumbi.” ⁹ Chi ajcxy jayijp yajmujuy je tumbi ajcxy huidibi anajty ti ytigiiy tumbi axam. Chi yajmujuy ajcxy jadu'n nej anajty jäy ñaymujuyii je tüg xiibi. ¹⁰ Co miñ je tumbi ajcxy je huidibi ajcxy jayijp tigiiy tumb. Chi ajcxy jot'ajti co jac'anaxy yajmujuyañ. Per quipxyjaty ajcxy paty tüg meeñ nidüg'óciy je tumbidijc. ¹¹ E co ajcxy quipxyjaty yajmujuy, chi ajcxy ytigiiy jotma'tpi. ¹² Chi ajcxy nimay je cam huindzin: “¿Na'amy co quipxyjaty ñich ajcxy ti xymujuyich müid je huidibi ti miñ axam tumbi? Yi' ajcxy tüg jaxigy ti ytuñ, e ñich ajcxy tüg xi je anbi ti ngöbicyich.” ¹³ Chi je cam huindzin y'adzooy, nimay nidügte je' ajcxy: “Miich, ñich nmigüg, ca' ñich jibic ti nduñich müid miich. ¿Nej ca' ñich ajt ngapxytuunim co jadu'n nmujuyañ tüg denario meeñi? ¹⁴ Con yi mmeñ, e nicxni. Jadu'n ndzocyich co quipxyjaty nmujuyañich miich müid huidibi ti ymiñ axam ma je tung. ¹⁵ ¿Nej ca' huaad ñich nduñich müid ñich nmeñ nej ndzocyichi? ¿O co xyajca'oy'ixyich, co ñich ooy n'oyjajity?” ¹⁶ E huidibi ajcxy jaccogixiyyb, yi' ajcxy jayijp'adam. E huidibi ajcxy jayijp'ajtp cham, yi' ajcxy yjaccogixihuamb. May ooy yjayajhuoomiñ e hueeni huidi huin'ijxipy.

Jesús capxpidizimy jadüg'oc co y'ögañ

¹⁷ E co Jesús anajty ñicxy ma Jerusalén tü'aa, chi müid nicxy ahuingujc je nimajmetzpi ydiscipulos. Chi ajcxy nimay:

¹⁸ —Jadu'n nej miich ajcxy m'ijxy mnejhuñy cham ñich ajt nba'ttigiiyim jim Jerusalén. Jim Jerusalén ñich, je jäy huidibi tsoon tzajpjoty, xyajciyegaamich je teedy mijtungmüidpi etz escribas ajcxy. Nyajtiyduna'ñich etz pidäga'ñ ajcxy ané'min co n'ögibich. ¹⁹ E yi' ajcxy xyciyega'ñich ma je huidibi ca' yjudiojajity, jigix xyñixigibich xyajxigibich, xycoxipich, etz xyajcruutzpedipich ajcxy. E co n'ögibich, chi njugypigipyich codugüg xii.

Huidibi Jacobo etz Juan ytaj ypijctzou

²⁰ Chi je Zebedeo y'töxyjic nimiiñ Jesús müid metz je ymang; Jacobo etz Juan. Huin'it je ungdaj huingojxinay'ihuñy Jesús, pijctzoy may'ajt. ²¹ Chi yajtiy Jesús:

—¿Ti mdzojcpy?

Chi je ungdaj y'adzooy:

—Tun may'ajt möhüipy iich metzpi yi nmang yi jacmijtung ma miich m'ane'min, jaydëb iñähüipy ma miich mmijc, tüg a'oy'amy etz jadüg anaty'amy.

²² Chi Jesús y'adzooy:

—Miich ajcxy ca' mhuiñihüiy ti ajcxy mbijctzooyb. ¿Nej mminaxa'n myanaxa'n miich ajcxy je tzaachypi huidibi iich nminaxamy nyajnxamyich? Jadu'n nej jihüiy m'üga'n ajcxy je ta'm nñi huidibi iich n'ügamy e mbaada'n je nübejtin huidibi iich nbadamyb.

Chi je' ajcxy y'adzooy:

—Jëbi.

²³ Chi Jesús ymina'n:

—Janch tiy'ajt nej miich ajcxy mina'n co mminájxcixipy myajnájxcixipy je tzaachypi huidibi nmaxa'nich. Per ca' iich cötujcin nmüdidyich co iich miich ajcxy nbidägiipy mijtungmüd, co myajpaadip tüg ma iich nmijc a'oy'amy e jadüg anajty'amy. Hue' janchtiy Dios Teedy ymüd ni'ixi' pinjaty ti huin'ixy jaydëb yajnicxip je mijtung ma iich n'ane'mdac.

²⁴ Co je nimajcpi ydiscipulos ajcxy nejhüiy jadu'n nej Jacobo etz Juan pijtzooy may'ajt ma Jesús, chi ajcxy ooy mijotma'ty Jacobo etz Juan.

²⁵ Huin'it Jesús mijcapxy je' ydiscipulos ajcxy, chi nimay jadu'n:

—Miich ajcxy mnejhüiy co yi jäy ajcxy huidibi mijtungmüdp ma je maybi naax cajp, mic ajcxy ane'my je naax cajp. Nañ jadu'n yi' ajcxy huidibi mic'ajt müd ma je maybi naax cajp, mic ajcxy ane'my je jäy ajcxy. ²⁶ Per miich ajcxy ca' mjadu'nity nej je mijtungmüdp ma je maybi naax cajp. Pinjaty miich ajcxy je mij tung yajnicxip, copicy ñaybidägiyb nej tüg tumbi. ²⁷ Pen ji miich ajcxy nidüg nigohuajc'ada'n, copicy ñaybidägiyb nej tüg tumbi.

²⁸ Com iich nañ jadu'n, je jäy huidibi tzoon tzajpjoty, ti nmüñich ya naaxhuin'it jaydëbi nbubedipyich yi mayjäy ajcxy. E canan yi' ajcxy xypubedipich. Ngüyegaamyich njugy'ajtin ma yi o'cin müd je mayjäy ycipxi, jaydëbi ngo-hua'nich jäy ajcxy y'alma huidibi tigoyam.

Jesús yajtzoocy metz jay huintzpi

²⁹ E co Jesús etz ydiscipulos ajcxy ycajppidzimy jim Jericó, chi ypanicxi ajcxy mayjäy. ³⁰ E jim anajty iñaay nimetz huintzpi tüba'áy. E co ajcxy nejhüiy co jim anajty ñaxy Jesús, chi ajcxy yaaxpi jojcp:

—Huindzin, David y'ap y'oc, tun may'ajt iich pa'ayoog.

³¹ Chi je mayjäy ajcxy ojcooty je metzpi jäy huintzpi, nimay ajcxy co huen amoñ. Per je huintzpi nigi minan'idich:

—Huindzin, David y'ap y'oc, tun may'ajt iich pa'ayoog.

³² Huin'it Jesús ytinayxijp, e yminañ:

—Ocmin miich ajcxy ya.

Huin'it yajtiy:

—¿Ti mdzojcpy ndunipyich müd miich?

³³ Chi ajcxy ñimaayi:

—Huindzin, ndzojcpyich co xyajhuindicxigibich.

³⁴ Huin'it Jesús pa'ayoogoty ajcxy. Chi ajcxy nidoni ma je' yhuini, e mic'amy je huintzpi ajcxy y'ixxigy. Chi Jesús ajcxy panicxy.

21

Jesús ytigüy jim Jerusalén

¹ E co anajty Jesús etz je mayjäy ajcxy ti mihuingoni Jerusalén, chi yja'ty ma Betfagé cajp mihuingon je Olivos cógop. E jim Jesús quejxy nimetz ydiscípulos ajcxy. ² Chi ajcxy nimay:

—Níxcíx ma je cajp huídibi jim'amy. E jim tüg burro ycoxochity müd y'ung. Coguejtüdíp ajcxy je burro e yajmüingix ya ma ñch. ³ E pen jim pin nej xyñmáy, nima' co je Huindzin yajtunam, e yajhuimbida'ñ mic'amy.

⁴ Jadayaabi oy jadu'n ytuñyí yadyí ycíxy yca'pxy jadu'n nej je profeta jecyíp jaay, co jadu'n yminañ:

⁵ Yajníma' je jäy ajcxy huídibi tzinaayb jim Sión (Jerusalén), oc'íjxcíx, chi miññ ajcxy je mrey, yung nax yjot yhuinma'ñ müdity je mrey, etz burrocíxy miññ. Ma tüg burro mang huídibi ytaj tzimay yajyöyp.

⁶ Chi je metz ydiscípulos ajcxy cuyduñ nej anajty Jesús ti y'ane'myí. ⁷ Yajja'ty ajcxy je burro müd ymang. Chi Jesús ydiscípulos ajcxy jübe'ñ je metzpi burro müd ajcxy yjocxhuit, chi Jesús yaj'ñay je burro mang. ⁸ E je mayjäy ooy yajhuinyëbii ajcxy je tü'aa müd yhuit, chi ajcxy oy ypuxy quipy y'aacx. Chi ajcxy pidacy ma je tü'aa. ⁹ E jim ñajxy je burro, e je mayjäy huídibi nícxp jayíjp, e nañ jadu'n huídibi anajty mimb axam, ooy ajcxy ytigüy huambi jihuñyb, chach minangixy:

—¡Hosana! ¡Gloria a Dios! ¡Ooy ycómayty Dios! Huen capxpaady idípy jada yëdyjc huídibi mimb ma yí nHuindzin Dios yxí etz müd ymic'ajt. ¡Gloria a Dios!

¹⁰ Co Jesús ytigüy jim Jerusalén, chi tüg'ócíy je mayjäy huinmay'ahuídijty, chi ñay'amidóohuigixy miñ xyipy:

—¿Pin yí' yíjüibi jäy?

¹¹ Chi mayjäy y'adzooy:

—Yí' je' je profeta Jesús huídibi tzoon ma Nazaret cajp ma Galilea it.

¹² Huin'it Jesús ytigüy ma Dios ytíj. Chi ixquejxtay tüg'ócíy je ajuybi adoocpi huídibi anajty yajpatp jüby. Chi tijhuimbijttay tüg'ócíy je mesa ma anajty jäy jim ymeëñyhuingogongixy, etz nañ jadu'n tijhuimbijttay je muuxytoocpi ñaybejt. ¹³ Chi jadu'n nimay ajcxy:

—Jaaybety jadu'n ymiñ ma Dios ñecy: “ñich ndíjx je' yí' ma jäy ajcxy Dios mibíjctzoy”, per müch ajcxy hue' yí' mhua'ñ meetzpi tíjx.

¹⁴ E co anajty jüby tzajptogoty Jesús, chi jüby ñimiñi huídijaty anajty huíntz, huídijaty anajty cína'ty tecyma'ty, chi Jesús yajtzoocay. ¹⁵ Per je teedy ajcxy huídibi müjtungmüd etz je escribas ajcxy ooy mijotma'ty Jesús co ajcxy íjxy nejhuñy jadu'n nej Jesús anajty tuñ mjíhuinma'ñ. Etz nañ jadu'n ajcxy íjxy co je pí'c'anäg anajty ajcxy yhuaangixy yjihuñyigixy jüby tzajptogoty, yminaangixy: “¡Huen cómay'idípy je rey David y'ap y'oc!” ¹⁶ Chi je teedy etz escribas ajcxy Jesús nimay:

—¿Nej ca' müch mmídooy nej je pí'c'anäg chach minangixy?

Chi Jesús y'adzooy:

—Nmídooybích. ¿Nej ca' müch ajcxy mgapxyñi Dios ñecy ma ymiñ jaaybety co jadu'n ymina'ñyí?:

Ti myaj'ixpícy ñy ma je pí'ctíjx ma'xungdíjx jaydëbi ajcxy ñibaadíp capxpaadíp Dios.

¹⁷ Chi Jesús ycapxycíjxy müd je teedy etz escribas ajcxy etz choon jüby tzajptogoty. Chi ñicxy ma Betania cajp, e jim yajnajxy je tzumbi.

Jesús capxpojcy je higueri ca'p anajty yt'im'aty

¹⁸ E co yx'imiy yt'icx'igy, chi Jesús yhuimbijty Jerusalén. E ma anajty tim ytüyöy, jím yuuböccooti. ¹⁹ E jím ijxy ma tüba' tüg cop je higueri quipy. Chi ninicxy. Chi pä't'ijxy, per ca' anajty ni tüg yt'im, jéda'ajty je' y'aay. Chi Jesús nimay je higueri quipy:

—¡Ni ca minaa xii md'im'adipy!

E mic mic'iyi je higueri quipy yt'ich. ²⁰ E co je' ydiscipulos ajcxy jadu'n ijxy, chi ajcxy ooy huinmay. Chi ajcxy y'amidooy Jesús:

—¿Na'amy co yi higueri quipy mic'amy ti yt'ich?

²¹ Chi Jesús y'adzooy:

—Janch tiy'ajt jadu'n nej nnimaaygixy. Pen miich ajcxy müd je mibijcin, etz ca' ajcxy mmibicy aametz jotmetz, jébi mijhuinma'n mdungixy nej ich ti nduñich. E nañ jadu'n jébi jac mijpi mijhuinma'n mdunipy ajcxy. Jébi ajcxy tun cop m'nimäy: “Quég ya, tigi' meyjoty” e xycapxymidoohuipy ajcxy je tun je cop. ²² E tüg'óc'iy tijaty miich ajcxy mbijctzooyb huen yt'imytijity, pen mmibijcp ajcxy, mbaadip ajcxy.

Jesús ycötujcin

²³ Co Jesús yja'ty Jerusalén, chi yt'ig'iy jadüg'oc ma Dios yt'ic. E jilby anajty yaj'ixpicy je mayjäy, chi ñimiini je teedy m'jntungmüdp'i etz judío mijjäydic ajcxy. Chi ajcxy y'amidoohu:

—¿Ma cötujcin ti mbaady co jadu'n mduñ tzajtigoty? ¿Pin jada cötujcin ti yymöy?

²⁴ Chi Jesús y'adzooy:

—Nañ jadu'n ich miich ajcxy nyaj'amidoohuamy tüg ayuc. Pen m'adzooyb ajcxy jada ayuc, huin'it ich miich ajcxy nyajnimáhuipy ti cötujcin ich müd nduñ huidijaty. ²⁵ ¿Pin quejxy je Juan, je Bautista, yajniibejtpi, Dios o jäy ajcxy?

Chi ajcxy ñayñimáayigixy miñ xyipy:

—Co ixipy ajt n'adzoohuim co Dios Juan quejx, huin'it xy'adzoohuim: “¿Na'amy co miich ajcxy ca' mmibijcy Juan?” ²⁶ Per nañ jadu'n ca' huaad nm'inaanim co jäy ajcxy yajniibejcy Juan, com nejhuiy'im co yi mayjäy mibijccixy co je' anajty Dios tüg y'ayucnajtzcapx'iybi.

²⁷ E paady ajcxy jadu'n adzooy Jesús:

—Ca' ich ajcxy nejhuiyigixy.

Huin'it Jesús ym'inañ:

—Nañ jadu'n ich ca' nigapxa'ñich pin je' ycötujcin müd nduñich huidijaty.

Je metzpi ung ijxpejt

²⁸ Chi Jesús ym'inañ:

—¿Nej m'oc'ixy m'oc'jaygugi' jadayaabi ixpejt? Tüg je yéydijc ym'id anajty metz je' ymang. Chi nimay je mijpi: “Nícx cham m'octuñ ma ich n'uva cam.” ²⁹ Huin'it je' ymang y'adzoohui: “¡Ca' nnicxa'ñich!” Chi jaccohueeñyi je' ymang yhuinmaydigajch, chi ñicxy tumbi. ³⁰ Chi je' ungedeedy oy ixy je ymang mutzpi. Chi nañ jadu'n nimaay co huen nícxxy tuñ. Chi je' ymang mutzpi y'adzooy: “Oy, cham nícxibich.” Per ca' ñicxy. ³¹ ¿Huidi je' nidügti ycuymuñ nej anajty yteedy tzocoy?

Chi ajcxy ym'inañ:

—Je' ymang mijpi huidibi jayijp nimay.

Huin'it Jesús nimay ajcxy:

—Janch tıy'ajt jadu'n nej nımaaygıxy co je huidibi ajcxy yajcogüejtpi etz je töxyjäy ajcxy huidibi tundigooyb müd yëydıjc, je' ajcxy tigıhuamb jayıjp ma Dios y'ane'my jııby tzajpjoty, ca'ydi müich ajcxy. ³² Paady ycıxpi oy ymiın je Juan huidibi jäy ajcxy yajniıbejt, Juan yajni'ixııygıxy je mayjäy nej ajcxy jëbi yjothuımbıdıpy ma Dios. E müich ajcxy ca' mıbıjcy jadu'n nej Juan ymınañ. Per je' ajcxy huidibi yajcogüejtp etz je töxyjäydıjc huidibi tundigooyb müd yëydıjtıjc, ymıbıjcy je' ajcxy Juan. Oy müich ajcxy mja'ıjxy, per ca' mjothuımbıdaangıxy etz ca' mıbıgaangıxy.

Je naymıduunıptıjc jıbıcjäybi ajcxy y'ıjxpejt

³³ Chi Jesús ymınañ:

—Oc'amıdoo'ıjtcıx jadayaabi ıjxpejt. Ji anajty tüg je huidibi nihuındzın'ajtp mıjpi je tundac. Chi je cogam uvas cojy ma je ytundac etz jügajy. Chi yaj'oyııy ma anajty jëbi je uvas ñıı yajniğıdägaanı. Nañ jadu'n cojy tüg tzaaboch cıxpi, jıgıx jëbi cuend'aty ycam. Co yaj'oyıyday, chi je cogam yejcy pıjctzoy je ycam ma je jäy ajcxy huidibi naymıdunaanıp. Chi oy choonı je cogam nıcxı vıaje tumbı. ³⁴ Je huın'ıt tempo co yhuaad'ajtnı je cosecha, chi je cogam quejxy nıjëjty ytumbı jim ma huidibi anajty tı yajpıjctzoy je ñaax co huen möyüı je huidibi yı' paadaanıp. ³⁵ Per je jäy huidibi anajty tı naax pıjctzoy, chi ajcxy majch je tumbı. Chi ajcxy ooy huınhuojpy jıjphuojpy tüg. Chi ajcxy huıngäch jıjpcäch jadüg. Chi ajcxy je mıdugıgpi yaj'o'cy. ³⁶ Chi je conaax cogam huıngbı ytumbıdıjc quejxy. E nañ jadu'n ajcxy oy tungıxy jadu'n nej anajty tı tungıxy je jayıjp'atypi. ³⁷ Chi ycı'm'ung oy quejx cogıııyñı. Hue' jot'ajtı co yajmıj'adııyb je' y'ung. ³⁸ Per co ajcxy je tumbıdıjc ıjxpaty je cogam je' y'ung, chi ajcxy ñaygapı: “Tzoc ajt yaj'o'cım je cogam ymang, com yı' je' mıhuı'mamb je' yteedy je yjugy'ajtnı je ypidägy. E co ajt nyaj'o'cım, chı ııch ajt nmıhuı'mım je cam.” ³⁹ Chi ajcxy majch je cogam ymang. Chi ajcxy huıjtzpıdzımy ma je tundac. Chi oy yaj'öccıxy.

⁴⁰ Huın'ıt Jesús ymınañ:

—Co anajty tı müiın je conaax je cogam, ¿tı jada' y'octunıpy müd je tumbıdıjc ajcxy?

⁴¹ Chi je teedytıjc etz mıjjäydıjc y'adzooy:

—Je cogam yaj'ögıpy yıjııbı jıbıcjäydıjc, ca' ajcxy pa'ayoohııpy, etz yegıpy je uvas cam pıjctzoy ma je huıngbı jäy huidibi yegıpy je pidägy huidibi cogam paatıp.

⁴² Chi Jesús ymınañ:

—¿Nej ca'ni müich ajcxy mgapxy ma müiın jaaybety ma Dios ñecyı? Jadu'n ymınañ:

Je yëydıjc huidibi je jäy ajcxy ca' anajty tzocy, Dios tı pidägy mıj'ane'mbi. Tım jadu'n nıpaady nej tüg tzaa oybı huidibi je pojtzpıdıjc ca' ajcxy yajtuna'ñ, e je' je' oy tı yhuı'mni ma anajty yjaccopıcyıty. Je Huındzın Dios jada tung tı tuñ, e ooy oy n'ıjım yı' ytung.

⁴³ E paady jadu'n ııch müich ajcxy nımäy co müich ajcxy myajpıga'ñ yı m'ıt mlugar jııby tzajpjoty ma Dios y'ane'my etz yajmöhua'ñ je huıngbı jäy je huidibi amuımdügot naygıyejcpı ma Dios. ⁴⁴ Pınjaty ca' cöbıga'ñ jada mıj'ane'mbi, ayon' ypadaamb, ytımnıpatp nej jıhuıy jim ycıjxcıday ma je tzaa nıcx, tıjhuıdz yjajtähuıpy. Ö pen je mıj'ane'mbı mıdzıptzoñ je jäy, chı ytıgoydähuıpy ajcxy, tım jadu'n nej jıhuıy je tzaa ñıgıdaagoodyıı ajcxy, e janch jaam pıx nıcxı yjaty.

⁴⁵ Co ajcxy midooy, chi je teedytjic etz je fariseostjic huinjihuuy co yí' ajcxy yajniapxyp, ⁴⁶ chi Jesús ajcxy jamadzaañ. Per tzigiyyb anajty ajcxy miid je mayjä, je' co je mayjä anajty mibijccixy co Jesús najtzcaxxiyb Dios ytiy'ajt.

22

Je ijxpejt ma jäy anajty pijcpidjic nix#duuñ

¹ Chi Jesús jadüg'oc ytiğiyy capxp miid ijxpejt, ymiñañ jadu'n:

² —Je Dios y'ane'min jadu'n nipaady nej je rey ymang ocnix#duuñ co ti ypic. ³ Chi je rey quejxhuäcxtay je ytumbi co huen nixy huoomujctaaygixy je huidijaty anajty ti yaj'nimaaygixy co mingixipy ma ytuna'nyii yjada'nyii je pijcin. Per ca' je' ajcxy ymiñañ ma je pijcin nix#duuñ. ⁴ Chi quejxnip huingbi ytumbi, nimay ajcxy: “Nimaaygix je tiibi oy jayjip'aty mniimaaygix jadu'n co huen mmiingixy ma yam je caayin uucin ni'ixi' y'ity. Ti je huaj nixpi nyaj'ogyich. E ni'ixi' ijtaayñi, huen miin ajcxy ma je pijcin ytuna'nyii yjada'nyii.” ⁵ E je' ajcxy tiibi anajty yaj'nimaaygixy, ca' ajcxy je' ytimi tuñ cuendi. Nijëjity ajcxy nixy ma ytundac. Nijëjity ajcxy nixy toocp yejcp; ⁶ e nijëjity ajcxy majch je rey yquejxyöybi ajcxy, chi ajcxy oy chaachytuñ, chi yaj'o'cy. ⁷ Chi je rey ooy chachjotma'ty. Chi je soldados ajcxy quejxy co huen nixy yaj'öctayii je jäyyaj'öcp ajcxy etz tyoydähup je ycajp. ⁸ Chi je rey nimay je ytumbi ajcxy: “Ni'ixi' ijttäy ma jadyaabi je pijcin yajnix#dunañ. Per je huidibi ajcxy ti yajnimäy ca' ajcxy mihuaadity co ymingixipy. ⁹ Nix miich ajcxy majaty jäy yjin ytjic. Nimaaygixy tüg'öciy pinjaty ajcxy mbaty, co huen miingixy ma je pijcipi.” ¹⁰ Chi nixy je rey ytumbi ajcxy. Chi ajcxy miidmiinday je mayjä, je oyjäybi etz je jibicjäybi. Chi y'ujtztay je rey ytjic miid je mayjä. ¹¹ Huin'it je rey ytiğiyy mayjäyoty, ixañ anajty huidijaty ti yajhuomiñ. E jilby tüg yëydjic ti ijxpaty huidibi ca' anajty ti ñayxoxyii, jadu'n nej jäy nayxóxigixy co ajcxy nixy ma tüg pijcin. ¹² Huin'it je rey minañ: “Migüg, ¿nej ya ti mdiğiyy tigoty, e ca' mxojx müdity nej ypaadyii?” E je yëydjic amoñyi je' yhu'i'my. ¹³ Chi je rey nimay huidibi anajty jim pubejtp: “Cixotz tecyotz jada yëydjic etz pidäg agootztuuby. E jilby yjihuipy yäxipy, jilby ytiitz huinqueedip miid jotmay.” ¹⁴ Com may je jäy ajcxy huidibi ti yajhuooy, e hueeni ajcxy huidibi ti yajhuin'ixy.

Je cogüejtin ñimiydägy

¹⁵ Je huin'it tiempo je fariseos ajcxy tuuñ quipxycapxy co anajty xihuaangixy nihuambedaangixy Jesús. ¹⁶ E jadu'n ajcxy quejxy ma Jesús yajpaady naagity huidibi minixpejt je fariseos ajcxy ytiy'ajt etz naagity huidibi mijnixpejt je Herodes ytiy'ajt. Chi ajcxy Jesús nimay:

—Huindzin, nejhuiyibich iich ajcxy co miich mgapxy je tiy'ajt. Tudägy myaj'ixpicy jäy ajcxy jadu'n nej huaad ajcxy cuychinaaygixy Dios ytiy'ajt. E ca' mgüendituñ nej jäy ajcxy ymiñaangixy. Tú'ciy miich mduñ miid comeeñyjäy etz miid ayoobtjic, ca' huin'ixpety myaj'ixpicy. ¹⁷ Nejhuihuamy iich ajcxy nej miich minañ pen tiy'ajt jadu'n: ¿Nej ndundi gooyim ma Dios ycotujcin, co ngüejtim ma César, je romano mij'ane'mbi?

¹⁸ Per Jesús ñejhuuyb anajty ajcxy yjibic-huinmañ, e chi ajcxy nimay:

—Ooy miich ajcxy naybiadaagixy nej jihuuy ooy mdudägyity, e ca' yjanchity. ¿Na'amy co ajcxy yxhachjot'ixy yxhachhuinmañ'ixyich? ¹⁹ Yaj'ijxcich tüg meeñ huidi miid migüejtigixy César.

Chi ajcxy mamiin tüg meeñ. ²⁰ Chi co Jesús y'ijxy je meeñ, chi yajtüy:

—¿Pin y'ahuinax e pin yxii cixjaay ma jada meef?

²¹ Chi ajcxy y'adzooy:

—Je romano mij'ane'mbi y'ahuinax etz yi' yxii.

Huin'it Jesús je' ajcxy nimay:

—Mo' je César huidibi yi' yjé'ajtpy, etz mo' Dios huidibi Dios yjé'ajtpy.

²² E co ajcxy jadu'n midooy, chi ajcxy ooy jihuiy huinmay. Chi ajcxy ixmajch Jesús, e ñicxni ajcxy.

Yaj'amidooy ajcxy je jugypijcin co pin ti y'ögy

²³ Je huin'it xii je saduceos ajcxy oy icy Jesús. Yi' ajcxy ymina'ñ co ca' yjugypiga'ñ je öcpi ajcxy. E jadu'n ajcxy huinma'ñ pidägy, e yminaangixy:

²⁴ —Huindzin, jadu'n miñ ma Moisés ycötujcin co je yëydijc huidibi ypijcychinaayb müd ytöxyijc, e pen öcp je yëydijc, e ca' ni tüg y'ung yajhui'my, copicy co co'öcytöxyjäy ypijctigadzipy müd je yëydijc ymiguëx. ²⁵ Pues jii ma ñch ajcxy anajty tüg quëx je yëydijc nihiuxtujc. Je ungoob ypijcy, e chi ix'ögy ytöxyijc, e ca' ni tüg y'ung yajhui'my. Chi je miguëx ypijctigajch müd je töxyjäy.

²⁶ Nañ jadu'n je mimetzpi yëydijc ix'o'cy ytöxyijc. Nañ jadu'n je midugigpi yëydijc ix'o'cy ytöxyijc. E jadu'n oytuñyii yjadyii müd je töxyjäy co ti anajty müddzinay'abidzimdäy je nihiuxtujcpi yëydijc tüg quëxpi. E je nihiuxtujcpi ajcxy ix'o'cy je töxyjäy, e ca' ni tüg y'ung ajcxy yajhui'my. ²⁷ Chi nañ jadu'n oy y'öcni je töxyjäy. ²⁸ E co anajty xii tiempo paty, co anajty Dios yajjugypicy yi tiibi ajcxy y'ögy, çhuidibi jada' ajcxy nidügti je yëydijc töxyijc'adaanip je töxyjäy? Com ti ajcxy jadu'n nihiuxtujcpi müddzinay'abidzimgixy.

²⁹ Chi Jesús je' ajcxy y'adzooy:

—Miich ajcxy ca' mhuinjihuüy je tiy'ajt, com ca' mnejhuüygyx Dios y'ayuc tyti'ajt, e com ni ca' mnejhuüygyx je mic'ajt huidibi Dios ymiid. ³⁰ Pues co anajty yjugypijccixy je jäy tiibi y'öccixy, chi ca' ajcxy ypiiga'ñ, e nañ jadu'n ni ca' ajcxy ñaymöhuüyb y'ung huen pijccixy. Hue' ajcxy yjugy'adaangixy chinähuaangixy jiiiby tzajpjoty, tim jadu'n nej je ángeles ajcxy chinaaygixy jugy'ajtcixy. ³¹ Per je tiy'ajt co jäy ajcxy tiibi y'öccixy yjugypigaangixy jadüg'oc, jëbi mbaatcixy jada tiy'ajt ma Dios ñecy. Dios ci'm jadu'n minañ: ³² “ñich je' je Dios huidibi Abraham, Isaac etz Jacob yDios'ajtpy.” Com yi Dios ca' yi' yDios'aty ma yi öcpi ajcxy. Yi Dios Dios'ajtp yi' ma yi juugypí ajcxy.

³³ E co je mayjäy jadu'n midooy, chi ajcxy ooy tzachjihuiy tzachhuinmaay je Jesús y'ixpijcin.

Je ane'min huidibi ooyycopicyity

³⁴ E co je fariseos ajcxy nejhuüy co Jesús anajty ti yaj'amofnyii je saduceos ajcxy, chi ajcxy ñayyöymujctaayi. ³⁵ E jim anajty tüg leyhuindzin huidibi Jesús anajty jot'ijxyp huinma'ñ'ijxyp, chi y'amidooy:

³⁶ —Huindzin, çma yi maybi Dios ycötujcin, huidibi yi' jaccopicyip?

³⁷ Chi Jesús y'adzooy:

—Tzoc jihui' etz yajmij'at nHuindzin'ajtim Dios müd tüg'öciy m'aa mjot, etz müd tüg'öciy m'alma, etz müd tüg'öciy mhuinma'ñ. ³⁸ Jada je' jadu'n je Dios ycötujcin huidibi jaccopicyip, etz huidibi tim jayijpí. ³⁹ Je mimetzpi Dios ycötujcin jahueengi tú'ciy ñaybadyii müd je jayijpi, yi' huidibi jadu'n minamb: “Tzojccix jihuiygyx yi mmigügtijc, tim jadu'n nej mnaychogyii nayjihuiyii ci'm.” ⁴⁰ Jada Dios metzpi ycötujcin jaccopicy jacmic'ajt müd ca' jac huidibi cötujcin huidibi Moisés etz je profetas ajcxy yejc.

¿Pin je y'ung je Cristo?

41 E ma anajty jim tüg'mucy yjac'ijtcixy je fariseos, huin'it Jesús yajtiy:

42 —¿Nej miich ajcxy huinmay müd Cristo? ¿Pin je' y'apmang?

Chi ajcxy y'adzooy:

—Je David je' y'apmang.

43 Chi Jesús ajcxy nimay:

—¿Na'amy co David anajty ti ymína'n co Cristo hue' je' yi' yhuindzin? Jadu'n ti capxy David anajty müd je Dios yjihui'n ymic'ajt, ymínañ:

44 Je Huindzin Dios nimay iich nHuindzin: “Íña' ma iich n'a'oy'amy, ixti cooni iich miich nyajmímadägip ma je mmídzip ajcxy.”

45 ¿Nej jébi David ymíj'ap'adyii je Cristo? Com David ci'm ymínañ co Cristo yi' je' yhuindzin.

46 E nitüg'aa ajcxy yca'adzohuimbijty. E jadu'n nej je xii tiempo yjacnicx anajty ca' ni pin ocjacyajtiyñi huídijaty ayuc.

23

Jesús xiy ajcxy je fariseos etz escribas

¹ Chi Jesús nimay je mayjäy etz yi' ydiscípulos ajcxy:

² —Je escribas etz je fariseos ajcxy chachnaygömáayigixy co yi' ajcxy jajtpej capxti'cxipy je cötujcin huídibi Moisés yjaay jecy'ajty. ³ Oy co ajcxy mguydunipy jadu'n nej yi' ajcxy xyaj'ixpijccixy Dios y'ayuc, capxymídoogix nej xyñimaaygixy per ca' mdungixy huídibi yi' ajcxy ytumb, com yi' ajcxy oy ycapxcixy e ca' ajcxy cuydungixy. ⁴ Yi' ajcxy nigo yajcojccixy canaag costumbre huídi je jäy ajcxy ca' mímadağa'n, e ca' ajcxy pa'ayoy je jäy, tim jadu'n nipaady nej jihuiy tüg tziy ti mooygixy jemxypi huídibi ca' je jäy ajcxy mímadağa'n, e yi' escribas etz fariseos ajcxy ni ca' ycihuax yajpaadaangixy je tziy. ⁵ Tüg'óciy huídi yi' ajcxy ytumyb, je' ajcxy ytumyb co huen jäy ajcxy ixyii, jaydëbi yajcömay ajcxy. Yi' ajcxy yajhuimboc-huiniyigixy etz ñayyajcihuiniyigixy Dios y'ayuc. Nayxojaxcixy müd huit yooñjatypi co chachcömayaangixy. ⁶ Ooy ajcxy tzocy iñaybejt ma je' iñay je ane'mbi ma jäy ajcxy yxiiduñ. Ooy ajcxy tzocy yi' cödumbi iñaybejt ma je naymujctac. ⁷ Yi' escribas etz fariseos ajcxy oy tzojccixy co ajcxy yajcapx-pooxpi huindziği'n'amy mayjäyduum. Etz nañ jadu'n ajcxy tzocy co jäy ajcxy yajmíj'adiyib nej huindzindijc ixpijctijc. ⁸ Miich ajcxy ca' jadu'n m'a'ixihuiipy co ajcxy xytijipy huindzin com nidüg'óciy miich ajcxy mnaymígüg'ájtigixy, etz tüg'pajc je' huídibi miich ajcxy mhuindzin'ajtpy yi' je' Cristo. ⁹ E nañ jadu'n miich ajcxy ya naaxhuiñ, ca' oy ni pin mdeedy'adiyib co müd miich ajcxy tüg'pajc je mDeedy, huídibi jiiy tzajpjoty. ¹⁰ E nañ ni mganaydijiyib ajcxy mij ane'mbi, com yi' Cristo je' tüg'pajc miich ajcxy mmíj'ane'mbi. ¹¹ Je pin jaccapxymídoob ymígügtijc, je' je' mij'ajtin müd ma miich ajcxy. ¹² Pinjaty huídibi ci'm naygömayip, tzöydu'nbaadip je', e pinjaty naybidaacip nicy xeemy, je' je' capxpaady y'idipy.

¹³ ¡Ay miich ayoob ajcxy fariseos etz escribas ajcxy! Miich ajcxy mnaybidaacigixy nej jihuiy ooy mdudägyjäy, e ca' yjanchity. Miich ajcxy mgoyüchpy je Dios ytiy'ajtin nej huaad jäy ajcxy ytiyigiy jiiy tzajpjoty ma Dios y'ane'my. Ni miich ajcxy mgatigiyigixy, e nañ ni mga'a'ixiyigixy co huingbi ytiyihuiy.

¹⁴ ¡Ay miich ayoob ajcxy fariseos etz escribas ajcxy! ¡Miich ajcxy m'aanídacp! Miich ajcxy myajcijxtaayi yi' co'ögy ytöxyjäy ypidägy müd ajcxy m'adzojcin, e mdungixy ooy jecy tzajpcapxycapxi, jigix capxpaady

mbidzimipy. Dios nigi chaachytunip miich ajcxy miid mbocy ycixpi, ca'ydi jac pin jäy.

¹⁵ ¡Ay miich ayoob ajcxy fariseos etz escribas, miich ajcxy naybidaacigixy tudägy, e ca' yjanchity! Mhuinyöy'abidzimyb miich ajcxy je naaxhuiñybi, co mgapxhuäcxa'ñ je m'ixpijcin ma je tügpí jäy. E co ajcxy je' myajmibicy, huin'it meizt jadu'ñyi je pocy anajty miidity je jäy, ca'ydi miich ajcxy.

¹⁶ ¡Ay miich ayoob ajcxy huídibi jadu'n idittp nej tügi huintzpi huinhuoy! Miich ajcxy minamb co pen tüg jäy tuñ yhuandaacin, e ñbaati capxpaati Dios ytjic, chi ca' cuyduñ je huandaacin. Per pen ñbatpy capxpatpy je oori huídibi jiiiby ma Dios ytjic, huin'it janchity cuyduñ je huandaacin. ¹⁷ Tzuudijc locidijc huídibi ca' huinjihuüy je t'y'ajt. ¿Huídibi jaccopicyip: je oori o je Dios ytjic ma je oori yoxy ity?

¹⁸ Nañ jadu'n miich ajcxy mina'ñ: “Pen tüg jäy huandaacin tuñ, e capxpaady je altar ma Dios yajhuindzigiy, chi ca' cuyduñ je huandaacin. Per pen capxpaady je huindzigi'ñ tüzch ma je altar ma Dios yajhuindzigiy, chi cuyduñ yhuandaacin.” ¹⁹ ¡Tzuudijc locidijc huídibi ca' huinjihuüy je t'y'ajt! ¿Huídibi jacmij'ajtin ymiid je huídibi ti yajyoxy o je altar? ²⁰ Pinjaty capxpatp je Dios ytjic ma Dios yajhuindzigiy y'agapxmuctaayb anajty huídijaty jiiiby yajpaatp ma Dios yajhuindzigiy. ²¹ Pinjaty capxpatp je Dios ytjic, ca' anajty jéyi capxpaady Dios ytjic, nañ ycapxpatp anajty Dios huídibi jiiiby tzinaayb. ²² Pinjaty capxpatp je tzajp, nañ capxpatp anajty Dios y'ane'mdac quipxyi miid Dios huídí tzinaayb jiiiby.

²³ ¡Ay miich ayoob ajcxy fariseos etz escribas ajcxy, huídí naybidaacip tudägy, e ca' yjanchity! Miich ajcxy mooyb Dios je tügpicy je majcpi huídibi je' paatip, ixti yi tzajnimang, yi ruda etz je pi'c'ujtz'ay ung. Per ca' ajcxy mduñcuenti je cötujcin huídibi jaccopicyity. Miich ajcxy ca' mdzinäy t'yududägy miid je migügtjic. Miich ajcxy ca' mmüdit pa'ayo'n miid je' ajcxy huídibi ayoob jottigooyb, etz ca' mmibijccixy Dios. Jada ixipy ajcxy mbaadumyb, e moogyixy Dios je tügpicy je majcpi. ²⁴ ¡Tzuudijc locitijc! Miich ajcxy ti m'anajxyp je uux, e mgojinnaaxcixy je camello, je mijpi iyujc.

²⁵ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jiiiby jotjoty huinma'ñyoty miich ajcxy miidity jibicpi. Miich ajcxy miid je ca'oy'ixii etz je adzojcin. Tim jadu'n nipaady nej jihuüy myajhuächpy ajcxy yi tasi ninücx yi texy ninücx, e chi myajhui'my jibicpi ma tasijot ma texyjot. ²⁶ ¡Tzuudijc miich ajcxy! Jayijp yajhuädz jiiiby jotjoty texy tasi, huin'it hui'm nañ jadu'n huädz nigix'amy.

²⁷ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jadu'n miich ajcxy nipaady nej öcpi jut. Je öcpi jut nigix janch oy yquëxigy, per jiiiby jutjoty ujtz jiiiby miid je öcpi pajc etz miid jibicpi. ²⁸ Jadu'n ajcxy mguëxigy mayjäyduum nej jihuüy ooy m'oyjäyity, per jiiiby jotjoty miid jibic-huinma'ñ.

²⁹ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Miich ajcxy mgo'abojtcixy yajxon je öcpi jut ma profeta ajcxy ñaaxtigüy, etz mxoxy ajcxy miid je pijy ma ñaaxtigüy je tudägy jäy ajcxy, ³⁰ e miich ajcxy nayñimaayigixy miñ xyipy: “Co ixipy anajty n'octzinaayim jecy'ajty ca' ngapubejtím co ajt nmij'ap nmijteedy yaj'ögy je profetas ajcxy etz je tudägy jäy ajcxy.” ³¹ Miid jada ycixpi miich ajcxy nejhuüy co miich ajcxy m'ap'adyii mdeedy'adyii je

jibicjäydjic ajcxy huidibi yaj'oc je profetas. ³² ¡Miich ajcxy yajcáxcixy je jibicpi huidibi ajcxy mmij'ap mmijteedy yajtzondac!

³³ ¡Jadu'n miich ajcxy nipaady nej mayxoox! Ca' miich ajcxy madägipy cöguägipy je tzaachypi jüby ayoodactuuby. ³⁴ E paady nguexaamybich ma miich ajcxy profetas etz huidibi ixpicyip ma Dios y'ayuc, etz huidibi xyaj'ixpigamb ajcxy yi Dios ñecy. Per miich ajcxy myaj'ögamyb myajruutzpedamyb nijëjity, etz nijëjity mgoxamyb mhuobamyb ajcxy jüby tzajtigoty etz m'ixhuidida'ñ mbahuidida'ñ ajcxy cajp cajp. ³⁵ Je mijpocy xyñigidaccoda'ñ miich ajcxy, jadu'n nej je oyjäy ñi'py temy yojcy jecy'ajty, oga'ñ chondacy müid je oyjäy Abel etz ycocixiy müid Zacarías, je Berequías y'ung huidibi miich ajcxy mmij'ap mmijteedy myaj'o'c jüby tzajtigoty ma altar. ³⁶ Janch tiy'ajt jadu'n nej nimaaygixy co je mijpocy ñigidaccoda'ñ je jäy ajcxy huidibi tzinaayb jadachambi tiempo.

Jesús yäxy müid Jerusalén cajp ycxipi

³⁷ ¡Miich ajcxy Jerusalén jäy! ¡Miich ajcxy Jerusalén jäy! Jerusalén jäy huidibi jecy'ajty yaj'ögy je profetitijc etz ycögächpy ajcxy je Dios ycocapxy. Canaag'oc ti njayajtügmujtähua'ñich miich ajcxy, jadu'n nej tzeydaj yajtügmujtäy je' y'ung ma yqueec pät, per miich ca' m'a'ixiygixy. ³⁸ Oc'ix miich ajcxy nej mdäjc abac yhui'maangixy. ³⁹ Janch tiy'ajt jadu'n nej nimaaygixy co camina miich ajcxy xy'ixipyich jadüg'oc, ixti cooni paadipy je xii je tiempo co jäy ajcxy ymina'ñpy: “Cömay yi huidibi müimb müid nhuindzin Dios yxii etz ymic'ajt.”

24

Jesús ymina'ñ co Dios ytijc yhuindigoyipy

¹ Ma anajty Jesús ti ypidzimni ma Dios ytijc, nicxp anajty, huin'it Jesús ydiscipulos ajcxy ñimijhuäci. Yi' ajcxy anajty yaj'ixiydähuamyb je Dios ytijc, com ooy anajty chachmijtjcity.

² Chi Jesús ymina'ñ:

—Huindicx miich ajcxy jada maybi mijjaty ytijc. Miinipy xii tiempo mina tüg'óciy jada tjic nicxy yhui'my taj xit, ca' ma tzaamacxy. Huindigoydähuipy tüg'óciy.

Je tiy'ajt ma ca'ni naaxhuiñybi ycxia'ñyi ytigoya'ñyi

³ Chi oy ñicxni ajcxy ma Olivos cögop. E co anajty jim, Jesús y'iñäy, chi ñimaayi ameech je' ydiscipulos ajcxy:

—Iich ajcxy nejhuñhuamyb mina jëdu'n ytuna'ñyii yjada'ñyii. ¿Ti je' quëxigamb co anajty miich mhuimbida'ñ ya naaxhuiñ, e co anajty je naaxhuiñybi ytigoya'ñ?

⁴ Chi Jesús nimay ajcxy:

—Mnaygüend'adiib ajcxy, ca'ydi pin xyhuin'ingixy. ⁵ Ooy mayjäy ñaybidägäänigixy müid iich nxii, naybidägäänigixy co je' ajcxy je Cristo, ymina'na'ñ ajcxy: “Iich je' je Cristo.” ⁶ Co miich ajcxy ayuc midohuipy co jäy ajcxy chachtziptungixy ñayñibidigigixy xi ya, chi ca' ajcxy mdzigüygixip, com ooy ycopicyity co jadu'n jayijp ytunüyb yjadüyb. Ca' nan hue' je' anajty tim cijxp tim tigooyb je xii je tiempo. ⁷ Nayñibidigüib naax cajp müid huingbi naax huingbi cajp, e gobierno müid huingbi gobierno. E miinip mic'ujx canaag'it etz mij yuu etz mij pa'm xi ya. ⁸ Jada tzaachypi ayo'n oga'ni anajty chondägy huidibi nminaxaanim nyajnaxaanim. ⁹ Huin'it xii huin'it tiempo miich ajcxy myajcüyegipy, jigix ychaachytungixipy e xyaj'ögixipy. E tüg'óciy je

maynaaxhuiñyäjy xyca'ixáangixipy, miid iich nxii ycxipi. ¹⁰ Je huin'it tiempo may je jāy ajcxy yajtigoya'ñ ymibijcin. E nañ jadu'n ñayca'oy'ixáangixy etz ñayñigapxáangixy ñi'ojihuáangixy miñ xyipy. ¹¹ Ooy may quëxígaangixy aanüdaacpidijc mina'naangixy co Dios y'ayuc ytiy' ajt nimiydaci, e mayjäy oy huin'inaangixy. ¹² E je' co ajcxy xii jimijt ñajtzñnicxiiyñi jac tim nigi jibicpi tunaangixy, ca' ajcxy y'ocnaychójcinipy miñ xyipy. ¹³ Per pinjaty tiydudägy panicxp je mibijcin, je' ajcxy ypaadip y'alma nidzocin. ¹⁴ Copicy co jayijp yajcapxhuäcxa'ñ huindu'ñybi naaxhuiñybi Dios y'ayuc ytiy'ajt jemybi, jaydëbi jāy ajcxy nidüg'ociy nejhuñy Dios ytiy'ajt. Huin'it je naaxhuiñybi ycijxni ytigooyñi.

¹⁵⁻¹⁶ Je profeta Daniel jaay jecy'ajty jada ayuc (miich ajcxy pinjaty capx jada necy huin'ihuiñygy) ma minañ: Miich ajcxy co m'ixy pinjaty jibic-huinma'ñ tumb nej ca' ypadyii ma Dios ytijc, huidibi ooy ycodzigijty, chi miich ajcxy huidibi tzinaayb jim Judea, co jadu'n m'ijxcixy, chi nicx mgueectzocixipy mic'amy ma tungop. ¹⁷ Pinjaty huidibi yajpatp ma ytjcnicx ca' nicxy tijaty yajpidzimy ma ytjic. ¹⁸ Yi jāy ajcxy huidibi yajpatp camjoty, ca' ajcxy huimbidity co yajpidzimipy tijaty ma ytjic. ¹⁹ Huin'it tiempo ayo'n ypadamy je töxyjäy ajcxy huidibi anajty y'ungdzim'ijt, e nañ jadu'n je' ajcxy huidibi miid y'ungma'xung. ²⁰ May'ajt ajcxy mbijctzoohipy yi Dios co jada jadu'mbi ayo'n ca' ytuniiyb yjadüyb ma anajty ytiichtiempoijty, etz ma anajty pocxinxiijoty. ²¹ Huin'it oy ayo'n jotmay ytuna'ñyii yjada'ñyii huidibi nicamina ycatuñyii ycajadyiini mabi naaxhuiñybi chondägy e nicamina jadu'n ycajactuniiyb ycajacjadiyb. ²² Pen ca' Dios capx'aduga'ñ yjiibi ayo'n xii ayo'n tiempo, ni pin ca' chögipy. Per Dios ycapx'adugamy yjiibi ayo'n tiempo miid je mibijcpidijc ycxipi huidibi Dios ti huin'ixy. ²³ Co yi jadu'mbi xii tiempo anajty ymiin, ca' mmibijccixipy, pen ji pinjaty xyñimaangixy: "Ijxcix, cha yajpaady je Cristo", o "Jim'amy yajpaady je Cristo." Ca' mmibijccixipy. ²⁴ Pues miinip jāy ajcxy huidibi huin'inaangixy ymigütiyc. Ci'm ñayyajnaáangixy jadu'n nej jihuñy je' yCristity, e yminaangixipy co capxhuäcxy ajcxy Dios y'ayuc, e ca' yjanchity. Ytunip ajcxy mihuinma'ñ etz mijpi ijxpejt, ixti jëbi jahuin'ingixip je mayjäy huidibi Dios ti yhuin'ixyii. Per ca' Dios a'ixihuipy co yhuin'iniiyb yi yjäy. ²⁵ Ti iich yi' jayijpni nigapxich. ²⁶ E co pinjaty ajcxy xyñimähuiipy: "Chim je' je Cristo mijtigidumb", ca' ajcxy mninixcip. O co pinjaty ajcxy xyñimähuiipy: "Chiib je' tigoty yhuingoyüch", ca' ajcxy mmibigipy. ²⁷ Iich je' je jāy huidibi tzoon tzajpjoty, nhuimbidaambich ya naaxhuiñ miid je tiicxin je jájin, jadu'n nej je luidzuc huidi tücxp xii bidzimyb ixti xügidägy. ²⁸ Ma je öcp ninicx yajpaady jim ñimujctähua'ñ je luud ajcxy.

Nejjada' je' Dios y'ung ymiinipy

²⁹ Co anajty ti ñaxy je ayo'n xii ayo'n tiempo, huin'it je xii ycoodzygidäga'ñ, je po' ca' ytiicxa'ñ, je madza' ycadähua'ñ etz janch mic je tzajp yücxa'ñ. ³⁰ Co yi jadu'mbi ytuniiyb yjadüyb, chi quëxíga'ñ tzajpjoty je ijxpejt co iich, je jāy huidibi tzoon tzajpjoty, nhuimbida'ñich ya naaxhuiñ. E chi tüg'ociy je mayjäy tájip máyip yjihuiñuipy yäxy, chi ajcxy ixipy je jāy huidi tzoon tzajpjoty miñ anajty jocjoty miid ymic'ajt y'oy'ajt. ³¹ Chi nguexipyich zoon ajcxy co huen mic yajxixy ajcxy ytrompeta, jigix yömujctähuiipy tüg'ociy pinjaty huin'ijxyp xi ya ma ajcxy yajpaady ya naaxhuiñ; ma xii pidzimyb, ma xii cidägy, ma jünboj pidzimyb, ma tichpoj pidzimyb.

³² Jim miich ajcxy ijxpejt mbigipy ma je higueri quipy jadu'n nej je xii tiempo ymiin cidägy. Co je higueri quipy jadüg'oc pidägipy je' y'aay'ung, huin'it miich ajcxy nejhuihuipy co yhuingoni mina ypottigiiyñi. ³³ Tim jadu'n nej tiy'ajt mbijccixy ma je higueri quipy co jada ajcxy jadu'n ixipy nejhuihuipy co yhuingoni anajty je xii je tiempo jii'n'aguy tijc'aguy. ³⁴ Janch tiy'ajt jadu'n nej nimaaygixy co tüg'óciy ytuna'ñyii yjada'ñyii ma ca'ni anajty je jäy y'óctäy huidibi anajty jactzinaayb huin'it tiempo. ³⁵ Je tzaajp etz je naaxhuiñybi cixam tigoyam yi', per iich n'ayuc ca' ycixa'ñ ytigoya'ñ nimina.

³⁶ Ca' ni pin nejhuüy je xii je hora mina nhuimbida'ñich ya naaxhuiñybi. Ni je ángeles ajcxy canejuüy, ni je Dios y'ung canejuüy. Tügpaic je Dios Teedy nejhuüy.

³⁷ Com jadu'n nej yjajty ya naaxhuiñ jecy'ajty, co je Noé chinay, nañ tim jadu'n yjadipy co anajty nhuimbityich, yi jäy huidibi tzoon tzaajpoty, ya naaxhuiñ. ³⁸ Jecy'ajty co anajty ca'ni je ayo'nduu ymiin ya naaxhuiñybi, hue' je' mayjäy ajcxy chinay agujc jotcuyc, ycaaygixy y'uuccixy etz yajpijccixy je y'ung y'anäg, ixti cooni paty je xii tzuu co ytigiiy Noé barcojoty. ³⁹ Je mayjäy ajcxy ca' ajcxy cuenttuñ co ayo'n miina'ñ anajty, ixti cooni je ayo'nduu miin e óctay ajcxy je jäy ñijoty. Jadu'n nej yjajty jecy'ajty miid je mayjäy huidibi tzinaayb anajty quipxy miid Noé, nañ tim jadu'n yjada'ñ miid je jäy ajcxy huidibi tzinähuiip jac jiiñi co iich anajty nhuimbityich ya naaxhuiñ jadüg'oc. ⁴⁰ Je huin'it tiempo co nhuimbidityich jadüg'oc ya naaxhuiñ, chi metz yëydijc yajpaadipy ma ytundac, tüg je' yajminicxa'ñ, e tüg je' yhui'ma'ñ. ⁴¹ E mejtz töxyjäy yajpaadip anajty yjich, tüg je' yajminicxa'ñ, e tüg je' yhui'ma'ñ.

⁴² E paady miich ajcxy ni'ixi ijtcix, xyjijp'ixipyich com ca' mnejhuüygyixy mina miich ajcxy je mHuindzin ymiina'ñ. ⁴³ Mnejhuüygyixy miich jada co ixypy je ungeedy nejhuüy ti hora je meetzpi miina'ñ, ca'p je' ymähuiipy, e ca'p a'i'xihuipy co je meetzpi ytigihuipy tigoty. ⁴⁴ Nañ tim jadu'n miich ajcxy ni'ixi ijtcix, je' co iich, je jäy huidibi tzoon tzaajpoty, nhuimbida'ñich ma ca' ni pin anajty nejhuüy.

Je tumbi tudägypy etz je huidibi ca'p ytudägyity

⁴⁵ ¿Huidibi tumbi je' ya huidibi tumb miid yhuindzin janch cixyot huiniot huidibi miid ixpijcin, huidibi je' yhuindzin moopypy ane'min ma ytijc, huidibi yajniigidagihuipy ma ymiigügtijc caayin uucin mina ypadyii? ⁴⁶ Janch jotcuyc je tumbi co yhuimbiditye je' yhuindzin, e je' cuyduñ jadu'n nej je' yhuindzin ti ñimäyii. ⁴⁷ Janch tiy'ajt jadu'n nej nimaaygixy co je huindzin ytumbi yajniigohuajc'adyii tüg'óciy huidibi ymiid. ⁴⁸ Pen je tumbi jibicjäybi mina'ñ jotjoty huinma'ñyoty: "Huäcxijpni iich je nhuindzin." ⁴⁹ E chi nimajtztagip ymiigügtijc, e ytigihuip caaybi uucpi miid amüggyäydijc; ⁵⁰ chi je tumbi yhuindzin minipy ma ytijc huidi xii mina je tumbi ca' anajty aa'ixy jijp'ixy e ni je hora anajty canejuüy. ⁵¹ Chi huindzin tzaachytunip je' ytumbi, etz ypidägipy miid je jacjadyii jäy ajcxy yajpaady huidibi naybi dáacigixp nej tudäggyäyity e ca' yjanchity. Jiiby ayoodactuuby yjihua'ñ yäxa'ñ etz huinmucxa'ñ huingueda'ñ ytüzt miid jotmay.

25

Je ijxpejt ma je majcpi töxy'anäg

¹ Co anajty nhuimbityich jadüg'oc ya naaxhuiñybi jadu'n nipaadip nej je ni-majcpi töxy'anäg co ñicxy ajcxy ñayjijpcobadihuáanigixy miid je yëydijc huidi

pigamb. Chi minicxy ajcxy aceite lámpara co yajticxaangixy. ²⁻⁴ Nimigoox je töxy'anäg huidi cohuinmañity etz ahuing minicxy jadüg quig ujtz müid aceite. E nimigoox je töxy'anäg ca'pi ajcxy cohuinmañity, e ca' ajcxy ahuing minicxy jadüg quig aceite. ⁵ E je yëydijc huidibi anajty pigamb huäcxijpni ooy, chi je töxy'anäg ajcxy ooy ytigüyñi mä'uuybi. ⁶ E mijcuctz ajcxy midoy co tüg jäy mic minañ: “Chi miñ je yëydijc huidibi pigamb, nicx jijpcobadüygixy.” ⁷ E huin'it je nimajcpi töxy'anäg ajcxy ypidictay. Chi ajcxy yjin ni'ixüy nidüg nidüg. ⁸ Chi je nimigooxpi huidibi ca' ycohuinmañity nimay je nimigooxpi huidibi cohuinmañip: “Hich ajcxy hueeni mooygich yi m'aceite, co pidzaanip ich ajcxy njün.” ⁹ Chi y'adzooy je cohuinmañybi ajcxy: “Ca' nyegañich, je' co ca' ich ajcxy nje' yhuaadühuañ. Nicx müich ajcxy juy jim ma ytoogyii.” ¹⁰ E ti anajty ajcxy ñicxy aceite juuyb je huidibi ajcxy ca' ycohuinmañity, co oy yjaty je yëydijc huidibi pigaanip. Chi je cohuinmañybi ajcxy müid tigiy tigoty je yëydijc huidibi pigaanip. Chi tijc yaj'agüy. ¹¹ E com jecyñi oy yhuimbity ajcxy je huidibi ca' ycohuinmañity. Chi ajcxy yminañ: “¡Huindzin, Huindzin, ocyaj'ahuädz mdijc!” ¹² Chi je' y'adzooy: “Ca' ich müich ajcxy n'ixy'adyii.”

¹³ Chi Jesús yminañ:

—Nayñi'ixüyigix, je' co ca' mnejhuüygixy mina ich nhuimbidañich jadüg'oc ya naaxhuiñ.

Je ijxpejt ma je meeñ

¹⁴ Co ich anajty nhuimbidañich jadüg'oc ya naaxhuiñybi, jadu'n nipaadij nej jadaayaabi ijxpejt, co anajty tüg comeñyjäy chonañ viajetumbi, chi je' ytumbi ajcxy mooy je meeñ co huen cuend'ajtcixy. ¹⁵ Je ymidügpi tumbi moy migoox mil meeñ. Je mimetzpi moy mejtz mil. E je ymidügügp moy tüg mil. E jadu'n ajcxy moy nije' nije' nej huaad cuend'ajtcixy. Chi choñ je huindzin viajetumbi. ¹⁶ Je tumbi huidibi cidigüy: migoox mil meeñ, ytigiy ajuybi adoocpi. Chi je' ymeeñ y'ung'ajty jamigoox mil. ¹⁷ Nañ jadu'n huidibi cidigüy mejtz mil, ytigüy tumbi müid je meeñ. Chi je' ymeeñ y'ung'ajty ja mejtz mil. ¹⁸ Je huidibi cidigüy tüg mil hue' oy pidägy je meeñ tützjoty. Chi tajiy, e yützi je yhuindzin ymeeñ. ¹⁹ E com jecyñi oy yhuimbity je huindzin. Chi ytigüy cuenta yaj'oyüyb müid je ytumbi ajcxy. ²⁰ Chi miñ jayijp je huidibi anajty ti cidigüyii migoox mil meeñ. Chi je tumbi yajcidigüy je' yhuindzin majc mil meeñ. Chi yminañ: “Miich ti xymooyich migoox mil meeñ, e ich ti nyaj'ung'atyich jamigoox mil.”

²¹ Chi je' yhuindzin minaañ: “Janch jotcujc ich cham co jadu'n ti mduñ müid je hueenbi meeñ. Miich ooy mdudägy etz oy ti mduñ, e paady njacmöhuamyb jacmay. Tigí' ma ich, e xondäg müid ich.” ²² Chi ymiñ je huidibi anajty ti cidigüyii mejtz mil meeñ. Chi nimay je yhuindzin: “Miich xymooyich mejtz mil meeñ, e ti nyaj'ung'atyich jamejtz mil.” ²³ Huin'it je' yhuindzin ñimaayi: “Janch jotcujc ich cham, co jadu'n oy ti mduñ müid ich nmeeñ, e paady njacmöhuamy jacmay. Tigí' xondäg müid ich.”

²⁴ E co oy yja'ty je huidibi cidigüyib tüg mil meeñ, chi nimay je' yhuindzin: “Huindzin, hue' ndijyich müich myëydijc'aty janch jibic jäy. Miich cosecha myajpidicpy ma ca' ti mnüpy etz müich mgosecha myajpidicpy ma ca' ti ti mhuijy. ²⁵ Paady ooy ndzigüyich co je meeñ ngayaj'ung'adipyich. E co müich mhuimbidañi, mdzogamy je nmeeñ, e paady je mgí'mmeeñ ti nyüchich, je' co ndzigüyich co nicxy nyajtigooyich müich nmeeñ. Cha je meeñ huidibi ti xymooyich.”

26 Chi je' yhuindzin ñimaayi: "Jibic tumbi miich, ooy mnuuxity. ¿Nej ti mnejhuïy miich co ñich cosecha nyajpidigiyich ma ca' ti ti nnibyich, etz cosecha nyajpidigiyich ma ca' ti ti nhuijyich? 27 Oy co ixypy miich je ñich nmeen ti myejc'anuuicy, e jim ixypy y'ung'at. E cham co ti nhuimbityich cham ixypy je nmeenich xycidigiyich miid nimeen'ung."

28 Chi je huindzin nimay je jacjadyi tumbidijc: "Pijci ajcxy yi meen huidi ymiid, e mooygix yi huidibi majc mil ymiid. 29 Je huidibi oy tumb jacyajmohuamb je' anaxy, e ymiid'adamy je' conaxpi. Je' huidibi hueen miid yajpigamb je' huidi ymiid, je' co ca' oy ti ytuñ miid je hueenbi. 30 Yi jilibi tumbi huidibi ca' oy ytuñ, pidäg ajcxy agootztuuby ma yjihuipy yaxipy, ma ytiitz huinmuucx huinguedip miid jotmay."

Co anajty naaxhuiñyäjy ajcxy yajtyduñ

31 Co ñich, je jäy huidibi tzoon tzajpjoty, nhuimbity ñich anajty jadüg'oc ya naaxhuiñybi, huin'it n'ixtäga'ñich ma ñich n'ane'mdac etz ane'ma'ñich miid ñich nmij'ajtín etz n'oy'ajtin. 32 Chi tüg'óciy je naaxhuiñyäjy yajtüg'mujctähua'ñ ma ñich. Nhuäcxamybich jadüg jadüg jadu'n nej jäy ajcxy huäcxy je cöbixy etz je chiibo ajcxy. 33 Nbidägaamybich a'oy'amy je jäy ajcxy huidibi oy ti ytungixy miid ñich. E yi' ajcxy jadu'n nipaadip nej cöbixy. Nbidägaamybich anajty'amy yi jäy ajcxy huidibi jibic ti ytungixy miid ñich. E yi' ajcxy jadu'n nipaadip nej chiibi.

34 Chi nnimähuibich yi jäy ajcxy huidibi a'oy'amy: "Miingix miich ajcxy huidibi Dios Teedy ti xyconuucxy ajcxy. Je'ajtigix ane'mdac huidibi ijtp ni'ixi miid miich ajcxy ycixpi maabi naaxhuiñybi chondägy. 35 Ma anajty ñich nyuubögyii miich ajcxy ti xyajcaayich; ma anajty ñich ndidzïyii, miich ajcxy ti xyajni'üg'yich; ma anajty ñich nihuidityich, miich ajcxy jättac ti xymöyich; 36 ma anajty ñich je nhuit ti nyajmayjatyich, miich ajcxy ti xymöyich je huit; ma anajty ñich nbigyijich, miich ajcxy ti xycuend'atyich; etz co anajty ñich pujxtigoty nyajpaady, miich ajcxy ti xycogapxïyich."

37 Huin'it ymina'na'ñ je jäy ajcxy huidibi oy ti ytungixy miid ñich: "Huindzin, ¿mina ñich miich ajcxy ti n'ixy ayuu, e ti nyajcay? O ¿mina ñich miich ajcxy ti n'ixy co mdidzïyii, e ti nyajni'ügy? 38 ¿Mina ñich miich ajcxy ti n'ixy co miich nihuidity, e ti nmöy jättac? O ¿mina mhuit ti myajmayjaty, e ti nmöy je mhuit? 39 ¿Mina ñich miich ajcxy ti n'ixy, co miich mbigyii, e oy ti ngüend'aty? etz ¿mina ñich miich ajcxy ti n'ixy co pujxtigoty nyajpaady, e oy ti ngogapxïy?" 40 Hich, je mij'ane'mbi, n'adzohuimbidityich: "Janch tiy'ajt jadu'n nej nnimaaygixy co yi jäy ajcxy huidibi oy ti ytungixy miid pinjaty huidibi xymijnicxpejtpich, nañ jadu'n oy ti ytungixy miid ñich. Ca' ñëjity co jäy ajcxy ymina'ñ co ca' ypinity je jäy huidibi xymijnicxpejtpich."

41 Chi ñich, je mij'ane'mbi, nimähuibich je jäy ajcxy huidibi yajpatp: "Huin-huäctuutich miich ajcxy jibicjäydijc. Nixcy miich ajcxy mijjinjoty, huidibi ijtp ni'ixi miid je mujcu' ycixpi etz miid je' y'angeles ajcxy ycixpi. 42 Ma anajty ñich nyuubögyii, ca' miich ajcxy xyajcaayich; ma anajty ñich ndidzïyii, ca' miich ajcxy xyajni'ucyich; 43 ma anajty nihuidityich, ca' miich ajcxy xyajjättägyich; ma anajty ñich nhuit xytigoy'ijtigich, ca' miich ajcxy huit xymooyich; etz ma anajty ñich nbigyii e nyajpaadyich pujxtigoty, ca' miich ajcxy xycogapxïyich." 44 E chi je' ajcxy ymina'na'ñ: "Huindzin, ¿mina ñich ajcxy miich ti n'ijxcixy co anajty miich yubögyii tidzïyii, o co anajty

mnihuidity? ¿Mina ti n'ijxcixy co ca' mhuit müidity, o co mbigyii, o co anajty pujxtigoty myajpaady, e ca' iich ajcxy müich nbubejty?"

⁴⁵ Chi iich, je mij'ane'mbi, n'adzohua'ñich: "Janch tiy'ajt jadu'n nej nnímaaygixy. Huen tim pinity huidibi ca' müidity pa'ayo'n müid je' ajcxy huidibi xymijñicxypejtpich, oy jäy yjamina'ñ co ca' ypinity, iich müich ajcxy anajty jadu'n ti xytuñich." ⁴⁶ E jada ajcxy nicxip huinixii ayoodactuuby, e yi tudägyi ajcxy nicxip ma yi jugy'ajtin huinixiibi.

26

Je huinma'ñ nej anajty Jesús madzaangixy

¹ Co Jesús nigapxtay tüg'óciy jadayaabi ayuc, chi nimay yi' ydiscípulos ajcxy:

² —Müich ajcxy mnejhuüyb co huixtic je amayxi, je pascua xii. Pascua xiioty iich, je jäy huidibi tzoon tzajpjoty, nyajciyega'ñich ma nmidzipich etz xyajcruutzpeda'ñich, xyaj'öga'ñich ajcxy.

³ Je huin'it xii je teedy huidibi tungmüid ajcxy, je escribas, etz je mijjäydijc ajcxy ñayöymujctayi ma je' ytiba' je teedy huidi jacmijtungmüid huidi anajty yxi Caifás. ⁴ E jim ma Caifás ytiba' jim ajcxy huinma'ñy'ixtay nej jëbi yajmachycägixy Jesús müid anii etz yaj'ögaangixy. ⁵ Chi ajcxy ñayñímaayi müi xyipy:

—Ca' y'oyity co xiioty nmajzim Jesús. Ca' jecyity co je mayjäy xymijotma'ttayim etz ytigihuij ajcxy huambi jihuiybi.

Tüg töxyjäy pidacy aceite ma Jesús ycohuajc

⁶ Jesús anajty yajpaady Betania ma Simón ytijc, je Simón huidibi anajty ymüid je jibic nibüdz pa'm. ⁷ E ma anajty Jesús ycay, huin'it ymüiñ tüg töxyjäy müid tüg quiig ujtz müid perfume huidibi ooy oy yxuugy, jada perfume ooy anajty choohuity. Chi je töxyjäy yaj'ahuäch je quiig, e yajcöyogiy Jesús je perfume huidibi ooy oy yxuugy. ⁸ Co Jesús ydiscípulos ajcxy jadu'n ijxy, chi ajcxy mijotma'ty je töxyjäy. Chi ajcxy ñayñímaayi müi xyipy:

—¿Ti co jada perfume huidibi ooy oy xuugy ayoy? ⁹ Tzou ixypy ooy jada yajtoocy, jaydëbi ixypy müid yajpubet je ayoobitijc.

¹⁰ E co Jesús nejhuüy nej ajcxy yminañ, chi nimay:

—¿Na'amy co m'amayiy jadayaabi töxyjäy? Yi' huidibi ti tuñ, je' yi' tüg oybi.

¹¹ E ayoobtijc ca' ytigoy'ida'ñ ma müich ajcxy nimina. Huen huidibi xii huen huidibi tiempo jëbi müich ajcxy mbubedipy ayoobtijc. Iich ca' n'ida'ñich jecy ya müid müich ajcxy. ¹² Jada töxyjäy ti pidägy ma iich nninixc perfume huidibi ooy oy xuugy, jayijp ca'ni nnaaxtigiyich. Jadu'n je' jijp'ijxpy mina nnaaxtigihua'ñich. ¹³ E huentimma'amyity je Dios y'ayuc anajty yajcapx-huächy huindu'my naaxhuin' jim yajnigapxa'ñ jadu'n nej je töxyjäy ti tuñ cham müid iich, e jadu'n je mayjäy jäymedzipy jada töxyjäy.

Judas cüyecy yi Jesús ma ymidzip agojix

¹⁴ Chi nidüg je' ydiscípulos huidibi yxi Judas Iscariote oy nimäy je teedy mijtungmüidpi, ¹⁵ nimay ajcxy:

—¿Ti ajcxy xymöhuibich co ngüyegipyich Jesús?

Chi ajcxy moy iipxmajc plata meeñ. ¹⁶ Co ajcxy meeñ ymooy, chi mic'amy Judas yhuinma'ñ'ixtay nej jëbi cüyecy Jesús ma ymidzip.

Jesús y'adzuu'ajty pascua xiioty

17 Je ymidügpí xii, je amayxii, je pascua xii ma anajty yajcay je tzajcaagy huídí ca' levadura mii'dity, huin'it je' ydiscípulos ajcxy nimiiñ Jesús. Chi ajcxy yajtyy:

—¿Ma mdzocy co iich ajcxy ni'ixihuip huídí mgayamy je pascua xii cixpi?

18 Chi Jesús y'adzooy:

—Nícx miich ajcxy jim Jerusalén ma tüg jáy ytíj, e mnimáhuip: “Íich nHuindzin jadu'n minamb co yhuingoñ je' yxii yhora, e paady ma miich mdíj yí tuna'ñ je pascua xii adzu'ajtn mii'd ydiscípulos ajcxy.”

19 Huin'it Jesús ydiscípulos ajcxy cuyduñ jadu'n nej Jesús anajty ti ñimáyii. Chi ni'ixiiy ajcxy je pascua adzuu'íbi.

20 E co chu'íy, chi Jesús y'ixtacy ma je mesa mii'd je nimajmetzpi ydiscípulos.

21 E ma anajty ycaaygíxy, huin'it nimay je nimajmetzpi:

—Nidügti miich ajcxy huídíbi xycíyegaambich ma nmídzípich.

22 Huin'it ajcxy yajtay taj may. Chi ajcxy yajtyy:

—Huindzin, ¿nej iich jada'jí?

23 Chi Jesús y'adzooy:

—Yí huídí mii'd ndocxmucyich, yí' je' jadu'n xycíyegaambich ma nmídzípich. 24 Janch tíy'ajt co iich n'öga'ñich, jadu'n nej je profeta jaay jecy'ajty. ¡Ay ayooob je yéydíj huídí xycíyegaambich! Jac'oy co ca' ycama'xung'aty je huídíbi xycíyegaambich.

25 Chi Judas ymínañ:

—Huindzin, ¿nej iich jada'jí?

Chi Jesús y'adzooy:

—Miich jadu'n minamb.

26 E ma anajty ajcxy ycaay, huin'it Jesús tzajcaagy conígy. Chi yajnaxty Dioscojuyip. E chi jada' tujchuäcxy je tzajcaagy. Chi moy je nimajmetzpi ajcxy je tzajcaagy, e ymínañ:

—Cay miich ajcxy jadayaabi tzajcaagy, yí' je' iich je nniñcixch.

27 Huin'it Jesús ciyígy je y'ügy. Chi yajnaxty Dioscojuyip. E huin'it moy je ügy je nimajmetzpi ajcxy, e ymínañ:

—Üc miich ajcxy jadayaabi ügy, 28 yí' je' iich je nni'pyich. Yí' ñigapxy co Dios ti yaj'aducy je jemybi ayuc. E iich nni'py ytema'ñ yoga'ñ mii'd je mayjá ycipi, jaydēbi ajcxy paadip je huinmeecxin mii'd je ypocy ycipi. 29 Janch tíy'ajt jadu'n nej nni'maaygíxy, co ca' n'oc'ügaanich jadüg'oc je pascua xii ügy, íxti cooni je xii tiempo paadip co iich ajt n'uucim huinjemybi je pascua xii ügy ma iich nDeedy y'ane'min.

Jesús ñigapxy co Pedro ycoyütza'ñyii

30 E co ti y'í'däy, chi ajcxy choon'ñicxy ma Olivos cögop. 31 Chi Jesús je' ydiscípulos ajcxy nimay:

—Nidüg'ócíy miich ajcxy xy'ixmajtztähua'ñich cham coodz. Je' co jaay-bejty jadu'n miiñ ma je Dios ñecy: “Ögip je cuend'ajtpi, huin'it je cöbixy yöyhuäcxtähua'ñ.” 32 E co anajty iich njugypicyich jadüg'oc ma anajty ti n'ögyich, chi jayíjpní ñnicxa'ñich ma Galilea, e jim naybaatim nidüg'ócíy.

33 Chi Pedro ymínañ:

—Oy yí jacjadyiibi miügügtíj cich xyjadim'ixmajtztäy, per ni camina xii iich miich n'ixmadzípy.

34 Chi Jesús Pedro nimay:

—Janch tɨy'ajt jadu'n nɨmāyɨch, cham coodz ca'nɨ anajty je tzey yaxɨgy, miich tugɨg'oc mɨna'nɨp co ca' xy'ixy'adyiɨjɨch.

³⁵ Chi Pedro ymɨnañ:

—Oy ɨch ndɨm'ogɨp mɨɨd miich, ni camɨna ngamɨná'nɨbɨch co ca' miich n'ix'adyiɨ.

E nidüg'ócɨy je' ydiscípulos ac tɨm jadu'n ymɨnañ.

Jesús mɨbɨjctzoy Dios jɨm Getsemaní

³⁶ Chi Jesús ñɨcxy mɨɨd je' ydiscípulos ajcxy, oy yja'tcɨxy jɨm Getsemaní. Chi jɨm Jesús nɨmay je ydiscípulos ajcxy:

—Ya miich ajcxy oc'ɨña', mɨɨn ɨch n'ocnɨcxyɨch jɨm'amy Dios mɨbɨjctzoobi.

³⁷ E chi Jesús ñɨcxy mɨɨd Pedro etz nañ jadu'n mɨɨd je Zebedeo ymang nimetzpɨ. E jɨm Jesús ñayjɨhuɨyɨ janch tajy may mɨj cajee. ³⁸ E chi jɨm jajnɨmay je nidügɨgɨpɨ discípulos:

—Nayjɨhuɨyɨbɨch taj may ma njot nhuɨnma'ñ, ixtɨ mabaad anajty n'ogɨch mɨɨd tájɨn máyɨn. Hui'm miich ajcxy ya mɨɨd ɨch etz ca' mmaagɨxy.

³⁹ Huɨn'it Jesús ñajtzöyɨyɨ mɨjci'm jahui'. Chi jɨm ñaygojxtɨnaydacɨ naaxcɨxy, e ytɨgɨy Dios mɨbɨjctzoobi, ymɨnañ:

—Dios Teedy, ɨch nDios, pen jébi jadu'n, mduñ may'ajt pɨjcgɨch jadayaabi tzaachypɨ ayo'n, per ca' yjadu'nɨty nej ɨch ndzojɨn mdunɨpy, jadu'n mdunɨpy janchtɨy nej miich mdzojɨn.

⁴⁰ Huɨn'it Jesús yhuɨmbɨjty jɨm ma anajty tɨ jajhui'my je nidügɨgɨpɨ. E oy paady ac tɨm maab anajty ajcxy. Chi nɨmay je Pedro:

—¿Nej ca' madäga'ñ miich ajcxy co m'ɨdɨpy juugy tüg hora mɨɨd ɨch ycɨxpɨ? ⁴¹ Hui'mi' ya, juugy m'ɨdɨpy etz mɨbɨjctzoo Dios, jaydéb ca' je ca'oybɨ xymɨmadägɨp. Janch tɨy'ajt co jotjoty ooy mnɨjot'ajtcɨxy com tunaangɨxy yɨ oybɨ. Per yɨ mnɨnɨcɨ ca' ymadäga'ñ nɨcxy tuñ oybɨ.

⁴² Chi mɨmetz'oc Jesús ñɨcxy oy Dios mɨbɨjctzoy, ymɨnañ:

—Dios Teedy, pen copɨcy co ɨch nbaadɨbɨch je ayo'n, huen jadu'n yjadɨyɨb mɨɨd ɨch nej miich mdzojɨn.

⁴³ Chi jadüg'oc Jesús huɨmbɨjty ma je nidügɨgɨpɨ discípulos, e oy pátnɨbɨ maab ajcxy, je' co ca' anajty ajcxy mɨmadägy máhuɨ. ⁴⁴ Chi jajhui'my ajcxy, e mɨdüg'oc ñɨcxy Dios mɨbɨjctzoobi. E nañ tɨm jadu'n oy mɨnaanɨp jadu'n nej anajty tɨ y'ocmɨnamb. ⁴⁵ Chi jadüg'oc huɨmbɨjtnɨ jɨm ma je nidügɨgɨpɨ, chi nɨmay ajcxy:

—¿Máagɨxnɨ? Pócxcɨx jadachambɨ. Tɨ je tiempo yhuaad'ajtnɨ mɨna ɨch, je jāy huɨdɨbɨ tzoon tzajpjoty, nyajcɨyega'ñɨch ma yɨ jɨbɨcɨjädɨjɨc ajcxy. ⁴⁶ Pɨdɨccɨx, tzoc jámɨm, chi ymɨñ je huɨdɨbɨ xycɨyegaambɨch ma nmɨdzɨpɨch.

Tzummy mach ajcxy Jesús jajnɨcxy

⁴⁷ Jesús capxnɨ anajty jɨm co yjätɨ je Judas. Judas hue' je' nidügɨtɨ je majmetzpɨ discípulos huɨdɨbɨ Jesús yhuɨn'ɨjx. E je Judas mɨɨd ja'ty mayjäy, je huɨdɨbɨ anajty tɨ quexy je judɨo teedy mɨjtungmɨɨdpɨ etz je mɨjjäyɨjɨc. E je mayjäy hue' anajty ajcxy mɨɨd ypujx etz quipy. ⁴⁸ Judas, je huɨdɨbɨ anajty cɨyɨjɨp Jesús, tɨ anajty jajjɨp yecy tüg ɨjxpejt huɨdɨbɨ mɨɨd jébi ajcxy ɨjxcapy Jesús. Jadu'n jajjɨp Judas ycapxtuñ mɨɨd je' ajcxy, e ymɨnañ:

—Je jāy huɨdɨbɨ anajty ndzúcɨpɨch, yɨ' je' Jesús. Májtzɨɨx.

⁴⁹ Huɨn'it Judas nɨmɨjhuägɨy Jesús co capxpocxa'ñ, chi ymɨnañ:

—jHuɨdzɨn!

Chi tzúcɨxy.

⁵⁰ Chi Jesús ñimayi:

—Migüg, ¿na'amy co xyñimijhuägyich?

E co jadu'n ñimay, chi mic'amy yi' ajcxy majch Jesús. Chi ajcxy yajnicxy tzumy mach.

⁵¹ E huin'it nidüg je Jesús ymigüg, juudy je ypujx. Chi tatzpujxtucy je teedy mjtungmüdpí ytumbi. ⁵² Chi Jesús ñimay je' ydiscípulo:

—Pidäg yi' mbujx ma ytjic. Com pinjaty tziptumb müid pujx, nañ jadu'n y'ögipy müid pujx. ⁵³ ¿Nej ca' mnejhuüy co ñich jëbi nbjctzooyich cham adzu'x may ángeles, je huídibi xyñihuá'ñibich ma nmidzipich? ⁵⁴ ¿Per nej ycixipy yca'pxipy nej miññ jaaybety, jadu'n nej cham ytuñyii yjadyii müid ñich ycixpi?

⁵⁵ Chi Jesús ñimay je mayjäy:

—Miich ajcxy ti xyñidzonüyich müid je pujx müid je quiipy. ¿Nej mdiy ñich meetzpi o jäy yaj'öcpich? ñich jabom jabom anajty ññäyich nyaj'ixpicyich miich ajcxy jüby ma Dios ytjic. E ca' miich ajcxy xymajchich. ⁵⁶ Huinjihu' miich ajcxy co tüg'óciy yam ytuñyii yjadyii ca'px tím jadu'n nej je profeta ajcxy cojaay jecy'ajty.

Huin'it nidüg'óciy je' ydiscípulos ajcxy yqueectay. Chi Jesús yhu'i'my naydügpajc.

Jesús ma naymujcpidjic yhuinduu

⁵⁷ Je' ajcxy huídibi anajty ti mach Jesús, yajnicx ajcxy jim ma Caifás ytjic. E jim ma Caifás ytjic ma anajty ti ñayöymujctáayigixy je escribas etz je mijjäydjic ajcxy. ⁵⁸ E je Pedro anajty axam nicxy jiguëgy jihuüy, ixti cooni yajja'ty ma Caifás ytiba'. Chi jim ytigiy. Chi ixtacy müid je cuend'ajtpi ajcxy, je' co oc'ixa'ñ ocnejhuñhua'ñ nej Jesús yjada'ñ.

⁵⁹ Je teedy ajcxy mjtungmüdpí etz tüg'óciy je judíojäy mjtungmüdpí ajcxy huinma'ñ ixtaaygixy nej jëbi Jesús yajpocycägixy müid ajcxy xihuín, e jadu'n jëbi mooygixy yi' o'cin. ⁶⁰ Mayjäy ñihuambejty Jesús müid anñi, per ni pin anajty ca' müidity tiy'ajt co Jesús anajty ti ytundigooy müid judíojäy ajcxy ycötujcin. Jac com jecy miññ metz testigos müid aanñi. ⁶¹ Je' ajcxy yminañ:

—Jadayaabi yëydjic minañ co jëbi nyajhuindigooyich Dios ymijtzejptjic, e codugüg xñi ti anajty nyaj'oyiyich jadüg'oc.

⁶² Huin'it je teedy mjtungmüdpí ytinayigy, e ñimay Jesús:

—¿Nej co ca' m'adzooy? ¿Nej janch tiy'ajt nej jadayaabi metzpi testigo yminañ?

⁶³ Per Jesús ca' y'adzooy. E huin'it je teedy mjtungmüdpí ñimaayi:

—Ñimaayg ñich ajcxy Dios ycixpi, pen janch miich je' je Cristo je Dios y'ung.

⁶⁴ Chi Jesús yminañ:

—Miich jadu'n minamb. Nañ jadu'n ñich miich ajcxy ñimäy, co ñich je jäy huídibi tzoon tzajpjoty, miich ajcxy xy'ixipyich tzajpjoty ma Dios ymijc a'oy'amy. Nañ jadu'n miich ajcxy xy'ixipyich jocjoty co anajty nhuimbityich jadüg'oc ya naaxhuññ.

⁶⁵ Chi je teedy jacmjtungmüdpí oy yhuít huindzecx y huinma'ch, chi yminañ:

—Jadayaabi yëydjic ti capxtigooy Dios. ¿Ti testigo njac-huaanim? Miich ajcxy ci'm ti mmidoogixy co yi' ti ycapxytigooy ma Dios, e minañ: ⁶⁶ ¿Nej miich ajcxy minaangixy?

Chi ajcxy yminañ:

—Ti ycapxytigooy, copicy co y'ögipy.

⁶⁷ Chi ajcxy huindzuju jįptzujy etz cojxy ajcxy. Chi jacjadyii huingojujy jįpcojxy. ⁶⁸ E chi ajcxy nimay:
—Pen janch co miich je' je Cristo octiygapx pin ti xycoxy.

Pedro yminañ co ca'p Jesús ix'y'adyii

⁶⁹ Je huin'it moñi Pedro anajty iñay tibägujc. Chi ñimiini tüg töxy'anäg tumbi, chi ñimaayi:

—Miich nañ jadu'n ti mhuidity müd Jesús je Galilea jäy.

⁷⁰ Chi Pedro yminañ mayjäyjoty:

—Ca' nhuinjihuñyich ti mgapxpy.

⁷¹ Pedro hue' anajty pidzimnip co ñimiini huingbi töxy'anäg. Chi je töxy'anäg nimay je' ymügütiç:

—Jadayaabi yëdyjç ti yhuidity nañ jadu'n müd Jesús je Nazaretpi.

⁷² Chi Pedro jadüg'oc coyüch je Jesús cixyot huinijot yminañ:

—Ca' n'ix'y'adyiijich yjiibi yëdyjç.

⁷³ Jac co hueeni, je jäy huidibi anajty ajcxy jimip ñimay ajcxy je Pedro:

—Janch co miich nañ jadu'n anajty müd mhuidity yi Jesús, com yi m'ayuc yi' xyajniquëxçp.

⁷⁴ Chi Pedro tigiy capxpi janch oy ñinej minañ huinijot:

—Ca' n'ix'adyiijich yi yëdyjç.

E tim huin'ityi je tzey yaxigy. ⁷⁵ Chi Pedro jäymejtcoody jadu'n nej anajty Jesús ti ñimäyii: “Ma ca'ni anajty tzey yaxigy cham coodz, miich tugüg'oc xycoyütziich.” Chi Pedro pidzimny tiba', e jiiby oy yäxy mibaad yjotcidägy.

27

Chi Jesús yajçeyjcy ma Pilato

¹ E co oy yximñy yticxüy, chi je teedy mįtungmüdpç etz je mijjäydjç ajcxy quipxycapxy co yaj'ögaangixy Jesús. ² Chi ajcxy yajnicxy cixoch oy ajcxy çiyecy ma Poncio Pilato je gobernador.

Judas ñayöctiçyi

³ Co je Judas je huidibi anajty ti çiyecy Jesús, co ixxy co yaj'ögaanip Jesús, chi oy yjotmaybaatni. Chi conhuimbijty je iipxmajcpi plata meeñ ma je teedy mįtungmüdpç etz mijjäydjç ajcxy. ⁴ Chi Judas nimay je teedy mįtungmüdpç etz je mijjäydjç ajcxy:

—Iich ti ndundigooyich co ti ngiyecyich yi tudägyjäy ma miich ajcxy.

Chi je' ajcxy y'adzooy:

—Ti iich ajcxy n'ocuent. Miich yi' mnigixp tibi mduñ.

⁵ Huin'it Judas cohuijy je meeñ jiiby tzajtigoty. Chi ñicxy. Chi ñayöctiçyi.

⁶ Huin'it je teedy mįtungmüdpç yajpidigy je meeñ. Chi ajcxy ñayñimaayi miñ xyipy:

—Jadayaabi meeñ ca' yjëbity co nbidaacim ma ofrenda ñigidägy. Je' co yi' yjëjity je huidi ni'py ti tzoo'adyii.

⁷ Huin'it je teedy ajcxy tuñ je quipxycapxy co juyaangixy müd je meeñ tüg naax huidibi jäy ytjip, tütznaax it, ma ajcxy yajnaxtigihuijy pinjaty ca' ycogapity jim Jerusalén. ⁸ Ixti chambaad jadu'n xii'adyii jejmibi it: Ni'py naax. ⁹ E jadu'n ycixy yca'px nej je profeta Jeremías yminañ: “E jadu'n ajcxy je' yajpidigy meeñ iipx majcpi plata meeñ (je' choou nej anajty ajcxy Israeljäy

ti yajnigödugy), ¹⁰ e müd je meeñ ajcxy juy je tütznaax it, jadu'n nej anajty ti xy'ane'my'ich Dios.”

Pilato y'amidooy Jesús

¹¹ Jesús yajpaady jim anajty ytinäy ma je gobernador Poncio Pilato yhuindu, chi y'amidoohui:

—¿Nej miich je' judíos jäy xyrey'ajtp?

Chi Jesús y'adzooy:

—Miich jadu'n minamb.

¹² Je judío teedy ajcxy huidibi mijtungmüdpí etz je mijjäydijc tzachxigixy Jesús ma je gobernador. Ni jadu'ñyi Jesús ca' y'adzooy. ¹³ Chi je Pilato ñimay Jesús:

—¿Nej ca' mmidooy nej yi' ajcxy yx'iyi?

¹⁴ Per Jesús ni jadu'ñyi ca' y'adzooy. E paady je gobernador oy mij huinmay, ni ca' ocnejhuñyiñi ti ycapxipy.

Jesús ycödujcy y'o'cin

¹⁵ Je gobernador jadu'n anajty ycostumbre müdity co jimijt jimijt najtzmazdy tüg machyjäy pascua xüjoty, je huidibi je mayjäy ti ytimychojcpy. ¹⁶ E jim anajty tüg je machjäy huidibi anajty ajcxy ix'y'ajtaayb, e yxüjity Barrabás.

¹⁷ E co anajty jim ti ytügmujctaaygixy, chi Pilato ajcxy y'amidooy:

—¿Pin miich ajcxy mdzojcpy co ñich nnajtzmazdihuibichi? ¿Najtzmazdihuibich Barrabás o Jesús huidibi jäy ajcxy ytipty je Cristo? ¹⁸ Pilato ñejhuñiyb anajty co mañ'ájtingix anajty ti cýejccixy Jesús.

¹⁹ Jimni anajty iñäy Pilato me je ycötujctac co je ytöxyijc tiy'ajt quejxy ma yi', yminañ: “Ca' huaad myajtzaachytuñ yi tudägyjäy. Je' co ñich amygoodz ti ngumäyich janch jibic müd yi' ycixpi.”

²⁰ Per je teedy ajcxy etz je mijjäydijc ti anajty capxyjotc:daaccixy je mayjäy co huen yajnajtzmazdihy Barrabás etz huen yaj'öccixy Jesús. ²¹ Paady co jadüg'oc je gobernador y'amidooy je mayjäy:

—¿Huidibi machyjäy mdzojcpy co nnajtzmazdihuibich?

Chi je mayjäy y'adzooy:

—Najtzmazdi' Barrabás.

²² Chi Pilato y'amidooy je mayjäy:

—¿E nej ndunipyich yi Jesús, huidibi jäy ytipty Cristo?

Huin'it ajcxy nidüg'öciy y'adzoday:

—¡Yajcruutzpet yi Jesús!

²³ Chi Pilato yminañ:

—Pues, ¿nej ti ytundigooy?

Per je mayjäy ni goob y'adzoday:

—¡Yajcruutzpet! ¡Yajcruutzpet!

²⁴ Pilato yjapubedaan Jesús, per co ijxy nejhuñy co je mayjäy ca' ni nej niducy. Hue' ajcxy oy ytigüy huambi jihuiybi, chach ñayñajtztiñiygixy müd jot'an. Huin'it Pilato capxyñiguejxy je huadz nü. Chi ytigüy cübuyp ma je mayjäy yhuindu, e yminañ:

—Ca' ñich ngo'adzohuipyich jadyaabi tudägyyëydijc y'o'cin. Miich ajcxy yi' mgo'adzoohuipy.

²⁵ Chi je mayjäy y'adzoday:

—Ñich ajcxy ngo'adzohuipyich yi' y'o'cin müd n'ung anäg etz n'ap n'oc.

²⁶ Chi Pilato najtzmazdiy je Barrabás. Per Pilato ane'my co huen Jesús yajhuojp. E co yajhuojptay, chi c̄yeyjcy, co huen yajcruutzpedyii. ²⁷ Chi Pilato ysoldados ajcxy yajnicxy Jesús ma agujctjic. E jiīby t̄üg'óciy soldadtjic ñayyöymujci ma Jesús. ²⁸ Chi je soldado ajcxy je' yhuít yajnījenducy. Chi ajcxy yajnījeniy je tzapx huit huídibi je rey ajcxy yajtuumyb. ²⁹ Chi ajcxy tacy t̄üg corona m̄id apy. Chi ajcxy yajc̄ojenīy ma Jesús. E huin'it ajcxy a'oy'amy yajc̄igabīy t̄üg je paxy. Chi ajcxy huingojxtinay'ahūīy. Chi ajcxy nixiicy yajxiicy, e ym̄inaangixy:

—īooy ym̄ijity yjanchity, je judíos ajcxy yrey!

³⁰ Chi ajcxy huindzujy jijptzujy. Chi ajcxy yajc̄igajptucy je paxy, e yajc̄ohuojp̄igy ajcxy. ³¹ E co ajcxy nixiictay yajxiictay, chi yajnījenducy je rey yhuít etz yajnījeniy je yci'm huit. Chi ajcxy yajnicxy ma yajcruutzpedaangixy.

Co Jesús yajcruutzpejti

³² E jim ma anajty hueeni ti yt̄üyöy, jim ti paty t̄üg Cirene ȳeydijc anajty yxījity Simón. Chi ajcxy adz̄ip n̄imay Simón co huen jaccapi Jesús ycruudz.

³³ E co ajcxy yja'ty ma t̄üg je it yxījip Gólgota, jadu'n yhuimb̄idzim Öc̄pi Cohuajc Cōgop. ³⁴ E jim ajcxy Jesús jayaj'üga'ñ vino temhuídity m̄id tzooy, jigix ca' jihuīhuip je tzaachyp̄i. Per co uucmajch, chi jihui'ñybījic co ca' y'oy'uucnity.

³⁵ E co anajty ajcxy yajcruutzpety Jesús, chi je soldadtjic suerte ijxy, p̄in j̄ebi ocjē'adyii Jesús yhuít, chi ycijxy yca'pxy jadu'n nej je profeta cojaay jecy'ajty: “Yajhuácx̄ipy ajcxy īich nhuit e m̄id īich nhuit ycx̄ipi ix̄ipy ajcxy suerte.” ³⁶ E jim anajty ajcxy īñaaygixy cuend'ajtc̄ixy. ³⁷ Je x̄ihūin ayuc huídibi ajcxy yjaay ma Jesús yc̄oóduu jadu'n ym̄inañ: “Jadayaabi je' Jesús, je judíos ajcxy je yrey.”

³⁸ Quipxy m̄id Jesús ajcxy yajcruutzpejty metz̄p̄i. T̄üg a'oy'amy, e jad̄üg anajty'amy. ³⁹ Je mayj̄ay huídibi ajcxy nax̄iyb anajty ma Jesús, ooy anajty oy oc̄oj̄iḡiñ, nix̄igy yajx̄igy ajcxy Jesús. ⁴⁰ ym̄ina'ñ ajcxy:

—Bah, miich huídibi Dios yt̄ijc jidaan̄ip, e coduḡig x̄ī huingbi myajp̄id̄iga'ñ. Miich ci'm cham naygohuāñī, e minac cruudzc̄ixy, pen janch miich Dios xy'ung'adyii.

⁴¹ Nañ jadu'n je teedy ajcxy huídibi m̄ijtungm̄id̄ipi, etz je escribas, etz je fariseos ajcxy etz je mijj̄ayd̄ijc nixiicy yajxiicy ajcxy Jesús, ñayñimáayigixy miñ xyipy:

⁴² —Huingbi ti cohua'ñ, e ca' jaty nej ci'm ñaygohua'n̄iyb. Pen janch co yi' j̄ejity je Cristo je Israel j̄ay rey, huen minac jadachambi ma cruudz, huin'it nm̄ib̄ijcin. ⁴³ Yi' ti pid̄ägy ym̄ib̄ijcin ma Dios; huen jadachambi je Dios yajnīdzögyii, pen janch Dios chogyii; yi' ti ym̄ina'ñ co Dios y'ung'adyii.

⁴⁴ Nañ jadu'n je metz̄p̄i meetz̄p̄i ajcxy huídibi cruudzpejt̄ quipxy m̄id Jesús nixiicy yajxiicy ajcxy ooy Jesús.

Jesús y'ögy cruudzc̄ixy

⁴⁵ Co ycuycx̄īj̄īy, chi ycoodzyday t̄üg'óciy naaxhuiñybi. E jadu'n je naaxhuiñybi y'ijty coodz, ixti minac yxīi. ⁴⁶ Huin'it̄iy Jesús ycapxyqueecy janch mic ym̄inañ:

—Elí, Elí, ¿lama sabactani? —yi' jadu'mbi ayuc hue' yhuimb̄idzimy: Dios Teedy, Dios Teedy, ¿ti co ti xy'ixmachich?

⁴⁷ Nij̄ejity j̄ay huídibi anajty jim yajpatp huigon ma Jesús co jadu'n midoogixy Jesús y'ayuc, chi ajcxy ym̄inañ:

—Jadayaabi yëydijc cham yaaxtaayb je profeta Elías.

⁴⁸ Huin'it nidüg jäy ñicxy janch poyïgy etz oy yajtzoon je pixy. Chi je pixy yajxoogy müid je xun vino. Chi pidacy je pixy ma je paxyjijp. Chi yujctijy ma Jesús y'ahuac co huen ügy. ⁴⁹ Huin'it nijëjity ajcxy yminañ:

—Ixmatz, tzoc ajt oc'ijxim, pen nimiinip Elías, pen janch yajnëdzögyii.

⁵⁰ Jadüg'oc Jesús yaaxqueegy janch mic. Chi oy y'o'cni. ⁵¹ Co Jesús y'o'cy, tim huin'itij jim ma Dios ytijc je mapxy yhuut yciitzhua'cxy tinä'amy. E nañ jadu'n je naaxhuiñybi ooy chuyuy müid ujx micpi etz je mijjatychaa oy jüitzhua'cxy.

⁵² May öcpi jut y'ahuach etz yjugypijcy mayjäy tiibi anajty y'o'ccixy tiibi anajty mibijccixy Dios. ⁵³ Co Jesús yjugypijcy, chi je may'öcpi tiibi anajty jugypijccixy etz tiibi anajty pidzimixy ma öcpi jut, chi ajcxy ytigüy ma je Dios ycajp, je Jerusalén. E mayjäy ajcxy ijxy. ⁵⁴ Co je mic ujy oy ñaxy etz jac tijaty anajty ti ytuñyii ti yjadyii, chi je capitán etz müid jadyii ymigütiyc huidibi anajty cuend'ajtp Jesús ooy ajcxy chigiy yjihuiy, e minaangixy:

—Janch tiy'ajt co yijüibi yëydijc Dios y'i' anajty y'ung.

⁵⁵ May anajty nañ jadu'n töxyjäydijc ymij'ijxcixy jiguem huidibi anajty ajcxy Jesús ti müiddoon jim Galilea. Y'i' anajty ajcxy Jesús ypubejtp. ⁵⁶ E ma je' ajcxy jim anajty choonity, María Magdalena, María huidibi Jacobo etz José ytaj'ajtpy, etz je huidibi Zebedeo y'ung ytaj'ajtpy.

Jesús yajnaaxtigüy

⁵⁷ Co oy chuu'iiñi ycoodzyñi, huin'it choon ma Arimatea tüg comeñyjäy huidibi yxii José. E je' ymijncxpejty anajty Jesús. ⁵⁸ Chi José ninicxy Pilato oy pijctzou Jesús ñinicx. Huin'it Pilato pidacy y'ane'min co huen möyüi. ⁵⁹ Chi José ycidigüy Jesús ñinicx. Chi huinmojch müid tüg poob sábana. ⁶⁰ Chi yajnaaxtigüy ma je yci'm jut jemybi huidibi anajty ti yajtzejtztüty ti yajpädüty ma tüg tzahuingueetz. Chi adiguejctujcy je öcpi jut müid tüg tzaa. ⁶¹ Chi José ñicxni. E jim yhui'my María Magdalena etz je jadügpi María, y'iñäy ajcxy ymihuingon öcpi jut.

Je cuend'ajtpi ajcxy ma Jesús ñaaxtigüy

⁶² E com jabom ma anajty Jesús ixiiybi ti y'ögy, ma anajty ti ni'ixiydäy müid je sábado xii ycxipi, chi je teedy ajcxy huidibi tungmüid etz je fariseos ajcxy ñayyömjucj ma je Pilato. ⁶³ Chi ajcxy yminañ:

—Huindzin, y'i' ich ajcxy njäymejchpyich co je aniidacpi yminañ ma anajty yjuugyity co codugiig xii jugypiga'ñ jadüg'oc co anajty ti y'ögy. ⁶⁴ E paady tunmay'ajt quexipy soldados ajcxy ma Jesús ti ñaaxtigüy huen cuend'ajtcixy ixti cooni tugüig xii paadipy. Ca' yjegyity co ñiminib adzuum agoodz je' ajcxy huidibi mijncxpejtj etz tzimguëgipy ajcxy Jesús ñinicx. E chi nicxy jäy yminañ: “Ti yjugypicy je öcpi.” Chi anajty jac'anaxy je anii ti yjajtni ca'ydi je jayijpi.

⁶⁵ Chi Pilato ajcxy nimay:

—Miich ajcxy müid tüg picy soldados huidib cuend'ajtp ma miich ajcxy. Ñicxcix miich ajcxy yaj'adujccixy je öcpi jut, jadu'n nej m'a'ixiygixy.

⁶⁶ Chi ajcxy choni ma je Pilato. Chi ajcxy quejxy je tüg picypí soldados ma je öcpi jut. Chi ajcxy pidacy ijxhui'min ma je tzaa huidibi ajcxy je jut yaj'adiguejctujcy.

1 E com jabom co yximäy yticxäy je domingo xii, huin'it ñicxy María Magdalena etz je jadügpi María ma Jesús ñaaxtigäy. 2 Chi tüg mij uyx ñajxy. Huin'it ycidacy Dios tüg y'ángel huidibi tzomb tzajpjoty. Chi jidigejcy je tzaa ma je öcpi jut aguu. Chi y'ixtacy ma tzaa ñicx. 3 Janch adücxp je ángel anajty yhuinjip jadu'n nej huidzuc, e je yhuit janch poob'ögy. 4 E co je soldados ajcxy ijxpaty je ángel, chi ajcxy ooy chuyuygooty. Chi ajcxy yhuim'y jahuengi ögy. 5 Huin'it je ángel y'adzooy je metz töxyjäy:

—Ca' miich ajcxy mdzigäy. Hich nejhuiybich co miich ajcxy m'ixtäy Jesús je huidibi ajcxy yajcruudzpejty. 6 Per ca' je' cham ya. Ti je' yjugypicy, jadu'n nej ymíañ. Min miich ajcxy oc'ix ma ñaaxtigäy. 7 Nicx miich ajcxy jottigooyb ma je' ydiscípulos ajcxy e nima': "Ti Jesús yjugypicy jadüg'oc, e yi' ñicxip jim Galilea e jim ajcxy mmídnaybadüyb." Hich miich ajcxy yam nnímaaygixy.

8 Huin'it je töxyjäy ajcxy chooñ janch poyígy ma anajty ti ñaaxtigäy Jesús. Chi ajcxy ñicxy miid tzigi'ñ, per agujc jotujc. Poyígy ajcxy oy tiy'ajt yecy ma je discípulos ajcxy. 9 E jim anajty je metzpi töxyjäy ytüyöy, timetini Jesús ñayguéxici ma je' ajcxy yhuinduu. Chi Jesús ajcxy capxocxy. Chi je' ajcxy mihuingoñ Jesús etz mäneeni je' ytecy. Chi ajcxy huindzigäygyx. 10 Jesús míañ:

—Ca' mdzigäygyx. Nicx miich ajcxy nima' je nmigügtijcich co huen ajcxy nicxy jim Galilea, e jim naybadüybich miid yi' ajcxy.

Huidibi ajcxy je soldadotjic ñigapx

11 E tüyöybñi anajty je töxyjäy nímetspi co nijéjity je soldados ajcxy chooñ ma Jesús ñaaxtigäy ñicxy jim Jerusalén, müdmíydäga'ñ je teedy huidibi tungmüdpí nej anajty ti ytuñii ti yjadyii ma Jesús ñaaxtigäy. 12 E huin'it je teedy ajcxy ñayöymujctayí miid je mijjäydijc, tunaangixy quipxy capxy. Huin'it je teedy ajcxy etz je mijjäydijc moy ajcxy je soldados may meeñ. 13 Chi ajcxy nimay:

—Miich ajcxy mína'nip co maab anajty miich ajcxy mijcoodz co ymiñ Jesús ydiscípulos ajcxy etz tzimgueeci Jesús ñinícx. 14 Etz pen ymídooyb anajty yi' gobernador, hich ajcxy ngapxjotcidägich, jigix ca' nej xytúngixipy.

15 E huin'it ajcxy je soldados ycidigäy je meeñ. Chi ajcxy ñicxy cuyduñ jadu'n nej anajty ajcxy ti ñimäyii. E ixti chambaad jadu'n judiojäy capx je ayuc.

Huidibi Jesús yajnibjic ydiscípulos ajcxy

16 E jadu'n ajcxy ñicxy je nimajctügpí Jesús ydiscípulos ajcxy jim Galilea. Chi ajcxy ñicxy ma je cögop jadu'n nej anajty Jesús ti ñimäygyx. 17 E co ajcxy ijxpaty Jesús, chi ajcxy oy huindzigäy. Per jim nijéjity huidibi ca' mibijcy co anajty yjéjity. 18 Huin'it Jesús ymíjhua'cy ma yi' ajcxy, e nimay:

—Hich ti nyajmüyich je cötujcín jiiy tzajpjoty etz ya naaxhuiñ. Hich ti nyajmüyich je mij cötujcín, jaydëbi n'ane'myich jiiy tzajpjoty etz ya naaxhuiñ. 19 E paady nicx miich ajcxy huindu'my naaxhuiñ capxhuäcxix je ayuc, jaydëbi jäy ajcxy xymibigipyich. Tüg'ócy jäy ajcxy huidibi xymibijcpich myajñübedipy ajcxy müd Dios yxii, Dios y'ung yxii, etz miid je Espiritu Santo yxii. 20 Miich ajcxy myaj'ixpigipy je mayjäy co copicy cuydunipy ajcxy hich ngötujcín tüg'ócy jadu'n nej ti n'ane'myich miich ajcxy. E miich ajcxy mnejhuüyb co nmíd'ityich miich ajcxy huinixii huinítiempo, ixti mabaad naaxhuiñybi anajty ycixpi ytigooy. Jibaad ycixy. Amén.

SAN MARCOS

Jaayhu'i'my Jadu'n Nej Jesucristo Ytun Yjajti

¹ Jadu'n ogañ chondacy je oybi ayuc tıy'ajt jadu'n nej Jesucristo, je Dios y'ung ytun etz yjajti.

² Je Dios y'ayucnajtzcaxıybi je Isaías jecy'ajty jayhu'i'my jadu'n nej Dios nimay je Cristo:

Nguexaamyıch ıch ngogapxy jayıjp ma nidüg nidüg cajp ma miıch mniıcxa'ñ jac'axam, jigix jëb je cogapxy nimähuıpy je jäy ajcxy co huen nayñi'ixııyigıxy ma yjot yhuinma'ñ miid miıch ycıxpı, jadu'n nipaady nej jihuiy jäy ajcxy ni'ixıy tü'aa co tüg rey yjāda'ñ.

³ Nañ jadu'n jadüg it Isaías jayhu'i'my jada ayuc ma jadu'n ymınañ:

Jim mıjtigıduum jäy ajcxy midoy co tüg jäy y'ayuccapxhuäcxy, jadu'n ymınañ: “Nayñi'ixııyigıxy ma mjot mhuinma'ñ ajcxy jaydeb naybaatim miid ajt nHuindzin Dios. Ixmájtcıxy yi mjıbcıjot mjıbcıhuinma'ñ. Jadu'n nipaady nej jäy ajcxy yajtıy tü'aa huıdibi ooy y'adıy y'a'och.”

⁴ Jim mıjtigıduum anajty Juan je Bautista miñ e ytıgıy mayjäy jajniıbejtı. Chi Juan capxhuäcxy Dios y'ayuc ma je mayjäy ajcxy huıdibi anajty mimb niıbejtı. Juan ayuc capxhuäcx co copıcy co jäy ajcxy huen jothuımbıjtıcy etz ixmájtcıxy ajcxy je yjıbcıhuinma'ñ, etz niıbejtıcy, jigix jëbi Dios yhuinmecııb ajcxy ypocy. ⁵ Tüg'ócıy je mayjäy ajcxy huıdibi anajty tzınaayb jim Judea ñaaxjot etz jim Jerusalén mimb anajty ajcxy ma Juan, e y'amıdoo'ıjty anajty ajcxy je y'ayuc. Co je jäy ajcxy capxpıdzımy nej anajty ypocytıngıxy, chi Juan jajniıbejty ajcxy ma je Jordán mijniı.

⁶ Juan hue' anajty yhuı'ajtpy camello niıbjc, e nañ jeyim anajty miid ñayhuıııyıı, e hue' anajty yjıcx'ajtpy mu' etz uxpäg. ⁷ Juan ycapxhuäcxyp anajty Dios y'ayuc ma je mayjäy, e ymınañ:

—ıch jayıjp ti nmiñıch ngapxhuäcxy Dios y'ayuc. Jac'axam minıpy tüg jäy huıdibi jacniği mic'ajt miidıty ca'ydi ıch, ca' xypaadyıch niıcy nguejyıch yi' ycıghuin. ⁸ ıch ti nyajniıbetyıch miıch ajcxy miid niı. Per je jäy huıdibi yjacmiid Dios ymic'ajt, ca'ydi ıch. Yi' xyaj'adıgıhuıpy xyajjotıgıhuıpy Dios yjıhuı'ñ ymic'ajt, jadu'n nipaadıp nej jihuiy xyajniıbedıp miid Dios yjıhuı'ñ ymic'ajt.

Co Jesús ñıbejty

⁹ Je huin'it xıı huin'it tiempo Jesús choon ma je cajp huıdibi yxıı Nazaret, jim Galilea ñaaxjot, e ymiñ ma Juan el Bautista anajty yajpaady. Huin'it xıı Juan jajniıbejty Jesús ma je Jordán mijniı. ¹⁰ Pidzımb anajty Jesús ma je mijniı, e tim huin'ıtyı Jesús iıx co je tzajp anajty y'ahuäch, e iıx je Espıritu Santo choon tzajpjoty, e ycıdägy ma yi'. Jadu'n je Espıritu Santo yquëxıgy anajty nej tüg muuxy. ¹¹ Chi Jesús midooy capxy ayuc choñ tzajpjoty, nimäyıı:

—ıch miıch n'ung'ajtpy. Ooy ıch miıch ndzocy njıhuıy. Ooy jotcujc najjıhuıyıjıch miid miıch.

Je mujcu' tuñ iıxta'ni ma Jesús

¹² Huin'it mic'amy je Espıritu Santo jajnicıxy Jesús mıjtigıduum. ¹³ E hue' Jesús yhuı'mıy jim mıjtigıduum huıxchıguılpıx xıı ahua'n iyujc agujc. Huin'it

je mujcu' jot'ijxy yhuinma'n'ijxy je Jesús. Chi je ángeles ajcxy miñ ypubejty ypuđigiiy je Jesús.

Jesús ytung yajtzondägy jim Galilea

¹⁴ Ti anajty Juan yajpidägy pujxtigoty, jac'axam Jesús ñicxy jim Galilea. Jim Galilea Jesús capxhuäcxy Dios y'ayuc etz yi Dios y'ané'min. ¹⁵ Jesús yminañ:

—Ti je xii je tiempo yhuaad'ajtni. Ti nigoody je xii je tiempo mina Dios pidäga'n'yi y'ané'min ya naaxhuiñ. Jothuimbijtcix ajcxy, etz ixmajtcix ajcxy mjibicjot mjibic-huinma'n. Mibijccix Dios y'ayuc jadu'n nej jëb ajcxy m'alma ñdzögipy.

Jesús huodzoñ midaax jäy huidibi anajty acxmajtzp

¹⁶ Jesús huidijtp anajty ma je mejypa' huidib yxi Galilea mejy, co oy'ixpaady Simón etz y'uch Andrés. Simón etz Andrés acxmadziñ anajty ytung'ajtpy, ytipidacpy anajty y'acxmadzi'ñ mejyjoty co ajcxy Jesús ixpaty.

¹⁷ Chi Jesús nimay Simón etz Andrés:

—Min müid ich. Ich miich ajcxy huingbi tung nmöhuipy. Jadu'n mdung nipaadip nej jihuüy mjäymajtcixipy.

¹⁸ Mic'amy Simón etz Andrés ajcxy ixmajch y'acxmadzi'ñ, e ñicxy ajcxy müid Jesús.

¹⁹ Chi Jesús yjacyöy anajty hueen, e ixpaty Jacobo etz y'uch Juan, je Zebedeo ajcxy ymang. Je Jacobo etz Juan tumb anajty barcojoty. Hue' anajty ajcxy yaj'oyiib je' y'acxmadzi'ñ. ²⁰ Chi Jesús mijhuooy ajcxy Jacobo etz Juan, e nimay co huen ñicxy müid yi'. Mic'amy je' ajcxy ixmajch yteedy, je Zebedeo, barcojoty müid ytumbi, chi ajcxy ñicxy müid Jesús.

Tüg jäy huidibi anajty jibic espíritu müd

²¹ Huin'it Jesús müid ymügütiyc yja'ty jim Capernaum. Je huin'it sábado, je pocxin xii, Jesús ytiigi y ma je judíojäy ajcxy ñaymujctac jim Capernaum, chi jyäyay'ixpijctzondacy. ²² Je mayjäy ooy ajcxy jihuiy huinmay je ayuc huidibi Jesús anajty ajcxy yaj'ixpijcp. Com Jesús hue' anajty yaj'ixpiy jadu'n nej jihuiy yci'm'ané'min müidity. Ca' Jesús anajty yaj'ixpiy jadu'n nej je jäy ajcxy huidibi yaj'ixpijcp anajty Moisés ycötújcín je jécyp. ²³ E ma je naymujctac tüg yëydijc huidibi müid anajty ca'oybi. Chi je ca'oybi ooy mic ycapxcoody, e yminañ:

²⁴ —¿Ti co xy'amayiy ich ajcxy, Jesús huidibi tzomb jim Nazaret? ¿Nej ti mmiñ co xyajhuindigoyáangixyich? Ich n'ixcajpy miich, e nejhuiybich co miich je' je Huätzpi Dios.

²⁵ Chi Jesús ix'ojy je ca'oybi, e nimay:

—Amon miich, e pidzimb ma jada yëydijc.

²⁶ Huin'it je ca'oybi yajyajch yajquidy je yëydijc, e mic yaaxqueegy, e ypidzimy ma je yëydijc. ²⁷ Tüg'ócay je mayjäy jiiib ma je naymujctac ooy ajcxy ñay'adzigiüy, e ñayñimaay ajcxy miñ xyipy:

—¿Ti jada' yi? Jada yëydijc ymüid jemybi ixpijcin. Yi' müid mic'ajt etz ane'm'ajt, paady yciixpi yi' ane'my yi ca'oybi, e ycapxmidoohup.

²⁸ Mic'amy je mayjäy ajcxy huidijaty tzinaayb ma tüg tüg cajp jim Galilea nejhuiy ajcxy nej Jesús ytuñ, e cómaaygixy Jesús.

Jesús yajtzögy Simón Pedro ymüd töxyjäybi

²⁹ Tim huin'itiy Jesús ypidzimy ma je naymujctac, chi ñicxy müid Jacobo etz Juan jim ma Simón etz Andrés ytijc. ³⁰ Simón ymüd töxyjäybi pijcip anajty.

Cijx'am anajty y'ity, e mic anajty ooy ytoyii. Tim huin'ítiiy Jesús ñimaayi co Simón ymíd ooy mic ypigyii. ³¹ Chi Jesús nimijhuägy je pa'mjäy. Chi majtzi yci', e huijtziägy. Tim huin'ítiiy yi toyii y'ixmajtzi, e chi yajcay yaj'uucy Jesús etz ymígügtijc.

Jesús yajtzögy may pa'mjäy

³² Co xii oy ycidacni, e chuu'ñiyi, chi je mayjäy müid miñ ajcxy ma Jesús tüg'óciy pa'mjäydijc, etz huidijaty ajcxy ca'oybi ymüd. ³³ Tüg'óciy je mayjäy ajcxy ma je jimbi mij cajp nimujcy je tijc ma Jesús anajty ti yjättägy. ³⁴ Jesús yajtzooctay tüg'óciy je may pa'mjäy huenytimyitiibá'mity, etz yajpidzimy may ca'oybi majaty jäy ajcxy. Per Jesús ca' anajty a'ixiy nicxy je ca'oybi ñigapxyii, com y'ixy'ajttaayb anajty ajcxy Jesús.

Jesús y'ayuc tiy'ajt capxhuäcxy jim Galilea

³⁵ Tim mooñi Jesús ymaybidigy, ca' anajty yxiimiiyñi, e ypidzimy ma je cajp. Chi ñicxy ma tüg mijtig'iduum Dios mibijctzoobi. ³⁶ Huin'it je Simón etz je ymígügtijc ooy ajcxy ja'ijxtäy Jesús. ³⁷ Co ajcxy paty je Jesús, chi ajcxy nimay: —Tüg'óciy je mayjäy xyjadim'ixtäy.

³⁸ Chi Jesús nimay Simón etz je ymígügtijc ajcxy:

—Tzoc ajt jámim ma yi jacjadyii cajp huinduy agonbi, jaydeb ngapx-huäcxibich Dios y'ayuc nañ jadu'n ma yi jäy ajcxy jim. Paady ycixpi nd-zooñich tzajpjoty, jigix jébi ngapxhuäcxibich Dios y'ayuc.

³⁹ Jesús nicxp anajty ma nidüg nidüg cajp jim Galilea ycapxhuäcx anajty Dios y'ayuc ma nidüg nidüg judiojäy ñaymujctac, e yajpidzimy anajty ca'oybi majaty jäy.

Jesús yajtzögy tüg jäy nibützpa'mmüdpj

⁴⁰ Tüg jäy huidibi ymüd anajty jibic pützpa'm, je micpi, chi nimijhuägy Jesús, e ycojxtinay'ahuüy ma Jesús yhuinduu, yminañ:

—Pen miich jadu'n tzojcpy, jéb xyajtzögich.

⁴¹ Chi Jesús pa'ayoy je pa'mjäy, e pidacy yci' ma je pa'mjäy ñinicx, e yminañ: —Ndzojcpyich, cham nyajtzögy.

⁴² Co Jesús jadu'n yminañ, chi mic'amy je jäy huidibi anajty müid je jibic püd chögy. ⁴³⁻⁴⁴ Mic'amy Jesús ycapxcijxy müid je jäy huidibi anajty ti chögy, e nimay:

—Ix pin myajnimäy co ti mdzögy. Nicx jayijp jiiy ma Dios ytijc ma je judio teedy ajcxy, e mo' Dios yhuindzigi'ñ jadu'n nej Moisés ycötújcjin ane'my, jigix jébi huädz mbidzimipy ma Dios ycötújcjin. Cuydun miich huidibi Moisés ñajtz'ane'miäy jecy'ajty, jigix jébi je mayjäy ajcxy nejhuihuip co ti mdzögy.

⁴⁵ Per je yéydijc ca' capxymidoy Jesús. Co ñicxy, chi ytigüy capxy yajyöybi jadu'n nej anajty ti yajtzögyii. Com je mayjäy nejhuihyb huidibi anajty Jesús ti tuñ, paady ycixpi Jesús ca' anajty ocjajtni nej ytigühuipy ijxna' jigue'xna' majaty cajp. Hue' anajty huidity ma ca' pin chinäy. Per miñ anajty y'oy'ixyii huenytimypinjäyity, chooñ ma nidüg'óciy cajp huinduy agonbi.

2

Jesús yajtzögy tüg jäy cïma'tpi tecyma'tpi

¹ Ti anajty xii tiempo ñajtzniinicxiyñi co Jesús yhuimbijty jadüg'oc jim Capernaum. Je mayjäy ñejhuihyb anajty co Jesús yajpaady ma tüg tijc. ² Chi mic'amy mayjäy ñayyöymujci ma anajty Jesús yajpaady, e ca' anajty tigiydac

ma je tijc, miid co tzach mayjäy anajty ti miingixy. Y'aductaayb anajty ajcxy je tijc'aguu. E Jesús ycapxhua'xyp anajty Dios y'ayuc. ³ Huin'it xii, midaan yéydjic ciymiñ cijx'am ma Jesús yajpaady tüg pa'mjäy huidibi yci' ytecy ti yxujtäy anajty. ⁴ E com ca' anajty ni nej y'oyiy nej yajjädir ajcxy ma Jesús je pa'mjäy, je' co anajty chach újztzy je tijc miid je mayjäy, chi ajcxy yajcöhuaach hueeni je tijcñlcx ma anajty Jesús yajpaady. Chi ajcxy cödiññajxy je pa'mjäy cijx'am. ⁵ Co Jesús ijxy je jäy ajcxy ymibijcin, chi nimay je pa'mjäy:

—Migügich, yi mbocy ti yajhuinmecxtäy.

⁶ Per nijëjity huindzindjic huidibi ajcxy nijaydutp anajty Dios ñecy co ajcxy midoy nej Jesús ymína'ñ, chi ajcxy ymína'ñ jotjoty huinma'ñyoty: ⁷ “¿Nej co jada jäy jadu'n ymína'ñ co ti yajhuinmecxy jada pa'mjäy ypocy? Capxtigooyb yi' miid Dios. Com ca' nipinjäy jëb ypocyhuinmecxy. Tügpaic Dios yi' huidibi jëb ypocyhuinmecxy.” ⁸ Per Jesús ñejhuuyb anajty nej je' ajcxy chachmína'ñ jotjoty huinma'ñyoty, paady mic'amy ymína'ñ:

—¿Na'amy co mdzachuinmaaygixy? ⁹ ¿Huidibi jada jac'ooy co nniimäyich yi pa'mjäy: “Ti mbocy yajhuinmecxytäyi.” O jac'ooy co nniimähuiibich: “Pidig, e yajpidig yi mdögy, e tüyöy?” Tú'ciy yi'.

¹⁰ Chi Jesús yjacmína'ñ:

—Jadachambi janchtiy nyajquëxiga'ñich co ñich, je jäy huidib tzoon tza-jpoty, e huidibi cham yajpaady ya naaxhuiñ, nniidich mic'ajt jaydëb nhuinmecxyich jäy ypocy.

Co Jesús jadu'n ymína'ñ, chi nimay je pa'mjäy huidibi yci' ytecy anajty xuxy:

¹¹ —ñich miich yam jadu'n nima'y: “Tinayig, yajpidig yi mmabejt e nicx ma mdjic.”

¹² E mic'amy je pa'mjäy ypidigy, e yajpidigy ymabejt, chi ytüyöychoñ jiiyb ma je mayjäy ajcxy anajty y'ixy yhuindicxy. Paady ycixpi tüg'öciy je mayjäy ooy jihuiy huinmay etz jäymejch ojadajty ajcxy Dios, ymínaangixy:

—Nimínaabi ajt jadu'n nga'ixim mijhuinma'ñ jadu'n nej cham ti n'ixim.

Jesús nimay je Leví: “Pajamgich”

¹³ Chi jadüg'oc Jesús ycajppidizimy, ñicxy jim ma mejypa'. E co mayjäy ñayöymujcy jim ma Jesús anajty yajpaady, chi Jesús yaj'ixpijc je mayjäy. ¹⁴ Co Jesús yjactüyöy anajty, chi ijpaaady Leví je Alfeo ymang. E Leví iñaayb anajty ma je yajcogüejttac jäy yajcogüejtp anajty. Chi Jesús nimay Leví:

—Pajamgich.

Tim huin'itiy Leví ytinayigy, ixmajch ytung, e panicxy Jesús.

¹⁵ Jadu'n yjajti co tüg xii Jesús caayb anajty me Leví ytijc. Mayjäy huidibi ytung'ajtpy anajty yajcogüedi, etz jacjadyii jäy huidibi anajty tundigooyb miid judío jäy ycostumbre y'iñaaygixy ma je caydac quipxy miid Jesús etz je' ydiscípulos ajcxy. Com may jäy anajty ooy Jesús tzach miid huidijtcixy.

¹⁶ Jim anajty ma Leví ytijc nijëjity fariseojäy, je huindzindjic huidibi tzach padumb judíojäy ycostumbre. E co je' ajcxy ijxy co Jesús caayb uucp anajty tügmyc miid tüg'öciy je mayjäy ajcxy huidibi tundigooyb miid judíojäy yti'y'ajt ycotújcín, etz yajcogüejtpidijc, chi ajcxy migapxy Jesús ydiscípulos, je' ajcxy huidibi mijnicxpejtp anajty Jesús, nimay ajcxy:

—¿Nej co Jesús miich ajcxy mHuindzin ycaymucy y'ucmucy miid yi yajcogüejtpidijc ajcxy, etz jacjadyii jäy ajcxy huidibi tundigooyb miid judíojäy ycotújcín?

¹⁷ Co Jesús jadu'n midoy nej je fariseo jäy nigapxyii, chi ajcxy nimay:

—Ca' tzocy tzozdumbi yi jāy ajcxy huídibi mic'ajtp oy'ajtp. Yi' janchtiy yi huídibi ajcxy yuuba'm ymíid chojcpy ajcxy tzozdumbi. Nañ tim jadu'n yi jāy ajcxy huídibi ca' ypocymíidit, ca' ajcxy tzozy pocyhuinmeecxin. Hich ti nmiñich co nyajjothuimbidiyich pocyjāydijc. Hich ca' ti nmiñich co nya-jjothuimbidiyich oyjāydijc tudāgyjāydijc.

Jesús yaj'amidoogixy nej co jāy y'ity jaygay

¹⁸ Jadu'n yjajti tūg tiempo ayuu'ijtp anajty je jāy ajcxy huídibi mijnicxpejtp anajty Juan je Bautista. Nañ jadu'n ayuu'ajtp anajty je fariseojāy ajcxy. Chi nijējity ajcxy ymiñ ma Jesús e amídoy:

—¿Nej co yi jāy ajcxy huídibi mijnicxpejtp ajcxy Juan etz nañ jadu'n yi fariseojāy ajcxy ayuu'ajtp ajcxy, e je jāy ajcxy huídib miich xymijnicxpejtp, ca' y'ayuu'ajtcixy?

¹⁹ Chi Jesús y'adzooy:

—Co ya nyajpaadyich ya naaxhuiñ, ca' ycopícity co íich ndiscípulos ajcxy y'ayuu'adíp. Jadu'n nipaady nej jāy ajcxy huídibi píjcin nixíidumy ca' ajcxy y'ayuu'aty ma yam yi píjcin nixíiduñ, e peni ca'ni je píjcpí ymígúgtijc y'ixmajztāyíi. Nami je píjcpí ca'ni choñ, chi ca' pin y'ayuu'adañ huídibi nixíidum je píjcin. ²⁰E paadíp je xii je tiempo mína ca' nmíid'idañich ya naaxhuiñ yi' huídibi ajcxy xymijnicxpejtpich, e huin'it ajcxy y'ayuu'adaangixy.

²¹ Com jemybi Dios y'ayuc nyaj'ixpícpíyich, paady ca' ytūgíy míid je jécypí ayuc huídibi je fariseo jāy ajcxy yaj'ixpícpí. Jadu'n nej miich ajcxy mnejhuíy co ni pin ca' agíyíy tuc huit míid tūg pedaas jemy huit, con je' co je jemy huit níimujcp je', e chi nígi najtzciídzíhuip je tuc huit. ²²E nañ ni pin ca' jēb huaad pídágy jemy vino ma tuc cochac. Je' co je vino jemybi yciídzamy je tuc cochac, e chi y'ixyojctāhuip je vino etz je cochac ñitígoydáhuip. Hue' janchtiy jēb ajcxy pídacý jemy vino ma jemy cochac.

Je discípulos ajcxy yajmújicxy je moc cojc sábado xii

²³ Tūg sábado xii Jesús míid ydiscípulos ajcxy ñaxíy ma tūg trigo cam. E huin'ítíyí je ydiscípulos ajcxy ytígíy je trigo tujcp. ²⁴Co je fariseo jāy ajcxy íjxy jadu'n nej Jesús ydiscípulos ajcxy anajty tujcmujc trigo tím, chi ajcxy nímay Jesús:

—Ix miich. ¿Na'amy co miich mdiscípulos túngixy huídibi judío ycótújcin capx'adujcpy sábado xii?

²⁵ Per Jesús ymínañ:

—¿Nej ca'miich ajcxy mguendtuñ Dios y'ayuc co mnecycapxy, jadu'n nej David ytuñ tūgtecy jecy'ajty, co David etz ymígúgtijc yuu'ōgaangixy anajty?

²⁶ Je huin'it tiempo jecy'ajty co je judío teedy Abiatar mjtungmíidpí anajty ma Dios ytíj, chi David ytígíy ma Dios ytíj, e caay je tzajcaagy huídibi ti anajty yoxy ma Dios yhuinduu. Dios ycótújcin ymínañ co je teedy ajcxy ycaagy'ajtpy jada tzajcaagy, ca' jac'ooyñipin. Nañ jadu'n David moy je tzajcaagy je jāy huídib anajty ajcxy ymíid.

²⁷ Nañ jadu'n Jesús yjacmínañ:

—Hich, je jāy huídibi tzoon tzajpjoty, nmíidich ané'min, jaydēb nímayích je jāy ajcxy ti jēb túngixy sábado xii. ²⁸ Com Dios ti íxmach je sábado xii, paady ycíxpi, íich je jāy huídibi tzoon tzajpjoty, nmíidich ané'min jaydēb nímayích jāy ajcxy co jēb tijaty tuñ sábado xii.

3

Je yëdyjc huídibi anajty yci' t'ítz

¹ Jesús ytigíy jadüg'oc ma je judío naymujctac. Jiiby anajty tüg yëdyjc huídibi anajty ymíid tüg yci' t'ítz. ² Je fariseojäy jiiby ma je naymujctac y'ijx'ijtpy anajty Jesús, co anajty nejhuihua'ñ pen Jesús yajtzögamy je pa'mjäy sábado xii, jigix jëbi ajcxy xihuip Jesús co ti ytundigoy míid judíojäy ycötújcín.

³ Jesús nimay je jäy huídibi míid tüg yci' t'ítz:

—Pidíg, min ya ma ñch.

⁴ Huin'it Jesús y'amídoj je jäy ajcxy e nimay:

—¿Nej müch ajcxy mínaangixy: Nej jëbi jada nduñich je oybi o je jibicpi sábado xiijoty? ¿Jëbi nyajtzögich jäy o jëbi nyajtigoyich jugy'ájtín?

Per je jäy amoñ ajcxy ijty, ca' ajcxy je' y'adzooy. ⁵ Huin'it Jesús huindicxpejty je jäy ajcxy míid chip y'ahua'n, e míid jotmay, je' co ooy ajcxy jotjuuñity, e chi nimay je yëdyjc:

—Xajtiu yi mgi'.

Chi je yëdyjc xajtiy yci', e chi yci' oy chögy. ⁶ Chi je fariseojäy ypidzimday ma je naymujctac, ooy yjotmädy ajcxy, e ñicxy ajcxy ñaymújcip míid je jadügpicy judío huindzindijc huídibi ymíjnicxpejt je rey Herodes. Huinma'ñ itxaayb anajty ajcxy nej jëb ocyaj'ögip Jesús.

Mayjäy ma tüg nñiba'

⁷ Per Jesús chooñ míid yi' ydiscípulos ajcxy, ñicxy ma mejypa'. E ooy mayjäy huídibi ajcxy tzomb Galilea ñaaxjot etz Judea ñaaxjot panicxy ajcxy Jesús. ⁸ Nañ jadu'n mayjäy panicx ajcxy Jesús huídibi ajcxy tzomb jim Jerusalén, huídibi ajcxy tzomb jim Idumea ñaaxjot, huídibi ajcxy tzomb jim Jordán mijñi nñaxy ma xii ypidzimyb, huídibi ajcxy tzomb jim Tiro etz Sidón ñaaxjot. Ñicxtäy je mayjäy ma Jesús yajpaady, com ñejhuíyib anajty ajcxy je mijhuinma'ñ huídibi Jesús anajty ytumyb. ⁹ Com tzach mayjäy anajty ymiingixy, paady Jesús ni'ane'mdiy ma yi ydiscípulos ajcxy tüg barco ma jëb ññäy, ca'ty je mayjäy ooy y'adijyíi y'agodíyíi. ¹⁰ Com Jesús ti anajty yajtzögy may jäy, paady ycxipí tüg'ócíy je pa'mjäy nimujcy Jesús, adzip tzachñidonaangixy. ¹¹ Co je jäy ajcxy huídibi ca'oybi ymíid ijxpaty Jesús, chi ajcxy ñayhuíjotaci ma Jesús yhuinduu, e mic ycapxcooty, ymínaangixy:

—Müch je' Dios y'ung.

¹² Per Jesús nimay mictägy je ca'oybi ajcxy co ca' huaad nigapxcixy nimíydaaccixy pin je' anajty.

Jesús huin'ixy majmetzpi discípulos

¹³ Huin'it Jesús ypejty ma tüg cögoj, e capxyñiguexy co huen miñ ma yi' je ymígügtijc huídibi yhuin'ixamy co ytunam míid yi'. Chi ajcxy ymiñ ma Jesús.

¹⁴ Chi Jesús yhuin'ijx majmetz ajcxy huídibi ymíid'idamy, e huídibi yquexamy y'ayuccapxhuácxp. ¹⁵ Jesús moy je majmetzpi discípulos ajcxy huídibi anajty ti yhuin'ixy mic'ajt jaydëb yajtzögip pa'mjäy ajcxy, e ymoy ajcxy ymic'ajt jaydëb ca'oybi yajpidzimy ma jäy ajcxy. ¹⁶⁻¹⁷ Jada je nimajmetzpi discípulos ajcxy yxii nidüg nidüg: Simón, je huídibi Jesús yxii moy Pedro; Jacobo míid y'uch Juan, yi Zebedeo y'ung y'anäg, je huídibi ajcxy Jesús yxii moy Boanerges (je ayuc Boanerges jadu'n yhuimbizimy: “Enee ymang”). ¹⁸ E jacjadyíi huídib Jesús ti anajty huin'ixy: Andrés; Felipe; Bartolomé; Mateo; Tomás; Jacobo je huídibi

Alfeo ymang'ajtpy; Tadeo; e je jadügpí Simón, je cananista. ¹⁹ Nañ jadu'n Jesús huin'ijxy Judas Iscariote, je huídibi agojix cıyejc Jesús ma ymidzip.

Yajnıbjccıxy Jesús co müidity mujcu'ymic'ajt

(Co jadu'n huin'ijxtaay je majcmetzpi discıpulos ajcxy), Jesús ytigıy ma tügtıjc müd yi' ajcxy. ²⁰ Huin'ıtiy tzach mayjäy ñayöymüjcgıxy ma je tıjc ma Jesús y'ıty, ıxtı Jesús etz ymıgügtıjc ca' y'oyıy nej jëb ycaaygıxy y'uuccıxy. ²¹ Co Jesús y'amıgügtıjc jadu'n nejhuiıy, chi ajcxy nımıñ Jesús yajnicxaangıxy anajty mach, com hue' anajty tıjıxy co Jesús ylocıb.

²² Nıjējıty escribas ajcxy, je huındzındıjc huídibi nıjaydutp anajty Dios ñecy, mıñ ma Jesús co choñ ajcxy Jesusalén, ymınaangıxy:

—Jada Jesús ymıd Beelzebú, je ca'oybi yhuındzin, ma y'aa yjot. E yı' yajpidzımy je ca'oybi ajcxy ma jäy ajcxy yjothuinma'ñ müd Beelzebú ymic'ajt.

²³ Chi Jesús huoomıñ ma yi' je escribas ajcxy, e yajmıdmıydacy ajcxy tüg jıhuımbıt ayuc. Chi Jesús ymınañ:

—¿Nej tıy'ajt jada nej mııch ajcxy mına'ñ co Satanás jëb cı'm ñayajpidzımyıı ma jäy ajcxy y'aa yjot? Ca' tıy'ajt nej mııch ajcxy mına'ñ. ²⁴ Pen tügpıcy tungmıdpi ıxyıpy ñaybjıjc-huá'cxıgıxy, etz ñaymıdzıptzónıgıxy ıxyıpy ac jëyi. Pıes cıxıpy yı' ajcxy y'ané'mın. ²⁵ Nañ jadu'n pen tügpıcy tüg juugy tüg mıgüg ıxyıpy ñaybjıjc-huá'cxıgıxy, ca' ajcxy y'ıdaangıxy tügmıcy. ²⁶ Nañ jadu'n pen Satanás ıxyıpy tı ñaybjıjc-huá'cxıyıı, e cı'm ıxyıpy tı nayñıbidıgyıı, ca' ıxyıpy yı' ymic'ajt ıda'ñ. Hue' janchtıy Satanás cıxıpy tıgoyıpy. (Paady ca'tıy'ajıtıty nej mııch ajcxy ymınañ.) ²⁷ Ca' nı pın jëb huaad ytıgıhuıp ma tüg mıcpı jäy ytıjc etz meedzıpy tıjaty ymıd, pen ca' jayıjp cıxoch tecyoch je jäy mıcpı. Pen tı cıxoch tecyoch ıxyıpy je mıcjäy, huin'ıt janchtıy mımadägıpy, e pıjıcp tıjaty ymıd.

²⁸ Janch ıch mııch ajcxy nımäy co Dios jëb huınmeecıpy tüg'ócıy pocy huídibi jäy ytüngıxp etz tüg'ócıy jıbıcpı huídibi jäy ycapxp. ²⁹ Jëyi janchtıy co pınjaty capxtıgooyb müd je Espıritu Santo, je Dios yjıhui'ñ ymic'ajt, ca' Dios huınmecxı nımına. Huınıxı y'ıda'ñ pocymıd.

³⁰ Müd co jäy ajcxy chach ymınaangıxy co Jesús anajty müidity ca'oybi, paady Jesús jadu'n ymınañ.

Jesús ytaj etz y'uch mıguëxy ajcxy

³¹ Jesús ytaj etz y'uch ajcxy oy yja'ty ma anajty Jesús yajpaady. Chi Jesús ytaj etz y'uch ajcxy anajty ytınaaygıxy tıba'y, e chi ajcxy capxıgıuejxy Jesús.

³² Je mayjäy huídibi anajty ajcxy ıñaaıyb jıhuıdıtı ma Jesús, ymınañ ajcxy:

—Mııch mdaj etz m'uch cheeby ajcxy tıba'y mııch ıxtaayb.

³³ Chi Jesús ymınañ:

—¿Pınjäy mııch ajcxy mdıjy co ıch ndaj'adyıı etz ıch n'uch'adyıı?

³⁴ Huin'ıt Jesús huındıcxpejty je jäy ajcxy huídibi anajty ıñaaıyb ajcxy jıhuıdıty ma je', e ymınañ:

—Tüg'ócıy jada jäy ya jadu'n ajcxy nıpaady nej ıch ndaj etz ıch n'uch.

³⁵ Hıenıtımyıpınıty huídibi ajcxy cıydumb yı Dios chójcin, yı' je' jadu'n nıpaady nej ıch n'uch, ıch n'ajch, ıch ndzi' etz ıch ndaj.

¹ Jadüg'oc Jesús ytigüy yaj'ixpijcpí ma mejypa'. E ooy mayjäy ymujcpejty ma anajty Jesús yajpaady. Müid co ooy anajty chachmayjäyity, paady Jesús ytigüy ma tüg barco jahuengi mejyjoty. Jesús iñaayb anajty barcojoty, e je mayjäy iñaayb anajty ajcxy ma mejypa'. ² Huin'it Jesús yaj'ixpijcy je mayjäy müid canaag jihuimbit ayuc. Co yaj'ixpijcy, chi ymínañ:

³—Amídoo'ijtcix müich ajcxy iich jada n'ayuc. Tüg jäy chooñ niipi. ⁴ Co je niipi yhuijpy anajty trigo tñm, chi je trigo tñm nijējity oy ycäy tñm tügüj. Chi je joon ajcxy ymüñ jicxy je trigo tñm huídibí tügüj ti ycäy. ⁵⁻⁶ E nijējity trigo tñm oycäy ma tzaanícx, ma nihueeñ oyñaax yajpaady. E je trigo tñm ca' tzip mujx je', je'co ca'anajty ooy naax mápxity. E co je xü ypidzimy, chi no'cy je trigo mang, com ca' anajty ytictz müidity naaxjoty, chi ytíich. ⁷ E nijējity trigo tñm oycäy ma apyot. Co jada trigo tñm ymujxy, chi y'ujtz'ögtäy je trigo mang, e ca' ytíim'ajty. ⁸ Per jacjadyii trigo tñm oycäy ma oyñaax, chi ymujxy, e ytíim'ajt may'amy: tüg pi'c pajc iipxmajc oyco'ity, jadüg pi'c pajc tugí'px oyco'ity, jadüg pi'c pajc migo'px oyco'ity.

⁹ Co Jesús je miydägi yajmay, chi ymínañ:

—Pinjaty müid ytätzac, pin midoquamy, huen mido'mbicy jada ayuc.

Ti yí' ñigapxpy yí ijxpejt

¹⁰ Co je mayjäy ñicxni, e Jesús yhuí'my naydüg, chi je nimajmetzpi ydiscípulos ajcxy etz jacjadyii huídib müjnicxpejt Jesús ñimijhua'cy, e amidoy nej yhuimbidzimy je jihuimbit ayuc. ¹¹ E Jesús ymínañ:

—Müich ajcxy jaydéb mnejhuíhuipy huídibí Dios ñigapxpy ñimiydacpy coyüch'amy ma y'ané'min ycotújcin. Jacjadyii jäy ajcxy jihuimbit'amy nyajmüidmíydaacyich. ¹² Jadu'n jihuimbit'amy nyaj'ixpijcpýich je mayjäy, jaydéb co pinjaty ijxp, ca' ajcxy ixipy; etz pinjaty midoob, ca' ajcxy mido'mbigipy. E jadu'n ca' ajcxy yjothuimbidip, e nañ ni ycajameecxipy ajcxy ypopy.

Jesús najtzcapxü nej yhuimbidzimy je niipi y'ijxpejt

¹³ Chi Jesús yjacmínañ:

—¿Nej ca' müich ajcxy mhujnjihuüy jada jihuimbit ayuc? Pen ca' müich ajcxy mhujnjihuüy jada jihuimbit ayuc, ca' müich ajcxy mhujnjihuüip yí jacjadyii jihuimbit ayuc. ¹⁴ Je huídibí capxhuäcxp Dios y'ayuc, jadu'n yí nipaady nej je huídibí niip trigo tñm. ¹⁵ Je jäy ajcxy huídibí amídoo'ijtp Dios y'ayuc, e mic'amy je ca'oybí yajpidzimy Dios y'ayuc ma ajcxy yjot yhuinma'ñ, jadu'n ajcxy nipaady nej trigo tñm huídibí cáb tügüj, e je joon ajcxy mic'amy piimujctay. ¹⁶⁻¹⁷ Je jäy ajcxy huídibí amídoo'ijtp Dios y'ayuc janch jotcuje, e mibíjccixy tzojccíx, chi ajcxy ixmajtz Dios y'ayuc co agapxiyb paady, e co tzaachypí minaxy yajnaxy müid Dios y'ayuc ycxpi. Jadu'n ajcxy nipaady nej je trigo tñm huídibí ti ycäy ma tzaanícx. ¹⁸⁻¹⁹ Je jäy ajcxy huídibí amídoo'ijtp Dios y'ayuc, e co ñicxni, chi jäy dígooñí Dios y'ayuc müid jotcuje'ájtín tzaaayín, etz comeeñ'ájtín etz adzójcin. Jadu'n ajcxy nipaady nej trigo tñm huídibí ti ycäy ujtzjoty, e ca' ytíim'aty müid co oy y'ujtz'ögy. ²⁰ Je jäy ajcxy huídibí amídoo'ijtp etz cöbijcp Dios y'ayuc amumdügot etz Dios y'ayuc tumb ma ajcxy yjot yhuinma'ñ, jadu'n ajcxy nipaady nej je trigo tñm huídibí ti cáb ma oyñaax etz ytíim'aty may'amy: tüg pi'cpajc iipxmajc, etz jadüg pi'cpajc tugí'px, etz jadüg pi'cpajc migo'px.

Je lámpara ñi'ijxpejt

²¹ Chi Jesús yjacmínañ:

—Co jäy ajcxy jindicxi'ñ nöctzoy, chi canan ajcxy cöjuyjy müid tu'tz, ni ca' ajcxy pidacy cijxp'a'ci'py, hue' janchtiy pidaaccixy ma jindicxpejt jaydëb mij ytiicxy. ²² E nañ ni ca' ni pin ni ti jëb ameech tunipy, e nicxy ycayajnejhuüy. E ca' ni pin ni ti ayüch tunipy, e nicxy ycayajnejhuüy. ²³ Pinjaty ytätzac ymüid, pin midoohuamb, huen mido'mb'ijcixy iich n'ayuc.

²⁴ Nañ jadu'n Jesús ymüinañ:

—Cuendtúngix jada ayuc huídibi müich ajcxy yam mmidooyb. Yi quipxi'ñ huídibi ajcxy myajquipxi'iyb, nañ jadu'n yi' müid Dios ajcxy xyquipxyhuimbidipy, e ixti jacyajmöhüp ajcxy huídijaty midoob iich n'ayuc. ²⁵ Pinjaty ymüid, yajmöhüp nigi, pinjaty hueen müid, yajpigipy nigi (oy ixypy hueen jadim müidity).

Je tñm huídibi yeecp ñi'ixpejt

²⁶ Nañ jadu'n Jesús ymüinañ:

—Yi Dios y'ané'min jadu'n yi' nej co tüg jäy nicxy ñipy ma ycamjot. ²⁷ Chi jada' co ñiipitay ñicxni ma ytiyc e ymi'o'cni ymäybidigni com jabom, e jadu'n yajnaxy canaag xi' tzuu. E je moc pajc mujxp je' etz yomb. Per je cogam ni ca' nejhuüy nej je moc yoñ, ma mic'ajt paady. ²⁸ Je' co yi' naax ci'm mic'ajt müidity jaydëb yajyoñ je moc. Jayijp ypidizimy je moc ung, jac'axam ypidizimy yi' moc pijy, e chi jada' ytiim'ajtñi. ²⁹ Co je moc ymajaani, chi je jäy ajcxy nicxy moc tzijcp, com ti yhuindiy je moc.

Ijxpejt ma je mostazi pajc

³⁰ Nañ jadu'n Jesús ymüinañ:

—¿Nej m'oc'a'ixhiygixy yi' Dios y'ané'min? ¿Ti müid n'ocyajquipyxihuibich?
³¹ Jadu'n Dios y'ané'min nipaady nej mostaza pajc huídibi tüg jäy nicxy niipy ma ycam. Yi mostaza pajc jacnigi ymützity ca'ydí jacjadyii ujtzpajc huídibi yajpatp ya naaxhuiñ. ³² E co yajnipy je mostaza pajc, chi yoñ, e chi yeegy ooy janch mij, ca'ydí jacjadyii ujtz. E janch mij yeegy tüg'óciy yci' y'aacx, ixti joon ajcxy pe'mb ma je yci'y'aacx y'anicüy.

Nej anajty Jesús yecy je tiy'ajt müid je ijxpejt yci'ixpi

³³ Jadu'n anajty Jesús yaj'ixpiy je mayjäy ajcxy Dios ytiy'ajt müid canaag jihuimbit ayuc, ixti mibaad ajcxy jëb huinjihuüy. ³⁴ Ac jihuimbit ayuc Jesús yajnimay je mayjäy. Per müid y'ydiscípulos Jesús ycapxticxtaayb anajty je jihuimbit ayuc.

Jesús capxticx nej huimbizimiy je ijxpejt

³⁵ Je huin'it xi' co ycoodziiy, chi Jesús nimay yi' ydiscípulos ajcxy:

—Tzoc ajt jámim jim'amy ahuin ma yi' jadügpí mejypa'.

³⁶ Huin'it Jesús ydiscípulos ajcxy ixmajztay je mayjäy, e müid tzoñ Jesús barcojoty. Nañ jadu'n jacjadyii barco ajcxy choñ quipxy müid Jesús ydiscípulos ajcxy ybarco. ³⁷ Je huin'it coodz tüg poj müiñ janch mic. E je mejy nigoo anajty y'ocpidigni. Janch tigiüyb anajty nií barcojoty, jagoo jagoo yca'ujztay je barco müid nií. ³⁸ Jesús maab anajty ma je barco iix ma tüg mabejt. Chi yajmäybidigi, e nimay ajcxy:

—Huindzin, ¿nej ca'mduñcuend co iich ajt yam nguinaanim?

³⁹ Huin'it Jesús ymäybidigy, e jijpcogapxiy je poj. Etz nimay je mejy:

—¡Amon! ¡Huäcxip!

Chi mic'amy je poj ymongidactay yhuæcxijptay jadu'ñyi. ⁴⁰ Huin'it Jesús yminañ:

—¿Na'amy co mdzachtzigüygixy ajcxy? ¿Nej ca' mmibijccixy co nmüidich Dios ymic'ajt?

⁴¹ Jesús ydiscípulos ajcxy ooy chigüy, e ñayñimaay ajcxy miñ xyipy:

—¿Pin jāy jada' jada Jesús? Ooy chachmijhuinmañ co yi poj etz je mejy ycapxymidooyi.

5

Je Gadarajäy huidibi anajty ca'oybi müid

¹ Chi Jesús müid ydiscípulos ajcxy oyja'tcixy ma je mejypa' ma je Gadara jāy ñaaxjot. ² Tim mic'amy co Jesús ybarcobidzimy, chi nimiiñ tüg jāy huidibi ca'oybi müid anajty. Hue' anajty choon ma öcpi jut. ³ Je yëydjic, ca'oybimüidpi, tzinaayb anajty ma öcpi jut. E ni pin anajty ycamimadägyii. Ni pin camimadacy nicx cïxoch tecyxoch jada je ca'oybimüidpi, e ni ca' ajcxy mimadacy müid cadena. ⁴ Canaag'oc ajcxy jacïxojch jatecyxojch müid cadena, e ypojtaayb anajty je cadena. Ni pin camihuinmañybaady nej jëb ocmimadaaccixy je ca'oybimüidpi. ⁵ Je ca'oybimüidpi xim tzuum anajty yhuidity tüg yuugjot etz ma öcpi it, janch mic anajty yäxytinäy. E chachnayya-tzaaachiyii anajty müid tzaa.

⁶ Jiguëgy anajty je ca'oybimüidpi ymiñ, co ijxpaty Jesús, chi poygy ninicxy Jesús, e ycojxtinay'ahuïy ma Jesús yhuinduu. ⁷ Je ca'oybimüidpi mic migapxcooty Jesús, e nimay:

—Jesús, je mijpi Dios y'ung, ¿na'amy co xymidziptzooñich? May'ajt nbijctzooybich ma Dios co ca' iich jëb huaad xychaachytuñich. ⁸ Je ca'oybi jadu'n yminañ, com Jesús ti anajty nimäy:

—Ca'oybi, pidzimb ma jada yëydjic.

⁹ Jesús y'amidooy je ca'oybi:

—¿Ti mxii?

Chi je ca'oybi y'adzooy:

—Iich nxiñ hue' je' "ni may", com ni may iich ajcxy huidibi yajpatp ma jada yëydjic.

¹⁰ Huin'it je may ca'oybi may'ajt pijctzoy ma Jesús co ca' ajcxy jëb huaad ixquexyii ma huingbi it lugar. ¹¹ Huingon anajty je cop ma anajty may idzim yjïxcxixy. ¹² Chi je ca'oybi ajcxy may'ajt pijctzoy, e nimay ajcxy:

—Najtzquexiyg ma yi may idzim, jigix jëbi n'adigiyich njottigiyich yi may idzim.

¹³ Chi Jesús jadu'n a'ixiy co jëbi adigiyigixy jotigiyigixy je may idzim. Chi je ca'oybi ypidzimday ma je yëydjic, e yajtigiyday je may idzim ajcxy. Jim anajty yajpaady jahuengi mejtz mil idzim. Chi je idzim ylociydaay, e ycögänaxtaay ajcxy ma tüg tzajjip, e oy ycädaaygixy nijjoty, e chi ajcxy ñii'ogtay.

¹⁴ Je idzim cuend'ajtp ajcxy ooy ajcxy ñay'adzigüiyi, e nicxtay ajcxy poygy ma ytjic. E oy nimiydaaccixy cajpjoty etz majaty tundac nej anajty ajcxy y'idzim y'öctaaygixy. Mayjäy ajcxy choñ mic'amy oy ijxcixy nej anajty ti ytunyii ti yjadyii. ¹⁵ Co je mayjäy ajcxy yja'ty ma Jesús yajpaady, chi ajcxy ijxy je yëydjic huidibi anajty mayca'oybi ymüid. Ijxy ajcxy co iñäy huit müid etz huijycujc, ti anajty y'oyiy. E huin'it ooy ajcxy je mayjäy ñay'adzigüiyi. ¹⁶ Je jāy ajcxy huidibi anajty huindixp co anajty je ca'oybimüidpi ti y'oyiy, etz ijxcixy nej ti ytunyii ti yjadyii müid je may idzim, chi yajmïydactay je maycajpijy

jadu'n nej anajty ti ijxcixy. ¹⁷ Huin'it ajcxy pijctzoy may'ajt ma je Jesús, co huen tzoofn ma ajcxy je ñaaxjot.

¹⁸ Co Jesús ytiigiy jadüg'oc ma je barco, chi je yëydijc huídibi anajty ca'oybi ti ñibidzimyíi ti ycöbidzimyíi, pijctzoy may'ajt ma Jesús co huen a'ixíy möhuip co huen müd'idyíi Jesús. ¹⁹ Per Jesús ca' a'ixíy co ymü'd'idyíi, chi ñimay:

—Huimbít ma mdijc etz mjugymigüg, e yajmü'dmiydäg jada mǎjpi tung mǎjpi huinma'ñ huídibi je Huindzin Dios ti tuñ müd miich. Müdmiydägǎpy jadu'n nej je Huindzin Dios ti xypa'ayoy.

²⁰ Chi je yëydijc yhuimbijtni, e huídijtp anajty cajp cajp jim Decápolis ñaaxjot, e ñimiydactay tüg'óciy jadu'n nej Jesús ti yajtzögyii, e tüg'óciy je mayjäy ooy jihuuy huinmay.

Je Jairo ñix etz je töxyjäy huídibi Jesús yhuít ñidoni

²¹ Co Jesús huimbijty barcojoty ma je mejypa' ma anajty ti choofn, chi mayjäy ymüñ ma Jesús yajpaady, chi Jesús yhuäcxijpy ma je mejypa'.

²² Huin'it Jesús ñija'ti tüg mǎjtungmüdpí ma yí judíojäy ajcxy ñaymujctac. Je yëydijc hue' anajty xijity Jairo. Co Jairo ijxpaty Jesús, chi ñayhuíojtác ma Jesús yhuinduu. ²³ Jairo may'ajt pijctzoy, ymíñañ:

—Huindzin, ógaanip íich nníx. Tun may'ajt nícxxy ma íich ndijc, e mgíñixájip ma íich nníx, jigix jébi myajtzögip, e yjactzináhuip.

²⁴ E Jesús nícxp anajty müd Jairo, e mayjäy panícxxy anajty Jesús. E je mayjäy ooy anajty tzach'adijy'y tzach'agodí'y Jesús. ²⁵ E ma je mayjäy ymüñ anajty tüg töxyjäy pa'm müd, jécyíñ anajty ymíjtacni. Majmetz jimíjt yxí ybo' anajty cujc payöy, ca' anajty y'oc-huäcxijpni je ní'py. ²⁶ Jada töxyjäy ti anajty yajtzoyduñ müd may tzozdumbi, ti anajty ymeen' yajtundäy ma je tzozdumbi ajcxy. E je'ni anajty ypa'm'ity. Ni ti pubéjtin ti capaady, íxti nǎgi anajty ypa'm mǎjhua'ñ.

²⁷ Jada töxyjäy ti anajty ayuc midoy nej Jesús anajty pa'mjäy yajtzögy, paady ñimíñ etz ñimǎjhuägü jíxcí'py'amy, chi ñidooni Jesús yhuítpa'. ²⁸ Jada töxyjäy nayñimaayi jotjoty huinma'ñjoty: “Co nnídoníbx Jesús yhuítpa', müd tím yí'yí ndzögíbx.” ²⁹ Co je töxyjäy nidoñ Jesús yhuítpa', tím huin'ityi mic'amy yhuäcxijp je ní'py. Huin'it je töxyjäy jihuuy co anajty ti chögy.

³⁰ E Jesús jihuuy co anajty ti yajtzögy tüg jäy müd ymic'ajt, paady ní'ijxhuimbijty je mayjäy huídibi anajty pamíñip, y'amídooy ajcxy:

—¿Pín íich nhuit ti xyñídoni?

³¹ Huin'it Jesús ñimaayi ajcxy ydiscípulos:

—Míich m'ijxpy co yí mayjäy xychach'adijy xychach'agodíy, e míich mǎna'ñ: “¿Pín ti xyñídoníx?”

³² Per Jesús huindícxypejty je mayjäy júhuidity ma yí, oc'íxañ ocne-jhuíhua'ñ pín anajty ti ñidonyíi. ³³ Huin'it je töxyjäy, com ñejhuíyib anajty jadu'n nej Jesús ti yajtzögyii, paady ñimǎjhua'cy Jesús janch tziyuuyb müd tzigí'ñ ñayhuíojtác ma yí yhuinduu. ³⁴ Jesús ymíñañ:

—Töxyjäy huídibi ooy ndzócyíx, ti mdzögy müd co ti xymíbcyíx. Nícx agujc jotcujc, ti mba'm ñaxy.

³⁵ Capxp mǎydacp anajty Jesús müd je töxyjäy co ñijéjty jäy ñimiini, choñ ma je judío jäy ñaymujctac mǎjtungmüdpí ytíj, e ñimay je töxy'anäg yteedy:

—Yí mníx ti je y'ögy. Ca' huaad mǎjac'amayy nǎg yí Huindzin Jesús.

³⁶ Per Jesús ca' tuñcuend jadu'n nej ajcxy yjamíña'ñ, chi ñimay je naymujctac huindzin:

—Ca' mdzigíy, míbc nigoda'ajty.

³⁷ E ni ca' jac'a'ixiy nicxy yjacmüdnicxyii jacpınjaty. Jëda'ajty müdnicxy je Pedro, Jacobo etz Juan, je Jacobo y'uch. ³⁸ E co Jesús ytıjctıgııy ma yi naysmıjctac huındzin ytıj, chi ıjxy jadu'n nej jäy jııby chachne'ngıxy chachjııyıxy chachyaaxcıxy. ³⁹ Co Jesús tıjctıgııy, chi nımay je jäy ajcxy:

—¿Nej co nıgoo ajcxy mdzachne'mni, e mdzachyaáxcıxnı? Yi pi'c töxy'anäg ca' yi' ti y'ögy, maab yi'.

⁴⁰ Per nıgoob ajcxy Jesús nıxiıcy co jadu'n ymına'ñ. Huın'ıt Jesús yajpidzimday tüg'ócıy pınjaty anajty jııby tıgoty, e müd tıjctıgııy jëda'ajty je ungedeedy etz ungdaj, e nañ je tugııgpi ydiscıpusos huıdıbi anajty ti müd müñ. Chi ajcxy ytıgıy jııby ma anajty je töxy'anäg yajpaady. ⁴¹ Chi Jesús májtzyı yi töxy'anäg yci', e chi nımay:

—Talita, cumni —jadayaab ayuc hue' yi' yhuımbıdzımy: Töxy'anäg, ııch müıch yam nımaayb, pidıg.

⁴² Huın'ıtıy je töxy'anäg, je huıdıbi anajty majmetz yjimıjt, ypidıgy e ytıyöychoñ. E tüg'ócıy yi mayjäy ooy ajcxy jıhuıy huınmay. ⁴³ Huın'ıt Jesús najtzcapxııy co ca' huaad pın yajnimay jadu'n nej je töxy'anäg ti chögy, nañ jadu'n ni'ane'mdıy co huen ajcxy yajcay je pi'c töxy'anäg.

6

Jesús yajpaady jim Nazaret

¹ Huın'ıt Jesús chooñ ma je jimbi it lugar, e yhuımbıjty ma yci'ngajp. E müd ñıncy yi' ydiscıpusos ajcxy. ² Sábado xııjoty Jesús ytıgıy yaj'ıxpııjcp ma je mayjäy huıdıbi yömıjccıxp ma je judıo jäy ñaymıjctac. E je mayjäy huıdıbi amıdoo'ıjtp anajty ooy jıhuıy huınmay ajcxy, e ñayñımaayı ajcxy müñ xyıpy:

—¿Ma jada' jadayaab jäy ti ni'ıxpııgıy jadayaab ıxpııjcin? ¿Ma ti paady jada huıjy'ajt cujc'ajt huıdıbi ymıd? ¿Ma jada' ti paady yi' mıc'ajt huıdıbi müd mıjhuıma'ñ tumyb? ³ Je' jada je tzejtzpi, yi María y'ung. Yi' y'uch ymıgüg, yi Jacobo, yi José, yi Judas, etz yi Simón. Nañ jadu'n yi' y'uch töxyjäybi cha ajcxy chinäy quıpxy müd ııch ajt.

E je mayjäy ca'ajcxy anajty ıxa'ñ cöbıga'ñ Jesús. ⁴ Huın'ıt Jesús nımay je mayjäy ajcxy:

—Huenma'amyıty tüg'ócıy je mayjäy ooy yajmıj'aty je jäy ajcxy huıdıbi najtzcapxııyb Dios y'ayuc. Jëyi janchtıy, ma yci'm naax ma yci'ngajp ca' je jäy ajcxy yajmıj'adyıı, etz nañ ytım jadu'n yi' y'amıgügtıjct etz ymıjıın ymıdıjct.

⁵ Ma yci'm naax yci'm gajp Jesús ca' jaty nej mıjhuıma'ñ tunıpy müd co ca' ajcxy mıjpidägyıı. Jëyi ycıpidacy ma nıjëjıty pa'mjäy etz yajtzoooy. ⁶ Jesús ooy jıhuıy huınmay nej je jäy ajcxy ca' ymıjpidägyıı ma yci'm naax yci'm gajp. Chi Jesús chooñ jim ñıncy ma jacjadyıı cajp huınduy agonbi, e yaj'ıxpııjcy anajty je mayjäy ajcxy.

Jesús quexy ydiscıpusos ayuccapxhuäcxp

⁷ Huın'ıt Jesús mıjhuoy je majmetz ydiscıpusos ajcxy, e chi quejxhuäcxy nımetz nımetz ma canaag cajp. E chi mooy mıc'ajt, jıgıx jëb yajpidzımy ajcxy ca'oybi ma jäy ajcxy. ⁸ Nañ jadu'n y'ane'my Jesús je' ydiscıpusos ajcxy co ca' huaad ti mıñıxcıxy tü'amgıxpi, jëyi jëb mıñıxcıxy tüg tajc nıdüg nıdügtı. Ca' huaad mıñıxcıxy ymorral, e ca' huaad mıñıxcıxy ycaagy, e ca' huaad mıñıxcıxy ymeeñ. ⁹ Jëyi je ycıg etz je yhuıt huıdıbi anajty ajcxy ymıd huen mıñıxcıxy. ¹⁰ Chi Jesús ymına'ñ:

—Co anajty ajcxy mjättaccixy ma tüg tijc, jim ajcxy mhuí'mipy ixti coon mdzóonip ma yijimbi cajp. ¹¹ Pen mdigüygixp ma tüg cajp, e je jäy ajcxy ca' ajcxy xycöbiga'ñ, ca' ajcxy amido'ida'ñ miich m'ayuc, mbidzimgix ma je cajp, chi mhuinhuójpáixipy mgig. Jada je' je tiy'ajt co ca' ajcxy mjotcúcity. Janch ich miich ajcxy nimäy co Dios anajty ytiyduñ jada naaxhuiñ jäy, jacnigi tzaachypi paada'ñ yi jäy ajcxy huidibi ajcxy anajty ca' xycöbáccixy, ca'ydi je' ajcxy huidibi tzinaay jecy'aty ma Sodoma etz Gomorra cajp.

¹² Chi je nimajmetzpi ajcxy chon Dios y'ayuccapxhuäcxy co huen jäy ajcxy jothuimbáccixy, huen ixmajtzaaygixy yi pocytuní. ¹³ Nañ jadu'n ajcxy yajpidzimy ca'oybi majaty jäy, e pidaaccixy aceite majaty pa'mjäy, e yajtzóoccixy anajty.

Co Juan je Bautista y'ögy

¹⁴ Huin'it je rey Herodes nejhuüy co Jesús canaag mijhuinma'ñ tzachytuñ anajty, com tüg'óciy je mayjäy anajty nimiyaaccixy Jesús. Herodes ymínañ co Juan je Bautista ti yjugypicy jadü'oc ma anajty ti y'ögy, paady mic'ajt müdity jaydéb mijhuinma'ñ tuñ. ¹⁵ Nijéjity jäy ymínaangixy:

—Jesús yi' je' Elías.

E naagity jäy ymínaangixy:

—Yi' je' tüg Dios tiy'ajtmüdpí huidibi quipxyíby müd je Dios ytiy'ajtmüdpí huidibi tzinaay jecy'ajty.

¹⁶ Co Herodes nejhuüy nej je mayjäy nimiyaaccixy Jesús, chi ymínañ:

—Janch jada co Juan ti yjugypicy, je huidibi nni'ane'mdüyich co huen yajmínagyyi ycohuajc.

¹⁷ Müd Herodías, Herodes ytóxytjic ycixpi, Herodes n'ane'mdüy co Juan yajmach, e pidägyi pujxtigoty. Jada Herodías jayjip ypijcy müd je rey Herodes y'ajch Felipe, per ti anajty ixmach Felipe, e ypijctigajch müd je ycapy Herodes. ¹⁸ Hue' anajty Juan ti nimay Herodes:

—Ca' jadu'n paadyii co yi m'ajch Felipe ytóxytjic miich müddzinaayi.

¹⁹ Paady ycixpi Herodías mijotma'ty Juan, e ytimy yaj'ögamy anajty. Per ca' mic'amy yhuinma'ñybaty nej ocyaj'ögip; ²⁰ com je rey Herodes ñejhuüyb co tudägy jäy huadz jäy anajty je Juan, e tzigüyb anajty müd Juan. Paady ycixpi anajty je rey Herodes Juan müdity cuend'aty pujxtigoty. Naag'oc naag'oc anajty Herodes nicxy amido'ity Juan y'ayuc, ooy anajty huinmay nej yhuimbizimy, per jotcuaj anajty amido'ity.

²¹ Huin'it Herodías ypat huinma'ñ nej jéb yaj'ögy Juan je huin'it xí co je rey Herodes anajty ñayñixíduñyí. Hue' yajcay yaj'uucy je gobierno ytumbi ajcxy, je soldado huindzin ajcxy, etz tüg'óciy yi mic jaydjic huidibi ajcxy tzinaayb naag naag cajp jim Galilea. ²² Xíduñyoty anajty co Herodías ñix oy y'ech ma je rey anajty yajpaady müd je may jäy huidibi anajty yajcaayb yaj'uucy. E jadu'n nej je Herodías ñix y'ejch, ooy je rey jadu'n jäygidacy, etz tüg'óciy je jäy je huidijaty anajty müd ajcxy ycaaygixy y'uuccixy. Chi je rey nimay je töxy'anäg:

—Pijctzóohuigich ti mdimdzojcpy, ich miich nmöhuipy.

²³ Je rey nigí capxcódujcy janch cixyot huinijot co möhua'ñ ti ytimy ypijctzooyb, ixti jéb jamöy cujhuäcxy yi' y'ané'min, mibaad anajty ane'my je naaxjot. ²⁴ Chi je töxy'anäg ñicxy ma ytaj oy amidoy, nimay:

—¿Ti nbijctzohuipich?

Chi je' ytaj y'adzooy:

—Pijctzohui yi Juan je Bautista ycohuajc.

²⁵ Mic'amy je Herodías ñiix nihuimbity je rey e yminañ:

—Ndzojcyphich co xymôhuibich mic'amy je Juan je Bautista ycohuajc ma tüg texy.

²⁶ Co jadu'n midoy je rey, chi ytigüy tajp mayb janch mijcajee. Per ti y'octunipy. Com ti anajty jadu'n capxcöducy, ti anajty mayjäy midoy ti anajty ti yaj'ahuanÿ je töxy'anäg, ca' y'ayuc yajxiicy. ²⁷ Paady ycixpi je rey mic'amy ane'my tüg soldado, co huen nicxy yajtzoni Juan ycohuajc. ²⁸ Chi je soldado ñicxy ma pujxtijc, e yöcpujxtuuty Juan. Chi je soldado mimiñ Juan ycohuajc ma tüg texy, e yajcídigi y je töxy'anäg, e je töxy'anäg yajcídigi y ytaj.

²⁹ Co je jäy ajcxy huídibi anajty mijnicxpejt Juan ñejhuüy ajcxy co je rey ti yaj'ögy Juan, chi ajcxy y'oy e yajpidíci Juan ñinicx, e yajnaaxtigüy ajcxy.

Jesús yajcaay migoox mil yëydijc

³⁰ Co je majmetzpi apóstoles ajcxy yhuimbijty huídibi anajty Jesús ti quexy y'ayuccapxhuäcxpi ma canaag cajp, chi ajcxy yajmüdmüydacy Jesús tüg'óciy tijaty anajty ti túngixy, etz tüg'óciy ayuc huídijaty ti yaj'ixpijccixy. ³¹ Huin'it Jesús nimay je nimajmetzpi huídibi anajty ti quexy y'ayuccapxhuäcxpi:

—Tzoc jámim ma tüg it ma ca' pin, jaydëb nböcxim tüg xii metz xii.

Paady ycixpi Jesús jadu'n yminañ, com tzach mayjäy ja'ttüib tzondüib ma Jesús yajpaady, e ca' ajcxy tiempo anajty müidity mina ycáaygixipy y'úuccixipy müid je mayjäy ycixpi. ³² E Jesús müid ydiscípulos ajcxy ñicxy barcojoty ma ca' pin. Ac jëyi ajcxy nicxy ca' jac pin jäy müid nicxy. ³³ E mayjäy ijxy co Jesús ajcxy choñ, e nañ ijxcajpy pin anajty tzoñ barcojoty. Paady mayjäy chooñ ma canaag cajp tegyi'm, ñicxcixy povügy anajty ma Jesús ñicxa'ñ. Mayjäy oy yja'ty jayijp ca' ydi Jesús ajcxy, e jim ajcxy yöymujctay. ³⁴ Co Jesús ybarcopidzimy, chi ix y janch mayjäy, e Jesús ooy pa'ayoy je mayjäy, com jadu'n anajty ajcxy nej maycöbixy huídibi ca' müidity ycuend'ajtpi. Chi Jesús ytigüy yaj'ixpijcp, canaag nax ixpijcin anajty yecy. ³⁵⁻³⁶ Co anajty ti chu'üyñi, chi Jesús ydiscípulos ajcxy ñimaay:

—Ca' ni pin chinäy ma jadyaabi it lugar, e ti chu'üyñi. Capxycix müid jada mayjäy ajcxy, jaydëb ñicxcixyñi ma yi cajp huinduy agonbi, huen nicxy júygixipy ycaayin y'uucin.

³⁷ Huin'it Jesús y'adzooy yi' ydiscípulos ajcxy:

—Miich ajcxy móoygix jada mayjäy caayin úucin.

Chi ajcxy Jesús y'adzooy:

—¿Huaad iich ajcxy nicxy njuy mejtz migö'px denario tzajcaagy, jigix ycaayipy y'ügipy jada mayjäy?

³⁸ Chi Jesús y'amidooy ydiscípulos ajcxy:

—¿Naag tzajcaagy müich ajcxy müidity ya? Nicx ijxcix.

Co ajcxy tiy'ajt paty, chi ajcxy Jesús nimay:

—Iich ajcxy nmüid migoox tzajcaagy etz metz acx.

³⁹ Chi Jesús ni'ane'mdüy co je mayjäy huen ixtaaccixy naaxcixy tügpijaty. ⁴⁰ Chi je mayjäy y'ixtactay canaagpicy. Canaagpicy migö'px jatypi, e canaagpicy huixchigüipxmajjatypi.

⁴¹ Chi Jesús conügy je migooxpi tzajcaagy etz je metzpi acx, e ypa'tijxy tzajpcixy, e yajnajxy Dios cojuyip ma Dios müid je tzajcaagy etz je acx ycixpi. Huin'it Jesús tujc-huäcxy je migooxpi tzajcaagy, e yajcídigi y je' ydiscípulos ajcxy, jaydëb ajcxy yajhuäcxip ma je mayjäy. Nañ jadu'n Jesús yajcídigi y je

metzpi acx je' ydiscípulos ajcxy, jaydëb yajhuäcxip ma je mayjäy. ⁴² Nidüg'óciy je mayjäy ajcxy yca'y y'uucy cüxyi. ⁴³ Co je mayjäy yca'yday, chi je discípulos ajcxy yajmujcy je cayduc tzütztuc, e yaj'ujch ajcxy majmetz cach. ⁴⁴ Migoox mil anajty ajcxy je yëydijctijc huídibi cay uuc.

Jesús yöy nühuingíxy

⁴⁵ Huin'it Jesús ane'my je' ydiscípulos ajcxy co huen barcotigíyigíxy mic'amy. Huen nicxícixy jayijp jim Betsaida jim mejy nünajxy. Co yi discípulos ajcxy ybarcotigiyday, chi Jesús ycapxycíjxy müd je mayjäy. ⁴⁶ Co anajty Jesús ti ycapxycíxy müd je mayjäy, chi ñicxy ma tüg cögop Dios mibijctzoob. ⁴⁷ Co ycoodziñiñi je discípulos ajcxy anajty yajpaady mejyjoty ma je barco. Jesús naydüw anajty yajpaady mejypa'. ⁴⁸ Jesús y'ijx co je ydiscípulos ajcxy anajty ti y'anucxiyigíxy müd mejycabi, je' co je barco anajty chachjijpcobojíy. E co oy moñi, chi Jesús ymijhuägy ma je barco. Jesús yöyp anajty mejyhuingíxy, e hue' anajty jüyöyñaxamy je discípulos ajcxy. ⁴⁹ Co ajcxy ijxpaty Jesús yöyp anajty mejyhuingíxy, chi ajcxy ooy yaxqueegy, com hue' anajty ajcxy tijy co nigo y'ijxmañiñyigíxy. ⁵⁰ Com tüg'óciy yi discípulos ajcxy anajty ti ijxcixy Jesús, e ooy ajcxy chigiiy, paady mic'amy Jesús migapxy je' ydiscípulos ajcxy, e nimay: —Jotmic naybidáacigíxy, ca' mdzigíyigíxy. Ich yi'.

⁵¹ Huin'it Jesús ybarcotigíy, e mic'amy je poj yxeemy, e je discípulos ajcxy ooy jihuiy huinmay. ⁵² Ooy ajcxy jihuiyigíxy huinmaaygíxy, com ca' ajcxy huinjihuuiyigíxy anajty nej Jesús je mayjäy yajcay müd je migooxpi tzajcaagy. Com je'ni anajty ajcxy ooy yjotjuuñity ycöjuuñity.

Jesús yajtzögy pa'mjäy ajcxy jim Genesaret

⁵³ Chi ajcxy ymejch ma je mejypa' ma je Genesaret ñaaxjot. E coxojch ajcxy je barco ma mejypa'. ⁵⁴ Co ajcxy ybarcopidzimy, chi mic'amy je mayjäy ajcxy jim ijxcajpy Jesús. ⁵⁵ Poyigy je jäy ajcxy choon, e yajyöyñajxtay je cajp ajcxy huinduy agonbi, capxhuäcxixy co Jesús anajty ti yjädy jim. E jäy ajcxy yajmiindzondacy may pa'mjäy cijx'am jim ma anajty Jesús yajpaady. ⁵⁶ E hueñitim ma'amuyty anajty Jesús ñicxy majaty mij cajp, mutz cajp, o majaty jäy y'ujtztzinäy, ooy anajty ajcxy pidáccixy pa'mjäy majaty majaty yi mij tüba', e cohuaníyigíxy Jesús co huen nidoñiyi yi yhuitpa', e tüg'óciy huídijaty anajty ajcxy nídomb, najxp ajcxy anajty je' ypa'm.

7

Huidi jäy yaj'ahuimbijt pocyjayity

¹ Huin'it ymiñi ma Jesús nijëjity fariseojäy ajcxy, je huindzindijc huídibi tzachpadumb judío ycostumbre. Nañ jadu'n müd miñi nijëjity escribas, je huindzindijc huídibi ajcxy nijaydutp anajty Dios ñecy. Hue' je fariseos etz escribas ajcxy anajty ti choongíxy Jerusalén. ² Je fariseos etz escribas ajcxy ijxy co Jesús ydiscípulos ajcxy ytigíy caaybi uucpi jaygíbuuy, ca' anajty cuydúngíxy judíojäy ycostumbre. ³ (Com yi fariseojäy etz jacjadyi judíojäy ajcxy cuydumby anajty ajcxy ñi'ap costumbre, e ixpocypújcxixy jayijp ma ca'ni ytigíyigíxy caaybi uucpi. Com yi judíojäy ajcxy co ajcxy ñicxy mayjäyjoty etz yhuimbijtcixy jadüg'oc ma ytiyc, ca' ajcxy yca'y ixti cooni jayijp ajcxy ycíbújcxixy canaag'oc. ⁴ Yi judíojäy ymüd canaagnax costumbre huídibi cuydúngíxyp jadu'n nej ajcxy yajhuaatzcixy ajcxy ytaasi ytexy ytütz etz ypujxtexy.) ⁵ Chi je fariseos etz escribas ajcxy y'amidooy Jesús, nimaayi:

—¿Na'amy co miich mdiscípulos ajcxy ca' cuydúngxixy judíoájy ñi'ap costumbre? ¿Na'amy co ajcxy ycaaygixy y'úccixy, e ca' jayijp ixpújcixy yi' ypocyi?

⁶ Chi Jesús y'adzooy:

—Janch tiy'ajt jadu'n nej je Dios ytiy'ajtmüdpi Isaías jayhui'my jecy'ajty müid miich ajcxy ycixpi. Miich ajcxy huídibi naybidaacip jadu'n nej jihuüy ajcxy tudágyjy, e ca' yjánchity. Com jadu'n Isaías jaybejty co Dios jadu'n yminañ:

Jada jáy jadu'n ajcxy ycapxcixy ymiydaaccixy jadu'n nej jihuüy xyajmij'atyich. Per ca' ajcxy xyajmij'atyich cixyjtot huinijot.

⁷ Naadigí co ajcxy xyhuin'ügixich xyhuinyáaxcixich. Ñayyaj'ixpújcixy ayuc tiy'ajt huídibi jáy ajcxy ti cojy ti macxy.

⁸ Chi Jesús yminañ:

—Miich ajcxy ti m'ixmájtzcixy Dios ycötújcín, e myajmij'ájtzcixy ayuc huinma'ñ huídibi jáy ci'm ti cojy ti macxy. ⁹ Miich ajcxy ca' mgüendúngxixy Dios ycötújcín Dios ytiy'ajt jigix jébi cuydúngxixy mgi'm costumbre. ¹⁰ Com Moisés je cötújcín ypidac jecy'ajty: “Yajmij'at mdaj mdeedy”, e “Pínjaty jibic nigapx ni'oñiyb ytaj yteedy, copicy y'ögip.” ¹¹ E miich ajcxy minañ co tüg jáy nimáhuip ytaj yteedy co ca' pubeda'ñ ajcxy jadu'n nej padyi, müid co tüg'ócixy tijaty yi' ymüid huídibi ytaj yteedy jé'adánip, hue' ti ahuanüy nigoo ma Dios. ¹² E pen jadu'n minañ, chi miich ajcxy minaangixy co ca' copícyity mbubéjtcixipy mdaj mdeedy. ¹³ Miich ajcxy midundigooyb Dios ycötújcín müid mgostumbre huídibi myajnajxyp myajtigüyb, etz jacjadyi jibic-huinma'ñ myaj'ixpújcixy.

¹⁴ Jadüg'oc Jesús mijhuoy yi mayjáy ajcxy, e chi nimay:

—Mido'mbíjccix miich ajcxy iich n'ayuc, e mhuinjihuihuip ajcxy. ¹⁵ Ca' yi' yajpocycáhuüy huídibi jáy ajcxy ypidacy ma yhuin y'ahuac. Yi' janchtiy huídibi pidzim ma jáy ajcxy yjot yhuinma'ñ, yi' yi' yajpocycáhuüb. ¹⁶ Miich ajcxy mmüid mdáztac, mido'mbíjccix iich n'ayuc.

¹⁷ Co Jesús ixmajch je mayjáy, e ytjctigüy, chi je discípulos ajcxy yaj'amidoohui nej yhuimbízimy jada ayuc. ¹⁸ Chi Jesús ydiscípulos ajcxy nimay:

—¿Nej nañ jadu'n miich ajcxy ca' mhuinjihuiy jada ayuc? ¿Nej ca' mhuinjihuiygixy co huídibi tigüy ma yi jáy y'ahuac (yi caayin uucín), ca' yi' yajpocycäy yi jáy? ¹⁹ Yi caayin uucín hue' yi jáy ypidägy ma y'aa ymoox ca' nan ma yjot yhuinma'ñ, e co ñax ma y'aa ymox, chi ypidzimni.

Co Jesús jadu'n yminañ, chi nejhuiyim co Dios ca' capx'aducy ni ti caayin ni ti uucín. ²⁰ E Jesús yjacminañ:

—Dios yajpocycáhuip jáy ajcxy müid huídibi pidzim ma ajcxy yhuinma'ñ. ²¹⁻²² Ma yi jáy ajcxy yhuinma'ñ jüby chooñ jibic-huinma'ñ; jüby chooñ migapxtigoyü töxyjáy yhuinma'ñ; jüby chooñ je tundigooyü yëydijc müid töxyjáy etz töxyjáy müid yëydijc huinma'ñ; jüby chooñ jáyyaj'ögü huinma'ñ; jüby chooñ meedzü huinma'ñ; jüby chooñ mügü huídidi huinma'ñ; jüby chooñ jibic-huinma'ñ; jüby chooñ je huin'ñü huinma'ñ; jüby choñ nayca'oy'ixü huinma'ñ; jüby chooñ je piützcaxü huinma'ñ; jüby chooñ je amij agix huinma'ñ; jüby chooñ je tzuu huinma'ñ je loci huinma'ñ. ²³ Yi jadu'mbi jibicpi jüby chooñ ma jáy ajcxy yjot yhuinma'ñ, paady jibicpi jáy ajcxy túngxixy, e yjocycäy ajcxy ma Dios.

Tüg töxyjáy huídi ca' yjudiojáyity mibijc Jesús

24 Chooñ Jesús ma yijimbi it, e ñicxy jim ma Tiro etz Sidón ñaaxjot. Jesús ytigiy ma tüg jäy ytijc, e ca' anajty tzocy co je mayjäy ñejhuñhuñyb ma y'ity. Per ca' jajty nicx yhuingoyüch. 25 Mic'amy tüg töxyjäy nejhuñy ma Jesús anajty yajpaady. Hue' je töxyjäy ypi'cnñix ymñd anajty ca'oybi. Je töxyjäy ymiñ ma Jesús, e ycojxtinay'ahuiy ma y' yhuinduu. 26 Je töxyjäy hue' anajty ycogájpity Sirofenicia (e hue' anajty griegojäy). Yi töxyjäy may'ajt pijctzoy ma Jesús co huen yajpidzimy je ca'oybi ma ypi'cnñix yjot yhuinma'ñ. 27 Chi Jesús je töxyjäy ñimay:

—Ooy ycopícyity co nbubedipyñich jayijp Dios yjäy (yi judíojäy). Jadu'n nipaady nej tüg ungedeedy. Tim copicy co je ungedeedy yajcayipy jayijp yci'm ung, e ca' möhuip uc je huidibi y'ung yajjicxaamy.

28 Chi je töxyjäy y'adzooy:

—Huindzin, tiy'ajt nej miich mmñna'ñ, per ñañ jadu'n yi uc ajcxy yjñcxy co je caagy abu'x huidi cáb naaxcíxy ma mesipa't ma je jäy y'ung ajcxy ycaay.

29 Chi Jesús je töxyjäy ñimay:

—Tiy'ajt jadu'n nej ñich miich ti xy'adzooy, paady ycixpi jëb mhuimbidity ma mdijc jotcujc, je ca'oybi ti ypidzimy ma mññix yjot yhuinma'ñ.

30 Co je töxyjäy huimbity ma ytijc, chi paty ypi'cnñix cijx'am, ti anajty je ca'oybi ññbidzimy yicöbidzimy.

Jesús yajtzögy tüg jäy huidibi cönat etz ahui'mb

31 Chi Jesús jim tzojci chooni Tiro ñaaxjot. Chi chooñ jim ñicxy anajty Galilea, e nicxy ma je tü'aa huidibi najxp Sidón etz je cajp huidibi yajpatp jim Decápolis ñaaxjot, chi yja'ty ma Galilea mij laguunba'. 32 Jim ajcxy mñd miñ tüg jäy huidibi cönatip etz aahui'mb. Chi ajcxy may'ajt pijctzooy ma Jesús huen cññaxay je pa'mjäy. 33 Chi Jesús mñdnicxy je pa'mjäy ahuingujc ma ca' mayjäy, e pidacy ycihua'x ma je pa'mjäy ytätzac. Chi chujy, e huin'it ñidoni je ytoodz. 34 Chi Jesús ypa't'ijxy tzajpcix, e ymicxejy, e chi ymñañ Aramaico'amy:

—Efata —jada ayuc hue' yhuimbidity: Ahuädz.

35 E mic'amy je jäy cönatpi ytätzac y'ahuaach etz ytoodz yungñiy etz ycapxni yajxon. 36 Chi Jesús ane'my je pa'mjäy etz ymügügtijc co ca' huaad ni pin yajmñdmidyägiy jadu'n nej anajty ti chögy. Co Jesús jadu'n mictägy ane'my co ca' huaad ni pin yajmñdmidyägiy je mijhuinma'ñ huidibi ytumyb, chi ñigi je pa'mjäy etz ymügügtijc mñdmidydaaccixy hueñyñity. 37 Je mayjäy ooy tzachjihuñy huinmay ajcxy, ñaññmaayi ajcxy miñ xyipy:

—Jada Jesús ooy oy chachtuñ. Ymñmadactaayb y'huenytmityjity, ixti yajmñdohuñcy y' y' cönatpi etz yajcapxgy yi uumbi.

8

Jesús yajcay midax mil yëdyjc

1 Je huin'it xi je huin'it tiempo mayjäy anajty ti ñaymñjicixy ma Jesús yajpaady, e ca' anajty je mayjäy ajcxy mñdity ti ycaaygixipy y'uuccixipy. Jesús capxyñiguejy je' ydiscipulos ajcxy, co huen mñingixy ma y' yajpaady. Co ajcxy ymiñ, chi ñimay:

² —Ooy nba'ayooyich yi mayjäy. Yi' co cham midugüg xii maabi ya müid y'ityich je mayjäy, e ni ca' ajcxy müidity ti ycaiyipy. ³ Co ixypy nguexhuimbityich ajcxy ma ytijc ayuu, ca' yjécyity yajpa'mgójipy ajcxy tü'am, com nijëjity ajcxy jigüëgy ti choongixy.

⁴ Chi je discípulos ajcxy Jesús adzooy:

—¿Ma iich ajt nbaatim je caayin uucin huidibi jëb müid nyajcaayim nyaj'úucim jada mayjäy? Com mijtigüduum ya nyajpaatim ma ca' pin chinäy.

⁵ Chi Jesús y'amidooy je' ydiscípulos ajcxy:

—¿Naag tzajcaagy müich ajcxy müidity?

Chi je' ajcxy y'adzooy:

—Huixtujc tzajcaagy.

⁶ Chi Jesús ane'my je mayjäy, co huen iñay'ahuüygixy naaxcixy. Huin'it Jesús conëgy je huixtujc tzajcaagy, e yajnaxy Dioscojuyip ma Dios müid tzajcaagy ycixpi. Chi tujc-huäcxy je tzajcaagy, e moy je' ydiscípulos ajcxy, e je' ydiscípulos ajcxy yajhuäcxy je tzajcaagy ma je mayjäy. ⁷ Je Jesús ydiscípulos ajcxy ymüid anajty nijëjity pi'c acx. Chi Jesús yajnaxy Dioscojuyip ma Dios müid je pi'c acx ycixpi, e moy je' ydiscípulos ajcxy huen yajhuäcxtaygixy ma je mayjäy. ⁸ Chi je mayjäy nidüg'óciy ycay cüxyi, e co ajcxy ycayday, chi je Jesús ydiscípulos ajcxy yajpidëgy huixtujc cach cayduc jicxtuc tüibi anajty yconaxy. ⁹ Jahueeni anajty ycamidaaxmility je jäy huidibi ajcxy cay uuc cüxyi. Chi Jesús ycapxy ycijxy müid je mayjäy, e nimay ajcxy co huen nicxcixy ma ytijc. ¹⁰ E mic'amy Jesús ybarcotigiy müid ydiscípulos ajcxy, e chi ñicxy ajcxy jim Dalmanuta ñaaxjot.

Yi fariseos ajcxy tüg ijxpejt pijctzoob mijhuinma'ñybi

¹¹ Nijëjity fariseos ajcxy, je huindzindijc huidibi padumb judío ycostumbre, ymiin ajcxy ma Jesús yajpaady, e ytigiy ajcxy ijxquípccixy y'ixpijcin müid Jesús. Pijctzoogixy co Jesús huen yaj'ixyii ajcxy tüg ijxpejt huidibi tzomb tzajpjoty. Ijxta'n octunaangixy müid Jesús. ¹² Chi Jesús tajy may ñayjihüiyi jotjoty huinma'ñyoty, chi ymicxejy, e yminañ:

—¿Na'amy co jada jäy ajcxy huidibi jugy'ajtp cham, pijctzoogixy ijxpejt huidibi tzomb tzajpjoty? Janch iich müich nimaaygixy co ca' nyaj'ixaangixy ijxpejt huidibi tzomb tzajpjoty.

¹³ E Jesús ytimycapxycixy müid je fariseos ajcxy, e chi puyöduuty ajcxy. Chi Jesús ybarcotigiy, e ñicxy müid ydiscípulos ajcxy ma mij laguun ñinaxy.

Fariseojäy ajcxy yaj'ixpijcin

¹⁴ Je' ydiscípulos ajcxy ti anajty jaydigoygixy je jicxy picy co ajcxy ybarcotigiy. Jëyi ajcxy mimiin tüg pi'c tzajcaagy. ¹⁵ Chi Jesús ane'myb je' ydiscípulos ajcxy, e yminañ:

—Ca' mmijpidaaccixy yi fariseojäy ajcxy y'ayuc ytiy'ajt etz ni rey Herodes y'ayuc ytiy'ajt, com jadu'n ajcxy y'ayuc nipaady nej levadura huidibi ca' y'öyity.

¹⁶ E je Jesús ydiscípulos ajcxy nimiydaaccixy Jesús y'ayuc ñayñimáaygixy ajcxy miñ xyipy:

—Je' co ca' iich ajt nmimiinim caayin uucin.

¹⁷ E Jesús ñejhuüyb anajty nej je' ydiscípulos ajcxy ñayñimaayyi miñ xyipy, paady yminañ:

—¿Na'amy co mdzachnimiydaaccixy je caayin uucin huidibi ti mjäydigooygixy? ¿Nej ca' mhuinjhuüygixy e ca' mguenditungixy iich n'ayuc? ¿Nej co ajcxy mdzachcöjuuñity? ¹⁸ Müich ajcxy müid mhuin: ¿Nej

co ca' m'ijxcixy huidibi ndumywich? Miich ajcxy mïid mdädzac: ¿Nej co ca' mmïdo'mbïjccixy ïch n'ayuc? ¿Nej co ca' mjäyméjtzcxixy ti ti nduñich?
 19 Jayhuin co ndujc-huäcxixyich je migooxpi tzajcaagy e nyajcaayich migoox mil jäy: ¿Naag cach cayduc jicxtuc ti ajcxy myajpidigy?

Chi ajcxy y'adzooy:

—Hue' ïch ajcxy nyajpidigyich majmetz cach cayduc jicxtuc.

20 Chi Jesús yminañ:

—E jayhuin co ndujc-huäcxixyich je huixtujcpi tzajcaagy, e nyajcaayich mïdaax mil jäy: ¿Naag cach cayduc ti ajcxy myajpidigy?

Chi ajcxy y'adzooy:

—Hue' ïch ajcxy nyajpidigyich huixtujc cach cayduc jicxtuc.

21 Chi Jesús yminañ:

—¿Nej chambaad miich ajcxy ca' mhuinjihuïy?

Jesús yajtzögy tüg jäy huintzpi jim Betsaida

22 Jesús etz ydiscípulos ajcxy oy yjá'tcixy jim Betsaida. Jim Betsaida nijëjity jäy mïid miin ma Jesús tüg huintzpi, e pijtzoy ajcxy may'ajt co huen nïdoñ jigix je huintzpi y'ijxigipy. 23 Huin'it Jesús huijtzooñ je huintzpi ma yci', chi mïid cajppidizimy. E chi Jesús yajjaaxy yi chujyñï je huintzpi yhuini, etz cïñxajy, e chi amïdoy pen y'ijxpy anajty tigati yinjaty huenjaty. 24 Chi je huintzpi huindicxpejty Jesús, e nimay:

—N'ijxpyich yëdyjctijc, e jadu'n ajcxy yquëxigy nej quipy, per yöyp ajcxy.

25 E jadüg'oc Jesús yci' pidacy ma je huintzpi yhuini, e chi je huintzpi yhuindicxpejtpy anajty, e chi yhuini y'oyïy yajxon, huin'it oy huädz y'ijxy.

26 E Jesús ycapxycijxy mïid je', e quejxhuimbijty ma ytijc. Chi yminañ:

—Ca' mdigïhuip cajpjoty, e ni pin jada mgayajmïdmïydägy.

Pedro capxypidizimy co Jesús yi' je' je Cristo

27 Chi Jesús ñicxy mïid ydiscípulos ajcxy jim ma nijëjity mutz cajp mihungon je mij cajp Cesarea Filipino. E tü'am Jesús amïdoy ajcxy ydiscípulos, nimay:

—¿Nej jäy yminaangixy pin ïch?

28 Chi ajcxy je' ydiscípulos y'adzooy:

—Nijëjity jäy yminaangixy co miich je' je Juan, je Bautista. E nijëjity yminaangixy co miich je' je Elías. E jacjadyii yminaangixy co miich je' tüg Dios y'ayucnajtzcaxxïybi huidibi tügïyb mïid nijëjity Dios ytiy'ajtmïdipi huidibi tzinaay jecy'ajty.

29 Jesús y'amïdooy je' ydiscípulos ajcxy:

—Miich ajcxy, ¿nej miich mminaangixy pin ïch?

Chi Pedro y'adzooy:

—Miich je' je Cristo.

30 Chi Jesús nimay je' ydiscípulos ajcxy co ca' huaad ni pin nïmaaygixy, co yi' je' je Cristo.

Jesús capxypidizimy co y'ögañ

31 Chi Jesús jacyaj'ixpijcy je' ydiscípulos ajcxy, e yminañ:

—Copicy co ïch, je jäy huidi tzoon tzajpjoty, nyajnaxipyich mij tzaachpyi etz mij ayo'n. Yi mijjäydijc ajcxy, yi judïo teedy mijtungmïdipi, etz yi escribas, je huindzïndijc huidibi nijayduutcxixyp Dios necy, ca' ajcxy xy'ixa'ñich, e xyaj'ögañ ajcxy, e codugïg xï njugypigipyich jadüg'oc co ïch anajty ti n'ögy.

32 Co Jesús jadu'n nigapxy nimïydacy huädz huädz nej yjada'ñiyi anajty, chi

Pedro huobibzımy Jesús ahuingujc, chi ooy ojy. ³³ Chi Jesús ni'ixhuimbıty ydiscıpusos ajcxy, e ojy je Pedro, ñımay:

—Huinhuäctuatcıc, mııch Satanás. Com mııch ca' mhuınma'ñ mbıdägy nej Dios tzcocy. Yı' janchtıy mııch mhuınma'ñ'ajtpy nej jäy ajcxy tzcocy.

³⁴ Huın'ıt Jesús huoomıñ yı' ydiscıpusos ajcxy etz yı mayjäy, e chi ñımay:

—Pen jı pınjaty xypanıcxa'ñıch, huen jäydgoydäy yci'mdzócin etz huen xypanıcxıch jabom jabom. Oy nej ytımyjadıpy ytımy'ayoohuıpy. Jadu'n nıpaady nej jıhuıy ajcxy anajty mgruudz mgabıcıcxy, etz naygıyéjıgıxy ma yı ó'cin huen ytımyñéjıty mııd ıch ycıxpi. ³⁵ Huenpınjäy huıdıbı ca' yega'ñ yı yjugy'ájtin ma yı ó'cin mııd ıch ycıxpi, hue' je' yajtıgoyamy yı'yjugy'ájtin. E huenpınjäy huıdıbı yegamy yjugy'ájtin ma yı ó'cin mııd ıch ycıxpi etz ıch y'ayuc oybı ycıxpi, hue' je' ypadamyb yı jugy'ájtin huıdıbı ca' cıxıpy tıgoyıpy nı mınaa. ³⁶ ¿Tı oy'ájtin yı' co tüg jäy y'ocnayıyjadadıyb yı meeñ etz mıc'ájtin (huıdı yajpaatp ya ñaaxhuıñybi) e y'alma yjugy'ájtin cıxıpy tıgoyıpy tügıy? ³⁷ ¿Jadu'ñyı jéb jäy y'alma yjugy'ájtin occojuyı? Nıgı tzoohuın mııdıty jäy ajcxy y'alma yjugy'ájtin, ca' jac tı. ³⁸ Huentımpınyty yı huıdıbı xymıdzoy'dúnıbıch yı n'ayucıch ndıy'ájtıch ma yı pocyjäydıjc yhuınduu huıdıbı tzınaayb cham ma jada naaxhuıñybi. Pıes nañ jadu'n ıch, je jäy huıdıbı tzoon tza-jpıoty, nmıdzoy'dúnıbıch yı jadu'mbı jäy co ıch anajty nhuımbıty ya naaxhuıñybi mııd ıch nDeedy, je Dios Teedy, ymıc'ajtı y'oy'ajtı etz mııd tüg'ócıy yı may'angeles ajcxy tudägpyı.

9

¹ Jadu'n Jesús yjacmınañ:

—Janch tıy'ajtı jadu'n nej ıch mııch ajcxy cham ñımäy, co nıjéjıty mııch ajcxy huıdıbı cham ma ıch nhuınduu, ca' m'ógaangıxy, ıxtı coonı ajcxy jayıjp m'ıxıpy je Dios y'ané'mın etz ymıc'ajtı.

Co Jesús ñıncxıyajtıgajch

² Co tuctujc xıı naxy, chi Jesús mııd tzoon Pedro, Santiago etz Juan, e mııdpa'ttıgıy ma tüg mıjcop ma tüg it ooy ycıxıty. E jım copcıxy Jesús ñıncxı naygojtıgajtıznı ma Pedro ajcxy yhuınduu. ³ Chi Jesús yhuıt oy y'ahuımbıty janch poob, e janch adııcxp. E nı pın jadu'n yhuıt cayajhuäch janch poob jadu'n nej je' anajty yhuıt mııdıty. ⁴ E chi oy nayguëxıgyıı ma ajcxy yhuındu Elıas etz Moısés. Elıas etz Moısés mııydacp anajty ajcxy mııd Jesús. ⁵ Huın'ıt Pedro ñımay Jesús:

—Huındzın, janch oy jadu'n co ıch nyáajıty. N'occojyıch ajcxy tugıg tıjquemy: tüg mııch mje'; tüg Moısés yje'; etz tüg Elıas yje'.

⁶ Com Pedro, Jacobo etz Juan ooy anajty chıgııygyıxy, paady Pedro ca' anajty nejhuıy tı ycapxyp. ⁷ Tım huın'ıtıy tüg joc yajndıgoy je' ajcxy, e mıdooy ajcxy ayuc jocjoty, e je ayuc ymınañ:

—Jada je' ıch n'ung, huıdıbı ooy ndzcocyıch. Mıdo'mbıc mııch ajcxy Jesús y'ayuc.

⁸ E tım huın'ıtıy Pedro, Jacobo etz Juan ajcxy yujc'ıjxy, e yja'ıjxhuıdıjty ajcxy, e ca' nı pın ma ocjac'ıjxni, jéda'ajty Jesús naydügpajc.

⁹⁻¹⁰ Tı anajty choongıxy copcıxy, e cıdacp anajty ajcxy, co Jesús ñımay Pedro, Jacobo etz Juan, co ca' huaad yajmııdmıydaaccıxy pınjaty huıdıbı ajcxy anajty tı jıxcıxy, ıxtı coonı ıch, je jäy huıdıbı tzoon tzaıppoty, n'ögıbıch etz njuygıpyıch jadüg'oc. Pedro, Jacobo, etz Juan ca' yjacmıyđägy mııd jacpınjaty

huidibi anajty ti íjxcixy. Per ooy ajcxy huinmay etz naymíidmíydáacígixy miñ xyipy ti Jesús ytijamy co yminañ: “N'ögibich etz njugypigipyich jadüg'oc.”
 11 Huin'it ajcxy Jesús y'amidooy:

—¿Na'amy co yi escribas yminañ co yi Elías huidibi chinay jecy'ajty jayjip miinañ ca'ydi je Cristo?

12 Chi Jesús y'adzooy:

—Tiy'ajt jadu'n co miñ jaybety ma Dios ñecy jecy'ajty co Elías yhuimbidity jacyajjip ca'ydi je Cristo, e yaj'oyiydáhuipy huinjemybi tüg'ócay míd Dios ycixpi. E nañ tiy'ajt jadu'n co jaybety ymiiñ ma Dios ñecy co je Cristo, je jay huidib tsoon tzajpjoty, yajnaxa'ñ ayo'n etz tzaachypi etz mayjäy ca' y'ixa'nüby. 13 Ích miich ajcxy nimaayb co je Elías ti je' yhuimbity ya naaxhuñ, e je mayjäy ti túngixy míd Elías nej anajty tim tzójcixy. E cuyduñ ajcxy nej jaybety miiñ ma Dios ñecy míd Elías ycixpi.

Jesús yajtzögy tüg mutz'anäg huidibi ca'oybi míd

14 Co Jesús, Pedro, Jacobo etz Juan yhuimbity ma je jacjadyii Jesús ydiscípulos ajcxy anajty ti yhui'míy, chi ajcxy íjxy mayjäy jühuidity ma Jesús ydiscípulos ajcxy. Etz íjxy ajcxy nijëjity escribas huidibi ayuc tzachyajtziñy míd Jesús ydiscípulos ajcxy. 15 E co je mayjäy íjxcixy nejhuíyigixy co Jesús ti yhuimbity anajty, chi mic'amy ajcxy ninícy Jesús poyígy, e capxpoocxixy, e may je' ajcxy ooy jihuy huinmay. 16 Chi Jesús y'amidooy je mayjäy, nimay:

—¿Ti ayuc miich ajcxy mdzachyayjomyb míd ích ndiscípulos ajcxy?

17 Chi nidüg je jäy ajcxy y'adzooy:

—Huindzin, ti nmíidmiiñ ích nmang huidibi ymíd ca'oybi, e je ca'oybi ti yaj'umíyíi. 18 E janam jadzojc je ca'oybi yajyachyíi yajquídyíi ích nmang, e oy cäy naaxcixy, e ooy y'aa'opy ypidzimy, e nañ jadu'n oy ytíitz queety etz ñinícx janch ögy yhui'my. Ti nbíjctzoyich may'ajt míd miich mdiscípulos ajcxy co huen yajpidzimígy je ca'oybi ma ích nmang, e ca' ajcxy ymadacy nícy yajpidzimígy.

19 Jesús nimay je mayjäy:

—Miich ajcxy huidibi jugy'ajtp jadachambi xíi tiempo huidibi ca' mijpidägy Dios y'ayuc, ¿naag xíi naag po' ích njac-hui'mmíhuibich míd miich ajcxy? ¿Naag xíi naag po' n'ocmímecxtuguípich miich ajcxy? Mídmiin yi mmang ya ma ích nhuinduu.

20 Chi ajcxy mídmiñ je pa'mjäy ma Jesús yhuinduu. E co je ca'oybi íjxpaady Jesús, chi mic'amy yajyajch yajquídy je pa'mjäy, e chi oy ciday naaxcixy, e ooy yajch yquídy, yajpidzimy ooy y'aa'opy ma y'ahuac. 21-22 Jesús y'amidooy je pa'mjäy yteedy:

—¿Minaag jimíjt cujc yöy maabi mmang ypa'mbety?

Chi je ungedeedy y'adzooy:

—Ma'xung anajty co pa'mbedyíi. Canaag'oc je ca'oybi yajyachyíi yajquídyíi ích nmang, íxti ti oy ycogídadhuíy jünjoty etz ñíjoty. Je ca'oybi canaag'oc jajaj'ögy ích nmang. Pen miich míd tzöc'ajt mic'ajt jaydëb xypubedipyich, tun may'ajt pa'ayoogich etz pubejtcich.

23 Chi Jesús y'adzooy nimay je pa'mjäy yteedy:

—Pen miich mibijcpi, ca' ti chípity ma pin mibijcp.

24 Mic'amy je pa'mjäy yteedy mic'ycapxy yminañ:

—Nmibijcyich, pubejtcich nej huaad jacmij nmibicyich.

25 E co Jesús ijxy co nigi mayjäy chach ymiñ poyigy ma yi', chi ix'ojy je ca'oybi, e ymiñañ:

—Miich ca'oybi huidib ti yajhu'i'my jada pi'c'anäg uum etz nat, iich miich yam n'ane'myb: “Pidzim ma yi pa'mjäy, e ca' mjectig'huipy ma yi' yjot yhuinma'n jadüg'oc.”

26 Jayijp je ca'oybi yaaxqueecy janch mic, yajyajch yajquidy je pa'mjäy. Co jadu'n tuñ, chi ypidzimy. Je pa'mjäy oy ñimicx yhu'i'my nej jihuïy ti y'o'cni. Je mayjäy huidibi anajty ajcxy jim huindicxp ymiñangixy:

—Ti ayoob y'ögy.

27 Chi Jesús majtz je pa'mjäy yci', e yajpidigy e huin'it je pa'mjäy ytinayigy mic oy.

28 Co Jesús ytigy ma tüg tijc, chi je' ydiscipulos ajcxy y'amidou ameech, miñañ ajcxy:

—¿Na'amy co iich ajcxy ca' ti nmadägyich nej nyajpidzimip iich ajcxy yi ca'oybi?

29 Chi Jesús y'adzooy:

—Yijibi ca'oybi ca' yi' huaad ypidzimy jadu'nïyi. Hue' janchtiy copicy miñijctzou Dios mictägy, e huin'it ypidzimipy je ca'oybi ma je pa'mjäy. Ca' jac ni nej huaad ypidzimy yi jadu'mbi ca'oybi, jëyi co Dios nmiñijctzoohuim n'ijtim ayuu.

Jesús capxpizimnip jadüg'oc co y'öga'n

30 Chi Jesús miid yi' ydiscipulos ajcxy choñ ma je jimbi it, e yajyöyñajxtay ajcxy Galilea naaxjot. Jesús ca' anajty tzocy co je mayjäy ñejhuñhuñyb ma yi' ñicxy. 31 Com Jesús hue' anajty yaj'ixpicy yi' ydiscipulos ajcxy, co ooy ycopicyty co yi jäy huidibi tzoon tzajpjoty, yajc'yegipy ma yi ymidzip, etz yaj'ögüyb, e co anajty ti y'ögy codugüg xii jadüg'oc yjugypigipy. 32 Jesús ydiscipulos ajcxy ca' huin'ihuïy anajty Jesús y'ayuc, e nañ jadu'n tzigüyb anajty ajcxy co Jesús yaj'ójip, paady ca' ajcxy amidoy nej huimbizimy yijibi ayuc.

¿Pin je' nigi jacmijip?

33 E Jesús miid ydiscipulos ajcxy oyjaty jim Capernaum. Co ajcxy ytijectigy, chi Jesús yaj'amidoy ydiscipulos ajcxy, nimay:

—¿Ti ayuc miich ajcxy naymiidmiydäcigixy jim ma anajty mdüyögyixy?

34 Per amonday ajcxy, com jëgixpi co anajty ajcxy ooy ti ñaymiidmiydäcigixy tüyöyjoty co pin jada' ajcxy nidügti ocjaccopicyip.

35 Huin'it Jesús y'ixtacy, e chi mijhuoy je nimajmetzpi ydiscipulos ajcxy, chi ajcxy nimay:

—Pin nayaajnaxaanip mij, huen ity nej jihuïy ca' ytiijity e huen capxmidooy ymigügtijc.

36 Chi Jesús tzenigy tüg pi'c'anäg, e chi pidacy cujc'amy ma yi' ydiscipulos ajcxy. Chi tzenigy jadüg'oc, e nimay ajcxy:

37 —Pin cöbije tügpajc pi'c'anäg jadu'n nej jada pi'c'anäg miid iich nxii ycixpi, iich yi' anajty ti xycöbicyich, e pin iich xycöbijcpich, ca nan iich anajty naydügpajc ti xycöbijcyich, nañ jadu'n anajty ti cöbicy huidi ti xyquejxich.

Pin iich ajt xycamidzip'ájtım, iich ajt je' miid y'ity

38 Juan Jesús nimay:

—Huindzin, ti ñich ajcxy n'ixpaaady tüg jäy co ca'oybi yajpidzimy müid miich mxii, e ti ngapx'aducyich müid co ca' yi' ñich ajt xypahuidíjtim.

³⁹ Per Jesús ymíñañ:

—Ca' mgapx'adugípy yi jadu'mbi jäy, com huenpínity huidibi mijhuinma'ñ tumb müid ñich nxii, ca' yi' jibic xyñigapxich. ⁴⁰ Com yi' huidibi ajt ca' xymidzip'ájtím, yi' yi' müid ñich ajt nbidzímim. ⁴¹ Janch janch ñich müich ajcxy jadu'n nimäy co huenpínjäy huidibi ixypy müich ajcxy xyajni'uucp tüg vaso nií müid co müich ajcxy ti mmijnícxpety je Cristo, yi' jadu'mbi jäy ypadamy yi' y'oy'ájtín ma Dios.

Je huidibi ooy ycojotmáyity co nicxy nbocycáhuim

⁴² Huenpínity huidibi jibic-huinma'ñ mibidzimb, e yajpocycäy yi' jadu'mbi pí'ctijc huidibi ajcxy xymijnícxpejtpich, jac'oy ixypy co yi' jadu'mbi jäy ytimyñayyayöcxodziyii tüg paandzaa etz ñayñajtjibibihuiyb mejyoty. ⁴³ Pen müich mgi' xyajtundigoyamb jac'oy co mdím'ixpuxipy, com jac'oy co mdigíhuipy ma yi' jugy'ájtín huinixiibi cídud, ca'ydi co Dios xypidägip müid metz mgi' jiiyby jünjoty ca'oydactuuby, ma yi' jün ni camina ycapích. ⁴⁴ Jiiyby ca'oydactuuby yi' ucxyting ca' y'ögy etz ni jün ycapích nicaminaaxii. ⁴⁵ E pen müich yi' mdecy xyajpocycáhuamb, ixpux, com jac'oy co mdigíhuip ma yi' jugy'ájtín huinixiibi tecytuc ca'ydi co mdigíhuip müid metz mdecy jiiyby ca'oydactuuby, ma yi' jün ni camina ycapích. ⁴⁶ Jiiyby ca'oydactuuby yi' ucxyting ca' y'ögy etz ni jün ycapích ni caminaxii. ⁴⁷ E pen yi' mhuiin tüg xyajpocycáhuamb, tím yajpidzim, jac'oy yi' co mdigíhuip ma yi' Dios y'ane'mdac müid tügpajc mhuiin, ca'ydi co mdigíhuip ca'oydactuuby müid metz mhuiin. ⁴⁸ Ma yi' ucxyting ni caminaxii yca'ögy etz yi' jün ni caminaxii ycapích, ⁴⁹ e ma nidüg'ócíy ñi'cägooda'ñ jün xut jün ye'n tím jadu'n nej jäy tzüch caan xiducy. ⁵⁰ Yi' caan ooy yi' y'óyity, pen ymüid xücx'ájtín. Co je caan ytigoy yxücx'ájtín, ca' ji ni ti huidibi jéb müid nyajxücxiiyim. Müid'ájtíx ñich n'ayuc ma mjot mhuiinma'ñ, jadu'n ñich n'ayuc nipaady nej caan, e tzína' müich ajcxy jotcujc müid mmigügtijc nidüg nidüg.

10

Jesús yaj'ixpicy müid co jäy ytöxyijc ixmach

¹ Chi Jesús chooñ jim Capernaum, nicxy jim Judea ñaaxjot ma je it lugar Jordán mijnií ñinaxy xii ypidzimy'amy. E mayjäy ooy ñayöymujci ma Jesús anajty yajpaady. E Jesús yaj'ixpicy je mayjäy jadu'n nej anajty yaj'ixpicy'adyii. ² Chi nijéjity fariseos ajcxy ñicxy ma Jesús anajty yajpaady. Hue' ajcxy yhuinma'ñ pidaaccíxy co anajty Jesús tzu'ixaangíxy. Chi ajcxy y'amídooy, pen huaad tüg yéydijc ixmach ytöxyijc. ³ Chi Jesús y'adzooy, ymíñañ:

—¿Nej Moisés ymíñañ ma yi' ycötújcín ñecy?

⁴ Chi je fariseos ajcxy Jesús y'adzooy:

—Moisés cötújcín yecy co tüg yéydijc jéb huaad ixmach ytöxyijc, e möhuipy ñinecy ñidiy'ajt co nej ñay'ixmájtzigíxy, e jadu'n anajty ti y'oyíy nej jéb yi' ytöxyijc ixmach.

⁵ Chi Jesús ymíñañ:

—Moisés cojaay jada ycötújcín müid müich ajcxy ycixpi, co ooy müich ajcxy mdzachcapxycómídoodaaccíxy ca' mgapxymídohuaangíxy Dios. ⁶ Per co je

naaxhuiñybi chondacy, co Dios oga'n yajcojy tüg'óciy tijaty huidi ji'ajtp, chi Dios yajcojy yéydijc etz tóxyjáy. ⁷ E je yéydijc ixmadzipy ytaj yteedy etz pudigihuijy yí ytóxyijc. ⁸ E je yéydijc etz ytóxyijc tú'ciy idaangixy. Paady je yéydijc tüg'mucy yajpaady müid ytóxyijc. ⁹ Com yí huidibi Dios ti huijtzmucy, ca' ni pin huaad huijtzhuägy.

¹⁰ Co Jesús müid ydiscípulos ajcxy yhuimbijit ma anajty ti yjättáccixy, chi Jesús ydiscípulos ajcxy yajtihuimbijitcixy je ayuc huidibi anajty ti yaj'ixpijy ma je píjcin. ¹¹ Chi Jesús ymíñañ:

—Je yéydijc huidibi ti ixmach yí ytóxyijc, e píjcy müid huingbi, hue' yí' anajty ymidundigooyb yí ytóxyijc huidibi müid jayijp ypijcy. ¹² Nañ tim jadu'n co tüg tóxyjáy ixmach je yéydijc huidibi müid ti ypijcy jayijp, e ypijctigach müid huingbi yéydijc, hue' ymidundigooyb je yéydijc huidibi müid ti ypijcy jayijp.

Jesús conucxy pi'ctijc

¹³ Je huin'it tiempo jäy ajcxy müid miñ pi'ctijc ma Jesús, jaydéb cínixajy etz conuucxip. Co Jesús ydiscípulos ajcxy jadu'n ixjy co jäy ajcxy nimijhuägy Jesús müid ajcxy ypi'c'ung, chi je' ydiscípulos ajcxy ix'o'jy je jäy ajcxy. ¹⁴ Co Jesús jadu'n ixjy nejhuüy nej yí ydiscípulos ajcxy y'idích, chi o'jy ajcxy, ymíñañ:

—Ooy y'óyity co je pi'ctijc ajcxy xyñimijhuäg'yich, ca' müich ajcxy mgapx'aducy. Com yí jäy ajcxy huidibi yajpatp ma Dios y'ané'min, jadu'n ajcxy nipaady nej pi'ctijc. ¹⁵ Janch íich müich ajcxy nimäy co pinjaty huidibi ca' cöbiga'ñ Dios y'ané'min, jadu'n nej pi'ctijc cöbjiccixy Dios y'ané'min, hue' yí jadu'mbi jäy ajcxy ca' ytigihua'ñ ma yí Dios y'it lugar.

¹⁶ Chi Jesús amínenmujctay je pi'ctijc ajcxy, e chi cínixajiy etz conuucxcixy.

Tüg mutz'anäg comeeñybi ymíydägy müid Jesús

¹⁷ Co Jesús chooñ jadüg'oc, chi ñimiini poyígy tüg yéydijc, ycojxtinay'ahuüy ma Jesús yhuinduu, e ymíñañ:

—Müich, oybi Huindzin, ¿ti huaad ndunípyich jigix jébi nbadípyich jugy'ájtín huidibi ca' ycixipy ytigoyipy?

¹⁸ Chi Jesús ymíñañ:

—¿Na'amy co xyñimäyich co oy huindzin íich? Dios tüg'pajc óyip, ca' jac ni pin. ¹⁹ Müich mnejhuüyb Dios ycötújcin huidibi jadu'n mínaam: “Ca' mmigapxtigoyip tóxyjáydjic; ca' mjäyyaj'ögipy; ca' mmeedzíp; ca' m'índaacíp; ca' pin mhuin'íiníp; etz myajmíj'adip mdaj mdeedy.”

²⁰ Chi je jäy Jesús nimay:

—Huindzin, ti nguydündäyich jadaaab cötújcin ajcxy maabi íich nbi'c'atyich.

²¹ Chi Jesús huindixpejty je yéydijc müid tzójcin jihuüyín, e chi nimay:

—Per jactigoy'íjtni jadügnax. Nícx toog tüg'óciy huidijaty müich mmüid, etz mo' yí ayoobtijc. Co jadu'n mdunípy, chi mbaadipy oy'ájtín jüiby tzajpjoty. Co jadu'n mdooctáhuüpy tijaty müich müid, chi miníp jadüg'oc ma nyajpaadyich, e xypanícxibich, e mnaybidägüib cixyjot huinjot oy nej mdímyjadipy müid íich ycixpi.

²² Co jadu'n je yéydijc midoy nej anajty Jesús ti ñimäyíi, chi yhuí'my taj may e co ñícxni, chi ooy ytajy ymay, com hue' je' anajty ooy ycomeeñity.

²³ Co Jesús jadu'n ixjy co je comeeñybi taj may yhuimbijitni, chi huindixpejty je' ydiscípulos ajcxy huidibi tinaayb jühuidity ma yí', e ymíñañ:

—Ooy chachtzípity co tüg comeeñybi ytigihuijy ma Dios y'it lugar.

24 Jesús ydiscípulos ajcxy ooy tzachhuinmay'ahuidity müid jada ayuc nej Jesús anajty ti ymína'ñ. Paady Jesús yjacmínañ jadüg'oc:

—Miich ajcxy migügtjic huídibi ooy ndzocycich, ooy chachtzípity co ytigíhuip ma Dios y'ane'mdac tüg comeeñjáy huídibi tzachnijot'ajt ycomeeñ'adii. 25 Nígi chípity co tüg comeeñ jáy ytigíhuip ma Dios y'ane'my, ca'ydí co tüg camello ñaxipy ma tüg xu'ñ'ijx yxütity.

26 Co jadu'n ajcxy midoy nej Jesús ymínañ, chí ooy ajcxy yhuinmay'ahuidijty, e nayñimáayigixy miñ xyipy:

—Pen janch tìy'ajt jadu'n, ¿pínjáy jada' huaad jëb y'alma ñdzögípy?

27 Je huídibi jáy ajcxy ca' ní minaxii huaad ca' yaj'oyíy, Dios yí' yaj'oyíhuip, com müid Dios ca' yí' ní ti chípity.

28 Chi Pedro ymínañ:

—Huindzin, occuendun, ñich ajcxy ti n'ixmajtztäyich tüg'ócíy tijaty anajty nmüidich, e ñich ajcxy nbanicxpich miich.

29-30 Chi Jesús y'adzooy, minañ:

—Janch tìy'ajt nej ñich miich ajcxy nimäy co huenpínity huídibi müid ñich ycixpi ti ixmach ytjic, ti ixmach y'uch ymigüg ajcxy etz ytaj yteedy, etz ytöxyjic, etz y'ung ajcxy, etz nañ jadu'n ti ixmach ycam ñich ycixpi, etz ñich n'ayucich etz müid Dios ytìy'ajt ycixpi, yí' ypadamy nígi oy'ájtín ya naaxhuíñ, ixti ypadamy migo'px jadu'nyí ytjic ajcxy, y'uch ajcxy, ytaj ajcxy, y'ung ajcxy, etz ypadamy nígi ymij cam, müid tzaachypi müid ayo'n müid ñich n'ayuc ycixpi. Etz nañ jadu'n ma je xii tiempo huídibi mimb cidacpi ypadamy jugy'ájtín huídibi ca' ycixipy ytigoyipy. 31 Ji yajpaady ya naaxhuíñ níjéjity jáy huídibi cómay ijtp, e co yjätý ajcxy tzajpjoty, chí ca' ajcxy cómay ida'ñ. Nañ jadu'n jí yajpaady ya naaxhuíñ níjéjity huídibi ca' cómay y'ity, e co ajcxy yjadípy tzajpjoty, chí jíiby ajcxy cómay y'idípy.

Jadüg'oc Jesús capxpídzímnip co y'öga'ñ

32 Jesús müid ydiscípulos tüyöyp anajty ajcxy, hue' anajty ypättigíygixy jim Jerusalén. Jesús jayijp anajty ñícxý, e je' ydiscípulos ajcxy etz nañ jadu'n mayjáy panícxý anajty ajcxy Jesús. Je Jesús ydiscípulos ajcxy ooy chachhuinmay'ahuidíjtcixy, e jacjadyii jáy huídibi anajty ypanícxý Jesús ooy ajcxy chígíygixy. Chí Jesús huodzooñ abícy je majmetzpi ajcxy, e yajmüidmíydactay je' ajcxy jadu'n nej ytuna'nyii yjada'nyii jim Jerusalén co anajty ajcxy jim yja'tcixy. 33 Jesús je nimajmetzpi nimay:

—Miich ajcxy m'ijxpy mnejhuíyb co nñícxím cham jim Jerusalén. E jim Jerusalén, ñich je jáy huídibi tzoón tzajpjoty, nyajcýyega'ñich mach ma yí Teedy míjtungmüidpi, etz ma yí escribas ajcxy. E chí ajcxy ane'mín pídága'ñ co huen xyaj'ócíxich. Nañ jadu'n xycíyegaangíxich mach ma yí' ajcxy huídibi ca' yjudiojáyity. 34 Yí' ajcxy xyñixigípy xyajxigíbyich, xyhuobípyich ajcxy müid coochac, xyhuindzuj xyjíjptzújibích ajcxy, e xyaj'ögíbyich ajcxy. Codugígg xii maabi anajty xyaj'öccíxyich, chí njugypigípyich jadüg'oc.

Jacobo etz Juan píjctzóogixy tüg may'ajt

35 Huin'it Jacobo etz Juan, yí Zebedeo ajcxy ymang, nimíjhuágy Jesús, nimay:

—Huindzin, ndzojcpyich ajcxy co mdunípy may'ajt jadu'n nej yam nimaaygixy.

36 E Jesús ymínañ:

—¿Tí mdzojcpy co ndunípich müid miich ajcxy ycixpi?

³⁷ Chi ajcxy yminañ:

—Tun may'ajt co anajty mbaady yi m'ané'min etz m'oy'ájtin, xymöhuibich yi mij tung ma m'ané'min jaydëb n'ifñahuibich ma miich mmijc. Nidügti ñich ajcxy n'ifñahuipy a'oy'amy ma miich etz jadüg anajty'amy.

³⁸ Chi Jesús nimay Jacobo etz Juan:

—Ca' miich ajcxy mnejhuüy ti ti mbijctzoogixy. ¿Nej myajnaxamyb miich ajcxy je tzaachypi ayo'n huidibi nyajnaxaamybich, jadu'n nej jihuiy m'üga'ñ ajcxy ñich n'ügy e mbaada'ñ ajcxy ñich nnñbéjtin?

³⁹ Jacobo etz Juan y'adzooy:

—Ñich ajcxy nmimadägibich minaxipyich nyajnaxipyich ajcxy yi tzaachypi huidibi mminaxamyb myajnaxamyb.

Chi Jesús yminañ:

—Janch tiy'ajt jadu'n nej miich ajcxy mina'ñ co mminaxaangixy myajnaxaangixy yi tzaachypi jadu'n nej ñich mminaxaamyich nyajnaxaamyich yi tzaachypi, tim jadu'n nej jihuiy m'ügaangixy ñich n'ügy, e mbadaangixy ñich nnñbéjtin. ⁴⁰ Per ca' ñich cötújcin nmñdidyich co ñich miich ajcxy nbidägipy tungmiid, co myajpaadip tüg ma ñich nmijc a'oy'amy, e jadüg anajty'amy. Hue' janchtiy Dios Teedy ymñd ni'ixi' pinjaty ti hui'n'ixy jaydëb yajnñcxip je mijtung ma ñich n'ané'min.

⁴¹ Co je jacjadyi Jesús ydiscípulos ajcxy nejhuüy jadu'n nej Jacobo etz Juan may'ajt pijctzoy ma Jesús, chi ajcxy ooy mijotmäty Jacobo etz Juan. ⁴² Per Jesús huomiñ yi jacjadyi ydiscípulos ajcxy, e yminañ:

—Jadu'n nej miich ajcxy mnejhuüygyixy, yi jäy ajcxy huidibi mijtungmiid ma je maybi naax cajp, mic ajcxy ane'my je naax cajp. Nañ jadu'n yi' ajcxy huidibi mic'ajt miid ma je maybi naax cajp, mic ajcxy ane'my je jäy ajcxy.

⁴³ Per miich ajcxy ca' mjadú'nity nej mijtungmiidpi ma je maybi naax cajp. Pinjaty ma miich ajcxy mijtung yajnñxaamb, copicy ñaybidägiiyb nej tüg tumbi. ⁴⁴ Pinjaty miich ajcxy huidibi nigohuajc'ajtp, copicy ñaybidägiiyb nej tüg tumbi. ⁴⁵ Com ñich nañ jadu'n, je jäy huidibi tzoon tzajpjoty, ti nmiñich ya naaxhuiñ jaydëb nbubedipyich yi mayjäy ajcxy, e ca' nan yi mayjäy ñich xypubedipy. Ti nmiñich jaydëb nyegipyich njugy'ájtin ma yi o'cin. E co jadu'n nyegipyich njugy'ájtin ma yi o'cin, chi ngohua'na'ñich yi jäy ajcxy y'alma.

Jesús yajtzögy Bartimeo huiidi anajty huíntzpi

⁴⁶ Chi oy jäty Jesús miid ydiscípulos ajcxy jim Jericó. E co Jesús tzoon Jericó ytübijcy jadüg'oc, chi yi' ydiscípulos ajcxy etz janch mayjäy ñicxcixy anajty miid Jesús. Co ajcxy ycajp pidzimy, chi tūba'ay anajty yajpaady tüg huíntzpi huidibi limosna anajty ypijctzooyb jabom jabom. Hue' anajty yxi Bartimeo, e Timeo anajty xñijty yi' yteedy. ⁴⁷ Co Bartimeo nejhuüy co Jesús je Nazaretpi najxp anajty ma je tū'aa, chi mic yaaxqueegy yminañ:

—Jesús, David y'ap y'oc, tun may'ajt ñich pa'ayoog.

⁴⁸ Chi je mayjäy ajcxy ogy je huíntzpi, nimay ajcxy co huen amoñ. Per je huíntzpi ñigi yminan'idich:

—Miich, David y'ap y'oc, tun may'ajt ñich pa'ayoog.

⁴⁹ Chi Jesús ytinayxipya, e yminañ:

—Huomiingix yi huíntzpi.

Chi je jäy ajcxy oy yajtzooogixy je huíntzpi, nimaagyixy:

—Jotcugi', e pidig, com Jesús xyaaxtzoob.

⁵⁰ Chi mic'amy je huíntzpi, najtz'oxiy je ñibe'ñ, chi ypidigy, e ninicxy Jesús.

⁵¹ Chi Jesús je huíntzpi y'amidooy:

—¿Ti mdzojcpy ndunipyich mïid miich ycixpi?

Chi je huintzpi ymïnañ:

—Huindzin, ndzójcpyich co xyajhuindixigibich.

⁵² Chi Jesús je huintzpi ñimay:

—Jëb mnicxy ma mdijc. Com ti xymibicyich, paady ti mhuindixigy.

Tim huin'it je huintzpi yhuin'oyiïy, e yhuindixigy, e panicxy Jesús co ytübicy jadüg'oc.

11

Jesús ytigïy jim Jerusalén

¹ Co Jesús etz je mayjäy oyjá'tcixy huington ma je Jerusalén cajp ma yajpaady mejtz mutz cajp huidi xüjipy Betfagé etz Betania, huington ma je cop huidibi xüjip Olivos, chi Jesús quejxy metz ydiscípulos huen nicxy jayijp.

² Jesús ñimay je metzpi ydiscípulos:

—Nïcx müich ajcxy ma yijimbi cajp huingtonbi. Co jim mjädipy, chi mic'amy mbaadip tüg burro ycoxóchity huidibi ca' pin yaj'iñayñi chambaad. Coguejtuutcix je burro e yajmiingix ya ma ñich. ³ Pen jim pinjaty xy'amidoogixy: “¿Na'amy co mmïdzonaangixy yi burro?” Chi müich ajcxy mmïmähüipy: “Je Huindzin (Jesús) yajtunamyb tzojc, e yajhuimbidamy mic'amy.”

⁴ Chi je metzpi ydiscípulos ñicxy ma je cajp huingtonbi, e oypaatcixy tüg burro ycoxóchity huington ma tüg tijc'aguu. Chi ajcxy coguejtuuty je burro.

⁵ Ycoguejtuutyp anajty ajcxy je burro co nijëjity jäy jim huington ymïnañ:

—¿Ti mdungixyp? ¿Na'amy co mgoguejtuutcixy yi burro?

⁶ Chi je metzpi Jesús ydiscípulos je jäy ajcxy yajmïdmïydacy Jesús y'ayuc nej anajty ti ñimäyïi. Je jäy ajcxy ymïnaangixy co jëb yajñicxcixy je burro.

⁷ Mic'amy ajcxy mïja'ty je burro ma Jesús yajpaady. Je Jesús ydiscípulos ajcxy jïibe'ñ je burro ajcxy mïid yjocxhuit, chi Jesús yaj'iñay je burro. ⁸ Mayjäy ajcxy ooy yëby yhuut tügujc ma Jesús anajty ñaxa'ñ, e jacjadyïi jäy pujxy ajcxy quipy'aacx, e pidaaccixy tügujc.

⁹ Je mayjäy huidibi anajty ajcxy nicxp jayijp etz axam ma Jesús, chi ajcxy ytigïy capxp mic, ymïnaangixy:

—¡Hosana! ¡Gloria a Dios, ooy ycömávyty Dios! Huen capxpaady y'idipy jada yëydijc huidibi mimb mïid yi nHuindzin Dios yxï etz ymic'ajt. ¹⁰ Huen capxpaady y'idipy je ané'min huidibi jada Jesús yajtzondacp cham. Jada je' je ané'min huidibi nmij'ap nmijteedy David anajty ymïd. Hosana, huen je tzajpjoty tzïnaayb ajcxy ñbaatcixy capxpaatcixy jada mij'ane'mbi.

¹¹ E jadu'ñyi Jesús ycajptigïy jim Jerusalén, e ytigïy tigoty ma Dios ytijc. Co huindixtay tüg'ócïy tijaty jïiby tzajtigoty, chi chooñ jïiby, e ñicxy jim ma je cajp huidibi yxï Betania. Chi Jesús je majmetz ydiscípulos ajcxy mïdnicxy.

Jesús capxpocy je higueri ca'pi anajty ytiim

¹² Je com jabom co ajcxy chooñ jim Betania, chi Jesús yuböccooti. ¹³ Chi Jesús ijxpaty jigügy tüg higueri ooy anajty yco'aayty. Chi Jesús ñicxy ma je higueri yajpaady, ixa'ñ pen ymïd ytiim. Co Jesús ymech ma je higueri, chi ijxy co je higueri ca' anajty ytiim mïdity, jëyi mïdity anajty y'aay, com ca' anajty ni tiempity mïna higo ytiim'aty. ¹⁴ Chi Jesús migapxy je higueri ñimay:

—Jadu'n nej tiempo yjacnicxnï, ni pin cajacpaadipy higo tiim ma müich.

Chi Jesús ydiscípulos ajcxy mïdoy nej Jesús ñimay je higueri.

Jesús quejxidzïmday ajuybi adoocpi ma Dios ytijc

15 Co ajcxy oy yjädý jim Jerusalén, co Jesús ytiǵiy jadüg'oc jiiiby ma Dios ytiǵc, chi Jesús yajpidzimday je ajuuybi adoocpi ajcxy jiiiby tzajptigoty. Chi Jesús tijhuimbijtay je mesa ajcxy me je meeñ yajhuäcxpi ytuñ ajcxy. Nañ jadu'n tijhuimbijty je jäy ajcxy iñaybejt huídibi muuxy toocp. 16 Jesús ca' anajty tzocy co pinjaty midighuipy juudoogy ma Dios ytiǵc. 17 Jesús yaj'ixpiǵcpy anajty je mayjäy, e yminañ:

—Ma Dios y'ayuc necy Dios jadu'n yminañ: “Iich ndijc hue' je' tzajpcapx-capxtac ma tüg'óciy jäy ajcxy chooñ ma nidüg'óciy naax cajp ymiingixy Dios ojadajtp”, per miich ajcxy hue' yi' mhua'ñ meetzpitijc.

18 Co ajcxy je teedy mǵtungmǵdipi etz je escribas nejhuüy nej anajty Jesús ti y'idǵich jiiiby ma Dios ytiǵc, chi ajcxy ooy ijxtaayǵixy nej ajcxy jëb yaj'ögipy Jesús. Per ca' ajcxy yhuinma'ñybaady mic'amy nej yaj'ögipy, tziǵiyy ajcxy miid je mayjäy com je mayjäy ooy tzachjihuy huinmay jadu'n nej Jesús yaj'ixpiǵigixy. 19 Co oycoodziyñi, chi Jesús ycajpidzimy.

Je higeri ytiǵtzn

20 Je com jabom Jesús miid ydiscipulos ajcxy najxp anajty tim jopyñi ma je higeri anajty ytinäy. E je higeri ti anajty ytiǵtztay mabaad ytiǵtz. 21 Huin'it Pedro jäymejtzooty nej Jesús nimay je higeri, chi Pedro Jesús nimay:

—Huindzin, ix jada higeri huídibi ixiy mgapxpojç, ti yi' ytiǵc.

22 Chi Jesús Pedro nimay:

—Mibic yi' Dios. 23 Janch iich miich ajcxy nimäy, co ixipy pin migapxy jada huingonbi cop, e nimäy ixipy: “Miich cop pidǵ, e nicx cidäg mejyoty”, pen ca' ti mijotmetzciy, e mibicy co jadaanip nej yi' ti ane'my je cop, chi jadu'n ytunüyb yjadiüyb. 24 Paady iich miich ajcxy nimäy co tüg'óciy tijaty miich ajcxy mbijctzooyb ma Dios, chi Dios xymöhuipy ajcxy huídibi ti mbijctzoogixy. Pen janch miich ajcxy mibicy co Dios ti xymoogixy ajcxy je huídibi ti mbijctzooyb. 25 Co miich ajcxy mgapxtaaccixy, pen ca' oy m'ity ajcxy miid tüg jäy, huinmécxix yi' mmidzip tim jayijp, jigix jëbi Dios Teedy huídib jiiiby tzajpjoty xyhuinmeecxip miich ajcxy ma ti mdundigoogixy. 26 Pen ca' miich ajcxy mhuinmecxy yi' mmidzip huídibi ti xymidundigoogixy, ca' miich ajcxy xyhuinmecxa'ñ Dios Teedy huídibi yajpatp tzajpjoty.

Jesús je' ycötújcin

27-28 Je huin'it tiempo Jesús miid je' ydiscipulos ajcxy yhuimbijty jim Jerusalén. E co Jesús anajty yhuidity tzajtigoty, chi nijëjty huindzindijc huídibi nigohuajc'ajtp anajty je teedytiǵc etz escribas ajcxy huídibi nijyadutpi Dios ñecy, nimiñ ajcxy Jesús, e yminañ ajcxy:

—¿Pin cötújcin ti xymöy huídibi ti mduñ ya tzajtigoty? ¿Ma cötújcin ti mbaady co jëb m'ane'my ya tzajtigoty?

29-30 Chi Jesús yminañ:

—Iich miich ajcxy nañ jadu'n nyaj'amidohuamyb tüg ayuc. E pen mni'adzooyb ajcxy, huin'it ajcxy nyajnimähuipy ma iich ti nbaady yi' mic'ajt etz yi' cötújcin, co jadu'n nduñich jiiiby tigoty ma Dios ytiǵc. ¿Pin yajñibijc Juan, je Bautista, co huen jäy yajñibety? ¿Dios, o naaxhuñjáy? Adzoogich ajcxy.

31 Chi ajcxy ytiǵiy huinmay'ahuídijtpi, ñayñimáayigixy miñ xyipy:

—Pen mnaanim co Dios tzajpjotyti' ti yajñibicy Juan, chi Jesús xyñimáayimipy: “¿Nej co ca' miich ajcxy mibicy Juan y'ayuc?” 32 Nañ ni ca' jëbi iich ajt mnaanim co jäy ajcxy ti quejxy Juan.

Com chigüyb anajty jäy com ñejhuüyb anajty ajcxy co Juan je Bautista Dios anajty ytiy'ajt ymüid. ³³ Chi ajcxy Jesús nimay:

—Ca' iich ajcxy nejhuiy pin ti yajnibicy Juan.

Chi Jesús yminañ:

—Iich nañ jadu'n ca' nnigapxa'ñich pin ti xycötujcmöyich co jëb nduñich huídibi ndumyibich.

12

Je naymidúniptijc jibicjäybi ajcxy y'ijxpejt

¹ Je huin'it xii Jesús jacmigapxy je mayjäy müid jihuimbit ayuc, yminañ:

—Ji yajpaady tüg yëydijc huídibi camuuxy ti cojy ma ycam, e ti co'aguemy je camuuxy cam, e yaj'oyüy tügi tang ma huinmicxa'ñ je camuuxy. Nañ jadu'n je yëydijc tüg poch yajpidigy ma ycamuuxy yaj'ixihua'ñ co cuent'aty. Co anajty ti ni'ixidäy ti a'ixidäy, chi ycamuuxy cam yejcy ajuyducy ma nijëjity tumbidijc. Chi chooñ viaje tumbi jigüëgy it. ² Je huin'it tiempo co yhuaad'ajtñi je cosechi, chi je cogam quejxy tüg ytumbi jim ma je' ycam yajpaady, co hueen je tumbidijc yëjccixy je cosechi, jadu'n nej anajty ti ycapxytuñ müid je' ajcxy.

³ Chi je cam tumbidijc ajcxy majch je cogam yquexyöyp, chi huinhuojpy jijphuojpy ajcxy. Chi ajcxy quejxhuimbijty jadu'ñyi, ni ti ajcxy camoy. ⁴ Chi je cogam quejxy jadüg ytumbi ma je ycam yajpaady. Chi tumbidijc ajcxy tzaagäch je mimetzpi quexyöyp etz yajtzachiy ajcxy ma ycohuajc, chi ajcxy ooy ogy oyñinej. ⁵ Chi je cogam jacquejxy jadüg ytumbi e ajcxy tumbidijc yaj'o'cy je midugügpí quexyöpy. Chi je cogam jac tim quejxy jadyii ytumbi. Chi je tumbidijc ajcxy je cogam ytumbi huinhuojpi jijphuojpi nijëjity, e nijëjity ajcxy yaj'o'cy.

⁶ Je cogam ymüid anajty tügpajc ymang huídibi anajty ooy tzocy jihuüy. Je' oy quejxcogixiy ma je ycam yajpaady. Je cogam huinmay jadu'n co je tumbidijc ajcxy yajmij'adiyb je' ymang. ⁷ Chi je tumbidijc ajcxy ñayñimaayi miñ xyipy: “Jada yëydijc je cogam jada ymang huídibi jë'adaañip je yteedy ypidägy. Tzoc yaj'ó'cim, e jadu'n je cam një'ájtím.” ⁸ E jadu'n ajcxy majch je cogam ymang yaj'ögy ajcxy. Chi ajcxy yajpidzimy camjoty, e jibijptacy agajixci'py.

⁹ Co Jesús jadu'n miydactay je jihuimbit ayuc, chi yminañ:

—¿Ti ytunamyb je cogam müid je tumbidijc ajcxy? Hue' min ci'm ma je' ycam, e yaj'óctáhuipy je tumbidijc ajcxy huídibi tundigoy. E yegipy pijctzoy je' ycam müid huingbi jäy ajcxy.

¹⁰ ¿Nej ca'ni miich ajcxy mgapxy yi Dios ñecy ma jadu'n yminañ?

Je yëydijc huídibi je jäy ajcxy ca' anajty tzocy, Dios ti pidägy mij'ane'mbi.

Tim jadu'n nipaady nej tzaa oyjatypi huídibi je pojtzpidijc ca' ajcxy yajtuna'ñ, e je' oy ti yhui'mni ma anajty yjaccopícyity.

¹¹ Jada tung je Huindzin Dios ti tuñ, e ooy oy n'íjxim njäygidaacim.

¹² E huin'it je judíojäy ajcxy ytungmüidpi ooy jamadzaañ anajty Jesús, com ñejhuüyb anajty ajcxy co Jesús ñigapxyii yi' ajcxy. Com tzigüyb anajty ajcxy müid je mayjäy, chi ajcxy tim huinyöducy, chi ñcxcixni.

Yajnidüygixy pen jëbi cogüéjtin yajyecy o pen ca'

¹³ Jac'axam je judíojäy ajcxy ytungmüidpi quejxy ajcxy ma Jesús yajpaady mejtzcipy ixpicytjic. Tügpicy anajty ñaygomájtzigixy müid yi fariseos ajcxy, etz jadügpcy ma je rey Herodes. Hue' anajty ajcxy huinma'ñ ixtaayb nej ajcxy

ocxiñhuipy Jesús. ¹⁴ Jada mejtzpicypí ixpicytiç ñicxy ajcxy ma Jesús, e ymínañ ajcxy:

—Huindzin, iich ajcxy nejhuiyb co myaj'ixpijcy je tiy'ajt, ca' jāy mdzigíy, com ca' huin'ixpety myaj'ixpicy. Tú'ciy miich mduñ miid mic jāy, miid comeeñyāj, etz miid ayoob jāy. Tudāgy jāy ajcxy myaj'ixpicy jadu'n nej huaad ajcxy cuychinaagyxy Dios ytiy'ajt. Nejhuíhuaamybich ajcxy nej miich yaj'ixpijcy je mayjāy. ¿Nej tundigooyim miid yi Dios ycótúçin co nmigüéçim César, je romano jāy mij'ane'mbi, o ca'ji? ¿Nej jēb nmigüéçim, o ca'ji?

¹⁵ Per Jesús ñejhuiyb anajty ajcxy yjibic-huinma'ñ, e chi ajcxy ñimay:

—¿Na'amy co miich ajcxy xyjot'ixy xyhuinma'ñ'ixyich? Yajmiingix tūg meeñ jigix n'oc'ixipyich.

¹⁶ Chi ajcxy mimiñ tūg meeñ e co Jesús ijxy je meeñ, chi ymínañ:

—¿Pín y'ahuanax etz pín yxii ijtp ma jada meeñ?

Chi ajcxy y'adzooy:

—Hue' yí' César.

¹⁷ Chi Jesús ymínañ:

—Mo' je César huídibi yí' yjē'ajtpy, e mo' Dios huídibi Dios yjē'ajtpy.

Chi ajcxy ooy jihuiy huinmay jadu'n nej anajty Jesús ti y'adzooy.

Yajnidíygyxy pen je tiibi öccixy jugypigipy jadüg'oc

¹⁸ Je huin'it tiempo nijēçity saduceos ajcxy ymiñ ma Jesús. Yi saduceos ajcxy ymínaangixy co ca' pín yjugypiga'ñ tiibi y'o'ccixy. ¹⁹ Chi je saduceos ajcxy Jesús ñimay:

—Huindzin, Moisés jayhu'my je cötúçin co tūg yēydijç y'ögy, e co'ögy yhu'my je ytöxyjç e ca'ni ytöxyjç ung'ixy. Pues copicy je co'ögy ytöxyjāy ypigipy miid ña'y y'uch yēydijçpi jigix jēbi je töxyjāy y'ung'ixipy huídibi huimíhuip jadu'n nej codijç cobidāgy ma je yteedy y'ajch ypidāgy. ²⁰ Pues jim ma tūg çajp anajty chināy huixtujç yēydijç tūg que'x. Je ungoob ypijcy, e chi ix'o'cy ytöxyjç, e ca' ni tūg y'ung yajhu'my. ²¹ Je mímetzpi yēydijç ypijcy miid je co'ögytöxyjāy, e nañ jadu'n ix'o'cy ytöxyjç e ca' ni tūg ung yajhu'my. E nañ jadu'n je midugüçpi miid ypijcy je töxyjāy, e nañ jadu'n ix'o'cy je ytöxyjç, e ca' ni tūg y'ung yajhu'my. ²² E jadu'n oytuñyii yjadyii miid je töxyjāy co ti anajty miiddzinay'abidzimdāy je nihuixtujçpi yēydijç tūg que'xpi. E je nihuixtujçpi ix'o'cy ajcxy je töxyjāy, e ca' ni tūg y'ung ajcxy yajhu'my. E chi je töxyjāy oy y'öcni. ²³ E co anajty xii tiempo paaty, co anajty Dios yajjugypicy yí' tiibi ajcxy y'ögy, ¿huídibi jada' ajcxy nidüçti je yēydijç töxyjç'adaañp je töxyjāy? Com ti ajcxy jadu'n nihuixtujçpi miid tzínay'abidzimingixy.

²⁴ Chi Jesús je saduceos ajcxy ñimay:

—Miich ajcxy ca' mhuiñjihuý je tiy'ajt, com ca' mhuiñjihuiygyxy Dios y'ayuc ytiy'ajt, e com ni ca' mnejhuiygyxy je mic'ajt huídibi Dios ymiid. ²⁵ Pues co anajty yjugypijccixy je jāy tiibi y'o'ccixy, chi ca' ajcxy ypiga'ñ, e nañ jadu'n ni ca' ajcxy ñaymöhuiyb y'ung huen pijccixy. Hue' ajcxy yjygy'adaangixy chināhuaangixy jilby tzajpjoty, tim jadu'n nej je ángel ajcxy chinaagyxy yjygy'ajtcixy. ²⁶ Per je tiy'ajt co jāy ajcxy tiibi y'o'ccixy yjugypigaangixy, ¿nej ca'ni mgapxyñi Moisés ytiy'ajt ma anajty Dios ymigapxyii co je aay ujtç anajty chachtoy? Chi ymínañ: “Ihç je' je Dios huídib Abraham, Isaac etz Jacob yDios'ajtpy.” ²⁷ Com yi Dios ca' yí' yDios'aty ma yí' öçpi ajcxy huídibi y'alma ti yçyxy ti ytiyog. Yi Dios Dios'ajtp yí' ma yí' juugypí ajcxy. Paady miich ajcxy ooy mij mdundigoogyxy co ca' mhuiñjihuiygyxy Dios ytiy'ajt.

Je ané'min huídibi ooy nǎgi ycopícyity

²⁸ Nañ jadu'n je huin'it tiempo nimiiñ Jesús tǔg escriba. E yí' anajty y'amido'ijtpy co Jesús adzooy je jāy huídibi ca' mibicy co yí' ōcpi yjugypigípy ajcxy jadǔg'oc. Jada escriba ñejhuíyb co Jesús ooy oy ti y'adzooy je saduceos ajcxy, paady yí' Jesús amidooyi:

—¿Huídibi je' Dios y'ané'min jacmijpi?

²⁹ Chi Jesús y'adzooy:

—Yí' Dios ycótújcín huídibi jaccopícyip, yí' je' huídibi minamb: “Midoogix Israel jāy, je Huindzin Dios huídibi nDios'ájtím, yí' je' ajt nHuindzin Dios tǔgpajcpi. ³⁰ Tzoc jihui' etz yajmij'at mHuindzin Dios mǎid tǔg'óciy m'aa mjot etz mǎid tǔg'óciy m'alma, etz mǎid tǔg'óciy mhuinma'ñ, etz mǎid tǔg'óciy mmic'ajt.” Jada je' je jaccopícyip ané'min. ³¹ Je mimetzpi Dios ycótújcín jahueengi tú'ciy ñaybadyii mǎid je jayijpi, yí' huídibi jadu'n minamb: “Tzocjccix jihuiyigix yí' mmigǔgtijc tím jadu'n nej mnaychogyii mnayjihuiyii c'i'm.” Jada metz Dios ycótújcín jaccopícy jacmic'ajt mǎid ca'ydi jac huídibi cótújcín.

³² Chi je escriba ymíñañ:

—Ooy oy ti m'adzooy. Janch tǔy'ajt jadu'n nej miich míñañ, co jǐ yaj-paady tǔgpajcpi Dios, e ca' jǐ jadǔg Dios mic'ajt mǎidpi. ³³ E janch tǔy'ajt co copícy nmijpidaacím nyajmij'ájtím Dios cixyot huinijot mǎid tǔg'óciy ajt nhuinma'ñ, mǎid tǔg'óciy ajt n'alma, etz mǎid tǔg'óciy ajt mmic'ajt. E copícy ndzójcím njihuiyím nmigǔgtijc tím jadu'n nej naychójcím nayjihuiyím c'i'm. Jactzoobatp jada ca'ydi co tǔg'óciy yí' huindzigi'ñ huídibi anajty yajno'cpi mǎid Dios ycipxi.

³⁴ Co Jesús ijxy jadu'n nej je escriba tiydudǎgy anajty ti y'adzoyii, chi ymíñañ:

—Jahuenjaty miich mmibijcín ytigoy'ityñi jaydéb mdigíhuipy ma Dios y'ane'my.

Co Jesús anajty jadu'n ti y'adzooy je escriba, chi ca' jac pín ti ayuc yja-cyaj'amidoohui.

¿Pín je' y'ung je Cristo?

³⁵ Jesús yaj'ixpijcpy anajty je mayjǎy jǐiby ma Dios ytjic, e ymíñañ:

—¿Na'amy co yí' escribas ajcxy ymíñaangixy co Cristo hue' je' David y'ap y'oc? ³⁶ Com je Espíritu Santo ymoy David jada ayuc huídibi jaybety ma je Salmo necy ma jadu'n ymíñañ:

Yí' Huindzin Dios nimay iich nHuindzin: “Íña' ya a'oy'amy ma iich nmijc, ixti cooni anajty miich mmǎidzip ti nmimadactǎyich, jadu'n nipaadiy nej jihuiy ti nbidǎgyich miich mmǎidzip jadu'n nej tǔg tinaybejt.”

³⁷ ¿Per nej co yjadu'nity co jāy ajcxy ymíñaangixy co je Cristo David je' y'ap y'oc? ¿E David c'i'm ymíñañ co je Cristo yí' yHuindzin'ajtpy?

Jotcujc anajty je mayjǎy amidoo'ijti Jesús y'ayuc.

Jesús ca'p jāygidaci leyhuindzin ajcxy yhuinma'ñ

³⁸ Jesús yaj'ixpijcpy anajty je mayjǎy, e ymíñañ:

—Naycuend'ájtigix mǎid yí' escribas ajcxy. Com yí' escribas ajcxy ooy jotcujc co nayxóxigixy mǎid yhuít oyjatypi yoñjatypi. Ooy ajcxy tzocy co yajcpxpócxixipy huindzigi'ñ'amy mayjǎyduum. ³⁹ Yí' escribas ooy ajcxy tzójcixy yí' cōdumbi iñaybejt ma je naysujctac, etz ooy ajcxy tzójcixy iñaybejt ma yí' cōmaybi jāy iñay ma jāy ajcxy yxíduñ. ⁴⁰ Yí' escribas ajcxy yajcijxtaayipy yí' cōgy ytóxyjǎy ypidǎgy mǎid ajcxy y'adzójcín. Yí' ajcxy ooy tǔngixy jecy

tzajpcapxycapxii jigix ajcxy capxpaady idipy. Dios nigi tzaachytunipy yi escribas ajcxy miid ypocy ycixpi, ca'ydi jac ni pin.

Je ayoobi töxyjäy y'ofrendi

⁴¹ Tüg xii anajty Jesús iñay jii by tigtoty ma Dios ytijc. Iñaa yb anajty ma je limosna caja huinduu. Jesús yhuindüxcyp anajty je jäy ajcxy huidibi meeñ pidaaccixp ma je ofrenda caja. E maycomeeñyjäy ooy ymeeñ pidaaccixy janch may. ⁴² Tim huin'itiy yja'ty tüg co'ögy töxyjäy janch ayoob pidacy metz pi'c meeñyhuäcxy, huidibi ca' ooy choobaady. ⁴³ Chi Jesús huoomujcy je' ydiscípulos, e nimay ajcxy:

—Janch tiy'ajt jadu'n nimaaygixy co jada co'ögy ytöxyjäy ayoob jac'anaxy jada ti pidägy ofrenda, ca'ydi jac ni pin. ⁴⁴ Tüg'óciy comeeñydijc ajcxy ypidacpy ma y'ofrenda yi meeñ huidibi yajconajxyp. Jadayaabi co'ögytöxyjäy ti pidacy tüg'óciy huidibi anajty ymiid, je meeñ tüg'óciy huidibi anajty ñigayamy yi' ymooyb Dios.

Jesús ymina'ñ co Dios ytijc yhuindigooyipy

13

¹ Co Jesús ypidzimy ma Dios ytijc, chi nidügti ydiscípulos ñimay:

—Huindzin, ix jada maychaa mijjatypi etz jada maybi tijc ooy y'oy'oydüñity.

² Per Jesús y'adzooy, ymina'ñ:

—Huindücx miich ajcxy jada maybi mijjaty ytijc. Minip tiempo mina tüg'óciy jada tijc nicxy yhuim'y taj xit, ca' ma tzaa macxy. Huindigoydähuiip tüg'óciy.

Je tiy'ajt ma ca'ni naaxhuiñybi ycixa'ñi ytigoya'ñi

³ Jesús miid ydiscípulos ajcxy ñicxy ma je cop huidibi xii jip Olivos. Jim ajcxy co'ijxnaxy je Dios ytijc. Iñaa yb anajty Jesús jim copcixy co Pedro, Jacob, Juan etz Andrés ameech migapxy Jesús, yminaangixy:

⁴ —Tun may'ajt ich ajcxy yajnimaa yg mina jada ytuna'ñyii yjada'ñyii co huindigoydähuiip Jerusalén cajp. ¿Ti iixpejt'adam co anajty jadayaabi jadu'n ytuna'ñyii yjada'ñyii?

⁵ Chi Jesús y'adzooy ajcxy je' ydiscípulos ymina'ñ:

—Ix pinjaty xyhuin'ingixy. ⁶ Ooy jäy may ymiina'ñ miid ich nxii. Ñaydijáanigixy co je' ajcxy je' je Cristo, ymina'na'ñ ajcxy: “Ich je' je Cristo.” E ooy jäy may huin'inaangixy.

⁷ Co miich ajcxy ayuc mmidohuiipy co jäy chachchiptúngixy xii ya, ca' mdzigüygixip, com ooy ycopicyity co jada jadu'n jayijp ytunüyb yjadüyb. Ca' nan hue' je' anajty tim cijxp tim tigooyb je xii je tiempo. ⁸ Nayñibidigüüb tüg naax cajp miid huingbi naax cajp, e gobierno miid huingbi gobierno. E minipy mic uix canaag'it etz mij yuu mijpa'm xii ya. E jäy ajcxy ooy yhuänipy yjihuihuipy ycanaymijotcujc'ajtigixipy. Jada tzaachypi ayo'n tzondacni yi' anajty.

⁹ Chi Jesús yjacmina'ñ:

—Nayguend'ajtigix miich ajcxy, com yi mmidzip ajcxy xymájtzcixip, e xycyéjccixip ma tungmiidpidijc, e xychachytúngixip xyhuójpçixip ma yi judiójäy ñaymujctac ajcxy. Xyajnicxcixip mach ma rey etz ma gobernador ajcxy yhuinduu miid ich ycixpi com miich ajcxy xymibicyich. E miich ajcxy

tiy'ajt myegipy müd ñich ycixpi, ixti ma rey ajcxy etz ma gobernador ajcxy yhuinduu. ¹⁰ Ca' anajty xii tiempo paady mina ycixa'ñ naaxhuiñybi, chi ajcxy capxhuäcxtähuiipy ñich n'ayuc huindu'myb ñaaxhuiñ ma tüg'óciy naax cajp. ¹¹ Co jäy ajcxy xyajñicxip mach ma codungdijc co xytidyüngixipy, chi ca' ni nej m'jot'adiyib, ni ca' mhuinmayipy nej m'adzóogixipy. Mgápaxcixipy je ayuc huídibi Dios xymóoygixipy, com je ayuc huídibi mgápaxcixip, ca' nan miich je' anajty ajcxy m'ayuc. Hue' je' je Espiritu Santo xymóoygixipy capxy ayuc. ¹² Yéydijc ajcxy ycíyegamyb ma tungmüdpi yci'm y'uch ajcxy co huen yaj'ögyii. E nañ jadu'n je ungedeedy ycíyegamy yci'm y'ung ajcxy ma tungmüdpi. Nañ jadu'n yi' y'ung ajcxy cíyegipy yci'mdeedy co huen yaj'ögyii. ¹³ May naaxhuiñjäy ca' xychogipy xyjihuihuipy müich ajcxy müd ñich ycixpi. Pen müich ajcxy mmictinaayb ma mmibijcin, ypaadip müich ajcxy m'alma nídzoocin.

¹⁴ Chi Jesús yjacmíñañ:

—Co anajty m'ljxcixy je huídibi Daniel ñimiydac jecy'ajty, co pinjaty jibic-huinma'ñ tumb ma ca' ypadyii ma Dios ytijc, huídibi ooy ycodzigijity. Müich ajcxy huídibi tzinaayb jim Judea, co jadu'n m'ljxcixipy, chi ñicx mgueect-zoocix ma tungop. ¹⁵ Yi jäy ajcxy huídibi yajpatp ma ytijcñicy ca' ñicxity tigoty ma ytijc. E ni ti jüby cayajpidzimipy. ¹⁶ Yi jäy ajcxy huídibi yajpatp camjoty, ca' ajcxy nihuimbiditye' yjocxy huit huídibi ymüid. ¹⁷ Huin'it xii huin'it tiempo ayo'n pada'ñ je töxyjäy huídibi anajty ti y'ungtzimigy, e nañ jadu'n yi' ajcxy huídib müd y'ung ma'xung yajtzitzp. ¹⁸ May'ajt ajcxy mbjctzoohuipy ma Dios, co jada jadu'mbi ayo'n ca' ytunüyb yjadüyb ma anajty ytíich tiémpity. ¹⁹ Yi jadu'mbi xii tiempo jäy ajcxy ayo'n tzaachyipi minaxipy yajnaxipy. Ni caminaaxii jäy jadu'n tzaachyipi mijcajee ti minaxy ti yajnaxy maabi Dios cojy naaxhuiñybi oga'n, ixti chambaad. E caminaaxii jadüg'oc ycajadüyb jadu'n. ²⁰ Pen ca' Dios capx'aduga'ñ yjüibi ayo'n xii ayo'n tiempo, ca' ni pin chögipy. Per Dios ycapx'adugamyb yjüibi ayo'n tiempo müd je mibijcpidijc ycixpi huídibi Dios ti huin'ixy.

²¹ Co yi' jadu'mbi xii tiempo anajty ymüiñ, ca' mmibigipy, pen ji pinjaty xyñmaaygixy: “Ijxcix, cha yajpaady je Cristo”, o “jim'amy yajpaady je Cristo.” Ca' mmibijcixipy jäy y'ayuc. ²² Minip jäy ajcxy huídibi ñayajnaaxánigixy nej Cristo, e ymináangixipy co capxhuäcxy ajcxy Dios y'ayuc, e ca' yjanchity. Ytunipy ajcxy mij huinma'ñ etz mijpi ijxpejt, ixti jahuin'ina'ñ je mayjäy ajcxy huídibi Dios ti yhuin'ixy. ²³ Nayquend'ájitigix müd yi' jadu'mbi jäy ajcxy, com jayijp ñich müich ajcxy yi' ti nyajmüdmüdyägy.

Nej jada' je Dios y'ung yminipy jadüg'oc

²⁴ Chi Jesús yjacmíñañ:

—Co anajty yi' jadu'mbi ayo'n tiempo ti ñaxy, ycoodzihua'ñ etz je po' ca' y'ana'ñ. ²⁵ Maymadza' ycähuiip, e nañ yücxiip huídijaty mic'ajt müd tzajpjoty. ²⁶ Je huin'it xii je huin'it tiempo co jadu'n anajty ytunyii yjadyii, huin'it ajcxy m'ixipy, ñich je jäy huídibi tzoön tzajpjoty, co ñich anajty nmiñich jocjoty müd tüg'óciy nmic'ajt n'oy'ajtich. ²⁷ Co jadu'n anajty nmiñich, chi mic'amy nguexipyich ñich n'angeles ajcxy ma xii ypidzimy, ma xii ycidägy, ma jimboj ypidzimy etz ma tichpoj ypidzimy. N'angeles ajcxy yajmuga'ñ tüg'óciy ñich njäy, huídibi ti nhuin'ixyich, xim yam ma ajcxy yajpaady ya naaxhuiñ, etz jüby tzajpjoty.

²⁸ Chi Jesús yjacmíñañ:

—Jëb miich ajcxy ti'y'ajt mbigipy ma yi higueri jadu'n nej je xii je tiempo mimb cidaacni. Co je higueri jadüg'oc ñihuamiy, chi miich ajcxy mnejhuüy co ti yhuingtoni mina ypottigiyyi. ²⁹ Nañ tim jadu'n co m'ixipy tuniyyb yjadüyb tüg'óciy ijxpejt nej ti nnimaaygixy, chi mnejhuühuip co ti yhuingtoni je tiempo mina nhuimbidiyich jadüg'oc ya naaxhuiñybi. ³⁰ Janch ich miich ajcxy nimäy co jada huidibi ti nnimaydacyich tuniib jaduñb ca'ni anajty y'óctay je jäy ajcxy huidibi jacjagy'ajtp jadachambi xii jadachambi tiempo. ³¹ Je tzajp etz je naaxhuiñybi cixipy tigoyipy. Ich n'ayuc huidibi ngapxyich, ca' yciixipy ytigoyipy ni caminaxii. ³² Ca' ni pin nejhuüy je xii je tiempo mina ytuna'ñyii yjada'ñyii jadu'n nej ti ich miich ajcxy nnimaaygixy. Ni je ángeles ajcxy jüby tzajpjoty ca' nejhuüyigixy, nañ ni ich, Dios y'ung', ca' nejhuüyich. Jëyi Dios Teedy tügpaic nejhuüy.

³³ Ni'ixi' ahujxcix. Mibijctzoogix Dios jabom jabom, com ca' mnejhuüyigixy mina anajty ytuna'ñyii yjada'ñyii yi huidibi ti nyajnimaaaygixy. ³⁴ Yi xii yi tiempo huidibi minip jadu'n nipaady nej tüg comeñyñyay huidibi ñixca'ñ ma tüg it lugar huidibi jigüegy yajpatp. Jayiip ca'ni anajty chooñ, chi yajñibijcy je ytumbi ajcxy nidüg nidüg je' ytung. E nimay je' ytumbi huidibi cuend'ajtp je tijc'aguu co huen ni'ixi' y'idipy ma tijc' aguu. ³⁵ Ni'ixi' m'idipy miich ajcxy. Com ca' mnejhuüyigixy mina je codijc yhuimbida'ñ ma ytijc, pen namgodzäy, o mij coodz, o moñi, o ma anajty ti yximiiyñi. ³⁶ Ca' jécyity co yjadipy timetiini, e xyajyöybéjtcixipy anajty mdzachmaagixy. ³⁷ Yi huidibi ich miich ajcxy ti nyajnimaaaygixy, nañ jadu'n nimäyich tüg'óciy jäy co huen ajcxy nidüg'óciy ahujxcixip ni'ixi' je xii je tiempo mina nhuimbidiyich jadüg'oc ya naaxhuiñ.

14

Xicmujccixy capxmujccixy co Jesús madzaangixy

¹ Tigoy'ijtni anajty mejtz xii co judíojäy ajcxy nixiiduna'ñ je pascua xii, mina ajcxy tzajcaagy cay huidibi ca' levadura müidity. Je judío teedy ajcxy huidibi jacmijtungmüid etz je scribas ajcxy huinma'ñ'ixtaaygixy nej jëb ameech májtzicixipy Jesús, e yaj'ögaangixy, ca'ydi je mayjäy nejhuüy. ² Chi ajcxy ñayñimayi miñ xyipy:

—Ca' y'óyity co nmájtzim Jesús xiioty. Com ca' yjécyity co je mayjäy yjotmätcottähuipy, e ytiñhuip huambi jihuiyyb ajcxy.

Tüg töxyjäy pidacy aceite ma Jesús ycohuajc

³ E Jesús jim anajty yajpaady jim Betania. Hue' Jesús anajty yajpaady ma Simón ytijc, je Simón huidibi anajty ymüid nübüd pa'm. Jesús iñaayb anajty ma caydac co ymüiñ tüg töxyjäy müid tüg tzaadüdz quiiq ujtz müid perfume huidibi ooy oy yxuugy. Jada perfume ooy anajty chóohuity. Chi je töxyjäy yaj'ahuäch je quiiq, e yajcöyogiy Jesús je perfume huidibi ooy oy yxuugy. ⁴ E nijjëjty jäy ajcxy huidibi anajty jim, ca' anajty ajcxy yjotcújcity müid huidibi je töxyjäy ti tuñ, e ñayñimayi ajcxy miñ xyipy:

—¿Nej jada co ocyaj'ayooni yi perfume huidibi ooy oy yxuugy? ⁵ Jac'oy co ixipy yajtoogy yi perfume tugiig migo'px peexy, jigix yajpubedipy ayoojtijc.

E ca' jadu'n ajcxy tim jäygidacy nej je töxyjäy ytuuñ müid Jesús, chi ix'ojy ajcxy je töxyjäy ayoo.

⁶ Chi Jesús yminañ:

—Ixmajtcix jada töxyjäy. ¿Nej co m'amayiygixy? Yi huidibi ti tuñ müid ich, ooy yi' y'óyity. ⁷ Je ayoojtijc ca' ytigoy'idipy ma miich ajcxy nimina. Huen

huidibi xii huen huidibi tiempo jëb mbubedip ajcxy ayoobtjic. Per iich ca' n'ida'ñich ya jecy miiid miich ajcxy. ⁸ Jada töxyjäy ti tuñ miiid iich jadu'n nej ti ymadägy. Yi' ti pidägy ma iich nninixc perfume huidibi ooy oy yxuugy. Yi' jijp'iixpy mina naaxtigihua'ñich. ⁹ Janch iich miich ajcxy nimaaygixy co huen yma'amyity ya naaxhuiñ ma anajty yaj'ihuäcxy yajcapxhuäcxy jada ayuc jada tiy'ajt huidibi nidzoocin miiid, yajnimiydägiipy huidi jada töxyjäy ti tuñ, jigix capxpaady y'idipy.

Judas cïyecy yi Jesús ma ymidzip

¹⁰ Huin'it tiempo je Judas Iscariote, nidüg je nimajmetzpi huidibi Jesús anajty ti huin'ixy, oy miiid ñaygapxyii je teedy mjtungmiiidpi nej jëb cïyecy Jesús ma yi teedy ajcxy. ¹¹ Co je teedy mjtungmiiidpi ajcxy jadu'n midoy, co je Judas cïyega'ñ Jesús ma yi' ajcxy, chi ajcxy ooy yjotcugiiy. Chi ajcxy Judas meeñ yajhuinhuaniiy. Chi Judas yhuinma'ñ'ixtay nej jëb occïyecy Jesús ma yi' ajcxy.

Co Jesús y'adzu'ajty pascua xiijoty

¹² Chi paty je mij xii mina je xii'ajtpidijc tzajcaagy cay huidibi ca'p levadura miiidty, e yaj'öccixy je cöbixy huidibi ajcxy yajhuindzigiiyb anajty Dios. Chi ydiscipulos ajcxy y'amidooy Jesús:

—¿Ma'amy mdzocy co ni'ixiiyim je pascua xii adzu'ájtjn?

¹³ Chi Jesús quejxy metz ydiscipulos ajcxy cajpjoty, chi nimay:

—Jim miiid mnaybadiiyb tüg yëydijc huidibi nii tzimnicxp ma tüg majt. Miich ajcxy mbanicxiiyb je yëydijc. ¹⁴ Mbanixcixpy ajcxy je yëydijc, ixti coon mbajädipy ma ytjic. E miich ajcxy mni'mähuipy je codijc: “Je Huindzin Jesús ñejhuñhuam ma miich miiidty tüg cuarto ma je Huindzin Jesús miiid ydiscipulos ajcxy jëb caaygixy yi pascua xii adzu'ájtjn.” ¹⁵ Je codijc ci'm xyajni'ixiiygixyip tüg cuarto miiidpi ma je miiidty piso huidibi ti yajni'ixiiy. Ma yijimbi cuarto miich ajcxy mni'ixiihuipy yi pascua xii adzu'ájtjn.

¹⁶ Chi je metz Jesús ydiscipulos ajcxy tiiyöychooñ. Co ajcxy yja'ty cajpjoty, chi ajcxy paty je cuarto, tim jadu'n nej Jesús jayijp ymiiinañ. E jim ajcxy ni'ixiiy je pascua xii adzu'ájtjn.

¹⁷ Nam coodziiyiñ anajty co Jesús yja'ty ma je cuarto miiid jacjadyii ydiscipulos ajcxy. ¹⁸ Co anajty jim ycaaygixy ma je caydac, chi Jesús ymiiinañ:

—Janch iich miich ajcxy nimay co nidüg miich ajcxy huidibi cham caayb miiid iich, xycïyegaambich ma nmiiidzipich.

¹⁹ Co je Jesús ydiscipulos jadu'n midooy, chi ooy ytiigiiy tajpi maybi ajcxy, e ñay'amidóohuigixy miñ xyiipy, e tüg ymiiinañ:

—¿Nej iich jada'ji?

E jadüg ymiiinañ:

—¿Nej iich jada'ji?

²⁰ Chi Jesús ymiiinañ:

—Yi' yi' nidügti yi nimajmetzpi huidibi tocxmujep miiid iich ma tiiidpi txy. ²¹ Pues janch iich je', je jay huidibi tzoon tzajpjoty, nbadaamybich tzaachypi ayo'n jadu'n nej yjaybétyity ma yi Dios ñecy. Per mij ayo'n pada'ñ je jay huidibi xycïyegaamich ma iich nmiiidzip. Jac'oy co ca' ycadimma'xung'ajty jada yëydijc.

²² Caayb ajcxy anajty, co Jesús conígy tüg tzajcaagy, e jayijp yajnajx Dioscojuyip ma Dios, e chi tujc-huäcxy je tzajcaagy, moy je' ydiscípulos ajcxy. E co Jesús jadu'n tuñ, chi ymíñañ:

—Caaygix jada tzajcaagy. Jada tzajcaagy ñch jada nninícx.

²³ Chi Jesús conígy je úgy vaso, e co Dioscojuyip yajnajxy, chi moyday ajcxy je úgy, e nidüg'óciy ajcxy uucy je úgy. ²⁴ Chi Jesús ymíñañ:

—Jada úgy ñch nní'py'ajtpy huidibi temamb yogamb. Je' jada jemybi Dios ycótújcín huidibi Dios yejc mñid jáy ajcxy ycíxpi. ²⁵ Janch tíy'ajt jadu'n nej ñch miich ajcxy nimaaygixy, co ca' jadüg'oc n'üga'ñich vino nñ, ixti cooni anajty njädýich tzajpjoty ma yí Dios y'ane'my.

Jesús capxpídzimyo co Pedro ymíña'na'ñ co ca'y'ixy'adyii

²⁶ E co Jesús etz ydiscípulos ajcxy ñy tüg himno, chi ñicxy ajcxy ma je cop huidibi xíijp Olivos. ²⁷ Chi Jesús ymíñañ:

—Cham coodz xycöguëgaambich miich ajcxy, com jaybety jadu'n ma Dios ñecy ma jadu'n ymíñañ: “Nyaj'ögaamybich je cöbixy cuend'ajtpi, e huin'it je cöbixy queeg-huäcxtähuij.” ²⁸ Per co ñch anajty njugypícyich jadüg'oc, co ñch anajty ti n'ögyich, nícxibich jim Galilea jacjayijp, ca'ydi miich ajcxy.

²⁹ Chi Pedro Jesús nimaayi:

—Oy ixipy yí jacjadyii miich mdiscípulos ajcxy xycöguectäy, per ñch ca' miich ngöguëga'ñ.

³⁰ Per Jesús nimay Pedro:

—Janch tíy'ajt jadu'n nej yam nimäy, jadachambi coodz ma ca'ni anajty tzeyaxígy mejtz'oc miich xycoyüdz'a'ñich tugüg'oc, míña'na'ñ co miich ca'y'ixy'adyiijich.

³¹ E Pedro ca' anajty cöbiga'ñ nej Jesús ymíñañ, chi mictägy míñañ:

—Ca' ñch miich ngoyüdz'a'ñ, oy ixipy ndim'o'cich quipxy mñid miich.

E nañ actim jadu'n jacjadyii Jesús ydiscípulos ajcxy ymíñañ nej Pedro ti ymíñañ.

Jesús mibijctzoy Dios jim Getsemaní

³² Jesús mñid ydiscípulos ajcxy oya'ty ma tüg it huidibi xíijp Getsemaní, chi Jesús je ydiscípulos ajcxy nimay:

—Íña' miich ajcxy ya, nami n'ocnicxyich jim'amy Dios mibijctzoob.

³³ Chi Jesús mñid nicxy jëda'ajty Pedro, Jacobo etz Juan ma tüg it ahuingujc. Chi Jesús ytigíy tajpi maybi jihuiy jotmay. ³⁴ Chi Jesús ymíñañ:

—Njihuiybich tüg jotmay nej n'öga'ñich. Huí'mgix miich ajcxy ya etz juugy m'íjtcixípy, ca' mmáagixípy.

³⁵ Chi Jesús ñicxy jac'amijci'm, Dios mibijctzoy, e may'ajt pijctzoy co ixipy ca' minaxy yajnaxy je tzaachypí huidi anajty ypadamy je huin'it hora. ³⁶ E Jesús anajty Dios mibijctzoy ymíña'ñ:

—Dios, mñid miich ca' ni ti chípity. Píjcigich jadayaabi tzaachypí ayo'n, per ca' yjadú'nity nej ñch ndzójcín, huen tuñyí jadu'n nej miich mdzójcín.

³⁷ Co Jesús nihuimbijty Pedro, Juan, etz Jacobo, chí oy ajcxy paady ti anajty ymi'óccixy. Chi Jesús Pedro nimay:

—Simón, ¿nej ti mmi'ögy? ¿Nej ca' mmadäga'ñ m'idipy juugy tüg hora?

³⁸ Jugy'íjtcix, e mibijctzoogix Dios ca'ydi jibictuuyb mdigíygyxy. Janch tíy'ajt co jotjoty ooy mnijot'ájtcixy mdunaangixy yí oybi. Per yí mninícx oy amaayity.

³⁹ Chi Jesús jadüg'oc huinhuäctuuty je' ydiscípulos ajcxy, e jadüg'oc ñicxy Dios miñictzoob. May'ajt pijctzoy tim jadu'n nej je jayijp'atypí anajty ti ymína'ñ. ⁴⁰ Chi Jesús yhuimbijty ma anajty ajcxy ydiscípulos yajpaady, e jadüg'oc oy pátcixy ti anajty ymi'öccixy, com ca' ajcxy mimadägy máhuü, e ni ca' ajcxy jayty nej adzohuipy Jesús. ⁴¹ Midugüg'oc Jesús ñicxy ma je' ydiscípulos ajcxy, e ymínañ:

—¿Nej ya mjacmáagixp mjacpooxcixp? Maagix pooxcix jadachambi. Ti miid jadu'ñyi. Ti je tiempo huaad'ájtñi mína ñich, je jáy huídibi tzoon tzajpjoty, xycíyegipy ajcxy ma yi jibic jáydijc. ⁴² Maybidígicx, tzoc jámim. Chi ymiñ je jáy huídibi xycíyegaambich ma nmídzípich.

Mach ajcxy Jesús yajñicxcixy

⁴³ Capxp anajty Jesús, co Judas oyyáty ma Jesús yajpaady. Judas hue' je' nidügti je majmetzpi huídibi Jesús yhuin'ijx. Judas miid miñ mayjáy huídibi ajcxy miid pujx etz quipy. Je teedy miitungmiidpi, je escribas ajcxy, etz je mijjädijc ajcxy ti anajty quexy je mayjáy huídibi anajty madzamb Jesús. ⁴⁴ Judas, je huídibi anajty cíyegamb Jesús, hue' anajty jayijp ti moy je mayjáy tüg ijxpejt huídibi miid jéb ajcxy ijxcabip Jesús. Jadu'n jayijp Judas ycapxytuñ miid yi' ajcxy, e ymínañ:

—Je jáy huídibi anajty ndzücxypich, yi' je' anajty Jesús. Madzípy ajcxy, e myajñicxip miich ajcxy yajxon cuend'aty.

⁴⁵ Mic'amy co Judas oyyády ma Jesús yajpaady, chi nimijhua'cy, e nimay:

—Huindzin, Huindzin.

E co jadu'n ymínañ, chi Judas Jesús tzücxxy. ⁴⁶ Chi mic'amy je mayjáy Jesús mach, e yajñicxy ajcxy mach.

⁴⁷ Per nidügti Jesús ydiscípulos juudy ypujxy ma ytijc, chi je teedy miitungmiidpi tüg ytumbi yajtzaachíy, quejtzpujxi tüg ytätzac. ⁴⁸ Chi Jesús je mayjáy nimay:

—¿Ti co miich ajcxy xyñimiñich miid pujx etz quipy, jadu'n nej jihuü ñich tüg meetzpi? ⁴⁹ Jabom jabom nyaj'ixpijcyich jáy jüby ma Dios ytijc ma miich ajcxy myajpaady, e ni ca' miich ajcxy xymajchich. Paady jadu'n ytunyí yjadyí jigix yi' yajcuydumb nej ity jaybety ma Dios ñecy.

⁵⁰ Chi je' ydiscípulos ajcxy yajhu'my Jesús naydügpajc. Chi je' ajcxy yqueegy.

Je jáy mutz'anägnip huídibi quectzög

⁵¹ Per tüg yujcyeeg anäg huídibi anajty payöy Jesús nimóchity anajty miid tüg sávana. Chi Jesús ymídzip ajcxy majch je yujcyeegpi. ⁵² Chi je yujcyeegpi cíqueegtuty je mayjáy, yajhu'my ysábana, e yquectzögy niñuädz ixhuädz.

Jesús mijjuntjoty

⁵³ Chi ajcxy yajñicxy Jesús mach ma je teedy miitungmiidpi yajpaady. Chi mic'amy ñaymujci tüg'óciy teedy ajcxy huídibi miitungmiidpi, e tüg'óciy mijjädijc, etz tüg'óciy escribas ajcxy. ⁵⁴ Chi Pedro jiguéy anajty panicxy je mayjáy ajcxy ixti oy yja'ty ma je teedy miitungmiidpi ytíba'. E jim ixtacy quipxy miid policia ajcxy agujc, yxaamgixy anajty ma jinba'.

⁵⁵ Je teedy ajcxy miitungmiidpi etz tüg'óciy je judiojáy ytungmiidpi ajcxy yhuinma'ñ'ixtaaygixy nej ajcxy jéb Jesús yajpocya' miid ajcxy yxíhuin, e jadu'n jéb mooygixy yi' ócin. Per ca' ajcxy paady huinma'ñ. ⁵⁶ Mayjáy niñuambejty Jesús miid aní, e ca' ajcxy y'ayuc ytügy. ⁵⁷ Nijéjity jáy ytinayígy juntajoty, e niñuambety ajcxy Jesús, ymínaangixy:

58 —Hich ajcxy amido'ijt Jesús y'ayuc tüg tecy, co jadu'n ymínañ: “Nji-daamybich jada Dios ytijc huídibi jáy ti cójcxíy, e codugüig xü gojtigadzípich huíngbi huídibi ca' jáy cojy.”

59 Per ni ca' ytügüy ajcxy y'ayuc nej ajcxy Jesús níhuambejty, ac tigachjaty nidüg nidüg ymínañ ajcxy.

60 Chi je teedy huídibi je jacmíjtungmíid ytinayígy juntajoty, chi y'amídooy Jesús e nímay:

—Jesús, ¿ca' nej m'adzohua'ñiyi? ¿Ca' mmídooy nej yxhachxígíxy?

61 Per Jesús amofñ y'íjty. Ca' ti ayuc adzohuimbíjty. Chi je teedy jadüg'oc mígapxy Jesús nímay:

—¿Nej míich je' je Cristo, je Dios y'ung?

62 Chi Jesús ymínañ:

—Janch jadu'n, íich je' je Cristo, je jáy huídibi tzoon tzajpjoty, e míich ajcxy xy'ixípich íñáyich ma je míjpi Dios ymíjc a'oy'amy. Nañ jadu'n xy'ixípyíich míich ajcxy jocjoty co anajty nhuimbítíych jadüg'oc ya naaxhuíñ.

63 Chi je teedy huíndzech huínhuocy yci'm yhuít, je' je' tíy'ájtíp co ca' anajty yjotcújcíty míid Jesús y'ayuc, chi ymínañ:

—¿Ti testigo njac-huaaním? 64 Míich ajcxy ci'm ti mmídoogíxy yí' y'ayuc, jadu'n nej ycapxtígoy míid Dios. ¿Nej míich ajcxy mínaangíxy?

Chi nidüg'ócíy ajcxy ymínañ co janch jadu'n Jesús míj oy ti ycapxtígoy míid Dios ytiy'ajt, paady huaad mooygíxy yí' o'cin.

65 Chi níjéjaty jáy yhuíndzujígy Jesús. Chi ajcxy huíngoxodzíy, cójcxíy, e chi ajcxy nímay:

—Octíygapx. ¿Pín ti xycojxy?

E je policíatíjc ajcxy cojxy Jesús ma yhuíñyjíjp.

Pedro ycoyüch Jesús

66 Pedro tíbáy anajty y'ahuíxy. Chi nímiñhuáci tüg tumbi töxyjáybi huídibi anajty tumb ma je teedy ytíjc. 67 Co je töxyjáy íjxpaty Pedro íñáy anajty jünba'áy, yxaamb anajty. Chi huíndíxpejty Pedro, e nímay:

—Míich nañ míidhuídíjty anajty je Jesús yí' Nazaretpí.

68 Per Pedro ca' cóbíjcy je töxyjáy y'ayuc, e ymínañ:

—Ca' n'ixy'adyííjich jada Jesús. Ní ca' nhuínjúhuíyíich ti míich nímiydacpy.

E mic'amy Pedro ypidzímy jíiby, e tím huín'ítíy tüg tzeyñí'aa oy yaaxígy.

69 Chi jadüg'oc je tumbi töxyjáybi huíndíxpejty Pedro, e nímay je jáy ajcxy huídibi jíim yajpatp huíngon, e ymínañ:

—Jada je' nidügtí huídí anajty míid huídity Jesús.

70 Chi Pedro jadüg'oc ymínañ co ca' ix'adyíi. Co hueeñí, je jáy ajcxy jadüg'oc Pedro nímay:

—Janch co míich je' nidügtí ma Jesús yjáy míñ, Galileo jáy míich, com nmídooybich míich m'ayuc nej Galileo jáy ycapxcíxy.

71 Co ajcxy jadu'n ymínañ, chí Pedro míc'tágy ñaygogapxi co ca' yí' míidhuídity Jesús, ymínañ:

—Dios y'íjxpy ñejhuíñyib co tíy'ajt ngapxyích, co ca' n'ixy'adyííjich yí' Jesús huídibi míich ajcxy mnígapxpy.

72 Co Pedro ycapxymaayi tím huín'ítíy tüg tzeyñí'aa yaaxígy mímejtz'ocpi. Huín'ít Pedro jáymetzcoody nej Jesús nímiyíi: “Cham coodz jayíjp ca'ní anajty tzeyñí'aa yaaxígy metz'oc, ti anajty míich mína'ñ tugüg'oc co ca'

xy'ix'adyijich.” Co Pedro jadu'n jäymejtzcoody Jesús y'ayuc, chi tajy may ñajyihuüiyi, e ytiğiyy yaaxpi.

15

Jesús ma Pilato yhuinduu

¹ Co yxiiñy, chi je teedy ajcxy huídibi mij tung mïd, je mijjäydjç, je escribas ajcxy, etz tüg'óciy judíocjy huídibi mij tung mïd yömujctay ajcxy. Chi nidüg'óciy ajcxy yajnícxixy Jesús cïxoch ma Pilato, je gobernador. ² Pilato Jesús y'amidooy, nimay:

—¿Nej miich rey'ajtp ma yi judíojäy ajcxyi?

Chi Jesús yminañ:

—Miich jadu'n minamb.

³ Je judío teedy ajcxy huídibi mijtungmïdipi mictägy tzachxigixy Jesús mïd canaagnax xihuïn. ⁴ Chi Pilato jadüg'oc Jesús y'amidooy, nimay:

—¿Ca' nej m'adzohua'ñi? Ix nej yi mmidzip ajcxy xychachxigixy.

⁵ Chi Jesús ca' ni nej y'adzooy. E Pilato ooy chachhuïnmay'ahuídijty.

Jesús yajmoy sentencia co y'ögipy

⁶ Com xiíjoty anajty, je gobernador Pilato najtzmadzïy tüg machyjäy, je huídibi je mayjäy anajty ypijctzoogixyp. ⁷ Pujxtijç iñaayb anajty jim Jerusalén tüg machyjäy huídibi anajty yxii Barrabás. Barrabás pujxtijç iñaayb anajty quipxy mïd jacjadyii jäy huídibi anajty ti midziptzoon je gobierno romano, e ti anajty yjäyyaj'óccixy. ⁸⁻⁹ Co anajty je may yxii'ajtpidjç may'ajt pijctzoogixy ma Pilato co najtzmazhüip tüg machyjäy, chi Pilato yminañ:

—¿Nej mdzojccixyp co nnajtzmazhüibich je judíojäy ajcxy yrey?

¹⁰ Pilato ñejhuüiyb anajty co mañ'ajtingixy anajty ajcxy je teedy mijtungmïdipi ti cïyejccixy Jesús. ¹¹ Per co Pilato jadu'n yminañ, chi je teedy ajcxy mijtungmïdipi ooy ajcxy yajhuamgoty yajjihuiygoty je mayjäy co huen je Pilato najtzmazhïy je Barrabás. ¹² Chi Pilato y'amidooy je mayjäy jadüg'oc:

—¿Nej miich ajcxy mdzocy ndunipyich mïd jada yëydjç huídibi jäy ajcxy ytiíjpy co yrey'aty ma yi judíojäy ajcxy?

¹³ Chi je mayjäy mic yminangottay:

—Yajcruutzpet.

¹⁴ Chi Pilato yminañ:

—Per ¿ti yi' ti tundigoy?

Huin'it je mayjäy nigí mic yminañ:

—¡Yajcruutzpet!

¹⁵ Co jadu'n je mayjäy ajcxy mictägy yminanday, chi Pilato anajty yajjotcuç'adaangixy je mayjäy, chi najtzmadzïy je Barrabás. E co yajc'ajttay yi Jesús, chi cïyejçni co huen yajcruutzpedyii.

¹⁶ Chi je soldados ajcxy yajnicxy Jesús ma je agujctijç tiba', e jim ñaymujci tüg'óciy soldados ajcxy huídibi yajpatp anajty jim Jerusalén. ¹⁷ Chi ajcxy yajñjenïy je Jesús tüg rey yhuít, color ucypi e yajcojenïy ajcxy apy corona.

¹⁸ Chi je soldados ajcxy yminañ:

—¡Viva jada judío rey!

¹⁹ Chi je soldados ajcxy huojpy Jesús ma ycohuajc mïd paxy, e huindzuj jijptzujcixy ooy, e huingoxtinay'ahuüygixy janch ypaad nej jihüüy ooy huindzigüygixy. ²⁰ Co je soldados ajcxy nixiictay yajxiictay Jesús, chi ajcxy

jeeni je yreyhuit color ucypí, e yajnijeniiy ajcxy yci'm yhuit jadüg'oc. Chi ajcxy Jesús miiðcajppidzimy co anajty yajcruutzpedaangixy.

Co Jesús yajcruutzpejtí

²¹ Tú'am ajcxy tüg jáy miiðnaybati, hue' anajty yxii, Simón, ycocájpity jim Cirene, Alejandro etz Rufo je' anajty yteedy. Hue' anajty choñ camjoty. Chi ajcxy adzip nimay Simón co huen jaccajpi Jesús ycruudz.

²² Chi ajcxy yajnicxy Jesús ma tüg it lugar huuidibi yxii Gólgota, je ayuc Gólgota jadu'n yhuimbidzimy o'cpi cohuajc. ²³ Chi ajcxy moy Jesús vino huen ügy tem huuidity miið mirra tzoy. Per ca' Jesús cöbijcy je vino nii. ²⁴ Chi ajcxy yajcruutzpejty Jesús. E huin'it je soldados ajcxy suerte ijxy, co anajty ajcxy Jesús yhuit yajhuäcxaani, oc'ixaangixy pin anajty ocj'e'ájtíp.

²⁵ Petyxii anajty co ajcxy yajcruutzpejty Jesús. ²⁶ Je ayuc huuidibi ajcxy yjaay ma Jesús cruudz, jadu'n yminañ:

—Je judíojäy ajcxy yRey. ²⁷ Quipxy miið Jesús ajcxy yajcruutzpejty metz meetzpi. Tüg meetzpi ajcxy yajcruutzpejty a'oy'amy ma Jesús ymijc, e jadüg anajty'amy. ²⁸ Yajcuyduñ nej anajty jaybety miñ ma Dios ñecy, ma jadu'n yminañ: “Yaj'amichoomujc je Cristo miið je pocyjäy ajcxy.”

²⁹⁻³⁰ Je mayjäy huuidibi ajcxy naxiiyb anajty ma Jesús yajpaady cruutzcíxy, ooy anajty ajcxy ycöjigiiyñ, nixiiicy yajxiicy ajcxy Jesús, yminañ ajcxy:

—Bah, miich huuidibi Dios ytijc mjidaanip, e codugüg xii huingbi myajpidíga'ñ, miich ci'm cham naygohuaani, e minac cruutzcíxy.

³¹⁻³² Nañ jadu'n je teedy ajcxy miiðtungmiiðpi etz je escribas ajcxy nixiiicy yajxiicy ajcxy Jesús ñayñimayí miñ xyipy:

—Jada Jesús ti cohua'ñ jacydyii jäy, e ca' jaty nej ci'm ñaygohua'ñiiyb. Pen janch, co jada Jesús yjējity je Cristo huuidibi rey'adamb ma yi judíojäy ajcxy, ymiið ixipy mic'ajt jaydēb ci'm yminagipy cruutzcíxy. Co jadu'n ixipy n'ixim co ci'm ti yminacy cruutzcíxy, huin'it miiðjicim co janch jada jējity je Cristo huuidibi rey'ajtp ma yi Israel jäy.

Nañ jadu'n je metz meetzpi ajcxy huuidibi cruutzpejt quipxy miið Jesús nixiiicy yajxiicy ajcxy je Jesús.

Co Jesús y'ögy

³³ Co ycuycxiiijy, chi ycoodzygyiday tüg'ócíy naaxhuiñ. E jadu'n je naaxhuiñ y'iity coodzixi minacyxii. ³⁴ Minacyxii Jesús mic yminañ miið aramaico ayuc:

—Eloi, Eloi, ¿lama sabactani? —yi jadu'mbi ayuc hue' yhuimbidzimy: Tat Dios. Tat Dios. ¿Na'amy co ti xy'ix'ixyich?

³⁵ Nijējity jäy huuidibi anajty jim yajpatp huingon ma Jesús, co midoo jadu'n ajcxy Jesús y'ayuc, chi ajcxy yminañ:

—Midoogix, Elías yi' yaaxtaayb.

³⁶ Chi nidügti ajcxy ninicxy Jesús poyígy, ti anajty yajxoogy pixy miið vinonii ta'mbi, e yajjijpxodziy je pixy ma tüg paxy, e jadu'n yajja'ty je vino nii ta'mbi ma Jesús y'ahuac, huen muucip je vino nii ta'mbi. Co jadu'n tuñ, chi yminañ:

—Tzoc oc'ahuixim pen mimb Elías, e miñ yajminagyii ma yi cruudz.

³⁷ Chi Jesús mic ycapxqueegy, chi y'o'cy. ³⁸ Co Jesús y'o'cy, chi je mapxhuit yciñtzhua'cxy tiná'amy huuidibi anajty miið y'adiyduñity je Dios ycuarto ma je teedy miiðtungmiiðpi ytiğy tüg tecypajc jimijt jimijt. ³⁹ Je soldado huindzin huuidibi anajty tinaayb ma Jesús yhuinduu, co jadu'n midoy nej Jesús mic yaaxqueegy, e ijxy nej y'ögy, chi yminañ:

—Janch co jadaayaabi yëydiŋc anajty Dios ung'adyii.

⁴⁰ Nañ jim anajty nijëjity töxyjäydjic ymij'ijxcixy jiguëgy. Jim anajty yajpaady María Magdalena, etz je jadügpí María, Jacobo je mutz'anägnip ytaj, etz José ytaj. Nañ jim anajty yajpaady Salomé. ⁴¹ Jadaayaabi töxyjäy ajcxy mähduidjít Jesús, e ti anajty pubéjtcixy taabi anajty Jesús yajpaady jim Galilea ñaaxjot. Nañ jadu'n anajty jim yajpaady jacnaagity töxyjäydjic ajcxy huídibi anajty ti ycoody jim Jerusalén quipxy miid Jesús.

Jesús yajnaaxtiğiyyii

⁴²⁻⁴³ Paady co chu'iiyñi hue' anajty viernes mina judíojäy ñayyajpocynñi huáatzigixy, jaydëb anajty amay'adaangixy je sábado xii je com jabom. Chi José huídibi anajty cogajp Arimatea yjotmictuñ, chi ytigüy ma je gobernador Pilato, pijctzooy may'ajt co yajnaaxtiğiñhuaani Jesús ñiniñx. E hue' je' José anajty tungmiid ma yi judíojäy ajcxy. José yjijp'ijxpy anajty mina Dios pidäga'n yi' y'ané'min ya naaxhuiñ. ⁴⁴ Pilato ooy tzachhuinmay co Jesús tim mic'amy ti y'ögy anajty, paady huodzooy je soldado huindzin, e tiy'ajt pijctzoy pen janch co Jesús ti anajty y'ögy. ⁴⁵ Co je soldado huindzin tiy'ajt yejcy co Jesús ti anajty y'ögy, chi nimay José co huen yajnaaxtiğiñhuipy Jesús. ⁴⁶ Chi José juy poob huit, e co yajminajcy Jesús ñiniñx, chi mo'n miid je poob huit, e chi pidacy ma tüg tzaajut huídibi anajty ti yajtzejtztüdy ti yajpadüdy ma tüg tzaahuinguetz. E chi yaj'adujcy je öcpi jut miid tüg mij tzaa. ⁴⁷ E je metzpi töxyjäy María Magdalena etz je jadügpí María huídibi José ytaj'ajtpy huindicxp anajty ajcxy co Jesús ñaaxtiğiyy.

16

Jesús yjugypicy jadüg'oc

¹ Com jabom jopy, domingo, chi je tugüg töxyjäy ajcxy María Magdalena, María Jacobo ytaj etz Salomé juy ajcxy tzooy huídibi ooy oy xuugy, pidägaangixy anajty ma Jesús ñiniñx. ² Je tugügpí töxyjäy chooñ domingo, semaan ixtigi', tim jopyñi. Ti anajty ypidzimni je xii co ajcxy oyjädy ma je öcpi jut. ³ Chi je tugügpí töxyjäy ajcxy nayñimaayi miñ xyipy:

—¿Pin xy'ocpubéjtim jigüñhuipy je mij tzaa huídibi miid agüiyity je öcpi jut?

⁴ Per co ajcxy ijxy je öcpi jut, chi ajcxy ijxy ahuingujc je mij tzaa anajty ytiguejcnäy huídibi je öcpi jut anajty agüydujcp. ⁵ Chi ajcxy ytigüy jutjoty. E chi ajcxy ijxy tüg yeeg'anäg iñäy anajty a'oy'amy ma je' ajcxy. E je yeeg'anäg poob huit anajty ymüd. Co ajcxy jadu'n ijxy je yeeg'anäg jüby jutjoty, chi je töxyjäy ajcxy ooy chigiyy. ⁶ Chi je yeeg'anäg nimay je töxyjäy ajcxy:

—Ca' ooy mdzigiyyigixy. Miich ajcxy je' m'ijxtaaygixp je Jesús huídibi cogajp Nazaret, je huídibi jäy ajcxy yajcruutzpejt. Ti je' yjugypicy. Ca' je' ya. Oc'ijxcix ya ma ajcxy pidaacci. ⁷ Níxcix, nimaaygix Pedro etz yi jacjadyii Jesús ydiscípulos ajcxy co Jesús níxcip jayijp jim Galilea, e jim Galilea ñaybadüyb ajcxy miid Jesús, jadu'n nej ajcxy ñimaayi jayijp'aty.

⁸ Chi je töxyjäy ajcxy jim yqueegy ma je öcpi jut, com ti anajty ooy chigiyyigixy. Ooy anajty ajcxy chiyuy miid tzig'iñ. E ni ca' ajcxy nimay ni pin nej anajty ti ijxcixy, com ooy anajty chigiyyigixy.

Jesús ñaygue'xici ma María Magdalena

⁹ Je domingo, semana ixtigi', co Jesús yjugypicy, chi ñayguëxici jayijp ma María Magdalena, je' je' je töxyjäy huídibi anajty Jesús ti yajpidzimi

huixtujc ca'oybi ma yjot yhuinma'ñ. ¹⁰ Chi María Magdalena ñicxy ma Jesús ydiscípulos ajcxy huidibi müid yhuidijty, e ñimaaygixy nej anajty yí' ti icy Jesús co ti yjugypicy jadüg'oc. E Jesús ydiscípulos ajcxy ooy anajty ytájycixy ymáygixy etz yaaxcixy. ¹¹ E co ajcxy midoohui je María y'ayuc, co anajty ti icy Jesús juugy, chi ca' ajcxy mijpidaaci y'ayuc.

Jesús nayguëxici ma metz ydiscípulos

¹² Co hueeñi, Jesús ñayguëxici nañ jadu'n ma metz je' ydiscípulos huidibi ñicxp anajty ajcxy camjoty. ¹³ Chi je metzpi discípulos ñicxy ajcxy mic'amy oy ñimaaygixy je jacjadyii discípulos ajcxy co ti ijxcixy Jesús. E je jacjadyii discípulos ca' ajcxy mijpidaaci je metzpi discípulos y'ayuc.

Huidi Jesús ydiscípulos yajnibjc

¹⁴ Jac com jecy, Jesús ñayguëxici ma je majtügpi discípulos ajcxy ma anajty y'ñaaygixy ma caydac. Chi Jesús ogy ajcxy co ca' ajcxy mibíjccixy co ooy ajcxy yjot yjuuñity, ca' ajcxy mijpidägy jacjadyii pin anajty ti y'íjxcixy Jesús. ¹⁵ Jesús je' ydiscípulos ajcxy ñimay:

—Ñicxcix miich ajcxy ma tüg'óciy naaxhuiñyjäy, ma tüg'óciy naax cajp, e capxhuäcxcix ajcxy je oybi ayuc nej jäy ajcxy jëb y'almanidzögipy. ¹⁶ Pinjaty mibijc etz ñiibejtcixy, ypaadip ajcxy y'almanidzoocin. Per, pinjaty ca' mijpidägy tiy'ajt hue' ajcxy y'alma tigoyip müid ypocy ycixpi. ¹⁷ Yi jäy ajcxy huidibi mibijcp, ooy ajcxy ijxpejt túngixipy. Müid iich nxii iich nmic'ajt yajpidzimipy ajcxy ca'oybi ma jäy ajcxy yjot yhuinma'ñ. Nañ jadu'n ycápngxixipy huingbi ayuc. ¹⁸ Ymadzipy ajcxy tza'ñ, e ca' nej yjájtcixipy. E co ajcxy veneno ügip, ca' ajcxy ypa'mduniib. E co ajcxy cñixájiipy pa'mjäy, tzögip je pa'mjäy.

Jesús ypätigüyñi tzajpjoty

¹⁹ E co je Huindzin Jesús ycapxy ycijxy müid je' ydiscípulos ajcxy, chi ypätigüyñi tzajpjoty. Jiiby tzajpjoty Jesús yajpaady ma Dios ymijc a'oy'amy, müid mij'ane'min. ²⁰ Chi Jesús ydiscípulos ajcxy chooñ ñicxcixy cajp cajp capxhuäcxy ajcxy Jesús y'ayuc ma nidüg'óciy naax cajp. E je Huindzin Jesús ooy ajcxy ypubejti ypudigiyyi, mic'ajt moy je' ajcxy müid je ijxpejt je mijhuinma'ñ huidibi ajcxy tumyb. Jadu'ñyi jadu'n. Amén.

SAN LUCAS

Jaayhu'i'my Jadu'n Nej Jesucristo Ytun Yjajti

1 Mayjäy ti cojaay je ayuc je tiy'ajt huidi ñich ajt nejhuüiyim co janch ytiy'ájtity, tüg'óciy jadu'n nej Jesús chondacy yjugy'ájtin ya naaxhuin ixti mabaad ycogixiyy. 2 Tüg'óciy je tiy'ajt jadu'n nej ajt xyñimaayim huidi ci'm ijx midou nej chondacy ixti mabaad ycogixiyy, je' ajcxy huidibi capxhuäcxy Jesús y'ayuc ytiy'ajt. 3 Ñich nañ jadu'n ti nyajciyöyich ti nyajtecyöyich yajxon je tiy'ajt nej Jesús chondacy je' chinaayin ya naaxhuin ixti mabaad ycogixiyy. Paady ycixpi ñich nhuinma'ñ pidägy co ñich miich nyajnijayihua'ñ tüg'óciy je tiy'ajt, miich oyjäybi, Teófilo. 4 Jigix miich nañ jadu'n mnejhuüihuipy yajxon je tiy'ajt, jadu'n nej miich ti m'ixpicy.

Tüg'ángel nigapxy co Juan el Bautista ypi'c'ada'ñ

5 Jadu'n ytuni yjajti co anajty Herodes yrey'aty ma Judea naax cajp, jim anajty tüg'judío teedy hue' anajty yxii Zacarías. Je' anajty semandumb müid Abías y'ajugytijc y'amigügtijc. Je Zacarías ypijcy müid Aarón y'ocniix, hue' je' anajty yxii Elisabet. 6 Dios y'ijxyp ñejhuüiyb co je' anajty ajcxy ytudägyjäyity nimetz. Je' ajcxy ycuydumyib tüg'óciy yi Huindzin Dios ycapxy y'ané'min. 7 Je' ca'p anajty ajcxy y'ung ni tüg, e jadu'n ajcxy ymiijäyñ nimetz.

8 Chi tügtecy Zacarías müid y'ajugy y'amigüg yteedy'ájticy anajty ma Dios ytijc. 9 Jadu'n nej teedy ajcxy ycostumbre müidity, chi ñigooti tung je Zacarías mina ypoomjogipy jilby ma yi Huindzin Dios ytijc. 10 Tüg'óciy je mayjäy ooy anajty Dios mibijctzoogixy tiba'y. Yam Zacarías tzajtigoty ypoomjocy, 11 co ñayquëxici Huindzin Dios y'ángel tüg ytinäy a'oy'amy ma je poomjocay. 12 Co Zacarías ijxy je ángel, chi ooy chigiyy. 13 Chi je ángel nimaay Zacarías:

—Ca' mdzigiy, ti Dios midooy yi mjuydácin mnucxtácin. Yi mdöxyijc Elisabet ypaadipy tüg ung yëdyijcpi, e mxiiimöhuipy Juan. 14 Mjotcujc'adip mxondägy miich etz mdöxyijc, nañ may yi jäy yjotcugihuiy co anajty m'ung ti ypi'c'aty. 15 Chi yi m'ung ycömay'ida'ñ ma Dios. Ni ca' ügipy vino ni jocni. Ma ca'ni anajty yma'xung'aty ymiid'adipy yi Dios yjihui'ñ ymic'ajt. 16 Yi' yajjothuimbidity may Israel jäy ma yi' ajcxy yHuindzin Dios. 17 Je' nixcy yocgapxy'aty ma yi jäy ajcxy huinmic jotmic müid Dios yjihui'ñ ymic'ajt, tim jadu'n nej Elías jecy'ajty yocgapxy'ajty huinmic jotmic müid Dios yjihui'ñ ymic'ajt. Je' m'ung yajjothuimbidity je ungdeedy ajcxy huidibi ca' y'ung ixaangixy, nañ yajjothuimbidity je jäy ajcxy huidibi ca' capxycöbicy yi Dios, jigix ajcxy paadipy oyjot oyhuinma'ñ. Nañ m'ung ñimähuiy je jäy ajcxy huen nayñi'ixiiyigixy müid yHuindzin Dios ycixpi.

18 Chi Zacarías nimay je ángel:

—¿Nej jada ñich nejhuüihuipy peni janch huidibi xyajnimaaaybich? Ti nmijjäyñiich, cham ndöxyijcich nañ ti ymiijäyñi.

19 Chi je ángel y'adzooy:

—Ñich Gabriel, ma Dios yhuinduu ni'ixi' n'ityich. Dios ti xyquexyich cogapxy'ajtpi ma miich co nyajnimähuiy jada oybi ayuc. 20 Jadachambi miich mhu'miipy uum, ni ca' m'ocjájtñip nej mgápaxipy, müid co ca' mmibicy jada ñich n'ayuc huidibi yajcuydunip co anajty tiempo patni.

²¹ Yam je mayjäy ooy ja'ahuñxcixy Zacarías, ooy anajty ajcxy tzachhuin-maaygixy ti co chachhuäcxipy jüiby ma Dios ytijc. ²² Co Zacarías ypídzimy, chi ca' anajty y'occapxni. Chi je jäy ajcxy huinjihuüy co ti anajty ixty tijaty jüiby ma Dios ytijc. Hue' je' yjacmíydacy a'ixi'y'amy, e oyhu'i'mi'y uum.

²³ Co je semandung yajmay, chi Zacarías ñicxni ma ytijc. ²⁴⁻²⁵ Co jadu'n yjaty, chi Elisabet jihuiy co ti anajty y'ung tzimígy ciyí gy. Chi yüch'ijty migoox po', e yminañ: "Jadu'n yi Huindzin Dios ti ytuñ müid ñich jadachambi tiempo, ti xyjäy mechich ti yajquëgy ñich ndzöydu'n ma yi mayjäy ajcxy."

Tüg ángel nigapxy co Jesús ypi'c'adañ

²⁶ Co tudujc po' maabi Elisabet anajty y'ungtzimígy, chi Dios quejxy je' y'ángel Gabriel jim Galilea naaxjot ma je cajp huidi anajty yxñ Nazaret.

²⁷ Chi Dios quejxy Gabriel ma anajty tüg töxy'anäg y'ity huidibi anajty ca'ni midzinäy yëydijc. Je töxy'anäg ti anajty co'adzoy co piga'ñ müid tüg yëydijc huidi yxñ José. José hue' anajty David y'ap y'oc. Je töxy'anäg hue' anajty yxñijty María. ²⁸ Co je ángel ytigüy ma anajty María, chi nimay:

—María, Dios ti xy'ijxtiy, je Huindzin Dios y'oy'ajt müid müich. Müich je' cömay y'idip ma tüg'óciy töxyjäydijc.

²⁹ Chi María co y'ijxy je ángel, chi chigüy müid je' y'ayuc, chi huinmay ooy müid jada copxpócxin nej co yjadu'ñity. ³⁰ Chi je ángel yminañ:

—María, ca' mdzigüy, müich Dios ti xy'ijxtiy. ³¹ Jadachambi, m'ungdzimígip, myajpi'c'adipy tüg mang, huidibi mxñmöhuiipy JESUS. ³² Je Jesús mij y'idipy, hue' je' yajtijpy Dios tzajpjoty y'ung. Chi je Huindzin Dios möhuiyb je ané'min huidi y' ymij'ap ymijteedy David ymüid anajty. ³³ Je Jesús ané'mip huinixñ ma yi Jacob y'ap y'oc. Je' y'ané'min camina ycixipy.

³⁴ Chi María je ángel nimaay:

—¿Nej jada co yjadu'ñity? ñich ca'ni nyëydijc müid tzinäy.

³⁵ Chi je ángel y'adzooy:

—Je Dios yjihui'ñ ymic'ajt minip ma müich, je Dios tzajpjoty ymic'ajtín xyajñidujttähuiip, je oyyäyb jäy huidi pi'c'adam, hue' yajtijpy Dios y'ung. ³⁶ E cham Elisabet müich m'amigüg nañ jadu'n yajpi'c'adamy tüg mang ma ti ymijjäyñyñi. Cham midudujc po'bi maabi y'ung tzimígy je huidibi jäy ytijpy ca' y'ung'ixaani, ³⁷ com müidi Dios ca'ni ti chípiy.

³⁸ Chi María yminañ:

—Jotcujc nguydunipyich yi Huindzin Dios chójcin, huen jadu'n tuñyii jadyii ma ñich jadu'n nej müich m'ayuc xymöyich.

Chi je ángel ñicxni.

María y'oy cogapxüy Elisabet

³⁹ Huin'it xñ María choñ, ñicxy jottigoy ma yugjot, ma tüg cajp jim Judea naaxjot. ⁴⁰ Chi ytigüy ma Zacarías ytijc, e capxpcxy Elisabet. ⁴¹ Chi jadu'n yjaty co Elisabet midoohui María ycapxpócxin, chi jihuiy co y'ung yücxxy ma yjot. E chi je Elisabet ooy yjotcugiy müid je Dios yjihui'ñ ymic'ajt. ⁴² Chi yminañ janch mic:

—Cömay müich ma tüg'óciy töxyjäydijc, e cömay y'ida'ñ m'ung huidibi pi'c'adamb. ⁴³ ¿Nej ñich jada co jadu'n ti n'ahuägüy co nHuindzinich ytaj miñ nxyco'ixi'yich? ⁴⁴ Co ti nmidooyich yi mgapxpócxin, ti ñich n'ung yücxxy ma ñich njot co chachjotcújty. ⁴⁵ Jotcujc'adip pinjaty ti ymbicy, co cuyduñ y'ida'ñ je ayuc müid je Huindzin Dios ycixpi. ⁴⁶ Chi María yminañ: Ooy mij n'ojadatyich yi Huindzin Dios.

- 47 Ooy nxondägyich m'iid Dios ycixpi, ñich nnihuambi nyajtzoocpi,
 48 co yi' ti xyñi'ljxcidägyich, co ñich ayoobi xytumbi'adyijich. Jadachambi etz jacnicxp xii tiempo, tüg'óciy jäy ajcxy oy mina'ñip co jotcujc'ájtpech.
 49 Yi Dios tügpajc m'ijip, tiñbi tun m'iid ñich, ooy yi' yxii ymijity.
 50 Dios ypa'ayooyb hueñyp'inity huidibi huindzigi'yip jadachambi etz jacnicxni xii tiempo.
 51 Dios ti ooy tuñ mijpi huinma'ñ, ti jñbicy pinjaty amij agix nayjihui'yip ma yjot yhuinma'ñ.
 52 Dios ti yajpidzimy yi mijpi rey ma y'ane'my, ti mij'ajt möy ayoobidijc.
 53 Pinjaty ayuu'ljtp anajty ymooy ti m'iid yjotcujc'adip, etz yi comeeñy'jäydijc ajcxy ti ixmach ca' ni ti.
 54 Dios ti pubety yi Israel jäy, yi' ajcxy ytumbi, m'iid co anajty ti pa'ayogoty je' ajcxy,
 55 jadu'n nej jecy'ajty Dios yajnimay je' n'ap ndeedy, je Abraham etz je'y'ap y'oc, co tunamb m'iid je' ajcxy huinxiñ.
 56 Chi María tugig po' jim y'ijty m'iid Elisabet, chi yhuimbijtni ma ytiç.

Juan el Bautista co ypi'c'ajty

- 57 Co je Elisabet oy yajhuaad'ajtni xii tiempo, chi yajpi'c'ajty tüg ymang.
 58 Chi ayuc midooy ajcxy je ymijün ymidijc etz y'ajugy y'amigüg jadu'n nej Dios may'ajt ti tuñ m'iid Elisabet. Chi ajcxy ooy yjotcugiy m'iid je' ycixpi. 59 Chi jadu'n yjaty co ductujc xii je ymijün ymidijc etz y'ajugy y'amigüg miñ ma Zacarías ytiç co anajty tiy'ajttihuaangixy je pi'c'anäg. Chi ajcxy yajxi'ada'ñyii anajty jadu'n nej yteedy yxii Zacarías. 60 Chi ytaj ymíñañ:
 —Ca' xii'adiyb Zacarías, hue' yi' huen xii'adyii Juan.
 61 Chi je' ymigügtijc ajcxy ymíñañ:
 —¿Na'amy? Ni tüg miich m'amigüg jadu'n ca' xii'ajty.
 62 Chi ajcxy y'amidoohui je' yteedy jadu'n a'ixiy'amy, nej yi' yajxi'ada'ñyii.
 63 Chi Zacarías pijctzoy tüg necy, e jaay jadu'n: “Juan huen xii'adyii.” Chi je ymigügtijc ajcxy nidüg'óciy ooy jihui'y huinmaay. 64 Chi mic'amy Zacarías y'ahuac ahuac'xycy e ytoodz yungiiy, chi oy ycapxígy e jäymejch cōmay yi Dios. 65 Chi tüg'óciy ymijün ymidijc ooy chigiiy. Chi ajcxy nimiydactay nej Zacarías ti yjaty ma tüg'óciy jäy huidibi tzinaayb Judea yuugjoty pi' tzinaaydac.
 66 Tüg'óciy pinjaty anajty midoob je ayuc, chi jäymejtzhui'm ajcxy ma yjot yhuinma'ñ, chi ñayñimáayigixy:
 —¿Ti jada' ytunamyb jada pi'c'anäg?
 Com je Huindzin Dios je' m'iid y'ity.

Je Zacarías y'iy

- 67 Chi je ungedeedy Zacarías m'iid je Dios yjihui'ñ ymic'ajt Dios y'ayuc najtzcaxiiyi ymíñañ:
 68 Cōmay yi Israel jäy yHuindzin Dios, co ti ni'ljxcidägy, ti cohua'ñ yi' ñaax ycajp,
 69 Dios ti quexy tüg mij nihuaambi yajtzoocpi, ma yi' ytumbi, David y'ap y'oc ajcxy.
 70 Com Dios jadu'n ymíñañ jecy'ajty m'iid yi' y'ayuc najtzcaxiiyb huidibi huätzjäyip;
 71 je' xyñihuánaanim ma ñich ajt nmidzip, nañ xypubedaanim xypudigihuaanim ca'ydi xycigähuiyim huidibi ca' xy'ixaanim xychogaanim.

- ⁷² Jaydēbi pa'ayoohuipy iich ajt nmij'ap nmijteedy, etz jāymedziyib jadu'n nej ayuc ahuaniiy mīid je' ajcxy.
- ⁷³ Jadu'n nej Dios janch huinijot y'ayuc ahuaniiy mīid iich ajt nmij'ap nmijteedy Abraham jecy'ajty huidi anajty xymōhuaanin.
- ⁷⁴ Co nihuātzi'ctuuim ma nmīdzip, huin'it jaydēbi miyaaxim n'ojadājitim ca' ma tzi'gi'ñ jihu'i'ñ.
- ⁷⁵ Mīid huātzhuinma'ñ etz tudāgy huinma'ñ ma yi' yhuinduu jabom jabom ixti mībaad ndzinaayim.
- ⁷⁶ Miich ma'xung, jāy hue' myajtijip mijpi Dios y'ayucnajtzcaxpiybi. Miich nīcxip cogapxy, nīcx yajni'ixi jāy mīid Huindzin Dios ycixpi.
- ⁷⁷ Yajni'ixi' yi cajpjāy jadu'n nej huaad ajcxy y'alma paadipy nihuaanin yajni'dzoocin, etz jadu'n nej huaad ajcxy ypocy huinmecxiyib.
- ⁷⁸ Jadu'n nej Dios iich ajt ti xypa'ayoohuim co ti xyñi'ijxcidaacim etz xymooyim tiicxin jājin huidibi tzomb tzajpjoty,
- ⁷⁹ jaydēbi yajmōhuipy jāy ajcxy Dios yti'y'ajt huidibi ajcxy tzinaayb agootz-tuum etz o'c jipp'am, jigix ajcxy xytūmooyim ma je tudāgy'pi tū'aa.
- ⁸⁰ Je pi'c'anāg yeeg yjodijy huinmic jotmic mīid yi Dios yjihui'ñ ymic'ajt. Chi chinaay adūgtuum ma ca' pīn, ixti cooni xii tiempo paty mīna nīcxipy cogapxy ma Israeljāy ajcxy.

2

Jesús yma'xung'ajty

¹ Huin'it xii Augusto César pidacy y'ané'min huen tūg'óciy jāy nīcxy necypejttaaygixy. ² Je jayijp'atypi padrón hue' je'yaj'oyiiy Cirenio huidibi anajty gobernador'ajtp jim Siria ñaaxjot. ³ Chi jāy ajcxy nidūg'óciy ñicxtay yajcojayyib; nidūg nidūg ma yci'mgajp. ⁴ Chi José chooñ jim Galilea naaxjot ma je cajp huidi yxii Nazaret, ñicxy ajcxy jim Judea naaxjot ma je David ycajp, huidi yxii Belén. Yi José ñicxy jim Belén com ymij'ap'ajtpy ymijteedy'ajtpy je David. ⁵ Chi José yajcojayyiy padrónjoty mīid María, je tōxyjāy huidibi anajty ymīid capxytuñ, huidi anajty ung tzim'ijtp. ⁶ Chi jadu'n yjajty co ajcxy anajty yjīmity Belén, chi oyhuaad'aty co María paadipy y'ung. ⁷ Chi yma'xung'ajty je ungoob, e chi nibe'ñ nīmūxy mīid ymotz, e chi agōgiy ma iyujc pēcxi'ñ, co ca' anajty ti paady jättac.

Je ángeles ajcxy etz je cōbixy cuend'ajtpi ajcxy

⁸ Chi mihuingon je cajp anajty jāy ycōbixy cuend'aty. Hue' anajty ajcxy yhuin'ñāayb huintzuumnajxyp je' ycōbixy ajcxy. ⁹ Chi Huindzin Dios tūg y'ángel ñigidaaci je' ajcxy, e yi Huindzin Dios y'oy'ájtin y'adixcoody jūhuidity ma je' anajty ajcxy ymijc, chi ajcxy ooy chigiyy. ¹⁰ Huin'it je ángel yminañ:

—Ca' mdzigiyygixy, cham iich miich nyajni'maaygixy oybi ayuc huidibi yajjotcugihui'py tūg'óciy naax cajp. ¹¹ Mīid miich ajcxy ycixpi ti ypi'c'aty cham ma je David ycajp tūg jāy huidibi miich ajcxy xyñihuānaam xycōhuānaam ma ajcxy mmīdzip. Hue' je' je CRISTO, je Huindzin Dios. ¹² Yi' je' iixpējt'ip huidi mīid m'ijxcabipy. Mbáadipy ajcxy je ung ma'xung ñimōchity mīid ymotz, ycōcnāy ma iyujc pēcxi'ñ.

¹³ Chi janch mic'amy ñayguēxici mīid je ángel may yi tzajpjoty chinaaybi, chach Dios ojadājtixy ymināangixy:

¹⁴ ¡Ooy ycōmāyity ooy ymijity yi Dios tzajpjoty'pi, ji naaxhuñ jotcuje'ajt mīid jāy ajcxy ycixpi huidibi Dios yjāygidacpy!

15 Jadu'n yjajty co je ángel ajcxy ñicxtay tzajpjoty, chi je cöbixy cuend'ajtpi ajcxy ñayñimayi:

—Tzoc jámim jim Belén, jaydëbi n'íxam ti ti ytunyii ti yjadyii huídibi nHuindzin'ájtım Dios ti xyajnimáayım.

16 Chi ajcxy ñicxy jottigoy, chi oy pátcixy María, José etz je ung ma'xung y'agögüity ma je iyujc pëcx'iñ. 17 Co ajcxy ijxy je María etz je ung ma'xung, huin'it ajcxy nigapxtay nimydactay jadu'n nej je ángel ajcxy ñimayi mïid je pi'c'anäg ycixpi. 18 Tüg'óciy jáy huídi midou ooy jihuıy huınmay jadu'n nej je cöbixycuend'ajtpi ajcxy ymınañ. 19 Chi María mido'mbijctay, e yajhuı'my ma yjot yhuınma'ñ. 20 Chi yhuımbijty je cöbixycuend'ajtpi ajcxy cömay jáymech ajcxy yi Dios, etz ooy alabanza ajcxy iıy mïid Dios ycixpi mïid tüg'óciy jadu'n nej anajty ti íjxcıxy ti midóogıxy, etz jadu'n nej anajty ti ñimáayıgıxy.

Pi'c Jesús yajcapxquëxıgy ma Dios ytıjc

21 Coductujc xıi maabi anajty yma'xung'aty, huin'it je' ajcxy tiy'ajttıy je ung ma'xung. Chi ajcxy yxımoy JESUS, jadu'n nej je ángel anajty jayıjıy ti ymınañ ca'ni anajty chimıgyıı ycıyıgyıı.

22 Co je xıi oypaatni mına je María anajty yhuätzpidzımaamni, jadu'n nej Moısés ycötújcin je jécyıy ymınañ. Chi ajcxy mıidnicxy je ung ma'xung jim Jerusalén capxquëxıgaangıxy ma yi Huindzin Dios yhuınduu. 23 Com jadu'n anajty yjaybétyıty ma Huindzin Dios ñecy:

Tüg'óciy unngoob yéydıjcpı huıdi ma'xung'ajtp, abıcy yhuı'mıpy mïid je Huindzin Dios ycixpi.

24 José etz María oy yéjccıxy huındzıgı'ñ jadu'n nej Huindzin Dios ñecy ymınañ co jëbi yecy metzc jam muuxy o pajctza'm muuxy.

25 Jim Jerusalén anajty chinäy tüg jáy huıdi anajty yxıi Simeón, tudägyjäy je', etz ooy Dios jáymech. Simeón y'ahuijxyp anajty mına Dios miñ yajjotcujc'ada'ñ Israeljäy ajcxy, e mïid je' anajty Dios yjihuı'ñ ymic'ajı. 26 Dios yjihuı'ñ ymic'ajı ti anajty yajnejhuıyıı co ca' chojc óga'ñ, jayıjpnı oc'ixıpy je Huindzin Dios yCristo. 27 Je Dios yjihuı'ñ ymic'ajı yajmin yajmejtzi Simeón yhuınma'ñ huen nicxy ma Dios ytıjc; huin'it Jesús ytaj yteedy ymıidnicxi ma Dios ytıjc, cuyduñ ajcxy jadu'n nej Dios ñecy y'ane'my. 28 Chi Simeón tchendzoy etz capxpaady je ung ma'xung, e chi Dios mıbijctzoy mïid je' ycixpi, chi ymınañ:

29 Jadachambi capxcıx jotcujc, Huindzin Dios, mïid iıch miıch mdumbı, com ti mguyduñ jadu'n nej ti xyñimäyich co n'ixıpyıch je Cristo.

30 Cham ti n'ixyıch je nihuambi cohuambi,

31 huıdibi ti mni'ixıy ma tüg'óciy jáy ajcxy yhuınduu.

32 Jada ung ma'xung ytıy'ajı yegıy ma yi jáy ajcxy huıdi ca' yjudıojäyıty. Jadu'n yi' nıpaady nej tüg jıın huıdi codııcxp je jáy. Cömay y'ıdıpy yi Israel jáy mïid yi' ycixpi.

33 José etz Jesús ytaj ooy jihuıy huınmaay jadu'n nej Simeón ñıgapxy je pi'c ma'xung. 34-35 Chi Simeón conuucx yi' ajcxy, e ñımay María, Jesús ytaj:

—Jadayaabi pi'c'anäg hue' jada aminıy co may Israel jáy yjothuınma'ñ yaj'oyıhuıpy mïid yi Dios etz nañ jadu'n may Israel jáy yjothuınma'ñ ca' yaj'oyıhuıpy mïid yi Dios. Yi' je' tüg ijxpejt co ca' jáy y'ixa'nıyb choga'nıyb, e jadu'n tüg'óciy yajnejhuıhuıpy nej ajcxy nidüg nidüg yjothuınma'ñ mııdıty. E miıch m'ıdıpy jotmaymıid jadu'n nejihuıy tüg espada ti xyajtzaachıy.

36-37 Nañ jim Jerusalén anajty tüg töxyjäy huídibi anajty yxii Ana, Dios je' anajty y'ayucnajtzcaxiiybi. Fanuel anajty yteedy'ajtpy, hue' je' Aser y'ap y'oc, mij jäy anajty ooy. Janch mutz'anägni ypijcy e jeyi huixtujc jimijt chinay müid yña'y, mada'px mídaax jimijt anajty cujc co'ögy chinäy, e ca' anajty ytigoy'ity ma Dios ytijc. Ana ytumb anajty tzajtigoty xim tzuum jopy ayuu anajty ycapxtägy. 38 Chi Ana nimiñ José etz Maria jiiy ma Dios ytijc, e quipxy müid ajcxy huingapxtacy je Huindzin Dios. Chi je Ana nimiydacy je pi'c Jesús müid tüg'óciy jäy jim Jerusalén huídi anajty ajcxy jipp'ijxp mina Dios cohua'na'n Jerusalén ma ymidzip.

Co ajcxy nicxni jim Nazaret

39 Co oy yajcuydundäy tüg'óciy jadu'n nej je Huindzin Dios ñecy ymina'n, chi José etz Maria ñicxcixni jim Galilea ma ajcxy yci'mgajp Nazaret. 40 Je pi'c Jesús anajty yeegy mic ooy müid huijy'ajt cujc'ajt, etz ymüid je' Dios ymay'ájtin y'oy'ájtin.

Je pi'c Jesús yajpaady ma Dios ytijc

41 Jimijt jimijt yi undaj undeedy ñicxy anajty ajcxy jim Jerusalén co anajty je Pascua xii paady. 42 Co Jesús anajty ymajmetzjimijt'ajty, chi ajcxy ypättigiiy jim Jerusalén jadu'n anajty ajcxy costumbre müidity co xii paady. 43 Co je xii ñaxtäy, chi ajcxy huimbjíticxni, e Jesús yhui'müiy je' jim Jerusalén. Ca' José etz ytaj nejhuüiy ajcxy co ti anajty yhui'müiy. 44 Hue' ajcxy anajty tijj je' ymiñ axaam müid ymigügtijc. Co tüg xii yöyigixni, chi ajcxy itxay je' y'ung ma y'amigügtijc ajcxy, etz huídi müid ñay'ixy'adyii ñaymigü'g'adyii. 45 Co ca' ajcxy y'ung paady, chi yhuimbjíticxni jim Jerusalén ung ixtaaybi.

46 Chi jadu'n yjajty codugüig xii oypaatcixy jim ma Dios ytijc, Jesús y'ñäy anajty agujc'amy ma je huindzindijc. Yi' anajty y'amido'ijtyp yi huindzindijc y'ayuc, e nañ yaj'amidooy anajty tijaty. 47 Tüg'óciy je huindzindijc huídibi müdou Jesús y'ayuc, chi ooy ajcxy huinmay etz jihuiy jadu'n nej je Jesús huinjihuidäy etz jadu'n nej anajty tiydudägy y'adzooy. 48 Co Jesús ytaj yteedy y'ijxpati, chi ooy ajcxy tzachjihuiy. Chi undaj yminañ:

—Aay ung, ¿nej co müich jadu'n xytúngixyich? Yi mdeedy etz ich yam tzachjottigooyb nay'adzigiijich n'ixtáaygixich müich.

49 Chi Jesús y'adzooy:

—¿Na'amy co müich xy'ixtáaygixyich? ¿Ca' mnejhuüygixy co copity n'ida'ñich ma nDéedyich ytung?

50 Chi ajcxy ca' huinjihuiyi Jesús y'ayuc huídibi ycapxy.

51 Chi Jesús müid nicxy je' ajcxy jim Nazaret. Chi Jesús capxymidooy ytaj yteedy. Chi yi' ytaj yajhui'mday ma yjot yhuinmañ tüg'óciy nej ytunyi yjadyii. 52 Chi Jesús ixpijc'adittp anajty ooy, etz yeegy yjáygojy huijycujc. E yi Dios etz jäy ajcxy ooy anajty jäydaaccixy.

3

Juan el Bautista y'ayuccapxhuäcxy mjtig'iduum

1 Ma anajty je Tiberio César yjimijtjoty, mimajmocx jimijt anajty maabi y'ane'mtigüy, chi je Poncio Pilato anajty gobernador'ajtp jim Judea, je Herodes anajty rey'ajtp jim Galilea, je' y'uch Felipe anajty rey'ajtp jim Iturea etz jim Traconite ñaaxjot. Chi Lisaniás anajty rey'ajtp jim Abilina. 2 Chi je Anás etz Caifás je' ajcxy anajty teedy mjtungmüid ma Dios ytijc. Je huin'it tiempo Dios y'ayuc yja'ty ma je Juan, Zacarías ymang, huídibi anajty

tzinaayb mǝjtigǝduum. ³ Chi Juan choñ ñicxy ma tǝg'ócxy cajp mǝhuington je Jordán mǝjnǝ, capxhuijy je jāy ajcxy, co huen jothuimbǝjttaaygǝxy etz huen ñǝbejtcǝxy jǝgǝx ajcxy ypocy yajhuinmeecǝp. ⁴ Jada jadu'n tunǝ jajtǝ nej je ayucnajtzcaxǝybi Isaias anajty tǝ cojaay:

Jim mǝjtigǝduum yajmidooy tǝg jāy minañ: “Yaj'oyǝyǝgǝxy yǝ Dios ytǝ'aa, tim jadu'n nej jāy ajcxy yaj'oyǝyǝgǝxy yǝ jǝbic tǝ'aa co tǝg rey minañ.” Yajtǝyǝgǝxy yǝ tǝ'aa huǝdǝbi ooy y'adǝjy y'a'och.

⁵ Tǝg'ócxy anǝ ahuoc huen joyǝydǝy, tǝg'ócxy tungop huen nañ jadu'n joyǝydǝy. Tǝg'ócxy ñǝ'aa tǝ'aa huǝdǝbi tǝjmin tǝjxǝj p huen tǝyǝdǝy. Yǝ tǝ'aa huǝdǝbi ca' quǝpxyǝjaty huen quǝpxyǝjaty tǝyǝdǝy.

⁶ Tǝg'ócxy yǝ jāy ajcxy ixǝpy ñǝjhuǝǝpy nej Dios yega'ñ je ñihuambi cohuambi.

⁷ Chi Juan ojy ajcxy je jāy pǝnjaty anajty miimb ñǝbejtpǝ, yminañ:

—ǝMiich ajcxy tza'ñ ajcxy y'ajugy y'amǝgǝg! ¿Pǝn miich ajcxy tǝ xynǝmǝy quǝg ma yǝ ayo'n huǝdǝbi Dios yquexaamy? ⁸ Tǝngǝx oybi, jothuimbǝjtǝx, ca' ajcxy minaangǝxy mǝñ xyǝpy: “Abraham ñǝch ajcxy n'ap'ajtpy ndeedy'ajtpy”. ñǝch miich ajcxy nǝmaayb co Dios ixǝtǝ jǝbi yǝ' yaj'ung'adyǝ yaj'anǝg'adyǝ Abraham jada tzaa ca'yǝdǝ miich ajcxy. ⁹ Dios nǝ'ixǝ y'ity jaydǝbi yajcǝdǝgoyǝpy jāy ajcxy y'alma huǝdǝbi jǝbic-huinma'ñ mǝd. Tim jadu'n nǝpaady nej jāy nǝ'ixǝ y'ity mǝd jacha co pujǝgǝ'ñ tǝg quǝpy huǝdǝ ca' oy yǝm'aty, etz yajnoǝgǝhua'ñ.

¹⁰ Chi je mayjǝy ajcxy y'amǝdooy je Juan:

—¿Tǝ ñǝch ajcxy jǝbi nduñ?

¹¹ Chi je Juan y'adzooy, yminañ:

—Pǝnjaty yhuǝt mǝd metz, jaydǝbi mǝy pǝn ca' mǝdity ni tǝg. Etz pǝnjaty caagy mǝd nañ jadu'n mǝhuǝpy pǝnjaty ca' mǝdity.

¹² Chi miñ jadyǝ yajcǝgǝjtpǝ co anajty ñǝbedaangǝxy, yminañ ajcxy:

—¿Tǝ huaad ñǝch ajcxy nduñ (jǝgǝx Dios xymǝjotcujc'adǝpyǝch)?

¹³ Chi Juan y'adzooy:

—Ca' nǝgǝ anaxy myajcǝgǝyety jadu'n nej je cǝtǝjǝn y'ane'my.

¹⁴ Chi soldado ajcxy yminañ:

—¿Tǝ ñǝch ajcxy ndunǝpy (jǝgǝx Dios xymǝjotcujc'adǝpyǝch)?

Chi Juan y'adzooy:

—Ni pǝn ajcxy tǝ mgapǝjǝpy, ni mganǝhuambǝdǝpy ajcxy. Nañ jadu'n mǝjotcujc'ajtcǝxy nej myajmujyuyǝgǝxy.

¹⁵ Je mayjǝy yǝjǝ'ixyp anajty ajcxy ooy, etz ooy jǝhuǝy huinmaay ñǝjhuǝhuaangǝxy pǝn yǝ Juan je' anajty Cristo. ¹⁶ Chi Juan nǝmay ajcxy nidǝg'ócxy:

—ñǝch janch nyajñǝbedǝjtpǝch jāy mǝd ñǝ. Miimb je' axaam huǝdǝbi jacmǝj ca'yǝdǝ ñǝch, ca' huaad yǝ' yǝgǝhuin ngejǝch. Je' miich ajcxy xyajñǝbedǝpy mǝdǝ Dios yǝjhuǝ'ñ ymǝc'ajt etz mǝdǝ jǝn. ¹⁷ Je Cristo nǝ'ixǝ y'ity co oybi mǝhua'ñ je jāy huǝdǝbi ajcxy oyhuinma'ñ mǝd, etz ymǝhuaamy tzaachypǝ je jāy ajcxy huǝdǝbi jǝbic-huinma'ñ mǝd, tzaachypǝ huǝdǝbi ñicamǝna yǝcǝpy. Tim jadu'n nǝpaady nej tǝg jāy nǝ'ixǝ y'ity co ymoc-huimboja'n, e chi je oybi mocpǝj pǝdǝgǝ'ñ ma che'x, etz je mocjaam ninǝgǝhua'ñ, e camǝnaxǝ ycapǝdza'ñ je jǝn.

¹⁸ Je Juan ooy jāy capxhuijy, etz canaagnax oybi ayuc capxhuǝcxy. ¹⁹ Chi yǝ' ojy je rey Herodes, co y'uch Felipe ytǝxyjǝ Herodǝs mǝd tznayǝ, etz jacjaydǝybi jǝbic-huinma'ñ tǝbi Herodes anajty tuñ. ²⁰ Chi je rey Herodes nǝgǝ pocytuñ co Juan pǝdacy pujǝxtǝgoty.

Je Jesús ñǝbejtin

11-22 Chi jadu'n yjajty co jadu'n tüg'óciy jäy ñiibejtay nañ jadu'n Jesús ñiibejty. Yam anajty Jesús ycapxtägy co je tzajp y'ahuaach, etz je Dios yjihui'ñ ymic'ajt yminajcy ma Jesús ycóduu miid ñinicx jadu'n nej muuxy ñinicx. Nañ jadu'n yajmidoy tüg ayuc choñ tzajpjoty yminañ:

—Miich n'ung'ajtpy, ooy ñch miich ndzocy ooy njihuüy, ooy njotcújcidyich miid miich.

Jesús ymij'ap ymijteedy

²³ Jesús hue' anajty yjimajt oy ni iipxmajc co ytungtigiüy. Hue' je' anajty jadu'n jäy tijy José ymang, José yteedy hue' je' Eli, ²⁴ Eli yteedy hue' je' Matat, Matat yteedy hue' je' Levi, je Levi yteedy hue' je' Melqui, je Melqui yteedy hue' je' Jana, je Jana yteedy hue' je' José, ²⁵ Je José yteedy hue' je' Matatías, je Matatías yteedy hue' je' Amós, je Amós yteedy hue' je' Nahum, je Nahum yteedy hue' je' Esli, je Esli yteedy hue' je' Nagai, ²⁶ je Nagai yteedy hue' je' Maat, je Maat yteedy hue' je' Matatías, je Matatías yteedy hue' je' Semei, je Semei yteedy hue' je' José, je José yteedy hue' je' Judá, ²⁷ je Judá yteedy hue' je' Joana, je Joana yteedy hue' je' Resa, je Resa yteedy hue' je' Zorobabel, je Zorobabel yteedy hue' je' Salatiel, je Salatiel yteedy hue' je' Neri, ²⁸ je Neri yteedy hue' je' Melqui, je Melqui yteedy hue' je' Adi, je Adi yteedy hue' je' Cosam, je Cosam yteedy hue' je' Elmodam, je Elmodam yteedy hue' je' Er, ²⁹ je Er yteedy hue' je' Josué, je Josué yteedy hue' je' Eliezer, je Eliezer yteedy hue' je' Jorim, je Jorim yteedy hue' je' Matat, ³⁰ je Matat yteedy hue' je' Levi, je Levi yteedy hue' je' Simeón, je Simeón yteedy hue' je' Judá, je Judá yteedy hue' je' José, je José yteedy hue' je' Jonán, je Jonán yteedy hue' je' Eliaquim, ³¹ je Eliaquim yteedy hue' je' Melea, je Melea yteedy hue' je' Mainán, je Mainán yteedy hue' je' Matata, je Matata yteedy hue' je' Natán, ³² je Natán yteedy hue' je' David, je David yteedy hue' je' Isaí, je Isaí yteedy hue' je' Obed, je Obed yteedy hue' je' Booz, je Booz yteedy hue' je' Salmón, je Salmón yteedy hue' je' Naasón, ³³ je Naasón yteedy hue' je' Aminadab, je Aminadab yteedy hue' je' Aram, je Aram yteedy hue' je' Esrom, je Esrom yteedy hue' je' Fares, je Fares yteedy hue' je' Judá, ³⁴ je Judá yteedy hue' je' Jacob, je Jacob yteedy hue' je' Isaac, je Isaac yteedy hue' je' Abraham, je Abraham yteedy hue' je' Taré, je Taré yteedy hue' je' Nacor, ³⁵ je Nacor yteedy hue' je' Serug, je Serug yteedy hue' je' Ragau, je Ragau yteedy hue' je' Peleg, je Peleg yteedy hue' je' Heber, je Heber yteedy hue' je' Sala, ³⁶ je Sala yteedy hue' je' Cainán, je Cainán yteedy hue' je' Arfaxad, je Arfaxad yteedy hue' je' Sem, je Sem yteedy hue' je' Noé, je Noé yteedy hue' je' Lamec, ³⁷ je Lamec yteedy hue' je' Matusalén, je Matusalén yteedy hue' je' Enoc, je Enoc yteedy hue' je' Jared, je Jared yteedy hue' je' Mahalaleel, je Mahalaleel yteedy hue' je' Cainán. ³⁸ je Cainán yteedy hue' je' Enós, je Enós yteedy hue' je' Set, je Set yteedy hue' je' Adán, je Adán yteedy hue' je' Dios.

4

Je mujcu' tuñ ijxta'ni ma Jesús

¹ Jesús ymiid'ajtpy anajty je Dios yjihui'ñ ymic'ajt. Co Jesús jim choñ ma Jordán mij ñi, chi je Dios yjihui'ñ ymic'ajt yajnicxi mijtigiduum. ² Jesús y'ijty huixchigui'px xii jim mijtigiduum. Chi je mujcu' yjot'ijxi huinma'ñ'ijxi. Jaygay jim y'ijty, e co huixchigui'px xii ñajxni, chi oy yuuböccodyii. ³ Chi je mujcu' nimay:

—Peni janch miich Dios xy'ung'adyii, nımay jada tzaa huen ahuimbity tzajcaagy.

⁴ Chi Jesús y'adzooy:

—Jaybety ity ma Dios ñecy co ca'nan mıid tzajcaagy ti'ajty jäy ajcxy yjugy'aty, nañ jadu'n tzocy tüg'óciy Dios y'ayuc.

⁵ Chi je mujcu' mıidpejty Jesús ma tüg cop janch cıxpi, chi tüg jaxıgy yajni'ixııy tüg'óciy je naax cajp huıdı jıı naaxhuıfıı. ⁶ Chi je mujcu' ymınañ:

—İich miich möhuıpy tüg'óciy mic'ajtin ané'mın etz oy'ajtin, com ĩch ngı'am y'ity tüg'óciy, e nmöhuıbıch hueñyimpıııty. ⁷ Pen xyhuıngoxtınaaybıch xy'ojadajtpıch miıch, ac miıch jada mje' tüg'óciy.

⁸ Chi Jesús y'adzooy, ymınañ:

—Huınhuägtuutcıch miıch mujcu', com jadu'n jaybéty y'ity: “Co yi Huındzın miıch mDios mhuingoxtınaıhuıpy m'ojadadıpy, etz yi' je' tüg pajc myajmıj'adıpy.”

⁹ Chi je mujcu' mııdnıcxıy Jesús jım Jerusalén, chi mııd pejty ma Dios ytıj codu, e nımay:

—Pen Dios miıch xy'ung'ajtp cödıjpnax naaxcıxy, ¹⁰ com jaybety jadu'n y'ity ma Dios ñecy co quexıpy Dios yi' y'áıgeles ajcxy e xycuend'adıpy. ¹¹ Cıgıxy ajcxy xyhuıdzıpy, ca'ydı mdzaachıy ma tzaajot.

¹² Chi Jesús ymınañ:

—Jı Dios y'ayuc huıdı jadu'n mınam co ca' mjot'ixıpy mhıınma'ñ'ixıpy yi mHuındzın Dios.

¹³ Co je mujcu' yajcıxy jadu'n nej anajty jot'ıxa'ñ huıınma'ñ'ıxa'ñ Jesús, chi huınhuägtuuty tüg tiempo.

Jesús yajtzondägy je' ytung jım Galilea

¹⁴ Chi Jesús nıcxıy jım Galilea, e Jesús mııd'ajtpy je Dios yjihui'ñ ymic'ajt. Chi Jesús ooy cömay y'ıjty ma tüg'óciy cajp huınduy agonbı. ¹⁵ Hue' Jesús anajty yaj'ıxpcıy majaty je' ajcxy naymujctac. Chi je jäy ajcxy tüg'óciy ooy cömay Jesús.

Jesús yajpaady jım Nazaret

¹⁶ Chi Jesús ymııñ Nazaret ma anajty ti yeegy. Chi Jesús ytıgyı ma naymujctac, jadu'n nej costumbre anajty mııdıty pocxxııduum. Chi ytınaay'ahııy, chi ytıgyıy necycapxpi. ¹⁷ Chi ajcxy mooy je necy huıdıbı je Dios y'ayucnajtzcapxııybı İsaías yjaay. Chi cıyhuäcxıy je necy, paty jııby tüg it ma anajty yjaybétyıty jadu'n:

¹⁸ Je Huındzın Dios yjihui'ñ ymic'ajt xymııd'ajtpıch, co xyajniıbcıyıch co nyajniımahııbıch ayobıtıjı je oybı ayuc. Ti xyquexyıch co nya-jjotcugıhuıbıch je jäy ajcxy huıdı jotmay ymııd, etz nhuınméecıxbıch huıdıbı ajcxy pujxtıgötyıpy, nañ jadu'n ajcxy je huıdıbı huııntzıpy nya-jhuındıcxıgıbıch, e nbıdägıbıch ahuätztuum huıdıbı yajtzaachytumb.

¹⁹ Ti xyquexyıch co ngapxhuäcxıbıch je tiempo mına Huındzın Dios may'ajt oy'ajt tuna'ñ mııd je jäy ajcxy ycıxpi.

²⁰ Chi jada' Jesús abıdıjty je ñecy, yajcıdıgyı je tungmııdpi, huıın'ıt y'ıxtacy. Chi tüg'óciy mayjäy jııby ma naymujctac ooy ajcxy huındıcxıy je Jesús. ²¹ Chi Jesús ymıınandacy:

—Cham yajcuydun je' huıdı jaybety ma Dios ñecy jadu'n nej miıch ajcxy cham ti mııdıooy.

²² Chi nidüg'óciy ajcxy ooy jäygidacy nej Jesús mīna'ñ, etz huinmay ajcxy ooy je ayuc huidibi Jesús ycapxy, chi ñayñimáayigixy:

—¿Nej ca'y José jada jada' y'ung?

²³ Chi Jesús ymīnaañ:

—Ca' yjécyty miich ajcxy xyajnimähuibich jada ayuc: “Tzoydumbi naychoyihuñ ci'm. Tüg'óciy jadu'n nej ich ajcxy nmidooyich ti mduñ jim Capernaum, nañ jadu'n miich octun ma mgi'mgajp.”

²⁴ Chi Jesús yjacmīnañ:

—Janch ich miich ajcxy nnimäy co ni tüg jäy huidibi Dios y'ayucnajtzcaxxiyb ca' jäy ajcxy cöbicy ma yci'mgajp. ²⁵ Janch ich miich ajcxy nimäy co ooy anajty may co'ögy ytöxyjäy ya Israel jecy'ajty co Elías chinay, co je tzajp adujcy tugig jimjt jatudujc po', co oy yuu miñ ma tüg'óciy naax cajp. ²⁶ E Dios ca' quejxy je Elías ma yi Israeljäy co'ögy töxyjäy ajcxy. Hue' janch quejxy huinduum jim Sarepta ma Sidón naaxjot ma tüg co'ögy töxyjäy huidi jim. ²⁷ Nañ jadu'n anajty ooy mayjäy püdz pa'm müidity ya Israel jecy'ajty co je Dios y'ayucnajtzcaxxiybi Eliseo chinay. Chi ni tüg jäy huin'it catzoocy, jéyi tügpaic choocy pa'mjäy huidibi anajty yxi Naamán huidi tzoon Siria naaxjot.

²⁸ Huin'it tüg'óciy jäy huidi anajty jüby ma naymujctac ooy yjotma'tcoty co jadayaab ayuc ajcxy midooy. ²⁹ Chi je mayjäy ajcxy nibidígy Jesús etz yajpidzimy ma je cajp. Chi ajcxy yajnicxy jim ma je tzaahuingueetz, co je cajp copcíxy anajty yajpaady, e jim anajty cödiipnaxaangixy. ³⁰ Chi Jesús ñajxy cujc'amy ma je' ajcxy, chi ñicxni.

Tüg yéydjic huidibi anajty müd jibic espíritu

³¹ Chi Jesús y'idacy jim Capernaum, tüg cajp jim Galilea naaxjot, chi Jesús jäy ajcxy yaj'ixpijcy pocxxiiduum. ³² Huinmay ooy ajcxy jadu'n nej je' yaj'ixpijcy. Ñayñimáayigixy co je Jesús yaj'ixpijcy nejihuñy mijtung mij'ané'min müidity.

³³ Jüby ma je naymujctac jüby anajty tüg yéydjic huidibi müd tüg ca'oybi, chi je ca'oybi mic yaaxqueecy ymīnañ:

³⁴—Ixmajtcich ajcxy, ¿ti mdunamy müd ich ajcxy Jesús je nazaretpi? ¿Nej ti mmiñ co xyajhuindigoyáanigixyich? Ich miich n'ijxcapy co miich je' je Huätzpi Dios.

³⁵ Chi Jesús je ca'oybi ooy, nimay:

—Amon, pidzim ma yi jäy.

Chi je ca'oybi najztijjy je yéydjic agujc'amy ma je jäy ajcxy, huin'it ypidzimy, e ca' ni nej jactuñ. ³⁶ Tüg'óciy jäy jim ooy ajcxy ñay'adzigiñyi miñ xyipy yjanayñimáayigixy:

—¿Ti ayuc jada' yi'? Co müd y'ané'min etz mic'ajt ane'my ca'oybi etz yajpidzimy ma jäy.

³⁷ Chi Jesús capxpaady y'ijty ma tüg'óciy cajp huidi huinduy agónip.

Jesús yajtzoocy Pedro ymüd töxyjäybi

³⁸ Chi Jesús ypidígy choñ ma naymujctac, ytigñy ma Simón ytijc. Jadu'n anajty Simón ymüd töxyjäybi mic ytoyii. Chi ajcxy cohuanñy Jesús müd je' ycixpi. ³⁹ Chi Jesús yhuindacy ma je' yhuinduu, ix'ojy je toyii, e jadu'ñi ñajxy. Chi je' mic'amy ypidígy, yajcay yaj'uucy ajcxy.

Jesús yajtzoocy mayba'mjäy

⁴⁰ Tzuu tzuu anajty jäy ajcxy yajnicxy tüg'óciy jäy ajcxy pa'mmüdpí ma Jesús. Chi Jesús cínixajy nidüg nidüg, e jadu'n anajty ajcxy chögy. ⁴¹ Chi nañ jadu'n je' ca'oybi yajpidzimy ma mayjäy, mic je ca'oybi anajty yhua'nñ yjihuíy, ymina'nñ:

—Miich je' Dios xy'ung'ajtp.

Chi Jesús nīgi ix'ojy, ca' anajty yajhuäcxipy nicxy yjaccapxy, com ti anajty nejhuüygixy co yi' je' je Cristo.

Jesús y'ayuccapxhuäcxy jim Galilea

⁴² Co yxüimüy, chi chooñ Jesús, ñicxy mjtigüduum. Ooy jäy yja'ixtäyüi, chi ajcxy oy paatcixy, yajhuäcxijpy ajcxy ooy, ca' anajty oc'ixmadzáangixni. ⁴³ Chi Jesús ymina'nñ:

—Ooy jada chachcopícyity co canaag agajp iich jada ngapxhuäcxibich je oybi ayuc jadu'n nej Dios y'ane'my. Paady Dios ti xyquexyich ya naaxhuüñ.

⁴⁴ Jadu'n anajty je' capxhuäcxy majaty jäy ñaymujctac jim Galilea.

5

Je acxmajtzin mijhuinma'ñybi

¹ Tügtecy jadu'n yjajti, jim anajty Jesús ma je Genesaret mejypa', co jäy ñimiini janch ñay'adijüy ñay'agodiüygixy, tzach'amidohuaangixy Dios y'ayuc. ² Chi yi' ijxpaty mejtz barco jahueengi mejypa'áy. Je acxmajtzpidjic ti anajty ypidzimgixy ma je barco, jim anajty y'acxuumy püjccixy. ³ Chi Jesús yajtigüyüy tüg barco huüdi Simón anajty je'ajtpy. Chi may'ajt pijctzoy co huen yajjihuaügy hueeni yi' barco mejypa'áy. Chi Jesús y'ixtacy barcojoty, e jadu'n yaj'ixpijcy je mayjäy ajcxy. ⁴ Co ycapxymaayi, chi Jesús Simón nimay:

—Nícx pidäg m'acxmadzi'nñ mejyjoty, jaydëbi májtzcixipy acx.

⁵ Chi Simón y'adzooy:

—Huindzin, ti iich ajcxy ooy njatuñ tüg tzuum, ni ti ti ngapáatcixyich. Per müd miich m'ayuc ycixpi yi' acxmadzi'nñ nbidägibich mejyjoty.

⁶ Co ajcxy pidacy je acxmadzi'nñ mejyjoty, chi yajco'adujcy ooy may acx, jahueeni acxmadzi'nñ ycaciich müd je may acx ycixpi. ⁷ Chi Pedro yemi ymügügtjic huüdi anajty jim ma je jadügpí barco, huen miñ ajcxy pubedyi. Chi ajcxy ymiñ pubejtp, yaj'ujch ajcxy metzpi barco müd may acx, jagoo jagoo ycaquiinñ je barco müd may acx ycixpi. ⁸ Co Simón Pedro ijxy jadu'n, chi ycojxtinaay'ahuüy ma Jesús yhuinduu, nimay:

—Huinhuaäctútcich, Huindzin, com iich pocyjäy iich.

⁹ Com Pedro janch tzigüyb anajty, etz nañ tzigüyb tüg'óciy huüdi anajty müd ti ytuñ, co anajty ooy may acx tzachyajñibéjtcixy. ¹⁰ Nañ jadu'n tzigüyb anajty je Jacobo etz Juan je Zebedeo ymang ajcxy huüdi Simón anajty ti pubety. Chi Jesús ñimay Simón:

—Ca' mdzigüy, jadachambi etz jacnicxni xü tiempo mdunipy jäymadzii.

¹¹ Co je barco yajmejypidzimy, chi ajcxy y'ixmajch tüg'óciy, chi ajcxy panicxy Jesús.

Jesús yajtzögy tüg jäy nibützpa'mmüdpí

¹² Chi jadu'n yjajti co anajty Jesús yjüimüty ma tüg cajp, co ñimiini tüg yëydijc ymüd anajty pützpa'm. Co je pa'mjäy ijxy Jesús, chi nihuindacy ma yhuinduu, minucxtacy, nimay:

—Huindzin, pen mdzojocy jëbi xyajtzögibich.

¹³ Chi Jesús yci' najtzxajiiy nīdoofñ, nimay:

—Ndzojcpyich, hui'm huadz.

Chi mic'amy je jāy choocy. ¹⁴ Chi Jesús ane'my, nimay:

—Ca' ni pin myajnimāhuipy, nicx janchtiy nayguēxigūib ma teedy, jaydēbi mōhuipy Dios huindzig'i'ñ, jadu'n nej Moisés ycotūjcin je jécyip y'ane'my, miid yi' ycixpi co ti mhuaätzpidzimy, jaydēbi jāy ajcxy nejhuīhuipy co ti mdzōgy.

¹⁵ Je capxy'ayuc nīgi y'oc-huācx'adiitzni, e janch mayjāy y'ocnimūjcin, jim pin ayuc midohuaam, e jim huīdi tzōgaam. ¹⁶ Jesús ycōgueecpy anajty je mayjāy, ñicxy anajty mijtigīduum Dios ojadajtpi.

Jesús yajtzōgy tūg jāy cīxuxypi tecyxuxypi

¹⁷ Tūg teci yjāti, Jesús anajty yaj'ixpijcp, e jim anajty ajcxy iñāy ma Jesús yhuinduu fariseojāy ajcxy, etz huīdi jāy yaj'ixpijcp Dios ñecy huīdijaty anajty ti choongixy canaag agajp ma Galilea naaxjot Judea naaxjot, etz cham huīdijaty anajty ti choofñ Jerusalén. E Jesús ymiid anajty Huindzin Dios ymic'ajt co jāy yajtzōgipy. ¹⁸ Chi nijēity jāy yajja'ty cijx'am tūg pa'mjāy yēydijcpi huīdi ca' anajty yci' ytecy yūcxy. Chi ajcxy ixtaay ma yajtijctigīhuipy pidāga'ñ anajty ajcxy je pa'mjāy ma Jesús yhuinduu. ¹⁹ Com ca' anajty ni ma tigiyiydac miid co je tijc anajty ooy y'ūtzity miid mayjāy. Chi ajcxy miidpejty tije nīgixy, chi ajcxy tijc yajcōhuach, e chi ajcxy cōdiyñajxy cijx'am je pa'mjāy ma Jesús yhuinduu. ²⁰ Co Jesús ijxy jadu'n nej je' ajcxy ymibicy, chi nimay:

—Yēydijc, yajmeecxp mbocy.

²¹ Chi je' ajcxy huīdi yaj'ixpijcpy Dios ñecy etz je judío ixpicytjc huīdi naydijigixp fariseojāy huīnmaygoty, ñayñimāyigixy: “Jada Jesús ooy ycapxtigoy miid Dios. Ni pin yēydijc huaad ca' ti pocymeecxy. Tūgpajc nHuindzin'ajtīm Dios huīdi pocyhuīnmeecxp.”

²² Jesús ñejhuīy je' ajcxy yjot yhuīnma'ñ, paady ajcxy nimay:

—¿Ti mdzachhuīnmaayb ajcxy ma mjot mhūinma'ñ? ²³ ¿Ti jactzip co mīnaanīm co ti mbocy yajmeecxy o mīnaanīm: “Pidīg etz nicxni”? ²⁴ Jaydēbi miich ajcxy mnejhuīhuipy co ñich je' je jāy huīdi tzoon tzajpjoty, nmīdich ané'min etz mic'ajt ya naaxhuīñ jēbi jāy nbocyhuīnmeecxyich, paady cham nmīmāyich yi pa'mjāy: “Pidīg etz yajpidīg mmaabejt, nicx ma mdiic.”

²⁵ Chi mic'amy je pa'mjāy ytinayīgy ma je jāy ajcxy yhuinduu, etz yajpidīg y je' ymaabejt ma anajty ycōgnāy. Chi ñicxni ma ytijc, chi ooy cōmay jāymejch Dios. ²⁶ Huīn'it nidūg'ōciy je mayjāy ooy ajcxy jihuīy, e chi ajcxy ooy cōmay etz jāymejch Dios. Chi ajcxy ooy chigiyigixy, ymīnaangixy:

—Cham janchtiy n'ijxim mijhuīnma'ñ.

Jesús huodzoofñ je Leví

²⁷ Co jadu'n ytuni yjāti, chi Jesús jim choñ, chi ijxy tūg yajcogūejtpi huīdi anajty yxii Leví. Leví jim anajty iñāy ma yajgogūejttac. Chi Jesús nimay je Leví:

—Pajaamgich.

²⁸ Chi je Leví ixmajztay huīdi anajty ytuumyb etz padzoofñ je Jesús.

²⁹ Chi Leví mayjāy yajcay yaj'uucy ma ytijc, cham may yajcogūejtpi ajcxy etz jacjadyii jāy huīdi iñāay ma yi mesa miid Jesús etz yi' ydiscípulos ajcxy.

³⁰ Chi je' ajcxy huīdibi yaj'ixpijcp Dios ñecy etz je ixpicytjch huīdi naydijigixp fariseojāy tzachni'ameechycāpxcixy ni'ojnygixy je Jesús ydiscípulos ajcxy, ymīnaangixy:

—¿Na'amy co mgaaygixy m'uuccixy mïid yajcogüejtpi etz mïid pocyjäy ajcxy?

³¹ Chi Jesús yminañ:

—Ca' yajmayjaty tzoydumbi huiidibi ca' ajcxy ypiigyii, jëyi huiidi ajcxy pijcip.

³² Ca' ñich ti nmiñich ma je jäy ajcxy huiidibi ca' pocy mäidity. ñich ti nmiñich mïid yi pocyjäy ycixpi co huen jothuimbijttaaygixy ma Dios.

Yaj'amidooy ajcxy Jesús ti co jäy ajcxy y'ayunas'ajtixy

³³ Chi je mayjäy ajcxy Jesús nimay:

—Nej co yi' (Juan) ydiscipulos ajcxy janam jadojic jaygay y'ijtixy etz ycapxtáccixy, nañ jadu'n je fariseojäy ydiscipulos ajcxy janam jadojic jaygay y'ijtixy. Chi miich mdiscipulos ajcxy ca' ajcxy jaygay y'ijtixy, caaby uucp ajcxy jabom jabom.

³⁴ Chi Jesús yminañ:

—¿Nej jëbi yaj'ayuu'aty jäy ajcxy huiidi yajpatpi ma je pijcpi yajnixiduñ, pen quipxyi yam yajpaady mïid je huiidibi pijcp? ³⁵ Minamb je xii je tiempo mina je pijcpi yajtzonñyb, huin'it janchtiy ajcxy jëbi y'ayuu'ajtixy.

³⁶ Nañ jadu'n ajcxy yajnimay tüg jihuimbit ayuc:

—Ni pin ca' huaad agiyiyi tuc-huit mïid jemyhuit, canaan jëyi yciñdzip yi jemybi, nañ jadu'n je tucpi ca' oy yhui'mañ mïid je jemyhuit agiyi'ñ. ³⁷ Ni pin ca' pidägy jemy vino ma je tucpi cochac, pen janch jadu'n octuñ, je vino jemybi yciñdzip je tucpi cochac, chi y'ixyojctähuiipy je vino etz je cochac ñitigoydähuiipy. ³⁸ Pidägyipy ajcxy jemy vino ma tüg jemybi cochac, chi jadu'n ca' ytigoyipy je vino ni je cochac. ³⁹ Ca' ni pin tzocy vino jemybi, pen ti anajty ügy vino tiibi yjejni, co jadu'n ymina'ñ co jac oy je tiibi yjejni.

6

Je discipulos ajcxy yajmújcixy trigo cojc pocxxïduum

¹ Chi jadu'n yjajti tüg pocxxïduum co Jesús oy ñaxy ma tüg trigo cam, e yi' ydiscipulos ajcxy oy anajty yajminájccixy trigo tïim, chi ajcxy ñixajztüdy, e chi ajcxy jïcxy. ² Chi nidügti fariseojäy yminañ:

—¿Ti co ajcxy jadu'n mdundigooy co mdúngixy huiidi ca' ñigodúcyity ajcxy mdunipy pocxin xïduum?

³ Chi Jesús yminañ:

—¿Nej ca'ni miich ajcxy mgapxy Dios ñecy nijadu'ñiy? ¿Nej ca' mnehuhuygixy ti David ytuun co anajty yuubögyii etz nañ co ymígügtijc anajty yuubögyii? ⁴ David ytigiy ma Dios ytijc, chi congy je tzajcaagy huiidibi anajty jiiy ma Dios yhuinduu, chi caay, nañ jadu'n moy je ymígügtijc ajcxy. Je' tzajcaagy ca' anajty ypadyii ñicxy je' ajcxy cay. Teedy je' anajty ajcxy paatip cáaygixip.

⁵ Chi Jesús yjacminañ:

—Ñich je' je jäy huiidibi tzoon tzajpjoy, jëbi nniimäyich je jäy ajcxy ti jëbi huaad ytúngixy sábado xii.

Je yëdjic huiidibi anajty yci' tidzip

⁶ Chi jadügtecy yjajti tüg pocxxïduum, co Jesús ytigiy ma tüg naymujctac, chi jäy yaj'ixpijcy. Jiiy anajty tüg yëdjic huiidi y'a'oygi' anajty tidzip. ⁷ Chi huiidi ajcxy yaj'ixpijcp Dios ñecy etz fariseojäy ajcxy ix'ijxy pa'ijxcixy Jesús nej pen jäy yajtzögam pocxxïduum, e je' ajcxy anajty mïid ycixpi xïhua'ñ. ⁸ Jesús

ñejhuuıyb je' anajty ajcxxy yjot yhuinma'ñ. Chi Jesús nimay je yëydıjc huıdıbi anajty yci' tıdzıp:

—Pidıg, tinayıg mayjäy'agujc.

Chi je' ytınaayıgy. ⁹ Chi Jesús ymınañ:

—Nyaj'amıdohuaamybıch mııch ajcxxy tüg ayuc. ¿Nej Dios ñecy ymına'ñ, jëbi oybi nduunım pocxxıduum o jëbi jıbıcpı nduunım, nyajtzooım jäy o nyajtıgooyım jäy yjugy'ajt?

¹⁰ Chi Jesús ajcxxy huındıcxpejtay nidüg'óciy, chi nimay je pa'mjäy:

—Xajtıu mgı'.

Chi je' yci' xajtıy, huın'ıt je' yci' choocy. ¹¹ Chi je' ajcxxy huıdi yaj'ıxpıjcp Dios ñecy etz je ıxpıcytıj huıdi ajcxxy mıjpidacp judıo ycostumbre ooy ajcxxy yjot'ambıjcy, ñayñımáayıgıxy mıñ xyıpy:

—¿Nej ajt n'octuunım jada Jesús?

Jesús huın'ıxy je majmetzpi discıpulos ajcxxy

¹² Jadu'n yjajtı huın'ıt xıı Jesús ñıcxxy mıjtıgıduum Dios ojadaytıpi. Tüg tzuım ooy Dios mıbıjctzooy. ¹³ Co yxımıy, chi Jesús huooımıñ yı' ydiscıpulos ajcxxy. Chi huın'ıjxy je majmetzpi, etz yxımoy ajcxxy, apóstoles. ¹⁴⁻¹⁶ Chi Jesús yhuın'ıjxy je Simón huıdi yxımoy Pedro; je Andrés, Pedro y'uch; Jacobo etz Juan; Felipe etz Bartolomé; Mateo etz Tomás, Jacobo hue' je' Alfeo ymang; etz Simón huıdi jäy ytıjpy Zelote; Judas, Jacobo y'uch; etz Judas Iscariote huıdıbi nañ jadu'n Jesús cıyejc ma ymidzip.

Jesús yaj'ıxpıcy mayjäy

¹⁷ Chi Jesús mııd'ıdacy je discıpulos ajcxxy, chi oy yhuäcxıpy ma tüg ajoy mııd ydiscıpulos ajcxxy etz mayjäy huıdi anajty ti choongıxy Judea naaxjot, etz Jerusalén, etz ma mejypa' jim Tiro etz Sidón. Ymıñ ajcxxy je mayjäy co amıdoo'ıdáanı Jesús y'ayuc etz nañ chögaangıxy je pa'm huıdi ajcxxy ymııd. ¹⁸ Cham je huıdi anajty ayo'n tzachpaatp mııd ca'oybi, nañ tzoocp je' anajty ajcxxy. ¹⁹ Chi tüg'óciy je jäy ajcxxy janch ñıdonamy anajty ajcxxy je Jesús, co ymııd mıc'ajt co jäy tüg'óciy yajtzög.

Je jotcujc'ajt etz je cajotcujc'ajt

²⁰ Chi Jesús huındıcxpejtay je mayjäy huıdi ajcxxy ıxpıgaam yı' y'ayuc, e ymınañ:

—Jotcujc mııch ajcxxy ayoobtıj, com mııch ajcxxy cham xypaat Dios y'ané'mın.

²¹ Jotcujc mııch ajcxxy huıdi cham yuubó'cip, co mgüxııb mııch ajcxxy. Jotcujc mııch ajcxxy huıdi cham jotmay mııd, co ypáadıp xıı tiempo mına mxondáaccıxıpy.

²² Jotcujc mııch ajcxxy mına anajty jäy ca' xy'ıxáangıxy, co pın xy'ıxtıjıxıpy, e co jäy ajcxxy jıbic xyñıgapxa'ñ xyñıxıga'ñ mııd ıch ycıxpi, je jäy huıdi tzoon tzajpjoty. ²³ Mxondäg mııch ajcxxy huın'ıt xıı, etz mjotcugııygıxıp, com ooy chachmıjıty huıdi ajcxxy mbadaamy tzajpjoty. Com jadu'n anajty jecy'ajty mııch mmıj'ap mmıjteedy ca' ıxaangıxy je huıdi anajty Dios y'ayucnajtzcapııyıpy.

²⁴ Mııch ayoob ajcxxy comeñıyjäy, com ca' ti jotcujc'ajtıın mjacpadaangıxy huın'ıt xıı (co Dios tıyduııp je naaxhuıñıyjäy).

²⁵ Mııch ayoob ajcxxy huıdi cham oc'agujc'ajtp ocjotcujc'ajtp, ayo'n jotmay ajcxxy mbaadıp, e myajmayjadıpy mııch ajcxxy tıjaty.

²⁶ Miich ayoob ajcxy co ajcxy myajnigapxipy myajnimiydägipy, com jadu'n jecy'ajty miich ajcxy mmij'ap mmijteedy nimay je jäy ajcxy co ooy y'oyjäy huidi ajcxy anajty najtzcapxiyb ayuc huidibi ca' ytiy yjanchity.

Nej huaad nmigüg ndzójcm

²⁷ Chi Jesús yjacmínañ:

—Miich ajcxy huidi cham amido'ijtp iich n'ayuc, iich miich ajcxy nimaayb: Tzójccix mmidzip, mi'oyjäy'ajtcix huidijaty ca' xy'ixaangixy. ²⁸ Migapx je jäy ajcxy miid oyjot oyhuinmañ huidi ajcxy jibic xyñigapxp xyñi'ojiiyb. Mibijctzoogixy yi Dios miid je' ajcxy ycixpi huidibi xyñigapxp xyñi'ojiiyb. ²⁹ Pen ji pin xycocyx ma yi mhuinjijp, mo' jadüg adu'm'amy ahuin hueñ coxy. Pen ji pin xypigaani yi mjocxhuít, jactimmo' mnijen huen yajnicx. ³⁰ Pin xypijctzohuip tijaty, mo'. Pin xypijcip huidi miich mjé'ajtpy, ca' mbijctzohuipy jadüg'oc. ³¹ Nej mdzocy tunipy jäy miid miich ajcxy, nañ jadu'n miich ajcxy mdunipy miid yi' ajcxy.

³² Pen miich ajcxy jëyi mdzojccixpy pinjaty xychojccixp, ¿ti oyyäy'ajtin jada' miich ajcxy m'ocpaadipy? Nañ jadu'n je pocyjäy ajcxy chojcpy pinjaty yi' ajcxy tzójcip. ³³ Pen mdumyb oybi huidijaty mmid ooy mnaymigü'adyii. ¿Ti oyyäy'ajtin jada' miich ajcxy m'ocpaadip? Nañ jadu'n je pocyjäy ajcxy tuñ oybi miid ymigügtijc. ³⁴ Pen myejcpijctzou miid je jäy huidibi miich ajcxy mjijp'ijxpy co nañ jadu'n xymöhuipy tigatii, ¿ti oyyäy'ajtin miich ajcxy mdumyb? Nañ jadu'n yi jibic jäydijc jayejcpí tijaty pijctzoy co nañ jadu'n jijp'ijxcixy co ymöhuiipy tigatii. ³⁵ Miich ajcxy, tzójccix mmidzip, mi'oyjäy'ajtcix mmidzip, yajpíjctzoogix tijaty, e ca' ni ti mjijp'ijxcixipy co ajcxy jac mij mbaadip. Jadu'n miich ajcxy mij mbaadip oy'ajtin e mnaydijiiyb ajcxy je mijpi Dios y'ung. Com Dios pa'ayoodaayb tüg'óciy yi jäy ajcxy huidibi ca' ti jäygidägy, etz huidi jibicjäy. ³⁶ Miich ajcxy pa'ayoo migügtijc ajcxy, jadu'n nej mDios Teedy tzajpjoty pi ypa'ayooy huenytmipinity.

Ca' mmigüg ni ti myaj'ix'ixipy myajpa'ixipy

³⁷ Ca' mmigüg ni ti myaj'ix'ixipy myajpa'ixipy, huin 'it ca' pin xy'ix'ixipy xypa'ixipy. Ca' mmigüg mbocy'ixipy, e huin'it ca' pin xypocy'ixipy. Huinmecx mmigüg, e huin'it nañ jadu'n Dios myajhuinmecxip. ³⁸ Mo' mmigüg etz huin'it miich ajcxy Dios xymöhuiipy quipxy ooy tijtäch etz janch yajxon y'újtzytý cödinaayb. Com yi quipxiñ tübi myajquipxiy, nañ yi' miid xyquipx-huimbidiy.

³⁹ Chi Jesús yajnimay je mayjäy tüg jihuimbit ayuc:

—¿Nej jëbi tüg jäy huintzpi ymigüg huintzpi huiztyöyñi? ¿Nej ca' mdijj nimetz yjutcögäxixipy? ⁴⁰ Ca' ji ni tüg ixpijcpí huidi nigí ixpicyip ca'ydi yhuindzin, pen ji pin huädz yjadim'ixpicy najtzpadihuipy yhuindzin.

⁴¹ ¿Na' amy co mic'amy mbocy'ixy mmigüg co hueeni ytundigoy, e miich jac mij ooy mdundigoy, e ca' mjihu'iñybicy? Tim jadu'n nipaady nej jihuüy ti m'ixy pi'cpüx ma mmigüg yhuuin, e ma miich mgi'mhuuin jac jiiyby mij quipy, e ca' m'ixy je quipy ma mgi'mhuuin. ⁴² Ca' huaad mnimähuiipy mmigüg: “Nayyegü miñich püx n'ocyajpidzim maabi mhuuin”, e miich ca' m'ijxy mij quipy ma mgi'mhuuin. Jibicjäy miich. Jayijp miich myajhuädzip mjot mhuinmañ, huin'it jëbi mmigüg m'ihuujip mgapxhuujip, jadu'n nipaady nej jihuüy ti myajpidzimy je quipy maabi mhuuin, jachuädz m'ijxigipy e chi jëbi yi pi'cpüx myajpidzimipy maabi mmigüg yhuuin.

Je quipy je ytäm, yi' müd ycixpi yaj'ijxcapy

⁴³ Ca' yi' y'oyjäyity huidi jibic tuumb, nañ jadu'n ca' jibicjäy huidi oy tuum, tim jadu'n nipaady nej tüg quipy. Ca' ji yi' oyguipy huidi jibic tim'ajt, nañ jadu'n ni ca' yjibicquipyity huidi oy tim'ajtp. ⁴⁴ Com ni je' quipy yaj'ijxcapj müd ytäm ycixpi. Ca' pin higeri tim tucy ma quipy apymüdp. Nañ ni pin ca' uvas cha'm piy ma aadz apymüdp. ⁴⁵ Je jäy oyjäybi ma yjot yhuinmañ yajpidzimy oyb. Je jibicjäybi ma yjot yhuinmañ yajpidzimy jibicpi. Huidibi yhuinmaayb jotjoty huinmañyoty yi' ycapxyp.

Je mejtznajxpi poch y'ijx

⁴⁶ Chi Jesús yjacmāñ:

—¿Nej co nigo minaangixy: “Huindzin, Huindzin”, ni ca' ajcxy mdúngixy huidi nyajnimaaгыxyp? ⁴⁷ Tüg'óciy jäy huidi xyñimimbich etz xymidoohui ich n'ayuc etz cuyduñ, ich nyajni'ixihuipy pin je' ymidügnax. ⁴⁸ Quipxyiyb tüg yëydijc huidibi ytijccoyp ma tzaa nıcxı, chi nidajıy ooy cıcy, chi pidägy poch'ijx tzaa nıgıxy, co mijñi ycomy nimiñ je tijc, müd tüg'óciy ymijaa jayajpidıgañ je tijc, e ni ca' jaduñyi yajyücxı, com tzaagıxy anajty ypojtzooñity. ⁴⁹ Yi jäy huidi midoob ich n'ayuc e ca' cuyduñ, müdquipxyıy jadu'n yi' nej tüg yëydijc co ti ytijccoyp. Ni ca' poch cıcy ypojtzooñity, jeyi naaxhuingıxy nidajıy hueni. Co je mijñi ymiñ müd ymijaa, chi yajpidıgy je tijc, chi oy yhuindıgoydäy.

7

Jesús yajtzögy tüg mijtungmüdp Romano ytumbi

¹ Co Jesús ycapxtaay ymiydactaay müd je mayjäy huidi anajty jim amido'ijtp, chi ytıgyıy jim Capernaum. ² Jim anajty tüg Capitán tüg ytumbi hue' anajty pijcip, janch tim ögaanıp anajty, e je soldado huindzin ooy anajty tzocy je ytumbi. ³ Co je capitán ayuc midooy jadu'n nej Jesús ytuñ, chi quejxy judio mijjäydijc, huen nıcxı minuucxtaaccıxy Jesús co je' yminıpy ma ytıjc yajtzögyıyb je' ytumbi. ⁴⁻⁵ Chi je mijjäydijc ajcxy ymiñ ma Jesús, chi ajcxy cohuaniıy ooy, pijctzou may'ajt, nımay:

—Jadayaabi capitán ymihuaad co mbubedıpy, com yajmıj'ajtpy ich ajcxy ngajp, ti coyp ich ajt naymıjctac.

⁶ Chi Jesús nıcxı müd je' ajcxy. Co ajcxy mıhuıngooñ je tijc, chi je capitán quejxy ymıgüg huen nıcxı jıjpcbadıy Jesús, nımahıpy:

—Huindzin, ca' nej mnayjihıyıı, ca' ich mıhuaadıty co mdıgıhuıpy ma ich ndıjc. ⁷ E paady ca' ich njot ti mıctıñ co ich mııch cı'm nıcx nıxtäy. Jëda'ajty mııch nıgoo capx, e ti anajty ndumbıch chögy. ⁸ Nañ jadu'n ich nmüdich soldados ajcxy huidi ajcxy xycapxcöbıjcpıch. Nımäyıch tüg: “Nıcx”, e nıcxp; nımäyıch jadüg: “Min”, e mımb; nımäyıch ndumbı: “Tun jada”, e ytumyb.

⁹ Co Jesús midoy nej je capitán ymāñ, chi jıhuıy ooy, chi ni'ıjxhuımbıjty nımay ajcxy huidi pamıııp:

—İch mııch yım nımaagyıxyp co ca' nbaadyıch Israel jäy huidibi xymıbıjcpıch jadu'n nej jadayaab agatz jäy.

¹⁰ Co ajcxy je quexyöybi yhuımbıjtcıxni ma je tijc, chi oy páatcıxni je tumbi ti anajty y'agıdägy.

Jesús yajjugypıcy tüg co ögytöxyjäy y'ung tııbi anajty y'ögy

11 Chi jadu'n yjajty huin'it xii co Jesús anajty ñicxy ma tüg cajp huidi anajty yxii Naín. Miiid anajty ñicxy jadyii ydiscípulos ajcxy etz mayjáy. 12 Co yhuíngooñ ma anajty ycajp tigihuaani, chi minaybaati jáy ajcxy, ñicxy anajty ajcxy tüg öcpi yajnaaxtigiiygixy, huidi anajty ungdaj tügpaic y'ung'ajtpy. Hue' je' anajty co'ögy je töxyjáy, e miiid anajty ñicxy maycajppáy. 13 Co je Huindzin Jesús ijxy, chi pa'ayogoty je töxyjáy, chi nimay:

—Ca' myáxy.

14 Chi Jesús ymijhua'cy, nidoñ je öcpi cajón. Chi ajcxy ytinayxijpy je huidi anajty ajcxy öcpi cinyñicxp. Chi Jesús yminañ:

—Yéydijc, ich miich yam nimaayb, pidig.

15 Chi je yéydijc inayigy huidi anajty ti y'ögy, e ytigiiy miydaacp. Chi Jesús yajcidiigiyyñi je' ytaj. 16 Chi ajcxy nidüg'ócicy ooy ñay'adzigiyygoti, e Dios jáymejch cömay, yminaangixy:

—Tüg mijpi Dios tiy'ajtmiipti cham yajpatp ma ich ajt.

Nañ jadu'n ajcxy yminaangixy:

—Ti Dios ni'ijxcidägy yi yñaax ycajp.

17 Ooy Jesús yajcömay ma tüg'ócicy Judea naaxjot, etz ma tüg'ócicy jac huinduy agonbi naax cajp.

Je Juan je Bautista yquexyöybi

18-19 Chi je jáy ajcxy huidi anajty Juan je Bautista yaj'ixpijcpy nimiydactay jadu'n nej miiid ytuni yjajti Jesús. Chi Juan huoooy metz yi' ydiscípulos ajcxy, e quejxy ma Jesús yajpaady. Chi Juan nimay co huen nicxy amidoogixy Jesús, pen yi' je' je Cristo huidi anajty miinaam, o pen n'ahuíjxpy ajcxy huingbi.

20 Chi je Juan yquejxyöybi miiñ ma Jesús nimay:

—Yi Juan je Bautista ich ajcxy ti xyquéxyich ma miich amidohua'ñ pen miich je' je Cristo huidi minaamb, o ¿n'ahuíjxypich ajcxy huingbi?

21 Tim huin'itiy Jesús ooy mayba'mjáy yajtzoocy. Yajtzoocy nañ jadu'n huidi anajty ajcxy ooy mij yuu mij pa'm yaj'ayoyii, etz nañ yajtzoocy pinjaty anajty ca'oybi miiid ma yjot yhuinma'ñ. 22 Chi Jesús je Juan yquejxyöybi nimaayi:

—Nicx nimaaygix je Juan jadu'n nej ti m'ljxcixy ti mmidoogixy, co yi huintzpi ti yhuindicxigy, yi tecyma'tpi ti yöyigy, yi nübützpa'mmiiidpi ti chögy, je cönatpi ti ymidohuiccixy, je öcpi ajcxy ti yjugypijcy, e ngapxhuäcxyich oybi ayuc ma ayoohtijc. 23 Jotcujc yi' ajcxy huidi ca' huinma'ñyitigooygixy miiid ich ycixpi.

24 Co je Juan yquexyöybi yhuimbijttay, chi Jesús nimiydaccoty je Juan ma je mayjáy ajcxy, yminañ:

—Co ajcxy ti m'oy mijtigiduum, ¿ti ti m'ljxcixy? ¿Nej ti m'ljxcixy tüg jáy ametz jotmetz, jadu'n nejhuíy tüg nãhuaax huidi pojmiimb pojxijp? 25 Chi jada', ¿ti oy ti m'ljxcixy? ¿Tüg yéydijc huidi miiid oy yhuít yxöxyity? Yi jáy ajcxy oy yxoixyipi huidi agujc jotcujc tzinaaygixp hue' ajcxy yajpaady ma yi rey ytijc. 26 ¿Ti ajcxy ti m'ixy jim mijtigiduum? ¿Tüg jáy huidi Dios ytiy'ajt miiid? Janch ti m'ljxcixy tüg Dios ytiy'ajtmiiidpi, etz jacnigi ymijity je' ca'ydi Dios y'ayucnajtzcaxpiybi huidi jecy'ajty tzinay. 27 Je' jada je jáy huidi Dios ñigapxyp ma ñecy ma Dios jadu'n yminañ:

Cham nguejxyich ich nguexyöybi jayijp ma miich, je' yaj'oyíhuip je jáy ajcxy yjot yhuinma'ñ miiid ich ycixp, tim jadu'n nipaady nej jihuíy jáy tü'aa yaj'oyíy co rey yminañ yjada'ñ.

28 Hich miich ajcxy yam nimaayb co huídijaty ajcxy töxyjäydijc yajpi'c'ajtpy, ca' ji ni tüg Dios y'ayucnajtzcaxi'ybi huídibi jacnigi ymi jity ca'ydi Juan, je Bautista. Chi jada' je jac mutzpi huídi jüby tzajpjoty yajpaatp ma Dios y'ane'my, jacnij je' ca'ydi Juan.

29 Co ajcxy je mayjäy jadu'n midoy nañ jadu'n je yajcogüeijtpidijc ajcxy huídi anajty niibéjticy ma Juan, chi ajcxy minañ co Dios ytudägyity. 30 E je fariseos ajcxy etz je escribas ajcxy huídi anajty ca' niibéjticy ma Juan, ca' ajcxy mijpidacy huídi anajty Dios ytunamy müd je' ajcxy ycixpi. 31 Chi je Huindzin Jesús yminañ:

—¿Ti müd nyajquipxíhuibich jadayaabi jäy huídi tzinayb ma jadachambi tiempo? ¿Huídi müd nyajtügihuibich? 32 Jadu'n nej pi'ctijc huídi ajcxy iyiyb ma jäy yjuygixy ytoocixy. Mijhuan mijjihuiyigixy ymígügtijc: “Ti njayaxüxich flauta e ni ca' ti m'éjticy; ti nja'ihuí ajcxy iy jotmaymüdpi, e ca' ti myaaxicy.” 33 Chi Juan je Bautista ymiñ, e je' ca' anajty cay, ni ca' vino ügy, chi miich ajcxy minangixy co Juan ymiid ca'oybi. 34 Chi ich, je jäy huídi tzoön tzajpjoty, nmiñich, chi caaybich uucpich, e miich ajcxy minangixy: “Ijxcix, cha tüg yëydijc janch cax janch vino uucp, huídi migüg'ajtpy yajcuéjtpidijc etz pocyjäydijc.” 35 Je t'y'ajt ji je' ñigüëxigy ma je pinjaty nigapxp nimydaacp t'y'ajt.

Jesús ma Simón je fariseojäy ytijc

36 Chi tüg fariseojäy may'ajt pijctzoy, co Jesús anajty müd ycaya'ñ. Chi Jesús ytiigy ma je fariseojäy ytijc, chi ñay'ahuüy ma mesa. 37 Chi jim anajty tüg töxyjäy huídibi anajty jibic tzinaayb jibic jugy'ajtp ma je jimbí cajp. Co je' nejhuüy jüby Jesús ma fariseojäy ytijc ñäy ma mesa, chi mimiñ tüg quig aceite huídibi ooy oy xuugy, chi midigüy tigoty. 38 Chi ypiguetz'ahuüy ma Jesús ytecy ymijc, e chi yajxooi Jesús ytecy müd huinní e yajpöt müd ycöhuay, chi yajjaaxy je aceite huídi ooy oy xuugy. 39 Co jadu'n ijxy je fariseojäy, je' huídibi anajty ti huoy Jesús, chi jot'ajti yminañ:

—Co ixypy jada Jesús y'ocjëjity Dios yt'y'ajtmüdpi, y'ijxcajpy ixypy pin jäy nejpy jäy yi töxyjäy huídibi nidoonip co yi' yjibictzinäy yjibicjugy'aty.

40 Chi Jesús yminañ:

—Simón, cham ich tüg ayuc nmíididyich huídi nyajnimáhuamy.

Chi je' y'adzooy:

—Yajnimaaaygich, Huindzin.

41 Chi Jesús yminañ:

—Tüg comeeñjyäy ymiid anajty metz jäy huídi ti ñuucxy. Tüg jäy anuucxy migoox migo'px denario meeñ, e je jadügpí anuucxy huixchigui'px majc. 42 Com je' ajcxy ca' anajty müdity ti müd cuedip, chi je comeeñjyäy huinmecxy nimetz. Miich ocnímaaygich, ¿je metzpi jäy huídi nuucxy, huídibi je' ñigi chojpy?

43 Chi Simón y'adzooy:

—Hue' n'a'ixiyyich je tübi huinmecxy jac'anaxy.

Chi Jesús yminañ:

—Ti mdiygapxy.

44 Chi Jesús ni'ijxhuimbijty je töxyjäy, e nimay Simón:

—¿Nej m'ijxyp jadayaabi töxyjäy? Co ndigüyich ma mdiyc, ca' miich ni xymooyich co ndecy nbújibich. Jadayaabi töxyjäy ich ndecy ti xypújip müd yhuinní, e ti xyméxyich ndecy müd ycöhuay. 45 Ca' ich miich ti xychücy.

Jada töxyjäy jadu'n nej ti ytijc tigiy, xychücxthiyb iich ndecy. ⁴⁶ Hich miich ca' aceite mbidägy ma iich ngohuajc. Jada töxyjäy ti xyajjaaxi ndecyich aceite huidi ooy oy xuugy. ⁴⁷ Paady iich miich nyajnimäy co jada töxyjäy huinmecxixi y' ymaybocy, co tiibi oyhuinma'n yajtuñ cixyot huinijot. Pinjaty hueeni ypocy yajhuinmecxixi, hueeni y' chójcin yajniquëxigy.

⁴⁸ Chi Jesús je töxyjäy nimay:

—Ti miich mbocy yajhuinmecxitäy.

⁴⁹ Pinjaty anajty iñaayb ma je mesa ñayñimáayigixy miñ xyipy:

—¿Pin jäy jada jada' co nañ yhuinmecxixy jäy ypocy?

⁵⁰ Chi Jesús nimay je töxyjäy:

—Ti m'alma ñüdzögy co ti xymibicyich. Nicx jotcujc.

8

Töxyjäydijc huidibi anajty Jesús pubejtp

¹ Co jadu'n yjajti, chi Jesús ñicxy ma tüg'ócay je mij cajp etz mutz cajp, capxhuäcxy je oybi ayuc maabi Dios y'ané'min. Je nimajmetzpi ydiscipulos ajcxy müd ñicxy. ²⁻³ Etz nañ ymüdnicx nijëjity töxyjäydijc huidi anajty Jesús ti yajtzögy huidi ca'oybi anajty ymüd etz jac tijaty pa'm. Hue' je' ajcxy anajty je María je töxyjäy huidi anajty xiijip Magdalena, je huidibi Jesús yajpidzimi huixtujc ca'oybi ma je'; etz Juana, je huidibi ñäy anajty xiijip Chuza, e je Chuza hue' je' je rey Herodes ytungmüdp; etz Susana, etz jacjadyii ajcxy huidi anajty ajcxy pubejt Jesús müd tijaty anajty ajcxy ymüd.

Je niipi y'ijxpejt

⁴ Co mayjäy ooy ñayöymujc ma Jesús yhuinduu huidi tzoon ma tüg tüg cajp, chi Jesús nimay je mayjäy ajcxy:

⁵ —Cha tüg ayuc nyajnimähuaangixy. Jadu'n jäy tüg choñ niipi, ñicxy trigo tñm huijpi. Co je trigo tñm huijy, chi nijëjity ypajc oy ycäy mjtügujc, chi je jäy ajcxy yajhuägpejty, e huidi ca' yajhuägpejty, chi joon piihuigy. ⁶ Chi nijëjity trigo pajc oycäy ma tzaa ñicx. Co ymujxy chi je' ytñich, je' co anajty naax ca' yxoogity. ⁷ Chi nijëjity trigo pajc oycäy ma apyjot, chi ymujxy quipxy müd apy'ung, chi y'ujtz'o'ctay. ⁸ Chi nijëjity trigo pajc oycäy ma je naax oybi huinnätzujc, chi ymujxy, chi yeectzoñ, ytñim'ajty oyjaty, tüg trigo pajc migo'px oyc'o'ity.

Co Jesús je miydägyi yajmay chi yjactimcapxcoty, ymíñañ:

—Pin midohuamb jada ayuc, huen midooy.

Nej yhuimbizimy je niipi y'ijxpejt

⁹ Chi je discipulos ajcxy y'amidooy:

—¿Nej jada jadu'mbi jihuimbit ayuc yhuimbizimy?

¹⁰ Chi Jesús ymíñañ:

—Miich ajcxy jaydëbi mnejhuñhuipy huidi Dios ñigapxpy ñimiydacpy coyüch'amy ma y'ané'min ycótújin. Jacjadyiibi jäy jihuimbit'amy nyajnimayich, jaydëbi pinjaty huidi ijxp ca' ajcxy y'ixipy, etz pinjaty midoob, ca' ajcxy mido'mbigipy.

Jesús capxticxy je niipi y'ijxpejt

¹¹ Jadu'n je jihuimbit ayuc yhuimbizimy: Je trigo pajc Dios je' y'ayuc.

¹² Je trigo pajc tiibi tügujc ycäy, je' je' jadu'n nej jäy huidi midoob Dios y'ayuc, chi mic'amy ñiminyii je ca'oybi, e piibizimday je Dios y'ayuc ma

yjot yhuinma'ñ, ca'ydi mibic etz ca'ydi y'alma yajnödzygyii. ¹³ Je trigopajc huidi cähui ma tzaajot, je' yi' ajcxy huidi je ayuc midoob, chi cöbicy jotcujc, chi je' ca' ytictztigiy, tzojccixy y'ocmibicy, co agapxiyb paaty chi ixmajtzn. ¹⁴ Je trigo pajc huidi ti cähui apy'agujc, je' je' ajcxy huidibi midoob, chi co ñicxni jäydigooyñi Dios y'ayuc miid jotcujc'ájtin tzinaayin etz jugy'ájtin etz comeeñ'ájtin, e chi ca' Dios y'ayuc yhuim'y ma yjot yhuinma'ñ. ¹⁵ Je trigo pajc huidi cähui ma oyñaax huinnätzcujc, je' ajcxy huidi oy etz tudägy yjot yhuinma'ñ müidity. Chi je Dios y'ayuc midohui'my, e oñdägy'amy Dios y'ayuc ymayiy ma yjot yhuinma'ñ.

Je lámpara ñi'ixpejt

¹⁶ Co jäy ajcxy jüindixi'ñ nöctzoy, chi ca' ajcxy cöjupy miid tu'tz, nañ ca' huaad pidägy cijx pätcipy, hue' janchtiy pidaaccixy ma jüindixpejt, co pin ytigiy jébi icy je jün. ¹⁷ Ca' ni pin ayüch tunipy e nicxy ycayajnejhuüy, ca' ni pin ti tunipy ameech e nicxy ycaniquëxygy. ¹⁸ Paady miich ajcxy midoogix yajxon co pin tijaty miid, jacyajmöhui'p. Pin ti camiid, yajpigipy je' huidi anajty yjamüid.

Jesús ytaj etz je jugymigüg

¹⁹ Chi Jesús ytaj etz y'uch ajcxy ñimiini, ca' ajcxy nimejch Jesús yajxon miid mayjäy ycixpi. ²⁰ Chi Jesús yñimaay:

—Cheeby mdaj etz m'uch ajcxy tiba'y, miich ajcxy xyjamigapxam.

²¹ Chi Jesús yminañ:

—Yi jäy ajcxy huidibi Dios ayuc midoohui'py etz cuyduunip, yi' üich ndaj'ájtypich etz n'uch'ájtypich.

Jesús yajxemy je poj etz je nü co anajty chachpidigy

²² Chi tüg tecy yjajti Jesús ytigiy ma tüg barco miid ydiscípulos ajcxy, chi Jesús yminañ:

—Tzoc jim'amy ñinaxy náxim.

Chi ajcxy chooñ. ²³ Chi nügujc anajty nícxcixy co Jesús ymi'ögy. Chi tüg mic poj miñ ma je mejy. Chi je barco ñi' yajtigiyüi, janch yinjaty jahueenjaty ycaquiñ. ²⁴ Chi ajcxy Jesús nimijhuägy, tijyücxxy ajcxy nimaaygixy:

—¡Huindzin! ¡Huindzin! Cham ajt n'ocquünim.

Co Jesús oy ymäyhuijy, chi jipcgapxiy je poj etz je mejy co anajty chachmijjétpety ma barco. Chi je poj yhuäcxijptay, y'amoonday. ²⁵ Chi Jesús yminañ:

—¿Ma miich ajcxy je mmibijcin?

Chi ajcxy yjanchchigygoty janch yhuinmay ajcxy ñayñimáayigixy miñ xyipy:

—Pin yëdyjc jada jada' co je poj etz nü jüguexy, etz yajhuäcxipy, etz ycapxycöbigyii.

Je Gadarajäy huidibi anajty ca'oybi müid

²⁶ Chi ajcxy ymejch ma je gadarenos naaxjot, huidi hui'm jim'amy ñinaxy ma je Galilea mjlaguunba'. ²⁷ Co Jesús ñibidzimy, chi jipcobadiy tüg yëdyjc huidi anajty ti choñ ma je Gadara cajp. Je' anajty müid ca'oybi, ti anajty yjejcni maabi ypadyii. Ca' je' anajty huit yajtuñ, nañ ni ca' anajty chinäy ma ytjic, öcpjüt anajty yajtzinähui'yb. ²⁸ Co je' ixpaty Jesús, chi yaaxqueecy, e ycoxtinay'ahuüy ma Jesús yhuinduu, yminañ janch mic:

—¿Ti ñich miich co xyñimiiñich, Jesús, tügpajc mijpi Dios y'ung? Tun may'ajt ca' nijot xychachchaachytüñich.

²⁹ Jadu'n minañ com co anajty Jesús ixquexy je ca'oybi ma je jäy, ti anajty yjejcni ma je ca'oybi anajty tzach'ane'my je jäy. Coxoch anajty ymügütiyc ymüid'adyi miiid cadena. Janch ypojtpy cadena, chi ca'oybi anajty yajnicxyii mijtiüdüum. ³⁰ Chi Jesús y'amidooy je locijäy:

—¿Ti miich mxii?

Chi je ca'oybi yminañ:

—ñich nxii Legión (hue' yhuimbizimy nimay).

Jadu'n minañ com nimay anajty ca'oybi ti ytiüyüxy ma je jäy. ³¹ Chi je ca'oybi may'ajt pijctzoy ma Jesús co ca'ydi yquexyii ma ayoodactuuby. ³² Jim anajty tüg quepy idzim chachjüxcixy ma je ujtzjot. Chi je ca'oybi may'ajt pijctzoy co huen yajtiüyühiipy je' idzim. Chi Jesús ni'adzooy. ³³ Co je ca'oybi ypidzimy ma je jäy, chi ytiüyü ma je may'idzim. Huin'it je may'idzim ñayñajtzjibibiyaadyi ajcxy ma tüg ahuoc, chi oy ajcxy ycädäy ñijoty, chi y'ögtay.

³⁴ Chi je idzim cuend'ajtpi ajcxy co ixy jadu'n nej ti yjadyii müid ajcxy y'idzim, chi ajcxy yqueecy, oy nimiydaaccixy cajpjoty etz majaty tundac.

³⁵ Chi mayjäy ajcxy choon oy ijxcixy jadu'n nej anajty ti ytunyii ti jadyii, oyja'tcixy ma Jesús. Chi je mayjäy ajcxy paty je yëdyjc, tiibi anajty ca'oybi ñibidzimyii ycöbidzimyii, iñäy ma Jesús yhuinduu, huit müid etz huijy quejy, chi ooy je jäy ajcxy chigüy. ³⁶ Chi pinjaty ajcxy iix müid müydacy jadu'n nej y' choocy, je jäy huidi anajty ca'oybi müid. ³⁷ Huin'it tüg'óciy je mayjäy ma gadarenos naaxjot etz jadyii cajp huinduy agonbi, chi ajcxy may'ajt pijctzoy ma Jesús co huen jihuägy ma je' ajcxy, co anajty ooy chigüyüxy. Chi Jesús ytiüyüñi barcojoty yhuimbijtni. ³⁸ Chi je jäy tiibi anajty ca'oybi ñibidzimyii ycöbidzimyii pijctzoy may'ajt co müid'idan Jesús. Chi Jesús müid capxycijxy, nimay:

³⁹—Nihuimbit mdijc, etz nimiydäg jada mijpi tung huidibi Dios ti tuñ müid miich ycxipi.

Chi je' ñicxy capxhuäcxy je tiy'ajt cajp cajp jadu'n nej anajty mijhuinmañ Jesús ti tuñ müid je' ycxipi.

Je Jairo ñix etz je töxyjäy huidibi Jesús yhuitpa' nidoni

⁴⁰ Jadu'n yjajti co Jesús yhuimbijty co choon Galilea, chi je jäy ajcxy cöbijcy Jesús janch agujc jotcuyc, com nidüg'óciy anajty ooy jijp'ijxcixy. ⁴¹ Chi tüg yëdyjc huidi anajty yxii Jairo huidibi anajty mijtungmüid ma judíojäy ñaymujctac ymiiñ ma Jesús, chi minucxtacy Jesús pijctzoy may'ajt co huen nicxy ma je' ytijc. ⁴² Jairo ymüid anajty tügpajc ñix, hue' anajty yjimijt majmetz, janch tim ögaanip anajty. Co Jesús ñicxy müid je', chi janch mayjäy anajty chach'adijii chach'agodiüi.

⁴³ Chi tüg töxyjäy huidi anajty yxii ybo', ca' anajty y'oc-huäcxijpni, mimajmetz jimijt anajty cujc jadu'n mi'ijtni. Ti anajty ymeeñ yajtundäy ma je tzozdumbi ajcxy, etz ni pin anajty ycayajtzögyii. ⁴⁴ Chi je töxyjäy nimijhuägy je Jesús, chi nidoni yhuitpä. Janch mic mic je yxii ybo' oy yhuäcxipy.

⁴⁵ Chi Jesús yminañ:

—¿Pin xyñidoñ ñich nhuit?

Chi ajcxy y'adzooy co ca' pin. Chi Pedro etz tüg'óciy müid je' yminañ:

—Huindzin, jäy ti xy'adijii ti xy'abodii etz miich minañ: “¿Pin ti xyñidoñich?”

46 Chi Jesús ymínañ:

—Nidügti ti xyñüdoñich. Nnejhuñybich co müid nmic'ájtich ti nyajtzyögyich pinjaty.

47 Co je töxyjäy jihuñy co ca' coyüch yhui'mañ, chi nimíñ janch tziyuuyb. Chi yhuindacy ma Jesús yhuinduu, chi capxpídzimy mayjäy'aguic ti ycixpi anajty co ti nidooni Jesús yhuitpa', e co anajty mic'amy ti chögy. 48 Chi Jesús nimay je töxyjäy:

—Töxyjäy, ti mdzögy co ti xymibicyich, nicx jotcuyc.

49 Yam Jesús anajty ycapxpy, co ymíñ tüg jäy huídi anajty ti choon ma Jairo ytijc; je Jairo nihuindzin'ajtp anajty je judiojäy naymujctac, chi nimaayi:

—Ti y'ögy miich mnñx, ca' mjac'amayñy nigi yi Huindzin Jesús.

50 Co Jesús jadu'n midooy, chi ymínañ:

—Ca' mdzigñy, mibijcich janchtiy, etz tzögip yi mnñx.

51 Co Jesús ytigñy ma je tijc, chi ca' a'ixñy nicxy ytigñy hueñypínity müid je'. Jëyi Pedro, Jacobo, Juan etz je töxy'anäg ytaj yteedy ytigñy müid Jesús. 52 Chi tüg'öciy je mayjäy ajcxy janch yaaxp, janch ñe'mgixy müid je töxy'anäg ycixpi. Chi Jesús ymínañ:

—Ca' myaaxcixy, ca' yi' ögity, maab yi'.

53 Chi nigooob ajcxy nixiicy com ti anajty nejhuñygyixy co ti y'ögni. 54 Chi Jesús majch je töxy'anäg ma yci', chi migapxy mic, ymínañ:

—Töxy'anäg pídig.

55 Chi je' yjugypijcy, e mic'amy ypidígy. Chi Jesús ymínañ co huen yajcaaygixy yaj'uuccixy. 56 Chi ytaj yteedy ajcxy ooy chigñy yjihuiy. Chi Jesús nimay co ca' huaad pinjaty müidmíydägipy jadu'n nej ti ytuñy yjadyi.

9

Jesús quejxy ayuccapxhuäcxp je nimajmetzpi ydiscípulos ajcxy

1 Co Jesús yajyöymujctay je ni majmetzpi ydiscípulos ajcxy, chi moy je mic'ajt jaydëbi yajtzögipy pa'mjäy, etz moy ajcxy nañ jadu'n cötüjcin co ajcxy ixquexipy je ca'oybi. 2 Chi quejxy je' ajcxy ñicxy capxhuäcxixy jadu'n nej Dios y'ane'my, etz yajtzoocixy pa'mjäy. 3 Chi Jesús ymínañ:

—Ca' ni ti tü'amgixpi mminíxcixy; ni mgaminícxip mdajc, ni mmorraal, ni mgaagy, ni meef, e ni mgaminíxcixipy ajcxy metz mhuit. 4 Huen tim huídi tijc ma anajty mdigñygyixy, jim ajcxy huí'mgixipy, e jim ajcxy nayyöyhuäcxñyb.

5 Hueñy'ma'myity ma ca' jäy xycöbñjccixy, co ajcxy mbdzímgyixipy ma je' cajp mhuinnéjpcixipy mhuinjáaxcixipy je naaxjoc ma mdecy. Jada je' tiy'ájtíp co Dios tzaachytunipy yi jadu'mbi jäy ajcxy.

6 Chi ajcxy ñayyöyhuäcxtaayi, ñicxy ajcxy cajp cajp capxhuäcxixy je oybi ayuc, etz yajtzoocixy pa'mjäy hueñytmma'amyity.

Co Juan el Bautista y'ögy

7 Je rey Herodes co nejhuñy jadu'n nej Jesús anajty mijhuinmañ tuñ, chi ooy anajty tzachnejhuñhuañ pin je' anajty. Com nijëity jäy anajty ymínaangixy co ti Juan yjugypicy. 8 Chi jacnaagity ymínaangixy co Elías ti ñayguëxgyii, e jacnaagity ymínaangixy co tüg Dios y'ayucnaajtzcapxñybi je' ti yjugypicy huídi jecy'ajty octzinaybi. 9 Chi Herodes ymínañ:

—ñich yi' ni'ane'mdiy co huen ajcxy Juan ycohuaajc yajmínaajci. ¿Pin jada jada' huídi ñich nmidooybich co tzachnimíydaaccixy?

Herodes ooy anajty ja'ixa'n̄ Jesús.

Jesús yajcay migoox mil jāy

¹⁰ Co je apóstoles ajcxy yhuimbijty, chi yajmüdmüydactay ajcxy Jesús tüg'óciy tübi anajty túngixy. Chi ac jēyi ydiscípulos müd'ajty Jesús mǐjtig'íduum huíngon ma tüg cajp huídi yxü Betsaida. ¹¹ Co je mayjāy ajcxy nejhuüy, chi ajcxy panícxxy Jesús. Chi Jesús je mayjāy cöbǐjctay etz yajmüdmüydacy ajcxy Dios y'ayuc yti'y'ajt nej ané'min cötújcin müdity. Jesús nañ yajtzöcpy anajty huídijaty yajtzoyíhuaam.

¹² Co oy chu'íyüñi, chi ymǐjhuāgy je nimajmetzpi ydiscípulos ajcxy ma Jesús, chi ajcxy nimay:

—Capxycixni müd jadayaabi mayjāy ajcxy, jaydēbi ajcxy ñicxipy ma yi cajp huídi huínduy agon yajpaatpi, huen nicxy ixtaaygixy jāttac etz jim ajcxy paadipy caayin uucin. Com hue' jada it ma ñich ajt yam nyajpaatim mǐjtig'íduum.

¹³ Chi Jesús ymínañ:

—Mooygix müich yi' ajcxy ycaayin y'uucin.

Chi je' ajcxy y'adzooy:

—Jēyi ñich ajcxy nmüdidyich migoox tzajcaagy e mejtz acx, nigo co ca' ñich ajcxy njuy caayin uucin müd jadayaab mayjāy.

¹⁴ Hue' anajty oy nimigoox mil je jāy. Chi Jesús nimay je discípulos:

—Yaj'ixtaaccix ajcxy yi mayjāy.

¹⁵ Chi ajcxy jadu'n cuyduñ, yaj'ixtactay ajcxy je mayjāy. ¹⁶ Chi Jesús conǐgy je migooxpi tzajcaagy, etz je metzpi acx, chi ypa't'ixxy tzajpcíxy conuucxy je tzajcaagy etz acx, huín'it tujc-huācxxy moy je' ydiscípulos ajcxy, huen yajhuācxíxy ma tüg'óciy mayjāy. ¹⁷ Chi ajcxy ycaay cüxyi, huín'it ajcxy yajmujcy je tzajcaagy yconaxy etz je acx yconaxy majmetz cach.

Pedro capxypidzimy co Jesús yi' je' je Cristo

¹⁸ Chi jadu'n yjajti co Jesús anajty ycapxtāgy ahuíngujc müd je' ydiscípulos ajcxy, chi Jesús je' ajcxy y'amidoy:

—¿Pin ñich jāy xytijy?

¹⁹ Chi ajcxy y'adzooy:

—Nijējity jāy xytijy co müich je Juan je Bautista; nijējity ymínaangixy co müich je' Dios y'ayucnajtzcaxíybi huídi jecy'ajty tzíñay e ti yjugypicy.

²⁰ Chi Jesús ymínañ:

—¿Müich ajcxy, pin ñich müich ajcxy xytíjicxy?

Chi Pedro y'adzooy:

—Dios yCristo.

Jesús capxypidzimy co y'öga'n̄

²¹ Chi Jesús pidacy ané'min etz cötújcin co ca' ajcxy ni pin yajnimāhuip co yi' je' Cristo. ²² Chi Jesús ymínañ:

—Ooy ycopícyty co ñich, je jāy huídi tzoön tzajpjoty, canaag nax ayo'n nbáadibich, ca' xymǐjpidägibich je mǐjjāydijc, je teedy tungmüdpí, etz je' ajcxy huídi yaj'ixpicy Dios ñecy, e co n'ögip njugypigípyich codugüg xü.

²³ Chi Jesús nimay ajcxy nidüg'óciy:

—Pen ji pin xypanicxa'ñich, huen jāydgoydāy yci'm tzójcin etz huen xypanicxyich jabom jabom, oy nej ytimyjadipy ytimy'ayoohuipy, tim ni-paady nej jihuüy ti cabǐgy mgruudz jabom jabom etz pajamgích. ²⁴ Huen pinjāy huídibi ca' yega'n̄ yi yjugy'ajtín ma yi o'cin müd ñich ycixpi, hue' je'

yajtigoyamy yi' yjugy'ájtín. E huen pinjäy huídibi yegamy yjugy'ájtín ma yi o'cín miíd ñich ycixpi hue' je' ypadamy yi jugy'ájtín. ²⁵ ¿Ti tüg jäy ypatpy, pen ti paady tüg'óciy cohuit'ájtín comeñ'ájtín ya naaxhuñ e nayyajtigoyii, etz ca' y'alma yajnídzyögy? ²⁶ Yi jäy ajcxy pinjaty xymídzöydúnibich n'ayuc, ñich je' je' jäy huídí tzoom tzejpoty, nañ nmídzöydunñybich je' ajcxy co anajty nhuimbityich ya naaxhuñ, miíd ñich n'ané'mín etz nmic'ajtich etz nDeedyich y'ane'm'ajt, etz ymic'ajt, etz miíd je' ángeles ajcxy ymic'ajt huídibi huádz yjot yhuinma'ñ. ²⁷ Janch ñich miich ajcxy nimäy co ji jäy ma miich ajcxy huídibi ixipy Dios y'ané'mín jayijp ca'ni anajty y'ögy.

Jesús yajtigach je ñinícx

²⁸ Chi miductujc xiibi maabi anajty jada ayuc jadu'n capxy, Jesús huodzoñ Pedro, Juan etz Jacobo, chi miíd'ajtpy jim ma tüg copjijp Dios miibjctzoob. ²⁹ Yam anajty Dios ooy miibjctzoy, co Jesús yhuññijp oytigach, e je yhuít yjajty janch poob janch adícxp. ³⁰ Chi metz jäy ñaygüexíci, miídgapxy miídmíydägy Jesús, Moisés je' anajty etz Elías. ³¹ Huídí ajcxy naygëxíci janch jühuidityi anajty ajcxy je tücxin jájin miídity, nigapxcíxy nimíydaaccíxy je o'cín huídí Jesús ypadamy jim Jerusalén. ³² Pedro, Jacobo etz Juan ooy anajty ajcxy chachmáhuani, chi ajcxy mi'ógtigooy. Co oy ymäyhuijcixy, ijxy ajcxy Jesús y'adícxin y'ajajín, etz nañ jadu'n ijxy ajcxy je nimetzpi jäy ajcxy huídí anajty Jesús miídmíydäcxy. ³³ Jadu'n yjajty co yi jäy ajcxy puyöyduutni Jesús. Chi Pedro Jesús nimay:

—Huindzin, jotujc ñich ajt ya. Tzoc tugüg tíjc yaj'oyñiyim, tüg miich mjédüby, jadüg Moisés jédüby, etz jadüg yi Elías jédüby.

Pedro ca' anajty nejhuñy ti ycapxy. ³⁴ Yam ñigi anajty ycapxy co joc ñaaxcidacy huídí yajnídigoy je' ajcxy. Chi ajcxy ooy chigüy co oy joc yajnídigoydáayigixy. ³⁵ Chi tüg ayuc yajmidooy ma je joc ymíñañ:

—Ñich jada n'ung'ajtpy, ooy ndzocyich njíhuñyich. Amido'íjti miich ajcxy yi' y'ayuc.

³⁶ Co je ayuc y'amoñ, chi ajcxy ijxy Jesús naydüg yhuí'my, chi ajcxy nañ jadu'n amoñ. Huin'it xi' ni ca' ajcxy miydacy miíd ni pin jadu'n nej anajty ti y'ijxcíxy ti ymídoogixy.

Jesús yajtzögy tüg yeegy'anäg huídibi anajty ca'oybi miíd

³⁷ Com jabom co Jesús, Pedro, Jacobo etz Juan ajcxy ymíñajcy ma je copjijp, chi ooy mayjäy choñ oyjijpcobadíyí. ³⁸ Chi nidügti jäy ycapxy janch mic, ymíñañ:

—Huindzin tun may'ajt ix ñich n'ung, yi' ñich tügpaic n'ung'ajtpy. ³⁹ Huen mináajity ca'oybi ymachyíi, chi timetiini yaaxquëgy yajyachyíi yajquídüyí, etz yajpidzimy oy yhuin'opy y'aa'opy e adzaach y'ixmachyíi. ⁴⁰ Ti ñich may'ajt nbjctzooyich ma yi mdiscípulos ajcxy, co huen yajpidzimy je ca'oybi, per ca' yi' ajcxy ti mimadágy.

⁴¹ Chi Jesús ymíñañ:

—Miich jäy ajcxy huídibi ca' miibjcp ca' ajcxy mmíjpidäga'ñ yi tiy'ajt! ¿Naag xi' ñich njac'idipy ma miich ajcxy nmímecxtújcixipy? Mimin m'ung ya.

⁴² Co anajty yhuingoñ, chi je ca'oybi yajcidaay je yeeg'anäg, chi ooy yajyatzcootí. Chi Jesús ix'ojy je ca'oybi, e yajtzoooy je yeeg'anäg, chi yteedy yajcídigüñí. ⁴³ Chi tüg'óciy je mayjäy ajcxy ooy chigüy miíd je mijhuinma'ñ huídí Dios ytuun.

Jesús capxpídzimy jadüg'oc co y'öga'ñ

Jesús ydiscípulos ajcxy ooy jihuüygixy huinmaaygixy co Jesús jadu'n ymínañ:

44—Miich ajcxy yajxon mido'mbíjccix jada ayuc. Hich je' je jáy huídi tzoon tzajpjoty, hue' nyajcüyegañich ma pocyjäydijc ajcxy ycí'am.

45 Je' ydiscípulos ajcxy ni ca' anajty huinjihuüygixy, tzigüyb anajty ajcxy, paady ca' ajcxy jaty nej yaj'amídogixipy.

¿Pin je' nīgi jacmíjip?

46 Chi Jesús ydiscípulos ajcxy ytigüy huinmay'ahuídiijt, nejhüühuaangixy pin je' jacmíj'idam. 47 Jesús nejhüüy je' ajcxy yjot yhuinmañ huídi nayyajmídmíydáacip ajcxy, chi tüg pi'c'anäg huijtzigy, ypidacy ma ymíj.

48 Chi Jesús ymínañ:

—Pinjaty xycöbícipich jadu'n nej jada pi'c'anäg xycöbícycich míid ich nxí ycixpi, ich yí' anajty ti xycöbícycich; je huídibi ich xycöbícipich, cöbígíib je huídi ti xyquexyich ya naaxhuíñ. Yí' huídibi jacmútzip ma miich ajcxy, yí' je' jacmíjpi.

Pin ich ajt ca'p xymíjotma'tim, je' ajt xymíjnicpejtim

49 Chi Juan ymínañ:

—Huindzin, ti ich ajcxy n'íjxcixy co tüg jáy ti yajpidzimy ca'oybi míid miich mxíi miich mmic'ajt. Ti ich ajcxy yí' nyaj'ojyich com ca' yí' ich ajt xypahuídiijt.

50 Chi Jesús ymínañ:

—Ca' myaj'ójcixy yí'; pinjaty ca' xymídzip'ajtim, ich ajt yí' nmíid.

Jesús jijpcogapxíy Jacobo etz Juan

51 Jadu'n yjajti co tiempo yhuingoni mína Jesús ñícxip tzajpjoty, chi yhuinmañ pídacoy co nicxañ jim Jerusalén. 52 Chi Jesús quejxy cogapxy jayíj jättac pijtzoobi. Chi je cogapxy'ajtpi ñícxxy ytigíy ma je samaritano jáy ajcxy ycajp, jättac pijtzoobi. 53 Chi je' samaritano jáy ajcxy ca' yegañ jättac, com ñejhuüygixyp co Jesús etz ymígütiyc ñícxxy anajty ajcxy jim Jerusalén. 54 Co jadu'n Jesús ymígüg ajcxy nejhüüy co je samaritano jáy ca' jättac yegañ, chi Jacobo etz Juan nimay Jesús:

—Huindzin, ¿nej m'a'ixüyb ich ajcxy n'ocni'ane'mdíyich huen jün cäy huídibi tzomb tzajpjoty, jigix yí' samaritano jáy ajcxy ycíjxtáhuipy jadu'n nej je profeta Elías ytuuñ jecy'ajty?

55 Chi Jesús y'íjxhuimbíjty, ogy Jacobo etz Juan, nimay:

—Miich ajcxy ca' mnejhuüygixy ti jot ti huinmañ miich ajcxy míid. 56 Hich, je jáy huídi tzoon tzajpjoty, ca' ti nmíñich ya naaxhuíñ co jáy yjugy'ajt miñ nyajtígooyich, hue' jánchty ti nmiñich co jáy yjugy'ajt nyajtzóogíich.

Chi ajcxy ñícxni huíngbi cajn jättacp.

Je pinjaty anajty Jesús panícxam

57 Jadu'n yjajti co anajty ñícxycixy ma tüg tú'aa, chi tüg jáy Jesús nimay:

—Huindzin, ich miich nbanícxamy oy tim ma'amy miich mñícxxy.

58 Chi Jesús y'adzooy:

—Yí' huaax ymíid yí' ajcxy yjut, etz yí' joon ajcxy ymíid ajcxy ype'ñ, ich je jáy huídi tzoon tzajpjoty ca' nmídidyich ma nmáhuíbich ma nbócxíibich.

59 Chi Jesús nimay jadüg jáy:

—Pajamgíich.

Chi je jáy y'adzooy:

—Huindzin, jayijp iich ndeedy n'ocyajnaaxtigihuiipy.

⁶⁰ Chi Jesús ymínañ:

—Jébi yajnaaxtigihuiipy huidibi ca' xypanicxa'ñich. Nicx miich capxhuäcxi Dios y'ayuc y'ané'min.

⁶¹ Chi jadüg jäy ymínañ:

—Huindzin, nbanixamy yam. Tun may'ajt ocnajtzmadziygich nicxy n'ocmüdcapxycíxyich njuugy nmigügich huidi jim ma iich ndijc.

⁶² Chi Jesús ymínañ:

—Pínjaty yhuinma'ñ ti pidägy co Dios ytung tunaani, ca' huaad ixmach je tung, tím jadu'n nipaady nejihuiy tüg jäy ti ytigy naaxjidziitzi müid arado, e ca' huaad y'ijxhuimbity com co huinduum arado nicxihuiipy.

10

Jesús quejxhuäcxy je nidugi'pxmajcpi

¹ Huin'it co jada jadu'n ti ñaxy, chi je Huindzin Jesús huin'ijxy jatugi'pxmajc y'ixpijcpidijc, chi quejxígy cogapxy metz metz ma tüg tüg cajp majaty ñicxa'ñ.

² Chi Jesús nimay yi' ajcxy:

—Janch je cosecha ooy ti yhuindiiy, yi midumbi janchtiy hueeni. Chocpy co nbijctzóohuim ma nHuindzin Dios co huen quexy ytumbidijc ma yi cosecha. ³ Nicxcix, iich miich ajcxy nguejpxy jadu'n nej cöbixy y'ung yhuidity pa'uc agujc. ⁴ Ca' mminicxcixy mbijty, ni mxäcxuumy, ni mgig, e ni pin ca' mgapxpócxixipy tü'am. ⁵ Co ajcxy mdigihuiipy huenytmítüjcity, jayijp ajcxy mináangixipy: “Ji jotcuic'ájtín ma jada tjc.” ⁶ Pen yung naxy je' ajcxy yajpaady, miich ajcxy je mgapxpooocxin jotcuic'ajt myegipy ma je' ajcxy; pen ca' ajcxy yjadu'nity, naadigi'adip huidi anajty ti mgápcixy. ⁷ Nañ hui'mgix ma je tjc, chi ajcxy mgayipy m'ügipy huidi je jäy anajty ajcxy xymooyb, com je tumbi paatip je' je ymuju'ñ. Ca' ajcxy mhuididipy jayjin jaydijc. ⁸ Huenytmihuidi cájpity ma anajty mdigiygixy, pen je jäy ajcxy xycöbijc, caaygix uuccix huidi anajty jäy ajcxy xymooyb. ⁹ Yajtzöoccix yuujäy pa'mjäy huidijaty jim ma je' ajcxy yajpaady, etz yajnimaaygix: “Je Dios y'ané'min huingóniñ yi' ma miich ajcxy.” ¹⁰⁻¹¹ Huenytmihuidicájpity ma anajty mdigiygixy, e ca' anajty jäy xycöbigaangixy, co ajcxy mdzonaanip, nimaaygix: “Yi mgajp naaxjoc huidi ti ypety ma iich ndecy nhuinnebáamyich, yi' je' ixpejt co Dios ajcxy xychaachtunipy. Chi nejuhuygix miich ajcxy jada co je Dios y'ané'min ti ymihuingoni.” ¹² Iich miich ajcxy nimayb co huin'it xii co anajty yajhuaad'aty, Dios nigí tzaachtunaangixy je jäy huidi ajcxy ca' miich ajcxy xycöbiga'ñ, ca'ydí Sodoma cajpjäy.

Je cajp huidijaty ca'p ycapxymido

¹³ Chi Jesús yjacmínañ:

—iMiich ayoob ajcxy Corozín jäy! iMiich ayoob ajcxy Betsaida jäy! Co jim ma je Tiro cajp etz Sidón cajp caytuni cayjajti je Dios ymijhuinma'ñ huidi ti ytunyi ti yjadiyi ma miich ajcxy, jécyip ixxyipy ajcxy yjothuimbijtni, etz ti yajniquëxicixy ixxyipy müid je yhuít íñaaygixy saci nijen nícuyjam íxcuyjam (je' je tiy'ajt co ooy ytajcixy ymaygixy müid ypocy ycixpi). ¹⁴ Janch jadu'n yjadipy co anajty Dios yajnigödugiy, nigí o'ctiy miich ajcxy ayo'n mbaadiyb ca'ydí jadu'n nej Tiro jäy etz Sidón jäy. ¹⁵ E miich ajcxy Capernaum jäy ajcxy,

¿nej mmīnaangixy mjātcixipy tzajpjoty? Hue' m'idaaccixyp miich ajcxy ma yi ayoodactuuby.

¹⁶ Je jāy ajcxy huīdi miich ajcxy m'ayuc xymidoohuip, nañ xymidoohuīb yi' ajcxy iich n'ayuc. Je jāy ajcxy huīdibi miich ajcxy ca' xy'ixa'ñ, nañ ca' je' ajcxy xy'ixa'ñich; e pīnjaty ca' xy'ixa'ñich, nañ ni ca' yi' ixaangixy je Dios je huīdi ti xyquexyich ya naaxhuīñ.

Chi ajcxy je nidugi'pxmajcpi yhuimbjtcixni

¹⁷ Chi je nidugi'pxmajcpi huīdi Jesús yquejx ayuccapxhuācxpi yhuimbjttay ajcxy janch jotcujc, ymīnaangixy:

—Ixti je ca'oybi ti iich ajcxy xycapxycōbījccixy mīid miich mxii.

¹⁸ Chi Jesús ymīnañ:

—Ti n'ixyich nej je ca'oybi yhuīndzin ti ycāy, jadu'n nej jihuīy ti ycāy ti ycodigīy tzajpcixy, jadu'n nej tūg huīdzuc. ¹⁹ Fich miich ajcxy mic'ajtīn ti nmoogixy, jaydēbi ca'oybi ca' xymimadāaccixipy, tim jadu'n nipaady nej jihuīy tza'ñ etz ca'ty myajhuācpéjtcixy e ca' nej mjājtcixy. ²⁰ Nīgi miich ajcxy jotcujc'ajtīc co ajcxy mxii y'jtcixy cojay jūiby tzajpjoty, ca'ydī co ajcxy ca'oybi xycapxymidoogixy.

Chi ooy Jesús yjotcugiy

²¹ Huīn'it Jesús yjotcugīy mīid je Dios yjihuī'ñ ymic'ajt, ymīnañ:

—Nyajnajxypich Dioscojuyip ma miich, Dios Teedy, tzajpjoty Huīndzin etz je naaxhuīnybi Huīndzin, co ti myūch jada mijhuīnma'ñ ma yi cohuīnma'ñ jāydīc, etz ti myajnejhuīy je jāy huīdi ca' y'ixpīcyity. Dios Teedy, jadu'n miich ti mdūñ com jadu'n miich ti mjāygidacy.

²² Ndēedyich ti xyajcīdigīydāyich tūg'ōciy tijaty mic'ajt oy'ajt. Ni pīn ca' iixcājp pīn je' Dios y'ung'ajtpy, jēyi nDēedyich tūgpajci pīn xy'ijxcājpīch. Ni pīn ca' iixcāpy pīn je' nDēedy'ajtypīch, jēyi je Dios ung tūgpajci huīdi iixcājp, etz jacjadyīi ma je ung yajnīguē'īga'ñ.

²³ Chi Jesús nī'ijxhuīmbjty yi' ydiscīpulos ajcxy, ahuingujc ajcxy nīmay:

—Jotcujc ajcxy je jāy ajcxy huīdi iixcāxp jadu'n nej miich ajcxy ti m'jxcixy.

²⁴ Fich miich ajcxy nīmayb co ooy may Dios y'ayucnajtzcāpxīyb etz rey ajcxy ja'ixa'ñ huīdibi miich ajcxy m'ijxpy, e ni ca' ajcxy icy; etz jamīdoo'ida'ñ huīdi miich ajcxy mīdooyb, e ni ca' ajcxy mīdooy.

Ijxpejt ma tūg samaritano oyjāybi

²⁵ Chi tūg jāy huīdi yaj'ixpīcjp Dios ñecy ytīnaay'ahuīy jot'ixy huīnma'ñ'ixy Jesús, chi y'amīdooy:

—Huīndzin, ¿ti huaad ndunīpīch co iich jugy'ajtin huīnīxīibi nbāadībīch?

²⁶ Chi Jesús y'adzooy:

—¿Ti jaybétyip ma yi Dios ñecy? ¿Nej mhuīnjihuīy co mncycāpxy?

²⁷ Chi je ley huīndzin y'adzooy:

—Mdzogīpy mjihuīhuīpy mHuīndzin Dios mīid tūg'ōciy m'aa mjot, mīid tūg'ōciy m'alma, mīid tūg'ōciy mmījaa, etz mīid tūg'ōciy mjot mhuīnma'ñ, e mdzogīpy yi mījīn mīdījc jadu'n nej miich cī'm naychogyīi.

²⁸ Chi Jesús y'adzooy:

—Ti ooy yajxon m'adzooy. Tun yi', e mdzināhuip huīnīxi.

²⁹ E je' nañ jadu'n tim tīy ñejhuīhua'ñ, nīmay Jesús:

—¿Pīn iich nmīdījc'ajtpy?

³⁰ Chi Jesús y'adzooy:

—Tüg jäy choñ jim Jerusalén ycidägy anajty jim Jericó, chi oy meetzpi minaybadyii. Chi ajcxy tüg'óciy yhuit e tijaty yi' anajty ymüid pijtaayi. Chi ajcxy ooy huinhuojpy jipphuojpy huingojxy jipcojxy, chi ajcxy ixmach jahueengi ögy, chi ajcxy ñicxni. ³¹ Tüg judío teedy yminagiiy ma je jimbí tü'aa. Co y'ixy je tzaachijäy, chi jüyöyñajxy. ³² Nañ jadu'n yminagiiy ma je jimbí tü'aa tüg levita jäy huidi tuumb ma Dios ytijc, co jim yjaty mihuingon je tzaachijäy, co oy ixy, nañ chi jüyöyñajxy (ca' pa'ayooy). ³³ Chi tüg samaritano jäy anajty jim naxiy, co mihuingoñ je tzaachijäy, co oy ixy, huin'it ooy pa'ayogooty je tzaachijäy. ³⁴ Chi je' nimijhuägy, chi puji e xojtzi je chaach'au, nañ tzoyiiyi chaach'au müid aceite etz vino. Chi yaj'yujcpety, e yajnicxy jim ma yjättac, e jim cuend'ajty. ³⁵ Com jabom co anajty ñicxaani, chi yajpidzimy mejtz denario meeñ, moy je codijc nimay: “Cuend'at jadaayaabi tzaachijäy, jadu'n nej anajty mjacmeeñyajuñ, co ñich anajty nhuimbityich huin'it nmigüedipy.” ³⁶ ¿Ma je nidugiiipi jäy pin je oybi ti tuñ müid je jäy huidi anajty je meetzpi ti ymeechyii ti yajtzaachiyii?

³⁷ Chi je jäy huidi Dios ñecy yaj'ixpijcp Jesús y'adzooy:

—Je huidi ti yajuñ je pa'ayo'ñ.

Chi Jesús ymínañ:

—Ñicx müich, e tun nañ jadu'n pa'ayo'n.

Jesús yajpaady ma Marta etz María ytijc

³⁸ Chi jadu'n yjajty co Jesús anajty ytüyöy, chi ytigiiy ma tüg mutz cajp. Jim anajty tüg töxyjäy huidi anajty yxií Marta, yi' yajjättaci ma ytijc. ³⁹ Je Marta ymüid anajty tüg y'uch töxyjäybi huidi anajty yxií María, chi je' y'ixtacy ma Jesús ymijc, amídooy'ijti je' y'ayuc. ⁴⁰ Chi je Marta ooy anajty jim chachjottigoy tuñ anajty tigatii ma ytijc, chi nimijhua'cy je Jesús nimay:

—Huindzin, ¿ca' nej mnayjihuiiijii co ñich naydüg yam tzach nayyaj-tuñyijiiichi? Níma' yi María co huen xypubétyich.

⁴¹ Chi Jesús ymínañ:

—Marta, Marta, yi maytung müich mdzachmijottigooyb. ⁴² Tügpaic ji, huidibi ooy ycopícyip. Yi María ti yi' huin'ixy je oybi huidi ni pin ca' ypiigiiyb.

11

Jesús yaj'ixpijc nej jébi mibijctzoohuim Dios

¹ Jadu'n yjajti co Jesús anajty Dios mibijctzoy ma tüg it lugar, co yajmay, chi tüg discípulo ñímaayi:

—Huindzin, yajni'ixiiyigich ajcxy tzajcapxycapxií, jadu'n nej Juan yajni'ixiiy yi' ydiscípulos ajcxy.

² Chi Jesús ymínañ:

—Co ajcxy Dios mmibijctzohuiipy, jadu'n minángixipy:

Dios Teedy, müich huidi tzajpjoty tzínaayb, huindzigiiy müich mxii y'ity. Huen miñ ya müich yi m'ané'min. Huen mdzójcin yajcuyduñ ma je jäy yjot yhuinma'ñ jadu'n nej yajcuyduñ jiiby tzajpjoty.

³ Mooygich ajcxy ngaayin n'uucin jabom jabom.

⁴ Méecxibich ajcxy nbocy ngaydey huidibi ñich ajcxy ndundigooyb, jadu'n nej ñich ajcxy nmecxyich huidibi ajcxy xymidundigooybich. Ca' m'a'ixiiy co ñich ajcxy huinma'ñ tigoyipich. Yajnihuaatzcich ajcxy ma yi jibicpi.

⁵ Chi Jesús yjacmínañ:

—Pinjaty ji ma miich ajcxy huidi tüg ymigüg müid, co ninéxcipy mijcoodz e mmimähuipy: “Migüg, tun may'ajt yajpijctzoogich tugüg mdzajcaagy. ⁶ Tüg ñich nmigüg ti xyñimiñich huidi tüyöyp, etz ca' nmüdidyich ti nmöhuibich.” ⁷ Chi je jäy y'adzooy jibby tigoty, ymínañ: “Ca' xy'amayiyich. Ti ñich ndijc n'agüyñi, etz n'ungich yam nmüdich cijx'am; ca' njatyich nej nbidigibich etz nmöhuipy huidi mbijctzooyb.” ⁸ Ñich miich nimaayb, oy ca' tzojc nipidiga'ñ ymöhuamy huidi pijctzou co migüg'adyii, hue' ymöhuamy jaydëbi ca'ydi yjac'amayiyii, chi yegipy tüg'óciy huidi yajmayajtpy. ⁹ Ñich miich ajcxy nimaayb: Pijctzóogix, e myajmöhuiipy ajcxy. Ixtaaygix, e mbaadipy ajcxy; cogapxiygix, ahuädzip ajcxy mdijc'aguu. ¹⁰ Tüg'óciy je' pin pijctzoob tijaty ma Dios, cidigihuüb; pin y'ixtaayb, ypaadipy; pin cogapxiyb, yaj'ahuatzüb ytjic'aguu.

¹¹ ¿Pin ungeedey ji ma miich ajcxy pen y'ung ypijctzoob tzajcaagy, nej mmöhuiipy tüg tzaaji? ¿E pin ypijctzooyb acx, nej jëbi mmöhuiipy tüg tza'ñi? ¹² ¿Pen ypijctzoyb tzeydüty, nej jëbi mmöhuiipy ca'ty? ¹³ Pen miich jibicjäy ajcxy mnejhuüyb nej oybi m'ung móoygixipy, ¿nej ca' mdijy yjáncity co mDios Teedy tzajpioty xymóoygixipy je Espíritu Santo, pen miich ajcxy mmibijctzohuiipy?

Yajñibijccixy Jesús co müidity mujcu'y mic'ajt

¹⁴ Chi Jesús anajty yajpidzimy tüg ca'oybi ma tüg jäy huidi anajty uumip. Jadu'n yjaty co je ca'oybi ypidzimy, chi je uum ycapxígy. Chi je mayjäy ooy jihuiy huinmay. ¹⁵ Nijëjity jäy ymínaangixy:

—Jesús mijhuinma'ñ ytumyb müid je Beelzebú ymic'ajt, je ca'oybi yhuindzin, paady ca'oybi yajpidzimdäy.

¹⁶ Jacjaydiibi jäy ajcxy co jot'ixaangixy huinma'ñ'ixaangixy Jesús, pijctzooy ajcxy Dios tüg ymijhuinma'ñ. ¹⁷ Co Jesús nejhuüy nej je' ajcxy jot'adyii huinma'ñ'adyii, chi nímay:

—Co tüg gobierno ñaybijc-huäcxyii, chi ñaychiptünigixy miñ xyipy; ñayyajcixigixy ñayyajtigóoyigixy; co tüg quëx jäy ñaybijc-huäcxyii, nañ jadu'n je' ñayyajcixigixy ñayyajtigóoyigixy. ¹⁸ Pen je mujcu' ajcxy ñaybijc-huäcxip, ¿nej jada je mujcu' y'ané'min yjac'idipy? Miich ajcxy minamb co ñich müid ndüñich je Beelzebú ymic'ajt co ñich ca'oybi nyajpidzimy. ¹⁹ Pen jadu'n yi', ¿pin je mic'ajt mooxy huidi miich ajcxy xypahuidijtp co yajpidzimy je ca'oybi? Paady yi' ajcxy ci'm yajniquëxëcp co miich ajcxy mdundigooygixy mgapxtigooygixy. ²⁰ Pen ñich müid Dios y'ané'min nyajpidzimyich ca'oybi, janch jada co Dios y'ané'min ti yjäty ma miich ajcxy.

²¹ Co tüg micjäybi müidity maydujt, e ñaycuend'adyii yajxon, ca' je' ytigoyipy tijaty ymüid. ²² Co yjäty jadüg jäy jacmicpi ca'ydi je', chi ymímadägyii, e ypijctäyii tüg'óciy ytujt huidi anajty ooy jot'amij'adyii, e yajhuäcxipy tijaty anajty ymüid.

²³ Pinjaty ca' xymijnicxpétyich, nmidzipich yi'. Pinjaty ca' ytuñ müid ñich co jäy nyaj'ixpicyich Dios ytiy'ajt, hue' je' ajcxy jäy yajhuinma'ñyidigooyb.

Je ca'oybi co jadüg'oc yhuimbijty

²⁴ Co je ca'oybi ypidzimy ma je jäy, chi je' ñicxy jim tütznaax ijxtägy co ypocxa'ñ. Co ca' paty ypocxtac, huin'it ymína'ñ: “Huimbidaambich ma je jäy yjot yhuinma'ñ ma ñich ti n'octzombi.” ²⁵ Co je ca'oybi yja'ty ma anajty ti chinäy, chi paady je jäy yhuinma'ñ janch yhuädzity janch ooy jadu'n nej tüg

tijc huidi janch huädz pedigity. ²⁶ Chi je ca'oybi ñicxy, e miid miñ jahuixtujc ca'oybi jacjibicpi ca'ydi je'; chi ajcxy ytigüiy ma je jäy yjot yhuinma'ñ, e chinay ajcxy jüby; huin'it je jäy jac'o'ctiy oy yjajtni ca'ydi jadu'n nej anajty jayjip'aty.

Huidi ajcxy janch jotcújcip

²⁷ Co je Jesús jadu'n anajty ymina'ñ, chi tüg töxyjäy mayjäy agujc mic ymina'ñ. —Jotcujc je töxyjäy huidi ti xyajpi'c'aty etz huidi xyajyeegy.

²⁸ Chi Jesús ymina'ñ:

—Je' jacjotcujc pinjaty Dios y'ayuc midoohuip etz cuyduunip.

Jibicjäydic pijctzoogixy tüg tñ'ajt mijhuinma'ñybi

²⁹ Co je mayjäy ajcxy jübigüiy, chi Jesús yminandacy:

—Jadachambi jäy ooy ajcxy yjibicjäy'ity, ypijctzooyb ajcxy mijhuinma'ñ ijxpejt. Ni camina Dios ajcxy ycamöhüiyb ijxpejt, jëyi tügpaic Jonás y'ijxpejt yajmöhüip. ³⁰ Com jadu'n nej je Jonás jecy'ajty ijxpejt yecy ma je Nínive jäy, nañ jadu'n ñich, je jäy huidi tzoon tzajpjoty, nyegaamy'ich ijxpejt jadachambi tiempo miid jäy ycixpi. ³¹ Je töxyjäy reina huidi tzinay jecy'ajty ma madzäcruudz ypidzimy, yí' je' xidáhuam jadachambi tiempo jäy co anajty Dios tiyduna'ñ mayjäy, etz yajpocycähüipy ajcxy. Ixti ma naaxhuiñybi ycgixiy jim je reina chooñ co anajty amido'idani je rey Salomón ycapxy y'ayuc. Ji naaxhuiñ jadachambi tüg Dios yti'ajtmüdpí jacnëgi ymijity ca'ydi Salomón anajty. ³² Co anajty Dios tiyduna'ñ yí may naaxhuiñyjäy, chi je jäy ajcxy huidibi anajty cogajpip jim Nínive pidigaangixy etz yajpocycähuaangixy jadachambi naaxhuiñyjäy. Com je Nínive jäy jothuimbijt je' ajcxy co Jonás Dios y'ayucnajtzcaxxiy. Ji jadachambi tüg Dios y'ayucnajtzcaxxiybi jacnëgi ymijity ca'ydi jadu'n nej anajty je Jonás.

Je tñ'ajt huidibi nipaady nej lámpara ma ajt nninix

³³ Ni pin ca' yüch je jün huidi ti nögpity, ni ca' pidägy jüby cajón pa'tci'py, jëyi janchtiy pidägy je jün ma jündicxpejt, jaydëbi co pinjaty ytigihüipy tigoty, codicxüib je jün. ³⁴ Je jün ma miich ajcxy mninix je' yí miich ajcxy mhuiin. Pen oy miich ajcxy mhuiin, nañ jadu'n tüg'óciy miich ajcxy mninix ymiid yí tiicxin. Pen ca' y'óyity mhuiin, nañ jadu'n ajcxy yí mninix yajpaty agootztuum. ³⁵ Cuend'ájtciy yí tñ'ajt huidi miich ajcxy miid, ca' mgoyützcixy, com co jadu'n nicxy y'ahuimbity nej cootzpi. ³⁶ Pen miich mdí'ajt codicxxy y'ity miid Dios yti'ajt, tüg'óciy quëxigtähua'ñ janch huädz.

Jesús ca'p jäygidaci je fariseos etz je escribas ajcxy yhuinma'ñ

³⁷ Co Jesús ycapxtay, chi tüg fariseojäy may'ajt pijctzoy huen nicxy miid cayii. Co Jesús ytiçtigüiy, chi y'ixtacy ma je caybejt. ³⁸ Co je fariseojäy ijxy jadu'n nej Jesús ytuñ, chi ooy huinmay nej co Jesús ca' ñayajpocyhuächyüi miid ni jayjipni ma anajty ca'ni ycaayñi. ³⁹ Chi je Huindzin Jesús ymina'ñ:

—Miich ajcxy fariseojäy, ooy mnaybidaaccixy tudägyjäy ma jäy ajcxy yhuinduu e ca' yjanchity; chi jada' ma mjot mhuiinma'ñ miich ajcxy ooy m'adzocy, etz miid ajcxy jibic-huinma'ñ; tim jadu'n nipaady nej myajhuäch ajcxy yí tasi ninix, yí texyñinix e chi ajcxy yajhuí'ngixy jibicpi je tasioty je texyoty. ⁴⁰ Miich ajcxy ca' Dios y'ayuc huinjihuüybi! ¿Ca' mnejhuüygyxy co yí pin ti texyñinix yajjoty nañ ti yajcojy texyoty? ⁴¹ Tun miich ajcxy oyjäy'ájtin, huin'it janchtiy anajty ajcxy mhuädzity ma mjot mhuiinma'ñ.

⁴² ¡Ay miich ayooibi ajcxy fariseojäy! Com mbidaaccixy abicy tüg picy je majcpi miid yí Dios ycixpi ixti yí tzajnimang, yí ruda, etz tüg'óciy aay ujtz.

Chi jada' ca' mduñ je oyjäy'ájtín etz tiy'ájtín jadu'n nej Dios tzocy. Hue' je' oy mduñ co tijaty abicy mbidägy müd Dios ycixpi, nañ jadu'n copicy oyjäy'ájtín mdunipy etz Dios ytiy'ajt mguydunipy.

⁴³ ¡Ay miich ayooobi fariseojäy ajcxy! Co ooy m'adzóccixy je iñaybejt huidi cöduum ma naymujctac, etz ooy m'adzóccixy co huen jäy ajcxy xycapx-pöocxcixy oy huindzigíy mayjäy agujc.

⁴⁴ ¡Ay miich ayooobi ajcxy huidi yaj'ixpijcp Dios yley etz miich fariseojäy ajcxy! Oy mjanaybidáacigixy oyjäy e ca' yjáncity, ca' mguydungixy Dios ytiy'ajt, jadu'n nipaady miich ajcxy nej öcpi jut huidi ca' yquëxígy, chi jäy yöy nígix, com co ca' ñiguëxígy.

⁴⁵ Chi tüg jäy huídibi yaj'ixpijcp Dios y'ayuc ymíñañ:

—Huindzin, co jadu'n miich míñañ, nañ jadu'n iich ajcxy ooy jibic nayjihuíyigixy.

⁴⁶ Chi Jesús ymíñañ:

—¡Ay ayooob miich ajcxy Dios y'ayuc huindzin! Miich ajcxy mgóccixyp canaag costumbre huidi je jäy ajcxy ca' mímadága'ñ, e ca' ajcxy mba'ayoogixy, tím jadu'n nipaady nej jihuíy tüg tzímy ti mmooygixy jemxypi huidi ca' je jäy ajcxy mímadága'ñ, e miich ajcxy ni ca' mgíhuáx jéda'ajty mgayajpadaangixy je tzímy.

⁴⁷ ¡Ay miich ayooob ajcxy! com myajcojcxixy je ögpi jut ma je Dios ayuc-najtzcapxíybi naaxtigíy, je huidi m'ap mdeedy ajcxy yaj'o'c. ⁴⁸ Jadu'n yajhuinjihuíy nej jihuíy miich ajcxy ooy mjäygidägy jadu'n nej ajcxy m'ap mdeedy ytundigoy. Janch yi' ajcxy yaj'ögy Dios y'ayucnajtzcapxíybi, e miich ajcxy myajcoj je öcpi jut ma ajcxy je' ñaaxtigíy.

⁴⁹ Paady yi Dios jadu'n huinmay, e míñañ: Nyajni guexipyich miich ajcxy profetas etz y'ayuccapxhuäcxpi, e miich ajcxy myaj'ögip nijëjity, etz jac-naagity mbahuidijttáccixipy. ⁵⁰ Dios yajcomidohuípy jadachambi tiempo jäy ajcxy je ypocy huidi y'ap yteedy ajcxy ytuñ, com maabi naaxhuíñ chondägy, yi' ajcxy yaj'ögy Dios ytiy'ajtmüdpí. ⁵¹ Janch nimaaybich miich ajcxy co Dios yajcomidohuípy jadachambi tiempo jäy ajcxy je y'ap yteedy ypocy co ajcxy yaj'o'cy Dios ytiy'ajtmüdpí chondägy ma Abel, ixti Zacarías huidi jäy yaj'o'c ma Dios ytiyc tiba'gujic.

⁵² ¡Ay miich ayooob ajcxy Dios y'ayuc huindzin! Ca' miich ajcxy m'ixpiga'ñ Dios ytiy'ajt, nañ ca' mdzocy co yi jäy ajcxy ixpigípy; tím jadu'n nipaady nejjihuíy ti mbicy je tiyc ahuaast e ca' miich ajcxy mdigíhua'ñ, e ni mgatzoc-cixy co huingbi nicxy ytigíy.

⁵³ Co Jesús anajty jadayaab ayuc yajnímaaygixy, chi je Dios y'ayuc huindzin etz yi fariseojäy ajcxy jotmátcooty chi yaj'amídogoty ajcxy may ayuc. ⁵⁴ Ñayñimáayigixy miñ xyipy co huen amído'íjt Jesús y'ayuc, jigix jëb páatcixipy huidi jëb müd xígixipy.

12

Jesús yaj'ixpicy co ca' huaad pinjaty naybidaaci oyjäy pen ca' yjáncity

¹ Chi je mayjäy ooy nimujcy Jesús, janch jadu'n ñay'adijiy ñay'agodíyigixy, chi Jesús nimaydacy je' ydiscípulos jayíjp:

—Nigüendi müd yi fariseojäy ajcxy nej ajcxy yjäy yaj'ixpijccixy. Yajxon yi' ajcxy ycapxy ymíydägy, chi ca' cuydungixy. ² Ca' ji ti huidi ijtp ayüch nicxy

ycajaynejhuïy, nañ ni ca' ji ti huïdi ijtp ameech nicxy ycaniguëxigÿ. ³ Huen huïdi ayuc miich ajcxy ameech mgapxy, yajnejhuïhuip yí'. Huen huïdibi ayuc huïdi ti mnayyajnimáayigixy ameech jiiiby tigoty, mic yajcapxhuäcxip tijc nigixy.

Pin jëbi huaad ndzigiiyim

⁴ Chi Jesús yjacminañ:

—Miich ajcxy nmigügtijc, ïch miich ajcxy nimaayb co ca' mdzigiiygixy yí jây ajcxy huïdibi ninïcx yaj'o'cp, com ca' jac ni ti ajcxy tunipy. ⁵ ïch miich ajcxy nyajni'ixïhuipy pin huaad jëbi mdzigiiygixy. Yí' janch mdzigiiygixy yí Dios huïdibi jugy'ajt pijcp, e huin'ti müd je' ymic'ajt jëbi quexipy m'alma ma je mij jün. Yí' janch mdzigiiygixy yí'.

⁶ ¿Nej ca' jây ajcxy ytoogyii migoox joon müd metz pi'cmeñ? Dios ni tüg yí' ajcxy ca' jâydigooity. ⁷ Ixti mgöhuay ajcxy ac michoy Dios müdity. Ca' mdzigiiygixy, jactzou nigí miich ajcxy ma Dios ca'ydi pi'cjoon ajcxy.

Je pinjaty ca'p midzöyduñyii Jesús mayjäyoty

⁸ ïch miich ajcxy nimaayb co pinjaty ma miich ajcxy huïdi capxpizimp mayjäyoty co xymibicyich xymijpidägyich, ïch, je jây huïdi tzoon tzajpjoty, ngapxpizimpicyich co ti ngöbicyich jadu'mbi jây ma Dios y'angeles ajcxy yhuïnduu. ⁹ Pinjaty ca' xycöbicyich mayjäy'agujc, nañ jadu'n ïch yí' ca' ngöbigipyich jiiiby ma Dios y'angeles ajcxy yhuïnduu.

¹⁰ Tüg'öciy jây huïdi jadu'n ïch, je jây huïdi tzoon tzajpjoty, xyñigapxp xyñi'ojiiybich Dios huinmecxiib. Chi jada' pinjaty nigapxp ni'ojiiyb je' Dios yjihui'ñ (je Espiritu Santo), yí' janchtiy Dios ca' yhuinmecxiyb.

¹¹ Co mmidzip ajcxy xyajnicxip ma naymujctac, ma codungdijc, etz tungmüdpí yhuïnduu, ca' mdájip mmáyip nej m'adzöogixipy, e ca' mhuinmayipy nej ajcxy m'adzohuipy. ¹² Com je Dios yjihui'ñ huin'ítíy ajcxy xyajni'ixïhuip nej huaad m'adzoogixy.

Naygüend'ajtigixy ca'p adzojccixy comeñ' adii

¹³ Chi nidügti je mayjäy yminañ:

—Huindzin, nima' n'ajchich co huen yajhuäcxy müd ïch huïdi ndaj ndeedyich ñidungiy.

¹⁴ Chi Jesús yminañ:

—Yëydijc, ca' ïch ni pin ti xypidägyich ane'mbi ma miich ajcxy etz yajhuäcxpi.

¹⁵ Chi Jesús nimay je jây ajcxy:

—Ijxcix naygüend'ajtigix, ca' m'adzojccixy comeñ'adii, com je m'alma yjugy'ajtin ca' je' nïdzoocin'adyii huïdijaty miich ajcxy müd.

¹⁶ Chi ajcxy yajnimay tüg ayuc, yminañ:

—Jim anajty tüg comeñyjäy huïdibi anajty ooy mij ypidägy yajpidigÿ. ¹⁷ Je comeñyjäy anajty ooy ci'm huinmay ma yjot yhuinma'ñ, yminañ: “¿Ti n'octunipich com ca' nmüdidyich ma nyajniigidägibich yí tiiibi y'ity?” ¹⁸ Chi yminañ jotjoty huinma'ñyoty: “Nyajpidicnibich ndzëx, e ngöjibich jacmijpi, chi tüg'öciy jiiiby nibdactähuibich tiiibi y'ity.” ¹⁹ Co jadu'n ndunipyich, chi jëbi jotcuyc ndzinähuibich, com ooy anajty nmüdidyich pidägy yujcpicy, jëbi canaag jimijt niboocxyich etz jëbi ngay n'ügyich jotcuyc. ²⁰ Chi Dios nimay je comeñyjäy: “Ooy jibic-huinma'ñ miich müdity. Cham coodz ïch miich nibijctzohuïhuaaniy yí m'alma (m'ögip), e co anajty ti m'ögy yí huïdibi ti

myujc'picy, ¿p'in yi' je' ad'ib'?" ²¹ Jadu'n yjajty yi' ajcxy huídibi ymeeñ'idi'ñ ci'm yujc'p'ijc, ca' yi' ajcxy jilby ycomeeñ'ity ma Dios yhuinduu.

Dios ycuend'ajtpy y'ung y'anäg

²² Chi Jesús nimay je y'ixp'ijc'pidijc:

—Paady ajcxy nimaaygixy co ca' huaad mjottigooygixy ma yi mdzináayin yi mjogy'ájtín, huídi mj'xcxcixipy mgáaygixipy, huídi m'iid mnin'icx mxó'jxcixipy. ²³ Yi jugy'ajt jacn'igi tzou yi', ca'ydí yi caayin uucin, etz je mnin'icx jacn'igi choohu'ity ca'ydí huit. ²⁴ Ijxcix yi joogy ni ca' ñi'py, ni ca' chijccixy, ni ca' m'iidity yt'ic ni ch'èx, e Dios yi' ajcxy mooyipy huídi yj'icxcixyp, ¿nej cayjacn'igi miich ajcxy mdzoohu'ity ca'ydí joon ajcxy? ²⁵ Ca' ji ni p'in ma miich ajcxy p'in jadipy nej ñayjijptzomihui'ib jadüg c'ínuux. ²⁶ Pen ca' m'ajajcixy nej md'ungixipy huídi hueen huinma'ñ, ¿nej co mdzachm'ijottigooygixy yi tzinaayin yi comeeñ'ájtín?

²⁷ Ijxcix yi aaybijy nej xóxyity, ca' ytaaccixy ni ca' yxuuygixy. Ich miich ajcxy nimaayb, co ni je rey Salomón m'iid t'üg'óciy ymeeñ' ca' ñayxojxi jadu'n nej jada aaybijy ujtzp'ipy. ²⁸ Pen jadu'n Dios xoxy yi aay yi ujtz huídibi cham jajtip ma yi tungop, e com jabom ti anajty ñi'icxni, Dios xypubedipy xypudig'ihu'ipy n'igi miich ajcxy huídi hueen m'ibijc'p. ²⁹ Ca' miich ajcxy mhuinmay'ahuídijtcixipy ajcxy ti mgáaygixipy m'úuccixipy. ³⁰ Yi naaxhuiñ'yäy ajcxy ym'ijottigoyb anaxy t'üg'óciy caayin uucin, huit etz tijaty. Miich ajcxy huídi m'ijpidacp Dios, Dios Teedy ñejhu'iyb co copicy ajcxy m'iid'adipy caayin uucin etz huit tucxy. ³¹ Jayijp m'ijottigooygix Dios y'ayuc yt'iy'ajt, chi jada' t'üg'óciy huídi ajcxy myajmayjaty mbáatcixipy yi'.

Jugy'ájtín m'ijpi jilby tzajpjoty

³² Chi Jesús yjacm'inaañ:

—Ca' miich ajcxy mdzig'iygixy, miich ajcxy m'ihueeñ'ity, per mDios Teedy yega'ñ ane'mdac tzajpjoty m'iid miich ajcxy ycixpi. ³³ Toocix tijaty miich ajcxy m'iid, nimooygix ayoob'it'ijc. Yaj'oy'iygix meeñ'idi'ñ huídi ca' y'am'ijihu'ipy ni cam'ina. Yaj'oy'iygix t'üg pidägy, janch m'ij e janch oy, jilby tzajpjoty huídi ca' ycixipy yt'igoyipy, ma ca' meetzpi huaad yt'igiy, ni ucxyting ca' yajhuindigoyipy. ³⁴ Pen miich ajcxy m'iid mgomeeñ'ájtín ya naaxhuiñ, yaayi je m'jot mhuinma'ñ ajcxy. Pen mdzocpy ajcxy je oybi huídibi Dios yegamy, nañ m'iid'ájt'icixy jim jabom jabom m'jot mhuinma'ñ ajcxy ma Dios.

Tzoc'ítim ni'ixi'

³⁵ Chi Jesús yjacm'inaañ:

—Ni'ix'iygix m'jot mhuinma'ñ jadu'n nej jihu'iy mhuit myujc'ameetcixy co mdunaangixy, etz jadu'n nej jihu'iy lámpara mnö'g'ijccixy co mdzumnax-aangixy m'ahuixaangixy je huindzin. ³⁶ Ni'ix'ijtcix jadu'n nej jäy huídi yhuindzin ahuijxp, co anajty yhuimbity co anajty ti y'oy ma jäy ti y'picy, chi co anajty min'ipy ycogapx'iy, mic'amy myaj'ahuädzity yt'ijc. ³⁷ Jotcuje ajcxy je tumbi co je yhuindzin anajty yjädý, e paady chumnajx juugy. Janch nimaayb'ich miich ajcxy co je tumbi ajcxy yhuindzin anajty yjädý, chi yhuít yujc'ameedipy, chi ajcxy yaj'ixtägipy ma caybejt, yajcayipy yaj'ügipy. ³⁸ Oy min'ipy je huindzin m'ijcood o moñyi, e páadip je tumbidijc ajcxy jim chumnájxcixy juugy, jotcuje je' ajcxy je jadu'mbi tumbidijc. ³⁹ Nejhu'iygix jada co je codijc ixipy nejhu'ihu'ipy ti hora ymina'ñ je meetzpi, chi juugy ixipy chuumnaxa'ñ, e ca' c'iyegipy yt'ijc nicxy jäy tigoty ymeech. ⁴⁰ Miich

ajcxyc nañ jadu'n ijtccixy ni'ixi', mina anajty ca' ti mhuinmaaygixy, huin'it miina'ñich ich, je jäy huidi tzoon tzajpjoty.

Je tumbi tudägyipi etz je tumbi ca'pi ytudägyity

⁴¹ Chi Pedro Jesús nimay:

—¿Pin jada ti myajnimaaayb jada ayuc huidi ti mgapxy, ich ajcxyc, o nidüg'ócicy jäy?

⁴² Chi je Huindzin Jesús yminañ:

—Huidibi tumbi je' ya huidi tumb müid yhuindzin janch cixyjot huinjot huidi müid yhuinj'ajt ycuyc'ajt huidi je yhuindzin mooyip ané'min ma ytiçc, huidi yajnidägüyb tumbidijc nej ypaadyii. ⁴³ Jotcuyc je tumbi co anajty je' yhuindzin yhuimbity e padüyb ti cuyduñ jadu'n nej anajty ti ñimäyüi.

⁴⁴ Janch ich müich ajcxyc nimäy co je tumbi huindzin yajmihui'mdähuiipy jada ytumbi tüg'ócicy pidägy huidi ymüid. ⁴⁵ Pen je tumbi yhuinmaayb jotjoty huinma'ñyjoty co je yhuindzin yhuäcxijpni mina ymiina'ñ, chi midziptzooni jacjadyii tumbidijc ajcxyc, huojpni, cojxni, nañ ytiçgyñi caayb uucp anaxy etz ymügyii. ⁴⁶ Chi je tumbi yhuindzin miinipy ma je xii hora anajty ca' jijp'ixy e ni canejhuüy anajty, e huin'it ooy tzaachytunipy yi tumbi e chi pidägüipy ma je huidi ajcxyc ca' ytudägyity.

⁴⁷ Je tumbi huidi nejhuüyb nej yhuindzin chójcín, e ca' cuyduñ, ni ca' ycapxymidoy, ni ca' ni'ixi' ity co yhuindzin anajty yhuimbity, je' je' nigi yajtzaachytunip. ⁴⁸ Je tumbi huidi ca' yajxon huinjihuüy nejjuhuüy yhuindzin chójcín, hueeni je' yajtzaachytunipy. Huenpinity huidi may yajmooyb, may yi' yajmibijctzohüyb; etz huenpinity huidi ti mihui'my ooy, yajmibijctzohüüb nigi.

Jesús ycxipi ñaybijc-huäcxycii jäy

⁴⁹ Chi Jesús yjacminañ:

—Ich ti nmüñich ya naaxhuñ co jin nbidägibich. ¡Ooy njadzocyich ji ixipy ñitooyñi! ⁵⁰ Nyajnaxipyich tüg tzaachypi, e jooy ndajy nmayich xiti mabaad yajcuyduñdy! ⁵¹ ¿Nej müich ajcxyc mdijy co ti nmüñich ya naaxhuñ co nyajcixipyich je tzipi? Ich müich ajcxyc nimaayb co ca'. Hue' janchtiy nyajnaybijc-huäcxäänibich jäy ajcxyc. ⁵² Jadachambi etz yjacnicxni xii tiempo ji migoox tüg quëxjädijc huidibi ajcxyc ñaybijc-huäcxüüb, tugüig müid je metzpi, e metzpi müid je tugüigpi. ⁵³ Je ungedeedy tziptunip müid ymang etz je mang müid yteedy. Nañ je ungdaj tziptunip müid yñix etz je nüix müid ytaj. Nañ jadu'n je xecy tziptunip müid yxecy.

Je xii tiempo ytiy'ajt

⁵⁴ Chi Jesús nimay je mayjäy ajcxyc:

—Co ajcxyc m'ixy je joc ypidägy ma xii ycidägy, chi minaangixy co tühuaam, e janch jadu'n yjadyii. ⁵⁵ Co ymüñ je jinboj, chi müich ajcxyc minaangixy co ambigaamb, chi janch jadu'n yjadyii. ⁵⁶ ¡Müich jibic jäy ajcxyc! Ooy mjajtccixy nej myajcapxcixy yi xii tiempo huidi ajcxyc m'ixy tzejccixy etz ya naaxhuñ: ¿Nej co ca' mjajtccixy nej myajcäpccixipy xii tiempo ymüñ ycidägy?

Naymi'oyihui müid midzip

⁵⁷ ¿Nej co müich ajcxyc ca' ci'm mnaydiyduünigixy nej ytudägyity je tiy'ajt?

⁵⁸ Co mnäcxipy ma yi codung müid yi mmidzip jac'oy co mnayyaj'oyihuiipy müid yi mmidzip tü'am, ca'ydi müid mjädip ma yi codung, e chi je codung xyciyegipy

ma je xueetz, e je xueetz xypidägip pujxtigoty. ⁵⁹ Hich miich nimaayb co ca' jilby mbidzimipy, ixti cooni mgüejtähuiipy tüg'óciy.

13

Ooy ycopícyity nyajtígaizim nhuinmañ

¹ Huin'it jäy müdmüydacy Jesús jadu'n nej je gobernador Pilato yaj'ögy nijëjity jäy jim Galilea, chi tem huidijti ajcxy ñi'py müd iyujc ñi'py huidi je' ajcxy müd huindzigi'ñ tuuñ. ² Chi Jesús y'adzooy nimay ajcxy:

—¿Nej mdijy, ñigi anajty ypocymüidity je galileojäy ajcxy huidi jadu'n ayo'n patp, ca'ydi nidüg'óciy galileojäy? ³ Hich miich ajcxy nimaayb co ca'. Pen miich ajcxy ca' mjothuimbijtcixy ma Dios etz nay'adzigüiyigixy ma Dios, nidüg'óciy miich ajcxy mgijxtähuiip mdigoydähuiip. ⁴ E je' ajcxy je majmocxtugüigpi huidi je mijtjic jim Siloé ñigidaagootti, yaj'öci ajcxy. ¿Nej mdijy ñigi ajcxy ypocymüidity, ca'ydi nidüg'óciy je jäy huidi tzinayb jim Jerusalén? ⁵ Hich miich ajcxy nimaayb co ca'. Pen miich ajcxy ca' mjothuimbijtcixy, nañ mgijxtähuiip mdigoydähuiip miich ajcxy nidüg'óciy, jadu'n nej je' ajcxy.

Ijxpejt ma je higuere ca'pi anajty ytiim'aty

⁶ Chi Jesús yajnimay ajcxy jada ayuc:

—Tüg jäy anajty müdity higuere cojy ma y'aguemy, chi ñicxy jilby ma y'aguemy higuere tiim ijxtaaybi, ni ca' paty. ⁷ Chi nimay je' ytumbi: “Cham midugüig jimijt müñich ya higuere tiim ijxtayb ma jada higuere cop, ni tüg nga-paadyich. Huen yajpujxciday jada higuere cop, nej co ñigoobi ñaaxnihua'ñ.” ⁸ Chi je' ytumbi y'adzooy: “Huindzin, oc'ixmatz. Huen jadüg jimijt jëyi ocjactinây, octajtyich jayjip yi naax jühuidityi, etz oc'abonijiyich. ⁹ Pen tiim'ajt ca' nyajpuxäpy, pen ca' ytiim'aty jëbi nbújxigäpy.”

Jesús yajtzögy pocxxüduum tüg töxyjäy jigojopyi

¹⁰ Chi Jesús anajty yaj'ixpicy ma tüg naymujctac pocxxüduum. ¹¹ Jim anajty tüg töxyjäy huidi anajty mimajmocxtugüig jimijt cujc m'iitni yjüibojpa'm, agojoy anajty yöy, ni nej anajty yca'oyiy nej ytinaaygugihuiipy. ¹² Co Jesús ijxy, chi yaaxi, e nimay:

—Töxyjäy, ti mdzögy.

¹³ Chi yci' cijxxajy ma je töxyjäy yjix, e chi je' yjix ytiy, huin'it ytigüy Dios ojadajtpi. ¹⁴ Huin'it je naymujctac huindzin ooy yjotmäty müd co anajty Jesús jäy ti tzoyiy pocxxüduum. Chi je naymujctac huindzin nimay ajcxy je mayjäy:

—Jëyi tudujc xii jäy huaad ytuñ, huen miñ seamaanjoty pin yajtzoyihuum, ca' ypocxxüduumity.

¹⁵ Chi je huindzin Jesús ymínañ:

—¿Miich ajcxy naybidaacip nej tudägyjäy, e ca' yjanchity! ¿Nej ca'miich ajcxy mmigüeyy mhuaajuubi, etz mburro ma ypëcxtac pocxxüduum, e myajnicxy ajcxy ñi'ucpi? ¹⁶ E jada Abraham y'ap y'oc huidi Satanás ca' y'ixmachii majmocxtugüig jimijt, ¿nej ca' ypadyyi nyajtzögibich pocxxüduum?

¹⁷ Co Jesús jadu'n y'adzoy, chi yajtzöyduuñ ymidzip. Chi tüg'óciy cajpjäy oy ajcxy yjotcugüiyigixy müd je oybi huidi Jesús ytuun.

Ijxpejt ma je mostaza pájc

¹⁸ Chi Jesús ymínañ:

—¿Nej m'oc'a'ixiyigixy yi Dios y'ané'min? ¿Huidi müd n'ocyajquipxihuibich? ¹⁹ Jadu'n Dios y'ané'min nipaady nej mostaza pajc huidibi tüg jäy ñiip ma

y'aguemy, chi ymujxy etz yeegy ooy janch mij, chi je joon ajcxy oy ype'n ñ pidaaccixy ma je mostaza quipy aacxy.

Ijxpejt ma je levadura ca'p óyity

²⁰ Chi Jesús jadüg'oc ymínañ:

—¿Huindibi miid n'ocyajquipxíhuibich yí Dios y'ané'min? ²¹ Jadu'n Dios y'ané'min ni paady nej levadura huidi tüg töxyjäy ytiyhuidijt miid tugüg quipxi'ñ harina ixti cooni yajxunday je harina.

Je tü'aa xützpi

²² Co Jesús anajty ñicxy jim Jerusalén, chi yaj'ixpicy anajty Dios y'ayuc yti'yajt cajp cajp majaty ñaxy. ²³ Chi tüg jäy Jesús amidoy:

—Huindzin, ¿nej hueeni yí jäy ajcxy huidi y'alma nïdzögip?

Chi Jesús y'adzooy:

²⁴ —Mijpidaaccix Dios yti'yajt amuumdügot, jëbi ajcxy m'alma nïdzögipy, jadu'n nipaady nej jäy ajcxy ñaymic'íjxigixy co ytiğihuaangixy ma je tijc aguu xützpi. Jadu'n ñich miich nimaayb co mayjäy ooy ja'a'ixiy ytiğihuaangixy ma Dios y'ane'my e ca' ajcxy jadipy nej ytiğiygixipy. ²⁵ Co je codijc ypidigipy etz agüyñip ytiyc, huin'it miich ajcxy pinjaty tibäy huim, chí jilby tibäy miich ajcxy mminandägipy: “Huindzin, yaj'ahuädz”, e chi je tijc huindzin miich ajcxy xy'adzohuipy: “Ca' ñich miich ajcxy nehuüyich ma miich ajcxy mdzoongixy.” ²⁶ Chi huin'it miich ajcxy minandägipy: “Miid ñich ajcxy miich ti nmïdgaaygixy ti nmïd'uuccixy, e miich ti myaj'ixpicy ma ñich ajcxy ngajp.” ²⁷ Chi je Huindzin y'adzohuipy ajcxy: “Ñich miich ajcxy nimayb co ca' nnejhuüyich ma miich ajcxy mdzoongixy. Jihuäccix ma ñich nhuinduu, miich ajcxy pocy ytumbi.” ²⁸ Chi miich ajcxy jim ooy mdäjcixipy mmäygixipy, myäaxcixipy mdiitzquéetixipy, co miich ajcxy m'ixipy Abraham, Isaac, Jacob etz tüg'ócüy yí Dios y'ayucnajtzcaxiybi jilby ma Dios y'ane'my, e miich ajcxy tibäy anajty ti mhui'ngixy. ²⁹ Minip yí jäy ajcxy huidibi tzoomb ma xii ypidzimy, ma xii ycidägy, ma jayhuixtujc ypidzimy, etz cham ma madzäruudz ytinaay'ahuüy, chi y'ixtäaccixipy ma je caydac jilby ma Dios y'ane'my. ³⁰ Paady ji jäy ajcxy huidi cham axam'ajtp, je' ajcxy jayijp'adip, etz ji jäy ajcxy huidibi cham jayijp'ajtp, etz je' ajcxy axam'adip.

Jesús taj may miid Jerusalén ycixpi

³¹ Chi nijëjity fariseojäy nimay Jesús:

—Quëg ya com yí rey Herodes xyaj'ögaam.

³² Chi Jesús y'adzooy:

—Ñicx nimaaygix yjilbi huaax co nyajpidzimybich ca'oybi etz nyajt-zoocypich jäy cham etz jabom, codugiig xii ti ndung maylijich. ³³ Ooy ycopicyty co ñich nactiyöyibich cham, jabom etz huixtic. Com ypaadyii co Dios y'ayuccaxhuäcxpi y'ögip ajcxy jim Jerusalén.

Chi Jesús yjacmínaañ:

³⁴ —¡Jerusalén jäy! ¡Jerusalén jäy! huidibi yaj'o'cp Dios y'ayucnajtzcaxiyb ajcxy, etz ycögädz ajcxy je jäy huidibi Dios ti xyajniğuejx ajcxy. Janch canaag'oc ñich miich ajcxy njahuijtmuga'ñ jadu'n nej tzeydaj y'ung yajmucy queecpätcipy, chi ni ca' jadu'n ti m'a'ixiygixy. ³⁵ Chi jada' ijxcix cuenditongix, com jadachambi ngajp yhuim'ny najtz'ixi'. ñich miich ajcxy nimayb co ca' xy'ixipyich jadügtecy, ixti cooni anajty tiempo paaty mina mminängixipy: “Capxpaaty je' huidi miimb miid Huindzin'ajtín Dios ycixpi.”

14

Jesús yajtzögy tüg yéydjic quixypa'mmüdpí

¹ Chi jadu'n yjajti co tüg pocxxüduum Jesús ytiyiy ycaya'ñ anajty ma tüg fariseojäy ytijc, hue' anajty judío tungmüdpí. Chi yi judío ixpicytjic ajcxy tzach'ix'ijtcixy Jesús, amidoo'ijtcixy Jesús y'ayuc. ² Huin'it tüg jäy huídibi ymüid anajty quixypa'm miñ ma Jesús yhuinduu. ³ Chi Jesús ymígapxi je' ajcxy huídibi yaj'ixpjic Dios ñecy etz yi fariseojäy ajcxy, nimay:

—¿Nej je Dios ytiy'ajt ymíñañ? ¿Huaad o ca' huaad chögy jäy pocxxüduum?

⁴ Chi ajcxy y'amonday. Huin'it Jesús cñixajjiy je pa'm jäy, chi yajtzoooy. ⁵ Chi Jesús nimay je fariseos ajcxy:

—¿Nej miich ajcxy pen ñijutcögäp ajcxy mhuajyuubi o mburro pocxxüduum, nej ca' mic'amy nicxy yajpidzimigixy oy y pocxxüduumi?

⁶ Chi ca' ajcxy jajty nej y'adzohuimbjtcixipy.

Je pinjaty huodzooñyip ma je pijcpi yajnixüduñy

⁷ Co Jesús ijxy jadu'n nej yi' ajcxy jac'oybi iñaybejt huin'ijxcixy jim ma je caybejt, chi ajcxy tüg ayuc yajnimaaayí, je tiibi anajty yajhuomiingixy:

⁸ —Co miich myajhuoohuipy ma pijcpi yajnixüduñ, ca' m'ixtägipy ma je iñaybejt cödumbi, ca' jécyity co yajhuoomiñ huídí je' iñaybejt ymíhuaad. ⁹ Chi jada' xyñimáhuipy je huídibi anajty ti xyhuomiñ: “Mo' jada migüg jada iñaybejt cödumbi.” Chi miich tzöydu'n müid mñicxpy ma je' iñaybejt axambi.

¹⁰ Co jäy xyhuoohuipy ma je pijcin yajnixüduñ, jim m'ixtägip ma je axambi iñaybejt, e co yminiipy je huídibi anajty ti xyhuomiñ, chi xyñimáhuipy: “Migüg, nax ma yi iñaybejt cödumbi.” Huin'it capxpaady m'idipy ma je' ajcxy huídibi anajty iñayb ma caybejthuinduu müid miich. ¹¹ Pinjaty ci'm naygömáyip, tzöydu'nbaadip je'. Pinjaty naybidaacip nicy xeemy je' je' capxpaady y'idip.

¹² Chi Jesús nimay pinjaty huídí anajty ti yhuoomiñyii:

—Co miich mxüduunipy ca' mhuoohuipy je jäy ajcxy huídibi ooy müid mnaymigüg'ájtigixy, ni mmidügquëx, ni m'ajuugy m'amigüg, ni mmidijc comeeñybi, ca' jécyity co nañ jadu'n xyhuoohuipy, e chi anajty jac mij yejchhuimbijty. ¹³ Co mxüduunipy, chi huoohuipy ayoobitjic, tzaachijäy ajcxy, tecymätpi ajcxy, etz jäy huíintzpi. ¹⁴ Huin'it miich mjotcujc'adipy co yi' ajcxy ca' jadipy nej yejchhuimbidipy. Jiini Dios xymigüedipy co anajty yajjugypicy je tudágyi jäy ajcxy.

Je ijxpejt ma tüg adzuu'ájtin mijpi

¹⁵ Tüg jäy huídí anajty iñayb müid Jesús ma caybejt huinduu co midooy nej Jesús ymíñañ, chi nimay Jesús:

—Jotcujc je jäy ajcxy huídí cayip jiiby ma Dios y'ane'my.

¹⁶ Chi Jesús y'adzooy:

—Tüg jäy may anajty jäy yaj'adzu'ada'ñ, chi jayijpni oy mayjäy nimay co anajty yaj'adzuu'ada'ñ. ¹⁷ Co je adzui'ibi paty, chi quejxy tüg cogapxy huen nicxy huogixy je tiibi anajty ajcxy yajnimäy, nimay ajcxy: “Jámgiç, ti jim yajni'ixiy je caayin uucin.” ¹⁸ Chi ajcxy nidüg'ócíy ymínandacy: “Tun may'ajt meexcich, ca' y'oyiy nej nyajnixibich.” Chi je' jayijp jäy y'adzooy: “Ti njuyich tüg rancho je' copicy jayijp nicxy n'ixyich, paady ca' nicxa'ñich; tun may'ajt meexcich.” ¹⁹ Chi jadüg jäy ymíñañ: “Ti njuyich migoox par huaj yuubi, nicxy n'oc'ijxmadza'ñich jayijp, paady ca' y'oyiy nej n'icxybyich, tun may'ajt meexcich.” ²⁰ Chi jadüg jäy ymíñañ: “Tim chamni nbicyich,

paady ca' oyïy nej nícxibyich.” ²¹ Co je cogapxy yhuimbijty, chi yajnimay je' yhuindzin jadu'n nej je jáy ajcxy y'adzooy huidi anajty oy ti huoy. Huin'it je huindzin ooy yjotmátcoty, chi nimay je ytumbi: “Nícx tzojcyi cajjoty ma yi jáy ajcxy yöygyxy ñajxcixy etz ma yi mij tü, e chi huomiinipy pin mdimypaatyp ayoobitijc, yi tzaachñäy etz huinntzpi.” ²² Chi je' ytumbi yminañ: “Huindzin, ti nduñich jadu'n nej ti xyñimäyich, etz jac chiini ifaybejt.” ²³ Chi je huindzin nimay je' ytumbi: “Nícx ma yi mij nü mij tü yajmin je jáy ajcxy adzip, huen ñich ndijc uch. ²⁴ Chi ñich miich nimäy co ni tüg yi jáy ajcxy huidi jayijp yajnimay, ca' ajcxy y'adzoo'adipy miid ñich.”

Nej ooy chípity co Cristo nbanícxim

²⁵ Chi may anajty jáy ñícxxy miid Jesús, chi Jesús yhuác-huimbijty, nimay ajcxy:

²⁶ —Pen ji pin xypamiñich, e ooy ñigi tzocy yi' ytaj yteedy, yi' ytöxyijc, yi' y'ung, y'ajch o chi', etz nañ ooy ñigi tzocy yi' yjugy'ájtín, ca' ñich yi' huaad ndiscípulo'adyijich. ²⁷ Yi jáy ajcxy huidi xypamiñbich huidi ñich ndiscípulo'adaanip, copicy yajnaxipy ajcxy ayo'n, jadu'n nipaady nejjihuüy ycrudz ti cabíccixy e nícxxy yajcrudzpeda'ñyíi. ²⁸ Co miich ajcxy mmijtijc mgoja'ñ, chi miich ajcxy jayijp m'ixtaaccixy e m'a'ixiigyxy jadu'ñyi meeñydunaangixy, nej pen miid ajcxy huidi jébi miid myajmaaygixy je mmijtijc, o peni ca'. ²⁹ Ca' yjécyity co anajty je tijc ti yajpojtzígy, chi anajty ca' m'ocjajtni nej myajmayipy, e pinjaty anajty ti xy'ixy, chi ooy xyñixigipy xyajxigipy. ³⁰ Chi jáy ajcxy ymina'ñip: “Jadayaabi yéydijc nigoo ti yajtzondägy tijc poch, e ca' ti ocyajmaayñi.” ³¹ O huidi rey ji co chona'ñ tziptumbi miid huingbi rey, ¿ca' jayijp huinmayipy pen jébi chiptuñ miid majc mil jáy, pen je ymidzip miimb miid iipx mil jáy? ³² Ca' yjécyity co je tügpí rey jiguemni anajty miñ, chi quexipy tüg huingapxpi pijctzohuipy may'ajt ca'ydi yi tzip yjadyíi. ³³ Hueñyíñity ma miich ajcxy pen ca' m'ixmájtzcixy tüg'ócyi tijaty miich ajcxy mmíid, ca' ñich yi' huaad ndiscípulo'adyíi.

Co je caan ytamtz'ajt ytigooyñi

³⁴ Yi caan ooy yi' y'óyity pen ymiid ytamtz'ájtín. Co je caan ytigoy ytamtz'ájtín ca' ji ni ti xücx'ájtín yegipy. ³⁵ Yi caan huidi ti ytigoy ytamtz'ájtín ni ca' y'oybidágnity ma je naax, ni ma je püx huidi aboon'ajtp. Hue' janchtiy yaj'ixjidejtp tibäy. Pinjaty ñich n'ayuc xymidohuaanip huen mido'mbicy.

15

Ijxpejt ma je cöbixy huidibi tigooy

¹ Chi ajcxy je yajcujtpidijc etz pocyjäydijc nimijhuágtay ajcxy Jesús tzach'amído'o'idaani ajcxy je' y'ayuc. ² Chi ajcxy huidi ooy tzachmijpidägy judiojáy ytiy'ajt etz huidi ajcxy yaj'ixpíj Dios ñecy ameech nigapxcixy ni'ojígyxy je Jesús, chi ajcxy yminañ:

—Yi Jesús pocyjäydijc ajcxy ymígüg'ajtpy, e yi' miid ycaaygixy.

³⁻⁴ Chi Jesús jadayaabi ayuc ajcxy yajnimay:

—Huidi jáy ji ma miich ajcxy pen ymiid migo'px cöbixy co ytigoy nidügti, ¿nej ca' yajhuimipy je mada'px majmox mídaaxpi jim ma chinaaydac, chi nícxxy ixtáy huidi anajty ti ytigoy ixti cooni paadip? ⁵ Co paadip, chi mic'amy pidägip ma quejycop janch jotcujc. ⁶ Co yajjädip ma ytijc, chi huomucy ymígügtijc etz ymijñn ymidijc, nimáhuipy ajcxy: “Jotcugígyix miid ñich, ti ñich ngöbixy nbaady huidi anajty ti ytigooy.” ⁷ ñich miich ajcxy nimaayb co nañ

jadu'n tzajpjoty ooy jotcuje'ájtín nígí mïid co tüg pocyjäy yjothuimbity, ca'ydi mïid mada'px majmocx madaax tudägypi jäy huïdi ca' ytundigoy.

Ijxpejt ma je meeñ huïdibi tigoy

⁸ Chi Jesús yjacmïnañ:

—¿Huïdi töxyjäy ji pen ymïid majc ymeeñ, co ytigooy tüg meeñ, nej ca' jïin nõctzohuipy, e ytiğïhuipy pedïgpi ixtähuipy ymeeñ oñyädgy ixti cooni paadipy? ⁹ Co paady, chi huomucy ymïgügtijc etz ymïjïin ymïdijc, e chi nïmähuiipy: “Xondaaccix mïid ïich, ti ïich nmeeñ nbaty huïdibi ïich anajty ti nyajtigoy.” ¹⁰ Jadu'n ïich miich ajcxy nïmây co nañ jadu'n Dios y'ãngeles ajcxy ooy jotcúcity co yjothuimbity tüg pocyjäy.

Ijxpejt ma je ung huïdibi ymeeñ yajticxtay

¹¹ Nañ jadu'n Jesús yjacmïnañ:

—Tüg yëydijc ymïid anajty metz ymang. ¹² Chi je jacmutzpi nïmay yteedy: “Tat, mooygich yi pidägy huïdi xypaatpich.” Chi je' yteedy je pidägy yajhuäcxy. ¹³ Hueeni anajty xii tzuu cujc ñicxy, co je' ymang mutzpi yajmujctay tüg'óciy huïdi yi yjé'ajtpy, chi choon ñicxy huingnaax huinggajp. Chi jïm mic'amy yajtunday yajtigoyday tüg'óciy huïdi anajty ymïid. ¹⁴ Co anajty ymeeñ tüg'óciy yajtunday, chi miin tüg mij yuu ma je cajp. Chi ooy je mang mutzpi caayïn uucin huit meeñ jayajmayajtni. ¹⁵ Chi je' nïnicxy tüg jäy ma je jïmbi naaxjot ymïduna'n anajty. Chi yquejxi ma yrancho idzim cuend'ajtpi. ¹⁶ Ooy anajty janijot'aty ycüxa'ñyii mïid je pëtzïim huïdi anajty idzim y'ojcpy. Chi ni pin anajty ni ti ycamöyïi. ¹⁷ Co yhuinma'n yajmejch, chi ymïnañ na yjot yhuinma'n: “Jïm janch maytumbi ma ïich ndeedy ytijc, ymïid ajcxy jïicxy piçy janch may'amy. ïich ya tzach'ayoob mïid yuu xii. ¹⁸ Tzonaambich ya, nicxa'ñich ma ïich ndeedy, nïmähuibich: Tat, ti ndundigöyich mïid Dios tzajpjoty etz mïid miich. ¹⁹ Cham ca' ypadyi miich mïna'nip co miich xy'ung'adyïijich. Yajtungich jadu'n nej mdumbidijc.” ²⁰ Chi je' choñ, ñicxy ma yteedy. Jegügyñi anajty ymïi co yteedy y'ijxpaati. Chi yteedy ypa'ayogoti, e ñicxy poygy oy jïpcobaäy. Chi yögminennajxy etz tzücxy. ²¹ Chi je ung ymïnañ: “Tat, ti ndundigooyich mïid Dios tzajpjoty etz mïid miich. Cham ca' ypadyi nicxy miich mïna'n co ïich miich xy'ung'adyi.” ²² Chi je ungedeedy nïmay je' ytumbi: “Yajpidzim je huit oybi, mic'amy yajñjenïyigix jada n'ungich, chi mooygix yi cïjiit etz ycïg. ²³ Nicx yajtzoongix yi huaj mang nïcxpi, yaj'öccix, chi ngaayim n'uucim e nxïduunim. ²⁴ Jada n'ungich jadu'n nipaady nejjihuïy anajty ti y'ögy, e chi ti yjugypicy. Tigooy yi' anajty e ti yjädy.” Chi ajcxy ooy yjotcugïy.

²⁵ Chi je ymang mijpi camjoty je' anajty. Co yja'ty mïhuingon je ytijc, chi midoy co jäy ooy yxüxy etz y'ech. ²⁶ Chi yaaxi tüg ytumbi y'amidooy: “¿Ti yi' tünip jájtjp?” ²⁷ Chi je tumbi y'adzooy: “Ti yjädy m'uch, ti mdeedy yaj'ögy tüg huaj nïcxpi, co ymang ti huimbity juugy.” ²⁸ Chi je ungoob ooy yjotmäty, ca' anajty ytigïhua'n tigoty. Huin'it je yteedy ñibidzimi, ycohuanïyï co huen tigïy tigoty. ²⁹ Chi je' y'adzooy, nïmay yteedy: “Janch mïcanaag jïmijt ïich miich mïid nduñ, ni ca' ngapxhuimbityich. Ca' chambaad miich ni xycamooyich tüg pi'cöbixy jaydeb njotcuje'adipyich nxïduunipyich mïid nmïgügtijc. ³⁰ Per co yi mmang ti yjädy huïdi oy ti yajtunday yi ymeeñ mïid jïbic-huinma'n mïid jïbic töxyjäydijc ajcxy, chi ti myaj'ögy huaj mang nïcxpi mïid yi' ycixpi.” ³¹ Chi je ungedeedy nïmay je' ymang: “Miich ung huinixi ya mïid n'ity. Tüg'óciy huïdi nmïdich miich yi' mje'. ³² Ooy ycopïcity co nxïduunim etz njotcugïyïm, co

yi m'uch jadu'n anajty nej ti y'ögni, e jadachambi ti yjugypicy, ti anajty ytigoy, e cham ti yajpaady."

16

Je ijxpejt ma je mayordomo huidibi ca' yhuindzin miduñ tudägy

¹ Nañ jadu'n Jesús nimay yi' ydiscipulos:

—Jim anajty tügjäy comeñybi, ymiid tüg ytumbi huidi yi' ypidägy cuend'ájtíp. Chi oy nimäyii co tüg je ytumbi nigoo anajty tzachyajtuñ je meej ma ycapaadyii. ² Chi je huindzin oy yajhuoyii je' ytumbi, chi nimay: “¿Nej jada co ñich jadu'n nimäyijich miid miich ycixpi? Ya yi' cuenti cimoydaagyich nej ti mduñ, etz ca' ñich miich n'ocjactumbi'adaañin.” ³ Chi je pidägy cuend'ajtpi jot'ajti: “¿Ti ndunipich? co yi' nhuindzin xyajpidzima'ñich ma yi' ytung. Juttajii ca' njatyich, co limosna nbijctzohuipych tzöydumbich.” ⁴ Nejhuiybich ti ndunipich jaydeb jäy ajcxy xycöbigipych ma ajcxy ytijc.” ⁵ Chi tüg tüg huoy pin anajty minuucx'ajtp je' yhuindzin; chi y'amidooy je jayijpi: “¿Jadu'ñyi miich minuucxy'adyii ñich nhuindzin?” ⁶ Chi je' y'adzooy: “Migo'px garafón aceite.” Chi nimay: “Matz mnecy, ñña' mic'amy, e cojayi' huixchigui'pxmajc.” ⁷ Chi jadüg nimay: “¿Miich jadu'ñi mminuucxy'adyii?” Chi je' y'adzooy: “Migo'px quipxi'ñ trigo.” Chi nimay: “Matz mnecy, cojayi' mida'px.” ⁸ Chi je pidägy huindzin capxaaty je jibicjäybi huidi cuend'ajtp yi' ypidägy co oy yhuinma'ñybaady mij; co jadachambi naaxhuiñyäj huidi ca' mibicy Dios, ñigi ajcxy ypëgyity miid yhuinma'ñ, ca'ydi yi' jäy ajcxy huidi huiñhuiyb Dios yti'yajt.

⁹ Ñich ajcxy yam nimaayb migüg'ájtigixy yi' jäy ajcxy miid yi' meej huidibi ca' ytimytiijyity, jigix co je meej anajty myajmayjajtcixy ji pin miich ajcxy xycöbigip ma jugy'ajttac huinixibi.

¹⁰ Je' jäy ajcxy huidibi yajxon cuydunam je ané'min huidi hueeni, nañ y'cuydunamy je ané'min huidibi mijip. Je jäy ajcxy huidibi ca' cuydunaangixy je ané'min huidi hueeni, nañ ca' cuydunaangixy je mijpi ané'min. ¹¹ Pen ca' m'ajajtcixy nej mgüend'ájtixipy yi' jugy'ájtin huidibi ya naaxhuiñ yajpatp, çpin miich ajcxy m'ocyajmihui'mamy je jugy'ájtin je riqueza oybi janchypi? ¹² Pen ca' m'ajajtcixy nej mgüend'ájtixipy tiibi mihui'mgixy huidi huingjäy yje'ajtpy, çpin miich ajcxy xymöhuip huidibi ajcxy yje'ajtpy?

¹³ Ni tüg tumbi ca' jëbi ytuñ miid metz yhuindzin; com tüg je' itxijipy etz jadüg mijnixpedipy; o tüg huidi ycapxycöbigipy, etz jadüg ca'. Miich ajcxy ca' huaad mijpidägipy Dios etz nañ jadu'n mijpidägipy yi' comeñ'ájtin.

¹⁴ Nañ jadu'n midooy jada ayuc yi' fariseojäy ajcxy, com ooy anajty ajcxy meej adzóccixy. Chi ajcxy ooy ñixiici yajxiici Jesús y'ayuc. ¹⁵ Chi Jesús ymíañañ:

—Miich ajcxy fariseojäy jadu'n mnaybidáacigixy ma jäy ajcxy yhuinduu nejjhuiy ajcxy ooy m'oyjäyity. Dios ñejhuiydaayb co miich ajcxy miid jibicpi ma mjot mhuinma'ñ. Tijaty huinma'ñ huidi jäy ya naaxhuiñ y'oy'ixyp, Dios ca' yi' oy'ixy.

Je Dios ycötújin etz je Dios y'ane'mdac

¹⁶ Chi Jesús yjacmíañañ:

—Je taabi je Juan anajty yjiijity, jii'ajtp anajty Moisés ycötújin etz je y'ayucnajtzcapxiybi ajcxy y'ixpijin. Huin'it tiempo etz itxi jadachambi

jadu'n yajnajtzcapxïy je Dios y'ané'min, e mayjäy ooy ñaybidáacigixy co ytiġihuaangixy ma Dios y'ane'my.

¹⁷ Ca'chípity co je tzajp etz naaxhuiñybi ñajxtähuipy, pero je Dios ycuycundähuamy tüg'óciy jadu'n nej ñecy ymina'ñ. Ni tügi letra oy mabaad ymúdzity nicxy ycajaycyuduñ.

Jesús capxticxy nej ypöcyity co jäy ytöxyijc ixmach

¹⁸ Chi Jesús yjacminañ:

—Huenpinjäyity co ytöxyijc ixmach etz ypicy müid huingbi töxyjäy, ooy anajty mij pocy tuñ. Nañ huenpinjäyity huidibi pijcp müid je töxyjäy huidi ñäy ti y'ixmachyii, nañ mij anajty ypocytuñ.

Je comeeñjyäy etz je Lázaro

¹⁹ Chi Jesús yjacminañ:

—Ji anajty tüg jäy comeeñybi ñayxoxyii anajty janch ooy müid oyjatypi huit, etz janch oy ycay y'ügy jabom jabom. ²⁰ Nañ ji anajty tüg ayoobi jäy huidi limosna pijctzoob, hue' anajty yxii Lázaro. Lázaro jabom jabom anajty ycögnäy ma je comeeñjyäy ytijc'aguu, janch nibuutzp anajty ooy. ²¹ Lázaro ooy anajty jani'ixy caya'ñ je cayduc tzütztuc huidibi cäb ma je comeeñjyäy ycajbejt. Oy uc anajty ymiñ yhueyii je ñibüdz. ²² Chi jadu'n yjajti co oy y'o'cni je jäy huidi limosna pijctzoob, chi je ángeles ajcxy yajnicxy Lázaro ma je Abraham yajpaady. Chi je comeeñybi nañ jadu'n y'o'cni, e oy yajnaaxtiġiyii. ²³ Chi je comeeñybi jiiyby ca'oydactuuby tzaachypi anajty jihuüy, chi mij'ixxy jiguëgy je Abraham etz je Lázaro. ²⁴ Chi je comeeñybi ycapxy janch mic, yminañ: “Apteedy Abraham, iich pa'ayoog. Tun may'ajt quex Lázaro, huen yi' ycihuäx yajxoogy müid nü etz xyajtjitzibich ndootz, co iich ooy ayo'n nbaadyich ma jada mijjin.” ²⁵ Chi Abraham y'adzooy: “Oc'ungich, ajihuihuüi co ti mdzinäy ti mjugy'aty müid mhuit mmeeñ agujc jotcuyc, e yi' Lázaro ooy ayo'n paty. Jadachambi Lázaro yjotcuyc'aty, etz müich jiiyby mbatpy tzaachypi. ²⁶ E jadügnax, ji tüg mij huoc ma iich ajcxy etz müich ajcxy. Pen iich jim'amy janaxam ma müich, ca' njadipyich, nañ jadu'n müich ajcxy ni pin ca' jadipy nej ñaxipy ma iich nyajpaadyich.” ²⁷ Chi je comeeñybi jacnimay Abraham: “Apteedy Abraham, tun may'ajt quex yi' Lázaro ma iich ndeedy ytijc. ²⁸ Jim ma iich ndeedy ytijc jim migoox miguëx nmüididyich, huen nicxy yajmüidmydaaccixy, ca'ydí je' ajcxy nañ jadu'n ya minipy ma jada ayoodac.” ²⁹ Chi Abraham y'adzooy: “Yi' ajcxy ymiid necy huidibi Moisés etz Dios y'ayucnajtzcaxxiybi ycojaay, huen cuydungixy.” ³⁰ Chi je comeeñybi yminañ: “Janch jadu'n apteedy Abraham. Pen nidüg yi' ögpi ñicxy ma je' ajcxy, jothuimbidiy yi' ajcxy.” ³¹ Chi Abraham yminañ: “Pen ca' je' ajcxy mijpidägy Moisés y'ayuc je jécyip etz huidi ajcxy jecy'ajt Dios y'ayucnajtzcaxxiy, nañ ni ca' mibijccixipy pen nidüg ögpi yjugypicy.”

17

Huidibi ooy ycodzigijity co n'agänáxim ma pocy

¹ Chi Jesús nimay yi' ydiscipulos:

—Janch tiy'ajt jadu'n co yminip jäy ajcxy huidi yajhuinma'ñydigoyip yi' mayjäy ajcxy müid aanü. ¡Ay yi' ayoob ajcxy! pinjaty jäy ajcxy yajhuinma'ñydigoyaangixy. ² Niġi y'óyity co ixypiy yajyo'cxodziyüi tüg tzaa janch mijpi, e chi yajcöjibijpnaxipy mejyoty, ca'ydí co yajhuinma'ñydigoyipy

jada jāy ajcxy huídibi xpíjcin hueeni m̄id ma Dios yt'iy'ajt. ³ Naygüend'ájtigix miich ajcxy co ca' mgapxtigóoygixipy.

Co m'uch xymidundigooyipy, e chi mgapxhuíjip, e pen jothuimbijit, chi mbocymeecxipy. ⁴ Pen m'uch huixtujc'oc xymidundigooy tüg x̄ibi, nañ huixtujc'oc xyñimiiñ tüg x̄ibi, e ym̄ina'n'ipy: "T'i njothuimbityich", huinmeecxipy miich yi', chi jada' miich huixtujc'oc mbocymeecxip.

Je mibíjcin ym̄ic'ajt

⁵ Chi je apóstoles ajcxy nimay je Huindzin Jesús:

—Yajyeeg iich ajcxy nm̄ibíjcin.

⁶ Chi je Huindzin Jesús y'adzooy:

—Co ixypy miich ajcxy mm̄ibicy Dios jadu'n nej tüg pi'c mostaza pajc, e mn̄ima' ixypy jada paadzim quipy: "Nayyajpidígii, nicx tina' mejyoty, e xycapxymidohuip yi'."

Ti huaad tuñ je pin yajcaayb yaj'uuc

⁷ Pen ji miich ajcxy nidüg pin ym̄id tüg ytumbi huídi tumb ñaaxjiditzii o yhuaj cuend'aty, co yja'ty ma mdíjc, ¿nej jēbi nimay: "Tigi', ixtäg ma mesa etz adzu'at?" ⁸ Hue' jancht'iy mn̄imāhuipy: "Yaj'oy'iyigich n'adzuu'ibi, co'amedí' mhuit, e xymooygich ngaayin n'uucín. E huin'it miich mgayipy m'ügipy."

⁹ ¿Nej yajnaxipy je' Dioscojuyip m̄id co je' anajty ti tuñ huídibi yaj'ane'my? Hich minamb co ca'. ¹⁰ Nañ jadu'n miich ajcxy co ti mguydungixy tüg'óciy tiibi Dios xyaj'ane'mgixy, chi mn̄inángixipy: "Je' iich ajcxy je tumbi huídibi ca'p ycapxpaadyity, jēyi ti ndúngixich huídibi iich ajcxy huaad ndungixy."

Jesús yajtzögy majc jāy jibic pützpa'mm̄idpi

¹¹ Nicxp jim Jerusalén anajty Jesús, chi ñaxty ma Samaria etz Galilea ñaymidziba'n'ájtigixy. ¹² Co anajty mihuingoñ tüg cajp, chi jijpcoyöyiy majc jāy pützpa'mm̄idpi. Chi ajcxy yhuácxiy jiguégyni. ¹³ Chi ajcxy mic ycapxcoody ym̄inángixy:

—Huindzin Jesús, pa'ayoog iich ajcxy.

¹⁴ Co Jesús je' ajcxy ijxy, chi nimay ajcxy:

—Nicx nayguéxícigix ma yi teedy ajcxy.

Chi jadu'n yjajti, co ajcxy ñicxy, chi tūyöyjoty oy choocxxy. ¹⁵ Nidügte je' ajcxy co ñay'ixi co ti anajty chögy, chi nihuimbijty Jesús, ooy Dios jāymech cōmay janch cixyot huinijot. ¹⁶ Chi je' ycojxtinay'ahuuy ma Jesús ytecymijc, chi pidacpy yhuñyijp naaxcxy yajnaxy Dioscojuyipy. Samaritanojäy je' anajty. ¹⁷ Chi Jesús ym̄inañ:

—¿Nej ca' nimajc miich ajcxy huídi ti mdzoocxxy? ¿Ma ajcxy je' janidaxtucpí? ¹⁸ ¿Nej ca' pin jac yhuimbijty miñ jāymedza'ñ cōmaya'ñ Dios, jēyi tügpaic ti yhuimbity jada samaritanojäy?

¹⁹ Chi Jesús nimay je jāy:

—Pidíg, nicxni. Yi mm̄ibíjcin ti xyajtzögy.

Nej je' yminipy Dios y'ané'min

²⁰ Chi je fariseojäy ajcxy y'amidooy Jesús m̄ina anajty yi Dios ya miñ ya naaxhuñ y'ane'mañ. Chi Jesús y'adzooy:

—Je Dios y'ané'min ca' je' yminipy jadu'n nej ti yaj'ixy o yajmidooy. ²¹ Ni mgaminángixipy co cha je' o jim'amy je'. Dios y'ané'min ya je' cham ma miich ajcxy.

22 Chi Jesús nimay yi' ydiscípulos ajcxy:

—Miim je xii je tiempo ma miich ajcxy anajty ooy xyjamid'idáangixich tüg xii, e ca' iich miich ajcxy xy'ixiipy, iich je jáy huidi tzoon tzajpjoty. 23 Chi jáy ajcxy yminá'nip: “Chaa'amy je', je Cristo”, o “Chim'amy je'.” Ca' miich ajcxy yi' mniníxcixiipy, e ni mgabaníxcixiipy. 24 Co anajty nmiñich jadügtecy ya naaxhuiñ, iich, je jáy huidi tzoon tzajpjoty, co iich anajty nmiñiñ n'ané'min, jadu'n je' yjadipy nej huidzuc co y'aa'an ma tüg tzajp'ijx e nañ jadu'n y'aa'an jadüg tzajp'ijx. 25 Nañ ooy ycopícyity co jayijp ocpáadibich ayo'n, e chi jada xyca'ixa'nibich xycatzoga'nibich yi jáy ajcxy huidi tzinaayb jugy'ajtp jadachambi tiempo. 26 Com jadu'n nej yjajti jecy'ajty, co je Noé chinaay, nañ jadu'n yjadipy co anajty iich, je jáy huidi tzoon tzajpjoty, co anajty nxii ndiempo paty mina anajty nmiñich ane'mbi. 27 Janch caayb janch uucp anajty je jáy ajcxy agujc jotcujc co je Noé ytigüy ma ymijcajoon. Chi je ayo'nduu ymiñ huidi cijx yaj'ögtigoydäy je mayjäy. 28 Nañ jadu'n yjajti jecy'ajty co Lot chinaay. Je jáy ajcxy jim Sodoma etz Gomorra ycaaygixy y'uuccixy yjuuygixy ytooccixy, etz ytiçcojicixy. 29 Huin'it xii co Lot chooni jim Sodoma, chi ycäy tzajpjoty jün etz huidi jindzaa muid conhuidity ytoy, chi cajp ytigoyday. 30 Jadu'n nej ayo'n yjajti taabi chinaay Noé etz Lot ya naaxhuiñ, nañ jadu'n yjadiiyb ayo'n co anajty nmiñich jadüg'oc ya naaxhuiñ, iich je jáy huidi tzoon tzajpjoty.

31 Je huin'it xii huin'it tiempo pin anajty iñaayb ma ytiçcop, e ymuid anajty ypidägy jilby tigoty, ca' niminagipy nicxy ti yajpidzimy, e huidi jáy anajty jim camjoty nañ ni ca' yhuimbidity ma ytiç. 32 Ajihuuygix jadu'n nej Lot ytöxyjic ayo'n paty. 33 Tüg'öciy jáy ajcxy pinjaty yjugy'ajt tzoögam, tigoyipy yjugy'ajt. Tüg'öciy jáy ajcxy pinjaty yjugy'ajt tgooyb (muid iich ycixpi), hue' je' yjugy'ajt ypaadipy chögipy.

34 Iich miich ajcxy nimaayb co je huin'it coodz nimetz jáy anajty ajcxy ma cijx, tüg yajnicxiyb etz jadüg yajhui'miiyb. 35 Nimetz töxyjäy anajty yjijtzcixy, tüg yajnicxiyb, etz jadüg yajhui'miiyb. 36 Nimetz yeydijc anajty ytungixy camjoty, tüg yajnicxiyb etz jadüg yajhui'miiyb.

37 Chi je jáy ajcxy huidi ixpijcp Jesús y'ayuc yminañ ajcxy:

—¿Ma jadu'n yjadiiyb nej miich ti mina'n, Huindzin?

Chi Jesús yminañ:

—Ma anajty je ögpi yajpaady, jim yi luud ajcxy ñimuga'nñ.

18

Je ijxpejt ma je ayoobitöxyjäy etz je juez

1 Chi Jesús yajnimay ajcxy tüg ayuc huidijaty ixpijcp ma yi' co ooy ycopícyity Dios nmibijctzoohum jabom jabom, ni ca' nmidziipim. 2 Chi Jesús yminañ:

—Ji anajty tüg juez ma tüg cajp, ni Dios anajty ca' tzigüy, etz ni jáy ajcxy anajty ca' huindzigüy. 3 Nañ ma je cajp jim anajty tüg co'ögy ytöxyjäy. Je' anajty yminög janam jadzoc ma je juez, nimäy anajty: “Nihuaangich ma je nmidzipich.” 4-5 Chi je codung ca' co'adzoy ca' a'ixiy tzojc. Chi je juez jot'ajti, yminañ jotjoty huinma'ñyjoty: “Oy Dios ca' ndzigüyich, ni jáy ca' nhuindzigüyich, per com jada co'ögytöxyjäy nigi xychach'amayiyich, miñ n'ocnihua'nñich, ca'ydi jadüg'oc ymiñ e xyajcijxich anajty nmecxtújin.”

6 Chi je Huindzin Jesús yminañ:

—Mido'mbic miich ajcxy nej je juez jibicjāybi ti nihuañ je tōxyjāy co anajty ti yajtzibyyi. ⁷ ¿Nej ca' Dios ñihuaanip yi huidibi ti huin'ixy, huidibi mibijctzoob xim tzuum? ¿Huācxibip, nicx ca' tzojc adzooyi? ⁸ Hich miich ajcxy nimaayb co Dios ñihuānami mic'amy yi' yjāy. Co anajty nhuimbity ya naaxhuñ, ñich, je jāy huidi tzoon tzajpjoty, ¿nej nbáadibich mibijcin ya naaxhuñ?

Je ijxpejt ma je fariseo etz ma je yajcogüejtpi

⁹ Jesús ñimiydac je jāy ajcxy huidi ci'm ooy ñaygōmayyii co ooy y'oyjāyity, etz pejxy yi jacjadyiibi jāy ajcxy, chi yajnimay ajcxy tūg jihuimbit ayuc:

¹⁰ —Mejtz jāy ajcxy ytiñiy ma Dios ytiñ capxtacpi. Tūg hue' je' fariseojāy, e jadūg yajcogüejtpi. ¹¹ Chi je fariseojāy ytinay'ahuñiy ycapxtāgy, chachmina'ñ jadu'n: “Dios Teedy, Dioscojuyip yajnajxpich com co ca' ñich nbocytuñich jadu'n nej jacjadyi jāy ypocytūngixy, ca' nmeechich, ca' njibicjāyidyich, ca' nmigapxich huingjāy ytōxyjic, ca' nbocytuñich jadu'n nej jada yajcogüejtpi.

¹² Mejtz xi n'ityich jaygay tūgpi seamaan. Chi huen ytim ti nmūdich ngüejtpyich ma Dios majcjay.” ¹³ Per je yajcogüejtpi jiguem ytinay'ahuñiy, ni ycapāt'ixy tzajpcijx, jēyi ycaachtzachoxy ymina'ñ: “Dios Teedy, pa'ayoogich, ñich pocyjāyich.” ¹⁴ Hich miich ajcxy nimaayb co jada yajcogüejtpi y'idacy ma ytiñ ti anajty yajhuinmecxy ypocy, e je fariseojāy ca' yajpocyhuinmecxy. Huenpinity huidi ci'm naygōmayipy, Dios yajtzōyduniib; e pinjaty ca' ñaygōmayyii ci'm, Dios ycōmayiib.

Jesús conucxy je pi'ctijc ajcxy

¹⁵ Chi jāy ajcxy mūdmiñ pi'c'anāg ma Jesús huen ñidoñyii. Co je' ydiscípulos ajcxy ijxy, chi ajcxy oyy undaj. ¹⁶ Chi Jesús yaaxi ymīgūgtijc nimay ajcxy:

—Ixmatz, huen yi pi'ctijc xyñimifich, ca' ajcxy mjijpcogapxñygyixy, com yi jāy ajcxy huidibi yajpatp ma Dios y'ané'min, jadu'n ajcxy nipaady nej pi'ctijc.

¹⁷ Janch ñich miich ajcxy nimāy co hueñypinity huidi ca' cōbijci yi Dios y'ayuc ytiy'ajt jadu'n nej yi pi'ctijc ajcxy cōbijcy Dios y'ayuc ytiy'ajt, ca' yi' ajcxy ytiñihuipy ma Dios y'ané'min.

Tūg comeeñ'anāg ymiydāgy mūd Jesús

¹⁸ Chi tūg micjāy y'amidooy Jesús, nimay:

—Miich oyjāybi Huindzin, ¿ti huaad nduñich co ñich n'alma nīdzoocin paadipy?

¹⁹ Chi Jesús y'adzooy:

—¿Nej co xytijich oyjāy? Ni pin ya yca'oyjāyity, je'yi Dios tūgpajc y'oyjāyity.

²⁰ Miich mnejhuñiyb yi Dios ycotūjcin. Ca' mmigapxtigoyipy huingbi tōxyjāy, ca' jāyay'ōgipy, ca' mmeedzip, ca' mmīgūg nihuambedipy, yajmij'at mdaj mdeedy.

²¹ Chi je' y'adzooy:

—Ti tūg'ōciy nguydundāyich jada cōtūjcin maabi nyeecpidzimyich.

²² Co Jesús jadu'n midooy, chi nimay:

—Tigoy'ijtni ja tūg huidi ca' mduñi. Toocta' tūg'ōciy tijaty miich mūd, e mo' je meeñ ayoobtijc, huin'it mgomeeñ'adipy jiihy tzajpjoty; miin, e pajamgich.

²³ Co je comeeñybi jadu'n ayuc midoy, chi ooy yjottigoyoty com ooy anajty ycomeeñity. ²⁴ Co Jesús ijxy co je comeeñybi anajty ti yjotmaybicy, chi minañ:

—Ooy chachchipyty ytiñihuipy tūg comeeñyāy ma Dios y'ané'min. ²⁵ Jac ca' chípity co ñaxipy tūg camello ma yi xu'ñ yxūtity, ca'ydi co tūg comeeñyāy ytiñihuipy ma Dios y'ané'min.

26 Chi je jāy ajcxy anajty tūibi ajcxy midoogixy Jesús y'ayuc, ymīnaangixy: —¿Pīn jada' jēbi y'alma paadīpy nīdzocīn?

27 Chi Jesús y'adzooy:

—Huīdībi naaxhuīñy jāy ajcxy ca' jaty nej yaj'oyīhuīpy, Dios jēbi yaj'oyīy.

28 Chi Pedro ymīnañ:

—ñich ajcxy tī nbiđāgy n'ixmajtztaaygixy, co nbanīcxaangixy.

29-30 Chi Jesús y'adzooy:

—Janch ñich miich ajcxy nnīmaaygixy co yī jāy ajcxy huīdi ytījc ixmajtz etz ytaj yteedy, ymīguēx, etz y'ung y'anāg mīid Dios y'ané'mīn ycīxpi, ypāadīpy ajcxy ya naaxhuīñ nīgi oy'ājtin, etz ypaadīpy ajcxy tzajpjoty tzīnaayīn huīdi ca' ycīxīpy ytīgoyīpy nīmīna.

Jesús capxypīdzīmy jadūg'oc co y'ōga'ñ

31 Chi Jesús huodzon je nīmajmetzpi, nīmay ajcxy:

—Jadachambī tzoc jāmīm jīm Jerusalén. Nguydunaamyīch tūg'ōcīy jadu'n nej yī Dios y'ayucnajtzcaxīybi ajcxy jāybejty jecy'ajty mīid ñich ycīxpi, ñich, je jāy huīdi tzoon tzajpjoty. 32 Chi nyajcīyega'ñich ma je romano gobernador, xycamīj'ixīpy xycamīj'pīdāgībīch ajcxy. Xy'ōjībīch xyhuīndzūjībīch xyjījptzūjībīch ajcxy. 33 Xychaachytunīpyīch ajcxy, xyaj'ōgībīch ajcxy, e codugūg xīi njugypīgīpyīch jadūg'oc.

34 Chi yī majmetzpi ajcxy nī jadu'ñyī ca' huīnjīhuīy ajcxy nej yhuīmbīdzīmy Jesús y'ayuc. Yūch anajty jada ayuc mīid yī' ajcxy ycīxpi, paady ca' huīnjīhuīy nej anajty yajnīmaaygixy.

Jesús yajhuīndīcxīgy tūg huīntzpi jīm Jericó

35 Chi jadu'n yjajti co Jesús mīhuīngoñ je cajp huīdi yxī Jericó, chi tūg huīntzpi anajty īñāy tūba'āy pījctzoy anajty limosna. 36 Co mīdooy mayjāy ñaxy, chi je' yajtiy:

—¿Pīn yī' ñajxp?

37 Chi ajcxy nīmay co Jesús nazareno najxp. 38 Huīn'it je huīntzpi mīc ymīnañ:

—Jesús, David y'ap y'oc, ñich pa'ayoog.

39 Je jāy ajcxy huīdi anajty jāyīp nīcxp ooy oiy je huīntzpi, nīmay co huen amōñ. E je' nīgi mīc ymīnan'īdīch:

—David y'ap y'oc, ñich pa'ayoog.

40 Chi Jesús ytīnayxījpy oy yajhuoyīi. Co je' jīm ymejch, chi amidoy, nīmay:

41 —¿Tī mdzojcpy ndunīpyīch mīid mīich?

Chi je' y'adzooy:

—Huīndzīn, yajhuīndīcxīccīch.

42 Chi Jesús mīnañ:

—Huīndīcxīg, yī mmībījīcīn tī xyajtzōgy.

43 Chi je huīntzpi mīc'amy yhuīn y'ījxīgy, chi panīcxy Jesús, chi ooy jāymejch cōmay yī Dios. Cham tūg'ōcīy je cajp jāy co ajcxy jadu'n ījxy, nañ ycōmay yjāymejtz yī ajcxy Dios.

19

Jesús mīd Zaqueo

1 Co Jesús ytīgīy jīm Jericó, ñajxy cajpcujc anajty. 2 Chi jadu'n yjajty jīm anajty tūg jāy hue' anajty yxī Zaqueo. Hue' je' anajty yajcogūejtpī huīndzīn, e comeñ anajty. 3 Ooy yī' anajty tzach'īxa'ñ Jesús, nejhuīhua'ñ pīn jāy je', chi

ca' jajty nej ixipy, je' co anajty ñaxity, etz co anajty ooy mayjäy jim. ⁴ Chi je' ñicxy poyigy jayijp, chi ypejty ma tüg sicómoro quipy, yco'ijxnaxa'ñ co anajty Jesús jim ñaxy. ⁵ Co Jesús jim ymejch, chi pät'ijxy je Zaqueo, e nimay:

—Zaqueo, tzojc minac, com copicy co nicxy njättäga'ñich ma mdijc.

⁶ Chi je' yminajty janch jottigoy, e jotcuyc cöbijcy Jesús. ⁷ Co jadu'n ijxy, chi je mayjäy ajcxy nigapxy ni'oj#ygyx Jesús, ymīnaangixy:

—Ti ñicxy jättacpi ma tüg pocyjäy ytijc.

⁸ Chi Zaqueo ytinayigy, nimay Jesús:

—Huindzin Jesús, cha je' je njugy'ajtich huidi cup nbijc-huäcxaamyich nmöhua'ñich ayoobitijc. Pen ti ñich nyajcuejtnaxy, nyajhuimbiditych midaaax jadu'ñyi.

⁹ Chi Jesús ymīnañ:

—Jadachambi jada jäy ma jadayaabi tijc ti y'alma ñīdzögy, com co yi' nañ jadu'n Abraham y'ap'adyii y'oc'adyii. ¹⁰ ñich, je jäy huidi tzoon tzajpjoty, ti nmiñich ya naaxhuiñ co n'ixtähuibich etz nyajñīdzögibich tiibi anajty ytigooy.

Je ijxpejt ma je majci meeñ

¹¹ Co je jäy ajcxy midooy jadu'n, chi Jesús jacyajnimay ajcxy tüg ayuc, com ytimyihuingónip anajty Jerusalén, etz je jäy ajcxy tzachhuinmaaygixy co Jesús mic'amy anajty pidäga'ñ y'ané'min. ¹² Chi Jesús ymīnañ:

—Tüg micjäy, comeeñyjäy anajty, ñicxy ma tüg naaxjot jiguembi, nicxy anajty ytungbicy co yrey'ada'ñ, e chi anajty yhuimbidaani. ¹³ Chi je micjäy mijhuooy nimajc ytumbi, chi moy ajcxy majc meeñ nidüg nidüg, chi ajcxy nimay: “Meeñ yaj'ung'ajtcix ji ixti cooni ñich anajty nhuimbityich.” ¹⁴ Chi je ymīnogajp ajcxy ca' anajty ixa'ñyii ajcxy je comeeñybi, chi ajcxy yajpaguejxy huīngapxpī ma anajty je comeeñybi ñicxy, chi je huīngapxpī ymīnañ: “Ca' ñich ajcxy ndzocy co jada comeeñyjäy rey'adipy ma ñich ajcxy.” ¹⁵ Chi jadu'n yjajty co je comeeñyjäy yhuimbijty ti anajty yreytiigy. Chi oy yajhuoyii je ytumbi ajcxy, je huidi anajty je meeñ ti yajmihui'mgixy, nejhuñhua'ñ anajty jadu'ñi ti yaj'ung'ajtcixy je meeñ nidüg nidüg. ¹⁶ Chi tüg jayijp ymiñ ymīnañ: “Huindzin, yi meeñ majcjadu'ñi ti nyaj'ung'atyich.” ¹⁷ Chi je rey y'adzooy: “Ooy miich oy mduñ. Jadu'n nej ti mgapxycöbicy mīd huidi hueeni, cham m'ané'mipy majc ciudad.” ¹⁸ Chi je mīmetzpi ymiñ, ymīnañ: “Huindzin, yi mmeeñ mīgoox jadu'ñyi ti nyaj'ung'atyich.” ¹⁹ Chi je rey nimay je mīmetzpi: “Cham m'ane'mipy mīgoox ciudad.” ²⁰⁻²¹ Chi je midugiipī ymiñ, ymīnañ: “Huindzin, cha je mmeeñ huidi ti nmi'ityich, ti nyujcpiyich ma tüg paayi. Ndzigiyybich miich co miich mjäy'aty ahua'ñ, myajpidigtäy huidi ca' mjē'adyii, nañ ndzijcipy huidi ca' ti mnīpy.” ²² Chi je rey ymīnañ: “Miich jibic ti mduñ, cham ndiyduna'ñ mīd mgi'm'ayuc ycixpi. Miich mnejhuib co nyajpidigyich huidi ca' njē'adyiijich, e ndzicyich huidi ca' ti nnībyich. ²³ ¿Nej co ca' ti mbīdägy ñich nmeeñ ma je banco, jigix co ixipy nhuimbityich, may meeñ ixipy xycidigyich mīd meeñ'ung?” ²⁴ Chi je rey nimay huidi anajty ajcxy jimip: “Pijci ajcxy yi' ymeeñ, etz mooygixy yi' tiibi meeñ yaj'ung'aty majc jadu'ñyi.” ²⁵ Chi je jäy ajcxy y'adzooy: “Huindzin, ymīd yi' cham majc jadu'ñyi meeñ.” ²⁶ Chi je rey y'adzooy: “Ñich mīnaam co tüg'ócay pinjaty mīd, jacyajmöhui; e huidi ca' ti mīdity, oy jamīdity yajpīctähui; huidi ymīd. ²⁷ Nañ jadu'n ajcxy je nmīdzipich huidi ca' anajty tzojccixy co ñich nrey'adipyich ma yi' ajcxy, yajmīngix ya, yo'cpujxtutaaygix ma ñich nhuinduu.”

Jesús ytigüy Jerusalén

²⁸ Co Jesús jadu'n yminanday, chi choñ jim, ñicxy Jerusalén. Jesús jayijp anajty ytüyöy ma je mayjäy. ²⁹⁻³⁰ Jadu'n yjajty co jim yja'ty mihuingon Betfagé etz Betania ma je cop huïdi yxii Olivos, chi Jesús quejxy metz ydiscípulos, ñimay ajcxy:

—Ñicxcix ma yjiibi cajp huïdi ji huingon. Co ajcxy mgajptugühuip mbáatcixipy tüg burro mang ycoxochity, huïdi ca' ni pin yaj'iñaayñi. Mgoguejtúutcixipy, etz mmimíngixipy. ³¹ Pen jim pin xy'amidoogixy, ¿nej co yi burro mgoguejtüdy? Chi ajcxy jadu'n m'adzohuipy: “Je nhuindzinich jim tzojcp.”

³² Chi je' ajcxy ñicxy huïdi Jesús yquejx. Chi ajcxy paty je burro jadu'n nej Jesús anajty ajcxy ti ñimäyii. ³³ Jim anajty ajcxy je burro mang coguejtuutcixy, co ñihuindzin ñimaayi ajcxy:

—¿Nej co yi burro mang mgoguejtuutcixy?

³⁴ Chi je' ajcxy y'adzooy:

—Je nhuindzinich jim tzojcp.

³⁵ Chi ajcxy huijtz miñ je burro ma Jesús. Chi ajcxy jibe'ñ miid yhuit, chi ajcxy Jesús yajburripejty. ³⁶ Co Jesús anajty ytüyöy, chi je mayjäy ajcxy yhuit yé'pcixy tüguc. ³⁷ Co ajcxy mihuingoñ je minac ma je cop huïdi yxii Olivos, chi tüg'ócüy je mayjäy yjotcugiyday, e ytigüy ajcxy ooy alabanza iibi Dios ojadajtpi miid je mij huinma'ñ ycixpi co anajty ti ijxcixy huïdi anajty Jesús ti tuñ. ³⁸ Chachminaangixy:

—¡Capxpaady je rey huïdi miimb miid Huindzin Dios yxii ycixpi! ¡Jotcujc'ajt jiiiby tzajpjoty etz cömáyin ma Dios!

³⁹ Huin'it nijéjity fariseojäy huïdi anajty ajcxy jiiiby jäy agujc ñimay ajcxy je Jesús:

—Oj yi mjäy ajcxy.

⁴⁰ Chi Jesús y'adzooy:

—Fich miich ajcxy ñimaayb pen yi' ajcxy amomb, yi tzaa tigühuip mic capxp.

⁴¹ Co Jesús yja'ty jim mihuingon Jerusalén cajp, e co ijxy, chi yaaxy miid je cajpjäy ycixpi. ⁴² Chi Jesús yminañ:

—¡Pen mhuinjihuüyb ixipy miich ajcxy nej mbáatcixipy mjotcujc'ájtín jadachambi xii tiempo! Yüch jada tiy'ajt cham ity ma miich ajcxy, ca' huaad m'ijxcixy. ⁴³ Minip je xii je tiempo ma miich ajcxy je mmidzip ajcxy xyajjüdügipy mgajp miid tzaamacxy, e tziptunipy ajcxy miid miich, yajxon xyajco'adugipy ajcxy jühuidity ma je mgajp. ⁴⁴ Xyñigidaagoodip mdzaaboch ni'ung ni'anäg, ni ca' yhuü'mip tzaagop tzaamacxy, jadu'n yjadipy com miich ajcxy ca' mnejhuüy je tiempo mina je Dios xyñigidägy.

Jesús yajpidzimy je jibicjäydjic ma Dios ytjic

⁴⁵ Chi Jesús ytigüy ma Dios ytjic yajpidzimday tüg'ócüy jäy huïdi anajty jiiiby ajuuyb adoocp. ⁴⁶ Chi Jesús ñimay je jäy ajcxy:

—Jadu'n mina'ñ ma jaybétyity: “Fich ndijci tzajpcapxycapxtägi'ñ yi'.” E miich ajcxy hue' mhuaangixy jadu'n nej meetzpi y'ang.

⁴⁷ Jesús anajty yaj'ixpijc jabom jabom ma Dios ytjic, chi je teedy tungmiidpi, etz huïdi ajcxy yaj'ixpijcp anajty Dios ñecy, etz mijjäydjic ajcxy nihuinmayiygixy co yaj'ögaangixy Jesús. ⁴⁸ Chi ajcxy ca' ni nej mihuinma'nybaty nej yaj'öccixy, com tüg'ócüy jäy anajty ooy tzach'amidoo'ijt Jesús y'ayuc.

20

Jesús y cõtújcin

¹ Chi jadu'n yjajty tüg xii anajty Jesús yaj'ixpicy je cajpjäy ma Dios ytijc, capxhuäcxy anajty oybi ayuc. Chi ñimiini je teedy tungmiidpi ajcxy etz huidi ajcxy yaj'ixpijc Dios ñecy etz mijjäydijc ajcxy. ² Chi ajcxy migapxy Jesús ñimay:

—Yajñimaaygich, ¿ma cõtújcin ti mbaady co jäy myaj'ixpicy ya ma Dios ytijc? ¿Pin je' tiibi xycõtujc möy?

³ Chi Jesús y'adzooy:

—Hich nañ jadu'n nyaj'amidohuamy #ch miich ajcxy tüg ayuc, e m'adzóogixip. ⁴ Co Juan (je Bautista) jäy yajñibejty, ¿pin je' cõtújcin moy, je Dios tzajpjotypi o jäy ajcxy?

⁵ Chi ajcxy ytigüiy huinmay'ahuidijtpi ñayñimáayigixy miñ xyipy:

—Pen mñaanim co tzajpjoty choñ je Juan ycõtújcin, Jesús xyñimaayimip ya: “¿Nej co ca' miich ajcxy mijpidacy yi' y'ayuc?” ⁶ Pen mñaanim ajt co jäy cõtújcin moy je Juan, chi tüg'óciy cajpjäy tzojc xycögädzim, com ymibijcipy ajcxy co yi' Juan, Dios yi' y'ayucnajtzcapxiybi.

⁷ Chi ajcxy y'adzooy co ca' ajcxy nejhuüiygixy pin Juan ti quexyii. ⁸ Chi Jesús ñimay je' ajcxy:

—Hich nañ jadu'n ca' nigapxa'ñich pin ti xycõtujcmöyich.

Je ijxpejt ma je tumbidijc ajcxy jibicjäybi

⁹ Chi Jesús ymñandacy yajñimay tüg'óciy je jäy ajcxy tüg ayuc, ymñañ:

—Tüg jäy pidacy tüg camuuxy ycam, chi yajpijctzoy ytumbidijc, co anajty chona'ñ ñicxa'ñ jiguem jecy jecy. ¹⁰ Co cosecha paty, chi quejxy tüg ytumbi ma je ytumbidijc, huen cimoüyii huidibi je' anajty paatip. Chi je ytumbidijc huinhuojpy jijphuojpy je quejxyöybi yajhuimbijty ca' ni ti mooy. ¹¹ Chi huingbi ytumbi quejxy, nañ jadu'n ajcxy je' tuñ, huin'ojoy jijp'ojoy ajcxy, yajhuimbijty ajcxy, ca' ajcxy ni ti mooy. ¹² Chi midugüigpi ytumbi quejxy, nañ jadu'n ajcxy je' yajtzaachüy etz yajhuimbijty ajcxy.

¹³ Huin'it je camuuxycam huindzin ymñañ: “¿Ti ndunipyich? Ocquejxyich nmang huidibi ooy ndzocyich. Ca' jécyity co ajcxy ixipy nmangich, yajmij'adipy ajcxy.” ¹⁴ Chi je ytumbidijc co ajcxy ijxy je' yhuindzin ymang, chi ajcxy huinmaygoty nayñimáayigixy miñ xyipy: “Ti ymiñ je cogam ymang, yi' je' jada cam jédaanip. Tzoc yaj'o'cim jigix #ch ajt jada cam njé'ajtim.” ¹⁵ Chi ajcxy je cogam ymang yajpidzimi camjoty, chi ajcxy yaj'o'cy.

Chi Jesús y'amidooy:

—¿Ti jada' ytunipy je cam huindzin? ¹⁶ Minip je', miñ yajtigoydäy je ytumbidijc ajcxy, e chi je' je ycam yegipy müd huingbi tumbi.

Co je jäy ajcxy jadu'n midoy, chi ajcxy ymñañ:

—Ni catzogipy Dios, ñicxy jadu'n njajtim.

¹⁷ Chi Jesús huindixpejty je mayjäy ñimay ajcxy:

—¿Ti tijamy huidi yjaybétyip ma Dios ñecy?

Jadu'n:

Je yëydijc huidi je jäy ajcxy ca' anajty tzocy, ti Dios pidacy mij'ane'mbi. Tim jadu'n nipaady nejhuüiy je tzaa oyjatypi huidibi je pojtzpidijc ajcxy ca' yajtuna'ñ, je' oy ti yhuimni ma anajty yjaccopicyity.

18 Pinjaty ca' cöbigañ jada mij'ane'mbi, ayo'n ypadamy, tim jadu'n nipaady nej jihuüy jim ycixciday ma je tzaa nıcx e tijhuıtız yjajtahuıpy; e pen je tzaa nigıdagoty, je' ajcxy janch jaam pıx nıcx yjajtcıxy.

Yajnidıygıxy pen jėbi cogüėtin yajyecy o pen ca'

19 Je teedy tungmıdipi etz huıdi ajcxy yaj'ixpijc Dios ñecy ooy anajty nihuınmayıygıxy madzaangıxy je Jesús mic'amy, co ajcxy huınjihuıy co Jesús nimıydaacıgıxy mıd je jihuımbıt ayuc, e chıgıyb anajty ajcxy je cajp jäy. 20 Chi ajcxy chachhuınma'ñ'ixtaaygıxy nej huaad xıgıxy Jesús, chi quejxy ajcxy iıx'ıjtpı ma Jesús yajpaady huıdi naybıdaacıp janch ypaat tudägyjäy; chi amıdoo'ıjtcıxy Jesús y'ayuc huıdi mıd xıhuaangıxy, chi cıyegaangıxy ma je gobernador. 21 Chi je iıx'ıjtpı ajcxy y'amıdooy Jesús nimay ajcxy:

—Huındzin, nejhuıyb ıch ajcxy co mııch m'ayuc ooy y'öyity, etz myaj'ixpıcy yajxon, ca' huın'ixpety jäy myaj'ixpıcy, etz myaj'ixpıcy Dios ytiy'ajt nej jäy jėbi huaad chinaaygıxy. 22 ¿Nej copıcy ıch ajcxy mıgüedıpy je César je romanojäy mij'ane'mbi, o ca'ıjı?

23 Chi Jesús huınjihuıy yı' ajcxy yjıbic-huınma'ñ, paady ajcxy nimay:

—¿Ti co mııch ajcxy xyjot'ıxy xyhuınma'ñ'ıxyıch? 24 Yaj'ıjxcıch tüg meeñ. ¿Pın y'ahuınax etz pın yxıı mımb ma jada meeñ?

Chi ajcxy y'adzooy:

—Yı César.

25 Chi Jesús nimay ajcxy:

—Cuet ma César huıdi César paatıp, e ma Dios huıdi Dios paatıp.

26 Ca' mımadacy ajcxy nej tzu'ıjxcıxy ma mayjäy yhuınduu. Chi ajcxy ooy huınmaay jadu'n nej anajty Jesús ti y'adzóohıgıxy, chi ajcxy amoñıyı.

Yajnidıygıxy je jugy'ájtın ycıxpı

27 Chi ñıja'tti Jesús tüg saduceojäy, e yı saduceojäy ajcxy ymınañ co jäy ögy ca' y'ocıyujcni. Chi je' yajtıy:

28 —Huındzin, Moısés jaybety ma yı' ñecy, je jécıpy, co tüg yėydıjc ytöxyıjc yajhuı'my ix'ögp, e ca' ymang ti paatcıxy. Jėbi je yėydıjc y'uch mıdztınäy je töxyjäy jaydėbi yaj'ung'ıxıp mıd y'ajch ycıxpı. 29 Jadu'n anajty tügpıcy jäy, nihuıxtujc ajcxy ytügquėx'ájtıcy, ac yėydıjc ajcxy. Je mıjpi mıdztınay töxyjäy, chi ix'o'cy, e ca' ymang paty. 30 Chi je mımetzpi ypijcy mıd je töxyjäy, e ni ca' ajcxy ung paty. 31 Chi je mıdugıgpi ypijcy mıd je töxyjäy, e jadu'n je nihuıxtujcpi mıdztınay ajcxy je töxyjäy, ix'o'cy ajcxy, ni ca' ajcxy ung paty.

32 Chi nañ jadu'n je töxyjäy y'ögıni. 33 Co anajty je nihuıxtujcpi jugypıccıxy, ¿huıdi jada' octöxıj'adııyb je töxyjäy? Com nihuıxtujc ajcxy ti töxyıjc'ájtıgıxy.

34 Chi Jesús y'adzooy:

—Jadachambı jäy pıjccıxp, ñaymooyıgıxy y'ung huen pıjccıxy. 35 Je jäy ajcxy huıdıbı paatıp anajty chınähııp ma je tiempo huıdi mımb co ögpi yjugypıjccıxıpy, ni ca' ajcxy ypijıpy, ni ca' ajcxy ñaymóoyıgıxıpy y'ung huen pıjccıxy. 36 Co jäy ajcxy yjugypıcy, chi ca' huaad y'ögıcy jadüg'oc, quıpxyjatı ajcxy mıd je ángeles ajcxy, e Dios yı' ajcxy ung'adıb co yjugypıgıpy mıd jemybı jugy'ájtın. 37 Janch co yı ögpi yjugypıgıpy, jėbi mbaadıp je tiy'ajt ma Moısés ñecy ma jadu'n yjaybėtyıty, je taab anajty aay'ujtız ytoy, co je Huındzin Dios mıgapxy Moısés, nimay: “ıch Abraham yDios, Isaac yDios, Jacob yDios.”

38 Je ögpi ca' mıdıtıy Dios. Je jäy ajcxy huıdi juugyıp janchtıy ajcxy ymıd Dios, com co mıd Dios ycıxpı tüg'ócıy jäy ajcxy ymıd yjugy'ajt.

³⁹ Chi jäy ajcxy huidi yaj'ixpijcp Dios ñecy nimay Jesús:

—Oy ti m'adzoy, Huindzin.

⁴⁰ Ca' ajcxy ocjajtni nej jac nimáaygixipy.

Pin je' y'ung je Cristo

⁴¹ Chi Jesús je' ajcxy nimay:

—¿Nej co miich ajcxy mīna'ñ co Cristo David y'ap y'oc? ⁴² David ci'm mīna'ñ ma je Salmo necy:

Yi Huindzin Dios nimay iich nHuindzin: “Iña' ya a'oy'amy ma iich.

⁴³ Ixti cooni anajty miich mmidzip ti nmimadactäyich, jadu'n nej jihuÿy ti nbiidägyich yi mmidzip ma miich mdecypocxpejt.”

⁴⁴ Co David yxiimoy Cristo iich nHuindzin, ¿nejtz yi' co y'ap'adyii y'oc'adyii?

Jesús xiy je escribas ajcxy

⁴⁵ Chi tüg'óciy cajpjäy jim anajty y'amido'ijtcixy co Jesús nimay je' ydiscípulos ajcxy:

⁴⁶ —Naygüend'ájtigix mīd yi' escribas ajcxy ydiscípulos, co ajcxy ooy tzojccixy yhuídidaangixy mīd yhuít oyjatypi, ooy ajcxy tzojccixy co huen capxpcoxyii ma jäy y'amugiy, e ooy ajcxy tzojccixy yi cödumbi iñaybejt ma naymujctac, etz ooy ajcxy tzojccixy cödumbi iñaybejt ma jäy ajcxy yxiidungixy.

⁴⁷ Chi ajcxy yajcixtayi yi co'ögytöxyjäy ypidägy, e tungixy ooy jecy tzajpcapxy-capxi ma jäy yhuinduu. Yi jadu'mbi jäy ajcxy nigi ajcxy Dios chaachytuniiyb mīd ypocy ycixpi ca'ydi jacnipin.

21

Je ayooobitöxyjäy co'ögypi y'ofrenda

¹ Jiiby anajty Jesús ma Dios ytijc co ijxy comeeñyjäy may'amy ofrenda pidaaccixy ma meeñygaax. ² E nañ ijxy co tüg co'ögytöxyjäy pidägy anajty metz pi'cmeeñ. ³ Chi Jesús ymīnañ:

—Janch iich miich ajcxy nimäy co jadayaabi co'ögytöxyjäy ayooob jac anaxy jada, ti pidägy ofrenda ca'ydi jacnipin. ⁴ Tüg'óciy comeeñydijc ajcxy ypidacyp ma ofrenda je meeñ huidi conajxp. Jadayaabi co'ögytöxyjäy ti pidägy huidi anajty ñigayamy.

Jesús ymīnañ co je Dios ytijc yhuindigoya'ñ

⁵ Nijējity jäy co ytigiyy ma Dios ytijc nimaydacy ajcxy co Dios ytijc ooy chach'oy'oyduñity mīd tzaa oyjatypi, e mīd tiibi jiiby yojxcixy. Chi Jesús ymīnañ:

⁶ —Tüg'óciy jada huidi ajcxy m'ijxpy ma Dios ytijc, minip xii tiempo mīna jada nicxy yhu'i my taj xit jada tzaa, ca' ma pochycop.

Je tiy'ajt ma ca'ni naaxhuiñybi ycixa'ñi ytigoya'ñi

⁷ Chi ajcxy y'amidooy Jesús:

—Huindzin, ¿mīna jada jadu'n ytuniiyb yjadiiyb nej miich ti mmīnañ? ¿Ti tiy'ajt ji yaj'ixip co jada anajty jadu'n ytuna'ñiyi yjada'ñiyi?

⁸ Chi Jesús y'adzooy:

—Ix mgayajhuin'iingix. Ooy mayjäy ymīna'ñ ñaybiidägānigixy co je' ajcxy je Cristo, ymīna'ñ ajcxy: “Iich je' je Cristo; huingóniñ anajty je xii je tiempo mīna je naaxhuiñybi ycixa'ñ ytigoya'ñ.” Ca' ajcxy axam mbanicxipy. ⁹ Co miich ajcxy ayuc midohuipy co jäy chachchiptungixy, e ñayñibiidicigixy, ca'

mdzigiŷygyxipy, com ooy ycopicyty co jada jadu'n jayjip ytuniyb yjaduyb, ca'nan hue' je' anajty tim cijxp tim tigooyb (je naaxhuiniŷbi).

¹⁰ Chi Jesús yjacminañ:

—Nayñibiðägiib naax cajp müid huingbi naax huingbi cajp. ¹¹ E minip mic'ujx, etz mij yuu mij pa'm xii yaa. E jaduib mij'adzigi'ñ, etz ooy ijxpejt huidi quëxiŷip tzajpcixy.

¹² Ma ca'ni anajty jadu'n jadyii, xypahuidiŷtcootcixipy jay, xymájtzcixipy, xyciyéjicixipy ma judíoŷy ñaymujctac. Chi jay ajcxy xypidägiŷip pujxtigoty, xyajnicxcixipy mach ma rey etz ma gobernador ajcxy yhuinduu. Jadu'n jay ajcxy jibic xytunipy müid miich ajcxy com co anajty ti xymijpidaaccixiyich.

¹³ Miich ajcxy tiŷ'ajt myegipy müid iich nxii ycxipi. ¹⁴ Co jay ajcxy yxihiuipy ma codungdiŷc, ca' ni nej ajcxy mjot'adiŷy, ni ca' ajcxy mhuinmayipy nej m'adzooŷigixipy. ¹⁵ Nyegipyich ayuc etz tiŷ'ajt nej huaad mmidzip m'adzoogixy. Ca' mmidzip ajcxy jadipy nej xy'adzooŷigixipy, e nej xy-jacxiŷigixipy. ¹⁶ Miich ajcxy mgi'mdeedy, mgi'm'uch, mgi'm'ajch, etz mgi'm ajuugy amigüg xyciyéjicixipy ma cötuŷctac. Nijëjity miich ajcxy m'ögipy müid co anajty ti mmijpidaaccixy iich n'ayuc. ¹⁷ Mayjäy ajcxy ca' xy'ixaanipy xychogaanipy müid co anajty ti mmijpidaaccixy iich nxii. ¹⁸ Ni tüg miich ajcxy mgöhuay ca' ytigoyipy. ¹⁹ Pen ooy ajcxy mmecxtucy, chi m'alma ñidzögipy huiniŷii.

²⁰ Co ajcxy m'ixipy Jerusalén anajty ti ñaducy müid ymidzip, huin'it ajcxy mnejhuihuipy co huingon je'anajty ma yhuindigoyaañi. ²¹ Huin'it tiempo je jay ajcxy huidi jim Judea naaxjot yquéeccixipy ñicxcixipy ajcxy yuugjoty, etz je jay ajcxy huidi jim Jerusalén queegipy ajcxy, etz je jay ajcxy huidi camjoty ca' huaad y'ocajptigiŷyñi ma je Jerusalén cajp. ²² Je tiempo mina yjadiŷy ayo'n müid co anajty judío jay ti ytundigooygixy, je' jada yajcuydundaŷy jadu'n nej yjaaybétyty ma Dios ñecy. ²³ ¡Ayoob yi töxyjy ajcxy huidi anajty ung tzim'ijtp huin'it xii, etz huidi anajty müid y'ungma'xung! Ooy jadiŷ mij ayo'n ya naaxhuin etz tzip éjcin ma jada cajp. ²⁴ Nijëjity ajcxy y'ögipy tzipjoty, e nijëjity yajnicxip tzummy mach ma huingbi cajp huingbi naax. E Jerusalén naxmihuägidydahuib yi jay huidi ca' yjudioŷyity, minipy je tiempo mina anajty Dios yajcixaani yajtigoyaañi yi' ajcxy y'ané'min.

Nej jada' yminipy je Dios y'ung

²⁵ Huin'it xii huin'it tiempo quëxiŷip ijxpejt ma xii po' etz ma yi madza', ya naaxhuin ooy jay ajcxy jotmay müidipy. Je jay ajcxy ooy chigihuipy yjihuhuipy yhuinmay'ahuididipy ajcxy ooy, müid je meŷy ycxipi co anajty chachpidigy chachnögy chachmina'ñ. ²⁶ Yi jay ajcxy anucxi'ñ yajcidahuib co anajty ajcxy ixŷy nej yjadyii huindu'mybi naaxhuin; e huidijaty mic'ajt yajpatp jiiŷy tzajpjoty yücxtähuipy yi'. ²⁷ Huin'it miich ajcxy xy'ixipyich, iich je jay huidi tzoön tzajpjoty, nmiiñich jocjoty müid je nmic'ajtich, nmiiñich müid iich ngötújcin etz iich n'oy'ájtin mijpi. ²⁸ Co je ayo'n tiempo jadu'n yjatzondägiŷy, chi mba't'ijxcixipy com huingoniñ anajty mina Dios xyñihuáangiŷipy xycohuáangiŷipy.

²⁹ Chi Jesús yajnimay ajcxy tüg ayuc, yminañ:

—Ijxcix yi higueri etz tüg'óciy quipy, ³⁰ co yhuamiŷy huin'it miich ajcxy nejhuŷy co ti yhuingoni mina ypottigiŷyñi. ³¹ Tim jadu'n nej miich ajcxy ijxpejt mbicy ma higueri quipy co pottiempo ytigiŷyñi, nañ jadu'n co miich ajcxy

m'ixipy je iixpejt tzajpcíxy jadu'n nej yam nyajnimaaaygixy, mnejhuñhuipy ajcxy co huingónip je tiempo mina Dios y'ane'mañ ya naaxhuiñ.

³² Janch nimaaybich miich ajcxy co jadu'n yjadiiyb ytuníyib jayijp, ca' anajty o'ctây je jây ajcxy huidibi tzinaayb jugy'ajtcixyp jadachambi xii tiempo.

³³ Yi tzajp etz naaxhuiñybi naxip tigoyip yi'. Hich n'ayuc ca' ñaxipy ytigoyipy ni camina.

³⁴ Naygüend'ajtigix miich ajcxy ca' mnijot'ajtcixy yi jocni yi mügii, etz yi tzinaayin jugy'ajtin, jigix ca' ajcxy xyniminipy jotcômoñyi je ayo'n xii je ayo'n tiempo. ³⁵ Timetiini minipy je ayo'n tiempo mîd jây ajcxy ycixpi huidi ya tzinaayb ma tûg'óciy naaxhuiñybi. Tim jadu'n nej tûg iyujc ayo'nbaady co timetiini yajtûxuuch.

³⁶ Ni'ixi' ijtcix, mibijctzoogix Dios, ca'ydí ayo'n ajcxy mbaatcixy huidi jadaañ, jigix jiiyby myajpáatcixipy tzajpjoty ma ñich nhuinduu, ñich, je jây huidi tzoon tzajpjoty.

³⁷ Xim anajty Jesús yaj'ixpiy ma Dios ytijc, e coodz anajty chooñ ñicxy jim ma cõgop huidi yxii Olivos. ³⁸ Jabom jabom jopy jopy ñiminyii tûg'óciy cajpjây jiiyby ma Dios ytijc tibây co y'amidoo'idaani ajcxy Jesús y'ayuc.

22

Xiicyõgyixy capxyõgyixy nej huaad Jesús májtcixy

¹ Huingon anajty je xii mina jây tzajcaagy caaygixy huidi ca' ylevadura mîdity, huidi jây ytijpy pascua xii. ² Chi je teedy mîjtungmîdipi etz je escribas yhuinmañ'ixtaaygixy nej ajcxy ocyaj'õgipy Jesús. Chigiiyb anajty ajcxy je cajpjây.

³ Chi je mujcu' ytigiiy ma Judas yjot yhuinmañ. Je Judas hue' anajty ymîmetz xii Iscariote, je' nidûgti je majmetzpi discípulos. ⁴ Chi Judas ñicxy oy mîgapxy je teedy mîjtungmîdipi etz tzajptijc soldado huindzin, e ycapxytuñ mîd je' ajcxy nej jêbi cîyecy Jesús. ⁵ Huin'it je Jesús ymidzip ooy ajcxy yxoondaccottay. Chi ajcxy ñaygapxi co meeñ môhuangixy je Judas. ⁶ Chi Judas cõbijcy je meeñ, chi yhuinmañ'ixtay nej jêbi cîyegipy Jesús ma ca'p mayjây y'ixyii yhuindicxyii.

Je huindzin Dios y'adzu'ajtin

⁷ Chi paty je xii mina jây cay je tzajcaagy huidi ca' ylevadura mîdity com huin'it anajty ajcxy yaj'õgy cõbixy ymang pascua xigixp. ⁸ Chi Jesús quejxy Pedro etz Juan, nimay:

—Ñicx miich ajcxy yaj'oyi' je pascua adzu'ibi, jaydêbi ajt ngaayim.

⁹ Chi ajcxy y'amidooy:

—¿Ma mdzocy co nyaj'oyiñhuibich ajcxy?

¹⁰ Chi Jesús yminañ:

—Co mdigiihuipy ajcxy cajpjoty, mbaadipy tûg yëydijc huidi yajnicxp tûg majt nii. Mbanicxyp ajcxy je yëydijc cooni yjadipy ma ytijc. ¹¹ Co miich ajcxy mjâdipy ma je jây ytijc, chi ajcxy mnimâhuipy je codijc: “Nhuindzinich jadu'n minaaam: ¿Ma yaj'ahuadz yajpaady ma ngayipyich je pascua adzu'ibi mîd ñich ndiscipulotijci?” ¹² Je codijc miich ajcxy yajni'ixiñhuip tûg cuarto ma mîmetzpi piso. Ni'ixi' jim je adzu'ibi. ¹³ Chi Pedro etz Juan ñicxy, chi paty jadu'n nej anajty ti ñimâyii, e jim ajcxy ni'ixiiy je pascua caayin uucin.

¹⁴ Co je hora paty, chi Jesús y'ixtacy ma je mesa mîd je' ydiscípulos ajcxy.

¹⁵ Chi Jesús yminañ:

—Ti ooy nijot'atyich co nmüdgayaangixy jada pascua adzu'ibi ma ca'ni n'ögyñich. ¹⁶Ich müch ajcxy jadu'n nimaayb co ich ni mina ca' njaccayipyich jadüg'oc je pascua adzu'ibi, ixti cooni yajcuydundahuipy je pascua xii ytiy'ajt ma Dios y'ané'min.

¹⁷ Chi Jesús conigy je ügy co Dioscojúyip yajnaxy, huin'it yminañ:

—Uccix jada ügy, naymööyigixy müch ajcxy. ¹⁸ Cham ich müch ajcxy nimäy co jadu'n nej yjacnicxa'ñ xii tiempo ca' vino nü üga'ñich ixti cooni Dios y'ané'min yminipy ya naaxhuiñ.

¹⁹ Nañ yconigy Jesús tüg tzajcaagy co mübijctzooy Dios, huin'it tujc-huäcxy moy discípulos ajcxy, e chi ajcxy nimay:

—Jada tzajcaagy ich nnin'cx'ajtpyich huidi ngiyejcpyich ma yi o'cin müd müch ajcxy mbocy ycixpi. Jada ijxpejt müch ajcxy mü'idipy oy jäymech müd ich ycixpi.

²⁰ Co anajty ti ycaйдаaygixy, chi Jesús conigy je ügy jadüg'oc, chi yminañ:

—Jada vino je' jada Dios y'ayuc ytiy'ajt jemybi jadu'n yi' nej ich nni'py huidi temam yogam müd müch ajcxy ycixpi.

²¹ Jadachambi yi jäy huidi xyciyegaambich ma nmüdzipich, ya je' cham müd'inäyich ma jada mesa. ²² Janch jadu'n njada'ñ n'ayoohua'ñich jadu'n nej ti nyajnigodugiyiñich. ¡Ayo'n padamy je jäy ayoob huidi xyciyegaamyich ma nmüdzipich!

²³ Chi je nimajmetzpi ajcxy ñayñimaayi miñ xyipy:

—¿Pin jada' yi' ma ich ajt huidi jadu'n tundigoyam?

Yajcapxcójixy pin jada' jacnigi ymijity

²⁴ Chi je nimajmetzpi huidi Jesús anajty ti huin'ixy ca' ajcxy ñay'ayuc-huinjihuiyi pin jada' jac mijpi oc'idipy. ²⁵ Chi Jesús nimay ajcxy:

—Yi reyes ajcxy y'ane'myib ajcxy naax cajp jadu'n nej tüg huindzin, yi' ajcxy huidibi ane'mb yajtjycixy co ooy oytuungixy. ²⁶ Müd müch ajcxy ca'ydi yjadú'nity. Hue' janchty je mijpi ma müch ajcxy huen ñaybidägyii nej jihuiy ymützity. E je huidi nigohuajc'ajtp huen ñaybidägyii nej jihuiy je' je' je tumbi.

²⁷ ¿Pin je' jacmijip? ¿Huidi ñaybi ma mesa, o huidi ni'ixiyyb a'ixiyyb caayin uucin? Yi' je' jacmijip huidi ñaayb ma mesa. Per ich ijtpich müd müch ajcxy jadu'n nej huidi ni'ixiyyb aa'ixiyyb caayin uucin.

²⁸ Müch ajcxy ti m'ijtcixy müd ich ma anajty ayo'n ti nyajnaxyich.

²⁹ Paady ich müch ajcxy tüg ané'min nmooyb, jadu'n nej ich ndeedy ti xymöyich. ³⁰ Jaydebi müch ajcxy mgáaygixipy m'uuccixipy ma ich nmesa jüby ma ich n'ané'min e m'ñähuiipy ajcxy ma je ane'mdac, e mdiydungixipy m'ané'mgixipy je nimajmetz picy Israel ñaax ycajp.

Jesús capxpídzimy co Pedro ymina'na'ñ co ca'p Jesús ix'y'adyii

³¹ Nañ jadu'n je huindzin Jesús yminañ:

—Simón, Simón, jadachambi je mujcu' xyjot'ixaangixy xy-huinma'ñ'ixaangixy jadu'n nej jäy trigo huimbojy co yajhuätzaangixy. ³² Per ich Dios nmübijctzooyich müd müch ycixpi, jigix müch ca'ydi mmübjc'in ytigoy'ity. Mina anajty müch ti mjothuimbity, jotmic migápxipy yi mmigügtijc ajcxy.

³³ Chi Pedro yminañ:

—Huindzin, jotcuje ich nnicxa'ñich müd müch oy pujxtigótyity, etz oy ndim'yögibich müd müch.

34 Huin'it Jesús nimay Pedro:

—Ich miich nimaayb co ca'ni anajty tzey yax'igy jabom jopy co miich miná'nip tug'ig'oc co miich ca' xy'ix'adyiijich.

Huingomb hori ma Jesús y'ocyaj'ijxmadza'n

35 Chi Jesús nimay ydiscípulos ajcxy:

—Co ich miich ajcxy jayhuin nguejxy, ni mmoral, ni ca' mmeefñydjc, ni mg'ig ti mmi'oygixy, ¿nej myajt'igoy'ijt ajcxy ti jatyi?

Chi ajcxy y'adzooy:

—Ni ti.

36 Chi Jesús yminañ:

—Jadachambi pin ymeeñydjc etz ymorral müd, huen min'icx; nañ pin ca' müdity y'espada, huen toogy yjocx huit, chi juuyip y'espada. 37 Ich miich ajcxy nimaayb co copicy jada yajcuydunipy huidibi mimb jaybety müd ich ycixpi ma Dios ñecy ma jadu'n yminañ: “Yaj'amichomujc (je Cristo) müd yi' ajcxy huidi jibicjäyip.” Tüg'óciy mimb jaybéty ma Dios ñecy müd ich ycixpi, yajcuydunipy yi'.

38 Chi Jesús ydiscípulos ajcxy yminañ:

—Huindzin, cha metz espada.

Chi Jesús y'adzooy:

—Huen müd yi'yi.

Jesús Dios mibijctzoy jim Getsemani

39 Chi Jesús jim choñ ñicxy ma je cop huidi yxii Olivos, com jim anajty nicxy coodz coodz, chi je' ydiscípulos ajcxy ypan'icxi. 40 Co ajcxy yja'ty ma je cop, chi Jesús yminañ:

—Mibijctzoogix Dios huen xypubedipy xypudigihuiipy ajcxy ca'ydi mdig'iygixy jibic tuum.

41 Chi Jesús huinhuäctuty je discípulos ajcxy tüg tzaagäch yjiguëgyity, chi ycoxtinay'ahu'iy ytig'iy Dios mibijctzoob. 42 Chi Jesús yminañ:

—Dios Teedy, pen miich m'a'ix'iyb píjcg'icich jada tzaachypi, ca' ich huaad nyajnaxy'ich, per ca' ich huaad ngi'mdzójcin nguyduñich, miich mdzójcin huen myajcuyduñ.

43 Chi ñayguëx'ici tüg ángel tzajpjoty chooñ, jotmic migapxy je Jesús. 44 Yam anajty Jesús ooy ytaj ymay, chi Dios mibijctzooyb jacmictägy. E je yxibitnii ypidzimy janch jadu'n yi' anajty nej ni'py janch mijjaty y'ocnajtza'cx'iyyñi.

45 Co ypid'igy ma anajty Dios mibijctzoy, chi nihuimbijty je' ydiscípulos ajcxy, chi oy paat'icxy maab anajty ajcxy müd jotmay. 46 Chi Jesús nimay ym'igügtijc ajcxy:

—¿Ti co mdzachmaagixy? Pid'ic'icx mibijctzoogix Dios, ca'ydi jibic tuum mdig'iygixy.

Yajnicxcixy mach je Jesús

47 Jim Jesús anajty ym'igügtijc ajcxy müdcapxy müdm'iydägy, co je mayjäy oy jyäty. Jayijp anajty ymiñ je huidi anajty xijip Judas, yi' je'anajty nidügti ma je nimajmetzpi Jesús ydiscípulos ajcxy. Chi Judas mihuingoñ Jesús co anajty tzücx'a'ñ. 48 Chi Jesús yminañ:

—Judas, ¿nej müd tüg tzücx'in mg'iyecy ma ymidzip, je jäy huidi tzoon tzajpjoty?

49 E je' ajcxy huidi anajty Jesús ym'iid, co ajcxy ijxy jadu'n nej ytuñyii yjadyii, chi ajcxy yminañ:

—Huindzin, ¿tzoc ajt mihuimbijtim?

⁵⁰ Chi nidüg je' ajcxy yajtzaachiyi je teedy mïjtungmïdipi tüg ytumbi, quejtzpujxi tüg ytätz'ac a'oy'amybi. ⁵¹ Huin'it Jesús yminañ:

—Ixmajtcix, huen jadu'ñyi.

Chi nïdoni je jäy ytätz'ac, e jadu'n yajtzoocy. ⁵² Chi Jesús nimay ajcxy huïdi nimiini, yi teedy tungmïdipi ajcxy, yi Dios ytiç policia huindzin etz mijjäydijc:

—¿Nej co xyñimíngixyich mïd pujx etz mguipyijjpxu'ñ jadu'n nej jihuïy ñich tüg meetzpi? ⁵³ Jiiby ñich anajty jabom jabom ma Dios ytiç, e ca' miich ajcxy ti ti mduñ mïd ñich. Per cham jedu'n je tiempo mina miich ajcxy xy'ane'myich etz je jibicpi xymimadägyich.

Pedro yminañ co ca' ix'y'adyii Jesús

⁵⁴ Chi ajcxy majch je Jesús, yajnicxy ajcxy, e pidacy ma teedy mïjtungmïdipi ytiç. Je Pedro jigüëgyjihui' anajty ypanicxyii. ⁵⁵ Jim ajcxy jün yajmijiy tibägujç chi ajcxy y'ixtactay nidüg'óciy. Pedro y'ixtacy nañ jadu'n ma je jäy ajcxy.

⁵⁶ Huin'it tüg pödumbi ijxy Pedro iñäy ma jümba', chi huindicxpejty nimay:

—Jada yëydijc nañ ymïd anajty Jesús.

⁵⁷ Chi Pedro ca' cöbijcy, yminañ:

—Töxyjäy, ca' ñich yi' n'ix'y'adyii.

⁵⁸ Nañ jahuengi huin'it jadüg jäy Pedro yhuindicxpejti, ñimaayi:

—Miich, yi Jesús ajcxy anajty mïd m'ity.

Chi Pedro yminañ:

—Ca' n'ñchity.

⁵⁹ Ti anajty tüg hori nïnaxni co oy huingbi yminandägy:

—Janch co jada yëydijc yi' anajty mïd y'ity Jesús. Com nañ galileojäy yi'.

⁶⁰ Chi Pedro yminañ:

—Ca' ñich nhuinjihuïy nej miich mmïna'ñ.

Capxni anajty je Pedro co tzey oy yaaxïgy. ⁶¹ Chi je Huindzin Jesús ni'ijxhuimbijty je Pedro. Huin'it Pedro jäymetzcootti je' ayuc nej anajty yHuindzin Jesús ti ñimäyiy: “Ni ca'ni anajty tzey yaaxïgy cham coodz co miich tugü'oc xycoyüdzibiyich.” ⁶² Chi Pedro ypidzimy tibäy, oy jiiby yäxy mïd tájin máyin.

Nixiiccixy yajxiiccixy yi Jesús

⁶³ Je jäy ajcxy huïdi anajty Jesús cuend'ajtp, ooy ajcxy nixiicy niyaaxy, etz nañ ooy ajcxy huingojxy jipcojxy. ⁶⁴ Chi ajcxy huingoxodziy, e cojxy ajcxy ma yhuñyijjip, nimaaygixy:

—Octiygapx, ¿pin ti xycoxy?

⁶⁵ E ooy anajty mïd yjibic ayuc cixy cuety nimaaygixy.

Jesús mijjuntajoty yajpaady

⁶⁶ Co yxïmïiy, chi yöymujcy yi teedy mïjtungmïdipi ajcxy, yi mijjäydijc ajcxy, etz yi escribas ajcxy, chi ajcxy y'amidooy:

⁶⁷ —Nimaaygich ajcxy ¿nej miich je' je Cristo?

Chi Jesús y'adzooy:

—Co ixyipy nnigapxich, ca' miich ajcxy mibigipy. ⁶⁸ E pen ñich miich ajcxy n'amidooyb, ca' miich ajcxy xy'adzohuipyich, etz canan huin'it xyñajtmadzihuibich miich ajcxy. ⁶⁹ Jadachambi e ñicxa'ñi ñich, je jäy huïdi tzoon tzajpjoty, n'ixtägä'ñich a'oy'amy ma Dios mic'ajtmïdipi.

⁷⁰ Chi nidüg'óciy je' ajcxy y'amidooy:

—¿Nej janch co miich Dios xy'ung'adyii?

Chi Jesús y'adzooy:

—Miich ajcxy jadu'n minamb co ñich njëjity.

⁷¹ Chi ajcxy yminañ:

—¿Ti ajt njac-huáanim testigo? Ti ajt yam ci'm nmidoohuim nej mina'ñ.

23

Jesús ma Pilato yhuinduu

¹ Chi tüg'ócay je mayjäy ajcxy ypidigy, chi yajnicxy ajcxy Jesús ma je gobernador Pilato. ² Chi ajcxy ytigüiy xibi yminaangixy:

—Jada jäy naax cajp yaj'ixpijcp huidi ca' ytiy'ájtity. Yi' adujctahuam co ca' huaad nmigüéjtim César, e ymina'ñ ci'm co yi' je' je Cristo huidi rey'ajtpi.

³ Chi Pilato y'amidooy Jesús:

—¿Nej miich je' judío jäy xyrey'ajtp?

Chi Jesús y'adzooy:

—Miich jadu'n minamb.

⁴ Chi Pilato nimay je teedy tungmüdpí ajcxy etz je mayjäy:

—Ca' ñich ti pocy nbaadyich ma jadayaabi yëydijc.

⁵ Chi Jesús ymidzip nigí anajty ajcxy yminan'adütczixy:

—Jada Jesús naax cajp tzachyajúeet-huäcxtaayb je judíojäy müd yi' y'ayuc. Yajtzondacy Galilea, e jadachambi ya Judea jadu'n idich.

Jesús ma Herodes yhuinduu

⁶ Co Pilato midoy Jesús ymidzip ajcxy nigapxy Galilea, chi y'amidooy pen galileojäy je Jesús anajty. ⁷ Chi mic'amy huinjihuuy co yi' jim anajty yajpaady ma Herodes y'ane'my, chi jim quejxy ma Herodes huidi nañ jadu'n anajty yajpatp jim Jerusalén huin'it xii. ⁸ Co Herodes ijxy Jesús, chi oy jotcugüiy com tüyip anajty ooy ja'ixa'ñ, ti anajty may ayuc midoohui, e ahuixy anajty co mijhuinma'ñ tunipy. ⁹ Janch may ayuc ooy jayaj'amidooy, e Jesús ni tüg'aa ca' y'adzooy. ¹⁰ Jim anajty teedy mijtungmüdpí etz je escribas ajcxy, tzachnigübéjtcixy mictägy. ¹¹ Chi Herodes müd yjäy ooy nixiicy yajxiicy Jesús, ca' mij'ijxy mijpidacy. Chi xojxy müd oyhuit etz quejxhuimbijty jim ma Pilato. ¹² Huin'it xii Herodes etz Pilato ajcxy ñaymügüpijci, com naymijotma'tip anajty ajcxy huin'it tiempo.

Jesús yajmoy ysentencia co y'ögipy

¹³ Chi Pilato huomujcy yi teedy mijtungmüdpí, yi cajptungmüdpí, etz yi naax cajp. ¹⁴ Chi ajcxy nimay:

—Ti miich ajcxy xyajnimügingixyich jadayaabi yëydijc, jadu'n miich ajcxy minamb co ooy jäy yajúeet-huäcxtay. Ti ñich yi' jatiyduñich ma miich ajcxy mhuindu, ca' ñich yi' ni ma ypocy ti nbaati, jadu'n nej miich ajcxy mxigixy. ¹⁵ Nañ ni ca' Herodes ti pocy ti paady ma jada jäy, com ti njayajniqexyich, ni ti pocy jada Jesús ca' ti tuñ huidi huaad nyajco'ögüiyich. ¹⁶ Miñ n'octzaachytuñich, jaydëbi nnajtmadzihuibich.

¹⁷ Jadu'n je gobernador anajty costumbre müdity co najtmadzïy tüg machyjäy mijxiijoty. ¹⁸ Chi je mayjäy tügümyc ajcxy yminaandacy:

—¡Yaj'ög jadayaab Jesús! ¡Najtmadzï' yi Barrabás!

¹⁹ Je Barrabás anajty pujxtigoty ti ypidägyii co anajty ti nibidigy je go-bierno, nañ ti anajty yjäy'aj'ögy. ²⁰ Chi Pilato nimay ajcxy jadüg'oc co najtmadzïhua'ñ Jesús. ²¹ Chi je mayjäy janch mic yminañ:

—¡Yajcruudzpet miich yi'! ¡Yajcruudzpet miich yi'!

²² Chi Pilato yminañ je midugüg'ocpi:

—¿Ti Jesús ti tundigoy? Ca' yi' ma ypocy nbaatich. Miñ n'octzaachytuñich, e najtzmazdñhuibich.

²³ Je jäy ajcxy nigi anajty yminaañ'adiitcixy janch mic, co huen yajcruudzpejty. Chi ajcxy jadu'n mimadacy Jesús co chachne'ngixy je teedy tungmüdpí, etz je cajpjäy ajcxy. ²⁴ Chi jada' Pilato cuyduñ jadu'n nej je jäy ajcxy anajty pijctzoy. ²⁵ Chi Pilato najtzmazdñy je Barrabás huidi anajty pujxtigótyip, co anajty chach jäy yajqueec-huäcxy, etz yjáyaj'ögy, je' huidi yi jäy ajcxy ypijctzou. Chi Pilato cñeyjcy Jesús ma yi' ajcxy huen tungixy nej tzojccixy.

Jesús yajcruudzpejti

²⁶ Chi je judíojäy ajcxy yajnicxy Jesús. Jim tü'am ajcxy minaybaati tüg jäy huidi anajty ti choon camjoty, huidi anajty yxñ Simón, e ycogájpity anajty Cirene. Chi adzip ajcxy Simón yajquejycabiy Jesús ycruudz, e yajpanicxy ajcxy Jesús.

²⁷ Jac'axam anajty naax cajp panicxcixy, etz nañ may töxyjäydjic ajcxy chachyaacixy müid jotmay müid yi' ycixpi. ²⁸ Chi Jesús ni'ijxhuimbijty je töxyjäydjic ajcxy, chi nimay ajcxy:

—Miich Jerusalén töxyjäydjic ajcxy, ca' xyñiyäaxcixich. Nayñiyaaxigix miich ajcxy ci'm etz m'ung ajcxy ycixpi. ²⁹ Chi ypaadipy tiempo co jäy ajcxy ymina'nipy: “Jotcujc je töxyjäy ajcxy huidi ca' y'ung ixty, huidi ca' ti y'ungtzimigy, etz huidi ca' ti y'ung yajtzitcixy.” ³⁰ Chi je jäy ajcxy nimaydägipy mijtun mijcop: “Nigidagótcich ajcxy”; etz je mutztun mutzcop: “Yajtigooygich ajcxy.” ³¹ Pen jäy ajcxy tzaachypi ayo'n mooyb Dios y'ung, nigi ajcxy jacjiini ytundigoya'ñ müid Dios yjäy, tím jadu'n nipaady nej pin puxam tzuxy quipy nañ puxamy quipy títzpi.

³² Nañ jim anajty yajnicxcixy müid Jesús jametz pocyjäy. Tú'ciy müid Jesús anajty yaj'ögaangixy. ³³ Co ajcxy oyjäty jim ma tüg it huidi jäy ytijpy ögpi cohuajc, chi ajcxy jim Jesús yajcruudzpejty müid metz pocyjäy: tüg pocyjäy a'oy'amy, jadüg anajty'amy. ³⁴ Chi Jesús yminañ:

—Dios Teedy, mecxi ajcxy ypocy, com ca' nejhuüygixy ti ytungixyp.

Co je soldados anajty ajcxy yajhuäcxaani ac je'y Jesús yhuit, chi ajcxy ijxy suerte pin ocjediib. ³⁵ Jim je cajpjäy anajty yhuindicxcixy, yam je tungmüdpí nixixy yajxigy Jesús, yminañ ajcxy:

—Jada Jesús huingjäy ti yajtzögy, huen cham ci'm nayyajtzögyii, pen yi' je' je Cristo, je huidi Dios ti huin'ixyi.

³⁶ Nañ jadu'n je soldados ajcxy nixiicixy yajxiicixy Jesús, nimijhuägy ajcxy möhuaangixy anajty vino ta'mbi. ³⁷ Chi je soldados ajcxy yminañ:

—Pen miich Rey'ajt ma yi' judíojäy ajcxy, nayñihuänñi ci'm.

³⁸ Ma Jesús ycödu jim anajty yjaayity griego'amy, latin'amy, etz hebreo'amy: JADA JE' YI JUDIOJÄY AJCXY YREY.

³⁹ Chi tüg pocyjäy huidi anajty cruudzcixy ooy nixiicy yajxiicy Jesús yminañ:

—Pen miich je' je Cristo, naygohuänñi ci'm, e cohuaangich ñich ajcxy nañ jadu'n.

⁴⁰ Chi je jadügpi pocyjäy oy y'adzooy, ogy ymigüg, nimay:

—¿Nej ca' miich Dios mdzigïy. Ca' m'ixy co tú'ciy ti nbóycähuim? ⁴¹ Hich ajt janch paatip jadu'n, co jadu'n jada ngöbïjçim tzaachypï je tiibi ndundigooyim. Jadayaabi Jesús janch ni ti jibicpi jada ti catuñ.

⁴² Chi je pocyjäy nimay Jesús:

—Tun may'ajt xyjäy medzipich co anajty mjäty jiihy ma m'ane'mdac.

⁴³ Chi Jesús oy y'adzooy:

—Janch ïch miich yam nimäy co cham ïch miich müid'ïjtnïpy ma je oybi it.

Jesús y'ocni

⁴⁴ Co cujcxïibi paty, chi oy ycoodzïy tüg'óciy naaxhuiñ ixti minacyxiini.

⁴⁵ Chi xii ca' y'oc'ani. Chi je huit oy yciitzhuaçy huidi anajty adïydujcp je Dios y'it jiihy ma Dios ytijc. ⁴⁶ Huin'it Jesús mic ypätcapxy ymïnañ:

—Dios Teedy, cham nyajçidigïy ïch n'alma.

Co Jesús jadu'n ymïnañ chi y'ögy.

⁴⁷ Co je soldado huindzin ijxy jadu'n nej anajty ti ytunyii ti yjadyii, chi ooy jäymejch yi Dios ymïnañ:

—Janch co jadaayaabi yëydijc anajty tudägy yjäyity.

⁴⁸ Chi je mayjäy tiibi anajty jim yömüjccixy yhuindïcxcixy, co ajcxy ijxy jadu'n nej ytuuni yjajti, chi ajcxy huimbijttaayñi cajpjoty yam ycaach tzachcójxcixy müid jotmay ycixpi. ⁴⁹ Cham tüg'óciy Jesús ymigügtijc ajcxy huidi anajty müid ñay'ixy'adyii, etz töxyjäydijc ajcxy huidi anajty Jesús ti ypadzonyii jim Galilea, jiguëgy je' anajty ajcxy yhuindïcxcixy.

Yajnaaxtigïy ajcxy Jesús

⁵⁰ Jim anajty tüg yëydijc huidi anajty yxii José, hue' anajty ycogájpity Arimatea ma Judea naaxjot. Je' anajty judío mjtungmüidpi, e je' ooy anajty chach'oyjäyity etz ytudägyjäyity. ⁵¹ Je' nañ yjijp'ijxy anajty co yminiyy je Dios y'ané'min, e ca' je' anajty jijptigiyiy müid jacnaagity mjtungmüidpi co ajcxy yaj'ögy Jesús. ⁵² Chi José ñicxy ma Pilato oy pijctzoohui Jesús ñinïcx. ⁵³ Chi yajminajcy ma cruudz, e mo'ñ müid tüg sábana, chi pidacy ma ögpi jut, ma tüg tzaahuinguetzmijc ma ca'ni anajty ni tüg ögpi jiihy yajpidägyp. ⁵⁴ Je' anajty ajcxy ni'ixïyb a'ixïiyb je pascua xii e je' anajty tim tzondägan je pócxin xii.

⁵⁵ Chi je töxyjäydijc huidi anajty ti ypadzoñyii Jesús jim Galilea, panicxy ajcxy je José axam. Chi ajcxy nañ jadu'n ijxy je ögpi jut, etz je ninïcx jadu'n nej jiihy yajpidacy. ⁵⁶ Chi ajcxy yhuimbijttay cajpjoty. Chi ajcxy yaj'oyïy ujtz xuucpi, tzooy, etz ungüento, chi amay'ajty je pocxinxi, jadu'n nej anajty cötüjcin y'ane'my.

24

Co Jesús y'ögy chi yjugypïjcy

¹ Co je seamaan y'ixtigïy janch tim ticxïcp je töxyjäydijc ajcxy ymüin ma je o'cpi jut, chi mimiin ajcxy ujtz xuucpi, etz tzooy huidibi anajty ti yaj'oyïygyxy. Nañ jadu'n müidjadyii töxyjäydijc müin. ² Chi ajcxy paty je tzaa ti anajty yjidiguegyii ma je o'cpi jut'aguu. ³ Co ajcxy ytigïy jutjoty, chi ca' ajcxy paty je Huindzin Jesús ñinïcx. ⁴ Chi jadu'n yjajty, jiihy anajty ajcxy jutjoty huihmaaygixy, co ñayguëxigi ma ajcxy ymijc metz yëydijc janch adïcxp anajty yhuin. ⁵ Chi ajcxy ooy chigïy, chi ajcxy yhuindactay, chi je metzpi yëydijc ymïnañ:

—¿Na'amy co m'ixtaaygixy yi jugypí ma yi tñibi y'ögy? 6-7 Ca' je' ya, ti je' yjugypicy. Jäyméjtzcxix jadu'n nej mīna'n̄ jim Galilea, co ymīnañ:

—Ooy ycopícyity co ñich, je jāy huidi tzoon tzajpjoty, nyajcīyegipy pocyjāy cī'am. Yi' ajcxy xyajcruudzpedipyich, chi njugypigipyich codugñig xīi.

8 Chi ajcxy oy jāymejtzcooty nej anajty Jesús ti ymīna'n̄. 9 Chi je tōxyjāydījc ajcxy yhuimbijttay ma o'cpi jut. Chi ajcxy yajmīdmīydactay jadu'n nej anajty ti i'jxcixy ti midoogixy mīd Jesús ydiscīpulos ajcxy je nimajmetzpi etz jacjadyii jāy huidi yajpaatp ma je' ajcxy. 10 Je tōxyjāy ajcxy huidi ooy ma Jesús ñaaxtigīy, je' je' anajty ajcxy: María Magdalena, Juana, etz María Jacobo ytaj, e cham jacnaagity ymīdōxyjāydījc. 11 Chi Jesús ydiscīpulos ca' ajcxy tim mījpidacy je tōxyjāydījc ajcxy ayuc, hue' ajcxy tijy nigo y'occapxcixy y'ocmīydaaccix, paady ca' ajcxy mībijcy.

12 Chi Pedro ypidīgý ñīcxy poyīgý ma anajty Jesús ti ñaaxtigīy. Chi Pedro yco'ixīy ma je o'cpi jut, chi i'jxy co ca' jūiby ni ti, jēyi Jesús yhuīt abīcy y'ooxnāy. Chi Pedro yhuimbijty ma ytījc jihuīy ooy jadu'n nej ti ytuñyīi yjadyīi.

Ma Emaús tū'aa

13 Huin'it xīi metz Jesús ydiscīpulos ajcxy ñīcxy ma tūg cajp mutzpi hue' anajty yxīi je cajp Emaús, hue' yjīguemyity mīd Jerusalén tugi'px estadios (majmetz kilómetro). 14 Chi amīydaacīp anajty ajcxy ñīcxy. Nīgapxcixy nīmīydaaccixy nej Jesús ti yjaty ti y'ayoy. 15 E jadu'n yjaty ma anajty ycapxcixy ymīydaaccixy je nīmetzpi, chi Jesús cī'm nīmījhua'cy je metzpi, chi mīd ñīcxy ajcxy yquīpxyī. 16 Oy anajty ja'i'jxcixy, ca' ajcxy tuñcuend pīn je' anajty. 17 Chi Jesús y'amīdooy je' ajcxy:

—¿Ti mīich ajcxy mīydacpy ma yam mdüyōygixy? ¿Nej co mdājcxixy mmāyīgixy?

18 Chi tūg huidi anajty yxīi Cleofas y'adzooy:

—Janch tūg'ōcyi mayjāy nejhūiydāy je ayo'n ti ytunyīi ti yjadyīi. ¿E mīich naydūg jim jāttac Jerusalén, e jadu'n tijy ca' mnejhuīy?

19 Chi Jesús je' ajcxy nīmay:

—¿Ti ti ytuñyīi ti yjadyīi?

Chi je' ajcxy ymīnañ:

—Jesús Nazaretpi, huidi Dios y'ayucnajtzcapyīy, yi' anajty mīj jānchīp ma yi ayuc etz huīnma'n̄ ma Dios yhuīnduu, etz cham ma tūg'ōcyi naax cajp. 20 Chi yi' ajcxy je teedy mījtungmīdīp etz ñich ajt ndungmīdīp Jesús yajcīdīgīy je gobernador co huen yaj'ōgyīi. Chi ajcxy yajcruudzpejty. 21 Hue' ñīch ajcxy anajty ndzach'ahūījxyp co yi' je' huidi Israeljāy ajcxy cohuānaam ma ymīdzip. Jadachambi jada' ymīdugñīgxīi ma jadu'n ti ytunyīi ti yjadyīi.

22 Cham ñīch ajcxy ndōxyjāydījc ajcxy ooy xy'adzīgīyīgixyich. Ti y'oygixy janch ticxīcp ma o'cpi jut. 23 E com ca' ajcxy paaty je ñaaxñīcx, chi ajcxy yhuimbijtnī ymīnaangixy co ti i'jxcixy yi' āngeles ajcxy, hue' je āngeles ajcxy ymīnañ co Jesús yjuugyity. 24 Huīn'it nījējity nmīgūgtījcīch ooy ma o'cpi jut, paty ajcxy janch jadu'n nej tōxyjāydījc anajty ymīnaangixy. Ca' je' ajcxy i'jxy Jesús.

25 Chi Jesús ymīnañ:

—iMīich jāy ajcxy ooy ajcxy m'aajuūñity mjotjuūñity, ca' ajcxy ti md-zojcmībijccixy co ajcxy mjamībigá'nīp huīdībi y'ayuc najtzcapyīybi ajcxy ycapxy! 26 ¿Nej ca' anajty ycopícyity co je Cristo ayo'n paadīp, e huīn'it ytīgīhuīp tzajpjoty ma yi' y'it oybi?

²⁷ Chi Jesús yajnimaaay ajcxy Dios ytiy'ajt, chondägy ma Moisés ñecy, etz tüg'óciy jacjadyii necy huidi Dios y'ayucnajtzcaxi'iybi yjaay, yajxon ajcxy yajni'ixiyday jadu'n nej yjaybétyity miiid je Cristo yci'ixpi.

²⁸ Chi ajcxy mihuingoñ je mutz cajp ma anajty ñicxcixy, je Jesús jadu'n ñaybidaaci jadu'n nej jihuüy jacjiguem ñicxy. ²⁹ Huin'it ajcxy nimay adzip:

—Hui'm miich miiid iich ajcxy, ñigi jada chuu'iy'adich.

Chi Jesús yti'gy cajpjoty yhu'i'my miiid je' ajcxy. ³⁰ Chi jadu'n yjayty co anajty ti y'ixtaaccixy caaybi, chi Jesús tüg tzajcaagy conigy, e yajnajxy Dios cojuyip, huin'it tujc-huäcxy moy ajcxy. ³¹ Huin'it ajcxy ijxcajpy Jesús. Chi Jesús mic mícxy yaj'ijxtigoy. ³² Chi ajcxy ñayñimaayi:

—¿Nej ca' yjanchity co iich ajt ooy njihuüy'ym jotjoty huinma'ñjoty co anajty ajt jim xymiidmiydacim tü'am, etz co ajt xyñajtzcapxi'iyim je huidi jaybety ma Dios ñecy?

³³ E tim huin'ity ajcxy tübijccixy, chi ajcxy ñicxcixni jim Jerusalén. Ni'amugi' ajcxy paty je majctügpí Jesús ydiscípulos ajcxy e jacjadyii jäy ajcxy.

³⁴ Chi ajcxy mīnaangixy:

—Janch yi' co ti yjugypicy je Huindzin Jesús, com ti oy ñayguëxigiyi ma Simón.

³⁵ Chi Cleofas nimiydacy jadu'n nej tü'ay anajty ajcxy ti ñaybáatigixy miiid Jesús, etz jadu'n nej ajcxy Jesús ijxcajpy co tzajcaagy ti tujc-huäcxy.

Jesús ñayguëxici ma je' ydiscípulos ajcxy

³⁶ Jiiby anajty ajcxy tzachnimiydaaccixy co Jesús oy ñayguëxigiyi ma je' ajcxy. Chi ytinay'ahuüy cujc'amy ma je' ajcxy, chi ymīnañ:

—Jotcugi' miich ajcxy.

³⁷ Chi je' ajcxy ooy ñay'adzigiyi ooy huinmaaygixy, hue' ajcxy tijy ijx-mañiyb. ³⁸ Chi Jesús nimay je' ajcxy:

—¿Na'amy co mjot mhuinma'ñ ti yti'goydaaygixy? ¿Nej co m'aa'ájtigixy m'ot'ájtigixy pin iich? ³⁹ Ijxcix miich ajcxy iich ngi' iich ndecy, iich jēni iich. Nidongich etz ijxcich ajcxy. Tüg espíritu ca' miiidity chüch ni ypajc, jadu'n nej m'ijxcixy iich nmiiidity.

⁴⁰ Co Jesús jadu'n ymīnañ, chi ajcxy yaj'ijxy yci' ytecy. ⁴¹ Per ca'ni ajcxy mibijcy miiid co anajty ajcxy chachjotcújcity, chi Jesús ajcxy nimaayi:

—¿Miiid ajcxy ti ii mgayipy?

⁴² Chi ajcxy moy Jesús acxtzäy, etz tüg jüdy serpäg. ⁴³ Chi cöbijcy, chi ycaay y'uucy jim ma je' ajcxy yhuinduu. ⁴⁴ Huin'it Jesús ymīnañ:

—Huidi m'ijxyp cham je' je' huidi nyajnimay jayhuin, co iich miich ajcxy anajty miiid'ijtcixy, co copicy nguydundähuibich jadu'n nej yjaybétyity ma je Moisés ñecy je jēcyip, etz jacjadyii Dios y'ayucnajtzcaxi'iybi ñecy, etz yi salmo necy.

⁴⁵ Huin'it je' ajcxy yjot yhuinma'ñ ymiiñ ymejch, jaydēbi huinjihuüyigixipy huidi jaybétyip. ⁴⁶ Chi Jesús yjacmīnañ:

—Jadu'n jaybety y'ity ma Dios ñecy co copicy co je Cristo paadip ayo'n e yjugypigipy codugig xii, maabi anajty y'ögy. ⁴⁷ Huen ajcxy yajcapx-huäcxy Dios ytiy'ajt huindu'my naaxhuin, chondägip Jerusalén, co ooy ycopicyity huen jäy ajcxy jothuimbijtcix jaydēbi ajcxy paadip pocyhuin-meeccin. ⁴⁸ Miich ajcxy nidiy'ajt'adipy tüg'óciy jadu'n nej cham ti m'ijxcixy ti mnejhuüyigixy. ⁴⁹ Jadachambi nguexipyich ma miich ajcxy je huidi

nDeedyich ti xyaj'ahuaniiygixy. Hui'mgix ya Jerusalén ixti cooni ajcxy xyñ'idigihuip xycödigihiup je Dios yjihu'iñ ymic'ajt huidi tzonam tzajpjoty.

Jesús ypa'ttigüyñ tzajpjoty

⁵⁰ Huin'it xü Jesús müid tzoñ je' ydiscípulos ajcxy, chi ajcxy ycajppidzimy, ñicxy ajcxy mihuingon je Betania. Chi Jesús xajhuäcxy yci' mibijctzoy Dios müid je ymügügtijc ajcxy ycixpi. ⁵¹ Chi jadu'n yjajty ma anajty Dios mibijctzoy müid yi' ajcxy ycixpi, chi abicy yajhu'mni je' ajcxy e je' ypättigüyñi jiihy tzajpjoty. ⁵² Chi yi' ajcxy jim yjac-huäcxijpy Dios ojadajtcixy. Chi ajcxy yhuimbijttaayñi jim Jerusalén janch jotcujc. ⁵³ Chi ajcxy jabom jabom anajty ñicxcixy ma Dios ytiyc chajpcapxycapxcixy, ojadajtcixy jäymejtzcixy yi' Dios, Janch jadu'n jada. Amén.

SAN JUAN

Jaayhui'my Jadu'n Nej Jesucristo Ytun Yjajti

Dios y'ung huidibi y'oy ya naaxhuiñ yejci Dios y'ayuc tñ'yajt

¹ Co naaxhuiñybi oga'n chondacy jiiyim anajty Dios y'ung, e yi' yajnejhuiñy jäy ajcxy Dios y'ayuc ytñ'yajt. Dios y'ung tú'ciy anajty yajpaady ma Dios. ² Je' tim oga'n'aty anajty yajpatp ma Dios. ³ Tüg'óciy huidijaty yaj'ijxp yajpatp ya naaxhuiñ, yi' yaj'oyiyday yajcojtay. Tüg'óciy huidijaty Dios yajcojy, tú'ciy ytuñ miid y'ung. ⁴ Dios y'ung yi' jugy'ajtyejctaayb ma tüg'óciy naaxhuiñyjäy. Miid co jugy'ajtyejctäy ma tüg'óciy naaxhuiñyjäy, je' je' tñ'yajt co Dios y'ung ymiid Dios ymic'ajt. Jadu'n nipaady nej tüg'jün huidibi jäy codücxp. ⁵ Ya naaxhuiñ yajpaady anü. Yi anü jadu'n yi' nej coodzpi. Yi Dios y'ung ti mimiñ ya naaxhuiñ Dios y'ayuc ytñ'yajt. Jadu'n Dios y'ayuc ytñ'yajt ma jäy yjot yhuinmañ nej tüg'jün ytücxxy agoodztuuyb. Yi anü ca' ñaygodigüiyi miid Dios ytñ'yajt.

⁶ Ma'xung'ajt tüg'yëydjc huidibi Dios anajty ti yajnübicy. Hue' anajty yxü Juan. ⁷ Yi' oga'n tñ'yajt yejc co Dios ymic'ajt etz ytñ'yajt yajpaady ma Dios y'ung, jigix tüg'óciy je jäy ajcxy camibijctähuiy je Dios y'ung. Dios y'ung jadu'n nipaady nej tüg'jün huidibi codücxp ma jäy ytüöy. ⁸ Je Juan ca' je' anajty yjējity je Cristo, je huidibi capxhuäcxp Dios y'ayuc ytñ'yajt. Hue' janchtiy je Juan ñidiy'ajt'ajt je Cristo. ⁹ Je Dios y'ung hue' je' ma'xung'ajty ya naaxhuiñ. Je' je' anajty je Dios ymic'ajt etz ytñ'yajt ymiid, je janchyp, ma jëb tüg'óciy jäy ya naaxhuiñ patcixy Dios ytñ'yajt.

¹⁰ Je Dios y'ung ya anajty yhuidity naaxhuiñygiy. E jada naaxhuiñ yi' yaj'oyiyday. E may je naaxhuiñyjäy ca' ajcxy ijxcajpy. ¹¹ Je ymigügtijc, je judiojäy, je' ajcxy nimiini, e may ajcxy je ymigügtijc ca' ajcxy ycobijci. ¹² Tüg'óciy je jäy ajcxy pinjaty mijpüdac yi' yxü yi' ymic'ajt, yi' ajcxy yajmoy Dios ymic'ajt, e jadu'n nipaty nejjiñyüy ajcxy Dios y'ung'adyii. ¹³ Canan hue' je' co naydijiyb Dios y'ung co ti yma'xung'aty jadu'n nej jäy ajcxy y'ocma'xung'aty. Nañ ni ca' yjadu'nity nej jäy tijy, nej jäy jip'ixy, ni canan jäy jadu'n ti huinmay. Hue' janchtiy Dios jadu'n ti huinmay.

¹⁴ Je Dios y'ung ya naaxhuiñ je' yma'xung'ajty miid ñimicx etz chinay miid naaxhuiñyjäy. E ñich ajcxy n'ijxich yi' y'oy'ajt etz ymic'ajt, jadu'n nej Dios Teedy y'ung tüg'pajc oy'ajt etz mic'ajt miidity. ¹⁵ Juan ñidiy'ajt'ajt je Dios y'ung, e chi capxypüdzim, e jadu'n yminañ:

—Jada je' je jäy huidibi ñich jadu'n nimiydaacich ma miich ajcxy. Je huidibi miimb jac'axam ma ñich, jac mic'ajt miid yi' ca'ydi ñich, com jacjayijp yi' jugy'ajt paty ca'ydi ñich.

¹⁶ Je Dios y'ung oy xychojcm xyjihuiñyim mijcajee, paady je' tuuñ may'ajt oy'ajt mijcajee miid ñich ajt yciñpi. ¹⁷ Com Dios y'ané'min ycütuñcin micpi hue' Dios yajnigüejx je Moisés. Co Dios quejxy Jesucristo ya naaxhuiñ, chi may'ajt oy'ajt tuñ miid je jäy ajcxy yciñpi, e nañ je' ytñ'yajt yajnigüejx je Jesucristo. ¹⁸ Je Dios ni caminaabi pin ca'ixyñi, je y'ung tüg'pajci yajpatp ma Dios Teedy ity. Je Dios y'ung ti xyajnejhuiñyim nej Dios yajpaady.

Juan el Bautista je' tñ'yajt yejc co Jesús je' anajty Dios y'ung

19 Jadaabi je' je tiy'ajt huídibi Juan yejc, co judío jāy ajcxy quejxy nijējity teedytjic etz tzajptjic tungmūdpi. Jim ajcxy chooñ Jerusalén nicxy ma anajty Juan yajpaady, chi ajcxy y'amídooy:

—¿Mbin miich? ¿Nej miich je' je Cristo huídibi Dios yquexamy?

20 Je' ñigapx je tiy'ajt, ca' ñaygoyūtz, chi ymīnañ:

—Ca' iich njējity je Cristo.

21 Chi ajcxy jac'amídooy:

—¿E pin miich mnaydijyii? Pen ca' mjējity je Cristo. ¿Nej miich je' je Elías?

Chi Juan y'adzooy:

—Ca' je' n'ichity.

Chi ajcxy jac'amídooy:

—¿Nej miich je' je Dios y'ayuccapxhuācxpi, je huídibi ñigapxy ma Dios ñecy co ymīnañ ya naaxhuiñ?

Chi Juan y'adzooy:

—Ca'.

22 Chi y'amídooy ajcxy jadüg'oc:

—¿Mbin miich? Jigix iich ajcxy tiy'ajt nyajnicxibich ma yi tiibi iich ajcxy xyquexyich. ¿Ti miich nayñigoyāxyii?

23 Chi Juan ymīnañ:

—Iich je' je jāy huídibi Dios y'ayuccapxhuācxip ma tūg mjtigīduum, tim jadu'n nej jūby jaybety ymīñ ma Isaías ñecy, nañ tim jadu'n iich nmīnañich co copicy nayñ'ixiyyigix ma yi mjot yi mhuinmañ, jēbi naybātigixy mīd mHuindzin Dios. Jadu'n nej jāy ixypy tū'aa yaj'oyōy co tūg huindzin ymīnañ.

24 Je teedytjic etz tzajptjic tungmūdpi huídibi oy mīgapxy Juan, hue' anajty ajcxy fariseojāy ti yquexyii. 25 Chi ajcxy jactim'amídooy Juan:

—¿Ti miich co mjāyyajñibety? Peni ca' miich mjējity je Cristo, ni mgajējity je Elías, ni mgajējity huídibi Dios y'ayuc najtzcapxñyip.

26-27 Chi Juan y'adzooy:

—Iich hue' jāy nyajñibetyich mīd nū. Ya naaxhuiñ ji tūg jāy huídibi miich ajcxy ca' m'ixy'adyii. Je' huídibi jac'axam mimb ma iich, je huídibi ca' mīhuaadity nicxy yi' xytumbi'adyiijich, nicxyich ycighuin nguejich.

28 Jadu'n ytuni yjajti jim Betábara, jim'amy ahuin ma Jordán mij nū, jim anajty Juan jāy yajñibety. Juan tiy'ajt yejc co Jesús je' anajty yjugy'ajt yegam mīd iich ajt nbocy ycixpi.

Jesús nayyajhuindzigihuaanip ma Dios mīd jāy ajcxy ypocy ycixpi

29 Chi je com jabom co ijxy Jesús anajty ñimiñyii, chi Juan ñimay je jāy ajcxy:

—Cha je' ymīñ je Dios yjāy huídibi Dios nayyajhuindzigihuaanip mīd naaxhuiñjāy ajcxy ypocy ycixpi. Tim jadu'n nej judío jāy ajcxy Dios huindzigīy mīd ypocy ycixpi. 30 Jada je' huídibi iich nnigapxypich co jac'axam ymīnañ ma iich tūg yēdyjic huídibi ñigi Dios ymic'ajt y'oy'ajt mīdity ca'ydi iich. Com jiiyim anajty yi' yjugy'aty co oga'n naaxhuiñybi chondacy. 31 Oy iich anajty ca' yi' n'ixy'adyiijich huingixy jipcīxy, nyajñibejtich jāy, jigix yi judío jāy nejhuñhuip ajcxy co ji yajpaady je Cristo je huídibi Dios ymic'ajt mīd.

32 Chi Juan nigodiy'ajt'ajty je Cristo co ymīnañ:

—Iich ti n'ixyich yi Espiritu Santo jūby choñ tzajpjoty, jadu'n yquēxigy nej tūg muuxy, e chi y'ixtacy ma Jesucristo. 33 Tiydudāgy ca' iich anajty n'ixy'adyiijich. Je Dios huídibi xyquejxich jāy yajñibejtī, je' iich anajty jadu'n ti xyñimāyich co je jāy ma anajty n'ixyich je Espiritu Santo

ñigidägyii anajty etz yhu'i'my ma je'. Je' je' jadu'n anajty hu'idibi y'adigihuiipy yjottigihuiipy Dios yjihu'i'ñ ymic'ajt ma je jäy ajcxy. ³⁴ Cham nnigapxpetyich co ñich ti n'ixyich je jäy, e nyejcpyich t'y'ajt co je' je' je Dios y'ung.

Jesús yhuin'ijx nijëjty jäy hu'idibi anajty ydiscípulo'andaanipy

³⁵ Chi je com jabom jopy jim anajty Juan yajpaady müid metz jäy hu'idibi ixpijcp ma y'i'. ³⁶ Chi anajty ajcxy tzachhuindicxy Jesús co anajty jim ñaxy, chi Juan nimay je metzpi jäy:

—Oc'ijxcix ocnejhu'iygix, cha je jäy hu'idibi Dios nayyajhuindzigihuaanip müid naaxhuiñjy ypocy ycixpi.

³⁷ E je metzpi jäy hu'idibi anajty ajcxy ixpijcp ma Juan, co jadu'n ajcxy midoy nej Juan yminañ, chi ajcxy Jesús padzoñ. ³⁸ Chi Jesús y'ijxhuimbijty, chi ijxy co anajty ajcxy ypanicxyii, chi jada' nimay ajcxy:

—¿Ti ajcxy m'ixtaayb?

Chi ajcxy y'adzooy:

—Huindzin, ¿ma tiyi ti mja'ttägy?

³⁹ Chi Jesús y'adzooy:

—Miingix, jigix ajcxy m'ixipy ma ti nja'ttägyich.

Chi jada' ajcxy panicxy, e chi ajcxy ijxy ma anajty ti yja'ttägy. Je huin'it xümbi chi jim je' müid yhu'i'miy, com mijm'nacxyii anajty co ajcxy jim ymejch.

⁴⁰ Andrés, je Simón Pedro ymiguëx, je' anajty tüg tzoonip hu'idibi nimetz ajcxy midou jadu'n nej Juan yminañ, etz je' anajty ajcxy ti padzoñ Jesús.

⁴¹ Chi jada' Andrés oy ixtäy y'uch Simón tim jayijp, chi nimay:

—Ti ñich ajcxy nbaady je Mesías —jadu'n je ayuc Mesías yhuimbizima'ñ Cristo.

⁴² Chi Andrés müidnicxy Simón ma Jesús, e chi Jesús huindicxpejty, nimay:

—Miich je' Simón, Jonás miich xy'ung'ajtp. Miich je' mxii'adiyb Cefas —hu'idibi ayuc'amy huimbizimb tzaa.

Jesús je' yhuin'ijx Felipe etz Natanael

⁴³ Chi com jabom Jesús choñ ñicxy jim Galilea, chi minaybaati Felipe, chi jadu'n nimay:

—Pajamgich.

⁴⁴ Felipe jim anajty ycogajpity Betsaida, nañ je' je' je cajp ma anajty ajcxy ycogajpity Andrés etz Pedro. ⁴⁵ Chi Felipe minaybaati je jäy hu'idibiyxii Natanael, chi jadu'n nimay:

—Ti ñich ajcxy je' nbaadyich je jäy hu'idibi yajnigapxp yajnimiydacp ma Moisés ñecy, etz yi Dios y'ayucnajtzcaxiybi ñecy. Yi' je' je Jesús, José y'ung hu'idibi cogajpim jim Nazaret.

⁴⁶ Chi Natanael y'adzohuimbijty:

—¿Nej jim Nazaret ti choñ tüg oyyäyi? Com ac jadu'n jäy ymina'ñ co ac jibicjäydiyjc jim tzinaayb.

Chi Felipe yminañ:

—Jam ci'm octim'ix.

⁴⁷ Co Jesús ijxy co Natanael ñimiñyii, chi jadu'n yminañ:

—Cha tüg judiojäy hu'idibi ca' pin huin'ñniipy.

⁴⁸ Chi Natanael yminañ:

—¿Nej miich ti xy'ijxcapyich pin jäy ñich?

Chi Jesús nimay Natanael:

—Ca'ni anajty Felipe xyñimaayñi: “Jam ijxim je Jesús” co anajty miich jüby'emy ma je higueri quipypa't, huin'it ñich miich ti n'ijxcapy.

⁴⁹ Chi Natanael y'adzooy:

—Huindzin, miich je' Dios y'ung. Miich je' Rey'adam ma je judíoJay ajcxy.

⁵⁰ Chi Jesús y'adzooy:

—Miid co ti nniimäy co jiiiby'emy anajty miich ma je higueri quipypa't co ich miich ti n'ijxcapy. ¿E ti mdimjanimibicy? Jactimmijhuinma'n etz jactimmij'oy'ajt m'ixamyb mbadamyb.

⁵¹ Chi Jesús jadu'n yminañ:

—Janch tim tiy ich miich ajcxy yam jadu'n nimäy co m'ixipy ajcxy yi tzajp y'ahuäch etz Dios y'angeles ajcxy chooñ tzajpjoty xyñigidäyich, e ypa'ttigüygixy jadüg'oc tzajpjoty. Choongixy yja'tcixy ma ich je jäy huidibi tzoon tzajpjoty.

2

Jesús y'oy ma anajty jäy nixüduñ tüg pijcin jim Caná

¹ Midugügxüibi anajty maabi ajcxy Jesús minaymigápüxigixy, ma je cajp huidibi yxii Caná ma je Galilea naaxjot jim anajty huinxüdungixy tüg jäy huidibi anajty ti ypicxy. E jim anajty nañ jadu'n Jesús ytaj. ² Chi Jesús miid je' ydiscipulos ajcxy yajhuooy jim ma je xii anajty ytuñyii yjadyii. ³ Ti anajty vino ycixjtaayñi, huin'it Jesús ytaj ñimayñi:

—Ca'p ajcxy müdiñ vino.

⁴ Chi Jesús y'adzooy ytaj nimay:

—Ca' ti jotmay nmüdidyich miid miich töxyäy. Ich nhorí ca'ni paady mina jäy ajcxy nyajnejhuñhuibich pin ich.

⁵ Chi je ytaj nimay je tumbidijc ajcxy:

—Mdúngxixipy nej anajty ajcxy Jesús xyñimaaygixy.

⁶ Jim anajty tudujc tzaadu'tz ma anajty nii y'ity. Je nii anajty ajcxy yajtumyby co anajty ajcxy ycibujcixy jadu'n nej ypocy ixpujcxixy, jadu'n anajty ajcxy judíoJay costumbre müdity. Tügpi tzaadu'tz ymiid anajty yjot metz majt tugüg majt nii. ⁷ Chi Jesús nimay je tumbidijc ajcxy:

—Yaj'ujtzcxix yi tzaadu'tz miid nii.

E chi ajcxy yaj'ujztay mabaat y'a'ujtznaxy je tzaadu'tz. ⁸ Chi Jesús yminañ:

—Yajpidzimgix cham yi nii, e yajnicxcix jiiiby ma huidibi ane'mb ma yi caydac uuctac.

Chi ajcxy yajnicxy je nii. ⁹ Co jada' je ane'mbi jihuiymajch je nii ti anajty yvinocojy, chi mijhuoy je yéydijc huidibi anajty ti ypicxy. Je ane'mbi ca' anajty nejhuñy ma anajty je vino ti choñ. Jëyi anajty je ytumbidijc ñejhuñy co nii anajty ajcxy yajpidzimgixy ma je tzaadu'tz. ¹⁰ Chi je ane'mbi nimay je huidibi anajty ti ypicxy:

—Tüg'óciy jäy ajcxy huidibi xüdumb, hue' ajcxy yajtumyby jayjip je vino oybi. E co jäy ajcxy ooy yxondaacni, chi oyñihuidibi vino nii jacyajtungixy. Miich janchtiy, ti m'amay'aty yi vinonii oybi ixti chamni myajtuñ.

¹¹ Je' je' je oga'nibi mijhuinma'n huidibi Jesús ytuun jim Caná ma Galilea ñaaxjot. Chi yajnicüxigixy je ymic'ajt etz y'oyjäy'ajt. E je huidibi anajty ajcxy yaj'ixpijcpy, chi ajcxy ooy mibijcy mijpidacy je Jesús.

¹² Co jadu'n tüg'óciy ytuni yjajti, chi Jesús y'idacy jim ma je cajp huidi yxii Capernaum miid ytaj etz y'uch ajcxy, etz huidibi anajty yaj'ixpijcpy. Jim ajcxy yhuäcxijpy tüg xii mejtz xii.

Jesús yajpidzim ajuyybi adoocpi ma Dios ytiyc

¹³ Tim huington anajty je pascua xii huidibi judío ajcxy ytumy jim Jerusalén, paady Jesús ñicxy jim. ¹⁴ Jim ma Dios ytijc Jesús paty je' huidibi anajty ajcxy ajuuybi adoocpi, jadu'n nej ma ymiñ huaq, borregi, etz muuxy (huidibi jāy ajcxy Dios yajhuindziḡiyb). Nañ jim meeñyhuingogombidijc anajty ajcxy y'ñaayḡixy ma ymesa. ¹⁵ Chi Jesús yaj'oyiḡy tūḡ cochac huojp. E chi ixhuo-jppidzimday je ajuuybi adoocpi ajcxy ma Dios ytijc ñihuaj etz ñiborrego. Chi yḡ meeñyhuingogombidijc ymeeñ cōxijtnajxtayḡ, e chi ymesa tijhuimbijttaayḡ.

¹⁶ Chi nimay je muuxytoocpidijc ajcxy:

—Yajpidzimḡix jada muuxy ya. Ca' iich nDeedy ytijc yhuaani ajcxy ajuydac adoctac.

¹⁷ Je' ajcxy huidibi anajty Jesús yaj'ixpijcpḡy chi ajihuiyḡooti ajcxy je ayuc, jadu'n nej jaybety ymiñ ma Dios ñecy: “Ooy ndzocy njihuiy'ich Dios ytijc, paady ooy nnijottigoyich Dios ytijc.”

¹⁸ Chi je judío ixpicytjic ajcxy y'amidooy Jesús:

—¿Ti mijhuinma'ñ miich xy'ocyaj'ixambich ajcxy nej tūḡ iḡxpejt, pen janch mīidity cōtujc'in co m'ixhuo-jppidzimḡay yḡ ajuuybi adoocpi ajcxy?

¹⁹ Chi Jesús y'adzooy:

—Yajhuindziḡooyḡix jada Dios ytijc, e codugūḡ xii iich yḡ jadūḡ'oc nyajpidiḡipḡy.

²⁰ Chi jada' je judío ixpicytjic ajcxy y'adzooy:

—Huixchigūḡpx tudujc jimijt yhuācxijpḡy co jāy coy jada Dios ytijc. ¿E miich tijy myajpidiḡigamy codugūḡxijj?

²¹ Per ca' je' anajty nūḡapxy je Dios ytijc. Hue' je' anajty ci'm ñayñiḡapxyii co anajty y'ōḡa'ñ, etz co yjugypḡipḡy jadūḡ'oc codugūḡ xii. ²² Chi jada' co Jesús yjugypḡijcy codugūḡ xii maabi anajty y'ōḡy, je huidibi anajty ajcxy ti yaj'ixpicy, ajihuiyḡooti ajcxy huidibi Jesús anajty ti yajnimāyḡigxy. Chi jada' ajcxy mibijcy ooy jadu'n nej anajty ycojaayḡy ma Dios ylibro, etz com nañ jadu'n anajty Jesús ti ymina'ñ.

Jesús ñejhuḡy nej jāy ajcxy yjot yhuinma'ñ mīidity

²³ Co anajty Jesús yjimity Jerusalén pascua xijoty, mayjāy ooy ymibijci co ajcxy iḡxy je mijhuinma'ñ huidibi anajty ytumy. ²⁴ Jesús ca' anajty yjaty ñayḡyegyii ma je mayjāy ajcxy (hue' anajty ajcxy chachya-jrey'adamy). ²⁵ Com Jesús ñejhuḡydaayb anajty nej jāy ajcxy nidūḡ nidūḡ yjot yhuinma'ñ mīidity ca' tzocy p'in yajnimāhuḡiyb ti anajty ajcxy ytunamy, com ñejhuḡydaayb nej jāy ajcxy yjot yhuinma'ñ mīidity.

3

Nicodemo oy ytiy'ajtpicy ma Jesús

¹ Jim anajty tūḡ yēdyjic, fariseojāy y'ixpijcin anajty yajtuunipḡy. Hue' anajty yxii Nicodemo. Je' anajty ñiḡohuajc'ajtpḡy ma je judíoḡāy ajcxy ymiñ. ² Chi jada' Nicodemo ymiñ coodz ma Jesús anajty y'ity, chi nimay:

—Huindzin, ñejhuḡiyb iich ajcxy co miich tūḡ huindzin huidibi tzomb ma Dios. Com ca' ni p'in jaty nej tunipḡy je mijhuinma'ñ huidibi miich mdumy, pen ca' Dios ymic'ajt mīidity.

³ Chi Jesús y'adzooy:

—Janch janch iich miich yam jadu'n nimāy, co ca' ni p'in ixipḡy Dios y'it, pen ca' jadūḡ'oc yma'xung'ajttigach.

⁴ Chi Nicodemo yajtiy:

—Per, ¿nej tüg jäy tiibi ymij'anäcciiyñi y'ocnima'xung'ajttigájtzpity jadüg'oc? ¿Nej jëbi jadüg'oc ytiigiy ma ytaj y'aa yjot, e chi yma'xung'adity jadüg'oc?

⁵ Chi Jesús y'adzooy:

—Janch janch iich miich yam jadu'n nimäy pen ca' jäy yjothuimbity etz ñiibety, pen ca' Dios yjihui'n ymic'ajt y'adigiyyi yjottigiyyi, ca' jëbi ytiigiy ma Dios chinäy. ⁶ Je jäy huidibi ajcxy ma'xung'ajtp ma töxyjäy, ymüid ajcxy ñinixc yjugy'ajtin. Je jäy ajcxy huidibi Dios yjihui'n ymic'ajt adigiyyipy jottigiyyipy ymüid ajcxy Dios yjugy'ajtin. ⁷ Ca' nej mnayjihuihuüyb co ti nnimäy co copicy mma'xung'adipy huinjemy, co Dios yjihui'n ymic'ajt xy'adigihuiipy xyjottigihuiipy. ⁸ Com je poj miiniyb hueñytimyma'amyity, e nmidoohuim co y'a'ich, e ca' nnejhuüym ma choñ e ma ñicxy. Jadu'n nej je poj ypojy e nganejhuüym ma choñ, nañ tim jadu'n yjaty müid je Espiritu Santo, ca' nejhuüym nej yjaty co adigiyy jottigiyy jäy.

⁹ Chi Nicodemo yajtihuimbijty:

—¿Nej tijy co yjadu'nity? Ca' nhuinjihuüyich.

¹⁰ Chi Jesús y'adzooy:

—Miich huindzin'ajtp ma yi judíojäy, ¿ti co ca' mhuinjihuüy jadayaabi tiy'ajtp? ¹¹ Janch janch iich miich yam jadu'n nnimäy co iich etz nDeedich ngapxyp yi huidibi nejhuüygyixypich, e nyejcpyich ajcxy tiy'ajtp yi huidijaty iich ti n'jxcixyich. Miich ajcxy judío ixpicytjic ca' ajcxy mgöbjiicixy iich ajcxy ndiy'ajtp. ¹² Pen ca' miich ajcxy mibijccixy jada tiy'ajtp huidibi njanimiydacypich huidibi yajpatp ya naaxhuiñ, ca' ajcxy mmibigipy co njanimiydagibich yi tiy'ajtp huidibi tzajpjoty yajpatp.

¹³ Ca' ni pin ti y'oy tzajpjoty, iich je jäy tügpajc huidibi ti ndzoñich tzajpjoty, ti ngidägyich ya naaxhuiñ. ¹⁴ Jadu'n nej Moisés yaj'oyiy je pujx tza'ñ, e chi yajcruudzpety jim mijtigüduum jigix chögipy je jäy ajcxy ma je ahua'n iyujc chüchyii. Nañ tim jadu'n jäy ajcxy xyajcruudzpeda'ñich. ¹⁵ E tüg'óciy jäy ajcxy pinjaty xymijpidaacpich, ca' yi' jugy'ajtin ycixy ytiigooy ni mina.

Dios ooy mijcajee tzocy jihuüy yi naaxhuiñjyäj

¹⁶ Ooy mijcajee Dios tzocy jihuüy yi naaxhuiñjyäj co yecy y'ung tügpajcpi müid jäy ajcxy ypocy ycixpi. Paady pinjaty mibijcp mijpidacp yi' y'ung, ca' yjugy'ajtin ycixipy ytiogipy tücci'yi. Hue' janchty y'alma ypaadipy tüg jugy'ajtin huidibi ca' ni mina ycixipy ytiogipy. ¹⁷ Dios ca' quejxy y'ung ya naaxhuiñ co tzaachytunipy yi naaxhuiñjyäj ajcxy müid ypocy ycixpi. Paady y'ung quejxy co yajpocyñihuáatzcixipy.

¹⁸ Je jäy ajcxy pinjaty mibijcp mijpidacp Dios y'ung, ca' ajcxy Dios chaachytunipy müid ypocy ycixpi. Je jäy ajcxy pinjaty ca' mibicy ca' mijpidägy Dios y'ung, pocycähuiipy ajcxy ma Dios, co ca' mijpidacp ajcxy Dios y'ung tügpajcpi. ¹⁹ Paady ycixpi Dios tzaachytuna'ñ mayjäy müid ypocy ycixpi, com co Dios quejxy y'ung müid ytiy'ajtp ya naaxhuiñ, e ca' ajcxy mibijcy Dios y'ung, jadu'n je' anajty nej tüg jün huidi codicxip jäy ajcxy ma chinaayin yjugy'ajtin. Per ca'p ajcxy je naaxhuiñjyäj mijpidacy je jün, jadu'n nej jihuüy ajcxy anajty yjacotcujcity co chinaaygixy agoodztuuyb, com je' co ñigi tzachnijot'ajtcixy jibic-huinma'ñ. ²⁰ Com je jäy ajcxy huidibi jibic-huinma'ñ tzach nijot'ajtcixp, ca' ajcxy tzojci Dios ytiy'ajtp, jadu'n nej jihuüy ca' chinähuaangixy ma jün ytücxin. Ca' ajcxy y'amidoo'idani Dios y'ayuc, ca'ydi ñiguëxigy je jibicpi huidibi ajcxy ytumyb. ²¹ Je jäy ajcxy huidibi cuydumb Dios ytiy'ajtp, je' ajcxy ñiminipy Dios y'ung ytiy'ajtp, jadu'n nej jihuüy jün nimiingixy ma ytücxy, huen

jatyimy niguëxigý co oy ytungixy etz co Dios ytiy'ajt ajcxy müidity ma yjot yhuinma'ñ.

Juan (el Bautista) tiy'ajt yejc ma jäy ajcxy müd Jesús ycixpi

²² Co jadu'n ytuni yjajti, chi Jesús ñicxy jim Judea naaxjot müd ydiscípulos ajcxy. Chi ajcxy jim yhuäcxijpy. Jim ajcxy jäy yajñibety. ²³ Nañ jadu'n Juan anajty yjäyyajñibety jim Enón, com jim anajty ooy comñi, e jim anajty jäy ymingixy etz ñibejtcixy. ²⁴ Hue' jada jadu'n ytuni yjajti ca'ni anajty je Juan pidaaccixy pujxtigoty.

²⁵ Ca' ajcxy ñay'ayuc-huinjihuiyi nijëjity huidibi anajty Juan yaj'ixpijcy etz tüg jäy nej jëbi huaad ypocy ñayyajñihuädzihyb ajcxy. ²⁶ Chi jada' ajcxy Juan nidzooñ, oy ajcxy paty, e chi ajcxy nimay:

—Huindzin, je jäy huidibi anajty miich jim müd jim'amy Jordán mijñinaxy, je huidibi miich anajty mnidiy'ajt'ajtpy co je' je' je Cristo, nañ ooy chachjäyyajñibety. E janch mayjäy y'ocnimujcin.

²⁷ Chi Juan y'adzooy:

—Ca' ni pin ni ti mic'ajt müdity, pen ca' Dios ni ti mic'ajt ymöyü. ²⁸ Miich ajcxy mnejhuiyb co nmınaañich co ñich ca' njëjity je Cristo. Hue' janchtiy Dios xyquejxich jayijp co nnidiy'ajt'adipyich je Cristo. ²⁹ Co jäy ypicý je yëdyjc je' je' müd'idam je ytöxyjic. E je töxycapxpi huidibi ti yaj'oyiy je pijcin, ca' je' müd'ida'ñ je töxyjäy, jëyi co yjotcugiy co yöcmidoohui je töxyjäy ñäy co yjädy ma je' ytijc co ypigaani. Cristo jadu'n je' nipaady nej tüg töxyjäy ñäy, e je töxyjäy jadu'n je' nipaady nej Dios yjäy. Je Cristo ymüd'idaanipy Dios yjäy. Jadu'n ñich nipaady nej tüg töxycapxpi, ti Dios yjäy nyajni'ixiyich jigix mijpidaaccixipy je Cristo. Jotcujcich cham co je Cristo ti ymiñ, e ñicxy yi jäy ajcxy ma yi'. ³⁰ Ooy ytimycopycity co Jesús ymiy'ajt paatniy, e ñich ndung yciñniy ymayñipy.

Dios y'ung tzoon jiiyby ma Dios

³¹ Chi Juan yjacmıañ:

—Je Cristo huidibi jiiyby tzoon ma Dios jacmij ixpijcin müdity ca'ydi naaxhuiñyjäy ajcxy. Je jäy ajcxy huidibi ya naaxhuiñ ijtp, ymınaaxhuiñyjäy ti yaj'ixpijigixy, e je' ajcxy ñidiy'ajt'ajtpy je naaxhuiñyjäy y'ixpijcin. Je Cristo tzoon jiiyby tzajpjoty, jacmijcajee yi' ma y'ayuc ytiy'ajt ca'dy' pin. ³² Je Cristo ñigapxyp huidibi ti ixey e ti midooy, e yi'y'ayuc ytiy'ajt ca' jäy ajcxy cöbigaangixy. ³³ Je jäy ajcxy huidibi cöbijcp Dios y'ung y'ayuc ytiy'ajt, je' ajcxy ñigapxpejtp co Dios ytiy'ajt janch yi'. ³⁴ Je Jesús huidibi Dios yquejx, ca'pxy Dios ytiy'ajt ñigapxpejti, com Dios ti möy yi' y'ung yi' yjihui'ñ ymicc'ajt mijcajee. ³⁵ Dios Teedy chojcy yjihuiyb y'ung, e tüg'ociy ymic'ajt ytiy'ajt yi'ti yajmigo'ixiydyäy. ³⁶ Je jäy ajcxy pinjaty mibijcp Dios y'ung, ymüd'ajtpy ajcxy y'alma je jugy'ajtin huidibi ca' ycixy ytigooy. Je jäy ajcxy pinjaty ca' capxymidooy Dios y'ung, ca' ajcxy y'alma müd'adipy je jugy'ajtin huidibi ca' ycixy ytigooy. Je yi' ypaadipy ajcxy Dios chip y'ejcin.

4

Jesús ñaybaati müd tüg töxyjäy jim Samaria

¹ Chi je Huindzin Jesús ayuc midoy jadu'n nej anajty je fariseojäy ajcxy ycapxcixy ymiydaaccixy co je Jesús jacmayjäy anajty yaj'ixpiy etz yajñibety ca'ydi Juan. ² Oy Jesús ca' anajty jäy yajñibety ci'm. Hue' janchtiy je'

ydiscípulos anajty ajcxy jāy yajniibejtp. ³ E co Jesús jada nejhuiy, chi jim Judea choni, yhuimbijtni jim Galilea.

⁴ Co yhuimbijty, hue' anajty yjatytiymñaxihuañ jim Samaria. ⁵ Chi jada' yja'ty huingon ma je mij cajp huidi xiijip Samaria, jim ma anajty tūg pi'ccajp huidi xiijip Sicar, mihuingon je naax huidibi Jacob anajty ti moy y'ung José. ⁶ Jim anajty Jesús yajpaady ma je Jacob ñiigondac. Com ti anajty Jesús y'anucxiyñi mūd je tūyōyī, chi y'ijxtacy jim ma je ñiigondac anajty. Hue' anajty xii jim cugihuaanip. ⁷ Chi jim yja'ty ñigombi tūg tōxyjāy. Chi Jesús yminañ:

—Iich yajni'uucc. ⁸ Com je' ydiscípulos ajcxy huidibi anajty Jesús yjaymūd'ajtīp, ti anajty ñicxcixy cajpjoty juuyb pijcp.

⁹ Chi je tōxyjāy y'adzooy huidibi anajty cogajpīp Samaria:

—¿Na'amy co iich ñi xypijctzoohuich? com miich hue' miich judío jāy, e samaria jāy iich.

(Co yi judío jāy etz samaria jāy ca' ajcxy ñaygodigēiyigixy.)

¹⁰ Huin'it Jesús y'adzooy:

—Co ixipy m'ocnejhuīy je oybi huidibi Dios yejcyp mūd miich ycixpi, e m'ocnejhuīy ixipy nañ jadu'n pin xypijctzoohuipy yi ñi, janch co miich ixipy xynimāyich: "Iich yajni'uucc". E iich miich ixipy nmooyb ñi huidibi jugy'ajt yegipy huinixi.

¹¹ Chi je tōxyjāy y'adzooy ñimay Jesús:

—Huindzin, miich ca' mmūdity ti mūd myajpidzimipy yi ñi, e yi ñijut cūcy y' ooy. ¿Ma tijy m'ocpadañ yi ñi huidibi yajjugy'ajtp? ¹² ¿Nej jacñgi tijy miich mij mnayyajnaxyii, ca'ydi iich ajt n'ap ndeedy Jacob? Je'je' huidibi jada ñigop yaj'oyi. Jacob etz y'ung y'anāg ñi'uuc ma jada ñigop, e nañ jadu'n yajni'uucy yhuaj y'iyujc ajcxy ya.

¹³ Chi Jesús y'adzooy ñimay je tōxyjāy:

—Tūg'ócīy pinjaty ñi'uucp ma jada ñigop tidzī huīb ajcxy jadūg'oc. ¹⁴ Yi jāy ajcxy pinjaty ñi'uucp huidibi nmooybich, ca' ni mina ytidzīhuīyb, com hue' yi ñi huidibi nyejcypich, ahuimbidity ma je jāy jadu'n nej tūg ñigop huidibi yegam jugy'ajtin huidibi ni ca' ycixy ytigoy.

¹⁵ Chi je tōxyjāy y'adzooy:

—Huindzin, iich mooyg yi ñi, ca'ydi jabom jabom ndidzīyijich, e ca'ydi n'ocjacmīnibich ma jada ñigop ñi yajpidzimbī.

¹⁶ Chi Jesús y'adzooy:

—Ñicx yajtzon mñāy, e mūd miin.

¹⁷ Chi je tōxyjāy y'adzooy:

—Ca' mmūdidyich nñāyich.

Chi Jesús y'adzooy:

—Janch tīy'ajt jadu'n nej miich mina'ñ, co ca' mmūdity mñāy. ¹⁸ Com ti mūddzināy migoox yēydīc, e huidibi cham mmūd, ca' mñāy'adyi. Janch tīy'ajt jadu'n nej ti m'adzooy.

¹⁹ Chi je tōxyjāy yminañ:

—Huindzin, cham nhuinjihuīyich co miich je' tūg huidibi Dios yhuīj'ajt yucj'ajt mūd. ²⁰ Iich ajcxy n'ap ndeedyich hue' je' yminañ co jēbi ya huaad iich ajcxy nDios'ojadajtcixyich ma jadayaabi huīngombi copjīp. E miich ajcxy judío jāy yminaangixy co jim Jerusalén je' ma huaad jēbi nDios'ojadajtm, ca' jac ma.

²¹ Chi Jesús y'adzooy ñimay je tōxyjāy:

—Töxyjäy mijpidäg ich n'ayuc. Co ypadamy je xii je tiempo co ni ya ma miich ajcxy mDios'ojadajttac, e ni jim Jerusalén jäy ca' ojadadipy ajcxy yi Dios Teedy. ²² Miich ajcxy ca' tiy'ajt mnejhuuyigixy nej jëbi huaad mDios'ojadajtcixipy. Ich ajcxy judiojäy nejhuiybich ajcxy je tiy'ajt nej jëbi huaad mDios'ojadajtm. Com tüg judiojäy je huudibi yajnidzooctähuam je jäy ajcxy y'alma ma Dios. ²³ Ypadamy je xii je tiempo, e jada jëdu'n je tiempo co je huudibi ajcxy tiydudägy Dios ojadajtp, y'ojadadipy ajcxy Dios müid oyjot oyhuinma'n etz müid Dios ytiy'ajt. Com yi Dios Teedy y'ixtaayb yi jadu'mbi jäy huudibi ojadadib müid oyjot oyhuinma'n. ²⁴ Dios ca' ñinic müidity, jadu'n je' nej poj ca' yaj'ixy. Je jäy ajcxy pinjaty ojadajtp Dios, copicy co huen ojadajtcixy müid tudägyjot tudägyhuinma'n, etz müid Dios ytiy'ajt.

²⁵ Chi je töxyjäy yminañ:

—Ich nejhuiyb co je Mesías ymina'n huudibi naydijaanip Cristo, co je yminipy, huin'it xyajni'ixihuaanim tüg'óciy tiy'ajt.

²⁶ Chi Jesús y'adzooy:

—Ich jëdu'n je Cristo huudibi miich müidmüydacyp.

²⁷ Chi jada' yja'ty ajcxy Jesús ydiscípulos ajcxy. Chi ajcxy ooy jihuiy ti anajty co Jesús je töxyjäy müidmüydägy, e ni pin ca' yaj'amidooy ti anajty chojcyt ti anajty yñimüydacyp müid yi töxyjäy. ²⁸ Chi je töxyjäy jim ymajt ixmajch, chi ñicxy cajpjoty oy mayjäy nimay:

²⁹ —Mingix, jam tüg yëdyic ixim. Ti ich yi' xyajnimaydäyich tüg'óciy tijaty ti nduñich. ¿Nej ca' jada' yi' jëjity je Cristo?

³⁰ Chi choñ ooy mayjäy cajpjoty, ninicxy ajcxy Jesús. ³¹ Yam anajty ajcxy Jesús ydiscípulos chachnimäyii adzip:

—Huindzin, occaay.

³² Chi Jesús y'adzooy:

—Ich nmüidich tüg caayin uucin huudibi miich ajcxy ca' mnejhuuyigixy.

³³ Paady je' ydiscípulos ajcxy tzachhuinmay, ac jëyi ajcxy, nayñimayigixy miñ xipy:

—¿Nej ti pinjaty yajcayyii yaj'ügyii?

³⁴ Chi Jesús yminañ:

—Jotcuych nayjihuiyijich co ti nguydunich Dios chojcän. Com yi' ti xyquexyich ya naaxhuiñ, e nguydünibich yi' y'ané'min. ³⁵ Miich ajcxy minaangixp co jactigoy'ijtni jamidaax po' mina cosecha nyajpidicim. Oc-huinmay miich ajcxy, ich nmäna'ñich, jëbi nyajpidicim yi cosecha cham cham. Huindxcxcix yi mayjäy huudibi xyñigidaacim choñ cajpjoty. Ni'ixi yi' ajcxy y'ity co amido'idaangixy Dios y'ayuc. Jadu'n ajcxy nipaty nej tügi cosecha huudibi ti ymijaani, jëbi nyajpidicim. ³⁶ E pinjaty cosecha yajpidicp ypaatyp ajcxy ymuju'n. Nañ tim jadu'n miich ajcxy huudibi myajmibijcy yi jäy ajcxy co ich je' je Cristo, mbaadipy ajcxy jotcuj'ajtn, etz huudibi ajcxy xymibijcpcich xymijpidaacpcich ypadamy ajcxy y'alma jugy'ajtn huudibi ca' ycixy ytigooy. Tim jadu'n nej je jäy ajcxy huudibi niip etz huudibi cosecha yajpidicp yjotcuyigixy müid co je cosecha ti y'ity, nañ tim jadu'n je jäy ajcxy huudibi cojaay jecy'ajty jada Dios y'ayuc etz miich ajcxy jotcuyigixy aguipxy co yi jäy ajcxy xymijpidägyich. ³⁷ Paady tiy'ajt je ayuc huudibi minam: "Tüg jäy niip etz jadüg jäy cosecha yajpidicp." ³⁸ Ich ti nguexyich miich ajcxy myajmibigipy jäy huudibi ti paady Cristo ytiy'ajt ma Dios ñecy. Yi Dios y'ayuc ycojaaybi ti möy je jäy Dios ytiy'ajt, e miich ajcxy je' mbubedipy co myajmibigipy co ich je' je Cristo.

39 Mayjäy huidibi cogajpíp jim Samaria ymájpídac ajcxy je Jesús co je' je' je Cristo, mäd co je töxyjäy anajty ti ymána'n: "Ti yí xyajnimäydäyich tijaty ñich ti nduñich." 40 Co je samariajäy ajcxy yjädy ma Jesús yhuinduu, chi ajcxy cohuanäy huen hu'my. Chi Jesús jim yhu'mäy mejtz xü. 41 Janch mayjäy ooy nãgi mäbijcy mäjpídac y Jesús, co je' je' je Cristo co ajcxy ci'm midomíydacy je Jesús. 42 Chi ajcxy nimay je töxyjäy:

—Canan jëyi co müch ti xyajnimäy ñich ajcxy, paady ycíxpí ñich ajcxy yam nmíbicyich. Nañ ti ñich ajcxy yam ci'm n'amído'ityich, paady ñich ajcxy nejhuyí co janch jada yjëjity je Cristo huidibi yajnídzögam yí naaxhuiñjäy ajcxy y'alma ma Dios.

Jesús yajtzooz tüg gobierno mijtungmädpí ymang

43 Mímetz xübi anajty co Jesús chooñ jim, nícxy jim Galilea. 44 Jesús ci'm anajty ti ymána'n:

—Co jäy ajcxy huidibi mäid Dios yhuí'ajt ycuje'ajt yajpaady ma yci'mgajp, ca' pín yajmí'adyí. 45 Co Jesús yja'ty jim Galilea naaxjot, huídi anajty ajcxy jimíp agujc jotcujc ajcxy cöbijcy Jesús, com ti anajty ajcxy íjxcíxy tijaty mijhuinma'n anajty ti tuñ jim Jerusalén xüjoty, com nañ ti je' anajty ajcxy jim y'oygíxy xü'ajtpí.

46 Chi yhuimbijty Jesús jadüg'oc jim Caná ma Galilea ñaaxjot, ma je nü yajvinocojy. Jim Capernaum anajty tüg rey mijtungmädpí huídi bi anajty y'ung píjíp. 47 Co je' nejhuyí co Jesús anajty ti yhuimbity Galilea co anajty ti y'oy Judea, chi nínícxy, e chi cohuanäy co Jesús huen nícxy y'ung tzo'yíyí huídi bi anajty ögaaníp. 48 Huin'it Jesús ymána'n:

—Pen ca' íxyípy ti m'íxy mijhuinma'n etz tijaty íjxpejt, ca' íxyípy mmíbicy.

49 Chi y'adzoy je rey ymíjungmädpí:

—Huindzín, tun may'ajt nínícx ñich n'ung ma ca'ni y'o'cyñi.

50 Chi Jesús ymána'n:

—Huímbit ma mdíjc, je m'ung jugy'ajtni je'.

Chi je yëdyjc mäbijcy Jesús nej anajty ti ñimäyí, chi ñícxy jadüg'oc ma ytíjc.

51 Nícxníp anajty co ytumbi ajcxy oy yjípco badíyí, e chi ñimaayí co je' y'ung ti anajty y'agídägy.

52 Chi yaj'amídooy ajcxy ti hora anajty ti yhuaadjihuíy, chi ajcxy y'adzooy:

—Íxíy cujc yxí naxy je toyí y'íxmajtzni.

53 Paady je ungedeedy jihui'ñybijcy co huin'it je' jada' je tiempo co anajty Jesús ti ñimäyí: "Je m'ung jugy'ajtni je'." Chi jada' mäbijcy mäjpídac y Jesús mäid tüg'ócíy jäy huídi jaty anajty yajpat ma yjín ytíjc.

54 Je' je' je mímetzpí mijhuinma'n mij'oy'ajt huídi bi Jesús ytun co chooñ jim Judea ñícxy jim Galilea ñaaxjot.

5

Jesús yajtzooz tüg jäy huídi bi anajty yci' ytecy xuuxy

1 Co jadu'n ytuní yjajti jim Jerusalén anajty ajcxy judíojäy tungíxy tüg mijxü. Huin'it Jesús jim ñícxy jim Jerusalén. 2 E jim Jerusalén jim anajty nü abojtzíg y'ity, mihuingon je poch aguú huídi xüjíp puerta de las ovejas. Je it hue' anajty yajtíy hebreo'amy Betesda, e ymäid anajty migoox ti yhuinguembetpa't. 3 Ma je huinguembetpa't mayba'mjäy anajty jim chachcögnaaygíxy; je huíntzpi, cídúcpc tecyucpí, cíxuxy tecyxuxypí, huídi bi anajty ajcxy jim tzach'ahuíxp mäna je nü y'ocpu'xhuimbity. 4 Com tüg ángel anajty yhuimbety y'adíy ma je nü abojtzíg y'ity, chi je nü yajyúcxy. E je jäy pínjaty anajty jayíjp jilby

nijoty tigiyb co je nñ yücxy, huin'it anajty ajcxy choocixy, oy ixypy ti pa'm ajcxy tim müidity. ⁵ Jim anajty tüg yëydijc hue' anajty ti ypa'mgögnäy iipx majmoxc tugig jimijt. ⁶ Co Jesús ijxy jim ycögnäy, ijxcajpy co anajty je' jecyip chachmijtacni, chi nimay:

—¿Nej mdzögambi?

⁷ Chi je pa'mjäy y'adzooy:

—Huindzin, ca' nmüdidyich tüg yëydijc pin ich xypidägipy jilby nijoty co anajty nñ y'ahuidjtcoty. E paady ycixpi co oy ich jim njamechich ma yi nñ, ti huingbi ñitigiyñi.

⁸ Chi Jesús yminañ:

—Pidig, yajpidig yi mmaabejt, etz tüyöychon.

⁹ Chi mic'amy choocy, chi je' ymaabejt yajpidigy ytigiy yöybi najxpi janch mic oy. Hue' anajty tüg sábado xii co choocy. ¹⁰ Paady je judíojäy ixpicytjic ajcxy nimay je huidibi anajty ti chögy:

—Hue' yam sábado xii, paady ca' jadu'n ñigo'aducyity jadu'n nej m'idich co mmaabejt mdzimhuidity.

¹¹ Chi y'adzooy je':

—Je jäy tiibi ich xyajtzögy, yi' ich jadu'n ti xyñimäy: “Yajpidig yi mmaabejt etz tüyöychoon.”

¹² Chi ajcxy y'amidooy:

—¿Pin miich jadu'n ti xyñimäy: “Yajpidi yi mmaabejt etz tüyöychoon”?

¹³ Per je tiibi anajty chögy, ca' anajty je' nejhuıy pin je' anajty. Com ti anajty Jesús niyöydigooyni ma je mayjäy huidibi anajty ajcxy jim tzachajtip ma je it.

¹⁴ Chi jada' jacomjicy minaybaatti Jesús jim ma Dios ytjic, e chi Jesús yminañ: —Cuentipic nej ti mdzögy, ca' ni ti bocy mjactunipy. Co pocy mjactunipy ca' yjecyity co tim ñigi jibic nicxy mjaty.

¹⁵ Chi je yëydijc ñicxy oy je' yajnimäy je judío ixpicytjic co hue' je' anajty Jesús, je huidibi anajty ti yajtzögyii. ¹⁶ Paady ycixpi je judío ixpicytjic anajty tzach'ixhuidjtcixy tzachpahuidjtcixy je Jesús, e yaj'ögaangixy müid co anajty jäy ti yajtzögy sábado xii. ¹⁷ Chi Jesús yminañ:

—Ich nDeedy tumb je' cham, ca' ypooxxy, paady ycixp ich nañ jadu'n nduñich cham ma miich ajcxy sábado xii.

¹⁸ Co Jesús jadu'n yminañ, paady ycixpi je judío y'ixpicytjic ajcxy ñigi yjactotma'tcoty, ytimy yaj'ögamy anajty aj y Jesús. Ca' ajcxy jadu'n yjotcujcity co anajty Jesús ca' cuyduñ judíojäy ajcxy ytiy'ajt nej ajcxy sábado xii yajmij'ajtcixy, etz co jadu'n yminañ: “Dios yi' nDeedy'ajtypich.” Paady ycixpi ajcxy judío y'ixpicytjic yminañ co Jesús ci'm anajty ytüghua'ñ müid Dios.

Dios ymooy je y'ung ymic'ajt

¹⁹ Chi Jesús yminañ:

—Janch janch ich miich ajcxy yam jadu'n nimaaygixy co ich Dios nDeedy'ajtypich. Ca' huaad ti nduñich müid ngi'mjot ngi'mhuinma'ñich. Jëbi janchtiy nduñich huidibi n'ijxpyich Dios Teedy ytumy. Huidibi Dios Teedy ytumy, ndumylich com Dios yi' nDeedy'ajtypich. ²⁰ Com yi' Dios Teedy ooy yi' tzocy jihuı yci'm'ung, paady xyajni'ixiydaaybich tüg'öciy yi' huidibi ytumy. E nañ xyajni'ixihuaambich jacmijatyti mijhuinma'ñ, ca' ydi' jadaayaabi mijhuinma'ñ nej ajcxy ti m'ijxycixy nej jada pa'mjäy ti chögy, paady ycixpi ñigi mhuinmayipy ajcxy. ²¹ Jadu'n nej Dios Teedy yajjugypicy yi' o'cpi, e chi yajtzinäy jadüg'oc. Nañ jadu'n ich anajty ndimymöhuamyb.

22 Com je Dios Teedy ca' je' ci'm ocyajciyöyaani ocyajtecyöyaani jäy ajcxy ypocy. Hue' tüg'óciy je ymic'ajt xyajci'digiydaayich co ñich ndiydunipyich tüg'óciy naaxhuiñjäy, com Dios nDeedy'ajtpich. 23 Hue' tüg'óciy je ymic'ajt xyajci'digiydaayich, jigix tüg'óciy jäy xyajmij'adipyich. Je jäy ajcxy huidibi ca' xyajmij'ada'ñich, nañ ca' ajcxy yajmij'ada'ñ Dios Teedy huidibi xyquejxich ya naaxhuiñ.

24 Janch janch ñich müich ajcxy yam jadu'n nimaaygixy: Co hueñy'pinjäyity, pinjaty xy'amido'íjtibich n'ayuc, e ymibijcyp ymijpidacyp je tüibi xyquejxyich ya naaxhuiñ, ymüid je'je y'alma jugy'ajtin huidibi ca'ycixipy ytigoyipy, e ca' Dios Teedy chaachytuna'ñyii müid ypocy ycixpi. Hue' janchtiy co y'ögipy, chi janchtiy jadügtecy yjugypigipy. 25 Janch janch ñich müich ajcxy jadu'n nimaaygixy co yi xii tiempo paatnipy, e cham jedu'n ti paady, co yi jäy ajcxy tüibi y'o'ccixy ymidohuipy yi n'ayucich, co anajty ngapxyich, com Dios yi nDeedy'ajtpyich. Pin jäy anajty midoob n'ayucich jugypigip jadüg'oc ajcxy. 26 Com yi Dios Teedy mic'ajt müid jébi yajjugypicy jäy tüibi y'o'ccixy. Nañ Dios ti xymöyich ymic'ajt jébi huaad nyajjugypicyich jäy tüibi y'o'ccixy, com Dios ñich nDeedy'ajtpich. 27 Ti Dios xymöyich ymic'ajt jébi ndiyduñich je jäy ajcxy müid ypocy ycixpi, com ñich je' je jäy huidibi tzoon tzajpjoty. 28 Ca' ooy jada ayuc tiy'ajt mhuinmaaygixy. Com ypaadipy je xii je tiempo co je huidijaty ajcxy yajpatp ma naaxtigiydac, ymidohuipy ajcxy n'ayucich co ñich anajty nmigapxyich ajcxy. 29 Chi ypidzimipy ajcxy ma ñaaxtigiy. Je' ajcxy huidibi anajty oybi ti tungixy, jugy'adip ajcxy y'alma jadüg'oc. Je' ajcxy huidibi anajty jibicpi ti tungixy ypaadipy ajcxy tzaachypi müid ypocy ycixpi.

Dios tiy'ajt yejc co Jesús ymüid anajty mic'ajt

30 Ca' ni ti huaad nduñich müid ngi'mmic'ajtich ngi'm'ayucich. Je ayuc tiy'ajt huidibi nmidooybich ma Dios Teedy, jada ayuc tiy'ajt müid nyajciyöya'ñich nyajtecyöya'ñich jäy ajcxy ypocy. Jadu'n tiydudägy nduna'ñich, com ca' ñich nduñich ngi'mdzócinich. Yi' ñich ndumyb nej Dios Teedy tzocy, yi huidibi xyquejxich ya naaxhuiñ. 31 Co ixypy ñich ci'm nayñigodiy'ajt'adyijich, ca' ixypy müich ajcxy mmijpidägy n'ayuc ndiy'ajtich. 32 Com huingbi yi' huidi xyñigodiy'ajt'ajtpich co ñich Dios ymic'ajt nmüididyich, e nejhuiybich co janch yi' huidibi xyñigodiy'ajt'ajtpich. 33 Müich ajcxy ti mguexy je migügtijc ajcxy tiy'ajtpijcpi ma Juan. E je' yejc tiydudägy ayuc tiy'ajt janchypi pin ñich. 34 Co jadu'n nmüina'ñich co Juan xyajnidiy'ajt'atyich co ñich je' je Cristo, ca' jadu'n nmüina'ñich co ooy ycopicyity co tüg' jäy xyñidiy'ajt'adipyich. Com Dios ci'm xyñidiy'ajt'ajtpich. Jadu'n ajcxy nyajnimäy jada tiy'ajt, jigix ajcxy m'alma nüdzoocin paadipy ma Dios. 35 Je Juan mictägy ooy Dios y'ayuc najtzcapxiyi, jadu'n je' anajty nej tüg' jñn huidibi tücxp jajp, e müich ajcxy tüg' jaxigiy ti mxondaaccixy müid yi' y'ayuc ytiy'ajt. 36 Nigi' ñich Dios y'ayuc ytiy'ajt nmüididyich ca'ydi Juan. Yi' mijhuinma'ñ huidibi ndumybich müid Dios Teedy ymic'ajt. yi' xyajnigüexigibich co ñich ya naaxhuiñ Dios Teedy xyquejxich. 37 Yi' Dios Teedy tüibi xyquexyich, yi' ci'm yejc tiy'ajt co ñich je' je Cristo. E ni caminaabi müich ajcxy yi' mgamidoohui ycapxin, nañ ni caminaabi müich ajcxy Dios Teedy yhuiñyijp maga'ijxi. 38 Ni ca' müich ajcxy mmüidity yi' y'ayuc ma mjot mhuinma'ñ, müid co müich ajcxy ca' xymijpidägyich co ñich je' je jäy huidibi Dios ti quexy ya naaxhuiñ. 39 Ijxtaaygixy jada tiy'ajt ma Dios ylibro, com jüby mdijy müich ajcxy mbaadipy tiy'ajt nej jébi ajcxy mjogy'adipy co anajty ti m'o'ccixy, e yi' Dios ylibro nañ ñich yi' xyñigapxp. 40 E ca' müich ajcxy

mgöbigaangixy ñich n'ayuc ñich ndiy'ajt, jigix ajcxy jugy'ajti mbaadipy huidibi ca' ycixy yti gooy.

⁴¹ Dios xycömayipyich, ca' ngöbigipyich co naaxhuiñyäjy ajcxy xycömayipyich. ⁴² Nnejhuiybich, nej miich ajcxy mjot mhuinma'ñ mmüidity, co ca' ajcxy Dios ytiy'ajt mgyuduuni. Ca' ajcxy migüg mdzocjicxy mjihuixyigy jade'u'n nej Dios tzocy jihuy jäy ajcxy. ⁴³ Hich ti nmiüich müid nDeedyich ymic'ajt. Müich ajcxy ni ca' xycöbicyich. Pen ji huingbi jäy ymiüñ müid yci'mmic'ajt, ca' müidity Dios ymic'ajt, je' janchtiy müich ajcxy ooy mijpidägaangixy. ⁴⁴ Ca' mjájtciixipy nej ñich müich ajcxy xymijpidägibich, müid co ajcxy ci'm mdzachnaygömayáangixy ac müich ajcxy jéyi. E co ixypy müich ajcxy xycöbiga'ñich, huin'it ajcxy Dios xycömayipy. ⁴⁵ Ca ajcxy mmüina'ñipy co ñich müich ajcxy nxihuaamy ma Dios Teedy yhuinduu. Je Moisés müich ajcxy yxihuam ma Dios, je huidibi müich ajcxy mdzachmijpidaacip ytiy'ajt. ⁴⁶ Pen mmijpidaacyp ixypy ajcxy je Moisés y'ayuc ytiy'ajt, nañ jade'u'n ixypy ñich müich ajcxy xymijpidägyich. Com Moisés ñich yi' xychachñimiydaacich ma yi' ñecy. ⁴⁷ Pen ca' mmijpidaaccixy Moisés ñecy, ca' mjájtciixipy nej ajcxy mijpidaaccixipy ñich n'ayuc.

6

Jesús ymoy jäy jicxy picy migoox mil

¹ Co jade'u'n ytuni yjajti, chi Jesús ñicxy jim Galilea mejy nünaxy, huidibi nañ jade'u'n xüjip Tiberias mejy. ² Janch mayjäy anajty Jesús ypanicxyii axam co anajty ajcxy icy je mijhuinma'ñ tijaty anajty Jesús ytumyb ma mayba'mjäy. ³ Chi Jesús ypejty ma tüg cögop, chi jim y'ixtacy müid je' ydiscipulos ajcxy. ⁴ Tim huingonip anajty je pascuaxüi huidibi anajty judiojäy ajcxy ytumyb. ⁵ Chi Jesús ijxy co janch mayjäy ti ypamiinyii, chi nimay Felipe:

—¿Ma jada' caayin uucin n'ocjuyim, ti nyajcaayim jada mayjäy huidibi ti xypamiinim?

⁶ Hue' anajty y'oc'ijxmadzamy nej Felipe y'oc'adzooy. Jesús anajty ñejhuiyib yajxon ti anajty ytunamy. ⁷ Chi Felipe y'adzooy:

—Ni ycahuaadihuip mejtz mil peso meeñ, co ixypy ajt n'ocjuyaanim caayin uucin, e nmöhuaanim cijp tüg'aa cijp mejtz'aa jéyi.

⁸ Tüg Jesús ydiscipulo, hue' anajty yxüi Andrés, Simón Pedro y'uch, je' jade'u'n nimay Jesús:

⁹ —Cha tüg pi'c'anäg huidibi müid migoox cebada tzajcaagy, e mejtz acx ung. E ni ycatiijty yi' yi' migooxpi tzajcaagy, etz mejtz acx ung müid jada mayjäy.

¹⁰ Chi Jesús nimay je' ydiscipulos ajcxy:

—Yaj'ixtacta' yi mayjäy.

Müyjot anajty ooy ma je it.

Chi ajcxy y'ixtactay. Hue' jada' anajty ajcxy ñaybadyii migoox mil ac yëdyjictic, abicy yi' töxyjäydic etz y'ung y'anäg ajcxy. ¹¹ Chi Jesús je tzajcaagy conigy, chi yajnajxy Dioscojuyip, chi yajnidägüyday je jäy ajcxy huidijaty anajty jim iñaayb, mooy jade'u'n nej pin tim tzocy je tzajcaagy etz je acx. ¹² Co je mayjäy cayday, chi Jesús nimay je' ydiscipulos ajcxy:

—Yajmujcta' ajcxy yi' cayduc, ca'ydi' huaad ni ti y'iyoy.

¹³ Chi ajcxy yajmujctay je cayduc, e yaj'ujch ajcxy majmetz mijjaty cach müid je tiibi anajty yconaxy je migooxpi tzajcaagy. Je' anajty jade'u'n ti yjacconaxy. ¹⁴ Co ajcxy y'ijxy je mijhuinma'ñ huidibi anajty Jesús ti tuñ, chi je jäy ajcxy ymüinañ:

—Janch jëdim jada je yëydijc huídibi Dios y'oy'ajt ymic'ajt mïid, je huídibi anajty miinam ya naaxhuiñ.

¹⁵ Co Jesús nejhuíy co ajcxy anajty yajrey'ada'ñyí, chi jada' jadüg'oc huin-huäctuttay je mayjäy. Chi ñicxy naydüg ma tüg yuugjot.

Jesús yöy ñihuingíxy

¹⁶ Co oy chu'iyñi, chi Jesús ydiscípulos ajcxy y'idaacni ma mejypa'. ¹⁷ Chi ajcxy ybarcotigíy, ñicxy ajcxy jim Capernaum jadügpí mejypa'. E ti anajty ycoodziyñi, e ca'ni anajty Jesús ajcxy ñihuimbidiyini. ¹⁸ Chi tüg mijpoj ymiñ, chi je meyy ytigíy oy yücxi. ¹⁹ Ti anajty ajcxy ytüyöy oy migoox tudujc kilómetro co ajcxy ijxy Jesús yhuingoñ ma je barco, hue' anajty ytüyöy mejyhuingíxy. Chi ajcxy ooy ñay'adzigiíy. ²⁰ Chi Jesús yminañ:

—Ích yí, ca' mdzigiíyigíxy.

²¹ Chi ajcxy jotcujc Jesús yajbarcotigíy. Chi tim mic'amy ajcxy ymejch jim ma mejypa' ma anajty ajcxy ñicxcíxy.

Mayjäy ixtaay Jesús

²² Je mayjäy huídibi anajty ajcxy ti yhuimíy jim'amy y'ahuin, y'ijx ajcxy co ac jëyi Jesús ydiscípulos ajcxy ytigíy ma tüg barco, e Jesús ca' anajty ti ytigíy barcojoty mïid je' ajcxy. Ac jëyi anajty ajcxy ti choongíxy barcojoty. ²³ Je com jabom nıjeyıty barco huídibi anajty jim tzomb Tiberias, ti anajty yjädy mihuingon ma je it, ma anajty Jesús ti yajcaaygíxy je mayjäy mïid je Huindzin Dios ymic'ajt, huin'it co Dios mıbjctzoy. ²⁴ Chi je mayjäy ajcxy ijxy co ca' anajty jim Jesús, ni ca' anajty jim je' ydiscípulos ajcxy. Chi ajcxy ybarcotigıyday, chi ajcxy oy ixtaaygıxy Jesús jim Capernaum.

Jesús ymóhuamy jäy ajcxy jugy'ajtin huídibi ca' ycixıpy ytigoyıpy

²⁵ Co ajcxy minaybaati Jesús mejy ñınaxı, chi ajcxy nımay:

—Huindzin, ¿mına mıich ya ti mmiñ?

²⁶ Chi Jesús y'adzooy nımay je mayjäy ajcxy:

—Janch janch co ích mıich ajcxy yam jadu'n nımaaygıxy co mıich ajcxy xy'ixtaaybıch, canan yí' ycıxpı co ajcxy ti m'oc'ıxy yı mıjhuınma'ñ huídibi ti nduñıch, paady ycıxpı mıich ajcxy xy'ixtäyıch co ajcxy nyajcay cüxyı mïid tazjcaagy.

²⁷ Chi Jesús yjacmınañ:

—Ca' myajjotmaygojıxy yı jıicxy pıcy huídibi cıjxp tıgooyb. Yı' janchtıy mıjottıgooygıxy yı jıicxy pıcy huídibi xymóhuıpy yı jugy'ajtin huídibi ca' ycıxıpy ytigoyıpy tüccı'yı. Ích mıich ajcxy je jugy'ajtin nmóhuıbıch huídibi ca' ycıxıpy ytigoyıpy tüccı'yı, com ích je' je jäy huídibi tzoon tazjıjoty, e Dios Teedy xymic'ajtmooyıch, jëbi ích mıich ajcxy nmöy jugy'ajtin huídibi ca' ycıxıpy ytigoyıpy tüccı'yı.

²⁸ Chi ajcxy nımay Jesús:

—¿Ti ích ajcxy jëbi huaad nduñ, nej jëbi ích ajcxy Dios xymıjotcujc'aty?

²⁹ Chi Jesús y'adzooy:

—Dios chojıpy co mıich ajcxy xymıbıcyıch, com Dios xyquejıch ya naax-huıñ.

³⁰ Chi ajcxy nımay Jesús:

—¿Ti ijxpejt mdunamy mïid ích ajcxy, jëbi ích ajcxy n'ıxıpy Dios ymic'ajt etz ích ajcxy nmıııpy co mıich je' je Cristo? ¿Ti mıjhuınma'ñ mdunamy?

³¹ Ích ajt nmıj'ap nmıjteedy ajcxy jecy'ajty yjıicxy pıjı ajcxy je maná jim ma tıtznaax'ıt. Jadu'n ymiñ jaybety ma jadu'n ymina'ñ: “Dios yejıpy jıicxy pıcy huídibi tzoon tazjıjoty.”

³² Chi Jesús y'adzooy:

—Janch janch ñich miich ajcxy yam jadu'n nimaaygixy co canan je' je' je' Moisés huidibi miich ajcxy xymooyb je jüxcy picy janchypí huidibi tzomb tzajpjoty. ³³ Je jüxcy picy huidibi Dios yejcyp huidibi tzomb tzajpjoty, je' je' huidibi jugy'ajtín moy je naaxhuiñy-jây huidibi ca' ycixipy ytigoyipy tüccí'yi.

³⁴ Chi ajcxy nimay Jesús:

—Huindzin, ñich ajcxy mooyg je jüxcy picy janchypí jabom jabom huinixí.

³⁵ Chi Jesús ymínañ:

—Ñich jëdu'n je jüxcy picy huidibi miich ajcxy xymôhuip jugy'ajtín huidibi ca' ycixipy ytigoyipy tüccí'yi. Co jây ajcxy xyñimiinich, e xymijpidägyich, huin'it ca' yi' ajcxy yuböccodañiyii niminaxii, e co jây ajcxy xymibicyich, ca' yi' ajcxy ytidzihuañiyii niminaxii. ³⁶ Com ti ñich miich ajcxy nimây, oy ñich miich ajcxy ti xyja'ijxcixy, per ca' mibijccixy. ³⁷ Tüg'óciy pinjaty ñich nDeedy yquexyp ma ñich, xyñimibich yi' ajcxy. E pinjaty xyñimibich etz xymijpidaacpich, ca' ñich yi' ajcxy n'ixtijy. ³⁸ Canan paady ycixpi ñich ti ndzooñ tzajpjoty ngidägich ya naaxhuiñ co ndunañich ngí'mhuinmañ. Hue' janchtiy yi' ndunaamyich nDeedyich y'ayuc ytiy'ajt, com yi' xyquejxich ya naaxhuiñ. ³⁹ Yi' jadu'n tzojcp ñich nDeedy huidibi xyquejxich ya, co ñich ca' ni pin nyajtigoyipyich, yi' huidijaty xymooybich. Hue' janchtiy yi' ajcxy nyajjugypigipyich jadüg'oc co anajty naaxhuiñybi ti yhuaad'ajtñi mina ytigadzipy. ⁴⁰ Dios Teedy ti xyquexyich ya naaxhuiñ e yi' jadu'n tzojcp co pin jây ñich anajty xy'ijxpich, e xymijpidaacpich, ymüid'adipy je' ajcxy jugy'ajtín huidibi ca' tüccí'y ycixipy ytigoyipy. Hue' janchtiy nyajjugypigipyich ajcxy jadüg'oc co anajty je naaxhuiñybi ti yhuaad'ajtñi mina anajty ytigadzañ.

⁴¹ Chi je judíoñy ajcxy ooy yajtzibíy yajcapxíy co anajty Jesús jadu'n ti ymínañ: “Ñich je' je' jüxcy picy huidibi tzoon tzajpjoty.” ⁴² Jadu'n anajty ajcxy chachmínañ:

—¿Nej ca' je' yjadaajity je Jesús, je José y'ung, je huidibi ajt ytaj yteedy n'ixy'ajtín? ¿Nej co jadu'n ymínañ: “Ñich ti ndzooñich tzajpjoty?”

⁴³ Chi Jesús y'adzooy:

—Ca' myajtzibíygyixy myajcapxíygyixy ac miichiy ajcxy. ⁴⁴ Ni pin jây xycaniminipyich, pen ca' jayíjp Dios Teedy huinmañ ymóyí co xymijpidägibich. E co xymijpidägibich, chí nyajjugypigipyich jadüg'oc co anajty naaxhuiñybi ti yhuaad'ajtñi mina ytigadzipy. ⁴⁵ Com jadu'n ymíñ jaybety ma Dios ñeey huidibi je jây ajcxy anajty Dios ytiy'ajt müid'adipy jecy'ajty yjaay co Dios yaj'ixpigamy je jây ajcxy tüg'óciy. Paady ycixpi tüg'óciy jây huidibi midoob Dios y'ayuc etz y'ixpijcp Dios ytiy'ajt xymijpidägibich ajcxy.

⁴⁶ Ca' ni tüg jây ti ixxy yi' Dios Teedy. Jëyi je jây tügpaic huidibi ti choñ ma Dios, yi' je' ti ixxy yi' Dios. ⁴⁷ Janch janch ñich miich ajcxy yam jadu'n nimaaygixy co pinjaty xymibijcpich xymijpidaacpich, ymüid'adipy yi' ajcxy yjugy'ajtín huidibi ca' ycixipy ytigoyipy tüccí'yi. ⁴⁸ Ñich jëdu'n je jüxcy picy huidibi jugy'ajt mooyb je jây huidibi ca' ycixipy ytigoyipy tüccí'yi. ⁴⁹ Miich ajcxy mmíj'ap mmíj'teedy yjüxcy'ajti ycaagy'ajti ytigoyipy je maná jim títznaaxtuom'it jecy'ajty. E chí ajcxy y'o'ctay. E ni ca' ajcxy jugy'ajtín paty huinixíbi. ⁵⁰ Je jüxcy picy huidibi nnigapxypich huidibi tzoon tzajpjoty, co jây ajcxy jüxcipy, ymüid'adipy ajcxy je jugy'ajtín huidibi ca' ycixipy ytigoyipy tüccí'yi. ⁵¹ Ñich jëdu'n je jüxcy picy huidibi ti chooñ tzajpjoty, etz ti ycidägy ya naaxhuiñ huidibi jugy'ajtín yejcp. Co jây ajcxy jüxcyp je jüxcy picy, ymüid'adipy ajcxy je jugy'ajtín huidibi ca' ycixipy ytigoyipy tüccí'yi. Je jüxcy picy huidibi nyegaamyich müid' naaxhuiñyây ajcxy ycixpi, je' je' je' nniñcixich.

⁵² Chi je judío y'ixpicytijc ajcxy ooy yaj'ayucyooñ yajcapxyooñ, ac je'yi ajcxy ñayñimáayigixy:

—¿Nej jada yéydijc tijy yi' ñinícx njúcx'y'ajtím?

⁵³ Chi Jesús yminañ:

—Janch janch co ñich miich ajcxy yam jadu'n nimaaygixy, pen ca' miich ajcxy mdzúdzicxy ñich nninícx, e pen ca' m'uuccíxy ñich nni'py, ñich je jáy túgpajc huídibi tzoon tzajpjoty, ca' miich ajcxy müid'adipy yi Dios yjugy'ajtín.

⁵⁴ Com pinjaty ñich nninícx xychu'tzip etz ñich nni'py xy'uucibich, ca' je ajcxy yjugy'ajtín ycixipy ytigoyipy túcc'i'yi, oy ajcxy yja'o'ccixy. Nyajjugypigipyich je' ajcxy jadüg'oc co anajty naaxhuin'byi ti yhuaad'ajtín mína ytigadzipy.

⁵⁵ ñich nninícx janchypi júcx'y picy yi', etz ñich nni'py janchypi úgy yi'. ⁵⁶ Co yi jáy ajcxy xymibicyich xymijpidäg'yich jadu'n ni paady nej jihuüy ñich nninícx xychüdzi, etz ñich nni'py xy'uuci. Chi y'idipy ajcxy huinixii ma ñich, etz ñich n'idipyich huinixii ma je' ajcxy. ⁵⁷ Dios Teedy huídibi xyquejxich ya naaxhuin' ymiid jugy'ajtín huídibi ca' ycixy ytigooy. ñich ti nbaadyich ma Dios Teedy je jugy'ajt huídibi ca' ycixy ytigooy. Nañ mbadamy müch ajcxy jugy'ajtín huídibi ca' ycixy ytigooy ma ñich. Co müch ajcxy xymijpidäg'yich, jadu'n anajty nipaady nej jihuüy mjúcx'y'ajtigixy ñich nninícx. ⁵⁸ Je júcx'y huídibi tzoon tzajpjoty, e ycidacy ya naaxhuin' co jáy ajcxy júcx'y'adyii, yajtzinähuiib je ajcxy, ca' ajcxy yjugy'ajtín ycixipy ytigoyipy túcc'i'yi. Yi mmij'ap mmijteedy huídibi júcx'y'ajtigixy je maná jecy'ajty, o'tcay ajcxy, ca' ajcxy paty je jugy'ajtín huinixii.

⁵⁹ Jadu'n Jesús ymiydacy jim ma je judíojáy ajcxy ñaymujctac jim Capernaum co anajty jim yaj'ixpicy.

Mayjäy ca' mijotcujc'ajty Jesús y'ayuc

⁶⁰ Co ajcxy Jesús y'ayuc midodaayi, nigujc-huäcx'y je huídibi anajty ixpicp ma Jesús. Chi ajcxy capxpídzimy, e jadu'n ajcxy yminañ:

—Ooy chachchipity je Jesús y'ayuc. Ca' huaad ji pin huinjihuiday.

⁶¹ Com Jesús ñejhuüyb nej ajcxy anajty yajtzib'iy yajcapx'iy, chi yminañ:

—¿Nej ca' müch ajcxy mijotcujc'aty je tzip ayuc jadu'n nej cham ajcxy ti nyajnimäy? ⁶² ¿Nej xymijpidäg'yich ajcxy, pen m'ixpy ixipy ajcxy co anajty nba'ttig'yich jadüg'oc jiiy tzajpjoty ma ndzooñich? Com ñich je' je jáy huídibi tzoon tzajpjoty. ⁶³ Je jáy ajcxy yjihui'ñ, yi' je' ñinícx yajjugy'ajtíp, e je jáy ajcxy ninícx ca' yi' ni ma chobaady, pen ca' müdity yjihui'ñ. Co müch ajcxy mgöbig'ipy yi ayuc tiibi ngapxyich, huin'it ajcxy mbaadipy Dios yjihui'ñ (je Espíritu Santo), etz mbaadipy ajcxy jugy'ajtín huídibi ca' túcc'i'yi ycixy ytigooy, oy mja'o'ccixy. ⁶⁴ Per nigujc-huäcx'y ma müch ajcxy pinjaty ca' mibicy ñich n'ayuc.

Com Jesús ñejhuüyb anajty jayijpni pinjaty ca' ymibigyii y'ayuc, etz pinjaty anajty cýegaanip ma ymidzip. ⁶⁵ Chi Jesús yjacminañ:

—Paady ycixpi jayijp ti nmína'ñich, co ca' ni pin jébi ñich xymijpidägy, pen ca' Dios Teedy jayijp yhuin'ma'ñ ymöyii co cöbiga'ñ ymöyii co cöbiga'ñ ñich n'ayuc.

⁶⁶ Huin'it mayjäy ajcxy, je huídibi anajty ixpicp ma Jesús, chi ajcxy huin-huäctut ixmajtzní ajcxy Jesús. Ca' ajcxy y'ocjacpanicxni. ⁶⁷ Chi jada' Jesús nimay je nimajmetz discípulos ajcxy:

—¿Nej nañ xy'ixmadzaambich müch ajcxyi'?

⁶⁸ Chi y'adzooy Simón Pedro:

—Huindzin, ca' jac ni pin ñich ajcxy jébi huaad nmijpidäg'yich, com miich túgpajc müid je ayuc huídibi xyajni'ixiyich ajcxy nej jébi huaad ñich

ajcxyc nbaadipy jugy'ajtin huidibi ca' ycixipy ytigoyipy tücc'i'yi. ⁶⁹ Hich ajcxyc nmibjycpich e nnejhuüybich co miich je' je jây huidibi tzoon ma Dios huidibi huádz yhuinma'ñ ymüid.

⁷⁰ Chi Jesús ymïnañ:

—Miich ajcxyc je' ti nhuin'ixyich nimajmetzpi, e nidügti miich ajcxyc mujcu' huinma'ñ mmiüidity.

⁷¹ Je Judas Iscariote, Simón ymang, anajty ytijpy. Com je' je' anajty cïyegam Jesús ma ymidzip, oy je' anajty yjajëjity nidüg ma je nimajmetzpi.

7

Jesús y'uch ajcxyc nañ ca' anajty jaty mijpidaaci Jesús y'ayuc

¹ Co jadu'n ytundaayi yjajtaayi, jim anajty Jesús yhuidity Galilea naaxjot, ca' anajty ñicxa'ñ jim Judea naaxjot, co anajty yi judíojäy ajcxyc huidibi midzip'ajtip yaj'öga'ñiyi. ² Tim huingon anajty je judíojäy yxii, hue' anajty ajcxyc yxigoyäxy Tabernáculo xii. ³ Chi Jesús ñimaayi y'amigüg y'uch yëydijcpi:

—Tzon miich ya, nicx jim Judea naaxjot nayguëxigii mayjäyjoty. ⁴ Com huenpinity huidibi nayguëxigaaanip mayjäyjoty, ca' ajcxyc naygoyüchyii. Mduinipy miich mijhuinma'ñ xiijoty, jigix je mayjäy xycömayipy.

⁵ Ni Jesús y'amigüg ajcxyc ca' anajty yjaty ymijpïdägyii y'ayuc. ⁶ Paady Jesús y'adzooy:

—Hich nxii ndiempo ca'ni paty mina ndigihua'ñich jim Jerusalén jadu'n nej je Mesías. Janch miich ajcxyc oytymïnaajity jëbi mnayguëxicigixy ma je mayjäy ajcxyc. ⁷ Ca' huaad jëbi miich ajcxyc, naaxhuïnyjäy ajcxyc, xymidziptzoñ. Janch ñich xymidzip'ajtpich ajcxyc yi', je' co ngapxpïdzimiyich yi yjibic-huinma'ñ huidibi ajcxyc ytumyb. ⁸ Nicx miich ajcxyc jim ma xii yjadyii. Hich ca' ñnicxa'ñich cham, com ca'ni ñich ndiempo yhuaad'aty mina ndigihuiyich jim Jerusalén jadu'n nej je Mesías.

⁹ Jady'ñydi jëda'ajty ymïnañ, chi yhui'müy jim Galilea.

Jesús ñicxy jim Jerusalén xiijoty

¹⁰ Co Jesús y'amigügtijc ajcxyc jayijp ñicxtay xii'ajtpi jim Jerusalén, chi Jesús ñicxy nañ jadu'n ayüch ameech ma anajty xii yjadyii. ¹¹ Xiijoty je judíojäy ooy ajcxyc ja'ixtay Jesús, e chi ajcxyc ymïnañ:

—¿Ma jada' je Jesús?

¹² Ma je mayjäy ajcxyc may anajty ajcxyc tzachnigapxcixy tzachnimïydaaccixy Jesús. Nijëjity anajty ymïnaangixy: “Tüg yëydijc oyjäybi yi'”; e nañ nijëjity ymïnaangixy: “Ca'p yi' y'oyjäyity, nigo jäy tzachhuin'ññ.”

¹³ E ni pin anajty ca' capxpïdzimiy mayjäyjoty co y'oyjäyity anajty Jesús, müid co anajty ajcxyc je judío xpciytjic ajcxyc tzachtzigüygixy.

¹⁴ E mijxiijoty Jesús ñicxy jim ma Dios ytijc, chi jim ytigüy yaj'ixpijcpï. ¹⁵ Je judío y'ixpicytjic tzachmaañhuindicxcixy anajty je Jesús, chachmïnaangixy anajty:

—¿Nej jada' tijy jada chach'ixpicyty? e ca' ni ma ti y'escuel'aty.

¹⁶ Chi Jesús y'adzooy:

—Jada ixpïjcin ca' ñich jada një'adyii. Yi' jada yje' je huidibi xyquejxich ya naaxhuïñ. ¹⁷ E pen ji pinjaty cuydunaanï yi' ytïy'ajt je huidibi xyquejxich, huinjihuïhuipy yi' jada ixpïjcin, pen janch Dios yi' ytïy'ajt, o pen ñich yi' ngi'm ayuc huidibi ngapxpïch. ¹⁸ Je jäy huidibi yci'm'ayuc yci'mdiy'ajt müid

yaj'ixpicy, ci'm je' ñaygömaya'ñyii. Janch pinjaty tzojcp co ycömayiib je' yhuindzin huidibi ti yquexyii, tiydudägy je', ca' je' y'anijity.

¹⁹ Janch co Moisés miich ajcxy xymoy Dios ytiy'ajt. E ni tüg miich ajcxy mgacuydungixy je' tiy'ajt. ¿Ti ycixpi co miich ajcxy xyaj'öga'nich?

²⁰ Chi je' jäy ajcxy y'adzooy:

—Mujcu' miich müid ma mjot mhuinma'ñ. ¿Pin miich yam xyaj'ögam?

²¹ Chi je' ajcxy nimay:

—Müid tügpajc mijhuinma'ñ tiibi nduñich sábado xii, yi' miich ajcxy mij mdzachjihuiyb mdzachhuinmaayb. ²² Moisés miich ajcxy xyajna-jtz'ane'müy je' cötujcin co ajcxy m'ung mdiy'ajttüyigixy (oy je' ca' yajtzondac, miich janchtiy ajcxy mmij'ap mmijteedy Abraham yajtzondac), e paady ycixpi miich ajcxy m'ung mdiy'ajttüyigixy oy yjapocxxiidumity. ²³ E chi jada' ca'ydi miich ajcxy Moisés ytiy'ajt mnixiici myajxiici, paady ajcxy m'ung mdiy'ajttüyigixy oy sábado xiioty. ¿Ti miich ajcxy co xymijotma'tcixich co tüg jäy ti nyajtzögyich sábado xiioty? ²⁴ Ca' m'ix'ijxcixy mba'ijxcixy mmigüg müid anii. Yajcüyöyi yajtecyöyi miich ajcxy jäy ypocy müid tiy'ajt.

Ooy ajcxy tzachhuinmay je' jäy, peni Jesús je' je' anajty je' Cristo

²⁵ Chi ajcxy nijëjity Jerusalénjäy ymínañ:

—¿Nej ca' jada jada' yjëjity je' huidibi ajcxy yjajaj'ögamyi? ²⁶ Oc'ix ajcxy, ta ycapxy ymiydägy ijxna' que'xna', e ca' ajcxy huam nimäy. ¿Nej ti jada ajcxy ijxajpcixy yajxon tungmüidpi ajcxy co jada yjëjity je' Mesías? ²⁷ Hich ajt nnejhuüym ma jada yëydijc chooñ. Per je' Cristo co anajty je' ymiñ, ni pin je' canejhuüipy ma je' anajty choñ ma ycogajpity.

²⁸ Co Jesús jadu'n midooy, co anajty yaj'ixpicy ma Dios ytiyc, huin'it Jesús mic ymínañ:

—Mnejhuüyb miich ajcxy pin iich, e ma ndzooñich. Per ca'p iich ti nmiñich ya naaxhuin müid iich ngi'ndzocjin. Yi' huidibi iich ti xyquexyich, tiydudägy yi' ytuñ, e ca' miich ajcxy yi' m'ixy'ájtigixy. ²⁹ Hich janchtiy n'ixy'ajtypich je'. Je' co jim ndzooñich ma je', e je' iich xyquejxich.

³⁰ Huin'it ajcxy jamadzaañ, per ca' ni pin cñixajiy, com ca'ni anajty paady je' xii je' tiempo mina ñaygyegüyb ma ymidzip ajcxy. ³¹ Per mayjäy ooy miibjcy je' Jesús y'ayuc, e ymínañ ajcxy:

—Co anajty je' Cristo ymiñ, ca' jada' nigí mijhuinma'ñ tuna'ñ ca'ydi jadaaabi yëydijc.

Je' teedy mijtungmüidpi yquejx ajcxy soldadotijc huen majtzcixy Jesús

³² Co je' fariseojäy ajcxy ayuc midooy co jäy chachmínaangixy jadu'n co je' Jesús je' je' je' Cristo, chi ajcxy quejxy tungmüidpi huen Jesús yajmach.

³³ Paady Jesús ymínañ:

—Hich jac-huäcxijpich hueeni ma miich ajcxy, chi nñicxa'ñich jadüg'oc jiiiby tzajpjoty ma huidibi xyquejxich. ³⁴ Xy'ixtähuibich miich ajcxy, e ca' iich miich ajcxy xypaadipy. Ma anajty iich nñicxyich, miich ajcxy ca' jaydëbi jiiiby nñicxcixy.

³⁵ Huin'it je' judíojäy ixpicytjic acjëyi ajcxy ñay'amidoohui:

—¿Ma jada jada' y'ocnícxa'ñ, e nícxy iich ajt ngapaatim? ¿Nej nícxiib jada' ma je' judíojäy ajcxy huidibi yajpaatcixy yxi yaa ma yi griegojäy ajcxy, e yaj'ixpigaangixy yi griegos ajcxy? ³⁶ ¿Nej jada' yajhuimbídzim? co ymínañ: “Xy'ixtähuibich miich ajcxy, e ca' xypaadibich, e ma anajty iich nyajpaady, ca' miich ajcxy jaydëbi jiiiby nñicxcixy.”

Je nã huidibi jugy'ajt yejcp huidibi ca'ycixy ytigoy

³⁷ Co je mijxã ycodiicxni, chi Jesús ytinay'ahuïy, chi mic yminañ:

—Pen ji pinjaty tiy'ajt nejhuihua'ñ jadu'n nej ixypiy jäy ytidziyïi tzocy yi nã, huen xyñimiñich, etz nmõhuibich tiy'ajt. ³⁸ Je jäy ajcxy pinjaty xymibijcpich xymijpidaacpich, ytunipy ajcxy jadu'n nej Dios ñecy ymina'ñ ma jadu'n yjaybetyity: “Ycapxypidzimipy je' ajcxy Dios ytiy'ajt, etz mayjäy jotcuic'ajtin etz jugy'ajtin pada'ñ huiniñi, ytimyñipaaty jadu'n nej nã ypidzimy janch com ma tũg niigop.”

³⁹ Je' anajty jadu'n Jesús ytijyp pinjaty je' anajty mibijcip, je' anajty ajcxy adigihuaanip jottigihuaanip je Espiritu Santo. Ca' ni anajty je Espiritu ymini ma je discipulos ajcxy com ca'ni anajty Jesús yhuimbityñi tzajpjoty.

Jäy ajcxy ca' ñay'ayuc-huinjihuiyi müid Jesús ycixpi

⁴⁰ Je mayjäy ajcxy huidibi anajty ti midooy nej Jesús anajty ti ymina'ñ, nidüg nimetz yminañ:

—Jadaabi je' je tydudägypï jäy huidibi Dios y'ayuc najtzcaxxiyip.

⁴¹ Jacjadyïi yminañ ajcxy:

—Je' yi' je Mesías.

Per nijëjity ajcxy huidibi ca' ymibijccixy chachminaangixy:

—Ca' jim Galilea naaxjot chona'ñ je Mesías. ⁴² Com jadu'n yjaybetyity ma Dios ñecy co je Mesías jim chona'ñ ma David y'ap y'oc, jim ma je cajp huidi xiijip Belén ma David ycogajpity.

⁴³ Je mayjäy ca' anajty ajcxy ñay'ayuc-huinjihuiyigixy müid Jesús ycixpi.

⁴⁴ Nijëjity anajty ajcxy ytimymadzamy Jesús, per ca' ni pin ymajtzi.

Judío ixpicytije ca' ajcxy mijpidacy Jesús

⁴⁵ Chi ajcxy policías huidibi tumb ma tzajptijc nihuimbijty ajcxy je teedy mijtungmüidpi etz je fariseojäy ajcxy, chi ajcxy ñimaayi:

—¿Nej ajcxy co ca' ti mmajtzcixy je Jesús?

⁴⁶ Chi ajcxy je' y'adzooy:

—Nicaminaaxi tũg yëdyjc jadu'n ti ymïydgäy jadu'n nej yijibi yëdyjc.

⁴⁷ Chi je fariseojäy ajcxy yminañ:

—¿Nej nañ ti miich ajcxy myajhuin'ñigixy? ⁴⁸ Ca' nmïnaanim ti ajcxy teedy mijtungmüidpi o fariseojäy ajcxy mibijccixy Jesús. ⁴⁹ Je mayjäy huidibi mijpidaaci Jesús y'ayuc, ca' ajcxy y'ixpicyity ma Dios ycõtujcin. Dios y' ajcxy tzaachytunib.

⁵⁰ Nidügti ajcxy je' anajty je Nicodemo huidibi oga'n'aty ni'oy Jesús coodz, je' ymïgügtijc jadu'n nimay:

⁵¹ —Jadu'n ñich ajt ngõtujcin xy'ane'mim co ca' huaad ndzaachytuunim pinjäy, pen ca'p jayijp n'ixyöyim nbayöyim ti anajty ti tuñ.

⁵² Chi ajcxy ymïgügtijc y'adzohuimbijty oyñinej:

—¿Nej miich nañ jadu'n galileojäy? Ixta' yajxon ma Dios ñecy, com jüiby mnejhuïhuipy co jim Galilea ca' jim chona'ñ pinjäy huidibi Dios y'ayucnajtzcaxxiyip.

⁵³ Chi ajcxy ñicxtay nidüg nidüg ma yjin ydjic.

8

¹ Chi Jesús ypa'ttigüy ma je cõgop huidibi xiijip Olivos. ² Com jabom jopyñi Jesús yquidacy jadüg'oc ma Dios ytijc. Chi mayjäy ñimiini. Chi yixtacy, e chi ytigüy yaj'ixpijci. ³ Je jäy ajcxy huidibi Dios ycõtujcin yaj'ixpijcp etz je

fariseojäy ajcxy müdmüñ tüg töxyjäy ma Jesús huídibi anajty ti ytundigooy müd huingbi yéydjic. Chi ajcxy pidacy cujc'amy ma je mayjäy. ⁴ Chi ajcxy nimay Jesús:

—Huindzin, jadyaabi töxyjäy huingbi yéydjic müd ti ytundigoy. ⁵ Moisés ytiy'ajt ich ajcxy xyñajtz'ane'miy jecy'ajty co yajtzaagögädzipy jada jadu'mbi töxyjäy. ¿Nej müich m'ocminambi?

⁶ Jadu'n ajcxy nimay co anajty ajcxy oc-huinma'n'ixa'n. Hue' anajty ajcxy ixtaayb nej jëbi huaad yajpocycäy Jesús. Chi Jesús yhuindacy, chi jada' ytiyiy jaaybi müd ycihuäx naaxcíxy. ⁷ Com je' anajty ajcxy chachyaj'amidooyb, chi Jesús ytinayígy. Chi ajcxy nimay:

—Pin jäy ji ma müich ajcxy ca' ti pocy müdity, huen yi' jayjip tzaagäch jada töxyjäy.

⁸ Chi Jesús yhuindacy jadüg'oc. Chi ytiyiy jaaybi jadüg'oc naaxcíxy. ⁹ Co ajcxy jadu'n ayuc yajhuinjihuیداای, chi ajcxy ooy chöyduñ, com yjihuiy ajcxy ypocy. Chi ajcxy yjihuaćtay. Chi je mijjädjic ajcxy ñaybattzondayi. Jesús yhui'müy nimetz müd je töxyjäy huídibi jim anajty tinaayb huingon. ¹⁰ Chi Jesús yhuaccugiy jadüg'oc nimay je töxyjäy jada':

—¿Ma ajcxy je jäy? ¿Ca' ni pin ti xychaachytuñ müd mbocy ycixpi?

¹¹ Chi je töxyjäy y'adzooy:

—Huindzin, ca' ni pin.

Chi Jesús yminañ:

—Ni ich müich ngatzaachytunipy müd mbocy ycixpi. Nicx, e ca' m'ocjacpocytunip.

Jesús jadu'n nipaady nej tüg jin huídibi tixcipi

¹² Chi jadüg'oc Jesús yjactiyiy miydacp yminañ:

—Ich je tiy'ajt nmüd ya ma naaxhuñjy, jadu'n ich nipaady nej tüg jin huídibi tixcip ma jäy ajcxy. Pinjäy xymijpidaacpich ymüd tiy'ajt nej jëbi huaad tudägy chinähuipy, jadu'n nipaady nej jihuiy ytüyöy ma jin ytixcin.

¹³ Chi je fariseojäy ajcxy nimay Jesús:

—Müich ci'm nayñidiy'ajtip co müich je' je Cristo, e ca' mdiy'ajt chobaady.

¹⁴ Chi Jesús y'adzooy:

—Janch co ich ci'm nayñidiy'ajt'adyiijich co ich je' je Cristo. E ich ndiy'ajt janch yi'. Com nnejhuñyibich ma ti ndzooñich, e ma nnicxa'nich. E müich ajcxy ca' mnejhuñyigixy ma ndzooñich, e ma nnicxa'nich. ¹⁵ Müich ajcxy mmigüg mbocy'ixyp müd ngi'mhuinma'n. Ca' ni pin nbocy'ixyich müd ngi'mhuinma'nich. ¹⁶ Pen ich anajty nyajciyöybich nyajtecyöybich jäy ypocy, tiydudägy anajty jadu'n nduñich. Com ich ca' nyajpaadyich naydüg. Je' xymüd'ijtpich je Dios Teedy huídibi ti xyquexyich. ¹⁷ Com cojaay jadu'n y'ity ma müich ajcxy mgötujcin ñecy: “Pen nimetz jäy nigodiy'ajt'aty huentüjity, tzoobatp ajcxy y'ayuc.” ¹⁸ Ich ci'm ñayñidiy'ajt'adyiijich co ndzooñich tzajpjoty, etz nDeedyich nañ jadu'n xyñidiy'ajt'ajtpich, co je' ya ti xyquexyich.

¹⁹ Chi ajcxy y'amidooy:

—¿Ma müich mdeedy yajpaady?

Chi Jesús y'adzooy:

—Com co ca' ich müich ajcxy xy'ixxapcy co ich je' je Cristo, nañ ca' ajcxy m'ixy'adyi ich nDeedy. Co ixypy ajcxy xy'ixxapcyich, nañ jaydëbi ixypy ajcxy nejhuñy pin ich nDeedy'ajtyp.

20 Jim jadu'n Jesús ycapxy ymíydacy ma je meeñ'ljttac, co anajty jyäy jaj'ixpicy ma Dios ytijc. E ca' ni pin ymajtzi. Com ca'ni anajty yxii yhora anajty paadyñi mina ñaygíyegíyib ma ymidzip.

Jesús ñimay ymígügtijc co ca' huaad ñicxy ma je' anajty ñicxy

21 Chi Jesús yjacnimaayi ajcxy:

—ñich nnicxaanip ñich, miich ajcxy xy'ixtähuibich. Miid ajcxy mbocy ycixpi m'ogaangixy, com ma nnicxa'ñich ca' huaad miich ajcxy jëbi nnicxcixy miid mbocy ycixpi.

22 Huin'it je judíojäy ajcxy ac jëyi ñayñimaayi:

—¿Nej ñicxy jada' ci'm ñayyaj'oga'ñiyiiji? Com jadu'n ymina'ñ co ma yi' ñicxy, ca' huaad ñich ajt jëbi nnicxim.

23 E Jesús nigí nimay'idich anajty:

—Miich ajcxy ya naaxhuiñ mmíidity mdiy'ajtcop. ñich tzajpjoty mmíidityich ndiy'ajtcopich. Miich ajcxy naaxhuiñjäy ajcxy ytiy'ajt mmíjpidaacipy. ñich ca' nmíjpidägyich naaxhuiñjäy ytiy'ajt. 24 ñich miich ajcxy jadu'n nnimaayb co m'ogam miich ajcxy, e ca' ajcxy Dios mbocy xyhuinmeecxip. Copicy ajcxy m'ogipy, e ca' Dios mbocy ajcxy xyhuinmeecxip, pen ca' xymibigáangixyich co ñich je' je huídibi jëbi mbocy ajcxy xyhuinmeecxip.

25 Chi ajcxy nimay Jesús:

—¿E miich, pin miich?

Chi Jesús y'adzooy:

—Ti ajcxy nyajnimaaigyixy pin ñich, co oga'n ndigíyich jäy jaj'ixpicipi. Cham jadüg'oc nyajnimaaigyixy. 26 May ooy tijaty ayuc nyajnimähuaangixy nej ti mdundigoogyixy ma Dios ytiy'ajt. Cham ca' ajcxy nyajnimaydáhuipy. Je huídibi ti xyquexyich ya naaxhuiñ je' tüg'óciy tiy'ajt miid. E ngapxpizimiyich je ayuc je tiy'ajt jëyi huídibi ti nmídooyich ma je'.

27 Je jäy ca' ajcxy huinjihuüy co Dios Teedy anajty Jesús ñigapxyp. 28 Paady Jesús nimay ajcxy:

—Co anajty miich ajcxy ti xyajcruudzpetyich, ñich je jäy huídibi tzoon tzajpjoty, huin'it miich ajcxy mnejhuíhuip co ñich je' je Cristo. E co ñich ca' ngi'mhuinma'ñ nduñich. Yi' ñich ya nmíydacypich huídibi Dios Teedy ti xyaj'ane'myich. 29 Je Dios Teedy huídibi ti xyquexyich, yi' ñich miid n'ityich. Ca' ñich yi' xy'ixmachich. Com co ñich njatytimyumbich jabom jabom huídibi yi' chojcy.

30 Co Jesús jadu'n yminañ, chi mayjäy ooy ymibijcy.

Jäy huídibi mibijcp Jesús ycuychinaaipy yi' ytiy'ajt

31 Chi Jesús nimay je judíojäy ajcxy huídijaty anajty ti ymibicy:

—Pen mmibijc ajcxy cixyot huinjot tüg'óciy ñich n'ayuc, e ca' m'ixmadzipy ajcxy ñich n'ayuc, huin'it ñich miich ajcxy jëbi njäy'adyii. 32 Huin'it jëbi ajcxy mnejhuíhuipy Dios ytiy'ajt. E. Dios ytiy'ajt xyñihuáangixip ma je mjibic-huinma'ñ ooy xy'ane'mgixy.

33 Chi ajcxy y'adzooy:

—Abraham ñich ajcxy nmíj'ap nmíjteedy'ajtpy. Ca' ñich ajcxy huaad ni pinjäy xyjac'ane'my. ¿Nej co miich jadu'n mina'ñ: “Dios ajcxy xyñihua'ñip ma yi' mjibic-huinma'ñ xy'ane'mgixy”?

34 Chi Jesús y'adzooy:

—Janch janch ñich miich ajcxy jadu'n nimaaygixy co tüg'óciy pinjaty pocy ytundib, jibicp yi' ane'mip. Tim jadu'n nipaady nej tüg tumbi huídi

codoogï y ijtp, yi' yhuindzin jatytim'y'ane'mip. ³⁵ Yi tumbi huidibi codoogï ijtp, ca' yhu'ma'n ma je jäy ytijc huinixii. Yi jäy y'ung janchtiy hui'mam huinixii ma yteedy ytijc. ³⁶ Pen Dios y'ung miich ajcxy xyajpidzingixp ma je jibicpi xy'ane'mgixy, janch huinixii m'idaangixy, ca' ma ti jibicpi xy'oc'ane'mgixnipy. Tim jadu'n nej Dios y'ung y'ity, ca' ti jibicpi y'ane'myii. ³⁷ Nejhuuybich co miich ajcxy Abraham mmij'ap'adyii mmijteedy'adyii. Per miich ajcxy chachyaj'ogaambich. Je' co ca' mijpidaaccixy ich n'ayuc huidibi njayajnamaaygixyp. ³⁸ Ich miich ajcxy nyajmüdmidydaacyp tiibi n'ixyich huidibi ndeedyich ytumyb. E miich ajcxy yi' mdumyb nej m'ap mdeedy ti xyajnamaaygixy.

³⁹ Chi ajcxy y'adzooy:

—Hue' ich ajcxy nmij'ap'ajtyp nmijteedy'ajtyp je Abraham.

Chi Jesús y'adzooy:

—Pen janch ajcxy Abraham mmij'ap'adyii mmijteedy'adyii, yi' ixypiy ajcxy mdungixyp jadu'n nej Abraham tuuñ. ⁴⁰ Janch ich miich ajcxy xychachyaj'ogaangixyich, e ti ajcxy njayajnimäy je huidibi ich ti nmidooyich ma Dios. Ca' Abraham yaj'ögy je jäy ajcxy huidijaty anajty Dios ytiy'ajt müd, jadu'n nej miich ajcxy m'iditzaangixy. ⁴¹ Miich ajcxy jibic-huinma'n mdungixyp, tim jadu'n nej m'ap mdeedy jibic huinma'n ajcxy tuñ jecy'ajty.

Chi ajcxy Jesús ndzooy:

—Ca'ich ajcxy ndogoy'ungity. Je' tügpajc ich ajcxy ndeedy'ajtyp Dios Teedy.

⁴² Chi Jesús yminañ:

—Peni Dios ixypiy ajcxy mdeedy'ajtyp, xychojcpich xymijpidaacpich ixypiy ajcxy. Com Dios ti xyquexyich ya naaxhuiñ, e jilby ndzooñich ma Dios. Ca'ich ngi'mdzojcin ycixpi nmiñich ya naaxhuiñ. Yi' je' jadu'n tzojcp pin ti xyquexyich. ⁴³ Ti co ca' miich ajcxy mhuinjihuñ ich n'ayuc? Je' co ca' ajcxy midohuaangixy ich n'ayuc. ⁴⁴ Je' miich ajcxy mdeedy'ajtyp je mujcu'. Müd mg'i'mdzojcin mguydungixy je mujcu' chójcin. Je' mujcu'yaj'öctiyb yi' jäy maabi naaxhuiñybi chondägy. Je' mujcu' ca' je' ixaani Dios ytiy'ajt. Ca' ni ti tiy'ajt yajpaady ma je', com je' mujcu' indaacc je', chi ci'm ooy nijot y'idich. Je' ooy indacy, e je' oga'n anii yajtzondac. ⁴⁵ Com miich ajcxy mujcu' yhuinma'n müd, paady miich ajcxy ca' xymibijci xymijpidaaci n'ayucich co ich tiy'ajt njamiydägy. ⁴⁶ Ni pin miich ajcxy xycayajpocycähuiy. Peni tiy'ajt ich miich ajcxy nyajnamaayb, çti co ca' mmijpidaaccixy ich n'ayuc? ⁴⁷ Je' jäy ajcxy huidibi yajpatp ma Dios, y'amido'ijtyp ajcxy Dios y'ayuc. Paady miich ajcxy ca' m'amido'ijtcixy Dios y'ayuc, com ca' ajcxy Dios mDeedy'ajtigixy.

Jesús jiiyim anajty yjagy'aty ca'ydí Abraham

⁴⁸ Chi je' judío ixpicytije ajcxy y'adzooy:

—Ti ich ajcxy yajxon nmína'n co miich mgogajpity jim Samaria, e mujcu' miich müd ma mjot mhuinma'n.

⁴⁹ Chi Jesús y'adzooy:

—Ca' ich mujcu' nmüdity ma njot nhuinma'n, com nyajmij'ajtypich nDeedy, e miich ajcxy xy'ixtijpich. ⁵⁰ Ich ca' ci'm naygömayijich. Dios Teedy ich xycömaayb, com yi' je' huidibi ixyoyp payoyp jäy ajcxy ypcy. ⁵¹ Janch janch ich miich ajcxy nimaaygixy co ji nijejity jäy huidibi ich n'ayuc cuydumb, e ca' yi' ajcxy yjagy'ajtin ycixipy ytigoyipy tücci'yi co y'öccixipy.

⁵² Chi je' judío ixpicytije ajcxy y'adzooy:

—Cham ich ajcxy janchtiy ti nnejhuñyich tiydudägy co miich mujcu' müdity ma mjot mhuinma'n. Abraham o'c je', nañ jadu'n o'c ajcxy je' huidibi anajty Dios ytiy'ajt capxhuäcxip, e miich mmina'n co pen ji pinjaty miich m'ayuc

xymibijcip xymijpidaacip, ca' je' y'ögipy. ⁵³ ¿Nej mjacmüid miich mic'ajt, ca'ydi Abraham, üich ajt nmij'ap nmijteedy huidibi o'ci? ¿Nej mjacmüid miich mic'ajt, ca'ydi ajcxy huidibi Dios y'ayucnajtcapxiy, huidibi ajcxy o'ci? ¿Pin miich mdüimnaydijyii?

⁵⁴ Chi Jesús y'adzooy:

—Pen üich nnaygömayibich ci'm, ca' n'ayucich chobaadipy. Üich nDeedy yi' xycömayipich, je huidibi miich ajcxy mdijpy co ajcxy mDios'adyii. ⁵⁵ Per miich ajcxy ca' Dios m'ixy'adyii. Üich janchtiy n'ixy'ajtypich Dios. E co ixypiy nmüina'üich co ca' üich Dios n'ixy'adyii, indaacpich ixypiy, jadu'n nej miich ajcxy m'indaaccixy. Janch üich n'ixy'ich Dios, e nguuydumybich yi' y'ayuc. ⁵⁶ Je Abraham, miich ajcxy mmij'ap mmijteedy, jotcujc ooy üayjihuiyi' co anajty ixa'ñ üich nxi' ndiempo ya naaxhuiñ. E co ixxy co üich nmüiñich, chi ooy yjotcugüy.

⁵⁷ Chi je judío ixpicytjic ajcxy nimay Jesús:

—Ni mgamüidity huixchigui'px majc jimijt, e ¿mmüina'ñ co m'ixy Abraham? (Ca' m'ixy'ajti je Abraham, naxy tüg mil jimijt maabi je' y'o'cni.)

⁵⁸ Chi Jesús y'adzooy:

—Janch janch üich miich ajcxy jadu'n nimäy co ji anajty üich co ca'ni anajty Abraham yma'xung'aty.

⁵⁹ Chi ajcxy tzaa conügy tzaagädza'ñ anajty ajcxy. Chi Jesús yhuingoyüch, e ypidzimy ma Dios ytijc.

9

Jesús yajtzooc tüg huintzpi

¹ Hue' anajty Jesús huidijtp co ixxy tüg huintz, jadu'n anajty huiintz ti yma'xung'aty. ² Chi ydiscípulos ajcxy y'amidoohui:

—Huindzin, ¿pin pocy ytuun, jada huintzpi o ytaj yteedy, co huintz yma'xung'aty?

³ Chi Jesús y'adzooy:

—Ca' yi' ypocytuun, ni ytaj yteedy, hue' janchtiy paady ycixp jadu'n yjajty, jigix Dios ymic'ajt üiguëxigity ma yi'. ⁴ Copicy njactüünibich yi' ytung huidibi ti xyquexyich ya naaxhuiñ. Miinip je xii tiempo ma ca' pin Dios y'ayuc tunaani. Jadu'n nej jihuiy ixypiy je xümbi ti üaxy etz je coodzpi ti ymiñ. ⁵ Jadu'n nej n'ityich ya naaxhuiñ nmüidich Dios ytiy'ajt, jadu'n üich nipaady nej tüg jün huidibi codücxp yi' naaxhuiñyäjy.

⁶ Co Jesús jadu'n yminanday, chi nidzujüy naax, chi mo'ntz yaj'oyüy müid chujni, chi jada' yajjaaxi je jäy yhuin müid je mo'ntz. ⁷ Chi nimay jada':

—Nücx quejtzpuj yi' mo'ntz jim ma yi' Siloé nüi y'abojtzigity —je ayuc Siloé jadu'n yhuimbidity: quexyöybi.

Chi je jäy huintzpi üichy jim, chi oy quejtzpuj je mo'ntz, chi oy huimbity ti anajty yhuindicxigy. ⁸ Je ymüjün ymidijc ajcxy etz tüg'óciy huidijaty anajty ajcxy ti ixxy je huintzpi co jabom jabom iñäy limosna yajmucy, chi ajcxy üay'amidoohui miñ xyipy:

—¿Nej ca' jada yjéjity je huintzpi huidibi anajty jabom jabom limosna yajmucpi?

⁹ Nijéjity ajcxy ymüinañ:

—Je' yi'.

E jacjadyii ajcxy ymüinañ:

—Huingbi yi', nigoob jadu'n yquëxigy nej je'.

E je' ymüinañ ci'm:

—Ich jëdu'n huídibi anajty huíntz.

¹⁰ Jadu'n anajty ajcxy tzach'amídooy:

—¿Nej yi mhuiin ti ñay'ahuácxyii?

¹¹ E je' anajty y'adzooy:

—Yi yëydíjc huídibi ajcxy ytíjyp Jesús, yi' mo'ntz yaj'oyíy xyajjaaxích nhuiin, e chí xyñímaayích: “Nícx quejtzpuj ma yi Siloé nñ.” Chí nnícxych, e oy nguejtzpujych, e chí nhuíndícxí'cyích.

¹² Chí ajcxy je' nímáy:

—¿Ma je' je yëydíjc?

Chí je huíntzpi y'adzooy:

—Ca' nnejhuíyích.

Fariseojäy tíy'ajt píjcy nej je huíntzpi anajty ti chögy

¹³ Chí ajcxy yajnícxxy ma fariseojäy ajcxy yhuínduu, je huídibi anajty huíntz yajpatp. ¹⁴ Hue' anajty tüg sábadó xñ (judíojäy ajcxy amayxñ) co Jesús mo'ntz yaj'oyíy, e yajhuíndícxígy je huíntzpi. ¹⁵ Chí je fariseojäy ajcxy jadüg'oc yajtíy nej anajty je jäy ti yhuíndícxígy. Chí je jäy y'adzooy:

—Mo'ntz ti pídágy ma ñch nhuiin, chí ñch ti nguejtzpujy, e cham n'íjxníbích.

¹⁶ Níjéjity fariseojäy ajcxy ymínañ:

—Yi yëydíjc huídibi jada jadu'n ti tuñ, ca' yi' Dios ytíy'ajt míidity, com ca' yi' amay'aty sábadó xñ.

Chí ajcxy jacjadyii y'adzooy:

—¿Nej tíjy jada míjhuínmañ octuñ, pen hue' yi' pocyjäy?

Ca' ajcxy nay'ayuc-huínjihuíyígyxy. ¹⁷ Chí ajcxy jadüg'oc nímáy je jäy huídibi anajty ti y'íjxígy:

—E míich, ¿nej m'ocmínambi? ¿Pín jäy yi tíibi xyajhuíndícxígy?

Chí je jäy y'adzooy:

—Tüg jäy huídibi Dios y'ayuc etz ymic'ajt míid.

¹⁸ Chí je judío íxpícytíjc ajcxy ca' anajty tím míbígáangíxy co je yëydíjc anajty huíntz yajpaady, e co anajty ti yhuíndícxígy, íxti cooní ajcxy ytaj yteedy míjhuoohuí. ¹⁹ Chí ajcxy amídoohuí ytaj yteedy:

—¿Nej je' jada míich ajcxy m'ung huídibi huíntz ma'xung'ajti? ¿Nej jada ti yhuíndícxígy?

²⁰ Chí je' ytaj yteedy ajcxy y'adzooy:

—Ich ajcxy nnejhuíyíb co ñch ajcxy yi' n'ung, e co yma'xung'ajty huíntz.

²¹ Per jadu'n nej cham ti yhuíndícxígy, e pín yi' yhuín ti yajhuácxyii, ca' ñch ajcxy yi' nnejhuíyígyxy. Amídoó míich ajcxy yi' cí'm. Míj'anáçíñ yi', ñígápápy yi' cí'm.

²² Jadu'n ajcxy ytaj yteedy y'adzooy, míid co ajcxy tzachtzígygyxy je judío íxpícytíjc ajcxy. Com je judío íxpícytíjc ajcxy ti anajty ñaygápágyxy co anajty yajpídzímaangíxy ma ajcxy ñaymujctac je jäy ajcxy pínjaty anajty míbíjcp co Jesús anajty yjéjity je Cristo. ²³ Paady ajcxy ytaj yteedy ymínañ:

—Míj'anáçíñ yi', amídoogíx míich ajcxy yi' cí'm.

²⁴ Chí ajcxy y'amídooy mímejtz'oc je yëydíjc huídibi anajty ti y'íjxígy, e chí ajcxy nímáy:

—Cómáy capxpat yi' Dios co ti mdzögy. Ca' mgömay mgápaxpaady je Jesús. Com ñch ajcxy nejhuíyíb co yi' Jesús, tüg yi' pocytumbi. Ca' yi' Dios y'ayuc ytíy'ajt míidity.

²⁵ Chí je jäy y'adzooy:

—Pen tög pocytumbi yi Jesús, ca' nejhuiyich. Huidibi janchtiy nnejhuuybich, co anajty ñch nhuintzity etz co cham huindicxnibich.

²⁶ Chi ajcxy y'amidooy jadüg'oc:

—¿Nej ti xytuñ? ¿Ti ti tuñ co ti xyaj'ijxíci yi mhuiin?

²⁷ Chi je' y'adzooy:

—Ti ajcxy nyajnimaaagyxy, e ca' ajcxy ti m'amido'idaangixy. ¿Nej nañ ixpigaangixy miich ajcxy ma yi'ji?

²⁸ Chi ajcxy je' ogy, nimay ajcxy jadu'n:

—Miich ixpijc ma yi', ñch ajcxy n'ixpijcpich ma Moisés ytiy'ajt. ²⁹ Hich ajcxy nejhuiyb co Dios Moisés migapxy. Janch yi Jesús ca' ñch ajcxy nnejhuuygixy ma yi' chooñ (ma mic'ajt ti paady).

³⁰ Chi je jäy y'adzooy:

—Ooy yi' y'oychigiñity y'oyhuinmañity co miich ajcxy ca' mnejhuuygixy ma yi' chooñ (ma mic'ajt ti paady), e ti ñch yi' xyajhuindicxigiyich. ³¹ Yajxon yajnejhuüy co Dios ca' yi' midoohui pocyjäydijc y'ayuc. Pen oy jäy ñch ajt, e nguyduunim Dios ytiy'ajt, huin'it ajt Dios n'ayuc xymidoohuim. ³² Ni caminaaxi ycaaymidoy, co pinjäy tög huintzpi ti yaj'ijxígy huidibi jadu'n ti yma'xung'aty huintz. ³³ Co ixypy je Jesús ca' jilby chooñ ma Dios, ca' ixypy jaty nej ti tunipy.

³⁴ Huin'it ajcxy y'adzooy:

—Miich jadu'n ti mma'xung'aty pocymiid. Ca' miich huaad ti xyaj'ixpijccixyich.

E chi ajcxy yajpidzimy tibäy'tücci'yi (ma ajcxy ñaymujctac etz ma Dios ytiyc).

Je jäy ajcxy huidibi ca' cöbijccixy Dios ytiy'ajt jadu'n nipaady ajcxy nej jihuüy huintzity

³⁵ Chi Jesús nejhuiy jadu'n co anajty ti yajpidzimy tiba'y tücci'yi ma Dios ytiyc. Co minaaabaati chi nimay:

—¿Nej mmibijcyp mijpidaacyp miich je jäy huidibi tzoon tzajpjoty?

³⁶ Chi je' y'adzooy:

—Huindzin, nimaagyich pin je', jigix nmibicyich.

³⁷ Chi Jesús je' y'adzooy:

—M'ijxyp yi'du'n yam. Yi je' je huidibi xymiidmíydacp.

³⁸ Chi jada' huingoxtinay'ahuüy ma Jesús yhuinduu, je huintzpi huidibi Jesús ti yajtzögy nimay:

—Nmibijcypich, huindzin.

³⁹ Chi jada' Jesús yminañ:

—Hich ti nmiñ ya naaxhuin co n'ixyöyaanich nbayöyaanich jäy ypocy, jigix nyajpocycähuibich pin ca' ypocymidity, etz nyajpocyñihuadzibich pin ypocy miid. Jadu'n nej jihuüy nyajhuindziyich je jäy huidibi iixp, etz jadu'n nej jihuüy nyajhuindicxigiyich yi huintzpi.

⁴⁰ Chi nijëjity fariseojäy huidibi anajty jim ma Jesús ymiyc jadu'n midoy nej Jesús yminañ, chi ajcxy nimay Jesús:

—¿Nej nañ jadu'n miich mdijy ñch ajcxy ca' Dios ytiy'ajt nejhuiyich, jadu'n nej jihuüy ñch ajcxy nhuintzity?

⁴¹ Chi Jesús y'adzooy:

—Co ixypy miich ajcxy janch janch ca' mnejhuuygixy Dios ytiy'ajt, ca' ixypy ti pocy ajcxy mmidity. Per miich ajcxy minam co Dios ytiy'ajt mguyduuniy, e ca' yjanchity. Paady ajcxy mbocymidity. Nipaaty jadu'n nej jihuüy miich ajcxy mhuintzity, e mminaangixy co m'ijxcixy.

10

Jesús yaj'ixpijc jihuimbit ayuc

¹ Chi Jesús jacnımay je judıo y'ixpicıtyıjc, je fariseojäy ajcxy:

—Janch janch ıch mııch ajcxy yam jadu'n nımaaygıxy co je jäy ajcxy huıdıbi ca' ytıgıhuaangıxy ma borregı agaj aguu (ma je cuend'ajtpı ycuend'aty), huıdıbi huıngduum ameech tzach tıgıhuaam ma yborregı agaj, je' je' je meetzpi huıdıbi meedzam je borregı ajcxy ameech. ² Je jäy huıdıbi tıgıhuam ma yborregı agaj aguu, je' je' je borregı cuend'ajtpı. ³ Co je borregı cuend'ajtpı ymıñ ma agaj aguu, chı je agaj aguu cuend'ajtpı yaj'ahuäch je agaj aguu. Chi yborregı ajcxy yöcmıdoyıı, chı je' mıgapxy xııbety xııbety, chı yajpidzimıy ajcxy. ⁴ Co ajcxy yajpidzimdıäy, ac je' yje', chı jayıjp ñıcxıy, e axam ajcxy ypanıcxıyıı, com je' co yöcmıdoyıı. ⁵ Ca' je borregı ajcxy jėbi panıcxıy tüg huıngjäy. Nıgı ajcxy cöguęy, com yöcmıdooyb ajcxy co yhuıngjäyıtıy.

⁶ Jadu'n Jesús mayjäy yaj'ixpijcy jihuimbit'amy, jaygue' ajcxy ca' huaad huınjıhuıy nej anajty Jesús yjaminána'ñ.

Jesús je oybi cuend'ajtpı

⁷ Chi ajcxy Jesús jadüg'oc ñımaayı:

—Janch janch ıch mııch ajcxy yam jadu'n nımaaygıxy, co je Dios nDeedy'ajtpıch. Jėbi jäy ajcxy paady Dios ytıy'ajt ma ıch, e huın'ıtıy tıgıygyıxıpy ma Dios y'ıtı. Jadu'n nıpaady nej jıhuıy ıch je agaj aguu ma borregı ajcxy ytıgıygyıxıy. ⁸ Tüg'ócıy je huındzındıjc huıdıbi ajcxy mıın jayıjp ca'ni ıch anajty nmiñıch, e ymınaangıxy anajty co ajcxy mııd'ajtı Dios ytıy'ajt, jadu'n je' anajty ajcxy nej meetzpi huıdıbi meedzaanıp Dios yjäy. Per je Dios yjäy ca'p je' ajcxy tuuñ cuendi, jadu'n nej je borregı ca' yöcmıdoogıxy je meetzpi. ⁹ Jadu'n nej je borregı ajcxy ytıgıygyıxıy ma agaj aguu, nañ tım jadu'n jäy ajcxy paady Dios ytıy'ajt ma ıch. Je jäy ajcxy huıdıbi ypaatyp Dios ytıy'ajt ma ıch, nañ ypadaamy jugy'ajtıñ huıdıbi ca' ycıxıpy ytıgıygyıpy tüccı'yı. E huıdıbi je' ajcxy yajmayajıtyp ma yı chınaayın, nmóhuıbyıch. Tım jadu'n nej borregı ajcxy jabom jabom ypidzimıgıxy ma agaj aguu nıcxıcxıy mııy'ojcpi, etz yhuımbıjtcıxy tzuu tzuu.

¹⁰ Yı meetzpi ajcxy mımb co ymeedzaangıxy yaj'ögaangıxy yajhuındıgıyaaangıxy. ıch tı nmiñıch, jıgıx mııch ajcxy mbáatcıxıpy jugy'ajtıñ mıjcajee huıdıbi ca' tüccı'yı ycıxıpy ytıgıygyıpy.

¹¹ Chi Jesús yjacmınañ:

—ıch jadu'n nıpaady nej tüg borregı cuend'ajtpı oybi. Je oybi borregı cuend'ajtpı ycııeycyp yı' yjugy'ajt ma yı o'cıñ mııd yborregı ycıxıpi. ¹² Je borregı cuend'ajtpı huıdıbi mujuy tumb, huıdıbi ca' ycıımborregı cuend'aty, nı ycajėjıty je borregı yhuındzın, co ıxy caa ymıñ, chı cöguęy je borregı, e yajqueec-huáčxtäy. ¹³ Com je' co mujuy ytuñ, paady cöguęy je borregı ajcxy, ca' tzocy jıhuıy borregı.

¹⁴ Tım jadu'n nej je oybi borregı cuend'ajtpı ıjxcıajptäy je' yborregı, nañ tım jadu'n ıch n'ıjxcıajptäy je njäyıch (huıdıbi xymıjıpıdaacpıch), etz je' ajcxy xy'ıxy'ajtpıch. ¹⁵ Tım jadu'n nej Dios Teedy xy'ıxy'adyııjıch, nañ tım jadu'n n'ıxy'adyııjıch Dios Teedy. Tım jadu'n je' nej je oybi borregı cuend'ajtpı ycııyegamy yjugy'ajtıñ mııd yborregı ycıxıpi. Nañ tım jadu'n ıch ngııyegamyıch njudy'ajtıñ mııd ıch njäy ajcxy ycıxıpi. ¹⁶ Nmıdıch jadügıpy jäy, ca' ajcxy yudıoıjıyıtıy, je' ajcxy nañ jadu'n nmıdıdaamyıch tügıııcy (mııd je judıo jäy ajcxy huıdıbi xymıjıpıdaacpıch). Tım jadu'n nej je cuend'ajtpı ymııd'ajtpı je' yborregı ajcxy tügıııcy. E je' ajcxy y'amıdooıdaamy ıch n'ayuc, tım jadu'n

nej borregi ajcxy yöcmidoogixy yhuindzin. Ji y'idipy tügmucy jäy (huidibi xymijpidägibich), etz tüg cuend'ajtpi (iich jëdu'n).

¹⁷ Chi Jesús yjacminañ:

—Paady ycixp Dios Teedy ooy xychocyich xyjihuiyich, co ngi'yegaamyich njugy'ajtin ma yi ó'cin (müid jäy ajcxy ypocy ycixpi), etz njugypigipyich jadüg'oc. ¹⁸ Ca' ni pin xypijcibich yi njugy'ajtin, iich yi' ci'm ngi'yegamy. Nmüidich mic'ajt nej ngi'yegipyich njugy'ajtin, etz nañ nmüidich mic'ajt nej njugypigipyich jadüg'oc. Jadu'n nDeedyich ti xy'ane'myich co jadu'n ndunipyich, n'ögibich, njugypigipyich jadüg'oc.

¹⁹ Chi jadüg'oc ajcxy ca' nay'ayuc-huinjihuiyi je judíoäy ajcxy müid Jesús y'ayuc ycixpi. ²⁰ Mayjäy yminañ:

—Ca'oybi yi' ymüid, locjiyb yi', ¿nej co ajt n'amido'ijtim y'ayuc?

²¹ E jacjadyii ajcxy yminaangixy:

—Jadayaabi tiy'ajt etz mic'ajt ca' yajpaady ma tüg jäy huidibi mujcu' ymüid. Ca' jëbi tüg mujcu' jäy huintzpi yaj'ixígy.

May judíoäy ajcxy ca' cöbijcy Jesús

²² Jim Jerusalén anajty xii yjadyii, je' anajty ajcxy ñixüidumyib jimijt Dios ytijc. ²³ E hue' anajty iich tiempo. Chi jim anajty Jesús yhuidity ma Dios ytijc, ma je Salomón ytijc-huinduu. ²⁴ Chi ajcxy je judío y'ixpicytijc nimujcy ooy Jesús, nimay ajcxy:

—¿Ixti mïnaani müich iich ajcxy tiydudägy xyajhuinjihuihuáangixyich pen müich je' je Cristo? Yajhuinjihuiyigich ajcxy tiydudägy.

²⁵ Chi Jesús y'adzooy:

—Ti ajcxy nyajnimaaagixy, e ca' müich ajcxy ti nmüibijccixy. Je mijhuinmañ huidibi ndumybich nmüidich nDeedy ymic'ajt, yi' je' nidiy'ajt'ajtp co iich je' je Cristo. ²⁶ Paady ycixp müich ajcxy ca' nmüibijccixy, com ca' müich ajcxy njäy'adyijich. ²⁷ Iich njäy ajcxy ymijpidaacyb iich n'ayuc, e n'ixcajpic ajcxy je', e je' ajcxy xypanixpich. Tim jadu'n nej je borregi ajcxy yöcmidooy je yhuindzin, jadu'n nej je huindzin ixccapy je' yborregi, e jadu'n nej yi' yborregi ypanixxyii. ²⁸ Iich njäy ajcxy nmooybich yi' jugy'ajtin huidibi ca' tücci'yi' ycixa'ñ ytigoya'ñ. Ca' je' ajcxy yjugy'ajtin ytigoyipy ni camina, e ni pin ca' huaad je' ajcxy xypijcich. Je' ajcxy ci'am nmüididyich. ²⁹ Yi' Dios Teedy huidibi iich njäy ti xymöy, tügpajc yi' ymijity, e ni pin huaad ni ti capijciy huidibi Dios Teedy ymüid ci'am. ³⁰ Dios Teedy etz iich tü'ciy iich ajcxy.

³¹ Chi je judíoäy ajcxy jadüg'oc tzaa conig cädzaangixy anajty ajcxy. ³² Chi Jesús je' ajcxy nimay:

—Ti iich ooy mij oybi nduñich ma müich mhuinduu müid je nDeedyich ymic'ajt ycixpi. ¿Huidi ycixpi müich ajcxy ychaagädzaangixyich?

³³ Chi je judío ixpicytijc ajcxy y'adzooy:

—Ca' nmïnaanim paady iich ajcxy müich ndzaagädzaangixy müid je oybi tüibi mduñ, hue' janchtiy ycixpi ndzaagädzaangixy müid co ooy Dios myajjotmädy. Com müich nañ jäy, e mnayajnaxyii Dios.

³⁴ Huin'it Jesús je' ajcxy nimay:

—Jadu'n ycojaayity ma yi' judíoäy ajcxy ytiy'ajtnecy, ma Dios jadu'n ymina'ñ: "Jadu'n nej dios müich ajcxy." ³⁵ Paady ca' ngapxtigooyich, com Dios ci'm jadu'n minamb ma ñecy, co jadu'n nej Dios je' ajcxy huidibi Dios y'ayuc cöbijcip (e ca' huaad pinjäy ymina'ñ co Dios ñecy ca' yjanchity). ³⁶ Dios ti xyajñibicyich jada tung, e xyquejxyich ya naaxhuiñ. ¿Nej co mïnaangixy

co ñich ngapxtigooyich co nmína'ñich co Dios xy'ung'adyiijich? ³⁷ Pen ca' nduñich nDeedyich ytung, ca' ñich ajcxy huaad n'ayuc xymibijcich. ³⁸ E pen ndumybich nDeedyich ytung, oy ixypy miich ajcxy ca' xymijpidaacich n'ayuc, jébi ixypy mijpidägy ajcxy je mijhuinma'ñi huídibi ndumybich. E chi mnejhuíhuipy miich ajcxy, etz mmijpidägipy miich ajcxy co je Dios Teedy jajpaady ma ñich, e ñich nyajpaadyich ma Dios Teedy.

³⁹ Ooy ajcxy jamadzaañ Jesús, e chi Jesús oy choni, ca' ajcxy majch.

⁴⁰ Chi Jesús ñicxy jadüg'oc jim Jordán mij ñi ñinaxy ma Juan yjáy yajñibejty oga'n'aty, chi jim yhui'miyy. ⁴¹ Mayjáy Jesús ooy ñimujci, e ymínañ ajcxy:

—Je Juan el Bautista ca' jadu'n ooy mijhuinma'ñ tuuñ, per tüg'ócay yi tiy'ajt jadu'n nej nimiydactay jada Jesús, janch tiy'ajt je'.

⁴² E janch mayjáy ooy mibijcy Jesús jim ma je jimbi it.

11

Co Lázaro y'o'cy

¹ Jim Betania anajty tüg pa'mjäy, hue' anajty yxii Lázaro. Hue' je' anajty chinäy ma María etz Marta ycogajpity. ² María je' anajty huídibi je Huindzin Jesús anajty ti yajjaxy je ujtzpíjyñi huídibi ooy oy yxuugy, etz po'ti Jesús ytecy miid ycóhuay. Hue' je' anajty María etz Marta ymidüguëx Lázaro huídibi anajty pijcip. ³ Chi Lázaro ymidüguëx ajcxy ycapxyquejxy ma je Huindzin Jesús anajty jajpaady, e chi oy yajñimäyii:

—Je mmigüg huídibi ooy mdzocy, pijcip je'.

⁴ Co Jesús jadu'n midooy, chi ymínañ:

—Je' ypa'm ca' yaj'öga'ñyii tücci'yi. Je' ypa'm hue' yajñiguëxigamy Dios ymic'ajt, jaydeb Dios ycómaybidzimipy, e nañ ñich nyajcómajpíyich, ñich je jäy huídibi tzoon tzajpjoty.

⁵ Jesús ooy anajty tzocy jihuíy je Marta, María etz je Lázaro. ⁶ Oy jadu'n Jesús nejhuíy co anajty Lázaro ypigyyi, jamejtz xi jim yjacxñinajxy ma anajty jajpaady. ⁷ Huin'it Jesús ñimay ydiscípulos ajcxy:

—Tzoc jamim jim Judea naaxjot.

⁸ Chi je' ydiscípulos ajcxy y'adzooy:

—Huindzin, namni jäy ajcxy jim Judea ti xy'ocjaccögädzambi, e zmnicxaanip jim jadüg'oci?

⁹ Chi Jesús y'adzooy:

—Majmetz hora tüg xiimbi miidity. Pinjäy miid Dios ytiy'ajt, ca' ayo'n pada'ñ, tim jadu'n nej jihuíy yhuidity xim, e ca' ycónepy, com co xi codicxy jada naaxhuiñybi. ¹⁰ Pinjäy ca' miidity Dios ytiy'ajt, ca' je' nejhuíy ti anajty jadaanip, chi ayo'n pada'ñ, tim jadu'n nej jäy ycoodzhuidity, e chi ycónepy miid co ca' anajty icy ma ñicxy.

¹¹ Huin'it Jesús je' ajcxy ñimay:

—Ñich ajt nmigüg Lázaro maab je', nicxy nyajpidäga'ñich.

¹² Chi je' ydiscípulos ajcxy y'adzooy:

—Huindzin, pen maab, huaadjihuíhuip yí', ci'm yí' ymäyhuijipy.

¹³ Je' Jesús anajty ñimiydaacyp je o'cin, e je' ajcxy tijy Jesús ñimiydaacyp je máhuí. ¹⁴ Chi Jesús yajmíidmacydacy ajcxy tiydudägy, ymínañ:

—Lázaro ti je' y'o'cy. ¹⁵ E ooy njotcúcidyich miid miich ajcxy ycxpi co anajty ñich ca' njimíty, jigix ajcxy mmibigipy co Dios ymic'ajt nmíididyich. Tzoc ajt jamim jim Betania.

16 Tomás huídibi anajty ajcxy yxigoyaaaxyp Dídimó, huídi ayuc-huimbídzim: cuate, nimay jacjadyii Jesús ydiscípulos ajcxy:

—Tzoc ajt nañ jadu'n jamim, huen jáy jim xyaj'o'cim quipxy müd Jesús.

Jesús yajjugypigipy je jáy ajcxy etz möhuipy ajcxy jugy'ajtin

17 Co ajcxy jim yja'ty, chi ajcxy paty tiy'ajt co mimidaaxxiibi anajty maabi Lázaro ñaaxtigíy. 18 Betania ca' anajty ooy yjiguégyity müd Jerusalén, jéyi jada' anajty müdity tugüg kilómetro. 19 May judíojäy ajcxy anajty ti ymiingixy ma Marta etz María, yajjotcugühua'ñ ajcxy müd je' ymiguëx ycixpi co anajty ti y'ögy. 20 Co nejuhuíy Marta co Jesús anajty jim ymiñ, chi nidzooñ oy jijpcobaadíy. E María jim yhuí'míy ma ytijc, tigoty anajty iñáy. 21 Chi Marta Jesús nimay:

—Huindzin, co ixypy müich ya anajty myajpaady, ca' ixypy ti y'ögy nmiguëxich. 22 Per nejuhuíybich co müich cham jébi Dios mmibijctzoy, e xymöhuip ti mdimdzojcy.

23 Chi Jesús y'adzooy:

—Je nmiguëx jugypigip jadüg'oc.

24 Chi Marta y'adzooy:

—Nnejuhuíybich co yjugypigipy jadüg'oc co anajty naaxhuiñybi ti yhuaad'ajtni co Dios anajty yajtigadza'ñ.

25 Per huin'it Jesús y'adzooy:

—Ich je' nyajjugypigipyich je jáy ajcxy, e nmöhuíybich ajcxy jugy'ajtin. Pinjäy ajcxy xymibijcpich xymijpidaacpich, oy anajty yja'ögy ajcxy, jugy'ajtcixip ajcxy jadüg'oc. 26 E tüg'óciy pinjaty ajcxy xymibijcp xymijpidaacpich juugyñi, ca' y'ögipy ajcxy tüccí'yi. ¿Nej mibijcyp müich jadaají?

27 Chi Marta y'adzooy:

—Nmibijcypich, Huindzin. Nmibijcypich co müich je' je Cristo, Dios y'ung, huídibi anajty miinam ya naaxhuiñ.

Jesús taj may ooy müd Lázaro ycixpi

28 Co Marta jadu'n yminañ, chi jada' oy huoy y'uch María, e yajnimay ameech:

—Je Huindzin chiiby je', e müich jii by xymidmiydägamb.

29 Co María jadu'n midooy, chi ypidígy mic'amy, e chi ñicxy ma Jesús.

30 Ca'ni anajty Jesús yja'ty cajpjoty. Jimni anajty yhuäcxijp ma anajty Marta ti yjijpcobaadíy. 31 Co ajcxy ijxy co María ypidígy, e ypidzimy janch mic'amy, je judíojäy huídibi anajty ajcxy jim ma je tijc müd je', hue' ajcxy tijy María ñicxy yaaxpi ma anajty ti ñaaxtigíy je Lázaro. Chi ajcxy panícxty.

32 Co yjädy María ma je it ma anajty Jesús, co ijspxty, chi ycojxtinaay'ahuíy ma Jesús yhuinduu, chi nimay:

—Huindzin, co ixypy müich anajty m'ocyaajity, ich n'ay ca' je' ixypy y'ögy.

33 Co Jesús ijxy yäxy je María etz je judíojäy ajcxy huídibi anajty yjaymüid'ajtip, chi ooy jihuíy etz ytaj ymaay. 34 Chi jada' Jesús yajtiy:

—¿Ma ajcxy Lázaro ti myajnaaxtigíy?

Chi ajcxy nimay:

—Huindzin, jam ijaxim.

35 Chi Jesús yaaxy. 36 Chi judíojäy ajcxy ñayñimaayí miñ xyipy:

—Ooydim anajty tzocy je Lázaro.

37 Per nijéjity ajcxy yminañ:

—Jadayaabi jāy huidibi huintzjäy yajhuindicxigý, ¿nej ca' jada' ixypý mic'ajt müdity jébi ixypý ti yajtzögy je Lázaro, e ca'ydí ixypý ti y'ögy?

Jesús yajjugypijc Lázaro

³⁸ Chi Jesús jadüg'oc yjotmaybaty, chi ymijhuägy ma je o'cpi jut. Hue' je' anajty tüg ang müd tüg mij tzaa y'agiyducyity je jut aguu. ³⁹ Chi Jesús ymínañ:

—Jigí' ajcxy jada tzaa.

E chi Marta je o'cpi y'uch y'adzooy:

—Huindzin, xuucnip yi', com cham yi' mimidaaxxiibiñ maabi ñaaxtigíy.

⁴⁰ Chi Jesús ymínañ:

—¿Nej cay ti jadu'n nnimäyi? Pen xymibíjicibich yi' n'ayuc, m'ixipy Dios ymic'ajt y'oy'ajt.

⁴¹ Chi ajcxy je tzaa jigíy, chi Jesús cix ypa't'ijxy, ymínañ:

—Dios Teedy, jāygidaaçin nyajnajxypich ma miich, co miich xymidoohui n'ayucich ⁴² Yajxon nnejhuíyich co miich xy'amido'ijtpich jabom jabom, paady ycixp miich jadu'n ti nnimäy müd jadayaabi jāy ajcxy ycixpí ma ich nhuinduu, huen ajcxy mibicy co miich xyquejxich ya naaxhuñ.

⁴³ Co Jesús jadu'n ymínañ, chi jada' mic ycapxy:

—Lázaro, pidzim tibäy.

⁴⁴ Hue' je o'cpi mic'amy ypidzimy ymo'nity yajxon tüg'óciy ñinícx etz huingoyebíyity müd huit, chi Jesús ymínañ:

—Huimbídjttuutcixy, e najtzmadzíyigix, huen yöychooñ.

Judío ípicytíjc ymadzamy anajty Jesús

⁴⁵ May je judíojäy ajcxy ymibíjcy huidibi anajty María yjaymüd'ajtyp, co ajcxy íjxy je huidibi anajty Jesús ti tuñ. ⁴⁶ Per jadyii judíojäy ajcxy oy íxtäy je fariseojäy ajcxy, chi ajcxy yajmüdmíydacy huidibi anajty Jesús ti tuñ. ⁴⁷ Je teedy tungmüdpí ajcxy, etz je fariseojäy ajcxy, chi ajcxy ñayhuoomujctayí je tungmüdpí ajcxy nidüg'óciy, chi ajcxy ymínañ:

—¿Nej ajt Jesús n'octuunim? Yijíibi yéydíjc ooy yi' mijhuinmañ tzachtuuni.

⁴⁸ Pen nnajtz'ixíyím jadu'ñyi, tüg'óciy jāy mibíjctähua'ñ yi'. Chi ajcxy ymiinípy je Romano tungmüdpí huidibi ajt xy'ané'mim, e chi yajhuindigoyipy ich ajt nDios y'it, e nañ yajhuindigoyipy ich ajt ndzinaayin njugy'ajtín.

⁴⁹ Nidügtí ajcxy je jāy, hue' anajty yxií Caifás, hue' anajty míjtungmüd, je' anajty teedy huindzin, je' jadu'n jāy nimayday:

—Miich ajcxy ca' ti mhuinjihuíyigixy. ⁵⁰ Ca' ajcxy mnejhuíy co jac'oy nyaj'o'cim je Jesús tügpajc, huen yi' codínaydáhuip naax cajp, jigix ca'ydí ich ajt nnaax ngajp yhuindiooyim.

⁵¹ Canan yci'mhuinmañ jadu'n ycixpi ymínañ je'. Hue' janchtíy com je' anajty ymíjtungmüdity je huin'it jimíjt ma teedy ajcxy ymiñ, paady Dios huinmañ jadu'n yejcy, co jadu'n najtzcaxiy co Jesús anajty y'öga'ñ müd tüg'óciy ajcxy naax cajp ycixpi. ⁵² E ca' nmínaaním müd jéda'ajty müd je judío ajcxy ñaax ycajp ycixpi, nañ jégix co huoomujctähua'ñ tüg'óciy Dios y'ung huídijaty anajty ajcxy yajpatp xií ya. ⁵³ Huin'it oga'n ajcxy je tungmüdpí yajnigodugíy co yaj'ögaangixy Jesús.

⁵⁴ Jesús ca' anajty ma y'ocyaj'íjxní mayjáyoty ma je judíojäy ajcxy. Chi jada' ñícxý jguem mihuingon ma je títznaax'it, ma anajty tüg cajp xiíjity Efraín. Chi jim yhuí'míy müd ydiscípulos ajcxy.

⁵⁵ Huingooníp anajty je pascua xií huidibi anajty judíojäy ytumyb. Ti anajty may judíojäy ajcxy ñinícxni jim Jerusalén xií'ajtp huidibi anajty

jiguëgyjaty tzomb. Jayijpni ajcxy ñicxy ca' anajty xii paady, co anajty ajcxy ñayyajpocyñihuädza'ñyii. ⁵⁶ Ooy anajty jäy ajcxy ijxtäy Jesús huin'it. Paady anajty chachnayñimáayigixy nidüg nidüg miñ xyipy, co ajcxy ytinay'ahuüiy ma Dios ytijc, jadu'n ajcxy yminañ:

—¿Nej m'ocminaangixy? ¿Minipy jada' Jesús xii'ixpxi, o ca'ji?

⁵⁷ Je teedy ajcxy je' yhuindzin etz fariseojäy ajcxy ti anajty yejccixy cötujcin co huentimpinaty huidibi anajty nejhuüiyb ma je Jesús, huen nigapxy jigix ajcxy madzipy.

12

María yajjaax aceite Jesús ytecy

¹ Jatudujcxiiñi anajty pascuaxii ca' paady, co Jesús ñicxy jim Betania, jim ma anajty Lázaro yajpaady, je huidi anajty ti yajjugypicy jadüg'oc. ² Chi ajcxy jim yaj'oyiyy tüg adzu'ibi. Marta anajty jim yajcaayb yaj'uucp je jäy ajcxy. Lázaro anajty müd Jesús iñäy ma je mesi. ³ Chi María conigy tüg libra ujtzipiyñii huidibi anajty ooy oy yxuugy. Tzou je' anajty ooy, je' müd Jesús ytecy yajjaaxtaayi. Chi jada' müd ycöhuay po'ttiich. Chi ac ujtzipiyñii yxuugitay tigoty. ⁴ Huin'it je Judas Iscariote je Simón ymang huidibi anajty yhuindzin ceyegam ma ymidzip, je' jadu'n yminañ:

⁵ —Jac'oy co ixipy ti ndoocim jada ujtzipiyñii oy migo'pxpeexyti jadüib ixipy ajt ayoobitijc nbubejtím.

⁶ Canan paady Judas jadu'n yminañ co ayoobitijc tzachpa'ayoy. Paady jadu'n yminañ co ajcxy chachmeedza'ñ. Com je' anajty meeñybity cuend'ajtp, e chachpuugomyb huidijaty anajty jüby ajcxy yjapidaacyp. ⁷ Chi Jesús nimay je Judas:

—Ixmatz miich yi', hue' yi' yi María ti yujcpicy jada ujtzipiyñii co yajtuna'ñ co anajty naaxtigiyich. ⁸ Com yi' ayoobitijc ajcxy huinixi yi' miich ajcxy müd'idipy. Janch #ch ca' #ch miich ajcxy müd n'idipy huinixi (ya naaxhuiñ).

Judío ixpicytijc yaj'ögamy anajty Lázaro

⁹ Co ajcxy nejhuüiy may judíojäy ajcxy co anajty Jesús yjimity Betania, chi ajcxy nimiiñ. E canan müd Jesús ycixpi jëda'ajty, je' anajty ajcxy nañ jadu'n chach'ixaamy je Lázaro huidibi anajty ti jugypicy jadüg'oc. ¹⁰ Chi je teedy ajcxy yhuindzindijc ñaygapxi, co yaj'ögaangixy Jesús etz nañ jadu'n je Lázaro, ¹¹ com may judíojäy ajcxy anajty ñayjübijcin, etz tzachmibijccixni Jesús.

Jesús tigiy Jerusalén jadu'n nej tüg rey

¹² Je com jabom je mayjäy huidibi anajty ajcxy ti ymiingixy xii'ajtpi ñejhuüiy ajcxy co Jesús anajty ymina'ñ jim Jerusalén. ¹³ Chi ajcxy cabigy may ytixy y'aacx, chi ajcxy nidzooñ Jesús, chachminaangixy:

—¡Dios ajt xyñihuuanim xyajtzoocim! Mimb tüg jäy huidibi Dios ti yconucxyii. Ymüd yi' Dios ymic'ajt, je' je' je judíojäy yrey.

¹⁴ Co Jesús paty tüg burro mang huidibi ca' ni pin yaj'iñaayñi, chi yajpejty, chi cuyduuñ jadu'n nej anajty jaybety y'ity ma Dios ñeey co jadu'n yminañ:

¹⁵ —Ca' mdzigiy miich ajcxy huidibi tzinaayb ma Sión cajp (Jerusalén). Cha je mrey ymiñ y'iñäy ma tüg burro mang.

¹⁶ Je huidibi anajty ajcxy Jesús discipulo'ajtyp, ca' anajty ajcxy huinjihuüiygixy ixti cooni Jesús paty jadüg'oc yi' y'oy'ajtin ymij'ajtin jüby tzajpjoty. Huin'it ajcxy ajihuüygooti co jadu'n anajty ycojaayity müd Jesús

ycixpi, e nañ co je' anajty Jesús ti yajtunyii ti yajjadyii jadu'n nej jaybety ymiñ.

¹⁷ Je jāy ajcxy huídibi anajty ajcxy ymiñ Jesús, huin'it co Lázaro ypidzimy ma yajnaaxtigiyyi, e yajjagyjici jadüg'oc, chachyejcy anajty ajcxy ty'ajt nañ jadu'n huídibi anajty ajcxy ti ijxcixy. ¹⁸ Nañ paady ycixpi je mayjäy oy nañ jadu'n yjijpobadñiyi, co ajcxy nejhuuy je mijhuinmañ huídibi anajty Jesús ytumyb. ¹⁹ Paady je fariseojäy ajcxy ñayñimaayi miñ xyipy:

—Ix ajcxy, ca' jada' ninej nmimadaacim Jesús, com tüg'óciy yi mayjäy axam ajcxy je' panicxcixy.

Nijëjity anajty griegojäy miñmüydägaangixy Jesús

²⁰ Nijëjity griegojäy nañ ti anajty ñicxcixy jim Jerusalén Dios ojadajtpi xijjoty. ²¹ Chi jada' je griegojäy ajcxy nimijhuägy Felipe, huídibi anajty Betsaida cogajp jim Galilea naaxjot, e chi ajcxy minucxtaacy nimay:

—Migüg, tun may'ajt pubejtcich, Jesús ñich ajcxy nja'ixamy.

²² Chi Felipe oy yajnimay Andrés, chi ajcxy Felipe etz Andrés oy Jesús yajnimay. ²³ Chi Jesús ymiñañ:

—Ti je tiempo paady co ñich je jāy huídibi tzoon tzajpjoty nyajcömayipyich.

²⁴ Janch janch ñich miich ajcxy jadu'n nimaaygixy co jāy nıby tüg mocpajc, e co je mocpajc ymuxy, huin'it yhuindigoy, e chi ytiim'ajtni may'amy. Pen ca' ni pin nıby jada mocpajc, ca' ytiim'adañ. Jadu'n ñich nıpaady nej je mocpajc. Copicy n'ögibyich, huin'it mayjäy jugy'ajtn paadaangixy huídibi ca' ycixipy ytigoyipy ni mina. ²⁵ Je jāy huídibi ooy niği nixondağy yi chinaayin ya naaxhuñ, yajtigoyamy je' yjugy'ajtn tücci'yi. Per je pin ca'p ooy nijot'aty je chinaayin ya naaxhuñ, e nixondaaci ooy niği Dios y'ayuc, je' y'alma nüdzoocin paadip ma Dios. ²⁶ Pen ji jāy huídibi naybidaacip ma ñich, copicy ajcxy xypanicxibich. Ma ñich nyajpaady, nañ jim yi' yajpaadipy nañ jadu'n. Yi jāy pinjaty naybidaacip ma ñich, Dios Teedy yi' cömayiib.

Jesús capxpıdzımy co y'ögañ

²⁷ Chi Jesús yjacmiñañ:

—Tájñibich mayñibich cham jotjoty huinmañjoty. ¿Nej nnimähuibich nDeedyich? ¿Nihuaangich ma jada ayo'n tzaachypi huídibi ti yhuaad'ajtni? Ca' yjadu'nity. Com paady ycixp ti nmiñich ma jada xii tiempo, jëbi ayo'n nyajnajxich miid jāy ajcxy ypocy ycixpi. ²⁸ Dios Teedy tun huídibi copicy, jëbi jāy ajcxy ijxcixy miich mmic'ajt etz miich m'oy'ajt.

Huin'it je jāy ajcxy huídibi anajty jim ma Jesús yajpaady midooy tüg ayuc choñ tzajpjoty ymiñañ:

—Ti nduñich mijhuinmañ, e ti jāy icy ñich mmic'ajt n'oy'ajt. E nañ jadüg'oc ndunipyich mijhuinmañ, jigix jāy ajcxy ijxcixipy jadüg'oc ñich mmic'ajt ñich n'oy'ajt (jadu'n Dios y'adzooy y'ung Jesús).

²⁹ Je mayjäy huídibi anajty ajcxy jim, je tiibi anajty ajcxy midoogixy je ayuc huídibi tzoon tzajpjoty, ymiñañ ajcxy:

—Enee yi' ti yjidity.

Jacjadyii ajcxy ymiñañ:

—Tüg ángel ti ymigapxyii.

³⁰ Chi Jesús nimay je mayjäy ajcxy:

—Ca' nmınaanım miid ñich ycixpi jadu'n ti yajmidoy jadyaabi ayuc huídibi ti choon tzajpjoty. ³¹ Jadachambi jada' Dios yajpocycähuañ naaxhuñjyāy, e nañ ypiğanipy je mujcu' ymic'ajt huídibi ane'mb naaxhuñjyāy ajcxy. ³² Co

ich anajty jäy ti xyajcruudzpetyich, e co ich anajty ti njugypicyich jadügtecy, e co ich anajty ti nhuimbityich tzajpjoty, huin'it tüg'óciy jäy ajcxy huidibi xymibijcpich, nyajpa'ttigiñhuidibich jii by tzajpjoty ma nyajpaadyich.

³³ Paady jadu'n Jesús ymíañ, jébi huaad tüg'óciy jäy ajcxy huinjihuñhuip ti o'cin anajty ypadamy. ³⁴ Chi je mayjäy ajcxy ymíañ:

—Ma Dios ñecy jii by jadu'n ymiñ jaybety co je Cristo huinixi je' y'idañ. E ¿nej müich co cham jadu'n míñañ co copicy co yi jäy huidibi tzoon tzajpjoty, huimbidad jadügtecy tzajpjoty? ¿Pin jédu'n mdijyp huidibi tzomb tzajpjoty?

³⁵ Chi Jesús nimay je jäy ajcxy:

—Jahueeni xii tiempo njac'idañich müid müich ajcxy. Jadu'n ich ndiy'ajt nej tüg jiiñ huidibi codiñcxp jäy co ytüöy. Cuychinäy ich ndiy'ajt, co tzojc nhuimbidañich tzajpjoty, e müich ajcxy mhuimañ jadu'n nej jäy huidibi ca' jiiñ müidity. Je jäy ajcxy huidibi ca' cuychinaaygixy ich ndiy'ajt, ca' ajcxy nejhuñygixy ma ñicxcixy. Jadu'n ajcxy nej jihuñy yöygixy coodz, e ca' ijxcixy ma ñicxcixy. ³⁶ Com occhaani ich ma müich ajcxy, nyaj'ixpijcy ich müich ajcxy Dios ytiy'ajt. Pen xymibijccixpich, m'ijtcixip ixpicy ma Dios ytiy'ajtin.

Co Jesús jadu'n je jäy ajcxy nimayday, huin'it Jesús je' ajcxy puhua'ctuutni, chi ñicxni, e ca' ma y'ocjac'ixin.

Je judío jäy ca' mibigañ Jesús

³⁷ Ooy anajty canaag mijhuinmañ Jesús ti jatuuñ ma jäy ajcxy yhuinduu, e ca' anajty ajcxy ni ti tim mibijccixy. ³⁸ Huidibi Jesús ytun ycapx, jii by anajty jadu'n ycojayity ma je Dios y'ayuc necy, je Isaías ñecy, co Isaías jadu'n ymíañ: Huindzin, ca' ni pin ajt n'ayuc ndiy'ajt ti xymibijcim. Ca' ni pin huidibi huinjihuñyib je Huindzin Dios ymic'ajt.

³⁹ Ca' anajty ajcxy huaad ymibijccixy, com nañ ti anajty jadu'n Isaías jay ma jadu'n ymíañ:

⁴⁰ Jadu'n yi' ajcxy nej jihuñy Dios ti yajhuindzñygixy, e ti yajjotjunñygixy, jigix ca' y'ijxcixipy müid yhuin, e müid yjot yhuinmañ ca' huinjihuñyigixyipy, ni ycajothuimbijtcixipy nej jébi Cristo yajtzóocigixy.

⁴¹ Paady jadu'n Isaías ymíañ je' co anajty ti ijxi Cristo y'oy'ajt, e chi cojay nej anajty ti ixy.

⁴² Ca' nidüg'óciy judío ixpicytije mijotmädy anajty Jesús. Jim anajty nijjity huindzindijc huidibi mibijcp Jesús. Per müid je fariseojäy ycxpi co chachjotma'cixy, paady anajty ajcxy ca' capxpizimigixy co mijpidaaccixy Jesús. Je' co chigiñygixy co jim yajpizimñyib ajcxy tücci'yi ma Dios ytiyc, etz ma yi judío ñaymujctac. ⁴³ Jacñgi anajty tzojccixy co huen jäy cömáayigixy, ca'ydi co ajcxy Dios ycömáayyib.

Dios yajpocycähuip je mayjäy müid Jesús y'ayuc

⁴⁴ Chi jada' Jesús ymíañ mic:

—Je jäy ajcxy huidibi xymibijcpich xymijpidaacpich, caminaanim ich naydüg xymibijcpich xymijpidaacpich, nañ ymibijcyp ymijpidacy ajcxy je tübi ich ya naaxhuñ xyquexyich. ⁴⁵ E je jäy huidibi xy'ijxpich, tim jadu'n nipaady nej jihuñy ti ixy je huidibi ti xyquexyich. ⁴⁶ Ich ti nmimiiñich ya naaxhuñ Dios ytiy'ajt, jadu'n ich nipaady nej jihuñy tüg jiiñ huidibi codiñcx je jäy ajcxy. Je jäy ajcxy huidibi xymibijcpich ca' ajcxy yhuimipy jibictuuby, jadu'n nej jihuñy ca' ajcxy chinaaygixy agootztuuby. ⁴⁷ Je jäy ajcxy huidibi midoob ich n'ayuc, e ca' cuydungixy, ca'p je' ich je' ypocy ajcxy

n'ixyöyaani nbayöyaani cham. Ca'p ñich ti nmiñich ya naaxhuiñ mïid co jäy ajcxy ndzaachytunipyich mïid ypocy ycixpi. Paady ñich ti nmiñich ya naaxhuiñ co nyajpocyñhuädza'ñich yi jäy ajcxy. ⁴⁸ Je jäy ajcxy huïdibi xycapxhuimbjítbich n'ayuc, e ca' xycöbiga'ñich, ymïid ajcxy huïdibi yajpocycähuiib. Yi ayuc huïdibi ti ngapxyich, yi' yajpocycähuiib ajcxy co anajty naaxhuiñybi ti yhuaad'ajtñi co Dios anajty yajtigatzaani. ⁴⁹ Com ñich ca' ngi'm'ayuc ngapxhuäcxyich. Je' je' Dios Teedy y'ayuc, je huïdibi ti xyquexyich, yi' ngapxhuäcxbich y'ayuc. Je huïdibi ti xyquexyich ya naaxhuiñ ti xyñajtzcapxyiyich yi' y'ayuc, jada ayuc ngapxhuäcxyipich nyajñimaaygixyp. ⁵⁰ E nejhuñyibich co Dios y'ayuc ytñ'ajt ymimimyb yi' tzinaayin jugy'ajtñ huïdibi ca' tücci'yi ycixy ytigoy. Paady ycix je ayuc huïdibi ajcxy nyajmïidmydacyp, jadu'n nyajmïidmydaaccixy nej Dios Teedy ti xyajñajtz'ane'miyich.

13

Jesús ypuji ydiscípulos ajcxy ytecy

¹ Ca'ni anajty xii paady, pascuaxii anajty ajcxy tijy. Chi Jesús ñejhuñyib co anajty yxii ytiempo yhuaad'ajtñi mina chonaani ya naaxhuiñ yhuimbidaani ma Dios Teedy. E Jesús ooy anajty tzocy jihuñy ymīgügtjic ajcxy huïdibi ya naaxhuiñ anajty ajcxy huñ'ma'ñ. Jadu'n tzocy jihuñy huñixii.

² Chi jada' Jesús etz ymīgügtjic ytīgūy ajcxy adzoo'ajtp (je pascuaxii adzu'ajtñ). Ti anajty je mujcu' huñma'ñmōy Judas Iscariote, Simón ymang, co anajty Jesús cīyega'ñ ma ymidzip ajcxy. ³ Ñejhuñyib anajty Jesús co je Dios Teedy ti yajcīdīgīyīi tūg'ōcīy ymīc'ajt, e Jesús nañ ñejhuñyib anajty co je' ti chooñ ma Dios y'it, e nañ jūiby anajty jadūg'oc yhuimbida'ñ. ⁴ Chi ypidīgīy ma mesi, chi je yoñybi yhuīt ñayajñjenduutti. Chi huñjtzīgīy tūg huīt huïdibi mīid ñaymextītīzī naybōttītīzī, ñayajmījxojtzpejti yhuñdīy. ⁵ Co jadu'n ñayñī'ixīyī, chī pidacy nī ma tūg cībujī'ñyoc. Chi nihuāgīyī ydiscípulos ajcxy ytecy. Chi yajtzondacy tecypujī tūg tūg, e mextīch pōttīch mīid je huīt huïdibi anajty ti ñayajhuñdīyīyī.

⁶ Co nihuāgīyī Simón Pedro ytecy, chi Pedro yminañ:

—Huñdzin, ca' huaad miich ndecy xypujich.

⁷ Chi Jesús y'adzooy:

—Huïdibi ñich ndumyb ca' yi' miich ajcxy mhuñjihuñyigixy jadachambi, jaccomjey miich ajcxy mhuñjihuñyipy.

⁸ Chi Pedro y'adzooy:

—Miich ca' huaad ñich ndecy xypujich ni caminaabi.

Chi Jesús y'adzohuimbijty:

—Pen ca' mdecy nbuji, ca' ñich miich jēbi njāy'adyī.

⁹ E huñ'it Pedro ñimay Jesús:

—Huñdzin, ca' ñich jēda'ajty ndecy xypūjibich, hue' janchtiy tūg'ōcīy ngījich etz ngohuajcīch.

¹⁰ Chi Jesús ñimay Pedro:

—Com tiibi mjot mhuñma'ñ yajhuäch, ca' yi' ocjactzojcnī yajhuädzīpy mjot mhuñma'ñ jadūgtēcy. Tim jadu'n nej jihuñy naamni chly, e cham ca' tzojcnī yajtzlhuñyibich jadūgtēcy. Jēda'ajty mdecy nbujich cham. Miich ajcxy huädz mjot mhuñma'ñ ajcxy mñmīdīñ, oy ca' miich ajcxy nidūg'ōcīy.

¹¹ Com Jesús ñejhuñyib anajty pinjāy cīyegaanip ma ymidzip, e paady jadu'n yminañ:

—Ca' ni tūg'ōcīy miich ajcxy mjot mhuñma'ñ yhuädzīty.

¹² Chi jada' co yajtecypujtay, chi jada' yoñyhuit yajtigüiy jadüg'oc. Y'ixtacy ma mesi, e chi jada' ñimay ajcxy:

—¿Nej mhuinjihuiyb ajcxy ti ñich ti nduñich m'id miich ajcxy? ¹³ Miich ajcxy jadu'n minamb co ñich miich ajcxy myaj'ixpijcy, etz ñich miich xyhuindzin'ajtpich. E tiydudägy miich ajcxy myaj'ixpijcy etz xyhuindzin'ajtpich, e ti ñich miich ajcxy nyajtecypujy, nañ jadu'n miich ajcxy myajtecypujyib miñ xyipy. ¹⁵ ñich miich ajcxy ti nmöy tüg iixpejt, jigix ajcxy jadu'n mdunipy jadu'n nej ti nduñich, e huin'it ca' amij agix nayjihuihuiyb ajcxy. ¹⁶ Janch janch ñich miich ajcxy yam jadu'n ñimäy co je huindzin jac mij je' ca'ydi yi' ytumbi. E nañ je' huidibi yajquejxyöyb jac mij je' ca'ydi huidibi quejxyöyb. ¹⁷ Co ajcxy tiy'ajt mnejhuihuiy, chi jotcuyc ajcxy m'idipy, pen mbadumyib ajcxy jadu'n nej nduñich.

¹⁸ Ca' nm'ina'ñich co nidüg'óciy miich ajcxy mbocym'idity. Ti ñich yi' nnejhuüy pin ti nhuin'ixyich. Ti nhuin'ixyich tüg huidibi pocym'id, jigix cuyduunip nej anajty yjaybetyity ma Dios ñecy ma je Cristo jadu'n ymina'ñ: "Yi' huidibi caymujcp m'id ñich, ti ñich yi' xymib'idigy." ¹⁹ Ti ñich yam miich ajcxy jayjip nyajñimaagyixy, jigix co anajty jadu'n ytunyii yjadyii, mmib'igipy ajcxy co ñich jedu'n je Cristo. ²⁰ Janch janch yam ajcxy jadu'n ñimaaagyixy co je jay ajcxy huidibi cöbijcp je huidibi anajty nguejxypich, tim jadu'n nipaady jadu'n nej ñich anajty xycöbijcycich. E je jay ajcxy huidibi xycöbijcpich, je' ajcxy anajty ycöbijcyp je' huidibi xyquejxich ya naaxhuiñ.

Jesús ñimay ym'igügtjc co je Judas anajty cüyegaanip ma ymidzip

²¹ Co jadu'n Jesús ymina'ñ, chi tajnip mayñip anajty ooy jotjoty huinma'ñjoty, chi capxypidzimy:

—Janch janch ñich miich ajcxy yam jadu'n ñimäy co nidügti miich ajcxy xycüyega'ñich ma nm'idzipich.

²² Chi Jesús ydiscípulos ajcxy ñayhuindicxpejttaayi nidüg nidüg. Ca' anajty ajcxy nejhuüy pin anajty jedu'n Jesús ytijyp. ²³ Nidügti je' ajcxy huidibi anajty Jesús ooy m'id ñaychogyii ññay anajty ma mesi tim huingon ma Jesús yhuinduu. ²⁴ Chi Simón Pedro yci' yaj'ixxy yajhuinjihuiy co huen yaj'amidooy Jesús pin anajty jadu'n ytijyp. ²⁵ Chi je discípulos ajcxy huidibi anajty ññayb ma Jesús yhuinduu ñimay yhuindzin:

—¿Pin jadu'n mdiijyp?

²⁶ Chi Jesús y'adzooy:

—Yi' je' pin anajty ñich nmooybich yi' tzajcaagy huidibi anajty nyajx-oocpyich ma je ügy.

Chi yaxxoogy tüg pedasi tzajcaagy, chi moy je Judas, je Simón Iscariote ymang. ²⁷ Tim huin'ityi co Judas je tzajcaagy cöbijcy, chi je mujcu' ytigüiy ma je' y'ay yjot. Chi Jesús ñimay Judas:

—Yi' huidibi mdunamyb, tungo jadu'n mic'amy.

²⁸ Huidijaty anajty ajcxy jim caayb, ni pin cahuinjihuiy je ayuc huidibi Jesús yajñimay Judas, nej je ayuc yhuimb'idzimy. ²⁹ Com je Judas anajty m'id je meeñybijty, paady ajcxy nijëjity huinjihuiy co anajty tije ñimäyii:

—Nixc juy yi' huidibi ajt nyajmayajtim yi' xiigixpi.

Jacjadyii ajcxy anajty tije ñimäyii:

—Mo' tigatii ayoobitijc. ³⁰ Tim huin'ityi co je tzajcaagy cayday, chi ypidzimy Judas tiba'y, e ti anajty ycoodziyñi.

Jesús ñajtz'ane'miy jemybi cötujcin

³¹ Co Judas ypidzimy, chi Jesús ymínañ:

—Cham je jāy ajcxy ixa'ñ ñich nmic'ajt ñich n'oy'ajt, ñich je jāy huidibi tzoon tzajpjoty. Etz nañ ma ñich je jāy ajcxy ixa'ñ Dios ymic'ajt Dios y'oy'ajt. ³² Jadu'n nej je jāy ajcxy ti ijxcixy Dios ymic'ajt ma ñich, nañ tim jadu'n Dios yajniguëxigipy yi nmic'ajtich n'oy'ajtich tim mic'amy. ³³ Migügtijc huidibi ooy ndzocy njihuüyich, ca' n'ochuäcxibaanich jecy müd miich ajcxy. Xy'ixtähuüwich miich ajcxy. Jadu'n nej ti nnimäaygixyich yi jacjadyi judiojāy ajcxy, nañ jadu'n ñich miich ajcxy yam njacnimaaygixy co ma nnicxa'ñich, ca' huaad miich ajcxy jiihy mnicxcixy. ³⁴ Cham ajcxy nmöhua'ñ tüg ané'min huinjemybi. Cham miich ajcxy nyajnajtz'ane'mihuaangixy jadüg'oc jadaayaabi ti'y'ajt: Naychójcigix nayjihuiyigix ajcxy nidüg nidüg, tim jadu'n nej ñich miich ajcxy ti ndzocy ti njihuüy. Naychójcigix nayjihuiyigix aguipxyi. ³⁵ Müd jada ycixpi ñejhuühipy tüg'ócixy jāy co ñich miich ajcxy ti nyaj'ixpijccixy co ajcxy nidüg nidüg mnaychogiyb mnayjihuihuüyb.

Jesús ñimay ymüggtijc co je Pedro anajty coyüdzanip

³⁶ Chi Pedro ñimay:

—Huindzin, ¿ma miich mnicxa'ñ?

Huin'it Jesús y'adzooy:

—Ma ñich mnicxa'ñich miich ca' huaad xypaníxcyich. Jac'axam xypaníxcyich.

³⁷ Chi Pedro ymínañ:

—E ¿nej co ca' huaad jébi ñich miich nbaníxcy? com ñich ngíyegamyich njugy'ajtin ma yi o'cin müd miich ycixpi.

³⁸ Chi jada' Jesús y'adzooy:

—¿Nej janch co mgíyega'ñ yi njugy'ajtin ma yi o'cin müd ñich ycixpi? Janch janch ñich miich ajcxy yam jadu'n ñimäy, co ni ca'ni anajty jabom tugüg'oc tzey yaaxígy, co ñich miich anajty tugüg'oc ti xycoyüchich.

14

Pinjaty mibijcp Jesús nicxip ma Dios Teedy yajpaady

¹ Chi Jesús yjacmínañ:

—Ca' ajcxy jotmay mjihuüy ma m'aa mjot müd jada ayuc. Mibic ajcxy Dios etz ñich nañ jadu'n mibijccich. ² Jiihy ma ñich nDeedy chinäy, jiihy mjtigiydac. Co ixypy ca' yjadu'nity, ca' ixypy ti nnimaaygixy co nnicxyich ma nDeedyich n'ocni'ixiy tzinaaydac müd miich ajcxy ycixpi. ³ E co ñich anajty ti nba'ttigiyich, e ti ni'ixiyich tzinaaydac jayijp müd miich ajcxy ycixpi, huin'it ajcxy nihuimbidipy, jébi ñich ajt naydügmujcim, jigix ma anajty n'ityich, nañ jiihy miich ajcxy m'idipy. ⁴ Miich ajcxy mnejhuüyb nej jébi ajcxy mjádp ma nnicxyich oyduuby.

⁵ Chi Tomás ymínañ:

—Huindzin, ca' ñich ajcxy nejhuüygixy ma miich mnicxa'ñ, e ca' ñich ajcxy nnejhuüygixy nej jébi njá'tcixyich jiihy.

⁶ Chi Jesús y'adzooy:

—Jadu'n nej ti ndzinäyich jada je' je ijxpejt nej Dios tzocy co miich ajcxy mdzinähuipy. Nyejpcyich je ti'y'ajt huidibi jébi huaad mguychinaaygixy. Co jadu'n mguydundáygixipy ñich ndiy'ajt, chí mjá'tcixipy ma Dios. Nyejpcyich je jugy'ajtin huidibi ca' tücci'yi ycixy ytigoy. Ca' ni pinjäy yjadipy ma Dios Teedy, peni ca' cuydundäy ñich ndiy'ajt. ⁷ Jadachambi etz nej xii tiempo

yjacnicxa'n miich ajcxy m'ixy'ajty Dios Teedy. Pen xy'ixy'ajtpich miich ajcxy, nañ m'ixy'ajtyp miich ajcxy Dios Teedy.

⁸ Chi Felipe y'adzoy:

—Huindzin, ñich ajcxy yi Dios Teedy yaj'ijxcich cham cham, e müid tim yi'yi jotcujc'adipyich ajcxy.

⁹ Paady Jesús nımay je Felipe:

—Cham xii jımiyt ñicxni maabi ñich nja'ityich müid miich ajcxy, e ¿ca'ni miich xytımy'ijxhui'myich Felipe? Yi jäy ajcxy tıibi xy'ijxcixyich, nañ y'ijxyp ajcxy yi' Dios Teedy. E chi jada', ¿nej miich co jadu'n xyñimäyich: “Yaj'ijxcich je Dios Teedy?” ¹⁰ ¿Nej ca' mmibicy co ñich n'ity ma Dios Teedy, e Dios Teedy ijtp ma ñich? Yi ayuc huıdibi ngapxhuäcxypich, ca' yi' ngi'm'ayuc'adyiijich ngi'mdiy'ajt'adyiijich. Yi mijhuinma'n huıdibi ajcxy m'ijxyp ndumybich, yi Dios Teedy huıdibi ijt ma ñich, yi' jadu'n tumb. ¹¹ Mibijccich ajcxy co ñich n'ityich ma Dios Teedy, e Dios Teedy ijtp ma ñich. Peni ca' mdımmibigaangixy, mibic ajcxy müid je mijhuinma'n ycıxpı huıdibi ti nduñich. ¹² Janch janch ñich miich ajcxy jadu'n nımaaygixy co je jäy ajcxy huıdibi xymibijcpich, nañ ytunıpy ajcxy nañ jadu'n yi mijhuinma'n huıdibi ti nduñich. Jac tim nıgi tunıpy mijhuinma'n, com ñich nnıcxaambich ma Dios Teedy y'ity. ¹³ E tüg'óciy ti miich ajcxy mibijctzooyb ma Dios Teedy müid ñich nxıi, ndunıpyich yi'. Dios Teedy huıdibi nDeedy'ajtypich, je' cömay y'idıp müid huıdibi miich anajty ajcxy mdumyb müid ñich nmic'ajt. ¹⁴ Co myajmibijctzohıpy tijaty, xycapxpáatibich nxıi, huin'it nguydunıpyich huıdibi anajty ti mbijctzooigixy.

Jesús yquexamy Dios yjihui'n ymic'ajt

¹⁵ Peni xychojcpich miich ajcxy, cuydúnigich ajcxy tüg'óciy n'ayuc ndıy'ajt, jadu'n nej anajty ti nnajtz'ane'mıyich. ¹⁶ E co ndzóonıbyich, chi nbijctzóohıbyich yi Dios Teedy jadüg yjaymıid huıdibi ajcxy xyjaymıid'adııb. Dios ajcxy xymóhıpy jadüg jaymıid huıdibi ajcxy xycapxhuijp, je huıdibi ajcxy mjot'amıj'adııyb, e je' xymıid'idıpy ajcxy huınıxıi. ¹⁷ Je huıdibi xycapxhuijp, je' jada'ajty Dios yjihui'n ymic'ajt, je Espıritu Santo. Je' Dios ytıy'ajt ymıid. Dios yjihui'n ymic'ajt ca' adıghıua'n yi naaxhuiñyjäy huıdibi ca' xymibicyich. Com ca' ajcxy ıxy, e nañ ca' ajcxy ıxy'adyıi je Espıritu Santo. Miich ajcxy m'ixy'ajtyp je Espıritu Santo, com je' tzınaayb ma miich ajcxy, e nañ xy'adıghııpy xyjottıghııpy ajcxy. ¹⁸ Ca' miich ajcxy nyajhui'maangixy naydüg jadu'n nej co'ögy'ung. Nnihuımbıdipyich miich ajcxy jadügtecy. ¹⁹ Tim huingónıpy yi xıi tiempo mına yi jacjadyıi naaxhuiñyjäy ajcxy ca' xy'ocjac'ıjxnıbıch. Com jadu'n nej ñich njactzınähua'n, ca' ñich njgy'ajtin ycıxıpy ytigoyıpy tücci'yi. Nañ jadu'n miich ajcxy mjactzınähua'n, ca' mjgy'ajtin ajcxy ycıxıpy ytigoyıpy tücci'yi. ²⁰ Co anajty Dios yjihui'n ymic'ajt ajcxy xy'adıgyıy xyjottıgyıy, huın'it ajcxy mnejhuihuıpy co nyajpaadyich ma nDeedyich, yi Dios Teedy, e miich ajcxy myajpaady ma ñich, e ñich nañ jadu'n yajpatpıch ma miich ajcxy. ²¹ Je jäy ajcxy huıdibi ñich n'ayuc ndıy'ajtıch xycöbıjcp, e cuydungixy, je' je' jadu'n xychojcpıch, e tzogııb je' ñich nDeedy. E ñich nañ jadu'n ndzogıpy njıhuıhuıbyich je' ajcxy, e nnayyajnıguëxıgyıybıch ma je' ajcxy.

²² Je jadügpı Judas, ca' nmınaanim Judas Iscariote, nımay Jesús:

—Huindzin, ¿nej co mnayyajnıguëxıga'nyıi ma ñich ajcxy, e ca' mnayyajnıguëxıga'nyıi ma je jäy ajcxy huıdibi ca' xymıjpidägy?

²³ Chi Jesús je' y'adzooy:

—Yi jäy ajcxy huidibi xychojcpich xyajmij'ajtpich, xycuydúunibich yi' ajcxy ñich n'ayuc ndiy'ajt. E huin'it yi' ajcxy chogiiyb ñich nDeedy. Je nDeedyich etz ñich miinip ñich ajcxy ma je jäy ajcxy huidibi xycuyduunip ñich ndiy'ajt, e tzinaydacpiyipich ma yi' ajcxy yjot yhuinma'ñ. ²⁴ Je jäy ajcxy pinjaty ca' xychocych, nañ ca' ajcxy ñich n'ayuc xycuyduunich. Paady ca' nnayyajnigüëxiga'ñiyijich ma je' ajcxy. Com yi' ayuc huidibich miich ajcxy nyaj'amido'ijtyp, ca' yi' ñich ngi'm'ayuc'adyii. Yi' je' Dios Teedy y'ayuc ytiy'ajt, com yi' ñich ya naaxhuiñ xyquejxich.

²⁵ Jadayaabi ayuc ajcxy cham jadu'n njacyajnimaaayb, jadu'n nej njacyaanigyich ya naaxhuiñ müd miich ajcxy, ma ca'ni ndzooñich. ²⁶ Per je Espiritu Santo huidi miinam, je' ajcxy xycapxhuijip. Dios Teedy yquexamy je Espiritu Santo müd ñich nxi. Je Espiritu Santo xyajnejhuidyähuiipy miich ajcxy tüg'óciy tiy'ajt, e nañ xyaj'ajihuiñib tüg'óciy jadu'n nej ñich miich ajcxy nnimaaygixy.

²⁷ ñich miich ajcxy nyajmihui'my jotcuje'ajtin. Jadu'n nej ñich njotcuje'atyich, nañ nyajjotcuje'adipyich miich ajcxy. Yi' jotcuje'ajtin huidibi nyajmihui'maamyich miich ajcxy, ca' yi' yjadu'nity nej je jotcuje'ajtin huidibi yajpaatp ya naaxhuiñ. Ca' mdajcixy maygixy, nañ ca' mdzigüygixy. ²⁸ Ti ñich miich ajcxy nnimaaygixy jayijp'aty co ndzona'ñich ma miich ajcxy, e nhuimbida'ñich jadüg'oc ma miich ajcxy. Peni xychojcpich miich ajcxy, mxondägipy ajcxy co nñicxa'ñich ma Dios Teedy, com yi' Dios Teedy jac mij yi' ca'ydí ñich. ²⁹ Ti ñich jada tiy'ajt jayijp nimiydägyich ma ca'ni ndzooñich, jigix co anajty je tiempo paady mina jadayaabi ytuniiyb yjadiiyb, huin'it ajcxy mmibigipy ñich n'ayuc.

³⁰ E ca' ñich miich ajcxy mijcajee ooy njacmüdmüydägaangixy yam. Com tim huingónip mina je mujcu' huidibi ane'mb ya naaxhuiñ xyñimina'ñich. Ca' ñich yi' huaad jébi xymimadägyich. ³¹ Per copicy yi' nguydunipyich Dios Teedy y'ayuc nej xyajnajtz'ane'miiyich, jigix je naaxhuiñyäj nejhuihuipy co nyajmij'atyich yi' Dios Teedy. Pidiccix, tzoc'ajt huingduum jamim.

15

Je camuuxy'aadz etz y'aacx

¹ Chi Jesús jacnimay ydiscípulos ajcxy:

—Jadu'n ñich nipaady nej camuuxy'aadz ma tüg muuxy'aadz cam. ñich nDeedy, yi' Dios Teedy, jadu'n yi' nipaady nej je muuxy'aadz cam cuend'ajtpi.

² Tüg'óciy jäy jadu'n ajcxy nipaady nej muuxy'aadz y'aacx. Je jäy ajcxy huidibi ca' cuychinäy ñich ndiy'ajt, yi' Dios Teedy yajcödigoiyib, jadu'n nej je muuxy'aadz cam cuend'ajtpi quejtzpuxy je muuxy'aadz y'aacx huidibi ca' ytiim'aty. Je jäy ajcxy huidibi cuydundaayb ñich ndiy'ajt, Dios yaj'oyiib je' ajcxy yjot yhuinma'ñ, jébi oybi tuñ, jadu'n nej je muuxy'aadz cam cuend'ajtpi huijtz'oyiy je muuxy'aadz y'aacx, jigix jébi nigí ytiim'aty. ³ Yi' ayuc huidibi ti nyajnimaaaygixy, yi' ti yajhuäch yi' jibicpi ma miich ajcxy mjot mhuinma'ñ. ⁴ Mibiiccich ajcxy, panicxigich ajcxy ndiy'ajt huinixü. Co ajcxy jadu'n mdunipy, ñich miich ajcxy müd'idipy huinixü. Jadu'n nej ixypy camuuxy'aadz y'aacx co ca' ytiim'aty co ahuingguje y'ity, e ca' mic'ajt paady ma ycop. Nañ tim jadu'n ytiich ajcxy pen ca' mmic'ajt mbaadipy ma ñich, ca' mmimadääccixipy mguychinääyixipy ñich ndiy'ajt.

⁵ Jadu'n ñich nipaady nej camuuxy'aadz cop, e miich ajcxy jadu'n nipaady nej camuuxy'aadz y'aacx. Je jäy ajcxy huidibi yajpatp ma ñich, e ñich

nyajpaady ma je' ajcxy, je' ajcxy oyhuinma'n tunam mij cajee, tim jadu'n nej camuuxy'aadz huidibi tim'ajt ma'yamy. Co ixypy ich ca' nyajpaady ma miich ajcxy, ca' miich ajcxy huaad ti mdungixy. ⁶ Co jäy ajcxy ndiy'ajt xy'ixmájtzybich, Dios ajcxy yajcödigoyiib, tim jadu'n nej jäy yajcödigoy müd jün yi muuxy'aadz y'aacx huidibi yimbuxiib co ca' ytüm'ajtni. Co je y'aacx ytüdzity, chi ajcxy yajmucy, e pidaaccixy jünjoty, e jadu'n jüby nidooyi jünjoty.

⁷ Co miich ajcxy m'ijtcixy ma ich, e co ich n'ayuc nañ jadu'n ijtp ma miich ajcxy mjot mhuinma'n, jëbi mbijctzoogixy ti ajcxy mdzojcy ma Dios, e nguydunipyich müd miich ajcxy ycixpi. ⁸ Chi je jäy ajcxy comayipy Dios co miich ajcxy mguydunipy ich ndiy'ajt tydudägy, tim jadu'n nej camuuxy'aadz y'aacx ytüm'aty may'amy. Co je jäy ajcxy ixipy nej tudägy mguydungixy ich ndiy'ajt, chi je jäy ajcxy tydudägy nejhuuipy co ti nañ'ixpicyich miich ajcxy. ⁹ Jadu'n nej Dios Teedy xychocyich xyjihuiyich, nañ tim jadu'n ich miich ajcxy ti ndzocy ti njihuiyich. Ndzogipy njihuihuibyich miich ajcxy huinixi co ca' ajcxy xy'ixmájtzybyich ndiy'ajtich. ¹⁰ Co mguydudähuiipy ajcxy jadu'n nej nyajnajtz'ane'müygixy, ndzogyich njihuihuibyich miich ajcxy huinixi. Tim jadu'n nej nguydunich yi huidibi Dios Teedy xyajnajtz'ane'müybich, e yi'xychojpcich xyjihuiybich huinixi.

¹¹ Cham jadaaabi ayuc nyajnajtz'ane'müygixy, jigix jotcuje m'ijtcixy. Jadu'n nej jotcuje ti n'ityich, e nañ jadu'n miich ajcxy mjotcuje'adipy anaxy.

¹² Jadaabi ayuc ich miich ajcxy nyajnajtz'ane'müybich co naychöjcgix nayjihuiyigix nidüg nidüg, tim jadu'n nej ich miich ajcxy ndzocy njihuiy.

¹³ Je ty'ajt jac'oybi co migügtjic ajcxy naychogüyb nayjihuihuiby, co tüg jäy cüyegipy yjugy'ajtn müd ymügügtjic ycixpi. ¹⁴ Ich miich ajcxy migüg'ajty, pen mguydumyb nej ajcxy nyajnajtz'ane'müygixy. ¹⁵ Jadu'n nej xi tiempo yjacnixa'n, ca' miich ajcxy n'ocnaydijnip ich ndumbi. Com je tumbi ca' huinjihuüy huidibi yhuindzin ytumyb. Hue' miich ajcxy nyajnaxyich nmügügtjicich, com tüg'öciy ty'ajt tiibi nmidooyich ma ich nDeedy, yi Dios Teedy, ti ich miich ajcxy nnimaaygixy. ¹⁶ Ca' nminaanim ich miich ajcxy ti xyhuinixy. Ich miich janchty ajcxy ti nhuinixy. E ti ich miich ajcxy nyajnibcy co nixy mgapxhuäcxixy ich n'ayuc. E nañ mayjäy mijpidägipy je ayuc huidibi miich ajcxy mgapxhuäcxipy. E nañ ich n'ayuc, huidibi miich ajcxy mgapxhuäcxipy, y'idipy ma je jäy ajcxy yjot yhuinma'n huinixi. Paady ycix tüg'öciy tijaty miich ajcxy mbijctzooyb ma Dios Teedy müd ich nxi, yi' ajcxy xymöhuipy. ¹⁷ Jada ayuc ajcxy yam nyajnajtz'ane'müyb co ajcxy mnaychogüyb mnayjihuihuiby miñ xyipy.

Je maybi naaxhuiñjäy ca' ajcxy ixaangixy Jesús etz cham je' yjäy

¹⁸ Co je may naaxhuiñjäy ca' xy'ixaangixy miich ajcxy, ca' ajcxy ooy mhuinmayipy, com mnejhuuiby ajcxy co ich nañ jadu'n jac jayjip ca' yi' ajcxy ti xy'ixaangixyich. ¹⁹ Co ixypy ytügy miich ajcxy m'ayuc mdiy'ajt müd je jacjadyi naaxhuiñjäy y'ayuc ytüy'ajt, huin'it ixypy ajcxy xychojccixy xyjihuiyigixy, com tü'ciy miich ajcxy mhuinma'n ixypy müd yi' ajcxy yhuinma'n. Janch com co ca' ytügy miich ajcxy m'ayuc mdiy'ajt müd je jacjadyi naaxhuiñjäy y'ayuc ytüy'ajt, paady je jacjadyi naaxhuiñjäy ca' ajcxy xy'ixa'nip. Com ich miich ajcxy ti nyajjiphuijztüdy, jadu'n nej yi' jacjadyi naaxhuiñjäy ajcxy chinaaygixy yjugy'ajtcixy. ²⁰ M'ajihuihuib ajcxy jadu'n nej ti nnimaaygixy co ich miich ajcxy xyhuindzin'ajtpich, paady jac mij ich ca'ydi miich ajcxy. Jadu'n nej naaxhuiñjäy ajcxy ti xy'ixhuidityich ti xypahuidityich, nañ jadu'n miich ajcxy yi' xy'ixhuidida'n xypahuidida'n.

Nañ may je jāy huídibi ca' ti xycapxymidooyich, nañ jadu'n may je jāy huídibi miich ajcxy ca' xycapxymidohuaangixy. ²¹ Nijot ajcxy y'idítzaangixy müd miich ajcxy ycixpi, com ca' ajcxy ix'y'adyii Dios Teedy huídibi xyquejyich ya naaxhuiñ.

²² Co ixypy ca' ti nmiñich ya naaxhuiñ nyajnimäyich je jāy ajcxy Dios ytiy'ajt, ca' ixypy ajcxy pocy müdity. Per com ti nmiñich ya naaxhuiñ, paady cham ypocy ajcxy müdity co ca' ajcxy xy'ixa'ñich. ²³ Je jāy ajcxy huídibi ca' xy'ixa'ñich, jadu'n nipaady nej ñich nDeedy ca' ajcxy ixaangixy. ²⁴ Co ixypy ñich ca' ti nduñich ma yi ajcxy yhuinduu mijhuinma'ñ, huídibi ca' ni pñ jāy tuñi, ca' ixypy ajcxy pocy müdity. E janch ti ajcxy ooy ja'ixcixy je mijhuinma'ñ, e ca' ñich yi' ajcxy xy'ixa'ñ, e nañ ca' ixaangixy ñich nDeedy. ²⁵ Paady jada jadu'n ytuñiyii yjadyii, jigix yajcuydunipy jadu'n nej ycojaayity ma yi judío jāy ajcxy ley ñecy, ma jadu'n ymína'ñ: "Ni ti tiy'ajt ycaca'ty, co ñich yi ajcxy ca' xy'ixa'ñich."

²⁶ E co anajty xyñigidaaccixy yi Espíritu Santo, yi huídibi xycapxhuijip ajcxy, je huídibi miich ajcxy nyajniguexam, chon ma Dios Teedy, je huídibi Dios ytiy'ajt müd. Yi' xyñidiy'ajt'adaambich co Dios ytiy'ajt nmüdityich. ²⁷ E miich ajcxy nañ jadu'n xyñidiy'ajt'adipich co Dios ytiy'ajt nmüdityich. Com ñich miich ajcxy jayijp nyaj'ixpijctzondac Dios y'ayuc ytiy'ajt.

16

¹ Ti ajcxy yam tiy'ajt njacyajnimaaaygixy, jigix ca' ajcxy m'ixtigihuägipy. ² Com judío jāy ajcxy xy'ixhuidzipy ajcxy ma ajcxy yi' ñaymujctac. Ypadaamy yi xii tiempo co miich ajcxy jāy xyaj'ögipy, hue' ajcxy tijipy co Dios anajty ooy jadu'n jāygidägy tüibi anajty ajcxy tuñ. ³ Paady ajcxy jadu'n xytunipy jibic, je' co ajcxy ca' ix'y'adyii yi Dios Teedy, etz nañ jadu'n ca' xy'ixy'adyiijich. ⁴ Paady ñich miich ajcxy jadachambi jadu'n nnimaaygixy, jigix co anajty je xii tiempo paady, chi m'ajihuiñiyb ajcxy co ti anajty jayijp nnimaaygixy co ayo'n tzaachypi mminaxa'ñ myajnaxa'ñ ajcxy.

Dios yjihui'ñ ymic'ajt tunam ma jāy yjot yhuinma'ñ

Ca' anajty ajcxy jada ti nyajnimäy müd jégix nmüd'ity ajcxy. ⁵ E cham janchtiy nñicxáanibich ma yi huídibi ti xyquexyich ya naaxhuiñ. E ni tüg miich ajcxy xya'amidooyich: "¿Ma mñicxa'ñ?" ⁶ Paady miich ajcxy mdajy mmay ma m'aa mjot, co ajcxy cham jadu'n jada ayuc ti nyajhuinñiygixy. ⁷ Oy ixypy miich ajcxy cham mjatajy mjamay, tiy'ajt nej mína'ñich co jac'oy müd miich ajcxy ycixpi co nhuimbidityich ma Dios Teedy. Co ixypy ca' jiiy nñicxa'ñich tzajpjoty, ca' ixypy xyñiminaangixy Dios yjihui'ñ ymic'ajt, je Espíritu Santo, je huídibi ajcxy xycapxhuijip. Per co ñich anajty tzajpjoty ti nhuimbity, huin'it ñich yi' miich ajcxy nyajniguexipy. ⁸ E co anajty je Espíritu Santo miñ ya naaxhuiñ, huin'it yi' yajjihui'ñybigipy jāy ajcxy ypocy. E nañ yajni'ixihuipy je jāy ajcxy co Dios tiydunib müd ypocy ycixpi. ⁹ Yi Espíritu Santo yajjihui'ñybigipy jāy ajcxy ypocy, co ñich ca' ajcxy ti xymibicy ca' ajcxy ti xymijpidägyich. ¹⁰ Je Espíritu Santo yajnejhuihuipy jāy ajcxy nej huaad cuychinaaygixy Dios y'ayuc ytiy'ajt. Com co ñich nba'ttigihua'ñich ma Dios Teedy, e miich ajcxy ca' xy'ocjac'ixñibich. ¹¹ Je Espíritu Santo yajhuinñiyhuip je jāy ajcxy co Dios tiydunib ajcxy müd ypocy ycixpi huídibi ajcxy ca' tiydudägy chinaaygixy. Com yi Dios ti yi' mujcu' tiyduñ müd ypocy ycixpi.

¹² Ooy may ayuc ñich nmüidity huudibi njayajnimähuaamyich ajcxy per ca' müich ajcxy mhujnihuihuipy cham. ¹³ Jacjiini mhujnihuihuipy ajcxy je ayuc huudibi njayajnimähuaamy ajcxy, co Dios quexipy je Espiritu Santo ya naaxhuiñ huudibi tiy'ajt müid. Yi' je' müich ajcxy xyajhuinjhuidyähuipy tüg'óciy Dios ytiy'ajt. Com yi' ca' yci'mhuinmañ tunipy. Yi' janchtiy ñigapxtähuipy tüg'óciy ayuc ytiy'ajt huudijaty anajty ymidooyb ma Dios Teedy, e nañ yajniüüxictähuipy tüg'óciy tiy'ajt huudibi mimb cidaacp. ¹⁴ Je Espiritu Santo ñich yi' capxpaady xyaj'idipyich, com yi' ñich ndiy'ajt müich ajcxy xyajhuinjhuihuaam. ¹⁵ Tüg'óciy huudibi Dios Teedy ymüid, nañ një'ajtypih yi', paady jadu'n ti nmina'ñich co je Espiritu Santo xyajhuinjhuidyäagixipy ajcxy ñich yi' n'ayuc yi' ndiy'ajtich.

Jesús ñimay ymüigütyjc co ajcxy yjotmay ahuimbidity jotcuje'ajtin

¹⁶ Tim huaad'ajtp xii tiempo, co ñich müich ajcxy ca' xy'ocjac'ixxip. Chi co xii tiempo yjacnajtznüicxihuip, huin'it ñich müich ajcxy xyjac'ixipy jadüg'oc.

¹⁷ E huin'it ajcxy nijëjity Jesús ydiscipulos ajcxy ñayñimaayi miñ xyipy ac jëyi:

—¿Ti jadu'n ytiyyp? Co jadu'n ymüina'ñ, co tim huaad'ajtnip xii tiempo müina ñich müich ajcxy ca' xy'ocjac'ixxipyich, e co yjacnajtznüicxihuip xii tiempo, huin'it müich ajcxy xyjac'ixipyich jadüg'oc, com nnicxaamich ma Dios Teedy.

¹⁸ Chi ajcxy jadu'n ñayñimaayi miñ xyipy:

—¿Ti jadu'n ytiyamy? Co jadu'n ymüina'ñ co tim huaad'ajtnip xii tiempo. Ca' ñich ajt nhuinjhuüyim ti jadu'n ytiyamy.

¹⁹ Com Jesús ñejhuüy anajty nej ajcxy yja'amidoohua'ñyii, chi nimay ajcxy:

—Yi' müich ajcxy ooy mjayajtihua'ñ. ¿Nej co jadu'n ti nmüina'ñich? Tim huaad'ajtnip xii tiempo co ñich müich ajcxy ca' xy'ocjac'ixxipy. E chi yjacnajtznüicxihuip xii tiempo, e chi müich ajcxy xyjac'ixipyich jadüg'oc. ²⁰ Janch janch ñich müich yam nnüimaaygixy co mjotmaybaadip ajcxy, e nañ myäxip ajcxy müid jotmay. Chi je naaxhuiñyjäy ajcxy huudibi ca' xymijpüidägyich, xondägam ajcxy, e müich ajcxy nañ mjotmaybaadip. Per yi' mjotmay ajcxy ahuimbidity tüg xondaacin. ²¹ Jadu'n ajcxy mjada'ñ jadu'n nej tüg töxyjäy tzaachypi jihuiy co y'ung yma'xung'ada'ñ. E co ti yma'xung'aty ypi'c'ung, chi jäydgoy yi' tzaachypi müid xondaacin co tüg jäy ti ymüin ya naaxhuiñ. ²² Tim jadu'n nej yjaty müid je töxyjäy, nañ jadu'n yjada'ñ müid müich ajcxy. Cham ajcxy jotmay mjihuüy ma m'aa mjot, e chi co xy'ixipyich jadüg'oc müich ajcxy, huin'it ajcxy m'aa mjot yxondäga'ñ. E ni pin huaad mxondaacin ajcxy xycapjicpy.

²³ Je huin'it xümbi (co anajty je Espiritu Santo ti ymüin ya naaxhuiñ) ca' ñich müich ajcxy ni ti xyjacyajmbijctzohuipyich, com janch ñich müich ajcxy yam jadu'n nimaaygixy co tüg'óciy huudijaty myajmayajtcixyp, chi ajcxy mbijctzohuipy ma Dios Teedy müid ñich nxii, e xymöhuipy ajcxy yi'. ²⁴ Chambaadni ca'ni ni ti ajcxy mbijctzoy ma Dios müid ñich nxii. Pijctzoogix, e xymöhuipy ajcxy yi', jigix mjotcugihuip ajcxy anaxy.

Jesucristo ymüimadac je jibic-huinma'ñ ya naaxhuiñ

²⁵ Tüg'óciy jada ayuc tiy'ajt ac jühuimbity müich ajcxy ti nyajnimäy. Huin-gomb xii tiempo müina tiyudägy ajcxy nyajmüidmiyductähuipy yi' Dios Teedy y'ayuc ytiy'ajt yajxon, e ca' y'ocjühuimbity. ²⁶ Je huin'it xii co anajty ñich ti nhuimbityich ma Dios Teedy, jëbi müich ajcxy mbijctzoogixy ma Dios Teedy tijaty ajcxy myajmayajty. Co ti mbijctzoogixipy müid ñich nxii,

xymóoygixipy yi' Dios Teedy. Ca' ycopicyity co ñich yi' nmibijctzohuipy müd miich ajcxy ycixpi. ²⁷ Com yi' Dios Teedy nañ xychojcp xyjihuiyib yi' miich ajcxy. Com miich ajcxy jayijp ti xychocyich ti xyjihuiyich, e ti mmibicy ajcxy co ti ndzooñich ma Dios Teedy, paady Dios miich ajcxy xymóhuipy tijaty anajty myajmibijctzooyb. ²⁸ Jiiby ñich ndzooñ ma Dios Teedy yajpaady, co nmiñich ya naaxhuiñ, per jadachambi n'ixmájtznibyich jada naaxhuiñybi, e nhuimbijtnich ma Dios Teedy.

²⁹ Huin'it je' ydiscípulos ajcxy ymínañ:

—Cham janchtiy tudägy miydägy, ca' m'ocyajtuuni jihuimbit ayuc.

³⁰ Cham ñich ajcxy nnejhuüy co miich mnejhuüyday tüg'óciy tiy'ajt. E ti xyajnimaydäyich co anajty ca' ti tiy'ajt ñich ajcxy nmibicy co miich mdzooñ ma Dios.

³¹ Chi Jesús y'adzooy:

—¿Nej nmibijcyp cham jada ayuc jadu'n nej ti nmimáaygixiyi?

³² Jihuiñybijccix co huingonip je xii tiempo, e ti tim paady mina miich ajcxy mgueec-huäcxtáaygixipy nidüg nidüg ma pin timdzocy, e xyajhuim'gixich naydüg. Per ca'p ñich nnaydügity, com yi' Dios Teedy yi' ijtp müd ñich. ³³ Miich ajcxy yam jada ayuc nyajnimaaayb, jigix ajcxy jotcujc'ajtin mbaadip ma ñich. Ya naaxhuiñ mbadamy ajcxy ayo'n etz tzaachypi. Jotcuigiygix, ca' mdajcixy maygixy, com ti nmimadägyich yi' jibicpi ya naaxhuiñ.

17

Jesús ymibijctzou Dios müd ydiscípulos ajcxy ycixpi

¹ Co Jesús jadu'n ymínañ jayijp, chi ypa't'ijxy tzajpcíxy, chi Dios Teedy pa'tcapxy nimay:

—Dios Teedy, ti hora paady mina ayo'n nyajnaxa'ñich jadu'n nej miich jayijp'aty myajnihuinmayi. Yajniguëxig ñich nmic'ajt ñich n'oy'ajt, com ñich miich nDeedy'ajtypich, jigix ñich nañ jadu'n nyajniguëxigibyich miich nmic'ajt miich m'oy'ajt ma yi' jäy ajcxy. ² Com miich ti xymöyich mic'ajt ma tüg'óciy jäy, jëbi nmöyich ajcxy jugy'ajtin huidibi ca' ycixipy ytigoyipy. Nmóhuibyich jada jugy'ajtin tüg'óciy jäy ajcxy huidibi miich ti xymöyich. ³ Je jäy ajcxy huidibi icy'ajtp je Dios janchypi, je Dios tüg'ajcpi etz y'ixy'ajtyp nañ jadu'n Jesucristo huidibi ti mguexy ya naaxhuiñ, ymüd ajcxy jugy'ajtin huidibi ca'ycixipy ytigoyipy niminaa.

⁴ Ti ñich nyajniguëxigiyich miich ajcxy yi' nmic'ajt ya naaxhuiñ, co ñich ti nduñ yi' mdung huidibi miich xyajniñijcich. ⁵ Jadachambi Dios Teedy yajmijtigüygich miich, müd je mic'ajtin huidibi anajty nmüdich ma miich mhuinduu co anajty ca'ni naaxhuiñybi chondacyñi.

⁶ Ti ñich miich ya naaxhuiñ nyajniguëxici yi' nmic'ajt ma yi' jäy ajcxy huidibi miich xymooyich, huidibi miich mhuin'ijx ma naaxhuiñyjäy ajcxy. Miich yi' ajcxy mjäy, e miich ti xymöyich, e ti ajcxy miich m'ayuc cuydungixy.

⁷ Jadachambi ñejhuüyñip yi' ajcxy, co tüg'óciy tijaty tiy'ajt ñich miich yi' xymooyb, jiiiby yi' choon tzajpjoty ma miich. ⁸ Com yi' ayuc huidibi miich ti xymöyich, ti ñich yi' ajcxy nyajnimaydäy, e ti yi' ajcxy cöbijccixy. E nañ ti ajcxy huiñjihuiyigixy tiydudägy co ñich jiiiby ndzooñich ma miich, e nañ ti ajcxy mibijccixy co miich ya naaxhuiñ xyquejxyich.

⁹ Müd yi' ycixpi ajcxy miich Dios Teedy nmibijctzooy, ca' nmínaaním müd jacjadyi naaxhuiñyjäy ajcxy ycixpi nmibijctzoy. Müd yida'ajty ycixpi ajcxy huidibi miich ti xymöyich, com nañ mjë'ajtyp miich yi' ajcxy. ¹⁰ Tüg'óciy tijaty

ich një'ajtyp, nañ mjë'ajtyp miich yi', e tijaty miich mjë'ajtyp nañ një'ajtyp ich yi'; e ich nmic'ajt niguëxi'cp yi' ma yi' ajcxy chinaayin yjugy'ajtin.

11 E ca' n'ocjacyajpadaanich ya naaxhuiñ. Ich njäy ajcxy jacyajpadam ya naaxhuiñ. Nnicxnibich jilby tzajpjoty ma miich. Dios Teedy, cuend'at ich ndiscipulos ajcxy müd miich nmic'ajt huidibi miich ti xymöyich, jigix yi' ajcxy tú'ciy yjot yhuinma'n jajpaadipy ma miich, tim jadu'n nej ich ajt tú'ciy njot nhuinma'n nyajpaatim. 12 Co anajty ich njac'yaajty naaxhuiñ müd ich njäy ajcxy, ti nguend'atyich anajty ajcxy müd je mic'ajt huidibi miich xymooyich. E ni tüg ajcxy ca' yhuinma'nydigoooy. Abicy ich n'octimpidägy je huidibi nayyajhuinma'nydigoooyi (je Judas Iscariote), co yi' anajty jadu'n yajcuydunam jadu'n nej jaybety ymiñ müd yi' ycixpi etz müd ich ycixpi.

13 Cham ich miich niba'ttigi'huaani jada'. Miich m'ayuc mdiy'ajt nyajnimayybich jada naaxhuiñjäy ajcxy huidibi nyaj'ixpijcyich, jigix agujc jotcujc yhuimip ajcxy. 14 Ti ich ajcxy yi' nyajnimaydäyich miich m'ayuc mdiy'ajt. E ca' ajcxy y'ixa'nyii yi' naaxhuiñjäy ajcxy huidibi ca' xymijpidägyich. Com je' co ajcxy yjot yhuinma'n ti yajtigach, ca' ytügy müd yi' jacjadyii naaxhuiñjäy yjot yhuinma'n. Jadu'n nej ich ca' ytügy njot nhuinma'n müd naaxhuiñjäy ajcxy yjot yhuinma'n. 15 Ca' ich cham miich nmibijctzoy co myajpidzimipy ich ndiscipulos ajcxy ma jada naaxhuiñybi. Hue' janchtiy tun may'ajt cuend'at ajcxy ma yi' ca'oybi ymiñ. 16 Yi' ajcxy yjot yhuinma'n ca' ytügy müd yi' jacjadyii naaxhuiñjäy ajcxy yjot yhuinma'n. Tim jadu'n nej ich ca' ytügy njot nhuinma'n müd yi' jacjadyii naaxhuiñjäy ajcxy yjot yhuinma'n. 17 Yajhuaatzi ajcxy yjot yhuinma'n müd miich m'ayuc, com yi' m'ayuc yi' je' tiy'ajt müd. 18 Jadu'n nej miich xyquejxyich ya naaxhuiñ, nañ jadu'n ich yi' ajcxy nguejxhuäcxyich ya naaxhuiñ. 19 Müd yi' ajcxy ycixpi ti nnaagyegyijich amuumdüg'ot ma miich, jigix yi' ajcxy nañ jadu'n ñagyegyiyb amuumdüg'ot ma miich, co ajcxy cuydunipy miich m'ayuc mdiy'ajt.

20 E ca' ich jada'ajty ajcxy nibijctzohuiyich. Hue' ich janchtiy nibijctzohuiydaaybich tüg'óciy jäy ajcxy huidibi xymibijcibich xymijpidägyibich müd yi' ayuc huidibi ich ndiscipulos ajcxy ycapxhuäcxiy. 21 Huen ajcxy nidüg'óciy yjot yhuinma'n yajtügäy, jadu'n nej miich Dios Teedy mjot mhuinma'n jajpaady ma ich, e ich njot nhuinma'n jajpaady ma miich. Co yi' ajcxy yjot yhuinma'n yajtügihuiy müd ich ajt njot nhuinma'n, huin'it jacjadyii naaxhuiñjäy ajcxy mibigipy co miich xyquejxyich ya naaxhuiñ. 22 Ti ich ajcxy nmöyich je tiy'ajt etz je oy'ajt huidibi ich miich ti xymöy, jigix ajcxy yjot yhuinma'n jatymy yajtügihuiy ajcxy, jadu'n nej ich ajt njot nhuinma'n yajpaatim tú'ciy. 23 Ich yajpatpich ma ich njäy, e miich nañ myajpatp ma ich, jigix tiydudägy ajcxy tügmucy y'idipy, e nañ jigix naaxhuiñjäy ajcxy jatymy nejhuihuiy co miich xyquejxyich ya naaxhuiñ, e nañ co yi' ajcxy ti mdzocy ti mjihuñ jadu'n nej ich miich xychocy xyjihuiyich.

24 Dios Teedy ndzojpcyich co yi' jäy ajcxy huidibi miich ti xymöyich y'idipy ajcxy nañ jadu'n ma anajty n'ityich jilby tzajpjoty, jaydëbi ajcxy ixipy ich nmic'ajt ich n'oy'ajt huidibi miich ti xymöyich. Com miich ti xychocy ti xyjihuiyich jacjayip ca'ni anajty naaxhuiñybi myajcojyñi. 25 Dios Teedy, miich ooy mmijty mjanchity, e yi' jacjadyii naaxhuiñjäy ca' ajcxy yi' xy'ixy'ajtyp. Ich miich n'ixy'ajtyp. Ich njäy ajcxy ti mibicy ti mijpidägy

co miich xyquejxy'ich ya naaxhuiñ. ²⁶ Ti nyajnimaaay'ich y'i' ajcxy pin miich, co miich je' Diosip. E njacyajnimähuaamy'ich y'i' ajcxy tiydudäy, jigix y'i' ajcxy nañ jadu'n ñaychogüiyb ñayjihuiñhu'iyb nidüg nidüg, jadu'n nej miich xychocy'ich xyjihui'y'ich, e nañ jadu'n jigix ñich ndiy'ajt yajpaadipy ma y'i' ajcxy yjot yhuinma'ñ.

18

Ymajtz ajcxy Jesús

¹ Co jadu'n Jesús ycapxymiydacy jayijp, chi jada' ñicxy müd je jäy ajcxy huidibi anajty ajcxy yaj'ixpijcy. Ñicxy ajcxy jim'amy huoc ninaxy, je huoc hue' anajty xijity Cedron. Ñicxy ajcxy jim ma anajty tüg aguemy. Chi Jesús ytigüy ma je aguemy müd ydiscipulos ajcxy. ² Judas huidibi anajty cïyegam Jesús, ñejhu'iyb anajty ma je it ma anajty müd'oy canaag'oc je' ydiscipulos ajcxy. ³ Chi jada' Judas müddzooñ soldados ajcxy etz jacjadyi tungmüdpi huidibi je teedy yhuindzin ajcxy etz fariseojäy ajcxy yquejx. Chi ajcxy yja'ty ma je it ma anajty Jesús yajpaady, ymüd ajcxy linterna, ymüd ajcxy chinjin etz canaagnax tijaty huidibi anajty ajcxy müd chiptuñ. ⁴ E Jesús com ñejhuiydaayb anajty tüg'óciy nej anajty yjada'ñ y'ayohua'ñ, chi jipcohuägy je ymaymidzip ajcxy, e nimay:

—¿Pin ajcxy m'ijxtaayb?

⁵ Chi je' ymidzip ajcxy y'adzooy:

—Yi' ñich ajcxy n'ixtaayb je Jesús, je Nazaret jäy.

Chi Jesús yminañ:

—Ñich jëdu'n.

Je Judas huidibi anajty cïyepc Jesús, jim anajty ytinäy müd Jesús ymidzip.

⁶ Co Jesús jadu'n yminañ: “Ñich jëdu'n.” Chi ajcxy yëphuimbijtay jadu'ñyi. ⁷ Chi Jesús jadüg'oc y'amidooy ajcxy:

—¿Pin ajcxy m'ijxtaayb?

Chi ajcxy jadüg'oc y'adzooy:

—Yi Jesús, je Nazaret jäy. ⁸ Chi Jesús yminañ:

—Ti ajcxy njanimäy co ñich jëdu'n. Pen janch ñich miich ajcxy xy'ijxtaayb, najtzmaziydäy jadayaab ñich nmigügtijc ajcxy, huen nixcixy.

⁹ E jadu'n yajcuyduñ je ayuc co anajty Jesús ci'm ti ymina'ñ: “Tüg'óciy jäy huidibi nDeedy ti xymöy'ich, ca' ni tüg jëbi huaad yti gooy.” ¹⁰ Chi jada' je Simón Pedro huidibi anajty müd tüg espada, juudy je y'espada ma ñidijc, e chi yajtzaachüy je Teedy mijtungmüdpi ytumbi, tüg yta'tz'ac aa'oy'amybi yajmináciy. Je tumbi hue' anajty xijity Malco. ¹¹ Chi Jesús nimay Pedro:

—Pidäg m'espada ma ñidijc. Ca' mnejhu'iy co copicy nyajnaxipy'ich je tzaachypi je ayo'n huidibi Dios Teedy ti xyajnigo'adugiy'ich. Min n'ocminaxy n'ocyajnaxy'ich jada tzaachypi jadu'n nej ixypy tüg tasi ta'm'ujtznñ ngo'uucnaxy'ich.

Jesús ma je Teedy mijtungmüdpi yhuinduu

¹² Chi je soldados ajcxy, je soldado yhuindzin etz judíojäy ajcxy ytungmüdpi huingohuägy ajcxy Jesús. Chi ajcxy majch, e chi ajcxy cïxojch. ¹³ Chi ajcxy jayijp yajnicxy Jesús ma Anás yajpaady, je' anajty Caifás ymüd'ajtyp, je huidibi anajty mijtungmüd ma teedytijc ajcxy ymiñ je huin'it jimijt. ¹⁴ Je Caifás je' anajty ti yecy je capxhuijin ma y'i' judíojäy ajcxy co tügtecy yminañ: jac'oy co tüg jäy y'ögipy müd tüg'óciy naax cajp ycixpi.

Pedro yminañ co ca' ix'y'adyii Jesús

15 Simón Pedro mïid jadügpï ydiscípulo ypanicx ajcxy Jesús (co je ymidzip yajnicxi mach). E je jadügpï ydiscípulo ix'y'ajtïp anajty yajxon je teedy mïitungmïidpï, paady ytigüy axam huin'it co Jesús ymidzip yajtigüyï ma je teedy mïitungmïidpï ytïjc. 16 E je Pedro jïiby je' yhu'mïiy ma tïjc aguu. E je jadügpï ydiscípulo co anajty ajcxy ñay'ix'y'adyii mïid je teedy mïitungmïidpï, chi ypidzïmy migapxy je tïjc aguu adinaayb, chi Pedro ajcxy yajtigüy jïiby tigoty. 17 Chi jada' je töxy'anäg huïdibï anajty tïjc'aguu adinaayb, nïmay je Pedro:

—¿Nej ca' mïich nañ jadu'n Jesús xydiscípulo'adyii?

Chi Pedro y'adzooy:

—Ca'.

18 Je tumbidïc ajcxy etz je soldadtïc ajcxy ti anajty ajcxy oy jïin yajmïijygïxy co anajty chachtïchity, e Pedro nañ jim anajty nañ jadu'n mïid xamy ajcxy.

Je teedy mïitungmïidpï yajcomïdou Jesús ypocy

19 Chi je teedy mïitungmïidpï y'amïdooy Jesús pïnjaty anajty ti yaj'ix'pïcy etz tïjaty anajty ti yaj'ix'pïcy. 20 Chi Jesús y'adzooy:

—Ti ñch oy njacapxy njamïydägy mayjäjoty. E ti ñch njatyïmy nyaj'ix'pïcyïch ma mïich ajcxy mnaymujctacïn etz ma Dios ytïjc, ma yï judïojäy ajcxy nidüg'öcyï ñaymugyï. Ca' ni ti ameech ti nngapxyïch.

21 ¿Na'amy co xyjactïm'amïdooyïch ti anajty ti nyaj'ix'pïcyïch? Yï' ajcxy amïdou pïnjaty ti xy'amïdo'ïjtïch n'ayucïch, yï' ajcxy nejhuïyb ti ñch jadu'n ti nyaj'ix'pïcyïch. Yï' ajcxy tüg'öcyï ñejhuydaayb nejjaty ñch ti nminañch.

22 Co jadu'n y'adzooy Jesús, huin'it tüg judïo tungmïidpï huïdibï anajty jim huïngon tïnaayb ma Jesús, chi tüg cï' acojxïgy Jesús, chi mïinañ:

—¿Nej co jadu'n jïbic m'adzooy yï teedy mïitungmïidpï?

23 Chi Jesús y'adzooy:

—Pen jïbic ñch ti n'adzooy yec tïy'ajt nej co yjïbicity. Pen oy ñch ti n'adzooy, ¿nej co xycoxyïch?

24 Chi Anás nïmay soldadtïc co huen Jesús yajnicxy cïxoch jim ma yï Caifás ytïjc, je teedy mïitungmïidpï.

Chi Pedro jadüg'oc yminañ co ca' ix'y'adyii Jesús

25 Simón Pedro jimni anajty ytinäy ma jïimba' yxamy anajty, chi ajcxy amïdoy jadüg'oc:

—¿Nej cay yï' mïich xyaj'ix'pïjcp nañ jadu'n?

Chi Pedro jadüg'oc coyüch Jesús yminañ:

—Ca' je' n'ñchity.

26 Nidügtï ajcxy je teedy mïitungmïidpï ytumbï, je' anajty y'amïgüg yï Malco, huïdibï Pedro yta'tz'ac quejtzpuxï, chi jadu'n yminañ:

—¿Nej ca' mdïjy n'ïjxyï jim ma je aguemy mïid Jesús?

27 Chi Pedro mïdugïg'oc oy coyüch yhuïndzin, e tïm huin'itïy tzey oy yaaxïgy.

Jesús ma je gobernador yhuïnduu

28 Chi ajcxy jim yajtzoön Jesús ma Caifás ytïjc yajnicxy ajcxy ma agujctïc, tïm jopyñï anajty. Chi je judïojäy ca' ajcxy ytigüy ma agujctïc, com ca' anajty ytundïgoyaangïxy mïid judïojäy ycostumbre. Ca' ajcxy ytigühua'ñ anajty ma je romanojäy gobernador ytïjc amayxïjoty, e ca' anajty ajcxy ñayyajïbicïhua'ñyï. Com co jadu'n ycanayyajïbicïcyï ajcxy, e huin'it ca'

ajcxy ycacaay ma je pascua xii adzuu'ajtin. ²⁹ Co ca' ajcxy ytigihua'n anajty ma je agujctijc, chi je gobernador Pilato nibidzimy ajcxy tiba'y ma anajty ajcxy miidity Jesús cuend'aty. Chi Pilato yminañ:

—¿Ti xihuin ajcxy mmiid, miid jadayaabi yëydijc?

³⁰ Chi ajcxy y'adzooy:

—Co ixypiy ca' ti jibicpi tuñ, ca' ixypiy ich ajcxy ya yi' nyajmiñ ma miich.

³¹ Chi Pilato yminañ:

—Yajnicxix miich ajcxy. Nicx tiydungix jadu'n nej miich ajcxy mley y'ané'my.

Chi je judíojäy ajcxy y'adzooy:

—Ich ajcxy ca' ni ti mic'ajt nmiiidity nicxy ich ajcxy njäyyaj'ögy.

³² Co jadu'n ajcxy yminañ, chi jadu'n ajcxy cuyduñ je Jesús yci'm'ayuc jadu'n nej anajty ti yminañ ti o'cin anajty ypadamy. ³³ Chi Pilato jadüg'oc ytigäy jüby agujctigoty, chi coyaaxiiy Jesús, chi nimay:

—¿Nej miich je' rey'ajtp ma yi judíojäy ajcxy?

³⁴ Chi Jesús y'adzooy:

—¿Nej mgi'mhuinmañ miid xy'amidooyich pen ich nrey'ajtpich, o huingjäy ti xyajnimäy co nrey'atyich?

³⁵ Chi jada' Pilato y'adzooy:

—¿Nej nañ judíojäy jada' ichi? Mgi'mnaax mgi'mgajp etz je teedy miitungmiidpi ti xyciyecy ma ich. ¿Ti ti mdundiگوی?

³⁶ Chi Jesús y'adzooy:

—Ich ca' n'ane'myich ya naaxhuiñ. Huingduum ich n'ané'min nmiiididyich. Co ixypiy ya naaxhuiñ n'oc'ane'myich, tüg'óciy ich nmigügtijc ajcxy ti ixypiy ajcxy tziptungixy, ti ixypiy ajcxy xyñihua'nich. E ca' ixypiy ti naygyegyijich ma yi judíojäy tungmiidpi ajcxy. Per janch ich ca' ich ya naaxhuiñ n'ane'myich.

³⁷ Chi Pilato y'adzooy:

—¿Nej mrey miichi?

Chi Jesús yminañ:

—Miich jadu'n xytijypich co nrey'atyich. Paady ti nmiñich ya naaxhuiñ, e ti nma'xung'atyich, jigix nyecyich tiy'ajt tiydudägy. Tüg'óciy yi jäy pinjaty tiy'ajt cuydumb xy'amido'íjtibich yi' n'ayucich.

Pilato y'ane'my huen Jesús yaj'ögyii

³⁸ Chi Pilato y'adzooy:

—¿Ti jadu'n mdijy tiy'ajt tiydudägypi?

Jadu'nyi je' jada'ajty yjacminañ, chi pidzimy jadüg'oc tiba'y ma anajty je judíojäy ajcxy. Chi ajcxy nimay:

—Ca' ich ni ti bocy nbaadyich ma jada jäy ma yi romanojäy yley. ³⁹ E com miich ajcxy miid tüg costumbre co tüg nnajtzmazdiyim machyjäy miid jada pascua xii yciixpi, ¿nej mdzojcp ajcxy co nnajtzmazdihiuibych jada judíojäy reyí?

⁴⁰ Chi ajcxy nidüg'óciy minanday:

—Jadayaabi jäy ca' mnajtzmazdihiupy, yi' janchtiy mnajtzmazdi' yi Barrabás.

Barrabás hue' je' anajty tüg meetzpi.

19

1 Chi jada' Pilato ané'min pidacy co huen ajcxy Jesús huinhuopy jipphuopy.

2 Chi jada' je soldados ajcxy yaj'oyi'y tüg corona mij'apy pa'apy, chi ajcxy yajcojeniy Jesús. Chi ajcxy yajñijeniiy tüg rey yhuít ucypí ycolor. 3 Chi soldados ajcxy huingohuägiiy jadüg'oc capxpoocxcixy yajxig'y'amy, nimaaygixy:

—¡Viva miich judíoäy rey!

Chi ajcxy ooy huingojxy jipcojxy.

4 Chi Pilato jadüg'oc ypidzimy tiba'y. Chi nimay je mayjäy:

—Cham ajcxy nyajpidzimy tiba'y jada Jesús, jigix ajcxy mnejhuíhuip co ca' ni ti pocy ti nbaadyich ma yi'.

5 Co Jesús ypidzimy tiba'y miid je apy corona ma ycohuajc etz je rey yhuít ucypí ycolor. Huin'it Pilato yminañ:

—¡Jxcix, cha je yëdyjc.

6 Co je teedy tungmiidpi etz je judiojäy ajcxy ijxy, chi ajcxy yminanday nidüg'óciy aguipxyjaty:

—Yajcruudzpet, yajcruudzpet.

Chi Pilato yminañ:

—Yajcruudzpetcix miich ajcxy, janch ich ca' ni ti tiy'ajt nbaadyich nej ich yi' nyajcruudzpedipy.

7 Chi je judiojäy ajcxy y'adzooy:

—Ich ajcxy miid tüg cötujcin, jëbi y'ögy miid ich ajcxy ngötujcin ycixpi, com ti ycapxtigooy co yminañ co yi' Dios yteedy'ajtpy.

8 Co jada ayuc midooy Pilato, chi nigí chigiygoty. 9 Chi ytigiiy jadüg'oc ma je cötujtac miid Jesús, chi nimay:

—¿Ma miich tiiyi mgogajpity?

E Jesús ca' y'adzooy.

10 Paady Pilato yminañ:

—¿Ich miich ca' xy'adzohuañ? ¿Ca' mnejhuíy co nmüdidyich mic'ajt jëbi nñajtzmadzïy etz nañ jëbi nyajcruudzpety?

11 Chi Jesús y'adzooy:

—Ni ti mic'ajt ixypy mgamüidity ma ich, pen ca' ixypy mic'ajt ti xymöyich yi' huidibi ane'mb jiiy tzajpjoty. E paady ycixpi yi' tüibi ich xyciyecyich nigí yi' pocy müidity ca'ydi miich.

12 E huin'it Pilato ooy yjahuinmañ ixtay nej huaad ca' jëbi ocñajtzmadzïy Jesús. E je judiojäy, je Jesús ymidzip, nigí anajty ajcxy chachxi'dich:

—Pen miich mñajtzmadzïyb jada Jesús, huin'it ca' m'ocjacnaymigüg'ajtinipy miid yi' mhuindzin je César huidibi ané'min ti xymöy. Com tüg'óciy pinjaty naydijip rey, ca' yi' miid nay'ixañyii je César.

13 Co Pilato jadu'n ayuc midooy, chi yajpidzimy Jesús tiba'y. Chi Pilato y'ixtacy jim ma je' y'ane'mdac ycötujtac, jim ma je it huidibi anajty xiiijip Empedrado, hebreo'amy xiiijity Gabata. 14 Hue' tim cujcxii anajty, e chi com jabom anajty je pascuaxii ycodiicxni, co Pilato jadu'n nimay judiojäy ajcxy:

—Cha ajcxy jada mrey.

15 E je' ajcxy y'adzooy:

—Huen ögy, huen ögy. Yajcruudzpet.

Chi Pilato yminañ:

—Miich ajcxy mrey, ¿miñ n'ocyajcruudzpetyichi?

Chi je teedy tungmiidpi ajcxy y'adzooy:

—Ich ajcxy ca' ich ajcxy huingbi rey nmüidity, jëyi César ich ajt nrey'ajtim.

16 Chi Pilato c̄yeycy Jesús ma je judíoäy ajcxy, huen ajcxy c̄'m yajcruudzpety. Huin'it ajcxy Jesús nihuäḡīy. Chi ajcxy yajtzoñ.

Yajcruudzpejty ajcxy Jesús

17 Chi ajcxy je cruudz Jesús c̄'m yajquejycabīy. M̄id nicx ajcxy ma je it x̄ijity o'cpi cohuajc, hebreo'amy x̄ijity Gólgota. 18 Jim ajcxy yajcruudzpejty quipxyi m̄id jametz jäy, t̄üg anajty'amy, jad̄üg a'oy'amy etz Jesús cujc'amy. 19 Chi Pilato ane'my huen cijxjay ayuc ma je cruudz, e jadu'n je ayuc ajcxy jay: "Jesús, Nazaret jäy, je judíoäy ajcxy yrey." 20 May ajcxy ooy je judíoäy capxy je ayuc huidibi anajty cijxjay ma je cruudz. Com je it ma anajty ajcxy Jesús ti yajcruudzpejtcixy mihuington anajty Jerusalén. Hue' anajty yjayty: hebreo'amy, latin'amy etz griego'amy. 21 Chi je teedy m̄jntgm̄idpi ajcxy nimay je Pilato:

—Ca' ixypy jadu'n ti mjay: "Judíoäy yrey". Hue' ixypy ti mjay: "Yi' jadu'n naydijip̄ ñch judíoäy xyrey'ajtp̄ich."

22 Chi Pilato y'adzooy:

—Yi t̄ibi njaayich, ti ñch yi' njaay, ca' nyajtigadzañich.

23 Co soldados ajcxy yajcruudzpejtay je Jesús, huin'it je' yhuit ajcxy huijtz'i'ci. Chi ajcxy je huit yajhuäcxy m̄idaaxp̄icy. Chi soldados ajcxy cijpt̄üg c̄ichyp̄icy. Yi' yjocxhuit jadu'n nej anajty yt̄ügijp̄uxyiyity. 24 Chi ajcxy ñayñimay ac j̄eyi soldadtijc:

—Ca' huaad ajt n'aḡidz̄īyim jada jocxhuit. Tzoc ajt suerte n'oc'ijxim, jigix ajt nnejhūīyim pin anajty suerte'ajtip.

E jadu'n ajcxy cuyduñ nej anajty ycojaayity ma Dios ñecy, ma Cristo jadu'n ym̄inañ: "Yajhuäc ajcxy ñch nhuit, e ma ñch njocxn̄ijen jim ajcxy suerte ijxy." Je' je' huidibi soldadtijc ajcxy ycuycuun.

25 Jim ma Jesús ycruudzm̄ijc, jim anajty ajcxy ytinäy: Jesús ytaj, je ytaj chi', je María (Cleofas yt̄oxyjic), etz María Magdalena. 26 Co Jesús ijxpaty ytaj etz je ydiscípulo huidibi anajty ooy n̄gi tzocy ma ytaj ym̄ijc, chi nimay ytaj:

—Nan, ñch nm̄iḡüg huidibi t̄inaayb ma miich mm̄ijc, yi' xycuend'adip̄ jadu'n nej jihūy miich yi' xytaj'adyii.

27 Chi Jesús nimay je' ydiscípulo:

—Ñch ndaj miich mḡüend'adipy, jadu'n nej ixypy mḡi'mdaj'adyii.

Jadu'n nej x̄i tiempo jac nicxni Jesús ytaj tzinaydacpicy ma jada discípulo yt̄ijc.

O'c Jesús

28 Co jadu'n ytundaayi yajtaayi, chi Jesús nejhūy co ti anajty t̄üg'óciy ytundäyii yajt̄äyii jadu'n nej Dios tzocy. Huin'it jadu'n ym̄inañ:

—T̄idz̄īyinibich.

Co jadu'n ym̄inañ, je' anajty ycuycundaayb nej anajty ycojayity ma Dios ñecy m̄id yi' yc̄ixpi.

29 Jim anajty t̄üg pi'c uugi'ñ ym̄id anajty vinoxunni. Chi ajcxy je' yajxoogy t̄üg esponja (jadu'n yi' nej po't) m̄id vinoxunni, e chi yajjip̄'eedz̄īy t̄üg paxyijip̄, je' m̄id yajj̄äy je vinoxunni ma Jesús y'ahuac. 30 Co jada' Jesús co'uucnajxy je vinoxunni, huin'it jadu'n ym̄inañ:

—Ti t̄üg'óciy nguydundäyich.

Chi ñaax'ijxy, e chi y'o'cni.

T̄üg soldado cumy Jesús ma ycaachyjip̄

³¹ Com jabom anajty je pascua mijxii (amayxii ooy), e nañ sábadó xii anajty. Paady copicy anajty co ajcxy yajminájcipy ajcxy je jáy ninícx je tiibi anajty yajcruudzpejticy. Miid je' ycixpi je judíoáy ajcxy ñicxy ma Pilato pijctzoy may'ajt co huen ane'my yi soldados ajcxy, co huen nicxy yajtijy je jáy ytecy ajcxy huídibi ti yajcruudzpejty. ³² E chi ajcxy je soldados yja'ty ma je it ma ajcxy yajcruudzpejty Jesús. E je metzpi jáy ajcxy ytecy tiji huídibi ajcxy yajcruudzpejt tú'ciy miid Jesús. ³³ Co je soldados ajcxy ymijhuágy ma Jesús, huin'it ajcxy ijxy co ti anajty y'o'cni, paady ca' ajcxy tiji ytecy.

³⁴ Chi tüg soldado cumy Jesús ma ycaachyjijp miid quipy jijpxu'ñybi. E huin'it tim mic'amy ni'py etz nii ypidzimy. ³⁵ Tüg jáy jim anajty ixy nej ytuni yjajti, e nañ yejc tiy'ajt. E je' ytiy'ajt janch je', e je' nejhuíyb co yjanchity. Miid je tiy'ajt ycixpi jébi miich ajcxy nañ jadu'n mmibijctáhuip. ³⁶ Paady je' jadu'n ytuni yjajti, co jadu'n anajty yajcuyduna'ñ jadu'n nej yjaybetyty ma Dios ñecy, co jadu'n ymíañ: "Ca' huaad ni tüg ypajc yajtijy." ³⁷ E jadüg'it anajty ycojaayity ma Dios ñecy, ma jadu'n ymíañ: "Y'ixipy ajcxy je jáy huídibi ajcxy ycuum."

Yajnaaxtigiiy Jesús

³⁸ Jim anajty José huídibi anajty cogájpip Arimatea. Yi' je' huídibi anajty mijpidacp Jesús, oy anajty ca' capxpídzimy, miid co anajty chigiiy miid je judíoáy ajcxy huídibi anajty midzip'ajtp Jesús. Co Jesús y'o'cy huin'it José oy pijctzoy may'ajt ma Pilato, co jébi nicxy yajtzooni Jesús ñaaxnícx ma anajty ti yajcruudzpedyii. Co Pilato a'ixiy, chi José ñicxy jim oy yajminajci je Jesús ñaaxnícx, e chi yajnicxy. ³⁹ Nañ miid ñicxy José je Nicodemo, je huídibi anajty jayijp ti ni'oy Jesús coodz. Nicodemo yminícx oy nimigo'px libra mirra etz áloes tzooy huídibi ooy oy yxuugy. ⁴⁰ Chi ajcxy yajpidíci Jesús ñaaxnícx, chi ajcxy mo'ñ miid poob huit, chi tzooy ajcxy miid mirra etz áloes tzooy, jadu'n nej je judíoáy ajcxy ycostumbre miidity co o'cpi yajnaaxtigiiygyixy. ⁴¹ Huíngon ma je it ma ajcxy yajcruudzpejty Jesús, jim anajty tüg aguemy, e jim ma je aguemy jim anajty tüg o'cpi jut jemybi ma anajty ca'ni pin ñaaxtigiiy. ⁴² Jim ajcxy Jesús ñaaxnícx yajnaaxtigiiyi, co anajty jim yjac-huíngonity, e janch jottigooy ajcxy yajnaaxtigiiy, miid co anajty ti chu'ñyñi, e je judíoáy ajcxy tzachni'ixiiñi tzach'a'ixiiñi co je amayxii anajty chondágaani com jabom.

20

Jesús jugypijc jadüg'oc co anajty ti y'oc'o'cni

¹ Tim seman ixtigi', moñiyi anajty, ca' anajty oy ximiiñi. Huin'it María Magdalena ñicxy ma Jesús anajty ti ñaaxtigiiy. E chi jim ijxy co je tzaa ti anajty jim yajjiiidiguecy ma je jut agu. ² Co ajcxy ijxy je jut ahuádz, chi jada' mic'amy poyígyi ninicxy Simón Pedro, etz je jadügpí ydiscípulo huídibi anajty Jesús miid ooy naychogyii, chi nímay:

—Ti yajtzoongixy iich ajt nñuindzin ñaaxnícx ma ajcxy yajnaaxtigiiy, e ca' nejhuíyim ma ajcxy ti pídaaccixy.

³ Huin'it ajcxy nimetz chooñ poyígyi Pedro etz je jadügpí discípulo, ñicxy ajcxy ma je o'cpi anajty ñaaxtigiiy. ⁴ Poyígyi ajcxy ñicxy nimetz, per je jadügpí discípulo jayijp ñajxy, e jayijp jim ojja'ty ma je naaxtigiiy dac. ⁵ Chi yco'ixiiy jutjoty, huin'it jim oy ixy je mo'nhuit jiiiby jutjoty y'ooxnäy, per ca' yi' jiiiby ytiigiiy jutjoty. ⁶ Simón Pedro co ymiñ jac'axam, tim janitigiiy jutjoty, chi ijxy je mo'nhuit y'ooxnäy jiiiby jutjoty. ⁷ E chi ijxy je cöxotz, je huídibi anajty miid

ycohuajc yxochity, abicy je' anajty, ca' anajty tú'ciy y'ooxnäy müid ymo'nhuit. Y'ijx ajcxy je cöxotz yajxon y'anëgyity abicy. ⁸ Huin'it ytiğiyy jutjoty je jadügpí discípuło huídibi jacjayijp ja't. Chi ijxy, e huin'it mibijcy co Jesús ñaaxnícx ca' anajty jüby. ⁹ Ca'ni anajty ajcxy yajxon huinjihuıy co anajty jadu'n ycojaayity ma Dios ñecy, co anajty je Cristo yjugypíga'ñ. ¹⁰ Chi je metzpi ajcxy ydiscípulos yhuimbijty ma ytiyc.

Jesús nayguëxici ma María Magdalena

¹¹ E je María jim yhui'miy ma je o'cpi jut ayaaxip. Chi ayaaxip yco'ixiy ma je jut. ¹² E chi ijxy metz ángel, poob huit ajcxy ymüid, y'iñaaygixy jüby ma je Jesús ñaaxnícx anajty yhuijtznäy, y'iñaaygixy tüg cöduy, jadüg tecy ixaay. ¹³ Chi je ángel ajcxy nimay je María:

—¿Miich töxyjäy na'amy co myäxy?

Chi je María y'adzooy:

—Ti ajcxy nHuindzin ñaaxnícx yajnicxi, e ca' nnejhuıyich ma ajcxy ti pidägy.

¹⁴ Jadu'n anajty ymína'ñ, co ñayji'i'ijxi, chi ijxy Jesús ytinäy ma yjiix, e ca' ijxcajpy pen Jesús je' anajty. ¹⁵ Chi Jesús ymína'ñ:

—Töxyjäy, ¿ti co myäxy? ¿Pín m'ixtaayb?

María hue' anajty tijy je aguemy cuend'ajtpi migapxip, paady jadu'n ymína'ñ:

—Huindzin, pen ti myajnicxy Jesús ñaaxnícx, nigapx ma ti mbidägy, e iich nícxy nyajtzoofich.

¹⁶ Chi Jesús ymína'ñ:

—María.

Chi jada' María yhuäg-huimbijty, chi yajxon huindixpejty, chi nimay:

—¡Raboni! —jada hebreo ayuc yhuimbídzimy Huindzin.

¹⁷ Chi Jesús nimay María Magdalena:

—Ca' xyñidooñich, com ca'ni iich nba'ttigıy ma Dios Teedy yajpaady. Nicx müich ixta' nmiüggtjicich, e nima' co nnicxaamich ma Dios Teedy, iich nDeedy etz müich ajcxy mDeedy, iich nDios, etz müich ajcxy mDios nañ jadu'n.

¹⁸ Chi María Magdalena oy yajnimäy je discípulos ajcxy, chi jadu'n nimay:

—Ti n'ixyich je Huindzin Jesús, e jadu'n yi' ti xycapxymöyich co nyajnimähuıbyich müich ajcxy.

Jesús nayguëxici ma ydiscípulos ajcxy

¹⁹ Co je huin'it xiambi chuu'ıy seman ixtigi', aducy anajty tijc'aguı y'ity ma anajty je discípulos ajcxy yajpatcixy, müid co anajty ajcxy tzigi'y je judíojäy ajcxy huídibi anajty midzip'ajtp Jesús. Chi Jesús ytiğiyy cujc'amy ma je' ajcxy, e chi jada' capxpocxy ajcxy, nimay:

—Jotcugi' müich ajcxy.

²⁰ Yam jadu'n anajty ymína'ñ, chi ajcxy yaj'ijxy je' yci' ma je clavo ytiğiyy, etz ycaachyjijp ma anajty jäy ti ycumyüi. Chi yjotcugiyy ajcxy co ajcxy ijxy je yHuindzin. ²¹ Chi jada' Jesús jadüg'oc capxpocx, nimay ajcxy:

—Jotcugi' müich ajcxy. Jadu'n nej iich nDeedy xyquejxyıch ya naaxhuiñ, nañ jadu'n iich müich ajcxy yam nguejxhuäcxy müid iich n'ayuc.

²² Co Jesús jadu'n ymína'ñ, chi jada' ajcxy nibuxujy cöbuxujy nimay:

—Huen Dios yjihui'ñ ymic'ajt xy'adigi'y xyjottigi'y ajcxy. ²³ Huenpinjäyity huídibi müich ajcxy mbocyhuinmeecxyp, nañ ypocyhuinmeecxıpy Dios Teedy. Huenpinjäyity huídibi müich ajcxy ca' ypocy huinmeecxaani, nañ jadu'n Dios Teedy ca' yi' ypocyhuinmeecxa'ñyüi.

Tomás ymibijc co yHuindzin yjugypijcy

²⁴ Tomás je' huidibi anajty miid majmetz yca'pxy Jesús ydiscípulos ajcxy, je' huidibi anajty yajtijp Dídimó, ca' je' anajty jim choonity co Jesús ymiñ oga'n.

²⁵ Chi je jacjadyi ajcxy ymigüg ñimaayi:

—Ti ñich ajcxy n'ixy je Huindzin Jesús.

E chi je' y'adzooy:

—Pen ca' n'ixyich ma yi' yci' je clavo'au, e pen ca' ngihuäxich ngodijiyich ma clavo'au, e ngi' nbidägyich ma ycaachyjijp ma anajty ycumyity, ca' nmibigipyich co yjanchity.

²⁶ Chi jacoductujc xii ajcxy jadüg'oc anajty yajpaady tigoty nidüg'óciy je discípulos ajcxy. Tzooñ anajty Tomás nañ jadu'n. Chi Jesús ymiñ. Agiy anajty tijc co Jesús ytinay'ahuüy cujc'amy ma je' ajcxy. Huin'it ycapxocxy, chi ñimay:

—Jotcugi' miich ajcxy.

²⁷ Chi jada' ñimay je Tomás:

—Pidäg ya ngihuäx ma clavo'au ma ngijich. Najtzxaji' mgi' etz pidäg ma ñich ngaach ma jäy xycumyich, e mibic yajxon tiydudägy.

²⁸ Chi Tomás y'adzooy:

—Ñich miich nHuindzin'ajtyp etz ñich miich nDios'ajtyp.

²⁹ Chi Jesús Tomás ñimay:

—Miid co miich ti xy'ixyich, paady miich ti mmibicy. Jotcujc yi' ajcxy huidibi ca' xy'ixyich, e ti ymibicy co ti njugypicyich co n'o'gyich.

Jada ayuc ngojaaybich ma jada necy, jigix miich ajcxy mmibigipy co Jesús je' yi' je Cristo, je Dios y'ung

³⁰ Ti anajty Jesús ooy tuñ mijhuinmañ ma ydiscípulos ajcxy yhuinduu huidibi ca' ycojaayity ma jadayaabi necy. ³¹ Paady ycix jada ngojaayich jigix ajcxy mmibigipy co Jesús je' yi' je Cristo je Dios y'ung. E co miich ajcxy mmibigipy, huin'it mbaadip jugy'ajtin huidibi ca' tücciyi ycixipy ytigoyipy miid Jesucristo yxi' ycixpi.

21*Jesús ñayguëxigyi ma ydiscípulos ajcxy nihiuxtujcpi*

¹ Co jadu'n jayijp ytuni yjajti, huin'it jadüg'oc Jesús ñayguëxici ma je' ydiscípulos ajcxy jim ma mejypa', je huidibi anajty xijijp Tiberias mejy. E jadu'n ñayguëxici: ² Jim anajty ajcxy Simón Pedro miid Tomás huidibi jäy ytijyp Dídimó. Nañ jim Natanael huidibi anajty cogajp jim Caná Galilea naaxjot. E nañ jim anajty je Zebedeo ymang ajcxy etz jametz discípulos ajcxy.

³ Chi Simón Pedro yminañ:

—Ñicxy n'oc'acxmachich.

Chi ymigügtijc ajcxy yminañ:

—Tzoc ajt jámim.

Chi ajcxy ytigüy ma tüg barco. E je huin'it tzuu ca' ni ti ajcxy majch. ⁴ Co yjobüy jim Jesús anajty ytinäy ma mejypa'. Je' ydiscípulos ajcxy ca' anajty ajcxy nejhuüy co Jesús je' anajty.

⁵ Chi Jesús yminañ:

—Migügtijc, ¿nej ca' ajcxy mbaadyñi acxi?

Chi ajcxy y'adzooy:

—Ca' ni ti.

⁶ Chi Jesús yminañ:

—Pidaaccix ajcxy je huídibí m̄id m'acxmajtzcxixy aa'oy'amy ma yí barco, e huin'it ajcxy mbaadipy acx.

Chi ajcxy pidacy je acxmadzi'ñ aa'oy'amy, e huin'it janch adzaach ajcxy yajpidzimy, co janch may acx anajty ti ytigy. ⁷ Je ymígüg huídibí m̄id Jesús ooy anajty ñaychogyii, chi ñimay Pedro:

—Je' yí, ich ajt nHuindzin.

Co jadu'n midooy Simón Pedro co anajty yjéjty je Huindzin Jesús, huin'it yhuít yajtigy. Com ti anajty yhuít jeñ, com jadu'n anajty jac'oy ytuñ. Chi ytigy mejyjoty huitm̄id. ⁸ Jacjadyii ajcxy ymígügtjic yjady ma mejypa' m̄id je barco, pahuich pajugucy ajcxy je y'acxmadzi'ñ janch ujtz m̄id acx. Hue' anajty ca' ooy yjiguemyity ma mejypa', jéyi anajty migo'px metro yjiguemyity. ⁹ E co ajcxy ymejch ma mejypa', chi ajcxy ijxy co jim anajty jimbajc y'ity n'ixí, e jim anajty acx jimbajc n̄igix huídibí yajtzaayb, e nañ jim anajty tzajcaagy. ¹⁰ Chi Jesús ñimay je' ydiscípulos ajcxy:

—Yajmiingix yí acx tiibi ajcxy mmajtzcxixy.

¹¹ Chi Simón Pedro ypejty barcojoty, chi yajpidzimy huindiztuum y'acxmadzi'ñ ujtz m̄id may'acx. Chi ajcxy michoy migo'px jahuixchigi'px majctugüg acx mijatypi, e jadu'n ca' je acxmadzi'ñ ycich m̄id tzachmay'acx.

¹² Chi Jesús ñimay ajcxy:

—M̄in ajop'ajtcix.

E ni tüg ydiscípulos ajcxy ca' y'amidoohui:

—¿Pin miich?

Com ñejhuuyb anajty ajcxy co je' anajty Huindzin Jesús. ¹³ Chi Jesús ymijhuägy ma je acx cí' etz tzajcaagy anajty y'ity, e chi yajhuäcxy, chi moyday ymígügtjic ajcxy.

¹⁴ E je' je' anajty je midugüg'ocpi co Jesús ñayguëxici ma je' ydiscípulos ajcxy, huin'it co yjugypjicy co y'o'cy.

Jesús yajni'ixiy Simón Pedro ti ytunipy

¹⁵ Co ajcxy y'ajop'ajttay, chi Jesús ñimay je Simón Pedro:

—Simón, Jonás y'ung, ¿nej xyjactzocpich miich, ca'ydi jada jacjadyii ndiscípulo'ichi?

Chi y'adzooy Pedro:

—Huindzin mnejhuuyb miich co ndzojcpich njihuuybich miich.

Chi Jesús ñimay:

—Cuend'at ich njäy, jadu'n nej jihuy borregi cuend'ajtpi yaj'ocy yí yborregi.

¹⁶ Chi Jesús m̄imejtz'oc ym̄inañ:

—Simón, Jonás y'ung, ¿nej xychojcpich xyjihuybich miich?

Chi Simón y'adzooy:

—Huindzin, mnejhuuyb miich co ndzojcpich njihuuybich miich.

Chi Jesús ñimay:

—Cuend'ajtigich njäy, jadu'n nej yí borregi cuend'ajtpi cuend'aty yborregi.

¹⁷ Co midugüg'ocpi oy y'amidooy:

—Simón, Jonás y'ung, ¿nej xychojcpich xyjihuybich?

Chi Pedro yjotmaybjcni co midugüg'ocpi y'amidoohui: “¿Nej xychojcpich xyjihuybich?”

Chi Simón yjac'adzooy:

—Huindzin, miich mnejhuuydaayb tüg'ócy, e nañ mnejhuuyb co ich ndzojcp njihuuybich miich.

Chi Jesús jacñimay:

—Cuend'ájtigich njäy, jadu'n nej borregi cuend'ajtpi cuend'aty yborregi. ¹⁸ Janch janch ñich miich yam jadu'n nimäy: “Co anajty miich mjac'anägnity, ci'm anajty mhuit nayyajñijeniyyi, e mnicxp anajty ma mdimdzocy. E co mjacmijjäyihuipy, huin'it mgi' mnajtzxajihuipy, e huingbi mhuit xyañijeniihuipy, e xyajnicxyipy ma anajty ca' mdzocy.”

¹⁹ Co Jesús jadu'n ymínañ, chi Pedro yajhuinjihuipy jadu'n nej anajty jäy ajcxy yaj'öga'ñiyi mñid Jesús y'ayuc ytiy'ajt ycixpi, e nañ ma yi y'o'cin tiy'ajt yegipy co ymñid Dios ytiy'ajt.

Je discípulo huidibi anajty Jesús ooy tzocy jihuüy

²⁰ Chi Pedro ñayjiñ'ijxi, chi ijxy co anajty tú'ciy anajty ymiingixy je' ydiscípulo huidibi anajty Jesús ooy tzocy jihuüy je' huidibi anajty iñaayb huingon ma Jesús ma je mesa co anajty y'adzuu'ajtcixy. Je' huidibi nimay je' yHuindzin:

—Huindzin, ¿pin miich yi' xyciyegam ma yi mmidzip? ²¹ Co Pedro ijxy je' jadügpí discípulo axam Jesús ypanicxyii, chi ymínañ:

—Huindzin, e jadayaabi migüg, ¿ti yi' jadaanip?

²² Chi Jesús y'adzooy:

—Co ixypy ndzocyich co yi' huen jugy'aty ixti mabaad nhuimbityich, ca' miich xypaady mnejhuihuipy ti yi' jadam. Panicxcich miich.

²³ Paady ycixp huinjihuüy je' ymigügtijc ajcxy co je' ymigüg huidibi Jesús ooy tzocy jihuüy ca' anajty y'öga'ñ. Per Jesús canan je' anajty jadu'n ytiyyp co ca' y'öga'ñ. Hue' anajty ti ymínañ janchtiy:

—Pen ndzojcpíich ixypy co jada migüg yhui'mipy ixti mabaad nhuimbityich, ca' miich xypaady mnejhuihuipy ti yi' ytunamy.

²⁴ Je' je' je' Jesús ydiscípulo huidibi tiy'ajt yejcp jadu'n nej Jesús ytuñ y'ayoy etz yjajty y'ayoy, e nañ yi' je' huidibi cojay nej Jesús ytuñ y'ayoy, yjajty y'ayoy. E ñich ajt nejhuüyim co janch yi' je' tiy'ajt huidibi ti yecy.

²⁵ May ooy tijaty mij huinma'ñ Jesús jactuñ. Co ixypy yajcojaydäy tüg'óciy, ca' yi' naaxhuñybi ixypy yhuaadüy mñid maylibro tzachpídägiy. Jadu'n n'aa'ixiyich.

LOS HECHOS

Jadu'n Nej Jesús Y'ayuccapxhuäcxpi Ytuun Yjajti

¹⁻² Ma je jayijp'atypi necy, migüg Teófilo, ti nyajnijayiy tüg'óciy jadu'n nej Jesús ytuun etz jadu'n nej yaj'ixpijctzondacy oga'n'aty, ixti cooni ypättigiy tzajpjoty. Ca'ni Jesús anajty ypättigiy tzajpjoty co huin'ijxy je' yjáy huidibi yi' y'ayuc yti'ajt capxhuäcxib, e chi müid je Espiritu Santo najztunüy najtz'ane'müy nej huaad ajcxy ytuüny. ³ Co anajty Jesús y'ögy, chi ñayguëxici canaag'oc ma je' ydiscipulos ajcxy, e huixchigüipx xii ñayquëxigo'ci ma je' ajcxy, yajniquëxigy huädz co anajty yjuugyity, etz nañ yajmüidmüydacy je' yjáy je Dios y'ayuc etz Dios y'ané'min.

⁴ Co anajty jim ijtcixy tügmucy müid Jesús, chi Jesús je' ydiscipulos ajcxy ane'my co ca' huaad jim choongixy jim Jerusalén. Chi ajcxy nimay:

—Ahuijxcix tiibi Dios nDeedy ahuanüy ma müich ajcxy, je huidibi müich ajcxy nyajmüidmüydägy. ⁵ Janch Juan je Bautista jäy yajniibejt müid nü, tzojz müich ajcxy xy'adigihuiipy xyjottigihuiipy yi Espiritu Santo.

Jesús ypättigiyñi tzajpjoty

⁶ Ni'amugü anajty ajcxy jim müid Jesús, chi ajcxy yajtiy:

—¿Huindzin, nej myajcödigoyamy je Israeljäy ymidzip jadachambi?

⁷ Chi Jesús y'adzooy:

—Ca' xypaatcixy mnejhuüygixy je xii je tiempo mina anajty ti yhuaad'ajtni, mina Dios Teedy tuna'n tijaty, je' tügpajc müid cötújcín tijaty ytuunamy. ⁸ Co anajty je Espiritu Santo chinaydacpicy ma ajcxy mjot mhuinma'n mbaatcixp mic'ajt. E chi mdzoongixp ayuc capxhuäcxpi müid ich ycixpi ya Jerusalén, etz tüg'óciy Judea ñaaxjot, etz jim Samaria, etz huindu'my ñaaxhuiñybi.

⁹ Ti jada ajcxy jadu'n yajnimäy, jim anajty ajcxy yhuindüxcixy, chi Jesús chajppejtni. Chi miñ joc yeeg huidi Jesús yajniidigoyday, chi ajcxy ca' ocjac'ijxni. ¹⁰ Jadu'n anajty ajcxy chachpät'ijxcixy tzajpcixy, co Jesús ypättigiy. Huin'it mejtz yëydijc ñayguëxici ma je' ajcxy ymüjc, poob huit müid, ¹¹ chi ajcxy ñimaayi:

—Galilea jäy ajcxy, ¿nej co mdzachpät'ijxcixy tzajpcixy? Yi Jesús huidibi ti chajppety, ti choon ma müich ajcxy, minaamb jadüg'oc jadu'n nej ti m'ijxcixy co ti ypättigiy.

Matías yajhuin'ijxy co Judas ytung jijptunüyipy

¹² Huin'it Jesús ydiscipulos ajcxy chooni ma je cögor huidi xüijip Olivos, yhuimbüjtcixni jim Jerusalén, ca' ooy yjiguëgyity, jëbi yajyöy sábado xii, jadu'n nej Moisés ycötújcín y'ane'my. ¹³ Co ajcxy yja'ty ma je cajp, chi ajcxy ypejty ma je cuarto müimetz nühuujtzpetypi ma ajcxy anajty müidity yjättac. Jim yi' anajty ajcxy: Pedro, Jacobo, Juan, Andrés, Felipe, Tomás, Bartolomé, Mateo, Alfeo ymang Jacobo, Simón je Zelote etz Judas Jacobo ymiguëx.

¹⁴ Tüg'óciy anajty ajcxy y'ijtcixy tügmucy Dios mibijctzooigixy chajpcapxy-capxcixy. Ymüid ajcxy anajty Jesús y'uch etz María Jesús yta, etz jacjadyii töxyjäydijc.

¹⁵ Huin'it xii Pedro ytinayigy agujc'amy ma je ymüigügtijc ajcxy huidibi yajmij'ajtp Jesús, huidi anajty ajcxy naybaatip migo'px ja'iipxti jäy, chi nimay ajcxy:

16 —Migügtjic, copicy co jada yajcuydúnipy nej Dios ymínañ ma ñecy huidi jaybety ijtp, ma David jaay Dios y'ayuc, ma Dios nigapxy Judas. Je'huidi coduu'ajt taabi je judíoJay ajcxy majch Jesús. 17 Je Judas yaj'amichomujcp je' anajty müid ich ajt, paatip anajty Dios ytung tú'ciy müid ich ajt. 18 Chi Judas ñicxy juy tüg naax müid je muju'n huidibi anajty ti paady müid yjibichuinmañ. Chi jim mic'amy ycäy tzuxcödeañ, chi ytopxy ymooxac, e chi ytiinch ypidzimday. 19 Je jäy ajcxy huidibi anajty tzinaayb jim Jerusalén, co nejhuiy, chi ajcxy yximoy je naax Acéldama, hue' je' yhuimbídzimy ma je' ajcxy ayuc, ni'py ñaaxjot. 20 Jada je' je ayuc huidibi David yjaay ma je Salmo necy:

Hui'mip najtz'ixiy yi' chinaaydac. E ca' pin yajtunipy.

Nañ jadu'n ymínañ:

Huingbi huen yajnicxyii je' ytung.

21-22 Copicy co tüg yéydjic huidibi müid ti yhuidity nHuindzin Jesús quipxyi müid ich ajt, huen tunipy je tung huidibi Judas anajty ytumyib, maab Juan yajñibety ixti taabi xypuyöyduutim co pättigiy tzajpjot, tüg jébi testig'aty müid ich ajt co Jesús yjugyijcy.

23 Chi Jesús ydiscípulos ajcxy huin'ijxy mejtz jäy: tüg jäy huidi anajty yxii José, huidi yxii anajty yajtij Barsabás etz nañ jadu'n anajty yajtij Justo. E huin'ijxy ajcxy nañ jadu'n Matías. 24-25 Chi Jesús ydiscípulos ajcxy Dios mibjctzoy, ymínañ ajcxy:

—Huindzin Dios, m'ijxyp mnejhuiyb tüg'óciy jäy yjot yhuinmañ, yajni'ixiiygich jada metzpi jäy huidibi müich nidügti ti nhuin'ixy, je huidibi jébi jijptigiy müich mdung tú'ciy müid ich ajcxy, etz huidibi apóstol'adip. Huen jada jäy jijptigiyii je tung huidibi Judas ti yajtigooy, co ytundigooy e ñicxy ma ypaadyii.

26 Chi ajcxy suerte ijxy, e je suerte ñibidzimni je Matías. E huin'itiy je Matías oy ymicho'ndigiy ma je nimajtügpi ajcxy huidi ycapxhuäcxy Jesús y'ayuc.

2

Co je Espíritu Santo ycidacy choñ tzajpjoty

1 Co oy je Pentecostés xii paady, jim anajty Jesús ydiscípulos ajcxy ni'amugi' tú'ciy ijtcixy. 2 Huin'it janch tímitiini yajmidooy tüg ne'min, choñ tzajpjoty, jadu'n nej poj micpi. Chi yaj'ujtzaay je tigot ma anajty iñaaygixy. 3 Chi nigidaaci nidüg nidügti toodz jadu'n nej jinye'n. 4 Chi je Espíritu Santo nidüg nidügti ajcxy y'adigiyi yjottigiyi. Chi ytigiyixni capxy miydaacp nije' nije' ayuc jadu'n nej je Espíritu ajcxy yajcapxyii.

5 Jim Jerusalén anajty je huin'it xii may judíoJay ajcxy huidibi tzoomb canaag agajp. Hue' ajcxy chachcuydumb judíoJay ycostumbre. 6 Co je cajpjäy ajcxy midooy je ne'min, chi ajcxy ooy yöymujcy. Chi je mayjäy ooy yhuinmay'ahuidijty, co ajcxy midooy chachcapxcixy chachmiydaaccixy ma yci'm'ayuc. 7 Je mayjäy ajcxy ooy chigiy jihuiy, chi ajcxy ñayñimaayi miñ xyipy:

—Ix ¿nej cay Galilea jäy jada ajcxy nidüg'óciy huidibi jadu'n tzachcapxcixy tzachmiydaaccixy ich ajt ngi'm'ayuc? 8 ¿Nej ich ajt co nmido'mbícim co tzachmiydaaccixy ich ajt n'ayuc huidibi ti nmibi'c'ájtim? 9 Ya anajty ajcxy Partia jäy, Media jäy, Elam jäy, Mesopotamia jäy, Judea jäy, Capadocia jäy, Ponto jäy, etz cham huidi tzinaayb ajcxy jim Asia ñaaxjot, 10 etz huidibi ajcxy tzomb jim Frigia, etz Panfilia, huidibi tzomb jim Egipto, etz huidibi tzomb

jim ma yi Africa ñaaxjot Cirene ninaxy. Nañ jadu'n jim romanojäy huidibi ya adzinaayb. May ajcxy jim huidibi judíojäy etz nijējity huidibi ca' yjudíojäyity huidibi judíojäy ycostumbre ajcxy ti yjijptigiyyi. ¹¹ Ya nañ jadu'n Creta jäy etz Arabia jäy; e ñch ajt tüg'óciy nmidoohuim jada jäy ajcxy nigapxcixy nimiydaaccixy huidi Dios ti tuñ mijcajee ma ñch ajt ngi'm'ayuc.

¹² Nidüg'óciy ajcxy ooy jihuüy, e chi ajcxy ooy yhuinmay'ahuidijty, miñ xyipy ñay'amidóohuigixy:

—¿Nej jada yhuimbizima'ñ?

¹³ E nijējity jäy jēyi nixigy yajxigy, yminaangixy:

—Muucip jada yi' ajcxy.

Pedro yaj'ixpijcy je mayjäy

¹⁴ Huin'it Pedro ytinaaygy miid je nimajctügpi apóstoles, e ytiigy capxpi mic yminañ:

—Yēdijctijc ajcxy huidibi tzinaayb Judea etz tüg'óciy huidibi tzinaayb ya Jerusalén, nejhuñhuipy miich ajcxy jada e midou ajcxy yajxon huidibi ajcxy nyajnimāhuamyb. ¹⁵ Jada jäy ajcxy ca' ajcxy ymügyii jadu'n nej miich ajcxy minaangixy. Tim petyxiini jada cham. ¹⁶ Jada je' huidibi ñigapxy je Joel, Dios y'ayuc najtzcaxxiybi, co jadu'n mina'ñ:

¹⁷ Je huin'it xii mina anajty je naaxhuiñybi cixa'ñ, jadu'n Dios minañ, nya-jhuäcxtāhuibich je nEspíritu ma tüg'óciy naaxhuiñyjäy. Miich mñix etz mmang ajcxy capxhuäcxip ñch n'ayuc ndiy'ajt, e je yujcyeepidijc ajcxy yhuin'ixipy ooy mijhuinma'ñ, e je mijjäydijc cumāhuipy ajcxy.

¹⁸ Nyajhuäcxtāhuip ñch je nEspíritu huin'it xii ma ñch ndumbi yēdijcpi töxyjäybi, e yi' ajcxy capxhuäcxip ñch n'ayuc ndiy'ajt.

¹⁹ Nyajquëxigibich tzajpcixy huidijaty oy chigiyyi, e ya naaxhuiñ nyegipyich tiy'ajt: ni'py, jin etz jinjoc.

²⁰ Yi xii ahuimbidity coodz, etz je po' ahuimbidity nej ni'py, ma anajty ca' miñ je xii je tiempo mina anajty mina'ñ je Huindzin Dios. Mij ayo'n ji tunaanip jadaanip iixna' quëxna'.

²¹ E tüg'óciy jäy huidi miyaaxp ojadajtp je Huindzin Dios, Dios ajcxy yanjndzögib y'alma.

²² Chi Pedro yjacminañ:

—Amido'ijtcix, miich judíojäy ajcxy, jadu'n nej cham nmina'na'ñich. Je Jesús huidibi tsoon jim Nazaret ti xyaj'ijxcixy Dios ymic'ajt, mijhuinma'ñ, etz ijxpejt, jadu'n nej miich ajcxy ti m'ijxcixy ti mnejhuñygyxy. ²³ Jada yajcyejcy ma miich ajcxy, jadu'n nej anajty Dios ti yajniögüdy, e ti huinmay. Ajcxy mmajch je Jesús e myaj'ögy ajcxy, chi ajcxy myajrucudzepty miid jibic jäydijc y'ané'min. ²⁴ Chi Dios yajjugypijcy yajnihuädzictuty ma yi ó'cin, ca' huaad yhu'i my ögy huinixii. ²⁵ Je David ñimiydac Jesús chi yminañ:

Nejhuñyibich co je nHuindzin Dios y'ity ma ñch nhuinduu. Yi' ijt ma ñch n'a'oy, jigix ca'ydi pin xy'adzigiyyich xyajhuinma'ñdygooyich.

²⁶ Paady ti njotcugiyich, e ti ngapxypidzimyich co ooy njotcujich. Paady co oy n'ögibich etz ninix ñaaxtigihuiipy, ca' ndajy mayich.

²⁷ Co miich Dios ca' myajhu'i ma'ñ ñch n'alma ma ñaaxtigiydac. Ni mga'aa'ixihuiipy, co miich mdumbi huidibi ooy mdzocy, co nicxy ñinix ñaaxhuindigoydäy.

²⁸ Miich Dios, ti xyajni'ixiyich yi tzinaayin huidibi ymiid jugy'ájtin huinixiibi. Xyajjotcugihuibich miid co xymiid'idipyich.

29 Chi Pedro yjacmīnañ:

—Mīgügtijc ajcxy, huädz miich mnejhuūygyxyc co iich ajt nmij'ap David y'o'cy etz yajnaaxtigüiyi. E ma ñaaxtigüiy nmīdñi jē'ajt chambaad. 30 Je David hue' je' anajty Dios y'ayuc ñajtzcapxiybi, e ñejhuūyb anajty co ti Dios yajnimāyīi huīdibi ca' y'anīijty. David ñejhuūyb anajty co ma y'ap y'oc ma'xung'adipy Cristo, jaydēbi ané'mīpy ma David y'ane'mdac. 31 Jadu'n co David jecy'ajty huinjūhuūy e nejhuūy etz nigapxy jadu'n nej yjugypigañ je Cristo co anajty ti y'ögy. E ymīnañ co ca' yi' y'alma yhuí'mīpy jutjoty etz ñiñicx ca' ypūdzipy. 32 Dios yajjugypijcy je Jesús co y'o'cy. Jada tiy'ajt iich ajcxy nidüg'óciy nidiy'ajt'ajtpy. 33 Jadu'n Dios Jesús mooy mij'ajt jūby tzajpjoty, chí yajcīdīgüiyi je Espíritu Santo huīdibi Dios Teedy y'ahuanīy e tūg'óciy huīdibi miich ajcxy ti m'ijxcixy ti mmīdoogixy jūby yi' choon' ma yi'. 34 Com David ca' je' chajppejty, je David cī'm ymīnañ:

Je Huindzin Dios nimay iich nHuindzin: “ñña' ma iich a'oy'amy,

35 ixti cooni nmīmadactāhuībich yi mmīdzip, jadu'n anajty nipaady nej jūhuūy mdēcypocpejt'adyīi.”

36 Chi Pedro yjacmīnañ:

—Ñejhuūhūpy nidüg'óciy yi Israel jāy ajcxy co janch janch co je Jesús huīdibi miich ajcxy myajcruudzpejt, Dios yajñībīc co yhuindzin'adipy ma miich ajcxy, etz Cristo huīdibi xynīhua'nīpy xyajtzōgipy ajcxy.

37 Co je mayjāy ajcxy jadu'n midoy, chí ajcxy yjotyungūy, e amidoy ajcxy je Pedro etz jacjadyīi jāy huīdi Jesús y'ayuc capxhuācxi anajty, chí ajcxy ymīnañ:

—Mīgügtijc, ¿ti iich ajcxy jēbi huaad nduñ?

38 Huin'it Pedro y'adzooy:

—Jothuimbijtcix e niibejtcix nidüg nidüg mīd Jesucristo yxi, jigix Dios miich ajcxy mbocy xyhuinmeecxipy. E jadu'n Dios xymōhūpy je Espíritu Santo. 39 Huīdibi Dios y'ahuanīy miich yi' ajcxy mje' etz m'ung ajcxy, etz m'ap m'oc ajcxy, etz nañ jadu'n je jāy ajcxy huīdi jiguēmīp, etz jacjadyīi jāy ajcxy huīdi Dios huin'ixamy.

40 Mīd jadayaab ayuc etz jacjadyīi ayuc Pedro yajnimay capxhuīy je mayjāy ymīnañ:

—Ca' mmījpidaaccix je jāy ajcxy y'ayuc huīdibi ca' capxymīdoy Dios.

41 Jadu'n yjajti, je jāy ajcxy huīdijaty mībīc Pedro y'ayuc, chí ajcxy ñiibejtay huin'it xi. Ñimayīy ajcxy huīdibi mījpīdac Jesús y'ayuc oy nidügūg mildi jāy. 42 Tūg'óciy ajcxy anajty panīcxcixy yi xpījcin jadu'n nej yi Jesús y'apóstoles ajcxy yaj'ixpījcy. Chīnaaygixy yquipxyjot yquipxyhuinmañ. Etz Dios mībijctzoogixy e ñayyōymūjcgixy co anajty ajcxy chajcaagy tujc-huācxaangixy.

Jadu'n nej je mībijpīdīc chīnaaygixy jugy'ajtcixy

43 Nidüg'óciy ajcxy anajty ooy mīcājee jūhuūy. E Jesús y'apóstoles ajcxy ijxpejt etz mījhuinmañ ooy anajty tungixy. 44 Nidüg'óciy je jāy ajcxy huīdibi anajty ti ymībijcciy ijtp anajty ajcxy tūg mucy, e yajhuācxcixy tijaty ajcxy anajty ymīd, moogygixy ymīgūgtīc. 45 Ytoocpy anajty ajcxy yi' ypidāgy huīdibi anajty ymīd, e chí anajty yajhuācxcixy yi meēñ nīje' nīje' nej pin ti yajmayjaty. 46 Jabom jabom anajty ajcxy ñayyōymūgyīi ma Dios ytīc, etz nañ ñayyōymūgyīi ajcxy ma ytīc tzajcaagy tujc-huācxcixy etz ycaaygixy y'uuccixy nī'amugi' jotcujc mīd ajcxy y'oyjot y'oyhuinmañ. 47 Ñi'īgixy nīyaacxixy

yí Dios, e tüg'óciy jáy nayyajmij'ájtíp anajty ajcxy. Chi je Huindzin Dios yajmayíy jabom jabom yí mibijcpidijc, yí' huidibi anajty patp nidzoocin.

3

Tüg tecyma'tpi chögy

¹ Tüg xii Pedro etz Juan ypättigäy ajcxy tú'ciy ma Dios ytijc, mijminacy xii anajty, je' je' anajty je hori mina ajcxy Dios mibijctzoogixy. ² Jabom jabom anajty jáy yajnicxcixy ma je Dios ytijc'aguu tüg tecyma'tpi, jadu'n je' anajty ti yma'xung'aty. Chi ajcxy pidägy je tecyma'tpi ma je Dios ytijc'aguu huidi anajty yxii la Hermosa, jigix jim pijctzohuipy meen ma je jáy ajcxy huidibi tigiiyb ma Dios ytijc. ³ Co je jáy tecyma'tpi ijxy Pedro etz Juan ytigihuaangixy anajty ma Dios ytijc, chi pijctzoy meen. ⁴ Co Pedro etz Juan ijxy je tecyma'tpi, chi Pedro yminañ:

—Huindicxpejtich.

⁵ Chi je jáy huindicxpejty, yjijp'ijxpy anajty ti möhuanip. ⁶ Chi Pedro je tecyma'tpi nimay:

—Ca' nmüdidyich plata, oori, huidibi janchtiy nmüdich je' nmöhuip. Müd Jesucristo je Nazaretpi ymic'ajt iich miich nimaayb: Tinaayig etz yöy.

⁷ Huin'it Pedro majch je tecyma'tpi ma a'oygi', e yajtinaygugiiy. Huin'itiy y'oyii ymicpijcy je ytecy etz ytecyöy. ⁸ Chi je tecyma'tpi ytinaygugiiy etz chi najtztiibiiy. Chi jada' yöychoñ e ytigiiy ma Dios ytijc müd Pedro etz Juan yöyñip ñidjicni yujctjicni, yam Dios ooy jáymech. ⁹ Tüg'óciy je mayjäy ijxy co anajty yöyñip etz jáymech yí Dios. ¹⁰ Je jáy ajcxy y'ijxy'ajtpy anajty ajcxy je tecyma'tpi e ñehhuiygixyp co je' anajty je' huidibi pijctzohuo'cp pi'c meen ma Dios ytijc'aguu huidi anajty yxii la Hermosa. Paady je jáy ajcxy ooy chigiiy jihuuy, co ajcxy ijxy nej anajty yam ti ytunyii ti yjadyii.

Pedro nimiydacy nej anajty je tecyma't ti chögy

¹¹ Je tecyma'tpi huidibi anajty ti chögy ca' anajty ixmach Pedro etz Juan, e tüg'óciy yí jáy anajty ooy jihuiygixy huinmaaygixy. Chi mic'amy mayjäy nimujcy Pedro etz Juan jim ma yí Dios ytijc huinduu huidibi jáy ytiijpy Salomón. ¹² Pedro co jadu'n ijxy je mayjay, chi yminañ:

—Judío yëydijctijc, ¿nej co mdzachuinmaaygixy mijcajee? ¿Nej co iich miich ajcxy xychachuindicxcixy jadu'n nej jihuiy iich ajcxy jada jáy ti nyajtzögyich ti nyajyöychooñich müd ngimmic'ajtich, o müd co iich ajcxy ooy nDios'ojadat? ¹³ Iich'ajt nDios, je Dios huidi nmij'ap nmijteedy, je Abraham, je Isaac, etz je Jacob y'ojadajt, yí' ti yajtzögy jada tecyma'tpi, jigix yajcömayipy yí' y'ung Jesús huidibi miich ajcxy mgiiyepc ma je tungmüdpi. E co je gobernador Pilato je' najtzmadzihua'ñ, miich ajcxy ca' m'aa'axiiy. ¹⁴ Ma yjapadyii ajcxy mgapijctzoy co huen yajnajtzmadziy, je huidi anajty yajpaatp huadz etz tudägy, chi miich ajcxy mbijctzoy co huen yajnajtzmadziy tüg jáy huidibi anajty ti yjääyaj'o'cy. ¹⁵ Jadu'n je jáy ajcxy yaj'o'cy je' huidibi anajty jugy'ajt yejcp. Je huidibi Dios yajjugypijcy ma anajty ti y'ögy e jada tiy'ajt iich ajcxy nidiy'ajt'ajtpyich. ¹⁶ Müd co ti mibicy Jesús yxii, je mijhuinma'ñ huidibi Jesús ymic'ajt ti tuñ müd jada pa'mjäy huidibi miich ajcxy m'ijxyp mnejhuuiyb. Com ti mibicy Jesús paady ti chögy janch yajxondicni, jadu'n nej miich ajcxy nidüg'óciy ti m'ijxcixy.

¹⁷ Chi Pedro yjacminañ:

—Nmigügtjicich, nejhuiybich co miich ajcxy etz mhuindzindijc yaj'o'cy Jesús, müd co anajty mganejhuiygixy ti anajty ajcxy mduungixy. ¹⁸ Jadu'n cham Dios ti cuyduñ jadu'n nej Dios y'ayucnajtzcaxxiybi ymīnañ co copicy co yi Cristo yajnaxipy ayo'n. ¹⁹ Paady jātyim jothuimbijtcix miich ajcxy ma Dios, jigix ajcxy mbocy yajjōtztāhuipy. Huin'it je Huindzin Dios xyanjiguxipy ajcxy jōtcujc'ājtin huinixi, ²⁰ e yi' quexamb je Jesús, je Cristo, je huidibi Dios jayijp'aty yhuin'ijx co quexañ ma miich ajcxy. ²¹ Oy jadachambi Jesucristo y'oc-hui'mipy jiiyby tzajpjoty ixti cooni Dios anajty yaj'oyiydāy tijaty, co jadu'n yjaay yi' y'ayucnajtzcaxxiybi huidibi müd huādz yjot yhuinmañ huidibi ajcxy jecy'ajty tzinay. ²² Jadu'n Moisés nimay iich ajt nmij'ap nmijteedy jecy'ajty: “Je Huindzin Dios xyanjiguxaana miich ajcxy tūg yi' y'ayucnajtzcaxxiybi, huidibi pidzimamyb ma miich ajcxy mjuugy mmigūg jadu'n nej iich yi' xyguejxy. M'amido'idipy miich ajcxy yi' y'ayuc. ²³ Jadu'n yjadipy co tūg'ōciy jāy huidibi anajty ca' capxymidooy je Dios y'ayucnajtzcaxxiybi, huādz ajcxy ytigoydāhuipy, e tūg jiiybicy ajcxy idipy ma judío jāy ajcxy yajpaady.”

²⁴ Chi Pedro yjacmīnañ:

—Jadu'n jada tūg'ōciy Dios y'ayucnajtzcaxxiybi, chondacy ma Samuel ixti ma jacadyiini ajcxy, ñigapxtay ajcxy jadu'n nej cham ytuñyii yjadyii. ²⁵ Yi Dios y'ayucnajtzcaxxiybi ajcxy, miich je' anajty ajcxy mmij'ap mmijteedy. E je ayuc huidibi Dios yajnimay Abraham ycuydunaamyb müd miich ajcxy co jadu'n ymīnañ: “Ngonúucxibich tūg'ōciy naaxhuiñjāy müd tūg miich m'ap m'oc.” ²⁶ Co Dios y'ung y'o'cy, chi Dios yajjugypijcy jadūg'oc, e quejxy jayijp ma miich ajcxy, jigix xyconuucxixipy, etz jigix nidūg'ōciy miich ajcxy m'ixmadzipy yi mībichuinmañ.

4

Pedro etz Juan ma tungmūdpi yhuinduu

¹ Pedro etz Juan jimni anajty tzachmūdmīydaaccixy je mayjāy ajcxy, co oy miingixy je judío teedy ajcxy, müd je soldado huindzin, je tzajptijc cuend'ajtpi etz müd saduceojāy. ² Ooy ajcxy anajty yjotmātcixy co Pedro etz Juan yaj'ixpijccixy anajty je mayjāy etz nimaaygixy co yi ōcpi jugypigipy yi' ajcxy, com co Jesús yjugypicy co y'o'cy. ³ Chi je tungmūdpi ajcxy majch Pedro etz Juan, e chi ajcxy pidacy pujxtigoty ixti com jabomni, com ti anajty chu'iiñ. ⁴ Mayjāy ajcxy huidibi anajty ti amido'ijtcixy je Pedro y'ayuc ymībijc ajcxy. E hue' je mībijcpidijc, ac yēdyijctijcpi, yajmichomuicy jahueen ycamigoox mīlity.

⁵ Je com jabom ajcxy ñaymūjccī jim Jerusalén judío jāy tungmūdpi, je mijjāydic etz yi escribas. ⁶ Nañ jadu'n jim anajty Anás huidibi anajty ane'mb je teedy ajcxy, etz je Caifás, je Juan, je Alejandro, etz tūg'ōciy teedy mijtungmūdpi yjugymigūg. ⁷ Chi ajcxy pidacy Pedro etz Juan cujc'amy ma anajty ajcxy ñaymugyii, chi ajcxy y'amidooy:

—¿Pīn miich ajcxy ti xymōy cōtujcin co jada jadu'n ti mdungixy?

⁸ Huin'it Pedro ymīd anajty Espīritu Santo ma yjot yhuinmañ, chi ymīnañ:

—Miich ajcxy tungmūdpi etz judío jāy mijjāydic, ⁹ yi' iich miich ajcxy cham xyaj'amidoob yi oyi'bi tijtuñ ma tūg pa'mjāy e nejhuihuaangixy nej ti chōgy. ¹⁰ Cham nimiydactāyich ma miich ajcxy mhuinduu, jaydēbi ajcxy nejhuiydāhuipy tūg'ōciy judío jāy, co jada yaabi jāy huidibi anajty tecyma'tpi, cham yajpaady ya ma miich ajcxy mhuinduu mic oy, müd je mic'ajt huidibi

Jesucristo je Nazaretpi yejcpy, je jäy huidibi miich ajcxy myajcruudzpejt, huidibi Dios yajjugypijc co y'o'cy. ¹¹ Yi Jesús jadu'n nipaady nej tüg tzaa oybi, huidibi ajcxy potzpidijc, ca' yajtúngixy co ytijccojcixy. Jesús cham ti paady mäjtung ma Dios, jadu'n yi' ni paady nej tüg mij tzaa huidibi ytungbaatp ma poch ytaatz. ¹² Ca' jac ni pin huidibi jëbi xyajnüdzoocim ajt n'alma. Jesucristo yi' je' tügajc huidibi Dios yejc ma jäy ya naaxhuiñ huidibi jëbi xyajnüdzoocim ajt n'alma.

¹³ Co je mäjtungmüdpj ajcxy ijxy midoy jadu'n nej Pedro etz Juan ajcxy huinmic jotmic ycapxcixy, etz nejhuüiy co ca' ajcxy y'ixpicyjäyity, chi ajcxy ooy jihuy huinmay. Nañ yi' ijxajp ajcxy co je' anajty huidibi ajcxy ti müd huidity Jesús. ¹⁴ Cha co yjactimjimity anajty je jäy huidibi anajty ti chögy ytinäy müd Pedro etz Juan, paady ajcxy ca'ajty nej midziptzoonipy. ¹⁵ Chi je tungmüdpj ni'ane'mdiy huen yajpidzimyüi Pedro etz Juan ma je mayjäy anajty ñaymugyüi, jigix ac jëyi tungmüdpidijc iyyöyaangixy capxyöyaangixy Pedro etz Juan ypocy. ¹⁶ Chi ajcxy ymïnañ:

—¿Ti cham nduunim müd yijüibi jäy ajcxy? Com tüg'óciy jäy huidibi tzinaayb ya Jerusalén ñejhuüiyb ajcxy co ti tüngixy mijhuinma'ñ, e ca' huaad iich ajt nmïnaanim co ca' yjanchity. ¹⁷ Tzoc capx'adujcim co ca' huaad ajcxy jacnimüdyägy Jesüs jadachambi etz jacnicxpi xii tiempo.

¹⁸ Chi ajcxy mijhuoy Pedro etz Juan, chi ajcxy nimay co ca' huaad ajcxy ni nej ocnimüdaacnip, ni ca' jacyaj'ixpigipy müd Jesüs yxii. ¹⁹ Huin'it Pedro etz Juan y'adzooy:

—Huinmaaygix miich ajcxy ci'm pen tïy'ajt jada ma Dios co iich miich ajcxy ngapxycöbigipy yajijp, ca'ydi yi Dios. ²⁰ Com iich ajcxy ca' nni'amonaangixy jadu'n nej iich ajcxy ti n'ixy ti nmïdoy.

²¹ Huin'it je tungmüdpj ajcxy adzigi'ñ migapxy Pedro etz Juan, e najtzmadzïy ajcxy. Ca' ajcxy mihuinma'ñybaty nej tzaachytunipy Pedro etz Juan. Com tüg'óciy jäy yjäymejchpy ycömaayb anajty yi Dios jadu'n nej anajty ti ytuñyüi ti yjadyüi. ²² Je jäy tecyma'tpi huidibi tzooc co Dios mijhuinma'ñ ytuñ, ymüd anajty yjimajt huixchigüipx naxy.

Je mibijcpidijc ajcxy pijtzoogixy ma Dios jotmic'ajt

²³ Chi Pedro etz Juan co yajnajtzmazdzy, chi ajcxy ñicxy ma ymügütijc anajty, yajmüdmüydactay tüg'óciy jadu'n nej teedy huindzin etz mijjäydic anajty ti ñimäyigixy. ²⁴ Co jada ayuc ajcxy midoy nidüg'óciy ajcxy tú'ciy yjot yhuinma'ñ pidacy, chi ajcxy Dios mibijctzoy ymïnañ ajcxy:

—Huindzin Dios, miich je' ti m'oyduñ je tzajp, je naaxhuiñybi, je mejy etz tüg'óciy tijaty. ²⁵ Miich müd mEspiritu je David myajcapxy, e yi' jadu'n ymïnañ:

¿Ney co jada naaxhuiñybi jäy chachhuaangixy chachjihuiygyxy, e yi' jäy ajcxy huinmaaygixy huidibi ca' ytimytiijity?

²⁶ Yi reydic ya naaxhuiñybi midziptzoon ajcxy yi Dios. Etz je tungmüdpj cajp cajp ñaymujci ajcxy, midziptzoñ ajcxy Huindzin Dios, etz midziptzoñ ajcxy Cristo.

²⁷ Com janch co je rey Herodes etz yi gobernador Poncio Pilato ñaymujci ya ma jada cajp müd huidibi ca' yjudíojäyity ajcxy etz müd judíojäy ajcxy, midziptzoñ ajcxy yi m'ung Jesús huidi anajty ti mhuin'ixy. ²⁸ Yi' ajcxy ti cuydungixy tüg'óciy jadu'n nej miich, Huindzin Dios, ti myajnigödügy jadu'n nej ytunüyb yjadzyb. ²⁹ Jadachambi Huindzin Dios, ix jadu'n nej yi tungmütpi ychachmijotmä'tcixyich. Mo' yi mdumbi ajcxy jotmic'ájin, jigix

m'ayuc ajcxy capxhuäcxipy amic jotmic, ³⁰ e mïid miich mmic'ájtin chögipy pa'mjäydijc, tunipy ajcxy tijaty iixpejt etz mijhuinma'n mïid yi m'ung Jesús yxii, huídibi mïid huädz yjot yhuinma'n.

³¹ Co ajcxy mibijctzoday, chi je naax chuyuuy ma anajty ajcxy tügmucy jajpaatcixy, etz nidüg'ócíy yi' ajcxy ymic'ajt mooyi je Espíritu Santo, e yi Dios y'ayuc capxhuäcxixy anajty amic jotmic.

Je mibijcpi:dijc tú'cíy anajty ajcxy yjot yhuinma'n

³² Je mayjäy huídibi anajty ti mibicy, tú'cíy ajcxy yjot yhuinma'n. Ni pin anajty ycamina'n co naydüg jé'adyii. Hue' anajty yminaangixy co tú'cíy jé'ájtigixy. ³³ Je majmetzpi Jesús y'ayuccapxhuäcxpi amic jotmic capxhuäcxy je tiy'ajt jadu'n nej je Huindzin Jesús yjugypijcy co y'o'cy. E mij ajcxy Dios ypubejti. ³⁴ Ma je' ajcxy ca' ni ti jajmayajtcixy, com tüg'ócíy tijaty anajty ajcxy ymïid ñaax o ytijc ytoocpy anajty ajcxy, e yejccixy anajty meeñ. ³⁵ Chi je meeñ jajcídigi:ygixy je apóstoles ajcxy e yi' ajcxy moy nidüg nidüg pinjaty jajmayajtp. ³⁶ Jim anajty mïid je' ajcxy tüg levita jäy huídi anajty yxii José, huídibi ma'xung'ajt ma yi' ñaaxjot mejy agujc huídibi yxii Chipre, je huídibi je majmetzpi Jesús y'ayuccapxhuäcxpi, yxii moy Bernabé, huídibi huimbizim je jajjotcuje'ajtpi. ³⁷ Je Bernabé tocy ytundac huídibi anajty ymïid, e chi mimiin je meeñ, e jajcídigi:y je apóstoles ajcxy.

5

Je Ananías etz Safira ajcxy Dios midundigoy

¹ Chi jadüg yéydijc, huídi anajty yxii Ananías, mïid ytöxyijc, Safira, toogy ajcxy tüg it ytundac. ² Ananías ñayajnihui'mi jac'anaxy je meeñ, e jajninicxy Jesús y'apóstoles ajcxy je jac-hueenip, jadu'n nej jihuiy yejctay tüg'ócíy, etz yi' ytöxyijc ñejhuuyb anajty. ³ Chi Pedro nimay Ananías:

—Ananías, ¿nej co myajtuñ je mujcu' yhuinma'n, e mhuin'ina'n je Espíritu Santo, e ti mbugoñ jac'anaxuyp meeñ nej ti tzoo'adyii yi pidägy tiibi mdoogy? ⁴ ¿Nej ca' anajty yi' miich mdundac'adyii? E co ti mdoogy, ¿nej ca' anajty je' miich mmeeñ'adyii? ¿Nej co jadu'n ti mdundigooy? Dios ti mhuin'iiñ, canan jäy.

⁵ Co jadu'n midoy, jimiyi Ananías yciday, e chi y'o'cy. E tüg'ócíy jäy ajcxy huídijaty nejhuuy, ooy ajcxy chigi:y. ⁶ Huin'it ymiiñ jadyii yujcyeecpidijc, chi ajcxy mo'n Ananías ñinicx, e oy ajcxy jajnaaxtigiy.

⁷ Codugi:g hori naxy, oy yti:giy je Ananías ytöxyijc, e ni ca' nejhuuy anajty ti ti ytuñyii ti yjadyii je ñäy. ⁸ Pedro y'amidoohui:

—Yajnimaaaygich, ¿nej janch jadu'n ti mdoocixy yi mdoundac jadu'n nej ti mgapxcixy?

Chi je töxyjäy y'adzooy:

—Janch jadu'n ti ndoogyich.

⁹ Chi Pedro yminañ:

—¿Nej co ti mnaygäpxigixy mhuin'ina'n yi Espíritu Santo? Cha ma tijc'aguu je jäy ajcxy ytinäy huídi oy ti jajnaaxtigiy mñäy, e jadachambi miich ajcxy xayjnicxaam nañ jadu'n.

¹⁰ Tim huin'itiy Ananías ytöxyijc yciday, e chi y'o'cy. E chi oy ycidägy ma Pedro ytecymijc. Co je yujcyeecpidijc yti:giy, chi ajcxy je' paaty ögy. Chi ajcxy jajpidzimy etz oy jajnaaxtigiy ma ñäy ymijc. ¹¹ Chi tüg'ócíy je jäy ajcxy

huidibi Jesús mibijcp etz tüg'óciy huidibi midou jada nej ti yjadyii ti tyunyii, chi ajcxy ooy chigäy.

Canaag mij'ixpejt etz tñy'ajt

¹² Je majmetzpi Jesús y'ayuccapxhuäcxpi ooy anajty ajcxy Dios ymic'ajt ya-njiguëxici etz iixpejt yejccixy ma yi jäy ajcxy. E tüg'óciy jäy ajcxy huidibi Jesús mibijc jabom jabom anajty ñayyöymújcigixy ma Dios ytijc huinduu huidibi yxii Salomón. ¹³ Ca' jac ni pin anajty mājnicxpeda'ñ mijyöyepeda'ñ je' ajcxy. E je jäy ajcxy yjacyajmij'ajtpy huidi Jesús anajty ooy mibijccixyp. ¹⁴ Mayjäy oy mibijcni Jesús y'ayuc, yéydijctijc etz töxyjäydijc. ¹⁵ Etz ixti pa'mjäydijc anajty ajcxy yajnicxy mjtügujc cijx'aam pidaaccixy, jigix co Pedro ñaxipy jim ycadimjeyty co nicxy y'aa'ap yjäty ma je pa'mjäy. ¹⁶ Nañ jadu'n mayjäy chooñ anajty huidijaty huingon ycajp, ymiingixy Jerusalén, müdmüingixy pa'mjäy, etz huidibi ca'oybi müd ma yjot yhuinma'ñ, e tüg'óciy yajtzoocaa'yb anajty ajcxy.

Pedro etz Juan yaj'ixhuidijtcixy yajpahuidijtcixy

¹⁷ Huin'it je teedy mjtungmüdpí etz huidibi saduceo ixpjicjin ymijpídacp ooy ajcxy yajca'oy'ixy, ¹⁸ e co ajcxy majch je apóstoles ajcxy, chi ajcxy pidacy ma je mijpuxjtijc. ¹⁹ Chi Huindzin Dios tüg y'ánel je huin'it coodz yaj'ahuach je pujxtijc aguu, yajpidzimy ajcxy, chi ajcxy nimay:

²⁰ —Níxcxix, tinay'ahuüygix tzajtígoty, yajmüdmüydaaccix yi mayjäy ajcxy Jesucristo yty'ajt nej jëbi jäy ajcxy paadipy jugy'ájin jemybi.

²¹ Co jadu'n midoy, chi com jabom ytigüy ajcxy jopyñi tzajtígoty. Jiiby je' ajcxy anajty ñiyaj'ixpijcco'ni.

Chi je teedy mjtungmüdpí etz jacpínjaty müd, chi ajcxy capxyñiguejxy yi judiojáy ymijjäydijc etz ixpicytijc co huen junta jadyii. Chi ajcxy capxyñiguejxy huen nicxy yajpidzimyii jiiby pujxtígoty yi apóstoles ajcxy.

²² Co je policías ajcxy ymejch ma je pujxtijc, ca' ajcxy paady je apóstoles ajcxy. Chi ajcxy huimbijtni müd tñy'ajt, ²³ chi ajcxy nimay:

—Hue' iich ajcxy ti nbaadcixy yi pujxtijc aducy, etz je soldadtijc jim tijc aguu yjacuend'ajtcixy. Chi co iich ajcxy nyaj'ahuach je pujxtijc, ca' iich ajcxy ni pin ti nbaatyich jiiby pujxtígoty.

²⁴ Co jadu'n ajcxy midoy, je teedy mjtungmüdpí etz je soldado huindzin, etz jacjadyii teedy huindzin ajcxy, chi ajcxy ooy huinmay nej jada y'occogixihuip. ²⁵ Huin'it tüg jäy müñ huidibi nimaayi ajcxy:

—Je jäy huidibi müch ajcxy mbidac pujxtígoty, chim je' ajcxy tzajtígoty yaj'ixpijccixy yi mayjäy.

²⁶ Chi je soldado huindzin müd soldadtijc ñicxy ma yi apóstoles ajcxy jäy yaj'ixpijccixy, chi ajcxy yajnicxy oy'amy, com tzigüyb anajty ajcxy co je mayjäy chaagädzüyb. ²⁷ Co ajcxy yajmüñ, chi ajcxy pidacy ma je maytungmüdpí yhuinduu. Chi je teedy mjtungmüdpí je apóstoles ajcxy nimay:

²⁸ —Iich ajcxy ti ngapx'aducy co ca' huaad m'ocjacyaj'ixpijccixni ma Jesús yxii. E ¿ti ti mdungixy? Ti myajhuäcxtaaygixy yi m'ixpijcin ma Jerusaléngajp, e iich ajcxy müch pocy xyjátyim yajmihui'mam co Jesús y'o'cy.

²⁹ Chi Pedro etz jacjadyii apóstoles ajcxy y'adzooy:

—Copicy iich ajcxy ngapxycöbigipyich yi Dios jayijp ca'ydi jäy. ³⁰ Je Dios huidibi iich ajcxy nmij'ap nmijteedy y'ojadaj, yi' yajjugypijc je Jesús huidibi müch ajcxy myaj'öc cruudzcixy. ³¹ Je Dios Teedy jadachambi hue' Jesús müdity aa'oy'amy jiiby tzajpjoty, e ti pidägy ane'mbi etz yajnidzoocpi jigix yi

judío jāy ajcxy yjothuimbidiḡy e yajhuinmeecixipy ajcxy yḡocy. ³² Hich ajcxy tiy'ajt nyejcpy miid jada ycixpi, etz nañ jadu'n je Espiritu Santo huidibi Dios ymooyb pinjaty capxymidoohuip.

³³ Co je jāy ajcxy jadu'n midoy, chi ajcxy ooy yjotmätcoty, chi ajcxy jayaj'öga'ñ. ³⁴ Huin'it ytinayig̃y ma je naymujectac tüg fariseojäy, hue' anajty yxii Gamaliel, hue' je' anajty Moisés yley ñihuindzin'ajtíp. E jāy ajcxy ooy anajty yajmij'ajtcixy je Gamaliel. Chi je' ni'ane'mdiñy co huen yajpidzimyüi tzojcyi jiiḡy tiba'y je apóstoles ajcxy. ³⁵ Chi Gamaliel nimay yi tungmiidpi ajcxy:

—Judío yëydijctijc ajcxy, ixcim ti mdungixy miid jada jāy ajcxy. ³⁶ Jäymetz miich ajcxy co jecy'ajty je Teudas ypidig̃y yminañ co je' ymiity yjanchity, e chi ypanicxi oy nimidaax migo'pxti yëydijc. Chi ajcxy yaj'o'ci, chi tüg'óciy huidibi anajty ti ypanicxyii yöyhuäcxtay, e jadu'ñyi je' ajcxy ñitigoyday. ³⁷ Jacnamni je huin'it xii mina cajpjäy anajty ñecypejtcixy, ypidig̃y Judas huidibi tzon Galilea. Mayjäy ypanicxi; nañ jadu'n ajcxy yaj'o'cy, e tüg'óciy jāy huidibi panicxy jadu'ñyi ajcxy yöyhuäcxtay. ³⁸ Paady iich miich ajcxy jadu'n nimaaygixy, ixmajtzcix yi apóstoles ajcxy, e ca' mmijyöybejtcixy. Peni jāy yi y'ayuc ytiy'ajt huidibi ajcxy ymiid, cixip tigoyip yi'. ³⁹ Pen Dios y'ayuc ytiy'ajt yi' ajcxy ymiid, ca' ajcxy mjadipy nej mayacödig̃oygixyipy. Jaty nayguend'ajtigixy, ca' jecyity co Dios anajty miid mdziptungixy.

⁴⁰ Nidüg'óciy ajcxy jäygidacy Gamaliel ycapxhuñin. Huin'it ajcxy mijhuoy yi apóstoles ajcxy. Chi ajcxy tzaachytuñ, chi ajcxy ci'ajty, etz capx'adujcy co ca' huaad Jesús y'ayuc jaccapxhuäcxip. Huin'it ajcxy najtzmadzñy. ⁴¹ Je apóstoles ajcxy ypidzimy ajcxy ma tungmiidpi ajcxy yhuinduu ooy yjotcujcity co Dios jadu'n ti aa'ixiy co huen tzaachytuñyüi miid Jesús yxii ycixpi. ⁴² E ooy ajcxy yaj'ixpijccixy etz nimiydaaccixy Jesucristo jabom jabom jadu'n tzajtigoty nañ jadu'n majaty tijc.

6

Chi ajcxy yajñibejty huixtujc mutztungmiidpi

¹ Je huin'it xii ajcxy huidibi ixpijcp Jesús y'ayuc niḡi anajty ñimayiy'adñitcixy. E huidibi anajty capxp griego ayuc ytig̃y nayñigápxip miid huidibi judío y'ayuc capxp. Yminaangixy co yi griegojäy co'ögy töxyjädjic, ca' anajty ajcxy paady quipxyjaty miid je judíojäy co'ögy töxyjädjic caayin uucin jabom jabom. ² Huin'it yi majmetzpi apóstoles ajcxy yajnaymujectaayi je jāy huidibi Jesús miibijcp, chi ajcxy yminañ:

—Ca' huaad iich ajcxy Dios y'ayuccapxhuäcxin n'ijxmajch, e nicxyich caayin uucin yajhuäcxixy. ³ Paady miich ajcxy migügtijc nayhuin'ixigix huixtujc yëydijctijc huidibi oy yajmij'ajtni Dios, huidibi huädz oy yhuinma'ñ ymiid, huidibi je Dios yjihui'ñ ymic'ajt miid, e huen ajcxy tung'adñib jada tung. ⁴ Hich ajcxy njacmiibijctzohuamy Dios, etz iich ajcxy njacyaj'ixpigamy Dios y'ayuc.

⁵ Tüg'óciy ajcxy jäygidacy je' ayuc. Chi je mayjäy huin'ijxy Esteban huidibi ymiid ooy ymiibijcin, etz ymiid Espiritu Santo. Nañ huin'ijxy ajcxy Felipe, Prócoro, Nicanor, Timón, Parmenas, etz Nicolás. Nicolás ca' je' anajty yjudíojäyity. Hue' je' anajty chooñ jim Antioquía, jecyip anajty jipptig̃yñyñi judíojäy ytiy'ajt. ⁶ Chi ajcxy yajnicxy je jāy ma je apóstoles ajcxy. Chi ajcxy je apóstoles Dios miibijctzoy e cñixajy ajcxy.

7 Je Huindzin Jesús y'ayuc n̄gi anajty jāy tzachnejhuuñi. E je m̄bijcp̄idijc n̄gi anajty ajcxy chachnimayñi jim Jerusalén, ixti may judío teedy ajcxy ym̄bijcy.

Majch ajcxy Esteban

8 Je Esteban ym̄id anajty Dios ym̄ic'ajt etz y'oy'ajt e oy m̄jhuinmañ tuuñ, etz yejcy iixpejt ma jāy ajcxy. 9 Huin'it x̄i nijējity ixc̄p̄icyt̄ijc ooy ñay'ijxquíp̄ixigixy y'ixp̄ijc̄in m̄id Esteban jim ma judío jāy ajcxy ñaymujctac huíd̄i anajty yx̄i Libertados. E jim anajty Cirene jāy, Alejandria jāy, Cilicia jāy, etz huíd̄ibi tzomb jim Asia ñaaxjot. 10 Ca' ajcxy mimadacy Esteban com hue' je' anajty ycapxy m̄id yhuijy'ajt ycujc'ajt huíd̄ibi je Esp̄ritu Santo anajty mooyip. 11 Chi Esteban ym̄idzip ajcxy mujuy jāy huíd̄ibi jēbi n̄huambety Esteban, co ti anajty ooy ycapxt̄igooy etz ni'oj̄y Moisés etz Dios. 12 Jadu'n ajcxy yajyuum̄igy yaj'ox̄igy ȳi jāy mijj̄ydiȳc, etz huíd̄ibi ajcxy yaj'ixp̄ijcp̄ Moisés yley. Chi ajcxy mimadacy majch ajcxy Esteban, yajnicxy ajcxy ma je judío jāy ym̄itungm̄idpi etz ixc̄p̄ityj̄c ñaym̄újc̄igixy. 13 Chi ajcxy ixtaaȳi jāy huíd̄ibi n̄huambed̄ib, chi ajcxy ym̄inañ:

—Jada Esteban j̄ibic nigapxy ȳi Dios yt̄ijc etz Moisés yt̄iy'ajt. 14 Ti iich ajcxy m̄idooy co ym̄inañ co Jesús je Nazaretp̄i yjidamy je Dios yt̄ijc, e yajt̄igadzañ Dios yt̄iy'ajt jadu'n nej Moisés ajt yymooyim.

15 Huin'it je judío jāy tungm̄idpi e t̄üg'óc̄iy jāy nej anajty ajcxy jim ñaaygixy huind̄icxpejty ajcxy Esteban. E chi ajcxy iix̄i yhuñiñij̄jp jadu'n anajty quēx̄igy nej y'ángel yhuñiñij̄jp.

7

Esteban ñaygohuaani ma tungm̄idpi yhuinduu

1 Huin'it je teedy m̄itungm̄idpi yaj'am̄idooy Esteban:

—¿Nej janch jadaj̄i?

2 Chi Esteban y'adzooy:

—Miḡügt̄ijc ajcxy etz mijj̄ydiȳc ocm̄idoogix. Ich ajt nDios m̄ijpi janchyp̄i nayquēx̄ici ma iich ajt nm̄ij'ap nm̄ijteedy Abraham jecy'ajty co anajty jim ity Mesopotamia ñaaxjot, ca'ni anajty chinaydac̄p̄icy jim Harán. 3 Chi Abraham Dios ñimaayi: “Ixmatz mnaax mgajp etz t̄üg'óc̄iy m'amiḡügt̄ijc, e nicx ma ȳi naaxjot huíd̄ibi myajniñihuaayb.” 4 Chi Abraham choon̄ ma ȳi Caldea ñaaxjot, e nicxy tz̄inaydac̄p̄ijcp̄i jim Harán. Co yteedy oy y'o'cni, chi Dios Abraham yajm̄iñ ma jada naaxjot ma miich ajcxy cham mdzinäy. 5 E ca' Dios moy Abraham jada naaxjot ya, ni ca' ma yhuācx̄t̄āḡip̄y. Hue' je' janchtiy yaj'ahuan̄y co m̄ohuaan̄y y'ap y'oc, e co anajty je' ajcxy jēd̄ib. Oyñi anajty Abraham ca' y'ung m̄idity co Dios ym̄igapxi. 6 Nimaayi Dios co y'ap y'oc y'adzin̄ahuiȳy ajcxy ma huingj̄y ñaaxjot, etz chi ajcxy ytumbi'adȳyb etz chaachytun̄ȳyb m̄idaax migo'px̄ jim̄ijt. 7 Nañ jadu'n Dios ñimay Abraham: “Ndzaachytun̄pȳich je naax cajp ma ȳi m'ap m'oc anajty ytumbi'adȳii. Chi choon̄ip ajcxy jim, e chi xym̄idun̄pȳich ma jadyaabi it.” 8 Dios ytuun t̄üg capxytuun̄in m̄id Abraham, co huen ajcxy yajtiy'ajtt̄ihuip. Paady co Abraham y'ung Isaac yma'xung'ajty conductuyc̄ x̄i ajcxy oy tiy'ajtt̄iy. Nañ jadu'n Isaac ymang Jacob, e Jacob ȳi ymang nimajmetz̄pi ajcxy, huíd̄ibi ajcxy ñi'ap'ajty ȳi nimajmetz̄p̄icȳpi Israel ycajp.

9 Chi Esteban yjacm̄inañ:

—Je' ajcxy Jacob ymang, ñch ajt nmij'ap nmijteedy, ymi'ijxtinaayb anajty ajcxy y'uch José. Chi ajcxy José toocy, chi je' yajnicxi jim Egipto, per Dios miid anajty y'ity José, ¹⁰ etz nihuaañ yajtzoocy ma ayo'n jotmay. Chi Dios moy ixpijcin jigix cōmay ypidzimipy ma Faraón, je Egipto jāy yrey. Chi je rey José tung moy huen ane'my je Egipto naaxjot etz ane'mipy je rey ytijc.

¹¹ Huin'it xii ymiñ mijyuu mij'ayo'n jim Egipto etz jim Canaán ñaaxjot. Je huin'it xii ñch ajt nmij'ap nmijteedy ca' anajty ajcxy paady ti ycaipy. ¹² Co Jacob oy nejhuiy co jim Egipto yajpaady jim trigo, chi jim quejxy ymang ajcxy trigo juuybi. Je' ajcxy huidibi ñch ajt nmij'ap'ajtim nmijteedy'ajtim. Chi ajcxy y'oy tügtecy trigo juuyb. ¹³ Je mimejtz'ocpi co ajcxy oy trigo juy, huin'it José ñayñigapxi ma y'ajch ajcxy. E chi je rey nejhuiy pinjāy je' anajty je José. ¹⁴ Chi José capxyñiguejxy huen cidaaccixy jim Egipto yi' yteedy Jacob miid tūg'óciy yjuugy ymigüg. Hue' anajty ajcxy ñaybaattāayigixy nidugi'px majmocx jāy. ¹⁵ E jadu'n yjajty co Jacobo oy chinaydacpiy jim Egipto. Jim oy comjexy y'o'cni. Nañ jadu'n jim ajcxy y'o'cy may ñch ajt nmij'ap nmijteedy. ¹⁶ E chi Jacob yjuugy ymigüg com jecy yajpidzimy Jacob ypajc ma ñaaxtigiy, e chi ajcxy yajnicxy jim Siquem, oy pidaaccixy ma je o'cpi jut huidibi Abraham anajty ti juy meeñyigixy ma Hamor ymang jim Siquem.

¹⁷ Chi Esteban yjacmīnañ:

—Ytimypadaanipy anajty tiempo nej anajty Dios ti yaj'ahuaniy Abraham. Ti anajty yi judiojāy ooy ymayiñi jim Egipto. ¹⁸ Chi oy jadüg rey ytigiiy ane'mbi huidibi ca' icy'adyii José. ¹⁹ Je rey yhuin'ññ ñch ajt nmij'ap nmijteedy, e oy ajcxy chaachytuun. E chi ane'my co huen y'ung ajcxy niguecytaaygixy huidibi anajty ajcxy ma'xung'ajtp, jigix y'ó'ccixipy. ²⁰ Huin'it tiempo oy yma'xung'ajty Moisés, je huidibi ooy Dios jāygidacy. Chi Moisés ytaj yteedy tugiiy po' yajyeeci ma ytijc. ²¹ Co ajcxy yajniñueeci, chi je rey ñiix je' agondigiiy, e yajyeegy jadu'n nej yci'm'ung. ²² Paady Moisés ixpijcy tūg'óciy jadu'n nej Egipto jāy anajty ajcxy y'ixpicity, e ooy ymadacy miid y'ayuc etz miid ytung.

²³ Co Moisés anajty miidity huixchigüipx jimijt, chi pidacy yhuinmañ co nicxy ixañ je' y'amigügtijc je Israel y'ap y'oc. ²⁴ Chi Moisés ijxy co tūg egipciojāy chaachytuñii tūg je' y'amigüg. Chi Moisés yaj'o'cy je egipciojāy, yaj'ahuimbijty nej anajty y'amigüg yajtzaachytuñ. ²⁵ Hue' Moisés tijy co je' y'amigügtijc ajcxy huen nejhuiy huinjihuuy co Dios nihua'naanip ma ymidzip miid Moisés yciixpi. Chi ajcxy ca' huinjihuuy co Moisés nihua'naanip. ²⁶ Com jabom Moisés paty mejtz Israel jāy chachtziptungixy. Chi Moisés jayajxemañ je tzip, chi nimay: “Miich ajcxy nay'amigüg'ajtip, ¿nej co mdziptungixy miich ajcxy miñ xyipy?” ²⁷ Je huidibi anajty ymigüg tzaachytuumb huin'it najtztijiy Moisés, nimay: “¿Pin ti xypidägy huindzin etz tiydumbi ma ñch ajcxy? ²⁸ ¿Nej xyaj'ōgaamich jadu'n nej axiy myaj'o'cy yi egipciojāy?” ²⁹ Co Moisés jadu'n midoy, chi yqueegy, ñicxy jim ma Madián naaxjot. Moisés jecy y'adzinaay jim Madián naaxjot, e jim oy ypicy. Chi ytōxyijc paty metz ymang.

³⁰ Huixchigüipx jimijt naxy, huin'it jim adügtuum ma je cop huidibi yxii Sinaí, ñayguēxiçi tūg ángel jinjoty ma tūg quipymang huidibi anajty tzachtooyb. ³¹ Chi Moisés ooy jihuuy huinmaay miid je' yciixpi huidibi anajty y'ijxyp. Co oy mihuingoo, chi midoy co je Huindzin Dios ñimāyii: ³² “ñch Dios huidibi mmij'ap nmijteedy ajcxy Abraham, Isaac etz Jacobo Dios'ajtpy.” Chi Moisés chiyuygoty, ca' anajty ocjac-huindixpedaani. ³³ E je Huindzin Dios nimaayi: “Jen mgig, com je it ma miich mdināy, Dios yi' y'it. ³⁴ ñch ti

n'ixyich njäyich nej tzaachypi paatcixy jim Egipto. Ti nmidooyich co yi'ajcxy yäxy ytinäy müid je tzaachypi ycixpi. Ti ngidägyich co ajcxy ngohuaanip. fih miich nguexamyb jim Egipto ma yi Israel jäy ajcxy."

³⁵ Chi Esteban yjacminañ:

—Co Moisés oga'n ñicxy ma ñich ajt nmij'ap nmijteedy ca' ajcxy cöbijcy huen y'ane'müiyb, chi ajcxy yminañ: “¿P'in ti xyñimäy co ñich miich ajcxy nhuindzin'adiyb?” Co mämetz'ocpi Moisés ñicxy ma yi Israel jäy, je taabi anajty je ángel ti ymígapxyii jinye'ñ agujc, chi ajcxy cöbijcy. ³⁶ Je Moisés je' yajpidzim ñich ajt nmij'ap nmijteedy jecy'ajty jim Egipto. Moisés ytuun oy mähuinma'ñ etz i'xpejt huixchigüipx jimijt jim Egipto, jim ma tzaptz mejy, etz jim ma mijtigüiduum. ³⁷ Je Moisés huidibi jecy'ajty nimay je Israel jäy: “Dios y'ijxtihuiipy tüg jäy ma miich ajcxy m'ap m'oc huidibi najtzcaxihuiipy yi' y'ayuc, jadu'n nej ti xy'ijxtiuyich ma miich ajcxy. M'amido'ijtip ajcxy yi' y'ayuc.” ³⁸ Je Moisés jim je' anajty mijtigüiduum müid je mayjäy. Chi jim je Dios y'ángel müid miydacy ma je cop huidi yxii Sinaí, etz Moisés yajnax Dios y'ayuc ma ñich ajt nmij'ap nmijteedy. Moisés ycöbijc Dios y'ayuc huidibi jugy'ájtän huinixiibi müid, etz jayhu'i'my müid ñich ajt ycixpi.

³⁹ Chi ñich ajt nmij'ap nmijteedy ajcxy jecy'ajtpy ca' anajty ajcxy capxcöbigaangixy Moisés, ca' anajty cöbijccixy je' y'ane'min, chachhuimbidaangixy jim Egipto. ⁴⁰ Chi ajcxy Aarón nimay: “Ndzojcy'ich ajcxy co miich oyduñ tüg Dios huidibi ñich ajcxy xyhuinhuoohui, com ca' nnejhuuiyim ti jada' ti yjadyii je Moisés huidibi ajt xyajtzoonim Egipto ñaaxjot.” ⁴¹ Chi oyduñ ajcxy tüg huajmang. Chi huindzigüiy ajcxy je huajmang huidibi anajty ti yajcojcy, e ooy ajcxy mijotcujc'ajty huidibi ci'm anajty ti yajcojy. ⁴² Huin'it xii ajcxy Dios y'ixmajtzi, huen ajcxy ojadaty yi xii, yi po' etz madza'. Com jadu'n Dios y'ayuc cojaaybi cojaay co Dios jadu'n yminañ:

Israel jäy ajcxy canan ñich je' huidibi ti mhuindzigüiygixy jim mijtigüiduum huixchigüipx jimijt.

⁴³ Ti mgyinícxcixy Moloc ytijc etz yi Renfán ymadza', tzadzech, quipychech etz oor: oyduñ huidibi miich ajcxy ci'm myajcoj huidibi anajty ajcxy m'ojadadamy. Paady ñich miich ajcxy nyajpidzimaangixy ma yi mnaaxjot, e nguexaangixy jiguem jim Babilonia ninaxy.

⁴⁴ Chi Esteban yjacminañ:

—Jim mijtigüiduum ñich ajt nmij'ap nmijteedy ymüid anajty cochactijc ma anajty ajcxy Dios huindzigüiy. Jiiby anajty ajcxy yujcciy je tzaa ma Dios ytiy'ajt ycojaayity. Je cochactijc ajcxy ycoj jadu'n nej anajty ti yaj'ane'myii Moisés, e nej anajty yajni'ixiyii nej tunipy. ⁴⁵ fih ajt nmij'ap nmijteedy mihui'm je cochactijc, e ñich ajt nmij'ap nmijteedy huidibi müiñ ma jada naaxjot müid Josué, chi mimiñ ajcxy je cochactijc je taab ajcxy mímadacy je ymidzip canaag'agajp. Dios yajpidzim je' ajcxy ymidzip ma je naaxjot, jigix yajcädigihuiip ñich ajt nmij'ap nmijteedy. Yajtuuñ ajcxy je cochactijc, ixti cooni David ytigüiy ane'mbi. ⁴⁶ Dios yjäygiadaac je rey David, e David yjacoja'ñ anajty tüg tijc oyduñ ma jébi yaj'ojadaty yajhuindzigüiy Dios, je Dios huidi Jacob mijpidac jecy'ajty. ⁴⁷ Per Salomón je' oy cojy Dios ytijc. ⁴⁸ Oy yi Dios tzajpjotypi ca' chinäy ma yi tijc tiibi jäy cojy. Jadu'n nej je Dios y'ayucnajtzcaxixybi jecy'ajty jaybety co Dios jadu'n yminañ:

⁴⁹ Je tzajp hue' je' ñich n'ane'mdac, jada naaxhuñiybi ñich ndecypocxtac. ¿Ti tijc ñich miich ajcxy xycojaanip? ¿Ma je it huidibi it ma ñich jébi nbocxy?

⁵⁰ ¿Nej cay ñich ti n'oydundäy tüg'óciy?

⁵¹ Miich ajcxy ooy m jotjuuñity, ca' mgapxymidoy Dios. Jadu'n Esteban yjacmínaañ:

—Jadu'n miich ajcxy m jot mhuinma'ñ mñdity jadu'n nej jáy ajcxy huidibi ca' Dios ytiy'ajt nejhuñiyi. Miich ajcxy jáyim midzip'ajtpe je Espíritu Santo. Mdügñiy ajcxy mñd mmij'ap mmajteedy. ⁵² Miich ajcxy mmij'ap mmñteedy chaachytuun tüg'óciy Dios y'ayucnajtzcaxñiybi. Yi' ajcxy yaj'o'c Dios y'ayucnajtzcaxñiybi huidibi jayijp'aty najtzcaxñiy co ymina'ñ tüg jáy huidibi tudágyip. E co je tudágy jáy ymññ, chi miich ajcxy agojñx myaj'o'cy. ⁵³ Je Dios y'ángel miich ajcxy xymooy je Dios ytiy'ajt, e ca' ajcxy mgöbijcy.

Yajtzaagögätcixy Esteban

⁵⁴ Co je mayjáy midoy jadu'n nej Esteban yminañ, chi ajcxy mijotmätcoty Esteban, chi ytiñiy ajcxy tiitzmucxpi tiitzqueetpi. ⁵⁵ E chi je Esteban jihuiy je Espíritu Santo ma yjot yhuinma'ñ, chi chajp'ijxy, e ijxy yi Dios y'oy'ájin etz ijxy Jesús ytinäy a'oy'amy ma Dios Teedy. ⁵⁶ Chi Esteban nimay je mayjáy:

—ijxcix! N'ijxypich yi tzajp ahuädz, e n'ijxypich je jáy huidibi tzoon tzajpjoty ytinäy a'oy'amy ma Dios Teedy.

⁵⁷ E chi je mayjáy ajcxy ytätz'ac amo'cxy, chi ajcxy ytiñiy huambi jihuiybi, e chi ajcxy nimujcy yajmujcy Esteban. ⁵⁸ Chi ajcxy yajpidzimy Esteban cajppa', je' oy cögätcixy. Je tiy'ajt yejcpñi huidibi jadu'n idiätz, chi yjocxhuit ajcxy yajmñhu'my tüg yeeg'anäg huidibi anajty yxñ Saulo. ⁵⁹ Jim anajty ajcxy Esteban tzachcätcixy. Chi Esteban Dios mñbijctzoy, yminañ:

—Huindzin Jesús, cöbñjçigich n'alma.

⁶⁰ Huin'it ycoxtinay'ahuñiy, e chi yaaxqueegy mic yminañ:

—Huindzin, ca' mbocy ixipy nej ajcxy xytuñich.

Co jadu'n Esteban ymñanday, chi oy y'ögy.

8

Saulo pahuidijttägy ooy mñbijcpñijc

¹ Saulo ytuun quipxycapxy mñd huidibi ajcxy yaj'o'c Esteban.

Huin'it xñ yaj'ixhuidijtt yajpahuidijtt pinjaty anajty Jesús mñbijcp jim Jerusalén. Tüg'óciy je jáy ajcxy huidibi Jesús mñbijcp anajty yqueec-huäcxtay, ñicxy ajcxy jim Judea ñaaxjot etz Samaria ñaaxjot. Jéyi je majmetzpi apóstoles ajcxy jac-hui'mñy. ² Nijjéjity yéydijc huidibi Dios huindzigiñyib oy yajnaxtiñiy Esteban. E ooy ajcxy jotmay jihuiñiy, yaaxy ajcxy mñd je' ycxipi. ³ Chi Saulo ooy ixhuidijtcoty pahuidijtcoty huidijaty Jesús mñbijcp etz tijc tijc anajty yajpidzimy pahuiñ pajuguty yéydijctijc etz töxyjädijc, e pñdaaccixy anajty pujxtigoty.

Jim Samaria ajcxy capxhuäcxy Dios y'ayuc

⁴ Je huidi ajcxy queec-huäcxtay ycapxhuäcxyp anajty ajcxy Jesús y'ayuc huen tim ma'amy huidijtcixy. ⁵ Nidügti huidibi anajty yxñ Felipe ñicxy jim Samaria, ytiñiy y'ayuccapxhuäcxpi, yajnimay ajcxy Cristo ytiy'ajt. ⁶ E je jáy ajcxy ñayyöymujci nidüg'óciy ajcxy y'amido'ijtcixy janch amoñyi jadu'n nej Felipe anajty ymiydägy e ijxyp anajty ajcxy je mñhuinma'ñ huidibi Felipe anajty ytuymyb. ⁷ Com may anajty jáy jim huidibi mñd ca'oybi ma yjot yhuinma'ñ, e tzoocp anajty ajcxy. E co je ca'oybi anajty ypidzimy ma je jáy, chi je jáy ooy yjacyaaxqueecy. Etz nañ mayjáy anajty chögy huidibi ca' yci' ytecy yücxy etz tecyma'tpi. ⁸ E jadu'n je mayjáy ajcxy anajty jim ooy yjotcujcity.

⁹ Jim anajty tüg yëydjic huídibi anajty yxii Simón huídibi anajty ti ni'ixpigíy huijyjáy huinma'n, e ooy anajty may Samaria jáy huin'iñ, ymína'n co je' anajty ymijity yjanchity. ¹⁰ Tüg'ócíy jáy anajty oy amído'ijtcíxy Simón y'ayuc, pi'ctájc etz mij'anáctijc, e ymínaangíxy:

—Jadayaabi yëydjic ymíid jada Dios ymic'ajt.

¹¹ Ooy anajty je jáy ajcxy Simón mijnicxpejtcíxy, com míid je mañ'ajt anajty jecy ti chachhuin'íinígíxy. ¹² Co je Samaria jáy mibíjcy je ayuc jadu'n nej Felipe ñimíydacy Dios y'ané'min etz Jesucristo, chi ajcxy ñíbejty yëydjctijc etz töxyjáydjic. ¹³ Etz je Simón, je huijyjáy, nañ jadu'n mibíjcy e ñíbejty. Chi Simón puyöyíy Felipe, ooy jihuíy huinmaay jadu'n nej je mihuinma'n huídibi anajty Felipe ytumyb etz jadu'n nej anajty Dios ymic'ajt ijxi.

¹⁴ Co ajcxy je majmetzpi apóstoles ajcxy, huídi anajty jim Jerusalén, nejhuíy co je Samaria jáy anajty ti cóbijccíxy Dios y'ayuc, chi ajcxy quejxy jim je Pedro etz Juan. ¹⁵ Co Pedro etz Juan yja'ty jim Samaria, chi ajcxy Dios mibíjctzoy míid je mibíjcpidijc ycíxpi, jigix ajcxy ymóhuíyib je Espíritu Santo. ¹⁶ Com ca'ni anajty je' ajcxy ñicídágyii, jëyi anajty ti ñíbejtcíxy ma Huindzin Jesús yxii. ¹⁷ Huin'it Pedro etz Juan cíníxajy ajcxy, e chi je Espíritu Santo y'adigíy yjottigíy ajcxy.

¹⁸⁻¹⁹ Co Simón ijxy co je Espíritu Santo y'adigíy yjottigíy co yi apóstoles ajcxy ycíníxajy, chi Simón yaj'ahuaniy je' ajcxy meeñ, ymínañ:

—Mooygich nañ jadu'n yi mic'ajt jigix co ngíníxájibich hueñypínity nañ jadu'n jëbi ajcxy je Espíritu Santo y'adigíy yjottigíy.

²⁰ Chi Pedro ñimay Simón:

—Mí'ögíhuípy miich mmeeñ, míid co mhuinma'n ti mbídágy co meeñyígix mbada'n je huídibi Dios ñíyejcp. ²¹ Com miich ca' xypaady jadayaabi tung, com miich mjot mhuinma'n ca' ytudágyty ma Dios. ²² Jothuimbit e íxmatz yí mjibic-huinma'n, e mibíjctzou Dios, ca' jécyity xyhuinmeecxípy jadu'n nej jibic mjot mhuinma'n mmíidíty. ²³ Com janch ta'm miich mjot mhuinma'n, e yi jibicpi hue' xymíidíty mach.

²⁴ Chi Simón y'adzooy:

—Mibíjctzou je Huindzin Dios míid ích ycíxpi, jigix ca' ti xyjadípyích jadu'n nej miich ti xyñimáych.

²⁵ Co Pedro etz Juan tíy'ajt yejcy etz capxhuácxty Dios y'ayuc jim Samaria, chi ajcxy yhuimbijty jim Jerusalén. Chi ajcxy canaag agajp ñaxíy jim Samaria ñaxjot, e capxhuácxty Dios y'ayuc nej ajcxy y'alma nízoozin paadípy.

Felipe míid je Etiopía jáy

²⁶ Huin'it xii Huindzin Dios y'ánel migapxy je Felipe, ñimay:

—Tzoon ya, nícx ma madzácruudz ypidzimy, ma je tü'aa huídi tzomb jim Jerusalén huídibi nícxp jim Gaza.

Je' je' je tü'aa huídibi adúgtuum najxp. ²⁷ Felipe tim janitzon e ñícxy, e tü'am naybaatti míid tüg Etiopía jáy. Hue' je' anajty eunuco, míjtungmíid jim Etiopía. Yí' je' tesorerero'ajt anajty ma je töxyjáy huídibi anajty yxii Candace huídibi anajty ane'mb jim. Je eunuco jim anajty ti y'oy Jerusalén Dios ojadajtp. ²⁸ E chi yhuimbijnti anajty ma ycajp, íñaayb anajty carretijoty yam chachnecyapxy. Hue' anajty chachcapxy je Dios y'ayuc huídibi Isaías ycojaay. ²⁹ Chi je Espíritu ñimay Felipe co huen nícxy najtzpadíy je carreti ma je eunuco anajty y'íñäy.

³⁰ Co Felipe mihuingoñ je carreti, chi midoy co je jäy anajty capxy je necy huidi Isaiás yjaay, chi y'amidooy:

—¿Nej mhuinjihuüyb huidibi mgapxyp?

³¹ Chi je jäy y'adzooy:

—¿Nej ñich nhuinjihuihuipy pen ca' pin xyajnimäyich?

Chi je eunuco nimay je Felipe co huen müid iñäyii carretijoty.

³² Je huidibi anajty je eunuco chachcapxyp jadu'n je' anajty yminañ: Jadu'n ajcxy nicxy yaj'ögy nej jäy borregi nicxy yaj'ögy. Je' amoñ'ity jadu'n nej borregi amoñ'ity co jäy nime'pxy. Ni tüg'aa huam ycaminañ.

³³ Ti jäy yajtzöyduñyii, ca' ajcxy a'ixiy co yjanayñgapxtüdaani. Ni y'ap y'oc ycaca'ty pin onigapxtüdiib. Co yaj'öci, chi chooni ya naaxhuiñ.

³⁴ Chi je eunuco y'amidooy Felipe:

—Tunmay'ajt yajnimaaгыich pin jada ayucnajtzcapxyibi ñimiydacpy, ¿ci'm ñayñimidyägyii o ji jada huangbi pin nimiydacpy?

³⁵ Chi Felipe yajtzondacy je ayuc capxticxin ma jadyaabi Dios y'ayuccoajyabi ñecy. Chi yajmüidmydaaci nej Jesús yjajty y'ayoy. ³⁶ Co ajcxy ñajx ma tüg nüi, chi je eunuco yminañ:

—Cha nüi, ¿nej ca' ñich jëbi huaad nnibetyi?

³⁷ Chi Felipe y'adzooy:

—Pen mmibijcpy Jesús müid tüg'óciy yi mjot mhuinmañ jëbi mnibety.

Chi je jäy y'adzooy:

—Nmibijcpyich co Jesucristo Dios yi' y'ung.

³⁸ Chi je eunuco nimay je carreti huindzin co huen yajtinayxipy je' carreti. Chi nimetz ajcxy ñicxy ma nüi, e chi Felipe yajniibejty je eunuco. ³⁹ Co ajcxy ñiibidzimy, chi je eunuco ijxtigoy je Felipe. Jadu'ñyi je Huindzin Dios y'Espíritu yajnicxi. E chi je eunuco ytü yajyöñi jotcujc. ⁴⁰ Felipe yajpaty jim Azoto, chi ñajxy cajp cajp capxhuäcxi Jesucristo y'ayuc ixty yja'ty jim Cesarea.

9

Saulo yjothuimbijty

¹ Ooy Saulo tzach'ixhuidijty pahuidijty Jesús yjäy, y'ahuändacy ooy, e yaj'ögañ anajty ajcxy. Paady oy icy je teedy mäjtungmüidpi, ² pijctzoy cötújcin, co anajty ñicxañ jim Damasco ma yi judíojäy ajcxy ñaymujctac, madzañ pinjaty Jesús y'ayuc mibijcip. Saulo yajmiinañ anajty ajcxy mach jim Jerusalén huen yëdyjctjcity huen töxyjäydicity. ³ Jim anajty Saulo ñicxy mihuingoñ je Damasco cajp. Huin'it jotcömoñyi je tiicxin huidi tzomb tzajpjoty, ñigidaaci jühuidity je Saulo. ⁴ Huin'it Saulo yciday, e midoy co ñimäyii:

—Saulo, Saulo, ¿na'amy co xychachpahuidijttägyich?

⁵ Chi Saulo yajtyy:

—¿Mbin miich, Huindzin?

Chi midoy co y'adzoyii:

—Ñich je' Jesús, je huidibi miich mdzachpahuidijttacpy, ci'm nayyajtzaachy-tunyii jadu'n nej huajyuub co jipconebi'y huidi müid ñuumygyumyii.

⁶ Chi Saulo chiyugoty chachchigüy, e yminañ:

—Huindzin, ¿ti mdzocpy ndunipyich?

Chi je Huindzin Jesús ñimaayi:

—Pidig etz nicx cajpjoty, e jim nyajnimähuipy ti jëbi mduñ.

7 Je yëydjctjtc huidibi anajty Saulo ymüid ooy ajcxy ñay'adzjgüy, co midoy je' ajcxy ayuc e ca' ajcxy ni pin ma y'ijxy. 8 Chi Saulo ypidügy, e co huindicxñcni ca' pin ma oc'ijxni. Chi ajcxy majch Saulo ma yci', e chi ajcxy huijtznicxy jim Damasco. 9 Tugüg xü Pablo jim y'ijty huiintz, ca' ycaay y'uucy.

10 Jim Damasco anajty tüg yëydjtc chinäy huidibi Jesús y'ayuc mibíjcp, huidi anajty yxiñ Ananías, cumäyjoty Dios ñimaayi:

—¡Ananías!

E chi je' y'adzooy:

—Cha üch, Huindzin Dios.

11-12 Chi je Huindzin Dios ñimaayi:

—Pidüg, nicx ma je tü huidibi yxiñ Derecha, e jim ma Judas ytjtc yajtiüu tüg Tarso jäy, huidi yxiñ Saulo. Dios mibíjctzoob je' jim cham, cumäyjoty ti huin'ijxy tüg yëydjtc huidi yxiñ Ananías, co oy ñimiñyü, e ycñixajüy jigix y'ijxügip jadüg'oc.

13 Chi Ananías y'adzooy:

—Huindzin Jesús, mayjäy ti xyajmüdmüydägyich ajcxy jadu'n nej yi Saulo jibic y'idüch jim Jerusalén müid müich mjäy ajcxy. 14 Jadachambi ti müimüñ ya je necy, ma teedy mjtungmüidpi ti ycötujcmöyü, co huen majztäy je jäy, e yajnicxtähuiipy jim Jerusalén, tüg'öciy pinjaty ojadajtp müich mxii.

15 Chi je Huindzin Jesús nimay Ananías:

—Nicx, com ti üch nhuin'ixy yijüibi yëydjtc, jigix üch nxü etz n'ayucich capxhuäcxipy ma tüg'öciy naax cajp huidi ca' yjudíojäyity, etz ma yi reydjtc, etz nañ jadu'n ma yi judíojäy ajcxy. 16 Üch yi' nyajnimähuiipy tüg'öciy, nej ayo'n yajnaxipy müid üch nxii ycixpi.

17 Chi Ananías ñicxy ma Saulo anajty ti yjättägy, co ytigüy tigoty, chi cñixajy Saulo, e chi nimay:

—Mügüg Saulo, je Huindzin Jesús huidibi nayguëxici jim tü'am ma müich anajty müñ, yi' ti xyquexyich jigix m'ijxügipy jadüg'oc, etz je Espíritu Santo xyñüdigihuiip xycödügihuiip.

18 Mic'amy ycäy ma Saulo yhuin jadu'n nej acx ñümeñ, chi y'ijxügy. Huin'it Saulo ypidügy e chi yajñibejti. 19 Chi Saulo ycaay y'uucy, e chi ymic'pijcy jadüg'oc. Chi jim müid'ijty jecy huidibi ajcxy ixpíjcp Jesús y'ayuc jim Damasco.

Saulo capxhuäcxy Dios y'ayuc jim Damasco

20 Chi janch mic'amy Saulo ytigüy Dios y'ayuccapxhuäcxp ma je judíojäy ajcxy ñaymujctac jim Damasco, ymüañ co je Jesús hue' je' Dios y'ung.

21 Tüg'öciy pinjaty anajty midoohuip Saulo y'ayuc, ooy ajcxy jihuiy huinmaay, etz ñayñimáayigixy:

—¿Nej ca' jada' yjéjity je huidibi tzachyajcödügoyam yi jäy ajcxy huidibi Jesús yxiñ müyaax ojadajtip jim Jerusalén? ¿Nej ca' jada yjéjity huidi anajty ti ymiñ ya jäy ymajtzpi, e nicxy cüyega'ñ ma teedy mjtungmüidpi?

22 Je Saulo capxhuäcxp anajty Jesús y'ayuc huinmic jotmic, e nigapxtäy co Jesús hue' je' je Cristo, chí yi judíojäy ajcxy huidi anajty jim tzinaayb Damasco cijx ajcxy yhuinma'ñ tigoydäy.

Saulo yqueecy ma judíojäy ajcxy

23 Ti anajty hueeni xü tiempo ñajtzñicxñyñi, chi je judíojäy ajcxy ñaygapxi co yaj'ögaangixy je Saulo. 24 Saulo ñejhuüy co anajty yaj'öga'ñyü. Chi jim anajty ajcxy y'ahuixyü xim tzuum ma je poch aguu cajppäbi, jim anajty yaj'öga'ñyü.

25 E je jäy ajcxy huidibi anajty ymüidpacpy Jesús, chí je' ajcxy codüñajxy

je Saulo mijcachjoty ma je pochycop huidi je cajp miid jübojtz'ahuidítyity, e jadu'n je' choocy.

Saulo yajpaady jim Jerusalén

²⁶ Co Saulo yja'ty jim Jerusalén, oy japuyöyihuaañ je mibijcpidijc ajcxy. Nidüg'óciy anajty ajcxy ooy tzigiygixy anajty com ca' anajty mibijccixy co je Saulo ti anajty yjothuimbity. ²⁷ Chi Bernabé yajnicxy Saulo ma je nima-jmetzp apóstoles ajcxy yajpaady, e chi yajmüdmíydactay nej Saulo anajty ti ixty je Huindzin Jesús tü'am, e nej anajty Saulo Jesús y'ayuc ti capxhuäcxi huinmic jotmic jim Damasco. ²⁸ Huin'it Saulo yhui'my jim Jerusalén, e miid huidity anajty ajcxy. ²⁹ Aamic jotmic capxhuäcxy je Huindzin Jesús y'ayuc, etz miid miydaaccixy e ñaymicmigápaxigixy miid je judíojäy huidibi griego ayuc caxp. E je' ajcxy nihuinmayiib co yaj'ögaangixy. ³⁰ Co je mibijcpidijc nejhuuiy, chi ajcxy yajnicxy je Saulo jim Cesarea, e chi ajcxy quejxnajxy huen nicxy jim Tarso.

³¹ Huin'it tiempo je' ajcxy huidijaty mijpidacp Jesús, jotcuyc anajty chinaaygixy, e niigi anajty ixpijc'idich Dios y'ayuc ytiy'ajt, jadu'n nej yi huidibi ajcxy tzinaayb ma yi Judea ñaaxjot, Galilea ñaaxjot, etz Samaria ñaaxjot. Chi ajcxy ooy yajmij'ajtcixy je Huindzin Jesús, e miid je Espíritu Santo ypubéjtín, niigi anajty yjacmayiygixy.

Pedro yajtzoocy Eneas

³² Co anajty Pedro yhuidijty cogapxiy cajp cajp je mibijcpidijc ajcxy, y'oy nañ jadu'n ma je mibijcpidijc ajcxy huidibi tzinaayb jim Lida. ³³ Jim minaybaatti tüg yéydijc huidibi anajty yxi Eneas, huidibi anajty ti ypa'm'ijtni tuctujc jimijit, hue' je' anajty ycixuxy ytecyuxy. ³⁴ Chi Pedro nimay:

—Eneas, Jesucristo xyajtzoocp, pidíg, etz yajpidíg yi mmaabejt.

Chi Eneas mic'amy ypidígy. ³⁵ Chi iixy tüg'óciy jäy huidibi tzinaayb jim Lida etz Sarón. Chi ajcxy yjothuimbijttay nidüg'óciy, ixmajtztay tüg'óciy yi ñi'ap huinma'ñ e jijptigiyiy yi Huindzin Jesús y'ixpijcin.

Co Dorcas y'o'cy, chi yjugypijcy jadüg'oc

³⁶ Je huin'it tiempo jim Jope, jim anajty tüg töxyjäy chinäy huidibi mibijcp Jesús, hue' anajty yxi Tabita, je' huidi griegojäy ytijyp Dorcas. E je Dorcas oy xi tiempo anajty yajnaxy mi'oyjäy'aty yi jäy ajcxy. ³⁷ Jadu'n yajti huin'it tiempo Dorcas ypa'mbejty, e chi ytimy'o'cy. Co ajcxy yajtziiday, chi ajcxy je öcpi yajnicxy ma je tijc mimejtznihuijtzipetypi. ³⁸ Je Jope cajp naymihuingon'ájtíp anajty miid Lida cajp ma anajty Pedro yajpaady, co mibijcpidijc ajcxy anajty nejhuuiy co je' anajty yjímity, chi ajcxy mejtz yéydijc quejxy co huen nimäyii:

—Min tzojc ya Jope.

³⁹ Huin'it Pedro ñicxy miid je' ajcxy. Co jim yja'ty, chi ajcxy yajnicxy ma je tijc mimejtznihuijtzipetypi, e jim anajty ajcxy je co'ögy töxyjäydijc ajcxy ytinayjühuidityi ma je öcpi, chachyaaxcixy. Chi ajcxy Pedro yaj'ijxy je huit nijen huidibi Dorcas anajty ti yaj'oyiy co anajty yjugy'atyñi. ⁴⁰ Mic'amy je Pedro quejxidzimday je jäy ajcxy. Chi ycoxtinay'ahuuiy, e Dios mibijctzoy. Chi huindicxpejty je öcpi, nimay:

—Tabita, pidíg.

Huin'it Tabita yhuindicxígy, e iixy je Pedro, chi ñayaguiy. ⁴¹ Chi Pedro majtzi yci', e chi huijtzigy. Chi yaaxi ymigügtijc etz co'ögytöxyjäydijc ajcxy,

chi ajcxy yajc'idig'ny juugy. ⁴² Tüg'óc'iy jäy ajcxy jim Jope nejhuiyday co Pedro yajjugyp'icy je Dorcas. E mayjäy mib'icy je Huindzin Jesús. ⁴³ Jadu'n yjajty co Pedro y'ijty jim Jope canaag xii ma je coodzp'i yt'ijc huidi anajty yxii Simón.

10

Pedro etz Cornelio

¹ Jim Cesarea anajty tüg tungm'ädp'i huidi anajty yxii Cornelio, hue' je' anajty capitán'ajtp ma tüg batallón soldado ajcxy yxii'jip, la Italiana. ² Je Cornelio ooy anajty ytudägyity, etz je' müid tüg'óc'iy y'ung ytöxy'ic ooy anajty yajmij'ajtc'ixy Dios. Je Cornelio nañ jadu'n ypubety müid meeñ je judío'jäy ayoobt'ijc, e je' Dios ojadajt anajty jabom jabom. ³ Tüg xii, minacyxii anajty, Cornelio huin'ijxy janch huädz Dios tüg y'ängel ñigidaaci, e ñimaayi:

—¡Cornelio!

⁴ Chi Cornelio huindicxpejty je ángel janch tzig'iyb anajty, e chi yajt'äy:

—¿Ti Huindzin?

Huin'it je ángel y'adzooy:

—Jadu'n nej mDios'ojadaty etz jadu'n nej mbubety ayoobt'ijc ti Dios jäygidägy. ⁵ Quex mjäy jim Jope, huen nicxy yajtzoñ Simón, huidibi nañ jadu'n yajt'ijp Pedro. ⁶ Jim je' ya'ttacy ma jadüg'p'i Simón, je cootzp'i huidi yt'ijc mihuingon mejypa'. Je Pedro xyajnimähui'py ti mdun'ipy.

⁷ Co je ángel ñicxni huidi anajty ti ymigapxyii, chi Cornelio yaaxi mejtz ytumbi, etz tüg soldado huidi Dios capxymidoob, etz huidibi je Cornelio ooy ymijnicxpedyii. ⁸ Chi yajm'ädm'iydactay nej je ángel ñimaayi, chi ajcxy quejxy jim Jope.

⁹ Com jabom jim anajty je quejxyöybi ajcxy ñicxy mihuingon Jope, cujc yxii anajty, e chi Pedro ypejty ma t'icn'icx Dios ojadajtp. ¹⁰⁻¹¹ Ooy Pedro anajty yuubögyii, e ooy jacaya'ñ, jimni anajty yjic'ixy yaj'oy'iyii. Chi Pedro huin'ixy je tzajp ahuädz, e huin'it ijxy quidägy jadu'n nej poob huit mijp'i yxöch'ity majaty ytaatz. ¹² Jüby ma je poob huit, jüby anajty canaagnax iyujc huidijaty m'idaax yci' ytecy etz tza'ñ etz joon. ¹³ Huin'it Pedro midoy co anajty ñimäy'ii:

—Pedro, pid'ig nicxy yaj'ög y'i iyujc etz tzüdz.

¹⁴ Chi Pedro y'adzooy:

—Ca', Huindzin, cam'inaabi ich ti njicxy huidibi jib'ic'ip etz huidibi ca' ñigödúcyity nicxy judío'jäy jic'ic'ixy.

¹⁵ Huin'it jadüg'oc ayuc midoy ñimäy'ii:

—Huidibi Dios yajhuäch ca' huaad mdijy co y'i yjibicity.

¹⁶ Tug'ig'oc jadu'n yjajti, chi je poob huit ypättig'iy'ni tzajp'joty. ¹⁷ Jim anajty Pedro tzachhuinmay nej anajty yhuimb'izimy je tübi ix' co yja'ty ma t'icx aguü je Cornelio yquexyöybi huidi ajcxy anajty nid'ihui'p yajt'ihui'p je Simón yt'ijc. ¹⁸ Chi ajcxy m'ic ycopax'ny yajt'äy pen jim anajty yjättägy Simón huidibi anajty nañ jadu'n yajt'ijp Pedro. ¹⁹ E je Pedro je' anajty chachhuinmaayb tübi ix'y, chi je Esp'iritu Santo Pedro ñimaayi:

—Tug'ig yëyd'ijc ji xy'ixtäy. ²⁰ Pid'ig e minac, nicx müid je' ajcxy, e ca' ti mhuinmay, com ich jadu'n ti nmimäy co huen xy'ixtäy.

²¹ Huin'it Pedro ym'inajcy ma je' ajcxy, je Cornelio quejxyöybi, nimay ajcxy:

—Ich je' huidibi müich ajcxy m'ixtaayb, ¿ti yci'xp'i co ti mmiingixy?

²² Chi ajcxy y'adzooy:

—Yi' ñich ajcxy ti xyquexyich yi Cornelio huidibi capitán'ajtpi, je' tudägy jäy huidibi Dios yajmij'ajtp, je' huidibi tüg'óciy judíojäy ooy tzóccixy, etz cómaaygixy. Huindzin Dios tüg y'ánel ñimay Cornelio co miich miñ nya-
jhuoy, jigix mñicxip ma yi' ytijc, e y'amido'ida'ñ ajcxy nej miich myaj'ixpi'ga'ñ.

²³ Chi Pedro yajtjctigüy je' ajcxy. Chi ajcxy jim ymaahu'my. Com jabom Pedro ñicxy müid je' ajcxy, e chi nijëjity ypanicxi' huidibi mijpidacp Jesús huidi anajty ajcxy tzinaayb jim Jope.

²⁴ Com jabom ajcxy yja'ty jim Cesarea ma Cornelio anajty y'ahuixy tügmucy müid yjugymigüg, etz nijëjity pin ooy müid ñaymigüg'adyii, huidijaty anajty ajcxy jayjip ti nimäy. ²⁵ Co Pedro oyjäty ma je tijc, chi Cornelio ytijcpidzimy oy yjijpcobadäy je Pedro, e chi ycoxtinay'ahuixy yajmij'ada'ñ anajty je Pedro.

²⁶ Chi Pedro huijtztinayigý je Cornelio, e nimay:

—Tinayig, ca' xyajmij'ida'ñich, nañ jadu'n ñich njäyity nej miich.

²⁷ Müid anajty ycapxy ymiydägy co ytijctigý, jüby anajty mayjäy ni'amugä'ahuixcixy. ²⁸ Chi Pedro nimay ajcxy:

—Miich ajcxy mnejhuixy co yi judíojäy ycostumbre capx'aducy ca' huaad judíojäy yömucy müid huidibi ca' yjudíojäyity, ca' huaad ytigüygixy ma ajcxy ytijc. Per Dios ti xyajni'ixiyich co ca' huaad nmína'ñich ca' oyjäyity huádzjäyity pinjaty. ²⁹ Paady co oy ti xyajhuoyijich ti nmiñ'ñich, ni ca' huam ti nmína'ñich. Nnejhuñhuaamyich na'amy co oy ti xyajhuoyijich.

³⁰ Chi Cornelio y'adzooy:

—Cham ymimidaaxxiijy, jadu'n nej jadachambi hora, ya ñich anajty ma ndijcich, jaygay jay'ügy nDios'ojadatyich. Com hue' anajty mijminacy xii mína judíojäy ajcxy ycapxtaaccixy, co tüg ñayguëxi'ci jadu'n nej jäy müid ypoob huit janch adicxp. ³¹ E je ánel xyñimaayich: “Cornelio, Dios ti xymidoohui m'oración e ti jadu'n jäygidägy jadu'n nej mbubety yi ayoobtijc ajcxy. ³² Quex mdumbi jim Jope, huen ñicxy yajtzoñ Simón huidi nañ jadu'n yajtjip Pedro. Jim Pedro yja'ttägy ma je cotzpi ytijc huidibi yxii Simón, huidibi tzinaayb mihuingon mejypa'. Co je' ymiinipy, chi xymüidmiydägipy.”

³³ Paady nguejxyich janch mic'amy huen ñicxy xy'ixjtäy. E ti may'ajt mduñ co ti mmiñ. Jadachambi cha ñich ajcxy nidüg'óciy ma Dios yhuindu. E n'amido'ida'ngixyich tüg'óciy je y'ayuc huidibi je Huindzin Dios ti xyaj'ane'my jëbi xyajniimaaygixy.

Pedro Dios yti'ajt nigapxy nimäydacy ma Cornelio ytijc

³⁴ Huin'it Pedro ytigüy y'ayuccapxhuäcxpi, nimay ajcxy:

—Jadachambi huinjihuixyibich, co yi Dios ca' ni tüg ix'yixy jäy, y'actojtaayb hueñyinity. ³⁵ Dios ycobijcpy hueñyinjäyity huidi tzinaayb huen huidi naax huen huidi cajpity, pen chigüyb ajcxy Dios, pen tumyb oybi. ³⁶ Dios ti quexy yi' yti'ajt ma yi Israel jäy ajcxy, yajnimay co ji cham jotcujc'ajtín müid Jesucristo ñich ajt nHuindzin. ³⁷ Miich ajcxy mnejhuixyib yajxon nej ti ytunyii ti yjadyii ma judíojäy ajcxy ñaax ycajp chondacy jim Galilea, Juan el Bautista ti anajty capxhuäcxí Dios y'ayuc yti'ajt etz yjääyajiibety. ³⁸ E mnejhuixyib miich ajcxy co Dios yejc je Jesús je Nazaretpi je Espiritu Santo, e nej Jesús yhuidijty e tuuñ oy'ájtín, etz mijhuinma'ñ, jadu'n nej yajtzocy je jäy ajcxy huidi anajty ane'm'ijtp ma yi mjucu'. Com Dios anajty müid y'ity je Jesús. ³⁹ ñich ajcxy je ti'y'ajt nmüidich tüg'óciy jadu'n nej Jesús yjajty y'ayoy jim Judea naaxjot etz jim Jerusalén. Huin'it ajcxy Jesús

yaj'o'cy cruudzćíxy. ⁴⁰ E Dios yajjygypijcy codugüg xii, e chi yajnayguëxici ma iich ajcxy. ⁴¹ Ca' ti yajnayguëxigyii ma tüg'óciy jāy, jēyi ma iich ajcxy huidi jaijip Dios yhuin'ijx jigix tiy'ajt nyegipyich. Iich ajcxy caaymujc uucmujc huin'it co yjygypijcy ma y'o'cy. ⁴² Ti xyquexy iich ajcxy ayuc ngapxhuäcxpi ma mayjāy ajcxy etz nidiy'ajt'adipyich ajcxy co Dios Jesús ti pidāgy mij'ane'mbi ma yi juugypi etz ma yi ögypi. ⁴³ Nañ jadu'n jecy'ajty tüg'óciy Dios y'ayucnajtzcaxiiybi ñimiydac ajcxy Jesús, e yminañ ajcxy co tüg'óciy je jāy ajcxy pinjaty mibijc je Cristo, Dios huinmecxiiib ajcxy ypocy.

Je Espíritu Santo ycidacy ma je ca'pi ajcxy yjudíojäyity

⁴⁴ Yam anajty Pedro ycapxyñi co je Espíritu Santo ñidigüiyi ycödügüiyi ajcxy nidüg'óciy huidijaty y'amido'ijt Pedro y'ayuc. ⁴⁵ E je judío mibijcpidijc ajcxy tiibi anajty miññ müid Pedro, ooy ajcxy jihuyi huinmay co Dios quejx Espíritu Santo ma je jāy ajcxy huidibi ca' yjudíojäyity, ⁴⁶ co midoy ycapxcixy müid huingbi ayuc, etz cōmaygixy jāymejtzcixy Dios. ⁴⁷ Chi Pedro yminañ:

—¿Nej ca' jada' y'óyity co ñiibedipy ajcxy huidibi Dios ti ymóoyigixy je yEspíritu Santo jadu'n nej iich ajt xymooyim?

⁴⁸ Chi Pedro ni'ane'mdüy huen niibejtćixy ma Huindzin Jesucristo yxii. Huin'it ajcxy Pedro cohuanñy huen hui'my tüg xii mejtz xii müid je' ajcxy.

11

Pedro yajmüdmíydacy jim Jerusalén nej anajty ti ytuñyii ti yjadyyi

¹ Je apóstoles ajcxy etz je mibijcpidijc ajcxy huidi anajty ajcxy jim Judea, midoy ajcxy ayuc co nijējity jāy huidi ca' yjudíojäyity ti anajty ajcxy cōbójicy Dios y'ayuc. ² E co Pedro yhuimbijty Jerusalén, chi nijējity judíojäy ajcxy oiy Pedro, je' ajcxy huidibi tzachmijpidaaccixp judíojäy ycostumbre jadu'n nej ajcxy tiy'ajttiygixy ymang. ³ Je' ajcxy nimay Pedro:

—¿Na'amy co oy ti mgo'ixiiy jāy ajcxy huidi ca' yjudíojäyity, etz ti mgay m'ügü müid je' ajcxy?

⁴ Chi Pedro nimíydactay tüg'óciy jadu'n nej anajty ti yjaty, chi yminañ:

⁵ —Jim iich anajty Jope nDios'ojadatyich. Chi nhuin'ixyich jadu'n nej tüg mij poob huit chooñ tzajpjoty, cidāgy ma iich nhuinduu, xóchity anajty ma mīdaax ytaatz. ⁶ Co nnimijhuāgyich n'ixa'ñich ti jiiby, chi n'ijxyich may iyujc, jiiby iyujc mīdaaxpi yci' ytecy, jiiby ahua'nbi iyujc, jiiby tza'ñ, etz joon. ⁷ Chi nmīdooyich tüg ayuc huidibi xyñimaaybich: “Pedro, pidíg, yaj'ög yi iyujc etz tzüdz.” ⁸ Chi n'adzooyich: “Ca' Huindzin, com caminaabi ndzüchich iyujc huidibi ca' ñigo'adúcyity judíojäy ajcxy tzüdzipy.” ⁹ Chi mīmetz'ocpi tüg ayuc tzajpcixy xyñimāyich: “Huidi Dios ti yajhuäch, ca' huaad mdijy co ca' y'oychú'tznity.” ¹⁰ Tugüg'oc jadu'n yjajti, chi je poob huit ypättigüyñi tzajpjoty. ¹¹ Huin'it xyñimiiñich je quexyöybi nidugüg, chooñ ajcxy jim Cesarea. ¹² Chi je Espíritu xyñimaayich, co min n'ocnicxich müid je' ajcxy, ca' ma ni ti nhuinmayipyich. Müid nicxyich nidugüg nmügügtijcich. Chi iich ajcxy ndigüiy ma je jāy ytjc. ¹³ Je codijc xyajmüdmíydaacich co je' anajty ti huin'ixy tüg ángel ma ytjc, ñimāyii: “Quex mdumbi ajcxy jim Jope huen nicxy yajtzoongixy Simón huidibi jāy ytijpy Pedro, ¹⁴ e je' xyajnimāhuip nej jēbi Dios m'alma xyajñidzoocip, miich etz tüg'óciy mjñn mdijc mjuugy-migüg.” ¹⁵ Co Jesús y'ayuc ngapxhuäcxtzondaacich, chi je Espíritu Santo ñidigüiyi ycödügüiyi je' ajcxy. Tim jadu'n nej xyñidigüiyim xycödügüiyim je jaijip'atypi. ¹⁶ Huin'it njāymejtzcoodyich nej je Huindzin Jesús yminañ: “Janch Juan, je Bautista,

jäy yajnuibejt müd nü, e Dios jäy ajcxy y'adigihuiyb yjottigihuiyb je Espiritu Santo.”¹⁷ Pen Dios ti ymöyii je jäy ajcxy huidibi ca' yjudiojäyity tú'ciy müd huidibi ich ajt ti xymooyim co nmibijcim Jesucristo. ¿Coactim pin ich co Dios nmidzip'adiybich?

¹⁸ Je mibijcpidijc ajcxy jim Jerusalén, co ajcxy midoy Pedro y'ayuc, chi ajcxy y'amonday. Chi ajcxy Dios jäymejch cömay, chi ajcxy yminaangixy: “Dios jadu'n ti ymina'n co je' ajcxy huidibi ca' yjudiojäyity jëbi yjothuimbijtcixy, jigix Dios ymöhuib yjugy'ájtin huinixibi.”

Antioquía jäy ymidoo ajcxy Dios y'ayuc

¹⁹ Taabi jäy yaj'o'cy Esteban, chi jäy ajcxy ooy ixhuidijtcoty pahuidijtcoty Jesús yjäy jim Jerusalén. Chi nijëjity ajcxy yqueecy, nicxy ajcxy jim Fenicia ñaaxjot, etz jim Chipre, etz jim Antioquía. E capxhuäcxy ajcxy je oybi ayuc ma jadyii judiojäy, ca' ajcxy jac ni pin yajnimay.²⁰ E nijëjity mibijcpidijc huidibi jim anajty ajcxy yconaaip y cogäjpip Chipre etz Cirene, chi ajcxy ñicxy jim Antioquía. Chi yajmidmidyacy ajcxy je Huindzin Jesús y'ayuc müd griegojäy ajcxy.²¹ E je Huindzin Dios ooy ypubejti je' ajcxy, e ooy mayjäy ixmajch je jibic-huinma'n etz mijpidaaccixy yi Huindzin Jesús ytiy'ajt.

²² Co je mibijcpidijc ajcxy jim Jerusalén midoogixy jada ayuc, chi ajcxy quejxy Bernabé jim Antioquía.²³ Co Bernabé jim yja'ty, chi ijxy jadu'n nej Dios anajty oy'ájtin ti tuñ, chi oy yjotcugiy je Bernabé. Chi capxhuijy tüg'óciy co huen ajcxy janch cixyjot huinjot cuyduuni yi Huindzin Jesús y'ayuc ytiy'ajt.²⁴ Com Bernabé oyjäy je' anajty, e ooy mijpidägy Dios y'ayuc etz ooy müdity je Espiritu Santo jotjoty huinma'ñyjoty. Ymüd je' ycapxhuijin ooy mayjäy mijpidacy Jesús y'ayuc ytiy'ajt.

²⁵ Co jadu'n yjajti, chi Bernabé oy ixtay Saulo jim Tarso, e co paty, chi müdmüñ Antioquía.²⁶ Jadu'n yjajty jim ajcxy y'ijty tüg jimijt, yaj'ixpijccixy je mayjäy huidibi ajcxy jipptigiyiy je Jesús y'ixpijin. Jim Antioquía oga'n yximoy cristiano, je jäy ajcxy huidibi mijpidacp Jesús.

²⁷ Huin'it tiempo nijëjity tiy'ajtnajtcapxiiybi chooñ Jerusalén ñicxy ajcxy jim Antioquía.²⁸ Tüg huidi anajty yxi Agabo ytinay'ahuüy mayjäyjoty, e chi je Espiritu Santo yajcapxi, e ymina'n co mijyuu anajty ñaxcidäga'n huindu'ñybi naaxhuiñ. E janch jadu'n yjajti taab anajty Claudio y'ane'my.²⁹ Huin'it je mibijcpidijc ajcxy jim Antioquía pidacy ajcxy yhuinma'n co quexaangixy pubëjtin ma ymügëjtijc ajcxy huidi tzinaayb jim Judea, jadu'n nej pubëjtin pin tim yega'n.³⁰ E jadu'n ajcxy tuuñ. E je meen täbi anajty ymucy yajmiguejxy ajcxy je Bernabé etz Saulo ma je mibijcpidijc tungmüdpj jim Judea.

12

Co Jacobo y'o'cy etz co Pedro yajpujxtijctigiyi

¹ Huin'it tiempo je rey Herodes yajmajtzä nijëjity Jesús yjäy, e chi yajtzaachytuuni.² Chi ni'ane'mdiy huen yaj'ögyii müd espada je Jacobo, je Juan y'uch.³ Co je rey nejhuüy co je judiojäy ajcxy jadu'n ooy jäygidaccixy, chi ymajtzä Pedro nañ jadu'n. Hue' jadu'n yjajti xiijoty, je xi' mina tzajcaagy caaygixy huidi ca'pi ylevadura müdity.⁴ Co Pedro yajmajch, chi yajpidacy pujxtigoty. E chi je rey ane'my co huen midaaxpicy soldado ajcxy cuend'adyi, tügpicyjaty midaax soldado ajcxy. Hue' anajty je rey ti huinmay xinaxy anajty tiyduna'n Pedro mayjäy agujc.⁵ Pedro jiiyb anajty pujxtigoty janch oy

cuend'aty. E je mibijcpidijc janch Dios mibijctzodiiib anajty ajcxy miiid Pedro ycixpi.

Dios y'ánel yajpidizimy Pedro pujxtigoty

⁶ Huin'it coodz ma ca'ni anajty yxiimiiy, ma je Herodes anajty tiyduna'n Pedro mayjäyoty com jabom, Pedro maab anajty, e soldado agujc ajcxy cixoch tecyoch anajty miiid cadena, e jadügpicy soldado ajcxy pujxtijc'aguy anajty ajcxy ycuend'aty. ⁷ Chi janch timetiini yHuindzin Dios tüg y'ánel ñayguëxici ytinäy ma Pedro yhuinduu, e je pujxtijc yaj'anayday. E chi je ánel tijyücxu Pedro ma ycaach, chi yajmäyhuijy, e nimay:

—Pidig mic'amy.

Chi je cadena ycäday ma Pedro yci'. ⁸ Chi je ánel nimay Pedro:

—Ñayhuini, yajtigi' mgig.

Co Pedro yajtigi'yday ycig, chi je ánel ñimaayi:

—Yajtigi' mjocxhuit, e pajamgich.

⁹ Chi Pedro pujxtijc pidizimy axam ma je ánel, ni ca' nejhuiy pen janch anajty huidibi je ánel tummy, hue' jihuiy jadu'n nej ycumäy. ¹⁰ Chi ñajxy ajcxy ma tügpicy cuend'ajtpi, mic'amy ajcxy mimetzpi ñinajxy. Co ajcxy yjätu ma mijpujxtijc aguu, ma mijtüba', chi je' ci'm'ahuaach. Chi ajcxy ypidizimy. Ti anajty mijyöygixni co je ánel ixmajtzn Pedro. ¹¹ Huin'it Pedro yhuinma'ñymejch, chi yminañ:

—Jadachambi njihuiybich co janch jada' co je Huindzin Dios ti quexy y'ánel, e yi' ti xyñihua'ñich ma Herodes, etz jadu'n nej tüg'ócüy judíojäy ajcxy anajty xytuna'ñich.

¹² Co Pedro yjot yhuinma'ñ ymejch, chi ñicxy ma María ytijc, je Juan ytaj, je Juan huidi jäy ytijpy Marcos, ma anajty ajcxy jim mayjäy tügmucy y'jtixy Dios mibijctzoogixy. ¹³ Co Pedro tijc'aguu cojxnojcy, je tiba'y'amybi, chi tüg töxy'anäg ypidizimy huidi anajty yxi Rode, ixa'n pin je' tijc'aguu cojxnojcy. ¹⁴ Co oy yögmidoy co Pedro je' anajty, chi ca' ytijc'aguu yaj'ahuaach. Jëyi co poyigy ñicxy tigoty co anajty tzachjotcücicy, nigapxy co Pedro je' anajty ma tijc'aguu.

¹⁵ Chi je jäy ajcxy nimay Roda:

—Mloocjiiyb jada' miich.

Chi je töxy'anäg y'adzoooy co janch je' anajty. E je jäy ajcxy yminaangixy co ca' yi' yjējity, hue' jada' Pedro y'ánel.

¹⁶ Yam Pedro anajty tijc'aguu tzachcojxnocy co ajcxy yaj'ahuaach, chi ajcxy ijxy, chi ajcxy ooy chigiiy yjihuiy. ¹⁷ Pedro cimiid ytiy'ajtyejcy co huen amon ajcxy. Chi yajmiiidmiydacy nej je Huindzin Dios anajty ti yajpidizimiiy pujxtigoty. E nimay ajcxy co huen ñicxy yajmiiidmiydägy jada je Jacobo etz jacjadyii mibijcpidijc.

Chi Pedro ñicxy huingbi cajp.

¹⁸ Co yxiimiiy, huin'it soldadtijc ajcxy ooy ytiigiiy huambi jihuiybii huinmay'ahuidijty, com ca' nejhuiygixy nej je' anajty ti ytunyii ti yjadyii miiid Pedro ycixpi. ¹⁹ Chi Herodes ni'ane'mdiy huen ñicxy yaj'ixtäy Pedro. E co ca' yajpaty, chi pijctzoy tiy'ajt ma soldado ajcxy huidi anajty Pedro ti ycuend'adyii. Chi ni'ane'mdiy huen ajcxy ñicxy yaj'ögyii. Chi Herodes choon jim Judea, chi oy chinaydacpicy jim Cesarea.

Herodes y'ögy

²⁰ Herodes janch ymijotmätpy anajty je jäy huídibi tziinaayb jim Tiro etz Sidón. Chi je Tiro etz Sidón jäy ajcxy ñaygapxi nej jëbi huingohuägihuaangixy je rey. E ymimadac ajcxy co migapxy je Blasto je mïjtungmïdipi maabi rey Herodes ytijc. E chi ajcxy pijctzoy co huen tzip cixy naxy, com co ajcxy xijc mooc jim anajty yajtzoongixy ma rey ñaaxjot. ²¹ Chi Herodes agapxtujcy tüg xii, chi je reyhuit yajtigiiy, chi ñhaydac paty ma ycötujctac, chi migapxy ajcxy je jäy. ²² Chi je mayjäy ajcxy ytigiiy mic capxp miydaacp, chi ajcxy ymïnaangixy:

—¡Jada jäy huídibi capxp, ca' jada yjäyity, jadu'n yi' nej tüg dios!

²³ E huin'itiy Huindzin Dios y'ángel yajpa'mbejty Herodes, com ca' anajty huindzigiiy cömay je Dios. Chi y'o'cy, ting je' tzütztaayi.

²⁴ Je Huindzin Dios y'ayuc mibijc'idichpy anajty jäy, e yajcapxhuäcxp anajty hueñytimma'amyity.

²⁵ Co Bernabé etz Saulo ajcxy ytungmay jim Jerusalén, huin'it chooni ajcxy jim ymïdnicy huídibi anajty yxii Marcos.

13

Bernabé etz Saulo yajtzondaaccixy ytung huídibi ajcxy pátip

¹ Ma je' ajcxy huídi mïjpidacp Jesús jim Antioquía, jim anajty jadyii huídi Dios y'ayuc yaj'ixpijcp anajty, etz ñañ huídibi tiy'ajt najtzcapxiiyb. Jim anajty Bernabé etz Simón, huídi anajty ajcxy ytiijpy el Negro, etz Lucio huídi tzoon Cirene ñaaxjot, etz Manaén huídi tüg yeectac mïd Herodes, huídibi ane'm jim Galilea, etz Saulo. ² Tüg xii ajcxy ñayyöymújcgixy jaygay jay'ügy Dios ojadajtciy. E chi je Espíritu Santo ñimaayi:

—Huen pidáacigich ajcxy Bernabé etz Saulo ahuing jigix ajcxy ytunipy ma je tung tii bi nyajnihuohuiyich.

³ Chi ajcxy yjacDios'ojadajty etz yjac'ayuu'ajty, e chi je jäy ajcxy cïñixajy Bernabé etz Saulo, e chi ycapxycijxy mïd je' ajcxy.

Je apóstoles ajcxy capxhuäcxixy Dios y'ayuc jim Chipre

⁴ Chi jada' je Espíritu Santo yquejxi Bernabé etz Saulo huen nicxy Seleucia, e jim ajcxy ybarcotigiiy nicxy ajcxy jim Chipre mejy agujcpi. ⁵ Co jim ajcxy yja'ty ma barco yjättac huídi yxii Salamina, chi ytigiiy Jesús y'ayuccapxhuäcxp ma je judíojäy ajcxy naymujctac. Tzooñ je Juan anajty ñañ jadu'n je' anajty Bernabé etz Saulo pubéjtip. ⁶ Huídiijttay ajcxy ma je naax mejy'agujcpi, e yja'ty ajcxy ma je cajp huídi yxii Pafos. Jim ajcxy paty tüg judíojäy huídi anajty yxii Barjesús, hue' je' anajty huijyjäy, e ñaydiyiy anajty co Dios ytiy'ajt najtzcapxiiyi, e ca' anajty yjançhity. ⁷ Je huijyjäy ooy mïd ñaymigüg'adyii anajty je huídibi ane'm jim, hue' anajty yxii Sergio Paulo. Je Sergio Paulo ooy anajty ycohuinma'ñity, ooy y'ixpicyity. Chi ni'ane'mdiy co huen nicxy yajtzonyii Bernabé etz Saulo. Com je Sergio Paulo anajty mïdoohuaani je Dios y'ayuc. ⁸ Je huijyjäy, huídi ñañ jadu'n yajtijp Elimas, mïdziptzoñ Pablo etz Bernabé, e tücc'y capxaduga'ñ ca'ydi je gobernador ymibicy. ⁹⁻¹⁰ Chi Saulo, huídibi ñañ jadu'n yajtijpy Pablo, mïd je Espíritu Santo huind#cxpejty je huijy jäy, e nimay:

—¡Ooy mibicjäyity miich, ooy m'aniijity, mujcu' miich xy'ung'ajtp, ooy mmïdzip'aty pinjaty oyjot oyhuinma'ñ mïd! ¿Mina m'ixmadza'ñ nej mdzachyajtigoya'ñ je Huindzin Dios ytiy'ajt? ¹¹ Jadachambi je Huindzin Jesús yxhachytunaamb, e mhuí'mip huiintz, etz ni ca' je xii'mbi tzojc m'ixipy.

Chi je huijyäjy mic'amy yhuim'y huiintz coodz, chi ixtay pin oc-huijznicxib com ca' anajty y'oc'ixni. ¹² Co je gobernador jadu'n ijxy, chi mijpidacy Jesús y'ayuc, e chi ooy jihuuy huinmaay nej Pablo nimiydägy je Huindzin Jesús y'ayuc ytiy'ajt.

Pablo etz Bernabé yajpátcixy jim Antioquía etz Pisidia

¹³ Chi Pablo etz ymigütiyc ajcxy müd ybarcotigüiy, chi ajcxy ñicxy Perge ma Panfilia ñaaxjot. Chi Juan puyöduutni Pablo etz Bernabé, e chi ñicxni Jerusalén. ¹⁴ Pablo etz Bernabé ñajxy jim Perge oyja'tcixy jim Antioquía ma Pisidia naaxjot. Sábado xii ajcxy ytiigüiy ma je judíojäy ajcxy ñaymujctac, chi ajcxy ixtactay. ¹⁵ Co ñecycapxtay ma Moisés ñecy etz Dios y'ayucnajtzcaxxiybi ñecy, chi je naymujctac huindzin quejxy ayuc ma Pablo ajcxy, ñimaayi:

—Migütiyc, pen mmüd ayuc tiy'ajt müd jäy ycixpi jébi cham myajnimäy ajcxy.

¹⁶ Chi Pablo ytinayigy, yci' müd ytiy'ajt yecy co huen amoongixy, e nimay ajcxy:

—Midoogix, miich Israel jäy ajcxy, etz huidibi Dios yajmij'ajtp. ¹⁷ Je Israel jäy Dios huin'ijxy ich'ajt nmij'ap nmijteedy jecy'ajty etz yajyujcpejt ajcxy micho'n co anajty ajcxy jim yjactzinäy Egipto ñaaxjot. Chi ajcxy yajpidziimni müd Dios ymic'ajt. ¹⁸ Dios je' ajcxy mihuindinay huixchigüipx jimijt jim mijtigüduum. ¹⁹ Je Dios huixtujc it naax cajp yajtigoy huidi anajty jim tzinaayb Canaan ñaaxjot, etz yajmoy je naax ich'ajt nmij'ap nmijteedy jecy'ajty jigix ajcxy jim chinähuipy. ²⁰ Midaax migo'px jahuixchigüipx majc jimijt Dios mic'ajt mooy juez ajcxy huen ane'myii Israel jäy ixti mabaad Samuel je Dios y'ayucnajtzcaxxiy ytungbijcy. ²¹ Huin'it ajcxy tüg rey pijctzoy huidi ane'müib ajcxy. Chi Dios yajreytigüiy Saul huidi tuun huixchigüipx jimijt. Je Saul yteedy hue' je' anajty yxi Cis, hue' je' anajty Benjamín y'ap y'oc. ²² Chi Dios tungbijcy Saul e yajreytigüiy David, chi Dios yminañ: “Ti nbaadyich David, Isaí ymang, tüg yeydiyc huidibi cuydundähuipy nej ndimdzcocyich.” ²³ Ma David y'ap y'oc Dios yajnibijcy Jesús, jigix nihuänipy yajnidzögipy je Israel jäy ajcxy, jadu'n nej anajty jecyip Dios yaj'ahuaniy ajcxy. ²⁴ Ca'ni anajty Jesús miin co Juan, je Bautista, capxhuäcxy Dios y'ayuc ma je Israel jäy ajcxy, nimaaygixy co copicy huen jothuimbijtcixy ma Dios, e huin'it jébi ñiibéjtcixipy. ²⁵ Co anajty Juan y'o'cin huingon, chi yminañ: “Ca' ich njéjity je Cristo, jadu'n nej mminaangixy. Jayijp ti nmüinich, jac'axam miina'ñ je Cristo; jacmic'ajt müd je' ca'ydi ich. Ca' xypaadyich nicxy yi' ycighuin nguejich.”

²⁶ Chi Pablo yjacminañ:

—Migütiyc, Abraham y'ijx y'oc etz pinjaty yajmij'ajtp Dios, Dios ti xyaniguexy jada ayuc nej ajcxy jébi m'alma nüdzoocin paady. ²⁷ Je jäy ajcxy huidi anajty ajcxy tzinaayb jim Jerusalén etz tungmüdpí ajcxy, ca' ajcxy nejhuüy pin je' anajty je Jesús, ni ca' anajty huinjihuüygyixy y'ayucnajtzcaxxiybi ajcxy y'ayuc huidibi anajty yajcapxp ma ajcxy ñaymujctac huindüg sábado. E je' ajcxy ci'm yajpocycäy Jesús, e cuyduñ nej anajty ajcxy yjaybetyity ma Dios ñecy. ²⁸ Oy ajcxy ca' paty pocy nej yaj'öccixipy Jesús, chi ajcxy nibijctzohuüy ma Pilato co huen nicxy yaj'ögyii. ²⁹ Co je jäy ajcxy cuydunday jadu'n nej anajty yjaybetyity ma Dios y'ayuc müd je' ycixpi, chi ajcxy yajminajcy crudzcixy, etz oy yajnaaxtiigüiygyixy. ³⁰ E Dios je Jesús yajjugypijc co anajty ti y'ögy. ³¹ Chi canaag'oc ñayguëxigo'ci ma ymigütiyc huidi anajty ti ymüdhuididyii co choofñ

Galilea ñicxy Jerusalén. Jadachambi yi' je' ajcxy huidi tiy'ajt yejcpy ma je jäy ajcxy.

³² Je oybi ayuc ñich miich ajcxy nyajmüdmüydacpy cham, huidi Dios yajnimay ñich'ajt nmij'ap nmijteedy jecy'ajty. ³³ Je oybi ayuc ti Dios cuyduñ cham ma ñich'ajt co yajjugypijcy Jesús co y'o'cy. Jadu'n yi Dios y'ayuccojaaybi jaay jecy'ajty ma je Salmo necy mimetzpi ma Dios jadu'n yminañ: "N'ungich cham ti nyajjuugypicyich." ³⁴ Müid jadayaabi ycixpi co Dios ti yajjugypicy Jesús co y'o'cy, jigix ñinix ca yhuindigoopy jadu'n anajty jaybétyity ma Dios ñecy ma Dios jadu'n yminañ: "Nmöhuaamyich miich ajcxy je conúcxin huidibi nyajnimaaayich je David." ³⁵ Paady nañ jadu'n Dios y'ayuccojaaybi jaay jadüg'it, ma yminañ: "Ca' Dios a'ixiy nicxy y'ung ñinix yhuindigooy, je y'ung huidibi müid huadz jot huinmañ." ³⁶ Com janch co je David Dios huiñ'ijxy, jigix ane'mipy yi' yjuugy ymügüg ajcxy. E co ytung yajmay, chi y'o'cy, e je' y'alma ñaybaatti müid je y'ap yteedy y'alma, e je' ñinix huindigooy je'. ³⁷ Je Jesús huidibi Dios yajjugypijc ca' je' ñinix yhuindigooy. ³⁸ Migügtijc, jébi mnejhuiygixy, co je pocyhuinmeecxin yaj'ihuäcxy yajcapxhuäcxy müid Jesús ycixpi. ³⁹ Müid je' ycixpi pinjaty mibijcp ti ypocyyajhuinmeecxixy huidibi Moisés yley anajty ca'p pocyhuinmeecxin yecy. ⁴⁰ Nayguend'ájtigix, ix xyajcidacpejtix je mij ayo'n jadu'n nej Dios y'ayuccojaaybi jaay jecy'ajty co Dios jadu'n yminañ:

⁴¹ Midoogix ñich n'ayuc, miich ajcxy nixiicpi yajxiicpi, nay'adzigi'yigixy, ix m'alma myajtigooygixy. Com ñich Dios ndumyibich tüg mijhuinmañ ma miich ajcxy mxii mdiempo. May miich ajcxy ca' mmibigipy, oy pin xyjayajmüdmüydáaccixipy.

⁴² Co Pablo ajcxy ypidzimy ma yi judíojäy ñaymujctac, chi je jäy huidibi ca' yjudíojäyity nimay je Pablo co huen nañ jadu'n yajmüdmüydägiyib ma je jadügpí sábado. ⁴³ Co ajcxy yöyhuäcxni ma nanyöymujctac may judíojäy etz mayjäy huidi ca' yjudíojäyity huidibi jijptigiyiy je judíojäy y'ixpijin, panicxy ajcxy je Pablo etz Bernabé. Pablo etz Bernabé capxhuijy ajcxy co huen panicxixy je tiy'ajt jadu'n nej Dios tibi tuñ may'ajt müid jäy ycixpi, e ca' ajcxy ixmadzipy.

⁴⁴ Co sábado yxi paty, chi jäy ñayöymujci jahuenjaty cajp jäy ycanicxtay co anajty tzachmidoohuaangixy Dios y'ayuc. ⁴⁵ Ca' anajty ajcxy yjotcújcity co je judíojäy ajcxy ijxy je mayjäy. Chi ajcxy ooy yjot'ambijccoty ni'ojiiygixy etz nimaaygixy oy ni nej Pablo. ⁴⁶ Chi Pablo etz Bernabé ytigüy miccapxpi yminañ ajcxy:

—Copicy anajty co ñich miich nyajnimähuipy Dios y'ayuc jayjip. Com ca' mgöbigaangixy Dios y'ayuc, e co ca' mnyabidáacigixy tudägy ma jugy'ájtin müid huinixibi, nicxyich n'ocyajnimäy ajcxy Dios y'ayuc huidibi ca' yjudíojäyity. ⁴⁷ Com jadu'n xy'ane'myich ajcxy yi Huindzin Jesús, e xyñimaayich ajcxy:

Ti ñich miich nbidägy jadu'n nej tüg tixcin jajin ma tüg'óciy naaxhuiñybi jäy jigix myajnejhuihuipy ajcxy je nüzooxin jiguembaad huindu'my naaxhuiñ.

⁴⁸ Co ajcxy jadu'n midoy huidibi ca' yjudíojäyity, chi ajcxy ooy nigi yjotcugiy, e chi ajcxy yminandacy co je Huindzin Jesús y'ayuc ooy anajty y'óyity. E may ajcxy mibijcy huidibi anajty Dios ti yajniögödüngiy co paatip jugy'ájtin huinixibi. ⁴⁹ E jadu'n jim yajcapxhuäcxy Jesús y'ayuc ma je jimbi naax cajp. ⁵⁰ E je judíojäy ajcxy minaygapxi nijéjity töxyjäydijc ajcxy tudägypi

huidibi Dios yajmij'ajtp, etz je mijjädijc, e je' ajcxy müid mübidigý Pablo etz Bernabé co pahuojpquëgaangixy ma jejümbi naaxjot. ⁵¹ Chi Pablo etz Bernabé ycig huinhuojpy, je' je' tiy'ajtip co ca' jäygidacy ajcxy nej jäy anajty ytungixy. Chi ajcxy nücxni jim Iconio. ⁵² E je' ajcxy huidibi mijpidaacp Jesús ooy anajty ajcxy yjotcujcity. E ymüid anajty ajcxy je Espiritu Santo ma yjot yhuinma'n.

14

Pablo müid Bernabé jim Iconio

¹ Jim Iconio Pablo etz Bernabé ytigüy ajcxy yquipxyi ma je judíojäy ñaymujctac, e oy yajxon ajcxy capxhuäcxy Jesús y'ayuc. E may judío etz griegojäy ajcxy ymibijcy. ² Je judíojäy ajcxy huidibi ca' yjudíojäyity huen je cajp jäy ajcxy mijotmädiipy je mibijcpidijc. ³ Müid jada ycixpi Pablo etz Bernabé yhuim'y je' ajcxy jecy etz capxhuäcxcixy ajcxy Dios y'ayuc huinmic jotmic etz je Huindzin mijotcujc'ajtcixy ooy, e mooyi ajcxy je mic'ajt jëbi ajcxy pa'mjäy yajtzögipy etz mijhuinma'n tungixy huidibi ijxpejt'ajtp ma Dios ymic'ajt. ⁴ E je cajpjäy mejtzcicy je' anajty ajcxy, nijëjity ymijpidacpy ajcxy yi judíojäy, etz nijëjity ymijpidacpy ajcxy je Dios y'ayuccapxhuäcxi. ⁵ Chi nijëjity judíojäy etz huidibi ca' yjudíojäyity ñaygapxi müid tungmüidpi co mijotmätcodaangixy etz tim tzaagögädaangixy Pablo etz Bernabé. ⁶ Co Pablo etz Bernabé nejhuüy, chi ajcxy yqueecy nücxny ajcxy jim Listra etz Derbe jim Licaonia, e majaty naax cajp huidi huinduy'agonbi. ⁷ Jim ajcxy capxhuäcxy Jesucristo ytiy'ajt nej jëbi ajcxy huaad y'alma nüdzoocin paatcixy majaty cajp huinjonbi.

Tzaagätzcixy Pablo jim Listra

⁸ Jim Listra anajty tüg yëydijc iñäy tecyma'tpi, caminaabi anajty yöy, com jadu'n anajty yma'xung'aty. ⁹ Je tecyma'tpi amüid'ijtpy anajty Pablo y'ayuc, e Pablo ijxpy anajty co ymüid mübijcin nej jëbi chögy. ¹⁰ Chi Pablo mic nımay:

—Tinaayig.

Chi je tecyma'tpi tüg tipy ytinaygugüy, e chi ytigüy yöyb. ¹¹ Co je mayjäy ajcxy ijxy nej Pablo anajty pa'mjäy ti yajtzögy, huin'it ajcxy ytigüy huambi jihüüybi müid Licaonia ayuc chachmınaangixy:

—ıDios ajcxy jadu'n nej jäy ti ycidaaccixy ma ñch ajt!

¹² Ymınaangixy co Bernabé je' anajty Júpiter, e je Pablo je' anajty Mercurio, com je' anajty capxp. ¹³ E je Júpiter teedy huidibi anajty tumb jim ma je Júpiter chajptijc cajppäbi, mımıñ toro ajcxy etz pijy. E je teedy müid je jäy ajcxy yhuindzigihuaangixy etz ojadadaangixy anajty Pablo etz Bernabé, yaj'ogaangixy je toro ajcxy. ¹⁴ Co Pablo etz Bernabé nejhuüy, ca' ajcxy jäygidacy nej jäy anajty ajcxy y'idüidzaangixy, chi ajcxy ci'm yhuıt agüidzüy, e ytigüy ajcxy mayjäy'agujc yam chachmınaangixy:

¹⁵ —ıYëydijctijc ajcxy! ¿Nej co jada jadu'n m'idüitcixy? Nañ jadu'n ñch ajcxy jäyity, jadu'n nej müich ajcxy. Paady ñch ajcxy ti nmingixy ma müich ajcxy mgajp jigix ajcxy m'ixmadzipy jada jadu'mbi huinma'n huidibi ca' choobaady ma Dios. E mijpidaaccixp je Dios juugypi huidi oyduñ tzajp etz naaxhuünybi, je mejy etz tüg'öciy tijaty ya n'ixim. ¹⁶ Jecy'ajty Dios ixmajch je jäy ajcxy huen tüngixy nej tzojccixy. ¹⁷ Oy Dios anajty yajecy tiy'ajt co je' Diosity, jatuñ jadu'n yi oybi müid müich ajcxy ycixpi. Dios yi' yajtuub etz yecy oybi cosecha e xymooyim mijcajee huidi ngaayim n'uucim e xyajjotcugüyım.

¹⁸ Oy anajty Pablo jadu'n jadim tzachnimaaygixy, ca'p ajcxy mimadacy co yi jay ajcxy ca'p yaj'ó'ccixipy je toro co anajty yhuindzigihuaangixy.

¹⁹ Huin'it xii nijējity judíoJay yja'ty, chooñ jim Antioquia etz Iconio. Chi ajcxy yajnimay je mayjāy co huen midziptzoongixy Pablo etz Bernabé. Chi mic'amy je mayjāy midziptzooñ Pablo etz cōgāch ajcxy. Hue' ajcxy tijy ti anajty yaj'ōccixy. Chi ajcxy oy ixjugucy cajpa'. ²⁰ Chi je apóstoles ajcxy jūbigiyy je Pablo, chi je' ypidīgý, e ñicxy jadūg'oc cajpjoty. Com jabom Pablo etz Bernabé chooñ, ñicxy ajcxy jim Derbe.

²¹ Co Pablo etz Bernabé jadu'n capxhuācxy je Jesucristo y'ayuc oybi jim Derbe, chi mayjāy ajcxy mijpidacy Jesús. Chi Pablo etz Bernabé ajcxy yhuimbijty Listra, Iconio, etz Antioquia. ²² Jim ajcxy jotmicmigapxy je mibijcpidijc ajcxy, e capxhuiyy huen tūgijp mibijccixy Dios y'ayuc, nimaaygixy:

—Co ndigihuaanim ma Dios y'ane'my copicy co nyajnáxim may ayo'n.

²³ Cajp cajp majaty mibijcpidijc yajpaady jim Pablo etz Bernabé yajñibicy nijējity yēydijctjc huen nigohuajc'ajtcixy je jāy ajcxy huidibi mijpidacp Jesús. Co anajty ti yajñibicy je' ajcxy huidibi nigohuajc'adīpy, chi jaygay ajcxy y'ijty etz Dios mibijctzoy miid je' ajcxy ycixpi.

Pablo miid Bernabé yhuimbijctcixy Antioquia jim Siria naaxjot

²⁴ Pablo etz Bernabé ñajxy ajcxy Pisidia oy ajcxy yja'ty jim Panfilia. ²⁵ Chi Pablo etz Bernabé Jesús y'ayuc capxhuācxi jim Perge, chi ajcxy ñicxy jim Atalia. ²⁶ Chi ajcxy jim ybarcotigiiy ñicxcixy jadūgtecy jim Antioquia ma anajty ajcxy ti yajñibigyii Dios chójcin miid je tung huidibi anajty ti yajcixcixy. ²⁷ Co ajcxy yja'ty jim Antioquia, chi ajcxy huoomujcy je jāy ajcxy huidibi anajty mijpidaacp Jesús, e yajmīdmīydactay tūg'ōciy nej anajty Dios ti ytuñ miid je' ajcxy ycixpi, nej anajty Dios ti yaj'ahuāch je tū'aa nej huaad mibicy ajcxy je huidibi ca' yjudíoJayity. ²⁸ Pablo etz Bernabé ijt ajcxy ooy jim jecy miid je mibijcpidijc ajcxy.

15

Mibijcpidijc ñayōymujci ajcxy jim Jerusalén

¹ Je huin'it tiempo nijējity jāy huidi tzoon Judea yja'ty ajcxy jim Antioquia, e ytigiiy yaj'ixpijcp ma ajcxy je huidibi mijpidaacp Jesús, ymīnaangixy: “Pen myajñdzōgamy ajcxy yi m'alma, copicy co ajcxy myajtiy'ajttihuiipy jadu'n nej Moisés y'ane'my.” ² Chi Pablo etz Bernabé ñaymidziptzongooti ajcxy miid huidi anajty ajcxy tzomb jim Judea, e ca' ajcxy ñay'ayuc-huinjihuiiyi. Chi jada' yajñibejtī Pablo etz Bernabé etz jacjadyii mibijcpidijc huen ñicxy ajcxy Jerusalén yajtiyidīgý ma je apóstoles ajcxy etz huidibi ajcxy nigohuajc'ajt je mibijcpidijc jim Jerusalén.

³ Je mibijcpidijc huidibi anajty ajcxy jim Antioquia oy ajcxy tūjijphuohiyy Pablo etz je' ajcxy huidi ñicx miid Pablo. Chi Pablo etz miid yajmīdtijc ajcxy ñicxy, e ñajxy ajcxy Fenicia ñaaxjot etz Samaria ñaaxjot. Yajmīdmīydaaccixy je mibijcpidijc cajp cajp jadu'n nej jāy ajcxy huidibi ca' yjudíoJayity ti yjothuimbijctcixy etz yajmij'adaangixy Dios. E tūg'ōciy mibijcpidijc ooy ajcxy jāygidacy je Pablo y'ayuc.

⁴ Co Pablo etz Bernabé ajcxy yja'ty jim Jerusalén, chi je mibijcpidijc ajcxy cōbijci je apóstoles ajcxy, etz je' ajcxy huidi nigohuajc'ajtp anajty je mibijcpidijc. Chi Pablo yajmīdmīydactay nej anajty Dios ti ytuñ miid je' ajcxy.

⁵ Chi nijëjity fariseojäy, tüibi anajty mibijccixy Jesús, ytinayïgy ajcxy juntijoty, e ymïnañ ajcxy:

—Copicy co huen yajtiy'ajttïy je jäy huidibi mibijcp Jesús huidi ca' yjudiojäyity, e copicy nyaj'ané'mim co huen ajcxy Moisés ycötújcïn cuyduuni.

⁶ Chi ñayyöymujci je apóstoles ajcxy etz huidi ajcxy nigohuajc'ajtp je mibijcpidijc, co capxyöyaangixy je fariseojäy y'ayuc nej yhuí'mip. ⁷ Ca' ajcxy tzojc ñay'ayuc-huinjihuiyï, chi Pedro ytinayïgy ymïnañ:

—Migügtijc, mnejhuuyb ajcxy co jayhuin Dios ti xyhuin'ixyich ma miich ajcxy, jigix nyajnimähuiübich jäy ajcxy huidibi ca' yjudiojäyity je Jesús ytiy'ajt oybi nej ajcxy y'alma nïdzooçin paadipy. ⁸ E Dios huidi nejhuuyb jäy yjot yhuinma'ñ xyaj'ijxich je tiy'ajt co yejcy Espíritu Santo ma yi' ajcxy nañ tim jadu'n nej ytuuñ ma iich ajt. ⁹ Dios tú'ciy ytuñ müid iich ajt etz müid yi' ajcxy, müid co yi' ajcxy mibicy Jesús paady Dios yajhuaatzï ajcxy yjot yhuinma'ñ.

¹⁰ Jadachambi, ¿nej co ca' mhuinjihuïhuaangixy mibigaangixy nej Dios ytuñ müid huidibi ca' yjudiojäyity? ¿Nej co adzip myajnihuidzaangixy je costumbre huidi ni iich ajt ni n'ap ndeedy ca' ti mïmadägy nicxy cuydundaaygixy?

¹¹ Janch iich ajt nmibijcim co müid je may'ajt huidi Jesús ti tuñ müid iich ajt ycixpi ti nbaatim n'alma nïdzooçin. Nañ tim jadu'n je' ajcxy huidi mibijc Jesús huidi ca' yjudiojäyity ypaat y'alma nïdzooçin müid je may'ajt huidi Jesús ti tuñ.

¹² Huin'it je jäy ajcxy y'amonday, y'amido'ijtcixy nej Bernabé etz Pablo nimïydaaccixy nej anajty Dios ti tuñ müid yi' ajcxy, jadu'n nej ajcxy ti yajtzögy pa'mjäy müid Dios ymic'ajt, etz jac tijaty mijhuinma'ñ huidi ti tuñ ma yi' jäy ajcxy huidi ca' yjudiojäyity. ¹³ Co Pablo etz Bernabé ajcxy miydactay, chi Jacobo ymïnañ:

—Migügtijc mido'mbïjcgich ajcxy iich n'ayuc. ¹⁴ Simón Pedro ti xyajmïdmiydaacim nej Dios may'ajt ti tuñ oga'n ma huidibi ca' yjudiojäyity, co huin'ijxy huidi yi' yjäy'adaanip ma yi' ajcxy. ¹⁵ Quipxy jada ñaybadyii müid huidi je Dios y'ayucnajtzcaxiyybi jecy'ajty ycojay, ¹⁶ co jadu'n ymïnañ: Co anajty jadu'n ti y'ocjadyii, chi nhuimbidiipyich ya naaxhuin.

Nyaj'oyïhuübich jadüg'oc je naax cajp huidi Dianajty y'ane'myib huidi anajty ti y'octigooybi jadu'n nej tüg tijc huidi ti yciday. Ma David y'ap y'oc nyaj'a'oyïhuübich jadüg naax cajp, jadu'n nej jäy ytiyc cojy huinjemybi.

¹⁷ Jigix jacjadyii jäy y'ojadadipy ajcxy yi' Dios. Nañ jadu'n je' ajcxy huidi ca' yjudiojäyity, huidi iich njäy'adaanip.

¹⁸ Jadu'n je Huindzïn Dios jécyp jada tiy'ajt jadu'n yejcy.

¹⁹ Chi Jacobo yjacmïnañ:

—Paady iich jadu'n nmïna'ñich co ca' huaad n'amayïyim ajcxy huidi ca' yjudiojäyity huidi ajcxy ti mijpidägy Dios. ²⁰ Hue' janchtiy tzoç nijayïyim co ajcxy ca' tüzdzipy huidi jäy yajhuindzïgyyb ídolos, etz ni ca' huaad migapxcixy huingbi töxyjäy, etz ni ca' huaad tüztcixy iyujc huidijaty jäy yöç-huïdypï, etz ni ca' huaad jïcxcixy tijaty iyujc ni'py. ²¹ Jecy'ajty ixti chamni tüg tüg cajp, ji pin ihua'cxp capxhua'cxp Moisés yley majaty nayyöymujctac naag naag pocxinxii.

²² Chi je apóstoles ajcxy etz je huidi nigohuajc'ajtp yi' mibijcpidijc, müid tüg'óciy Jesús yjäy pidacy ajcxy yhuinma'ñ co huin'ixaangixy nijëjity jäy ma je' ajcxy etz quexaangixy jim Antioquia quipxy müid Pablo etz Bernabé. Chi ajcxy yajnißejty Judas, huidi nañ jadu'n yajtiy Barsabás, etz müid

Silas, yëdijctijc huidi ajcxy capxpaadip. ²³ E je' ajcxy yajmiguejxy necy nej anajty ti jaay: "Ich ajcxy apóstoldijc, etz huidi nigohuajc'ajt yi mibijcpidijc, etz nidüg'ócicy mibijcpidijc, cham ich ajcxy nguexy capxpcxin ma ajcxy mibijcpidijc huidi ca' yjudiojáyity huidi ajcxy tzinaayb jim Antioquía, etz huidi ajcxy tzinaayb Siria etz Cilicia ñaaxjot. ²⁴ Ti ich ajcxy nejhuüyich co nijëjity jáy ti xynicxcixy, choñ ma ich ajcxy, ca' ich ajcxy ngótujcin mooy, e xy'amayiygixy jim müid y'ayuc, e xyajhuinma'ñytigoya'ñ ajcxy, co ajcxy xynimaaygixy co copicy co myajtiy'ajttíhuip ajcxy m'ung, etz mbayöyipy ajcxy je Moisés ycötújcin. ²⁵ Paady ich ajcxy ti nnyagápxigixy nidüg'ócicy co nyajñbedipyich nijëjity jáy huidi yajpaatp ma ich ajcxy co huen nicxy xy'íjxcixy niguipxy müid nmigügtijcich huidi ooy ndzocyich, je Bernabé etz je Pablo. ²⁶ Je huidi ajcxy yjuy'ajt ti yoxy ti toogy müid ajt nHuindzin Jesucristo ycixpi. ²⁷ E judu'n yam nguexyich ajcxy Judas etz Silas, e yi' ajcxy ci'm xyajmüidmiydäpipy tüg'ócicy ich ajcxy n'ayuc. ²⁸ Ti je Espiritu Santo huinma'ñ pidägy ma ich ajcxy nhuinma'ñ etz ich ajcxy ti nhuinma'ñ nbidägyich, co ca' nyajñibigipy ajcxy tijaty ayuc tzaachypi, jëyi janchtiy je huidi copicyip. ²⁹ Copicy co ca' ajcxy mdzüzzipy huidi jáy yajhuindzigüyb ídolos, ca' ajcxy ni'py mñicxcixipy, ni ca' ajcxy mdzüzzipy iyujc huidi yöc-huüty ti y'ögy, e ca' ajcxy mmigapxtigooygixipy huingbi töxyjäy. Pen mguydundaayb ajcxy jada ané'min, oy anajty mdungixy. E Dios ajcxy xypubedipy xypudigíhuipy."

³⁰ Judu'n je' ajcxy huidi ti yajquexy nicxy ajcxy jim Antioquía. Jim ajcxy huoomujcy je mibijcpidijc, e yajcídigiyy ajcxy je necy. ³¹ Co je mibijcpidijc je necy capxy, chi ajcxy ooy yjotcugíy müid je oybi ayuc tiibi anajty ajcxy yajnigüexyii. ³² Com Judas etz Silas hue' je' anajty Dios y'ayucnajtcapxüybi, paady ajcxy yajjotcugíy jot'amij moy je mibijcpidijc müid je ayuc. ³³ Jecy ajcxy jim yhuäcxijpy, chi je mibijcpidijc müid ajcxy ycapxycijxy, yajmihuaníy ajcxy Dios, chi ajcxy yhuimbijtni ma anajty ti choongixy. ³⁴ Chi Silas yhuinma'ñypidacy co anajty yhuí'ma'ñ. ³⁵ Nañ judu'n Pablo etz Bernabé ijt ajcxy jim Antioquía, etz müid jac nijëjity ymígügtijc yaj'ixpijc'iditczixy etz capxhuäcx'iditczixy je Huindzin Jesús y'ayuc ytiy'ajt.

Pablo mimetz viaje

³⁶ Ti xii tiempo anajty ñajtzñicxüyñi co Pablo nimay Bernabé:

—Jam'ajt nmigügtijc co'ixüyim cajp cajp majaty ti ngapxhuäcxim Huindzin Jesús y'ayuc. Ooy njanejhuíhua'ñich nej ajcxy yajpaady. ³⁷ Bernabé ymüid nicxaamy anajty je Juan huidi yajtjip Marcos. ³⁸ E je Pablo ca' a'ixüy co müid nicxip Juan, com ti anajty y'ocpuyöydúutibi jim Panfilia, e ca' anajty ti yjacmüidajtüyöyii je tung. ³⁹ E ca' ajcxy ñay'ayuc-huinjhuüyí miñ xyipy. Chi Bernabé müidnicxy Marcos e ybarcotigíy ajcxy, chi ajcxy ñicxy jim Chipre. ⁴⁰ E je Pablo abicy huin'ixxy Silas huidi anajty müid ñicxa'ñ. Chi je mibijcpidijc müid ycapxycijxy, chi chooni ti anajty je mibijcpidijc yajmihuaníyii Dios, ⁴¹ chi ñajxy jim Siria ñaaxjot etz Cilicia ñaaxjot jot'amijmooy je mibijcpidijc.

16

Timoteo mijhuäcpejty je Pablo etz Silas

¹ Chi Pablo etz Silas yja'ty ajcxy jim Derbe etz Listra. Jim ajcxy paty tüg jáy huidi anajty yxii Timoteo huidi anajty mijpidaacp Jesús. Judiojáy anajty yta'ajtpy, e griegojáy anajty yteedy'ajtpy. Je' ytaj nañ ymibijcpy anajty Jesús.

² Je jāy ajcxy huidi yajmij'ajtp Jesús jim Listra etz jim Iconio ooy anajty oy nimiydaaccixy Timoteo. ³ Pablo ooy jatzojcy co Timoteo ycajāymiid'ajti. Chi Pablo yajtiy'ajttiiyi Timoteo, jigix ca' ymijotmādiiyb je judío jāy huidi anajty ajcxy jim tzinaayb, com tūg'óciy ajcxy nejhuūy co griego jāy teedy'adyii. ⁴ Cajp cajp ma anajty ajcxy űaxy yajmīdmīydaaccixy ajcxy je mībijcpīdijc je cōtūjcin huidi je apōstoles ajcxy, etz huidi nigohuajc'ajt je mībijcpīdijc jim Jerusalén. ⁵ Je' ajcxy huidi yajmij'ajtp Jesús cajp nīgi anajty yjotmīpcijccixy, etz mījpdāaccixy Dios y'ayuc, etz űimayiy'idīttzcixy jabom jabom.

Pablo yhuin'ijx tūg Macedonia jāy

⁶ Je Espīritu Santo ca' a'ixiy nicx capxhuācxixy Dios y'ayuc jim Asia űaaxjot. Paady ajcxy huingduum űicxy yajyōyűajxy ajcxy Frigia űaaxjot etz Galacia űaaxjot. ⁷ Chi ajcxy jim yja'ty ma Misia űaaxtziba'n. Chi huinmay co űicxa'ñ ajcxy Bitinia űaaxjot. E je Espīritu yajnejhuūy ajcxy co ca' yi' tzocy co jim űicxcixipy. ⁸ Chi ajcxy jūyōyűajxy Misia űaaxjot, chi ajcxy y'idacy jim Troas. ⁹ Chi Pablo cumāyjoty huin'ijxy tūg yēydijc, huīdibi yconaaxity anajty Macedonia, ytīnay'ahuūy ma Pablo yhuīnduu, e ycohuanīyī, űīmāyīi: "Tun may'ajt nicx jim Macedonia, e jim xypubedipy űch ajcxy." ¹⁰ Co Pablo jadu'n huin'ijxy cumāyjoty, chi űch ajcxy n'ixtay barco huīdī nicxamb jim Macedonia. Nhuinjihuūy űch ajcxy co jim Dios xyquéjxcixyich jigix jim ngapxhuācxibich Jesucristo ytīy'ajt je oybi nej jēbi ajcxy alma nīdzoocīn paadipy.

Pablo etz Silas jim Filipos

¹¹ Chi űch ajcxy nbarcotīgūy jim Troas nicxy űch ajcxy tīyī ma naax mejy'agujcpi huīdibi anajty yxī Samotracia. Chi com jabom ajcxy nja'tyich jim Neāpolis. ¹² Co űch ajcxy jim ndzooñ, chi űch ajcxy nicxy jim Filipos. Filipos hue' je' romano jāy ycajp. Je' je cajp jac mījpi ma je Macedonia űaaxpa'. Jim űch ajcxy nhuācxijpy jecy. ¹³ Tūg sábadō nicxy űch ajcxy cajppa', mīhuingon tūg mījnī, ma anajty judío jāy ajcxy mīdity Dios ojadajtac. Chi űch ajcxy n'ixtacy jim, e ngapxhuācxich ajcxy Jesús y'ayuc ma je tōxyjāydijc ajcxy huīdī jim anajty ajcxy ti yōymujccixy. ¹⁴ Je Lidia anajty y'amīdō'ijtp. Hue' je' anajty Lidia ycogajpity jim Tiatira, e ytocpy anajty ucy huit oy jatypī. Lidia yajmij'ajtpy anajty Dios, e je Huīndzīn Dios yajyungūyī yjot yhuīnma'ñ, jigix amīdō'idipy nej Pablo Dios y'ayuc capxhuācxī. ¹⁵ Je Lidia nībejt mīd tūg'óciy yjuugy ymīgūg, chi űch ajcxy xycohuanīy, e xyñīmāaygixich:

—Pen mīnamb ajcxy co nmībicyich je Huīndzīn Jesús, mīn jāttaaccix ma űch ndijc.

Chi ooy xycohuanīy űch ajcxy, ixti cooni jim xyajhui'myich ajcxy.

¹⁶ Jadu'n yjajti tūg tēcy co űch ajcxy anajty űicxy ma Dios ojadajtac, chi űch ajcxy nbaty tūg tumbi tōxy'anāg mañ'ajt mīdpi huīdī ooy ytiygapxy. Ymīd anajty yhuīndzīn ma ytuñ, e je' yhuīndzīn ooy anajty ymeeñybaaty co je tōxy'anāg ytiygapxy. ¹⁷ Je tōxy'anāg ypanīcxy chach yam Pablo etz űch ajcxy ymīnañ:

—Jada yēydijc Dios tzajpjtoty ajcxy ymīdumyb. Capxhuācxī ajcxy Dios y'ayuc jadu'n nej jēbi űch ajt n'alma nīdzoocīn paady.

¹⁸ Canaag xī jadu'n űch ajcxy yxhach'amayīy. Co Pablo chijpīn, chi yhuāc-huimbijty nīmay je mañ'ajtmīdpi:

—Mīd Jesucristo yxī n'ane'myich, pidzīm ma jada tōxy'anāg.

Tim huīn'itīy je ca'oybi yajyōyduuty je tōxy'anāg.

¹⁹ Co je töxy'anäg yhuindzin jadu'n ijxy co ca' y'ocmeeñybadaani, chi müid je' ycixpi ajcxy majch Pablo etz Silas, e yajnicxy ajcxy ma je tungmüidpi ma je' ajcxy y'agujctijc. ²⁰ Co ajcxy jiiy müidja'ty ma je tungmüidpi, chi yminañ:

—Jada yëdyjc ajcxy judiojây jada, nigoo ajcxy ñaax yajmäty ycajp yajmäty, ²¹ etz yaj'ixpicy ajcxy costumbre huidi ca' huaad iich ajt ngöbjiçim, e nihuaad ngatuunim, com hue' iich ajt romanojây.

²² Chi je mayjâ ajcxy müiddziptzoon Pablo etz Silas, e je tungmüidpi ni'ane'mdiy co huen ajcxy yajnijeñ yaj'ixjeñ huen yajhuojpcixy müid matz.

²³ Co ajcxy huojptay, chi pidacy ajcxy pujxtigoty, e ane'my ajcxy pujxtijc huindzin co huen cuend'ajtcixy yajxon. ²⁴ Co je pujxtijc huindzin ypaati je cötujcin, chi pidacy Pablo etz Silas jac jiiy öc'am, e chi ajcxy ixmajch co'adzity ytecy ma je quipy huidi yxi cepo.

²⁵ Chi jadu'n yjajty mijcutz anajty, co Pablo etz Silas chach Dios ojadajtcixy chach huin'ügixy yi Dios, e jacjadyi machyjây chach amidoo'ijtcixy. ²⁶ Chi timitiini uix huinxijty pujxtijc poch. Chi y'ahuatztay je pujxtijc agi', e y'adzittuttay je cadena ma tüg'öciy machyjây. ²⁷ Chi oy ymähuijy je pujxtijc huindzin. Co jadu'n ijxy ac'ahuädz pujxtijc aguu, chi yajpidziimy y'espada ñayyaj'öga'ñiyi anajty. Com hue' anajty tijy ti je machyjây yqueectây. ²⁸ Huin'it Pablo mic'amy migapxy je pujxtijc huindzin nimay:

—Ix nej mnayduuni, cheeby ajcxy nidüg'öciy.

²⁹ Chi je pujxtijc huindzin pijctzoy jän, e ytiçiy poyiçy pujxtigoty, janch tziyuuyb müid tziç'iñ. Chi ycoxtinay'ahuuy ma Pablo etz Silas ajcxy yhuinduu.

³⁰ Chi yajpidziimy Pablo etz Silas, e yaj'amidooy:

—Huindzin, çti iich jëbi nduñ jigix nidzoocin nbäadibich?

³¹ Chi je' ajcxy minañ:

—Mibic Huindzin Jesús etz mbaadipy nidzoocin, miich etz m'ungdöxyijc.

³² Chi ajcxy yajnimay je Huindzin Jesús y'ayuc tüg'öciy pinjaty anajty jim ma je pujxtijc huindzin ytijc. ³³ Mijcutz je pujxtijc huindzin puji je Pablo ajcxy chaachi'au, e chi je pujxtijc huindzin ñibejtay ajcxy müid y'ung ytöxyijc. ³⁴ Chi je pujxtijc huindzin yajnicxy Pablo etz Silas ma ytijc, yajcaay yaj'uucy ajcxy. Ooy anajty ajcxy yjotcujcity nidüg'öciy, com ti anajty mibijccixy Dios.

³⁵ Com jabom je mijtungmüidpi quejxy mutztungmüidpi jim ma pujxtijc huindzin müid cötujcin huen najtzmazdizigixy Pablo etz Silas. ³⁶ Chi je pujxtijc huindzin nimay Pablo:

—Ti je tungmüidpi quexy cötujcin co jëbi nnajtzmazdiziyich miich ajcxy. Nicxcix jotcujc.

³⁷ Chi Pablo migapxy je mutztungmüidpi, e chi nimay:

—Romanojây iich ajcxy. Yi cajptungmüidpi ti xyhuopyich müid matz mayjây agujc, ni ca' jayijp ti xytyduñich, e ti xypidägyich pujxtigoty. ÇNej co jadachambi xyñajtzmazdizhua'ñich ameechi? Ca' jadu'n y'öyity. Huen mijtungmüidpi ci'm miñ xyajpidizimigixich iich ajcxy.

³⁸ Chi je mutztungmüidpi cijx nimiydactây ma mijtungmüidpi tüg'öciy Pablo y'ayuc. Chi ajcxy ñay'adzigiyyi co nejhuuy co Pablo etz Silas hue' je' anajty ajcxy romanojây. ³⁹ Chi je mijtungmüidpi ñicxy ci'm oy capxjotcidägy je Pablo etz Silas. Chi yajpidziimy pujxtigoty, e pijctzoy may'ajt huen huingduum nicxcixni. ⁴⁰ Co Pablo etz Silas ypujxtijcpidziimy, chi ajcxy ñicxy ma Lidia ytijc. Jim ajcxy jadu'n ijxy mibijcpidijc, e jot'amijmoy ajcxy. Chi ñicxcixni.

17

Jim Tesalónica yjajti ooy capxy ayuc, ca' nay'ayuc-huin'jihuühüü

¹ Pablo etz Silas ajcxy ñajxy Anfípolis, etz Apolonia, chi ajcxy yja'ty Tesalónica. Jim anajty judío'jáy ajcxy tüg ñaymujctac. ² Com jadu'n anajty costumbre müdity, Pablo nicxp anajty ma judío'jáy ajcxy ñaymujctac sábado xii. E tug'ig sábado xii jim capxy miydacy müd je' jim Tesalónica. ³ Hue' anajty müd miydaaccixy jadu'n nej jaybecyity ma Dios ñecy co Cristo copicy ayo'n yajnaxtáhuip, e chi y'ögipy, huin'it yjugypigipy. Chi Pablo ymínañ:

—Je Jesús huidibi y'ayuc ngapxhuäcxibich, je' je' je Cristo.

⁴ Nijëjity judío'jáy ymibijc ajcxy e mijyöybejty ajcxy Pablo etz Silas. Nañ jadu'n may griego'jáy huidi anajty Dios yajm'ajtp, etz maytöxyjäydijc huidijaty oy ymijpidaacni ymijnicxpejt etz mübijc ajcxy Pablo etz Silas y'ayuc. ⁵ Je judío'jáy huidi anajty ca' ymibicy, yjotmätcoty ajcxy. Huomujcy ajcxy amügy jäydijc etz jibic jäydijc, etz naax cajp yajmättay, anejptuuti agojxtuuti ajcxy Jasón ytjic'aguu tzach'ixtaaygixy Pablo etz Silas. ⁶ E co ca' ajcxy paty Pablo etz Silas, chi ajcxy majch Jasón etz jacjadyii mübijcpidijc. Adzip ajcxy yajnicxy pahuijch pajugujcy ajcxy jim ma cajp tungmüdpí. Yam chachmínaangixy mic:

—Jada jäy ajcxy je' huidi tzachyajhuinma'ñydiigooyb tüg'ócíy naax cajp, nañ iyabaad ajcxy ti ymiingixy. ⁷ Jada Jasón ti Pablo etz Silas jim yajjättägy ma ytjic, tüg'ócíy ajcxy müddzip'adyii je César huidi ane'mb, ymínaangixy co ji jadüg rey, je' je' je Jesús.

⁸ Co jadu'n midoy, chi ajcxy ooy yajyumigý yaj'oxigý cajpjäy etz je tungmüdpí ajcxy. ⁹ Chi Jasón etz ymigügtijc yajmeeñeyjcy, chi najtzmazäiy ajcxy.

Pablo etz Silas jim Berea

¹⁰ Co oy ycodzäy mic'amy yi mübijcpidijc yajpidizimy ajcxy cajpjoty Pablo etz Silas, e quejxy ajcxy jim Berea. Co ajcxy jim yja'ty, chi ajcxy ñicxy ma judío'jáy ñaymujctac. ¹¹ Jim Berea judío'jáy ajcxy yjacmüid oyjot oyhuinma'ñ, ca'ydí judío'jáy ajcxy jim Tesalónica. Je Berea jäy ajcxy ycöbijc ajcxy Jesús y'ayuc ymüid oyjot oyhuinma'ñ. Jabom jabom ixtaaygixy ma yjaybetyity ma Dios y'ayuc pen janch jadu'n ymína'ñ nej Pablo yaj'ixpicy. ¹² May judío'jáy ymibijcy etz may griego'jáy huidibi ooy ymijpidaacni nañ jadu'n ymibijcy, töxyjäydijc etz yëydijctijc. ¹³ Co yi judío'jáy jim Tesalónica nejhuüy co Pablo nañ jadu'n Dios y'ayuc capxhuäcxí jim Berea, chi ajcxy jim ñicxy, etz yajyumigý yaj'oxigý je cajp jäy ajcxy. ¹⁴ Mic'amy ajcxy, je mijpidaacpi Jesús, yquejx Pablo mic'amy, huen nicxy jim ma mejypa'. Chi Timoteo etz Silas yjac-hui'my ajcxy jim Berea. ¹⁵ Je huidibi ajcxy Pablo jaymüid'ajt ymüidnicxy, müid ñicxy ajcxy ixti cooni yja'ty jim Atenas. Huin'it ajcxy yhuimbijty müid tüg ayuc co huen Timoteo etz Silas nicxy minaybadyii Pablo jim Atenas janch mic'amy.

Pablo jim Atenas ahuijxy Silas etz Timoteo

¹⁶ Co anajty Pablo ahuixy je Silas etz Timoteo jim Atenas, ooy anajty ytajy ymay co ijxy nejhuüy co je cajp müid ooy may quipychech, tzaadzech, etz oori oyduñ huidi ajcxy dios'ajtpy. ¹⁷ Paady Pablo nimiydacy Jesús ma yi judío'jáy ñaymujctac müid je judío'jáy etz jacjadyii jäy huidi Dios miyaaxp ojadajtp. E jabom jabom müid miydaaccixy pinjaty y'oymujcp cajp cujc. ¹⁸ Nijëjity ixpicytijc ñay'ijxquípxigixy y'ixpicin müid Pablo. Jim huidibi ni'ixpigüyb

epicúreo ixpíjcin, etz cham huidi ni'ixpígüyb estoico ixpíjcin. Chi ajcxy nijëjity ymínaangixy:

—¿Ti jada jada' ajt xyajnímaayim jada yëydíjc capxymaaybi?

Chi jadyii ymínaangixy:

—Hue' jada ycapxhuácxyp huingbi dios y'ayuc.

Jadu'n ajcxy ymínañ co Pablo nimíydacy Jesús etz jadu'n nej jáy yjugypicy huídijaty ti y'óccixyp. ¹⁹ Chi ajcxy mídnicxy Pablo ma je it ma je ixpíctijc ñaymugyii huídi anajty yxíi Areópago, chí ajcxy Pablo nímay:

—¿Nej jëbi njájtícxich jada jemybi ixpíjcin huídi miích mmímimb? ²⁰ Com ti íich miích xyajnímaayícxh ayuc ca'p'i yhuinjihuíñity, e nejhuíhuaamyícxh ajcxy nej yhuímíbdízim y tüg'óciy jada ayuc.

²¹ Tüg'óciy Atenas jáy etz nañ jadu'n huídi ajcxy jim adzinaayb, ca' anajty ni ti tungixy, jëyi nígoobi amído'íjtcixy etz mýdaaccixy jemybi ayuc tíy'ajt.

²² Huin'it Pablo ytínayígy mayjáy agujc jim Areópago, e ymínañ:

—Atenas jáy, n'íjxypícxh co miích ajcxy ooy myajmíj'ajtcixy canaagnax huídibí miích ajcxy mdios'ajtpy. ²³ Com ti xíi ya n'íxyícxh canaagnax huídi ajcxy m'ojadajtpy, chí ti nbaatyícxh tüg altar ma jadu'n yjaayity: “Je Dios huídi ca' pín íxy'adyii.” Je Dios huídi miích ajcxy m'ojadajtpy, e ca' ajcxy m'íxy'adyii, jada je' huídi nyajnímaayb ajcxy.

²⁴ Je Dios huídi oyduñ naaxhuíñybi etz tzajp etz jac tijaty, yí' je' níhuindzin'ajttayb tüg'óciy. Je Dios ca' chináy ma tzajptíjc huídi jáy ajcxy cojpy.

²⁵ Dios ca' ni ti yajtígooy'ity huídi naaxhuíñyáy jamóhuaaníp. Dios yí' yejpc jugy'ajtin etz huídibí nxejim, etz tüg'óciy tijaty.

²⁶ E tügpi nípy tügpi jot ti yaj'oyíy tüg'óciy yí jáy, jigix huen tzinaaygixy huíndu'my naaxhuíñ. Dios tíy'ajt yejpc nej xíi tiempo yöyípy, e ma jáy jëbi huaad chinaaygixy, ²⁷ jigix íxtáaygixípy Dios, jadu'n nej jíhuíy íxtaaygixy tondáy xajtáy, com ca' je' jiguemity ma íich ajt nidüg nidüg. ²⁸ Dios ycxípi íich ajt ndzinaayim nyúcxim etz nji'ajtm, com jadu'n mínañ miích ajcxy mboeta, huídibí íy yajcojp: “Dios íich ajt xy'ung'ajtm xy'anäg'ajtm.” ²⁹ Pen Dios íich ajt xy'ap'ajt xy'oc'ajtm ca' huaad nhuinma'ñ nbidaacim co Dios yjadu'ñity nej oori oyduñ, plata oyduñ, etz tzaadzech quipychech huídi jáy ti yaj'oyíy míd yci'mhuinma'ñ. ³⁰ Dios ca' mídity jotcóduyb je jáy chuuhuinma'ñ tíibi ñajxní. Jadachambi ane'mb Dios hueñytímma'amýity huen jáy ajcxy jothuimbíjtcixy. ³¹ Com ti Dios yajnihuinmayíy tüg xíi mína tíyduna'ñ yí naaxhuíñybi jáy míd je yëydíjc huídibí ti huin'íxy, jada tíy'ajt Dios ti yaj'íxy yajnejhuíy tüg'óciy jáy co ti yajjugypicy Jesús co y'o'cy.

³² Co ajcxy jadu'n mídooy co yí ócpi yjugypígy, chí nijëjity ytígy níxiicpi yajxiicpi. Chi jacjadyii ymínaangixy:

—Huaad íich ajcxy n'amído'ídípyícxh miích m'ayuc mína anajty jadüg'oc.

³³ Chi Pablo jim chooni ma je' anajty ajcxy. ³⁴ Chi nijëjity jáy ypadzooni huídi anajty ti míbicy Pablo y'ayuc. Ma je' ajcxy jim anajty tüg jáy huídibí anajty yxíi Dionisio, yí' je' anajty tungmíd jim Areópago. Nañ jadu'n tüg tóxyjáy huídi anajty yxíi Dámaris ypadzooni, etz jacjadyii jáy.

18

Chi Pablo ñícxxy jim Corinto

¹ Co jada jadu'n ytuni yjajti, chí Pablo chooni jim Atenas, ñícxxy jim Corinto.

² Jim mínybaati tüg judíoáy huídi anajty yxíi Aquila, Ponto anajty ycogajpity, namja'tni anajty míd ytóxyíjc Priscila. Jim anajty ti chongixy Italia ñaaxjot,

jëgixpi co je mij'ane'mbi, Claudio, pidacy cõtujcin co huen tüg'óciy judíojäy pidzimdaaygixy jim Roma. Chi Pablo oy cogapxiy Aquila. ³ Aquila etz Priscila ytung'ajtpy anajty cochactijcxuyi, com nañ cochactijcxuuyb anajty Pablo, paady Pablo jim yhui'my müd je' ajcxy. Chi ajcxy tú'ciy ytuuñ. ⁴ Tüg tüg sábadó xii Pablo ñicxy ma je judíojäy ajcxy ñaymujctac yajmüdmíydaaccixy Jesús y'ayuc ytiy'ajt etz capxjotcídaaccixy judíojäy etz nañ huidi ca' yjudíojäyity.

⁵ Co ajcxy Silas etz Timoteo yja'ty jim Corinto, chooñ ajcxy Macedonia, chi Pablo adügijp ytigüy ayuccapxhuäcxpi ma judíojäy ajcxy co Jesús je' je' je Cristo huidi je' ajcxy chach'ahuijxyp. ⁶ E je judíojäy ajcxy ytigüy jotma'tpi, tzipcaxpi ahua'ngapxpi. Chi Pablo yhuit huinxijty, je' je' je tiy'ajt co puyóydüdaani ajcxy, e chi Pablo ymínañ:

—Miich ajcxy müd mgim'bocoy ajcxy myajtigoya'ñ yi m'alma. Hich ca' ti pocy nmüdidyich ma miich ajcxy. Cham nicxy Dios y'ayuc ngapxhuäcxich ma huidi ca' yjudíojäyity ajcxy.

⁷ Chi Pablo yöybojtni ma judíojäy naymujctac, chi ñicxy ma Justo ytijc. Justo ooy anajty Dios miyáxy ojadaty, e ymüid anajty ytijc mihuingon je judíojäy ñaymujctac. ⁸ E Crispo, je judíojäy ñaymujctac huindzin, ymibijc je' je Huindzin Jesús y'ayuc ytiy'ajt, müd tüg'óciy y'ung y'anäg, yjuugy ymigüg. Nañ jadu'n nijëjity Corinto jäy co midoy Jesús y'ayuc, chi mibijcy e ñibejty ajcxy. ⁹ Chi je Huindzin Dios nimay Pablo cumäyoty:

—Ca' mdzigí, capxhuäcx'adítz n'ayucich, e ca' mni'amoñ. ¹⁰ Com ich miich nbubedipy, ca' pin jot müd'adipy nicxy nejaty xytuñy. Hich may ich ya nmüidity jäy ma jada cajp.

¹¹ Chi Pablo yhui'my jim Corinto tüg jimijt jacup, yaj'ixpijcy jäy je Huindzin Dios y'ayuc ytiy'ajt.

¹² Huin'it tiempo co Galión ygobrador'ajty jim Acaya ñaaxjot, chi judíojäy ajcxy midziptzoñ je Pablo, yajnicxy ajcxy ma cõtujctac. ¹³ Chi ajcxy nimay je gobernador:

—Jada yëdyjc tzach jäy yaj'ixpijcp co ca' ycopicyity yajcuydunipy Moisés ycõtujcin huidi jaybety ijtp.

¹⁴ Pablo capxamb anajty co oy yi Galión nimäy ajcxy je judíojäy:

—Pen yi Pablo ti ytundigooy o mijpocy ti tuñ, huin'it nmijpidägibich miich ajcxy m'ayuc, miich ajcxy judíojäy. ¹⁵ Pen je Cristo y'ayuc etz miich ajcxy mgõtujcin myajtzibiyb myajcapxyiyb, ca' ich huaad nyajtigiyiyich yijiibi huinma'ñ.

¹⁶ Chi je gobernador y'ané'min pidacy co huen judíojäy ajcxy yajpidzimdäyii ma je cõtujctac. ¹⁷ Huin'it tüg'óciy griegojäy ma je cõtujctac hajtzpidzimyib je Sóstenes, yi judíojäy naymujctac huindzin, e chi ajcxy cuyj jbijpy huingojxy jipcojxy ma gobernador yhuinduu, e Galión ca' tuñyuenti.

Pablo yhuimbijtni Antioquia, e yajtzondacy midügügpí viaje

¹⁸ Jac-huäcxijp Pablo jecy jim Corinto. Chi yhuinma'ñpidacy co chonaani. Chi ycapxycijxni müd je mibijcpidijc, e chi ybarcotigüyñi ñicxni jim Siria ñaaxjot. Ñicxni quipxyi müd Priscila etz Aquila. Jim Cencrea, ca'ni anajty ybarcotigüy, Pablo yajcöme'px cödza'm co anajty cuyduñ yhuandaacin. ¹⁹ Co ajcxy yja'ty jim Efeso, chi Pablo ñay'ixmajtz ajcxy müd Priscila etz Aquila, e ñicxy ma je judíojäy ajcxy ñaymujctac. Chi müdmíydacy je judíojäy ajcxy huidi jim anajty ti ñayöymújcgixy. ²⁰ Chi je judíojäy ajcxy jim Efeso cohuanüy co

huen jac-hui'my, e Pablo ca' a'ixi'y co yhui'mipy. ²¹ Chi Pablo ycapxycijxni müid je Efeso jäy, chi ymínañ:

—Copicy co jim xii nyajna'xá'ñyich Jerusalén, e nhuimbidipyich jadüg'oc ma müich ajcxy, pen Dios jadu'n tzojcp.

Chi Pablo ybarcotigiiy chooni jim Efeso. ²² Co anajty ti ypättigiiy jim Cesarea, Pablo nicxy Jerusalén co anajty capxpcxaangixy je mibijcpidijc, chi mic'amy idaacni jim Antioquía. ²³ Jim hueni yhuáčxijpy, chi choñ jadüg'oc ñicxy cajp cajp ma Galacia ñaaxjot etz Frigia ñaaxjot jotmicmigapxcixy tüg'óciy yi mibijcpidijc.

Apolos Dios y'ayuc capxhuáčxi jim Efeso

²⁴ Huin'it tiempo yja'ty jim Efeso tüg jäy huidi anajty yxi Apolos, hue' anajty ycojá'pity Alejandría. Ooy anajty oy ayuc capxhuáčxy. E yajxon nejhuidyá Dios y'ayuc huidi jaybety ijtp. ²⁵ Apolos ooy anajty ixpicyity ma Huindzin Jesús y'ayuc e ooy yjotmiccapxy, oy anajty yaj'ixpicy nej je Huindzin Jesús yajaty y'ayoy. Oy jéda'ajty anajty janehuüy nej Juan, je Bautista, jäy ajcxy yajñibejty. ²⁶ Chi Apolos ytigiiy capxpí miydaacpi ma je judiojáy ajcxy ñaymujctac janch ni ca' chigiiy chöyduñ. Chi co Priscila etz Aquila ajcxy midooy Apolos y'ayuc, chi ajcxy yajnicxy ahuingujc, chi ajcxy oy yajmüidmiydägy jac-huádz Dios y'ayuc ytiy'ajt. ²⁷ Chi co Apolos anajty ñicxa'ñ jim Acaya ñaaxjot, chi je mibijcpidijc jotmicmigapxy, e pubejty ajcxy. Chi ajcxy nijayiiy je mibijcpidijc huidi ajcxy jim Acaya, huen ajcxy cöbigipy yajxon je Apolos. Co Apolos yja'ty jim Acaya ñaaxjot, chi ypubejti ooy pin anajty mibijcp Jesús y'ayuc, com Dios anajty may'ajt ti tuñ ma je' ajcxy. ²⁸ Chi je Apolos oy capxpídzimay mayjáy agujc co ca' yjanchity nej anajty ajcxy judiojáy yhuinma'ñ müidity, co Jesús ca' je' yjéjity je Cristo. Je Apolos jim je' mic'ajt tzachpaady ma Dios y'ayuc ycojaayity co Jesús je' je' anajty je Cristo huidi anajty ajcxy y'ahuixyp.

19

Pablo may mibijcpidijc minaybaati jim Efeso

¹ Jim Corinto anajty Apolos, co Pablo tegyi'm yajyöyñajxy mijyuugjot, chi oy yja'ty jim Efeso. Chi jim paty may mibijcpidijc. ² Chi Pablo y'amidooy je mibijcpidijc:

—¿Nej ti xy'adigiiy xyjottigiiy je Espíritu Santo taab ajcxy mmibijcy Jesús?

Chi ajcxy y'adzohuimbijty:

—Ni ngamidooyñi iich ajcxy pen ji Espíritu Santo.

³ Chi Pablo y'amidooy ajcxy:

—¿Ti ñibejtin müich ajcxy mbaad?

Chi je' ajcxy y'adzooy:

—Je Juan, je Bautista, ñibejtin.

⁴ Chi Pablo ymínañ:

—Juan jäy yajñibejt je', je' je' je' tiy'ajt co huen jothuimbijtcxy. E nimaaygixy anajty co huen ajcxy mibigipy je Cristo huidi jacmínamni. Je' je' je' Jesús, je Cristo.

⁵ Co jada ajcxy jadu'n midoy, chi ajcxy oy ñibejty müid je Huindzin Jesús yxi.

⁶ E co Pablo cñixajy ajcxy, huin'it je Espíritu Santo y'adigiiy yjottigiiy ajcxy. Chi ajcxy ytigiiy capxpí miydaacpi tigachyjaty ayuc, e capxhuáčxy anajty ajcxy Dios y'ayuc. ⁷ Jéyi anajty nimajmetz yéydijctijc huídibi ajcxy ñibejt.

⁸ Tugüig po' Pablo jim yhuäcxijpy, e yöydüib anajty ma judíojäy ajcxy ñaymujctac capxhuäcxy Dios ytiy'ajt janch huinmic jotmic. Chi capxjotcidägy mayjäy müid Dios ytiy'ajt. ⁹ Nijējity jotjuuñdyic ca' ajcxy ymibijcy, jēy ajcxy jibic tzachnigapxy Jesús ytiy'ajt ma jāy ajcxy yhuinduu. Chi Pablo puyöydüutcxni. Chi abicy yajnicxy je mibijcpidijc ma tüg escueltijc. Hue' je' je escuela huindzin anajty yxi Tirano, e jim Pablo Dios y'ayuc anajty capxhuäcxi jabom jabom. ¹⁰ Mejt jimijt jadu'n jim chachyaj'ixpijcy, e tüg'öciy jāy ma je Asia ñaaxjot ymidoday ajcxy je Huindzin Jesús y'ayuc, je judíojäy etz huidi ca' yjudíojäyity. ¹¹ E Pablo mayba'mjäy yajtzoocy müid Dios ymic'ajt etz ooy mijhuinma'n ytuñ. ¹² Ixti yajnicxy anajty ajcxy yhuitt etz ypaayi huidi Pablo ñinicx anajty ti ypadyii, e yajpaatcixy anajty pa'mjäy, e je' anajty müid choocixy, e nañ je' anajty müid ca'oybi ypidzimy ma jāy ajcxy y'ay yjot.

¹³ Chi nijējity judíojäy huidi anajty huidiñt tzozdumbi, huidibi anajty yajpidzimgixyp ajcxy ca'oybi, jayajtzögaañ tüg pa'mjäy müid je Huindzin Jesús yxi co huen yajyöydyii je ca'oybi. Chi ajcxy nimaygixy je ca'oybi:

—ñich miich yam nimaayb müid Jesús yxi, je huidi Pablo ycapxhuäcxp, yajyöydüt jada jāy.

¹⁴ Jadu'n anajty y'idüitcixy je Esceva ymang ajcxy, je nihuixtujcpi ajcxy. Je Esceva hue' je' anajty judíojäy etz nihuindzin'aty teedy'adii. ¹⁵ Co je Esceva ymang ajcxy migapx je ca'oybi, chi je ca'oybi y'adzooy:

—N'ix'atypich je Jesús, e nnejhuüyibich pin je' Pablo, e miich ajcxy, ¿mbin miich ajcxy?

¹⁶ Chi je yēdyic huidi ca'oybi anajty müid, ytijcpigy tüg ma je' ajcxy, ymimadactay je nihuixtujcpi, e yqueectay ajcxy ma je tijc nihuädz ixhuädz etz tzaachi. ¹⁷ Tüg'öciy jāy ajcxy huidi anajty tzinaayb jim Efeso, judíojäy etz huidi ca' yjudíojäyity nejhuüyday ajcxy, chi ooy ajcxy chigiy e nimiyaaccixy e cōmaaygixy je Huindzin Jesús yxi.

¹⁸ E mayjäy huidi mibijc Jesús y'ayuc ooy ajcxy ypocy nigapxtay, jadu'n nej anajty yi jibic mañ'ajt ajcxy ti mi'ijtcixy. ¹⁹ E mayjäy tiibi anajty capxy je mañ'ajt necy yajminday tüg'öciy e no'ctay je necy ma jāy ajcxy yhuinduu. E co ajcxy maymujcy je libro tzou, chi naybaati jada' huixchigui'px majc mil plata meeñ (moneda mexicana naybaati jacnaxy jahueenjaty ycatüg migo'px jamajcmocx tüg mil). ²⁰ E je Huindzin Jesús y'ayuc ñigi anajty yhuäcx'idich, ñigi ymijtigiy'idich.

²¹ Co anajty jadu'n ti ytuñyii ti yjadyii, chi Pablo yhuinma'ñypidacy co nicxy cogapxihua'ñ je mibijcpidijc jim Macedonia etz Acaya. Chi anajty yjacnicxa'ñ Jerusalén e jadu'n yminañ co jim chondäga'ñ jadügtecy e ñicxa'ñ jim Roma.

²² Chi quejxy jim Macedonia mejt je ypubejtpi, Timoteo etz Erasto. Chi Pablo je' yjac-hui'my jecy jim Asia.

Canay'ayuc-huinjihuihuü jim Efeso müid Dios y'ayuc ycipi

²³ Huin'it tiempo tzip oy pidicni jāy y'ocyumigni y'oc'oxigni müid Huindzin Jesús y'ayuc ycipi. ²⁴ Co je', je plateri huidi anajty yxi Demetrio, yaj'oyiy anajty ac plata Diana chaptijc'ung, e jadu'n anajty Demetrio etz jacjadyii jāy oy ymeeñybaatcixy müid je ytung. ²⁵ Chi Demetrio huomujcy ymigügtijc je huidi jadu'mbi tung tumb, nimay ajcxy:

—Migügtijc, mnejhuüyib ajcxy co müid jadyaabi tung huidi ñich ajt nduunim, jada müid jotcujc ndzinaayim njugy'ajtim. ²⁶ E miich ajcxy m'ijxpy mnejhuüyib co je Pablo chach yaj'ixpijcy co ca' yi' diosity huidi jāy ajcxy

yajcojpy. E Pablo ti ooy mayjäy capxjotcidägy, canan yaayi Efeso, nañ jadu'n ma tüg'óciy Asia naaxjot. ²⁷ Mij jada xyajtigoyaanim ma iich ajt n'adogi e nañ jadu'n je mijpi dios, je Diana, ytigoyipy, ca' ni pin occapxpaatnipy, je huidi cham mayjäy y'ojadajtpy tüg'óciy ya Asia ñaaxjot etz huindu'my naaxhuifiybi.

²⁸ Co jadu'n ajcxy midoy, chi ajcxy ooy yjotmätcooty, chi ytigiy ajcxy huambi jihuiyb, chachminaangixy:

—iCömay jada Diana, yi efesiojäy ydiosa!

²⁹ Chi ajcxy yajhuinmänydigoyday je cajp jäy e majch ajcxy je Gayo etz Aristarco, huidi tzoon Macedonia, metz yëydijc, huidi Pablo anajty ajcxy ymiid huidijtpy. Chi je cajpjäy ooy pahuijch pajugujcy ajcxy je Gayo etz Aristarco, yajnicxy ajcxy ma agujctijc huinduu ma jäy ñaymugyii. ³⁰ Chi Pablo yjatigihuaa'n jäy agujc, mii dcapxa'n mii dmiydäga'n anajty je mayjäy. E je mibijcpidijc ca' ajcxy a'ixiy nicxy jii by ytigiy. ³¹ Nañ jadu'n nijëjity Asia mijtungmiidpi huidi anajty Pablo miid ñaymigüg'adyii, yajni guejxy ayuc, co ca' huaad ñicxy ma jäy ñaymújcigixy. ³² Je mayjäy tügmyc anajty ijticy, ooy anajty yhuaangixy yjihuiygixy, ca' anajty ajcxy ñay'ayuc-huinjihuiygixy. E je jacmaaybi ni ca' anajty nejhuiygixy ti co chachnaymújcigixy. ³³ Nijëjity jäy huidibi anajty ajcxy mayjäy agujc, je ajcxy yajmii dmiydactay je Alejandro ti anajty tuunip jajtíp. Chi je judío jäy ajcxy tijpidzimy je Alejandro ma mayjäy agujc. Chi Alejandro címii d tiy'ajt yejcy co huen amongixy. Je' anajty ñigapxtüdamy judíojäy ajcxy. ³⁴ Co je mayjäy nejhuiy co je' je' yjudíojäyity, chi ajcxy ytigiy huaambi jihuiyb; jahuenjaty ycamejtzhority, yminaangixy:

—iCömay ooy yi Diana, yi Efeso jäy ydiosa!

³⁵ Chi je cajp jaaybi co anajty je jäy ti yaj'amoongixy hueeni, chi ajcxy nimay:

—Efeso jäy, tüg'óciy yi naaxhuifiyjäy nejhuiy co jada Efeso cajp yi' cuend'ajtp yi Diana chajptijc, je' Diana huidi ooy ti yCömay, etz yi Diana ñinix huidi cá'u tzajpcixy. ³⁶ Ca' huaad ni pin ymina'n co ca' yjáncity. Amongix, ca' ti mdúngixipy pen ca' jayijp yajxon mhuiinmaangixy. ³⁷ Com jada yëydijc ajcxy tiibi myajmiingixy, ca' ma ytundigooygixy, ca' yi' ma ajcxy jibic capxcixy ma miich ajcxy mdiosa Diana. ³⁸ Pen Demetrio etz huidijaty miid ytuñ pen ymiid xihuim miid pinjaty, paady tungmiidpi etz tiydundac jiijity. Jëbi nigapxy ma tungmiidpi, jëbi miñ xyipy ñayñigapxtüutigixy. ³⁹ E pen huingbi ayuc huidi miich ajcxy mbijctzooyb, copity jada y'oyihuipy ma jäy naymugyii. ⁴⁰ Ymiid jada ayo'n co nicxy nayyajxihuim co jäy cham ñaymi huiididyii miid jada ycixpi nej yam ytunyii yjadyii e ni ti tiy'ajt iich ajt nganejhuiyim nej nminaanim pen ji anajty xyaj'amidoohuim miid co jäy cham chachhuaangixy chachjihuiygixy.

⁴¹ Co jadu'n miydactay, chi ycapxycijxy miid je naymujcpidijc.

20

Pablo ñicxy jim Macedonia etz Grecia

¹ Co je cajp jäy ycapxy'ayuc xeemy, chi Pablo huoomujcy je mibijcpidijc, e jaccapxhuijy ajcxy chi ycapxycijxni, chi chooni Efeso ñicxy jim Macedonia ñaaxjot. ² Cajp cajp Pablo oy co'ixiy je mibijcpidijc jaccapxhuijy ajcxy. Chi Pablo yja'ty jim Grecia ñaaxjot. ³ Chi Pablo yhuaexijpy jim tugüg po'. Jim Grecia Pablo anajty ybarcotigihua'n ñicxa'n Siria. Co Pablo oy nejhuiy co judíojäy ajcxy ti yajni huinmayiyii yaj'öga'ñyii barcojoty, chi yhuinma'ñybaty

co huimbida'ñ tegyi'm, ñaxa'ñ jadüg'oc Macedonia. ⁴ Pablo mayjäy müid ñicxy, müidñicxy je Sópater huidi anajty cogajp Berea, etz Aristarco, etz Segundo huidi anajty cogajp Tesalónica, etz Gayo huidi anajty cogajp Derbe, etz Timoteo, etz nañ jadu'n Tíquico, etz Trófimo huidi tzoon jim Asia ñaaxjot. ⁵ Co jada mibijcpidijc ajcxy ñicxy jayijp, chi ajcxy xy'ahuijxy'ich jim ma je cajp huidi xii Troas. ⁶ Co xii ñajxtay mina yajcaay je tzejcaagy je huidi ca' müidty levadura, chi ich ajcxy ndzooni jim Filipos barcojoty. Co migoox xiiñi, oy ich ajcxy naybaatigixy jim Troas. Jim ich ajcxy yhuäcxijpy huixtujc xii.

Pablo co'ixüy je mibijcpidijc jim Troas

⁷ Domingo xii ajcxy ñayöymujci je mibijcpidijc chajcaagy ytujc-huäcxaangixy, e Pablo anajty ymigügtijc yjacyaj'ixpijcpy. Je' co anajty com jabom chonaani, paady oy ayuc jacyajyoñ ixti ycuujc-hua'cxchümüy. ⁸ Jiiby anajty canaag lámpara ytiicxy ma ajcxy anajty ti yöymujccixy ma tüg cuarto huidi anajty oy ycixity. ⁹ E tüg yeeg'anäg huidi anajty yxii Eutico, ma ventana aguü anajty y'iñäy. Com Pablo jecy oy yaj'ixpijcy, chi je yeeg'anäg ymäymajtzi, e tugig nühujtzpety anajty ycixity je tijc ma ycäy. Chi ajcxy yajpidigy ögy. ¹⁰ Co Pablo yminajcy, chi ñaygixnabaji amineenmujcy je yeeg'anäg huidi anajty ti ycäy. Chi Pablo nimay ymigügtijc:

—Ca' mdzigüygixy, juugy jada.

¹¹ Chi Pablo jadüg'oc ypejty ma je cuarto cixpi, chi chajcaagy tujc-huäcxy e yajcaay ajcxy, e jadu'n Pablo yjacmüydacy co oy xiiümüyñ. Chi ycapxycijxni müid je' ajcxy, chi ñicxni. ¹² E je yeeg'anäg huidi anajty ti ycäy, chi ajcxy yajñicxy juugy, e ooy ajcxy yjotcugiy nidüg'óciy.

Choñ ajcxy Troas ñicxcixy Mileto

¹³ Chi ich ajcxy jayijp ñicxigy barcojoty jim Asón co anajty jim nyajt-zonángixich Pablo, com ti anajty jadu'n müidnayñimáayigixich co je' tegyi'm anajty ñicxa'ñ. ¹⁴ Co ich ajcxy naybaatti jim Asón, chi Pablo ybarcotigüy müid ich ajcxy. Chi ich ajcxy ñicxy jim Mitilene. ¹⁵ Chi ich ajcxy jim ndzoñ, chi com jabom ich ajcxy najxy mihuingon Quío, comaax ich ajcxy nja'ty jim ma barco jättac huidi anajty yxii Samos. Jim Trogilio ich ajcxy nbocxy, com jabom ich ajcxy nja'ty jim Mileto. ¹⁶ Chi Pablo ca' ñicxa'ñ jim Efeso co ca' yhuäcxiba'ñ jim Asia ñaaxjot, com tzojc anajty yjada'ñ Jerusalén, com jim anajty yajnaxa'ñ Pentecostés xii.

Pablo yajmüidmüydacy je huidibi ajcxy ane'mb je mibijcpidijc

¹⁷ Jim Mileto anajty Pablo, chi capxyñigüeje xy huidi ajcxy nigohuajc'ajtp je mibijcpidijc huidi ajcxy jim Efeso. ¹⁸ E co ajcxy miñ, chi Pablo yminañ:

—Miich ajcxy mnejhuüyb jadu'n nej ich ti njäy'atyich ma miich ajcxy tüg'óciy je xii je tiempo nej oga'n nja'tyich ya Asia. ¹⁹ Jecy ich ooy ti n'ityich müid miich ajcxy, nduñich ma nHuindzin Jesús ytung müid yung naxy njot nhuinma'ñich, etz müid huinnü jotmay, etz ti may ayo'n nyajnaxyich ma yi judíojäy ajcxy. ²⁰ Ca' ti n'ixmachich je ngapx'ayuc huidi oyip müid miich ajcxy ycixpi. Ti nyaj'ixpicxyich mayjäy'agujc etz tijc tijc. ²¹ Ti ndiy'ajt yecyich ma judíojäy etz cham ma huidi ca' yjudíojäyity. Nnimaydaayich co huen jothuimbijctixy ma Dios, etz huen mibijccixy ich ajt nHuindzin Jesucristo. ²² Jadachambi nicxpich jim Jerusalén; adzjp je Espíritu Santo xyquexyich e ni nganejhuüyich ti ich jim xyjadamy. ²³ Co ich cajp cajp ma nnicxyich, je Espíritu Santo xyajnejhuüybich co jim Jerusalén jäy ajcxy xypidäga'ñich pujxtigoty etz jim ajcxy xychaachytuna'ñich. ²⁴ Yi jadu'mbi

ayuc ca' ñich nduñich cuendi, jada njugy'ajtich ca' ti tzoohuüty. Jëyi janchtiy co nyajcixipyich jada tung jotcuje, e nguydunipyich je Huindzin Jesús y'ayuc, je tiibi xyajñibicyich jada tung. Ngapxhuäcxibich yi oybi Jesucristo y'ayuc ytiy'ajt jadu'n nej Dios may'ajt ti tuñ müd jäy ajcxy ycixpi.

²⁵ E jadachambi nnejhuüybich co müich ajcxy ma ti ngapxhuäcxyich Dios y'ayuc, ca' müich ajcxy xy'ocjac'ixcixni jadügtecy. ²⁶ Paady cham nnimäyich müich ajcxy, ca' ni ti ngo'adzohuüpyich müd müich ajcxy ycixpi. ²⁷ Com ti ngapxhuäcxyich ma müich ajcxy tüg'óciy je Dios y'ayuc je Dios yhuinma'ñ. Ni ti ayuc ni ti ytiy'ajt ti ngacoyüchich ma müich ajcxy. ²⁸ Naycuend'ájtigixy ci'm etz cuend'ajtcixy tüg'óciy jäy ajcxy huidi yajmij'ajtp je Huindzin Jesús, jadu'n ajcxy nipaady nej tügpicy cöbixy, etz müich ajcxy huidi nigohuajc'ajt je mibijcpidijc jadu'n müich ajcxy nipaady nej cöbixy cuend'ajtpi. Je Espiritu Santo ti xyajñibijccixy co mgüend'adipy ajcxy yi Jesús yjäy, huidi ti cojuuy ajcxy ypocy müd yci'mni'py co y'o'cy.

²⁹ Chi Pablo yjacmíñañ:

—Nejhuüybich co ya ndzóonibich miinip huingbi jäy huidi yajhuinma'ñydigoyam mibijcpidijc, jadu'n nej ahua'n iyujc huidi cöbixy tzüdzip. ³⁰ Ji ma müich ajcxy ji jäy yaj'ixpigam anñi ma yjapadyii yaj'ixpigipy tiy'ajt oybi jigix yi mibijcpidijc ypanicxñyb. ³¹ Naygüend'ájtigix, mjäymedziyb ajcxy jadu'n nej ñich tugüig jimajt ti nyaj'ixpicyich xim tzuum jabom jabom, müd huinnñi jotmay ti nyaj'ixpijccixy müich ajcxy nidüg nidüg.

³² Jadachambi ñich, nmigügtjicich ajcxy, Dios müich ajcxy nyajpuhuanñyb, nyajmihu'maamyich müich ajcxy Dios y'ayuc jadu'n nej Dios ajt xchojcam xyjihuiyim. Ma Dios y'ayuc müich ajcxy mbaadipy mic'ajt ma yi mibijcin, e mbaadipy ajcxy it lugar ma Dios quipxyi müd ajcxy nidüg'óciy tiibi yajhuäch yjot yhuinma'ñ. ³³ Ni ti ñich ti nga'adzocy, ni pin yhuít ymeen huidibi n'ocjedñybich. ³⁴ Müich ajcxy mnejhuüyb co ti nduñich, müd ngi'mgijich ci'm ti nnaymóyijich huidi nyajmayajtpyich etz nañ jadu'n ti nbubetyich nmigügtjicich huidi ñich anajty nmüid. ³⁵ Ñich müich ajcxy ti nyajni'ixñyigixy nej jëbi mdungixy, nej jëbi mbubéjtcixy migügtjic huidi pa'm'ijtp, etz huidi tijaty yajmayajtp. Jäymedzi ajcxy je Huindzin Dios y'ayuc co ymíñañ: “Jacjotcuje je' huidi yejcp, ca'ydi huidibi yajmooyb.”

³⁶ Co jadu'n ycapxtay, chi Pablo ycoxtinay'ahuüy müd je' ajcxy, e mibijctzoy ajcxy Dios. ³⁷ Ytigüy ajcxy yaaxpi nidüg'óciy, e míneñ ajcxy Pablo etz tzücy. ³⁸ Ooy ajcxy jihuiy nej anajty ti ñimäyigixy ajcxy co ca' yjac'ixñyb ajcxy jadügtecy. Chi ajcxy oy najtzhuhuüy jim ma barco.

21

Pablo ñicxy jim Jerusalén

¹ Co ñich ajcxy ngapxycixy müd je mibijcpidijc, chi ñich ajcxy nbarcotigüy, tüy ñicxy ñich ajcxy jim Cos. Com jabom ndzooñich Cos ñicxy ñich ajcxy jim Rodas. Chi ñich ajcxy ndzooñ Rodas ñicx ñich ajcxy jim Pátara. ² Jim Pátara ñich ajcxy nbaaty tüg barco huidi anajty najxp Fenicia ñaaxjot. Jim ñich ajcxy nbarcotigüy jadüg'oc, chi ñich ajcxy nnicxni. ³ Chi ñich ajcxy mmij'ijxy Chi pre je naax meji'agujcpi, anajty'amy je' yhu'i'my. Jacñicxy ñich ajcxy Siria ñaaxjot, chi je barco ytigüy ma yjättac jim Tiro co jim anajty chimydajc yajhuíma'ñ. ⁴ Jim ñich ajcxy nбаты jäy huidi anajty yajmij'ajtp Jesús, chi nmüdhüäcxijpich ajcxy huixtujc xi. Je' ajcxy je Espiritu Santo yajnejhuüyi co Pablo ayo'n padañ Jerusalén, paady ajcxy ñimay Pablo co ca' huaad jim

ñicxy. ⁵ Co huixtujc xibi yca'pxy, chi ñich ajcxy ndzooni. E tüg'óciy mibijcpidijc mñid y'ung ytóxyijc oy xytüjijphuohuñiygixyich cajppa'. Jim ma mejypa' ngoxtinay'ahuñiy ñich ajcxy, chi ñich ajcxy nmibijctzoy Dios. ⁶ Huin'it ñich ajcxy ngapxycijxni, chi nbarcotigñiyñi ñich ajcxy e je mibijcpidijc yhuimbijtni ajcxy ma ytijc.

⁷ Co ñich ajcxy ndzooñ Tiro, chi ñicxy ñich ajcxy Tolemaida. Jim ñich ajcxy ngapxocxich je huidi anajty ajcxy mijpidaacp Jesús, e nmñidhuim'y ñich ajcxy jim tüg xñi. ⁸ Com jabom ñich ajcxy ndzooñ Tolemaida mñid Pablo etz pinjaty ñich ajcxy anajty nmñid. Chi ñich ajcxy nja'ty jim Cesarea. E chi ñich ajcxy ñicx ma Felipe ytijc, je huidibi anajty capxhuácxyc Jesucristo ytíy'ajt je oybi. Je' je' huidi tuun je nihuixtujcpi taabi ajcxy caayin uucin yajhuácxyc jim Jerusalén oga'n. Chi ñich ajcxy nhuim'y mñid je'. ⁹ Felipe midaax anajty ññix mñidty, ca'ni anajty ajcxy ypijccixy. E je' ññx ajcxy anajty Dios y'ayucnajtzcaxñiyipy. ¹⁰ Ti anajty ñich ajcxy jim nhuácxipy canaag xñi co oy yjáty tüg ayucnajtzcaxñiybi huidi anajty yxñi Agabo, jim anajty ti chooñ Judea. ¹¹ Chi Agabo y'oy xycogapxñiygixy ma ñich ajcxy njättac. Chi Agabo Pablo yhuin huijtzcici, e je' mñid ñaygixojtz ñaydecyxojtzi, chi ymñinañ:

—Je Espíritu Santo jadu'n minamb co jim Jerusalén jadu'n judíoñäy ajcxy cixodza'ñ tecyxodza'ñ jada huin yhuindzin, e nañ ceyega'ñ ajcxy ma huidi ca' yjudíoñäyity.

¹² Co jadu'n yajmidoy, ñich ajcxy etz je Cesarea jäy ngohuanñiy ñich ajcxy Pablo co ca' huaad ñicxy jim Jerusalén. ¹³ Huin'it Pablo y'adzooy:

—¿Nej co myaaxcixy mñid ñich ycxipi? ¿Nej ñich miich ajcxy co njot nhuinma'ñ xyaj'amutzcñiyi? ñich nayyéjicbich mñid naygixodzñi naydecyxoññi, nañ jébi n'ögibich jim Jerusalén mñid je Huindzin Jesús ycxipi.

¹⁴ Co ca' ñich ajcxy mñidacy ñicxy nyajhuim'gixyich Pablo, chi ñich ajcxy n'amooni, chi ñich ajcxy ñayñimaayi:

—Huen cuyduñ je Huindzin Jesús chojcin.

¹⁵ Co jadu'n yajti, chi ñich ajcxy ndzonñi ni'ixñiy e chi ñich ajcxy ñicxy jim Jerusalén. ¹⁶ Mñid ñicxy ñich ajcxy nijéjity mibijcpidijc huidi tzoon Cesarea, e nañ tzooñ anajty tüg Chipre jäy huidi anajty yxñi Mnasón, jecyip anajty jijptigñiyñi jada mibijcin e je' ñich ajcxy ñicxy xyajjättägaangixy.

Pablo oy cogapxñiy Jacobo

¹⁷ Co ñich ajcxy nja'ty jim Jerusalén, chi je mibijcpidijc ñich ajcxy xycöbijcy janch jotucj. ¹⁸ Com jabom ñich ajcxy ñicxy mñid Pablo, y'oy ñich ajcxy ngogapxñiy Jacobo, e jim anajty tüg'óciy huidi nigohuajc'ajtp je mibijcpidijc. ¹⁹ Chi Pablo ymügütijc capxocxy, e yajmñidmñiydacy ti anajty Dios ti tuñ mñid y' ma yi jäy ajcxy huidi ca' yjudíoñäyity. ²⁰ Co ajcxy jadu'n mñidooy, chi ajcxy huin'ñiy jäymejch yi Dios, chi ajcxy Pablo mñimay:

—Migüg Pablo, miich mnejhuñiyb co ya canaag mil jäy ti mibicy Jesús, e yjactimñinañ ajcxy co copicy nguyduunim Moisés ycötújcin je jecyip. ²¹ Ti ajcxy yajmñidmñiydägyii co miich mdzachjäyayaj'ixpicy ma tüg'óciy judíoñäy huidi ajcxy jigüegy adzinaayb co ca' huaad tuñycuenti Moisés ycötújcin je jecyip, etz ca' ycopicyty co tiy'ajttñiygixipy y'ung, etz ni ca' ycopicyty payöyipy ñich ajt ngostumbre. ²² ¿Ti huaad nduunim? Jotmñadam ajcxy co nejhuñhuipy co ya miich ti mjäty. ²³ Hue' janchty jadu'n miich mdunipy: cha midaax yéydijc huidi cuydunamy tüg huandaacin. ²⁴ Mñidñicxy je' ajcxy, ñicx nayyajpocynñihuaatzñi mñid y' ajcxy, e miich mgojuydayipy nej anajty

ajcxy ypadyii je meeñyduñi. E chi ajcxy myajcöme'pxipy cödza'm, e jadu'n je jäy ajcxy huinjihuiydähuipy co ca' yjanchity jadu'n nej xyñimiyaaccixy, jëyi co miich nañ jadu'n mguyduñ je Moisés ycötújcín je jecyip. ²⁵ Huidibi janchtíy jadu'n nej yi huidibi ajcxy ca' yjudíoáyity, e ti mijpidaaccixy Jesús, ti ñich yi' ajcxy nijayñyigixich co ca' túngixípy cuenti jada jadu'mbi judíoáy ycostumbre. Je' janchtíy co ca' huaad tzützcixípy je tñibi jäy yajhuindzígíy ídolos, ni ca' huaad jícxcixípy ni'py, etz ni ca' ajcxy tzüdzípy huidi yo'c-huidi ty'ögy, etz ca' ajcxy huingbi töxyjäy migapxtigóoygixípy.

Chi ajcxy majch je Pablo ma Dios ytíj

²⁶ Chi Pablo miid nicxy je nimidaaxpi yëydíj, com jabom ajcxy nayya-jpocyñihuatazi ajcxy, chi ajcxy ytígíy ma Dios ytíj, e chi ajcxy yti'ajt jeycy ma judío teedy ti xii ycixa'ñ je nayyajpocyñihuadzii, etz ti xii huindzigi'ñ iyujc cýegaangixy nidüg nidüg.

²⁷ Ma anajty yca'pxaani je mihuixtujcxñibi nijëjity judíoáy, choon jim Asia, chi ajcxy ijxy Pablo ma Dios ytíj. Huin'it ajcxy je mayjäy majch Pablo, yajhuangoty yajjihuygoty, ²⁸ chi ajcxy yam chachminaangixy:

—¡Israel jäy ajcxy, pubejtcich ñich ajcxy! Jada je' je yëydíj huidi xi ya tzach nigapxp ni'ojíyb judíoáy ycostumbre, Moisés ycötújcín, etz nDios ytíj. E jadüg nax ti yajtigíyigixy griegojáy ma Dios ytíj, yajjibicíyigixy jada it lugar huätzpi. (Com ca' ñigödúcyity nicxy griegojáy ytígíy ma Dios ytíj.)

²⁹ Paady anajty jadu'n yminaangixy je huidi ajcxy majtz je Pablo, com co ijxy ajcxy Pablo miidhuidity cajpjoty je Trófimo, huidi anajty cogajp Efeso. Hue' anajty tijcixy co Pablo ti miidtigíy Trófimo tzajtigoty.

³⁰ Tüg'óciy je cajpjäy yjotmätcottay, miñ ajcxy poyígy majch ajcxy je Pablo yajpidzimy tzajtigoty pahuijch pajugujcy. Chi ajcxy mic'amy agíy Dios ytíj.

³¹ Yaj'ögamyb anajty ajcxy Pablo. Chi je soldado huindzin ayuc midoy co tüg'óciy je cajp jäy ajcxy ti chachhuaangixy chachjihuiyigixy. ³² Je soldado huindzin huodzonday ysoldado ajcxy, e chi ajcxy ñicxy poyígy ma je mayjäy yhuaangixy yjihuiyigixy. Co je mayjäy ajcxy ijxy miñ soldado ajcxy miid yhuindzin, chi ajcxy ixmajch Pablo ca' ocjaccójxcixni. ³³ Co je soldado huindzin jim ja'ty, chi yajmajtzí je Pablo, ni'anëmdiy co huen cixochoyíi miid mejt cadena. Chi yajtiy pin je' anajty, e ti ti tuñ. ³⁴ Chi je mayjäy ajcxy ytígíy huaambi jihuiyibi, e jadu'n je soldado huindzin ca' ni nej huinjihuiy miid je ne'mbi. Chi ni'ane'mdiy co huen Pablo yajnicxyii ma cuartel. ³⁵ Co jim ya'ty ma cuartel pediydac, chi je soldado ajcxy cýígy Pablo, co anajty je mayjäy chachjottigoyñáxcixy tzachyaj'ógaangixy anajty Pablo. ³⁶ Tüg'óciy je mayjäy pamiingixy axam je soldado ajcxy, yam chachminaangixy:

—¡Huen ögy!

Pablo ñaygohuaani ma je mayjäy

³⁷ Co anajty yajtigíhuañyíi cuartel tigoty, chi Pablo migapxy je soldado huindzin miid griego ayuc, ymíñañ:

—¿Nej jëbi ii nmíidmiydägy tüg'aa metz'aaji?

Chi je soldado huindzin y'adzooy:

—¿Nej mjaipy miich griego y'ayuc? ³⁸ ¿Nej ca' jada' miich jëjity je egipcio jäy huidi namni tzip yajpidícp, e huobidzimy mídaax mil jäy yaj'öcpí, miid nicxy ajcxy jim mijtigíduum?

³⁹ Chi Pablo nimay je soldado huindzin:

—Hich judíojäy ïich, jim ngogájpídyich Tarso, tüg mijcajp huidi yajpatpi jim Cilicia ñaaxjot. Tun may'ajt miñ mayjäy n'ocmigapxich.

⁴⁰ Co je soldado huindzin a'ixiïy, chi Pablo ytinay'ahuïïy ma je cuartel pediydac, e címíid ytiy'ajt yejcy co huen amoongixy. Co je mayjäy ajcxy y'amunday, chi migapxcoty míid hebreo ayuc ymínañ:

22

¹ —Migügtijc etz mij'anäctijc, mídoogixy jadu'n nej ïich yam nnayñigapxtüdyii.

² Co je mayjäy ajcxy mídooy co ymígápxigixy míid hebreo y'ayuc, chi ajcxy y'amunday, chi Pablo ymínañ:

³ —Judíojäy ïich. Jim Tarso nma'xung'ajtyich, Cilicia ñaaxjot. E ya Jerusalén ti nyeegyich. Ixpíjicich ya ma Gamaliel, etz yajxon Gamaliel ti xyaj'ixpijcyich ajt nmij'ap nmijteedy ytiy'ajt etz ycótújcín. Njatyim nyajmij'ajtpyich Dios jadu'n nej miich ajcxy Dios myajmij'ajtcixy cham. ⁴ Jecy ti n'ixhuidity ti nbahuidityich je jäy ajcxy huidi anajty mïjpídaacp Jesús y'ayuc, nyaj'óctáhuamyich anajty, e nyajnicxpyich anajty mach yëdyjctijc etz töxyjädyjic, nbídägyich anajty ajcxy pujxtigoty. ⁵ Je teedy mïjtungmïdipi etz tüg'óciy mij'anäctijc ymíid tiy'ajt, co ïich ajcxy xymooyich cótújcín, e nnicxyich anajty jim Damasco ma nmigügtijcich yi judío jäy ajcxy. N'ixtäyich anajty je jäy ajcxy huidi Jesús y'ayuc mïjpídaacip, madza'ñich anajty ajcxy, e nyajmiina'ñich anajty ajcxy ya Jerusalén huen yajtzaachyunggixy.

Pablo nimíydacy nej yjothuimbijty

⁶ Co ïich anajty ndüyöyich mihuingon Damasco, cujc yxi anajty, chi janch timitiini ytücxigy jühuidity jadu'n nej jün ma ïich, hue' anajty chooñ tzajpjoty.

⁷ Chi jim ngídaayich, huin'it nmídooyich tüg ayuc xyñímäyich: “Saulo, Saulo, ¿ti co xypahuídjittägyich?” ⁸ Huin'it n'amídooyich: “¿Mbin miich, Huindzin?” Chi xy'adzooyich: “Hich je' je Jesús je huidi cogajp jim Nazaret, je huidi miich mdzachpahuídjittacpy.” ⁹ Pínjaty ïich anajty nmíid y'ijx je' ajcxy je tücxín, chi ajcxy ooy chigíïy, e cá' ajcxy huinjihuïïy je ayuc huidi anajty nmigapxyiijich.

¹⁰ Huin'it nnímaayich: “¿Ti jëbi nduñich, Huindzin?” Chi je Huindzin Jesús xy'adzooyich: “Pidíg e yajyöy mdu', nicxy jim Damasco, jim myajnimähuiïyb tüg'óciy ti jëbi mduñ.” ¹¹ Je tücxín hue' je' xy'ixmajchich huíntz. E chi je nmigügtijcich xyhuíjtzoonich ajcxy cígixy, xyajja'tyich ajcxy jim Damasco.

¹² Jim Damasco anajty chinäy tüg yëdyjic huidi anajty yxi Ananías, je huidi anajty ooy cuyduñ Moisés ycótújcín je jécyp. E judíojäy ajcxy huidi jim tzinaayb ooy cómaaygixy co ooy y'oyjäyity. ¹³ Chi Ananías ymíñ ma njättaacich, e ytinay'ihuïïy ma ïich nmíjc, chi xyñímaayich: “Migüg Saulo, ijxígich jadüg'oc huinjemy.” Tim huin'ity n'ijxígyich. ¹⁴ Chi Ananías xyñímaayich: “Je Dios huidi ajt nmij'ap nmijteedy ojadajt, je' ti xyhuin'ixy jigix mnejhuíhuipy Dios yhuinma'ñ, etz m'ixípy je tudäcypí jäy, e mmídohuipy yci'm ayuc huidi ycapxpy. ¹⁵ Dios ti xyhuin'ixy jigix nicxy mdiy'ajt ycy ma tüg'óciy naaxhuñyjäy, etz mnímídygípy nej ti m'ixy ti nmídooy. ¹⁶ Jadachambi, ¿nej co mhuäcxípy? Pidíg etz nübet. Míbijctzou Dios jigix mbocy ñíhuädzipty.”

Pablo nimíydacy nej oy yajquexy ma je huídibi anajty ajcxy ca'p yjudíojäyity

¹⁷ Co nicxnich jadüg'oc Jerusalén, chi nnicxich ma Dios ytíjc, oy Dios nmíbijctzooyich. Chi ïich jüby tzajtigoty n'ixmañyíyich. ¹⁸ N'ijxyich je

Huindzin Jesús e xyñimaayich: “Pidzim ya Jerusalén mic'amy, ca' je Jerusalén jäy ajcxy cöbigipy miich m'ayuc jadu'n nej xyñigapxa'ñich.”¹⁹ Huin'it n'adzooyich: “Huindzin Jesús, yi jäy ajcxy ñejhuñiyb co ñich anajty nñicxich huen huidi judíojäy naymujctac n'ixtäyich yi jäy ajcxy huidi miich m'ayuc xymibijcip, ti nbiädäyich anajty ajcxy pujxtigoty, ooy ñich ajcxy yi' ti ndzaachytuñ ti nga'oyduuñich.”²⁰ Co ajcxy yaj'ögy je Esteban, miich mdumbi, huidi miich m'ayuc xycapxhuäcxip, jim ñich anajty nañ jadu'n yajpaady. E ooy njäygidacyich co ajcxy yaj'o'cy, ixti ngüend'ajtich je' ajcxy yjocxhuit huidi Esteban yaj'o'c.”²¹ Chi ñich nHuindzin Jesús xyñimay: “Cham ñich miich nguexy jiguëgy it ma yi jäy ajcxy huidi ca' yjudíojäyity.”

Pablo, ma je comandante yci'am

²² E yabaad je mayjäy y'amido'ijty Pablo y'ayuc, chi ytiigiy ajcxy huambi jihuiybi chachminangixy:

—¡Huen öc yjiibi yëdyijc! ¡Ca' huaad yjactzinäy!

²³ Yam yhuaangixy yjihuiygixy, yam yjocxhuit tzachjengixy, etz naax-huaay tzachyujc-huicixy. ²⁴ Chi je soldado huindzin ni'ane'mdüy co huen Pablo yajnicxyii cuartel tigoty, e ni'ane'mdüy co huen ci'adyii jigix nigapxip ti ti tuñ co je jäy ti ymibiädigyii. ²⁵ Ti anajty ajcxy cixojtzicixy, e chi anajty ajcxy tzaachytunaangixy co Pablo nimay je capitán huidi anajty huinduy:

—¿Ti cötújcín miich ajcxy müid co mdzaachytuna'ñ tüg romanojäy, ni ca' ajcxy jayijp mdiyduñ?

²⁶ Co jadu'n midooy je capitán, chi ñicxy oy yajnimäy je comandante:

—Ixcim nej mduñ yi jäy, com hue' yi' romanojäy.

²⁷ Huin'it je comandante ymijhuägy ma je Pablo, chi y'amidooy:

—¿Nej janch co miich mromanojäyity?

Chi Pablo y'adzooy:

—Janch.

²⁸ Huin'it je comandante nimay Pablo:

—Meeñyigixy ñich jada nbaaty co naydijyijich romanojäy.

E chi Pablo y'adzooy:

—Ñich ti nmüibi'c'ajtich yi'.

²⁹ Müid jëyi, je huidibi anajty ajcxy ci'adam je Pablo, chi puyöydúutcixni. Nañ jadu'n je comandante ooy ñay'adzigiyyi, müid co cixojch Pablo müid cadena.

Pablo ma je judíojäy ajcxy yjuntitungixy

³⁰ Com jabom je comandante co anajty nejhuihua'ñ ti ycixpi co ti yxiyyi je Pablo yi judíojäy, huen yajminagyii cadena ma Pablo yci'. Chi ane'my co yajhuomujci je teedy tungmüidpi etz je judío mij'anäctijc. Huin'it je comandante yajnicxy Pablo ma je huindzindijc etz ixpicytijc anajty ti ñaymüjicigixy.

23

¹ Huin'it Pablo yaj'ijxpejty je mayjäy huidi anajty ti nayyöymüjicigixy, e chi ajcxy nimay:

—Migügtijc, Dios y'ijxpy ñejhuñiyb nej ñich ti nduñ maabi nyeepidzimyich, tudägy n'ityich ixti chambaadni.

² Huin'it je Ananías, je teedy mjtungmüidpi, ni'ane'mdüy Pablo co huen yaj'accojxigy. ³ Chi Pablo yminañ:

—¡Dios xychaachytunipy miich huidibi mnaybidaacip nej jihuiy ooy mdudägyjäyity, e ca' yjanchity! Paady miich m'ñäy ma cötujctac jigix

nyajtiyduñipyich nej je ley y'ane'my. Chi mmidundigooy je ley co ti xyajcojxyiijich.

⁴ Je jäy ajcxy huidi anajty jim minañ:

—¿Jadu'n miich mmigapxtigoy yi Dios ymijtungmüdpí?

⁵ Chi Pablo yminañ:

—Migügtijc, ich ca' anajty nejhuiyich, pen yi' je' Dios ymijtungmüdpí. Com jaybety jadu'n ma Dios ñecy: “Ca' huaad jibic mnigapxipy huidi tungmüdpí itp ma miich mjäy.”

⁶ Huin'it Pablo ijxy nejhuiy co jim juntijoty mejtzpicy ixpicytjic anajty jim, jim huidi saduceo y'ixpíjcín ymijpidacp etz nañ jadu'n jim huidi fariseo y'ixpíjcín ymijpidacp, chi Pablo yminañ mic:

—Migügtijc, fariseojäy ich, nañ jadu'n ndeedyich fariseojäy je'. Cham nyajtiyduñich müid jëgixpi co nmibicyich co Dios yajjugypigipy jäy tübi y'öccixy.

⁷ Co Pablo jadu'n yminanday, chi fariseojäy etz saduceojäy miñ xyipy ajcxy ca' ñay'ayuc-huinjihuiyi. Chi je naymujcpidijc ajcxy ñaybijc-huäcxi. ⁸ Je' co je saduceojäy yminaangixy co o'cpi ca' yjugypigipy, ni ca' ji ángel ajcxy, nañ ca' jäy y'alma, nañ ca' ji je Espíritu Santo, etz ni ca' ji mujcu' ajcxy. Je fariseojäy ymibijcpi je' ajcxy co yjiijity ángel ajcxy, co öcpi jugypigaangixy, co je Espíritu Santo yjiijity, co jäy ajcxy müidity y'alma, etz co mujcu' ajcxy yjiijity. ⁹ Tüg'ócíy jäy ajcxy ma je naymujctac ytigüy huambi jihuiybi. Chi nijëjity fariseojäy huidi nihuindzin'ajtpy je Moisés ycötújcín nigapxtuty Pablo yminañ:

—Jadayaabi jäy ca' ti pocy ti tuñ. Ca' yjeczyty ti jada' ymígapxyii tüg espíritu o tüg ángel.

¹⁰ Chi je mayjäy anajty ooy mic ti ñayyajot'ambijcigixy. Je soldado huindzin tzigüyb anajty co Pablo y'ahuoonñihuiyb y'agidzihuiyb, paady ni'ane'mdiy huen yi soldado ajcxy yajpidzimgixy juntijoty e yajnicxcixipy yi Pablo jadüg'oc ma cuartel.

¹¹ Huin'it coodz ñayguëxici je Huindzin Jesús ma Pablo ymijc, nimaayi:

—Jotmicpic Pablo, com jadu'n nej ya Jerusalén ti xyñigodiy'ajt'átyich, nañ jadu'n xyñigodiy'ajt'adipyich jim Roma.

Ixtaagyxy huinmañ nej huaad Pablo yaj'öccixy

¹² Com jabom nijëjity judíojäy ñaygapxi co yaj'ögaangixy Pablo. E chi ajcxy capxycödujcy ñay'ibojci ñaygapxojci co ca' ycayaangixy y'ügaangixy ixti cooni ajcxy yaj'öccixipy Pablo. ¹³ Nihuixchigüipx naxy anajty yëydijctjic huidi ajcxy jadu'n naygapxi. ¹⁴ Chi ajcxy ninicxy je teedy ajcxy huilibi mijtungmüdpí etz judío mij'anäctjic, nimay ajcxy:

—Ich ajcxy ti ngapxycödujccixy co ca' ngayáangixyich n'ügáangixyich ixti cooni ich ajcxy nyaj'öcip Pablo. ¹⁵ Jadachambi miich ajcxy, etz jacjadyii ixpicytjic mij'anäctjic nidungüygixy ma je soldado huindzin, co huen jabom yajminyii Pablo jadügtecy ma miich ajcxy. E aaniidaaccixy co jacyajxon yajtydunañ, e ni'ixä ich ajcxy anajty n'ijtcixy co Pablo nyaj'ögibich ca'ni anajty yjaty ma naymujctac.

¹⁶ Pablo chi' ymang nejhuiy nej je' anajty ti ñaygápxigixy, chi ñicxy ma cuartel oy Pablo yajnimäy. ¹⁷ Huin'it Pablo yaaxi tüg soldado huindzin, e chi nimay:

—Yajnicx jada yeeg'anäg ma je comandante, ymüid yi' ayuc ti nigapxaamy.

¹⁸ Chi je soldado huindzin yajnicxy je yeeg'anäg ma je comandante, e chi nimay:

—Pablo, je machyjäy, ti xyaaxyich, ti xyñimäyich co nmüidminipyich jada yeeg'anäg, ymüid yi' ayuc huidi ñigapxaamy ma müich.

¹⁹ Chi je comandante majch je yeeg'anäg ma yci', e yajnicxy abicy, chi yaj'amidooy:

—¿Ti xyajnimähuaamyich?

²⁰ Chi je yeeg'anäg ymüinañ:

—Yi judiojäy ajcxy ti ñaygäpxigixy co xyñimähuaangixy co jabom Pablo myajnicxipy jim ma ñayyöymugäänigixy, y'aaniidägaangixy co jacyajxon tydunaangixy. ²¹ Ca' müich yi' mmübigipy; com nihuixchiguipx naxy yëydijctjc jim yi' ajcxy ahuixy yüch. Ti capxycödujccixy co ca' ajcxy ycaya'ñ y'üga'ñ ixti cooni ajcxy yaj'ögipy je Pablo. Jadachambi ni'ixi jim y'ijtcixy, jëyi müich m'ayuc ajcxy xyjamidohuaani, pen mni'adzooyb.

²² Chi je comandante ycapxycijxy müid je yeeg'anäg. Chi nimay co ca' huaad ymiydägy müid jacpinjaty jadu'n nej anajty ti ymiydaaccixy.

Yajnicxy ajcxy Pablo ma je gobernador Félix

²³ Chi je comandante yaaxi metz capitán moy cötüjcin huen nayñi'ixiiyigixy nimejtzmigo'px soldado huidi nicxip tegyi'm, etz tugi'pxmajc huidi nicxip cohuaaygixy, etz mejtz migo'px quipyjijpxu'ñmüidpi, huen nicxcixy jim Cesarea mijcoodz. ²⁴ Nañ ni'ane'mdüy co huen cohuay ni'ixi pidägyii huidi Pablo yaj'iñahuipy, e moy cötüjcin co huen oy yajxon ajcxy Pablo yajjädipy ma je gobernador Félix. ²⁵ Chi yajmiguejxy tüg necy yjaayity jadu'n:

²⁶ “Ich comandante, Claudio Lisias, cham ngeuejyich jada necy ma müich, mijpi gobernador Félix, e ngeuejpyich capxpocxin. ²⁷ Je judiojäy ajcxy ti anajty majtzcixy jadayaabi yëydijc, yaj'ögamy anajty ajcxy co ich oy nejhüiy co je' yromanojäyity, chi nninicxich müid soldadtjic etz nihuaañich. ²⁸ Co ich ooy anajty nejhüihua'ñich ti anajty co ti xigixy, chi nyajnicxich ma anajty ajcxy tungmüidpi etz mij'anäctjic ti ñayyöymüjcgixy. ²⁹ Hue' anajty yi' ycixpi ti yajxii co anajty ti ytundigooy ma yi' ajcxy ycötüjcin. Ca' anajty yti'yäjtity co yaj'öccixipy, e ni ca' huaad ymach'iñäy. ³⁰ Co ich oy nejhüiy co yi' judiojäy anajty ti nihuinmayiygixy co yaj'ögaangixy, cham ich müich yi' nyajniguesy. E ti ich nañ jadu'n nimay huidi ti yxiyii huen nicxcixy ma müich, e jëbi ajcxy jim nigapxy ti ycixpi co müidzip'ajtcixy. Ji naybaatim.”

³¹ Je soldadtjic nej anajty ti ycötüjcin möyii tim huin'ítiy müid tzoof je Pablo mijcoodz ixti yajja'ty ajcxy Antipatris. ³² Je soldadtjic huidi ajcxy tegyi'm nicxp, com jabom huimbüjtcixni, chi yjá'tcixni ma cuartel. E je soldadtjic cohuaygixpi jacnicxy je' ajcxy müid Pablo. ³³ Co je' ajcxy yja'ty jim Cesarea, chi ajcxy je gobernador necy yajcädigiiy, chi ajcxy nañ jadu'n yajquëxigy je Pablo ma je' yhuinduu. ³⁴ Co ñecy capxtay, chi je gobernador y'amidooy Pablo ma anajty yconaaxity. Co nejhüiy co yCiliciajäyity, ³⁵ chi nimay:

—Jiini nejhüihuibich je tiy'ajt co anajty miingixy huidi ti xyxigixy.

Huin'it ni'ane'mdüy co huen cuend'adyii ma je Herodes ymijtijc.

24

Pablo ñaygohua'ñiyii ma je gobernador Félix yhuinduu

¹ Co migoox xii Ananías je teedy ajcxy ymijtungmüidpi yja'ty jim Cesarea müid judio mij'anäctjic ajcxy etz müid tüg huingapxpi huidi anajty yxii Tértulo,

chi ajcxy ñayguëxici ma gobernador co xihuaangixy Pablo. ² Co ajcxy Pablo yajmiñ, chi Tértulo ytiñiy xibi, nimay Félix:

—Miid miich ycxpi jotcujc je naaxcajp y'ijty, ca' ma tzip, je' co yaxon m'ane'mdäy miid oyhuinma'ñ. ³ Tüg'óciy iich ajcxy njäygidacpuyich hueñyima'ámyity, miich miitungmiidpi Félix. ⁴ Ca'ydi mdiempo nyajtiigooyi mij, tun may'ajt amido'ijtiyich n'ayuc tüg jaxigyi. ⁵ Com ti nnejhuüyigixich co jada Pablo, ooy ayo'n yecy hueñytimma'ámyity. Xi ya judíoäy tzach pijc-huäcxy miid y'ayuc huidi ymiid. Yi' je' nigohuajc'ajtp tüg picy jäy huidi jäy ytiyjp Nazaret jäy. ⁶ Com tundigoy ma iich ajcxy nDios ytijc nej ca' ypadyii, chi iich ajcxy nmajch, e chi iich ajcxy njatidyunaañich jadu'n nej iich ajcxy ngötújcín y'ane'my. ⁷ Per je comandante Lisias je' yajtiyiyi mictägy, chi iich ajcxy xypijci jada Pablo. ⁸ E Lisias ymínañ co pinjaty anajty ti yxíyii huen miñ ma miich. Miich ci'm jébi myajtiy, e mnejhuíhuip tüg'óciy je tiy'ajt jadu'n nej iich ajcxy yi' ti nxíy.

⁹ E je judíoäy ajcxy huidi anajty jim gobernador yhuinduu, ac jadu'n ajcxy ymínaangixy co yjanchity jadu'n nej Tértulo ymína'ñ. ¹⁰ Huin'it je gobernador tiy'ajt moy Pablo címíid co huen capxy, chi Pablo ymínañ:

—Janch jotcujc jébi nayñägapxtüdyiijich ma miich Félix, com nejhuíyibich co miich miitungmiid ma jada naaxcajp cham xii jimíjt ñicxni. ¹¹ Miich ci'm jéb mnejhuíy je tiy'ajt, jéyi anajty ñimajcmetzxíijy maabi anajty nbättigiyich jim Jerusalén Dios ojadaajtpi. ¹² Ca' iich yi' ajcxy xypaty ndzipcapxy n'ahua'ngapxyich miid pinjaty. E ni iich ngajäy'axiigiy ngajäy'agapxyi ma Dios ytijc, etz ni ma naymujctac etz ni ma Jerusalén cajp. ¹³ Jada jäy ajcxy ca' ajcxy miidity pinjaty tiy'ajt yegipy nej iich yi' ajcxy yxíy. ¹⁴ Huidi janch ngapxypidzimyibich ma miich jadu'n nej je tzinaayin, je jemybi ixpijcín huídibi yi' ajcxy ytiyjp ca' y'óyity, je' je' je' ixpijcín huidi iich miid n'ojadaajtpich Dios, je Dios huidi iich ajcxy nmij'ap nmijteedy y'ojadaajt. Nmibijcpuyich tüg'óciy jadu'n nej yjaybetyity ma Moisés ñecy, etz je Dios y'ayucnajtzcapyiybi ñecy. ¹⁵ Nañ nmibijcpich co Dios yajjugypigipy pinjaty ti y'ögy, tiibi oybi tuñ etz tiibi jibicpi tuñ. ¹⁶ Paady ycxpi naymijottigoyiijich co njothuinma'ñich huädz ooy nmíid'idipyich ma Dios etz ma jäy.

¹⁷ Canaag jimíjt iich anajty ti nhuidityich huingduum, chi nhuimbijtyich ma iich ngajp limosna cuejtp etz nhuindzigíhua'ñich anajty Dios. ¹⁸ Jadu'n iich anajty nduñ co nijéjity judíoäy xypatyich ma Dios ytijc huidi anajty tzoomb Asia ñaaxjot. Ti anajty naybocyñíhuächyijich, ti anajty nguyduñich costumbre, ca' anajty mayjäy pin yhua'ñ yjihuíy. ¹⁹ Je jäy ajcxy huidi xy'ixyich ma Dios ytijc, je' ajcxy ixypy ti ymiingixy ya tiy'ajt yejcp. ²⁰ Co ca' ajcxy ti miñ, huen jada jäy ajcxy huidi ya nigapxcixy pen ypaat ajcxy nbocuyich je taabi ajcxy xytyidüñich ma judío jäy tungmiidpi etz huinmij'anätiyc ajcxy ñaymujci. ²¹ Jéyi co iich mic ngapxyich juntijoty, chi nmínaañich: “Xytyidumbich miich ajcxy cham miid co nmibicyich co Dios yajjugypigipy pinjaty ti y'o'cy.”

²² Co Félix jadu'n midodaay, com ñejhuíydaayb anajty nej tüyöy je mibijcpidijc y'ayuc yhuinma'ñ, chi capxhuí'my je ayuc, nimay ajcxy:

—Co anajty miñ je comandante Lisias, huin'it njacnejhuíydähuibich nyajtydigíhuibich miich ajcxy m'ayuc.

²³ Huin'it Félix ane'mdäy je capitán co huen yajcuend'aty yí Pablo, e huen a'ixihuij co pidzim tibiñ tibäy e pen ji ymígügtijc miñ co'ixihuañyí, huen möyíi huidi yajmayjajtpy.

²⁴ Ti anajty xii ñajtzniñicxiiyñi co Félix jadüg'oc miñ müd ytöxyijc Drusila. Je Drusila judíojäy je' anajty. Chi Félix capxyñiguejxy Pablo huen miñ müdmüydägyí nej jäy mibicy Jesucristo. ²⁵ E co Pablo yajnimay je tiy'ajt nej Dios tzocy co huen jäy tudägy tzinäy, etz yajnimay jadu'n nej Dios jiini jäy tiyduna'n tüg'óciy, chi Félix ñay'adzigiñyí, ymínañ:

—Ñicx miich jadachambi, co ñich anajty xyñibadñiyigixy huin'it ñicxy nya-huooyíi.

²⁶ Nañ jadu'n Félix y'ahuijpxy anajty mina Pablo y'ocmeeñymöyíi, e huin'it anajty najtzmadzihua'ñ. Paady anajty janam jazzojc ñicxy yajhuoyíi, e müd müydägy anajty. ²⁷ Mejtz jimíjt jadu'n yjajty, huin'it Félix ygobernadorbidzimy. Chi Porcio Festo ygobernadortigiiy ma Félix anajty ytuñ. Co Félix anajty nayyajhuí'ma'ñyíi ooy müd je judíojäy ajcxy, paady ixmajch Pablo mach.

25

Pablo ma Festo yhuínduu

¹ Jadu'n yjajty co Festo anajty ti ygobernador tigiiy, chi codugiig xii choñ Cesarea, ypättigiiy Jerusalén. ² E jim Jerusalén je teedy mįjtungmüdpí etz nijjity huinmij'anäctijc jactimxiiy Pablo ma Festo. ³ Chi ajcxy may'ajt pijctzoy ma je gobernador Festo co huen quexy Pablo jim Jerusalén. Hue' anajty ti huinmaaygixy co yaj'ogaangixy tü'am. ⁴ Chi Festo y'adzooy co Pablo cuend'aty anajty y'ity Cesarea, e je' anajty ñicxa'ñ janch tim tzojc jim. ⁵ Chi ajcxy nimay: —Jëbi nijjity miich ajcxy mdungmüdpídjic etz huinmij'anäctijc quipxy ñicxibich müd ñich. Pen ti je Pablo ytundigooy jëbi miich ajcxy mxiiy jim Cesarea.

⁶ Festo jëyi jim y'ijty tuctujc xii taxtujc xii Jerusalén, chi yhuimbijtni Cesarea. Com jabom ñicxy ma tiydundac, huin'it capxyñiguejxy Pablo co huen yajminyíi. ⁷ Co Pablo ytigiiy ma tiydundac, chi mic'amy je judíojäy ajcxy yjübigiydäy huidi anajty ti choongixy jim Jerusalén. Chi ajcxy oyxiiy Pablo co mij anajty ti ytundigoy. E ca' ni ti tiy'ajt ajcxy miçuéxiiy. ⁸ Chi Pablo ñaygogapxi ymínañ:

—Ñich ca' ni ti ndundigooyich, ni ngamidundigooyich yí judío jäy ycötújcín, etz ni ngamidundigooyich Dios ytijc, etz ni ngamidundigooyich je mij'ane'mbi jim Roma.

⁹ Co Festo anajty jatytimayajcömaya'ñ ma judíojäy ajcxy, chi y'amidooy Pablo:

—¿Nej mñicxam jim Jerusalén, jigix jim ndiydunípiy?

¹⁰ Chi Pablo y'adzooy:

—Cha ñich cham ma je cötujctac huidi je romano codung y'ane'myb e ma jëbi yajtiyduñich. Yajxon miich mnejhuíy co ca' ti ti ndundigooyich ma yí judíojäy ajcxy. ¹¹ Pen ti ndundigooyich huidi jëbi co'ögiiyich, ca' nminá'ñibich co ñich ca' n'oga'ñ. Pen ca' ji ni ti tiy'ajt jadu'n nej yí ajcxy ti xyxiiyich, ni pin cötújcín camüditíy ñicxy xyciiyeciych ma yí ajcxy. ñich nbijctzoy co nyajtiyduñich ma César, je emperador, jim Roma.

¹² Co Festo capxyöyday müd ymidungmüdpí, chi nimay Pablo:

—Pen miich jadu'n minamb co jim nicxy myajtiyduna'n ma je César ycotujctac, nguexipyich miich jim. Miich ti mbijctzoy co je emperador xytiyduna'n. Pis jim mnicxipy miich.

Pablo ma je rey Agripa yhuinduu

¹³ Chi yi xii tiempo ñajtzniicxiyñi co je rey Agripa etz Berenice ycidacy Cesarea, cogapxihua'n anajty Festo. ¹⁴ Co ajcxy jim yhuäcxijpy canaag xii, chi Festo yajmüdmıydacy je rey Agripa je Pablo ayo'n, e nimay:

—Ji tüg yëydıjc huıdı Félix y'ixmajtz mach. ¹⁵ Co n'oyich jim Jerusalén, chi je teedy mıjtungmııdpı etz judıo mıj'anäctıjc xymıxıyich, nıbjıctzohuıy co Pablo nyaj'ögıbıch. ¹⁶ Chi n'adzooyıch co romanojây ca' cötüjcin jadu'n müdity nicxy yaj'ögy yi machyjây ma ca'ni ñayhuındınáayıgıxy müd je huıdı müd ñayxıyıı, jıgıx ñaygogapxııyb nej anajty ti yxıyıı. ¹⁷ Paady co je judıojây ajcxy y'oy ya ca' nıgoob tiempo nyajtıgooyıch com jabom nıncıch ma ngötıjctaacıch, e nni'ane'mdüyıch co huen yajmıñyıı je Pablo. ¹⁸ Co ajcxy ñayguëxi'ci, je huıdı anajty ti xıy, ca' jac ni ti ayuc anajty ajcxy müdity jadu'n nej ıch anajty ti ndıjyıch. ¹⁹ Jëyi janchtıy co jadu'n anajty ymınaangıxy co Pablo ti ytundıgooy ma yı' ajcxy ycostumbre huınma'n, etz Pablo capxhuäcxıy co je Jesús huıdı o'c, juugyñi je'. ²⁰ Com ıch ca' nnejhuıy nej ndunıpıch müd jada jadu'mbı huınma'n, chi n'amıdooyıch Pablo, pen nıcxam anajty Jerusalén, jıgıx jim ngatyduñıch müd jadayaabi ycxıpi. ²¹ Pablo cı'm mınañ co nıgi oy yajtıyduñıpy jim ma je emperador huıdı ane'm jim Roma. Chi nni'ane'mdüyıch co huen jacmach'ıñây, ıxtı cooni nguexıpyıch jim Roma ma César.

²² Chi je rey Agripa ymınañ:

—Nañ ooy ıch nja'amıdo'ıdaani Pablo y'ayuc.

Chi Festo y'adzooy:

—Jabom jëbi ayuc mıdohuıpy.

²³ Com jabom mıñı Agripa etz Berenice müd mayjây etz xuuxpıdıjc, chi ytıgıy ajcxy ma tiydundac müd je soldado huındzin ajcxy, etz huınmıj'anäctıjc. Chi Festo capxyñıguejxy co huen Pablo nicxy yajtzonyıı.

²⁴ Chi Festo ymınañ:

—Rey Agripa, etz tüg'öcıy mıj'anäctıjc huındzıdıjc huıdı ya ti mnayyöymüjıgıxy müd ıch ajcxy, cha je' je yëydıjc huıdı oy yi judıojây ti yxıyıı ma ıch. Xymıxıyıch jim Jerusalén, e nañ ya Cesarea, e jatıymymınaangıxy co jëbi y'ögy. ²⁵ Ca' ti ti tundıgooy, paady ca' huaad nyaj'ögyıch. Com ti cı'm ñayñıbjctzohuıyıı co jim yajtıyduna'n ma je emperador jim Roma, paady ti n'a'ıxıyıch co nguexaañıch. ²⁶ E com ca' ni ti tiy'ajt nej nijayıhuıbıch nhuındzııch, je emperador César, müd yı' ycxıpi, paady nyajmıñıch ma miich ajcxy, etz tım jayıjp ma miich mhuınduu, rey Agripa, jıgıx jëbi m'amıdohuıpy e nmıd'ıdıpyıch ti ıı njáayıbıch. ²⁷ Ca' jadu'n y'öyıty nicxy nguexıyıch tüg machyjây jim ma je mıj'ane'mbı e ca' ni ti tiy'ajt müdity nej ti yxıyıı.

26

Pablo nımydügy nej anajty yjatyın ma je rey Agripa

¹ Chi je rey Agripa nımay Pablo:

—Jëbi cı'm mnayñımydügyıı.

Chi Pablo yujcxajy yci' e ytıgıy nayñıgapxtuutıp, ymınañ:

²—Jotcujc nayjihuiyijich, co jëbi nmiydägyich ma miich, rey Agripa, jigix nayñgapxtüdiybich tüg'óciy jadu'n nej judío jäy ti xyxíyich. ³ Com miich mnejhuüyb yajxon nej judíojäy ajcxy yhuinma'n müdity, etz tijaty tzip yi' ajcxy ymiid, etz jadu'n nej yi' ajcxy y'ixpijcin oy ñay'ijxquípigixy.

Pablo nigapxy nej anajty chinäy ma anajty ca'ni yjothuimbity

⁴ Tüg'óciy judíojäy ñejhuüyb nej ti ndzinäyich ma yi' ajcxy jim ma nnaaxjotich etz jim Jerusalén maabi nyeecpidzimyich. ⁵ E yi' ajcxy ñejhuüyb nañ jadu'n, e jëbi nigapxcixy jadu'n nej ti nyujcyeecpi'atyich. Hue' naydiyjijich anajty fariseojäy, je tügpicyi jäy huidi mictägy je judío jäy ycostumbre etz ycotújcin payöyip. ⁶ E jadachambi xytiyduñich müd co njijp'ixyich co Dios yajjugypiga'n yi jäy ajcxy tübi y'o'ccixy, jadu'n nej Dios yajnimay nmij'ap nmijteedy jecy'ajty. ⁷ Je majmetzpicypí Israel ymang y'ap y'oc y'ahuijxpy mina Dios cuyduna'n nej anajty ti yajnimäyii je' ajcxy ymi'ap ymijteedy. Paady ajcxy Dios ojadaty huindzigíy xim tzuum. Miich, rey Agripa, nmibicyich co Dios yajjugypigipy je jäy tübi y'öccixy, paady ycixpi yi judíojäy yxíyich. ⁸ ¿Na'amy co ca' miich ajcxy mibiga'n co jëbi Dios yajjugypicy je tübi ajcxy y'ögy?

Nej anajty Pablo jayjip'aty mibijcpidjic ixhuidity pahuidity

⁹ Jecyip iich hue' ndijyich oy nduñich co anajty ndzachmidzip'adyijich je Jesús je Nazaretpi. ¹⁰ E jadu'n nduñich jim Jerusalén. Müd je teedy mijtungmüdpí ycotújcin nbidaacich Jesús yjäy may pujxtigoty. E co ajcxy yaj'o'cy, nañ nigapxpejt iich co huen yaj'öccixy. ¹¹ E nnicxyich anajty majaty judío ñaymujctac jim ndzaachytuñich huidi ajcxy mijpidacp anajty Jesús, jigix ajcxy y'ixmadzipy je' ymibijcin co Jesús je' je' je Cristo. Nigi anajty nmijotmätcootyich ixti nbahuidijttacyich huingnaax huinggajp.

Pablo nmiydägy jadüg'oc nej yjothuimbijty

¹² Müd yi jadu'mbi huinma'n nnicxyich anajty jim Damasco. Je teedy mijtungmüdpí anajty xyquejxpich, e xymöyich anajty cotújcin. ¹³ E tü'am, señor rey, iich anajty nicxy, cujc xi anajty co n'ijxyich tügi tücxin jacmic ca'ydi xi ytücxin choon tzajpjoty, xyñigdacycich etz nañ jadu'n huidi anajty ajcxy xymüdnicxich. ¹⁴ Huin'it nidüg'óciy iich ajcxy ngidaday, e nmiidooyich tüg ayuc xymigapxich müd hebreo y'ayuc, xyñimäyich: “Saulo, Saulo, ¿nej co chach xypahuidijttägyich? C'i'm naysajtzaachiyii jadu'n nej huaj yuub co jijpconebiy huidi müd ñumyugumyii.” ¹⁵ Huin'it n'adzooyich, nnimaayich: “¿Mbin miich Huindzin?” E je Huindzin xyñimaayich: “Iich je' Jesús je huidi miich mdzachpahuidijttacy. ¹⁶ Pidig e tinaaygugi', com ti nmaygüxigiyijich ma miich jigix xymidunipyich etz mgodiy'ajt'adipy jadu'n nej cham ti nyajnimäy ti nyajnejhuüy, etz jadu'n nej jiini njacyaj'ixa'n njacyajnejhuühua'n. ¹⁷ Iich miich nnihuänip nyajtzögip ma yi judíojäy, etz nañ ma huidi ca' yjudíojäyity. Iich miich jim nguejxpy ma huidi ca' yjudíojäyity. ¹⁸ Nicx jim myajhuinjihuüygixy iich ndiy'ajt, huen ixmach ajcxy yi jibic-huinma'n e jadu'n ypidzimipy ajcxy ma je mujcu' y'ané'migixy, etz mijnicxpedipy ajcxy Dios ytiy'ajt. Co ajcxy mibigipy mijpidägipy iich ndiy'ajt huin'it nmöhuibich tigiydac tzajpjoty ma yi oyjäydijc ity tübi Dios yajpocyñihuächyii.”

Pablo cuyduñ nej anajty ti y'ixmañiyin

¹⁹ Rey Agripa, jadu'n ti ngapxymidooyich huیدی n'ijxich nmidoohuich tsoon tzajpjoty. ²⁰ Jayijp ngapxhuäcxich Dios y'ayuc jim Damasco, chi ngapxhuäcxich jim Jerusalén etz tüg'óciy Judea ñaaxjot, etz cham ngapxhuäcxich Dios y'ayuc ma huیدی ca' yjudíojäyity. Nyajnimáaygixyich huen jothuimbijtcixy, huen mibijccixy Dios y'ayuc ytiy'ajt, etz huen yajtungixy oyjot oyhuinmañ jigix ñiguëxigipy co ti yjothuimbijtcixy. ²¹ Miiđ jada ycixpi xymajchich ajcxy je judíojäy ajcxy ma Dios ytiyc, e xyaj'ógáangixyich anajty. ²² Miiđ co Dios ti xypubety ti xypudigiyich cha nyajpaadyich juugy. Ngapxhuäcxych Dios y'ayuc ytiy'ajt ma tüg'óciy ayoobtiyc etz ixpicytiyc. Tüg'óciy huیدی ngapxpyich je Dios y'ayucnajtzcaxiibybi jaay jecy'ajty, etz je Moisés nañ jadu'n jaay jecy'ajty co jadu'n ytunañyii yjadañyii. ²³ Hue' yajminañ co je Cristo copicy ayo'n tzaachypi yajnaxipy, e y'ógipy e huin'it jugypigipy, e je' je' je jayijp jäy huیدی jugypigip co anajty ti y'ögy. E yajcaxhuäcxip je ayuc ytiy'ajt ma ñch ajcxy judíojäy, etz ma huیدی ca' yjudíojäyity.

Pablo jahueeni cayajjothuimbijty Agripa

²⁴ Co Pablo jadu'n yminañ ma anajty ñayñigapxtüdyii, chi Festo mic minañ:

—¡Mlocjiyb miich Pablo! Miiđ je ixpijcin niği m'ahuimbity loci.

²⁵ Chi Pablo y'adzooy:

—Ca' ñch nlocjiy, miich mijtungmiiđpi Festo. Yi huیدی ñch ngapxpyich je' je' tiy'ajtip etz janchip. ²⁶ Yi rey Agripa ñejhuیداayb yi' tüg'óciy jada, paady nmiydägich aamic jotmic ma yi' yhuinduu; com nnejhuیداybich co yi' ñejhuیداayb jada tüg'óciy, com canan hue' jada yajtuuñ yajmiydacy ayüchytuum. ²⁷ ¿Nej mmibijcipy, miich rey Agripa, jadu'n nej ajcxy yminañ yi Dios y'ayuccoajaaybi? Nnejhuیداybich co miich mmibicy.

²⁸ Chi je rey Agripa y'adzooy, yminañ:

—Janch tim jayinjaty jahuenjaty miich xycayajmibicyich Jesucristo.

²⁹ Chi Pablo yminañ:

—Oy yjayinjaty yjahuenjatyty ooy mijcajee mgamibicy, chojcpy Dios co miich mmibigipy Jesucristo etz nañ jadu'n tüg'óciy jäy huیدی cham xy'amidoo'itip ñch n'ayuc. Dios chojcpy co mmibigipy Jesucristo jadu'n nej ñch mmibicyich, jeyi janchtiy co ca' mmach'idipy jadu'n nej ñch nmach'ityich.

³⁰ Co je Pablo ymiydactay, chi je rey etz gobernador ytinayigy quipxyi miiđ Berenice etz jacjadyii huیدی anajty ajcxy jim. ³¹ Chi ajcxy ahuinguyc oy capxyögyixy Pablo ypocy, ñayñimáaygixy miñ xyipy:

—Jada yëdyjc ca' jada ti tundigoy, ca' ypadyii nicxy y'ögy, ni ca' ypadyii nicxy ymach'iñäy pujxtigoty.

³² Chi Agripa nimay Festo:

—Jëbi ixipy nnejtmadziiyim Pablo co ca' ci'm ycanayñibjctzohuiyi co huen tiydunyii je emperador César jim Roma.

27

Pablo yajnicxi jim Roma

¹ Co ajcxy yajnihuinmayiy co xyquexáangixyich jim Italia, chi Pablo yajcyeje miiđ jacjadyii machyjäy ma tüg capitán huیدی anajty yxii Julio, je' huیدی nihuindzin'ajtp tügpyc soldadtjc huیدی anajty yxii batallón Augusto.

² Chi ñch ajcxy ndigiy ma tüg barco huیدی yhuindzin cogajpip jim Adramitio. Je barco hue' anajty ñicxañ ma nijëjity barco jättac jim Asia ñaaxjot. Chi ñch ajcxy ndzooni. Miiđ ñch anajty ajcxy Aristarco huیدی anajty cogajpip

Tesalónica jim Macedonia. ³ Com jabom ñich ajcxy nja'ty ma barco jättac jim Sidón. Jim je Julio pa'ayoy Pablo, e ahuaatz'i ytu' co huen nicxy co'ixiy ymígügtijc, etz huen je' ajcxy yajcayyii yaj'ügüyii. ⁴ Co ñich ajcxy ndzooñ jim Sidón, chi je naax mejy' agujcpi yhu'i'mni anajty' amy huidi yxii Chipre, müid co je poj anajty jijpcobojiy je barco. ⁵ Chi je barco huinyöyñajxy je Cilicia ñaaxjot etz Panfilia ñaaxjot, oy njädyich ajcxy jim Mira, tüg cajp jim Licia ñaaxjot.

⁶ Jim je capitán paty tüg Alejandria ybarco hue' anajty ñicxy jim Italia. Chi je capitán ñich ajcxy xyajbarcotigüiy. ⁷ Canaag xii ñich nyöy janch oñdägy, adzaach ñich ajcxy nja'ty mihuingon je Gnido co anajty je poj tzach jijpcobojiy je barco. Najx ñich ajcxy mihuingon Salmón, etz njüyöy'ahuidiijtyich ajcxy Creta je mejy' agujcpi naax. ⁸ Adzaach ñich ajcxy nja'ty ma barco jättac huidi anajty yxii Buenos Puertos, mihuingon Lasea.

⁹ Ti ñich ajcxy ooy anajty nxüdigoy, e ooy anajty ycodzigüjity je barco yajyöyü. Ti anajty je ayuuxii ñajxni, e ti mihuingon anajty je poj tuu tiempo huidi jäy ytijpy invierno. Paady Pablo je soldado huindzin jaccapxhuijy,

¹⁰ chi Pablo yminañ:

—Huindzindijc, jadu'n nej yam codzigi' jada ooy co njacnicxim barcojoty, ca'yjecyty co nicxy ndigooyim müid barco etz müid ñidzimy etz n'o'ctaayim.

¹¹ E je soldado huindzin yjacmijpidac oy je barco yajyöybi y'ayuc etz je barco capitán y'ayuc, ca'ydí Pablo y'ayuc. ¹² Com je' co je barco yjättac ca' anajty y'öyity, nicxy jim yajnajxcixy je poj tuu tiempo, chi je jacmaybi ajcxy yhuinma ñypidacy, co jëbi barco yjacyoöy, oc'ixaangixy pen yjätcixy jim Fenice ma Creta ñaaxjot. Jim ma tüg barco yjättac huidi y'aguu najtz'ixiiyb ma xii pidzimy, e jim anajty je poj tuu tiempo yajnaxaangixy.

Je mijpoj mijtigoy ma je mejy

¹³ Jadu'n yjaty co je jinboj hueeni ypidzimy, huin'it huinmay ajcxy co jëbi yjactüyöy je barco. Chi ajcxy yajpidigy je mij pujx huidi barco yajtinayxijp, e yajyöychooñ je barco. Chi ñicxy je barco mejyja' mejyja' ma Creta ñaaxjot.

¹⁴ Huin'it hueeni tiempo ñajx, chi je micpoj müñ ma tuchpoj pidzimy, huidi jäy ytijpy Euroclidón, jadu'n yhuimbizim, Noreste. ¹⁵ Chi je mic poj yajtütigajch je barco, e com ca' anajty ndimdüyöyixni müid je poj ycxipi, chi je mic poj ñich ajcxy xyajnicxy adzip ma anajty tzocy. ¹⁶ Najx ñich ajcxy mihuingon tüg naax mutzpi mejy agujcpi huidi yxii Clada, e adzaach ñich ajcxy nyujcjugujcy je mutz barco huidi anajty müimb ixhodziy ma je mijpi. ¹⁷ Co ajcxy jugujcpidzimy je mutz barco, chi ajcxy yajtuuñ maychaay e xojtzmuicy je barco aguu. Chi ajcxy yajminajcy je huit huidi anajty poj mic tzach ymajchyp. Je' co chigüygixy co chimnicxiyb je barco jim ma mejy huidi ca' y'agomity, ma püjot huidi yxii Sirte. Chi ajcxy ñayjeci huen poj yajnícixigixy. ¹⁸ Com jabom, com ooy mic anajty je poj, chi ajcxy je chimney mejy cöjibijptaayi. ¹⁹ Je midugüg xübi, chi ñich ajcxy nmejycöjibijptay je tungbejt huidi yajtumyb ma je barco. ²⁰ Ti anajty canaagxii ñajxni e ñich ajcxy ca' ma xii madza' n'oc'ijxcixni, müid je mij poj ycxipi huidi anajty ñich ajcxy xychachyajtüyöyp. Hue' ñich ajcxy ndijcixy co ti ndigöoygixyich, ca' ndijy ñich ajcxy ndzögipy.

²¹ Ti anajty xii tiempo ñich ajcxy nyajnajxcixy jaygay, chi Pablo ytinaigy, ñimay je jäy ajcxy:

—Yëdyictijc, co ñich müich ajcxy xycacapxymidooy ca' ngatzoonim jim Creta ñaaxjot, e ca' ixypiy jada ayo'n yam jadu'n nbaatim. ²² Jadachambi ca' mdajcixy mmaygixy, ca' ni pin ytigoyañ, oy je barco yjatigoy. ²³ Amygoodz je nHuindzin Dios tüg y'ángel ti ñayguëxigüii ma ñich, je Dios huidi ñich

ngapxymidooybich, yí' ti quexy. ²⁴ Je ángel ti xyñimäyich: “Ca' mdzigíy, Pablo, copicy co mjatyjädípy ma je mij'ane'mbi, je César yhuinduu. Míid miich ycixpi, Dios ñihuänamy yajtzögamy tüg'óciy huídi ji barcojoty, ca' ni tüg' y'ögípy.” ²⁵ Paady nayjot'amijmóoyigix, yëdyjctijc, nmibijcpiyich Dios co jadu'n yjada'ñ jadu'n nej yí' y'ángel ti xyñimäyich. ²⁶ Ooy ycopicyity nicxy nmijpojpejtim ma tüg' naax mejy agujcpi.

²⁷ Majmactz xii je mic poj anajty yajyöyii je barco oyñinej jim ma je mejy huídi yxií Adria, chi mijcutz je barco yajyöybi jihui'ñybijcy co anajty ti mihuingoñ naax. ²⁸ Chi ajcxy quipxy je ñii jadu'ñi anajty ycicyity, e hue' ajcxy quipxy iipx xap ycicyity. Jahuengi huin'it jadüg'oc ajcxy quipxy je ñii, e hue' oy quipxcixy majmocx xap ycicyity. ²⁹ E co anajty chigiiygixy co tijy je barco jipcobonihuipy ma tzaagop, chi ajcxy pidacy ñijoty midaax pujx ma barco y'ijx, je huídi yxiijip anclas, janch tzigiiyb anajty ajcxy y'ahuijxcixy cooni xiiimihuipy. ³⁰ Chi je' ajcxy huídi anajty barco yajyöyp yhuinma'ñybaty co yuëga'ñ ameech. Chi ajcxy pidacy ñiihuingixy je mutz barco. Chi ajcxy ñaybidaaci jadu'n nej jihuiiy je ancla jac yajminagaangixy jim ma barco yhuinduu. ³¹ Huin'it Pablo ñimay je soldado huindzin etz je soldadtijc:

—Pen ca' jada hui'mgixy ma barco, ca' miich ajcxy mejy ypidzimipy.

³² Huin'it ajcxy tzujctujcy je tzaay huídi je mutz barco anajty míid ycoxochity, chi ajcxy yajcáy je mutz barco ñijoty, e chi je mejy yajnicxyi.

³³ Moñyi Pablo migapxy je jäy ajcxy, chi ajcxy ñimay co huen huin-gayñajxcixy, chi Pablo yminañ:

—Cham majmactz xii ma miich ajcxy ca' mmaagixy, e ni ca' mgaaygixy m'uuccixy. ³⁴ Tun may'ajt caaygixy oy jadu'ñyi, copicy jada co njatyñidzooctähuanim, ni tüg' ngöhuay ca' ytigoyaanim.

³⁵ Co Pablo jadu'n yminanday, chi tüg' tzajcaagy conígy, chi jayijp Dioscojuyip yajnaxy mayjäy agujc, chi tujc-huäcxy etz ytigiiy ajcxy caaybi. ³⁶ Mic'amy je jäy ajcxy yjotmigiayday nidüg'óciy, e chi ajcxy ytigiiy caaybi. ³⁷ Hue' anajty ñaybaatigixy barcojoty mejtz migo'px jatugi'px majmocxtüg'jäy. ³⁸ Co ajcxy ycaayday, chi jacniiögöjibijpy je trigo, jigix huen cöminacy je barco chimy.

Chi barco tüg'yuqiiñ

³⁹ Co yxiimiiy, chi je barco yajyöybi ca' ijxcapy je naax, e y'ijxpaty tüg' it ma mejy huen ycoguegíy, e jim anajty püjot. Chi ajcxy yhuinma'ñybaty co'ixaangixy pen jëbi jim yjäty je barco. ⁴⁰ Chi ajcxy tzujctujcy je tzaay huídi anajty míid yxochity je anclas, e chi anclas yhui'mni ñijoty, huin'it ajcxy miguejiiy je ñii gaap huídi tumb co tümöy je barco. Chi huit jadüg'oc ajcxy pidacy huídibi pojmajtzp. Chi je barco ytigiiy yöyb, tiyy ajcxy yajnicxy ma püjot. ⁴¹ E chi oy minaybadyii ma anajty je mejy mejtz it oy mic ycujiyñ, chi oy yjépxy püjoty. Je barco jijp oy ytigíy tätzpcy ca' huaad y'ocyücxni, e je barco ijx oy ytigiiyñ aguejthuäcxpi ymíid je mejy püjoty ymijaa. ⁴² Chi je soldado yjayaj'ögañ je machyjäy ca'ydi yqueeccixy ayaahuip. ⁴³ Je soldado huindzin ca' a'ixiiy nicxy yaj'ögyii Pablo, chi ñimay soldado ajcxy co huen ixmajtcixy yí machyjäy. Chi je soldado huindzin ñimay je jäy ajcxy co huen ñidigiiygixy pinjaty jajtp yau. ⁴⁴ E huídi ca' jajtcixy yau jaydëbi ñidigiiygixy míid pu'y etz míid barco pedasi. Jadu'n ajcxy nidüg'óciy ymejy ypidzimday.

28

Pablo yjädÿ ma tög naax mejÿ'agujcpi huidibi yxii Malta

¹ Co iich ajcxy nñibdzimday, chi iich ajcxy nejhuivy co je naax mejÿ'agujcpi hue' anajty yxii Malta. ² Je conaax ajcxy ooy oyjädÿ'ajtin tuuñ mñid iich ajcxy, chi ajcxy yajmijüy jün mij, mñid co anajty ooy ytñichity, etz co anajty ooy ytuubojy. Chi xyñimay iich ajcxy co mñin n'ocxäämgixyich. ³ Chi Pablo ytñigüy jähxycajpmujcpi, e chi pidacy jünjoty. Chi tög ahua'n iyujc pidzimy, yquëgy anajty mñid je anbi, chi Pablo ymajtz'i ma yci'. ⁴ Co je cogajp ajcxy ijxy je ahua'n iyujc ytñyñäy ma Pablo yci', chi ajcxy ñayñimaayi mñin xyipy:

—Jadayaabi yëdyijc, jây yaj'öcpi jada. Oy ca' ti y'ögy mejÿjoty, je tÿydumbi tzajpjoty pi ca' a'ixiy nicxy yjactzinäy.

⁵ Chi Pablo yci' huinxidicxy, e jünjoty oy ycäy je ahua'n iyujc, e ca' Pablo ni nej yjaty. ⁶ E tög'öciy je jây tzach'ahuijxcixy mina anajty y'ocquixigÿ, o mina anajty y'oc'ögy. Ti anajty ooy y'ahuijxcixy jecy; co ajcxy ijxy ca' ni nej yjaty, chi ajcxy yhuinma'ñ yajtigajch. Yminañ ajcxy co Pablo hue' jada' yi' tög dios.

⁷ E mihuingon anajty je Publio ytijc, je huidi nigohuajc'ajty je jimbi naax mejÿ'agujcpi. Je Publio xyajjättacich ajcxy, e xyajcaay xyaj'uucich iich ajcxy yajxon tugüg xii. ⁸ Jada'n yjaty co je Publio anajty yteedy ypigÿii mñid tooy gohuajc etz mñidity anajty ni'pypa'm. Chi Pablo oy ixy je pa'mjäy. Chi Pablo Dios mibijctzoy, e chi cinñaxaj, e yajtzoocy. ⁹ Mñid jadaay mñin ajcxy nijëjity pa'mjäy huidi anajty ajcxy tzinaayb ma je naax mejÿ'agujcpi e chi ajcxy chooctäy. ¹⁰ Mñid jada yci'p ni yajcömay iich ajcxy, e nyajmooyich iich ajcxy tijaty huidi iich ajcxy nidüyöyipy barcojoty.

Chi Pablo oy yjädÿ jim Roma

¹¹ Tugüg po' iich ajcxy anajty ti n'ijtni jim. Chi iich ajcxy nbarcotigüy ma tög barco huidi anajty je tuuboj tiempo ti yajnaxy jim Malta. E je barco capitán jim anajty ycogajpity Alejandría. E je barco ymñid anajty ahuinax huidi anajty yxii Cástor etz Pólux huidi ajcxy dios'ajtpy. ¹² Chi iich ajcxy oy njäty ma je barco jättac huidi anajty yxii Siracusa. E jim iich ajcxy nhui'müy tugüg xii. ¹³ Ndzoñich ajcxy Siracusa barcojoty, nicxy iich ajcxy mejÿpa' mejÿpa', ixti nja'tyich ajcxy jim Regio. Com jabom oy ypidzimy jünboj, chi co maax oy nja'ty iich ajcxy Puteoli. ¹⁴ E jim iich ajcxy nbaaty nijëjity jây huidi anajty mijpidaacp Jesús. Je' ajcxy xycohuaniyich co iich ajcxy jim huimüpy tög semaan. Chi iich ajcxy jadüg'oc ndzoñ, nnicxyich ajcxy jim Roma. ¹⁵ Je mibijcpidijc ajcxy huidi anajty jim Roma ymidou ajcxy ayuc co iich anajty ajcxy jim nicxy, chi ajcxy chooñ nijëjity oy xyjijpcobadüygixyich ma je cajp mercadoo mñid huidi anajty yxii Foro de Apio. Jacjadyii mibijcpidijc oy xyjijpcobadüyich ma tög jättac huidi anajty yxii, Tres Tabernas. Co Pablo jijpc'o'ixüy je mibijcpidijc ajcxy, chi Dioscojuyip yajnaxy etz ñayjihuiyi janch jotucj. ¹⁶ Co iich ajcxy nja'ty jim Roma, chi je soldado huindzin cÿejcÿ je machÿjây ma je comandante, per a'ixiÿyb co Pablo tzinäy ahuingujc ma tög pjctzoydyijc, jëyi anajty tög soldado ycuend'adyii.

Chi Pablo Dios y'ayuc capxhuäcxi jim Roma

¹⁷ Tugüg xii maabi Pablo anajty yjätÿ jim Roma co capxyñigüejÿ je judío huinmij'anätiyc huidi anajty ajcxy tzinaayb jim Roma. E co ajcxy ñaymujci, chi Pablo yminañ:

—Migügtijc ajcxy, oy iich ca' ti ndundigooyich mñidi judío jây ajcxy etz mñid ajt nmij'ap nmijteedy ycötüjcin, chi je judiojây ajcxy xymajchich etz

xyčijecich ma romano tungmüdpí jim Jerusalén. ¹⁸ Co je romano tungmüdpí ajcxy xy'amidooyich, huin'it ajcxy xyjanajtzmadzihuaañich, ca' ti ajcxy paaty ma ich huidi ajcxy xyajco'ögihuibich. ¹⁹ Co je judíoJay yjotmätcoty ajcxy, ca' ajcxy a'ixiy co nyajnajtzmadzihuibich, chi nayñibijctzohuiyich co nyajtuydunipyich ma je mij'ane'mbi ya Roma, oy ich ca' ti xihuin nmüditü müd ich nmigonaax nmigogajpich. ²⁰ Paady ti ngapxyñiguejxcixy co nyajmüdmüydäga'ñ ajcxy tigix co nmach'ityich. Müd co ich ajt n'ahuixim co Dios nihuäna'ñ yajñüdzöga'ñ yi Israel Jay etz yajjugypiga'ñ je Jay tiibi y'öccixy. Paady jadachambi nyajpaadyich mach.

²¹ Chi ajcxy y'adzooy:

—Ca'ni ich ajcxy ni ti necy xyñijäty huidi tzoomb jim Judea müd miich ycxipi. E ni tüg ajt nmigügtijc ca' jibic xyñimüydägy. ²² Nja'amido'idaamyich jadu'n nej miich mmiydägy, com nnejhuibich co huen yma'amyity Jay ymidzip'ajty je jemybi y'ijxpjcin.

²³ Chi tüg xii ajcxy agapxtujcy. Co oy paady mina anajty ti agapxtujccixy, chi mayJay ñayyöymujci ma je Pablo anajty jättac müdity. Jopy ajcxy yajtzondacy capxi müydägi ixti ycootztzuu'iiy, jadu'n Pablo tzachyajnimaaygixy je Dios y'ayuc nej Dios yhuinma'ñ müdity. E yajjothuimbidaangixy anajty ma je Jesús müd co capxticxy je Moisés ycötujcin nej anajty yjaybetyity, etz jacjadyii ayuc cojaaybi ñecy. ²⁴ Nijējity cöbije ajcxy nej Pablo anajty ymina'ñ, etz nijējity ca' ajcxy mibijcy. ²⁵ Co ca' anajty ajcxy miñ xyipy yajtügiiy yhuinma'ñ, chi ajcxy icy ca'ixy yöychóongixni. Chi Pablo yminañ:

—Tiytudägy je Espíritu Santo nimay je nmij'ap nmijteedy ajt co yajcapxy je profeta Isaías co yminañ:

²⁶ Nicx nima' je Jay ajcxy: Miich ajcxy oy mjamidohuipy n'ayucich, per ca' ajcxy mhujnjihuihuip; oy mjahuindicxcixipy, e ca' ajcxy mhujnjihuihuipy.

²⁷ Com jada Jay ajcxy hue' yjot'ahuimbijtcixy janch juuñ, e ymidoogixy oyñinej, jadu'n nej jihuiy yhuimbiz'ijtcixy, e ni ca' y'oc'ijxcixy müd yhuin e ni ca' ocmidoogixy müd yta'tz'ac, ni ca' huinjihuiygixy müd yjot yhuinma'ñ, ni ca' minipy ajcxy ma ich jigix myajtzögibich.

²⁸ Njehuüygixy miich ajcxy co jadachambi etz jacnicxpi xii tiempo Dios y'ahuanüyb y'ayuc ytiy'ajt nej jēbi Jay y'alma ajcxy yajñüdzögipy ma je Jay ajcxy huidi ca' yjudíoJayity, e je' ajcxy y'amido'idipy.

²⁹ Co Pablo jadu'n nimay ajcxy, chi ajcxy ñicxtáaygixni chach ñayhuin'hibéjtigixy ñayhuingapxpéjtigixy miñ xyipy.

³⁰ Pablo mejtz jimijt jim chinay ma je pijctzoydjic jim Roma, e yajxon xiic'adzoy capx'adzoy pin miñ ycgapxyii. ³¹ Janch agujc jotcujc anajty capxhuäcxy je Dios y'ané'min, e yaj'ixpicxy je Huindzin Jesús ytiy'ajt, e ni pin ma ycapx'adugyii.

ROMANOS

Yi Neczy Hu'idi San Pablo Yajniguejx Je Mibijcpidijc Jim Roma

¹ H'ich Pablo tumb'ich ma Jesucristo ytung. Jesucristo ti xyajñibicyich co ndunañ'ich ma y'i' ytung quipxy müd y'i' y'apóstol ajcxy. Ti xypidägyich ma jada tung tügjijp co ngapxhuäcxib'ich Dios y'ayuc ytiy'ajt oybi.

² Dios jecy'ajty y'ayuc yajhui'my cojay ma y'i' y'ayucnajtzcapx'iybi ñecy co quexa'ñ anajty je Cristo ya naaxhuiñ. ³ Ngapxhuäcxyich jada ayuc jadu'n nej ajt nHuindzin Jesucristo, je Dios y'ung, yma'xung'ajty ya naaxhuiñ. Hue' y'i' ñin'icx paty ma ytaj. E y'i' ytaj je rey David je' ymij'ap'ajti ymijteedy'ajti. ⁴ Per Jesucristo ti paady ma Dios y'i' yjihui'ñ ymic'ajt. Co Dios yajjugypijcy y'ung ma anajty ti y'ögy müd yjihui'ñ ymic'ajt, chi ti yajnejhu'iy anajty je naaxhuiñy'jy co Jesucristo hue' je' Dios y'ung, huidibi müd huädz yjot huädz yhuinma'ñ, etz nañ ymüid Dios yjihui'ñ ymic'ajt. ⁵ Co Dios yajjugypijcy Jesucristo ma anajty ti y'ögy, chi mijmay'ajt tuñ müd ñich ajt ycixpi. E nañ müd Jesucristo ycixpi Dios ti xyajñibicyich co ngapxhuäcxib'ich y'i' y'ayuc ytiy'ajt ma y'i' mayj'ay ajcxy ma tüg'óciy naax cajp, jigix jébi mayj'ay mibijccixy e nañ capxymidoogixy Jesucristo. ⁶ E miich ajcxy huidibi tzinaayb jim ma y'i' cajp huidibi xijip Roma, nañ jadu'n Dios miich ajcxy ti xyhuin'ijxcixy jébi ajcxy Jesucristo xyj'ay'adyii.

⁷ Jada necy nguejxypich ma miich ajcxy nidüg'óciy huidibi jim yajpatcixp ma y'i' cajp huidibi xijip Roma. Dios miich xychojccixp xyjihui'ygixp, e nañ Dios ti xyhuin'ijxcixy jayd'ebi y'i' xyj'ay'adyii, etz nañ jayd'ebi mdzinaaygixy müd huädz mjot huädz mhuinma'ñ. Huen ñich ajt nDios Teedy etz ajt nHuindzin Jesucristo may'ajt oy'ajt tunipy müd miich ajcxy etz nañ xya-jjotcug'ihuip ajcxy.

Pablo n'icxy mibijcpidijc cogapx'ihua'ñ jim Roma

⁸ Tim jayijp nyajnajxp'ich jäygidaacin ma Dios, müd Jesucristo yxi, co miich ajcxy ti mmibijccixy Jesucristo. Mayj'ay ma nidüg'óciy naax cajp ti nejhu'iygixy jadu'n nej miich ajcxy ti mmijpidaaccixy Jesucristo. ⁹ H'ich tumb'ich cixy'jot huinijot ma Dios ytung, co ngapxhuäcxyich Dios y'ayuc ytiy'ajt müd Jesucristo ycixpi. Dios y'i' tiy'ajt yegip jadu'n nej jabom jabom Dios nmibijctzooyich müd miich ajcxy ycixpi. ¹⁰ Dios nmibijctzooyibich pen y'i' jadu'n tzojcp co jébi nñicxyich cham tiempo jim ma miich ajcxy myajpaady. Canaag'oc ñich miich ajcxy n'icxy nja'ixaangixy, e ca' y'oy'iy nej n'icxib'ich. ¹¹ Ooy njanijot'atyich co ñich miich ajcxy n'icxy n'ixaangixy, jayd'ebi ngapxhuäcxib'ich Dios y'ayuc ma miich ajcxy müd Dios yjihui'ñ ymic'ajt, e nañ ngapxhuäcxib'ich Dios y'ayuc ma miich ajcxy jayd'ebi tiydudägy mmibigipy ajcxy Jesucristo. ¹² Pen oy'iyb nej n'icxib'ich ma miich ajcxy myajpaady, chi jébi njotcug'ihuib'ich co anajty n'ixyich nej miich ajcxy mibijccixy Jesucristo, e nañ jayd'ebi njotcug'ihuipy miich ajcxy co anajty m'ijxcixy nej ñich nmibicyich Jesucristo, e jadu'n n'ayyajjotcug'iyim miñ xyipy.

¹³ Ndzojcp'ich co miich ajcxy mnejhu'ihuipy co canaag'oc ti njapidägyich nhuinma'ñich co anajty nñicxa'ñich ma miich ajcxy myajpaady, e ca' y'oy'iy nej n'icxibyich. Njijp'ijxyp'ich co oy'ihuip jadachambi tiempo jadu'n nej jébi nñicxibyich jim ma miich ajcxy. Com njacyaj'ixpigaamyb'ich miich ajcxy,

e nañ njacyajmibigaamybich ajcxy Dios y'ayuc. Tim jadu'n nej nduñich canaag agajp ma chınaaygixy yi jacjadyii jāy huidibi ajcxy ca' yjudío jāyity. ¹⁴ Dios jadu'n xyajñibijcich jada tung, paady copicy co ngapxhuācxibich yi' y'ayuc ma tūg'óciy jāy, etz majaty naax cajp. Ngapxhuācxamybich Dios y'ayuc ma yi jāy ajcxy huidibi griego ayuc cāpxcixp, etz ñan ma yi jāy ajcxy huidibi ca' griego y'ayuc capxcixy. Ngapxhuācxamybich Dios y'ayuc ma yi icpicy jāy ajcxy, etz nañ ma yi jāy ajcxy huidibi ca' y'ixpicyty. ¹⁵ Paady cixpicy ooy ndzachcapxhuācxa'ñich Dios y'ayuc ma miich ajcxy huidibi yajpatp jim Roma nañ jadu'n.

Je ayuc tiy'ajt oybi

¹⁶ Ca' nmidzo ydunyiiich Cristo y'ayuc ytiy'ajt. Com je' jada je oybi ayuc huidibi tzoon ma Dios, ymūd yi' Dios ymic'ajt jigix jēbi tūg'óciy jāy ajcxy paadipy pocy huinmeecxin, pinjaty cōbigaamb Cristo y'ayuc. Tim jayijp ti ngapxhuācxy Jesucristo y'ayuc ytiy'ajt ma yi judío jāy ajcxy, e jac'axam ma yi huidibi ajcxy ca' yjudío jāyity. ¹⁷ Jesucristo ytiy'ajt xyajnejhuūyim co nmibijcim co Cristo ti jōch ajt nbocy etz nxihuūn, chi Dios xycōbigaanim jadu'n nejjuūy tudāgyjāy. Ca' ji jadūg huinma'ñ nej Dios jēbi xycōbijcim jadu'n nej juūy tudāgyjāy. Com jadu'n jaybety y'ity ma Dios ñecy ma jadu'n ymīnañ: “Pinjaty tudāgy'ajtin ti paady mūd co ti mijpidāgy Dios y'ayuc, hue' je' tzināhuip, ca' yjugy'ajtin ycixipy ytigoyipy.”

Je naaxhuiñyāy ajcxy ypocy

¹⁸ Copicy nbaatim tudāgy'ajtin ma Dios, com je Dios huidibi tzinaayb tzajpjoty ti xyajnejhuūyim co yi' tzaachytuna'ñ mictāgy tūg'óciy jāy ajcxy huidibi midundigooyb yi' ytiy'ajt, tūg'óciy huidijaty jibic huinma'ñ ymūd, tūg'óciy yi' ajcxy huidibi yajtigooyb Dios ytiy'ajt mūd je jibicpi huidibi ajcxy ytumyb. ¹⁹ Com yi jāy ajcxy huidibi jibicjot jibic-huinma'ñ mūd, y'ijxpy ñejhuūyb ajcxy Dios ytiy'ajt, com Dios ti pidāgy yi' ytiy'ajt ma yi' ajcxy yjot yhuinma'ñ. ²⁰ Ñejhuūyb jāy ajcxy Dios ytiy'ajt, com mabaad oga'n Dios yajcojy naaxhuiñybi ixti chambaad, quēxīcp ya naaxhuiñ Dios ymic'ajt y'ijxpejt, oy ca' pin Dios icy, huidibi Dios ti cojy ti macxy yejcpy ijxpejt co Dios yjiijity, etz Dios ymic'ajt huinixi huin'tiempo ijtp yi', ca' ycixipy ytigoyipy nimina. Co anajty Dios tzaachytuna'ñ yi pocyjāy ajcxy, ca' ajcxy ni ti ayuc mūd huaad adzohuimbip Dios mūd ajcxy ypocy ycixpi. ²¹ Com ñejhuūyb ajcxy co ji Dios yajpaady, e ca' ajcxy ojadajtcixy ca' ajcxy huindzigūygixy Dios. E nañ ni ca' ajcxy yajnaxy Dioscojuyip ma Dios. E nañ jadu'n ajcxy ñaybidācigixy amij agix, yhuinma'ñ ixtaaygixy huidibi ca' ytiy'ajtity. Yajtigooyi ajcxy Dios ytiy'ajt ma ajcxy yjot yhuinma'ñ, e nañ mūd'ajtcixy tzuuhuinma'ñ. ²² Yi jadu'mbi jāy ajcxy hue' yhuinma'ñ pidaaccixy co ajcxy ooy ycohuinma'ñity, co ajcxy ooy y'ixpicyty, e ca' yjanchity, tzuu huinma'ñ ajcxy ymūd. ²³ Ma yjapadyii ojadajtcixipy huindzigūygixipy Dios huidibi ymic'ajtin y'oy'ajtin ca' ycixipy ytigoyipy nimina. Chi ajcxy yajtigach yjot yhuinma'ñ, e huindzigūygixy jāy y'ahuinax e jāy ajcxy yjugy'ajtin etz y'oy'ajtin cixaamb tigoyaamb. Ixti mijpidaaccixy nañ jadu'n joon y'ahuinax, iyujc y'ahuinax etz tza'ñ y'ahuinax.

²⁴ Co jāy ajcxy jadu'n ytundigoy, paady Dios ñajtz'ixiijin ajcxy, huen tundigoogixy nej anajty cōm jibichuinma'ñ nijot'ajtcixy. Ñaymidundigōoyigixy ñinicx miñ xyipy huidibi janch oy midzo yduuni. ²⁵ Ma yjapadyii ixipy mijpidaaccixy je tiy'ajt tiydudāgypi nej Dios ti yecy, huin'it ajcxy mijpidaaccixy anñi huidijaty jāy ti cojy ti macxy. Ma yjapadyii ixipy

huindzigüygixy Dios, huídibi ci'm ti yajcojtäy tüg'óciy tijaty ji yajpaatp, huin'it ajcxy huindzigüygixy jäy y'ahuinax joon y'ahuinax, etz iyujc y'ahuinax huídijaty ca' ti mic'ajt müidity. Copicy n'ojadajtim ngómaayim Dios huinixii huinítiempo. Amén.

²⁶ Müid co jäy ajcxy tzachhuindzigüygixy jäy y'ahuinax etz jactijaty ahuinax, paady ycixpi Dios ajcxy ñajtz'ixiyii, chi ajcxy tungixy yi jibic-huinma'n huídibi ci'm ñijot'ajtcixyp huídibi oy ymidzo'yduuni. Tóxyjäy ajcxy ma yjapadyii chinaaygixipy tudägy müid ñäy, chi ajcxy ñaymüdtzináayigixy e ñaymüdtundigóoyigixy actóxyjäydijc. ²⁷ Yéydijctijc ajcxy nañ jadu'n ñaymüdtundigóoyigixy miñ xyipy. Ñaymüddzináayigixy ma yjapadyii iyxipy chinaaygixy müid tóxyjäy ajcxy, huin'it ytundigooyigixy ma Dios ytiy'ajt. Ci'm ñijot'ajtcixy jibic-huinma'n huídibi oymidzo'yduuni, ypátcixipy ma ajcxy ñinícx je tzaachypi huídibi Dios ypidacpy müid yi' ajcxy ypocy ycixpi.

²⁸ Co yi jäy ajcxy jadu'n ci'm yhuinma'n ti pidaaccixy co ca' yajmij'ada'n Dios, paady ycixpi Dios ñajtz'ixiyii ajcxy. Huen tim tungixy huídibi ajcxy ci'm ñijot'ajtpy, huídibi Dios ca' jäygidägy. ²⁹ Jäy ajcxy ooy mij jibic-huinma'n canaagnax nijot'ajtcixy; yéydijctijc ooy ajcxy jibic-huinma'n tungixy; ooy ajcxy migapxtigoy tóxyjäy ajcxy; ooy ajcxy adzojccixy comeeñ'ajtin; ooy mi'ijxtinaaygixy ymígügtijc; ca' ajcxy ymígüg ixaangixy; ooy ajcxy yjäy'aj'óccixy; ooy ajcxy chiptunaangixy; ca' ajcxy ycapxymidohuaangixy; ooy ajcxy ymígüg huin'ingixy; ooy ajcxy ypiitcapxcixy; ca'p ajcxy ymígüg ixaangixy. ³⁰ Jäy ajcxy ooy nigapxy ni'ojjy ymígügtijc; ca' ajcxy ixaangixy Dios; ca' ti jäygidaccixy; ooy ajcxy amij agix ñayjihuiiyigixy; ooy ajcxy ci'm ñaygómáayigixy; ooy ajcxy cojy macxy jibic-huinma'n, ca' ajcxy capxymidoogixy ytaj yteedy. ³¹ Jäy ajcxy ca' y'ayuc-huinjihuiiyigixy; ca' ajcxy cuydungixy yci'm'ayuc; ca' ajcxy ni pin tzojccixy jihuiiyigixy; ca' ajcxy ni pin pa'ayoogixy. ³² Jadayaabi jäy ajcxy ñejhuuyb co Dios ti cojy ti macxy ycótujcin co pinjaty tundigooyb jadu'n müid Dios ytiy'ajt, tigooyip ajcxy yjoty'ajtin. Oy iyxipy yi jäy ajcxy janejhuiiyigixy co padaangixy y'o'cin, huin'it ajcxy jactimtungixy jibic-huinma'n, e nañ jadu'n jotcuje ajcxy co jac pinjaty jibic-huinma'n tungixy.

2

Dios tiydumb jadu'n nej yi' tzocy

¹ Paady co müich migüg m'ix'ixy mba'ixy ti ytumyb, ti migüg ycapxyp ti anajty pocy mnaymöyii, oy iyxipy ypinjäy ñejpyjäyity. Müich ooy ti pocy m'ixy ma huing jäy, e nañ jadu'n müich ooy mij mdundigoy, tim jadu'n nej yi' ajcxy ytundigooyigixy. ² Nejhuuiyim co Dios tudägy ytuñ co tzaachytuñ tüg'óciy pinjaty tundigooyb. ³ E müich co migüg m'ix'ixy mba'ixy ti ytumyb ti migüg ycapxyp, nañ jadu'n müich Dios xychaachytuna'n. ¿Nej mdijy mdzögip co anajty Dios xytidyuna'n? ⁴ ¿Nej ca' mjäygidägy nej Dios mij ooy may'ajt oy'ajt ti tuñ müid müich, nej ooy mij ti xypa'ayoy, mij ti xymimecxtucy? ¿Nej ca' mnejhuüy co Dios mij ooy xypa'ayoy xymimecxtucy, jigix mjothuimbidity nej mdundigoy ma Dios ytiy'ajt? ⁵ Müid co ooy mjotjuuñity mgöjuuñity, ca' ajcxy mjothuimbida'n, ca' ajcxy m'ixmadza'n nej ajcxy mdundigooyigixy. Paady ycixpi Dios huídibi tudägy tumb nīgi müich yi' ooy mij xychaachytuna'n co anajty xii tiempo ycixy ytigoy, e Dios chaachytunamyb jäy ajcxy müid ypocy ycixpi. ⁶ Co anajty Dios tiyduñ yi naaxhuñ jäy, chi yajnigidagihua'n

nidüg nidüg nej anajty ti chinäy. ⁷ Nijëjity jäy ajcxy oyjot oyhuinma'n tungixy jabom jabom, yjijp'ixpxy ajcxy co Dios oybi ymöhuaanigixy, nañ yjijp'ixpxy ajcxy co Dios ycömayiib, yjijp'ixpxy ajcxy yjugy'ajtin huidibi ca' ycixipy ytigoyipy nimina. Yi jadu'mbi jäy Dios ymöhuaamyb jugy'ajtin huidibi ca' ycixipy ytigoyipy nimina. ⁸ Per Dios chaachytunamyb mijcajee yi jäy ajcxy huidibi ca' ycapxymidohuaangixy, huidibi ca' cuydungixy Dios ytiy'ajt, huidibi ajcxy tumb jibic-huinma'n. ⁹ Ayo'n tzaachypi ypadamyb tüg'öciy jäy ajcxy huidibi jibic-huinma'n ti tuñ. Nañ jadu'n miich judiojäy ajcxy tim jayijp mbadaangixy tzaachypi, pen mdundigooygixp, e chiini yi jacjadyii jäy padaangixy tzaachypi, pen tundigooygixp. ¹⁰ Tüg'öciy pinjaty oyjot oyhuinma'n tungixp, Dios ymöhuaamyb yi' ajcxy oy'ajtin, nañ cömayaanip yi' ajcxy Dios, etz nañ yajjotcugihuiib ajcxy. Tim jayijp yi judiojäy pada'n ajcxy oybi, etz jac'axam yi jacjadyii jäy ajcxy.

¹¹ Dios ca' tiyduna'n jäy ajcxy huin'ixxpety, quipxyjaty tiyduna'n nidüg'öciy jäy ajcxy. ¹² Nidüg'öciy jäy ajcxy huidibi tundigooygixp, Dios yajtigoyaanip ajcxy yjugy'ajtin. Yi jäy ajcxy huidibi ca' müdity Dios ycötujcin huidibi cojaayip, Dios yajpocycähuaanip ajcxy, com ymüd ajcxy Dios ytiy'ajt ma yjot yhuinma'n. Yi jäy ajcxy huidibi müd Dios ycötujcin cojay, Dios yajpocycähuaanip ajcxy müd yi' ycötujcin huidibi cojaayip. ¹³ Yi jäy ajcxy huidibi nigoob amido'ijtp co yajcapxy Dios ycötujcin, e ca' ycapxymidoogixy, ca' ycöbiga'nyii Dios jadu'n nej jihuüy ytudägyjäyity. Yi jäy ajcxy huidibi capxymidoob Dios ycötujcin, Dios cöbigaanip co ajcxy ytudägyjäyity. ¹⁴ Yi jäy ajcxy huidibi ca' müdity Dios ycötujcin huidibi cojayip, co ajcxy nijot'ajtcixy oyjot oyhuinma'n jadu'n nej Dios tzocy, jadu'n nipaady nej jihuüy ajcxy müdity Dios ycötujcin. ¹⁵ Co je jäy ajcxy oyjot oyhuinma'n tungixy, huin'it yajniügëxëccixy co ajcxy ymüd Dios ycötujcin ma ajcxy yjot yhuinma'n. E co paatcixy jibic jot jibic-huinma'n, huin'it jibic ñayjihuiiyigixy. E co patcixy oyjot oyhuinma'n, huin'it ooy oy ñayjihuiiyigixy. ¹⁶ Jada je'du'n je jemybi oybi ayuc huidibi ngapxhuäcxypich co miinip je xii je tiempo co Jesucristo, müd Dios ycötujcin, tiydunip tüg'öciy jäy ajcxy nej anajty yjot yhuinma'n ajcxy müdity, tüg'öciy pinjaty ti tuñ ayüch ameech tijaty.

Je Dios ycötujcin huidibi Moisés yjay jecy'ajty

¹⁷ Miich ajcxy huidibi minamb co mjudiojäyity, miich ajcxy mmijpidaaccixyp Dios ycötujcin, je jecyip huidibi jaybetyip. Miich ajcxy mnyagömáayigixy co miich ajcxy Dios xyjäy'adyii. ¹⁸ Miich ajcxy mnejhuüyb nej Dios tzocy nej huaad mjäy'ajtcixy. E nañ ti m'ixpicy Dios ycötujcin huidibi ti xyajnejhuüygixy huidibi tiy'ajt jac'oyip. ¹⁹ Miich ajcxy minamb co janch janch co miich ajcxy Dios ytiy'ajt myejci ma yi jäy ajcxy huidibi ca' Dios ytiy'ajt müdity, jadu'n nipaady nej jihuüy tüg huintzpi mhuijtzöy, e nañ jadu'n nipaady nej jihuüy mgodixy je jäy ajcxy huidibi agootztuum tzinaayb. ²⁰ Miich ajcxy judiojäy myaj'ixpijcpy yi jäy ajcxy huidibi ayooob, huidibi ca' ti tiy'ajt nejhuüygixy, e mgapxhuüiy yi jäy ajcxy huidibi ca' yhuinma'ñyemejtzcixy. Miich ajcxy minamb co m'ayuc etz mdiy'ajt mbaatcixy ma Dios ycötujcin huidibi jaybetyip. ²¹ Miich ajcxy myaj'ixpijcpy jacjadyii jäy ajcxy Dios ytiy'ajt. ¿Nej co ca' ci'm mgyudngixy nej ti myaj'ixpijccixy? Myaj'ixpijcpy ajcxy jacjadyii jäy co ca' huaad ymeetzcixy, e miich ci'm ajcxy meetzp. ²² Miich ajcxy myaj'ixpijcpy jacjadyii jäy co ca' huaad migapxtigoy töxyjäy ajcxy, e ¿miich ajcxy nej co mmigapxtigooygixy töxyjäy ajcxy? Miich

ajcxyci'm minamb co ca' huaad yajhuindziḡy tzaaboch quipychech, e miich ajcxyci'm mdzachmeech je meeñ ma je tzaḡptijc ma je quipychech y'ity. ²³ Miich ajcxyci'm mdzachnayḡmáayigixy co mguydungixy Dios ycötujcin. Miich ajcxyci'm ixtijy Dios müid co ca' ajcxyci'm mguyduni y'i' ytiy'ajt. ²⁴ Paady jadu'n jaybety miñ ma Dios ñecy, ma jadu'n ymína'ñ: "Com co miich ajcxyci'm mdundigooyigixy, paady ycixpi' yi' jacjadyii jāy ajcxyci'm nigapxy ni'ojy Dios yxii."

²⁵ Co ajcxyci'm mguyduunip Dios ycötujcin, huin'it Dios xytunipcuendi co miich ajcxyci'm müidity je tiy'ajt ma mninix co Dios xyjāy'adyii. Co ca' ajcxyci'm mguyduunip Dios ycötujcin, huin'it Dios ca' xytunipcuendi co miich müidity je tiy'ajt ma mninix co Dios xyjāy'adyii. Jadu'n nipaady nej jihuñy ca' mdiy'ajttiyity. ²⁶ Co yi' jacjadyii jāy ajcxyci'm huidibi' ca' müidity tiy'ajt ma ñinix, e cuyduni ajcxyci'm Dios ytiy'ajt, jadu'n nej ajcxyci'm ytiy'ajttiyity. ²⁷ Yi' jacjadyii jāy co ajcxyci'm cuyduñ Dios ytiy'ajt, y'i' ajcxyci'm capxpaady'idipy ma Dios. E miich ajcxyci'm judíoḡy mbocycāhuip miich ajcxyci'm, oy miich ajcxyci'm jamüidity ixypy Dios ycötujcin huidi' cojaayip, pen ca' mguydungixy. ²⁸ Je iixpejt janchyp' co pinjaty Dios yjāy'ajtyp, canan je' je iixpejt huidibi' ymüid ma ninix. E nañ jadu'n canan je' je tiy'ajttihuñy cötujcin huidibi' jāy cuydun jecy'ajty. ²⁹ Je iixpejt janchyp' co pinjaty Dios yjāy'ajtyp, je' je' je iixpejt huidibi' ymüid ma yjot yhuinma'ñ, je oyjot oyhuinma'ñ huidibi' ymüid, je iixpejt co je Espíritu Santo ti yajhuächyii yjot yhuinma'ñ, canan je' je tiy'ajt co ti cuyduñ je jecyp cötujcin huidibi' cojay ijtp. Yi' jadu'mbi' jāy ajcxyci'm cōmay'idipy ma Dios, e ca' ycōmay'ida'ñ ma jāy ajcxyci'm.

3

¹ Pen tiy'ajt jadu'n nej nmína'ñich, ¿ti jāyḡdaacin yi' judíoḡy ajcxyci'm ymüid ma Dios huidibi' yi' jacjadyii jāy ajcxyci'm müidity? ¿Ti jāyḡdaacin ajcxyci'm ypatpy co ajcxyci'm müidity tiy'ajt ma ñinix co Dios yjāy'adyii? ² Yi' judíoḡy ooy canaagnax oy'ajtin jamüidity. Tim jayijp Dios yajñibijci' ajcxyci'm y'i' ycötujcin y'i' y'ayuc huidibi' cojaayip. ³ ¿Nej mdiyy co Dios ca' cuyduna'ñ y'i' y'ayuc müid yi' judíoḡy ajcxyci'm müid co nijējity judíoḡy ca' cuyduñ y'i' ycötujcin? ⁴ Dios ca' jadu'n huinma'ñ müidity nej jāy ajcxyci'm huinma'ñ müidity. Oy ixypy nidüḡ'óciy jāy y'anüidaaccixy, Dios ca' y'anüidāḡa'ñ nimína. Paady jadu'n jaybety miñ ma Dios y'ayuc co David jadu'n ymína'ñ:

Ñejhuñhuipy jāy ajcxyci'm co miich, Huindzin Dios, tudāḡy mguyduñ yi' m'ayuc.

Ca' huaad pinjaty ymína'ñip co ca' miich mguyduñ yi' m'ayuc.

⁵ Pen Dios cōmaybidzimipy müid ajt nbocy ycixpi', ¿nej tiy'ajt jadu'n nej jāy ymínaangixy co Dios ca' oy ytuñ, co xychaachytunim müid ajt nbocy ycixpi'? ⁶ Ca' yjadu'nity. Co ixypy yjadu'nity, Dios ca' y'i' tiydunipy naaxhuñy jāy müid ajcxyci'm ypcy ycixpi'.

⁷ Co ixypy ytiy'ajttity jadu'n nej jāy ymínaangixy co Dios ooy yjotcujcity co ca' xychaachytunipyich müid nbocyich ycixpi', jac'oy co ixypy ndundigooyich, jigix Dios janch ycōmaybidzimipy. ⁸ Jac'oy ixypy nmínaanim: "Tzoc tundigooyim jigix jēbi' Dios cōmay ypidzimipy." Ixti nijējity jāy ti xyñhuambetyich co ñich jadu'n ti nmína'ñich. Ca' jadu'n nmína'ñich co Dios jāy tzaachytunipy ninigoob. Dios chaachytunipy pocyjāy ajcxyci'm, com paatip ajcxyci'm jadu'n yi' tzaachyp'.

Nidüḡ'óciy ñich ajt nbocymüidity

⁹ ¿Nej janch jadu'n co ñich ajcxy huídibi judíoáy, jac'oyjáy ñich ajcxy ca'ydi yi jacjadyii jáy ajcxy? Ca' yjadu'nity, ca' ñich ajcxy njac'oyjáyity. Com ti jayijp nyaj'ixpicyich co tüg'óciy jáy ajcxy yajpaady pocymiid, yi judíoáy, etz nañ jadu'n jacjadyii jáy ajcxy. ¹⁰ Com jadu'n jaybety miñ ma Dios ñecy ma jadu'n ymina'ñ:

Ca' ji ni tüg jáy tudäcpy, ni tüg.

¹¹ Ca' ji ni pñ huídibi huinjihuüyb Dios ytiy'ajt. Ni pñ huídibi ixtaayb Dios ytiy'ajt.

¹² Nidüg'óciy jáy ti ixmajtzcixy Dios ytiy'ajt. Quipxy ycapxy ajcxy ytumyby co ytundigooygixy. Ca' ji ni pñ, pñ huädz oy yjot oy yhuinma'ñ tumb, ca' ji ni tüg.

¹³ Yi jáy ajcxy ooy ycapxtigooygixy, oy ajcxy yhuin'ñ mñd y'ayuc. Jadu'n ajcxy yöcpajc nipaady nej tüg öcpi jut huídibi ahuädz. Ooy ajcxy yajtzachüy mñd y'ayuc jadu'n nej jihuiy tza'ñ chüch.

¹⁴ Ooy ajcxy ycapxtigooygixy. Ooy ajcxy jibic ayuc capxcixy.

¹⁵ Mñd yinjaty huenjatypi ayuc, mic'amy ymügüg yaj'oc'cixy.

¹⁶ Ma ajcxy yhuidity ooy midundigooygixy ymügüg, e nañ yecy ajcxy tajin mayin.

¹⁷ Ca' ajcxy nejhuüygyx nej huaad chinaaygixy jotcuyc, ca' ma ti tzip ti capxy.

¹⁸ Ni cahuinmaaygixy nej Dios tzigüygixipy.

¹⁹ Tüg'óciy ayuc ycojaayity ma Dios ycötujcin necy, mic'ajt mñdpi mñd yi jáy ajcxy huídibi yajmij'ajtp je cötujcin. Dios ti pidägy yi' ycötujcin, jaydëbi pinjaty tundigooyb, huaad ca' ti anñ tuñ ma Dios. Dios ytiydunipy tüg'óciy jáy ajcxy mñd yi' ycötujcin. ²⁰ Dios ca' capxpada'ñ co ytudägyity, mñd co ti cuydunyii ycötujcin. Dios ti pidägy ycötujcin jaydëbi nejhuüyim co ajt nbocymidity.

Yi alma nüzoozin, hue' yajpaady mñd mibijcin

²¹ Jadachambi Dios xyajnejhuüyim jemybi tiy'ajt jadu'n nej tudägy'ajtin jëb nbaatim ma yi', e jada jemybi tudägy'ajtin tiy'ajt, ca' yi' yjadu'nity nej yi tiy'ajt huídibi yajpatp ma Dios ycötujcin jecy'ajtpyi. Per yi Dios y'ayucnajtzcapxüybi ñecy etz Dios ycötujcin necy yejc tiy'ajt jecy'ajty co Dios xymöhuuanim tudägy'ajtin. ²² Jadu'n Dios yaj'ahuimbidaangixy tudägy tüg'óciy jáy huídibi mibijcp Jesucristo, ca' ñejity pinjäy ajcxy, pen judíoáy o pen ca' judíoáy ajcxy.

²³ Com nidüg'óciy naaxhuiñyáy ti ytundigooygixy. Ni tüg jáy yhuädz'ajtin ycanaybadyii mñd Dios yhuädz'ajtin y'oy'ajtin. ²⁴ (Mñd co nidüg'óciy jáy ytundigooygixy), paady ycipi Dios mijmay'ajt mij'oy'ajt tuñ ninigoob mñd tüg'óciy jáy ajcxy, e Jesucristo ti cojuydäy tüg'óciy ajcxy ypocy, e jadu'n yaj'ahuimbity tudägy nidüg'óciy jáy ajcxy huídijaty mibijccixp Jesucristo.

²⁵ Dios yquejx y'ung ya naaxhuiñ, jaydëbi huinmeecxip jáy ajcxy ypocy, mñd co Jesucristo ti yögy mñd ajcxy ypocy ycipi. Dios yhuinmeecxip jáy ajcxy ypocy co ajcxy mibigipy Jesucristo. Jayijp ca'ni anajty Jesucristo miñ ya naaxhuiñ, Dios ooy mñmecxtujcy jáy ajcxy, ca' anajty mñdity jotcöduuyb jáy ajcxy ypocy. ²⁶ Jadachambi xñ tiempo Dios ti yaj'oyiy jadu'n nej jëb huinmeecxipy jáy ajcxy ypocy, e jadu'n yaj'ahuimbidity ajcxy tudägy ma yi' yhuindu. Jadu'n Dios tuñ jigix ñigüexigipy co Dios tudägy yi', e tudägy'adaamni yi', co cöbicy jáy, yi pinjaty mibijcp Jesucristo.

²⁷ ¿Ti huaad jáy ajcxy tungixy huídibi jëbi mñd ñaygömayiyb ma Dios? Ca' ni ti. ¿Na'amy co yjadu'nity? ¿Nej jëbi ajcxy ñaygömayiyb mñd co yajmij'ajtcixy Dios ycötujcin? Ca' yjadu'nity. Ca' huaad ñaygömáygixy ci'm, com Dios ti yaj'ahuimbity jáy ajcxy tudägy huídibi mijpidacp Jesús. ²⁸ Paady nmina'ñich

co jāy ajcxy y'ahuimbity tudāgy co ajcxy mibicy Jesucristo, e canan co janch ypaad jacuydungixy canaag cōtujcīn.

²⁹ ĶNej miich ajcxy mdiicixy Dios ytuñ mīd ac y'i'yī judíoĵāy ajcxy, e ca' jacmīd pīnjaty? Ca' yjadu'nity. Dios tuumb mīd janch nidūg'óciy jāy ajcxy. ³⁰ Ji tūgpajc Dios, e y'i' tū'ciy ytuñ mīd judíoĵāy, etz nañ jadu'n jacjadyī jāy ajcxy. Dios yaj'ahuimbijaayb tudāgy nidūg'óciy jāy ajcxy co ajcxy mibijcixy Jesucristo. ³¹ Co jadu'n nbaatim ndudāgy'ajtīn mīd co nmibijcīm Jesucristo, ca' nmīnaanīm Dios anajty y'i' ycōtujcīn je jecyīp nyajcōdigooyīm. Hue' janchtiy nīgi anajty nmic'ajtmooyīm Dios ycōtujcīn.

4

Je ijxpejt huidi Abraham yejc

¹ ĶNej n'ocmīnaanīm? ĶTi oybi ti paady ma Dios je Abraham iich ajt nmij'ap nmijteedy? ² Co ixyipy Dios Abraham tudāgy ti ixy, mīd co oybi ti tuñ, jēbi Abraham ixyipy űaygōmayīi. Per ca' huaad cī'm űaygōmayīi ma Dios. ³ Jadu'n jaybety ymīñ ma Dios űecy ma jadu'n ymīna'ñ: "Abraham ymijpidaaci Dios, e paady Dios jadu'n cōbijcy Abraham jadu'n nej tūg tudāgyjāy." ⁴ Je jāy huidibi ymuju'ñ patp mīd ytung ycixpi, jada meeñ huidibi ymuju'ñ'ajtpy ca' nīgoo űimōyīi, hue' tīm paatip jadu'n mīd ytung ycixpi. ⁵ Yi jāy huidibi ca' jījp'ixy co tudāgy'ajtīn pada'ñ ma Dios mīd oy'ajtīn ycixpi huidibi ytumyb, jēyī ymibijcipy ymijpidacpy co Dios yaj'ahuimbida'ñyī tudāgy. Yi jadu'mbi jāy tudāgy'ajtīn ypadamy mīd ymibijcīn ycixpi. ⁶ Jaybety ymīñ ma Dios űecy co je David jecy'ajty nīmīydacy tūg jāy huidibi ooy anajty jotcujc űayjihuīyī mīd co Dios ti y'ixyīi jadu'n nej jihuīy ytudāgyjāyity mīd ymibijcīn ycixpi, e ca' nmīnaanīm mīd oyjāy'ajtīn ycixpi huidibi ytumyb. ⁷ David jadu'n ymīnañ: Jotcujc je jāy ajcxy huidibi ypocy ti yhuīnmeccyīi, huidibi ypocy ti yajtigoyīi. ⁸ Jotcujc je jāy huidibi Dios cōbijcīp jadu'n nej jihuīy ca' ypocy ymīdity.

⁹ ĶNej janch tiy'ajt jadu'n co jada jotcujc'ajtīn huidibi David űīmīydac jecy'ajty, co ac yī judíoĵāy yī' ajcxy padaamb huidijaty mīd tiy'ajt ma űīnīcx co Dios yjāy'adyīi? Ca' yjadu'nity, yī jacjadyīi jāy nañ jadu'n yī' ajcxy pada'ñ jotcujc'ajtīn. Ti nmīnaangixyīch co Abraham ymibijci Dios, e Dios ycōbijci jadu'n nej jihuīy ytudāgyity. ¹⁰ ĶNej mdiy Dios ycōbijci Abraham jayījp ca' anajty yajtiy'ajttīyñi? o Ķti anajty yajtiy'ajttīy? Dios ycōbijc Abraham jadu'n nej jihuīy ytudāgyjāyity ca'ni anajty pidacy tiy'ajt ma űīnīcx co Dios yjāy'adyīi. ¹¹ Jayījp anajty Abraham ti mibicy Dios, e ti anajty Dios ycōbigyīi. Jac'axam Dios Abraham je cōtujcīn mooy co huen tiy'ajttīhuīpy y'ung etz y'ap y'oc. Je' je' ijxpejt'ajtp co Dios anajty jayījp ti ycōbigyīi jadu'n nej jihuīy ytudāgyjāyity, ca'ni anajty ymōyīi cōtujcīn. Co Dios jadu'n ytuñ mīd Abraham jadu'n nīpaady nej jihuīy Abraham nmijteedy'ajtm iich ajt nidūg'óciy huidibi cham mibijcp Jesús. ¹² Abraham nañ jadu'n űīmijteedy'ajtpy yī judíoĵāy huidibi mibijcp mīpidacp Dios tīm jadu'n nej yī' mibicy anajty Dios, jayījp ca'ni anajty mīdity tiy'ajt ma űīnīcx co Dios yjāy'adyīi. Jadu'n nīpaady nej jihuīy Abraham ca' nīmijteedy'aty yī judíoĵāy huidibi ca' mibicy Dios.

Je huidibi Dios ti xyaj'ahuanīyīm ti ycixy yca'px mīd je mibijcīn

¹³ Mīd co Abraham etz y'ap y'oc ymibijcipy ymijpidacpy anajty ajcxy Dios, e paady anajty Dios yaj'ahuimbidaānīgixy tudāgy, e paady Dios nīmāy Abraham co yī naaxhuīñybi yī' ajcxy je' adaanīp. Canan jadu'n ajcxy Dios

ñimayí co ymöhüáanigixy je naaxhuiñybi müid co anajty nidüg'óciy ajcxy ti cuydungixy Dios ycötujcín. ¹⁴ Co Abraham etz y'ap y'oc padaangixy je naaxhuiñybi huidibi yaj'ahuaniñyí, müid co ajcxy ti cuydundaayi Dios ycötujcín, paady naadigi'ajtp ixxy co nmibijcím co Dios xyaj'ahuimbidaaním tudägy. E nañ naadigi'ajtp ixxy co Dios je Abraham ñimay: "Je naaxhuiñybi müich je mje'adaaníp, com ti xymibicyich." ¹⁵ Je pinjaty mijpidaacp Dios ycötujcín je jecyí, Dios yí' tzaachytunaaníp, com ca' cuydundaaygixy. Pinjaty ca' müidity Dios ycötujcín huidibi jaybetyíp, ca' yí' midundigooygixy jadayaabi cötujcín.

¹⁶ Müid co Abraham anajty Dios ti mibicy, paady ycixpi Dios ñimaayi co je naaxhuiñybi yí' je'adaaníp. Jadu'n Dios may'ajt tuñ müid Abraham, jaydëbi tüg'óciy pinjaty mibijcp Dios, tím jadu'n nej Abraham mibijcy Dios, jëbi ajcxy paatcixy yí' oy'ajtin huidibi Dios yajñimay Abraham co möhua'ñ je oy'ajtin huidibi yegamyb ninigoobi. Dios ycuynunamyb yí' y'ayuc müid tüg'óciy jäy huidibi mibijcp Dios, tím jadu'n nej Abraham anajty mibicy Dios, canan yí'yi judíojäy ajcxy padam oy'ajtin, com Abraham ijxpejt yejc ma tüg'óciy jäy ajcxy. ¹⁷ Ma Dios yhuinduu jadu'n nipaady nej jihuüy Abraham ñich ajt nmij'ap'ajtim nmijteedy'ajtim nidüg'óciy huidibi mibijcp Dios, com Abraham nañ jadu'n ymibijcyp anajty Dios. Com jadu'n jaybety ymiññ ma Dios ñecy co Dios jecy'ajty jadu'n ñimay Abraham: "Ñich müich nyajñibijcyp co müich nmimij'ap'adamyb nmimijteedy'adamyb tüg'óciy je mayjäy huindunmybi naax huindunmybi cajp." E Dios ycuynunapy yí' y'ayuc com mic'ajt müid, ixti jaydëbi yajjugypigipy jadüg'oc jäy tiibi y'ó'ccixy. E nañ mic'ajt müid jaydëbi ane'min pidägy co huen yji'adipy hudijaty ca' ca'tni.

¹⁸ Müid co Dios anajty ti ñimäyí co ymüid'adamyb may y'ap y'oc, paady ycixpi Abraham ti jijp'ixy anajty co Sara anajty y'ung'ixa'ñ. Canaag jimijt anajty jajijp'ixy co huen y'ung paadip. Ti anajty tiempo ñajxni mina y'ung'ixipy. Hue' Abraham ymibijc hidibi anajty Dios ti yajñimäyí co yí' müid'idamyb may'amy y'ap y'oc. Paady ti ni'ap'aty ti nideedy'aty may'amy y'ap y'oc. ¹⁹ Abraham ti anajty ymic'ajt ycixni com ti anajty ymijäyiyñi. Ymüid anajty migo'px jimijt, e nañ yí' ytöxyjc Sara ni tüg anajty ti yca'ung'ixy, per Abraham yjacmibijcyp anajty co Dios cuyduna'ñ y'ayuc müid yí'. ²⁰ Abraham ca' anajty ixmach yí' ymibijcín jadu'n nej anajty Dios ymüidity ymic'ajt jaydëbi cuydunip yí'y'ayuc. Chi Abraham ñibaty capxpaty Dios. ²¹ Com Abraham ti anajty huinma'ñ ypidägy ma Dios co yí' ymüid ymic'ajt jaydëbi ycuynunay yí' y'ayuc hidibi yaj'ahuaniy. ²² Com Abraham ymijpidaacip anajty Dios y'ayuc, paady Dios anajty ti cöbicy Abraham, e jadu'n anajty ti yajnaxy nej jihuüy ytudägyjäyity.

²³ Dios ymoy Abraham jada y'ayuc hidibi jaybety, canan jëda'ajty Abraham yajmoy, nañ yajmoyday mayjäy. ²⁴ Nañ jadu'n jaybety miñ jada ayuc müid ñich ajt ycixpi. Dios nañ xycöbigaaním jadu'n nej jihuüy ajt ndudägyjäyity müid co nmibijcím Dios hidibi ti yajjugypijcy anajty jadüg'oc ajt nHuindzin Jesucristo. ²⁵ Dios ycíyeyc Jesús huen yaj'ögyí müid ajt nbocy ycixpi. E nañ Dios yajjugypijc Jesús jadüg'oc jaydëbi xyaj'ahuimbijtim tudägy ma Dios.

Je nej yhuimbizimni co Dios xycöbijcím tudägyjäy

5

¹ Müid co nmibijcím nmijpidaacím ajt nHuindzin Jesucristo, paady Dios ti xyaj'ahuimbijtim tudägy. E müid co Dios ti xyaj'ahuimbijtim tudägy, paady jotcujc n'ijtim müid Dios. ² Co nmibijcím nmijpidaacím Cristo, chi nbaatim

je may'ajt je oy'ajt huidibi Dios ytumyb müd ich ajt, e jadu'n oy n'ijtm müd Dios, ca' ma ti tzip. Nañ ooy njotcugüyım, müd co njjpp'ijxim co nbadaanım Dios y'oy'ajtin. ³ Canan jëda'ajty nmijotcuyc'ajtim co nbadaanım Dios y'oy'ajtin, nañ jadu'n tzoc mijotcuyc'ajtim ayo'n tzaachypi. Com nejhüyım co nminajxim nyajnajxim tzaachypi, huin'it jëbi nyajtunım mechtujcin. ⁴ E co nyajtunım mechtujcin, cömay najxim ma Dios, e co anajty cömay ti nnajxim, chi njjpp'ijxim co nbadaanım oy'ajtin ma Dios. ⁵ Com njjpp'ijxim co nbadaanım Dios y'oy'ajtin, chi ca' ndajım nmayım com Dios ti yi' yEspiritu Santo xy'adigüyım xyjottigüyım huidibi xyajnejhuüyım jadu'n nej Dios xychojcin xyjihüyım.

⁶ Jecy'ajty co anajty ca'ni Jesucristo ymiñ, je naaxhuiñjyäy ca' anajty mic'ajt müdity nej ci'm y'ahuimbijtcixipy tudägy. Co yhuaad'ajtni je xii je tiempo huidibi Dios ti yaj'ixtägy, huin'it Cristo y'o'cy müd ich ajt nbocy ycixpi müd co ndigooyım müd Dios ytiy'ajt. ⁷ Co ixypy n'ijxtaayım pinjaty codinähuiptüg jäy tudägy pi ma yi o'cin, ca' ni pin nbaatım. Co ixypy n'ijxtaayım pinjaty codinähuaamayb tüg jäy huidibi ooy ycömayıty ma yi o'cin, ca' yjegyıty co nbaatım tüg metz. ⁸ Per Dios yajniquëxıccyp jadu'n nej xychojcin xyjihüyım mijcajee co quejxy Cristo huen o'cy müd ajt nbocy ycixpi, oy anajty ich ajt ooy njacpocytuunım. ⁹ Cristo ti xyaj'ahuimbijtim tudägy co ñi'py ti temy ti yocy müd ajt nbocy ycixpi, e nañ Cristo nigi may'ajt tunañ müd ich ajt ycixpi co anajty xyajñdzögaanım ajt n'alma, jadu'n nej Dios tzaachytunañ naaxhuiñjyäy müd ajcxy ypocy ycixpi. ¹⁰ Co anajty ca' Cristo ymiñi ya naaxhuiñ, huin'it anajty nmidzip'ajtim Dios. Je tzip capxy ti Dios yaj'oyıy co quejxy y'ung ya naaxhuiñ, e y'o'cy müd ajt nbocy ycixpi. Müd co Cristo xycodinaayım ma yi o'cin, paady nigi xypubejtim xypudigüyım cham co yajpaady juugy. ¹¹ Canan jada'ajty co Jesucristo xyajñdzögaanım ajt n'alma, nañ jadu'n tzoc xondaacım müd co n'ijtm müd Dios, müd je may'ajt huidibi ajt nHuindzin Jesucristo ti tuñ müd ich ajt ycixpi co yaj'oyıy je tzip nej anajty Dios nmidzip'ajtim, jëbi jotcuyc n'ijtim müd Dios.

Adán etz Cristo

¹² Müd jada ycixpi co yi pocytunı chondacy jecy'ajty ya naaxhuiñ müd tügpi jäy. E co jäy ytundigoy oga'n müd Dios, paady ycixpi je o'cin ytiğıy ya naaxhuiñ. Müd co tüg'öciy jäy midundigooyıgy Dios, paady tüg'öciy jäy patcixy yi o'cin. ¹³ Janch tiy'ajt jadu'n co jäy ajcxy ytundigooyıy jecy'ajty jayıyp ca'ni anajty Dios yecy yi' ycötujcin cojaaybi, e co ca' jäy anajty ajcxy cötujcin müdity jecy'ajty, paady ca'pin tiyduñ ajcxy nej ajcxy ytundigooyıy. ¹⁴ Ca' ñejıty, oy ajcxy anajty ca' müdity Dios ycötujcin, nañ jadu'n y'o'ctay ajcxy, chondacy müd Adán, ixti yja'ty ma Moisés yxi ytiempo. Nañ o'ctay jäy ajcxy huidibi tigachajty tundigooyıy, ca' yjadu'nıty nej Adán oga'n ytundigooyıy. Ich ajt nninıcx ymiñ je jibicpi huidibi nbaatım ma Adán. Per ajt njemyjot njemyhuinmañ nbaatım ma Cristo.

¹⁵ Je pocytunı huidibi Adán yajtzondac, ca' naybadyı müd je tudägy'ajtin huidibi Dios ti xyñımooyım. Müd je pocytunı ycixpi huidibi tüg jäy ti yajtzondägy, tüg'öciy jäy öcin ti paady. Dios müd tüg yëdyıjc, je Jesucristo, mijmay'ajt tuñ müd jäy ajcxy ycixpi co yaj'ahuimbijtcixy tudägy, chi mayjäy tudägy'ajtin ti paady. ¹⁶ Per je tudägy'ajtin huidibi Dios xyñımooyım, ca' jadu'n naybadyı müd huidibi Adán ytuun. Müd co Adán ytundigoy tügtecy müd Dios, paady ycixpi mayjäy o'cin ti paady müd tüg pocy ycixpi. Müd co Dios ti xyñımooyım tudägy'ajtin müd Jesucristo, paady mayjäy tudägy'ajtin y'oy'ajtin

ti patcixy huudibi mibijcp Cristo. ¹⁷ Mïid co tüg jây capxycömidodacy Dios, paady tüg'óciy jây ti patcixy yi o'cin. Mïid co tüg jây, je Jesucristo, may'ajt oy'ajt tuñ co xyaj'ahuimbijtim tudägy, paady tüg'óciy jây ajcxy huudibi mibijcp Jesucristo ypadaangixyp jotcujc'ajtin etz nañ chinähuaangixy jüby tzajpjoty ma Jesús y'ane'my.

¹⁸ Mïid co tüg jây ytundigoy oga'n, paady nidüg'óciy je mayjây ypocycäy ajcxy, e patcixy yi o'cin. Nañ tim jadu'n mïid tüg jây huudibi ti chinây tudägy, Dios mayjây yaj'ahuimbijty ajcxy tudägy, e ti patcixy yjugy'ajtin huudibi ca' ycixipy ytigoyipy nimina xii. ¹⁹ Mïid co tüg jây capxycömidodacy Dios, paady tüg'óciy jây ti patcixy je pocy. Nañ mïid co tügpi jây capxymidoy Dios, paady je mayjây tudägy'ajtin ti patcixy huudibi mibijcpi Jesucristo.

²⁰ Co Dios moy jây ajcxy yi' ycötujcin huudibi cojaayip, chi nigï jây ajcxy nejhuüiygixy co ypocytungixy. Je may'ajt oy'ajt huudibi Dios ytumyb, nigï yi' y'oyity, ca'ydi je mijpocy huudibi jây ajcxy ytungixyp. ²¹ Tim jadu'n nej co jây ypocytungixy, huin'it ajcxy pocymïid chinaaygixy, ixti mabaad anajty y'óccixy mïid ypocy ycixpi. Nañ tim jadu'n co Dios may'ajt tuñ co yaj'ahuimbity jây ajcxy tudägy, huin'it Dios ane'my yi' ajcxy chinaayim mïid tudägy huinma'ñ, etz nañ xymöhuaanim jugy'ajtin huudibi ca' ycixipy ytigoyipy nimina, co nmijpidaacim ajt nHuindzin Jesucristo huudibi jugy'ajtin yejc mïid ajt nbocy ycixpi.

O'cy mïid yi' pocy ycixpi, jugy'aty mïid Cristo ycixpi

6

¹ ¿Nej n'ocmïaanim? ¿Tzoc ooy nigï tundigooyim jigix Dios nigï may'ajt tunipy mïid ñich ajt? ² Ca' jadu'n ytiy'ajtity, ca' huaad njacpocytuunim. Co nmibijcim Jesucristo, chi jadu'n nipaady nejhuüiy ti n'o'cim, e cham ca' n'ijtim pocymïid. ³ ¿Nej ca' mnejhuüiygixy jada tiy'ajt? Co nnübejtim mïid Jesucristo yxi, chi n'ijtim mïid Jesucristo. Jadu'n nipaady nej jihuüiy ti n'o'cim quipxy mïid Cristo co yi' y'o'cy mïid ajt nbocy ycixpi. ⁴ Co ñich ajt nnübejtim jadu'n nipaady nej jihuüiy ti n'o'cim, e ti nnaaxtigüiyim quipxy mïid Jesucristo. Dios Teedy mïid ymic'ajtin oybi yajjugypijcy Cristo co anajty ti y'ögy, chi Cristo paty jemybi jugy'ajtin, nañ jadu'n ñich ajt ti nbaatim jemybi jugy'ajtin quipxy mïid yi', paady copicy ndzinaayim mïid jemybi jot jemybi huinma'ñ.

⁵ Co nmibijcim Jesucristo, chi n'ijtim mïid yi', co yi' ti y'ögy, jadu'n nipaady nej jihuüiy ti n'o'cim quipxy mïid yi'. Co Jesucristo yjugypijcy mïid jemybi jugy'ajtin, nañ jadu'n ñich ajt nbaatim jemybi jugy'ajtin quipxy mïid yi'. ⁶ Nejhuüiyim ñich ajt nej anajty jibic-jot jibic-huinma'ñ nmïd'ajtim jayijp'aty ca'ni anajty nmibijcim. Jadu'n nipaady nej jihuüiy ajt njibicjot njibic-huinma'ñ ti y'ögy quipxy mïid Cristo co yi' y'o'cy cruudzixy. Cristo ti y'ögy mïid ajt nbocy ycixpi, jigix jëbi n'ijxmajtzim pocytunü huinma'ñ, etz jigix jëbi je pocytunü ca' xyjac'ane'mim ajt njot nhuinma'ñ. ⁷ Com pinjaty ti y'ögy, yi' ypocytunü ca' ti mic'ajt jacmüidity ma yjot yhuinma'ñ. ⁸ Pen jadu'n nipaady nej jihuüiy ti n'o'cim quipxy mïid Cristo, paady ndzinähuaanim njugy'adaanim quipxy mïid yi'. ⁹ Nejhuüiyim co Cristo ti yjugypijcy co y'o'cy, e ca' yi' y'öga'ñ jadüg'oc. Yi' o'cin ca' ti mic'ajt jacmüidity ma Jesucristo. ¹⁰ Co Cristo ti y'o'cy mïid jây ypocy ycixpi, chi y'ögy tüg tecypajc mïid nidüg'óciy jây ajcxy ycixpi. Co Jesucristo yjugypijcy, chi tüg'óciy huudibi yi' ytumyb ma yi' chinaydac yjugy'ajttac, yi' ytumyb mïid Dios ycixpi. ¹¹ Nañ jadu'n miich

ajcxý mhuinma'ñypidaaccix jadu'n nej jihuïy ti m'öccixy, e yi ypocytunü ca' ti mic'ajt jacmüidity ma miich ajcxý mdzinaayin. E jadachambi xü tiempo tzinaaygix müid Dios ycixpi quipxy müid Jesucristo ich ajt nHuindzin.

¹² Paady ycixpi ca' huaad xy'ane'ngixy je jibic-huinma'ñ huídibi ajcxý mninücx yjanijot'ajtpy. ¹³ Ca' huaad mgüeyecixy yí mninücx ma pocytnüü. Naygüeyécigix ma Dios, ixmajtzcx yí pocytnüü. Jadu'n nipaady nej jihuïy ti m'öccixy, e ti mjugypijcixy jadüg'oc. Hue' janchtiy cüeyecix yí mninücx ma Dios, jaydëbi mdzináaygixipy müid ajcxý tudägy mjot mhuinma'ñ, e cuydungix Dios chojcín. ¹⁴ Jadachambi xü tiempo ca' miich ajcxý mdzinaaygixy pocy müid, jadu'n nej jecy'ajty ajcxý mdzinaaygixy co anajty ajcxý mguydungixy Dios ycötujcín je jecyíp. Hue' janchtiy tzinaaygix müid Dios ycixpi, com Dios mij may'ajt ti tuñ müid miich ajcxý.

Tüg ijxpejt huídibi yajpatp ma n'ijtim yajtuñ

¹⁵ ¿Ti huaad nduunim? ¿Nej jëbi huaad njacpocytuunim? Com Dios mijmay'ajt ti tuñ co ti jöch ajt nbocy etz nxñhuin, e Dios ycötujcín, je jecyíp, ca' xyjacyajpocycáhuim. Ca' huaad njacpocytuunim. ¹⁶ ¿Mnejhuïyb miich ajcxý jada tiy'ajt? Co ixypy pinjaty ñaygüeyeyii co ytuna'ñ müid tüg huindzin huídibi mic yajtumb, copicy co je tumbi capxymidohuipy je yhuindzin. Nañ tim jadu'n nipaady müid pocytnüü. Pen mnaygüeyecíp müid pocytnüü, huin'it anajty pocy xy'ane'my ma mdzinaayin, ixti mabaad anajty m'ögy müid mbocy ycixpi. Co mnaygüeyécigixipy ma Dios, huin'it ajcxý mgapxymidohuipy Dios, e mdzináhuip ajcxý tudägy. ¹⁷ Jecy'ajty miich ajcxý anajty pocy xy'ane'ngixy, co jibic-huinma'ñ mdungixy. Nyajnaxpyich jáygidaacín ma Dios co jadachambi tiempo ti mgöbijcixy cixy jot huinijot Dios ytiy'ajt huídibi xyaj'ixpijccixp, e mgapxymidoogixy Dios. ¹⁸ Cristo ti xyaj'a'oyüiyi ajcxý mjot mhuinma'ñ, ca'ydí mjactzinaaygixy pocy müid. Ti mhuinma'ñ mbidaaccixy co mgapxymidohuaangixy Dios e mdzináhuuaangixy tudägy. ¹⁹ (Ngapxhuijpyich miich ajcxý cham müid naaxhuinüyüy y'ayuc ytiy'ajt, com ca' yajxon mhuinjihuïygixy Dios y'ayuc ytiy'ajt.) Jadu'n nej jecy'ajty co ca' anajty mmibijcixy Cristo, ooy anajty mnaygüeyécigixy xü ya ma jibic-huinma'ñ, e mdundigoogixy xü ya müid mninücx. Ooy miich anajty ajcxý müidity jibicpi ma mjot mhuinma'ñ, ooy anajty mdundigoogixy. Jadachambi xü tiempo naygüeyécigix ma Jesucristo, jigix jëbi huaad mdungixy müid tudägy jot tudägy huinma'ñ, etz jigix jëbi huaad mdzinaaygixy müid huädz jot huädz huinma'ñ.

²⁰ Co anajty yí jibic jot jibic-huinma'ñ xy'ane'ngixy, chi ca' je oyjot oyhuinma'ñ anajty xy'oc'ané'ngixñi. ²¹ ¿Ti jotcujc'ajtin miich ajcxý ti mbaatcixy co jibic jot jibic-huinma'ñ mdungixy huídibi jadachambi tiempo mdzöydu'n'ajtip ajcxý? Yí jibic jot jibic-huinma'ñ xyajjnicxp ajcxý ma yí o'cín. ²² Jadachambi xü tiempo Dios ti yaj'oyüy nej jëbi m'ixmajtzcxixpy yí pocytnüü, ca' huaad mjactzinaaygixy pocy müid. Ti m'ahuimbijtcixy Dios ytumbi, jadayaabi tzinaayin xymóhuip ajcxý mjotcujc'ajtin. Tiydudägy cham tzinaaygix müid Dios ycixpi, e mbaadip ajcxý jugy'ajtin huídibi ca' ycixipy ytigoyipy nimina. ²³ Yí pocytnüü ycoju'ñ yí je' yí o'cín. Per je huídibi Dios xyñimooyim, hue' je' je jugy'ajtin huídibi ni camínaxü ycixipy ytigoyipy co n'ijtim müid ajt nHuindzin Jesucristo.

7

Tüg ijxpejt huídibi yajpatp ma picychinaayin

¹ Miich ajcxy migügtjic huidibi ti m'ixpicy Dios ycötujcin huidibi Moisés yjaay, mnejhuuıyb miich ajcxy co yi naaxhuiñyäjy ycötujcin ymıd mic'ajt ma ajt ndzinaayin, ixti mabaad anajty n'o'cin. ² Paady co tüg töxyjäy ycivılbicy müd tüg yëydjic, ca' huaad ixmach ñäy mabaad china'y yjugy'aty. Co janchtiy anajty je töxyjäy ñiyëydjic ti y'öcni, huin'it anajty ca' ocmıdın ñäy y'ane'mın. ³ Ooy anajty mij ytundigoy je töxyjäy co ypıgıpy müd huingbi yëydjic pen jugy'ajtni je ñäy. Cooni janchtiy anajty ñiyëydjic ti y'ögy, huin'itni janchtiy jëbi ypıcy müd huingbi yëydjic, e ca'p je' anajty ytundigoy.

⁴ Miich ajcxy nmigügtjicich, judıojäy huidibi mıbijcp Cristo, jayıp co anajty ca'ni mmıbjccıxy Cristo, je Dios ycötujcin huidibi Moisés yjaay xy'ane'ngıxp anajty ma mdzinaayin. Jadachambi xıı tiempo yi jadu'mbi cötujcin ca' yi' xyjac'ané'ngıxni. Jadachambi Cristo ytiy'ajt xy'ane'ngıxp, je Cristo huidibi Dios yajjugypic jadüg'oc co y'o'cy. Jadu'n miich ajcxy nıpaady nej je töxyjäy huidibi ñiyëydjic ti y'ögy, e ti ypijctigach. Cristo miich ajcxy xyñıgohuajc'ajtp, jıgıx jëbi mdzinaayıgıxy müd Dios ycıxpi. ⁵ Jayıp ca'ni anajty nmıbjcım Jesucristo ooy anajty nguyduunım huidibi ajt nnıncx ñıjot'ajt. Je huin'it tiempo anajty je jıbic-huinma'ñ xy'ane'mım ma ajt ndzinaayin. Je' je' je jıbic-huinma'ñ huidibi Dios xycapx'adujcım müd ycötujcin. Müd co jıbic-huinma'ñ xy'ane'mım anajty ajt ma ndzinaayin etz xyajnicxaanım anajty ma yi o'cin. ⁶ Jadachambi xıı tiempo Dios ycötujcin huidibi Moisés xymooyım, ca' ti mic'ajt müdity ma ıch ajt, ti n'ixmajtzım. Jadu'n nıpaady nejıhuıy ti n'o'cin, e njugypıcım jadüg'oc. Paady nguyduunım je jemybi tiy'ajt huidibi je Espıritu Santo xyajnejhuıyım. Canan je' anajty nguyduunım je jecy'ajtpy cötujcin.

Je pocy huidibi ijtp ma ıch

⁷ ¿Nej n'ocmınaanım? ¿Nej janch co je cötujcin huidibi Moisés xymooyım xyajpocytuunım anajty? Ca' yjadu'nıty. Co ıxyıpy ca' anajty nmıdidyıch Moisés ycötujcin, ca' ıxyıpy ıch ti nnejhuıyıch co ti ndundıgooyıch ma Dios ytiy'ajt. Co ıxyıpy anajty ca' n'ocnejhuıyıch Moisés ycötujcin ma jadu'n ymınañ: "Ca' mmıgüg ni ti m'adzojıpy." Ti ıxyıpy ndundıgooyıch, e ca' ıxyıpy nejhuıyıch ma ti ndundıgooyıch. ⁸ Müd co ıch jecy'ajty ooy anajty nnıjot'atyıch pocytuıı, paady ycıxpi ıch anajty ooy ndundıgooyıch. E jadu'n anajty nıgi ooy n'adzocyıch, e jamınam anajty Dios ycötujcin co ca' migüg ni ti m'adzojıpy. Co ıxyıpy Dios ca' jadu'n cötujcin ti pidägy, ni ca' ıxyıpy njıhuı'nybıcyıch co ndundıgooyıch. ⁹ Jayıp co ca'ni anajty nhıjnıhuıyıch Dios ycötujcin, huin'it tiempo ca' anajty njıhuı'nybıcyıch nbocy. E co nbatyıch Dios ycötujcin, chi njıhuı'nybıcyıch nbocy, e nañ ti nejhuıyıch co tıgoyaamıch njugy'ajtnı. ¹⁰ Dios ypidac ycötujcin jaydëbi nbáadıbıch jugy'ajtnı huidibi ca' ycıxıpy ytıgoyıpy. Per ca' jadu'n ti oyıy müd ıch. Yi cötujcin ti xyajpocycäyıch anajty, e jadu'n tıgoyaambıch anajty njugy'ajtnı. ¹¹ Jadu'n anajty huınma'ñ nmıdidyıch co nguydundıhuaamybıch Dios ycötujcin huidibi Moisés yjajhuı'm. Pero com ca' nıjatyıch nej nguydundıhuıyıch, chi nbocycäyıch ma Dios. Je pocytuıı ti xyhuın'ıñıch, e müd je' ycıxpi nbadaamybıch anajty yi o'cin.

¹² Tüg'öcıy Dios yley etz Dios ycötujcin huidibi cojay ijtp, huädz yi', tudägy yi', ooy yi'. ¹³ ¿Nej tıgoyaambıch anajty njugy'ajtnı müd co anajty nmı'ityıch Dios oybi cötujcin? Ca' yjadu'nıty. ¿Nej je Dios ycötujcin je oybi ti huımbıdzımy jıbic müd ıch co xyajtıgoyaanıch anajty njugy'ajtnı? Ca' yjadu'nıty. Nıcxpıch anajty ma yi o'cin müd nbocyıch ycıxpi. Je Dios ycötujcin xyajnejhuıyıch co o'cin nbadaamybıch müd nbocyıch ycıxpi. Jadu'n Dios pidacy ycötujcin ya

naaxhuiñ, jigix jëbi jäy ajcxy nejhuiñhiipy co mij ajcxy ooy ytundigooy müid Dios.

¹⁴ Nejhuiñim co yi Dios ycötujcin huidibi Moisés xymooyim, jiiyby yi' chooñ ma Dios, paady yi' ooy y'oyity. ñich nninïcx yi' je' huidibi nijot'ajtp yi' pocytnüi, paady ndzinäyich pocymüid. ¹⁵ Ca' nhuiñhiuyich huidibi ndumybich. Yi' oybi huidibi njatunaamybich, ca' njatyich nej ndunipyich. Yi' jibicpi huidibi ca' y'oychojcnity, yi' ndumybich. ¹⁶ Co nduñich huidibi ca' ndzocyich, jadu'n niquëxigy co Dios ycötujcin ooy oy yi', tudägy yi'. ¹⁷ Canan jotcuje ñich jadu'n co nbocytuñich. Yi' pocy'adzojcin huidibi nmüidich ma njot nhuinma'ñ, yi' yi' xyajtundigooybich. ¹⁸ Nejhuiñyibich co ca' ti oybi yajpaady ma ñich nninïcx. Ooy njatzocyich co oybi njatuna'ñich, per ca' njatyich nej oybi ndunipyich. ¹⁹ Je oybi huidibi njatunaamybich, ca' njaty nej ndunipyich. Je jibicpi huidibi ca' ndzocyich, je' ndumybich. ²⁰ Co yi' nduñich huidibi ca' ndzocyich, yi' je' je' pocytnüi huidijaty njot'ajtibich nhuinma'ñ'ajtibich, yi' xyajtundigooybich.

²¹ Nbaatpich tüg tiy'ajt, co njatunaamybich oyhuinma'ñ, jiiyby jibicpi nbaadyich ma njot nhuinma'ñich. ²² Jotjoty huinma'ñyoty ooy nmixondägyich Dios ycötujcin. ²³ E nañ müidich jotjoty huinma'ñyoty yi' jibicpi huidibi mi'ixtinaayb je oybi. Yi' tundigoyi yajpatp ma ñich nninïcx. Yi' nninïcxich yajpatp pocymüid.

²⁴ Paady ca' njotcüjcygich. ¿Pin jëbi xyñihua'ñich xyajnidzögibich ma jadyaab nninïcxich huidibi xyajnicxpich ma yi' o'cin? ²⁵ Dioscojuyip nyajnajxypich ma Dios co Dios, müid ajt nHuindzin Jesucristo, xyñihuaanim ma jada jibicpi huidibi ajt nninïcx xyñi'jot'ajtim. Paady müid n'oyjot n'oyhuinma'ñ nguyduñich Dios ycötujcin. Müid nninïcxich nijot'atyich pocytnüi.

8

Je jugy'ajt müid je Dios yjihui'ñ ymic'ajt ycixpi

¹ Jadachambi tiempo janchtiy Dios ca' tzaachtuna'ñ yi' jäy ajcxy huidijaty tú'ciy ijtp müid Cristo Jesús, huidibi ajcxy cuydumb Espíritu Santo chojcin, e ca' ajcxy tungixy nej je ninïcx nijot'ajtcixy. ² Je Espíritu Santo ti xyayajpidzimim ma yi' pocytnüi etz ma yi' o'cin huidibi yi' jecy'ajty cötujcin ti xymooyim. Je Espíritu Santo xyajtinaayim huinixi, ñich ajt huidibi ijtp tú'ciy müid Jesucristo. ³ Müid co ñich ajt ooy ninïcx ñijot'aty jibicpi, paady Dios xymooyim ycötujcin jecy'ajty jaybety. Per je naaxhuiñyäj yajtigoy ajcxy je cötujcin ymajaa, e ca' ymadacy nicxy xyajtinaayim müid tudägy jot huinma'ñ. Paady Dios yquejxy yci'm'ung huidi ti chinäy ya naaxhuiñ müid ñinïcx jadu'n nej ñich ajt nmüidity nninïcx, jigix jëbi ndzinaayim müid huadz jot huinma'ñ. Jadu'n Dios y'ung chinay müid ninïcx, per ca' ni ti bocy anajty müidity. E yi' ti y'ögy müid ajt nbocy ycixpi, e jadu'n yajtigoy je pocy huidibi ajt ñigix'ajtim. ⁴ Jadu'n Dios ytuuñ jigix jëbi xyajtinaayim müid tudägyjot tudägyhuinma'ñ jadu'n nej yi' ycötujcin y'ane'my. Müid co nmüid'ajtim Dios yjihui'ñ ymic'ajt ma ajt njot nhuinma'ñ, paady jëbi huaad ndzinaayim müid tudägy-jot tudägy-huinma'ñ.

⁵ Yi' jäy ajcxy huidibi ca' müidity Dios yjihui'ñ ymic'ajt ma yjot yhuinma'ñ, hue' ajcxy ycapxymidooyb je jibicpi huidibi ajcxy ninïcx ñijot'ajtpy. Yi' jäy ajcxy huidibi tzinaayb müid Dios yjihui'ñ ymic'ajt ma yjot yhuinma'ñ, hue' ajcxy ycapxymidooyb je Espíritu Santo. ⁶ Yi' jäy ajcxy huidibi capxymidoob je jibicpi huidibi ajcxy ninïcx ñijot'ajtpy, hue' ajcxy ypadaangixyp o'cin. Yi' jäy ajcxy huidibi capxymidoob je Espíritu Santo, hue' ajcxy ypadaangixyp jugy'ajtin huidibi ca' ycixipy ytigoyipy, etz nañ ypadaangixyp jotcuje'ajtin. ⁷ Yi' jäy ajcxy

huidibi capxymidoob je jibicpi huidibi ajcxy ñinixc ñijot'ajtpy, hue' ajcxy Dios ymidzip'ajtpy, ca' capxymidohuaangixy Dios ycötujcin. Ni ca' jajtciy nej ajcxy capxymidooogixipy Dios ycötujcin. ⁸ Ca' Dios jäygidägy yi' ajcxy chinaayin huidibi ajcxy capxymidoob je jibicpi huidibi ajcxy ñinixc ñijot'ajtpy.

⁹ Per miich ajcxy ca' mgapxymidoogixy je jibicpi huidibi mninixc nitot'ajtpy. Com miich ajcxy mmid Dios yjihui'ñ ymic'ajt ma mjot mhuinma'ñ, e mguydungixpy je Espíritu Santo chojcin. Huenpinity huidibi ca' mhidity Cristo yjihui'ñ ymic'ajt ma yjot yhuinma'ñ, ca' yi' y'ity miid Cristo. ¹⁰ Pen miich ajcxy ijtp mid Cristo, yi' mjogy'ajtin ajcxy ca' ycixipy ytigoyipy nimina, mid co Cristo ti xyaj'ahuimbijtcixy tudägy ma Dios yhuinduu. Yi' mnaaxnixc cixamb tigoyamb yi'. ¹¹ Pen ijtp ma miich ajcxy mjot mhuinma'ñ je' yjihui'ñ ymic'ajt je' huidibi yajjuyypijc jadüg'oc je' Cristo co y'o'cy. Nañ jadu'n miich ajcxy Dios xyajjugypigaangixy jadüg'oc, co anajty ti m'öccixy, mid yi' yjihui'ñ ymic'ajt huidi yajpaatp ma miich ajcxy mjot mhuinma'ñ.

¹² Mid co nmid'ajtim Dios yjihui'ñ ymic'ajt paady ycixpi, miich ajcxy migütiyc, copicy ngapxymidoohuim je Espíritu Santo, e ca' huaad ngapxymidoohuim je jibicpi huidibi ajt mninixc ñijot'ajtpy. ¹³ Pen ooy ajcxy xytimy'ane'ngixy je jibicpi huidibi ajcxy mninixc ñijot'ajtpy, co m'öccixipy, yi' mjogy'ajtin cixip tigoyip yi'. Per pen mid Dios yjihui'ñ ymic'ajt miich ajcxy myajtigoy je jibicpi huidibi mninixc ñijot'ajtpy, co m'öccixipy, yi' mjogy'ajtin ajcxy ca' yi' ycixipy ytigoyipy.

¹⁴ Tüg'öciy pinjaty ajcxy capxymidoob je Espíritu Santo, Dios yi' ung'ajtip ajcxy. ¹⁵ Je Espíritu Santo huidibi miich ajcxy xy'adigüygyixp xyjottigüygyixp, ca' xychaachtungixy e nañ ni ca' mdzinähuaangixy mid tzigü'ñ jihui'ñ. Ca' miich ajcxy jadu'n paady nej tumbidijc huidibi ooy tzigüygyixy yhuindzin. Co je Espíritu Santo yajpaady ma ajcxy mjot mhuinma'ñ, jadu'n nipaady nejihuüy miich ajcxy Dios xy'ung'adyi. E com nmid'ajtim Dios yjihui'ñ ymic'ajt, je' jadu'n xyajminaanim: "¡Dios Teedy!" ¹⁶ Je Espíritu Santo tiy'ajt yejcp ma ajt njot nhuinma'ñ, je' jadu'n xyajminaanim co Dios xy'ung'ajtim. ¹⁷ Pen ñich ajt Dios xy'ung'ajtim, chi nbadaanim it lugar quipxyi mid Cristo jilby tzejpjoty ma Dios yajpaady. Pen nminajxim nyajnajxim tzaachypi jadu'n nej Cristo minajxy yajnajxy tzaachypi, chi nbadaanim Dios y'oy'ajtin quipxyi mid Cristo.

¹⁸ N'a'ixüybich co yi' tzaachypi yi' ayo'n huidibi nminajxim nyajnajxim ya naaxhuiñ, ca' yi' ytim ytiijity, ca' ninej yquipxyjatytyi je oy'ajtin etz mijjotcuyc'ajtin huidibi Dios xyaj'ixaanim je huin'it xii co Cristo anajty ymiñ jadüg'oc. ¹⁹ Tüg'öciy tijaty ya naaxhuiñ huidibi Dios ti yajcojy yaj'oyüy, y'aa'ijxy yjijp'ijxy ajcxy mina Dios ymöhuaangixy y'oy'ajtin ymiñ'ajtin yi' jäy ajcxy huidibi ajcxy Dios ung'ajtip. ²⁰ Tüg'öciy tijaty Dios ti yajcojy yaj'oyüy ya naaxhuiñ, hue' je' yjogy'ajtin cixamb tigoyamb, ögam tidzam. E canan ci'm jadu'n tzocy, hue' je' Dios jadu'n ti yajnogödugüy. Per ca' yjogy'ajtin ycixipy ytigoyipy tu'ciyi hue' ajcxy y'aa'ijxy yjijp'ijxy co padaangixy oy'ajtin jadüg'oc. ²¹ Co anajty Dios yaj'oyüy nej jébi ajcxy chinaaygixy, e ca' y'öccixipy, ca' ytützcixipy, etz ca' ypügixipy, chi ajcxy padaangixy oy'ajtin etz jotcuyc'ajtin quipxyi mid je jäy ajcxy huidibi Dios ung'ajtip. ²² Com nejhuüyim co ixti chambaad tüg'öciy huidijaty Dios yajcojy yaj'oyüy ya naaxhuiñ yjihuiñyb tzaachypi, e ca' yjotcuyc'ajtcixy. Tim jadu'n nipaady nej tüg töxyjäy paady tzaachypi co yhuaad'ajtni mina y'ung yajma'xung'ada'ñ. ²³ Canan yi' naaxhuiñybí huidi Dios yaj'oyüy yi'yi tzaachypi jihuiñyb, nañ jadu'n ñich ajt

huidijaty müd'ajtp Dios yjihui'ñ ymic'ajt, huidibi Dios xymooyim jayijp'aty ca'ni anajty nyajtigajtzim nnin'icx. Nañ ñich ajt tajim mayim njñyim nyaaxim ixti cooni anajty Dios xyajtigadzaanim ajt nnin'icx etz xycöbigaanim ma yi' y'it jüby tzajpjoty, e xymüd'idaanim ajt jadu'n nej yci'm'ung. ²⁴ Müd co n'aa'ijxim njijp'ijxim co Dios xyajnidzögaanim ajt n'alma, paady ti nbaatim jugy'ajtin huidibi ca' ycxipy ytigoyipy. Co ixypy ti nbaatim huidibi anajty njijp'ijxim, ca' ixypy njacjijp'ijxim co nbadaanimni. Com ca' pin jacjijp'ijxni co padaanip je huidibi ti ocpatpi. ²⁵ Per co njijp'ijxim co nbadaanim huidibi ca' nmüd'ajtim, huin'it n'ahuixim müd mecxtujcin cooni nbaatim.

²⁶ Tim jadu'n nej jotcuje'ajtin nbadaanim co njijp'ijxim huidibi Dios xymöhuuanim, nañ tim jadu'n je Espiritu Santo xypubejtim xypudigiyim co njotmetzciyim, com ca' najatim nej jëbi huaad Dios nmibijctzoohuim nej ypadyii. Paady je Espiritu Santo xycodinaayim ma Dios, ymibijctzooyb je Dios mictägy müd ñich ajt ycxipi müd jñy'in yaaxin, huidi ca' huaad yajcapxpädzimy müd müydacin. ²⁷ Dios ñejhuuyb ti jot ti huinma'ñ jäy ajcxy ymüd. E Dios nañ huinjihuuyb tüg'öciy ayuc huidibi je Espiritu Santo yajnajxyp ma yi'. Je Espiritu Santo ypijctzooyb may'ajt jabom jabom ma Dios müd tüg'öciy je mibijcpidijc ycxipi. Nañ jadu'n pijctzoy jadu'n nej Dios tzocy jäygidägy.

Mij madaacin ma mibijcin

²⁸ Yi jäy ajcxy huidibi mijpidacp Dios, huidibi ajcxy Dios ti huin'ixy, jëbi chinaaygixy jadu'n nej Dios jäygidägy ajcxy chinaayin. Nejhuyim co huentimtiijity huidibi yi' ajcxy yminajxpy yajnajxpy, pen jibicpi o pen oybi, Dios jadu'n ti a'ixiy co huen minajxcixy yajnajxcixy müd yi' ajcxy y'oy'ajtin ycxipi. ²⁹ Je' yi' ajcxy huidibi Dios ti yhuin'ixy, je' yi' ajcxy huidibi Dios ñejhuuy jayijpni co ymibiga'nyii y'ayuc. Dios jadu'n tumb ma yi' ajcxy yjot yhuinma'ñ jaydëbi yquipxyjatyty ajcxy yjot yhuinma'ñ müd Dios y'ung, jadu'n nej yi' yjot yhuinma'ñ müdity. ³⁰ Yi mayjäy huidibi Dios yajnijödugiy ca'ni anajty naaxhuiñybi chondacy co ytuna'ñ müd yi', yi' ajcxy Dios huin'ijxi. Yi mayjäy huidibi Dios ti yhuin'ijxigixy, nañ Dios yi' ajcxy yaj'ahuimbijtip tudägy. E yi mayjäy huidibi Dios ti yaj'ahuimbity tudägy, nañ Dios yi' yajquipxyjatythuaanip ajcxy y'oy'ajtin müd yi' y'ung y'oy'ajtin.

³¹ ¿Ti jada' njacjijp'ijxim ti jada' njactzojcin? Ca' ni ti. Pen Dios ñich ajt xypubejtim xypudigiyim, ¿pin ñich ajt jëbi xymimadaacim? Janch ni ca pin. ³² Dios ixti yci'm'ung ti yecy müd ñich ajt ycxipi, co oy y'ocy müd ñich ajt ycxipi, co oy y'ocy ma yi cruud müd nidüg'öciy ajt nbocy ycxipi. Paady janch janch co Dios xymöhuuanim tüg'öciy oybi quipxyjaty müd yi' y'ung, Jesucristo.

³³ ¿Pin jada' jëbi ocxiy je jäy ajcxy huidibi Dios ti huin'ixy? Ca' ni pin. Com Dios ci'm yi' ti yaj'ahuimbijttäy tudägy. ³⁴ ¿Pin yi' ajcxy jëbi ocyajpocycäy? Ca' ni pin. Com Cristo o'c je' müd ajt nbocy ycxipi, etz yjugypijcy jadüg'oc, e jadachambi xii tiempo yajpaady a'oy'amy ma Dios ymijc, e yi' ane'mdaayb tüg'öciy. E Cristo ñich ajt xynibijctzohuyim, ypijctzooyb may'ajt ma Dios müd ñich ajt ycxipi. ³⁵ Com Cristo ooy xychojcin xyjihuyim, paady ni nej ca' xy'ixmadzaanim. Huen ti ndimpaatim ca' xy'ixmadzaanim. Oy ixypy tzaachyp i ayo'n nminajxim nyajnajxim, oy ixypy tajin mayin nbaatim; oy ixypy jäy xy'ixhuidijtim xypahuidijtim; oy ixypy yuu ayo'n nbaatim; oy ixypy huit tucxy nyajmayajtim; oy ixypy tzi'ñ nyajnajxim; oy ixypy jäy xytymyayj'o'cim. Oy ti ayo'n ndimbaatim, Cristo ca' xy'ixmadzaanim. ³⁶ Com jadu'n ymiñ jaybety ma Dios ñecy ma jadu'n ymiñañ:

Miid miich, Huindzin Dios ycixpi, je nmidzipich xyjatytimyyaj'ögaambich xim tzuum. Jadu'n ich ajcxy nej cöbixy huidibi yajnicxip ma yaj'öctac co yaj'öga'ñyii.

³⁷ Ca' ti ayo'n nbadaanim. Nmimadactähuaanim tüg'óciy ayo'n, miid co Cristo xychojcm xyjihuiyim. ³⁸⁻³⁹ Janch nejhuiybich tiydudägy co Dios xychojcm xyjihuiyim. Ca' ji ni pin jëbi huaad xypijc-huäcxim ma Dios chójcin, oy ixypy nja'o'cim; oy ixypy njajugy'ajtim; oy ixypy xymidzip'ajtim ángel ajcxy etz jacjadyii huidibi mic'ajt miid jilby tzajpjoty. Ca' ajcxy jëbi huaad xypijc-huäcxim ma Dios, ni ti huidibi ji ijtp cham, ni je huidibi mimb cidacp, ni yi' jëbi xycapijc-huäcxim ma Dios chojcin. Ajt nHuindzin Jesucristo ti xyajnejhuiyim jadu'n nej Dios xchojcm xyjihuiyim co y'o'cy ma yi' cruudz miid ajt nbocy ycixpi.

9

Dios ti huin'ixy yi Israel jäy ajcxy

¹⁻² Nmüidich je Cristo ytiy'ajt, nyajnijayiybich miich ajcxy yi' ytiy'ajt, ca' n'indägyich, co ooy ndajy nmayich miid n'amigügtjicich ycixpi je Israel jäy co ajcxy ca' cöbiga'ñ je Cristo. Nañ Dios yjihui'ñ, je Espíritu Santo, tiy'ajt yejcp ma ich njoj nhuinma'ñ co jadu'n tajin mayin njihuiyich miid yi' ajcxy ycixpi. ³ Com tajy may najihuiyijich miid ich n'amigügtjic, ich nmigogajp, ixti njaccodinähuaamybich ajcxy ma Dios miid ypocy ycixpi, ixti jëbi ixypy Cristo nja'ixmachich miid yi' ajcxy ycixpi, ixti jëbi ixypy Dios xychaachytuñich miid yi' ajcxy ypocy ycixpi, co ixypy jëbi Dios pocyhuinmecxy ajcxy. ⁴ Com hue' je' ajcxy Israel y'ap'ajtip y'oc'ajtip, Israel jäy ajcxy. Hue' anajty ajcxy Dios ti ycöbigyii jadu'n nej jihuiy yci'm'ung, Dios anajty ajcxy ti ñi'ijxcidägyii, y'ijx ajcxy Dios y'oy'ajtin. Dios nimay ajcxy co ycuend'adip. Dios ajcxy jadu'n yajni'ixiyi nidüg'óciy tiy'ajt nej ajcxy jëbi huaad Dios huindzigiy, e Dios yajhuinhuanüy Israel jäy ajcxy je Cristo. ⁵ Nañ hue' ajcxy ymi'ap'ajtip ymi'jteedy'ajtip ich ajt nmij'ap nmijteedy; je Abraham, Jacob, etz David, e ma je' ymiñ ajcxy, ji ymiñ je Cristo, e je' je' Dios ajtp, yi' tüg'óciy ane'mdaayb jilby tzajpjoty etz ya naaxhuiñ. Je Cristo capxpaady y'idipy huinixii.

⁶ Co jadu'n mina'ñich co may ajcxy Israel jäy ca' ajcxy Dios yjäy'adyii tiydudägyi, ca' jadu'n mina'na'ñich co Dios ca' cuyduñ yi' y'ayuc huidibi yajhuinhuanüy Abraham etz Moisés. ⁷ Canan nidüg'óciy Abraham y'ap y'oc pada'ñ je oy'ajt huidibi yajhuinhuanüy Abraham, com jadu'n yjaybetyity ma Dios ñecy. Dios jadu'n nimay Abraham: "Yi mmang, Isaac, ti nhuin'ixyich jëbi y'ap y'oc paady je oy'ajt huidibi ti nyajhuinhuanüy." ⁸ Co Dios jadu'n nimay Abraham, paady ycixpi nejhuiyim co ca' nidüg'óciy Abraham y'ap y'oc jëbi naydijyii Dios y'ung. Jëyi Isaac y'ap y'oc jëbi ñaydijyii Dios y'ung com Dios yajhuinhuanüy co may'ajt tuna'ñ miid yi' ajcxy. ⁹ Com jadu'n yjaybetyity ma Dios ñecy co Dios nimay Abraham: "Nihuibidaamybich ma je tiempo huidibi ti n'agapxtucyich, e huin'it mdöxyijc Sara y'ungbaadip."

¹⁰ Ji jadüg tiy'ajt. Ich ajt nmij'ap Isaac ytöxyijc Rebeca metz ymang paty. ¹¹ Dios yhuin'ijx je jacmutzpi ca'ni anajty yma'xung'aty, e ca'ni anajty ñiguëxygi ti huinma'ñ miid, oyhuinma'ñ o jibic-huinma'ñ. Dios ninigoob anajty jayijpni ti huin'ixy je jacmutzpi. ¹² Com Dios nimay je Rebeca co je jacmutzpi y'ane'mamyb y'ajch ma ca'ni anajty Jacob yma'xung'atyñi. ¹³ Tim jadu'n nej jaybety ymiñ ma Dios ñecy, Dios jadu'n mina'ñ: "Jac nigi ti ndzocyich Jacob, ca'ydi Esau."

14 ¿Nej n'ocminaanim? ¿Dios ca' tiiybi tuñyi? Ca' yjadu'nity. Dios tiydudägy ytuñ. 15 Com jadu'n Dios nimay Moisés: "Nba'ayohuipiyich ninigoobi pinjaty ndzocpyich." 16 Co Dios jadu'n nimay Moisés paady nejhuiyim co canan paady ycixpi Dios pa'ayohua'ñ jay miid co ajcxy chachñaymija'ljxigixy co tunaangixy oyhuinma'ñ. Hue' je' Dios pa'ayo'n tuñ miid jäy ajcxy ninigoob co jadu'n tzocy. 17 Com jadu'n jaybety ymiñ ma Dios ñecy co Dios jadu'n nimay je Egipto rey:

ñich miich ti nmöy m'ane'min, jigix jëbi jäy ajcxy ixipy je mij ayo'n huidibi ndunaamybich ma miich mnaax mgajp, huin'it jäy ajcxy capxpaady xyaj'idipy huindu'ñybi ñaaxhuiñ.

18 Dios ypa'ayooyb je' pinjaty chojcpy, e nañ jadu'n yjot yajjuuni pin jadu'n yajmidzocpy.

19 Huin'it miich ajcxy xyñimähuibich: "Peni janch yjadu'nity, ¿ti co Dios jadu'n jadüg'oc pocy'ixy jäy? ¿Pin jada' occapxhuimbidi nej yi' tzocy?"

20 Miich jäy, ¿mbin miich co ti myajcapxycyoja'ñ myaj'ayuccoja'ñ miid Dios? ¿Nej jëbi pochytudz nimäy je pin anajty ti yajcojyit? "¿Nej co jadu'n ti xyajcojyich?" 21 Tüdzycyojpi yi' yaj'oyiib je mo'ntz nej tim tzocy. Pen yajcojamyb tüdz oybi tzoajatypi, yajcojpy je'. Peni yajcojamyb tüdz huidibi ca' oyjatyity, yajcojpy je'.

22-24 Tim jadu'n nej je tüdzycyojpi yaj'oyiib mo'ntz nej tzocy, nañ jadu'n Dios tuñ miid jäy nej tzocy. Dios ti yajcojy jäy, e miid ymic'ajt jëb tzaachytuñ miid ypocy ycixpi. E co jadu'n tzaachytunipy, chi ñiguëxigipy yi' ymic'ajt. Dios ooy jecy ti jamimecxtucy ajcxy huidibi paatip co Dios chaachytuniyb ajcxy. Com Dios ti yajcojy jäy paady jëb nañ jadu'n pa'ayohuipiy etz may'ajt tunipy miid yi' ajcxy, jëbi ajcxy paadip yi' y'oy'ajtin. Dios ñich ajt ti xyhuin'ijxim nijëjity judíojäy, etz nijëjity huidibi ca' yjudíojäyity, jëbi ajt n'alma nïdzocin paady.

25 Com jadu'n jaybety ymiñ ma Oseas ñecy ma Dios jadu'n yminañ:

Yi jäy ajcxy huidibi ñich ca' anajty njäy'adyii, njäy'adäänibich cham. Yi jäy huidibi ca' anajty ndzocyich, ndzogäänibich cham.

26 E nañ jadu'n jadüg'it Oseas cojay: "E je jäy ajcxy huidibi anajty tzinaayb ma canaag naax cajp huidibi anajty ca' Dios yjäy'adyii, jëb ñaydijyii Dios yjäy, je Dios huidibi huinixi tzinaayb."

27 Nañ jotmay miid co Isaias jada tiy'ajt ycojay ma ñecy ma jadu'n yminañ: "Oy ixipy ajcxy ti yjamayiy jadu'n nej tzaa'ung yajpaady ma mejy ypa', nihueñ ajcxy y'alma nïdzocin pada'ñ. 28 Com Dios mic' ooy cötujcin miidity, e ca' mimecxtugipy jäy ajcxy ypocytunih huinixi. E mic'amy tzaachypi möhua'ñ naaxhuinyjy miid ypocy ycixpi co anajty xi tiempo paatni mabaad agapxtujcy." 29 Isaias ñajtzcapxiy jadu'n jecy'ajty:

Pen ca' ixipy je Huindzin Dios huidibi ane'mdaayb jilby tzajpjoty etz ya naaxhuiñ, capubejty yi' Israel jäy, co ca' ycajacyajtzocin nijëjity ajcxy, ycacödigoyday yi' ajcxy, tim jadu'n nej je jäy ajcxy yjajty jim ma Sodomo cajp etz Gomorra cajp, cödigoyday ajcxy.

Yi judíojäy ajcxy etz Jesucristo y'ayuc ytiy'ajt

30 Jadu'n jëbi mhuinjihuixigixy huidibi ti nyajnijayiygixy jadu'n nej Dios ytun miid jäy ajcxy. Yi jäy ajcxy huidibi ca' yjudíojäyity, huidibi ca' cuyduñ Dios ycötujcin je jecyip, co ajcxy mijpidägy je Cristo, chi ajcxy paady tudägy'ajtin ma Dios. 31 Per yi judíojäy ajcxy huidibi jip'ijxp co tudägy'ajtin padaangixy miid co tzachcuydungixy Dios ycötujcin je jecyip, ni ca' ajcxy mimadägy cuydundähuiy, e ca' ajcxy tudägy'ajtin paady ma Dios. 32 ¿Na'amy

co ca' ajcxy mĩmadägy cuydundäy Dios cõtujcĩn? Je' co ajcxy ca' mijpidägy huidibi Dios ti tuñ mĩd yi' ajcxy ycixpi. Hue' ajcxy tijy co tudägy'ajtĩn padaangixy ma Dios mĩd co tzachcuydungixy Dios ycõtujcĩn je jecyĩp. Hue' ajcxy ayo'n ypadamyb co ca' Cristo cõbĩjccixy, tĩm jadu'n nej jäy ayo'n paady co ycõnepy ma tũg tzaa. ³³ Com jadu'n jaybety ymiñ ma Dios ñecy, ma Dios jadu'n ymiñ:

Nguexaamybich jim Jerusalén tũg jäy. Mayjäy ca' mijpidäga'ñ je jäy, e ayo'n ajcxy ypadamyb ma ñch. Tĩm jadu'n nej ixipy ti nbĩdägy'ich tũg tzaa ma jäy ajcxy huaad ycõnejpcixy, e chi yciday ajcxy. Tũg'õciy jäy pinjaty mijpidaacp je jäy huidibi nbĩdägaamybich jim Jerusalén, hue' ajcxy yi' ca' ayo'n pada'ñ ma ñch, nbocyhuinmexaamybich yi' ajcxy.

10

¹ Miich ajcxy nmĩgũgtijcich, ooy ndzocy'ich cixygot huinijot co yi' Israel jäy nidũg'õciy pada'ñ y'alma ñdzooçĩn. Ooy ñch nũgi Dios nmibĩjctzoy mĩd yi' ajcxy ycixpi. ² Jēbi ndiy'ajt yecy'ich co yi' Israel jäy ooy ajcxy Dios jayajmij'ajtcixy. Hue' janchtiy ca' ajcxy huinjihuĩyi Dios ytiy'ajt. ³ Com ne-jhuĩyb ajcxy co Dios yajpocyñĩhuädzamyb jäy ajcxy, hue' ajcxy ca' huinjihuĩy nej Dios yhuinma'ñ mĩdity. Cĩ'm anajty chachhuinma'ñ ixtaaygixy nej ajcxy jēbi ñayajpocyñĩhuädzigixipy. Ca' anajty ajcxy cõbicy Dios ytiy'ajt nej jēbi huaad ñayajpocyñĩhuädziyb.

⁴⁻⁵ Yi judĩojäy ajcxy ca' huinjihuĩygyixy co je Cristo y'oy ya naaxhuĩñ, e chi yajtigooyi Dios ycõtujcĩn ymic'ajt huidibi Moisés yjaj, jigix jēbi tũg'õciy jäy pinjaty mijpidacp Cristo ytiy'ajt, huin'it ajcxy paadip tudägy'ajtĩn. Moisés yjayhu'i'm ma jadu'n ymiñ: "Je pinjaty cuydumb je Dios ytiy'ajt, jim mic'ajt paadipy mĩd chinaayĩn ycixpi." ⁶⁻⁷ Per yi' jäy ajcxy huidibi mijpidaacp Cristo etz cuyduni yi' ytiy'ajt, yi' ajcxy ymiñ: "Ca' huaad judĩojäy ajcxy ymiñangixy jotjoty huinma'ñyoty: ¿Pin ocpättigĩhuip tzajpjoty nicx je Cristo yajtzoõñ? o ¿Pin nicxamb ca'oydactuuby ma ajcxy õcpĩdjic y'ity e yajjugypigaanip je Cristo?" ⁸ ¿Nej Dios y'ayuc ymiñ? Jadu'n Dios y'ayuc ymiñ: "Ti mmĩdoy miich ajcxy Dios y'ayuc ytiy'ajt ma mgi'm'ayuc, ti jäy ajcxy capxhuäçy ma miich, ti mmĩd'ombĩjccixy." Pues jada je' je y'ayuc tiy'ajt nej jēb mijpidaaccixy Cristo, huidibi tiy'ajt ñch ajcxy ngapxhuäçp. ⁹ Pen miich mgapxypidzimyb mayjäy agujc co miich ajcxy Jesús mHuindzin'adyi, etz mmibĩjcpjy ajcxy ma mjot mhuinma'ñ co Dios ti yajjugypijcy Jesús co y'o'cy, huin'it m'alma paadip ñdzooçĩn ma Dios. ¹⁰ Co mmijpidägipy Jesús cixygot huinijot huin'it Dios xyajpocyñĩhuädziy. Co mgapxypidzimipy mayjäy agujc co miich mijpidägy Cristo Jesús, huin'it yi' m'alma ñdzooçĩn pada'ñ.

¹¹ Com jaybety jadu'n miñ ma Dios ñecy, ma jadu'n ymiñ: "Nidũg'õciy jäy huidijaty mijpidacp je Cristo, ca' ajcxy ayo'n pada'ñ ma Dios." ¹² Jēbi nidũg'õciy jäy mijpidägy je Cristo Jesús com Dios tú'ciy yajhuinhuanĩy pocyñĩhuaatzĩn ma yi' judĩojäy etz ma huidi ca' yjudĩojäyity. Ji tũg Huindzin je Jesucristo huidibi niHuindzin'ajttaayb. Jesucristo may'ajt oy'ajt tunam mĩcajee mĩd huentĩpinjãyity pinjaty piçzoob pubejtĩn ma Dios mĩd yi' yxi. ¹³ Com jadu'n jaybety ymiñ ma Dios ñecy, ma jadu'n ymiñ: "Nidũg'õciy jäy pinjaty Dios mibĩjctzoob mĩd Huindzin Jesucristo yxi, yi' ajcxy y'alma paadip ñdzooçĩn." ¹⁴ ¿Nej jēbi jäy ajcxy occohuanĩy Jesucristo co huen y'alma ñdzõgy, pen ca' anajty ti mibĩjci je ytiy'ajt? Pues ca' yjadu'nity. ¿Nej jēbi jäy mibicy Jesucristo peni ca'ni ajcxy amĩd'ijti y'ayuc? Pues ca'

yjadu'nity. ¿Nej jëbi jäy ajcxy midoogixy Jesucristo y'ayuc, pen ca' pin capxhuäcxy ma yí' ajcxy? ¹⁵ ¿Nej jëbi jäy ajcxy capxhuäcxy Jesucristo y'ayuc ytiy'ajt, pen ca' pin yquexyii ayuccapxhuäcxi? Com jaybety jadu'n ymiñ ma Dios ñecy, ma jadu'n ymíñañ: “Ooy oy jäy ñayjihuiyíi co pinjaty mimimb mija'tp oybi tiy'ajt, pinjaty capxhuäcxi oybi tiy'ajt ma yí' ajcxy.”

¹⁶ Per ca' nidüg'ócíy jäy mibicy je oybi tiy'ajt, com Isaías jadu'n cojay ma ñecy ma jadu'n ymíñañ: “Huindzin Dios, ¿pin ti mijpidägy ñich ajcxy n'ayuc?”

¹⁷ Cooni jäy ajcxy capxhuäcxy Jesucristo ytiy'ajt ma jäy chinaaygixy, huin'it ajcxy ymibijccixy com ti amido'ijtcixy je tiy'ajt.

¹⁸ Per n'amidooybich miich ajcxy: ¿Nej ca' jada' yí judíojäy ajcxy midoy Dios ytiy'ajt? Janch jadu'n ti ajcxy jamidoy, com jaybety jadu'n ymiñ ma Dios ñecy ma jadu'n ymíñañ:

Ti capxhuäcxy ajcxy Dios y'ayuc ytiy'ajt huindu'mybi naaxhuiñ. Ti ajcxy Dios y'ayuc midodaayi huindu'mybi naaxhuiñ.

¹⁹ Jadüg'oc n'amidoogixy: ¿Nej ca' Israel jäy jada' ajcxy nejhuüy Dios ytiy'ajt? Ñejhuüyb ajcxy. Com jecy'ajty Moisés ycojay ma ñecy ma Dios jadu'n ymíñañ: Nyajpocynñhuaatztähuibyich yí jäy ajcxy huídibi ca' ñich njäy'adyii, e huin'it miich ajcxy cohuindoyii mjihuñhuipy m'id yí' ajcxy ycixpi. Ndunipyich may'ajt m'id yí' ajcxy, e huin'it miich yí' ajcxy mmijotmädiip.

²⁰ Jadu'n jadüg'it Isaías cojay ma yí' ñecy, ma Dios jadu'n ymíñañ:

Yí jäy ajcxy huídibi ca' xy'ixtäyich, ti xypaadyich ajcxy. Ti nyajnigüëxígyich ndiy'ajt ma yí' jäy huídibi ca' xyñidiy xyajtyyich.

²¹ Com jadu'n jaybety ymiñ ma Dios ñecy, ma Dios jadu'n nigapxy yí Israel jäy co jadu'n ymíñañ:

Jabom jabom ti njamimecxtucyich yí Israel jäy ajcxy. Ti njayajnimäyich ñich ndiy'ajt, e ca' ajcxy mijpidägy. Hue' ajcxy ca' xycapxymidooyich, xymijotmij'öcpich ajcxy.

11

Yí Israel jäy ajcxy huídibi ti ypocynñhuaatzcixy

¹ Paady n'amidoogixy: ¿Nej ti jada' Dios ix'ixjni ixtijni yí Israel jäy ajcxy? Pues ca' yjadu'nity, Dios ca' yí' ixmachñi Israel jäy ajcxy. Com nañ Israel jäy ñich. Abraham nmij'ap'ájtibich nmijteedy'ájtibich e nañ jim ngogájpídyich ma anajty Benjamín ycogajpity. ²⁻³ Dios ca' ixmach yí' yjäy huídibi yhuin'ix jecy'ajty co jäy'ada'ñyíi jigix jëbi may'ajt oy'ajt tunipy m'id yí' ajcxy. ¿Nej ca' ajcxy mnejhuüy nej jaybety ymiñ ma Dios ñecy jadu'n nej Elías nigapxy yí Israel jäy ma Dios? Jadu'n ymíñañ:

Huindzin Dios, ti yí Israel jäy ajcxy yaj'öctäy huídibi anajty miich m'ayuc xycapxhuäcxi. Ti ajcxy yajhuindigoydäy je tzaa macxy ma anajty jäy xyhuindzigíy. Naydügpajc ñich ti njachui'myich njaccapxhuäcxyich miich m'ayuc, e nañ xyaj'ögaamich jäy ajcxy.

⁴ E chi Dios y'adzooy nimay Elías:

Ca' mim naydügity, ji ñich ahuing nmídidyich yujcpiy jahuixtujc mil yëdyic huídí xy'ojadajtpich xyhuindzigíyibich chambaad, huídibi ca'ni huin-goxtinäy yí Baal, yí dios falso, ca'pi ti mic'ajt müdity ni ti tzöc'ajt ca müdity.

⁵ Tim jadu'n nej Dios müdity anajty huixtujc mil yëdyictijc jecy'ajty co anajty Elías yjugy'aty, nañ tim jadu'n cham ma ñich ajt nxii ndiempo Dios müd

nijëjity judíoäy huidibi ti pa'ayoy, e paady ycixpi ti yhuin'ixyii jëbi yi' jäy'adyii. ⁶ Com co ixypy ajcxy yajxon cuyduni Dios ycötujcin, ca'p ni ti pa'ayo'n Dios jactunaani müid yi' ajcxy, com co ti anajty jim Dios y'ayuc ycuydundäyii.

⁷ ¿Ti ti ytunyii ti yjadyii müid yi Israel jäy ajcxy? May ajcxy ca' may'ajtin oy'ajtin paady ma Dios jadu'n nej ajcxy jip'ijxcixy. Jëyi ajcxy huidi Dios huin'ixi ti ajcxy paatcixy oy'ajt ma Dios. Yi jacjadyii Israel jäy ajcxy Dios nüg ooy yajjotmij'öccixy. ⁸ Com jadu'n jaybety ymiñ ma Dios ñecy jadu'n nej Dios yajjotmij'ögy yi Israel jäy, ma jadu'n ymíñañ:

Tim jadu'n ajcxy nipaady nej jäy ajcxy huidibi ti ymi'öctigooyñi, jadu'n nipaady nej jäy huidibi huiintzip, jadu'n nipaady nej huidibi cónatip.

⁹ David nañ jadu'n ycojay jecy'ajty ma ñecy, ma jadu'n ymíñañ:

Huindzin Dios, cham je jäy tzachnixondägy yi tzínaayin yi jugy'ajtin, ca' ajcxy xyjäymech. Timítiini ajcxy ayo'n möhuipy; tim jadu'n nej iyujc ayo'n paady co yajtixuuch o co yjut cögäy.

¹⁰ Yajma'ti ajcxy yjot yhuinma'ñ, huen ahuimbijtcixy jadu'n nej jäy huintzpi. Mö ajcxy tzaachypi huinixi huinítiempo, tim jadu'n nej jäy ajcxy tzaachypi jihuíy huidibi jemxypi tzmíccixp.

Yi ypocyhuinmeecxin huidibi ajcxy ca'p yjudíoäyity

¹¹ Co jadu'n yi maybi Israel jäy ca' cöbijccixy Dios ytiy'ajt, ¿nej mdijy, ti Dios y'ixmachyii ajcxy tüccí'yi, e yajtigoya'ñ ajcxy? Pues ca' yjadu'nity, ca' Dios ixmach yi Israel jäy ajcxy tüccí'yi. Co yi Israel jäy ca' cöbijccixy Dios ytiy'ajt nej Cristo y'o'cy müid yi' ajcxy ypocy ycixpi, paady cöbicy yi huidibi ca' yjudíoäyity, jëbi ajcxy y'alma nídzoocin paady. Jadu'n Dios ytuñ jigix jëbi yi judíoäy ajcxy cohuindoyii jihuíhuipy, e chi nañ jadu'n mijpidägipy ajcxy Jesucristo. ¹² Pen yi mayjäy ajcxy huidijaty ca' y'israeljäyity mij'oy'ajtin mijjotcuyc'ajtin ti paady, müid co yi jacmaybi Israel jäy ca' cöbijccixy Jesucristo, chi nigi oy'ajtin jotcuyc'ajtin pada'ñ yi naaxhuñjyay ajcxy co anajty nidüg'óciy Israel jäy yjothuimbijttaaygixy etz cöbijctaaygixy je Cristo.

¹³ Cham nijayiygixy miich ajcxy huidi ca' yjudíoäyity, com Dios ti xyquexyich ngapxhuáxcich yi' y'ayuc ma yi jäy ajcxy huidibi ca' yjudíoäyity. Ooy nyajcopicyich jada ndungich, jigix jëbi judíoäy oy'ajtin paady nañ jadu'n. ¹⁴ Ca' jecyity co ich n'amigügtijc, yi judíoäy ajcxy, cohuindoyii ajcxy jihuíhuipy, co anajty mayjäy huidi ca' yjudíoäyity mijpidägy ich n'ayuc. Co jadu'n ajcxy cohuindoyii jihuíhuipy, chi ajcxy nañ jadu'ñ mijpidägipy Jesucristo. ¹⁵ Com pen je naaxhuñjyay huidibi ca' yjudíoäyity, huidibi Dios jecy'ajty ca' jäygidaci ajcxy chinaayin, pen ti ajcxy cöbijci Dios ytiy'ajt, pen ti ajcxy oy'ajtin paady ma Dios, müid co Dios ti ixmach yi Israel jäy huidibi ca' cöbicy yi' ytiy'ajt, chi yi Israel jäy co ajcxy jadüg'oc yjothuimbidity etz cöbijgipy Dios ytiy'ajt, nañ jadu'n ooy yjotcuñhuipy ajcxy, jadu'n nejjihuíy ti ajcxy y'ögy etz nej jihuíy ajcxy ti yjugypicy jadüg'oc. ¹⁶ Com co Abraham, Isaac etz Israel Dios anajty jäy'ajtip, paady nañ jadu'n tüg'óciy Israel jäy Dios jäy'adyii, müid co Israel y'ap'ajtip y'oc'ajtip ajcxy. Tim jadu'n nejjihuíy judíoäy ajcxy tzajcaagy puuducy möy Dios, nañ jadu'n je ytujtuc huidibi jac-hui'm nañ Dios je' yje', e nañ tim jadu'n nej co jäy ajcxy möy Dios quipy ytictz, tüg'óciy je' Dios je'ajtäyii quipy y'aacxy.

¹⁷ Hue' je' nijëjity Israel jäy ca' mijpidägy Dios ytiy'ajt, paady ñajtz'ixiyi, e may'ajt oy'ajt tuñ müid huingbi jäy huidi ca' israeljäyity. Tim jadu'n nej jihuíy tüg oyguipy huidi tim'ajtp yajpubuxy y'aacx, e je ma ti yajjippujxtüty, je'

yjijp yajpidägy ma huingbi quipy y'aacx. Miich ajcxy huidi ca' yjudiojäyity huidibi ti mibicy je Cristo, ti mbaady Dios y'oy'ajt tim jadu'n nej judiojäy ajcxy jecy'ajty müdity Dios y'oy'ajt. ¹⁸ Ca' huaad amij agix mnayjihuiygyixy, e ni ca' huaad m'ixtijcixy yi judiojäy huidibi ca' mijpidaaccixy je Cristo. Miich ajcxy yi m'oy'ajt ti mbaady ma Dios, tim jadu'n nej je quipy y'aacx mic'ajt paady ma yi quipy ytictz.

¹⁹ Ca' yjecyity co miich ajcxy mina'naangixy co Dios najtz'ixiyy yi judiojäy huidibi ca' mibicy Cristo, jaydëbi miich ajcxy mnaydijyii co Dios xyjäy'adyii.

²⁰ Tiy'ajt jadu'n nej miich mina'n. Dios ñajtz'ixiyy yi maybi judiojäy müid co ajcxy ca' mibicy Jesucristo. E Dios miich ti xycöbicy müid co ti mmibicy Jesucristo. Per ca' huaad miich amij agix mnayjihuiyii müid co Dios ti xycöbicy. Naygüend'adii yajxon ma Dios ytiy'ajt, tzig'i Dios. ²¹ Com Dios ñajtz'ixiyy yi judiojäy ajcxy müid co ca' ymijpidägyii yi' ytiy'ajt. Nañ jadu'n miich ajcxy yi' xyñajtz'ixihua'n, pen ca' mmijpidaaccixy yajxon yi' ytiy'ajt. ²² Cuentipic jadu'n nej Dios may'ajt oy'ajt tuñ müid nijëjity jäy, etz mic tzaachytuñ nijëjity jäy. Dios mic tzaachytuñ je judiojäy huidibi ca' ycapxymidooy, etz may'ajt oy'ajt tuñ müid miich ajcxy huidi capxymidoob. Jaccuydun yajxon Dios ytiy'ajt, e nigi Dios may'ajt oy'ajt xytuunipy, pen ca' mguyduni yi' ytiy'ajt, huin'it Dios xyñajtz'ixihuiipy. ²³ E nañ jadu'n yi judiojäy ajcxy huidi ca' mibijcixy Jesús, co ajcxy yhuinma'n yajtigadzipy, e mijpidägyi Jesús, huin'it Dios ycöbigiyyb jadüg'oc, etz Dios müid ymic'ajt jëbi may'ajt oy'ajt tunipy müid yi' ajcxy. ²⁴ Com pen miich ajcxy huidi ca' yjudiojäyity huidibi jecy'ajty anajty ca' Dios jäy'adyii, pen miich ajcxy Dios mic'amy ti xycöbicy, nañ jadu'n jactzojc cöbiga'n huidibi ajcxy judiojäyip, pen ycöbijcy ajcxy.

Jadu'n nej Dios yajnidzoocogixihua'n Israel jäy ajcxy

²⁵ Miich ajcxy nmigügtijcich, nyajnijayiyb ajcxy jadu'n nej Dios tuna'n müid yi Israel jäy, jaydëbi ca' miich ajcxy amij agix mnayjihuihuiyyb, etz jaydëbi mnejhuihuiipy jada tiy'ajt huidibi ca' pin nejhuüy, co yi Israel jäy ajcxy ooy ajcxy y'aamijity yjotmijity, ca' ajcxy capxymidooy Dios. E jadu'n ajcxy y'ida'n mabaad anajty yca'pxy je mayjäy, ca'pi y'israeljäyity je huidibi mijpidägam Jesucristo ytiy'ajt. ²⁶ Nejhuiyim co Dios may'ajt oy'ajt tunamb jadüg'oc müid tüg'öciy Israel jäy ajcxy, com jadu'n jaybety ymiñ ma Dios ñecy ma Dios jadu'n ymina'n.

Jacjini tüg Israel jäy ymina'n huidibi yajnidzögamb ajcxy ma yi' ypocy. Yi' yajtigoyaanip Israel jäy ypocy.

²⁷ Jadüg'it jaybety ymiñ ma Dios jadu'n ymina'n: Jadu'n nyajhuinhuaniiyich yi Israel jäy co yi' ajcxy ypocy nyajtigooybich.

²⁸ Co yi Israel jäy ca' mijpidaaccixy Jesucristo ytiy'ajt, chi Dios ajcxy ñajtz'ixiyyi. E co ñajtz'ixiyyi ajcxy, paady ycixpi miich ajcxy Dios ti yxcöbicy, co ti mmijpidaaccixy Jesucristo. Per chambaad Dios jactzojctay yi Israel jäy müid co Dios huin'ixy yi Abraham, Isaac etz Jacob jecy'ajty jëbi yi' yjäy'adyii. ²⁹ Dios ti huin'ixy yi Israel jäy ajcxy jëbi yi' yjäy'adyii, etz tüg'öciy huidi yajhuinhuaniiy co möhua'n, co may'ajt tuna'n müid yi' ajcxy ycixpi. Ymöhuipy yi', ytuunipy yi'. Dios ca' y'ayuc yajxigy. ³⁰ Miich ajcxy huidi ca' yjudiojäyity jecy'ajty ca' anajty mmijpidaaccixy Dios. Jadachambi xii tiempo Dios miich ajcxy ti xypa'ayoy, müid co yi Israel jäy ca' mijpidägy Cristo ytiy'ajt. ³¹ Yi judiojäy jadachambi xii tiempo ca' mijpidaaccixy Dios ytiy'ajt, tim jadu'n nej jecy'ajty miich ajcxy ca' anajty mmijpidaaccixy Dios ytiy'ajt. Jacjini Dios pa'ayoohuin tuna'n jadüg'oc müid yi judiojäy ajcxy tim

jadu'n nej ytuñ m̄id miich ajcxy jadachambi x̄i tiempo. ³² Com Dios anajty ti yajpocycädäy t̄üg'óc̄iy jäy co ajcxy ycapxycōmidodacy, ȳi judíojäy etz nañ huidi ca' yjudíojäyity, paady ycixpi Dios pa'ayo'n tuñ m̄id nidüg'óc̄iy jäy, judíojäy etz nañ huidi ca' yjudíojäyity, t̄üg'óc̄iy p̄in mijpidacp ȳi' ytiy'ajt.

³³ ¡Ooy ycodziḡijity Dios! Dios ooy mijcajee may'ajt oy'ajt tuñ m̄id jäy ajcxy ycixpi. Dios ooy mijcajee m̄ihuinma'ñ ti tuñ m̄id jäy ajcxy ycixpi. Dios ooy mijcajee ycohuinma'ñity. Ca' ni p̄in jēbi huinjihuıyđäy je ayuc huinma'ñ huidi Dios ym̄id. Etz nañ ca' ni p̄in jēbi huinjihuıyđäy huıdibi Dios ytumyb. ³⁴ Com jaybety jadu'n m̄iñ ma Dios ñecy ma jadu'n ym̄ina'ñ:

Ca' ni p̄in jēbi huinjihuıyđäy nej Dios yhuinma'ñ m̄idity. Ca' ji ni p̄injäy huıdi ti capxhuijy Dios.

³⁵ Ca' ji ni p̄injäy huıdi tijaty ti ocmooybi Dios. Dios ca' ni ti nuucxy m̄idity m̄id ni p̄injäy.

³⁶ T̄üg'óc̄iy huıdijaty ñich ajt ya nbaatim, ac jiıby choondäy ma Dios. Ȳi t̄üg'óc̄iy ti yaj'oyıyđäy, e ȳi' je'ajttaayip t̄üg'óc̄iy. ¡Tzoc Dios capxpaatim ojadjatim huınix̄i huınitiempo! Jadu'n jadu'n. Amén.

12

Je jugy'ajtin cıxyjot ma Dios

¹ E jadu'n nm̄igügt̄ijc̄ich, cham ñich miich ajcxy nimaayḡixy m̄ictägy, com co Dios ti xypa'ayoogixy, paady ycixpi nay'ayéj̄c̄iḡix nayḡiyéj̄c̄iḡix amuumdüḡjot ma Dios. Cuychinaȳi ȳi' ytiy'ajt yajxon jabom jabom. Tzinaayḡix m̄id huädz m̄jot m̄huinma'ñ, jadu'n nej Dios jēbi jäygidägy ȳi' mdzinaayin. Jada je tiy'ajt nej jēbi Dios m'ojadajtcıxy t̄ıydudägy. ² Ca' ajcxy mguydunḡixy mguychinaayḡixy ȳi' naaxhuiñȳjäy ajcxy yjibicjot yjibic-huinma'ñ huıdibi tzinaayḡixp jadachambi x̄i jadachambi tiempo. Com Dios ti xymooyḡixy jem̄ybi m̄jot jem̄ybi m̄huinma'ñ, paady mguydunıpy ajcxy ȳi' ytiy'ajt. İxp̄ijc̄ıx Dios ytiy'ajt, jiḡix ajcxy mnejhuıhuıpy huıdibi tiy'ajt Dios chojcynguydunıpy, etz jiḡix m̄huinjihuıhuıpy je oyhuinma'ñ, je tudägy p̄i huınma'ñ huıdibi Dios yjāygidacpy, je huınma'ñ huıdi huädzıp ca'pxyip.

³ Com Dios may'ajt oy'ajt ti tuñ m̄id ñich etz ti xymöyich jada tung co ngapxhuäcxich ȳi' y'ayuc, paady ñich miich ajcxy nimäy nidüg'óc̄iy co ca' huaad amij agix mnayjihuiyiḡixy, ca' huaad n̄igi anaxy mnaygōmāayiḡixy cı'm. Nidüḡ nidüḡ cı'm huınmaayḡixy yajxon huıdi tung jēbi myajñıxcıxy, jadu'n nej Dios huıjy'ajt cujc'ajt ti xymooyḡixy. ⁴ Jadu'n nej ñich ajt nninıcx ym̄id yhuın y'ahuac etz ycı' ytecy, je ninıcx abıcy ytung m̄idity, etz je cı' t̄ecy abıcy ytung m̄idity.

⁵ Nañ t̄im jadu'n ñich ajt huıdi mijpidacp Cristo, e ni may ñich ajt, e t̄üḡpıcy jäy ñich ajt com t̄ü'cıy nm̄ıbjc̄im. E nıje' nıje' Dios huıjy'ajt cujc'ajt ti xymooyim abıcyjaty, nej jēbi nıje' nıje' Dios ytung nyajñıcxim.

⁶ Com abıcyjaty Dios ti xymooyim huıjy'ajt cujc'ajt, paady copıcy nyaıtuunim nıje' nıje' je huıjy'ajt cujc'ajt huıdi Dios ti xymooyim. Pen Dios ti xymooyim huıjy'ajt cujc'ajt jēbi ngapxhuäcxim ȳi' y'ayuc, copıcy ngapxhuäcxim m̄ıbaad xp̄ıjcin nm̄ıd'ajtim. ⁷ Pen Dios huıjy'ajt cujc'ajt ti xymooyim co jēbi nbubejt̄im nm̄ıḡügt̄ıj̄c̄, copıcy nm̄ıḡügt̄ıj̄c̄ nbubejt̄im. Pen Dios huıjy'ajt cujc'ajt ti xymooyim jēbi nyaj'ıxp̄ıjcin nm̄ıḡügt̄ıj̄c̄, copıcy ndung'ajtim yaj'ıxp̄ıḡıı. ⁸ Pen Dios huıjy'ajt cujc'ajt ti xymooyim co jēbi ngapxhuıjim nm̄ıḡügt̄ıj̄c̄, co jēbi n̄jot'amıjmooyim nm̄ıḡügt̄ıj̄c̄, copıcy ngapxhuıjim nm̄ıḡügt̄ıj̄c̄, etz n̄jot'amıjmooyim nm̄ıḡügt̄ıj̄c̄ agujc jotcujc. Pen nyejcin tijaty

yi jāy huidijaty oyhuinma'ñ m̄id. Hue' janchtiy yi' ajcxy chaachytunipy yi jāy huidi jibic-huinma'ñ m̄id. Pen mdzojcp co ca' tzaachypi mbaadipy ma yi tungm̄idpi, hue' janchtiy oybi mdunipy, e huin'it m'idipy jotcujc. ⁴ Com Dios ti pidāgy jada tungm̄idpi m̄id miich ajcxy ycixpi, jigix jēbi jotcujc ajcxy mdzinaaygixy. Pen mdundigooyb huin'it je tungm̄idpi mdzigihuipy, com yi' ym̄id mic'ajt jēbi tzaachytuñ jāy ajcxy huidibi tundigooyb. Com Dios ytung ytuunipy etz ycuuduunipy Dios ycōtujcin jadu'n nej Dios xyñajtz'ane'm̄iyyim, copicy co tzaachytuñ je jāy ajcxy huidibi tundigooyb. ⁵ Paady ycixp copicy mgapxymidohuipy tungm̄idpidijc, jigix ca' miich ajcxy Dios xychaachytunipy e nañ jotcujc mnayjihuihuipy co ca' anajty ti ti mdundigoy. ⁶ Yi tungm̄idpidijc Dios ycixpi ajcxy ytuñ, e ym̄id ajcxy ycōtujcin, paady ycixpi copicy mmigüedipy ajcxy.

⁷ Mgüedipy ma yi tungm̄idpidijc huidibi xypaatp. Co ajcxy cajp meeñ yajmucy, migüedipy. Co je gobierno tungm̄idpi pidāgy impuestos, migüedipy. Jāy ajcxy huidijaty tungm̄id myajmij'adipy, etz huidi m̄it tungm̄id mgōmayipy. ⁸ Ca' pin minuucxy'adīyb. Tzoc jihui' mmigügtijc, e mgüedipy oy'amy huidibi mnuucxyp. Co yi mmigügtijc mdzogipy mjihuihuipy ti anajty mguydundāy Dios ycōtujcin. ⁹ Jadu'n Dios ycōtujcin jaybety ymiñ, ma jadu'n ymina'ñ: "Ca' mmigapxtigoyipy huingbi tōxyjāy. Ca' mmigüg m̄meedzipy. Ca' mjāyay'ōgipy. Ca' mmigüg m'adzojipy ti ym̄id." Pen mdzojcpy mjihuihuipy m̄igüg nej miich ci'm mnaychogyi ti anajty mguydundaayi Dios y'ane'm̄an ycōtujcin. ¹⁰ Je naychojcin je nayjihuiyin ca'p je' ti jibicpi ti tzaachypi tuñ ma je m̄igüg, co jadu'n jada mguydundāhuipy ti anajty Dios ycōtujcin mguydundaayi.

¹¹ Com miich ajcxy mnejhuipy co huingon je x̄i je tiempo mina Jesucristo mina'ñ jadüg'oc ya naaxhuiñ, paady ycixpi j̄j̄p'ix̄cix ajt nHuindzin Jesucristo co tzojc ym̄inipy. E jadachambi ti yjac-huingoni mina miina'ñ iich ajt nHuindzin Jesucristo, ca'ydi co oga'n nm̄ibijcin. ¹² Canaag jimijt jāy ajcxy ahuijxy j̄j̄p'ix̄cxy co Dios yajnidzōga'ñyii ajcxy y'alma, jadachambi ti yhuingoni je x̄i je tiempo mina n'alma ajt n̄dzocin padaanim. Paady ycixp tzoc ixmajtzim yi jibic-huinma'ñ yi huidibi jāy ycuudumy huidibi ca' Dios ytiy'ajt nejhuipy. Tzoc cuychinaayim cuyjugy'ajtim Dios ytiy'ajt. ¹³ Tzoc tzinaayim jugy'ajtim tudāgy. Tzoc cuyduunim Dios ytiy'ajt. Ca' huaad jadu'n ndzinaayim amügjāy. Ca' huaad n'agootzhuidijtim xiicyaax xiictinaayim. Ca' huaad ndundigooyim m̄id huingbi tōxyjāy. Ni ca' huaad ndziptuunim ahua'nduunim. Ni ca' huaad nm̄igüg nm̄i'ix̄tinaayim. ¹⁴ Tzoc cuychinaayim cuyjugy'ajtim Jesucristo ytiy'ajt. Tzoc tzinaayim tiydudāgy jadu'n nej Jesucristo tiydudāgy ti chināy ya naaxhuiñ. Ca' nguyduunim ti jibicpi ajt n'aa njot yja'adzojcpy.

14

Ca' m̄igüg mbocy'ixy

¹ Miich ajcxy nm̄igügtijcch, copicy mgōbigipy agujc jotcujc ma miich m̄n̄ayyōym̄ijcigixy ajcxy yi m̄igügtijc huidibi m̄ibijcp je Cristo, per ca' tiydudāgy huinjihuipy je Cristo ytiy'ajt. Mgōbigipy per ca' mhuingapxpedipy, ca' ti myaj'ayucyoonipy m̄id yi' ajcxy. ² Ti m̄igügtijc huidibi minamb co Dios ca' ti jicxy capx'aducy, etz jēbi ajcxy jicxy huentyim ti jicxyity. Etz nañ ji m̄igügtijc huidibi minam co Dios ti capx'aducy tzūch, paady ajcxy jicxy'adyii je'jada'ajty aay ujtz. ³ Yi m̄igüg huidibi tzūch tzūtzp ca' huaad ixtijy je ym̄igüg

huidibi yjicxpy je'jada'ajty aay ujtz. E nañ ni yi migüg huidibi jicxp aay ujtz ca' huaad ixtijy yi migüg huidibi tzüch tzu'tzpz, com Dios ycöbijctaayb je jäy ajcxy huidibi ti mibicy Jesucristo. ⁴ Ca' huaad miich ajcxy mmimähuiipy yi mmigüg co ca' oytuñ, tim jadu'n nipaady nej co tüg jäy nimähuiipy huingbi jäy ytumbi co ca' oy ytuñ. Dios ci'm nimähuiip huidi ajcxy mibijcp Jesucristo, pen oytuñ o ca' oytuñ. Dios ypubejtyp pinjaty mibijcp, paady madaacp ajcxy ma chinaayin.

⁵ Nijëjity ajt nmigügtijc ymina'ñ co ooy ycopicyity n'amay'ajtim nijëjity xii, jacjadyii jäy ymina'ñ co ca' ycopicyity n'amay'ajtim jada xii. Huen nidüg nidüg yci'mhuinma'ñ yajtuñ pen y'amay'adamyb, o pen ca' amay'ada'ñ nije' nije' xii. ⁶ Ich ajt nmigügtijc huidi amay'ajtp nijëjity xii, hue' ajcxy tijy co Dios jadu'n tzojcp. E nañ ich ajt nmigügtijc huidi tzüch tzu'tzpz, hue' ajcxy tijy co Dios jadu'n tzojcp, etz nañ yajnaxyp Dioscojuyip ma Dios müd yjicxy ypicxy ycipxi. Nañ tim jadu'n ajt nmigügtijc huidi ca' tzüch tzüdza'ñ, hue' tijy co Dios jadu'n tzojcp, etz nañ yajnaxyp Dioscojuyip müd yjicxy ypicxy ycipxi.

⁷ Ca' ich ajt nayyajtinaayim amidzooci'm, nañ jadu'n ca' ich ajt ci'm ndzojcin co n'o'cim. ⁸ Pen njactzinaayim hue' anajty nguyduunim ajt nHuindzin Jesucristo chojcin. Pen n'o'cim yi' anajty jadu'n ti yajcöducy. Pen njactzinaayim, o pen n'o'cim, tú'ciy nipaady, com Jesucristo nHuindzin'ajtim ma yi tzinaayin etz ma yi o'cin. ⁹ Paady ycipx Cristo y'o'cy etz yjugypijcy jadüg'oc jigix jëb nihuindzin'ajttäy yi' yjäy huidibi jactzinaayb jacjugy'ajtp, etz jigix jëb nihuindzin'aty yi tiibi y'ögy.

¹⁰ ¿Na'amy co mmigüg mdzachpocy'ixy? o ¿Nej co mmigüg mdzach'ixtijy? Ca' jadu'n y'oyity co ajcxy jadu'n m'idich. Com nidüg'öciy ajt njädaanim ma Dios ytiydundac. ¹¹ Com jadu'n jaybety ymiñ ma Dios ñecy, ma jadu'n ymina'ñ:

Janch janch co ich, je tügpajcpi Dios, jadu'n nmina'ñich co tüg'öciy naax-huiñjäy xyhuingoxtinähuibich xyhuindzigihuibich, etz nañ tüg'öciy naaxhuiñjajay xycapxpaadibich co ich je' tügpajcpi je Dios.

¹² Com Dios nhuindzin'ajtim, paady ycipx nidüg'öciy ich ajt nayguëxiäthuaanim ma Dios yhuinduu, chi Dios xy'amidohuaanim nej ti ndzinaayim ti njugy'ajtim nidüg nidüg.

Ca' migüg myajhuinma'ñyidigoogyixy

¹³ Paady ycipxi ca' huaad naynixiic naynigapxim miñ xyipy. Hue' janchtiy miich pidaaccix mhuinma'ñ co ca' ti mdungixipy huidi mmigügtijc ca' jäygidägy, huidi mmigüg yajpocycähuiib. ¹⁴ Nnejhuiybich tiydudägy co ajt nHuindzin Jesucristo ytiy'ajt xyajnejhuuyim co jëbi njicxim huen tim huidi jicxy tim huidi picy. Je jicxy je picy ca' ma ycobocy. Per pen tüg migüg yhuinma'ñ pidacp co Dios ca' jäygidägy co yi' yjicxpy nijëjity jicxy picy, pues ca' yhuaadity co yi' jadu'mbi jäy jicxy huidi yi' ytiypp co ca' huaad njicxim. ¹⁵ Pen ca' m'oy'ity müd tüg migüg co ti mjicxy je jicx picy huidibi yi' ytiypp co Dios ca' jadu'n yaj'cöducy, chi ca' anajty mdzocy mjihuüy yi mmigüg nej ypydyii. Com nañ Cristo ti y'ögy müd yi mmigüg ypocy ycipxi, paady ca' huaad myajtigoy yi mmigüg, müd co mjicxy huidi yi' ca' jäygidägy. ¹⁶ Ca' ajcxy m'a'ixiyyigixy co jibic yajnigapx yajnimiydägipy huidibi miich ajcxy myajnaxp co y'oyity. Oy miich mjahuinjihuüy Dios ytiy'ajt, per ca' huaad mdunipy huidi yi mmigüg ca' jäygidägy, e huin'it xyñigapxipy jibic. ¹⁷ Canan Dios jadu'n ytiy'ajt xyñajtz'ane'miyyim huidijaty huaad njicxim n'uucim, o huidi ca' huaad njicxim n'uucim. Hue' janchtiy ti xyñajtz'ane'miyyim nej jëbi

tiydudägyi ndzinaayim njugy'ajtim. Nej jëbi jotcuje n'ijtim müd ajt nmigügtijc. Nej jëbi jotcuje nayjihuiyim müd Dios ymic'ajt ma njot nhuinma'ñ. ¹⁸ Co jadu'n nguyduunim nej Cristo ytiy'ajt ti xyñajtz'ane'miiyim, huin'it jäygidägyipy Dios etz nañ jadu'n jäygidägyipy jäy ajcxy nej anajty nduunim.

¹⁹ Tzoc panicxim je huinma'ñ jadu'n nej jëbi ndzinaayim agujc jotcuje müd ajt nmigügtijc, ca' ma ti tzip ti capxy nmüid'ajtim. Tzoc yajtuunim je huinma'ñ jadu'n nej jëbi huaad naybubejtim nidüg nidüg nej jëbi huaad nguychinaayim Dios ytiy'ajt. ²⁰ Ca' huaad nyajtigooyim Dios ytung müd tzip capxy jadu'n nej huidi jëbi huaad ndzüdzim, etz huidibi ca' huaad ndzüdzim. Janch tiy'ajt co Dios ca' ti jicxy ti picy capx'aducy, per pen njicxim huidijaty nijëjity ajt nmigügtijc yajcoboicy, e jadu'n nyajhuinma'nydigooyim ajt nmigüg, chi nmidundigooyim Dios ytiy'ajt. ²¹ Tiy'ajt jadu'n co ca' huaad tzüch ndzüdzim etz ca' huaad vino n'uucim, o jactijaty huidibi ajt nmigüg yajcoboicy. Com co jadu'n ajt n'idüdzim, hue' anajty ajt nmigüg nyajhuinma'nydigoyaanim ma ymibijcin. ²² Miich ajcxy huidibi huinjhuüyb Dios ytiy'ajt co Dios ca' capx'aducy ti jicxin ti pijcin, ca' mnimiydaconaxipy müd jäy ajcxy. Dios ñejhuüyb co miich mhujihuiy y' y' ytiy'ajt. Jëbi jotcuje mdzinähuiyipy pen mguychinaayb je huinma'ñ huidibi müich mnejhuuyigixy co ytudägyity, e huin'it ca' jibic mnayjihuihuüyb ajcxy. ²³ Tundigooyb y' migügtijc huidibi jotmetz jicxp nijëjity jicxy picy, müid co tzigüyb y' co Dios ymijotmädiyb co ti jicxy huidi ytiy' co ycobocy. Tundigooyb jadu'n com ca' ti cuydun Dios ytiy'ajt nej ci'm ti yajniuejy. Pen ca' nguyduunim jadu'n nej nhuinjhuüyim Dios ytiy'ajt, tundigooyim anajty.

15

Tzocix migügtijc, ca' ñaydüg mnaychogyi

¹ Ich ajt huidibi tiydudägy nmibijcin etz nhuinjhuüyim Dios ytiy'ajt, copicy nmimecxtujcim ajt nmigügtijc huidibi ca'ni huinjhuüy yajxon Dios ytiy'ajt. Ca' huaad ti nduunim müd ngi'm jäygidaacin ycixpi. ² Copicy nyajtuunim oyhuinma'ñ müd ajt nmigügtijc, jadu'n nej jëbi ajt nmigüg jäygidägy, etz jadu'n nej jëbi nbubejtim ajt nmigüg müd ymibijcin. ³ Com nañ Cristo ca' ti ytuñ müd yci'm jäygidaacin ycixpi, com jaybety jadu'n miñ ma Dios ñecy, ma je Cristo ñimay Dios Teedy: "Miich mmidzip ajcxy huidibi xyñigapxp xyñi'ojiiyb, xyñigapxpich xyñi'ojiiybich ajcxy nañ jadu'n." ⁴ Com tüg'öciy Dios y'ayuc huidibi ycojay jecy'ajty, hue' cojay müd ich ajt ycixpi, jigix jëbi Dios ytiy'ajt nbaatim. Dios ytiy'ajt xyajnejhuüyim co Dios jadu'n tzocy co nmimecxtujcim ajt nmigügtijc. Nañ Dios y'ayuc xyjot'amijmooyim, e nañ xyajnejhuüyim jadu'n jëbi njijp'ijxim pubejtin ma Dios. ⁵ Com Dios, y' je' huidi xypubejtim müd mecxtujcin, e nañ xyjot'amijmooyim, paady huen Dios may'ajt tunipy ma müich ajcxy mjot mhuinma'ñ, jigix jëbi mmüid'idipy tü'ciy mjot mhuinma'ñ nej Jesucristo yjot yhuinma'ñ müdiy, e jadu'n jëbi mnayyaj'oy'ijigixy jotcuje ca' ma tzip capxy. ⁶ Dios müich ajcxy xypubedipy xypudigihuiyipy, jigix jëbi myajtügüygixy mjot mhuinma'ñ, etz tü'ciy m'ojadajtcixipy mhuidzigüygixipy Dios Teedy etz ich ajt nHuindzin Jesucristo.

Jesucristo y'ayuc yajcapxhuäcxy ma huidibi ca' yjudtojäyity

⁷ Naygöbjicigix nidüg nidüg agujc jotcuje, tim jadu'n nej Cristo xycöbijccixy agujc jotcuje. Co mnaygöbjicigixipy nidüg nidüg agujc jotcuje, huin'it Dios

capxpaady y'idipy. ⁸ Janch tiy'ajt co Cristo y'oy ya naaxhuiñ, oy pubety judíoJay ajcxy, e jadu'n cuyduñ Dios ytiy'ajt huidi yajhuinhuaniiy Abraham, Isaac etz Jacob jecy'ajty co jadu'n tuna'n muid yi' ajcxy ycixpi. ⁹ Nañ jadu'n Cristo ooy pubejty yi huidibi ca' yjudíoJayity, jaydēbi ajcxy capxpaadipy Dios, muid co ti ypa'ayoyii ajcxy. Com jaybety jadu'n ymiñ ma Dios ñecy, ma jadu'n David ymiñañ:

Com miich Huindzin Dios ti xycohuañ'ñich paady miich ngapxpaady ma yi jāy ajcxy huidibi ca' yjudíoJayity. ñich miich nhuin'ñihuipy muid himnos.

¹⁰ E nañ jaybety jadu'n ymiñ ma Dios yñecy:

Jotcujc'ajtcixy quipxy muid Dios yJāy miich ajcxy huidi ca' yjudíoJayity.

¹¹ E nañ jaybety jadu'n ymiñ ma Dios ñecy, ma jadu'n ymiñaññ:

Capxpaatcix yi Huindzin Dios miich ajcxy huidi ca' yjudíoJayity. Capxpaatcix yi Huindzin Dios miich ajcxy nidüg'óciy naaxhuiñjāy.

¹² E Isaías ycojay nañ jadu'n ma yi' ñecy, ma jadu'n ymiñaññ:

Ma'xung'adamb tūg Isaí y'ap y'oc, e yi' ane'mamb yi jāy huidibi ca' yjudíoJayity. Co yi jāy ajcxy huidibi ca' yjudíoJayity mijpidāgipy je mij'ane'mbi, hue' ajcxy yjijp'ijxpy co mōhuaanip oy'ajt.

¹³ Nmibijctzooybich Dios muid miich ajcxy ycixpi huidijaty mibijcp Jesucristo, com njijp'ijxim co Dios xymōhuaanip oy'ajtin. Nmibijctzooybich Dios muid miich ajcxy ycixpi co huen xyajjotcug'ihuip ajcxy, e nañ co huen xyajpooxipy mjet mhuinma'ñ. Nmibijctzooybich Dios co huen xypubejtcixy xypudig'iygixy muid yi' yjihui'ñ ymic'ajt, jaydēbi mijijp'ixipy ajcxy co mbaadip oy'ajtin mijcajee ma Dios.

¹⁴ Miich ajcxy migügtijc, jotcujc nayjihui'yijich muid miich ajcxy ycixpi, com nejhuuybich co miich ajcxy muidity oyjot oyhuinma'ñ, e nañ mhuinjihuuyb ajcxy tūg'óciy Dios ytiy'ajt, paady jēbi mnayyaj'ixp'ijcixy nidüg nidüg.

¹⁵⁻¹⁶ Jotmic'amy ti nyajjāymejtcoodyich miich ajcxy nijējity Dios ytiy'ajt ma jada necy huidi nyajnijayiyb ajcxy cham, com Dios may'ajt oy'ajt ti tuñ muid iich, e ti xyhuin'ixyich jaydēbi nduñich Jesucristo ytung ma yi jāy ajcxy huidi ca' yjudíoJayity. Jadu'n nduñich muid Dios ycixpi, co ngapxhuācxxyich je oybi tiy'ajt jadu'n nej Jesucristo y'o'cy muid jāy ajcxy ypocy ycixpi. Jadu'n Jesucristo ytuñ jigix jēbi Dios cōbigipy yi mayjāy ca'pi yjudíoJayity huidi ti mibicy Jesucristo etz huidibi yi Espiritu Santo ti yajhuāch je jibicp ma ajcxy yjot yhuinma'ñ.

¹⁷ Com Jesucristo ytiy'ajt yajpaatp ma iich njot nhuinma'ñ, paady ycixp ooy jotcujc nayjihui'yijich co nduñich muid Dios ycixpi. ¹⁸ Jada janchtiy iich nyajmuidmuidyacy miich ajcxy je may'ajt huidi Cristo ti tuñ co ngapxhuācxxyich yi' ayuc. Ca' nyajmuidmuidyadaccixy huidi Cristo ytumyb muid jacpinjaty. Muid co ngapxhuācxxyich Cristo y'ayuc, e nañ mijhuinma'ñ ndumybich muid Cristo ymic'ajt, paady mayjāy ycapxymidooyb Dios huidi ca'p ajcxy yjudíoJayity.

¹⁹ Ti ngapxhuācxxyich tūg'óciy Cristo ytiy'ajt nej jēbi ajcxy y'alma ñidzoocin paadip. Jim nyajtzondacyich Jerusalén, e ti nhuidijttāyich canaag agajp mabaad nja'tyich jim Ilirico ñaaxjot. E Dios yjihui'ñ ymic'ajt xypubejtcixy xypudig'iyich co iich mijhuinma'ñ nduñich, etz Dios ytiy'ajt nyējicibich. ²⁰ Ooy nijot'atyich co ngapxhuācxxyich Jesucristo ytiy'ajt ma anajty ca' pin jayijp capxhuācxxyñi. ñich oga'n Jesucristo y'ayuc jim nminicxi ma yi jāy ajcxy huidi ca' anajty midoy Jesucristo ytiy'ajt. Jadu'n nduñich, jigix ca'ydi nijijptigiyiyich ma huingbi anajty jayijp ti capxhuācxxy Jesucristo ytiy'ajt.

²¹ Com jaybety jadu'n ymiñ ma Dios ñecy, ma Dios jadu'n ymiñaññ:

Yi jäy ajcxy ymidohuaanip Cristo y'ayuc huidibi ca'ni anajty midoogixy. Yi jäy ajcxy yhuinjihuühaamyb je Cristo ytiy'ajt huidibi ca'ni anajty nejhüüygixy co yjiijity je Cristo.

Pablo huinmay co ñicxa'ñ jim Roma

²² Com ooy ndzachcapxhuäcxich Cristo ytiy'ajt canaag agajp, paady ca' nyajnibadiyich nícxibyich ma miich ajcxy. ²³ Canaag jimijt ndzachni-jot'atyich anajty nicxa'ñich ma miich ajcxy. Ixti chamni ti nhuidijttäyich majaty anajty nhuidida'ñich. ²⁴ Paady njjip'ijxypich co jëbi nnaxihuübich ma miich ajcxy co anajty nicxyich jim España ñaaxjot. Huäcxibaambich jim ma miich ajcxy jëbi hueeni ajcxy ngapxim nmiydaacim. Nañ hue' njjip'ijxypich co xypubedaambich miich ajcxy müid ndu'amgixpich. ²⁵ Jayijp nñicxa'ñich jim Jerusalén, chiini nñicxa'ñich ma miich ajcxy. Nnänicxaamybich jim Jerusalén hueeni meeñ huidibi nyegaamybich ma yi mibijcpidijc jim Jerusalén müid ayoohtijc ycixpi. ²⁶ Com yi mibijcpidijc ya Macedonia etz Acaya ñaaxjot ti ajcxy yhuinma'ñ pidaaccixy co ajcxy pubeda'ñ yi ayoohtijc jim Jerusalén huidibi mijpidacp Jesucristo. ²⁷ Ooy ajcxy jotucjc ñayjihüüyii co ymigügtijc pubeda'ñ jim Jerusalén. Paatip co pubedipy ajcxy, com ma yi judíojäy ajcxy, jim ajcxy ti paady Dios ytiy'ajt, paady paatip ajcxy huidi ca' yjudíojäyity co pubedipy yi judíojäy ajcxy. ²⁸ Co anajty ti nyajcidiigydaaygixy je meeñ huidibi yi migügtijc ya Macedonia etz Acaya ti yajmujccixy müid je mibijcpidijc ycixpi huidibi yajpatp jim Jerusalén, huin'it nñicxa'ñich jim España ñaaxjot. Nnaxihuaambich ma miich ajcxy co anajty jim nñicxich. ²⁹ Nejhüüybich co anajty jim naxiyich ma miich ajcxy, je Cristo xypubedipich je ymic'ajt, e nyegipich Cristo ymic'ajt ijxpejt etz nyaj'ixpigipyich miich ajcxy je Cristo ytiy'ajt.

³⁰ Miich ajcxy nmigügtijcich, com miich ajcxy mijpidaaccixyp üch ajt nHuindzin Jesucristo, e com miich ajcxy müid Dios yjihüü'ñ ymic'ajt ma m'aa mjot, e nañ ychojcpich xyjihüüybich, paady ycixp nbijctzooyich may'ajt, yajtügüygixy m'ayuc mhuinma'ñ müid üch, jëbi tú'ciy Dios nmibijctzoohuim mictägy müid üch ycixpi. ³¹ Mibijctzoogix Dios co huen xyñihua'ñich xyco-hua'ñich ma yi judíojäy ajcxy jim Judea naaxjot, huidibi xyca'ixaambich co ajcxy ca' mijpidägy Jesús. Nañ mibijctzoogix Dios co yi mibijcpidijc jim Jerusalén cöbigipy ajcxy oy yajxon je pubejtin huidibi üch jim ngiyegaamy. ³² Mibijctzoogix Dios co huen xypubedipy xypudigihüibich, jëbi nícxibich ma miich ajcxy agujc jotucj, ca' ti jotmay, pen Dios jadu'n tzojcp, etz nañ jëbi nhuäcxibipich jim ma miich ajcxy agujc jotucj, e jim üch nhuinma'ñ nyajpocxip. ³³ Mibijctzooybich Dios müid miich ajcxy ycixpi, je Dios huidibi jotucj'ajtin yejcp, co huen miich ajcxy xypubedipy xypudigihüipy. Jadu'n jadu'n. Amén.

16

Capxpoocxin nidüg nidüg ma pinjaty y'ixy'ajtyp

¹ Cham üch miich ajcxy nyajnbijccixy, cöbijccixy je ajt nmigüg töxyjäy je Febe co anajty ñicxy ma miich ajcxy. Yi' je' nidügti huidibi pubejtin tumb ma je mibijcpidijc jim Cencrea. ² Mduunipy may'ajt mgöbigipy Febe müid ajt nHuindzin Jesús ycixpi. Com jadu'n ycopicyty co jäy huidibi mibijcp Jesucristo huen naymigüg'ajtigixy. Mbubedip mbudigihüip jadu'n nej yi' jotmay müidity. Yi Febe ti ooy mayjäy pubety, e nañ ti xypubetyich.

³ Nguejxypyich capxpooocxin ma jada necy müd yi Priscila etz Aquila huiidibi iich anajty müd ooy oy nduñ co ngapxhuäcxyich Cristo ytiy'ajt. ⁴ Yi Priscila etz Aquila yojx ytooc ajcxy yjugy'ajtin müd iich ycixpi, ca'ydi n'ögyich. Nyajnajxypich jäygidaaçin ma Dios müd yi' ajcxy ycixpi, co ti xypubetyich ajcxy. E nañ jadu'n tüg'óciy jäy ajcxy huiidibi ca'pi yjudíoäyity yajnajxcixy jäygidaaçin ma Dios müd yi' ajcxy ycixpi. ⁵ Nguejxypich capxpooocxin nañ jadu'n ma jada necy müd yi mibijcpidijc ajcxy huiidijaty naymujccip ma Priscila etz Aquila ajcxy ytiç. Etz nañ nguejxypyich capxpooocxin ma yi Epeneto huiidibi ooy ndzocyich. Yi' je' tim jayijp huiidibi mijpidaac Cristo jim Acaya ñaaxjot. ⁶ Etz nañ nguejxypich capxpooocxin ma María, yi' ooy ti ytuñ müd miich ajcxy müd Cristo ycixpi. ⁷ Etz nañ nguejxypyich capxpooocxin ma yi Andréonico etz Junias. Iich n'amigüg ajcxy huiidibi ti ypujxtijc iñay quipxy müd iich. Capxpaady ajcxy y'ity müd yi apóstoltijc. Jacjayijp ajcxy mijpidacy Jesucristo ca'ydi iich.

⁸ Etz nañ nguejxypich capxpooocxin ma yi Amplias, huiidibi ooy yajxon mijpidägy ajt nHuindzin Jesucristo. ⁹ Nañ nguejxypich capxpooocxin ma yi Urbano huiidibi xymüdtuñich co iich anajty ngapxhuäcxyich Jesucristo ytiy'ajt. Nañ jadu'n nguejxypich capxpooocxin ma yi Estaquis huiidibi oy ndzocy njihuüyich. ¹⁰ Nañ nguejxypyich capxpooocxin ma yi Apeles, huiidibi ooy tiy'ajt ti yecy co yi' ymibijcipy Cristo tiydudägy. Nañ nguejxypich capxpooocxin ma yi Aristóbulo etz jac pinjaty huiidibi yajpatp ma yi' ytiç. ¹¹ Nañ nguejxypich capxpooocxin ma iich n'amigüg yi Herodiön. Etz nañ nguejxypich capxpooocxin ma yi Narciso yjuugy ymügüg huiidibi mijpidacp iich ajt nHuindzin Jesucristo. ¹² Nañ nguejxypich capxpooocxin ma yi Trifena etz Trifosa huiidijaty tumb ma ajt nHuindzin Jesús ytung. Nañ nguejxypich capxpooocxin ma Pérsida, je migüg huiid oy ndzocyich, etz nañ huiid ooy ytuñ ma ajt nHuindzin Jesucristo ytung. ¹³ Nañ nguejxypich capxpooocxin ma yi Rufo, je huiidibi yi mibijcpidijc ycömaayb. Nañ nguejxypich capxpooocxin ma yi' ytaj, com jadu'n njihuüyich jadu'n nej jihuüy yi' ndaj'adyiijich. ¹⁴ Nañ nguejxypich capxpooocxin ma yi Asíncrito, yi Flegonte, yi Hermas, yi Patrobas, yi Hermes etz ñan tüg'óciy yi mibijcpidijc huiid jim yajpatp ma yi' ajcxy. ¹⁵ Nañ nguejxypyich capxpooocxin ma yi Filólogo, yi Julia, yi Nereo etz yi' y'uch töxyjäybi, yi Olimpás, etz nañ tüg'óciy yi mibijcpidijc huiidibi yajpaatp jim ma yi' ajcxy.

¹⁶ Naygapxpóocxigix xic xon nidüg nidüg. Naygimáztzigix miñ yxipy agujc jotcuç. Tüg'óciy huiidibi mibijcp Jesucristo ma yi jacjaydyii cajp, yquejxyp ajcxy capxpooocxin ma miich ajcxy.

¹⁷ Miich ajcxy migügtijc, may'ajt nbijctzooybich naygüend'adi' ajcxy ma yi jäy ajcxy huiidibi mimiimb ayuc ca'pi ytiy'ajtiy, huiidibi nigooob yjäyayztiptuna'n yjäybijc-huäcxa'n, huiidibi ca' ixa'n yi Dios ytiy'ajt huiidibi ti m'ixpijccixy. Puuhuäctüd miich yi' ajcxy. ¹⁸ Com yi jäy ajcxy huiidibi ymügügtijc yajhuinma'ñydiigooyb, ca' ajcxy tuñ Jesucristo ytung. Hue' ajcxy yaj'ixpijcp huiid yi' mhuinma'ñ yci'mdzojcin. Je' ajcxy huin'ünigixp je jäy ajcxy huiidibi ca' mijcajee y'ixpicity. Yi ayuc huiidibi ymihuidijtyp, jadu'n yajmidoy nej jihuüy oy ytiyity yjanchity, per ca' yi' yjanchity. ¹⁹ Com mayjäy ti xyajmidooyich jadu'n nej miich ajcxy mgapxymidoy Jesucristo, paady jotcuç nayjihüüyijich müd miich ajcxy ycixpi. Ndzojcypich co miich ajcxy mnejhuühiipy huiidibi oyhuinma'ñ jaydëbi mdúngixipy ajcxy etz ca' jibichuinma'ñ mdúngixipy. ²⁰ Dios oyhuinma'ñ etz mic'ajt ti xymooyim jëbi

ndzinaayim müid ajt nmigügtijc agujc jotcujc, ca' ma tzip capxy. Tim huington je xii je tiempo mina Dios yajcödigo'ya'n yi mujcu' ymic'ajt, e yi' xypubedip xypudigihui'p jëbi mmimadägipy yi ca'oybi. Nmibijctzooybich Dios müid miich ajcxy ycixpi co ich ajt nHuindzin Jesucristo huen may'ajt oy'ajt tuñ müid miich ajcxy jabom jabom.

²¹ Je Timoteo huidibi tumb müid ich co ngapxhuäcxich Jesucristo ytiy'ajt xyajniguejxp ajcxy capxpoo'cxin. Nañ jadu'n Lucio, Jasón etz Sosípater ich n'amigüg ajcxy, xyajniguejxp capxpoo'cxin.

²² Ich Tercio huidibi cojaayb Pablo y'ayuc ma jada necy, nañ nguejxypich capxpoo'cxin ma miich ajcxy, com ich nañ jadu'n nyajpaadyich ma ajt nHuindzin Jesucristo.

²³ Nañ jadu'n Gayo xyajniguejxp capxpoo'cxin, yi' xyajjättacich. E nañ je jäy ajcxy huidibi mijpidacp Jesucristo huidibi ajcxy nayyöymujcip ma Gayo ytiyc yquejxyp ajcxy capxpoo'cxin ma miich ajcxy. Erasto je cajp ytesorero etz ajt nmigüg huidibi yxi' Cuarto, nañ xyajniguejxp ajcxy capxpoo'cxin.

²⁴ Nmibijctzooybich Dios müid miich ajcxy ycixpi jabom jabom co ich ajt nHuindzin Jesucristo huen may'ajt oy'ajt tuñ ma miich ajcxy. Amén.

Je capxpoo'cxin ma yaj'ibaady yajcapxpaady Dios

²⁵ Tzoc cōmayim Dios, tzoc ojadajtim, tzoc huin'ihuim müid himnos. Dios müid ymic'ajt jëbi xypubedipy xypudigihui'py ajcxy, jaydëbi ajcxy tiydudägy mmibigipy Jesucristo, ca' ydi mjetmetzcüygixy. Tim jadu'n nej je oybi tiy'ajt huidibi ngapxhuäcxpich tim jadu'n nej je Jesucristo ytiy'ajt huidibi jacjadyi jäy ycapxhuäcxixyp. Jada je tiy'ajt huidibi jecy'ajty ca' pin huinjihuiy huidibi Dios ti xyajnejhuüyim. ²⁶ Dios ti xyajhuinjihuiyim nej yhuimbizimy je ayuc huidibi je profetas ajcxy ycojay jecy'ajty. Dios huidibi tzinaayb huinixii huinitempo, ane'mb co huen yajcapxhuäcxyp jada tiy'ajt oybi ma tüg'óciy naaxhuiñyäjy, jigix jëbi mayjäy mijpidägip etz capxymidoohui'py Dios.

²⁷ Müid co Jesucristo ooy mijhuinma'n tuñ müid ich ajt ycixpi, paady tzoc cōmayim, tzoc ojadajtim etz tzoc huin'ihuim müid himnos huinixii huinitempo yi tügajcpi Dios huidibi ñejhuiydaayb tüg'óciy. Jadu'n ngapcxixyich. Amén.

1 CORINTIOS

Yi Midügpí Neczy Huidibi San Pablo Yajnigüeñx Je Mibijcpidijc Jim Corinto

1-2 ñich Pablo, Dios jadu'n tzojcp co Jesucristo xyajñibicyich co ngapxhuäcxibiyich yi' y'ayuc. ñich etz ajt nmigüg Sóstenes nijayñybich miich ajcxy tüg'óciy huidibi jim Corinto huidibi mijpidacp Dios etz ñayyöymújciñixy jim müd Dios ycixpi. Nijayñybich miich ajcxy huidibi Dios ti yaj'ahuimbijttáy tudägy müd Jesucristo co y'o'cy müd ajcxy mbocy ycixpi. Nijayñybich miich ajcxy huidibi Dios ti huin'ixy, jaydëbi mmüd'idipy huädz jot huädz huinma'ñ. Nañ jadu'n nijayñybich tüg'óciy je jäy huenyma'amyity huidibi Dios mibijctzoob ojadañp müd ñich ajt nHuindzin Jesucristo yxi. ³ Ndzocypich co ñich ajt nDios Teedy etz ajt nHuindzin Jesucristo oy'ajt may'ajt tunipy müd miich ajcxy, etz xyajjotcugñhuipy ajcxy.

Oy'ajt müd Cristo ycixpi

⁴ Nyajñajxypich Dioscojuyip ma Dios jabom jabom müd miich ajcxy ycixpi, müd co Dios may'ajt oy'ajt ti tuñ müd miich ajcxy ycixpi ma Jesucristo. ⁵ Co ti mmijpidaaccixy Jesucristo, oybi ti mbaatcixy ma tüg'óciy mdzinaayin mjuy'ajtñ. May'amy capxy ayuc oybi ti mbaatcixy, etz may'amy huinma'ñ oybi ti mbaatcixy. ⁶ Ma miich ajcxy mdzinaayin mjuy'ajtñ etz mgapxy m'ayuc ñiguëñigipy Cristo ytiy'ajt etz ymic'ajt. ⁷ Dios miich ajcxy ti xymöy tüg'óciy ymic'ajt. Ca' ti myajtigoy'ijtcixy ma mdzinaayin mjuy'ajtññ hidibi Dios ñiyejcpy, ma je' m'ahuixxcixy co Dios yajniguëñiga'ñ jadüg'oc ya naax-huiññ ajt nHuindzin Jesucristo. ⁸ Jesucristo miich ajcxy xyhuijtz'ijtp tudägy, ixti cooni ycixipy tigoyipy je naaxhuiññybi, e co anajty yi' tyduññ naax-huiññjäy ajcxy müd ypocy ycixpi, ca' miich ajcxy mbocycähuiy. ⁹ Dios yjatyñmcyudunipy yi' y'ayuc müd miich ajcxy, ca' xy'ixmadzaangixy ni mina xii, com yi' ti xyhuin'ijxcixy co müd mnaymigüg'áñtigixy yi' y'ung, ñich ajt nHuindzin Jesucristo.

Naybijc-huäcxii ma je mibijcpidijc

¹⁰ Migügtijc, ñich miich ajcxy nmñuextacyp müd Jesucristo yxi co tungixy may'ajt nay'ayuc-huinjihuiñyigix, e ca' mnaybijc-huäcxigixy. Tzinaaygix xic xon müd tú'ciy mjot mhuinma'ñ. ¹¹ Miich ajcxy migügtijc, ti je Cloé y'amigügtijc xyajñimäyich co ooy miich ajcxy mnaychp'ijxcigixy, e ca' mnay'ayuc-huinjihuiñyigixy. ¹² Müd jada ycixpi mnina'ñich co nijëjity miich ajcxy jadu'n mñaangixy: "Ñich Pablo nmijnixpejtpyich." E nijëjity ymñaangixy: "Ñich Apolos nmijnixpejtpyich." E nijëjity ymñaangixy: "Ñich Pedro nmijnixpejtpyich." E nijëjity ymñaangixy: "Ñich Cristo nmijnixpejtpyich." ¹³ ¿Nej Cristo ti ñaybijc-huäcxiiñij? Ca'. ¿Nej Pablo yajcruudzpejti müd miich ajcxy ycixpi? Ca'. ¿Nej ti miich ajcxy mnñbejtcixy müd Pablo yxi? Ca' yjadu'nity. ¹⁴ Nyajñajxypich Dioscojuyip ma Dios co ca' jac ni pin ñich ti ngayajñibety. Jëda'ajty ti nyajñibetyich Crispo etz Gayo. ¹⁵ Jadu'n ti nduññijc'gejixpi co ca' huaad jäy ajcxy ymñaangixy co ti ajcxy ñibety müd Pablo yxi. ¹⁶ Nañ jadu'n ti nyajñibetyich yi' Estéfano müd yi' yjuugy ymigüg ajcxy. Jac ni je' ca' njäymechich pen ti nyajñibetyich. ¹⁷ Com Cristo ca' xyquejxyich jäy yajñibejtpi. Hue' janchtiy ti xyquexyich

co ngapxhuäcxibich yi' y'ayuc ytiy'ajt oybi. Ca' nyajtuñich ixpicytije y'ayuc yhuinma'ñ. Co ixypiy nyajtuñich ixpicytije y'ayuc yhuinma'ñ, naadig'ajt ixypiy co Cristo y'o'cy ma yi cruudz müid ajt nbocy ycixpi.

Cristo ymüid Dios ymic'ajt etz yi' y'ixpjcín etz ytiy'ajt

¹⁸ Yi jäy ajcxy huidibi y'alma tigoyam, loci huinma'ñ yi' tijcixy co Cristo y'o'cy ma yi cruudz müid ajcxy ypocy ycixpi. Per ich ajt pinjaty y'alma nüzögam, hue' minaanim co jada ayuc tiy'ajt müid Cristo ycixpi, ymüid yi' Dios ymic'ajt. ¹⁹ Com jaybety jadu'n ma Dios ñecy, ma Dios jadu'n ymina'ñ:

Nyajtigoyaamybich yi' ixpicytije y'ayuc yhuinma'ñ.

Njibjicibich yi' cohuinma'ñyäjdyjc ajcxy yhuinma'ñ.

²⁰ ¿Ti mic'ajt ymüid yi' cohuinma'ñyäjdyjc ajcxy? ¿Ti mic'ajt ymüid yi' ixpicytije? ¿Ti mic'ajt ymüid yi' huidibi ajcxy nay'ixquipxip müid ixpjcín? Ca' ti mic'ajt müidity yi' ajcxy, com Dios ti yaj'ahuimbity yi' naaxhuiñ y'ixpjcín tzuu huinma'ñ loci huinma'ñ. ²¹ Com Dios jadu'n ti tzocy co jäy ajcxy ca' padaangixy Dios ytiy'ajt ma yi' naaxhuiñjäy ajcxy y'ixpjcín. Dios yjäygidacpy co jébi jäy ajcxy y'alma nüzögipy co ajcxy mibigipy je Dios y'ayuc huidibi ngapxhuäcxypich. Je Dios y'ayuc ytiy'ajt huidibi ich ajcxy ngapxhuäcxpy, yi' yi' naaxhuiñjäy ajcxy huinjihuigixyp nej tzuu huinma'ñ loci huinma'ñ.

²² Yi judíojäy ajcxy ooy tzachtzojccixy co Dios tunipy ijxpejt mjhuinma'ñybi. Yi griego jäy y'ixtaaygixyp ayuc huinma'ñ etz huenhuidibity ixpjcín. ²³ Ich ajcxy ngapxhuäcxich co Cristo y'o'cy ma yi' cruudz müid jäy ajcxy ypocy ycixpi. Yi maybi judíojäy ajcxy ca' mijpidägaangixy ca' cöbigaangixy ich ajcxy n'ayuc. Etz yi' maybi jäy ajcxy huidibi ca'p yjudíojäyity, hue' tijcixy co tzuu huinma'ñ loci huinma'ñ ich ajcxy n'ayuc. ²⁴ Per yi' jäy ajcxy huidibi Dios ti yhuin'ixigixy, huen yjudíojäyity, o huen ycajudíojäyity, hue' ajcxy tijcixy co je Cristo ymüid anajty Dios ymic'ajt etz ymüid anajty Dios y'ayuc ytiy'ajt. ²⁵ Co ixpicytije tijcixy co Dios ytung, tzuu huinma'ñ loci huinma'ñ je', nigi jac'oyhuinma'ñ yi' huidibi Dios tummyb, ca'ydi' huidibi jäy ajcxy ytummyb. Co ixpicytije yminaangixy co Dios ca' ymic'ajt müidity, nigi jacmic'ajt müid yi', ca'ydi' huidi jäy ajcxy ymüid.

²⁶ Migügtije ajcxy, huinmay müich ajcxy jadu'n nej Dios ti xyhuin'ijxcixy. Ni may müich ajcxy huidibi ca' y'ixpicyity, tim nihueeni' huidibi ixpicyip ma müich ajcxy. Ni may müich ajcxy huidibi ca' ti mic'ajt, ca' ti ane'min müidity. Ni hueeni' müich ajcxy huidibi mic'ajt müid etz ane'min müid. Ni may müich ajcxy huidibi oyñipinjäyity. Ni hueeni' müich ajcxy huidibi y'ap yteedy rey'ajtp. ²⁷ Per Dios ti huin'ixy yi' jäy ajcxy huidibi ca' y'ixpicyity co jadu'n yajtzo'yduna'ñ yi' ixpicyjäy yi' cohuinma'ñjäy. Dios ti huin'ixy yi' jäy ajcxy huidibi ca' ti mic'ajt müidity, müid co jadu'n yajtzo'yduna'ñ yi' jäy ajcxy huidibi mic'ajt müid, ane'min müid. ²⁸ Dios ti huin'ixy huidibi jäy ajcxy ca' mij'ijx mijpidaaccixy, huidibi jäy ajcxy ytiypy co ca' y'oyity. Dios jadu'n tuuñ co yajcödigoya'ñ yi' huidibi jäy ajcxy mij'ijxp mijpidacp, je huidibi jäy ajcxy ytiypy co y'oyity. ²⁹ Jadu'n Dios ytuñ co ca' tzocy co ni pinjäy ca' ñaygömayyib c'i'm ma yi' yhuinduu. ³⁰ Per Dios c'i'm yaj'oyyij nej jébi müich ajcxy myajpatcixy müid Cristo Jesús. Dios c'i'm yaj'oyyij nej jébi ajt nbaatim ixpjcín ma Cristo. Nañ jadu'n yaj'oyyij nej jébi Cristo xyaj'ahuimbijtim tudägy, jaydébi Dios xycöbójcím nej tudägy jäy. Nañ jadu'n Dios yaj'oyyij nej jébi huaad nbaatim ajt nhuädzjot nhuädzhuinma'ñ ma Cristo. Nañ jadu'n Dios yaj'oyyij nej jébi Cristo xyñhuaanim ajt n'alma etz njugy'ajtín. ³¹ Paady ycixpi jaybety ymiñ ma Dios

ñecy, ma jadu'n ymina'ñ: "Pinjaty naygömayaanip ci'm, huen naygömayii müid co mibicy ajt nHuindzin Dios."

2

Je y'ayuc ytiy'ajt, je Cristo huidibi cruudzpejt

¹ Per co n'oyich ma miich ajcxy jayhuin, ngapxhuäcxyich anajty Dios y'ayuc ytiy'ajt, oy'amy nyaj'ixpijcyich, ca' nyajtuñich ixpijcyäy ajcxy y'ayuc, etz nañ jadu'n ca' nyajtuñich tzipjatypi ayuc. ² Co jim n'ijtyich ma miich ajcxy jayhuin, chi nhuinma'ñybidacyich co ca' jac ti ayuc ti huinma'ñ nyajmüidmiydägaangixy, jë'yi janchtiy nyajmüidmiydägaangixy Jesucristo etz jadu'n nej je' yajcruudzpejti müid jäy ajcxy ypocy ycixpi. ³ Co jim iich anajty nyajpaadyich ma miich ajcxy, chi ooy yung naxy naybidaacich, ooy ndzigüy njihuiyich. ⁴ E co nmüidmiydaacyich miich ajcxy, co ngapxhuäcxyich Dios ytiy'ajt ma miich ajcxy, ca'pi iich miich ajcxy nyajmibicy müid ixpijtyic y'ayuc müid tzipjatypi ayuc. Je Espíritu Santo xypubejtpich anajty co ajcxy nyaj'ijxy Dios ymic'ajt, e paady ycixpi ti ajcxy mmibijccixy Dios y'ayuc. ⁵ Jadu'n je Espíritu Santo xypubetyich anajty, jigix miich ajcxy mijpidägipy Dios, ca' nmüidmiydaacyich müid co ti nmüidmiydaacyich ooyjatypi ayuc huidibi jäy ajcxy ti cojy ti macxy. Ti mmüidmiydaacyich Dios com ti m'ijccixy ti mjihuiyigixy Dios ymic'ajt.

Dios xyajnejhuüyim yi' ytiy'ajt müid y'Espíritu Santo

⁶ Oy co ti nyajmibicyich miich ajcxy müid ayuc huidibi ca' chipjatyty, per nañ jadu'n nyaj'ixpijcyich ooyjatypi ayuc tzipjatypi ayuc yi mibijcpidijc ajcxy tiibi yhuinma'ñ ymiinni ymejchni. Tigachjaty iich n'ayuc ndiy'ajt e ca' ñaybadyii müid naaxhuiñyäjy ajcxy y'ayuc ytiy'ajt huidibi ca' mibijccixy huidibi tzinaayb jugy'ajtp jadachambi xü jadachambi tiempo. Iich n'ayuc ndiy'ajt ca' ñaybadyii müid je jäy ajcxy y'ayuc ytiy'ajt huidibi ane'mb ya naaxhuiñ, yi jadu'mbi jäy yi' ajcxy yjugy'ajtin cixamb tigoyamb tücc'yi. ⁷ Iich ajcxy nyaj'ixpijcpy Dios y'ayuc ytiy'ajt huidibi ca' ni pin jecy'ajty nejhuüy huinjhuüy, je ayuc tiy'ajt huidibi Dios ymüid coyüch, je ayuc tiy'ajt huidibi Dios ti cojy ti macxy jecy'ajty ca'ni anajty naaxhuiñyibi chondacy. Dios ycoj ymacx jada ayuc, jaydébi ajt n'alma ñidzoocim huinixü huinitempo. ⁸ Ni tüg mij'ane'mbi huidibi tzinaayb jadachambi xü jadachambi tiempo, ca' huinjhuüy jada ayuc. Co ixipy ajcxy huinjhuüy, ca' ajcxy cayajcruudzpejty je Huindzin Dios y'ung, je huidibi müid Dios y'oy'ajtin ymij'ajtin. ⁹ Com ca' ajcxy huinjhuüy Dios y'ayuc, paady ycixpi jaybety ymiñ ma Dios ñecy, ma jadu'n ymina'ñ:

Ni tüg jäy ca' icy, ni tüg jäy ca' midoy, ni tüg jäy ca' yhuinma'ñybaady jadu'n nej Dios ni'ixiy müidity müid je jäy ajcxy ycixpi huidibi yi' mijpidaacip yajmij'ajtip.

¹⁰ Müid co nmüidmiydaacyich Dios, paady ycixpi Dios yaj'oyüy nej jëbi je Espíritu Santo xyajnejhuüyim yi' ytiy'ajt. E je Espíritu Santo yhuinjhuüydaayb ñejjihuiydaayb tüg'óciy, ixti yhuinjhuüydaayb nej Dios yhuinma'ñ ti pidägy co tuna'ñ, je huidibi ca' pin nejhuüy.

¹¹ Ca' pinjäy jëbi huinjhuüy nej jadügpä jäy yjot yhuinma'ñ müidity. Je jäy yaj'pnhuinma'ñ jëbi huinjhuüy nej je' yci'mjot yci'mhuinma'ñ müidity, ca' jac pin. Nañ jadu'n ca' jac pin jëbi huinjhuüy nej Dios yjot yhuinma'ñ müidity. Dios yci'mjihui'ñ huinjhuüy nej Dios yjot yhuinma'ñ müidity.

¹² Dios ca' xyaj'adigüyim xyajjottigüyim huingjäy yjihui'ñ ymic'ajt. Hue' Dios

xyaj'adigiiyim xyajjottigiiyim yi' yci'mjihui'n yci'mmic'ajt, paady ycixp jëbi nhuinjihuiyim tüg'óciy huidibi ti xymooyim. ¹³ Hich ajcxy nyajmídmíyadacpy miich ajcxy je ayuc tiy'ajt huidibi je Espíritu Santo xyaj'ixpijccixyich. E ca' nyajmídmíydaaccixy je tiy'ajt huidibi ti n'ixpicycich ya naaxhuiñ huidibi jäy ajcxy ti cojy ti macxy. Nyaj'ixpijccixy Dios y'ayuc ytiy'ajt huidibi je Espíritu Santo xyajnejhuiyich. Hich ti nyaj'ixpicycich yi' ajcxy huidibi míd Dios yjihui'n ymic'ajt ma y'aa yjot.

¹⁴ Pinjaty ca' mídity Dios yjihui'n ymic'ajt, ca' yi' cöbiga'n je tiy'ajt huidibi je Espíritu Santo xyajnejhuiyim. Com yi' ajcxy ytijp co jada tiy'ajt tzuu huinma'n loci huinma'n yi'. Nañ ni ca' ajcxy Dios ytiy'ajt huinjihuuyi, com ca' ajcxy mídity Dios yjihui'n ymic'ajt huidibi yajnejhuuyb Dios ytiy'ajt. ¹⁵ Je jäy huidibi ymídmíyadajpy Dios yjihui'n ymic'ajt, yi' jëbi yajciyöy yajtecyöy tüg'óciy pinjaty yjot yhuinma'n. Per ca' yi' huaad pinjaty yajciyöy yajtecyöy yjot yhuinma'n. ¹⁶ Com jadu'n Dios ymína'n ma ñecy: “¿Pin jäy huinjihuuyb nej Dios yhuinma'ñymídity? Ca' ni pin. ¿Pin jäy huaad Dios yaj'ixpicy? Ca' ni pin.” Oy ca' pin huinjihuuy jecy'ajty nej Dios yhuinma'ñymídity, jadachambi hich ajt nhuinjihuiyim nej Cristo yhuinma'ñymídity.

3

Je huidibi ajcxy mibijcp ytungixy ma Dios

¹ Migügtjic ajcxy, co ti n'oyich ma miich ajcxy, chi nmídmíydaaccixy jadu'n nej jihuiy miich ajcxy mhuinma'ñymídity nej naaxhuiñy jäy ajcxy yhuinma'ñymídity huidibi ca' ymibijccixy. E ca' anajty miich ajcxy mídity je mhuinma'ñ huidibi je Espíritu Santo yejcyp. Miich ajcxy mmibijcin ma Cristo jadu'n yi' nipaady nej ma'xungdjic ymibijcin. ² Ti nyaj'ixpijccixy Dios y'ayuc huidibi ca' jëbi tzip mhuinjihuuygixy. Jadu'n nipaady nej jäy ajcxy yaj'ügy leche yi' ma'xungdjic, míd co cacöbiga'n caayin uucin huidibi jemxy cidacp ma yjot. Ca' miich ajcxy anajty ti mnayñi'ixiiyigixy ma mjot mhuinma'ñ nej jëbi mhuinjihuuygixy Dios y'ayuc yi' tzipjatypi. Chambaadni ca' mnayñi'ixiiyini ajcxy ma mjot mhuinma'ñ nej jëbi mhuinjihuuygixy yi' tzipjatypi ayuc. ³ Chambaadni miich ajcxy myajtuñ mjot mhuinma'ñ jadu'n nej naaxhuiñjäy ajcxy mídity huinma'ñ ca'pi ymibijccixy, chambaad mmi'ijxtinaaygix yi' migügtjic, chambaad mnaychip'ixixigix naybijc-huäcxigix. Jadu'n m'idüztzcixy nej jacjadyii jäy ajcxy y'idüztzcixy huidibi ca' ymibijccixy. ⁴ Com nijëjity miich ajcxy minaangixy: “Hich naygomajtzip ma Pablo.” Etz nijëjity minaangixy: “Hich naygomajtzip ma Apolos.” Jada je tiy'ajt co ca' mnay'ayuc-huinjihuiyigixy tim jadu'n nej jäy ajcxy ca' nay'ayuc-huinjihuiyigixy huidibi ca' mídity Dios yjihui'n ymic'ajt.

⁵ ¿Pin je' je Apolos? ¿Pin je' je Pablo? Hich Pablo etz Apolos nimetz ajcxy nduñ ma Dios ytung, e hich miich ajcxy nyajmibijccixy Cristo. Hich ajcxy nduñ nidüg nidüg je tung huidibi Dios xymooyich. ⁶ Hich jayijp'aty miich ajcxy ti nyaj'ixpicycich, e Apolos jac'axam. Jadu'n miich ajcxy nipaady nej tüg moc cam huidibi hich ti nnipy, e Apolos jac'axam ti pidägy ni. Per Dios ti yajyeegy je moc. ⁷ Ca' ytimyñejity pin ti yñipy, e pin ti pidägy je ni. Dios yi' tügpajc copicyip. Com yi' yajyeec je moc. ⁸ Yi' huidibi niip etz yi' huidibi ni pidac, quipxyjaty ajcxy. Dios yegamb je oy'ajt ma nidüg nidüg jadu'n nej anajty ti ytungixy. ⁹ Com hich etz Apolos naymüg'ajtibich ajcxy ma Dios ytung. Jadu'n miich ajcxy nipaady nej Dios ycam huidibi Apolos ti tuñ etz huidibi hich ti nduñ.

Nañ jadu'n miich ajcxy nipaady nej tüg tjc huidibi Dios ycojpy. ¹⁰ Dios ti xyajñibicyich yí' ytung ndunipyich. Ti nyaj'ixpicicyich miich ajcxy Dios y'ayuc ytiy'ajt. Jadu'n iich nipaady nej tüg pojtzpi oybi huidibi ti yajtzondägy je tzaadijc poch. Chi huingjäy xyjacyaj'ixpijccixy. Jadu'n yí' nipaady nej huingbi pojtzpi huidibi je tzaadijc poch jacijjppodzïyb. Copicy co nidüg nidüg huidibi yaj'ixpijcp Dios ytiy'ajt yajxon yaj'ixpijccixipy. ¹¹ Dios ti pidägy Jesucristo tügpaçc huidibi huaad nmibijcim, e ca' huaad pidacy huingbi. Jadu'n Jesucristo nipaady nej tüg tjcpoch chondägy. ¹² Co pinjaty yaj'ixpicicy Dios y'ayuc ytiy'ajt tiydudägy, chi jadu'n nipaady nej jihuïy pinjaty tijcpojtzp müid ori, müid plata etz müid tzaa oyjatypi. Pinjaty ca' yaj'ixpicicy yajxon Dios ytiy'ajt, jadu'n nipaady nej jihuïy pinjaty tijcpojtzp müid quipy, müid miy, etz müid moc'aay. ¹³ Jiini co anajty xïi tiempo paady mina Cristo tiyduna'ñ yí' yjäy huin'it ñiguëxigipy nej Dios ytumbi ajcxy ti ytungixy co ti yaj'ixpijccixy. Niguëxigip pen oy ti yaj'ixpijccixy Dios ytiy'ajt, o pen ca' oy ti yaj'ixpijccixy. Jadu'n nipaady nej Dios jün pidägy ma je tjc, e je quipy, je miy, etz je moc'aay tigoydähuiipy ma je jün. Etz je ori, plata etz tzaa oyjatypi ca' ytigoydähuiipy müid je jün. ¹⁴ Peni oy yajxon pinjaty ti yaj'ixpicicy Dios ytiy'ajt, chi Cristo premio möhua'ñ jada jäy co ooy yajxon ti yaj'ixpicicy. E jadu'n yí' ytung nipaadip nej je ori, plata, etz tzaa'oyjatypi huidibi ca' ytiy'ajt ma je jün. ¹⁵ Pen je Dios ytumbi ca' oy yajxon ti yaj'ixpicicy Dios y'ayuc ytiy'ajt, chi ca' premio pada'ñ. Jadu'n yí' ytung nipaadip nej je quipy, je miy, etz je moc'aay huidibi ti ytigoy ma je jün. Jadu'n nipaadip müid jada jäy nej jihuïy ti ñaxy jünjoty, e ti ytigoydäy ma je jün tijaty ymüid, je' yí' yjugy'ajtin ti yajtzögy.

¹⁶ ¿Nej ca' mnejhuïyigixy? Pen Dios yjihuï'ñ ymic'ajt yajpat ma miich ajcxy, jadu'n nipaady nej jihuïy Dios c'i'm ti chinaydacpicy ma miich ajcxy, nej jihuïy miich ajcxy Dios xytijc'adyii. ¹⁷ Pen ji pinjaty huidibi yajhuindigoy Dios chinaydac, huin'it Dios yajtigoya'ñ jada jäy. Yí' Dios chinaydac huädz'it amay'it yí', com Dios ti chinaydacpicy ma miich ajcxy huidibi mibijccixp.

¹⁸ Ix mnayhuin'ñinigix c'i'm. Pen nidügti miich ajcxy mnaydijyii co oy ixpicicyty ma naaxhuin'ñyäj y'ixpijcin, copicy jäydigoyipy yí' y'ixpijcin, jigix ixpijipy Dios ytiy'ajt. ¹⁹ Yí' naaxhuin'ñyäj y'ixpijcin jadu'n nipaady müid Dios nej tzuu huinma'ñ loci huinma'ñ. Paady jadu'n yjaybetyity ma Dios ñey ma jadu'n ymina'ñ: "Dios yajpocycähuiip yí' ixpicityjic müid yci'm'ayuc müid co chachnayömayii." ²⁰ E jadu'n yjaybetyity jadüg'it ma Dios ñey ma jadu'n ymina'ñ: "Je Huindzin Dios ñejhuïyb co yí' ixpicityjic y'ayuc yhuinma'ñ ca' choobaady." ²¹ Ni pin ca' huaad amij agix ñayjihuiyii, müid co mijnicxpety oyñipin y'ayuc. Miich ajcxy müid'ajttaayb tüg'öciy tijaty. ²² Miich ajcxy müid'ajtpy Pablo, Apolos etz Pedro. Nañ jadu'n miich ajcxy müid'ajtpy je naaxhuin'nybi, je tzaap, je jugy'ajtin, je c'in, je xïi je tiempo huidibi ji yajpatp, etz huidibi mim cidaacp. ²³ Je Cristo müid'ajtpy miich je' ajcxy c'i'am etz Dios ymüid'ajtpy Cristo c'i'am.

4

Je apóstoles ajcxy ytung

¹ Jëbi jadu'n co iich etz Apolos, iich miich ajcxy xytijcixy Cristo ytumbi huidibi Dios ti xyajñibijccixyich, nyaj'ixpijccixyich etz nguend'ajtcixyich yí' y'ayuc ytiy'ajt huidibi jecy'ajty ca' pin nejhuïy huinjihuïy. ² Pinjaty cuend'ajtp huingjäy yje', copicy tiydudägy ytunipy, jaydëbi yí' yhuindzin yjäygidägyib

yi' ytung. ³ Per ca' ooy nduñich cuendi co miich ajcxy xyajcüyöy xyajte-cyyöy ñich nbocy. Nañ jadu'n ca' ooy nduñich cuendi co ixypy tüg juez yajcüyöy yajteccyöy ñich nbocy. Nañ jadu'n ca' nyajcüyöyich nyajteccyöyich ngi'mbocyich. ⁴ Ca' nayjihuiyijich co nmidundi-gooyich miich ajcxy. Ca' jadu'n nmína'ñich co ca' ma ndundi-gooyich. Hue' ajt nHuindzin Jesucristo yi' je' xyajcüyöyip xyajteccyöyip ñich nbocy, ca' jac pinjaty. ⁵ Paady ycixpi ixmajtcix jadu'n nej miich ajcxy xypocy'ijxcixy jayijpni ma ca'ni Jesucristo ymiñ jadüg'oc ya naaxhuiñ. Ahuijxcix co Jesucristo yajniguëxígaani je jäy ajcxy ypocy huidibi cham ca' ñiguëxígy, huidibi jadu'n nipaady nej jihuiy yüch y'ity agootztuuby. Jesucristo co anajty ymiñ jadüg'oc, chi yajniguëxígyip nej jäy ajcxy yjot yhuinma'ñ müidity. E Dios nidüg nidüg jäy cömaya'ñ pen oy ti ytuñ, e ca' cömaya'ñ pen ca' oy ti ytuñ.

⁶ Migügtijc ajcxy, ci'm ti naybidägyiijich müid Apolos jadu'n nej tüg ijxpejt ma jada tiy'ajt huidibi cham ti nyajnijayiygixp. Jadu'n ti nduñich müid miich ajcxy m'oy'ajtin ycixpi, jigix jébi miich ajcxy m'ixpijccixy jadu'n nej jébi mguydundaygixy Dios ytiy'ajt, e ca' mjaactungixy huidibi Dios ycapxcódujc ma ñecy. Nañ jadu'n ñich ti nduñich müid Apolos nej tüg ijxpejt, jigix miich ajcxy ca' mnaygömayiyb ci'm, e ca' mmínaangixy co mnaygomájtzigixy ma tüg Dios ytumbi, e jadüg m'ixtijcixy. ⁷ ¿Pin ti xyajnajxcixy jadu'n nej jihuiy ajcxy ooy mgömayity? Ca' ni pin. ¿Ti miich ajcxy müidity, huidibi Dios ca' ti xymooygixy? Ca' ni ti. E pen Dios ti xymooygixy tijaty ajcxy mmüidity, ¿na'amy co mnaygömágyigixy ci'm, jadu'n nej jihuiy ci'm ti mganar'ajtcixy tijaty ajcxy mmüidity?

⁸ Jadu'n miich ajcxy mnaybidáacigixy nej jihuiy ti mgüxigixy, nej jihuiy ti mgomeeñygojcixy, nej jihuiy mrey'ajtcixy, e ca' mdzojccixy co nyaj'ixpigipyich. ⁹ Miich xytijcixyich nej jihuiy ñich ajcxy apóstoltijc Dios ti xypidaaccixich nej huidibi ca' ytimcapxpaadyity, nej huidibi ypocy co'ögüyb, co ángeles ajcxy etz jäy ajcxy xyñixíccixyich xyñiyáaxcixyich. ¹⁰ Miich ajcxy xytijcixyich co ñich ajcxy apóstoltijc jadu'n nej jäy tzuu locip co ndúngixyich müid Cristo ycixpi. E miich mnaybidáacigixy co ayuc cohuinma'ñ co ti mmibijccixy Cristo. Miich ajcxy xytijcixyich co ca' ti mic'ajt ajcxy müidityich, e miich ajcxy mnaybidaacip nej jihuiy ooy ti mmicpijccixy, nej jihuiy ooy mgömayity, e ñich ajcxy ca' nyaj'ixaangixyich. ¹¹ Chambaad ñich ajcxy nyubögyiijich etz ndidziyijich. Minaajity n'ijtcixyich ca' ñich ajcxy nhuit. Jäy ajcxy xyñi'ojiygixyich etz xyhuingojxy xyijjpcóxcixich, ni ndijc ñich ajcxy ycaca'tcixy. ¹² Ndúngixyich xuuyi müid ngi'm ngijich. Co pinjaty xyñi'ojiygixyich, chi n'adzóogixyich müid oy ayuc. Co ñich ajcxy xy'ixhuidityich xypahuidityich, ooy nmexxtüjccixyich yi tzaachypi. ¹³ Co pinjaty jibic xyñigápccixyich, chi huinma'ñ ixtáaygixyich oy'amy müid mecxtujcin n'ihuijccixyich ngapxhuíccixyich nej jébi y'ayuc-huinjihuiygyixy. Ca' naaxhuiñyäjy ajcxy xychóccixyich. Ixti chambaad jadu'n ajcxy xy'ijxcixyich nej püx, jadu'n ñich ajcxy nipaady nej jibicpi huidibi ca' jäy ajcxy tzocy.

¹⁴ Ca' ñich miich ajcxy nyajnijayiy jada ayuc co nyajtöydunaangixy. Hue' janchtiy jada ayuc nyajnijayiyb ajcxy co ngapxhuíjángixy. Jadu'n ndzojccixy njihuiygyixy nej ndzocyich njihuiyich ngi'm'ung. ¹⁵ Oy ixypy yjanchity co miich ajcxy müid majc mil huindzindijc huidibi xyaj'ixpijccixy Cristo ytiy'ajt. Per tügajcpi je mhuindzin huidibi oga'n xyajmibijcy ajcxy Cristo, ca'

nan canaag. Hich jadu'n oga'n ti nyaj'ixpicyich miich ajcxy Jesucristo ytiy'ajt nej jēbi ajcxy m'alma nīdzōgipy. Paady ycixpi jadu'n iich nipaady nej miich ajcxy mdeedy ma mmibijcin. ¹⁶ Hich miich ajcxy nimaayb mictāgy, com ti nyajmibijccixy Cristo oga'n, paady cuydungix ajcxy Dios ytiy'ajt, jadu'n nej iich nguyduñich.

¹⁷ Paady ycixp nguexyich Timoteo ma miich ajcxy. Yi Timoteo ooy ndzocyich ooy njihuñyich. Ti iich Timoteo nyajmibicyich Cristo, e ooy xycapxymidooyich yajxon, jadu'n yi' nipaady nej ngi'm'ungich. Yi Timoteo xyajjāymedzip miich ajcxy je ayuc je ty'ajt jadu'n nej nyaj'ixpicyich ma tūg'ōciy cajp ma yi jāy nāymūjcigixy huidibi mijpidaaccixp Jesucristo. ¹⁸ Cham nije' nije' miich ajcxy amij agix mnyajjihuiyīi co jadu'n mīnaangixy co ca' nicxy n'ixa'ñich miich ajcxy jadūg'oc. ¹⁹ Per ca' jadu'n mīnaangixy co ca' nnicxa'ñich ma miich ajcxy. Tzojc nīcxibich ma miich ajcxy, pen Dios jadu'n tzojcp. Co anajty jim nmechich, huin'it ca' n'amīdoo'ida'ñich yi' ajcxy y'ayuc huidibi amij agix nayjihuiyīp. Hue' janchtiy nejhuñhua'ñich pen ymiid yi' ajcxy Dios ymic'ajt chōg'ajt. ²⁰ Pinjaty miid Dios ymic'ajt Dios chōg'ajt, je' yajniguēxīcp Dios y'ane'mīn. Pinjaty miid oyñiti ayuc, ca' je' yajniguēxīgip Dios y'ane'mīn. ²¹ Co nīcxibich jim ma miich ajcxy, ¿ti ajcxy mdzojccixyp ndunipyich? ¿Nej oy nminīcxibich ma miich ajcxy tūg matz jigix ajcxy nhuōjpcixipy? o ¿Mdzojccixyp co nīcxibyich ma miich ajcxy miid yungnaxy njot nhuinma'ñich, etz oy'amy ajcxy nmigapxipy, jadu'n nej jihuiy ooy ndzojccixy njihuñyigixy?

5

Moy ajcxy castigo tūg jāy huidibi anajty ti ytundigooy

¹ Mayjāy nejhuñy co ma miich ajcxy jim tūg yēydijc huidibi tundigooyb miid tūg tōxyjāy. Nīgi yi' ytundigooy ca'ydi huīdi ajcxy ca' Dios y'ayuc mijpidaci. Ti nnejhuñyich co jim tūg yēydijc huidibi mīddzīnaayb ycoo'uu. ² Jim miich ajcxy mīdity je mijpocytumbi, e miich ajcxy amij agixy mnyajjihuiyīgixy co ajcxy mdzach'ixpicyity ma Dios ytiy'ajt. Jac'oy co ixipy mdajcixy mmyagixy. Yajpidzīngix ma miich ajcxy yi' jāy huidibi jadu'n tundigooyb. ³ Ca' ytimyñejity co ca' nyajpaadyich jim ma miich ajcxy. Jadu'n nipaady nej jihuiy iich njimity, miid co ooy njihuñyich nej miich ajcxy mjajtciy m'ayoogixy. Paady ycixpi ti nyajpocycāyich miid Jesucristo y'ane'mīn yi' jāy huidibi jim ooy mij ytundigooy, tim jadu'n nej ixipy jim nyajpaadyich ma miich ajcxy. ⁴ Huomujtaaygix yi' mibijcpidijc, e jadu'n nipaadipy nej jihuiy iich njimity quipxyi miid miich ajcxy. Huin'it miich ajcxy mīd'ajtciixipy ajcxy ajt nHuindzin Jesucristo y'ane'mīn ymic'ajt. ⁵ Miid je ane'mīn mic'ajt huīdibi Jesucristo ti xymōyich, myajpidzimipy je pocytumbi ma miich ajcxy. Jadu'n mijhuin nipaadipy nej jihuiy myajcidīgīyigixy je mujcu', jaydēbi yi' nīnīcx ytigoyipy, per je' y'alma nīdzōgip mīna anajty iich ajt nHuindzin Jesús yhuimbity ya naaxhuñ jaydēbi tydunipy jāy ajcxy miid ypocy ycixpi.

⁶ Ca' mnyagōmāayigixy cī'm miid huīdibi mdungixyp. ¿Nej ca' mnejhuñyigixy nej jāy mīna'ñi co levadura huīdibi ca' y'oyity yajhuindigooyb tūg'ōciy yi' harina jich? ⁷ Jadu'n je pocytunī nipaady nej levadura huīdibi ca' y'oyity, paady ycixpi yajtigooygix je pocytunī nej anajty mdundigōoygixy taabi anajty ajcxy ca'ni mmibijccixy. Jadu'n mdūngixipy, jigix jēbi m'ljtcixyp huādz ca' ma pocy. Co jadu'n mdūngixipy, jadu'n nipaadip miich ajcxy

nej tzajcaagy oyjatyꝑi. Nejhuhꝑbich co miich ajcxy ti mbocyñhuatzcixy, com Cristo nayyejci huen yaj'ögyii müid ajt nbocy ycixꝑi. Jesucristo jadu'n nipaady nej ajt ngöbixy mang huídibi müid nhuindzigiꝑim Dios müid ajt nbocy ycixꝑi. ⁸ Tzoc tzinaayim müid huädz njot huädz nhuinma'ñ, jadu'n nipaady nej judíoꝑäy co ajcxy amay'ajtcixy yi pascua xü. Tzoc yajtigooyim ma ajt ndzinaayin njugy'ajtin yi jibic jot jibic huinma'ñ. Tzoc cuydunim Dios ytiy'ajt.

⁹ Ti nnijayiygixy jayhuin co ca' huaad migüg'ajtigixy ꝑinjaty huídibi tundigooyb müid töxyjäy ajcxy. ¹⁰ Ca' nan jadu'n nmína'ñich co tücciyi mbuhuäctútcixipy yi naaxhuiñjäy ajcxy huídibi ca' ymibijccixy, huídibi tundigooygixꝑ müid töxyjäydijc, huídibi ooy y'adzojccixy, huídibi ajcxy meetzp, huídibi ajcxy tzaadzech quipychech ojadajtcixꝑ. Co ixypy tücciyi mbuhuäctútcixipy yi naaxhuiñjäy ajcxy, copicy co ixypy müich ajcxy mbidzimgix ya naaxhuiñ. ¹¹ Jayhuin ti nijayiygixy co ca' huaad mnaymigüg'ajtigixy müid yi jäy ajcxy huídibi naydjicigixꝑ co ymibijccixy, je huídibi tundigooygixꝑ müid töxyjäydijc, huídibi ajcxy ooy adzojccixy, huídibi ajcxy ojadajtp tzaadzech quipychech, huídibi ooy ycapxtigooygixy, huídibi ajcxy amügy jäy, etz huídibi ajcxy meetzp. Nañ ni ca' huaad mgaymujccixy m'uucmujccixy müid yi' ajcxy. ¹²⁻¹³ Com ca' yhuaadity co ñich nyajcüyöyipy nyajtecyöyipy yi jäy ajcxy ypocy huídibi ca' mijpidaaccixy Jesucristo. Dios ci'm yajcüyöyam yajtecyöyam yi' ajcxy ypocy. Hue' janchtiy copicy co müich ajcxy myajcüyöyipy myajtecyöyipy yi mibijcpidijc ajcxy ypocy. Yajꝑidzimgixꝑ yi pocytumbi ma müich ajcxy.

6

Tzꝑ capxy ma je juez ajcxy huídibi ca' ymibijccixy

¹ Pen xymidundigooyb tüg mibijcꝑi, ¿nej oy mnayjihuiꝑii co ñicxy mxüy yi nmügü ma yi tungmüdpí huídibi ca' mibijccixy Dios y'ayuc? ¿Cay jac'oy co myaj'abigipy je mibijcpidijc ajcxy, e jim y'oyihuiꝑy je ayuc nej anajty ti xymidundigoy? ² ¿Nej ca' mnejhuüiygixy co yi jäy ajcxy huídibi Dios ti ypocyhuinméecigixy, yi' ajcxy yajcüyöyamyb yajtecyöyamyb yi naaxhuiñjäy ajcxy ypocy huídibi ca' mijpidaaccixy Dios? Pen müich ajcxy myajcüyöyipy myajtecyöyipy yi naaxhuiñjäy ajcxy ymijꝑocy, ¿nej co ca' m'ajajtcixy nej ajcxy myajcüyöyipy myajtecyöyipy yi mibijcpidijc ajcxy ypocy huídibi ca' ytimymij ytimycajeejity? ³ ¿Nej ca' mnejhuüiygixy co müich ajcxy myajcüyöyamyb myajtecyöyamyb ixti yi ángeles ajcxy ypocy? Pen müich ajcxy myajcüyöyamyb myajtecyöyamyb yi ángeles ajcxy ypocy, ñigi ca' chipity co ajcxy myajcüyöyipy myajtecyöyipy yi mibijcpidijc ajcxy ypocy huídibi tzinaayb jugy'ajtp ma jadachambi xü tiempo. ⁴ Pen müich ajcxy mnaymidundigóoyigixꝑ, ¿nej co ñicxy mbidaaccixy yi mxühuin ma yi jäy ajcxy huídibi ca' yajpaady ma müich ajcxy myöymujccixy? ⁵ Jadu'n nnimáaygixyich müich ajcxy, jaydëbi mdzöydu'njihuiñgixy müid jada ycixꝑi. ¿Nej ca' yajpaady ma müich ajcxy ni tüg yëydijc huijy ycuꝑꝑi huídibi jëbi yaj'oyiy je capxy je ayuc ma je mibijcpidijc ajcxy? ⁶ ¿Nej ooy jada ytimycopicyty co yi mibijcpidijc ajcxy ñayxihuigixipy ma je tungmüdpí huídibi ca' mijpidaaccixy Dios?

⁷ Co müich ajcxy mnayxihuigixy ma cajꝑ tungmüdpí, je' je tiy'ajt co ca' ajcxy mguydúngixy Cristo y'ayuc ytiy'ajt. ¿Nej cay jac'oy co mnaymímecxtútcigixipy, ca'ydi co mnayxihuigixy? ¿Nej cay jac'oy co xytigóoyigixipy tijaty, ca'ydi co mnayxihuigixy? ⁸ Ma yjapadyii ixypy

mnaymimécxtújcigixy, chi miich ajcxy ac mibijcpidijc naymidundigóoyigixp, e nañ jadu'n mjanayméetzigixy ti ajcxy ymiid.

⁹ ¿Nej ca' mnejhuuyigixy co yi jáy ajcxy huidibi tundigooyb, ca' ajcxy it lugar padañ ma Dios y'ane'my? Ca' mnayhuin'ingixy, ca' ajcxy it lugar padañ ma Dios y'ane'my yi jáy ajcxy huidibi migapxtigooyb töxyjäydjic, huidibi ajcxy ojadajt p'zaadzech quipychech, huidibi ajcxy migapxtigooyb ymígüg ytöxyjic, huidibi ajcxy adöxyñ'aa. ¹⁰ Ca' ajcxy it lugar padañ ma Dios y'ane'my huidibi ajcxy meetzp, huidibi ajcxy tijaty adzojcp, huidibi ajcxy amügjyá'ajtp, huidibi ajcxy capxtigooyb, etz huidibi ajcxy ayucmihuidijc capxmihuidijtp. Nidüg'ócay yi jáy ajcxy huidibi jadu'n tundigooyb, ca' ajcxy it lugar padañ ma Dios y'ane'my. ¹¹ Jachu'n anajty nijéjity miich ajcxy mdundigooygixy jecy'ajty, per co ti mmibijccxy Cristo, chi Dios ti xyhuin-mecxy ajcxy mbocy, e ti yajhuäch je jibicpi ma ajcxy mjot mhuinmañ, etz mnayyéjicigixy amumdügot ma Dios. Co miich ajcxy mmijpidaaccixy je nHuindzin Jesús yxi e xy'adigüygixy xyjottigüygixy Dios yjihuiñ ymic'ajt, paady ajcxy ti m' ahuimbijtcixy tudägy ma Dios yhuinduu.

Je tudägy'ajtn huidibi ijtp ma ajt ndzinaayin

¹² Janch tiy'ajt nej jáy ymínaangixy co jébi huaad tungixy hueñytiijity huidibi ñijot'ajtcixyp. Per ca' tüg'ócay huidibi jáy ajcxy tuñ y'oyjäydaacnity. Janch jadu'n jébi pinjaty tunipy hueñytiijity, per ca' huaad ymimadägyii je huidibi ajcxy ytumyb. ¹³ Janch tiy'ajt nej jáy ymínaangixy co je jicxy picy ytungbaady ma je jáy y'aa ymöx, e je aa möx ytungbaady miid je jicxy picy ycixpi. Per Dios yajcödigoaymyb je jicxy picy, e nañ jadu'n yajcödigoayañ je jáy y'aa ymöx. Per nañ tiy'ajt co Dios ca' ti yaj'oyiy je yéydjic ñinixc, co midundigooyipy töxyjäydjic. ¹⁴ Dios ti yajjugypicy jadüg'oc ich ajt nHuindzin Jesucristo co y'ocy. Nañ jadu'n Dios miid ymic'ajt co xyajjugypigaanam jadüg'oc co anajty ti n'ocim.

¹⁵ ¿Nej ca' mnejhuuy miich ajcxy co yi mninixc ajcxy Cristo yi' yje'? ¿Nej cay Cristo anajty midundigooybich co nnicxy miidmäyich yi töxyjäy huidibi jibic-huinmañ miid? ¡Ca' jadu'n y'óyity nimina! ¹⁶ ¿Nej ca' mnejhuuyigixy co tüg yéydjic puhuägüy tüg töxyjäy huidibi jibic-huinmañ tumb, tügity ajcxy y'ijtcixy? Com jadu'n yjaybetyity ma Dios ñecy, ma Dios jadu'n ymínañ: "Nimetz y'idaangixy jadu'n nej tügpi ninixc." ¹⁷ Co tüg jáy miid y'ity yi Huindzin Jesucristo, huin'it je jáy yjihuiñ ymic'ajt etz Dios yjihuiñ ymic'ajt y'ijtcixy tú'cay.

¹⁸ Ixmajtciz je jibic-huinmañydunü, ca' mdundigooygixy miid töxyjäy ajcxy jibic-huinmañydumbi. Yi jacjadyii pocy huidi jáy ajcxy ytumyb, ca' yi' ajcxy midundigooy ninixc. Per co ytundigooygixy miid töxyjäy ajcxy, huin'it janchty yci'mninixc anajty ymidundigooygixyp. ¹⁹ ¿Nej ca' mnejhuuyigixy co je Espiritu Santo huidibi Dios xymooyim, ti chinaydacpicy ma miich ajcxy mjot mhuinmañ? Paady ycixpi miich ajcxy ca' ci'm nay'anémigixy. ²⁰ Tzohui Cristo ti cojuy miich ajcxy mbocy, paady ycixpi ooy ycopicyity co oybi mdúngixip miid mninixc, jigix Dios cömay y'idipy miid co oy anajty ti mdungixy.

7

Capxhuijn ma je pijcin

¹ Cham n'adzohuañich je huidibi miich ajcxy ti xyaj'amidoobich ma je necy huidibi ti xyajniuéjxcixyich. Oy jadu'n co tüg yéydjic ca' ypijipy.

² Per com may yëydijc huidibi ooy ytundigoya'ñ mïid töxyjäydijc, paady ycixp jac'oy co nidüg nidüg yëydijc pigipy e mïid'idipy yci'mdöxyijc. E nañ jadu'n jac'oy co nidüg nidüg töxyjäy ypigipy, e mïid idipy yci'm ñäy. ³ Copicy je yëydijc chinähuipy mïid töxyijc nej ypadyii, nan tim jadu'n je töxyjäy chinähuipy mïid ñäy nej ypadyii. ⁴ Com je töxyjäy ca' ane'my yci'mninïcx, hue' ñay'ané'migixy miñ xyipy. Nañ jadu'n je yëydijc ca' ane'my yci'mninïcx, hue' ñay'ané'migixy ymiñ xyipy. ⁵ Ca' huaad je yëydijc nimay je töxyjäy co ca' mïid mähua'ñ mïid poocha'ñ. Nañ jadu'n je töxyjäy ca' huaad nimay je ñäy co ca' mïid mähua'ñ mïid poocha'ñ. Jëbi janchtiy minaaajity ñay'ayuc-huinjihuiyigixy co amay'adaangixy co Dios mibijctzohuaangixy ycapxtägaangixy. Co Dios mibijctzoohuin myajmáygixipy, huin'it jëbi máagixni pócxixni agujc jotcujc, ca'ydí je mujcu' mïmadägyii ajcxy.

⁶ Jada je' tiy'ajt nej jëbi yëydijc müddzinäy ytöxyijc, hue' jada capxhuijin, ca' jada y'ané'minity. ⁷ Jadu'n njadzocyich co miich ajcxy ixypy m'ijtcixy adüg jadu'n nej n'ityich adüg. Per Dios ti xymooyim nidüg nidüg ngi'mhuinma'ñ ngi'mmic'ajt. Paady ji canaagnax jäy yhuinma'ñ, e nidüg nidüg mïid yci'mhuinma'ñ nej ytunaangixy, pen pigaangixp o ca' ypiigaangixy.

⁸ Jada ayuc nyajnimaaaybich yi adügtijc etz yi co ögytjic ajcxy. Jac'oy co ajcxy huen tzinaangixy adüg, jadu'n nej ñich ndzinäyich. ⁹ Pen ca' ajcxy mïmadäga'ñ yi chinaayin adüg, etz nijot'ajtcixy co ypiigaangixy, jac'oy co ypijicixipy. Com jac'oy co ypijicixipy ca'ydí co cuydüngixipy ninïcx chojcïn.

¹⁰ Jada ayuc nyajnimaaaybich huidibi ajcxy ti ypijicixy. Ca' y'oyity co töxyjäy tüg ixmach yí' ñäy. Nañ jadu'n ajt nHuindzin Jesús xymooyim jada ane'min. ¹¹ Co tüg töxyjäy ixmach ñäy, copicy co huen tzinäy adüg, e ca' huaad ypicy mïid huingbi yëydijc. Jëbi janchtiy jadüg'oc pudigiy ñäy. Nañ jadu'n ni ca' y'oyity co tüg yëydijc ixmadzip ytöxyijc.

¹² ñich jada ngi'm'ayuc jada huidibi nyajnimaaaybich je jacjadyii mibijcpidijc. Yi Huindzin Jesús ca' ti ane'min yecy mïid jadayaabi ycixpi. Pen tüg yëydijc mibijcp tzinay mïid tüg töxyjäy huidibi ca' mijpidägy Cristo, jac'oy co ca' ñay'ixmájtzigixipy, pen je töxyjäy jadu'n jotcujc jacmüddzinähua'ñ je yëydijc. ¹³ Nañ tim jadu'n co tüg töxyjäy huidibi mibijcp tzinay mïid tüg yëydijc jotcujc jacmüddzinähua'ñ je töxyjäy. ¹⁴ Je töxyjäy ñäy huidibi ca' mijpidägy Cristo, jadu'n yí' nipaady nej jäy huidibi ypocy ti yajnihuäch mïid co ytöxyijc ti mijpidägy Cristo. Nañ jadu'n je töxyjäy huidibi ca' mijpidägy Cristo, jadu'n yí' nipaady nej jäy huidibi ypocy ti yajnihuäch mïid co ñäy ti mijpidägy Cristo. Pen ca' ixypy yjadu'nity, yí' ajcxy y'ung y'anäg, hue' ixypy nipaady nej jäy ajcxy y'ung huidibi ca' mibicy. Per com ti je yëydijc etz je töxyjäy yajpocyñihuächyii, nañ jadu'n je y'ung ajcxy ti yajpocyñihuächyii. ¹⁵ Per pen je yëydijc huidibi ca' mibicy Cristo ca' müddzinähua'ñ ni jadu'ñyi yí' ytöxyijc huidibi ti mibicy Cristo, huin'it jëbi ñay'ixmájtzigixy. Nañ jadu'n co je töxyjäy huidibi ca' mibicy Cristo, e ca' müddzinähua'ñ ni jadu'ñyi yí' ñäy huidibi ti mibicy Cristo, huin'it jëbi ñay'ixmájtzigixy. Com Dios jadu'n tzocy co jotcujc ñaymüddzinäyigixipy. ¹⁶ Jëbi ñay'ixmájtzigixy com je töxyjäy ca' tiydudägy ñejhuüy pen mïmadacy yñäy yajmibigipy Cristo. Nañ jadu'n je yëydijc ca' tiydudägy ñejhuüy pen jëbi ytöxyijc yajmibigipy Cristo.

¹⁷ Oy ixypy ñejity jada tiy'ajt cuydüngixy. Copicy co nidüg nidüg miich ajcxy mdzinähuiipy mjugy'adipy jadu'n nej Dios ti xyajni'ixiyigixy

mdzinaayin mjugy'ajtin, e jadu'n nej anajty myajpatcixy co Dios xyhuin'ixy jëbi mmibigipy Cristo. Yi jadu'mbi ane'min nyaj'ixpijcpich yi mibijcpidijc ma tüg tüg cajp. ¹⁸ Yi jäy huidibi ti yajtiy'ajttiy jayijp, e Dios yhuin'ixyii jac'axam, huen jadu'nity, ca' huaad yajtigoy je ijxpejt nej ti yajtiy'ajttiy. E yi jäy huidibi ca'ni yajtiy'ajttiy e ti yhuin'ixyii Dios, huen jadu'n y'ity, ca' ycopicyity yajtiy'ajttihuipy. ¹⁹ Ca' ytimyñejity pen miich ajcxy ti myajtiy'ajttiy, o pen ca'ni myajtiy'ajttiygixy. Huidibi copicyip, mguyduunip ajcxy Dios y'ane'min ycötujcin. ²⁰ Nidüg nidüg mibijcpi huen ijtcixy nej anajty yajpatcixy co Dios ajcxy yhuin'ixy. ²¹ Pen miich anajty codoogiy tumb ma tüg jäy co Dios ti xyhuin'ixy, ca' mdajy may müd yi' ycixpi, huim müd mhuindzin. E pen mhuindzin a'ixiyb co mbidzima'n ahuätztuum, jëbi mbidziny ma codoogiy anajty m'ity. ²² Pinjaty codoogiy ijtp ma yhuindzin co mibicy ajt nHuindzin Jesucristo, chi Jesús yi' yajnihuädziçtüyii ma yi pocy y'ane'myii. Pinjaty tungixp yci'ndung, co mibicy ich ajt nHuindzin Jesucristo, chi jadu'n nipaady nej jihuiy codoogiy y'ity ma Cristo. ²³ Tzoohui ooy Jesucristo xycojuuyi miich ajcxy mbocy, paady ycixpi cuydungix ajt nHuindzin Jesucristo y'ayuc ytiy'ajt. E ca' mguydungixy naaxhuin'yjäy ajcxy y'ayuc ytiy'ajt huidibi ajcxy xpidägip ma pocy xy'ane'mgixy. ²⁴ Migügtijc ajcxy, nidüg nidüg mibijcpi, huen ijtcixy nej anajty yajpatcixy co Dios yhuin'ixy ajcxy.

²⁵ Jada ayuc nyajniimaaybich yi mibijcpidijc huidibi ajcxy adüg yajpatcixp. Je Huindzin Jesús ca' ti tiy'ajt ahuing ti xymöyich müd miich ajcxy ycixpi. Hue' ajcxy nyajniimaayb ahuing je huinma'n huidibi nmüidich. Com Dios ti xypa'ayooyich, paady ycixpi jëbi mgöbigipy ajcxy ich n'ayuc ich ngapxhuijin. ²⁶ Jadu'n huinma'n nmüidiyich co jac'oy co nidüg nidüg mij'anäg huen jac'ijtcixy nej yajpatcixy. Müd co tzaachypi ayo'n nminajxim nyajnajxim jadachambi xii tiempo, paady ycixpi ngapxhuijyich jadu'n. ²⁷ Pen mbijcyp tüg töxyjäy, müddzina'. Pen ca' ti picy tüg töxyjäy, jac'oy co ca' mbigipy. ²⁸ Pen ti mhuinma'n mbidägy co mbiga'n, jëbi mbiçy, ca' anajty mdundigoy co mbigipy. Nañ jadu'n tüg töxyjäy mutz'anägnip ca' anajty ytundigoy co ypigipy. Janch tiy'ajt jada co yi' ajcxy huidibi pijccixp ypadamyb ajcxy jotmay ma chinaayin. Paady ycixp ti nnimaaygixy co jac'oy co ca' mbijccixipy, e ca'ydi ti jotmay mbáatcixipy.

²⁹ Migügtijc ajcxy, jada njacyajniimaaygixpy. Hueeni xii tiempo njactzinähuaanin ya naaxhuiñ. Jadu'n nej je xii je tiempo yjacnicxni miich anajty pinjaty ti ypic, tzinaaygix jadu'n nej ixypy ca' mdöxijc ajcxy müidity. ³⁰ Miich ajcxy huidibi yaaxp etz ayo'n jihuiy, tzinaaygix jadu'n nej ixypy ca' ti ayo'n müidity. Miich ajcxy huidibi xondacp, tzinaaygix jadu'n nej ixypy ca' mxondaaccixy. Miich ajcxy huidibi ajuuyb adoocp tzinaaygix jadu'n nej ixypy ca' ti ajcxy müidity. ³¹ Miich ajcxy huidibi mic'ajt comeen'ajtp, tzinaaygix jadu'n nej ixypy ajcxy ca' ti mgomeenüty.

³² Hue' ndzocyich co ca' ti jotmay miich ajcxy mmüid'adipy ma yi mdzinaayin mjugy'ajtin. Yi jäy ajcxy adügpi ymijottigooyb ajcxy je Huindzin Dios ytung, yajjäygidäga'n ajcxy je Huindzin Dios. ³³ Je tiibi ajcxy ypijccixy, chi ymijottigooyb ajcxy yi' ytung ya naaxhuiñ, jadu'n nej jëbi yajtotcujc'ajtcixy ytöxyijc. ³⁴ Nañ tim jadu'n tigachjaty yhuinma'n müidity je töxy'anäg huidibi ti ypic. Je töxy'anäg adügpi ymijottigooyb Dios ytung, etz yecy ñinix etz yjihui'n ymic'ajt cixyot huinijot ma ajt nHuindzin Jesucristo. Per je töxy'anäg huidibi ti ypic, hue' je' ymijottigooyb ti ga ti ya naaxhuiñ, jadu'n nej huaad jäygidägyii näy.

³⁵ Jada jadu'n ti nyajnimaa'yigixy m'iid miich ajcxy m'oy'ajt'in ycixpi. Ca' nan tzipjaty ane'min ti nmooygixy. Jada'n ti ngapxhuijicixy jayd'ebi jotcuje mdzinaaygixy mjugy'ajtcixy, etz jayd'ebi ajcxy amumdug'ot mdungixy ma ajt nHuindzin Jesucristo ytung, e ca' mdungixy ametz jotmetz.

³⁶ Pen ji pin jotmay m'idity m'iid n'ix ycixpi, m'iid co yxi yjimijt ti yujc-huacni, jada je' ooy ytimycapxpaadyty, j'ebi tuñ huidibi y'a'ixiyb jac'oyip, j'ebi ypicxy, ca' y' ypocyty. ³⁷ Pen ji pinjaty n'ix yhu'i'ma'n jaybicy, e ca' pin ycohuan'iyi, nañ ni pin yca'adugyii co tuñ nej tzocyin, e ñijot'ajtyp tudägy'ajt janch cixy'ot huinjot co yñix yhu'i'ma'n jaybicy, oybi anajty ytumyb. ³⁸ Je jäy huidibi yñix yajp'icp, oybi anajty ytumyb, e pinjäy yñix cayajp'icp, ñigi anajty oybi tuñ ca'yd'i co ypigipy.

³⁹ Copicy co je töxyjäy m'iddzinähui'py y' ñäy mabaad yñäy yjugy'aty. Co janch anajty yñäy y'ögy, huin'it j'ebi ypigipy m'iid huingbi, pen jadu'n anajty najtztog'iy. Hue' janchty copicy co pigipy je pin mibijcp je Huindzin Jesucristo. ⁴⁰ Ooy ñigi je töxyjäy co'ögy'pi agujc jotcuje chinähui'py yjugy'ad'ipy pen ca' ypijctigach, jadu'n nm'iditych nhuinma'n, e nm'inaambich co naybaatip iich nhuinma'n m'iid je ty'ajt huidibi je Esp'iritu Santo yejcp.

8

Je tzüch huidibi ajcxy yajhuindzig'iyb quipychech

¹ Jadüg nax, jada ayuc ajcxy nyajnijay'iyb ma y' tzüch ymiñ huidibi jäy ajcxy yajhuindzig'iyb tzaadzech quipychech. Janch ty'ajt co nidüg'óciy iich ajt nm'iid'ajtm ixpijcin. Per pen ooy mij nayjihuy'im ajt n'ixpicyity, chi amij agix nayjihuy'im. Per pen naychojcin nayjihuy'im nidüg nidüg, huin'it nyajyeecim nm'ibijcin. ² Pen ji nidüg ma miich ajcxy ñaydiyii co y'ixpicyity, ca'ni y' jajtäy ixpijcin huidibi jaccopicy yjad'ipy. ³ Co tüg jäy yajmij'aty Dios, Dios ñejhu'iyb nej jada jäy y'ot yhuinma'n m'idity.

⁴ Jadu'n jada je ty'ajt maabi je tzüch huidibi jäy ajcxy ti yajhuindzig'iygixy tzaadzech quipychech ajcxy. Nejhu'iyim co y' tzaadzech y' quipychech ca' ti jugy'ajt'in m'idity. Ji tüg'ajc Dios huidibi tzinaayb jugy'ajtp. ⁵ Janch ty'ajt co y' naaxhuiñ'yäy ajcxy Dios'ajtigixy canaagnax huidibi yajpatp tajp'icx etz ya naaxhuiñ'it huidibi ca' Diosity. Etz nañ ty'ajt co may yhuindzin'ajtcixy huidibi ca' yhuindzinity. ⁶ Per iich ajt n'ojadajtm tüg'ajcpi Dios, je Dios Teedy. Je Dios Teedy co maxc tüg'óciy huidibi ji'ajtp. M'iid y' ycixpi iich ajt ndzinaayim njugy'ajtm. Nañ tim jadu'n nm'iid'ajtm tüg'ajcpi ajt nHuindzin Jesucristo, e y' huijtz'ijtaayb tüg'óciy tijaty huidibi ji'ajtp, e nañ y' ajt xyhuijtz'ijtm.

⁷ Janch ty'ajt co y' tzaadzech quipychech ca' ti mic'ajt m'idity, per nije'jty mibijcpidijc ca' huinjihu'ya jada ty'ajt. Nij'jity ajcxy jecy'ajty ooy huindzig'iygixy tzaadzech, ixti chambaadni tijcixy co y' tzüch huidibi jäy m'iid huindzig'iy tzaadzech, tzaadzech y' yje'. Co ajcxy tzüdzicixy y' jadu'mbi tzüch, j'ibic nayjihuy'iygixy, nayjihuy'iygixy nejjihuy'iy ti ytundigooygixy. Ca' tiydudägy y'ijtcixy ma ymibijcin. ⁸ Ca' Dios xycöbigaanim m'iid je' ycixpi co ti njücxim ti ndzüdzm tijaty tzüch, o m'iid co ca' ti njücxim ca' ti ndzüdzm tijaty tzüch. Nañ tim jadu'n Dios ca' oybi xymöhuaanim m'iid je' ycixpi co ti njücxim ti ndzüdzm ti tzüch, o m'iid co ca' ti njücxim ca' ti ndzüdzm tijaty tzüch. ⁹ Oy Dios a'ixy co j'ebi ndzüdzm huenhuidibi tzüchity. Per m'iid je migügtijc ycixpi huidibi ca' tiydudägy m'idity ymibijcin, tzoc naygüend'ajtm ca'yd'i je' j'ibic yñayjihuy'iy m'iid huidibi iich ajt ndunim. ¹⁰⁻¹¹ Tzoc ocpidaacim co miich

ajcxy mnejhuüy je tiy'ajt, e xy'ixipy tüg migüg co mgay m'uucy ma tüg mesa jüby tigoty me je tzaadzech y'ity. Ca' jecyity co jada jäy huidibi ca' tiydudägy müidity ymibijcin, etz co xy'ixpaadipy jüby, huin'it je' cöbiga'n je tzüch huidibi huindzigi'n'ajt. E jadu'n yhuimbizimy co miich jibic ijxpejt ti myecy müid yi m'ixpibcin ycixpi, com yi mmigüg ti ytundigoy müid huidibi miich ti mduñ. E Cristo ti y'ögy müid yi' ypocy ycixpi nañ jadu'n. ¹² Co tüg mibijcpi jibic nayjihuiyü müid co ti xy'ixy ma je caydac mdzüch je tzüch huidibi jäy ajcxy yajhuindzigi'yb tzaadzech, miich anajty tundigooyb müid Cristo ytiy'ajt, müid co yi mibijcpi jibic ñayjihuiyü. ¹³ Paady ycixp ca' ndzüdza'ñich ni mina tzüch huidibi tzaadzech yhuindzigi'n'ajt. Pen jadu'n nduñich, jibic ijxpejt anajty nyejcpyich ma nijëjity migügtijc, e chi yi' ajcxy yhuinma'ñyigoya'n.

9

Je tung huidibi Pablo paatip

¹ Janch janch co jëbi nduñich huentijity huidibi ndzojcpich. Nañ jadu'n janch co Jesucristo ti xyajñibicyich jada apóstol tung. Etz janch co ti n'ixyich ajt nHuindzin Jesucristo. Nañ jadu'n janch co miich ajcxy ijxpejt'ajtp ma ñich ndung, com ti ajcxy mmijpidaaccixy je nHuindzin'ajtim Jesús y'ayuc huidibi ti ngapxhuäcxyich ma miich ajcxy. ² Ca' jecyity co jacjadyü jäy ajcxy ca' xycöbiga'ñich jadu'n nej Jesús xy'apóstol'adyijich. Per com miich ajcxy ti mmijpidaaccixy ajt nHuindzin Jesucristo, etz miich ajcxy mmibijcin nidiy'ajtp co Jesús ti xyajñibicyich jada tung, paady ycixpi copicy co ñich miich ajcxy xycöbigipyich jadu'n nej Jesús y'apóstol.

³ Jadu'n n'adzohuimbityich yi' ajcxy huidibi jibic xyñigapxip ñich ndung. ⁴ Com Jesucristo xyajñibijcich jada tung co ngapxhuäcxyich yi' y'ayuc ytiy'ajt, paady ycixpi xypatpich jadu'n co je mibijcpidijc xymöhuibich ngaayin n'uucin. ⁵ Nañ jadu'n xypaatpich co nmüid'adipyich tüg ndöxyijcich huidibi mibijcp, etz huidibi nmüidhuididipyich tim jadu'n nej yi' jacjadyü apóstol ajcxy müidity, etz je Huindzin Jesús y'uch ajcxy müidity, etz Pedro. ⁶ ¿Nej miich ajcxy mminaangixy co ñich etz Bernabé nimejtzpajc ca' ñich ajcxy huaad ixmajtzcixy yi' ndungich co ngapxhuäcxyich Cristo y'ayuc ytiy'ajt? ⁷ ¿Huidibi soldado yi' ma je ejercito ci'm ygasto cojuy? ¿Pin ji cam nidungüyb, e ca' jücxipy je huidibi ti yaj'ity? Pin ychibo cuend'ajtp, ¿e ca' ügipy je chibo yleche? ⁸ Ca' miich ajcxy minanipy co jäy y'ayuc jada. Nañ jadu'n jaybety y'ity ma Dios ñecy tim jadu'n nej minañich. ⁹ Com jaybety jadu'n ymiñ ma Moisés ñecy, ma Moisés jadu'n yminañ: "Ca' huaad huajyuub y'ajen mbidaaci ma yam ten moody yi' trigo co yajpaj'aty." ¿Nej jëyi müid huajyuub ycixpi Dios jadu'n yminañ? ¹⁰ Canan jëyi müid huaj yuub ycixpi Dios jadu'n yminañ. Nañ jadu'n Moisés jaybejty jada tiy'ajt müid ñich ajt ycixpi. Com yi' jäy ajcxy huidibi naaxjdzijtzp, etz yi' ajcxy huidibi trigo yajpajc'ajtp, hue' ajcxy yjijp'ijxyp co padaangixy je moc tim huidibi ajcxy ti nidungüy. ¹¹ Nañ jadu'n ñich ajcxy huidibi Jesús ytung tuunip, ti ngapxhuäcxyich Dios y'ayuc ma miich ajcxy, e miich ajcxy oybi ti mbaatcixy ma Dios. ¿Nej ca' jadu'n y'oyity co nbaadyich meeñ etz jicxy picy müid ndungich ycixpi? ¹² Pen jacjadyü Dios y'ayuucapxhuäcpxi ti paatcixy meeñ etz jicxy picy ma miich ajcxy müid ytung ycixpi, ¿nej ca' jëbi ñigi ñich nbaadyich meeñ etz jicxy picy müidich ndung ycixpi? Oy njamüididyich je mic'ajt nej nja'ane'ngixy co xymöhuibyich ajcxy meeñ etz jicxy picy müid ñich ndung ycixpi, per ca' jadu'n ti n'ane'ngixy. Jadu'n ñich tzaachypí nyajnajxich jim ma miich ajcxy,

jaydëbi jäy ajcxý cöbïjccixý Cristo agujc jotcujc ca' ti adzïjpin. ¹³ Mnejhuïyib miich ajcxý co yï' huidibi ajcxý tumb ma Dios ytïjc, paatcixý ninigoobi caayin uucin. Nañ jadu'n yï' pin ajcxý huidibi iyujc yajhuindzigïyib Dios, paatip ajcxý je huindzigï'n tzüch. ¹⁴ Nañ jadu'n je Huindzin Jesucristo ane'my co huen yajcaaygixý yaj'uuccixý etz mooygixý yhuitt ytucx yï' ajcxý huidibi capxhuäcxixp yï' y'ayuc ytïy'ajt. ¹⁵ Ich ca' ti nyajtuñich jada mic'ajt jada ane'min huidi nmüidich. Nañ jadu'n ca' jada ayuc nyajnijayïygixý, müid co ndzocy co padañich tijaty ma miich ajcxý. Jacjotcujc co n'ögibich müid yuu, ca'ydi co n'ané'mibich caayin uucin ma miich ajcxý, e jadu'n tzöydu'n nbáadibýich jadu'n nej cham naygömayïijich, müid co ci'm nnayyajcayïijich müid ndungich.

¹⁶ Com ca' huaad naygömayïijich co ngapxhuäcxýich Cristo y'ayuc. Müid co Cristo xyajnjïbïjcich jada tung, paady ycixpi copicy ngapxhuäcxýich Cristo y'ayuc. Ayo'n nbadaamybich, pen ca' ngapxhuäcxich Cristo y'ayuc. ¹⁷ Pen ngï'mdzójcinich ycixpi ngapxhuäcxich Cristo y'ayuc, njïp'ïjxypich ixypý co jäy ajcxý xymïjuyïpyich. Per ca' yjadu'nity. Hue' janchtiy je Huindzin Jesucristo xyajnjïbïjcich jada tung, e paady nduñich yï' ytung. ¹⁸ ¿Ti muju'n nbáadibich müid ndungich ycixpi? Nbáadibich jotcujc'ajtin co ngapxhuäcxibich Cristo y'ayuc jadu'nyi, ca' ymeefygixýity. Ca' nyajtuñich je ane'min huidibi Cristo xymóyich müid caayin uucin ycixpi.

¹⁹ Ca' ji ni pin jäy mic'ajt müidity jaydëbi xy'ane'myïijich. Oy ixypý ytimyñejity ti nnaybidägyïijich müid ich njot nhuinmañ jadu'n nej jihuïy tüg'öciy jäy ajcxý xy'ane'myich. Jadu'n nduñich jaydëbi jac mayjäy ajcxý nyajmïbïgïpyich Cristo. ²⁰ Co ngapxhuäcxýich Cristo y'ayuc ma yï judíojäy, hue' naybidägyïijich judíojäy, jaydëbi nyajmïbicyich ajcxý Cristo. Co ngapxhuäcxýich Cristo ma yï judíojäy ajcxý huidibi cuydumy yï' ajcxý ycötujcin etz ycostumbre, nañ jadu'n ich nguyduñich yï' ajcxý ycötujcin, jaydëbi nyajmïbicyich ajcxý Cristo. Ooy yjanchity co ca' yï judío ycötujcin etz ycostumbre xy'ane'myich. ²¹ Co ngapxhuäcxýich Cristo y'ayuc ma yï' ajcxý huidibi ca' yjudíojäyity, chi naybidägyïijich jadu'n nej yï' ajcxý. Ca' nan nminaambich co ca' nguyduñich Dios ytïy'ajt. Hue' njatytimycuydumyibich Cristo ycötujcin, jaydëbi nyajmïbicyich ajcxý Cristo. ²² Co ngapxhuäcxýich Cristo y'ayuc ma yï' ajcxý huidibi ca' tiydudägy ymïbijccixý, chi naybidägyïijich jadu'n nej yï' ajcxý, jaydëbi nyajmïbicyich ajcxý Cristo. Ma nidüg'öciy jäy ajcxý ma ngapxhuäcxýich Cristo y'ayuc, chi nbidägyich njot nhuinmañ nej yï' ajcxý yjot yhuinmañ müidity, jaydëbi nijejity ajcxý nyajmïbicyich Cristo y'ayuc ytïy'ajt. ²³ Jadu'n nduñich tüg'öciy müid Cristo y'ayuc ycixpi, je ayuc nej jëbi jäy ajcxý y'alma ñidzoocixý. Jadu'n nduñich, jaydëbi nbaadyich je jotcujc'ajtin etz oy'ajtin huidibi nbaatim nidüg'öciy co nmïjpidaacim Cristo.

²⁴ Mnejhuïygixý co jäy ajcxý ñayboyicquïpxigixý co premio padaangixý, huin'it nidüg'öciy ajcxý ñaymic'ïjxigixý, per tüg'pajc huidi je premio patp. Nañ jadu'n miich ajcxý mijottigooygix cuydungix Dios y'ayuc ytïy'ajt, jaydëbi Dios xymóoygixipy ajcxý tüg' premio. ²⁵ Tüg'öciy pinjaty nayñ'ixïyïp co ñay'ixquipxáanigixý ma iyïhuïjin, ooy ñayguend'ajtigixý mic, jigix jëbi ymadaaccixý co ganar'adaangixý premio huidibi ca' huinixi ajcxý mi'ïjtcixý. Pero ich ajcxý Dios y'ayuc capxhuäcxý, yï' ich ajcxý mijottigooygixý nganar'adaangixýich huidibi ca' nimina ycixipy ytigoyïpy. ²⁶ E jadu'n ich ndung mijottigooyich, ca' yhuimbïdzity agoodzity, jadu'n nejihuïy ngxoch e nipin

ca ypegyii. ²⁷ Nnaychaachytumybych ngi'mninicxich, jaydëbi ngi'mninicxycapxymidooyich. Jadu'n nduñich co ti ngapxhuäcxyich Cristo ma je mayjäy ajcxy, ca'ydí nyajtgoyipyich nbremio huidibi Dios xymöhuambich.

10

Capxhuijn ma yi pin ajcxy jac-huindzigäyb quipychech

¹ Com ndzojcpich co miich ajcxy migügtjic mnejhuüygixipy co ajt nmij'ap nmijteedy müid yhuidijty Moisés co Dios nidüg'óciy ajcxy cuend'ajttay, huinhuoy jecy'ajty müid tüg joc. E nañ jadu'n Dios yajnihuañ yajtzoocy nidüg'óciy ajcxy ma ymidzip co ajcxy yajnajxy je tzaptz mejy cujc'amy. ² Co nidüg'óciy ajcxy panicxy je joc, e co ñidzoocay ajcxy nidüg'óciy ma je mejy, hue' nidüg'óciy ajcxy cöbijcy Moisés y'ane'min, e jadu'n nipaady nej jihuiy ni'amugí ajcxy yñübejty müid Moisés yxi. ³ Nañ jadu'n nidüg'óciy ajcxy caay jüicxy je maná huidibi Dios anajty yejcpy, choñ je' anajty tzajpjoty. ⁴ Etz nañ jadu'n y'uuc ajcxy nidüg'óciy je nüi huidibi Dios anajty yejcpy, com y'uuc ajcxy je nüi huidibi yajpidzim ma je tzaa. E je tzaa hue' je' anajty Cristo, e paady Cristo ymüid'ijtpy etz ypubejtpy ajcxy anajty nidüg'óciy. ⁵ Oy ajcxy Dios ooy yjapubejti, e ni may ajcxy ooy Dios yajjotma'ty, etz jahueen ajcxy yca'öctay jim mäjti'güduum jecy'ajty, com ca' Dios jäygidacy je' ajcxy yhuinma'ñ.

⁶ Jadu'n nej je ayo'n yjajti müid ajt nmij'ap nmijteedy jecy'ajty, je' iixpejtij ma iich ajt, ca'ydí n'adzojcim tijaty jibicpi, jadu'n nej je' anajty ajcxy adzojcicix jibicpi. ⁷ Nañ jadu'n ca' yhuaadity ca' y'oyity co miich ajcxy m'ojadajtcixy tzaadzech quipychech jadu'n nej nijëjity ajt nmij'ap nmijteedy tuñ jecy'ajty. Com jadu'n yjaybetyity ma Dios ñecy ma jadu'n ymina'ñ: "Ixtactay je jäy ajcxy caaybi uucpi, e huin'it ajcxy ypidig'y etz ytigüygixy iyiybi ejtzpi." ⁸ Nañ jadu'n ca' y'oyity co ndundigooyim müid töxyjäy ajcxy jadu'n nej nijëjity nmij'ap nmijteedy tuñ jecy'ajty, e iipx tugüg mil ajcxy y'o'cy tüg xiibi. ⁹ Nañ ni ca' y'oyity co njot'ijxim nhuinma'ñ'ijxim iich ajt nHuindzin Jesucristo, jadu'n nej ajt nmij'ap nmijteedy ajcxy idiich jecy'ajty, e may ajcxy tza'ñchüdzi, e ytigoooy ajcxy yjugy'ajtin. ¹⁰ Nañ ni ca' y'oyity co nnigapxim ni'ojüyim Dios, jadu'n nej nijëjity ajcxy idiich jecy'ajty, e müid je' ycixpi Dios y'áγγελ yaj'o'cy mayjäy ma yi' ajcxy.

¹¹ Tüg'óciy yi jadu'mbi ayo'n yjajti müid ajt nmij'ap nmijteedy, e jay-bety yhuindmy ma Dios ñecy, jigix n'ijxpejt'ajtim, e jadu'n tiy'ajt nbaatim, ca'ydí ndundigooyim müid Dios, iich ajt pinjaty tzinaayb ma jadachambi xi jadachambi tiempo huidibi janch tim huingónip ma Dios yajcixa'ñ yajtigoya'ñ jada naaxhuiñybi. ¹² Com nmüid'ajtim je tiy'ajt nej nmij'ap nmijteedy ajcxy ytundigooy, paady ycixp pinjaty yci'mhuinma'ñ pidacp co ooy mic'ajt müidity ma ymibjcin, huen naygüend'adyii, ca'ydí ytundigooy etz yuocycáhuipy ma Dios. ¹³ Tüg'óciy tzaachypí ayo'n, jot'ijxin huinma'ñ'ijxin huidibi miich ajcxy mmínajxyp myajnajxyp, nañ jadu'n jacjadyii mibijcpidijc ajcxy minajxcixy yajnajxcixy. Per yajmij'ajtcix jot'amij'ajtcix Dios, com Dios ca' a'ixihuij co mjacminájxcixipy mjacyajnájxcixipy tzaachypí ayo'n anaxy huidibi ca' ajcxy mmimadäga'ñ. Co anajty tzaachypí ayo'n mmínajxcixy myajnajxcixy mictägy, huin'it Dios xymöhuipy ajcxy huinma'ñ jadu'n nej jëbi mmínaxtaygixy myajnaxtaygixy yi tzaachypí ayo'n.

¹⁴ Paady miich ajcxy migügtjic, huidibi ooy ndzocy njihuiyich, ix-majtzcixy ca' m'ojadajtcixy tzaadzech quipychech. ¹⁵ Nyajmüidcapxy nyajmüidmüidacpy ajcxy jadayaabi ayuc, com nejhuüybych co miich ajcxy

ooy oy huinma'n mmiidity. E jēbi ci'm mhuinmaaygixy pen tiy'ajt jada iich n'ayuc, o pen ca'. ¹⁶ Ma je "Santa Cena" co nyajnajxim Dioscojuyip ma Dios miid je ūgy, e n'uucim. Je' je' nidiy'ajt'ajtpy co Cristo ti xyajtūgmūjīm ajt ntot nhuinma'n co yajcruudzpejti etz nī'py yteemy jojcy miid ajt nbocy ycixpi. Nañ jadu'n ma je "Santa Cena" co ndujchuācxim, e ngaayim je tzajcaagy, je' je' nidiy'ajt'ajtpy co Cristo xyajtūgmūjīm ajt ntot nhuinma'n miid niniix co ñaygyejci ma ymidzip huen yajcruudzpedyii. ¹⁷ Oy ajt ooy njanimaayity, per nidūg'ōciy iich ajt ngaayim je tūgpi "Santa Cena" tzajcaagy. Jada tzajcaagy tūg yi', paady ycixpi tūgpiy jāy iich ajt, e jadu'n iich ajt nipaady nej tūgpi ninix.

¹⁸ Oc-huinmaaygixy miich ajcxy yi Israel jāy ajcxy, co ajcxy tzūtzūcixy je huidibi ajcxy yajhuindzigūyb Dios, chi ajcxy naydūcmūjīgixy miid Dios ycixpi ma je Dios ojadajttac. ¹⁹ Iich nmīna'ñich co yi tzaadzech ca' ti mic'ajt mmiidity, e nañ jadu'n yi tzūch huidibi yajhuindzigūyb tzaadzech ca' jac nigi oy'ajtin mmiidity, ca'ydi jac huidibi tzūch. ²⁰ Jadu'n nmīna'ñich, co yi jāy ajcxy huidibi ca' mijpidaaccixy Dios, co ajcxy yejccixy yhuindzigi'ñ, hue' ajcxy yajhuindzigūyb ca'oybi, e ca' Dios ajcxy yajhuindzigi'y. E ca' ndzocyich co miich ajcxy migūgpi'gipy je ca'oybi. ²¹ Co miich ajcxy m'uuccixy je ūgy ma je "Santa Cena", ca' huaad m'uuccixy je ūgy huidibi ca'oybi ajcxy yhuindzigi'ñ'ajtpy. Etz co mgaaygixy je tzajcaagy ma je "Santa Cena", ca' huaad mgaaygixy je tzajcaagy huidibi ca'oybi yhuindzigi'ñ'ajtip. ²² ¿Nej tzoc yajjotma'tim yi Jesucristo? ¿Nej jacmic'ajt miid jada' iich ajt, ca'ydi yi'?

Je tzojcin huidibi tūg mibijcpi huaad tuñ miid ymigūg

²³ Janch tiy'ajt nej yay ymīnaangixy co jēbi huaad nduñich huentiijity huidibi nijot'ajtpyich, per ca' tūg'ōciy nmigūgtijcich jāygiidaaccixy huidi ndumybich. Janch jadu'n jēbi huaad nduñich huentiijity huidibi nijot'ajtpyich, per huidibi ndumybich ca' tūg'ōciy xypubetyich ma iich nmibijcin. ²⁴ Ca' y'oyity nnijot'ajtim ngi'm'oy'ajtin. Oy co nbubejtim nbudigūyim nmigūgtijc.

²⁵ Jēbi ajcxy mdzūch huen ti tzūch huidibi yajtoocp ma je mercado. Ca' ajcxy myajtihiuipy ma je tzūch chooñ, ca'ydi jibic mnayjihuiyigixy. ²⁶ Com Dios y'ayuc jadu'n ymīna'ñ: "Je Huindzin Dios yi' nihuindzin'ajtp je naaxhuiñybi, etz ñihuindzin'ajttaayb tūg'ōciy huidibi ji yajpatp."

²⁷ Pen jim pinjaty huidibi ca' ymibicy, xyajnihuohuify tūg caayin uucin ma yi' ytijc, e pen ti mhuinma'ñ mbiidāgy co nicxy mgaya'ñ ma yi' ytijc, oy co mgaayipy mdzūch huentiijity huidibi ajcxy xymooyb. E ca' mnidihuiipy myajtihiuipy ma je tzūch chooñ, ca'ydi jac pinjaty jibic ñayjihuiyii miid huidibi ti mduñ. ²⁸ Per pen je jāy xyñimaayb: "Jada tzūch ti jāy yajhuindzigi'y tzaadzech." Pues ca' mdzūdzip je tzūch, jigix ca' jibic ñayjihuihuuyb je migūg huidibi ti xyñimāy co je tzūch ti yajhuindzigi'y tzaadzech. ²⁹ Hue' nīmīydacypich je mmigūg huidibi jibic nayjihuihuuyb pen miich mdzu'chpyi tzūch huidibi tzaadzech yhuindzigi'ñ'ajtp. Ca' nnīmīydāgyich nej miich ci'm mnayjihuiyii. Ca' yjocyity co nijējity jāy xyñimāhuibich: "¿Na'amy co xycapx'adujcich tijaty nigoob miid co huingbi jāy jibic ñayjihuiyii miid jēgixpi?" ³⁰ Pen nyajnajxypich Dioscojuyip miid tijaty ycixpi huidibi ngaaybich n'uucyich, ¿na'amy co xyñigaxa'ñich xyñi'ojihua'ñich co ti ngay ti n'ūgyich tijaty?" ³¹ Paady ycixp huentiijity huidibi mdungixyp, pen mgaaygixyp m'uuccixyp, o jac ti ga ti mdungixy, tungix tūg'ōciy miid Dios y'oy'ajtin ymij'ajtin ycixpi. ³² Ca' mdūngixipy tijaty huidibi yi judiojāy ajcxy miid

huing ñayjihuiyii. Ca' mdúngixipy tijaty huídibi yí griegojäy ajcxy müid huing nayjihuiyii. Etz ca' mdúngixipy tijaty huídibi yí mibijcpidjic ajcxy müid huing ñayjihuiyii. ³³ Tüg'óciy huídibi ndúmybich, hue' nduñich jigix tüg'óciy jäy jäygidägipy huídibi ndumybich. Ca' ni ti nduñich nej jébi ñich ci'm nayjäygidägyiijich. Hue' nduñich müid jacjadyii jäy ajcxy y'oy'ajtin ycixpi, jaydëbi ajcxy y'alma ñidzögyip.

11

¹ Jadu'n ndzocyich co miich ajcxy mdunipy jadu'n nej nduñich. E ñich tumbich jadu'n nej Cristo ytuuñ.

Nej huaad töxyjäydjic ajcxy yjäy'ajtcixy co migügtjic naymújcgixy

² Miich ajcxy migügtjic, ngapxpatypich miich ajcxy, com miich ajcxy xyjatytimyjäymejtzpich, etz nañ mguydungixyp je ayuc je tiy'ajt huídibi ñich miich ajcxy ti nyaj'ixpijccixy. ³ Per ndzojcpich co mhuinjihuiyigixipy je tiy'ajt co Cristo nigohuajc'ajtpy nidüg nidüg yí mibijcpi yëydjicpi. E nañ nidüg nidüg yëydjic nigohuajc'ajty ajcxy ytöxyjic. E Dios nañ nigohuajc'ajtpy je Cristo. ⁴ Co tüg yëydjic cöjuuxy cöbe'ñ ihuäcxy capxhuäcxy je tiy'ajt huídibi Dios ti ymöyii, tüg je' tzo'ydu'ñ anajty naymöyii. ⁵ E co tüg töxyjäy cöjuxtüdy cöbe'ndüdy ihuäcxy capxhuäcxy je tiy'ajt huídibi Dios ti ymöyii, tüg je' anajty tzo'ydu'n ñaymöyii. Jadu'n je' nipaady nej jihuüy je' ycöme'pxity cödza'm. ⁶ Pen tüg töxyjäy ca' ñaygöbe'na'ñyii, jac'oy co huen yajcöme'pxy cödza'm. Per pen je töxyjäy cho'ydu'n jihuihuamyb co ycöhuay yme'pxity, o co ycöme'pxity cödza'm, jac nigi oy co ñaygöbe'na'ñyb. ⁷ Je yëydjctjic ca' y'oyity co ajcxy ycohuajc cöjuuxy cöbe'ñ mi'idipy ma ajcxy Dios mibijctzoogixy o yaj'ixpijccixy Dios y'ayuc. Com je yëydjic jadu'n yí nipaady nej Dios, e Dios yajcoj je yëydjic müid yí y'oy'ajtin ycixpi. Per Dios yajcoj je töxyjäy müid je yëydjic y'oy'ajtin ycixpi. ⁸ Co Dios yajcoj je jayijpi yëydjic, ca' yajtuuñ je töxyjäy ycaachypajc. Hue' janchtiy co Dios yajcoj je jayijpi töxyjäy, je' yajtuuni je ñiyëydjic tüg ycaachypajc. ⁹ Dios yajcoj je töxyjäy müid je yëydjic ycixpi. E ca' nan yajcoj je yëydjic müid je töxyjäy ycixpi. ¹⁰ Paady ycixp copicy co je töxyjäy ajcxy yijtcixy cöbe'ñ co Dios mibijctzoogixy o najtzcaxpiyigixy Dios ytiy'ajt. Je' je' je tiy'ajt co yajpaady ajcxy ane'my, nañ jadu'n yí ángeles ajcxy yajpaatcixy ane'my. ¹¹ Per ca' ñejity, ñich ajt huídibi nmibijcim Cristo, ma ajt ndzinaayin je yëydjic ca' je' yajpaady naydüg, etz ni ca' je töxyjäy yajpaady naydüg, hue' ajcxy naymüiddzinaayigixyp. ¹² Com tiy'ajt jadu'n co Dios yajcoj je jayijpi töxyjäy müid je ñiyëydjic ycaachypajc. Etz tiy'ajt jadu'n co je töxyjäy ajcxy yajma'xung'ajtcixy je yëydjic ajcxy. Per Dios ti yaj'oyäydäy, e tüg'óciy jüby chondäy ma Dios.

¹³ Miich ajcxy ci'm ocminaangix oc-huinmaaygix, pen oy jadu'n o pen ca' y'oyity jadu'n co tüg töxyjäy Dios mibijctzoy jaygöbe'ñ. ¹⁴ Jébi tiy'ajt nbaatim huenma'ámyity ya naaxhuñ co je yëydjic huídibi ymüid ycöhuay yoñ ooy cho'ydu'n yecy. ¹⁵ E je töxyjäydjic ajcxy ooy ycömappidzimigixy co ajcxy müidity ycöhuay yoñ. Com yí je' huídi ycöbe'na'ajtip. ¹⁶ Pen jim pinjaty ca' mijotcujc'aty ñich n'ayuc, copicy nejhuíhuipy co ñich ajcxy etz nañ jadu'n tüg'óciy jäy huídibi ajcxy mijpidaaccixyp Dios ma tüg'óciy cajp, cuydungixy nej ti nyaj'ixpiyich miich ajcxy, ca' pin jac huingbi costumbre müidity.

Pin tundigooyb "Santa Cenajoty"

17 Jada ayuc nyajnimähuaangixyp jadu'n nej mdungixy ma mnayyöymújcigixy co Dios m'ojadajtcixy. Ca' ngapxpaadyich miich ajcxy, com jibic yhuimbizimy jadu'n nej mdungixy. 18 Jayjip nimähuaangixy co nijējity migügtijc ti xñimäyich co miich ajcxy mnaybijc-huäcxigixy co mnayyöymújcigixy ma je naysyöymujctac. E ñich nmibijcpiyich ma ga ma co yjanchity nej je migügtijc ajcxy ymina'ñ. 19 Ca' yjeczyty paady miich ajcxy mnaybijc-huäcxixi müid ajcxy mjibic-huinma'ñ ycixpi, jaydēbi ñiguēxigy pin je' janch tīydudägy cuydumb Dios ytiy'ajt. 20 Co miich ajcxy mnayyöymújcigixy ma je naysyöymujctac, jadu'n yhuimbizimy co ca' mgyudungixy nej ypadyii ñich ajt nHuindzin Jesucristo ytiy'ajt co mjatungixy je "Huindzin je' ySanta Cena". 21 Com co je hora paady ma yam mdungixy je "Huindzin je' ySanta Cena" nidüg nidüg miich ajcxy mgyaagyixy abicyjaty, e ca' mdungixy cuendi yi jacjadyii migügtijc, paady nijējity migügtijc ayuu y'ijtcixy, e nijējity anaxy ycaagyixy y'uuccixy, ixti ymuucigixy nijējity. 22 ¿Nej ca' miich ajcxy müidity mjiin mdijc ma jēbi mgyaagyixy m'uuccixy? Jadu'n nej miich ajcxy mdungixy ca' mmij'ijxcixy ca' mijpidaaccixy je jāy ajcxy nidüg'ocixy huidibi mijpidaacp Dios. E nañ jadu'n myajtzo'ydungixy yi ayooobi jāy huidibi ajcxy ca' ti müidity. ¿Huam ñich miich ajcxy nimähuiy? ¿Nej jēbi ngömaagyixy miich ajcxy jadu'n nej mdungixy? Ca' huaad ngömaagyixy miich ajcxy co jadu'n m'iditczixy.

Jadu'n nej njäymejtzim ajt nHuindzin Jesús ma yi "Santa Cena"

23-24 Com ñich ajt nHuindzin Jesucristo ci'm xyaj'ixpijcyich je tiy'ajt huidibi ti nyaj'ixpiyich miich ajcxy, co je huin'it coodz co agojixx ajcxy cīyejcy je nHuindzin Jesús, huin'it je' conigy je tzajcaagy, e co jayjip yajnajxy Discosjuyip ma Dios, chi tujc-huäcxxy je tzajcaagy, e moy nidüg nidüg ydisćipulos ajcxy. E co ajcxy moyday, chi ñimay ajcxy: "Caagyix jada tzajcaagy. Jadu'n ñich jada nninix huidibi ngīyegaamybich ma yi o'cin müid miich ajcxy ycixpi. Jadu'n ñich ti nduñich, jadu'n jada miich ajcxy mdunipy jāymejtzig müid ñich ycixpi." 25 Co ajcxy ycaday, chi Jesús nañ jadu'n conigy je ügy cop'iam, e yminañ: "Jada ügy je' jada je Dios y'ayuc jemybi huidibi Dios yajhu'i'my müid jāy ajcxy ycixpi, je huidibi ñich nni'py ñidiy'ajt'ajtpy. Naag'oc naag'oc m'uuccixy jada ügy tungixy jāymejtzig müid ñich ycixpi." 26 Paady naag'oc naag'oc miich ajcxy mgyaagyixy jada tzajcaagy, etz m'uuccixy jada ügy, myegipy ajcxy tiy'ajt jadu'n nej Cristo y'o'cy müid ajt nbocy ycixpi, ixti cooni anajty Jesucristo yhuimbity ya naaxhuñ.

Nej huaad ngaayim je "Santa Cena"

27 Paady ycixp pinjaty müid ca'oyjot ca'oyhuinma'ñ caagyixy je tzajcaagy etz uuccixy je vino'ügy, huidibi ajt nHuindzin Jesús ñinix'ajtpy etz ñi'py'ajtpy, hue' ajcxy ymidundigoogyixy ajt nHuindzin Jesús ñaaxnix etz yi' yñi'py. 28 Paady ycixpi copicy nidüg nidüg mibijcpidijc jayjip yaj'oyihuiy yci'mjot yci'mhuinma'ñ, e huin'it jēbi cayipy je tzajcaagy etz ügipy je vino ma je "Santa Cena". 29 Com pinjaty caayb je tzajcaagy etz ügy je vino ma je "Santa Cena", e ca' tuñ cuendi co je' je' ñich ajt nHuindzin Jesús ñinix etz ñi'py, hue' je' ci'm ñaymidundigoyii, e Dios tzaachytunñib müid ypocy ycixpi. 30 Paady ycixp may miich ajcxy myuumüidity mba'mmüidity, pumäy mnayjihuiyigixy. May miich ajcxy yuu ba'm xyaj'ayoogyixy etz may ma miich ajcxy ti m'öccixy. 31 Co tīydudägy njot nhuinma'ñ nyaj'oyiyim ci'm, ca' ajt nHuindzin Jesucristo xychaachytunim. 32 Co ajt nHuindzin Jesucristo xychaachytunim müid yuu ba'm, paady ycixpi jadu'n xychaachytunim, jigix ca'ydi nidigooyim ajt

n'alma yjugy'ajtin quipxyi mïid je naaxhuiñjÿäy ajcxy huidibi ca' ajcxy Dios tzigiiygixy.

³³ Paady ycixpi miich ajcxy migügtijc co ajcxy mgaya'nip m'üga'nip je "Santa Cena" nay'ahuixigixy miñ xyipy, e jadu'n mgáaygixipy amugi'. ³⁴ Pen jim pinjaty ma miich ajcxy ooy yuubögyii, jac'oy co ycaayipy y'ügiyipy ma yci'ndijc jacjayijp ma ca'ni ymiñ ma je nayyöymujctac. Jadu'n mdüngixipy, ca'ydi Dios xychaachytungixy mïid co ca' oy mduungixy je "Santa Cena". Yi jacjadyii ayuc huinma'ñ jim nyaj'oyihuibich co anajty nicxy ci'm n'ijxcixyich miich ajcxy.

12

Je mic'ajt huidibi Espiritu Santo yejcy ma nidüg nidüg mibijcpidijc

¹ Migügtijc ajcxy, ndzojcpich co miich ajcxy mnejhuñhuipy jadu'n nej je Espiritu Santo xymooyim mic'ajt. ² Miich ajcxy mnejhuñyb co jayijp'ajty co ca'ni anajty mmibijccixy Cristo, ooy anajty je ca'oybi xyajnidigooygixy xyajtüdigooygixy, co m'ojadajtcixy tzaadzech quipychech huidibi ca' ymidoy ca' ycapxy. ³ Paady ycixpi ndzojcpich co miich ajcxy mnejhuñhuipy co pinjaty ymina'nipy: "¡Ca' oy jÿy yi Jesús!" je jÿy huidibi jadu'n minamb, ca' je' anajty yajcapxyii je Dios y'Espiritu. E pinjaty minamb: "¡Jesús ïch ajt nHuindzin!" je' anajty yajcapxip je Espiritu Santo.

⁴ Dios yjihui'ñ ymic'ajt yejcpy ymic'ajt canaag nax, per tügpaic jÿyi je Dios yjihui'ñ huidibi mic'ajt yejcp. ⁵ Ji yajpaady canaagnax Dios ytung, per tügpaic ajt nHuindzin Jesús huidibi xyajniñijcim nije' nije' tung. ⁶ Ji yajpaady canaagnax huinma'ñ nej jÿbi ndunim Dios ytung. Per tügpaic Dios huidibi xymooyim nidüg nidüg je nhuinma'ñ nej huaad ndunim Dios ytung. ⁷ Dios yajniügëxigyp ma nidüg nidüg mibijcpidijc je tiy'ajt co ajcxy müdity yi' yjihui'ñ ymic'ajt ma ajcxy yjot yhuinma'ñ. Jadu'n Dios ytuñ müid tüg'öciy ymibijcpidijc y'oy'ajtin ycixpi. ⁸ Dios müid yjihui'ñ ymic'ajt ymooyb nijÿjity mibijcpidijc ayuc huinma'ñ nej jÿbi ajcxy yaj'ixpicy Dios y'ayuc. E nañ jadu'n Dios müid yjihui'ñ ymic'ajt möy nijÿjity mibijcpidijc ixpijcin ma y' ytiy'ajt, per tügpaic je Espiritu Santo huidibi mic'ajt yejcp. ⁹ E nañ jadu'n Dios müid yjihui'ñ ymic'ajt möy nijÿjity jÿy mibijcin, per tügpaic je Espiritu Santo huidibi mic'ajt yejcpy. E nañ jadu'n jacnaagity möy mic'ajt jaydÿbi yajtzögy pa'njÿy. ¹⁰ E nañ jadu'n Dios müid yjihui'ñ ymic'ajt ymooyb nijÿjity mibijcpidijc mic'ajt, jaydÿbi mijhuinma'ñytungixy milagro tungixy. E jac nijÿjity ymooyb mic'ajt, jaydÿbi najtzcaxiiygixy Dios ytiy'ajt. E jac nijÿjity Dios ymooyb ixpijcin etz huijy'ajtin, jaydÿbi ijxcajpcixy je espíritu huidibi ca' tiy'ajt müdity, etz nañ jadu'n ijxcajpcixy je espíritu huidibi tiy'ajt müdip. E jac nijÿjity Dios ymooyb je mic'ajt, jaydÿbi capxcixy huingbi ayuc, etz nañ jadu'n jac nijÿjity ymooyb je ixpijcin jaydÿbi yajniügejicixy je huingbi ayuc. ¹¹ Per tügpaic je Espiritu Santo huidibi ymooyb nije' nije' mibijcpidijc mic'ajt etz huinma'ñ. Ymooyb nidüg nidüg nej yi' tzocy.

Nidüg'öciy ajt nyajpaatim ma Cristo

¹² Cristo jadu'n yi' nej tüg ninicx, je ninicx ymüid canaag nax huidibi yu'exp. Oy canaag jamüdity huidibi yu'exp, per tügpaic ñinicx'aty. ¹³ Co nidüg nidüg ïch ajt nnïbejtin, chi ïch ajt nyajpaatim nej tügpiy jÿy. Com Dios yjihui'ñ ymic'ajt tügpaic yajpaady ma nidüg'öciyi ïch ajt njot nhuinma'ñ, ca' ñÿjity pen judíoÿäy ajt, o pen ca' ajt njudíoÿäyity; pen jÿy xytumbi'ajtim o pen ndunim

ngi'ndung; hue' n'ijtim nej tügpicy jäy. Dios xy'adigiiyim xyjottigiiyim yi' yjihui'ñ ymic'ajt nidüg'óciy ñich ajt, paady ycixpi tú'ciy nyajpaatim, com tú'ciy nmi'ijtim Dios yjihui'ñ ymic'ajt.

¹⁴ Tügpí jäy ñinix mïd canaagnax huidibi yu'cxp, huidibi mïdoob, huidibi ijxp. ¹⁵ Co ixypy je teci jadu'n ymïna'ñ: "Ca'p ñich ngiiyity, paady ca' nyajpaadyich ma je ninix." ¿Nej paady ycixpi ca' yajpaady ma ninixin? ¹⁶ O co ixypy je tãdzac ymïna'ñ: "Ca'p nhuiniity, paady ca' nyajpaadyich ma je ninix." ¿Nej paady ycixpi ca' yajpaady ma ninixin? ¹⁷ Co ixypy tüg'óciy je jäy ñinix y'oc-huin'aty, ¿ma ixypy mïdity huidi mïdooyb? O co ixypy tüg'óciy je jäy ñinix ytãdzac'aty, ¿ma ixypy mïdity huidibi jëbi mïd tijaty xuugyii? ¹⁸ Dios ti pidaci jäy ytecy yhuin y'ahuac etz jac tijaty ma tügpí ninix jadu'n nej yi' tzojcy. ¹⁹ Pen huiind'ajty ixypy ninix'ajtp, ¿ti ninix ixypy jada? ²⁰ Dios ti möy nidüg nidüg jäy yci' ytecy, yhuin y'ahuac, yjipput etz ytãzac, per tügpajc ñinix'aty.

²¹ Ca' huaad je huin ixypy nimäy je ci': "Ca' ñich miich nyajmayjaty." Nañ jadu'n ca' huaad ixypy je cohuajc nimay je teci: "Ca' ñich miich nyajmayjaty." ²² Tügpí ninix copicy ca'pxy tijaty mïd. Huidijaty je ninix ymïd oy yjaquëxigy nej jihuiy ca' y'oy'ojadajtnity, per copicy yi'. ²³ Jadu'n ñich ajt njäy'ajtim. Muum ma ajt nninix ca' oy n'ijxim, paady nayxoxxim, jigix jac'oy quëxigip. Nañ jadu'n muum ma ajt nninix huidi y'oymïdzo'yduni, paady nyüdzim mïd huit, jaydëbi oy quëxigity. ²⁴ Muum ma ajt nninix oy n'ijxim paady ca' nyüdzim mïd huit. Jadu'n Dios yaj'oyiiy ajt nninix, jigix ma ca' oy y'ijxity, nxoxxim mïd huit, jigix jëbi oy quëxigy. ²⁵ Jadu'n Dios yajcojy yaj'oyiiy ajt nninix tú'ciy, jigix ca'ydí ñaychiptünigixy nije' nije' huidibi yücx ma ajt nninix. Tüg'óciy huidibi nmïd'ajtim ma ajt nninix naybubéjtigixp miñ xyipy. ²⁶ Pen pijcp muum ma je ninix, tüg'óciy je ninix jihuiy je pijcin. Pen muum ma ajt nninix ooy capxpaady y'ity, chi tüg'óciy je ninix jotcuje ñayjihuiyii.

²⁷ Miich ajcxy nidüg'óciy Cristo xyñinix'ajtcixyp, e nidüg nidüg miich ajcxy myajpatcixy ma Cristo ñinix. Jadu'n nidüg nidüg ñich ajt nipaady nej huidi yücxp ma tüg ninix. ²⁸ Dios yajnibicjpy nije' nije' mibijcpidijc, jigix ajcxy yajnixip nidüg nidüg yi' ytung. Tim jayijp yajnibijcy je apóstol ajcxy huidibi je mïjtung yajnixip. E mïmetz Dios yajnibijcy nijëjity mibijcpidijc huidibi najtcapxiybi yi' y'ayuc, je midugigpi Dios yajnibijcy nije' nije' je mibijcpidijc huidibi yaj'ixpijcp yi' ytiy'ajt. Dios yajnibijcy mibijcpidijc nijëjity huidibi mij huinma'ñ tumb. E Dios yajnibijcy mibijcpidijc nijëjity huidibi yajtzoocp pa'mjäy. E Dios yhuin'ijx huidibi pubejtp ymïgügtijc. E Dios yhuin'ijx je mibijcpidijc huidibi ane'mip je ymïgügtijc. E Dios yhuin'ijx je mibijcpidijc huidibi jadip nej capxip huingbi ayuc. ²⁹ Ca' nan nidüg'óciy mibijcpidijc huidibi Dios huin'ijxyp y'apóstol'ajtcixy. Nañ ni ca' nan nidüg'óciy ajcxy najtcapxiygixy Dios y'ayuc. E nañ ni ca' nidüg'óciy yi' ajcxy mïjhuinma'ñytungixy. ³⁰ Ca' nan nidüg'óciy mibijcpidijc huidibi Dios huin'ijxip ymïd ajcxy mic'ajt cõtujc yajtzögipy pa'mjäy. Nañ jadu'n ni ca' ajcxy nidüg'óciy jajtciy nej yajnigüéjixipy huingbi ayuc. ³¹ Pijctzoogix cixyot huinijot ma Dios je mic'ajt etz je huinma'ñ oybi. ñich miich ajcxy nyajnixihuipy tüg nni'aa tü'aa jac'oybi.

¹ Co ixypy ngapxyich tüg'óciy jäy ajcxy y'ayuc, etz nañ jadu'n ngapxich ángeles ajcxy y'ayuc, e ca' ndzocyich ca' njihuüyich nmigügtjicich, jadu'n yhuimbídzimý ñich n'ayuc jadu'n nej tüg tambor o tüg platillo huidibi nigoob ooy ñe'my. ² E co ixypy najtzcapxyich Dios y'ayuc, etz co ixypy njatyich tüg'óciy xpijcin huidibi pinjaty nejhuüy etz huidibi pinjaty ca' nejhuüy, etz co ixypy nmijpidägyich Dios ymic'ajt, ixti jëbi nyajpidägyich tüg cop, pen ca' ndzocyich njihuüyich nmigügtjicich, ca' ñich ti ndzoohuity. ³ E co ixypy nmoaydayich ayobitjic tüg'óciy tijaty nmüidich, e nañ co ixypy ngiyecyich nninix ma jäy ajcxy co huen nöctigoydäy, e ca' ndzocyich njihuüyich nmigügtjicich, ni ti oybi ca' nbada'ñich.

⁴ Yi jäy ajcxy huidibi ooy tzocy ooy jihuüy ymigügtjic, hue' ajcxy ooy mecxtujcin müidity, nañ ooy ajcxy yung naxy yjot yhuinma'ñ. Nañ ca' ajcxy ymigüg ti yajcohuindoyii, e nañ ca' ajcxy ñaygömayii ci'm. ⁵ Yi mibijcpidjic huidibi ajcxy tzojcp jihuüyb ymigügtjic, ca' ajcxy oyñinej ycapxcixy, ca' ajcxy yci'm tzojcin adzjp tungixy, nañ ni ca' ajcxy yhuindzipity, nañ ni ca' ajcxy ymigüg mijotma'tcixy. ⁶ Yi mibijcpidjic huidibi ajcxy tzojcp jihuüyb ymigügtjic ca' ajcxy yjotcujcity co pinjaty ytundigooy. Jotcujc ajcxy co pinjaty tudägy yjäy'ájtciqip. ⁷ Co naychojcin nayjihuiyim, huin'it yajtunim mecxtujcin, huin'it nmibijctayim huidijaty ty'ajtíp, huin'it nmibijctaayim co tüg'óciy tijaty oy yhuimbídzimipy, huin'it nmecxtujctayim tüg'óciy tzaachypi ayo'n.

⁸ Yi naychojcin nayjihuiyim ca' yi' ycixipy ytigoyipy ni mina. Minip je xii tiempo ma ca' y'ocyaj'ijxnipy y'ocyajmidoonipy Dios ycapxy y'ayuc huidi jäy ajcxy ñajtzcapxyigixyp, nañ ni ycajajmidoohuipy pin huingbi ayuc capxp, ni ycajajtzocy anajty ti diy'ajt. ⁹ Com ca' yca'pxity je xpijcin huidibi ñich ajt nmüid'ajtim. Nañ jadu'n ca' yca'pxity je Dios y'ayuc huidibi ñich ajt najtzcapxyim.

¹⁰⁻¹¹ Per co anajty nmüid'ajtim ca'pxy Dios y'ayuc ytiy'ajt, chi ycixipy ytigoyipy je ayuc huidibi nmüid'ajtim cham huidibi ca' yca'pxity. Co nmutz'ajtyich nbi'c'anäg'ajtyich, jadu'n anajty ngapxyich nmüidyägyich n'iyiyich nejtyin pi'c'anäcin. Per co oy nmij'anäciyñich, chi n'ixmajtznich je pi'c'anäg'atypi huinma'ñ. ¹² Nañ tím jadu'n nyajnajxim jadachambi xii tiempo ca' n'ixpijctaayim, ca' nhuinjihuiydaayim Dios y'ayuc ytiy'ajt. Jadu'n nipaady nej jihuüy nay'a'ijxnajxim ma tüg'ijx, huidibi ti chixni ti yjibiciyñi. Co anajty Jesús yhuimbity jadüg'oc, huin'it huadz nhuinjihuiydaayim Dios y'ayuc ytiy'ajt, com naybadaanim müid Jesús ahuin ajjip. Jadachambi magama nhuinjihuiyich. Per co nnaybadiiybich müid Jesús, huin'it nhuinjihuiydähuibich nej Dios y'ixpijcin müidity, tím jadu'n nej Dios nejhuüydäy nej ñich n'ixpijcin nmüidity. ¹³ Nmüibigaaním Cristo huinixii huinitempo, ca' n'ixmadzaaním nmüibjcin ni mina. Nañ njjip'ijxim co oybi nbadaaním ma Dios huinixii huinitempo. Nañ jadu'n ndzojcin njihuüyim migügtjic huinixii huinitempo. Hue' jac nügi copicyip co naychojcin nayjihuiyim ca'ydi jac ti.

14

Co huingbi ayuc yajcapxy

¹ Naychójcigixy nayjihuiyigixy miñ xyipy. Mijottigooygixy nej mbaatcixy Dios yjihui'ñ ymic'ajt canaagnax. Yi Dios yjihui'ñ ymic'ajt huidibi jac'oybi, yi' je' yejcpy mic'ajt jaydëbi mnajtzcapxyigixy Dios y'ayuc ytiy'ajt. ² Yi jäy ajcxy huidibi Dios ymic'ajt müid jaydëbi capxy huing ayuc, hue' ajcxy ymigapxyp

Dios, e ca' nan jāy, com yī jāy ajcxy ca' huinjihuūyigixy je' ajcxy y'ayuc huidibi capxp. Je Espīritu Santo yejcp je ayuc ma je huidibi capxp. Jadu'n nipaady nej jihuiūy ameech je' ycapxy. ³ Pinjaty najtzcapxūyib Dios ytiy'ajt, yī ycapxhuācxyp Dios y'ayuc ma yī jāy ajcxy, jaydēbi yujcpedipy ajcxy y'ixpijcin ma Dios y'ayuc, nañ jadu'n jaydēbi ajcxy yjotmicpigipy etz yjotcugūyigixipy. ⁴ Pinjaty capxp huing ayuc, hue' cī'm naybubedyī. Pinjaty najtzcapxūyib Dios y'ayuc ma yci'm ayuc, hue' ypubejtyp tūg'óciy yī mibijcpidijc.

⁵ Huaad co ixypipy nidūg'óciy miich ajcxy mgapxcixy huingbi ayuc. Per jac nīgi oy co miich ajcxy mnajtzcapxūyigixy Dios ytiy'ajt, ca'ydi co mgapxcixy huingbi ayuc. Pinjaty huidibi najtzcapxūyib Dios y'ayuc, jac nīgi oy tuñ, ca'ydi jac pinjaty huidibi capxy huingbi ayuc, pen ca' pinjaty capxticxipy je huingbi y'ayuc, jigix je mibijcpidijc jotcujc'ajtin páticixip. ⁶ Migūgtijc ajcxy, co ixypipy nñicxyich ma miich ajcxy, e ngapxyich ixypipy huingbi ayuc, ¿ti oybi miich ajcxy mbadamyb ma iich? Pen ca' anajty ti pubejtin nduñich ma miich ajcxy, pen ca' nyajnejhuūyigixy Dios ytiy'ajt jemybi, pen ca' nyaj'ixpijccixy Dios ytiy'ajt o pen ca' nnajtzcapxūyich Dios y'ayuc, o pen ca' nyecyich ixpijcin.

⁷ Tzoc ocpidaacim tūg iixpejt ma je xūxy, jadu'n nej je flauti o je arpa. Pen ca' nmido'mbijcim je nota je tono nidūg nidūg, ca' nmido'mbijcim ti pieza ti xūxy yajxuxp o yajcoob. ⁸ Nañ jadu'n co soldados ajcxy chiptunaangixy, pen je trompeta ca' huādz yxūxy, ca' ni tūg soldado ñayñi'ixihua'ñyī ma je tzip ytuna'ñyī yjada'ñyī. ⁹ Nañ tim jadu'n mūd miich ajcxy, pen mgapxcixyp huingbi ayuc huidibi ca' pin huinjihuūy, ¿nej yajnejhuūhūipy ti miich anajty mgapxyp? Jadu'n je' anajty yhuimbizimni nej nigooob mdim'ixmiydaaccixy. ¹⁰ Janch co ji yajpaady canaagnax ayuc ya naaxhuñ ac tigachjaty. Etz janch co nidūg nidūg jāy ayuc mūdity e cī'm je' ajcxy huinjihuūyigixy. ¹¹ Per pen ca' nhuinjihuiyich je ayuc huidibi jāy xyajmīgapxpcich jadu'n iich yī nyajnaxyich nej agatz. O pen ca', yī xyajnajxpcich nej agatz. ¹² Paady miich ajcxy co ooy mnijot'ajtcixy Dios yjihui'ñ ymic'ajt canaagnax, yajtungix je mic'ajt huidibi pubedam yī mibijcpidijc, jigix yujcpedipy ajcxy ymibijcin etz y'ixpijcin ma Dios y'ayuc.

¹³ Paady pinjaty jajtp nej capxip huingbi ayuc, copicy co Dios mibijctzohūipy co mic'ajt ymōhuūb, jaydēbi yajñigūey je ayuc huidibi ycapxamyb. ¹⁴ Pen nmibijctzooybich Dios mūd huingbi ayuc, nmibijctzooybich mūd iich n'espīritu, per iich nhuinma'ñ ca' ti jāygidaacin paady. ¹⁵ ¿Ti huaad ndunipyich? Pues copicy nmibijctzooyich n'ojadatyich Dios mūd iich njihui'ñich, e nañ jadu'n nmibijctzooyich mūd iich nhuinma'ñich. N'ibadaamyich ngapxpadaamyich Dios mūd iich njihui'ñich etz mūd iich nhuinma'ñich. ¹⁶ Com pen miich mhuiñigixyp mhuingapxtaaccixyp Dios mūd yī mjihui'ñ, je migūg huidibi amidoo'ijtp ca' je' huinjihuūy je huing ayuc huidibi mgapxyp, e ca' jēbi ymīna'nip "jadu'n jada, Amén." Com ca' yī huinjihuūy ti yī mgapxyp. ¹⁷ Ca' yjeczyty co oyjaty ayuc ti myajtuñ co ti myajnaxy Dioscojuyip ma Dios, per yī mmigūg huidibi ca' huinjihuūy miich m'ayuc ca' yī ti jāygidaacin paady. ¹⁸ Nyajnajxypich Dioscojuyip ma Dios co nīgi njatyich nej ngāpxibych huingbi ayuc, ca'ydi miich ajcxy nidūg'óciy. ¹⁹ Per co nyajpaadyich ma je mibijcpidijc ti ñayöömūjcgixy, jac'oy co ngapxyich migoox ayuc huidibi mibijcpidijc yhuinjihuūyigixyp, ca'ydi co ngāpxibich majc mil huingbi ayuc huidibi ca' pin huinjihuūy.

²⁰ Migügtijc ajcxy, ca' ajcxy mmüid'adipy mhuinma'n, jadu'n nej pi'ctijc yhuinma'n müidity. Ma yi jibicpi huinma'n ymiñ naybidägi jadu'n nej ma'xungdijc huidibi ca' ti jibic huinma'n huinjihuigixy. Müid'adip müich ajcxy oyjot oyhuinma'n jadu'n nej mij'anäctijc huidibi yhuinma'n ti ymejtzni ti yca'pxni. ²¹ Jaybety y'ity ma Dios ycötujcin necy ma Dios jadu'n ymina'n: "Nmigapxaamybich je may Israel jäy müid huingbi ayuc, e huingbi jäy najtzcaxihuamb #ch n'ayuc ma yi' ajcxy, per ni jadu'n ajcxy xycatuna'nich cuendi." Jadu'n je Huindzin Dios ymina'n. ²² Paady je' je Dios ymic'ajt huidibi yajcaxp huingbi ayuc, yejcp Dios ymic'ajt ijxpejt ma yi jäy ajcxy huidibi ca' mibijccixy Dios. Per je Dios ymic'ajt huidibi jäy ymüid co najtzcaxiy Dios ytiy'ajt, yejcp ijxpejt ma yi mibijcpidijc, ca' yecy ijxpejt ma yi' ajcxy huidibi ca' ymibijccixy. ²³ Ca' yjecyity jadu'n yjadip, co anajty ti ñayyöümüjcgixy je mibijcpidijc, e nidüg'óciy anajty ajcxy ytiyigixy capxi müid huingbi ayuc huidibi ca' pin huinjihuig, chi ytiyihuip ma ajcxy ñayyöymugyii nijëjity huidibi ca' ymibijccixy. ¿Ca' yi' ajcxy ymina'angixyipy co je mibijcpidijc anajty ajcxy ti y'ahuimbijtcixy loci? ²⁴ Pen nidüg'óciy je mibijcpidijc ma je nayyöymujctac najtzcaxiyigixy Dios ytiy'ajt müid yci'm ayuc, e co ytiyihuipy pinjaty huidibi ca' ymibicy, e co yi' midohuipy Dios y'ayuc yjihuihuamyb ypocy. E ci'm huinmayip nej anajty ti ytundigooy müid Dios co midohuipy co nidüg'óciy mibijcpidijc anajty najtzcaxiyigixy Dios y'ayuc. ²⁵ E Dios y'ayuc yajnejhuihuib nej anajty ameech ti ytundigooy jotjoty huinma'ñyoty. E chi jada' ycojxtinay'ihuihuipy, e ojadadipy Dios, e nañ jadu'n ymina'nip co janch Dios müich ajcxy xymüid'ijtp.

Tungixy tüg'óciy müid tudägy'ajt etz yajxon

²⁶ Migügtijc ajcxy, ¿ti huaad mdüngixipy? Co mnayyöümüjcgixipy, nijëjity müich ajcxy mhuin'ixipy tüg salmo, tüg ayuc huidibi yaj'ixpügamyb, tüg tiy'ajt huidibi Dios ti xyajnejhuigixy, etz capxip huingbi ayuc, etz capxticxipy nej yhuimbidzimyb je huingbi ayuc. Tüg'óciy jadu'n tungix, jaydëbi ajcxy jäygidägiy etz yujcpedipy ajcxy ymibijcin huidibi ti ñayyöümüjcgixy. ²⁷ Pinjaty capxamb ma je naymujctac müid huingbi ayuc, huen capxy metz o tugüg jäy je'yi, e huindüg padüg huen capxcixy, ca' y'animayity. E pinjaty capxticxamb je' je' yajniñguejip nej yhuimbidzimyb je ayuc tübi capxcixy. ²⁸ Pen ca' yajpaady ma je nayyöymujctac tüg jäy huidibi capxticxip je huingbi ayuc, jac'oy co ca' ni ti yajcapxipy müid huingbi ayuc, jac'oy co migapxip Dios jotjoty huinma'ñyoty, e ca' capxip mayjäyoty. ²⁹ Nañ jadu'n mayjäyoty jëbi metz o tugüg jäy najtzcaxihuip Dios ytiy'ajt, e yi jacjadyii mibijcpidijc huidibi amüid'ijtp, jëbi ajcxy huinmay pen janch Dios je' ytiy'ajt huidibi ajcxy ti najtzcaxiy, o pen ca' je' Dios tiy'ajt'adyii. ³⁰ Pen jim mayjäyoty jadüg jäy Dios yajnejhuigiyii nej ycapxip, nej tiy'ajt najtzcaxihuipy, huen je jäy y'amonipy huidibi anajty jayijp ti ytiyigijc najtzcaxiyi Dios y'ayuc ytiy'ajt. ³¹ Jëbi müich ajcxy nidüg'óciy mnajtzcaxiyigixy Dios ytiy'ajt huindüg padüg, jaydëbi tüg'óciy je mibijcpidijc ixpijccixy Dios ytiy'ajt, e nañ jadu'n jëbi nidüg'óciy yjotmüicpüjccixipy. ³² Copicy co yi' ajcxy huidibi najtzcaxiyb Dios ytiy'ajt, huen ajcxy nay'ané'migix ci'm, e huen capxcixy mina y'ahuatatzcy. ³³ Dios ca' xyajmidzocim nicx nhuinma'ñyidigooyim, Dios chojcpy co servicio ndunim agujc jotcujc.

³⁴ Jadu'n nidüg'óciy mibijcpidijc ma canaag cajp ymina'angixy co ca' huaad töxyjäydijc ycapxcixy serviciojoty, com Dios ti capxaducy co ajcxy

ca' ycapxipy serviciojoty. Copicy co je yëydijc ajcxy ane'mip je servicio, e ca' töxyjäydijc ajcxy huaad ane'mgixy je servicio, com jadu'n Dios ycötujcin ymina'n. ³⁵ Pen ñejhuïhuamyb ajcxy töxyjäydijc ti ayuc ti tiy'ajt, jëbi ajcxy ñiyëydijc amidoogixy co anajty ajcxy yhuimbijtcixni ma ytijc, com tzo'ydu'n yejpc töxyjäydijc ajcxy co ycapxcixy serviciojoty.

³⁶ Miich ajcxy hue' mdzachnaybidäacigixy nej jihuïy miich ajcxy jayjip tim nejhuïygixy Dios y'ayuc, ca'ydi jac pin. Miich ajcxy mnaybidäacigixy jadu'n nej jihuïy jimyi jadu'n yajcapxhuäcxy Dios y'ayuc, ca' yjacmaajity. ³⁷ Pen jim pinjaty ma miich ajcxy huïdibi naybidaacip nej jihuïy Dios ti ymöyii mic'ajt nej jëbi najtzcaxihuïpy Dios ytiy'ajt, o ti yhuinma'ñymöyii je Espiritu Santo tijaty tiy'ajt, hue' copicy nañ jadu'n yñejhuïhuïpy co je ayuc huïdibi ïch miich ajcxy nyajnijayïyb, Dios jada y'ane'min ycötujcin. ³⁸ Pinjaty jim ma miich ajcxy huïdibi ca' mijpidäga'n etz ni ca' cöbiga'n je ayuc tiy'ajt huïdibi Dios ti xyaj'ane'myich, Dios ca' cöbiga'n yjadu'mbi jay.

³⁹ Com ïch jada ayuc nyaj'ixpijpcich, paady cham nimaaybich nmigügtijcich, co huen najtzogïygixy nej mnajtzcaxïygixy Dios ytiy'ajt, e nañ jadu'n ca' mgapxadüjccixipy yi' ajcxy huïdibi capxamb huingbi ayuc. ⁴⁰ Hue' janchtiy tüg'öciy tungixy yajxon, etz müid tudägy'ajt, ca' oyüinej mdüngixipy.

15

Co Cristo yjugypijcy jadüg'oc co y'o'cy

¹ Jadügnax, migügtijc ajcxy, ndzojcpich co miich ajcxy mjäyméjtcixipy je Jesucristo y'ayuc ytiy'ajt huïdibi ti ngapxhuäcxyich ma miich ajcxy. Je' je' je ayuc tiy'ajt huïdibi miich ajcxy ti mgöbijccixy etz huïdi ajcxy tudägy mibijccixyp. ² Jëbi ajcxy m'alma ñdzögipy, pen mguydumyb ajcxy ïch n'ayuc huïdibi ngapxhuäcypich, e pen ca' anajty ti mmibijccixy.

³ Ti ngapxnaxyich ma miich ajcxy je ayuc huïdibi Dios jayjip ti xymöyich, etz ti nyajnimaaygixy huïdibi jaccopicyip co Cristo y'o'cy müid ajt nbocy ycixpi, jadu'n nej Dios y'ayuc ymina'n huïdibi jaybety ijtp ma yi' ñecy. ⁴ Chi ajcxy yajnaxtigïy Jesús, e codugüg xii yi' yjugypijcy jadüg'oc jadu'n nej Dios y'ayuc ymina'n huïdibi jaybety ijtp. ⁵ E co je Cristo yjugypijcy, chi ñayguëxici jayjip ma Pedro, e jac'axam ñayguëxici ma yi' jacjadyii ni majmetzpi apóstol ajcxy. ⁶ Jahueeni xii tiempo yjacnicxy co je Cristo oy ñayguëxigyii nañ jadu'n ma migox nimigo'pxnaxy mibijcpidijc tügpi tiempo. E may yjadu'mbi mibijcpidijc jacjugy'ajtni chambaad, etz naagity ajcxy ti y'ó'ccixni. ⁷ Jahueeni xii tiempo yjacnicxy co Cristo ñayguëxici ma Jacobo, etz nañ jadu'n ma nidüg'öciy yi' y'apóstol ajcxy.

⁸ Jac tim axam ñayguëxici je Cristo nañ jadu'n ma ïch. Jacjayjip Jesús huin'ixy yi' jacjadyii apóstol ajcxy, etz jac'axam ïch xyhuin'ixyich. Jadu'n ïch nipaady nej tüg jäy huïdibi ooy ti ñinajxni je tiempo co ti yma'xung'aty. ⁹ Jaccapxpaady yi' jacjadyii Jesús y'apóstol ajcxy ca'ydi ïch. Nañ jadu'n ni ca' ïch xypaady co jäy ajcxy xytijibich Jesús y'apóstol, müid co ooy ti n'ixhuïdityich ti nbahuidityich Dios yjäy ajcxy. ¹⁰ Fich nje'ajtpich nej nje'atych müid co Dios may'ajt müid ïch tuñ. Je mijmay'ajt je mij'oy'ajt huïdibi Dios ti tuñ müid ïch, ca' ñaadig'aty, ti y'oybidzimyb. Niigi mictägy ti nduñich ma Dios ytung, ca'ydi jacpinjaty. Ca' nan co ïch ndzachmadägyich ma Dios ytung. Hue' Dios oy xymüid'ityich, etz ooy may'ajt tuñ müid ïch. ¹¹ Paady pen

ti müch ajcxy mbaady Dios ytiy'ajt ma ñich, o ma yi jacjadyii apóstol ajcxy, ca' ñejity. Je' je' je Cristo y'ayuc huidibi ñich ajcxy ngapxhuäcxpich, e nañ Cristo yi' y'ayuc tiibi mmibijccixy.

Co öcypi ajcxy yjugypigäpy ajcxy jadüg'oc

¹² Per pen ñich ajcxy ayuc ngapxhuäcxpich co je Cristo yjugypijcy jadüg'oc co y'o'cy, ¿na'amy co nijëjity müch ajcxy minaangixy co yi jäy ajcxy tiibi y'o'ccixy ca' ajcxy yjugypigaangixy jadüg'oc? ¹³ Pues pen janch ca' yjugypigaangixy tiibi y'o'cy, nañ jadu'n ni Cristo ca' ycajyugypijcy jadüg'oc. ¹⁴ Co ixypy yjanchity co Cristo ca' yjugypijcy, nañ tim jadu'n je ayuc huidibi ngapxhuäcxpich ca' ti mic'ajt ixypy müdity. E nañ jadu'n müch ajcxy mmibijcin ca' ixypy chobaady. ¹⁵ Pen tiy'ajt ixypy co je öcpi ca' yjugypigaangixy, huin'it je Dios y'ayuc huidibi ngapxhuäcxpich ixypy yhuimbidityb anii. Com ngapxhuäcxpich co Dios yajjugypijcy Cristo co y'o'cy, paady pen tiy'ajt ixypy co pinjaty tiibi y'o'ccixy ca' yjugypijcy. Nañ jadu'n ixypy ca' ytiy'ajity co Dios yjugypijcy Cristo. ¹⁶ Pen je öcpidjic ajcxy ca' jugypijccixy etz ca' ajcxy yjugypigaangixy jadüg'oc, nañ jadu'n ni je Cristo ca' ycajyugypijcy jadüg'oc co y'o'cy. ¹⁷ Co je Cristo ca' ycajyugypijcy jadüg'oc co y'o'cy, chi müch ajcxy mmibijcin ixypy ca' choobaady. E ca' müch ixypy ajcxy Dios mbocy xyhuinmecxi. ¹⁸ E pen janch tiy'ajt ixypy co je Cristo ca' ycajyugypijcy, huin'it je mibijcpidjic tiibi y'o'ccixy tigoyaangixy y'alma. ¹⁹ Pen janch tiy'ajt ixypy co mmibijcin Cristo jëyi ma jadachambi tzinaayin ya naaxhuiñ, ca' jac ni ti ixypy njijp'ijxim co n'o'cim. Jadu'n ñich ajt nipaady nej locijäy, e jäy ajcxy nigi xyñixiicim xyajxiicim, ca'ydi jac ni pin.

²⁰ Per janch co Cristo yjugypijcy jadüg'oc co y'o'cy, je Cristo yi' je' je jayijp jäy huidibi jugypijc jadüg'oc. Co je Cristo yjugypijcy, chi ñicxy jadüg'oc ma Dios yajpaady, e nañ jadu'n müd yi' ycixpi mayjäy yjugypigañ ajcxy co anajty ti y'öccixy, e yñicxaangixy ma Dios yajpaady. ²¹ Com müd tüg jäy, je Adán, chondacy yi' o'cin ya naaxhuiñ. Nañ tim jadu'n müd tüg jäy, je Cristo, chondacy je jugypijcin co jäy y'o'ccixy. ²² Müd jada ycixpi co Adán ytundigooy oga'n, paady nidüg'öciy jäy patcixy yi' o'cin. Müd jada ycixpi co Cristo yjugypijcy jadüg'oc co y'o'cy, paady nidüg'öciy jäy ajcxy yjugypigaangixy jadüg'oc co anajty ti y'öccixy. ²³ Nidüg nidüg jäy yjugypigañ jadüg'oc jadu'n nej anajty ñigueegiyii. Cristo ti yjayijp'aty co yjugypijcy. Tüg'öciy yi' jacjadyii jäy ajcxy huidibi mjnxcpejtixp Cristo, yi' ajcxy jugypigamb jadüg'oc co anajty Cristo yhuimbity ya naaxhuiñ. ²⁴ Co anajty je Cristo yhuimbity ya naaxhuiñ, chi ycixipy ytigoyipy je naaxhuiñybi. Cristo yajtigoyamyb tüg'öciy naaxhuiñjäy y'ane'min, tüg'öciy naaxhuiñjäy ycotujcin, etz tüg'öciy naaxhuiñjäy ymic'ajt. Jesucristo ypijctähuaanip tüg'öciy naaxhuiñjäy ajcxy y'ane'min, e pidactähuiipy ma Dios y'ane'min, e Dios Teedy je' je'ajttähuiib. ²⁵ E tim copicy co je Cristo y'ane'mdähuaamyb tüg'öciy, ixti cooni Dios anajty ti mimadactäy tüg'öciy Cristo ymidzip, e ti pidactäy anajty ma Cristo y'ane'min. ²⁶ Jesús yajcixamyb yajtigoyamyb jac'axam je o'cin, ca' ni pin yjac'öcniipy. ²⁷ Com Dios ymimadactähuiip tüg'öciy je Cristo ymidzip, e pidactähuiip ma je Cristo y'ane'min. Per co Dios y'ayuc huidibi jaybety ijtp yminañ co je Cristo ti mimadactäy tüg'öciy, ca' nan hue' je' yajhuinjihuüy co Cristo ti mimadägy Dios. Com Dios yi' je' huidibi ti mimadactäy, e ti pidactäy ma Cristo y'ane'min. ²⁸ Co anajty Dios mimadactay tüg'öciy pinjaty etz tijaty huidibi mic'ajt müd, e co anajty pidactay ma je Cristo y'ane'min, chi je Dios y'ung ypidactähuiipy yi' y'ane'min ma Dios Teedy, etz ane'my yhuimañ ma Dios Teedy, je huidibi

anajty ti mımadactay. Jadu'n Jesucristo tuna'n, jigix jëbi Dios mıid'ajttäy tüg'ócıy mic'ajt etz ane'm'ajt.

²⁹ Pen ca' yjadu'nıty, ¿na'amy co mdzachnıbejtıcy co öcpi tzachcodınaaygıxy? Co ıxyıpy ca' pın yjugypıga'n jadüg'oc co anajty ti y'o'cy, ¿na'amy co jäy nııbejtıcy mıid öcpi ycıxpi?

³⁰ ¿E ti ycıxpi co ııch ajcxy nyajpatcıxy ayo'nduum jabom jabom? ³¹ Migügtıjc ajcxy, janch janch ııch mııch ajcxy nımaaygıxy co ooy njäygidägyıch mııch ajcxy. Mıid co mmııbjccıxy je nHuındzin Jesucristo, paady ycıxpi ııch mııch ajcxy nımaaygıxy co jabom jabom nyajpaadyıch öcıjıj'p'am. ³² Mınaambıch jadu'n co ooy nhuındınäy njıjptınäyıch nmıdzıp ya Efeso. Tim jadu'n nıpaady nej jıbic ıyujc ahua'n ıyujc nhuındınäy njıjptınäyıch. Pen ca' yjanchıty co yı öcpi ajcxy yjugypıgıpy jadüg'oc, naadıgı'ajtp ıxyıpy co ııch ayo'n jabom jabom nhuındınäy njıjptınäyıch. Nıg oy co ıxyıpy nyajtüyöyım jadu'n nej ayuc y'ıtyın: "Tzoc caayım uucım, agujc'ajtm jotcujc'ajtm, com jabom huıxtıc njugy'ajtm ycıxaanım mıid yı o'cın."

³³ Ca' mnayyéjıcgıxy co pınjaty xyhuın'ıngıxıpy. Jadu'n yjadıpy nej y'ayuc y'ıtyın: "Yı mıgügtıjc ajcxy huıdıbı jıbicjot jıbic-huınma'n mıid, yajtıgooyb ajcxy je oyjot oyhuınma'n." ³⁴ İxmajtcıx jıbicjot jıbic-huınma'n etz tzınaaygıx tudägy ca' mbocytungıxy. Nıjējıty mııch ajcxy ca' mnejhuııygyıxy Dios ytıy'ajt. Jadu'n nmına'nıch, jigıx ajcxy mdzo'ydu'n mjıhuııygyıxy.

Nej ajcxy yı ögyıpy yjugypıgıpy ajcxy jadüg'oc

³⁵ Ycadımjcyıty co nıjējıty mııch ajcxy xy'amıdohuıpyıch: "¿Ma mıic'ajt pátıxıpy je o'cpi ajcxy co jëbi yjugypıjccıxy jadüg'oc? ¿Huıdıbı nınıcx ajcxy ymı'ıdamyb?" ³⁶ Ca' mııch ajcxy ti mhıınjıhuııygyıxy. Ca' mnejhuııygyıxy co je moc tım huıdıbı mniıpcıxyp ca' ymıxa'n ıxtı coonı anajty jayıjıpy ti ypıch.

³⁷ Ca' mııch ajcxy mniıpcıxy je mocquıpy. Hue' mııch ajcxy mniıpcıxyp je tımmoc o'jacjadyıı huıngbı tım. ³⁸ E co je tım ymıxy, chí Dios möy je nıııcx, tım jadu'n nej Dios jayıjıpy ti huınmay ti tzocy. E Dios nıje' nıje' je tım möy je nıııcx tıgachjaty. ³⁹ Canaagnax nınıcx yajpaady ya naaxhuıı, ca' ajcxy ytügnaxıty. Tıgach yı jäy ajcxy mııdıty nıııcx, tıgachjaty ıyujc ajcxy mııdıty nıııcx, nañ tıgachjaty joon ajcxy mııdıty nıııcx, e nañ jadu'n tıgachjaty acx ajcxy mııdıty nıııcx. ⁴⁰ Yı tzajpjoty tzınaayb ajcxy tıgachjaty mııdıty nıııcx, nañ jadu'n huıdıbı ajcxy tzınaayb naaxhuıı tıgachjaty mııdıty nıııcx. Yı tzajpjoty tzınaayb ajcxy nıııcx mııd tıgachjaty y'oy'ajtm, ca'ydı jadu'n nej yı naaxhuıı tzınaayb ajcxy y'oy'ajtm. ⁴¹ Yı xıı ytııcxın yjajın ca' nıaybadyıı mııd po' ytııcxın yjajın, nañ tım jadu'n je po' ytııcxın yjajın ca' nıaybadyıı mııd madza' ytııcxın yjajın. Etz nıje' nıje' madza' mııdıty ytııcxın ca' nıaybadyıı mııd jacjadyıı madza' ytııcxın yjajın. ⁴² Nañ tım jadu'n yjada'n mııd yı jäy ajcxy tııbı y'o'ccıxy co ajcxy yjugypıjccıxy jadüg'oc. Jäy ajcxy yajnaxtıgıy je öcpi naaxnıcx huıdıbı yhuındıgooyıpy, e yjugypıgıpy jadüg'oc mııd tüg' nıııcx jemybı huıdıbı ca' yhuındıgoya'n nımına. ⁴³ Je öcpi nıaaxnıcx co nıaaxtıgıy, ca' ti oy'ajtm mııdıty, e co yjugypıjcnı jadüg'oc ymııd y'oy'ajtm. Je öcpi nıaaxnıcx co nıaxtıgıy, ca' ti mıic'ajt mııdıty e chí yjugypıjcnıp mıic'ajt mııd. ⁴⁴ Co je öcpi nıaaxtıgıy, hue' yjugypıjcnı, mııd jemybı nıııcx ca'p yaj'ıxy. Pen jı yajpaady nıııcx huıdıbı Dios ti yajcojy mııd naax, nañ tım jadu'n jı yajpaady nıııcx huıdıbı Dios yajcojpy mııd yjıhuıı'n ymıc'ajt ca'p yaj'ıxy.

⁴⁵ Jadu'n jaybety y'ıty ma Dios nıcy ma jadu'n ymına'n: "Je jayıjıpy Adán ymııd anajty jugy'ajtm." Je axambı Adán (je' je' je Cristo) je' tüg' espııtu

huidibi jugy'ajt yejcp. ⁴⁶ Je huidibi Dios yjihui'ñ ymic'ajt m'iid ca' je' yjayijp'ajty, je' jayijp'ajty huidi Dios yajcoj m'iid naax; jac'axam je' huidibi Dios yjihui'ñ ymic'ajt m'iid, je' je' je Cristo. ⁴⁷ Je jayijpi jāy huidibi Dios yaj'oyi'y, hue' je' yaj'oyiy m'iid naax (e yajpaady ya naaxhuiñ). Je mimetzpi jāy huidibi Dios yaj'oyiy, ñich ajt nHuindzin Jesucristo, hue' je' chooñ tzajpjoty. ⁴⁸ Je jāy ajcxy huidibi tzinaayb ya naaxhuiñ, yi' ajcxy ñin'icx tú'ciy ñaybadyii m'iid Adán ñin'icx huidibi Dios yaj'oyiy m'iid naax. Yi jāy ajcxy huidibi tzinahuamb tzajpjoty, hue' ajcxy ñin'icx tú'ciy ñaybada'ñyii m'iid je Cristo ñin'icx huidibi tzinaayb tzajpjoty. ⁴⁹ Jadu'n nej ñich ajt, tūgnax nguëx'icim m'iid Adán huidibi Dios yaj'oyiy m'iid naax. Nañ tim jadu'n tūgnax nguëx'igaanim m'iid je Cristo huidibi tzinaayb tzajpjoty.

⁵⁰ Migügtijc ajcxy, hue' nñimähuaangixy co je nin'icx huidibi m'iid yxixy etz yñi'py ca' yi' y'ida'ñ ma Dios y'ane'my. Je nin'icx huidibi cixamb tigoyamb ca' pada'ñ it lugar ma yi' ñin'icx ajcxy ity huidibi ca' ycixa'ñ ytigoya'ñ. ⁵¹ Tungix cuendi jada ayuc, nyaj'ixpigaamybich miich ajcxy tūg tiy'ajt huidibi ca' pin huinjihui'y. Ca' nan nidüg'óc'iy ñich ajt n'ōgaanim, per nidüg'óc'iy ñich ajt Dios nñin'icx xyajtigadzaanim. ⁵² Co anajty Dios yajxūxy yi' ytrompeta, je huidibi anajty cogix'iyñip, chi cixipy je naaxhuiñybi. Chi Dios xyajtigadzaanim ajt nñin'icx tim tzojcyi, tim tūg jaxigy tūg huinm'ipy. Dios yajxūxamyb yi' ytrompeta, e je jāy tiibi ajcxy y'ōccixy jugypigip ajcxy jadüg'oc, e ni ca mina ajcxy y'ōccixnipy. E ñich ajt huidibi jacjugy'ajtni Dios ñich ajt xyajtigadz'aaanim nñin'icx. ⁵³ Com ñich ajt nñin'icx huidibi ōgam, huidibi huen tigoyamb, copicy ytigadzip, e nm'iid'adaanim nin'icx huidibi ca' ōga'ñ ca' yhuindigoya'ñ. ⁵⁴ Co anajty ytigajtzim ajt nñin'icx huidibi cixamb huindigoyamb, nm'iid'ajtim anajty jemybi nin'icx huidibi ca' ycixa'ñ yhuindigoya'ñ n'imina. Co anajty ytigajtzim ajt nñin'icx huidibi ōgam, e nm'iid'ajtim jemybi nin'icx huidibi ca' y'ōga'ñ, huin'it cuydunipy Dios y'ayuc huidibi jaybety ijtp huidibi jadu'n ym'ianamb: "Co anajty ajt nHuindzin Dios mimadāgy yi' o'cin, huin'it cōdigooyñip je o'cin (ca' jacpin y'oc'o'cñip). ⁵⁵ ¿Ma yi' o'cin ocjacpada'ñ mic'ajt co tity xy'ocjactzaachytunaanim? ¿Ma yi' o'cin ocjacpada'ñ mic'ajt co tity xy'ocmimadāgaanim?" ⁵⁶ M'iid co ti ndundigooyim, paady ycixp o'cin nbaatim. M'iid co ca' ti nguydunaa'yim Dios y'cōtujcin, paady ycixp o'cin nbaatim. ⁵⁷ Per nyajnajxim Dioscojuyip ma Dios co mijmay'ajt ti tuuñ m'iid ñich ajt ycixpi, e ti nmimadaacim yi' o'cin co ajt nHuindzin Jesucristo y'o'cy m'iid ajt nbocy ycixpi.

⁵⁸ Paady ycixp, miich ajcxy migügtijc huidibi ooy ndzocy njihui'yich tiydudāgy mmibijccix, ca' m'ixtigihua'ccixy ma mmibijcin, ca' m'ixmajtzcixy yi' mmibijcin, ca' ajcxy m'jotmetzc'iygixy. Tungix jabom jabom ma Dios ytung agujc jotcujc, com mnejhuuygixy co ca' ñaadig'i'aty ajcxy mdung ma ajt nHuindzin Jesucristo ytung.

16

Je cuejtin m'iid je hermano ajcxy ycixpi

¹ Jadu'n nej ymiñ yi' meeñ huidibi miich ajcxy myajmujccixy m'iid je mibijcpidijc ycixpi huidibi jim Jerusalén. Cuydungix je tiy'ajt huidibi ti nyaj'ané'mgixyich yi' mibijcpidijc huidibi canaagpicy yajpatp jim Galacia. ² Naag naag domingo, je jayijpi xi' ma je semana y'ixtigiy nidüg nidüg miich ajcxy mbidāgip abicy hueeni pi'cmeeñ, jadu'n nej anajty ii ti mbaatcixy. Je pi'cmeeñ huidibi anajty ti myajmujccixy mgüend'ajtcixipy ooy, jigix co ñich jim

njadip ma miich ajcxy, ca' ycopicyity meen myajmújicixipy. ³ E co anajty jim nmechich ma miich ajcxy, miich ajcxy myajníbigipy nijéjity migúgtijc huidibi nícxip jim Jerusalén. E iich nguexipyich jada migúgtijc jim Jerusalén miid tüg necy etz miid je meen huidibi anajty miich ajcxy ti myajmujccixy, jaydëbi yajcidiǵihuij je mibijcpidijc jim Jerusalén. ⁴ E pen ooy ytimycopicyity co iich nañ jadu'n nñicxibich jim Jerusalén, jëbi ajcxy ñicxy miid iich.

Pablo huinmay co nicxa'ñ Macedonia

⁵ Co anajty ndübicyich nñicxaambich ma miich ajcxy, jayijp naxihua'ñich Macedonia naaxjot, com copicy jim Macedonia naxihua'ñich. ⁶ Ca' jecyity co nícxu nhuimych ma miich ajcxy jecy jecy. Ca' yjecyity co nyajnaxipyich tüg'óciy je tichypoj tiempo miid miich ajcxy. Co anajty ndzooñich jadüg'oc ma miich ajcxy, nñicxyich anajty muumjaty, miich ajcxy xytüjijphuohuihuibich ma iich anajty nñicxa'ñich. ⁷ Ca' nan tzojccixy n'ida'ñich miid miich ajcxy, hue' jatytimy huäcxibaambich ma miich ajcxy jecy jecy, pen iich ajt nHuindzin Jesús jadu'n tzojcp. ⁸ Per njac-huäcxibaambich ya Efeso ixti cooni Pentecostés xi anajty ti ñajxtäy. ⁹ Com nmüdidich it lugar ya ma jëbi ngapxhuäcxychi Cristo y'ayuc, e mayjäy huidibi mijpidacp iich n'ayuc, nañ jadu'n mayjäy ya ooy midzip'aty Jesucristo y'ayuc yti'ajt.

¹⁰ Co Timoteo anajty yjädy ma miich ajcxy, tungixy may'ajt mgöbójccixipy agujc jotcuje ca' ti mhuinmaaygixy, com Timoteo tumb ma ajt nHuindzin Jesucristo ytung tim jadu'n nej iich nduñich. ¹¹ Paady ycixp ca' huaad miich ajcxy Timoteo mga'oy'ixipy etz mdüjijphuohuihuipy, jaydëbi ca' ti jotmay miid'adipy etz yjactüyöyip agujc jotcuje, e ymedzipy ya Efeso ma nyajpaadyich. Com nijip'ijxypich co Timoteo xyñijädibich quipxyi miid jacjadyi mibijcpidijc.

¹² Jadu'n nej yjajti miid ajt nmigüg Apolos. May'ajt nbijctzoohuich ma Apolos co yi' müdnicxip nijéjity jacjadyi migúgtijc huidibi nícxamb ma miich ajcxy. Per ca' yi' yjotcuycity co ñicxip jadachambi tiempo. Hue' janchtiy jacjüni yñicxipy, pen yaj'ahuätzciyb anajty.

Capxpoocxin huidibi cijxnip je necy

¹³ Ni'ixi m'idipy ajcxy ma mmibijcin. Naygüend'ájtigix ma mmibijcin. Tiydudägy ajcxy mmibigipy, ca' m'ixtigihuäccixy ma mmibijcin. Naybidáacigix huinmic jotmic ma mhuinma'ñ. Mic m'idipy ajcxy ma mmibijcin. ¹⁴ Tüg'óciy tijaty ajcxy mdungixy, tungixp miid tzojcin jihuüyin etz oyjäy'ajtin.

¹⁵ Migúgtijc ajcxy, mnejhuüyb jadu'n nej Estéfanas miid yjugymigüg ti mibijccixy Jesucristo y'ayuc. Yi' je' jayijp ajcxy mibijcp jim Acaya, e ti yhuinma'ñyidaaccixy co ypubedamyb ajcxy yi' mibijcpidijc. ¹⁶ May'ajt nbijctzoobybich ma miich ajcxy co myajmij'ájtixipy Estéfanas, etz jac pinjaty huidibi pubejtp je mibijcpidijc etz huidibi ajcxy tumb Dios ytung. ¹⁷ Ooy njotcújidyich co Estéfanas, Fortunato, etz Acaico ti ymiñ ma iich ajcxy ya Efeso. Yi' ajcxy xymüid'ijtpich, com ca' anajty y'oyiy nej nmüd'idipyich miich ajcxy. ¹⁸ E yi' ajcxy ti ooy xyajjotcugiyich, e nañ jadu'n miich ajcxy ti mjotcugiyigixy co yi' ajcxy ymiñ ma iich. Paady ycixp copicy co miich ajcxy myajmij'adip yi' ajcxy etz jacjadyi tim jadu'n nej yi' ajcxy.

¹⁹ Yi' mibijcpidijc huidibi canaagpicy ya Asia naaxjot yquejxyp ajcxy capxpoocxin ma miich ajcxy. Aquila etz Priscila etz yi' mibijcpidijc huidibi ajcxy yöymujcip ma Aquila ytijc yquejxp ajcxy capxpoocxin ma miich ajcxy ma ajt

nHuindzin Jesucristo yxii. ²⁰ Tüg'óciy je mibijcpidijc huidibi ya Efeso yquejxp ajcxy capxpoocxin ma miich ajcxy. Naygapxpóocxigixy miich ajcxy xic xon.

²¹ Hich, Pablo, njaaybich miid ngi'mgi' ngi'mletra jada capxpoocxin huidibi nguejxypich ma miich ajcxy. ²² Pen jim pinjaty ca' mijpidägy ich ajt nHuindzin Jesucristo, huen Dios yajtigooyip ajcxy y'alma. ¡Maranata! Huen tzojc yminiipy ajt nHuindzin Jesucristo.

²³ Huen ajt nHuindzin Jesucristo oy'ajt may'ajt tunipy miid miich ajcxy etz xyconuucxip ajcxy. ²⁴ Ndzojcypich njihuuybich miich ajcxy nidüg'óciy huidibi yajpaady ma Jesucristo. Jadu'n jada. Amén.

2 CORINTIOS

Yi Mimetz Necy Huidibi San Pablo Yajnigiejx Je Mibijcpidijc Jim Corinto

¹ Hich Pablo, Dios jadu'n ti tzocy, paady ycixpi Jesucristo ti xyajñibicyich co ngapxhuäcxibich yi' y'ayuc. Hich müid ajt nmigüg Timoteo nguejxypich jada necy ma je mibijcpidijc jim Corinto. Nañ jadu'n nguejxypich jada necy ma tüg'óciy je mibijcpidijc majaty je cajp huidibi yajpatp jim Acaya ñaaxjot.

² Huen Dios Teedy etz ich ajt nHuindzin Jesucristo may'ajt oy'ajt tunipy müid miich ajcxy etz xyajjotcugüiygixip.

Nej Pablo yjajty y'ayoy

³ Tzoc yajnajxim Dioscojuyip ma Dios, je nHuindzin Jesucristo yTeedy, je Dios Teedy huidibi ajt xypa'ayoohuim, je Dios huidibi yejcp jotcuyc'ajtin.

⁴ Dios xyajjotcugüiyim co nminajxim nyajnajxim tzaachypi ayo'n jigix jébi nyajjotcugüiyim jacpnjaty huidibi minajxp yajnajxp tzaachypi ayo'n. Tim jadu'n nej ich ajcxy ti nbaady jotcuyc'ajtin ma Dios, nañ tim jadu'n yi' ajcxy pada'ñ jotcuyc'ajtin ma Dios huidibi minajxp yajnajxp tzaachypi ayo'n. ⁵ Com tim jadu'n nej ich ajt nminajxim nyajnajxim tzaachypi ayo'n müid Cristo ycixpi, nañ tim jadu'n müid Cristo ycixpi nbaatim jotcuyc'ajtin. ⁶ Paady ycixpi ich ajcxy nminajxcixy nyajnajxcixy tzaachypi ayo'n, jaydëbi müich ajcxy mbaadip jotcuyc'ajtin etz nañ jadu'n ypaadip ajcxy m'alma ñidzoocin. Dios yejcpy jotcuyc'ajtin ma miich ajcxy, jaydëbi müich ajcxy mbaadip jotcuyc'ajtin etz nañ jadu'n ñidzögip ajcxy yi' m'alma. E co ajcxy mbaadip jotcuyc'ajtin etz ajcxy m'alma ñidzoocin, chi jébi müich ajcxy mmimadägip etz mmecxtugip tzaachypi ayo'n, tim jadu'n nej ich ajcxy nmimadägy etz nmecxtüjccixich tzaachypi ayo'n. ⁷ Jotcuyc nayjihuiyijich müid müich ajcxy ycixpi, com njijp'ijxpich co mmadägipy ajcxy ma mmibijcin. Com nejhuüybich co müich ajcxy nminajxyp myajnajxyp tzaachypi, tim jadu'n nej ich ajcxy nminajxcixy nyajnajxcixy tzaachypi. E nañ jadu'n Dios yejcpy jotcuyc'ajtin ma müich ajcxy, tim jadu'n nej yecy jotcuyc'ajtin ma ich ajcxy.

⁸ Migügtijc ajcxy, ich ajcxy ndzojcpich co müich ajcxy mnejhuühuip jadu'n nej canaagnax tzaachypi ayo'n ti nminaxyich ti nyajnaxyich jim Asia naaxjot. Jayin jahueeni ti ngamimadäga'ñich. Ca' anajty njijp'ixyich co nbidzimipyich juugy ma je jimbí it lugar. ⁹ Jadu'n ich ajcxy nnayjihuiyii nej jäy ajcxy huidibi yajpatcyp o'cjijp'am. Jadu'n ti njatyich, jigix jébi n'ixpicyich nej ich huaad nigí Dios nyajmij'atyich, je Dios huidibi yajjuygipigip yi' jäy ajcxy tübi y'öccixy. E ca' nan ngi'm mic'ajt nmijpidaacpyich. ¹⁰⁻¹¹ Ti ich ajcxy Dios xyñihua'ñ xycohua'ñ, e xyjacnihua'naamb xyjaccohua'naambich ajcxy ma yi' jäy ajcxy huidibi xyaj'ögaambich ajcxy. E co müich ajcxy xypubejtyich, copicy co jacmibijctzoogix Dios müid ich ycixpi. Njijp'ijxypich co Dios yi' xyjatyimy xyñihua'naambich xycohua'naambich. E pen mayjäy Dios mibijctzoogix müid ich ycixpi, nañ jadu'n yajnajxcixyipy ajcxy jäygidaacin ma Dios müid je may'ajt oy'ajt ycixpi huidibi Dios ytumyib müid ich ajcxy.

Ti Pablo co yhuäcxijpy, ca' chojc nicxy jim Corinto

¹² Jotcuyc nayjihuiyijich müid jada ycixpi com nejhuüybich co ti ndzinäyich müid tudägy'ajtin etz müid oyjot oyhuinma'ñ müid yi' mayjäy ajcxy canaag agajp etz jacnigi ma müich ajcxy. Dios müid may'ajtin oy'ajtin ti xypubetyich

co tudägy ti ndzinäyich, e ca' nguyduñich ngi'mjot ngi'mhuinma'ñich ma ndzinäayinich. ¹³ ñich miich ajcxy nyajnijayiyb je ayuc tiy'ajt huidibi miich ajcxy jëbi mgapxcixy etz mhujnihuihygixy. E nañ jadu'n njijp'ijxypich co miich ajcxy mhujnihuihyipy ñich n'ayuc tüg'óciy. ¹⁴ Jadu'n nej miich ajcxy cham cujc-huäcxy mhujnihuihygixy ñich n'ayuc ndiy'ajt. Jacjiini co anajty je xii je tiempo ymiñ co ajt nHuindzin Jesús y'ane'ma'ñ ya naaxhuiñ, chi miich ajcxy jotcuje mnayjihuihyyb müid ñich ycixpi. E nañ tim jadu'n nej ñich ajcxy jotcuje nayjihuihyyb müid miich ajcxy ycixpi.

¹⁵ Com nejhuihybich co miich ajcxy xychojcpich xyjihuihybich, paady ycixpi nhuinma'ñ nbidägyich co ñicxy n'ixaangixy miich ajcxy jadüg'oc, e jadu'n nyajjotcugihuaangixich miich ajcxy mejtz'oc. ¹⁶ Jadu'n nhuinma'ñ ti nbidägyich co ñnicxa'ñich Macedonia. Per jayijp nnaxa'ñich ma miich ajcxy mgajp. E co anajty ndzooñich Macedonia, jadüg'oc ñnicxa'ñich ma miich ajcxy. E jadu'n jëbi miich ajcxy xytüjijphuohuihuibich co anajty ñnicxyich jim Judea. ¹⁷ ¿Nej mdijy, co ñich aametz jotmetz nduñich co ca' ti ñnicxyich ma miich ajcxy nej anajty ti nmïna'ñich? ¿Nej mdijy, nhuinma'ñ müididyich jadu'n nej naaxhuiñyây huidibi minamb co ñicxa'ñ, e chi ca' ñicxni? ¹⁸ Per Dios jëbi tiy'ajt yegipy co je ayuc tübi nyajniimaaygixy, nguydunipyich yi'. ñich n'ayuc janch yi'. ¹⁹ ñich müid Silvano etz Timoteo ngapxhuäcxcixyich Cristo Jesús y'ayuc, je Dios y'ung. E Cristo Jesús y'ayuc janch yi', ycuudumyb je' y'ayuc, tudägy je' ycapxy. ²⁰ Tüg'óciy je ayuc huidibi Dios yejc jecy'ajty müid ñich ajt ycixpi, hue' Cristo Jesús cuydundaayb. Paady co ngapxpaatim n'ojadajtim Dios, chi nmïnaanim. "Amén, jadu'n jada," com Cristo Jesús ti cuydundäy Dios y'ayuc. ²¹ Com je' je' Dios huidibi xyajmibijcim Cristo, e Dios huidibi xyajmüid'ijtim Cristo. Jadu'n Dios ytuñ müid ñich ajcxy etz nañ jadu'n müid miich ajcxy. Je' je' Dios huidibi xyajmibijcim etz xypidaacim tügjijp ma yi' ytung. ²² Dios ti pidägy ma ajt njot nhuinma'ñ je tiy'ajt co nyajpaatim ma Cristo Jesús. Co Dios xy'adigiyim xyjottigiyim yi' yjihui'ñ ymic'ajt, chi tiy'ajt yecy co nyajpaatim ma Cristo Jesús.

²³ Dios jëbi tiy'ajt yegipy co müid tudägy njot nhuinma'ñ nmïydacyich co ca' jadüg'oc ñnicxyñich ma miich ajcxy mic'amy, jadu'n nej anajty nhuinma'ñ ti nbidägyich, müid co ca' ndzocyich ñicxy n'ojcixy huin jijp. ²⁴ Ca' ñnicxa'ñich mic'amy ma miich ajcxy, com ca' adzip nyajmibigaangixy miich ajcxy huidibi copicy ajcxy mmibigipy. Miich ajcxy tiydudägy ti mmibijccixy. Jëyi co nbube-daangixy jaydëbi ajcxy nigí jotcuje'ajt mmüid'adipy ma ajcxy mdzinaayin mjogy'ajtin.

2

¹ Paady ycixpi jadu'n nhuinma'ñ ti nbidägyich co ca' ñnicxa'ñich mic'amy jadüg'oc ma miich ajcxy, müid co miich ajcxy nyajtajipy nyajmayipy co ngapxhuijyich müid ajcxy mbocy ycixpi. ² Com pen ñich miich anajty ajcxy nyajtajpy nyajmaayb, ¿pin jada' ñich xyajjotcugihuihuibich? Pues miich ajcxy huidibi tajp mayb, miich ajcxy xyajjotcugihuihuibich. ³ Paady ycixpi ti nni-jayiygixy jadu'n co ca' ñnicxa'ñich mic'amy ma miich ajcxy, com ca' jadu'n ndzocyich co ñich miich ajcxy nyajtajipy nyajmayipy. Jac'oy co ñich miich ajcxy nyajjotcugihuihyipy. Com nejhuihybich co ñich jotcuje nayjihuihyijich müid miich ajcxy ycixpi. Nañ jadu'n miich ajcxy jotcuje mnayjihuihyyb co mnejhuihyipy co ti njotcugihuihuibich müid miich ajcxy ycixpi. ⁴ Co ti njayich je necy huidibi ti nguexyich ma miich ajcxy, ooy mij jotmay ti njihuiyich,

ixti nyaaxich. Per ca' nan paady ycixpi ti njaayich je necy co nyaajtajaangixy nyajmayaangixy. Hue' janchtiy ti njaayich je necy jaydebi mnejhuuyigixy co mijcajee ndzocjixy njihuuyigixy.

Meeexin ma je pin anajty jibicpi ti tuñ

⁵ Per pen jim ma miich ajcxy pinjaty ti yecy tajin mayim co ti ytundigooy, pues ca' nan ich tũpajc tajin mayim jihuiybich. Nañ jadu'n miich ajcxy nidũg'óciy mjihuuyigixyp tajin mayin. Jadu'n nmina'ñich co huenjaty tajin mayin miich ajcxy mjihuuyigixy, jigix ca' anaxy ajcxy nyajtajip nyajmayip. ⁶ Yajhuáčxijp je tzaachypí huidibi miich ajcxy mooyb je migũg huidibi ti ytundigooy. Ti miid jadu'ñi. ⁷ Jadu'n tzocy cham co miich ajcxy meex je migũg jadu'n nej ti ytundigooy, etz nañ jadu'n ajcxy myajjotcugihuiy. Ca' yjecyoty co je migũg anaxy oy jihuihuip tajin mayin. ⁸ Paady ycixp may'ajt nbijctzooyich ma miich ajcxy co myajniguexigipy ajcxy co mdzocy mjihuuy ajcxy je migũg huidibi ti ytundigooy. ⁹ Ich miich ajcxy ti nijayiy jayhuin miid je migũg ycixpi huidibi ti ytundigooy, jigix jebi nnejhuuyich, pen mguydumyib miich ajcxy ich n'ayuc, o pen ca' mguydungixy. ¹⁰ Jadachambi co pinjaty ti ytundigooy ma miich ajcxy, e miich ajcxy mhuinmeexi yi' ypocy, nañ jadu'n nhuinmeexip ich yi' nej ytundigooy. Com ich co nhuinmeexyich tũg nmigũgich nej ti ytundigooy, jadu'n nduñich miid miich ajcxy ycixpi, com Cristo y'ijxyp ñejhuuyb tũg'óciy tijaty nduunim. ¹¹ Jadu'n nhuinmeexim nmigũg ypocy, jigix Satanás, je mujcu', ca' xymimadaacim. Nejhuuyim yajxon nej Satanás mañ'ajt miidity.

Pablo ca'p anajty yjotcujc'aty jim Troas

¹² Co nja'tyich ma je cajp huidibi xijip Troas, chi ngapxhuácsa'ñich anajty Cristo y'ayuc yti'ajt, etz mij ooy tigiydac nbatyich, nej jebi nduñich ma ajt nHuindzin Jesucristo ytung. ¹³ Per ca' anajty jotcujc nayjihuiyijich. Com ca' nmuinaybatich je ich ajt nmigũg Tito jim Troas. Paady ycixp ngapxycixyich miid je mibijcpijic ajcxy jim Troas, e nnicxyich jim Macedonia ñaaxjot.

Madaacim ma Cristo

¹⁴ Nyajnajxypich jaygidaacin ma Dios co miid Jesucristo ymic'ajt jatity nmimadacypich jabom jabom tũg'óciy huidibi xymidzip'ajtpich ma tũg'óciy naax cajp. Nañ jadu'n Jesucristo ti xymöyich yi' y'ayuc huidibi ngapxhuáčxypich ma tũg'óciy naax cajp. Je mayjáy ma canaag cajp ooy jaygidaaccixy Cristo y'ayuc. Co ngapxhuácsich Jesucristo y'ayuc xi ya, jadu'n nipaady nej tũg xuucin huidibi ooy oy xuugy, e y'abojiy xi ya. ¹⁵ Co ngapxhuácsyich Cristo y'ayuc ma yi mayjáy huidibi padamb ajcxy y'alma ñidzoocin ooy Dios jaygidägy. E ñañ jadu'n Dios ooy jaygidägy co ngapxhuácsyich Cristo y'ayuc ma yi jáy ajcxy huidibi ajcxy y'alma tigoyaamb. Jadu'n ich ajcxy ndung nipaady nej jihuiy nboomjócixich jabom jabom ma Dios yhuinduu miid Cristo ycixpi. ¹⁶ Pinjaty mijpidacp Cristo y'ayuc huidibi ngapxhuácsypich, hue' je' y'alma nidzögamb. E pinjaty ca' mijpidägy Cristo y'ayuc, hue' je' y'alma tigoyaamb. Ooy chachchipity chachmijhuinma'ñity ich ajcxy ndung. ¹⁷ Ca' ich ajcxy nduñ jadu'n nej jacnaagity ajcxy huidibi Dios y'ayuc mihudijtip meeñixy. Cixyot huinjot ich jáy nyaj'ixpijccixy Dios y'ayuc yti'ajt. Com Dios ti xyajñibycyich co yi' y'ayuc ngapxhuácsich. Miid co nyajpaatim ma Cristo, paady ycixp nduunim jadu'n nej jihuiy nyajpaatim jabom jabom ma Dios yhuinduu.

3

Je jemybi ayuc tiy'ajt huidibi Dios xymooyim

¹ Co jadu'n nmına'ñich ζnej m'ijxcixy nej jihuıy huinjemy nyajtzondäga'ñich ayuc co ndzachnaymayáanigixiyich ci'm? ζNey mdzojccix co ajcxy nyaj'ixipy tüg tiy'ajt necy co nduñich ma Dios ytung? o ζNbijctzohuipich tüg tiy'ajt necy ma miich ajcxy, jadu'n nej nijëjity jäy ytungixy? ² Ca' ñich ajcxy ndiy'ajt necy ycopicyity. Com jëbi yi mayjäy ajcxy tiy'ajt pigipy ma miich ajcxy mdzinaayin mjugy'ajtin co tudägy ti nyaj'ixpicyich miich ajcxy Dios ytiy'ajt. Jadu'n miich ajcxy nipaady nej ñich ajcxy ndiy'ajt necy yjaayity ma ñich ajcxy njot nhuinma'ñ. E jadu'n jäy ajcxy ijxcabipy etz huinjihuıipy. ³ Cristo ci'm ti pidägy yi' ytiy'ajt ma miich ajcxy mjot mhuinma'ñ müid je ayuc huidibi ti ngapxhuäcxyich ma miich ajcxy. Jadu'n miich ajcxy nipaady nej tüg tiy'ajt necy huidibi Cristo ti jaay. E huidibi ñich miich ajcxy ti nyaj'ijxcixy ti nyajnimaaagyixy. Miich ajcxy ca' jadu'n ocpaatni nej tüg tiy'ajt necy huidibi jäy ti jay müid tinta. Nañ jadu'n ni ca' yjëjity je tiy'ajt huidibi cojayip ma tüg tzaadzech. Hue' miich ajcxy janch nipaady nej tiy'ajt necy huidibi je Dios jugypi yjihui'ñ ymic'ajt ti jaay ma jäy ajcxy yjot yhuinma'ñ.

⁴ Nejhuıybich tiydudägy co janch tiy'ajt nej nmına'ñich co Cristo ti xyanibicyich jada tung müid Dios ycixpi. ⁵ Ca'p ñich ajcxy jëbi ci'm madägy ma Dios ytung. Tüg'öciy mic'ajt etz tiy'ajt jilby nbáatcixyich ma Dios, huidibi müid jëbi nduungixich yi' ytung. ⁶ Dios ti xymöogyixyich mic'ajt co ndunipyich ajcxy ma yi' ytung. Dios ti pidägy ma ñich ajt jemybi ayuc tiy'ajt, huidibi müid xy'ane'mim. Jada jemybi ayuc tiy'ajt je Espíritu Santo pidaacp ma ajt njot nhuinma'ñ. E ca' je' yjadu'nity nej je ayuc tiy'ajt huidibi Moisés jyayhui'm jecy'ajty. Müid je Moisés y'ayuc huidibi jaybety ijtp, Dios xymooyim je o'cin. Müid je jemybi ayuc tiy'ajt huidibi je Espíritu Santo yecpy, Dios xymooyim jugy'ajtin huidibi ca' ycixipy ytigoyipy ni mina.

⁷⁻⁸ Je Dios ycötujcin huidibi Moisés jyayhui'm hue' jaybejty oga'n ma tüg tzaa. E je huin'it tiempo ooy Moisés anajty yhuıñyjijp mic y'adixy müid Dios y'oy'ajtin. E je Israel jäy ajcxy ni ca'p je' anajty huaad y'ijxcixy Moisés yhuıñyjijp, co anajty ooy mic chach'adixcy. E jada Dios y'oy'ajtin huidibi Moisés ymüid, ca' jecy y'ijty. Hue' je' tigooyñip anajty oñydägy'amy. Per pen Dios yaj'ixip anajty yi' y'oy'ajtin co Moisés moy je jäy ajcxy je Dios ycötujcin huidibi ane'm yi' o'cin, nigı mi'idipy Dios y'oy'ajtin je jemybi ayuc tiy'ajt huidibi je Espíritu Santo xymooyim. ⁹ Pen mij anajty oy'ajtin müidity je cötujcin huidibi tuuñ co y'ane'my ma ñich ajt nbocy n'o'cin. Nigi mij'oy'ajtin müidity Dios y'ayuc ytiy'ajt je jemybi huidibi minaamb co Dios jëbi xyaj'ahuimbijtm tudägy. ¹⁰ Jëbi nmınaanim co je jécyp cötujcin y'oy'ajtin ca' yi' ytimyijity co nyajquipxyihuaanim müid je jac'oybi oy'ajtin huidibi Dios y'ayuc ytiy'ajt jemybi ymüid. ¹¹ Com pen ymüid oy'ajtin je cötujcin huidibi ymic'ajt ca' y'ida'ñ huinixi huinitiempe, nigı oy'ajtin müidity Dios y'ayuc ytiy'ajt jemybi huidibi ca' ycixipy ytigoyipy nimina.

¹² Müid co njijp'ijxim je oy'ajtin huidibi Dios xymöhuaanim müid je jemybi y'ayuc, paady ycixp ngapxhuäcxim Dios y'ayuc huinmic jotmic. ¹³ Ca' jadu'n nduunim nej Moisés idüich jecy'ajty co anajty müidity yhuıñyjijp huingobe'näy, jigix ca'ydı Israel jäy ajcxy ixı nej je' anajty ytigoy je Dios y'oy'ajtin huidibi anajty quëxıcp ma je' yhuıñyjijpın. ¹⁴ Per yi' Israel jäy jecy'ajty ca' ajcxy

yajxon huinjihuüy ti anajty Dios ytumyb müd Moisés, ixti chambaadni yi Israel jäy ajcxy ca' yajxon huinjihuüygyixy co ajcxy capxcixy je ayuc huidibi Moisés yjayhuim. Jadu'n nipaady nejjihuüy Moisés chambaadni yityñi huingobe'näy. Co ajcxy mibigipy je Cristo, huin'it ajcxy huinjihuühiipy, e jadu'n je' paadipy nej jihuüy Moisés ti ñayhuingobe'ndüdyii. Co yi Israel jäy ajcxy mibijccixipy Cristo, e ijax ajcxy Dios y'oy'ajtin, huin'itni ajcxy huinjihuühiipy Dios y'ayuc ytiy'ajt je jécyip. ¹⁵ Ixti chambaadni co yi Israel jäy ajcxy capxcixy je migooxpí libro huidibi Moisés yjayhuim, ca' ajcxy huinjihuüy yajxon Dios y'ayuc, jadu'n nipaady nej ajcxy yhuinma'n ymädyty. ¹⁶ Pinjaty jothuimbijtp, e mibicy iich ajt nHuindzin Jesucristo, oyñyñip yi' yhuinma'n, e yhuinjihuühiipy Dios ytiy'ajt. ¹⁷ Je Huindzin Jesucristo, yi' je' Dios yjihui'n ymic'ajt ymüd. E ma Dios yjihui'n ymic'ajt yajpaady, Dios yi' yi' jadu'mbi jäy ajcxy yajnihuätzäctutp ma yi' Dios ycötujcin je jécyip. ¹⁸ Paady ycxip tüg'óciy iich ajt jadu'n nipaady nej tüg'ijx ma nni'ijxim ajt nHuindzin Jesucristo y'oy'ajtin. Com ca' jadu'n patni nej jihuüy n'ijtim huingobe'näy. E nañ jadu'n iich ajt njacyujpejtim n'oy'ajtin, jaydëbi nguipxyjatytiiyim müd Cristo. Com jabom jabom iich ajt nigí nbaatim n'oy'ajtin ma Cristo. Jada je' huidibi je Dios yjihui'n ymic'ajt ytumyb ma ajt njot nhuinma'n. E iich ajt nHuindzin Jesucristo ti pidägy Dios yjihui'n ymic'ajt ma ajt njot nhuinma'n.

4

¹ Com Dios ti xypa'ayooyich, e ti xyajniñicyich co ngapxhuäcxibich yi' y'ayuc ytiy'ajt jemybi, paady ycxip ca' njotmetzcüyich. ² Per ooy ti njjpcodijiiygyixyich ti njjpcogapxiiygyixyich yi' jäy ajcxy y'ayuc huidibi ajcxy ytungixyp etz ycapxcixpy ayüch ameech, etz huidibi oymidzöyduuni. Ca' iich ajcxy ti nduñich müd jibic-huinma'n. Nañ jadu'n ni ca' nyajtigájtzcixich Dios y'ayuc. Hue' janchtiy ngapxpich ajcxy huidibi janchip. Jadu'n nyaj'ixpjccixyich yi' jäy ajcxy, jaydëbi ajcxy jotcuje ñayjihuiüygyixy ma Dios yhuinduu. ³ Yi' jäy ajcxy huidibi nicxy y'alma ytigoyaangixy ca'oydactuuby, ca' ajcxy huinjihuüy Dios y'ayuc oybi nej jëbi ajcxy y'alma nidzögipy. Jada je' je' ayuc huidibi ngapxhuäcxixpich. Pinjaty ajcxy y'alma nidzögipy yhuinjihuüy ajcxy jada ayuc. ⁴ Yi' ajcxy huidibi y'alma tigoyaanip ca' mibijccixy Dios y'ayuc, com Satanás huidibi ane'mb ya naaxhuin ti yajmädyii ajcxy yhuinma'n. Ca' je' ajcxy huinjihuüy Cristo y'ayuc oybi. Cristo tú'ciy yaj'ixy, tú'ciy mic'ajt müdity, nej Dios yaj'ixy nej Dios mic'ajt müdity. E Cristo y'ayuc jadu'n nipaady nej tüg' mjtixin huidibi Satanás ti ahuijztucy ca'ydi yticxy ma je' ajcxy. ⁵ Co iich ajcxy ayuc ngapxhuäcxycich, ca' iich ajcxy ngapxhuäcxy ngi'm'ayuc ngi'mdiy'ajt. Hue' iich ajcxy ngapxhuäcxyp Jesucristo y'ayuc ytiy'ajt. Ngapxhuäcxyich ajcxy co Jesucristo ñihuindzin'ajttaayb tüg'óciy. E nañ jadu'n ngapxhuäcxyich ajcxy je tiy'ajt co iich ajcxy jadu'n naydijiiygyixyich nej jihuüy miich ajcxy xytumbi'adyii müd Cristo ycxipi. ⁶ Je Dios huidibi jecy'ajty ane'm co huen tiicxin ji'aty huidibi codiicxip ma ycodzity, yi' ti xymooyim y'ayuc ytiy'ajt. Yi' y'ayuc tim jadu'n nipaady nej tüg' tixcin nmüd'ajtim ma ajt njot nhuinma'n, jigix jëbi n'ijxim je Dios y'oy'ajtin huidibi quëxícip ma Jesucristo yhuiniyjip.

Je jugy'ajtin co nmibijcim

⁷ Je Dios y'oy'ajtin oybi nmüd'ajtim ma ajt njot nhuinma'n, iich ajt ca' ni ti mic'ajt nmüd'ajtim ma ajt ngi'mjot ngi'mhuinma'n. Jadu'n Dios pidägyñi

yi' y'oy'ajtin ma ñich ajt, tim jadu'n nej jäy ajcxy pidaaccixy pi'cmeefi ma pi'c'idzimboch. ⁸ Oy ñich ajcxy nminaxyich nyajnaxyich may ayo'n, per ca' ndajy nmayich ajcxy anaxy. Ooy nhuinmay'ahuuidijtcixyich müid je tzaachypi ayo'n ycixpi, per ca' nhuinma'ñydidigooygixyich. ⁹ Oy ñich ooy nmidzip xy'ixhuuidityich xypahuuidityich, per Dios ca' xy'ixmachich. Canaag'oc ñich nmidzip ti xycujy ti xyjibipyich. Per ca' ñich njugy'ajtin ti ytigooy. ¹⁰ Hueñyama'amyty nhuuidityich ajcxy nmüidich je tzaachi'au ma nninixich, ma jäy ajcxy ti xychaachytüungixich. Je' je' je ijxpejt co nhuuidityich o'cin jijp'am, tim jadu'n nej Jesús anajty huuidity o'cin jijp'am. Ngöbajcypich jada tzaachypi, jigix tüg'óciy jäy ajcxy nejhuñhuip co Jesús xypubejtpich xypudigiybich. ¹¹ Nami jacjugy'ajtnich ajcxy, o'cjijp'am ñich ajcxy nhuuidijtcixy jabom jabom müid Jesús ycixpi, jigix jébi tüg'óciy jäy ajcxy nejhuñhuipy co Jesús xypubejtcixyp xypudigyigixyp. ¹² Jadu'n ndzinayich o'cjijp'am, jigix müich ajcxy müid'adip jugy'ajtin huuidibi ca' ycixipy ytigoyipy.

¹³ Jaybety ymiñ ma Dios ñecy ma jadu'n ymina'ñ: "Ti nmibicyich, e paady ycixpi ti ngapxp'idzimybich nej ti nmibicyich." Tim jadu'n nej Dios ñecy ymina'ñ, nañ tim jadu'n ñich ajcxy yminaangixy co nmibijccixyich Dios, e paady ngapxp'idzimygixyich nej nmibijccixyich. ¹⁴ Com nejhuñyim jadu'n nej Dios yajjugypijcy Jesús co y'o'cy. Nañ tim jadu'n Jesús xyajjugypigaanim jadüg'oc müid Dios ymic'ajt co anajty n'o'cim. E quipxyi müid müich ajcxy xyajnicximip ma Dios yhuinduu. ¹⁵ Tüg'óciy tzaachypi huuidibi nminajxypich nyajnajxypich, hue' nminaxyich nyajnaxyich müid müich ajcxy m'oy'ajtin ycixpi. E co anajty Dios jactuñ may'ajtin müid jacjadyi mayjäy ajcxy, nañ jadu'n mayjäy yajnajxcixipy jäygidacim ma Dios, jigix jébi mayjäy ñbaatcixipy capxpáatcixipy Dios.

¹⁶ Paady ycixpi ni mina xii, ñich ajcxy ngajotmetzcihuaangixy. Oy ñich ajcxy nninix yjaccöminajc'idich jabom jabom, per ñich ajcxy njot nhuinma'ñ nigi mic'ajt paady jabom jabom. ¹⁷ Je tzaachypi je ayo'n huuidibi nminajxim nyajnajxim ya naaxhuñ, ca' yi' ytimyüijity. Cixip naxip yi'. E müid co nminajxim nyajnajxim tzaachypi ayo'n, huin'it nbaatim oy'ajtin nigi ymijity y'oyity huuidibi ca' ycixipy ñaxipy ni mina. ¹⁸ Ca' huaad ñich ajt nhuinma'ñ nbidaacim ma huudijaty cixamb tigoyamb. Tüg'óciy tijaty yaj'ijxp yajhuindicxp ya naaxhuñ, cixip tigoyip yi'. Per huudijaty ca' yaj'ixy yajhuindicxy, idip yi', ca' ycixipy ytigoyipy nimina.

5

¹ Com nnejhuñyim co n'o'cim, naaxnixc ajt huuidibi nmüid'ajtim ya naaxhuñ cixamb tigoyamb yi'. Dios ymüid ni'ixi' jüby tzajpjoty huingbi ninixc huuidibi yi' ti cojy huuidibi xymöhuaanim. Je ninixc huuidibi xymöhuaanim jadu'n nipaady ma ajt n'alma nej tüg'tijc huuidibi tinaayb huinixi huini'tiempo. Tüg'tijc huuidibi Dios ti cojy, ca' nan huuidibi jäy ajcxy ti cojixy. ² Janch t'y'ajt co ca' ooy jotcujc ndzinaayim ya naaxhuñ müid ajt nninixc. Ooy njijp'ijxim mina nbadaanim ajt je nninixc huuidibi nmüid'adaanim jüby tzajpjoty. ³ Je' nninixc xyüdzim tim jadu'n nej co tüg jemyhuit nyajtigüiyim, ca'ydi n'ijtim niñuadz. ⁴ Nami njactzinaayim ya naaxhuñ müid ajt nninixc, ca' ooy jotcujc nayjihuyim. Ooy xyajtajim xyajmayim je tzaachypi ayo'n huuidibi nminajxim nyajnajxim. Ca' nan co ca' ndzojcm ajt nninixc, o co nyajtigogaanim ajt nninixc. Hue' ndzojcm co nmüid'ajtim jemybi jugy'ajtin jemybi ninixc jigix co ajt njugy'ajtin huuidibi cixamb tigoyamb, ahuimbidip yi' jemybi jugy'ajtin huuidibi ca' ycixipy

ytigoyipy. ⁵ Dios yi' ti yaj'oyiy je jugy'ajtin huidibi nm'id'ajtim cham, jigix jëbi nm'id'ajtim huingbi jugy'ajtin huidibi ca' ycixipy ytigoyipy ni mina. Dios ti xymoyim je Espiritu Santo je' je' tiy'ajt ma ñich ajtin co nbadaanim jemybi jugy'ajt jembyi ninicx.

⁶ Jabom jabom ñich ajt jotcujc naybidaacim. Nejhuuyim co nami n'jactzinaayim ñid ajt nninicx, ca' nm'id'ajtim jemybi ninicx, ca' nyaj-paatim ma ajt nHuindzin Jesús chinäy. ⁷ Je' nninicx xyüdzim tim jadu'n nej co tug jemyhuit nyajtiguyim, ca' ydi n'ijtim nihuädz. ⁸ Jotcujc etz jotmic nayjihuyim. Nigi jotcujc ixipy nayjihuyim, e ooy n'jatzojcm co mic'amy ixipy n'ijxmajtzim jada ninicx, jigix nicxy ndzinaydacpijcm ma ajt nHuindzin Jesús chinäy. ⁹ Paady ycixp jadu'n njacjugy'ajtim n'jactzinaayim jigix jëbi ajt nHuindzin Jesús jäygidägipy ajt ndzinaayin. Ca' ñejity pen n'jactzinaayim ixipy miid ajt nninicx, o pen tzojcm n'ijxmajtzim ajt nninicx ixipy, e nicxim ma Jesús yajpaady. ¹⁰ Nidüg'óciy ñich ajt nayguëxigaanim ma Cristo ytiydundac, e jilby nidüg nidüg paadip huidi anajty nipidzimip jadu'n nej anajty ti chinäy, pen oy, o ca' y'oyity.

Je ayuc tiy'ajt huidibi nicy'ajt cidägy'ajt miid

¹¹ Com nejhuuyim co copicy nhuindziguyim ajt nHuindzin Jesucristo, paady ycixpi mictägy nyajmibicyich yi mayjäy ajcxy Cristo ytiy'ajt. Dios ñejhuuyb co tudägy ñich njot nhuinma'ñich. E nañ jadu'n ndzocyich co miich ajcxy mnejhuuyigixipy co tudägy ñich njot nhuinma'ñich. ¹² Ca'p ñich ajcxy yam naygapxpäatigixy jadüg'oc co ñich ajcxy ooy n'oyjäyity, o co ñich ajcxy ooy oy ndüngixyich. Hue' janchtiy lugar nyejpcyich, jaydëbi miich ajcxy xycapxpadipyich etz jotcujc mnayjihuyigixipy miid ñich ajcxy ycixpi. Jigix jëbi miich ajcxy m'adzohuip yi jäy ajcxy huidibi capxpatp pinjaty yhuinijip ooy oy yquëxigy, e ca' ajcxy tuñ cuendi pen je' miid oyjot oyhuinma'ñ, o pen ca'. ¹³ Pen minamb jäy ajcxy co ñich nlocity, huen xyajnáxcixyich loci miid Dios ycixpi. Pen jäy minaangixp co oy huinma'ñ nm'ididyich, jëbi jadu'n ajcxy xyajnáxcixyich jadu'n nej oy huinma'ñ nm'ididyich miid miich ajcxy m'oy'ajtin ycixpi. ¹⁴ Com Cristo ooy xychojcm xyjihuyim, paady ycixp n'jatyntymcapxymidoohuim Cristo. Com nnejhuuyim ajt nidüg'óciy tiydudägy co Cristo y'ocy miid ajt nbocy ycixpi, e paady ycixpi jadu'n nipaady nej jihuyi nidüg'óciy ñich ajt ti n'o'cim quipxyi miid Cristo. ¹⁵ Cristo o'c miid tüg'óciy jäy ajcxy ycixpi, jigix co tüg'óciy jäy ajcxy huidibi jactzinaayb jacjugy'ajtp, ca' ajcxy yajtúngixipy yci'mjot yci'mhuinma'ñ ma ajcxy chinaayin. Huen ajcxy tzinaagixy miid Cristo ycixpi huidibi o'c miid yi' ajcxy ypocy ycixpi, etz yjugypijcy jadüg'oc miid yi' ajcxy ycixpi. ¹⁶ Miid co ndzinaayim miid Cristo ycixpi, paady ycixp ca' ndunim cuendi naaxhuiñjäy ajcxy nej ñayñigäpxigixy nayñimiydáacigixy. Jayijp ca'ni anajty nmibijcm, ooy anajty ndunim cuendi nej jäy ajcxy ñayñigäpxigixy nayñimiydáacigixy. Jadachambi etz yjacnicxni xii tiempo, ca' ndunim cuendi nej naaxhuiñjäy ajcxy capxcixy miydaaccixy. ¹⁷ Com tigachjaty cham nhuinjihuyich Cristo, paady ycixp pinjaty yajpatp ma Cristo, jemyjot jemyhuinma'ñ je' ymiid'ajtnip, jadu'n nipaady nej jihuyi ti ma'xung'aty huinjemy. Je jot je huinma'ñ huidibi anajty ymiid co anajty ca'ni mibicy Cristo, ti je' ñajxtäy, jadachambi ac jemyjot ac jemyhuinma'ñ ti y'ahuimbijttäy.

¹⁸ Tüg'óciy tijaty huidibi ya yajpatp, jilby chooñ ma Dios, Dios yaj'oyiyday. Miid huidijaty Cristo ytuun miid ñich ajt ycixpi, jotcujc n'ijtim miid Dios. E

Dios xyajñibjicich co ngapxhuäcxyich Dios y'ayuc jadu'n nej jäy ajcxy jëbi ajcxy jotcuje y'ijtcixy mïid Dios. ¹⁹ Jadu'n nmïnaanïm co Dios ymïd'ijtpy Cristo. E Dios tuun quipxyi mïid Cristo co y'i' yaj'oyïy je tzip nej naaxhuïñyjäy ajcxy midzip'aty Dios. Dios ca' yajcomidohuañ jäy ajcxy ypocy huïdibi mïbijcixp Cristo, mïid co Cristo ti yajpocyñïhuächyï. E Dios ti xyajñibicyich co ngapxhuäcxyich y'i' y'ayuc nej jäy ajcxy jëbi paadip pocyhuïnmeecxin, etz nañ jadu'n paadip jotcuje'ajtin ma Dios. ²⁰ Paady nhuidityich mïid Cristo ycixpi ngapxhuäcxyich Cristo y'ayuc. Jadu'n huimbïdzïmyb nej jihuïy miich ajcxy Dios xymïnucxtaaccixy mïid ïch n'ayuc jigix mmïbijcixïpy Cristo y'ayuc. Paady ngodinäyich Cristo co nmïnucxtacypïch miich ajcxy. Jothuimbijtcix nej mdundïgooygixy mïid Dios ycötujcin e Dios xyhuïnmeecxïp ajcxy mbocy, jigix jotcuje m'ïdïpy ajcxy ma Dios. ²¹ Cristo ca' ma ytundïgooy, per mïid ajt nbocy ycixpi Dios yajnaix je Cristo jadu'n nej tüg pocyjäy. Jadu'n Dios ytuñ mïid je Cristo, jigix co ïch ajt n'ïjtim ma Cristo, nbaatim je tudägy'ajtin huïdibi Dios chojcpy nmïd'ajtim.

6

¹ ïch ajcxy etz miich ajcxy quipxyi nduunïm ma Dios ytung. Nmïnucxtacpyich miich ajcxy co mgöbigïpy ajcxy je may'ajt je oy'ajt huïdibi Dios ti tuñ mïid miich ajcxy ycixpi, ca'ydi ñaadigï'aty Dios ytung. ² Com jadu'n jaybety y'ity ma Dios ñecy ma Dios jadu'n ymïna'ñ:

Co je xï tiempo ti patni, ti ïch miich m'ayuc midoohui. Ti nbubety nbudigïyich je huin'it xï je huin'it tiempo co ti yhuaad'aty mina jäy ajcxy y'alma ñïdzögïpy. Jadachambi xï tiempo ti yhuaad'ajtnï mina jëbi Dios xyñïdzöocim ajt n'alma.

³ Ca' pin n'adzïpicy co nduñich ma Dios ytung, jigix ca'ydi pinjaty ymïna'ñ co ca' oy nduunïch. ⁴ Nañ jadu'n ca' n'adziba'ñich miich ajcxy. Nïgi ndzocyich co ñïguëxïgïp tüg'ocïy ïch ndung co nduunïch mïid Dios ycixpi. Ooy nyajtuñich mecxtujcin. Ooy nmechtucyich ayo'n etz tzaachypi. Ooy nyajmayjatyich nhuit nducxy ngaayin n'uucïn. Ooy ïch ndzïnaayïn chipity. ⁵ Ti ajcxy xycï'atyich, ti ajcxy xypïdäacixyich pujxtïgoty. Ti jäy ajcxy xymïbidïgyich, e ooy ajcxy yhuaangixy yjihuiygixy. Ti tzaachypi nmïnaxy nyajnaxyich ma ndungich. Minaajity canaag xï ca' nmäyich, e minaajity ayuu n'ityich.

⁶ Nyajnïguëxïcïpy ïch ajcxy co ïch ndungixyich mïid Dios ycixpi, mïid co huädz jot huïnma'ñ nmïdidyich ajcxy. Ca' ma jïbicpi nmïdidyich ajcxy, mïid co n'ixpïjccixyich ma Dios ytiy'ajt. Ooy mecxtujcin nmïdidyich ajcxy. Ooy ïch ajcxy nba'ayooyich nmïgügtïcïch. Dios yjihui'ñ ymïc'ajt yajpatp ma ïch ajcxy njot nhuïnma'ñ. Ooy ïch miich ajcxy ndzojccixy njihuiygixy cixyjot huïnïjot. ⁷ Nyajnïguëxïgïpy ïch ajcxy co ndungixyich mïid Dios ycixpi, mïid co ngapxhuäcxcixyich Cristo y'ayuc ytiy'ajt tudägypi, e nañ mïid co nmïdidyich ajcxy Dios yjihui'ñ ymïc'ajt, etz mïid co nmïdidyich ajcxy ca'pxy Dios ytiy'ajt tudägypi. Mïid y'i' ytiy'ajt tudägy nyajmïbicyich jäy ajcxy, etz mïid y'i' ytiy'ajt naygohua'ñyïjich ma nmïdzipich. ⁸ Minaajity jay xycapxpäadygixyich; minaajity jäy ajcxy xyñïgapxy xyñï'ojïygixyich; minaajity jäy ymïnaangixy co oy nduunïch; minaajity jäy ymïnaangixy co jïbic nduunïch; mina ngamïna jäy xytjcïxyich co n'ïndaaccixyich; e minaajity jäy ymïnaangixy co tiy'ajt ngapxpïch. ⁹ Minaajity jäy ymïnaangixy co ajcxy ca' xy'ixy'ajtïgixyich; e minaajity jäy ymïnaangixy co ooy oy xy'ixy'ajtïgixyich; e minaajity ayo'n jïjp'am o'cin jïjp'am nhuidïtcixyich. Per jactzïnaaybïch ajcxy jadu'n. Ti je

tungm#d#p#i xychaachyt#ngixyich, per ca' #ich ajcx# xyaj'o'cyi. ¹⁰ Ooy #ich ajcx# njatajcx# njamaaygixy, per jabom jabom jotcu# najjihu#yigixyich. Ayoobi #ich ajcx# ca' ti mee# etz ca' ti pid#gy nm#id'ajtcixyich. Per na# jadu'n mayj#y oy'ajt#n pada'# ma Dios m#id #ich ajcx# ndung ycixpi, jadu'n jada oy'ajt#n nipaady nej mee# etz nej pid#gy. Oy ca' mee# etz ca' pid#gy nm#ididyich ajcx#, per nm#idich ajcx# t#g'ociy huidibi nima'na ca' ycixy yti#ooy.

¹¹ Mig#gtj# ajcx#, huidibi yajpatp jim Corinto, ti nm#idcapxcixy ti nm#idmydaaccixy ma jada necy m#id t#g'ociy tud#gy'ajt. Ti ngapxyich nm#idy#gyich nej njot nhuinma'# nm#ididyich. ¹² Ca' #ich n'ixmach nej #ich miich ajcx# ndzocjcx# njihu#yigixy cixy#ot huinjot. ¹³ May'ajt nbjctzooybich ma miich ajcx# co xyajnim#huibich nej miich ajcx# m#ot nhuinma'# m#idity tim jadu'n nej ti nduun#ich m#id miich ajcx#. Jadu'n may'ajt nbjctzooyich ma miich ajcx# nej ungededytj# ajcx# oy'amy y'ung ajcx# #huijcx# capx-huicixy.

#ich ajt je' ma Dios jugyp# chinaay#n

¹⁴ Miich ajcx#, ca' mdungmu#ccixy m'ayoomu#ccixy m#id j#y ajcx# huidibi ca' mibjccixy Cristo. Com ca' huaad tud#gyj#y ajcx# m#iddzinaaygixy j#y ajcx# huidibi ca' tud#gy huinma'# m#idity. #Nej j#bi je huidibi tiy'ajt#p yt#gy# m#id huidibi ca' ytiy'ajtity? #Nej j#bi pinjaty tiy'ajt m#id m#id'idipy pinjaty huidibi ca' tiy'ajt m#idity? Je huidibi tiy'ajt m#id jadu'n nipaady nej chin#y ma j#n yt#cxin. E je huidibi ca' tiy'ajt m#idity #npatp nej jihuy# chin#y agootztuuby.

¹⁵ #Nej j#bi Cristo etz Satan#s #nay'ayuc-huinjihuyigixy? #Nej j#bi t#g mibj#p#i yajt#gy# yhuinma'# m#id t#g huidibi ca' ym#bicy? ¹⁶ Ca' ni nej j#bi tzaadzech qu#pychech y'idipy ma Dios ytj#c. Com yi' ajcx# huidibi tzaadzech ojadjtp ca' ajcx# yhuinma'# yt#gy# m#id Dios ytiy'ajt. Je Dios juugyp#i ym#id chinaydac ma #ich ajt njot nhuinma'#, paady ycixp jadu'n #ich ajt nipaady nej Dios ytj#c. Com jaybety y'ity ma Dios jadu'n ymina'#: Ndzinaydac nb#id#gaamybich ma yi' ajcx#. Huididaamybich ma yi' ajcx# yajpaady. Yi' ajcx# #ich xyDios'adaanip. E #ich ajcx# yi' nj#y'adaanip.

¹⁷ Paady na# jadu'n ajt nHuindzin Dios ymina'#: Copicy co miich ajcx# m'ixmadzipy yi' jacjady# j#y ajcx#, e tzinaaygix abicy. Ca' ajcx# mnjot'adipy je jibicpi, huin'it #ich miich ajcx# ng#b#ipyich.

¹⁸ #ich miich ajcx# xym#id'adipyich jadu'n nej jihuy# #ich miich ajcx# xy-Teedy'ady#i. E jadu'n miich ajcx# m'idipy nej #ich nmang n'an#g. Jadu'n je mijpi Dios ymina'#.

7

¹ Miich ajcx# huidibi ooy ndzocy njihu#yich, com Dios jadu'n ymina'# co tz#naydac pid#ga'# ma ajt njot nhuinma'#, paady ycixp tzoc yajhuaatz#m ajt njot nhuinma'#, etz ma ajt n'esp#ritu, e jadu'n Dios nhuindzig#y#m etz nyajmij'ajtm cixy#ot huinjot.

Co ajcx# jothuimbij# ma Dios huidibi ajcx# jim Corinto

² Tungix may'ajt xyc#b#ipich miich ajcx# cixy#ot huinjot. Ca' #ich ajcx# ni pin ti nm#idundig#oygixyich, na# jadu'n ca' ni pin #ich ajcx# ti nyaj'ixpi#ccixyich jibic-huinma'#. Na# jadu'n ni ca' #ich ajcx# pin ti nhuin'##ich. ³ Ca' jadu'n nmina'#ich m#id co nyajpocyc#hua'#ich miich ajcx#. Com jadu'n jacjayj#p ti mina'#ich co ooy ndzocy njihu#yich miich ajcx#, t#'c#y ajcx# ndz#naay#m, e t#'c#y ajcx# n#o'c#mipy. ⁴ Ooy #ich miich ajcx# njot'amij'ady#i#ich. Ooy #ich miich ajcx# ng#maaygixy. Ooy jotcu#

nayjihuiyijich müd miich ajcxy ycixpi. Oy njayajpaadyich tzip agujc ayo'n agujc, per co njäyamechich miich ajcxy, jotcujc nayjihuiyijich.

⁵ Nej ich ajcxy njaty ya Macedonia, ca' n jotcujc'ajtcixyich. Hue' nyajpaadyich ajcxy tzip agujc capxy agujc huen ma'amyity. Jäy ajcxy xymidzip'ajtpich, etz nañ jadu'n tzigüybich jotjoty huinma'ñjoty. ⁶ Per Dios je huidibi yajjotcugüyb yajjotmicipjcp pinjaty tajp mayb, yi' ti xyajjotcugüyich co Tito yjaty ya ma' ich nyajpaady co jim choñ ma' miich ajcxy. ⁷ Ca' nan ti n jotcugüyich müd tim jéyi co Tito ti xñijädych. Hue' ti n jotcugüyich co yi' ti xñimäyich jadu'n nej yi' jotcujc'ajtin ti paady ma' miich ajcxy. Yi' ti xyajmüdmüydägyich jadu'n nej miich ajcxy tajin mayin mjihuüygixy müd mbocy ycixpi. E nañ jadu'n nej mhuinmaaygixy nej nyajpaadyich. E müd jada ayuc nigi ti n jotcugüyich.

⁸ Ich ca' ndajy nmayich müd co ich miich ajcxy ti nyajtajcixy ti nyajmaygixy müd je necy huidibi ajcxy nyajniguejx. Oy anajty ti njajihuiyich jotmay co nnejhuiyich co miich ajcxy ooy mdajy may tüg xii mejtz xii müd ich nnecy ycixpi. ⁹ Jadachambi ooy jotcujc nayjihuiyijich. Ca' nminaanim müd je tajin je mayin ycixpi huidibi miich ajcxy anajty müd jotcujc'ajtpich, com co je tajin je mayin ajcxy ti xyajjothuimbijtcixy, Dios ti jäygidägy jadu'n nej miich ajcxy ti mmimadaaccixy je tajin mayin. E ca' ich ti ndundigooyich ma' miich ajcxy co ajcxy n jotmaymoy. ¹⁰ Com Dios yjäygidacpyi co jäy njothuimbijtcixy, müd co taj may ñayjihuiyigixy müd ypocy ycixpi. E co ajcxy yjothuimbijtcixy, huin'it ajcxy je y'alma nidzoocin paadipy. E ca' je' huaad nidajim nimaayim co ajcxy y'alma ñidzögy. Co jäy ajcxy nidajcixy nimaaygixy huidi yajpat ya naaxhuiñ, e ca' yjothuimbijtcixy, jadu'ñi nicxy je o'cin nipatcixy. ¹¹ Müd je tügpi jäy ypocy ycixpi ti mbaatcixy je tajin mayin. Miich ajcxy jadu'n ti mmecxtujccixy je tajin mayin jadu'n nej Dios jäygidägy. Tungix cuendi jada' cham nej ti yhuimbidzimy. Tiydudägy janch cham ti mdiydungixy müd je pocy ycixpi. Ti xyajjotma'tcixy, e ti xy'adzigiüygixy, e ni'ixiy miich anajty m'ijtcixy co mdzaachytunaangixy je huidi ti ytundigooy. E müd jada ycixpi ti miich ajcxy myajnigüexccixy, co ca' miich ajcxy ti pocy mmüdity ma jadaaabi huinma'ñ. ¹² Co ich miich ajcxy jayhuin nijayiy, ca' nminaanim müd je' ycixpi huidibi anajty ti ytundigooy. Nañ ca' nminaanim müd je huidibi anajty ti yajmidundigooy. Nijayiyich miich ajcxy, jigix jébi mnejhuüygixy je tiy'ajt nej Dios tzocy co nduüñich müd miich ajcxy m'oy'ajtin ycixpi. ¹³ Com miich ajcxy ti mmijottigooyb Dios ytiy'ajt, paady ycixpi miich ajcxy ti mbaatcixy jotcujc'ajt, e nañ jadu'n ich ajcxy ti nbáatcixyich jotcujc'ajt müd miich ajcxy ycixpi. Nañ jadu'n ooy ti n jotcugüyich ajcxy müd co Tito ooy chachotcujcixy. Oy'amy miich ajcxy ti mgöb'jccixy Tito, paady yi' ooy ti yjotcugüy müd miich ajcxy ycixpi.

¹⁴ Co ti nnimäyich Tito co n jot'amij'adyijich miich ajcxy, ca' ti tzo'ydu'n ti nbaadyich, co yi' oy ti xyco'ixüygixy. Nigi oy ti yhuimbidzimy müd co tüg'ócixy ayuc huidibi ich miich ajcxy ti nyajnimäy ti yhuimbidzimy co yjanchity. Nañ jadu'n ti yhuimbidzimy co yjanchity jadu'n nej ti nnimüydacyich miich ajcxy müd Tito co n jot'amij'adyijich miich ajcxy. ¹⁵ Jadu'n nej co Tito oy miich ajcxy xycogapxiy, yi' ooy nigi xychojccixy xyjihuiyigixy co yi' nejhuüy jadu'n nej miich ajcxy mmijottigooygixy ich n'ayuc, jadu'n nej mgapxymidoohuaangixy. E nañ jadu'n co yi' ijxy nej miich ajcxy yi' mgöbijcy müd tzig'iñ jihuiñ. ¹⁶ Ooy jotcujc nayjihuiyijich, ooy n jot'amij'adyijich miich ajcxy.

8

Ycüejtçixy müd oyjot oyhuinmañ

1 Jadügnax, müich ajcxý migügtjç, nyajnejhuñhuaamybich nyajmüidmüydägaamybich müich ajcxý, jadu'n nej Dios may'ajt oy'ajt tuñ müid je mibijçpidijç ajcxý huídibi xü ya yajpatp Macedonia. 2 Je mibijçpidijç huídibi ya yajpatp ti ooy ajcxý minaxy yajnaxy tzaachypí etz ayo'n. Per ca' ñejity, ooy ajcxý jotcuç yajpatçixy. Nañ ayoobi ajcxý, per ti ajcxý may meñ yajmujççixy, jadu'n nej jihuñy ajcxý ycomeñity. 3 Ich testigo co je migügtjç müid yci'm tzojcin meñ yejççixy, nej jëbi ajcxý ymadaaccixy müid meñ, ixti anaxy ajcxý yejççixy. 4 Ooy xymínucxtägyich ajcxý co n'a'ixihuñbich ajcxý co jëbi ajcxý meñ yajmujççixy huídibi müid pubedaangixy jacjadyii je mibijçpidijç. 5 Nigi anaxy ajcxý ooy meñ yajmujçy ca'ydí jadu'n nej anajty njijp'ixyich. Jayijp ajcxý ñayyejci ma ajt nHuindzin Jesucristo, e huin'it ajcxý ñayyéçigixy ma ich ajcxý jadu'n nej Dios tzocy. 6 E chi jada' ich ajcxý ooy nminucxtacy Tito co huen nixy jadüg'oc ma müich ajcxý. Huen nixy yajçixy yajmay huídibi ti yajtzondägy ma müich ajcxý. Co huen je meñ yajmujçtäy huídibi çixyot huinijot müid mbubedaangixy je mibijçpidijç ajcxý huídibi yajpatp jim Jerusalén. 7 Müich ajcxý nigi ooy mmadaaccixy, ca'ydí jacpinjaty ma tüg'ocíy Dios ytung. Ooy mij mibijçin müich ajcxý müidity. Ooy myaj'ixpíjççixy Dios ytíy'ajt. Ooy mmijottigooygixy mguydunaangixy ich n'ayuc. E nañ jadu'n ooy müich ajcxý yxhojççixy xyjihuiygyixyich. Nañ ooy ndzocyich co müich ajcxý nigi pubejtín myegípy ma je mibijçpidijç huídibi jim Jerusalén.

8 Ca' jadu'n n'ane'myich co mbubéjtçixípy je migügtjç huídí jim Jerusalén. Hue' ndzocyich co müich ajcxý mnejhuñhuípy jadu'n nej yí jacjadyii mibijçpidijç yhuinmañ bidaaccixyp çí'm co pubedaangixy je ymigügtjç jim Jerusalén. Jadu'n mdunípy ajcxý jigix jëbi nnejhuñhuñbich pen janch tíy'ajt jadu'n co mdzojççixy mjihuñygyixy yí jacjadyii mibijçpidijç. 9 Com müich ajcxý mnejhuñygyixyp jadu'n nej ajt nHuindzin Jesucristo mijmay'ajt mij'oy'ajt tuñ müid ich ajt ycixpi, jadu'n Jesús nipaady nej tüg mijcomeñybi jüby tzajpjoty, müid co yí' yxhojççim xyjihuiyim mijcajee, chi yí' ixmajztay yí' y'oy'ajtín jüby tzajpjoty co ycidacy ya naaxhuñ etz y'ayooy ya. Müich ajcxý ca' anajty ti müidity jüby tzajpjoty, per jadachambi mbadaangixyp mij'oy'ajtín jüby tzajpjoty.

10 Müid müich ajcxý m'oy'ajtín ycixpi, ma jada necy nmooybich müich ajcxý ngapxhuñin jadu'n nej jëbi huaad mdungixy oyjáy'ajtín. Jac'oy co müich ajcxý myajçixípy je huídibi ajcxý myajtzondac jadöjimijt. Müich ajcxý jacjayijp ca'ydí jac ni pinjaty ti myajtzondaaccixy meñ yajmugü huídí müid mbubedaangixy je mibijçpidijç huídibi yajpatp jim Jerusalén. Nañ jadu'n müich ajcxý jacjayijp ca'ydí jacpinjaty mijottigooygixy co mbubedaangixy jacjadyii mibijçpidijç. 11 Jadachambi tiempo jactungix pubejtín, meñ yajmujççix çixyot huinijot jadu'n nej ti myajtzondaaccixy ixti mabaad myajmaygixy je meñ yajmugü. Nidüg nidüg yejççix nej ajcxý ii müidity. 12 Pinjaty y'ofrenda yejç janch çixyot huinijot Dios ycöbçip yí' je' y'ofrenda, jadu'n nej ii müidity. Dios ca' yí' pijctzoy huídibi ajt ca' nmüidity.

13 Ca' nmüinañich co oy jadu'n co mbubéjtçixípy jacjadyii mibijçpidijç ixti mabaad mnayyajhuñ'migixy ayo'ndumb. 14 Hue' yajmüinañ co quipxyjaty mdzinaaygixy, ni pin cayajconaxípy e ni pin cayajmayjadípy. Jadachambi tiempo müich ajcxý nmüidity ca'pxy je huídibi mnidzinaaygixípy, ixti müich

ajcxyc onajxpi, paady ycixp jēbi mbubéjtcixipy migügtijc huidibi yajmay-jajtp. Jadüg tiempo miich ajcxyc myajmayjadipy, e jacjadyii migügtijc jēbi xypubéjtcixipy, e jadu'n yhuimb'adzimipy co mnaybubéjtcigixy quipxyjaty miñ xyipy. ¹⁵ Com jadu'n jaybety y'ity ma Dios ñecy ma jadu'n ym'ina'ñ: "Pinjaty anajty may'amy m'iid, ca' yajconajxy. E pinjaty anajty hueeni m'iid, ca' yajmayjaty."

Tito m'iid ymigügtijc ajcxyc

¹⁶ Per nyajnajxypich jäygidaacin ma Dios, com Dios ti pidägy ma Tito yjot yhuinma'ñ co mijottigooy miich ajcxyc m'oy'ajtin, tim jadu'n nej iich nmijottigooyich miich ajcxyc m'oy'ajtin. ¹⁷ Co may'ajt nbijctzooyich ma Tito co nicxipy jadüg'oc ma miich ajcxyc, agujc jotcuyc cöbicy, com ti anajty jayijp yhuinma'ñ pidägy c'i'm co ñicxa'ñ jadüg'oc ma miich ajcxyc. Jadachambi Tito nicxip ma miich ajcxyc m'iid c'i'mdzojcin.

¹⁸ Quipxyi m'iid Tito nguexy iich ajcxyc yam tüg nmigüg huidibi ooy chachcapxaadyity majaty mibijcpidijc, co ooy oy ytuñ capxhuäcxi Jesús y'ayuc yti'y'ajt nej huaad jäy ajcxyc y'alma n'idoocin paady. ¹⁹ Ca' nan jēyi co je mibijcpidijc yi' ycapxpadyii. Nañ jadu'n ti yhuin'ixyii mibijcpidijc ajcxyc co jēbi yhuidity m'iid iich ajcxyc, e tunipy pubejtin m'iid je may'ajtin oy'ajtin huidibi iich ajcxyc ndumybich m'iid je migügtijc ycixpi jim Jerusalén. Jadu'n nduñich jaydēbi jäy ajcxyc capxpaadip ajt nHuindzin Jesucristo. Etz nañ jadu'n jaydēbi ñiguēxigy co iich ajcxyc n'bubeda'ñich ajt nmigügtijc cixygot huinijot. ²⁰ Ooy ngüend'atyich je meeñ huidibi je mibijcpidijc ti yajmujccixy, jigix ca'ydi pin huaad xyñigapxy xyñi'ojjyich, jadu'n nej iich ajcxyc meeñ nyajmúccixyich. ²¹ Jadu'n iich ajcxyc n'huinma'ñ nbidägy co tudägy ndunāangixyich ca' nan jēyi ma ajt nHuindzin Jesús yhuinduu, nañ jadu'n ma je mayjäy ajcxyc yhuinduu.

²² Nañ jadu'n nguejxypich m'iid yi' ajcxyc jadüg ajt nmigüg, je huidibi oy ti ytuñ ma Dios ytung quipxyi m'iid iich ajcxyc e nejhuñybich co tudägy ytuñ cixygot huinijot. E yi' m'iid ajcxyc ooy xyjot'amij'adyii, e oy ytuna'ñ m'iid miich ajcxyc ma Dios ytung. ²³ Pen jim pinjaty nidiy yajtye je Tito, nimaaygix co iich yi' nmigüg, e yi' m'iid nduñich ma Dios ytung ma miich ajcxyc. E nañ jadu'n pen jim pinjaty nejhuñhua'ñ pinjäy ajcxyc yi', yi' jacjadyiibi huidibi ajcxyc nicxip m'iid Tito. Nimaaygix co je mibijcpidijc ajcxyc ya Macedonia ti quexy ajcxyc, ytungixy m'iid Cristo ymij'ajtin ycixpi. ²⁴ Paady ycixp miich ajcxyc yi' mdzójccixipy mjihuñygyxyipy je migügtijc ajcxyc huidibi mimb m'iid Tito, jigix jēbi je mibijcpidijc ma nidüg nidüg cajp ya Macedonia nejhuñhuipy co miich ajcxyc yi' mdzójccixy mjihuñygyxyipy je mibijcpidijc tydudägy. E paady ycixp jēbi iich jotcuyc nayjihuyijich m'iid miich ajcxyc ycixpi.

9

Je cüejtin m'iid je mibijcpidijc ajcxyc ycixpi

¹ Nañ ca' yjaty ycopicyity co iich miich ajcxyc njacnijayygyxyipy co je mibijcpidijc huidibi xi' ya pubejtin tunaangixyp ma Dios yjäy huidibi ajcxyc jim Judea. ² Com nejhuñybich co miich ajcxyc nañ jadu'n mbubedaangixy cixygot huinijot Dios yjäy huidibi ajcxyc jim Judea. Paady ycixp jotcuyc iich jadu'n n'nimäyich je mibijcpidijc ya Macedonia jadu'n nej miich ajcxyc jim Acaya m'huinma'ñ pidacy jidöjimijt co mbubedaangixy je mibijcpidijc huidibi jim Judea. E m'iid co miich ajcxyc jayijp m'huinma'ñ ti mbidaaccixy

co mbubedaangixy je mibijcpidijc huidibi ajcxy jim Judea, paady ycixp may mibijcpidijc ya Macedonia yhuinma'n pidaaccixy co ypubedaangixy nañ jadu'n. ³ Paady nguejxypich Tito müid jacjadyii migügtijc ma miich ajcxy, jaydëbi xypubéjtcixipy ma je meen' yajmugii, jadu'n nej ti mbidaaccixy huinma'n. E ñich ca' ti tzo'ydu'n nbáadibich müid miich ajcxy ycixpi ma jada pubejtin huidibi ajcxy mguexamyb jim Judea. Com ñich ti nnimäyich mayjäy co miich ajcxy ni'ixi' m'ijtcixy müid mbubejtin. ⁴ Ca' yjegyity co nijëjity mibijcpidijc huidibi tzinaayb ya Macedonia ñicxa'nip ajcxy müid ñich co anajty nnicxyich jim ma miich ajcxy. E co anajty ñich ajcxy jim nmejtzcixy, e chi ajcxy nbáatcixipy ca' anajty ajcxy mni'ixijity. Pues chi ooy tzo'ydu'n njihuñhuibich, com ti anajty ooy njo't'amij'ájtigixy. Nañ jadu'n miich ajcxy tzo'ydu'n mjihuñhuip. ⁵ Paady ycixp huinma'n nbidäyich co oy jadu'n co nijëjity migügtijc nicxy jayijp xycogapxixygy, e huen xypubejtcixy ma yi meen' yajmugii jadu'n nej jidöjimijt ti mgapxytungixy. E co anajty nmechich jim ma miich ajcxy, chi ni'ixi' anajty ajcxy müidity yi m'ofrenda, e jëbi jäy ajcxy nejhuihuip co yi m'ofrenda ti myejccixy cixyjo't huinjot, ca'ydi jäy ymínaangixy co ñich miich adzip ajcxy ti n'ane'mgixy co m'ofrenda nyajmújccixipy.

⁶ Jäymetz miich ajcxy jadu'n nej ayuc y'oc'ity: Pinjaty hueni niip, nañ jadu'n hueeni ycosecha yajpidigy. E pinjaty mij niip, nañ jadu'n mij ycosecha yajpidigy. ⁷ Nidüg nidüg mibijcpi yegipy y'ofrenda jadu'n nej anajty ci'm yhuinma'n ti pidägy co yega'n. E ca' yegipy ametz jotmetz. E nañ jadu'n ni yca'adzip yca'a'écity. Com Dios chojcpy yjihuiyib pinjaty cixyjo't huinjot y'ofrenda yejcp. ⁸ Dios jëbi may'ajt oy'ajt tunipy müid miich ajcxy mijcajee, e miich ajcxy mbáatcixipy tüg'óciy tijaty conuucxin, e icti mmüid'adipy tüg'óciy huidibi myajmayjajtcixy, e nañ jadu'n conaxpi naadigibi nej huaad jacjadyii mibijcpidijc mbubejtcixy, e mdúngixipy canaagnax oyyä'ajtin. ⁹ Jadu'n jaybety ymiñ ma Dios ñecy, ma jadu'n ymína'n:

Yi oyyäydijc ajcxy, yi' ajcxy nimooyb ayoobitjc huidibi ajcxy yajmayjajtpy.

Yi oyyäydijc ajcxy co oyyä'ajtin tungixy, yejccixyp iixpejt oybi huidibi y'idipy huinixi.

¹⁰ Dios yejcpy je tim huidibi jäy ajcxy ñiipy, nañ jadu'n Dios yejcpy je jicxy picy huidibi nidzinaayim nijugy'ajtim. E jadu'n co miich ajcxy oyyä'ajtin mdungix mijcajee, je m'oyä'ajtin ajcxy ñipaadip nej jihuiy mgosecha myajpidicixy may'amy. ¹¹ E jadu'n miich ajcxy müid'adipy tüg'óciy jugy'ajtin comeen'ajtin, jaydëbi m'ofrenda myejccixy mij'amy. E mayjäy ajcxy Dioscojuyip yajnaxipy ma Dios müid je m'ofrenda ycixpi, co anajty nyecyich miich ajcxy m'ofrenda ma yi' ajcxy huidibi yajmayjajtp. ¹² Co ñich ajt pubejtin nyejcim ma jacjadyii migügtijc, canan jëyi co nbubejtin müid tijaty yajmayjajtcixyp. Nañ jadu'n yi' ajcxy jëbi yajnajxcixy Dioscojuyip canaag'oc. ¹³ Yi' ajcxy capxpadamb Dios müid co je m'ofrenda huidibi ajcxy ti myejccixy, yi' je' tiy'ajtip co miich ajcxy mgapxymidoogixy Cristo y'ayuc ytiy'ajt. Paady ycixp may mibijcpidijc ajcxy Dios ojadajtcixipy e nañ jadu'n Dios ñbáatcixipy capxpáatcixipy müid je pubejtin huidibi miich ajcxy anajty myejeyp müid yi' ajcxy ycixpi, etz nañ jadu'n müid jacjadyii mibijcpidijc ycixpi. ¹⁴ E ci'm yi' ajcxy Dios ojadadipy mibijctzohuipy müid miich ajcxy ycixpi, etz xychójccixip xyjihuiyigixip ooy müid co Dios je mijpi conuucxin ti yecy ma miich ajcxy. ¹⁵ Dioscojuyip yi' Huindzin'ajtim Dios müid yi' ymijconuucxin huidibi ti yecy

ma ñich ajtin, ni pin canejhuüy nej jëbi yajnajtzcapxÿ.

10

Pablo müdity cõtujcin co y'apóstol'adyii

¹ ñich Pablo nmigapxypich müich ajcxy müid yungnaxy njot nhuinma'ñ, jadu'n nej jihuüy Cristo müich ajcxy xymüidmÿdaaccÿxy. Com Cristo yungnaxy jot huinma'ñ müidity. Nijëjity müich ajcxy ymïnaangix co ooy yungnaxy naybidägÿiijich co n'ityich müid müich ajcxy, e jadachambi co jiguëgy nya-jpaadyich, hue' n'ahuimbityich ahua'ñ, ndunaamybich ti ndunaamybich. ² May'ajt nbijctzooybich co anajty ñich müich ajcxy nicxy n'ijxcixy, ca' jadu'n ndzocyich co copicy n'ahua'ndägibich müid nijëjity müich ajcxy huidibi xyñühuambejtpich, co nduñich etz ngapxyich ngim'tzojcin tim jadu'n nej huenpin naaxhuiñjäy ytungixy etz ycapxcixy müid yci'm'tzojcin. Janch ni'ixi' n'ityich, co anajty jim nmechich, chi müid nnayhuindinähuiybich yi' ajcxy huidibi jadu'n xyñühuambejtpich. ³ Janch tiy'ajt co ndzinaayich jadu'n nej naaxhuiñjäy chinaaygixy. Per ca' ndziptuñich nej jäy ajcxy chiptungixy. ⁴ Ca' ñich ajt nyajtunim naaxhuiñjäy ymic'ajt co nnaygo-huaanim ma je jibicpi huidibi xymidzip'ajtim. Hue' nyajtunim Dios ymic'ajt, huidibi jëbi müid nmimadaacim tüg'óciy huidibi ca'oybi müid. ⁵ Jadu'n ñich ajcxy ca' nyajtzobadaangixyich je ayuc tiy'ajt huidibi ca' yjanchity, etz je' ayuc pin amij agix naybidaacip co Dios y'ayuc ytiy'ajt adujci. Tüg'óciy naaxhuiñjäy y'ayuc ytiy'ajt nbidáaccixyich ma Cristo, jigix tüg'óciy jäy ajcxy capxymidohuip Cristo. ⁶ Co anajty müich ajcxy mhuinma'ñybidaaccixy co huädz mgapxymidohuaangixy tüg'óciy Cristo y'ayuc ytiy'ajt, pinjaty cacapxymidooy, hue' ni'ixi' n'ijtcixich co yajmöhua'ñ castigo pinjaty cacapxymidoo.

⁷ Müich ajcxy yi' mdzachuenditungixy jäy ajcxy nej yjäy'ajtcixy. Pen jim pinjaty ñayjihuiyii janch agujc jotujc co Cristo yhuin'ixyü müid ytung ycipi, huen huinjihuüygixy jotjoty co Cristo ti xyhuin'ijxcixyich nañ jadu'n müid yi' ytung ycipi. ⁸ ñich ca' ti tzo'ydu'n jihuüyich müid co ci'm nnaygömayiijich hueeni müid co Jesucristo xymooygixyich ane'min cõtujcin. Com ñich ajt nHuindzin Jesucristo ti xymöoygixyich jada cõtujcin, jigix ñich müich ajcxy nyajyeecip mmibijcin, canan nyajtigoyip ajcxy mmibijcin. ⁹ Ca' jadu'n ndzocyich co yquëxigipy jadu'n nej jihuüy n'adzigiñhuaangixy müid je necy huidibi nyajnigiejxypich müich ajcxy. ¹⁰ Ymïnaangixy co ñich nncy ooy tzaachyjaty chach chaach. E ymïnaangixy co ma jäy ajcxy yhuinduu yung naxy njäy'aty, e ngapxin nmiydáacinich ca' pin jäygidägy. ¹¹ Per yi' jäy ajcxy huidibi jadu'n mïnaangixp, copicy ajcxy nejhuihuipy co jadu'n nej ñich ngapxin necyjoty co nijayüygixy, co nyaapaadyich jiguem, nañ tim jadu'n ngapxa'ñich co anajty n'ityich ma müich ajcxy.

¹² Ca' huaad n'ocnay'ijxquipxim o nyajtügüyim müid yi' ajcxy ytung huidibi tzach naygömayaanip ci'm. Tzuu huinma'ñ locihuinma'ñ ajcxy ytungixyp, co pin jadu'n nay'ixquipxip naymidoguijxip müid yci'm'ayuc yci'mhuinma'ñ huidi ii yajtpy ñejhuüyb. ¹³ Ca' ñich ci'm naygömayiib ma ycapadyii, huidibi ñich ajcxy ca' xypátcixyich. Dios ñich ajcxy xyajnejhuüybich nije' nije' it lugar ma yi' tzocy ndúngixibich. E Dios jadu'n tzoje co nicxy ndungixy jim Corinto ma müich ajcxy myajpatcixy. ¹⁴ Paady ycipi ndúngixyich jëyi ma Dios xyquexyich, ca' jac ma. Nej ixypy y'octunyii y'ocjadyii, pen ca' ixypy ñich jayjip ti n'ityich ma müich ajcxy. Pues ñich tim jayjip ngapxhuäcx Dios

y'ayuc ma miich ajcxy, e ca' jac ni pin. ¹⁵ Pen huingbi jäy je Dios ytung yajtzondaacip ma tüg cajp, pues ca' ñich huaad jim nduunich, jadu'n nej jihuiy ñich ti nyajtzondägyich je tung. Ca' jadu'n nduunich, hue' njijp'ixypich co miich ajcxy myajyeegip mmibijcin, huin'it jëbi njactunipich ma miich ajcxy, jadu'n nej Dios tzocy co ndunipyich. ¹⁶ Co anajty jadu'n ti njactuñich ma miich ajcxy, huin'it xii ya n'ñhuäcxa'ñich ngapxhuäcxa'ñich Cristo y'ayuc ytiy'ajt ma je it lugar jactim jiguemjatypi ma miich ajcxy. Per ca' nduna'ñich ma huingbi ti yajtzondägy je tung.

¹⁷ Ooy ycopicyity ngömayim nyajmij'ajtim ajt nHuindzin Jesucristo, e ca' y'oyity co naygömayim ci'm. ¹⁸ Com Dios ca' jäygidägy pinjaty ci'm naygömayip. Hue' Dios yjäygidacyi pinjaty ajt nHuindzin Jesucristo capxpatp.

11

Pablo etz je' ajcxy huidibi'y'ayuccapxhuäcxp müid anii

¹ Huaad co miich ajcxy ixypiy xy'ocmimextujcich hueeni ñich nloci huinma'ñ huidibi ngapxaamybich. Oy ixypiy ñejity mímexctuccich. ² Ooy ndzocy ooy njihuiyich miich ajcxy. Dios ti xymöyich je tzojcin jihuiy'in huidibi nmüdich müid miich ajcxy ycixpi. Ndzojcyich co cixyot huinijot miich ajcxy mmijpidaaccixy Cristo. Co miich ajcxy yajmij'adip Cristo cixyot huinijot, huin'it jadu'n miich ajcxy nipaadipy nej tüg töxy'anäg pi'cnip huidibi pijcp müid tüg yëydijc. ³ Ndzigiybich co huingbi jäy xyajhuinma'nydigoyaangixy müid ixpicytjic y'ayuc huidibi ca' ytiy'ajty. E miich ajcxy m'ixmadzaangixy jadu'n nej cixyot huinijot ti mmijpidaaccixy Cristo. Tim jadu'n nipada'ñ miich ajcxy mjadaangixy nej yajty jecy'ajty je Eva co tza'ñ yhuin'ini. ⁴ Com miich ajcxy mgöbijccixy huingbi jäy huidibi tigachjaty yaj'ixpijcp Jesús ytiy'ajt, ca' yjadu'nity nej ñich ajcxy nyaj'ixpicyich. Etz nañ jadu'n miich ajcxy jotcujc mgöbijccixy huingbi espíritu, ca' yjëity je Espíritu Santo huidibi ti mgöbijccixy jayijp'aty. Etz nañ jadu'n mgöbijccixy tigachjaty ayuc tiy'ajt, e ca' y'ocjëiñ huidibi ajcxy m'alma xyajñdzoocip. Ca' y'ocjëiñ huidibi ti mmidoogixy ma ñich ajcxy. Mic'amy mdzachmijpidaaccixy huingjäy y'ayuc. ⁵ Ca' jadu'n ytiy'ajty co yi huindzindijc ajcxy huidibi naydijigixp Jesús y'apóstol huidi jim ma miich ajcxy, co jac mic'ajt müid ajcxy etz yjacmij ajcxy ixpjcich ma Dios ytiy'ajt, ca'ydi ñich. ⁶ Oy ñich jada' ca' njatyich nej yajon ngäpxibich, ca' ooy ngo'ayúcgich. Per ca' ñejity com yajon njatyich nnejhuiyich Dios ytiy'ajt. E ti nyaj'ixxcixy nyajnejhuiyigixy co n'ixpicyigich ma Dios ytiy'ajt müid je ayuc huidibi ngapxhuäcñich ma miich ajcxy etz je mijhuinma'ñ huidi nduunich co jim n'ijtyich ma miich ajcxy.

⁷ ¿Nej tundigoyich jada' co ngapxhuäcxyich Jesucristo y'ayuc ma miich ajcxy e ca' nbjctzooyich meen müid ndungich ycixpi? Jadu'n nnayajnajxich anajty nej tüg midumbi jigix miich ajcxy jac'oy jactocujc mdzinähüp. ⁸ Ti ngöbicyich meen huidibi jacjadyii mibijcpidijc ti xymöyich huidibi tzinaayb ma huingbi cajp. Yi' ajcxy ymeen nyajtuunich co nyaj'ixpijcyich miich ajcxy. ⁹ Co n'ijtyich müid miich ajcxy jadöjimijt jadöhuix'am ca' nbjctzooyich ma miich ajcxy huidibi nyajmayjajtpyich anajty. Ca' n'adzijpyich ni pin. Yi migügtjic huidibi ajcxy tzoon Macedonia, yi' ajcxy xymooyich huidibi anajty nyajmayjajtpyich, paady ycixp ca' anajty meen nbjctzooyich ma miich ajcxy, ca' n'adzijpich miich ajcxy. E jadu'n njactuna'ñich jadu'n nej nduunich müid miich ajcxy co n'ijtyich jim jadöjimijt. ¹⁰ Nejhuiyibich co yjanchity co

nmüdidyich Cristo ytiy'ajt, nañ tim jadu'n nnejhuüyich co ci'm nbaadyich huídibi müdnay'ixyijich. E ca' pin ma tüg'óciy je Acaya naaxjot xycapjicbich jada jotcuje'ajtin. ¹¹ ¿Na'amy co jadu'n nmína'ñich? ¿Je' co ñich miich ajcxy ca' ndzojccixy? Ca' yjadu'nity. Dios ñejhuüyb co ndzocy njihuüyich miich ajcxy.

¹² Per njacyajtüöyaamybich je ndungich huídibi ndumybich, e ca' meeñ nbjctzohua'ñich müd ñich ndung ycixpi jigix co yi jacjadyii huindzindijc huídibi yaj'ixpijccixp ma miich ajcxy, ca' jébi y'indaaccixy co yi' ajcxy tú'ciy ytungixy jadu'n nej ñich nduññich. ¹³ Yi' ajcxy ymínaangixy co Cristo ti yajñibjcgixy co ajcxy yi' y'apóstol'adyii, e ca' yjanchity, nigooob ajcxy huin'ingixy yi mibijcpidijc. Ñayajnáxigixy ci'm nej jihuiy Cristo y'apóstol'ájtigixy, e ca' yjanchity. ¹⁴ Nañ ni ca' oy nhuinmaayich co jadu'n idüitzcixy, com nañ jadu'n je Satanás ñayajtigachyii ñayajnaxyii nej Dios y'ángel huídibi tiy'ajt müd, e ca' yjanchity. ¹⁵ Paady ycixp nmibijcpich co yi jäy ajcxy huídibi tumb müd je mujcu' nañ jadu'n nayajnaxyii jadu'n nej jäy tudägypi, e ca' yjanchity. Per Dios chaachytunamyb ajcxy jadu'n nej ypanyii müd je jibicpi ycixpi huídibi ajcxy ytumyb.

Je tzaachypí je ayo'n huídibi Pablo yajtyt co y'ayuccapxhuäcxy

¹⁶ Jadüg'oc ñich miich ajcxy nmímaangixy: Ni pin ycamina'ñipy co ñich locijity. Per pen nijéjity jadu'n ymínaangixy, ca' ñejity. Miich ajcxy amidoo'jtciy ñich n'ayuc, jigix jébi naygömayijich ci'm. ¹⁷ Ca' ñich ajt nHuindzin Jesucristo xycötujcmöyich, co jadu'n jébi ngapxyich jadu'n nej cham ngapxa'ñich. Hue' ngapxa'ñich jadu'n nej tüg loci jäy co naygömaya'ñyijich ci'm. ¹⁸ Mayjäy ajcxy ooy ci'm chachnaygömayaáanigixyp müd huídibi ti tungixy müd yci'm mic'ajt ya naaxhuiñ. Nañ jadu'n ñich nnaygömaya'ñyijich ci'm. ¹⁹ Miich ajcxy mdzachcöbijccixyp loci jäy ajcxy y'ayuc, je' co mdzachnayajnaáanigixy jadu'n nej jihuiy ajcxy ooy mdzachcohuinma'ñity. ²⁰ Mgöbijcyp miich ajcxy co jäy ajcxy xytumbi'adiyb nej tim tzojccixy, huídibi ajcxy xyhuinjicxp xyhuimbijcp xyhuimmeetzp, e huídibi ajcxy xy'ane'mgixp, xycamij'ijxcixy xycamijpidaaccixy, ixti mgöbijccixyp co xycojxcixy ma ajcxy mhuiñyijp. ²¹ Oy njatzo'ydu'njihuiyich co nmína'ñich co ca' jadu'n nmüdidyich je jotmic'ajtin, jigix jébi ñich miich ajcxy nduññich jibic, jadu'n nej yi' jadu'mbi huindzindijc ti xytungixy.

Per jadu'n nej yi' ajcxy ñaygapxadyii ci'm, nañ jadu'n naygapxpada'ñyijich ci'm. Ca' ñejity pen capxich jadu'n nej tüg loci jäy. ²² Pen hebreojäy yi' ajcxy, hebreojäy ñich nañ jadu'n. ¿Conaax cogajp ajcxy Israel? ñich nañ jadu'n. ¿Abraham ajcxy ymij'ap'ajtpy ymijteedy'ajtpy? ñich nañ jadu'n. ²³ ¿Nej tumb ajcxy müd Cristo? Nigi nduñyich müd Cristo, ca'ydi yi' ajcxy. Ca' ñejity oy ngapxyich jadu'n nej tüg loci jäy. Jac mic ti nduññich müd Cristo ca'ydi yi' ajcxy. Canaag'oc codungdijc xychaachytuññich. Ti nyajci'atyich müd matz etz müd coochac janch canaag ci' janch ycamacho'nity. Canaag'oc codungdijc xypidaacyich pujxtigoty, e yi' ajcxy ca'. Canaag'oc o'cin jip'am ti nyajpaadyich, e yi' ajcxy ca'. ²⁴ Migoox'oc judíojäy ajcxy ytungmüdpí xyci'ajtyich müd cochac iipx majmoxc mídaax ci'. ²⁵ Tugiig'oc xychaachytuññich müd matz. Tügtecy ajcxy xychaagächich. Tugiig'oc je barco yquín tügtecy, chi tüg tzuum etz tüg xii n'ijtyich ma je meyy anajty ooy ypidigy. ²⁶ Ooy viaje nduññich canaag'oc, e o'cjip'am n'ijtyich ma mijñigom yjadyii, e nañ jadu'n ooy anajty may meetzpi yajpaady ma anajty nhuidityich. Nmigogajpich, yi' judíojäy,

xyajaj'ögaanich ajcxy. Ti ayo'n nbaadyich ciudadjoty etz ma yuugjot etz mejyjoty. E nañ ti ayo'n nbaadyich müid jäy ajcxy huidibi naybidaacip ajcxy nej ñich ajt nmügüg, e ca' anajty yjanchity. ²⁷ Minaajity ooy mic njhuiyich ndung n'ayo'nich. Canaag'oc ti ndzumnaxyich ca' nmäyich. Canaag'oc nxñnaxyich müid yuu tidzibi. Janam jatzojc n'ayu'atyich. Minaajity ooy njhuiyich je ñichypi, etz nyajmayjatyich nhuit nducxyich.

²⁸ Müid jada ycixpi etz müid jac-huidijaty, nañ jadu'n jabom jabom ooy mic njhuiyich jadu'n nej yajpaady je mibijcpidijc nidüg'öciy canaag picy xi ya. ²⁹ Pen nijëjity mibijcpidijc yajpaady amutz ma ajcxy ymibijcin, nañ jadu'n ñich nayjihuiyijich amutz. Pen nijëjity mibijcpidijc ypocytungixy, ñich ndzo'ydu'n njhuiybich etz jibic nayjihuiyijich müid yi' ajcxy ypocy ycixpi. ³⁰ Pen naygömayaanibich ci'm, naygömayaanibich co amutz njhuiyijich. ³¹ Je Dios ñich ajt nHuindzin Jesucristo yTeedy, je huidibi huaad n'ojadajtim n'ibaatim ngapxaatim huinixi huiniempo, yi' ñejhuiyb co tiy'ajt jadu'n nej ngapxyich. ³² Jecy'ajty co n'ijtyich jim Damasco, je gobernador huidibi anajty tumb müid je rey huidibi yxi Aretas, ypidac soldados ajcxy ma jadyii mijtu' ycajptigiy, jigix jëbi xyajnicxyich mach. ³³ Per je mibijcpidijc ajcxy xycodiyñajxich naaxcixy mijcachjoty ma tüg ventana aguu ma je mijpoch huidibi je cajp müid yjübojtz'ahuidityity. E jadu'n ndzoocyich ma je gobernador yci'am.

12

Huidibi Pablo yhuin'ijx etz nejhuiy

¹ Ni ti ycayajpaady ycayajganar'aty co ci'm ndzachnaygömaayim ndzach-nayñigapxim ndzachnayñimiydaacim. Per ca' y'ocnejity nimiydägaamybich ti nhuin'ijxypich cumäyjoty, je huidibi je Huindzin Jesucristo xyajhuin'ijxypich xyajni'ixiybich. ² N'ixy'ajtypich tüg yëdyjc huidibi mibijcp Cristo. Cham majmatz jimijt ma Dios yajpättigiyii tzajpjoty ma je midugügpi tzajp. E ca' nejhuiyich pen hue' yajpättigiyi müid ñinixc o pen ca'. Dios tügpajc nejhuiyb. ³⁻⁴ Jadüg'oc nminañich co Dios ti yajpättigiy je yëdyjc ma je oybi it. E ca' nnejhuiyich pen janch ti ypättigiy müid ñinixc o pen ca'. Dios tügpajc nejhuiyb. E jüby ma je oybi it midoy capxy ayuc huidibi ca' huaad ni pin jäy capxy miydägy nimina. ⁵ Ooy ñich amij agix nayjihuihua'ñiyijich müid je jadu'mbi yëdyjc jadu'n nej jëjin huidibi Dios yajpättigiy tzajpjoty. Per ca' ñich ci'm nayñimiydäga'ñiyijich naygömaya'ñiyijich. Hue' janchtiy nayñimiydägaanibich ci'm nej nduñ n'ayooyich ma ñich ndzinaayin. ⁶ Oy ixypy ñich ci'm njanayñimiydäga'ñiyijich janch oy nej nduñ n'ayooyich, ca'p je' anajty ngapxtigooyich, com je' anajty ngapxpich je janchypi. Per ca' jadu'n naygömaya'ñiyijich, com ca' ndzocyich co jäy ajcxy nicxy xycömaayich ñigi anaxy. Huaad jadu'n co ajcxy müid miydacy je migügtijc huidibi ajcxy ijxcixp huidibi ndumybich o huidibi ayuc ajcxy ymidoogixp huidibi ngapxpich.

⁷ Je capxy ayuc huidibi Dios xyajnejhuiyich jüby tzajpjoty, ooy anajty chach y'oyity. Paady ycixpi Dios pidacy jadu'n nej jihuiy tüg apy ma ñich nninixc, jigix ca'ydi amij agix nayjihuiyijich. E je apy jadu'n ni-paady nej mujcu' xyajtzaachiyich. ⁸ Tugüg'oc Dios ti nmibijctzooyich co huen xyajpidzimich je huidibi xyajtzaachiybich. ⁹ Per je Huindzin Jesús xyñimaayich: "Jëbi jadu'n co may'ajt ndunipich müid miich ycixpi. Co pinjaty pumäy ñayjihuiyii, huin'it ñigi ñiguëxigy ñich nmic'ajt." Paady ycixpi

njotcugiyich co pumäy nayjihuiyijich, jigix ñiguëxigipy Cristo ymic'ajt ma ñich ndzinaayin. ¹⁰ Paady ycixpi ooy njotcujicyich co pumäy nayjihuiyijich, co jäy xyñigapxy xyñ'ojiyich, co ti nyajmayjatyich, co jäy xy'ixhuidityich xy-pahuidityich, co tzaachypi nyajnaaxyich müid Cristo ycixpi. Co nayjihuiyijich pumäy, chi ñgi mic nayjihuiyijich müid Cristo ymic'ajt ycixpi.

Pablo ca' yjotcujc'aty nej je mibijcpidijc ajcxy jim Corinto ytungixy

¹¹ Co ñich jadu'n ci'm naygapxpadyijich, tim jadu'n nipaady nej jihuiy ñich tüg loci jäy. Adzip müich ajcxy jadu'n xytuuñich co copicy naygapxpadyijich ci'm. Hue' yjapaadyii müich ixypiy ajcxy xycömaaybich xycapxpatpich. Hich ca'p ñich ti ndzoohuity. Oy ixypiy ñich ca' ti mic'ajt nmüididyich, per jatytümy ñgi mic'ajt nmüididyich, ca'ydi yi huindzindijc huidibi ma müich ajcxy, huidibi ajcxy naydijip apóstol, e ca' yjanchity. ¹² Ma je tüg huidibi nduuñich müid mecxtycin ma müich ajcxy, ti ooy ñiguëxigy müid canaag ijxpejt, mijhuinma'ñ etz milagros, co ñich janch Cristo xy'apóstol'adyijich. ¹³ Ca' jadu'n ytiy'ajtity co mmínaangixy co ñgi oy ti nduuñich ma yi jacjadyii mibijcpidijc ma jacjadyii cajp, ca'ydi jadu'n nej ti nduuñich ma müich ajcxy. Pen ti ndundigooyich co ca' ti nbijctzooyich meef müid ñich ndung ycixpi ma müich ajcxy, jadu'n nej jacjadyii ajcxy ytungixy, pues tungix may'ajt mecxchich ajcxy.

¹⁴ Jadachambi ni'ixi' n'ityich co nnicxa'ñich midugig'ocpi jim ma müich ajcxy. Ca' ti pubejtin nbijctzohua'ñich ma müich ajcxy müid ndungich ycixpi. Ca' ndzocyich müich ajcxy mmeef. Hue' ndzocyich co müich ajcxy xymijnicxpedipyich. Jac'oy co ñich müich ajcxy nbubedipy, ca'ydi co müich ajcxy xypubedipyich. Jadu'n ñich nipaady müid müich ajcxy nej tüg ungedeedy. Je ungedeedy ypubejtpy y'ung, e ca' nan je ung pubejtyp yteedy. ¹⁵ Hich jotcujc nyajtundähuibich ma müich ajcxy tüg'óciy tijaty nmüidich, ixti ngi' mmic'ajtich tüg'óciy nyajtunaamybich müid müich ajcxy ycixpi, jigix jébi nbubedipyich müich ajcxy. Oy janiguëxigy co ñich müich ajcxy njadzojccixy njajihuuyigixy, e müich ajcxy ca' xychójjccixyich xyjihuiyigixyich.

¹⁶ Nijëjity müich ajcxy mmínaangixy co janch tiy'ajt co ca' ti pubejtin ti nbijctzooyich ma müich ajcxy, nijëjity ymínaangixy co janch nihuinma'ñ ti nyajcägixyich ma tüg trampí müid anü. ¹⁷ ¿Nej ti ñich müich ajcxy nhuin'ingix müid je migügtijc huidibi ajcxy nyajniguejx? ¹⁸ Nbijctzoohuich may'ajt ma Tito co huen nicxy xycogapxyigixy jadüg'oc. E nyajpuguexyich jadüg'ajt nmigüg huidibi müid ñicxy quipxyi. ¿Nej ti müich ajcxy Tito xyhuin'ingixy? ¿Nej ca' yjanchity co ñich etz Tito quipxyjaty ñich ajcxy nhuinma'ñ nmüidity, e tü'ciy ndúngixyich?

¹⁹ Ca' jyecyity co müich ajcxy mhuinma'ñybidáaccixy co ñich ajcxy ndzachnayñigapxtúutigixy ma müich ajcxy. Ca' yjadu'nity. Ngápccixpich nmíydáaccixpich ma Dios yhuinduu je ayuc tiy'ajt huidibi Cristo xymóoygixich. E tüg'óciy huidibi ndúngixpich, hue' ndúngixich jigix yeegip müich ajcxy mmibijcin. ²⁰ Com tzigüybich co anajty nicxy n'ijxcixyich müich ajcxy, ca' jecyity co nbadaamybich je tiy'ajt co müich ajcxy ca' mhuinma'ñmüidity jadu'n nej jébi njáygidägyich yi mhuinma'ñ ajcxy. E müich ajcxy nañ jadu'n ca' mjáygidáaccixpy nej ñich nhuinma'ñ müididyich. Tzigüybich co müich jada' ajcxy mnyachiptünigixy, ca' mnyaxáanigixy nidüg nidüg, mnyamijotmá'tigixy; mnyañ'ojíyigixy, e mbiitzcapxcixy; co ooy amij agix mnyajihuuyigixy, e ca' mnyayayuc-huinjihuiyigixy, ca' oy m'ijtcixy. ²¹ Tzigüybich co jadüg'oc nicxy n'ixyich müich ajcxy, chi ajt

nDios xyajjihuühuibich tzo'ydu'n müd miich ajcxy ycixpi, etz njihuühuibich tajn mayin müd miich ajcxy mbocy ycixpi, e com ca'ni mjothuimbijtcixy mjäydiigooygixy je mjibic-huinma'ñ jadu'n nej mmigapxtigooygixy e mmidundigooygixy huingbi töxyäydijc, etz jadu'n nej mmidundigooygixy migüg ytöxyijc, etz jadu'n nej jibic-huinma'ñ miich ajcxy mmüidity.

13

Ane'min capxhuijin etz capxpooxin huidibi cijxnip je necy

¹ Jada je' ymidugiig'oc co iich miich ajcxy nicxy ngo'ixihuaangixyp. Pen miich ajcxy mxihuaangixyp tüg migüg ma iich co ti ytundigooy müd Dios ytiy'ajt, hue' tzocy müd metz o tugüg testigos. ² Co je mimejtz'ocpi iich miich ajcxy oy ngo'ixiy, chi nnimaayich yi' ajcxy huidibi ti ytundigooygixy anajty, e nañ jadu'n nnimaayich je huidibi japocytungixp co iich anajty jadüg'oc nicxy miich ajcxy n'ijxcixy, ca' nyajtuna'ñich mecxtujcin ma yi' huidibi ajcxy pocytungixp. E cham co nyajpaadyich jigüegy ma miich ajcxy, nnigapxpejtyyich ma jada necy co jadüg'oc nicxy n'ixa'ñich miich ajcxy, ca' nmimecxtuga'ñich yi' ajcxy huidibi pocytungixp. ³ E jadu'n miich ajcxy mmüid'adipy tiy'ajt co ngapxnajxich Cristo y'ayuc. E Cristo ca' je' yjadu'nity nej tüg jäy huidibi ca' mic'ajt müdity. Hue' je' yajnigüexigyp ymic'ajt ma miich ajcxy. ⁴ Janch tiy'ajt co jadu'n ajcxy yajcruudzpejty Jesucristo nej jihuüy ca' anajty mic'ajt müdity. Per jadachambi Jesucristo jugy'ajtp müd Dios ymic'ajt. Nañ tim jadu'n co n'ijtim müd Jesús, jadu'n yquëxigy nej jihuüy ca' mic'ajt nmüid'ajtim. Per co n'ida'ñich müd miich ajcxy, nmüid'adaanibich Dios ymic'ajt müd co nyajpaadyich ma Cristo.

⁵ Ci'm naydiy'ajtpijcigix nidüg nidüg, pen janch tiydudägy mmibijccixy Cristo. Ci'm huinmaayix ma ajcxy mgi'mdzinaayin, pen janch mmibijccixy. ¿Nej ca' mdimjihu'i'mybijccixy, pen müd ajcxy Cristo ma mjot mhuinma'ñ? Pen ca' yjadu'nity hue' anajty Cristo mmibijccixy nigixy cohuajc. ⁶ Per njijp'ijxypich co miich ajcxy mnejhuühuipy co yjanchity co Cristo ti xya-jnibicyich yi' ytung, e ca' n'indägyich. ⁷ Dios mmibijctzooybich müd miich ajcxy ycixpi, jigix ca' ti jibic-huinma'ñ mdungixipy. Canan co iich ajcxy ndzachcomaybidzimmaangixyich, o co iich ajcxy nigü nmüidity Dios ytiy'ajt ca'ydi jac ni pinjaty. Jadu'n ndüngixyich, jigix miich ajcxy mdunipy oybi. Ca' ñejity oy jadu'n yquëxigipy nej jihuüy iich ajcxy ca' oy mij n'ixpicycigich. ⁸ Com ca' huaad ni ti nej ndunim huidibi ca' yjanchity huidibi ca' ytiy'ajtity. Hue' tzocy co tüg'öciy huidibi ndunim, naybadüib müd Dios ytiy'ajt. ⁹ Paady jotcujc iich ajcxy co nyajpaatcixyich nej jihuüy ca' iich ajcxy mic'ajt nmüidity, jigix miich ajcxy mic'ajt nmüid'adipy ma mmibijcin. Nmibijctzoohuuamybich ajcxy Dios müd miich ajcxy ycixpi, jigix ajcxy mmibijcin mü'ijtcixipy ca'pxy. ¹⁰ Jada necy iich jayjip nguexamyb ma miich ajcxy, ma yam ca'ni nicxy n'ijxcixyich miich ajcxy jadüg'oc, jigix ca'ydi adzip ahua'n anajty nyajtuun iich n'ane'min ma miich ajcxy. Ich ajt nHuindzin Jesucristo ti xymöyich mic'ajt, jigix jëbi iich miich ajcxy nyajyeegipy ma mmibijcin. Ca' nyajtigoyaanich miich ajcxy yi' mmibijcin.

¹¹ Migügtijc ajcxy, capxcijxpcij müd miich ajcxy, huen Dios xypubéjtcixipy xypudigüygixipy. Mijottigooygix cuydunaangix tüg'öciy Dios ytiy'ajt ma mdzinaayin. Jotcujc'ajtcix. Chinaaygix müd tú'ciy mjot mhuinma'ñ. Naymüid'ijtigixy agujc jotcujc. Huen ajcxy Dios xymüid'ijtcixy. Je Dios huidibi jotcujc'ajtin yejcp, e nañ jadu'n Dios xychojctäaygixipy xyjihuiydäaygixipy.

¹² Naygapxpóocxigix xic xon. ¹³ Tüg'óciy Dios yjäy huidibi ya, yquejxyp ajcxy capxpóocxin ma miich ajcxy.

¹⁴ Huen ajt nHuindzin Jesucristo may'ajt oy'ajt tunipy miid miich ajcxy ycixpi. Huen Dios xychojccixy xyjihuiygixy. Huen Dios yjihuiñ ymic'ajt ity ma nidüg'óciy miich ajcxy mjot mhuinma'ñ. Jadu'n ngapxycíxyich. Amén.

GÁLATAS

Yi Necy Huidibi Pablo Yajniejx Je Mibijcpidijc Jim Gálatas

¹ Hich Pablo, Jesucristo xyquejxich co ngapxhuáčxibyich yi' y'ayuc. Ca' nmínaaním jáy ajcxy xyajníbícich jada tung. Jesucristo etz Dios Teedy ajcxy ti xyajníbicyich jada tung. Je' je' je Dios huidibi yajjugypijc Jesucristo co y'o'cy. ² Hich etz tüg'óciy migügtijc ajcxy huidibi ya yajpatp ma hich nyajniejxpich jada necy ma nidüg'óciy pinjaty mijpidacp Jesucristo, huidijaty naymujcip ma nidüg nidüg cajp jim Gálatas naaxjot. ³ Nmibijctzooybich Dios Teedy etz hich ajt nHuindzin Jesucristo co huen oy'ajt etz may'ajt tuñ ma miich ajcxy etz nañ jadu'n xyajjotcugihuip ajcxy. ⁴ Hich ajt nHuindzin Jesucristo ti nayyoxyii ti naydogyii c'm anajty ma yi' o'cin müid hich ajt nbocy ycixpi. E jadu'n ti xyñihuaanim ma je jáy ajcxy huidibi jibic huinma'ñ ymüid huidibi tzinaayb ajcxy ma jadachambi xii tiempo. Jadu'n Jesucristo tuñ müid hich ajt ycixpi, com hich ajt nDios Teedy jadu'n tzojcp. ⁵ ¡Ooy y'oyity co Dios Teedy huen mij etz cōmay y'idipy huinixii huinítiempo! Jadu'n jada. Amén.

Ca'p ji huingbi tiy'ajt huidibi jáy y'alma yajnídzocp

⁶ Ooy ndzachhuinmaayich jadu'n nej tim tzojcy ti mijpyöyducixy je Huindzin Dios ytiy'ajt. Dios xyhuin'ijxcixy jigix jébi mmibijccixy je oy'ajt je may'ajt huidibi Jesucristo ytuun müid miich ajcxy ycixpi. E miich ajcxy ti mhuinma'ñ myajtigajtcixy, e ti mmibijccixy huingbi jáy ajcxy y'ayuc, jadu'n nej ca' jébi m'alma nízoozin padaangixy. ⁷ Ca' nmínaaním co ji jadügnax Dios ytiy'ajt. Hue' je'nijéjity jáy ajcxy ti xyajhuinma'nydigooygixy, ooy ajcxy yajtigadzaangixy je Dios y'ayuc ytiy'ajt nej Jesucristo xyajnídzōgaani ajcxy m'alma. ⁸ Co ixypy hich, o co ixypy nidüg hich ndiscípulo, o co ixypy tüg ángel huidibi tzajpjoty tzomb capxhuáč ixypy ma miich ajcxy ayuc tiy'ajt tigachjaty huidibi ca' ñaybadyii müid je tiy'ajt huidibi nyaj'ixpijc ajcxy oga'n'aty, ca' mgöbijccixipy yjadu'mbi ayuc huidibi ajcxy xyajnídigoyaangixy xyajtúdigoyaangixy, Dios tzaachytunüb yi' ajcxy y'alma. ⁹ Ti jayijp nyajnimay, e cham jadüg'oc nīgapxpetyich, pen ji pinjaty capxhuáčy ma miich ajcxy tiy'ajt tigachyjatypí, huidibi ca' ñaybadyii müid je tiy'ajt je tiibi miich ajcxy m'ixpijcixy, copicy Dios chaachytunipy jada jáy müid ypocy ycixpi huidibi ychachyajnídigooygixp xychachyajtúdigooygixp.

¹⁰ Co jadu'n nmína'ñich, ¿nej ndijy co ndzocyich co jáy ajcxy xyjäygidägipy o co Dios xyjäygidägipy? ¿Nej ndzachyajjot'adaanich jáy ajcxy? Ca' huaad nduunich huidibi jáy ajcxy chojcpy, yi' janchty ndumybich huidibi Dios chojcpy. Co ixypy nduunich huidibi jáy ajcxy yjäygidacpy, ca' ixypy nguyduunich Cristo ytiy'ajt.

Nej Pablo oy paady je apóstol'at

¹¹ Paady ndzocyich migügtijc co mnejhuihuip ajcxy jada co je Dios y'ayuc ytiy'ajt huidibi ngapxyhuáčxpich anajty ma miich ajcxy jadu'n nej jébi ajcxy m'alma nízōgipy, ca' yi' ayuc'adyii tiy'ajt'adyii huidibi jáy c'm ti cōjicy ti maacxcixy. ¹² Com je Dios y'ayuc ytiy'ajt huidibi nmüidich, ca' ti nbaadyich ma jáy ajcxy, nañ ca' nmínaaním jáy ajcxy ti xyaj'ixpicyich. Jesucristo c'm ti xyajhuinjihuñyich jada tiy'ajt.

¹³ Com miich ajcxy mnejhuuygixp jadu'n nej jecy'ajty iich ti ndzinäyich, co iich anajty nmijpidägyich yi judíoäy ajcxy ycostumbre. E mnejhuuygixp jadu'n nej jecy'ajty n'ixhuidijtyich nbahuidijtyich mictägy je jäy ajcxy nidüg'óciy huidijaty anajty mijpidaaccixp Dios ytiy'ajt. ¹⁴ Nigi iich anajty n'ixpicyidyich ma yi judíoäy ajcxy y'ixpjcín ca'ydi jac pinjaty judíoäy, ca'ydi jac pinjaty nmügütjicich huidibi tügnax yjimijt müd iich. Com ooy anajty nigi ndzachmijpidägyich n'ap needyich y'ayuc. ¹⁵ E Dios xyhuin'ixxich jayijpni ca'ni anajty ma'xung'atyñich co ndünibich yi' ytung. Müd co Dios ooy ti xychocyich ti xyjihuiyich, paady xyhuooyich müd ytung ycixpi. ¹⁶ Dios xyajnejhuuyich yi y'ung y'ayuc ytiy'ajt, jigix ngapxhuäcxibich yi' y'ayuc ma yi jäy ajcxy ca'pi yjudíoäyity ajcxy. Ca' pinjaty n'ixtaayich huidibi jëbi xyaj'ixpicyich Dios ytiy'ajt, hue' Dios ci'm xyaj'ixpicyich yi' ytiy'ajt. ¹⁷ Nañ jadu'n ni ca' nbättigüyich jim Jerusalén ma yajpaady y'apóstoles ajcxy huidibi anajty ajcxy Dios ti yhuin'ixyii. Chi tüy: nnicxyich jim Arabia ñaaxjot. Co iich jim hueeni n'ijtyich, chi nhuimbijtyich jim Damasco.

¹⁸ Cooni tugüig jimijt nhuäcxijpyich huin'itni nbättigüyich jim Jerusalén. Chi n'oyich ma Pedro anajty yajpaady, e chi jim nmüd'ijtyich jëyi majmox xi. ¹⁹ E ca' nmínaybaattich yi jacadyii apóstoles. Jëyi iich müd naybaati je Jacobo, je Huindzin Jesús y'uch. ²⁰ Je huidibi cham iich müich ajcxy niyajjayuygixyp, tiy'ajt yi'. Y'ixyp ñejhuuyb Dios co ca' n'ündägyich.

²¹ Co ndzooñich Jerusalén, chi nnicxyich Siria naaxjot etz jim Cilicia naaxjot. ²² Je huin'it tiempo yi Cristo yjäy ajcxy huidibi nayyöymujcip cajp cajp jim Judea naaxjot, ca' ajcxy anajty xy'ix'adyiijich huingixy jipcixy. ²³ Jëyi ajcxy nejhuuy anajty co jäy chachmínaangixy: "Yi jäy huidibi anajty xychach'ixhuidijtm xychachpahuidijtm, cham yi' tzachcapxhuäcxy je Cristo ytiy'ajt, je tiy'ajt huidibi anajty ytimyyajcödigoymy." ²⁴ Co je mibijcpidijc oy jadu'n tiy'ajt nejhuuygixy, chi ajcxy yajnajxy Dioscojuyip ma Dios müd iich ycixpi.

2

Jacadyii Jesús y'apóstoles ajcxy cöbijccixy yi Pablo

¹ Co majmactz jimijt, chi jadüg'oc nnicxyich jim Jerusalén quipxyi müd Bernabé. Nañ jadu'n Tito xypanicxyich. ² Dios jadu'n ti xyajnejhuuyich co copicy nixcibich jadüg'oc jim Jerusalén. Chi jim nyajmüdmíydacyich nijëjity jäy huidibi Jesús ti yhuin'ixyii ajcxy, je huidibi ajcxy nigohuajc'ajtp anajty je mibijcpidijc. (Ahuingujc iich ajcxy nxiicmujcy ngapxmujcy, ca'ydi ymayjäy'agucity.) Nyajmüdmíydactaayich je Dios y'ayuc ytiy'ajt huidibi ngapxhuäcxyich ma yi jäy ajcxy ca'p yjudíoäyity. Jadu'n ngapxticxyich n'ayucich ndiy'ajtich, jigix ca'ydi ajcxy xycapx'aducyich, e ti anajty jadu'ñyi ñaadig'aty iich ndung huidibi jayijp ti nduun'ich etz huidibi njactunaamybich anajty. ³ Je jäy ajcxy huidibi nigohuajc'ajtp anajty je mibijcpidijc jim Jerusalén yjäygidac ajcxy iich n'ayuc jadu'n nej ngapxticxyich, e nañ ni ca' ajcxy yminañ adzip co copicy yajtiy'ajttihuipy je Tito huidibi xypa'oyich jim, com griegojäy je' anajty, paady ca' yajtiy'ajttiy anajty. ⁴ Ca' ixipy pin huaam ycaminañ jim Jerusalén co Tito ca' yajtiy'ajttiy, co ca' nijëjity mibijcpidijc ycatigiy ayüch ameech huidibi ca' ymibijccixy cixyijot huinijot Cristo ytiy'ajt. Hue' ajcxy amido'ijtcixy n'ayucich nej huaad xyijpcogapxygixyich. Ca' ajcxy yjotcujcity co ngapxhuäcxyich co nmibijcim Jesucristo, e ca' copicy

nguydunim judíoĵäy ycostumbre. Yi' ajcxy adzip xyajnihuidzaambich yi judíoĵäy ycostumbre, jadu'n nej jāy codoogiyi ajcxy adzip ytuungixy ma yhuindzin ytung. ⁵ Ni catügjaxigý ajcxy xycamimadacyich, e ni xycayaj'amoñ ich ajcxy, com hue' ndzocyich co huen Dios y'ayuc ytiy'ajt oybi ity huadz ma miich ajcxy ca' ma anii.

⁶ Yi apóstoles ajiy huidibi Jesús ti yhuin'ixigixy huidibi ajcxy nigo-huajc'ajtp yi mibijcpidijc, ca' ajcxy ni ti tiy'ajt xyjacmóyich jemybi huidibi ca' jayjip nnejhuíyich. (Peni capxpaady ajcxy o peni ca' ycapxpaadyity, ca' nduuñich cuendi. Com Dios ca' huin'ixpety jāy ajcxy tiyduñ.) ⁷ Co oy ajcxy nejhuíy co Dios ti xyquexyich ngapxhuäcxyich yi' y'ayuc ytiy'ajt ma yi jāy ajcxy huidijaty ca' yjudíoĵäyity, tim jadu'n nej ti quexy Pedro co capxhuäcxi yi' y'ayuc ma yi judíoĵäy ajcxy, ca' ich yi' ajcxy anajty n'ayucich xyjijpcogapxiyich, ooy ajcxy jāygidacy yi' n'ayucich ndiy'ajtich. ⁸ Yi Dios huidibi Pedro quejx huen yi' y'ayuc capxhuäcxy ma yi judíoĵäy ajcxy, nañ jadu'n ich xyquejxich co yi' y'ayuc ngapxhuäcxiyich ma yi jāy ajcxy ca'p yjudíoĵäyity.

⁹ Je Jacobo, je Pedro etz Juan ajcxy, je huidi nigohuajc'ajtcixp yi mibijcpidijc, co ajcxy nejhuíy jadu'n nej anajty Dios may'ajt oy'ajt ti tuuñ müd ich, chi ajcxy xycóbijcyich agujc jotcujc Bernabé etz ich. E chi ich ajcxy müd nay'ayuc-huinjihuiy co jébi ich etz Bernabé nixbich ma yi ca'p yjudíoĵäyity ajcxy, etz jébi yi Jacobo, Pedro etz Juan ajcxy ñicxcixy ma yi judíoĵäy ajcxy. ¹⁰ Jéyi ajcxy may'ajt pijctzoy ma ich etz Bernabé co jadu'n pa'ayo'n ndunipyich ma yi judíoĵäy ayoobitijc. E chi ich ngo'adzoy co ndunamybich jadu'n agujc jotcujc.

Pablo oiy yi Pedro jim Antioquía

¹¹ E jadu'n anajty müd ti n'ocnay'ayuc-huinjihuiyibich ixti coon Pedro ycidacy jim Antioquía. Chi jim nnímaayich huinjijp co ti anajty jim Dios ytiy'ajt midundigooyi co puhuäctuutni je huidibi ca' yjudíoĵäyity, ca' y'ocmüdcaymujcni. ¹² Com co ca'ni anajty ymiñ jim Antioquía je judíoĵäy ajcxy huidibi anajty tzomb ma Jacobo jim Jerusalén, chi Pedro müdcaymujcni je jāy ajcxy ca'p judíoĵäyity. Co ajcxy ymiñ chooñ Jerusalén, chi Pedro oy puhuäctuutni je huidibi ca'p yjudíoĵäyity, ca' y'ocmüdcaymugaani anajty. Com Pedro tzigiyyb anajty co ñi'ojihuiyyb je judíoĵäy huidibi minamb co ooy ycopicyity yajtiy'ajtthuiipy tüg'óciy jāy ajcxy huidibi mibijccixp Jesucristo. ¹³ Co Pedro jadu'n oy y'idich, chi je jacjadyii judíoĵäy ajcxy huidi anajty jimip nañ tim jadu'n oy y'idütcixy. Oy ajcxy janejhuíy tiy'ajt, e huadz cuydungixy. Ixti Bernabé nañ jadu'n y'idüch nej Pedro, com ca' anajty yjotmicity. ¹⁴ E co ich jadu'n oy n'ixyich co ca' ajcxy cuydungixy yajxon Jesucristo ytiy'ajt, chi ich nnímaayich Pedro mayjāy'agujc: "Peni miich judíoĵäy, e ti m'ixmajtzní judíoĵäy ycostumbre co ti mibicy Jesucristo, e ti m'occuydumyeb je huinmañ huidibi judíoĵäy ca' cuydungixy, ¿nej tijy cham co adzip mdzachmínaandägy co yi' ajcxy huidibi ca'p yjudíoĵäyity, copicy cuydúngixipy judíoĵäy ycostumbre, huidijaty miich ti m'ixmajtzní?"

Yi judíoĵäy ajcxy quipxyjaty müd jacpínjaty

¹⁵ Jadu'n njacnímaayich Pedro: "Ich etz miich judíoĵäy ich ajt, huidibi ndaj'ajtim ndeedy'ajtim nañ judíoĵäy. E ca' ich ajt njadu'nity nej jāy ajcxy ca'pi yjudíoĵäyity, huidibi ca' cuydungixy Dios ycótuycin je jecyip huidibi

Moisés yjayhui'm. ¹⁶ Miich Pedro ñich ajt nnejhuñyim co jäy ajcxy ca' jëbi Dios yajpocyññhuaçhyii müid tím jëyi co ajcxy cuydungixy Dios ycötujcin je jecyip huidibi Moisés yjayhui'm. Co yi jäy ajcxy mibijccixy Jesucristo, huin'it janchtiy Dios yajpocyññhuaçziyby ajcxy. Nañ tím jadu'n ñich ajt, ti nmibijcim je Cristo jigix jëbi Dios xyajpocyññhuaatzim. E ca' jëbi huaad Dios xyajpocyññhuaatzim ajt müid tím jëyi co ti nguyduunim Dios ycötujcin je jecyip. Ca' ni tüg jäy huidijaty jëbi Dios yajpocynññhuaçhyii, müid tím jëyi co cuyduuni Dios ycötujcin je jecyip."

¹⁷ Co ajt nhuinma'ñ nbidaacim co nmibijcim Cristo jigix Dios jëbi xyajpocyññhuaatzim, huin'it je judiojäy ymínaangixy co jibic-huinma'ñ nyajtunim co ca' njaccuyduunim yi' ajcxy ycostumbre. ¿Nej mdijy je Cristo xyajtundigooyim jadu'n nej judiojäy ymínaangixy? Ca' yjadu'nity. Ca' jëbi huaad je Cristo xyajtundigooyim. ¹⁸ Co ixypy nmijpidaacim jadüg'oc Dios ycötujcin je jecyip, je huidibi ti n'ixmajtzim, jada ixypy ijxpejt'ajtp co ndundigooyim ma Cristo ytiy'ajt. ¹⁹ Jecy'ajty co nguyduunich anajty Dios ycötujcin je jecyip, huin'it ca' anajty nbaadyich tiy'ajt nej jëbi huaad Dios xyajpocyññhuaachich, e jadu'n nipaady nej jihuiy ti n'ögyich. Paady ycixpi ti n'ixmachich je jecyip cötujcin, e ti nmijpidägyich Jesucristo ytiy'ajt jigix jëbi njactzinäyich müid Dios ycixpi. ²⁰ Jadu'n nayjihuiyijich jadu'n nej jihuiy ti n'oc'ocpich, jadu'n nej jihuiy ti ngruudzpetyich quipxyi müid Cristo. Jadachambi ca' n'octzinaayñich müid ngi'm jugy'ajtin ycixpi. Hue' je' je Cristo ymic'ajt etz ytiy'ajt ti chinaydacpicy ma ñich njugy'ajtin. E jadu'n nej cham njactzinäyich müid ñich nninïcx, jactzinaaybich müid Dios y'ung ycixpi, nmijpidacypich Dios y'ung. Dios y'ung ti xychocyich ti xyjihuiyich, e ti nayoxyii naydogyii ma yi' o'cin müid ñich nbocy ycixpi. ²¹ Ca' nniyajtigoya'ñich je may'ajtin je oy'ajtin huidibi Dios ti tuuñ müid ñich ycixpi. Co ixypy jëbi Dios xyajpocyññhuaatzim müid co ajt nguyduunim Dios ycötujcin jëyi, huin'it ixypy ti ñaadigi'aty je Cristo co y'o'cy müid ajt nbocy ycixpi.

3

Je ycötujcin huidibi Moisés yejc o je mibijcin

¹ Janch loci müich ajcxy migügtijc huidibi tzinaayb jim Gálatas naaxjot. Ti jäy ajcxy xyajhuinma'ñdydigooyixy müid jibic-huinma'ñ. Paady ycixp mdzach'ixmadzaangixy je Dios ytiy'ajt. ñich oy njacapxhuäcxyich ma müich ajcxy mhuinduu je tiy'ajt jadu'n nej Cristo yajcruudzpejt müid ñich ajt nbocy ycixpi. ² Yi' nyaj'amidooyb: ¿Nej ti mbaatcixy Dios yjihui'ñ ymic'ajt müid co mdzachcuyduuni Dios ycötujcin je jecyip? o ¿Nej ti mbaatcixy Dios yjihui'ñ ymic'ajt müid co ti mmidoogixy Jesucristo y'ayuc e ti mmibijccixy? Hue' janchtiy ti mbatcixy Dios yjihui'ñ ymic'ajt co ti mmibijccixy Jesucristo, ca' nmínaanim co ti mguydungixy Dios ycötujcin je jecyip. ³ Co Dios oga'n yjihui'ñ xy'adigiyyigixy xyjottigyyigixy, chi mguychinaaygixy Jesucristo ytiy'ajt nej Dios yjihui'ñ xyhuinma'ñymoogyixy. ¿Nej co cham müich ajcxy mloci huinma'ñ mdzachtungixy? Jadachambi jadüg'oc mdzachtunaangixy mgi'mhuinma'ñ. ⁴ ¿Nej naadigi'ixpi müich ajcxy tzaachypi ti mminajxcixy ti myajnajxcixy müid Cristo ytiy'ajt ycixpi? Janch naadigi' jadu'n tzaachypi ti mminajxcixy ti myajnajxcixy, pen janch tücciyi ti m'ixmajtzicixni Cristo ytiy'ajt. ⁵ Jada nyaj'amidoogixyp: ¿Nej ti Dios yjihui'ñ ymic'ajt xy'adigiyyigixy xyjottigyyigixy etz tuñ mijhuinma'ñ ma müich ajcxy müid co ti mguydungixy Dios ycötujcin je jecyip? Ca' yjadu'nity. Hue' Dios xy'adigiyyigixy xyjottigyyigixy etz tuñ

mijhuinma'n̄ m̄id miich ajcxy m̄id co ti mm̄idoogixy Jesucristo yti'y'ajt etz ti mm̄ibijccixy.

⁶ Jadu'n ymiñ cojay ma Dios ñecy co Abraham mibijcy Dios, e co yi' mijpidacy Dios y'ayuc jadu'n nipaady nej jihu'iy Dios yhuinmecxi ypocy, jigix jēbi y'ity tudāgy ma Dios yhuinduu. ⁷ Jadu'n yjajty m̄id Abraham. Je' ym̄ibijc Dios, e yajpocyñihuaatzī Dios, jēbi ñaydijyī tudāgy jāy ma Dios yhuinduu. ⁸ Dios jecy'ajty yajnihuinmayi'y co yajpocyñihuaadza'n̄ je jāy ajcxy huidibi ca' yjudiojāyity, jēbi ajcxy ñaydijyī tudāgy jāy ma Dios yhuinduu, m̄id co ajcxy mijpidāgipy je may'ajt huidibi Dios ytunamyb m̄id yi' ajcxy ycixpi. Paady ycixpi jaaybety ymiñ ma Dios ñecy co jadu'n Dios m̄idm̄iydac Abraham jecy'ajty co yi' huidibi ca' yjudiojāyity ypaadipy ajcxy y'alma n̄idzoocin, com jadu'n Dios ym̄inañ: "M̄id miich tūg m'ap m'oc may'ajt oy'ajt nduna'ñich m̄id naaxhuiñyājy ajcxy ycixpi." ⁹ Paady ycixpi jadu'n nej jāy ajcxy tūg'óciy pinjaty mibijcp Dios, Dios may'ajt tunamb m̄id yi' ajcxy ycixpi co mibijccixy, tim jadu'n nej may'ajt tuun m̄id Abraham.

¹⁰ Dios chaachytunamy jāy ajcxy m̄id ypocy ycixpi, pinjaty huinma'n̄ tzachpidacp co y'alma n̄idzoocin padaangixy m̄id co cuydungixy Dios ycōtujcin je jecy'ip. Com jadu'n jaybety ymiñ ma Dios ñecy: "Dios chaachytunamyb jāy ajcxy m̄id ypocy ycixpi, pinjaty ca' mijpidāgy tūg'óciy Dios ycōtujcin, etz nañ jadu'n pinjaty ca' cuydundāy jada cōtujcin." ¹¹ Jadachambi m̄id je ayuc huidibi ti yajnijayiygixy ma jada necy, jēbi miich ajcxy mnejhuihuip co ca' ni pin jāy jēbi Dios yajpocyñihuaachyī m̄id huidijaty ti tungixy co cuydungixy Dios ycōtujcin je jecy'ip. Com jadu'n ymiñ jaybety ma Dios ñecy ma Dios jadu'n ym̄inañ: "Yi jāy ajcxy pinjaty mibijcp ñich n'ayuc, yi' ajcxy nyaipocyñihuaadzaamybich jēbi ajcxy y'alma paadip n̄idzoocin." ¹² Dios ca' jadu'n ym̄inañ ma yi' ycōtujcin huidibi Moisés yjayhui'm co jēbi nm̄ijpidaacim, e huin'it Dios xyajpocyñihuaatzim. Hue' je' ym̄inañ ma ycōtujcin co jēbi xychaachytuunim m̄id ajt nbocy ycixpi. Com jadu'n ymiñ jaybety ma Dios ñecy: "Yi jāy ajcxy pinjaty cuydumb Dios ycōtujcin huidibi Moisés ycojay, copicy cuydundāhuip, ni ma ycatundigoyipy."

¹³ Cristo xyñihuaanim xyajtzooocim ma anajty Dios xychaachytunaanim m̄id co ca' nguydunaaayim Dios ycōtujcin je jecy'ip. Cristo ci'm ti yajnicxy je tzaachypi huidibi Dios ajt xymōhuanim anajty. Com jadu'n jaybety ymiñ ma Dios ñecy: "Pinjaty anajty yajm̄ixotzpejtp ma tūg cruudz, hue' anajty je' yco'ayooyb ypocy tūbi tuñ." ¹⁴ Cristo o'c je' m̄id ñich ajt nbocy ycixpi, jigix Dios jēbi cuyduñ yi' y'ayuc jadu'n nej yaj'ahuaniy Abraham jecy'ajty, co may'ajt tuna'n̄ m̄id yi' jāy ajcxy ycixpi huidibi ca' p yjudiojāyity, etz nañ jadu'n may'ajt tuna'n̄ m̄id ñich ajt ycixpi, jigix jēbi ñich ajt nbaatim je Dios yjihui'n̄ co nm̄ibijcim je Cristo.

Je cōtujcin huidibi Moisés yejc etz huidibi Dios y'ahuaniy

¹⁵ Migūgtjic ajcxy, ngapxticxaamybich jadu'n nej Dios ti tuñ m̄id tūg iixpejt nej jāy ajcxy ytuñ. Co ixyipy tūg jāy necy yajcojy ma nigapxy jadu'n nej ypidāgy yajhui'ma'n̄, e co yajcojtāy je necy, e chi firmijjy, e nañ jadu'n je testigo ajcxy yfirmijjy, huin'it ca' huaad pinjaty nixigy yajxigy jada tiy'ajt, e nañ jadu'n ni ca' huaad yaj'ungy. ¹⁶ Cuenditungixy Dios y'ayuc yti'y'ajt, Dios ma yi' y'ayuc yaj'ahuaniy Abraham etz tūg yi' y'ap y'oc co may'ajt tuna'n̄ m̄id yi' ajcxy jēyi. Ca' nm̄inaanim Dios y'ayuc ym̄inañ co Dios yaj'ahuaniy Abraham co may'ajt tuna'n̄ m̄id tūg'óciy yi' y'ap y'oc. Hue' je'Dios y'ayuc ym̄inañ co may'ajt tuna'n̄ m̄id tūgpajc yi' y'ap y'oc, je' je' je Cristo. ¹⁷ Dios

ca' yí' nixígy yajxígy ytiy'ajt huídibi jayijp ymoy Abraham co yajniguejxy ycötujcin yi Moisés. Co Abraham y'o'cy, ti anajty ñajtzñnicxiyñi midaax migo'px ja'iipxmajc jimijt, chiini oy Dios möy Moisés yí' ycötujcin. Tim jadu'n nej ca' huaad yajtigach je jáy ñecy ma nigapxy jadu'n nej ypidágy yajhu'i'ma'ñ, nañ tim jadu'n ca' huaad Dios yajtigach y'ayuc huídí yajnimay Abraham jadu'n nej may'ajt tuna'ñ miid naaxhuíñjáy ajcxy ycixpi. ¹⁸ Dios y'ahuaniy yí' ytiy'ajt ma Abraham jecy'ajty co may'ajt tuna'ñ miid yí' y'ap y'oc ycixpi etz miid tüg'ocíy naaxhuíñjáy ajcxy ycixpi. Co ixypíy jébi jáy padaangixy y'alma ñidzoocin miid huídibi ajcxy ytumyb co ajcxy cuyduuni Dios ycötujcin je jecy'ip, ca' ixypíy may'ajt ti tuñ co ti quexy je Cristo ya naaxhuíñ co jáy yajñihuádzip.

¹⁹ ¿Ti ycixpi Dios co moy Moisés je cötujcin huídibi ycojay? Hue' je' Dios moy jada cötujcin jigix jébi niguéxígy co jáy ajcxy ca' ycapxymidoogixy. Tunamb anajty Dios ycötujcin huídibi Moisés ycojay mabaad ti quexy ya naaxhuíñ yí' y'ung, je' je' je' Cristo, je Abraham y'ap y'oc huídibi yajpocyñíhuáztzp jáy ajcxy. Dios ycötujcin hue je' yajniguejx Moisés miid ángeles ajcxy. E chi Moisés capxnajxy ma ymígügtijc ajcxy. ²⁰ Co Dios ti quexy yí' oybi y'ayuc ya naaxhuíñ miid y'ung, paady ycixpi Dios ca' tzocy co huingbi capxnaxípy yí' y'ayuc. Dios etz Dios y'ung tú'cíy yí'.

Tígixpi Dios je Moisés cötujcin yejc

²¹ ¿Nej mdiy ca' ñaybadyi yí' Dios ycötujcin huídibi Moisés ycojay, miid je ayuc huídibi Dios yajnimay Abraham? Naybaatip ajcxy y'ayuc. Co ixypíy cayejcy Dios cötujcin ma jébi jáy ajcxy y'alma ñidzoocin padaangixy, huin'it ixypíy jébi nbocyñíhuaaatzim co ixypíy nguyduunim yajxon jada cötujcin. ²² Ca' yjanchity co jébi Dios xyajpocyñíhuaaatzim miid co tijaty nduunim. Com ma Dios y'ayuc ymiñ cojay co nidüg'ócíy jáy ajcxy ti ytundigooy, ac pocy ymiid ajcxy. Jadu'n Dios y'ayuc ymina'ñ, jigix jébi Dios yajpocyñíhuäch tüg'ócíy pinjaty mijpidacp Jesucristo, jadu'n nej yajnimay Abraham jecy'ajty co jadu'n tuna'ñ.

²³ Ca'ni anajty Cristo ymiñ ya naaxhuíñ, huin'it anajty Dios ycötujcin ytuñ, yajpocycäy jáy ajcxy, e ca' Dios yajcomidooy jáy ajcxy ypocy. Jadu'n nej jihuíy jáy ixypíy ypujxtijc'iñaaygixy e ahuijxcixy mina je juez ytiydunáanigixy. Jadu'n anajty n'ijtim jadu'n nej jihuíy nbujxtijc'iñaayim, ixti cooni Jesucristo ymiñ ya naaxhuíñ yajpocyñíhuaaatzp. ²⁴ Jadu'n anajty Dios cuend'aty yí' judíoáy anajty miid ycötujcin huídibi Moisés ycojay. Tim jadu'n nej jáy cuend'aty huingjáy y'ung. Jadu'n anajty Dios cuend'aty judío jáy ajcxy ixti cooni Jesucristo ymiñ ya naaxhuíñ jébi yajpocyñíhuäch jáy ajcxy. ²⁵ Jadachambi co Jesucristo ti y'oy ya naaxhuíñ, e ti nmibijcím (tzojcingíx) yí' ytiy'ajt, paady ycixpi cham ca' n'oc'ijtim cuend'aty miid Dios ycötujcin huídibi Moisés ycojay.

²⁶ Com miich ajcxy ti nmijpidaaccixy Jesucristo ytiy'ajt, paady ycixp jébi nidüg'ócíy miich ajcxy naydíjigixy Dios y'ung. ²⁷ Tüg'ócíy miich ajcxy huídijaty ti mnñibejtcixy, ti mnñibejtcixy jigix jébi mdügmujccixy miid Cristo, jadachambi niducy m'ijtcixy miid Cristo. ²⁸ Nidüg'ócíy miich ajcxy ti mgöbijccixy Jesucristo jadu'n nej ajcxy mHuindzin. Jadu'n miich ajcxy judíoáy etz nañ jadu'n ca'pi yjudíoáyity, nañ jadu'n miich ajcxy midumbidijc etz miich ajcxy huídibi ci'm nay'ane'mip, miich ajcxy yéydijctijc etz miich

ajcxy töxyjäydjic; tú'ciy miich ajcxy myajpattaaygixy ma mHuindzin Jesucristo. ²⁹ Huenpinity miich ajcxy co mmijpidaaccixy Jesucristo, huin'it jébi ajcxy mnaydijiyb Abraham y'ap y'oc, e huin'it jébi mbáatcixipy tzinaydac jiiyb tzajpjoty, je huidibi Dios yaj'ahuanüy Abraham, Abraham y'ung y'anäg etz Abraham y'ap y'oc.

4

¹⁻² Cha jadüg iixpejt nyajnimäyich miich ajcxy huidibi captxcpx Dios ytiy'ajt. Tüg comeeñjyä ymang hue' anajty mutzni pi'cni je' anajty jëdaanip yteedy ypidägy. E chi yteedy tüg jäy yajnibicy huidibi jébi cuend'aty je pidägy etz je pi'c'anäg mabaad paady je tiempo mina ycidigihuiygy je pidägy. Je comeeñjyä y'ung com co anajty ca'ni yeegy, ane'my anajty y'ity, tim jadu'n nej ane'my y'ity je jäy huidibi midumb. ³ Tim jadu'n nej je comeeñjyä y'ung anajty y'ity ane'my, nañ tim jadu'n ñich yi judiojäy ajcxy ane'my anajty n'itcixyich co anajty ca' tiydudägy naydijiygixyich Dios y'ung. ⁴⁻⁵ Co oy Dios yajhuaad'ajtni, chi oy quejxni y'ung ya naaxhuiñ. Yi' y'ung ma'xung'ajt judiojäy, jigix jébi codinäy jäy ajcxy ma Dios ycötujctac. Nañ jadu'n yi' ma'xung'ajt judiojäy jigix jébi yajpocyñihuäch yi jäy ajcxy huidibi ti yajpocähuiygy Dios ycötujcin huidibi Moisés ycojaj. Dios ti quexy y'ung jigix jébi xycodinaayim müid ajt nbocy ycxpi, e jadu'n Dios jébi xycöbijci jadu'n nej jihuüy xyci'm'ung'ajtim.

⁶ Jadachambi müid co naydijim Dios y'ung, paady ycxp Dios ti xy'adigiyim ti xyjottigiyim yi' yjihu'iñ ymic'ajt, paady ycxp ajt minaanim co Dios ajt nDeedy'ajtim etz nminaanim: "¡Padre Nuestro!" ⁷ Müid co miich ajcxy ti mmibijccixy Jesucristo, jadachambi ca' ane'my m'oc'itcixyñi ma Dios ycötujcin je jecyip, jadu'n nej je jäy ytumbidijc müidity ane'my. Paady ycxp jébi Dios xymöoygixipy jugy'ajtin huidibi ca' ycxipy ytigoyipy, jadu'n nej Dios müidity jugy'ajtin. Jadachambi miich ajcxy Dios xy'ung'ajt, etz jébi mbáatcixipy pidägy ma Dios.

Pablo yjotmaybaady müid je mibijcpidjic ycxpi

⁸ Jecy'ajty ca' anajty mnejhuüygyx Dios ytiy'ajt tiydudägy, ooy anajty m'ojadajtcixy oyñiti huidibi ca' ymic'ajt müidity. E ca' anajty m'ojadajtcixy je Dios tzajpjoty huidibi mic'ajt müidity. ⁹ Jadachambi ti mnejhuüygyx Dios ytiy'ajt etz Dios ti xycöbijccixy. ¿Nej co jadüg'oc mdzachnihuimbidaangixy yi judiojäy ycötujcin, ca'p ti mic'ajt müidity, huidibi ti m'ixmajtcixy? E jadüg'oc xy'ane'mygyx je judiojäy ycötujcin. ¹⁰ Jadachambi mdzachcuydunaangixy judiojäy ycostumbre, jadu'n nej ajcxy myajmij'ajtcixy xübo' xijimijt. ¹¹ Huinmaaybich ooy müid miich ajcxy ycxpi co naadigí ti nyaj'ixpicyich miich ajcxy. Ninigoob ayoohua'iñ ñich ndung ma miich ajcxy.

¹² Migügtijc ajcxy, cham may'ajt nbjctzooyich ma miich ajcxy. Yajtügüygix yi mhuinma'iñ jadu'n nej ñich nhuinma'iñ. Hch ti nyajtügüygix nhuinma'iñ müid miich ajcxy mhuinma'iñ co ti n'ixmachich yi judiojäy ycostumbre. Je taab anajty n'ityich müid miich ajcxy, ca' miich anajty ajcxy ñich n'ayuc xyjijpcogapxiyi. ¹³ Miich ajcxy mnejhuüy co anajty n'ityich ma miich ajcxy, pumäy ñich anajty nyajpaady müid yuu pa'm ycxpi, paady ycxp ñich jim jecy nhuäcxijpyich, ngapxhuäcxych Jesucristo ytiy'ajt je jayijp'aty. ¹⁴ Müid ñich nba'm ycxpi ooy n'adzijpy miich ajcxy ma mjiin mdijc, e miich ajcxy ca' ti xy'ixtyje e ni ca' miich ajcxy xymidzijpich. Jadu'n ñich miich ajcxy xycöbijcy agujc jotcujc, tim jadu'n nej ixypy ti mgöbijccixy Jesucristo

ci'm. ¹⁵ Jadachambi ¿ti ti ytunyii ti yjadyii co ca' mmijotucj'ajtcixy ñich n'ayuc? Com nyejcich tiy'ajt co je taabi anajty oga'n jim n'ityich ma miich ajcxyc co janch xypubedaambich miich ajcxyc. Ixti mg'i'm huiin anajty ajcxyc mjayajpidzimaangixyp etz xymöhuaangixyich anajty co ñich ngaa'a'ixiy. ¹⁶ ¿Nej ñich ti n'ahuimbityich miich ajcxyc nmidzip müid co ti nyajñimaaygixy huidibi janchip?

¹⁷ Yi huindzindijc jim ma miich ajcxyc huidibi xychachyaj'ixpijccixp huidibi ca' ytiy'ajtity, ca' ajcxyc oyhuinma'ñ müidity. Hue' ajcxyc tzachtzocy co miich ajcxyc m'ixmäjtzcxixip ñich n'ayuc ndiy'ajt. Hue' ajcxyc tzachtzocy co miich ajcxyc yi' mgömayipy. ¹⁸ Hich njajotucjich jadu'n co huingbi huindzin ajcxyc jébi xyaj'ixpijccixy. Nigoobi co ixypiy jébi ajcxyc m'oy'ajtin mbaatcixy. Ca' oy copicyity co ñich ci'm miich ajcxyc nmüd'ijttihuiipy. ¹⁹ Migügtijc huidibi ooy ndzocy njihuüyich jadu'n nej jihuiy ngi'm'ung'ájtigixy, ooy tzaachypi ndzachjihuiyich müid miich ajcxyc ycixpi jadüg'oc. Jadu'n tzaachypi njihuüyich jadu'n nej ungday tzaachypi jihuiy co y'ung yajma'xung'ada'ñ. Njihuihuaamybich tzaachypi ixti cooni miich ajcxyc anajty Cristo mhuinma'ñ xyaj'oyiiyi. ²⁰ Ooy ñich njanay'ixpada'ñyii ma miich ajcxyc cham cham. Njamüidcapxaangixy njamüidmüidägaangixy, chi ixypiy tiy'ajt njacyajñimaaygixy jac huädz. Ooy ñich ndajy nmayich müid miich ajcxyc ycixpi, nej n'ocjacñimaaygixyipy.

Je Agar etz Sara y'ixpejt

²¹ Miich ajcxyc huidibi mdzachcuydunamyb Dios ycötujcin je jecyip. Nmimaaygixy ajcxyc, ¿nej ca'ni ajcxyc midoogixy huidibi Dios ycötujcin nigapxyip? ²² Com Dios y'ayuc huidibi jaybetyip jadu'n ymina'ñ co Abraham ymüid anajty metz ymang. Tüg je'anajty ytaj'ajtip huidibi ypödumb'ajtpy. Je jadügi ymang anajty ytaj'ajtip huidibi ytimy'töxijc'ajtpy. ²³ Je huidibi je pödumbi y'ung'ajti, hue' je' ypi'c'ajty jadu'n nej pi'ctijc jadyii yma'xung'ajtcixy. Je huidibi Abraham ytöxyijc y'ung'ajti Dios je' müid ymic'ajt ypi'c'ajty, Dios ycuyluun y'ayuc huidibi yajhuinhuaniiy Abraham. ²⁴ Jada jihuibit ayuc jadu'n yhuimbidzimyb: jada Abraham ytöxyjäy ajcxyc metz ixpejt'ajtp jadu'n nej Dios ti ytuñ müid yi' yjäy. Je ypödumbi huidi anajty yxi Agar, yi' müid yquipxiiyi Dios ycötujcin huidibi Dios ymoy Moisés ma je cop huidi yxi Sinaí. E tüg'óciy jäy ajcxyc huidibi cuyduungixp Dios ycötujcin huidibi Moisés ycojay, ane'my ajcxyc je' yaj'idyii, tim jadu'n nej tüg comeefnyjäy ane'my yaj'ity yi' ytumbi ajcxyc. ²⁵ Agar yi' nügix'ajtp je cop Sinaí jim Arabia ñaaxjot ma Dios moy Moisés je cötujcin. Agar je töxyjäy huidibi anajty pödumb, je' müid yquipxiiyi judiojäy huidibi tzachcuyduungixp Moisés ycötujcin, etz nañ yquipxiiyi müid Dios y'it ya naaxhuiñ jim Jerusalén. Yi judiojäy etz y'ung y'anäg ajcxyc huidibi tzach cuyduungixy Moisés ycötujcin je jecyip, ane'my ajcxyc y'ity ma jada cötujcin, tim jadu'n nej jäy ajcxyc huidibi tumb ma comeefnyjäy, e y'ane'my ajcxyc y'ijtcixy. ²⁶ Je Sara huidibi Abraham ytöxyijc'ajtpy, yi' müid yquipxiiyi ñich ajt huidibi cuydumb je Cristo ytiy'ajt, e je Cristo yi' yajpatp tzajpjoty. ²⁷ Com jaybetyity ymiñ ma Dios ñecy co mayjäy paada'ñ oybi ma Dios, com Dios jadu'n ymina'ñ:

Jotcugi' jadüg'oc miich Sara huidibi ca' y'ungbaady. Xic yäx miich müid jotcujc'ajtin, miich huidibi ca' ungmoy. Nigi ymayihua'ñ miich m'ap m'oc ca'ydi Hagar y'ap y'oc.

²⁸ Hich ajt huidibi nmijpidaacim Jesucristo tügiiyim müid Abraham ymang Isaac. Com jadu'n nej Dios cuyduun y'ayuc huidibi yajhuinhuaniiy Abraham

co Isaac yma'xung'ajty, nañ tim jadu'n Dios cuyduuñ yí' y'ayuc m'iid #ich ajt co je Cristo y'oy ya naaxhuiñ. ²⁹ Tim jadu'n nej Abraham ymang Ismael jecy'ajty midzip'ajty Abraham ymang huidibi Dios yajhuinhuaniiyi Abraham; nañ tim jadu'n yí' jáy ajcxy huidibi tzachcuydungixp Dios ycötujcin je jecy'ip, ooy ajcxy tzach midzip'adyii yí' jáy ajcxy huidibi mibijcp Jesucristo. ³⁰ Oc-huinmay miich ajcxy nej jaybetyity ymiñ ma Dios ñecy co jadu'n Dios nimay Abraham: Yajpidzim ma mdijc je mbödumbi müd ymang. Com ca' jadu'n ytiy'ajty co je pödumbi ymang paadipy miich mbidägy. Yi' je' padamb je mbidägy huidibi miich mdöxyijc ymang'ajtpy.

³¹ Migügtijc ajcxy, ca' #ich ajt n'ocjadu'niñ nej je pödumbi y'ung y'anäg ajcxy huidi ane'my ijt. Jadu'n #ich ajt nipaady nej Abraham ytöxyijc y'ung y'anäg huidibi ca' y'ane'my y'ity.

5

Cristo ti xyajnihuaatzim ma je cötujcin huidibi Moisés yeje

¹ Je Cristo ti xyajpidzimim ma Dios ycötujcin je jecy'ip ma anajty n'ijtim y'ane'my, jigix jébi tzojcingix nguyduunim yí' ytiy'ajt. Mibijccixy tiydudägy Cristo ytiy'ajt, ca' m'ixmajtzcixy. Ca' mni'ahuimbijtcixipy jadüg'oc Dios ycötujcin je jecy'ip ma anajty m'ijtcixy tim jadu'n nej comeefyjáy ytumbi ajcxy y'ijtcixy ane'my.

²⁻³ Amidoo'ijtcix #ich n'ayuc. Jadachambi #ich Pablo minaambich pen miich ajcxy mgöbigamyb jada ayuc co copicy myajtiy'ajtihuipy, huin'it ñaadig'ada'ñ co nmibijccixy Jesucristo ytiy'ajt. Ca' Jesucristo may'ajt tuna'ñ müd miich ajcxy pen jadu'n m'ididza'ñ. Jadüg'oc nmina'ñich co pinjaty jadu'n ycuydunamyb tüg Dios ycötujcin, copicy ycuydundähuipy tüg'óciy. ⁴ Pen mjijp'ijxyp ajcxy co Dios xyajpocyñihuátzaangixy müd co mguyduungixy tüg Dios ycötujcin, jadu'n nipaady nej jihuüy ti m'ixmajtzcixni Cristo y'ayuc ytiy'ajt. Pen ca' mjijpidaaccixy je may'ajt oy'ajt huidibi Cristo ti tuñ ninigoob müd miich ajcxy ycxipi, huin'it ca' Dios xyajpocyñihuátzcixipy. ⁵ Njijp'ijxim co Dios xyajpocyñihuadzaanim jigix jébi naydijim tudägy ma Dios yhuinduu müd co nmibijcin Cristo etz müd co je Espíritu Santo xypubejtim. ⁶ Co nmibijcin ajt Jesucristo, Jesucristo ca' cuendituñ pen ti nyajtiy'ajttiyim o pen ca'. Jéyi yí' tzocy co naychojcin nayjihuüyim nidüg nidüg, e jada je' je ijxpejt co nmibijcin yí' ytiy'ajt.

⁷ Jayijp'aty oy yajxon anajty m'occuydungixp Jesucristo ytiy'ajt. ¿Pin ti xy'agapxiygixy co ca' mgapxymidohuaangixy tiy'ajt? ⁸ Yi' jáy ajcxy huidibi ti xy'agapxiygixy ca' ajcxy tiy'ajt patcixy ma je Dios huidibi ti xyhuin'ijxim jigix jébi nmibijcin Cristo. ⁹ Miich ajcxy mnejhuüy co jáy pidaaccixy levadura ma harina jich je levadura yajtiyiydaayb je jich. Nañ tim jadu'n jada anii' huidibi jáy ajcxy ti pidaaccixy ma miich ajcxy yajtiyiydähuamyb miich ajcxy mjot mhuinma'ñ. ¹⁰ Com #ich nmibijcpich co ajt je nHuindzin Jesucristo oyhuinma'ñ xymöhuipy ajcxy, paady ycixp njijp'ijxypich co miich ajcxy nmibigaamyb #ich ngapxy #ich n'ayuc. Dios chaachytunipy je jáy ajcxy huidibi ti xyajhuinma'nydigooygixy. Oy ooy yjamij yjajanchity ajcxy, ca' ytimyñejty, Dios yí' ajcxy tzaachytunib.

¹¹ Migügtijc ajcxy, co xiypy yjanchity co #ich ngapxhuäcxyich co copicy nidüg'óciy jáy yajtiy'ajtihuipy, ¿nej co je'ni chambaad judíojäy xychach'ixhuidityich xychachpahuidityich? Pen ca' ixypy xy'ixhuidityich xypahuidityich jadu'n nipaady nej jihuüy nyaj'ixpcyich co je Cristo ca' y'oc'y

müid ñich ajt nbocy ycixpi. ¹² Yi' huidi ajcxy xyajhuinma'ñydidigooygixyp, ooy ixypiy y'oyity co ixypiy ajcxy xypuhuäctuatni tücciyi.

¹³ Dios müich ajcxy ti xymijhuogixy ma yi' ytiy'ajt jemybi jigix jëbi m'ixmäjtzcixni je Dios ycötujcin je jécyp, etz tzojcingix mijpidägipy Cristo ytiy'ajt. Dios ti ajcxy mdü'aa xy'ahuaatzi, per ca' huaad mduungixy je jibicpi huidibi mjot mhuinma'ñ chachñijot'ajtcixpy. Hue' a'oy naymi'oyjäy'äjtigix nidüg nidüg, naybubéjtigix miñ xyipy. ¹⁴ Dios y'ayuc ymina'n: "Mi'oyjäy'adipy mmijün mmidijc, tim jadu'n nej müich ajcxy mdzocy co mmijün mmidijc xym'oyjäy'adipy." Co jadu'n ajcxy mnaymi'oyjäy'adiyb miñ yxipy, ytimyñipatyp jadu'n nej jihuiy ti mguydundäy tüg'óciy je Dios ycötujcin. ¹⁵ Pen müich ajcxy mnaymidundigooyip etz mnaymijotma'tip miñ xyipy, ca' jyetyity co ci'm anajty jadu'n mdzachnayaajhuinma'ñydidigooyigixy miñ xyipy.

Je jugy'ajt huidibi yi Espiritu Santo yejcpy

¹⁶ Jada capxhuijin ñich müich ajcxy nyajnijayiyb. Cuychinaaygix je Dios ytiy'ajt jadu'n nej je Espiritu Santo xyhuinma'ñymooygixy ajcxy. Ca' mguyduungixy je jibic-huinma'ñ huidibi mdzachnijot'ajtcixyp ci'm. ¹⁷ Je jibic-huinma'ñ huidibi mdzachnijot'ajtcixyp, hue'ymidzip'ajtpy je oybi huinma'ñ huidibi je Espiritu Santo xymooygixp. Dios y'ayuc obyí ca' ñaygodigiyii müid müich ajcxy mjibic-huinma'ñ. Paady ycixp müich ajcxy ooy mjacyudunaangixy Dios y'ayuc, e ca' ajcxy mmimadäga'ñ ñicxy mguydundaaygixy. ¹⁸ Pen tzojcingix mguyduungixy je Cristo ytiy'ajt huidibi Dios yjihui'n xy-mooyb ajcxy, huin'ti ca' copicy mguydungixipy Dios ycötujcin je jecyp.

¹⁹ Com nnejhuiydaayim jadu'n nej jäy ajcxy yjot yhuinma'ñ tzachnijot'ajtcixy jibicpi. Jadu'n nej yëydjctjct tzachmigapxtigoyaangixy töxyjäydijc; e nañ jadu'n nej töxyjäydijc ajcxy ooy yëydjctjct tzachmüid'üangixy etz müid'edzaangixy etz ma yjiibi ji ajcxy yhuinma'ñydidigooygixy. ²⁰ E nañ nnejhuiyim jadu'n nej jäy ajcxy tzach'ojadajtctixy tzachhuingoxtinaaygixy je huidibi jäy ajcxy ci'm ti yajcojy, etz nej jäy ajcxy tzach'ojadajtctixy tzachyajtunaangixy caxpojpidijc, nej jäy ajcxy ymigüg tzachmijotma'tcixy; nej jäy ajcxy ca' tzip yjot'ambijccixy müid yinjaty huenjaty ayuc; nej jäy ajcxy tzachmidzip'ajtcixy ymigügtjct; nej jäy ajcxy tzachyajca'oy'ijxcixy ymigüg co tijaty müidib; nej jäy ajcxy chachnaybijc-huäcxáanigixy, huidibi abicy tzachmüid'adamb yjäy. ²¹ E nañ nnejhuiyim jadu'n nej jäy ajcxy abijctigihuaangixy tijaty ymigüg ymüid; nej jäy ajcxy ymigüg yaj'ocixy; nej jäy ajcxy nijot'ajtcixy ügü etz adzuuhuididi agoodzhuididi, etz yi jäy ajcxy huidibi tzachnijot'ajtcixp yi jadu'mbi huinma'ñ. ñich müich ajcxy cham njacyajnaaygixy jadu'n nej ñich jayijp'aty ti n'ocnigapxpich, co yi jäy ajcxy huidibi yi jadu'mbi jibic-huinma'ñ chachnijot'ajtcixp jadu'n nej cham ti nijayiygixy, ca' ajcxy tzinaydac paadaangixy ma Dios y'ane'my.

²² Hue' ajt jadachambi nejhuydaayim je oybi huinma'ñ huidibi Espiritu Santo yejcpy. Co yi jäy ajcxy huidibi ymüid Dios yjihui'n ymic'ajt ma yjot yhuinma'ñ, hue' ytungixyp ajcxy yi oyjäy'ajtin müid ymigügtjct; müid ajcxy xondaacin etz müid ajcxy jotcuj'ajtin; etz ymímecxtujcixyp ymigügtjct; etz chojccixyp yjihuiyigixyp ymigügtjct; etz ytungixp oybi; etz tudägy yjäy'ajtcixyp, ²³ nicy xeemy yjäy'ajtcixy ma ymigügtjct; etz ci'm yajxon ñay'ané'migixy ma yi oybi. Ca' ji huingbi cötujcin huidibi jada oybi huinma'ñ jipcogapxñhuipy. ²⁴ Tüg'óciy jäy ajcxy pinjaty Jesucristo

Huindzin'ajtp, mímadacpy ajcxy yí jibic-huinma'ñ huídibí c'i'm nijot'ajtcixyp mñid Cristo ymic'ajt. ²⁵ Mñid co nmñid'ajtm je Espíritu Santo ymic'ajt ma ajt ndzinaayin njugy'ajtn, paady ycixp tzoc tzinaayim jadu'n nej xy'ane'mim xyhuinma'ñymooyim je Espíritu Santo.

²⁶ Ca' huaad amij agix ndzachnayjihuiyim, etz nañ jadu'n ca' huaad nmigügtijc nyajjotma'tim; etz ca' huaad ni ti nyajca'oy'ixim.

6

Naybubéjtigixy miñ xyipy

¹ Migügtijc ajcxy, pen mbatpy tüg migüg huídibí jibic-huinma'ñ ti ymímadágyii, miich ajcxy huídibí mímadacyp yí jibic-huinma'ñ mñid Dios ymic'ajt mbubéjtixipy jada migüg, e co mbubéjtixipy jada migüg, ñigi jotmic mmigapx mñid oy gapxy oy ayuc. Naygüend'adii ajcxy c'i'm, ca'ydi jibic-huinma'ñ xymímadaaccixy. ² Naybubéjtigix nidüg nidüg pinjaty ayo'n jotmay mñid. Co jadu'n mdüngixipy, hue' anajty ajcxy mguydungixyp Cristo ycotujcin huídibí ti xymooyim ajt.

³ Pen ji pin ñayjihuiyii amij agix etz chach naygömaya'ñyii c'i'm co chach y'oyjäyity, ca' je' choobaady ma Dios yhuinduu. ⁴ Jébi nidüg nidüg jäy ñayjihui'ñybigyii nej chinäy yjugy'aty, pen oy o peni ca'yoyity. Peni ycuychinaayb yajxon Dios ytiy'ajt oybi, jotcujc ñayjihuihuib y' c'i'm e ca' huaad yajquipxíy chinaayin mñid huingbi. ⁵ Nidüg nidüg jäy c'i'm chinaayin jébi yajnicxy nej Dios jäygidägy. Ca' huaad ni'ixtúdy nej ymigüg jibic-huinma'ñ mñidty.

⁶ Yi jäy ajcxy pinjaty ti ixpicy Dios y'ayuc ytiy'ajt, copicy co möhuipy tijaty yajmayajtpy je huindzin tiibi yaj'ixpigyii.

⁷ Ix ajcxy c'i'm mnayhuin'ingix com Dios ca' yí ni pin huaad niixígy yajxígy. Com pen miich ajcxy jibic-huinma'ñ mdumyb, Dios xychaachytunip ajcxy. Pinjaty oybi tuumb, nañ ypaadipy oybi, e pinjaty jibicpi tumb, nañ jibicpi ypaadipy. ⁸ Pinjaty jibic huinma'ñ tum jadu'n nej jibicpi tzachnijot'aty, co y'ogipy yí y'alma ñicxip ayoodactuuby. Pinjaty cuydumb Dios ytiy'ajt jadu'n nej je Espíritu Santo huinma'ñ ymöyii, co y'ogipy yí y'alma huingbi jugy'ajtn ypaadamyb huídibí nimina ycaacixy ycaatigooy huídibí je Espíritu Santo möhuib. ⁹ Peni nduunim jabom jabom oy huinma'ñ ca' huaad ndzippim, jébi nmecxtujcim ixti cooni anajty nbaatim oybi ma Dios. E ca' huaad njotmetzcíyim. ¹⁰ Tzoc oyjäy'ajtn tuunim ma nidüg'óciy jäy ajcxy, jadu'n nej Dios xyhuinma'ñymooyim. Ñigi tzoc pubejtim nmigügtijc huídibí mibijcp mñidpac Cristo.

Ane'min, capxhuijn etz capxpooxín huídibí cijxnip je necy

¹¹ Ijxcix huindíxcix jada letra mijjatypi huídibí ñch c'i'm njaayb, com ndzojcpyich co mnejhuíyigixipy nej yam nijayíyigixy. ¹² Yi jäy ajcxy huídibí mibijcp co Cristo o'cy ma yí cruudz mñid ajt nbocy ycixpi etz nañ jadu'n mñidpac yí tiy'ajttíhuí, hue' ajcxy tzach ñaygömayaanigixy ma yí judíojäy ajcxy, jigix ca' pin y'ixhuídidiyb ypahuididiyb. ¹³ Yi huída ajcxy tzach mñidpac tiy'ajttíhuí, nañ ni ca' ajcxy cuydundäy tüg'óciy jada Dios ycotujcin je jecyip. Hue' yí ajcxy tzocixy co miich ajcxy myajty'ajttíhuip jigix ajcxy jébi ñaygómáayigixy mñid co miich ajcxy ti myajty'ajttíyigixy. ¹⁴ Yi jäy ajcxy huídibí jim yaj'ixpijcp anii, c'i'm ajcxy chach ñaygömayaanigixy. Per ñch ca' jadu'n naygömaya'ñyijich mñid huídibí ndumybich huídibí nyaj'ixpijcpyich.

Hue' janchtiy ngapxpadaamybich ich ajt nHuindzin Jesucristo ytiy'ajt, jadu'n nej yajcruudzpejtí miiid ajt nbocy yciixpi. Co ti nmibicyich Cristo Jesús, huin'it ti n'ixmachich je naaxhuiñyáj yjibic-huinma'ñ. E paady cham ni nga'ocnijot'ajtnich yi jibic-huinma'ñ. ¹⁵ Co nmibijcim Jesucristo, oy ixyipy ti nyajtiy'ajttiim o oy ixyipy ca' ti nyajtiy'ajttiim, ca' ma choobaady. Huidibi tzoubatp yi' je' co nmibijcim Jesucristo, etz co nmiiid'ajtim jemybi jot huinma'ñ. ¹⁶ Huen Dios xyajjotcugihuiipy etz xypa'ayoohuiipy, etz nañ jadu'n yajjotcugihuiipy etz pa'ayoohuiipy nidüg'óciy jáy huiidijaty cuydumb Cristo ytiy'ajt, tüg'óciy Dios yjáy janchypí tiydudägypí.

¹⁷ Jadu'n nej jadachambi, etz jadu'n nej xii tiempo jacmiimb jaccidaacp, ca' ich pin huaad xyjac'amayiyich, com nmiiidich je tiy'ajt ma nninixich jadu'n nej jáy ajcxy ti xyhueenduuñich ti xychaachytuñich miiid co ti nduuñich miiid Jesucristo yciixpi.

¹⁸ Migügtijc ajcxy, huen ich ajt nHuindzin Jesucristo tunipy ñigi may'ajt oy'ajt ma miich ajcxy. Jadu'n jada ngapxycixyich. Amén.

EFESIOS

Yi Necy Huidibi San Pablo Yajniejx Je Mibijcpidijc Jim Efeso

¹ Hich Pablo, Dios jadu'n tzojcp co Jesucristo ti xyajniñbicyich co n'apóstol'adipyich. Jada necy cham ngejxypich jim Efeso ma yi jāy ajcxy huidibi Dios yjāy'ajtip, yi' ajcxy huidibi mibijcp tudāgy Cristo Jesús etz huidibi ajcxy yajpatp ma yi'. ² Huen ajt nDios Teedy etz ajt nHuindzin Jesucristo may'ajt oy'ajt tunipy müid miich ajcxy etz xyajjotcugihuip ajcxy.

Nej je Espiritu Santo conucxy Cristo yjāy

³ Tzoc ñbaatim capxpaatim Dios ñich ajt nHuindzin Jesucristo yTeedy. Müid co nyajpaatim ma Cristo, paady Dios ti xyconuucxim müid tūg'óciy huidijaty tzomb tzajpjoty. ⁴ Dios ajt xyhuin'ijxim jecy'ajty, ca'ni anajty cojy macxy je naaxhuiñybi. Je' xyhuin'ijxim jigix jēbi nyajpaatim ma Cristo, etz jigix jēbi nyajpaatim ma Dios yhuinduu huadz oy njot nhuinmañ, ca' ti bocy nmüid'ajtim. ⁵ Müid co Dios ooy xychojxim xyjihuiñyim, paady ycixp yi' capxcōdujcy jecy'ajty, ca'ni anajty naaxhuiñybi yajcojy yaj'oyiñ, co xycōbigaanim nejjihuiñy yci'm y'ung. Co Dios jadu'n quejxy je Cristo ya naaxhuingixy, chi yi' yaj'oyiñy nej jēbi xycōbijxim nej yci'm y'ung, e jadu'n xymüid'adaanim tzajpjoty. Dios jadu'n ytuñ jadu'n nej yi' anajty tzocyin. ⁶ Tzoc ñbaatim capxpaatim Dios ooy müid co mijmay'ajt mij'oy'ajt tuñ müid ñich ajt ycixpi, co quejxy y'ung ya naaxhuiñ müid ñich ajt nbocy ycixpi, jigix jēbi nyajpaatim ma yi' y'ung, je' y'ung huidibi ooy tzocy jihuiñy. ⁷ Müid co Dios ooy xychojxim xyjihuiñyim paady ycixpi yi' y'ung ñi'py teemy yojcy co y'o'cy müid ajt nbocy ycixpi, ti ajt n'alma xyajniñdzoocim etz nbocy ajt ti xyhuinmeecxim. Co jadu'n ytuñ, chi Dios mijmay'ajt mij'oy'ajt tuñ müid ñich ajt ycixpi. ⁸ Co Dios jadu'n mijmay'ajt mij'oy'ajt tuñ müid ñich ajt ycixpi, ti xyajhuinjihuiñyim ti xyajnejhuiñyim yi ytiy'ajt yi yhuinmañ. ⁹ Dios yjāygidacpy jadu'n co ti xyajnejhuiñyim nej anajty müidity capxcōdujcy huidibi ca' pin jecy'ajty huinjihuiñy. Nañ jadu'n Dios ti xyajnejhuiñyim nej ti yhuinmañypidacy jecy'ajty nej ytunañ anajty müid Cristo. ¹⁰ Je huidibi Dios jecy'ajty ti yajnihuinmayiñy co tunañ anajty, ytunamyb yi' mina anajty je tiempo ti yhuaad'ajtni. Dios ti yajnihuinmayiñy anajty co pidāgañ tūg'óciy huidi yajpatp tzajpjoty etz tūg'óciy huidibi yajpatp ya naaxhuiñ ma tūg ane'min, e je Cristo je' ane'mamb nigohuajc'adamb tūg'óciy.

¹¹ Tūg'óciy tijaty tuni yjajti jilby tzajpjoty etz ya naaxhuiñ Dios jayijp capxcōdujcy. Hich ajt huidibi nyajpaatim ma Cristo, Dios ti xyhuin'ijxim jecy'ajty co ogañ je naaxhuiñybi chondacy jigix jēbi nbaatim tūg'óciy huidibi Dios xymōhuaanim. E tūg'óciy jada nicxy yjaty tim jadu'n nej Dios jayijp capxcōdujcy, e Dios ytunamyb jadu'n nej yi' tzocy etz nej jāygidāgy. ¹² Jadu'n Dios cuydumyñ müid ñich ajt ycixpi, huidibi jayijp ti nmibijcim ti nmijpidaacim Cristo, jigix jēbi nguydunim ma ajt ndzinaayin Dios ytiy'ajt, e jadu'n mayjāy capxpaadip etz ojadadip Dios müid yi' ymij'ajtn etz yi' y'oy'ajtn ycixpi. ¹³ Nañ jadu'n miich ajcxy co mmidooy je ayuc tiy'ajt nej jēbi m'alma ñidzōgipy ajcxy, e ti mmibijccixy Cristo, huin'it ajcxy myajpaatixy ma yi', e je Dios yjihuiñ ymic'ajt huidibi miich ajcxy müid ma mjot mhuinmañ, je' nidiy'ajt'ajtp co myajpaatixy ma Dios. Jada je' je Espiritu Santo huidibi Dios y'ahuanñy

jecy'ajty co xymöhuaanim. ¹⁴ Jada Dios yjihui'ñ ymic'ajt jada je' nidiy'ajt'ajtp co nbadaanim it lugar ma Dios y'it. Dios xymöhuaanim it lugar ma y'i' y'it co anajty xii tiempo yhuaad'ajtni huin'it Dios nihua'na'ñ yajndzöga'ñ pinjaty yjyä'ajtip ajcxy. Jadu'n Dios tuna'ñ, jigix jëbi ñch ajt n'ñbaatim ngapxpaatim Dios müid y'oy'ajtin ycixpi.

Pablo mibijctzoy Dios co huen ajcxy yajmoy huijy'ajt cuj'ajt

¹⁵⁻¹⁶ Com ti nnejhuüyich jadu'n nej tÿdudägy müich ajcxy ti mmibijccixy ñch ajt nHuindzin Jesús, e nañ jadu'n ti nnejhuüyich jadu'n nej mdzojccixy mjihuüyigixy tüg'óciy huidibi mibijccixp Jesucristo. Paady ycixp jabom jabom co Dios nmibijctzooyich, nyajnajxpich jäygidaaçin ma Dios müid müich ajcxy ycixpi. ¹⁷ Mibijctzooybich Dios, nHuindzin Jesucristo yTeedy, je mijpi Dios Teedy, co y'i' xymöhuip ajcxy je huinma'ñ je ixpijcin huidibi je Espiritu Santo yejcyp, etz nañ jadu'n xyajnejhuühiipy xyajhuinjhuühiipy ajcxy jac'oy y'i' y'ayuc, e tüg'óciy nej y'i' ti ytuuñ. ¹⁸ Dios nmibijctzooybich müid müich ajcxy ycixpi, co xyaj'anüiyip ajcxy mjot mhuinma'ñ müid y'i' ytiy'ajt, jigix jëbi mnejhuüyigixipy tijaty huidibi ajcxy m'ahuijxyp ma Dios, nidüg'óciy müich ajcxy huidibi Dios ti huin'ixy. Nañ jadu'n jigix jëbi mnejhuüyigixy nej ymijity yjanchity je pidägy huidibi Dios yegamyb müid tüg'óciy ajcxy huidibi Dios yjyä'ajtip. ¹⁹⁻²⁰ Dios nmibijctzooybich jigix jëbi ajcxy mnejhuühiipy jadu'n nej Dios ymic'ajt müidity. Je' ymic'ajt ca' ycixipy ytigoyipy, e ni pin ca' quipxipy. Etz y'i' ymic'ajt tumb ma ñch ajt njot nhuinma'ñ nidüg nidüg co ajt nmibijcin. Dios ti xyajnejhuüyim y'i' ymic'ajt huidibi ymüid may'amy co yajjuyipiçy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi jüby tzajpjoty. Y'i' ñnaayb a'oy'amy ma Dios ymijc, etz ane'mdäy tüg'óciy naaxhuiñ etz tzajp quipxyi müid Dios. ²¹ Cristo jac mij'ane'min ymüid, jac mic'ajt müid, ca'ydi jacpinjaty huidibi jayajpatp tzajpjoty, etz huidibi jayajpatp ya naaxhuiñ, huidibi cham tzinaayb etz huidibi jacjüini tzinähuaamni. Jesucristo cömay y'ity nigi, ca'ydi jac pin huidibi cham tzinaayb, etz huidibi jacjüini tzinähuaamni. ²² Dios ti pidägy tüg'óciy ane'min ma Cristo jëbi ane'mdäy. Jadu'n nipaady nej jihuiy Cristo niñuäçpejtäy tüg'óciy ane'min. E nañ jadu'n Dios ti pidägy Cristo jigix jëbi nigohuajc'adipy tüg'óciy mibijcpidijc. ²³ Je mibijcpidijc jadu'n nipaady nej Cristo ñinix, paady ycixpi y'i' ajcxy yajcixy yajca'pxy je Cristo y'oy'ajtin ymij'ajtin. E je Cristo yajcijxtaayb yajca'pxtaayb tüg'óciy tijaty ji ajtp.

2

Dios chojçpy yjihuiyb jäy ajcxy, paady ñdzooçcixy y'alma

¹ Ca'ni müich anajty ajcxy mmibijccixy Cristo, ooy anajty mdundigooygixy müid Dios ytiy'ajt, ooy anajty ajcxy mbocymüidity, e jadu'n nipaady nej jihuiy ti m'o'ccixy müid mbocy ajcxy ycixpi etz Dios xyajjugypijccixy huinjemy müid jemybi jugy'ajtin. ² Co ca'ni anajty müich ajcxy mgöbijccixy mmijpidaaccixy Cristo, ooy anajty mgyudungixy naaxhuiñjäy ajcxy ytiy'ajt, etz nañ ngapxymidoogixy anajty ajcxy je ca'oybi huidibi ane'mb je poj naaxhuiñ, je ca'oybi huidibi tumb ma y'i' jäy ajcxy yjot yhuinma'ñ huidibi ca' capxymidoogixy Dios. ³ Ma je tiempo tiibi ñaxy, nañ jadu'n anajty ndzinaayim jadu'n nej y'i' jacjadyii naaxhuiñjäy ajcxy huidibi capxymidoob y'i' ca'oybi. Ngapxymidoohim anajty nñinix chojcin. Ndundigooyim anajty müid ngi'mjot ngi'mhuinma'ñ. Ngupxyiyim anajty müid y'i' jacjadyii naaxhuiñjäy ajcxy huidibi Dios tzaachytunaanip müid ypocy ycixpi, etz nañ

jadu'n nmihuaad'ajtim co Dios xychaachytuunim müid ajt nbocy ycixpi. ⁴⁻⁵ Oy ixypy iich ajt mihuaadity tzaachypi müid ajt nbocy ycixpi, per Dios mij ooy ti xypa'ayoohuim, e mij ooy ti xychojcm ti xyjihuiiyim, paady ycixp tuuñ may 'ajt müid iich ajt ycixpi co yajjugypijcy je Cristo. E jadu'n quipxy müid Jesucristo iich ajt nbaatim jemybi jugy'ajtin huidibi ca' ycixipy ytigoyipy ni mina. Jadu'n Dios may'ajt tuuñ müid iich ajt ycixpi co anajty nbadaanim o'cin müid ajt nbocy ycixpi. Müid co Dios may'ajt oy'ajt tuuñ müid müich ajcxy ycixpi, paady müich ajcxy ti mbatcixy jemybi jugy'ajtin huidibi ca' ycixipy ytigoyipy ni mina. ⁶ Com jadu'n nipaady nej Dios xyajjugypijcm quipxy müid Jesucristo, paady ycixp Dios xymöhuaanim it lugar jüby tzajpjoty quipxy müid Jesucristo. ⁷ Jadu'n nej xü tiempo mimb cidacp Dios jadu'n oy tuñ jigix jëbi tiy'ajt nmüid'ajtim jadu'n nej Dios xychojcm xyjihuiiyim etz xypa'ayoohuim mijcajee, etz mijmay'ajt mij'oy'ajt tuun müid iich ajt ycixpi co nyajpaatim ma Cristo. ⁸ Müid co Dios müich ajcxy ti xychojccixy ti xyjihuiiyigixy, paady ycixp yi m'alma ajcxy ti patcixy nidzoocin co ti mmübijccixy Jesucristo. Ca' nmüinaanim co tijaty ti mdungixy, paady ycixp yi m'alma ajcxy ti patcixy nidzoocin. Hue' janchtiy Dios ti xymooygixy ninigoob ajcxy m'alma nidzoocin. ⁹ Ca' nmüinaanim huin'it jäy ajcxy y'alma nidzoocin paadip co oybi tungixy. Hue'janchtiy Dios jadu'n ci'm ti yaj'oyiy ninigoob nej jäy ajcxy jëbi patcixy y'alma nidzoocin, jigix ca' pin jëbi huaad amij agix ñayjihuiiyii. ¹⁰ Com Dios ci'm ti oyduñ iich ajt njemybi tzinaayin jugy'ajtin müid je may'ajt huidibi Cristo ytuun co y'o'cy müid ajt nbocy ycixpi. Jadu'n Dios tuuñ müid iich ajt ycixpi, jigix jëbi nduunim oyjäy'ajtin ma ajt ndzinaayin. Dios, jecy'ajty ca'ni naaxhuiiybi anajty chondacy, cojy macxy je tiy'ajt jadu'n nej yi' tzocy co nduunim oyjäy'ajtin.

Jotucj cham n'ijtim müid Dios, com Cristo xyajpocyhuaatzim

¹¹ Jadu'n müich ajcxy ocjäymejtzcodü nej müich ajcxy anajty myajpatcixy co anajty ca'ni mmübijccixy Jesucristo. Ca' müich anajty ajcxy mjudiojäyity, e ni ca' müich anajty ajcxy myajtiy'ajttiyigixy nej huaad mnaydjigixy Dios yjäy. Paady ycixp yi judiojäy ajcxy ymina'ñ co Dios je' yjäy ajcxy, e müich ajcxy ca', müid yi'da'ajty co müich ajcxy ca' myajtiy'ajttiyigixy. ¹² Co ca'ni anajty mmübijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judiojäy xycöbijccixy, etz ni ca' anajty mbadaangixy huidibi Dios y'ahuaniy ma yi judiojäy ajcxy, etz ni ca' anajty ti mijjp'ijxcixy ma Dios, etz ni ca' müich anajty ajcxy myajpatcixy ma Dios. ¹³ Jadachambi, müich ajcxy huidibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo müid co yi' ñi'py teemy vojcy müid müich ajcxy nbocy ycixpi. ¹⁴ Jesucristo ci'm yaj'oyiy je tzip je capxy nej anajty iich ajcxy judiojäy etz müich ajcxy huidibi ca' yjudiojäyity naymidzip'ajtim, e cham jotucj n'ijtim. Jesucristo ci'm yajtigoy je judiojäy ycötujcin huidibi anajty tzipcojp capxycojp ma iich ajcxy etz ma müich ajcxy. Jesucristo yajtügmuyc judiojäy, etz huidi ca' yjudiojäyity. ¹⁵ Jesús müid yci'm ninicx yajtigoy je jecy'ajtypi cötujcin co oy yaj'ogyii cruudzixy. Co Jesús y'o'cy, huin'it yajtügmuyc judiojäy etz huidibi ca' yjudiojäyity. Huin'it oy yaj'ahuimbity tügpicy jäy jemybi huidibi Dios yjäy'ajtip. E jadu'n ajcxy yajcixy yajmay je tzip capxy. ¹⁶ Co Cristo oy yaj'ogyii cruudzixy, huin'it yajcixy yajnajxy je tzip capxy jadu'n nej yi judiojäy anajty midzip'adyii yi' ajcxy huidibi ca' yjudiojäyity. Etz nañ huin'it Cristo yajtügmuyc yi judiojäy müid huidibi ca' yjudiojäyity. Paady ycixp Dios ycöbiga'ñyii judiojäy ajcxy etz huidibi ajcxy ca' yjudiojäyity agujc jotucj.

17 Je Cristo miin anajty ya naaxhuiñ etz capxhuäcxy oybi tiy'ajt jadu'n nej jëbi ajt nbaatim jotcuje'ajtin ma Dios. Ycapxhuäcxy anajty ma miich ajcxy huidibi ca' yjudiojäyity, huidibi ca' anajty müdity Dios ytiy'ajt. Etz nañ jadu'n ycapxhuäcxy Dios ytiy'ajt anajty ma iich ajcxy judiojäy huidibi jamüid anajty Dios ytiy'ajt. 18 Müid co Cristo may'ajt ti tuuñ co xy'adigiim xyjottigiim Dios yjihuiñ ymic'ajt, paady ycixp nidüg'óciy iich ajt nyajpaatim ma Dios jadu'n nej tügpicy jäy, tanto judiojäy etz nañ jadu'n huidibi ca' yjudiojäyity. 19 Paady ycixp miich ajcxy jadachambi myajpaady ma Dios. Jadu'n miich ajcxy myajpaady ma Dios tim jadu'n nej je jäy ajcxy huidibi tzinaayb ma yci'mgajp, ca' yjadu'nity nej adzinaaybi ajcxy. Paady ycixp tú'ciy miich ajcxy mnaygomájtzigixy ma Dios müid judiojäy ajcxy. Jadu'n miich ajcxy etz judiojäy ajcxy nipaady cham nej jihuiy ajcxy mdüguuy mdügmigüg. 20 Miich ajcxy ti mmijpidaaccixy je tiy'ajt huidibi Jesús y'apóstol ajcxy ti capxhuäcxy etz je tiy'ajt huidibi Dios y'ayucnajtzcaxiiby ti capxhuäcxcixy. E yi' ajcxy ytiy'ajt jadu'n nipaady nej poch'ijx ma chondägy. E Jesucristo yi' jëdu'n yajpatp nej tüg tzaa huidibi jaccopicyip ma je poch'ijx chondägy. 21 Dios jadachambi tiempo ycojyp ymacxyp jadügpicy jäy huidibi yjäy'adaanip huidibi tügjijp mijpidaaccixy Cristo, huidibi tú'ciy ijtcixyp müid Cristo. Jadu'n jadayaabi tügpicy jäy nipatcixy nej tüg tijc ma jäy ajcxy Dios ojadajtcixy. 22 Miich ajcxy myajpatp ma Cristo quipxyi müid nidüg'óciy yi' mayjay ajcxy huidibi mijpidacp Dios etz huidijaty müi'ijtp je Espíritu Santo ma ajcxy yjot yhuinmañ, jadu'n miich ajcxy mjogy'ajtin nipaady nej Dios chinaydac.

3

Pablo yi' je' müid cötujcin co capxhuäcxy Dios y'ayuc ma pin ca' yjudiojäyity

1 Iich Pablo, nyajpatpich pujxtigoty müid co nduuiñich ma Jesucristo ytung ma miich ajcxy huidibi ca' yjudiojäyity. Paady ycixp nmibijctzooybich Dios müid miich ajcxy m'oy'ajtin ycixpi. 2 Mnejhuiyb ajcxy com Dios mijmay'ajt ti tuuñ müid miich ajcxy ycixpi, paady yi' ti xyajñibicyich ngapxhuäcxbich ma miich ajcxy yi' y'ayuc ytiy'ajt. 3 Dios ti xyajnejhuiyich yi' ytiy'ajt huidibi jecy'ajty yüch y'ijjt. Jada tiy'ajt yinjaty hueeñjaty iich miich ajcxy ti nni-jayiygixy jayijp'aty. 4 Co miich je necy mgapxip, huin'it ajcxy mnejhuihuipy co iich nnejhuiyich je Cristo ytiy'ajt huidibi ijtp yüch. 5 Jada tiy'ajt maabi Jesucristo, Dios ca' ni pin yajnejhuiy jecy'ajty. Jadachambi xii tiempo Dios müid je Espíritu Santo yajnejhuiy Jesucristo ytiy'ajt je Jesús y'apóstoles ajcxy etz je Dios y'ayuc najtzcaxiiby ajcxy. 6 Jada je' je tiy'ajt huidibi jecy'ajty yüch anajty ijtp, co yi' jäy ajcxy huidibi ca' yjudiojäyity ypadamyb ajcxy Dios y'oy'ajtin quipxyi müid yi' judiojäy ajcxy, etz nañ jadu'n yi' ajcxy yajpaady ma Dios tú'ciy müid yi' judiojäy ajcxy, etz nañ jadu'n yi' ajcxy padaangixy oybi huidibi Dios jecy'ajty yajnimay yi' judiojäy co möhuaangixy pinjaty mibijccixp Jesucristo.

7 Dios mijmay'ajt ti tuñ müid iich ninigoob co ti xyajñibicyich jada tung, e xymöyich mic'ajt co ngapxhuäcxbich Jesucristo y'ayuc ytiy'ajt oybi ma yi' jäy ajcxy huidibi ca' yjudiojäyity. 8 Iich jactimmudzip ma yi' maybi mibijcpidic ca'ydi jacpin, per ca' ñejity. Dios may'ajt oy'ajt ti tuuñ ma iich, e ti xypidägyich ma yi' ytung co ngapxhuäcxyich jada oybi tiy'ajt ma jacjadyii jäy ajcxy jigix jëbi ajcxy patcixy ma Cristo Jesús mij'oy'ajtin, huidibi ca' pin huinjihuiy jadu'ñyi ymijity. 9 Dios ti xyajñibicyich co ngapxticxbich ma tüg'óciy jäy ajcxy je Dios y'ayuc ytiy'ajt oybi huidibi yüch anajty ijtp. Yi' je' je ayuc huidibi Dios

ti cojy ti macxy jecy'ajty, jadu'n nej yi' tuna'n je oybi mïid tÿg'óciy jáy ajcxy. Yi' je' Dios huidibi ti yajcojtây tÿg'óciy tijaty ya naaxhuiñ etz jiiby tzajpjoty yajpatp. ¹⁰ Jadu'n Dios capxcódujcy co je tzajpjoty tzinaaybi ajcxy huidibi ane'min etz mic'ajt mïid, tÿy'ajt padaangixy ma yi' mibijcpidijc jadu'n nej Dios mijhuinma'n canaagnax tuñ mïid jáy ajcxy nidÿg'óciy huidibi mibijccixp Cristo Jesús. ¹¹ Jadu'n Dios ti cuyduuñ mïid ajt nHuindzin Jesucristo jadu'n nej jecy'ajty capxcódujcy. ¹² Mïid co nyajpaatim ma Jesucristo paady ycixp agujc jotcujc nmigapxim nmihuingtonim Dios. Mïid co nmibijcim Jesucristo paady ca' ndzigüyim ndzo'yduunim ma Dios yhuinduu. ¹³ Paady ycixp may'ajt nbijctzooyich mïid miich ajcxy co ca' nigi m'ixtigihuaaccixy ma ajcxy mmibijcin. Etz ca'ajcxy xyñidajipy xyñimayipyich co tzaachypi nminaxyich nyajnaxyich mïid miich ajcxy ycixpi. Com mïid co ti nyajnaxyich tzaachypi mïid miich ajcxy ycixpi, paady jëbi miich ajcxy oy'ajtin mbatcixy.

Cristo chojpy yjihuiyb jáy ajcxy

¹⁴ Com Dios mijmay'ajt ti tuuñ mïid judíojäy etz mïid huidibi ca' yjudíojäyity, paady njatyhuingoxtinaaybich Dios, ñich ajt nHuindzin Jesucristo yTeedy, e nmibijctzooybich Dios mïid miich ajcxy ycixpi. ¹⁵ Tÿg'óciy tzajpjoty tzinaayb etz tÿg'óciy naaxhuiñyây huidibi mibijccixp Dios, jëbi nidÿg'óciy yminaangixy: "Dios ñich ajt nDeedy." ¹⁶ Paady nmibijctzooybich Dios Teedy mïid miich ajcxy ycixpi, co Dios je huidibi mic'ajt etz oy'ajt ymïid mijcajee, co xymóhuipy mic'ajt ma ajcxy nmibijcin mïid yi' yjihui'n ymic'ajt huidibi yajpatp ma ajcxy mjot mhuinma'n. ¹⁷ Dios nmibijctzooybich mïid miich ajcxy ycixpi co Cristo ymic'ajt yajpaadip ma miich ajcxy mjot mhuinma'n mïid co mmibijccixy Cristo. Jadu'n Cristo ymic'ajt yajpaadip ma ajcxy mjot mhuinma'n, jigix jëbi miich ajcxy huidibi mmibijccixp Cristo, jëbi mdzójcxipy mjihuüygixipy mijcajee huinixi huinitiempo je mibijcpidijc etz tÿg'óciy jac-jadyi jáy. ¹⁸ Nañ jadu'n Dios nmibijctzooybich mïid miich ajcxy ycixpi co miich ajcxy etz tÿg'óciy mibijcpidijc nnejhuüygixipy jadu'n nej Cristo xychojcm xyjihuiyim mijcajee. E yi' chojcin yjihuiyin jadu'n nipaady nej tÿg'ójc huidibi jac cixip jac mijip, jac yooñip jac cücyip ca'ydi ni huidi tijc. ¹⁹ Nmibijctzooybich Dios co xyajnejhuüygixipy xyajhuinjihuüygixipy nej Cristo xychojcm xyjihuiyim mijcajee nidÿg'óciy ñich ajt, ixti ca' huaad nhuinjihuüyaayim jadu'n nej Cristo xychachchojcm xychachjihuiyim. Nmibijctzooybich Dios co xypubéjtcixip, ixti mabaad mmïid'ajttaaygixy Dios y'oy'ajtin.

²⁰ Jadachambi, cömay Dios y'ity huidibi mic'ajt mïid, etz huidi yejcp mijcajee jac'anaxy ca'ydi nej njapijctzoohuim etz nej njahuinmaayim, mïid je ymic'ajt ycixpi huidi tumb ma ñich ajt. ²¹ Huen tÿg'óciy mibijcpidijc ajcxy jáymejtzcixy ojadájtzcixy Dios etz Cristo Jesús jabom jabom huinixi huinitiempo. Jadu'n jada. Amén.

4

Tú'ciy n'ijtim mïid Espíritu Santo ycixpi

¹ Nyajpatpich pujxtigoty mïid ajt nHuindzin Jesucristo ytung ycixpi. Paady ycixp may'ajt nbijctzooyich co miich ajcxy mdzináaygixipy jadu'n nej mihuaad jáy chinaaygixy huidibi Dios ti yhuin'ijxigixy, com Dios miich ajcxy ti xyhuin'ijxcixy. ² Pidaaccix mjot mhuinma'n yung naxy, nicy xeemy jáy'ajtcixy, naymecxtújcgix miñ xyipy, naymi'oyjäy'ájtigixy, jigix ñiguëxigip

co mnaychójcigixy mnayjihuiyigixy miñ xyipy. ³ Mii'd'adipy ajcxy njot mhuinma'ñ tú'ciy miid je Espíritu Santo ypubejtin jigix jébi mdzinaaygixy jotucj ca' ma tzip capxy. ⁴ Nidüg'óciy mibijcpidijc tú'ciy yajpatcixy ma Cristo etz tügpajc Espíritu Santo huidibi yajpaady ma ajt njot nhuinma'ñ. Dios ti xyhuin'ijxim, jigix jébi quipxyjaty njijp'ijxtaayim je oybi huidibi nbadaanim jiiy tzajpjoty. ⁵ Ji yajpaady tügpajc ajt nHuindzin Jesucristo, etz tügpajc je ayuc tiy'ajt huidibi jébi nmijpidaacim, etz tügpajc nnáibejtim miid Jesucristo yxi. ⁶ Ji yajpaady tügpajc Dios Teedy huidibi cuendi'ajtp yajtzinaayb nidüg'óciy mibijcpidijc. Yi' je' huidibi nihuindzin'ajttaayb. Yi' je' huidibi may'ajt tumb miid nidüg'óciy ajcxy, etz yi' ymic'ajt yajpatp ma nidüg'óciy ajcxy yjot yhuinma'ñ.

⁷ Dios may'ajt oy'ajt ti tuñ miid nidüg nidüg iich ajt co Cristo xymooyim mic'ajt, jigix jébi nidüg nidüg tuunipy Dios ytung nej ypadyi. ⁸ Paady ycixp jaybety ymiñ ma Dios jadu'n ymina'ñ:

Co Cristo ypättigiy tzajpjoty, chi ymiidpättigiy may machjäy, e nañ jadu'n Cristo moy jäy ajcxy mic'ajt (dones).

⁹ ¿Nej co jadu'n Dios y'ayuc ymina'ñ co je Cristo ypättigiy tzajpjoty? Hue' je' jadu'n ymina'ñ miid co je Cristo jayijp ycidacy etz ooy ayooy ya naax-huiñgixy. ¹⁰ Je Cristo yi' je' huidibi cidaac ya naaxhuiñ choon' tzajpjoty, nañ jadu'n ypättigiy jadüg'oc tzajpjoty jactim'o'c'am. E yi' je' ymic'ajt yajpatp ma tüg'óciy huidijaty jiiy tzajpjoty etz tüg'óciy huidijaty ya naaxhuiñ. ¹¹ Je Cristo ymoogixyp nidüg nidüg yi' ytumbi mic'ajt. Nijéjity moogixy mic'ajt jébi nidiy'ajt'ájtigixy co je' je' je' Cristo. Nijéjity moogixy mic'ajt jébi najtzcapxiiygixy Dios y'ayuc. Nijéjity moogixy mic'ajt jébi capxhuáccixy yi' y'ayuc. Nijéjity moogixy mic'ajt jébi capxhuijicixy yi' mibijcpidijc miid Dios ytiy'ajt. Nijéjity moogixy mic'ajt jébi yaj'ixpijccixy Dios ytiy'ajt. ¹² E jadu'n je Cristo mic'ajt moydaaygixy yi' yjäy, e jadu'n yajni'ixiydaaygixy miid ytung ycixpi. E miid yi' ajcxy ytung yjacyujcpedipy yi' mibijcpidijc y'ixpijcin, ixti mabaad jac miid'adipy ajcxy Cristo y'oy'ajtin. ¹³ Jadu'n Cristo mic'ajt xymooyim, jigix jébi nidüg'óciy iich ajt ytügiyim nmibijcin, etz nañ jadu'n quipxyjaty n'ixpijctaayim Dios y'ung y'ayuc ytiy'ajt. E jadu'n nmi'ijtim cixy ca'pxy njot nhuinma'ñ, nmi'ijtim Jesucristo ytiy'ajt cixy ca'pxy. ¹⁴ Ca' n'idaanim miid ajt nhuinma'ñ nej pi'ctijc yhuinma'ñ ymiidity. Je pi'ctijc ajcxy janam jadozic yhuinma'ñ ytigajtzixy. Jadu'n ajcxy nipaady nej je miy' huidibi je poj yajpojmiyib yajpojxiy. Co cixy ca'pxy nmiid'ajtim Cristo ytiy'ajt, ca' pinjaty xyhuin'anim miid huing ayuc oymibijcniip huidibi ca' yjanchity. ¹⁵ Hue' janchity ngapxim je tiy'ajt tiybi miid tzojcin jihuiyin, jaydēbi njacyeecim ajt nmibijcin etz njacnejhuuiyim tüg'óciy Cristo ytiy'ajt jadu'n nej ytuuñ ya naaxhuiñ, je Cristo huidibi nigohuajc'ajtp tüg'óciy mibijcpidijc. ¹⁶ Cristo etz je mibijcpidijc nipatp nej tüg' ninicx. Cristo ñipatp nej je ninicx cohuajc huidibi ane'mb etz mic'ajt mooyb je ninicx. Etz yi' mibijcpidijc ñipatp ajcxy nej je ninicx huidibi Cristo y'ane'myb etz mic'ajt möy. Ma Cristo tüg'óciy mibijcpidijc mic'ajt patcixy huidibi yajtügiiyip ajcxy ymibijcin etz nañ jadu'n yaj'ijtigixy tügmucy. Nidüg nidüg mibijcpi ymic'ajt patcixy ma Cristo, jébi tungixy Cristo ytung nej ypadyi. E jadu'n yeeccixy nidüg'óciy ma ajcxy ymibijcin, etz nañ jadu'n jayyeeccixy chojcin yjihuiyin miid ymiügütijc.

Je jemybi jugy'ajt huidibi nbaatim ma Cristo

17 Paady ycixp nnimäyich miich ajcxy etz nyajnübijccixy müd ajt nhuindzin Jesucristo ycötujcin, co ca' huaad mdungixy loci huinma'n huidibi ca' choubaady ma Dios, jadu'n nej jacjadyii jäy ytungixy huidibi ca' mijpidaaccixy ajt nHuindzin Jesucristo. 18 Ca' huaad mdzinaaygixy jadu'n nej jacjadyii jäy ajcxy chinäy müd loci huinma'n. Ca' ajcxy yajpaady ma Dios, je huidibi jugy'ajtin yejcp huinixibi. Ooy ajcxy yjotjuuñity, ca' ajcxy ixpigaangixy Cristo ytiy'ajt. 19 Ca' ajcxy ti tzo'ydu'n jihuüy co ytundigooygixy. Ooy ajcxy minicxnajccixy yi jibic-huinma'n. Ooy ajcxy nijot'ajtcixy mijcajee co túngixipy tüg'ócüy tijaty jibic-huinma'n. 20 Per miich ajcxy ca' ti m'ixpijccixy loci huinma'n etz jibic-huinma'n co ti m'ixpijccixy Cristo ytiy'ajt, 21 pen janch miich ajcxy ti mmidoogixy yi' y'ayuc, pen ti m'ixpijccixy je tiy'ajt huidibi yajpatp ma Cristo. 22 Ti miich ajcxy m'ixpicy co copicy m'ixmájtzcixipy yi jibic-huinma'n nej anajty mnijot'ajtcixy jibicpi jayjip ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy müd je jibicpi huidibi anajty ajcxy mnijot'ajtcixyp, ci'm anajty mnayhuin'ünigixy. 23 Ixmajtcix jibicjot jibic-huinma'n. Pidaaccix mjot mhuinma'n co mguydunaangixy Cristo ytiy'ajt jemybi. 24 Müd'ajtcix jemybi jot jemybi huinma'n com Dios ti yajtigajch huinjemy ajcxy mjot mhuinma'n müd tudägy'ajtin etz huädz'ajtin.

25 Paady ycixp ca' huaad m'indaaccixy, nidüg nidüg cápccix huidibi janchip müd migügtijc, müd co quipxyjaty nyajpaatim ma Jesucristo.

26 Pen miich ajcxy mnijotma'tpy yi mmigüg, ca' mmigüg migapxtigooygixy midundigooygixy, mic'amy ajcxy mjäy digooygixipy yi mjotmädi yajjip ca'ni anajty xi ycidacyñi. 27 Ca' mnayyéjicigixy ma je mujcu' co je mujcu' xymimadägipy.

28 Yi jäy ajcxy huidibi meetzcixp, huen ixmajtcixy meedzäi, etz ijxtähuipy ytung. Co ytunipy ma ci'mdung jëbi pubedipy ajcxy ymigügtijc huidibi yajmayajtcixp tijaty.

29 Ca' mgápccixipy jibic ayuc. Cápccix oy ayuc huidibi jëbi migüg ajcxy jäy gidaaccixy, huidibi pubejtp etz yajyeegy je mibijcin, huidibi yejcp oy'ajtin ma pin ajcxy amido'ijtp. 30 Ca' huaad mgapccixy mmaydaaccixy ayuc huidibi yajjotmaybijcp je Espíritu Santo huidibi Dios yjé'ajtpy. Je Espíritu Santo huidibi miich ajcxy müd ma mjot mhuinma'n, yi' je' huidibi tiy'ajt yejcp co miich ajcxy Dios yjäy'ajtigixy, co anajty Cristo ymiñ ya naaxhuñ jadüg'oc huin'it mbadaangixy jugy'ajtin etz tzinaayin huidibi ca' ycixipy ytigoyipy ni mina.

31 Yajqueeccix yi jibicpi ma ajcxy mjot mhuinma'n, jadu'n nej co mjot mhuinma'n ta'm mjuhüiygixy, jadu'n nej co tzojc mjotma'tcootcixy, jadu'n nej co mnaymijotmá'tigixy, jadu'n nej co mnayhuin'ójigixy nayjijp'ójigixy. Ca' huaad mmigüg mnigapccixy mni'ojüygixy. Ca' jibicpi mnijot'ajt'adütcixy müd ajcxy mmigüg ycixpi. 32 Hue' janchtiy oybi mhuinmáaygixipy müd mmigüg ajcxy ycixpi. Nayba'ayóohuigixy nidüg nidüg. Nayméecigixix nidüg nidüg. Com nañ jadu'n Dios ti huinmecxy miich ajcxy mbocy müd co myajpatcixy ma Cristo.

5

Nej jëbi chinaaygixy yi Dios yjäy ajcxy

1 Com miich ajcxy ñipatpy nejjihuüy Dios y'ung'ajtigixy, e Dios ooy xchojccixy xyjihüiygixy, paady copicy naychójicigixy nayjihüiygixy miñ xyipy,

jadu'n nej Dios ti xychojccixy ti xyjihuuigixy. ² Jabom jabom ma mdzinaayin naychójcigix nayjihuuigix nidüg nidüg, tím jadu'n nej Cristo xychojcim xyjihuuim, e yjugy'ajt yejcy müid ajt nbocy ycixpi, e jadu'n Dios jäygidacy nej Cristo ytuñ.

³ Müid co müich ajcxy Dios xyjäy'ájtigixy, paady tzinaaygixy müid huädz mjot mhuinma'ñ. Ca' huaad m'oc'ibáatcixyñi m'occapxpáatcixyñi yi töxyjäy migapxtigoyii, etz yi jibic ayuc capxi, yi jibic-huinma'ñ nijot'adi etz yi meen'adzogii. ⁴ Müid co mDios müich ajcxy xyjäy'ajtp, paady ycixp ca' huaad mgápccixipy ayuc huídibi tzo'ydu'n yejc, ni ca' huaad mgápccixipy huíd ca' y'oyjäygidaacnity, etz ni ca' huaad mguxiiccixy m'aniidaaccixy, com yi jibic ayuc ca' Dios jäygidägy. Tzoc yajnaxim jäygidacnity ma Dios com Dios ti xyajhuuazim ajt njot nhuinma'ñ. ⁵ Janch tiy'ajt jada co pinjaty tundigooyb müid huangbi töxyjäy, pinjaty jibic-huinma'ñ müid, ca' ajcxy padaangixy pidägy etz oy'ajtin ma Cristo etz ma Dios y'ane'min. Pinjaty meen' adzojcp, Dios ca' tzocy, tím jadu'n nej yi' ca' tzocy pinjaty ojadajtp tzaadzech etz quipychech. ⁶ Ca' mnaayéjcgixy co jäy ajcxy xyhuin'ingixipy müid ayuc huídibi ca' ytiy'ajtity ca'p choubaady. Müid co jäy ajcxy capxcixy ayuc huídibi ca' ytiy'ajtity, paady ycixpi Dios tzaachytuna'ñ tüg'ócicy jäy ajcxy huídibi capxycómidodacp yi' y'ayuc. ⁷ Ca' huaad müich ajcxy mnaymigüg'ájtigixy, ca' müid mnayyöymújcgixy yi jadu'mbi jäy ajcxy huídibi ca' capxymidoogixy Dios.

⁸ Jayjip ca'ni anajty mmibjccixy Cristo, ca'ni anajty Cristo ytiy'ajt ajcxy mnejhuüy, e jadu'n nipaady anajty nej jihuiy myajpaady ajcxy agootztuum. Jadachambi mnejhuüygixyp Cristo ytiy'ajt, e jadu'n nipaady nejjihuiy mdzinaaygixy ma tüg tücxin. Paady ycixp jatym cuydungixyp Cristo ytiy'ajt ma yi mdzinaayin mjogy'ajtin ajcxy, jadu'n nej jébi huaad quéxigy co mmibjccixy Cristo. ⁹ Co nmüid'ajtim Cristo ytiy'ajt, chi nduunim huídibi y'oyip, huídibi tudägyip, huídibi tiy'ajtip. ¹⁰ Ixpjccix je tiy'ajt huídibi Dios yjäygidacpy. ¹¹ Ca' müich ajcxy mnaymigüg'ájtigixy müid yi jäy ajcxy huídibi yajpatcixp agootztuum, huídibi tungixy huídibi Dios ca' jäygidägy. Müich ajcxy capxhuijcx müid Dios ytiy'ajt yi' ajcxy huídibi agootztuum tzinaayb. ¹² Tzo'yduunim ajt co jay nigapxcixy nimiydaaccixy je jibicpi huídibi ajcxy ytumyb ayüch ameech. ¹³ Co n'ixquipxim yi jadu'mbi jäy ajcxy ayuc müid Dios y'ayuc, chi niguéxigy pen janch tiy'ajt o pen ca' ytiy'ajtity, jadu'n nipaady nej ti najypidzimim je ajcxy ayuc ma yi agootztuum, etz nbidaacim ma yi tücxin. ¹⁴ Paady ycixpi Dios y'ayuc jadu'n yminañ:

Mäyhuijip müich ajcxy huídibi jadu'n nipatp nejjihuiy mdzachmaagixyp.

Jugypjccix müich ajcxy huídibi jadu'n nipaady nejjihuiy ti m'öccixy.

Cristo xycodüxcixipy müid yi' ytiy'ajt.

¹⁵ Paady naygüend'ájtigixy huídibi tiy'ajt yajtungixp ma yi chinaayin. Tzinaaygix jadu'n nejjihuiy mnejhuüygixy Cristo ytiy'ajt, e ca' mdzinaaygixy jadu'n nej huídibi ajcxy ca' nejjihuiygixy Cristo ytiy'ajt. ¹⁶ Ni'ix'ijtcix jabom jabom jébi mgyudungixy Cristo ytiy'ajt. Jadachambi xi tiempo mayjäy ytundigooygixy müid Cristo ytiy'ajt. ¹⁷ Ca' loci huinma'ñ myajtungixy, per nejhuiygixyp nej Dios tzocy co mdúngixipy. ¹⁸ Ca' huaad m'ijtcixy amügy jäy, com yi jocni xyajncxcixipy ayo'nduum. Nigi oy m'ijtcixy Dios yjihui'ñ ymic'ajt may'amy ma ajcxy mjot mhuinma'ñ. ¹⁹ Naymigápccixigy miñ xyipy müid yi salmo ayuc, müid yi himnos. Huin'ügix Dios müid je iy huídibi je Espiritu

Santo xymooygixyp. Huin'igix etz ojadajtcix Dios cixyot huinijot. ²⁰ Jatyim yajnaxcixy jabom jabom jäygidaacın ma ajt nDios Teedy ma ajt nHuindzin Jesús yxii, miid tüg'ócıy cıxıpi nej ndunim n'ayoohuim.

Nej huaad chinaaygıxy pinjaty picychinaaygıxy

²¹ Miid co miich ajcxy mhuindzigıy Dios, paady ycıxp miich ajcxy mnayyajmıj'ajtigıxy mnaygapxymıdoohuıgıxy miñ xyıpy.

²² Miich ajcxy töxyjäydıjc yajmıj'ajtcıx capxymıdoogıxy yi mñäy ajcxy, tim jadu'n nej myajmıj'ajtcıxy mgapxymıdoogıxy ajt nHuindzin Jesucristo.

²³ Com je töxyjäy ñäy nigohuajc'ajtp ma ytöxyıjc ymiñ, tim jadu'n nej Cristo nigohuajc'aty ma yi mibıjcpıdıjc ymiñ. Yi Cristo yi'je' huidıbi nihuänamb yajnädzögamb yi mibıjcpıdıjc. ²⁴ Tim jadu'n nej yi mibıjcpıdıjc capxymıdoogıxy Cristo, nañ tim jadu'n tzocy co je töxyjäy ajcxy capxymıdooğıxıpy yi ñäy ajcxy.

²⁵ Nañ jadu'n tzocy co je yëydıjc huen tzocy jıhuıy ytöxyıjc, tim jadu'n nej Cristo tzocy jıhuıy yi mibıjcpıdıjc, e paady ycıxp yejc yi' yjygy'ajtin miid yi' ajcxy ycıxpi. ²⁶ Cristo yejc yjygy'ajtin miid je mibıjcpıdıjc ycıxpi, jıgıx jëbi huınmecıxy ajcxy ypocy, yajhuaatzip ajcxy yjot yhuınma'ñ. Cristo yajhuaatzi yi mibıjcpıdıjc ajcxy yjot yhuınma'ñ miid yi'y'ayuc etz co niıbejt ajcxy miid niı.

²⁷ Jadu'n Cristo yajhuäch yi mibıjcpıdıjc ajcxy yjot yhuınma'ñ, jıgıx jëbi ajcxy nayguëxıgııyb ma yi' yhuıduu miid huädz yjot yhuınma'ñ. Je mibıjcpıdıjc ajcxy nıpaady nej tüg nıjen huidıbi huädzip, ca' ma ytıjy ymächıty. ²⁸ Jadu'n tzocy co je yëydıjc huen tzocy jıhuıy ytöxıjc tim jadu'n nej cı'm naychogyıı. Yi yëydıjc huidıbi tzojcp jıhuııyb ytöxyıjc nañ jadu'n cı'm ñaychogyıı. ²⁹ Ca' jı ni pin huidıbi ca' ñaychogyıı cı'm. Hue' janchtıy ycuend'ajtpy etz yajcüxyıı yajpedyıı ycı'm nıñıcx, tim jadu'n nej jäy ajcxy cuend'ajtcıxy ycı'm ñıñıcx nañ tim jadu'n Cristo ycuend'ajtpy yi mibıjcpıdıjc. ³⁰ Jadu'n Cristo cuend'ajtpy yi' yjäy, com jadu'n ajcxy nıpaady nej yi' ñıñıcx. ³¹ Com copıcy je yëydıjc tzogıp jıhuıhuıp ytöxyıjc jadu'n nej Cristo tzocy jıhuıy yi mibıjcpıdıjc. Paady ycıxp je yëydıjc ıxmadzıpy ytaj yteedy, e ypodıgıhuıpy ytöxyıjc, e jadu'n ajcxy çınähuıpy nej jıhuıy ytügpajcıty. ³² Ooy çachmıjhuınma'ñıty jada tıy'ajt huıdıbi yüch anajty ijtp, e yi' ñch jadu'n tıjpy yi' Cristo etz je mibıjcpıdıjc. ³³ Cuendıpjıccıx jada tıy'ajt co nidüg nidüg miich yëydıjctıjc ajcxy huıdıbi pıjccıxp copıcy mdzogıpy mjıhuıhuıpy ajcxy mdöxyıjc, tim jadu'n nej cı'm ajcxy mnaychogyıı, e nañ jadu'n copıcy co nidüg nidüg töxyjäydıjc yajmıj'adıpy ñäy.

6

¹ Pı'ctıjc ajcxy huıdıbi mibıjcp Jesucristo, copıcy mgapxymıdoohuıpy ajcxy mdaj mdeedy, com tıy'ajt jadu'n. ² Yi Dios ycötujcın huıdıbi mınaamb: "Yajmıj'ajtcıx mdaj mdeedy", yi' ooy ytımycopıcyıty. Nañ jadu'n co nguyduunım jada cötujcın, huın'ıt Dios jecy xyajtzınaayım. ³ Co miich ajcxy jadu'n myajmıj'adıpy mdaj mdeedy, huın'ıt Dios xymöhuıpy ajcxy jotcujc'ajtin, e nañ jadu'n xyajtzınaaygıxıpy jecy ya naaxhuıñ.

⁴ E miich ajcxy huıdıbi ungededy'ajtcıxp, ca' nigoo myajjotma'tcotcıxy yi m'ung ajcxy. Ane'mgıx yajyeccıx yi m'ung ajcxy miid Dios y'ayuc ytıy'ajt, jaydëbi capxymıdooğıxıpy ajcxy Dios.

⁵ Miich ajcxy huıdıbi tumbı'ajtp ya naaxhuıñ, capxymıdoogıxy yi mhuindzin ajcxy, etz tungıx miid tudägy'ajtin, etz yajmıj'ajtcıx etz tzigıyıgıx. Tim jadu'n nej jıhuıy mgapxymıdoogıxy yi mHuındzin Jesucristo.

⁶ Tungix yajxon müd ajcxy mhuindzin. Ca' janch xypaat oy mic mduungixy co ajcxy mhuindzin jim xyhuindicxcixy, e chi co je' yjihuäcni, chi nigoo mhuäccixni mdinaaygixni. Tungix jadu'n nej huaad jäy ytuungixy yi huidibi mijpidaaccixp Jesucristo. Tungix cixygot huinjot jadu'n nej Dios tzocy mdungixipy.

⁷ Tumbidijc ajcxy, tungix mdung cixygot huinjot, tim jadu'n nej jihuiy mdungixy je Huindzin Jesucristo ytung, e ca' yjäydungity. ⁸ Mnejhuuyb miich ajcxy co ajt nHuindzin Jesucristo oybi möhuañ nidüg nidüg jadu'n nej ti ytuuñ, ca' ñejity pen yci' mdung ytumy, o pen ytumb müd tüg huindzin.

⁹ Miich ajcxy huidibi nihuindzin'ajtp tumbidijc, oy' amy ane' mgix mdumbi ajcxy. Ca'm' adzigiygixipy ca' mdzaachytungixipy. Ajihuuyigixy co miich ajcxy etz nañ jadu'n mdumbi ajcxy müd ajcxy mHuindzin tzajpjoty, e yi mHuindzin tzajpjoty pi quipxyjaty tiydunañ nidüg' öciy miich ajcxy.

Je mic'ajt huidibi je mibijcpidijc ajcxy ypatcixyp müd Dios yjihuiñ

¹⁰ Jadügnax, migügtijc ajcxy, yi mmic'ajt mbaadip ajcxy ma ajt nHuindzin Jesucristo. Com Jesucristo ooy mic'ajt müdity, paady jëbi miich ajcxy mbatcixy yi mmic'ajtin ma yi'. ¹¹ Naygohuaanigixy miich ajcxy ma je mujcu' müd tüg' öciy tiy'ajt huidibi Dios xymooyim, huidi müd naygohuaanim ma je mujcu', e jadu'n ca' ydi je mujcu' xymimadaacim müd ani. Jadu'n Dios ytiy'ajt nipaady nej tujt etz pujxnijen huidibi soldados ajcxy müd naygohuaangixy tzipjoty. ¹² Hue' janchtiy xymidzip'ajtim poj naaxhuiñ, ca'oybi, mujcu'dijc, etz tüg' öciy mic'ajt müdipi huidibi midzip'ajtp Dios ya naaxhuiñ etz jilby tzajpjoty, ca' p' ich ajt nmidzip'ajtim naaxhuiñyjäy. ¹³ Paady ycixp yajtungixy tüg' öciy mic'ajt etz tiy'ajt huidibi Dios ti xymooyigixy, jigix jëbi mmimadaaccixy je ca'oybi co anajty xyajtungiyogaangixy. E jadu'n jëbi mmimadaaccixy je ca'oybi müd ajcxy mmibijcin. E co anajty ti mmimadaacciaaygixy, huin'it m'ijtcixipy mic ma ajcxy mmibijcin. ¹⁴ Ca' m'ixtigihuaäcxi ma ajcxy yi mmibijcin. Nayñi'ixiiyigix müd Dios ytiy'ajt, jadu'n nej jäy ajcxy ñayhuindädzigixy co ytunaangixy. Nayñi'ixiiyigix tim jadu'n nej soldados ajcxy ñayñi'ixiiyigixy müd pujx nijen ma caach co chiptunaangixy. ¹⁵ Nayñi'ixiiyigix müd Dios y'ayuc, jigix jëbi ajcxy nicxy mgapxhuäcxi Dios y'ayuc huidibi jotcuje'ajtin yejcp. Co jadu'n mdungixipy, jadu'n nibaadip tim jadu'n nej soldados ajcxy ñayñi'ixiiyigixy co yajtigiyigixy yzapat co ytüyöyaangixy. ¹⁶ Yi' huidibi jac copicyip ca' ydi jac ni ti, mibijccix tiydudägy Jesucristo. Müd ajcxy yi mmibijcin jëbi mnyagohuaanigixy ma je mujcu'. Miich ajcxy mmibijcin jadu'n nipaady nej tüg escudo huidibi je soldados ajcxy yajtumy co ñaygohuaanigix ma je tip huidibi yajnajtztihiiyb müdi jin. ¹⁷ Nayñi'ixiiyigix müd Cristo ytiy'ajt huidibi müd ajcxy m'alma xyajnidzoocip, tim jadu'n nipaady nej soldados ajcxy ñaygohuaanigixy co pidaaccixy ypujx cöjup co chiptunaangixy. Naygohuaanigix miich ajcxy müd Dios y'ayuc huidibi jadu'n nipatp nej tüg espada huidibi je Espiritu Santo ti xymooyigixy. ¹⁸ Mibijctzoogix Dios müd tüg' öciy ycixpi huidibi ajcxy mdumy. Mibijctzoogix etz pijctzoogix may'ajt ma Dios jabom jabom müd je Espiritu Santo ypubejtin. Huijy ycuje m'ijtcixipy, ca' m'jotmetzciiyigixipy. Mibijctzoogix Dios müd tüg' öciy mibijcpidijc ajcxy ycixpi. ¹⁹ Nañ jadu'n mibijctzoogix Dios müd ich ycixpi, co huen xymöyich ayuc etz jotcuje'ajtin, jigix jëbi ngapxhuäcxi bich huinmic jotmic yi' y'ayuc ytiy'ajt huidibi ca' pin jecy'ajty nejhuuyigixy. ²⁰ Dios ti xyajni bicyich jada tung jëbi nyajnicxyich

yi' y'ayuc ytiy'ajt ma je mayjäy ajcxy. Paady ycixp nyajpaadyich pu-jxtigoty cham. Tungix may'ajt mibijctzoogix Dios müd üch ycixpi co xya-jjotmicpigipyich jigix jëbi ngapxhuäcxyich yi' y'ayuc huinmic jotmic.

Capxpooxïn huidibi cogixiyñip

²¹ Ooy ndzocy njihuïyich je Tiquico, nañ jadu'n yi' ooy xypubejtyich ma ajt nHuindzin Jesucristo ytung. Yi Tiquico müch ajcxy xyajmüdmüydägipy tüg'óciy je tiy'ajt nej nyajpaadyich ya, etz tüg'óciy tung huidibi ya ndumybich.

²² Nguexaamybich Tiquico ma müch ajcxy jigix jëbi xymüdmüydägipy ajcxy jadu'n nej nyajpaadyich ya, e müd jada tiy'ajt jëbi müch ajcxy mjotcugüygixy.

²³ Huen Dios Teedy etz ajt nHuindzin Jesucristo may'ajt tunipy müd müch ajcxy, jigix jëbi jotcujc mdzinaaygixy, etz nañ jadu'n jëbi mnaychójcigixy mnayjihuiygixy miñ xyipy, etz jigix jëbi mjacmibjccixy Cristo. ²⁴ Huen Dios may'ajt oy'ajt tunipy müd müch ajcxy huidibi yajmij'ajtcixp ajt nHuindzin Jesucristo huinixü huinitempo. E ca' m'ixmájtzcixip nimina nej ajcxy mijpidaaccixy Jesucristo. Jadu'n jada. Amén.

FILIPENSES

Yi Necy Huidibi San Pablo Yajniguejx Je Mibijcpidijc Jim Filipos

¹ Ich Pablo mid Timoteo tumbich ma Jesucristo ytung. Jada necy ich ajcxy nguejxpy ma tug'ociy huidibi mibijcp Dios jim Filipos huidibi yajpaatp ma Jesucristo. Nañ jadu'n jada necy nyajniguesyich yi' ajcxy miltungmidpi etz mutztungmidpi ma Dios ytung. ² Huen ich ajt nDios Teedy etz ajt nHuindzin Jesucristo may'ajt etz oy'ajt tunipy mid miich ajcxy ycixpi etz xyajjotcugiygixipy.

Pablo mibijctzoy Dios mid je mibijcpidijc ycixpi

³ Naag'oc naag'oc njäyemehich miich ajcxy njatytimyajnaxpyich jäygidaacin ma Dios mid miich ajcxy ycixpi. ⁴ Njatytimjotcuje'ajtpich ooy naag'oc naag'oc Dios nmibijctzooyich mid miich ajcxy ycixpi. ⁵ Jotcuje'ajtpich com miich ajcxy ti xypubéjtcixyich co ngapxhuäcxich Jesucristo y'ayuc ytiy'ajt. Jadu'n ti xypubéjtcixyich maabi nyajtzondägyich ngapxhuäcxich Jesucristo y'ayuc ixti chambaad. ⁶ Nejhuüybich tündädgy co Dios ti yajtzondägy yi oyb ytung ma miich ajcxy mjot mhuinma'ñ, etz jactunaamn ma miich ajcxy mjot mhuinma'ñ ixti mabaad Jesucristo anajty ymiñ jadug'oc ya naaxhuiñ mid y'ane'min etz ymic'ajt. ⁷ Ooy ytudägyty co jadu'n jotcuje'ajtpich mid miich ajcxy ycixpi, com ooy ndzocy njihuüyich miich ajcxy. Dios may'ajt oy'ajt ti tuñ co ti xyajnbicyich jada tung, etz miich ajcxy myajpaady quixpy mid ich ma Dios ytung, mid co miich ajcxy xyjäyemehich etz nañ xypubetyich ajcxy, huenma'amy ich nyajpaady, oy ixypy pujxtigoty, oy ixypy ma tungmidpi yhuinduu co nnigapxpetyich Dios y'ayuc ytiy'ajt etz nañ nnigapxpetyich co yjanchity. ⁸ Dios nejhuüyb jadu'n nej mijcajee ooy ndzocy njihuüyich miich ajcxy mid je tzojcin jihuiyin huidibi Jesucristo ti xymöyich. ⁹ Nmibijctzooybich Dios mid miich ajcxy ycixpi co xypubedipy ajcxy jigix jëbi nigi mdzogipy mjihuühuipy migütjic, etz jigix ajcxy nigi m'ixpigipy je tiy'ajt tudägyti, etz nañ nigi mhuinjihuühuipy tug'ociy nej Dios tzocy co nduunim. ¹⁰ Nañ nmibijctzooybich Dios mid miich ajcxy ycixpi jigix jëbi mnejhuüygixipy, etz nañ jigix jëbi mhuin'ixcixipy huidibi jac'oy mdünggixipy. Co oy mdünggixipy, huin'it jëbi mdzinäygyx mid huädz jot huädz huinma'ñ, e ca' ni ti jotmay miich anajty ajcxy mmidiñ, co anajty je xii je tiempo paady co Jesús anajty miñ ya naaxhuiñ jadug'oc mid y'ane'min mid ymic'ajt. ¹¹ Dios nmibijctzooybich mid miich ajcxy ycixpi co ajcxy mbattähuip tug'ociy oyjot oyhuinma'ñ, je oyjot oyhuinma'ñ huidibi Jesucristo tügpajc jëbi xymoogyx. E jadu'n jäy ajcxy capxpaadip Dios etz nañ huin'ügixip Dios co ajcxy ixypy nej tudägy mdzinaaygyx.

Mid ich, yi njugy'ajtich, yi' yi' Cristo

¹² Ndzojcypyich co miich ajcxy mnejhuühuipy co mid je tzaachypi ycixpi huidibi nminaxpy nyajnaxpyich ya pujxtigoty, nigi mayjäy ti midoy Jesús y'ayuc ytiy'ajt. ¹³ Jadu'n ti yhuimbizimy co tug'ociy soldadtijc etz jacjadyii jäy ya ma je gobierno ymijtijc ti nejhuüydäy ajcxy co nbujxtijc'inäyich mid co nduunich ma Jesucristo ytung. ¹⁴ Nañ jadu'n mid co nbujxtijc'inäyich, paady

ycixpi yi jacjadyii mibijcpidijc ti yjotmicpijccixy ma ajt nHuindzin Jesucristo tung, etz ycapxhuäcxy'adiichpy ajcxy Dios y'ayuc ytiy'ajt, ca' ma tzigi'n jihui'n.

15 Janch tiy'ajt jada co nijëjity jäy capxhuäcxy je Cristo y'ayuc ytiy'ajt müid co ca' xyajmidzocjccixy, etz nañ müid co xyajmidzip'ajtcixy. Nañ tiy'ajt jada co jacjadyii migügtijc xychojcp xyjihuiyb ajcxy, e capxhuäcxy ajcxy je Cristo y'ayuc ytiy'ajt müid oyjot oyhuinma'n. 16 Janch tiy'ajt co nijëjity migügtijc capxhuäcxcixy Jesucristo y'ayuc müid co ñaygömaya'nyii ci'm, ca' nmänaanim ycapxhuäcxcy ajcxy cixyjot huinijot. Yi' ajcxy y'ixtaayb nej xyajtajipy xyajmayipyich, jadu'n nej ich pujxtigoty n'ityich. 17 Yi' ajcxy huidibi xychojcpich xyjihuiybich ycapxhuäcxcy ajcxy Cristo y'ayuc com ñejhuiyb ajcxy co ich yam n'ityich pujxtigoty, müid co ti nhuinma'n nbidägyich co nnägapxpeda'ñich Jesucristo y'ayuc ytiy'ajt. 18 Pen jäy ajcxy capxhuäcxcy Cristo y'ayuc müid co ñaygömaya'anigixy ci'm, o pen ycapxhuäcxcy müid oyjot oyhuinma'n, ca' ñejity, jotcujc'ajtpich co capxhuäcxy ajcxy Jesucristo y'ayuc.

19 Com nnejhuiybich co müich ajcxy mmibijctzoogixy Dios müid ich ycixpi, e nañ nnejhuiybich co Jesucristo yjihui'n ymic'ajt xypubetyich, paady nigi njotcugiyich, e nañ njijp'ijxpyich co nbidzima'ñich pujxtigoty. 20 Ndzocjpyich etz nañ njijp'ijxpyich co nmimadactähua'ñich tüg'öciy ma ich mdzinaayin, e ca' ti tzöydu'n nbäadibich ma Dios yhuinduu. Ndzocjpyich nañ njijp'ijxpyich co njaccapxhuäcxcibich Jesucristo y'ayuc huinmic jotmic, jigix Jesucristo ycömay'idipy. Ca' ñejity pen jactzinaayb, o pen n'o'cpich. 21 Ich ndzinaayin njuugy'ajtin Cristo yi' ycixpi, e peni n'o'cpich, ti ich anajty mij nmadägy. 22 Pen njactzinaaybich, mayjäy oybi pada'n müid ich ndung ycixpi. Ca' nnejhuiybich huidibi jac'oy nhuin'ixipyich co tzojc n'ögibich, o co njactzinähuibich. 23 Ooy chachchipity nnejhuiybich huidibi jac'oy nhuin'ixipyich, e ca' n'ögibich, o co njactzinähuibich. Ich ci'm nayjihuiyijich nigi jotcujc co ixypy tzojc n'ögyich, jigix ixypy mic'amy nicxy n'ityich jiiyby tzajpjoty ma Cristo yajpaady. 24 Per jaccopity müid müich ajcxy m'oy'ajtin ycixpi, co njactzinähuibich. 25 Com nnejhuiybich co copicy njacpubeda'ñich müich ajcxy, paady nnejhuiybich co njactzinähuibich, e jigix jëbi nbubejtcixy ma Dios ytung etz ma yi mmibijcin. E jadu'n müich ajcxy nigi jotcujc'adipy ma mmibijcin. 26 Müich ajcxy huidibi yajpaatp ma Jesucristo, nigi jotcujc m'idipy co nicxy n'ida'ñich jadüg'oc ma müich ajcxy.

27 Jëyi janchtiy co mdzinaayin mjugy'ajtin mi'ijtcixy jadu'n nej Cristo y'ayuc ytiy'ajt y'ane'my. Pen nicxpich anajty ci'm ma müich ajcxy, o pen ca' nnicxyich, per ndzocjcpich co xypäadibich tiy'ajt co müich mic m'ijtcixy ma mmibijcin, tú'ciy cixyjot huinijot mdungixy. Mic mjanchmidinaaygixy ni'amugi' yi mmibijcin, jadu'n nej ti mmijpidaaccixy Jesucristo ytiy'ajt, 28 e ca'ajcxy mdzigihuij co jäy ajcxy xymidziptzöongixipy, jada je' tiy'ajt co tigoyamb ajcxy y'alma, e nañ jada je' tiy'ajt co müich ajcxy chóocixipy yi m'alma, e nañ jadu'n jada tiy'ajtp co Dios y'ity müid müich ajcxy. 29 Dios may'ajt oy'ajt ti tuñ müid müich ajcxy ycixpi co yaj'oyiy nej jëbi müich ajcxy mibijccixy Jesucristo etz nañ nej jëbi tzaachypí mminajxcixy myajnajxcixy müid Jesucristo ycixpi. 30 Ich etz müich ajcxy quipxyi ti nminajxim ti nyajnajxim tung ayo'n müid Jesucristo ycixpi. Müich ajcxy ti m'ixy ti mnejhuij jadu'n nej ich ndung n'ayo'n ti nminaxy ti nyajnaxyich, co jim anajty n'ityich ma müich ajcxy. E nañ müich ajcxy mnejhuiyb nej ich chambaad nminaxy nyajnaxyich ndung n'ayo'nich müid Cristo ycixpi.

2

Cristo yung'ajt ñax'ajt etz ymij'ajt

¹ Pen Cristo miich ajcxy m jot'amijmooyb miid yjihui'ñ miid ymic'ajt, pen ti jotcujc'ajtin mbatcixy miid co Cristo xychojccixy xyjihui'ygixy, pen yi' yjihui'ñ ymic'ajt ijtp ma miich ajcxy, pen mdzocccixyp mjihui'ygixyp etz nañ mba'ayoogixy migügtijc, ² jotcujc'adipich miid co mdzinaaygixy ooy yaxon, xic xon, tügyi mnaychójcigixy mnayjihui'ygixy miñ xyipy, tzinaaygixy quipxyjot quipxyhuinma'ñ. ³ Ca' ajcxy ti mdunipy miid mgi'mdzocin ycixpi. Nañ ni ca' amij agix naybidáacigixy co ti mdungixy. Tüg'óciy huidibi mdungixyp, mdunipy ajcxy miid yung naxy m jot mhuinma'ñ. Nidüg nidüg myajmij'adipy nigü migügtijc, ca'ydi nej miich ci'm mnayajmij'adyii. ⁴ Ca' huaad pin naydügpajc yci'm'oy'ajt ixtäy, nañ jadu'n tzocy co migügtijc myajmidzogipy y'oy'ajt.

⁵ Pidaaccix m jot mhuinma'ñ tú'ciy jadu'n nej Jesucristo anajty yhuinma'ñ miidity co ya naaxhuiñ chinay. ⁶ Oy Jesucristo yjaDiosity ti yhuinma'ñypidägy co jëbi ixmach yi' ymij'ajtin huidibi anajty yjamüid. ⁷ Jesucristo ahuingujc pidaaccix je mij'ajt huidibi anajty ymiid, e chi jadu'n chinay nej tüg tumbi co oy jadu'n ypi'c'aty jadu'n nej jäy. ⁸ E co jadu'n ñaybidaaci nej naaxhuiñyjäy, chi yung naxy pidacy yjot yhuinma'ñ, e nañ capxymidooy Dios ixti mibaad ñayyejci, huen jäy yaj'ögyii. E ooy anajty cho'ydu'nity co jäy yaj'o'ci cruudzciy. ⁹ Paady ycixp Dios ti cömay jacnigi Jesucristo, e ti pidäci yi' yxi jaccömay, ca'ydi jacpinjäy yxi. ¹⁰ Jadu'n Dios ti cömay Jesús, jigix jëbi tüg'óciy tzajpjoty tzinaaybi etz tüg'óciy naaxhuiñyjäy, etz tüg'óciy jäy ajcxy huidibi ti ñaaxtigiy, co anajty ajcxy nidüg'óciy midoogixy co Dios capxapaatip Jesús yxi, chi ycojxtinaay'ihuidyähuipy ajcxy ma yi' yhuinduu, etz y'ojadadipy ajcxy Jesús nidüg'óciy. ¹¹ E co nidüg'óciy ajcxy cöbigipy etz yajmij'adipy Jesucristo jadu'n nej ajcxy yHuindzin, jadu'n Dios Teedy ycömay'ida'ñ.

Yi pin ajcxy Cristo mibijcp, yi' yi' ajcxy jadu'n nej tüg tucxin jajin

¹² Migügtijc ajcxy huidibi ooy ndzocy njihu'yich, com Jesucristo jadu'n ijxpejtin ti yecy, capxymidoogich cham co jiguëgy nyajpaadyich ma miich ajcxy, tim jadu'n nej jayhuin iich miich ajcxy xycapxymidooy co n'ijtyich ma miich ajcxy. Naymijottigöoyigix jabom jabom mguydungixy Jesucristo ytiy'ajt etz mmi'ijtcix huädz m jot huädz mhuinma'ñ. Tungix Dios ytung miid yung naxy ajcxy m jot mhuinma'ñ, e huindzigi'ygix Dios. ¹³ Com Dios yi' tumb jabom jabom ma miich ajcxy m jot mhuinma'ñ, jigix jëbi miich ajcxy mdunipy yi' ytung yi' chojcin cixyjot huinijot jadu'n nej Dios tzocy.

¹⁴ Tungix cixyjot huinijot Dios ytung, ca'y'aametzity yjotmetzity, nañ ni ca' miid tzip ejcin. ¹⁵⁻¹⁶ Jadu'n mdunipy ajcxy ca'ydi pinjaty yxigixy co ti mdundigoogixy. Miich ajcxy Dios xy'ung'adiib, ca' mñigix'adiyb ajcxy ti jibicpi. Tzinaaygix miid oyjot oyhuinma'ñ ma yi' jäy ajcxy yajpaady huidi jibic-huinma'ñ tumb huidibi tundigooyb ma Dios ytiy'ajt. Co miich ajcxy myajhuäcxy Dios y'ayuc ytiy'ajt huidibi alma yjugy'ajtin mooyb ma jibicjäydijc ajcxy, jadu'n nipaady nej tüg madzä ytucxy coodz. Pen jadu'n mdungixy, co anajty Cristo ymiñ jadüg'oc ya naaxhuiñ, jotcujc'adipich co anajty nnejhu'yich co ca' iich ndung etz nxi' ndiempo yñadig'ity co n'ijtyich ma miich ajcxy. ¹⁷ Co n'ögibich miid Cristo ytung ycixpi, jadu'n nipaady nejjihu'y iich nni'py ti ndem ti nyocych miid miich ajcxy ycixpi co ti ngapx-huäcch Dios y'ayuc ma miich ajcxy. E co miich ajcxy ti mmiipidaaccixy

ñich n'ayuc, jadu'n nipaady nejjihuïy miich ajcxy ti myoxy ti mdoogy yi mjugy'ajtín ma Jesucristo. Jotcujc'ajtpich jadu'n co miich ajcxy mjugy'ajtín ti myoxy ti mdoogy ma Jesucristo. ¹⁸ Nañ jadu'n miich ajcxy mjotcujc'adipy quipxy müd ñich.

Timoteo etz Epafrodito

¹⁹ Pen ñich ajt nHuindzin Jesús tzojcpy, njjip'ijxypich co jëbi nguexipyich Timoteo ma miich ajcxy, jaydëbi njotcujc'adipyich co anajty yi' xyajnimüñich tiy'ajt nej miich ajcxy myajpaady. ²⁰ Timoteo tügpajc huidibi huinma'ñ tú'ciy müd jadu'n nej ñich nhuinma'ñ nmüidyich, etz nañ huidibi janch naybidaacip müd miich ajcxy m'oy'ajtín ycixpi. ²¹ Yi jacjadyii migügtijc huidibi yajpatp ma ñich, yajcopijcpy ajcxy yci'm'oy'ajtín, e ca' ajcxy yajcopicy Jesucristo ytung. ²² Miich ajcxy mnejhuïyb jadu'n nej Timoteo tudägy ytuñ müd ñich co ngapxhuäcxyich Jesucristo y'ayuc ma miich ajcxy, tim jadu'n nej tüg ung ytuñ müd yteedy. ²³ Paady ycixp njjip'ijxypich co jëbi nguexyich Timoteo ma miich ajcxy mina anajty nnejhuïyich nej ycixipy ñich njotmay huidibi nmüidich ya. ²⁴ Nañ nmibijcypich ajt nHuindzin Jesucristo co yaj'ahuädzip ñich nni'a ndü'a co jëbi ñich ci'm nicxy tzojc n'ixyich miich ajcxy.

²⁵ Nañ jadu'n nhuinmaayich co copicy jadüg'oc nguexipyich ajt nmigüg Epafrodito ma miich ajcxy, yi' huidibi xypubejtpich ma ndung n'ayo'nich ya. Yi' huidibi miich ajcxy ti mguexy ma ñich, jëbi xypubetyich ma tüg'óciy huidijaty nyajmayajtypich. ²⁶ Epafrodito ooy nijot'aty co jëbi nicxy y'ixaangixy miich ajcxy nidüg'óciy. Ooy yi' tajty ymaay co miich ajcxy ti mnejhuïy co ypigyii. ²⁷ Janch tiy'ajt co Epafrodito ooy ti ypigyii, jago jago ti yca'ögy. Per Dios ti pa'ayoy Epafrodito, e nañ jadu'n ti xypa'ayooyich, jigix ca'ydi nigí ayo'n jotmay nbaadyich. ²⁸ Paady ycixp nigí ndzocyich co jëbi nguexipyich Epafrodito ma miich ajcxy jadüg'oc, jigix miich ajcxy mjotcugihuij co m'ixipy. E nañ jadu'n jëbi yquëgy ñich ndajin mayin müd yi' ycixpi. ²⁹ Cöbijccix Epafrodito jotcujc, jadu'n nej tüg migüg huidibi yajpaatp ma ajt nHuindzin Jesús. Yajmi'ajtcix tüg'óciy migügtijc huidibi yjugy'ajtín yojxp toocp müd Jesucristo ytung ycixpi, jadu'n nej yi' ti ytuñ. ³⁰ Com jago jago Epafrodito ti yca'ögy müd Cristo ytung ycixpi. Tzip tzaach yjugy'ajtín ti minaxy ti yajnaxy co ti xypubetyich ya. Com miich ajcxy ca' ci'm jëbi xypubéjtcixyich ya, paady yi' miich ajcxy ti xycodinäy.

3

Je tudägy'ajt je janchypi

¹ Jadügnax, migügtijc ajcxy, jotcujc'ajtcix co myajpatcixy ma ajt nHuindzin Jesucristo. Ca' ti adzijpín njihuïyich co nnigapxpetyich jada tiy'ajt jadüg'oc huidibi jayhuin ti nyajnijayüygixy. Jadu'n nduñich müd miich ajcxy m'oy'ajtín ycixpi. ² Naygüendi'ájtigix müd yi' ajcxy y'ayuc huidibi ajcxy tundigooyb co ajcxy yajcopijcy yi' tiy'ajt huidibi pidacp ma jäy ñinicx müd tzujc. Jibic jäy yi' ajcxy, jadu'n ajcxy nipaady nej uc. ³ Yi jäy ajcxy huidibi tiydudägy mibijcp Dios, ca' nminaanim je' yi' ajcxy huidibi tiy'ajttüyp ñinicx. Yi Dios yjäy ajcxy janchypi, yi' ajcxy cixyot huinijot mibijcp mijpidacp Dios ytiy'ajt jadu'n nej ñich ajt. ñich ajt n'ojadajtm Dios müd ajt n'espíritu, etz müd ajt njot nhuinma'ñ. Jotcujc'ajtm com je' co nyajpaatim ma Cristo Jesús, e ca' nyajcopijcim tijaty tiy'ajt huidibi jäy ajcxy ytumyb. ⁴ Co ixypy ytiy'ajtiy yi' jadu'mbi huinma'ñ, jëbi ixypy naygömayiijich ci'm, com jecy'ajty

ca' anajty ni pin huidibi nigí cuyduun yi jadu'mbi tiy'ajt ca'ydí ñich. ⁵ Con ductuycxiiñyich ma anajty ti nma'xung'atyich, chi oy nyajtiy'ajttiyich. Raza hebrea ñich, Benjamin nmij'ap'ajtpyich nmijteedy'ajtpyich. Nma'xung'ajttich hebreojäy. ñich ndaj ndeedy hebreojäy ajcxy anajty. Nañ nmijpidaacich fariseo y'ixpijcin, jadu'n nej ajcxy yajniñuejy judiojäy ycötujcin. ⁶ ñich janchmictägy anajty nguyduñich ngimhuinma'ñich, ixti mabaad anajty n'ixhuidity nbahuidityich mictägy yi jäy ajcxy huidibi anajty mijpidacp Jesucristo. Ti nguyduñäyich tüg'óciy judiojäy ycötujcin. Ni pin ca' huaad yxiyich co ti ndundigooyich ma yi' ajcxy ycötujcin. ⁷ Tüg'óciy yi judiojäy yhuinma'ñ huidibi ti nyajcopicyich anajty, jadachambi ca' ytimychoabaady müd ñich, co ti nmijpidägyich Cristo ytiy'ajt. ⁸ Jadachambi janchtiy, huidijaty anajty nyajcopijcpiyich, ti nnajtz'ixiiydäyich, jigix jëbi nnejhuñhuñbich etz nguyduñpich yajxon ajt nHuindzin Jesucristo oybi y'ayuc ytiy'ajt. Müd co ti nmijpidägyich Jesucristo, paady nnajtz'ixiiydaayich tüg'óciy huidibi anajty nyajcopijcpiyich, yi jadu'mbi huinma'ñ cham ca' chobaady müd ñich, jadu'n nipaady nej pux. Jadu'n nduñich müd Jesucristo ytiy'ajt oy'ajt ycixpi. ⁹ E jadu'n nduñich jigix jëbi nyajpaadyich ma Jesucristo. Jadu'n ti nnajtz'ixiiydäyich je tudägy'ajtin huidibi ti nbaadyich co ti nguyduñich Moisés ycötujcin je jecyip. Nañ jadu'n nduñich jigix jëbi nbáadibich je tudägy'ajtin huidibi Dios yejcpy co nmibijcim nmijpidaacim Jesucristo. ¹⁰ Ndzojcpiyich co njacnejhuñhuñbich Cristo y'ayuc ytiy'ajt. Nañ ndzojcpiyich co njacnejhuñhuñbich Cristo ymic'ajt, jadu'n nej yjugypijcy co y'o'cy. Nañ ndzojcpiyich co njacminaxipiyich njacyajnaxipiyich tzaachypi jadu'n nej Jesús minaxy yajnaxy tzaachypi, ixti mabaad jadu'n njatyich jadu'n nej Cristo yjajty co y'o'cy. ¹¹ E paady ycixpi nijjp'ijxpyich co n'ögibich nguygipiyich jadüg'oc co anajty Dios yajjugypicy yi jäy ajcxy tiibi y'óccixy.

Naymic'ijxim jigix nbaatim huidibi Dios ti xyaj'ahuaniyim

¹² Ca' nmínaaním jadu'n nmína'ñich co ti nmímadactäyich nej Cristo ti mímactäy. Nañ ni ca' jadu'n nmína'ñich co ñich njot nhuinma'ñ ti nyajhuáztäyich. Njactumnich, jigix jëbi Cristo y'oy'ajtin nbáadibich. Com Jesucristo ti xyhuin'ixyich jayjip, jaydëbi jada oy'ajtin nbáadibich. ¹³ Migügtijc ajcxy, ca'ñich ci'm naygómayijich, co ti nmímadactäyich Cristo y'oy'ajtin. Jada janchtiy ndumbyich, njäydigoydaaybich tüg'óciy huidibi ti ñaxy, e mictägy nduñich jëbi nbáadibich je oy'ajtin huidibi Dios jiiyby tzajpjoty xymöhuaambich müd co nyajpaadyich ma Jesucristo. ¹⁴ Mictägy nduñich müd tüg'óciy nmic'ajttich, jigix jëbi nbáadibich je oy'ajtin huidibi Dios jiiyby tzajpjoty xymöhuaambich. Jadu'n nipaady nejihuñ müd pin nayboycquipxyijich co nbada'ñich tüg' premio.

¹⁵ ñich ajt ti nhuinma'ñ ycijnxi yca'pxni, tzoc panixcim je ixpijcin huidibi nmüd'ajtm. E pen nidügti müich ajcxy tigachjaty huinma'ñ müdity, Dios xyajnejhuñhuñp ajcxy je tiy'ajt. ¹⁶ Jada janchtiy, je tiy'ajt huidibi ti nbaatim copicy nguydundaayim, ca' n'ixmajtzim.

¹⁷ Migügtijc ajcxy, panixcix ñich n'ijxpejt jadu'n nej ti ndzinäyich ma müich ajcxy. Nañ jadu'n müich ajcxy ijxpejt mbigipy ma yi' ajcxy chinaayin huidibi ijxpejt ti patcixy ma ñich. ¹⁸ Canaag'oc ti nnímaaygixy, e nnímaaygixy jadüg'oc müd tajin mayin co may nmigügtijc chinaaygixy jadu'n nej jihuñy müdzip'ajtcixy je Cristo huidibi o'c cruudzcixy müd ajt nbocy ycixpi. ¹⁹ Dios yajtigoyip je ajcxy y'alma. Yi' ajcxy ypidacpy yhuinma'ñ ma yi caayin uucin jicxy ypic, ma yjapadyii huen yjot yhuinma'ñ pidaaccixy ma Dios.

Yi' ajcxy chachñaygómáayigixy ci'm ma yjapadyii tzo'ydu'n jihuñyigixipy. Hue' pidaaccixy yhuinma'ñ ma naaxhuiñ jāy chinaayin. ²⁰ Ich ajt hue' nyajpaatim njāy'ajtim tzajpjoty, e njijp'ixxim co ich ajt nHuindzin Jesucristo miinaamb ya naaxhuiñ jadüg'oc, chona'ñ tzajpjoty, je huidibi xyajñdzōgaanim ajt n'alma. ²¹ Jesucristo xyajtigadzaanim ajt nninixx pocymiidpi, e xymōhuaanim tūg ninixx jemybi oybi, tim jadu'n nej yi' ñinixx mādity. Cristo xyajtigadzaanim ajt nninixx mād yi' ymic'ajt huidibi mād ane'mdāy mimadactāy.

4

Jotucj'ajtcixy ajcxy ma je mHuindzin Jesús

¹ Com Jesús xyajtigadzaanim ajt nninixx, paady ycixpi migūgtijc huidibi ooy ndzocy njihuñyich, tiydudāgy mibijccix ajt nHuindzin Jesucristo, ca' m'ixtiḡihuāccixy ma mmibijcin. Migūgtijc ajcxy huidibi ooy nicxy nja'ixa'ñich, ooy njotucj'atyich mād miich ajcxy ycixpi. Mād miich ajcxy ycixpi nbada'ñich n'oy'ajtin ma Dios.

² Nbijctzooybich may'ajt ma Evodia etz ma Síntique co huen ajcxy ixmajtcixy yi tzip etz huen naymigūgpjicigixy jadüg'oc, com hue'ajcxy yajpaady mibijcpi ma Cristo. ³ Miich migūg huidibi ti xypubetyich ma Cristo ytung, may'ajt nbijctzooybich ma miich co mgapx'oyihuipy je tzip ma ajcxy je metzpi tōxyjāy. Yijii bi metzpi tōxyjāy tumb anaŋty ajcxy quipxyi mād ich co ngapxhuāccxyich Jesucristo y'ayuc ytiy'ajt. Yi' ajcxy xypubejtich quipxyi mād Clemente etz yi jacjadyii huidibi anaŋty tumb quipxyi mād ich. Jada metzpi tōxyjāy ajcxy yxi ucojajy ymiñ ma Dios ñecy, je necy ma Dios mādity cojay je jāy ajcxy yxi huidibi padamb jugy'ajtin huinixibi.

⁴ Jotucj'ajtcix huinixi, mād co myajpatcixy ma ich ajt nHuindzin Jesucristo. Jadüg'oc nḡapxpetyich co huen jotucj'ajtcixy. ⁵ Jadu'n tzinaaygix jadu'n nej jēbi jāy ajcxy nejhuñyigixy co miich ajcxy myajtungixy mecxtujcin ma mdzinaayin. Com huington je xi je tiempo mina ymiina'ñ ich ajt nHuindzin Jesucristo jadüg'oc.

⁶ Ca' ni ti mnidajcixy mnimaygixy. Capxpzdizmdaaygix ma Dios tūg'óciy ti jotmay miich ajcxy mmād. Mibijctzoogix Dios, e nañ yajnaxcix jāygidaacin ma Dios. ⁷ Co Dios mmibijctzōogixipy, huin'it ajcxy yi' xymōhuip jotucj'ajtin mijcajee, e mayñaaxhuññjāy ajcxy ooy yhuinmay ahuididipy mād miich ajcxy m'oy'ajtin ycixpi. Co myajpaady ajcxy ma Cristo Jesús, paady ycixpi Dios xyajtzināhuipy ajcxy jotucj' etz xymōhuip ajcxy huinma'ñ tudāgyi.

Tzójccix nijot'ajtcix huidibi oyip

⁸ Jadūgnax, migūgtijc ajcxy, pidaaccix mhuinma'ñ ma tūg'óciy tiy'ajt huidibi janchip, tūg'óciy tiy'ajt huidibi jēbi nyajmij'ajtim. Pidaaccix mhuinma'ñ ma tūg'óciy tiy'ajt huidibi tudāgyip. Pidaaccix mhuinma'ñ ma tūg'óciy huinma'ñ huidi huādzip etz tūg'óciy huinma'ñ huidi oy jāygidaacni. Pidaaccix mhuinma'ñ ma tūg'óciy huinma'ñ huidibi jēbi yajcapxpaady. Huinmaaygix tūg'óciy jada oybi huinma'ñ etz huidibi huaad njāygidaacim.

⁹ Yajtungix je tiy'ajt huidibi ti nyaj'ixpijicxy, etz je cōtucj huidibi ti nmooygixy, etz je ayuc huidibi ti mmidoogixy co ti ngapxyich. Etz nañ tungix je ijpexjt huidibi ti nyecyich. Cuydungix jada tiy'ajt, huin'it yi Dios yajpaadipy ma miich ajcxy etz xyajjotucj'idipy ajcxy.

Filipenses ajcxy y'ofrendi mād Pablo ycixpi

¹⁰ Hich ajt nHuindzin Jesucristo ti ooy xyajjotcugü'yich co je tiy'ajt xy-paadyich co miich ajcxy xyjäyamechich jadüg'oc. Ca' nmînaanim nmîna'ñich co miich ajcxy ti xyjäydigoydaayñich. Hue' anajty ycanibidzimy nej jëbi xypubejtcixyich. ¹¹ Ca' nmînaanim jadu'n nmîna'ñich co ooy ti jaty nyajmayjajtñich. Com ti nhuinma'ñ nbidägyich co njotcujc'adipyich miid tijaty nmîdich, oy tim mînaaxii tim mînaatiempo. ¹² Com ñich ci'm nejhuüybich nej jay ajcxy y'ayoy yjottigooy, e nañ nejhuüybich nej jäy ajcxy chinäy co miid'aty tijaty may'amy. Ti nnejhuüydäyich nej jëbi ndzinäyich, nej jëbi nyajnajxich xii tiempo; pen cu'xyi ngaayich, o pen ca' cu'xyi ngayich, pen nmîdich conax, o pen ca' ti nmîdidyich. ¹³ Jëbi ndzinähuibich jotcujc huenti huennejity, com Cristo xymic'ajtmoobyich. ¹⁴ Ooy oy ti mdungixy co ti xypubéjtcixyich ma ñich n'ayo'n njotmay.

¹⁵ Jadu'n nej miich ajcxy huidi jim Filipos mnejhuüyb ajcxy, je taabi nyajtzondacyich co ngapxhuäcxyich Jesucristo y'ayuc ytiy'ajt, co ndzooñich jim Macedonia miich ajcxy ti xymiyoxyich, e jac tigati ti mguejxcixy ma ñich. E miich ajcxy jim Filipos huidibi mibijcp Jesús, miich ajcxy tügpajc xypubejtich ca' jac ni pin. ¹⁶ Co n'ijtyich jim Tesalónica miich ajcxy xyajnigüe-jxyich pubejtin metz'oc tugüg'oc, e jadu'n miich ajcxy xypubejtyich miid huidibi anajty nyajmayjajtñich. ¹⁷ Ca' nmînaanim ooy ndzachjip'ixynich pubejtin, jada janchtiy ndzoyjpyich co miich ajcxy ñigi oy'ajtin mbaadipy co anajty mmejtzcixy ma Dios yhuinduu. ¹⁸ Ti ooy yhuaadüy yi mbubejtin ixti nyajconajxpich. Miid je pubejtin huidibi ti myajmiguejxcixy Epafrodito cham nmîdidyich ca'pxy, ca'ti n'ocyajmayjajtñich. Miid jada pubejtin huidibi miich ajcxy ti xymöyich, ti ooy njäygidägyich, tim jadu'n nej Dios jäygidacy je poomjoc huidibi yajhuindzigü'yi. ¹⁹ Hich nDios miich ajcxy xymöhuip tüg'óciy huidibi miich ajcxy myajmayjajtpy. Mijcajee yi' miich ajcxy xymöhuip yi oybi mijpi oy'ajtin huidibi yi' ymiid ma yi Jesucristo. ²⁰ Huen ñich ajt nDios Teedy cömay'idipy huinixii huinitiempo! Jadu'n jada. Amén.

Capxpooxïn huidibi cijxnip je necy

²¹ Tungix may'ajt capxpooxcix miid ñich ycixpi tüg'óciy migügtijc huidibi yajpatp ma ajt nHuindzin Jesucristo. Je migügtijc huidibi yajpatp miid ñich nañ jadu'n xyajnigüe-jcixy capxpooxïn. ²² Tüg'óciy je mibijcpidijc huidibi yajpatp ya cajpjoty xyajnigüe-jcixy capxpooxïn, yi' ooy ytimyjajijpity huidibi ajcxy yajpatp ma je mij ane'mbi César ycötujctac xyajnigüe-jcixy ajcxy capxpooxïn.

²³ Huen ñich ajt nHuindzin Jesucristo may'ajt oy'ajt tunipy miid tüg'óciy miich ajcxy. Jadu'n ngapxycixyich. Amén.

COLOSENSES

Yi Neczy Huidi San Pablo Yajniejx Je Mibijcpidijc Jim Colosas

¹ Hich Pablo, Dios jadu'n tzojcp, paady Jesucristo ti xyajnbicyich jebi ngapxhuacxyich yi 'y'ayuc. ² Hich miid ajt nmigug Timoteo cham nguexyich jada necy ma miich ajcxy huidibi tzinaayb jim Colosas. Hue' nguexyich jada necy ma miich ajcxy huidibi Dios yjay'ajt ip e mmibijccixy yi Cristo. Huen ich ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugiygixip.

Pablo mibijctzoy Dios miid mibijcpidijc ycixpi

³ Jabom jabom co ich ajcxy Dios nmibijctzoy, chi nyajnaxich jaygidaacin ma Dios, nHuindzin Jesucristo ajt yTeedy, miid miich ajcxy ycixpi. ⁴⁻⁵ Ti nnejhuich jadu'n nej miich ajcxy ti mmibijccixy Cristo Jesús, e nañ jadu'n nej mdzojccixy mjihuuygixy tug'ociy migugtjic. Miid co miich ajcxy mjijp'ixy co Dios miidity tijaty yujpcicy tzajpjoty huidibi miich ajcxy mbadamyb, paady ycixpi ajcxy mmibijccixy Cristo Jesús, e paady ycixpi mdzojccixy mjihuuygixy migugtjic. Co jayhuin migugtjic capxhuacxy Jesucristo y'ayuc ytiy'ajt ma miich ajcxy, huin'it ti mnejhuuygixy co Dios miidity tzajpjoty huidi njijp'ixyp mbadaangixp. ⁶ Jadayaabi tiy'ajt huidibi migugtjic ti capxhuacxy ma miich ajcxy, nañ yajcapxhuacx'aditzni ma tug'ociy naax cajp etz mayjy mjipidaaccixy. Miich ajcxy ti mmibijccixy jadu'n nej oga'n yajnimiydacy e chambaadni co Dios may'ajt ti tuñ miid jay ajcxy ycixpi, e nañ miich ajcxy mnejhuuyb tiydudagy Dios ytiy'ajt. ⁷ Jada tiy'ajt ti xyajnejhuuygixy je Epafras, ich ajt nmigug huidibi ooy ndzocy njihuich, huidibi tudagy tumb ma Dios y'ayuc quipxy miid ich. Epafras ti xycodinayich ma miich ajcxy, e tiydudagy miich ajcxy xyaj'ixxpicy Cristo ytiy'ajt. ⁸ Epafras ti xyajnejhuich tiy'ajt jadu'n nej miich ajcxy myajpatcixy, etz jadu'n nej je Espiritu Santo ymic'ajt ymooygixy, jigix ajcxy mdzogipy mjihuuhuiipy tug'ociy migugtjic.

⁹ Miid jada ycixpi ich ajcxy jabom jabom Dios nmibijctzooyich miid miich ajcxy ycixpi, jadu'n nduunich chondacy co oga'n nnejhuich co miich ajcxy ti mmijpidaaccixy Jesucristo, ixti chambaadni. Dios nmibijctzooybich co ajcxy mhujnhuuhuiipy mnejhuuhuiipy tug'ociy Dios chojcin. Dios nmibijctzooybich co yi' Espiritu Santo miich ajcxy xyaj'ixxpigipy xyajnejhuuhuiipy ajcxy tug'ociy yi' ytiy'ajt etz yi' chojcin. ¹⁰ Dios nmibijctzooybich jaydebi mgyduunip ajcxy Dios ytiy'ajt jadu'n nej huaad mibijcpidijc chinaaygixy huidibi yajpaatp ma ajt nHuindzin Jesús, mabaad Dios jaygidagy yajxon ajcxy mdzinaayin mjugy'ajtin. E nañ jaydebi ajcxy mdunipy oyyay'ajtin. E nañ jaydebi jabom jabom yjacuycejtcixy yi' m'ixp'icjin ma Dios. ¹¹ Dios nmibijctzooybich jigix yi' xymohuiipy ajcxy mic'ajt jadu'n nej yi' miidity ymic'ajt mijpi, jigix jebi miich ajcxy jotcujc myajnaxipy etz mecxtujctahuip tug'ociy tzaachypi etz ayo'n. ¹² Dios nmibijctzooybich co miich ajcxy aguc jotcujc myajnaxipy Dioscojuyip ma Dios Teedy, com Dios Teedy ajt xyajpocynhuuatzim, e jadu'n ti xyni'ixiyim jebi nbaatim tug'it lugar tzajpjoty quipxy miid tug'ociy mibijcpidijc huidibi tiydudagy tzinaaygixp miid Dios ytiy'ajt, jadu'n nipaady nejihuich nej miich ajcxy mdzinay ma je tixcin. ¹³ Ti Dios xyajnhuadictuutim ma yi' jibic-huinmañ ma je mujcu' xy'ane'mim,

jadu'n nipaady nejjihuüy ti xyajpidzimim agootztuum. Ti Dios xypidaacim ma y'ung y'ane'my, je' y'ung huidibi yi' ooy tzocy ooy jihuüy. ¹⁴ Dios y'ung ti xyajnihuädzictuutim ma yi jibic-huinma'ñ co ñi'py temy vojcy ma yi cruudz müid ajt nbocy ycixpi, e ti xypocyhuinmeecxim.

Co Cristo y'o'cy müid ajt nbocy ycixpi, chi jotcujc n'ijtim müid Dios

¹⁵ Ca' pin ti ixty Dios. Pinjaty ti ixty Dios y'ung, jadu'n nipaady nej ti ixty Dios. Dios y'ung yi' je' anajty tim jayjyp ma anajty Dios ca' ti yaj'oyiüñi. ¹⁶ Dios y'ung ti cojtay tüg'óciy tijaty yajpaatp jiiy tzajpjoty etz ya naaxhuiñgixy. Dios y'ung cojtay tüg'óciy huidibi jébi huaad n'ijxim etz nañ cojtay huidibi ca' huaad pin ixty. Dios y'ung pidaactay tüg'óciy y'ane'min tüg'óciy mic'ajt ya naaxhuiñ, etz nañ jadu'n pidactay ane'min müid yi tzajpjoty tzinaaybi. Dios y'ung ti yajcojtäy ti yaj'abadiiydäy tijaty müid yigixp. ¹⁷ Je Cristo yajjyp y'ane'm'ajt ymic'ajt ti paady, ca' jac ni pin. Je Cristo yaj'ijtpy tüg'óciy huidijaty ya yajpatp huijt'ijtaayb. ¹⁸ Je Cristo ñihuindzin'ajtaayb ñigohuajc'ajtaayb, etz y'ane'mdaayb tüg'óciy jäy huidibi mibijcip mijpidaacip. Je Cristo yajtzinaayb yajjygy'ajtpy tüg'óciy mibijcpidijc, com yi' je' huidibi jayjyp ti yjugypicy co y'o'cy. Paady ycixp yi' cötujcin mijpi müidity. ¹⁹ Dios hue' tzojcy co tüg'óciy yi' ymic'ajt etz ymij'ajt yajpaadip ma yi' y'ung. ²⁰ Je naaxhuiñjäy etz je tzajpjoty tzinaayb ajcxy ca'oy'ijtcixy müid Dios müid je mijpocy ycixpi. Dios oy jäygidägy ooy jotcujc nayjihuiüy co y'ung y'o'cy cruudzcixy müid je mijpocy ycixpi e jadu'n oyüy nej jébi je naaxhuiñjäy etz je tzajpjoty tzinaaybi ajcxy oy'ijtcixy müid Dios.

²¹⁻²² Müich ajcxy co anajty ca' mmibijccixy je Cristo, ca' anajty oy m'ijtcixy müid Dios. E jadu'n anajty m'ijtcixy nej tüg midzip ma Dios, müid co jibicpi anajty mdungixy, etz müidity ajcxy jibic ma mjot mhuinma'ñ. Per jadachambi je Cristo ti capx'oyüy müich ajcxy je mdzip m'ejin huidibi ajcxy müid Dios, co ti chinäy ya naaxhuiñ müid ñinixc, e nañ co ti y'ögy müid müich ajcxy mbocy ycixpi. Müid co Cristo y'o'cy müid müich ajcxy mbocy ycixpi, jaydëbi myajpaatcixipy ma Dios yhuinduu janch oyjäy, janch huätzjäy, ca' ti pocy mmüidity, ca' ti xihuin yjac-hui'my ma Dios müid müich ajcxy ycixpi. ²³ Pen myajcopijccixyp tiydudägy je Cristo y'ayuc ytiy'ajt huidibi ti mmidoogixy, jadu'n nej mijjp'ijxcixy co je Cristo xyajnidzogaani ajcxy yi' m'alma. Je ayuc huidibi müich ajcxy ti mmidooy, je' je' huidibi migügtijc ti capxhuäcxy etz ycapxhuäcx'adichñi ma tug'óciy naax cajp, jadu'n nej jébi jäy ajcxy y'alma yajnidzögipy. Nañ jadu'n müich, Pablo ngapxhuäcxypich jada ayuc quipxy müid nmigügtijcich.

Pablo cötujcmoy co ytunipy ma mibijcpidijc ajcxy

²⁴ Jotcujc nnayjihuiüyjich co tzaachypi nminaxy nyajnaxyich müid nninixcixh müid müich ajcxy ycixpi e jadu'n njacyajcixy njacyajc'pxich je tzaachypi huidibi Cristo yajtzondac co yi' tzaachypi minaxy yajnaxy müid je mibijcpidijc ycixpi e je mibijcpidijc ni paady nej Cristo ñinixc. ²⁵ Dios ti xyyajniübicyich co ndunipyich müid yi' jäy ajcxy huidibi mijpidaacip. Dios ti xypidägyich ma jada tung, jigix ngapxhuäcxibich tüg'óciy Dios y'ayuc ytiy'ajt ma tüg'óciy jäy ajcxy. ²⁶ Jecy'ajty canaag jimijt ti ñaxy co Dios ca'ni anajty yajnigüëxigy yi' ytiy'ajt. Cham Dios ti yajnigüëxigy yi' ytiy'ajt ma yi' jäy ajcxy huidibi yi' yjäy'ajtipy. ²⁷ Dios oy nihuinmayüy co anajty yajnejhuihua'ñ yi' jäy ajcxy nidüg'óciy je oybi ayuc tiy'ajt huidibi jecy'ajty ca' pin nejhuiüy. Yi' je' je

tiy'ajt co Cristo yajpaady ma miich ajcxy mjot mhuinma'n, paady ycixpi jébi miich ajcxy mbaadip oy'ajtín jibby tzajpjoty.

²⁸ Hich ajcxy ngapxhuáčxypich Cristo y'ayuc, n'ihuijpyich ngapxhuijpyich, nyaj'ixpijcpýich yajxon yi Cristo ytiy'ajt ma tüg'óciy jáy ajcxy, jaydēbi nya-jquēxigibich ma Cristo yhuinduu nidüg nidüg mibijcpidijc ca'pxy yhuinma'n. ²⁹ Míid jada ycixpi nduñich mictägy míid tüg'óciy je nmic'ajtich huidibi Cristo xymooybich jabom jabom.

2

¹ Ndzojcpcyich co miich ajcxy mnejhuñhuijpy jadu'n nej mictägy nduuñich míid tajin mayin míid miich ajcxy ycixpi, etz míid yi mibijcpidijc huidi jim Laodicea ycixpi, etz nañ tüg'óciy mibijcpidijc ycixpi huidibi ti xy'ixyich ahuin ajijp. ² Mictägy nduuñich jaydēbi yi mibijcpidijc paadipy jotcujc'ajtín ma y'ay yjot, etz jaydēbi ajcxy ñaychójcigixipy ñayjihuijyigixipy mabaad jēbi mi'ijtcixy yjot yhuinma'n tú'ciy. Mictägy nduuñich jaydēbi je mibijcpidijc mi'ijtcixy mij jotcujc'ajtín co ajcxy huinjihuidähuiib Dios ytiy'ajt, je tiy'ajt huidibi jecy'ajty anajty ca' pín nejhuñy, je Dios ytiy'ajt maabi Cristo Jesús. ³ Ma je Cristo jim tüg'óciy tiy'ajt janchypí etz ixpijcin janchypí yajpaady. Jadu'n yi' ytiy'ajt etz y'ixpijcin nej tüg'júgy'ajtín. ⁴ Jadu'n nimaaygixy jigix ca' pín oy cohuin'ini e midigihuijpy oy ayuc ma miich ajcxy ooy ymibijcni, e ca'yjanchity. ⁵ Ooy ñch ngadim jimity, ixna' guēxna' ma miich ajcxy myajpatcixy. Hich njot nhuinma'n ca' y' jim ytiogoy'ity ma miich ajcxy myajpatcixy. Jotcujc nayjihuijyijich co n'ijxcixy yajxon myajtüyöyigixy tüg'óciy etz mic yi mmibijcin muidity ajcxy ma Cristo.

⁶ E míid jada ycixpi jadu'n nej miich ajcxy ti mgöbijccixy je Huindzin Jesús oga'n'aty, jadu'n ajcxy jactzinaaygix jacjúgy'ajtcix ma yí'. ⁷ Je tiy'ajt etz je mic'ajt jim yi' mbaatcixy ma Cristo. Yjacyujcpedipy ajcxy yi m'ixpijcin ma Cristo ytiy'ajt jabom jabom. Ca' m'ixtigihuáccixy ma yi mmibijcin. Jacmibijcix jadu'n nej anajty ti nyaj'ixpijccixy Cristo ytiy'ajt. Jatytim myajnájxcixipy jáydaacin ma Dios cixyjt huinijot jabom jabom.

Je jemybi júgy'ajtín huidibi Cristo xyajni'ix'iyim

⁸ Ooy naygüend'ájtigix, ca' myajhuin'ingixy, co huingjäy xya-jhuinma'nytigóoyigixipy míid huingbi ayuc huingpi ixpijcin huidibi jáy ci'm ti cojy ti macxy, huidi ca' choobaady, huidi nigoo xychachhuin'ingixp míid canaag ayuc huinma'n jadu'n nej poj naaxhuiñ huinma'n. Yi jadu'mbi ixpijcin huidibi jáy ti cojy ti macxy ca' ajcxy paady ma Cristo.

⁹ Tüg'óciy nej Dios yajpaady nañ jadu'n yajpaady ma Cristo. ¹⁰ Com je Cristo ñihuindzin'ajttaayb tüg'óciy ane'mín ya naaxhuiñ, etz nañ jadu'n tzajpjoty, paady ycixpi co miich ajcxy myajpaady ma Cristo, miich ajcxy míid'ajttaayb tüg'óciy huidi Cristo ymíid. ¹¹ Co anajty Cristo miich ajcxy xyjáy'adyii, chi yí'pidacy ma ajcxy mjot mhuinma'n je tiy'ajt co myajpatcixy ma Dios. Hue' je' yajtigooyb yi pocytoni huinma'n. Jada je' je tiy'ajt huidi Cristo Jesús ypidac, ca' miich ajcxy xyjáy'adyii. Ca' miich ajcxy mdiy'ajttiy ma mninix. Tigach Jesús ytuñ míid miich ajcxy, ca' yjadu'nity nej judíojäy ajcxy tiy'ajt pidaaccixy ma ñinix míid tzujc. ¹² Co ti mnibejtccixy míid Cristo yxií, jadu'n nipaady nejihuñy ti mnaaxtigüygixy quipxy míid Cristo co yí' ñaaxtigüy. Co ti mnijpidaaccixy Dios ymic'ajt jadu'n nipaady nejihuñy quipxy míid Cristo ti mjogyjccixy co Dios yajjúgyjicy y'ung co y'o'cy. ¹³ Co ca' anajty miich ajcxy Dios xyjáy'adyii, míid miich anajty ajcxy pocytoni

huinma'n̄ jadu'n miich anajty m'ijtcixy nej öcpi. E co ti mmijpidaaccixy Cristo, Dios ti xyhuinmeecxi ajcxy tüg'óciy mbocy, e jadu'n nipaady nejihuüy Dios ti xyajjugypijccixy quipxyi müid Cristo. ¹⁴ Co Cristo y'o'cy ma yi cruudz müid ajt nbocy ycixpi, jadu'n nipaady nejihuüy Dios ti xyjödözim xihuin huidi anajty xychaachytunaanim. Co Dios anajty yajtigooy hich ajt nxihuin, jadu'n nipaady nejihuüy ti mijxojtzpety je xihuin necy ma Jesús ycruudz. ¹⁵ Co Cristo y'o'cy cruudzcixy, chi ycödigooy je ca'oybi ymic'ajt, etz je poj naaxhuiñybi ymic'ajt. Chi je Cristo yajtzo yduñ je ca'oybi etz je poj naaxhuiñybi co yajcixy yajnaxy ma jäy yhuinduu.

Tzojccix nijot'ajtcix tüg'óciy huidijaty tzomb ma Dios tzajpjoty

¹⁶ Ca' mdungixy cuenti co pinjaty ajcxy xy'agapxihuipy etz xyñimähuipy:

—Amay'at jada jüicy picy, etz amay'at jada xii, etz amay'at je jemybo', etz amay'at yi Sábado xii. ¹⁷ Jecy'ajty jäy jadu'n ti yajtuñ yijadu'mbi huinma'n̄, jayijpni ca' anajty Jesucristo ymiiñi ya naaxhuiñ. Jadachambi xii tiempo Jesucristo ytiy'ajt tügpajc yi' je' ooy ycopicyity. ¹⁸ Ca' huaad yi jäy ajcxy xypijci je Cristo y'oy'ajtin huidibi ajcxy mbadamyb. Yi' ajcxy huidi oygohuin'ünñi naybidaacip jadu'n nejihuüy ooy yung naxy ajcxy yjäy'ajtcixy, e ca' yjanchity. Yi' ajcxy yi' y'ojadajtpy ángeles. Yi' ajcxy naygömayip co ti tiy'ajt patcixy ma cumäy, ninigoob ajcxy amij agix ñayjihuiñyigixy müid co tzachmijpidaaccixy yci'mhuinma'n̄ etz ñinücx chojcín. ¹⁹ Yi jadu'mbi jäy ca' ajcxy yajpatcixy ma Cristo, je huidibi nigohuajc'ajtp tüg'óciy mibijcpidijc. Je mibijcpidijc Cristo yajyeecp ma ajcxy ymibijcín jadu'n nej Dios tzocy, e yi' ajcxy patcixy tüg'óciy mic'ajt etz tiy'ajt ma yi'. Müid co Cristo nigohuajc'aty je mibijcpidijc, paady ajcxy y'ijtcixy tügpicy, jadu'n ajcxy nipaady nej tüg' jäy ñinücx müid ycohuajc huidi ane'm je ñinücx etz müid emy huidibi yajyücxtaayb je ñinücx.

²⁰⁻²¹ Co miich ajcxy ti mmibicy Cristo, jadu'n nipaady nejihuüy ti m'öccixy quipxyi müid Cristo, e nañ ti mbidzimgixy ma yi' naaxhuiñyjäy yhuinma'n̄ xyaj'ane'mgixy. ¿Na'ámy co chambaad mjactzinaaygixy jadu'n nej jihuiy yi' naaxhuiñyjay yhuinma'n̄ xy'ane'mgixy? ¿Na'ámy co mjaccuydungixy yi' jäy ajcxy ycötujcín huidibi mīnaamb co ca' huaad mgonigý jada, ni ca' huaad mjücxý jada, ni ca' huaad nidoñ yijimbi? ²² Tüg'óciy huidibi ngonücxim, njücxim, e nnidonim, co ytundäy, chí ytigoydäy. Yi jadu'mbi huinma'n̄ c'i'm jäy ajcxy cojcixy macxcixy, e nañ c'i'm jäy ajcxy yaj'ijxpjccixy huidibi ca' yajpaady ma Cristo. ²³ Yi jadu'mbi cötujcín jadu'n yquëxigý nej ooy y'oyity ooy y'oyimibijco'cnity, e ca' yjanchity. Co jäy ajcxy cuydungixy ooy ajcxy ñaybidaacigixy tudäy, etz nañ chaachtungixy ñücx ycohuajc. Yi jadu'mbi cötujcín ca' ti mic'ajt müidity, com co ca' jadu'n jëb yajtigoy jibic-huinma'n̄ yi' jadu'mbi cötujcín.

3

¹ Miich ajcxy huidibi ti mmibicy je Cristo jadu'n nipaady nejihuüy ti mjugypijccixy quipxyi müid Cristo, e jemybi jugy'ajtin ti myajtzondaaccixy. ² Ixtaaygix je tiy'ajt huidibi tzomb tzajpjoty ma je Cristo yajpaady ma Dios ymijc a'oy'amybi, e yi' je' je' mij'ane'mbi. ³ Co ti mmibijccixy je Cristo jadu'n nipaady nejihuüy co ti m'o'ccixy müid yi', etz ma je Cristo jemybi jugy'ajtin miich ajcxy ti mbaady. Jadachambi yi' mjugy'ajtin Cristo müid c'i'am, e yi' yajpaatp ma Dios. ⁴ Co anajty je Cristo ñayguëxigýii jadüg'oc ya naaxhuiñ, huin'it xii miich ajcxy mñaybada'ñyii müid yi' jilby tzajpjoty ma yi' oybi it.

Je jecy jugy'ajt etz je jemybi jugy'ajt

⁵ Yajtigooygix je jibic-huinma'n huidibi miich ajcxy m'iid, huidibi naax-huiñj'äy ajcxy yhuinma'n'ajtip. Ca' huaad m'iidcapxtigoyipy töxyj'äydijc. Ca' huaad jibic-huinma'n mdunipy. Ca' huaad mdungixy nin'icx chójcin, etz huidibi ca'p y'oyhuinma'n'ity. Ca' huaad m'adzogipy comeen'adii, com ñipaapty jadu'n nej ajcxy huidibi tzaadzech quipychech ojadajtp. ⁶ M'iid co j'äy ajcxy jadu'n ytundigooygixy, paady ycixpi jacj'ini Dios tzaachytunip j'äy ajcxy huidibi ca' ycapxymidoogixy y'i' ycötujcin. ⁷ Nañ jadu'n miich ajcxy jay'ip co ca'ni anajty mm'ijpidaaccixy je Cristo, mdzinaaygixy anajty m'iid jibic-huinma'n quipxy m'iid je jacjadyii naaxhuiñj'äy co anajty mguydungixy y'i' j'äy ycötujcin huidibi ca' ytiy'ajity. ⁸ Jadachambi ixmajtz'icx miich ajcxy y'i' jibic-huinma'n jadu'n nej co migüg mm'ijotma'tcixy, jadu'n nej co ooy m'jot'ambijccixy, jadu'n nej co jibic mdungixy, jadu'n nej co migüg mni-gapxcixy ni'oj'yigixy, jadu'n nej co jibic ayuc mgapxcixy. ⁹ Ca' huaad mnay-huin'ñigixy miñ xy'ipy. Co ti mm'ibijccixy Cristo ti m'ixmajtz'icixy je jibicjot je jibic-huinma'n huidi anajty ajcxy m'iid. ¹⁰ Jemybi jot jemybi huinma'n ti mbatcixy e Dios yjacyej'cyp jemybi jot jemybi huinma'n jabom jabom ma miich ajcxy co m'ixp'ijccixy y'i' ytiy'ajt. Jadu'n Dios tzocy co m'jot mhuinma'n m'bidáaccixipy jadu'n nej Cristo jot huinma'n m'iidity, je Cristo huidibi ti yaj'oy'iy je jemybi jot jemybi yhuinma'n. ¹¹ Co j'äy ajcxy mijpidägy Cristo, chi tú'ciy ajcxy yajpaady ma Dios, ca' ñejity co nij'ejity ajcxy m'iid griegoj'äy y'ixp'ijcin etz jacjadyii m'iid judioj'äy y'ixp'ijcin, ca' ñejity pen ti myajtiy'ajttiy o ca' mdy'ajttiyity. Ca' ñejity co nij'ejity ajcxy jigü'egy choon', e ca' y'ixp'icyity, etz jacjadyii ooy adzip ahua'n ñaybidáacigixy. Ca' ñejity co nij'ejity ajcxy moso'ajtp etz jacjadyii huidibi ci'm naym'iduunip. Nidüg'óciy ajcxy tú'ciy ñaybidägyii co ajcxy mijpidägy Cristo. Nidüg'óciy m'ibijcp'idijc tú'ciy pattay ajcxy mic'ajt oy'ajt ma Cristo, e nañ Cristo yajpaady ma nidüg'óciy ajcxy yjot yhuinma'n.

¹² Com Dios miich ajcxy ti xyhuin'ixy, e ti xychojccixy ti xyjihui'yigixy, e Dios ti xyajhuädzi ajcxy m'jot mhuinma'n, paady ycixpi pidaaccix m'jot mhuinma'n co mba'ayoohuaangixy migüg'tijc. Pidaaccix m'jot mhuinma'n co oyj'äy'ajtin mdunaangixy etz co nicy xemy mnaybidágaangixy. Pidaaccix m'jot mhuinma'n yung naxy etz m'imecxtujccixy migüg'tijc ajcxy. ¹³ Naym'imecxtú'j'icigix nidüg' nidüg'. Co mm'igüg ajcxy xymidundigooyipy j'ebi mhuinmeecxipy tim jadu'n nej ñ'ch ajt nHuindzin Jesucristo ti mecxy miich ajcxy mbocy. Com Cristo ti xyhuinmeecxixy, paady copicy miich ajcxy meecxip y'i' migüg huidibi ajcxy xymidundigooyb. ¹⁴ Mnaychój'icigix mnayjihui'yigix nidüg' nidüg'. Co mnaychój'icigixipy nayjihui'yigixipy, chi j'eb huaad mdzinaaygixy m'iid m'jot mhuinma'n tú'ciy. ¹⁵ Je jotcu'j'ajtin huidibi Dios xymooyim, huen ajcxy xy'ane'mi m'jot mhuinma'n. Dios ti xyajñ'ibijccixy, jayd'eb tú'ciy m'ijtcixy m'iid m'jot mhuinma'n. Mjatytim yajnaxipy ajcxy j'äygidaa'in ma Dios jabom jabom.

¹⁶ Naybidáacigix co je Cristo y'ayuc ytiy'ajt yajtig'iydähuamyb ajcxy m'jot mhuinma'n. Nayyaj'ixp'ijcigix etz nay'ihui'j'igix naygapxhu'ij'igix m'iid je Cristo y'ayuc ytiy'ajt, jadu'n nej Dios i'xp'ijcin yecy. I'igix Salmo etz i'gix himno etz y'i' iy' huidibi je Espíritu Santo ypidägip ma m'jot mhuinma'n, e jadu'n j'äygidaa'in m'i'ijtcixy ma ajcxy m'jot mhuinma'n m'iid Dios ycixpi. ¹⁷ Huen ti ayuc huidibi ajcxy mgapxyp, huen ti tung huidibi ajcxy mdumbiy, hue' capxcix tungix m'iid ajt nHuindzin Jesús yx'ii. Etz jatytim yajnaxcixy Dioscojuyip ma Dios Teedy ma Jesucristo yx'ii.

Je mibijcpidijc ajcxy chinaayin ma ypijchinaaygixy

¹⁸ Miich töxyjäydijc ajcxy, capxymidoogix mñäy ajcxy com jadu'n ñich ajt nHuindzin Jesucristo tzocy co ngapxymidohuipy ajcxy mñäy. ¹⁹ Miich yëdyjctijc ajcxy, tzojccix jihuiyigix ajcxy mdöxyijc, ca' ejcin mm'iidipy müid mdöxyijc. ²⁰ Miich ajcxy ung anäg, ngapxymidohuipy ajcxy mdaj mdeedy müid tüg'óciy. Jadu'n Dios jäygidägy co ung anäg ajcxy capxymido ytaj yteedy. ²¹ Miich ajcxy ungedeedy ca' oyñinej mmigapxcixy m'ung m'anäg ajcxy. Co jadu'n oyñinej m'ojipy m'ung ajcxy, ca' yjegyity co ñicxy ajcxy taj may chinaaygixy yjugy'ajtcixy. ²² Miich ajcxy tumbidijc, capxymidoogix yi mHuindzin, ca' janch xypaat oy mic mdungixy co mhuindzin jim xyhuindñcxcixy, e chi co je' yjihuaäcni, chi nigoo mhuäccixni mdinaaygixni. Hue' janchtiy oy tungixy müid oyjot oyhuinmañ, com je' je' je' tiy'ajt co Dios mhuindziyigixy. ²³ Je tung huidibi mdungixyp, tungix cixyot huinjot. ²⁴ Com miich ajcxy mnejhuuñyb co Cristo xymöhuaangixy it lugar tzajpjoty, paady ycixpi oy tungix jigix Cristo jäygidägipy huidibi ajcxy mdumyb. ²⁵ Dios chaachytunipy pinjaty tundigooyb. Ca' Dios huin'ixxpety tzaachytunipy jäy.

4

¹ Miich ajcxy yajtumbidijc, yajtungix mdumbi nej ypadyii etz nej ytudägyity, com miich ajcxy mnejhuuñyb co nañ müid miich ajcxy tüg mHuindzin jilby tzajpjoty.

² Jabom jabom Dios mibijctzoogix, ca' m'ixmajtzccixy Dios mibijctzoohuin. Huijy ycuje m'idipy ajcxy etz jatytim yajnaxccixy jäygidaacin ma Dios co anajty mgapxtaaccixy. ³ Nañ jadu'n miich ajcxy tun may'ajt mibijctzoogix Dios müid ñich ajcxy ycixpi. Mibijctzoogix Dios co huen it lugar xymöhuiyich ma jëbi ngapxhuäcxyich Dios y'ayuc ytiy'ajt. Ngapxhuäcxyñich je Cristo ytiy'ajt huidibi jecy'ajty anajty ca' pin nejhuñy. Müid co ngapxhuäcxyich Cristo ytiy'ajt, paady ycixp nyajpaadyich pujxtigoty. ⁴ Mibijctzoogix Dios müid ñich ycixpi, jigix jëbi ngapxhuäcxyich je Cristo ytiy'ajt huädz oy, nej jäy ajcxy jëb huädz huinjihuuyigixy, jadu'n nej ypadyii ngapxhuäcxyibich.

⁵ Tiydudägy mdzinäaygixipy müid yi jäy ajcxy huidibi ca' mibijccixy Cristo. Yajniguëxcccix miich ajcxy Dios ytung jabom jabom, ca' huaad xi tiempo myaj'ayoogixy. ⁶ Yi mgapxin yi mmiydaacin yajtungix oy'amy huindzigiñ'amy nej jëbi huaad jäy ajcxy jäygidäaccixy. Copicy mhuinmayipy ajcxy jayijp nej jäy huaad m'adzoogixy.

Je capxpooxin huidibi cogixiyñip je ñecy

⁷ Tiquico co ñicxipy jim ma miich ajcxy, yi' xyyajm'idmydáaccixipy tüg'óciy nej ytunyii yjadyii ma ñich. Ooy ndzocy njihuñyich ñich ajt nmigüg Tiquico. Yi' ooy tudägy ytuuñ quipxy müid ñich ajcxy ma ajt nHuindzin Jesucristo ytung.

⁸ Paady yam nguexyich Tiquico ma miich ajcxy jigix ajcxy xyajm'idmydägipy nej yam ñich ajcxy nyajpaatcixy, etz nañ jigix xyjotmicmigápxcixipy. ⁹ Quipxy müid Tiquico yam nguexyich Onésimo, tüg ajt nmigüg huidibi ooy ndzocy njihuñyich, huidibi tudägy ti ytuuñ müid ñich ajcxy. Onésimo miich ajcxy yi mmigogajp. Tiquico y Onésimo xyajm'idmydägip ajcxy tüg'óciy tijaty tuunip jajtíp yam ma ñich ajcxy.

¹⁰ Je Aristarco, huidibi pujxtijc iñaayb quipxy müid ñich, cham quexy capxpooxin ma miich ajcxy. Marcos, je Bernabé y'uch, cham quexy capxpooxin nañ jadu'n ma miich ajcxy. Ti ñich ayuc nguexyich jayhuin ma miich ajcxy co ixipy ñicxy Marcos ma miich ajcxy, mgöbigipy ajcxy

agujc jotcujc. ¹¹ Nañ jadu'n je Jesús huidibi jäy ytiy Justo, cham quexy capxpooxín ma miich ajcxy. Yi Aristarco, Jesús etz Marcos yi' ajcxy ni tugügpajc, judíojäy huidibi tumb müd ñich ma Dios ytung co ngapxhuäcxyich Dios y'ane'mín. Yi nidugügpí ñich ooy ti xyajjotcujc'atyich. ¹² Je Epafras, miich ajcxy mmigogajp je Cristo ytumbi, nañ jadu'n cham quexy capxpooxín ma miich ajcxy. Je Epafras jabom jabom Dios mibijctzoy müd miich ajcxy ycixpi. Yi' mibijctzoob Dios co miich ajcxy cuydunda' tüg'óciy je Cristo y'ayuc ytiy'ajt, etz co nayyéjicigix amumdügjot ma Dios, e jadu'n ajcxy mguydunipy nej Dios tzocy. ¹³ ñich jébi tiy'ajt nyecyich co Epafras ooy jotmay jihuiy müd miich ajcxy ycixpi, etz nañ ooy nidajy nimay müd yi' ajcxy ycixpi huidibi tzinaayb jim Laodicea etz jim Hierápolis. ¹⁴ Je Lucas, je doctor, huidibi je mibijcpidijc ooy tzojccixy ooy jihuiyigixy etz Dimas nañ cham ajcxy quexy capxpooxín ma miich ajcxy.

¹⁵ Yajnajxcix ñich ngapxpooxín ma yi mibijcpidijc jim Laodicea. Nañ yajnajxcix ñich ngapxpooxín ma yi Ninfas etz ma yi mibijcpidijc huidibi yöymujccixp ma yi' ytiy. ¹⁶ Co anajty jada necy ti ngapxtaaygixy, tungix may'ajt quejxnajxcix jada necy ma yi mibijcpidijc ajcxy jim Laodicea. Huen ajcxy nañ jadu'n capxcixy jada necy, nañ jadu'n miich ajcxy capxcix je necy huidibi ti nquexyich jim Laodicea. ¹⁷ Tungix may'ajt mnimähuiy je Arquipo co huen cuydundäy je tung huidibi ñich ajt nHuindzin je Cristo ti yajñibedyi.

¹⁸ ñich Pablo, ñich ci'm njaaybich jada capxpooxín ma miich ajcxy. Ca' ajcxy mjäydiyoyipy co ñich nbujxtijc inäy. Huen Dios may'ajt oy'ajt tunipy müd miich ajcxy ycixpi. Jadu'n ngapxcixyich. Amén.

1 TESALONICENSES

Yi Jayjip Necy Huidi San Pablo Yajniguejx Je Mibijcpidijc Jim Tesalónica

¹ Ich Pablo mid Silvano etz Timoteo cham nguexyich jada necy ma miich ajcxy jim Tesalónica huidibi yajpaatp ma Dios etz ma ajt nHuindzin Jesucristo. Huen ich ajt nDios Teedy etz ajt nHuindzin Jesucristo may'ajt oy'ajt tunipy mid miich ajcxy etz xyajjotcugüygixip.

Je mibijcin huidibi anajty yejcpy ijxpejt

² Jabom jabom ich ajcxy nyajnaxyich jäygi daacin ma Dios mid tüg'óciy miich ajcxy ycixpi. Jabom jabom ich ajcxy Dios nmibijctzooyich mid miich ajcxy ycixpi nidüg'óciy. ³ Co Dios Teedy nmibijctzooyigixyich, chi njäymeichich jadu'n nej miich ajcxy ti nmibijccixy Jesucristo, etz jadu'n nej oy mdungixy ma yi' ytung. Nañ njäymeichich jadu'n nej oyjäy'ajtin mdungixy etz jadu'n nej mdzojccixy mjihuüygixy mmigügtijc. Nañ jäymejtzpich jadu'n nej miich ajcxy mjijp'ixy jabom jabom co ich ajt nHuindzin Jesucristo xymöhuaangixy it lugar jüby tzajpjoty, e ca' mjometzciygixy. ⁴ Migügtijc ajcxy, ich ajcxy nejhüüyb co Dios xychojccixy xyjihuüygixy, e nañ ich ajcxy nejhüüyb co Dios ti xyhuin'ijxcixy. ⁵ Co ich ajcxy jayhuin ngapxhuäcxy Jesucristo y' ayuc ytiy'ajt ma miich ajcxy, chi ca' jëyi Dios y'ayuc ngapxhuäcchich, nañ nduunich mjihuinma'ñ mid Dios yjihu'ñ ymic'ajt. Jotcujc nduunich ma miich ajcxy. Miich ajcxy mnejhuüyb co tudäy nduunich jigix jëbi mmijpidáaccixy Jesús y'ayuc ytiy'ajt.

⁶ Oy anajty ooy mjayaj'ixhuidijtcixy mjayajpahuidijtcixy co Dios y'ayuc ytiy'ajt jemybi ajcxy ti mgöbijccixy, e chi ajcxy ti mbadüdigüygixy ich je n'ijxpejt, e nañ jadu'n ajt nHuindzin Jesús y'ijxpejt. ⁷ Co tzaachypí ti mmijnajccixy ti myajnajccixy mid Jesucristo ycixpi, chi tiy'ajt ti myejccixy ma tüg'óciy mibijcpidijc jim Macedonia naaxjot etz jim Acaya naaxjot jadu'n nej jëbi ajcxy nañ jadu'n mijpidaaccixy Jesucristo y'ayuc ytiy'ajt. ⁸ E jadu'n miich ajcxy ti myejccixy je ijxpejt mid Jesús y'ayuc ytiy'ajt, canan jëyi jim Macedonia etz Acaya, nañ ti myejccixy ijxpejt ma canaag'it naax cajp. Je mayjäy ti nejhüydäy jadu'n nej miich ajcxy ti nmibijccixy Jesús y'ayuc ytiy'ajt, paady ycixpi ca' ycopicyity nicxy ich ajcxy njacyajnimäy je mayjäy jadu'n nej miich ajcxy ti nmibijccixy. ⁹ Je mayjäy ma canaag'it naaxcajp ooy ñaymidmüydáacigixy jadu'n nej ich oy ngogapxüyich miich ajcxy, etz nañ jadu'n nej ich miich ti xycöbijccixyich e nañ je mayjäy ñaymidmüydáacigixy jadu'n nej ti m'ixmajtzcixy yi tzaadzech ojadadi, e ti mbadüdigüygixy je Dios juugypí janchypí etz tudägypí. ¹⁰ Nañ jadu'n je mayjäy ajcxy ñaymidmüydáacigixy jadu'n nej miich ajcxy m'ahuijxcixy mjijp'ijxcixy co Jesús, Dios y'ung, yhuimbida'ñ ya naaxhuin, chona'ñ tzajpjoty. Je huidibi Dios ti yajjugypijc co ti y'ögy. Yi' je' je Jesús huidi ti xychuaanim ma yi mijpi tzaachypí huidibi Dios yquexamyb mid co jäy ajcxy chach pocytungixy.

2

¹ Migügtijc ajcxy, mnejhuüyb ajcxy co ca' ñaadig'aty, co ñich oy ngapxhuäcxy Dios y'ayuc ytiy'ajt ma miich ajcxy. ² Miich ajcxy mnejhuüyb co jayijp ca'ni anajty nmechich ma miich ajcxy ñich ajcxy ooy tzaachyp'i etz ayo'n ti nyajnajxcixy jim Filipos. Ti jäy xyhuin'o'jy xyjijp'o'jyich. Co nmejchich ma miich ajcxy, ca' ñejity co tzaachyp'i ti nminaxyich ti nyajnaxyich jayijp, chi Dios ti xyajjotmicpicyich, jigix huinmic jotmic ngapxhuäcxiwich Jesús y'ayuc ytiy'ajt. Ti ngapxhuäcxyich Dios y'ayuc ma miich ajcxy, oy ñich jäy anajty xycaxa'ñ xycatzoga'ñ. ³ Ca' ñich ngapxhuäcxyich anii, ni jibic ayuc, e ni ngamiydägyich jibic ayuc jibic huinma'ñ nej huaad nhuin'ingixy. ⁴ Ca' ti nhuin'ingixy. Dios ti xyajñibicyich co ngapxhuäcxiwich y'i' y'ayuc ytiy'ajt, e jadu'n nguyduuñich. Ca' nduuñich co huen jäy ajcxy jäygidägy ñich ndung. Jada janchtiy ndumywich jigix Dios jäygidägipy ñich ndung. Com Dios y'i' ñejhuüyb nej jäy tüg'óciy yjot yhuinma'ñ müdity. ⁵ Miich ajcxy mnejhuüyb co ca' nyajxondaaccixy müd ayuc oyjatyp'i huidi ca' choobaady. Nañ ni ca' ñich ajcxy nhuinma'ñ 'ijxtäy nej jëbi ñich ajcxy nmeefybaat. E Dios nañ ñejhuüyb co yjanchity jada. ⁶ Nañ ni ca' ñich ajcxy njijp'ixy co jäy ajcxy xycömayipyich, ni miich ajcxy etz ni jac-huingbi jäy. Com je Cristo ti xyquexyich co ngapxhuäcxiwich y'i' y'ayuc, paady ycixp jëbi ixypy n'ane'myich co ixypy miich ajcxy xyajmij'atyich etz xypubetyich, per ca' jadu'n ti nduuñich. ⁷ Oygixy oy'amy ti nduuñich ma miich ajcxy, jadu'n nej tüg ungda j müdity y'ung y'anäg müd oyjot oyhuinma'ñ. ⁸ Ti ñich miich ooy ndzojccixy njhuüygixy, canan jëyi Dios y'ayuc ytiy'ajt ti nmooygixy, nañ naygëyegäänibich anajty ma y'i' o'cin müd miich ajcxy ycixpi. ⁹ Co jayhuin ngapxhuäcxyich Dios y'ayuc ma miich ajcxy, mjäymejchpy miich ajcxy jadu'n nej ñich ajcxy nduuñ n'ayooyich anajty xim tzuum müd ñich ajcxy ngaayin n'uucin ycixpi. Ca' anajty n'adzibaangixy, paady ñich ajcxy nduuñ n'ayooyich xim tzuum müd ñich ajcxy ngaayin n'uucin ycixpi.

¹⁰ Miich ajcxy huidibi mibijcp mnejhuüyb ajcxy, e nañ ñejhuüyb Dios, co ñich ajcxy ndzinaayich ma miich ajcxy tudägy, huäd ñich anajty ajcxy njot nhuinma'ñ müdityich. Ca' ma ndundigooyich ajcxy nej pin xy'ocnihuambedipyich ajcxy. ¹¹ Mnejhuüyb miich ajcxy nej n'ñhuijicy ngapxhuijicy etz njotmicmigapxcixy nidüg nidüg, tim jadu'n nej tüg ungdeedy ñihuijy capxhuijy y'ung y'anäg. ¹² Ti ngapxhuijicy co ooy chach copicyity co mdzinaaygixy nej Dios jëbi jäygidägipy y'i' mdzinaayin. Com y'i' miich ajcxy ti xyhuin'ijxcixy jëbi mdigüygixipy ma y'i' chinaaydac, ma y'i' müdity y'oy'ajtin ymi'ajtin.

¹³ Paady ycixpi nyajnajxpich jäygidaacin ma Dios jabom jabom, jadu'n nej miich ajcxy anajty ti mmido'mbijccixy etz ti mgöbijccixy Dios y'ayuc ytiy'ajt huidi ngapxhuäcxiwich ma miich ajcxy. Ti mmibijccixy anajty co ñich ajcxy ti ngapxhuäcxy Dios y'ayuc ytiy'ajt. Canan je' ti ngapxhuäcxyich ayuc huidi jäy ti cojy ti macxy. E janch tiy'ajt co Dios y'ayuc ytiy'ajt cham ytuñ ma miich ajcxy mjot mhuinma'ñ, miich ajcxy huidibi mibijcp. ¹⁴ Migügtijc ajcxy, jadu'n ti mjaajtcixy jadu'n nej yjajty müd je judío'jäy huidibi anajty tzinaayb jim Judea co ajcxy mijpidägy Dios y'ayuc ytiy'ajt, chi je ymigogajp ajcxy ooy y'ixhuidijty ypahuidijti. ¹⁵ Je judío'jäy ymidziptzoon ñich ajt nHuindzin Jesús, e chi yaj'o'cy ajcxy, tim jadu'n nej ajcxy y'ap yteedy yaj'o'cy huidijaty anajty Dios y'ayuc najtzcaxiipy jecy'ajty. Etz nañ jadu'n ajcxy xyajpidzimyich jim ma ajcxy judío'jäy chinäy. Dios ca' jadu'n jäygidägy jadu'n nej ajcxy ytundigooy, nañ ooy ajcxy ymijotmädyii tüg'óciy jäy. ¹⁶ Yi' judío'jäy ajcxy ti capx'adujccixy co ca' huaad ngapxhuäcxyich je Cristo ytiy'ajt ma y'i' jäy ajcxy

huidibi ca' yjudíoájäyity, nej huaad ajcxy y'alma ñidzóoccixipy. Co jadu'n ajcxy ytundigooy, chi ajcxy ooy ñigi ypocy ñibety ma Dios. Per Dios ti ooy chip y'ejcín pidacy ma judíoájäy mïid ajcxy ypocy ycixpi.

Pablo ñijot'ajtp co nicxy cogapxihuaangixy yi mibijcpidijc

¹⁷ Migüctijc ajcxy, cham hueeni xii tiempo ti ñaxy ma ca' n'oc'íjxcixni ajcxy, per ca' ñich miich ajcxy njäydigoy. Ooy ñich ajcxy nja'nicxa'ñ ma miich ajcxy jadüg'oc, e ca' y'oyiy nej ñich ajcxy nicxiyibich ma miich ajcxy. ¹⁸ Ooy ñich ajcxy njanicxa'ñ anajty ma miich ajcxy. E ñich, Pablo, ci'm anajty njanicxa'ñich mejtz'oc tugüg'oc, e je mujcu' nni'aa ndü'aa ti xy'adujcich. ¹⁹ ¿Ti mij'ajt miich ajcxy mdijy njjip'ijxpich? ¿Ma mdijy ajcxy nbada'ñich njotcujc'ajtin n'oy'ajtin? Co anajty ajt nHuindzin Jesucristo yhuimbity ya naaxhuiñ, nbadaamybich jotcujc'ajtin etz oy'ajtin mij'ajtin mïid je tiibi nduufñich ma miich ajcxy co ti mmijpidaaccixy Dios y'ayuc ytiy'ajt. ²⁰ Mïid miich ajcxy ycixpi nmïidich jotcujc'ajtin etz xondaacín.

3

¹⁻² Mïid jada tajin mayin co ñich anajty ca' nmimadäga'ñ mïid miich ajcxy ycixpi, paady ñich ajcxy nhuinma'ñ nbidägy co jëbi nhui'ma'ñich naydüg jim Atenas, etz jëbi nguexyich ñich ajt nmigüg Timoteo ma miich ajcxy. Timoteo nañ jadu'n ytuñ ma Dios ytung quipxyi mïid ñich co ngapxhuäckyich je Cristo y'ayuc ytiy'ajt oybi. Yi Timoteo ñigapxpedipy ñich n'ayuc etz xyjotmicmigapxip ajcxy, jigix jac mic ajcxy myajpaadip ma mmibijcin. ³ Jadu'n Timoteo ytunipy ma miich ajcxy jigix ca' mhuinma'ñytigóoygixip mïid je tzaachypi huidibi ajcxy mmijnajxyp myajnajxyp. Miich ajcxy mnejhuüiyb co copicy myajnaxipy ajcxy tzaachypi mïid Jesucristo ycixpi. ⁴ Co oga'n n'ijtyich ma miich ajcxy, chi ñich miich ajcxy nnimaayich co tzaachypi mmijnájxcixipy myajnájxcixipy mïid Jesucristo ycixpi. E miich ajcxy cham mnejhuüiygixyp co janch tiy'ajt jadu'n nej nnimaaygixy, mïid co cham tzaachypi mmijnajxcixy myajnajxcixy. ⁵ Com nejhuüiybich co tzaachypi mmijnajxyp myajnajxyp ajcxy, paady ycixpi tajpich maybich mïid miich ajcxy ycixpi. E com ca' nmimadäga'ñich je tajin je mayin, paady ycixp ti nguexyich Timoteo ma miich ajcxy jaydëbi tiy'ajt xypáadibich pen tiydudägy miich ajcxy mmibicy. Tzigüiybich anajty co ndijy je mujcu' ti xyajhuinma'ñytigóoygixy, etz jadu'n anajty ñaadig'ada'ñ ñich ndung ma miich ajcxy.

⁶ Jadachambi Timoteo ti xyñihuimbityich, chooñ ma miich ajcxy jim Tesalónica, etz ti xyajnejhuüiyich jadu'n nej miich ajcxy mmïidity mmibijcin, etz nañ ti xyajnejhuüiyich jadu'n nej mnaychójcgixy mnayjihüüiygixy nidüg nidüg. Timoteo nañ jadu'n xyñimaaybich jadu'n nej miich ajcxy xyjäymechich etz xychocy xyjihüüiyich, etz nañ ooy miich ajcxy xyja'ixáangixyich jadüg'oc, jadu'n nej ñich miich ajcxy nañ jadu'n ooy nja'ixaangixy. ⁷ Migügtijc ajcxy, ooy capxy agujc ayuc agujc nyajpaadyich. E co Timoteo ti mimiñ je oybi ayuc tiy'ajt jadu'n nej miich ajcxy mjacpanicxy tiydudägy yi mibijcin, chi mij ooy ti njotcugüiyich. ⁸ Jadachambi jëbi njactzinäyich jotcujc, com ti nnejhuüiyich co miich ajcxy ca' m'ixtigihuaäckixy ma mmibijcin. ⁹ Nyajnajxpich jäygidaacin ma Dios yhuinduu mïid miich ajcxy ycixpi, mïid co janch jotcujc nayjihüüiyich co miich ajcxy ca' m'ixtigihuaägy ma mmibijcin. ¹⁰ Xim tzuum mmibijctzooyich Dios mïid tüg'óciy njot nhuinma'ñich, jigix Dios xyaj'ahuáatzibich nni'aa ndü'aajich,

jëbi nnicxyich ci'm ma miich ajcxy, jaydëbi njacyaj'ijxpigipy ajcxy Dios y'ayuc ytiy'ajt, e jadu'n jëbi ajcxy mjacyajca'pxy mmibijcin ma mjacyajtigoy'ijtcixy.

¹¹ Njijp'ijxypich co Dios Teedy ci'm etz ajt nHuindzin Jesús xyaj'ahuáatzibich nni'aa ndü'aa jigix nicxy n'ijxcixy jadüg'oc. ¹² Ich ajcxy ndzojcpy co ajt nHuindzin Jesucristo xyjacmóoygixipy tzojcin jihuiyin, jigix nigí ajcxy mnaychogiiyb mnayjihuihuiyb miñ xyipy, e nañ nigí mdzójcxipy mjihuiygixipy tüg'ócíy je mayjäy, tim jadu'n nej ich miich ajcxy ndzocy njihuiy. ¹³ Ich ajcxy ndzojcpy co Dios xyaj'ijtip ajcxy mjot mhuinma'n tücc'y ma Jesucristo ytiy'ajt, e ca' m'ixtigihuaaccixy, jigix co anajty ich ajt nHuindzin Jesús ymiñ jadüg'oc ya naaxhuiñ miid tüg'ócíy je mibijcpidijc huidibi miid huádz yjot yhuinma'n, jëbi miich ajcxy mnayguëxigiiyb ma Dios Teedy yhuinduu miid huádz mjot mhuinma'n, ca' ti xihuin ma Dios miid miich ajcxy.

4

Je tzinaayin jugy'ajtin huidibi Dios yjäygidacy

¹ Jadüg nax, migügtijc ajcxy, jadachambi may'ajt nbijctzooyich, e nyajniijccixy miid ajt nHuindzin Jesucristo ycixpi co ajcxy mjaccuychinähuiipy Dios y'ayuc ytiy'ajt, jadu'n nej ti nyaj'ixpicxyich miich ajcxy, etz mjactzinähuiipy ajcxy jadu'n nej jëbi Dios jäygidägy ajcxy mdzinaayin, jadu'n nej ti mdungixy.

² Miich ajcxy mnejhuiyb je cötujcin huidibi ti nyaj'ixpijccixy. Jada cötujcin ich ajt nHuindzin Jesucristo ti xyajniibicyich. ³ Miich ajcxy mnejhuiyb je cötujcin jadu'n nej Dios tzocy co huádz jot huádz huinma'n myajtungixipy ma yi mdzinaayin mjogy'ajtin. Ca' huaad mmigapxtigooygixy tüg töxyjäy.

⁴ Miich ajcxy mnejhuiyb Jesús ycötujcin co copicy nidüg nidüg yëydijc pigipy tüg töxyjäy etz yajmij'adip ytöxyijc, etz nañ miiddzinähuiipy miid oyjot oyhuinma'n. ⁵ Ca' Dios jadu'n tzocy co je yëydijc nijot'aty töxyjäy miid jibichuinma'n, jadu'n nej yi jäy ajcxy y'idich huidibi ca' nejhuiy Dios ytiy'ajt.

⁶ Ca' huaad ni pin migapxtigooyi ymigüg ytöxyijc, com Dios yi' tzaachytunib mijcajee pinjaty migapxtigooyb ymigüg ytöxyijc. Jada cötujcin ti nyajni'ixiiygixy jayhuin. ⁷ Com Dios jadu'n ti xyhuin'ijxim jigix oyjot oyhuinma'n ndunim, canan co ndunim jibic jot jibic-huinma'n. ⁸ Co tüg jäy ytundigooy miid huingbi töxyjäy huidibi ca' töxyijc'adyii, hue' je' ñixiicpy yajxiicpy Dios ycötujcin, canan jäy ycötujcin ñixiicpy yajxiicpy, e nañ ñixiicpy yajxiicpy je Espíritu Santo huidibi Dios ti quexy ma ich ajt.

⁹ Miich ajcxy mnejhuiyb je cötujcin co copicy mdzogyi mjihuihuiipy ajcxy mmigügtijc huidibi tzinaayb jim Macedonia ñaaxjot. Migügtijc ajcxy, may'ajt nbijctzooybich co jacnaychójcigix jacnayjihuiiyigix. ¹⁰ Janch tiy'ajt jadu'n co miich ajcxy mdzocy mjihuiy tüg'ócíy je migügtijc huidi tzinaayb jim Macedonia ñaaxjot. Nmigügtijc ajcxy, may'ajt nbijctzooybich co jacnaychójcigixy nayjihuiiyigixy etz mnayyajmij'ájtigixy mij cajee. ¹¹ Jatyim tzinaaygix nicy xeemy, agujc jotcujc. Pidäg ajcxy mjot mhuinma'n ma mgi'mdzinaayin, etz nañ jatyim naymidúunigix. Jada tiy'ajt ti najtzcapxiyi ajcxy jayhuin. ¹² Tungix mgi'mdung, jigix yi jäy ajcxy huidibi ca' ymibicy xyajmij'adip ajcxy, etz nañ jadu'n ca' myajmayjadipy ajcxy ni ti.

Co anajty je Huindzin Jesús ymiñ ya naaxhuiñ jadüg'oc

¹³ Migügtijc ajcxy, ndzojycpich co miich ajcxy mhuiñihuñhuip je tiy'ajt ma je' yajpaady y'alma je migügtijc tiibi y'öccixy, jigix ca' mdájcxipy mmáygixipy, jadu'n nej je jäy ajcxy nidajcixy nimaygixy huidibi ca' mibijccixy co Jesús yajjugypiga'ñ jadüg'oc je tiibi ajcxy y'o'ccixy. ¹⁴ Jadu'n nej ich ajt nmibijcim co Jesús yjugypijcy co y'o'cy, nañ jadu'n Dios yajjugypijctähua'ñ je öcpidijc huidijaty ajcxy mibijc Jesús.

¹⁵ Paady ycixpi ich miich ajcxy nnimaaygixy co ajt nHuindzin Jesús tiy'ajt ti yecy co ich ajt huidibi jacjgy'ajtp co anajty Jesús yhuimbity ya naaxhuiñ, tügmucy xyajnicxaanim müid yi mibijcpidijc tiibi y'o'ccixy. Ca' ich ajt njayijp'adaanim yi tiibi y'o'ccixy, yi' ajcxy jayijp'adamb. ¹⁶ Ich ajt nHuindzin Jesús ci'm yhuimbida'ñ ya naaxhuiñ chona'ñ tzajpjoty müid ycotujcin, müid ymic'ajtin, e yi' mic capxamb ane'mamb. Huimbidamb Jesús quipxyi müid tüg ángel mijtungmüdpí huidibi nañ jadu'n mic capxamb ane'mamb. E co anajty yhuimbity, chi Dios yaxxuxa'ñ yi' ytrompeta, e tim huiñ'itiy Jesús xyajpidictähuaanim ya naaxhuiñ, e chi ajt naybadaanim müid Jesús jocjoty. ¹⁷ E chi ich ajt huidijaty anajty jactzinaayim, naybadaanim müid ajt nHuindzin Jesús jocjoty quipxyi müid je'ajcxy huidibi anajty ti yjugypicy jadüg'oc. E jadu'n ndzinähuaanim huiñixi huiñitiempo müid ajt nHuindzin Jesús. ¹⁸ Müid jada ayuc tiy'ajt nayyajtocugüiyigix miñ xyipy.

5

¹ Migügtijc ajcxy, ca' ycopicyity njacnijayüygixipy jadu'n nej je xii je tiempo yca'pxa'ñ. ² Miich ajcxy mnejhuñiyb co ich ajt nHuindzin Jesucristo yhuimbida'ñ ya naaxhuiñ tzaachytuna'ñ yi mayjäy müid ypocy ycixpi. Jesús miinaamb mina anajty je mayjäy ca' ti ocjijp'ixxni. Jadu'n ymiina'ñ jadu'n nejjihuñy tüg meetzpi ymiñ coodz co ymeedza'ñ. ³ Co anajty je mayjäy ymiinaangixy: "Cham ooy jotcujc ndzinaayim, ca' ma tzip capxy", chi timitiina jotcömoñi Dios yajtigoya'ñ je naaxhuiñybi. Timitiina ayo'n ñimiñiyb jäy ajcxy. Tim jadu'n nipaady nej töxyjäydijc timitiina ypa'mbety co tiempo ti yhuaad'ajtni co y'ung yajma'xung'ada'ñ. E ni pin huaad cacöguégipy je tzaachypí co Dios anajty ytiy'ajt, jadu'n yi' ajcxy nipaady jadu'n nejjihuñy ajcxy ti ymi'öctigoy. Ijtcix ni'ixi müid tüg'öciy Dios y'ayuc ytiy'ajt, paady miich ca' jadu'n myajpáatcixni nejjihuñy mdzinaaygixy agootztuuby. Ca' ajcxy mgixipy mgüedipy mina anajty Jesús miñ jotcömoñi, jadu'n nej jäy nigoobi ycixy ycuency co ti ymeechyüi. ⁵ Com tüg'öciy miich ajcxy Dios y'ayuc ytiy'ajt mhuiñihuñyigixy, jadu'n nipaady jadu'n nejhuyi ti mgoximüygixy ti mgodixcixy. Ich ajt ca' njacyajpaatim agootztuuby. ⁶ Paady ycixpi ca' huaad njäydiigooyim Dios ytiy'ajt, ca' huaad nmi'öctigooyim jadu'n nej yi' jacjaydyii jäy ajcxy huidibi ca' cuenditui Dios y'ayuc ytiy'ajt, jadu'n yi' ajcxy nipaady jadu'n nejjihuñy ajcxy ti ymi'öctigoy. Ijtcix ni'ixi müid tüg'öciy Dios y'ayuc ytiy'ajt. Mi'ijtcix huijy cujc mjot mhuiñma'ñ. ⁷ Yi' jäy ajcxy huidibi maab, coodz ajcxy ymäy. Yi' jäy ajcxy huidibi muucip, coodz ajcxy ymüucigixy. ⁸ Ich ajt huidibi nnejhuñyim Dios ytiy'ajt, copicy huijy ycujc ajt ndzinaayim, e nañ copicy nmibijcim Jesucristo e nañ naychójcigix nayjihuyigix miñ xyipy, jadu'n nipaady nej soldadtijc ñaygohuáanigixy müid pujx huidibi ymüid ma ycaach. E müid co njijp'ixxim co Dios xyajñidzögaanim ajt n'alma, jadu'n nipaady nejjihuñy soldadtijc ñaygohuáanigixy müid ypujxcöjup. ⁹ Com Dios xyajjugy'ajtim co ychaachytunaanim xyajtigoyaanim, Dios xyajjugy'ajtim nej n'alma jébi paatim nidoocin co nmijpidaacim ich ajt nHuindzin Jesucristo. ¹⁰ Jesucristo ti y'ögy müid

ajt nbocy ycixpi, jigix jëbi huaad ndzinaayim jiiyby tzajpjoty quipxyi müid yi', ca' ñejity pen ti anajty n'o'cim o pen jüni anajty njugy'ajtim co anajty Jesucristo yhuimbity ya naaxhuiñ. ¹¹ Paady ycixpi jacnayjotmicmigápxigix, e nañ jacnaybubéjtigix nidüg nidügti, tim jadu'n nej cham mdungixy.

Pablo capxhuijy yi mibijcpidijc ajcxy

¹² Migügtijc ajcxy, may'ajt nbijctzooybich co yajmij'ajtcixy ajcxy yi migügtijc huidibi tumb ma müich ajcxy müid Dios y'ayuc ycixpi. Yi' ajcxy huidibi xyajni'ixiyyb Dios y'ayuc ytiy'ajt, yi' ajcxy xycapxhuijip müid ajt nHuindzin Jesucristo y'ayuc ytiy'ajt. ¹³ Copicy myajmij'ajtcixipy ooy, etz nañ mdzójcxipy müid je Dios ytung ycixpi huidibi ajcxy ytumyb ma müich ajcxy. Tzinaaygix jotcujc ca' ma tzip capxy.

¹⁴ Nañ jadu'n, migügtijc ajcxy, nyajñibjcpy ajcxy co myaj'ojip yi migüg ajcxy huidibi ca' ti dung tuna'ñ, etz nañ mjotmicmigapxip huidibi ajcxy tajp maayb, etz nañ mbubedipy ajcxy huidibi hueeni müid ymibijcin, etz yajtungix mecxtujcin müid tüg'óciy migügtijc.

¹⁵ Ich müich ajcxy nimaayb co ca' ni pin huaad yaj'ahuimbidiy jibic ma ymigüg huidibi ti ymidundigoyi. Nañ jadu'n nimaaygixy co naymi'oyjäy'ájtigix nidüg nidügti. Nañ jadu'n oyyäy'ajtin mdunipy ajcxy müid tüg'óciy naaxhuiñyay.

¹⁶ Jatytim müid'ajtcix jotcujc'ajtin jabom jabom. ¹⁷ Capxtaaccix etz mibijctzoogix Dios jabom jabom. ¹⁸ Yajnajxcix jäygidaacin ma Dios pen ji ajcxy mjaajtcixy ayoogixy nejyaty, com Dios ooy yjotcujcity co je migügtijc huidibi mibijcp Cristo Jesús yajnaxy ajcxy jäygidaacin ma yi' jabom jabom müid tüg'óciy huidibi tuunip jajtíp ma yi' ajcxy.

¹⁹ Capxymidoogix je Espiritu Santo, co ngacapxymidoohuim je Espiritu Santo huin'it nyajtigooyim Dios yjihui'ñ ymic'ajt huidibi yajpatp ma ich ajt.

²⁰ Yajjotcujc'ajtcix huenpinity pin Dios y'ayucpidzimb ma müich ajcxy. ²¹ Jëyi janchty m'ixipy peni quipxyiyyb müid Dios y'ayuc huidibi ajcxy ycapxyp. Mijpidaaccix je ayuc tiybi. ²² Ixmajtzcix tüg'óciy jibic ayuc jibic-huinma'ñ.

²³ Dios nmibijctzooybich, je Dios huidibi yejcpy jotcujc'ajtin, co ajcxy xyajhuaatztaayip mjot mhuinma'ñ ma yi' jibicpi. Dios nmibijctzooybich co yi' ci'm xycuendi'ajtip huádz oy yi' m'alma ajcxy, etz yi' mjihui'ñ, etz mnücx mgohuajc, ca' ma pocy yquëxigy, ixti mabaad anajty ich ajt nHuindzin Jesucristo ymiiñ ya naaxhuiñ. ²⁴ Je Dios huidibi ti xyajmibijccixy, tudägy yi', e ycuydunipy yi' y'ayuc müid müich ajcxy.

Capxpooctxin huidibi cijxnip je necy

²⁵ Migügtijc ajcxy, mibijctzoogix Dios müid ich ajcxy ycixpi.

²⁶ Naygapxpóocxigix xic xon nidüg nidüg müid oyjot oyhuinma'ñ.

²⁷ Nhuindzin Jesucristo ajt ti xyajñibicyich jada tung, paady nyajñibijccixy co jada necy mgápxcixipy ni'abidizimy ma tüg'óciy mibijcpidijc.

²⁸ Dios nmibijctzooybich co ich ajt nHuindzin Jesucristo xyconuucxip ajcxy. Jadu'n jada. Amén.

2 TESALONICENSES

Yi Mimetz Necy Huidi San Pablo Yajniguejx Je Mibijcpidijc Jim Tesalónica

¹ Hich Pablo mïid Silvano etz Timoteo cham nguexyich jada necy ma je migügtijc huidibi ajcxy jim Tesalónica yajpatp, etz yajpatcixy ma ïich ajt nDios Teedy etz ajt nHuindzin Jesucristo. ² Huen ïich ajt nDios Teedy etz ïich ajt nHuindzin Jesucristo may'ajt oy'ajt tunipy mïid miich ajcxy etz xyajjotcugïyigixip.

Dios tïyduñipy yi pocyjäydijc ajcxy co anajty Cristo ymiñ jadug'oc

³ Migügtijc ajcxy, njatytimyajnaxypich jabom jabom jäygidaacin ma Dios mïid miich ajcxy ycixpi. E jadu'n copicy nyajnaxyich jäygidaacin ma Dios, com miich ajcxy mibijcipy Jesucristo nigï jabom jabom, etz nañ nigï jabom jabom naychójcigixy nayjihuiyigixy nidüg nidüg. ⁴ Com miich ajcxy ooy nuucxy meecxy m'ijtcixy ma yi tzaachypi etz ayo'n huidibi ajcxy mminajxyp myajnaxyp, e nañ ooy mmijpidaaccixy Jesucristo, paady ycixpi ngapx-paadyich miich ajcxy ma yi migügtijc huidibi mijpidaacp Dios majaty tüg tüg cajp. ⁵ Miich mmibijcin etz mmecxtujcin yi' je' ijxpejtïp co Dios ytudägyity mïid ajcxy ytyduunin, e xycöbïccixy co jëbi mdigïyigixipy ma yi y'ane'mdac mïid mmibijcin ycixpi. Mïid jada ycixpi miich ajcxy mminajxcixy myajna-jxcixy tzaachypi ayo'n.

⁶ Mïid co Dios ytudägyity, yi' tzaachytunamb yi jäy ajcxy huidibi miich ajcxy xy'ixhuidijtp xypahuidijtp. ⁷ E nañ yi' ajcxy xymöhuipy jotcujc'ajtin tim jadu'n nej xymöhuängixyich jotcujc'ajtin je huin'it xï co anajty ajt nHuindzin Jesucristo ñayguexigyii co anajty miin ya naaxhuiñ jadüg'oc choon anajty tzajpjoty. Nañ je ängeles ajcxy mic'ajt mïidpi miinaamb quipxyi mïid Jesucristo. Miinaamb Jesús mïid ane'min cötujcin e yajtigoydähua'ñ pocyjäydijc, tim jadu'n nej tüg mijjin yajhuindigoydäy huen ytiijity. ⁸ Jesucristo chaachytunamyb je mayjäy ajcxy huidibi ca'p cöbicy Dios, etz huidibi ca' mijpidägy ajt nHuindzin Jesucristo y'ayuc ytiy'ajt oybi. ⁹ Yi jäy ajcxy huidibi miich ajcxy xy'ixhuidijtp xypahuidijtp, Dios yi' tzaachytunaañip ajcxy y'alma huinixï huin'tiempo. Dios ypidägaanip yi' ajcxy y'alma jigüëgy ma ni caminaxï ajcxy ijxcixyp je nHuindzin Jesucristo etz yi' y'oy'ajtin etz ymic'ajtin. ¹⁰ Jadu'n yjadipy je huin'it xï huin'it tiempo co anajty ajt nHuindzin Jesús miin ya naaxhuiñ, Jesús je mibijcpidijc yajmij'ada'ñ etz huindzigihua'ñ, e nañ jadu'n miich ajcxy myajmij'adipy etz mhuindzigihuiipy mïid co anajty y'ayuc ajcxy ti mmibijcï, je ayuc huidibi ti ngapxhuäcxyich ma miich ajcxy.

¹¹ Paady ycixpi jabom jabom Dios mmibijctzooyich mïid miich ajcxy ycixpi, jaydebi tudägy ajcxy mdzinähuiipy, e Dios huidibi ti xyhuin'ijxcixy yjäygidägipy yi' miich ajcxy mdzinaayin. Nañ jadu'n Dios mmibijctzoogixy mïid jada ycixpi co yi' cuydunipy huidibi miich ajcxy mbijctzooyb m'amidooyb mïid oyjot oyhuinma'ñ. E nañ ycuydunipy yi' huidibi miich ajcxy mdumyib mïid mmibijcin. ¹² Com Dios jadu'n tunamb ma miich ajcxy mjot mhuinma'ñ, paady ycixpi ajt nHuindzin Jesucristo yxï capxpaady y'idipy ma miich ajcxy mdzinaayin etz nañ jadu'n miich ajcxy capxpaady

m'idipy ma Jesucristo. Jadu'n yjadipy com ñich ajt nDios etz ajt nHuindzin Jesucristo may'ajt oy'ajt tuñ ma miich ajcxy.

2

Je jibic jäy huidibi huin'ñmb mayjäy

¹⁻² Migügtjic ajcxy, cham nyajmñidmrydaaccixy je xii je tiempo co anajty ajt nHuindzin Jesucristo huimbidaani jadüg'oc ya naaxhuiñ, etz naybadaanim mñid yí. Nmñinucxtaapryich miich ajcxy, ca' mhuinma'ñytigooygixy co pinjaty ymina'ñ co Jesucristo ti yhuimbity. Ca' mmibijccixy, ca' jada ayuc yjanchity. Ca' mdungixy cuendi yi jäy ajcxy y'ayuc huidibi minamb co tüg espíritu ti yajnejhuuygixy co yjadu'nity, o co muum a'ijxnaxy amidoonaxy capxy ayuc, o co muum i'xpídzimy jada ayuc ma tüg necy huidibi ajcxy yti'jpy co ñich necy'y adyii. ³ Ca' myajhuin'ñingix janch ni nej. Jayijp ca'ni anajty je xii je tiempo yhuaad'atyñi ma anajty Jesucristo ymiina'ñ jadüg'oc ya naaxhuiñ, mayjäy ajcxy midziptzona'ñ Dios tiydudägy co ñayguëxigiyb tüg jibic jäy mic jäy huidibi Dios yajcödigoamy tücc'i'yi. ⁴ Jada jibic jäy ymidziptzonamyb tüg'óciy tijaty huidibi jäy Dios'ajtpy, e nañ ymidziptzonamyb huidibi jébi yaj'ojadaty. E nañ yí' naybidägümb amij agix jadu'n nejhuüy yjacmijity ca'ydi Dios. E nañ yí' ypidägamb y'ane'mdac ma Dios yti'j, e naybidägaanip nejhuüy Diosity.

⁵ ¿Nej ca' mjäymejtzcixy co jadu'n nimyidacyich tüg'óciy jada tiy'ajt jayhuin je taab anajty n'ityich ma miich ajcxy? ⁶ Jadachambi miich ajcxy mnejhuüyb pin yajhuäcxijp jada mic jäy jada jibic jäy, jigix ca'ydi ñayguëxigiyii jayijpni ma ca'ni tiempo yhuaad'atyñi mina Dios a'ixñhuip co ymiinipy. ⁷ Je mic jäy je jibic jäy cham ñi'ixiyyb ameech je jibicpi huidibi ytunamyb, jéyi ytigoy'ityñi mina je tü'aa y'ahuächyii, je huidibi yajhuäcxijp. ⁸ Co anajty je jibic jäy ytü'aa y'ahuäch, chi ajt nHuindzin Jesús yajcödigooypy mñid tüg puxujin. Jesús yajcödigooypy je jibic jäy mñid yí' y'oy'ajtin etz ymij'ajtin co anajty yhuimbity ya naaxhuiñ. ⁹ Je jibic jäy, yí' je' ymiid je mujcu' yhuinma'ñ etz ymic'ajt, e ytunamyb mijhuinma'ñ etz i'xpejt huidibi anijip. ¹⁰ Je jibic jäy ytunamyb tüg'óciy tijaty jibic-huinma'ñ jigix jébi huin'ñnip yi jäy ajcxy huidibi y'alma tigoyipy, mñid co ca' ajcxy cöbijccixy, e nañ ca' tzojccixy Dios y'ayuc ytiy'ajt huidi mñid jébi y'alma ñidzoocixy. ¹¹⁻¹² E je' ycixpi co ca' ajcxy cöbiga'ñ Dios ytiy'ajt, paady Dios y'ixmadzáanigixy huen yajhuin'ñingixy, huen mibijccixy je mujcu' y'anii, e mñid jada ycixpi jébi Dios yajtigooyi yí' ajcxy y'alma nidüg'óciy huidibi ca' mibiga'ñ Dios ytiy'ajt. Jacotcujc ajcxy co jibic-huinma'ñ tungixy.

Je jäy ajcxy tñbi Dios yhuin'ixyii jigix y'pocyrñihuädzi'py

¹³ Migügtjic ajcxy huidibi ajt nHuindzin Jesucristo ooy tzocy jihuüy, jabom jabom nyajnaxyich jäygiadaacin ma Dios mñid miich ajcxy ycixpi, mñid co Dios ti xyhuin'ijxcixy oga'n'aty, jigix jébi m'alma ñidzoocixy mñid Dios yjihui'ñ ymic'ajt, etz nañ mñid Dios y'ayuc ytiy'ajt huidibi ti mmibijccixy. Je Dios yjihui'ñ ymic'ajt xyajhuaatzip ajcxy mjibicjot mjibic-huinma'ñ. ¹⁴ Paady ycixpi Dios ti xyhuin'ijxcixy, e nañ xyajmibijccixy mñid yí' y'ayuc ytiy'ajt huidibi ñich ajcxy ngapxhuäcxyp, jigix jébi mbáatcixipy oy'ajtin ma ñich ajt nHuindzin Jesucristo.

¹⁵ Paady migügtjic ajcxy, mibijccix tiydudägy, ca' m'ixtigñhuäccixy, e ca' mjäydiigooygixy je tiy'ajt huidibi ñich ajcxy ti ngapxhuäcxxy ma miich ajcxy, etz jadu'n nej ti nnimaaygixy necyjoty. ¹⁶⁻¹⁷ Huen ñich ajt nHuindzin Jesucristo

ci'm etz ajt nDios Teedy may'ajt oy'ajt tunipy mïid miich ajcxy, e xya-jjotmicpíjccixipy etz xyajmibíjccixipy tiydudägy, jigix oybi ayuc mgápxcixipy etz mdunipy ajcxy tüg'óciy oybi huinma'ñ. Ich ajt nDios Teedy etz ich ajt nHuindzin Jesucristo xychojcim xyjihuiyim, e ti xymooyim jotcujc'ajtin huinixibi, e nañ ti tuñ may'ajt oy'ajt mïid ich ajt ycixpi, jaydëbi nijjp'ijxim oy'ajtin jilby tzajpjoty.

3

Mibijctzoogix Dios mïid ich ajcxy ycixpi

¹ Jadügnax, migügtijc ajcxy, tungix may'ajt mibijctzoogix Dios mïid ich ajcxy ycixpi, jigix jëbi ngapxhuácibich huinmic jotmic Jesús y'ayuc ytiy'ajt huingnaax huinggajp. E nañ mibijctzoogix Dios jëbi yi jäy ajcxy mijpidägipy Jesús y'ayuc ytiy'ajt oybi, tim jadu'n nej miich ajcxy ti mmijpidaaccixy. ² Nañ mibijctzoogix Dios mïid ich ajcxy ycixpi, jigix ich ajcxy Dios xyñihua'nipy xycohua'nipy ma yi jäy ajcxy huidibi jibic-huinma'ñ ymïid, huidibi jibic ich ajcxy xytunamb, com mayjäy ca' mijpidägy Jesús y'ayuc ytiy'ajt. ³ Ich ajt nHuindzin Jesucristo tudägy yi', e xypubedip xypudigihuiip ajcxy jigix miich ajcxy ca' mjetmetzcíhuipy ma yi mmibijcin, e nañ xypubedip ajcxy, jigix ca' xymimadaaccixipy je jibicjäy huidibi Dios ca' capxymidoy. ⁴ Ich ajt nHuindzin Jesús jotcujc'ajtin ti xymóogixyich mïid miich ajcxy ycixpi. Nmibijcipyich co miich ajcxy mguydumyb je Dios y'ayuc ytiy'ajt huidibi nyaj'ixpijccixy etz mjaccuydunaamyb ajcxy. ⁵ Com ca' ich njaty nej nijjpcogapxihuibich, chi nguejxyich cogapxy, nnejhuihua'ñich nej anajty ajcxy myajpatcixy ma yi mibijcin, tziğiib ich anajty co nicey mujcu' xypidaaccixy jibictuum, chi ich anajty ajcxy ndung ti ñaadigi'aty.

Ooyycopicyity co nduunim ma ajt ndung

⁶ Migügtijc ajcxy, mïid ajt nHuindzin Jesús yxi etz ymic'ajt jada ane'min ajcxy nyajnibijcipy, co copicy ajcxy m'ixmadzipy yi mmigüg huidibi ca' ytuna'ñ ma yci'mdung, etz huidibi ca' cuyduñ Dios ytiy'ajt jadu'n nej ich tiy'ajt ti nyecy. ⁷ Miich ajcxy mnejhuiyb jadu'n nej ich ti ndzinäyich ti njugy'atyich co ti n'ityich ma miich ajcxy. E jëbi tiy'ajt ajcxy mbigipy ma ich ndzinaayin nej jëbi miich ajcxy mdzinaaygixy. Co anajty ich njimity ma miich ajcxy, ca' ich n'ixmajch ngi'mdung. ⁸ Tüg'óciy ich ajcxy ngaayin n'uucin ngojuuyich. Nduñ n'ayooyich anajty xim tzuum, co anajty ca' n'adziba'ñich ni tüg. ⁹ Dios ti xymöyich mic'ajt ane'min co ixipy ajcxy mbubejtin ti nbijctzoohui o ti nbijctzoohui ixipy ajcxy mgaayin m'uucin, per ca' ich ajcxy jadu'n ti ndungixyich, jigix ijxpejt ajcxy mbigipy ma ich ajcxy. ¹⁰ Com co anajty n'ityich ma miich ajcxy jada cötujcin ajcxy nyajnibijc co pinjaty ca' ytuna'ñ, ca' ajcxy myajcayipy myaj'ügipy. ¹¹ Jadu'n ich ti nnejhuiy co nijëjity miich ajcxy ca' mdunaangixy mgi'mdung, jëyi myöygixy mnajxcixy jäyjün jäydijc. ¹² Yi jadu'mbi jäy ajcxy nyajnibijcipyich mïid ich ajt nHuindzin Jesús yxi co huen tungixy jabom jabom ma yci'mdung, ca' huaad pin adzijpcix anajxcix jigix jëbi paadip ajcxy ycaayin y'uucin.

¹³ Migügtijc ajcxy, oybi jatyim tungixy jabom jabom, ca' mjetmetzcíyigixipy. ¹⁴ Pen nidügti ma miich ajcxy ca' tuñ cuendi jada ayuc huidibi ajcxy nyajni-jayiyb, ijxcix pin je', e chi ca' mjaactungixip cuendi, e ni ca' mïid myöymujc mnaxmújcxipy, jigix chöydunipy. ¹⁵ Ca' ajcxy huaad midzip'ajtcixy yi jäy ajcxy

huidibi ca' yajxon cuyduñ Dios ytiy'ajt. Hue' janchtiy mgapxhuijcix oy'amy jadu'n nej tüg mibijcpi.

Capxpoox'in huidibi cijxnip je nocy

¹⁶ Huen ñch ajt nHuindzin Jesucristo huidibi jotcuje'ajtin yejcp, ci'm xya-jjotcugiiygixipy jabom jabom oytim minaaxiiijity oytim yma'amyity. Huen je Huindzin Dios xypubejtcixy xypudigiiygixy.

¹⁷ ñch, Pablo, jada capxpoox'in ci'm njaayich. Jadu'n nfirmajiyich tüg'óciy ñch nnocy, e jadu'n miich ajcxy mnejhuñhuipy co ñch jada nocy'adyii. ¹⁸ Huen ñch ajt nHuindzin Jesucristo may'ajt oy'ajt tunipy miid tüg'óciy miich ajcxy. Jadu'n jada. Amén.

1 TIMOTEO

Yi Jayijpi Necy Huidibi San Pablo Yajniguejxy Timoteo

¹ Hich Pablo, Cristo Jesús xyaj'apóstol'ajtpich. Yi Dios huidibi xyñihuaanim xyyajñdzoocim ajt n'alma, etz Cristo Jesús huidibi xymöhuaanim jugy'ajtin huinixiibi, yi' ajcxy ti xyajñibicyich co yi' y'ayuc ngapxhuäcxibich. ² Cham ich miich nijayiy Timoteo. Jadu'n njihuüy nej ich miich ngi'm'ung'adyii, co miich Dios ytiy'ajt ti mbaady ma ich. Huen Dios Teedy etz Cristo Jesús ich ajt nhuindzin may'ajt tunipy müid miich, huen xypa'ayoohuipy etz xyajjotcugihuipy.

Nijëjity jäy yaj'ixpicy huidibi ca' ytiy'ajity

³ Hui'mi' miich jim Efeso, jadu'n nej nimay je taabi anajty ndzona'ñich jim Efeso nnicxa'ñich anajty Macedonia. Hui'mi' jim, jigix mgapx'adugipy je jäy huidibi najtzcapxiiyb je ayuc ca'p ytiy'ajity. ⁴ Mgapx'adugipy je nigooobi y'ayucity. Mgapx'adugipy yi' ajcxy huidibi tzachnigapxp tzachnimiydacpy yi judiojäy ajcxy y'ayuc jadu'n nej huidibi ñi'ap'ajtpy ñideedy'ajtpy ajcxy. Yi jadu'mbi ayuc nigooob yajhuinma'ñyidigoy pinjaty ixpijcp Dios ytiy'ajt.

⁵ Jadu'n Dios tzocy co huen jäy ajcxy naychojctäyüii müid oyjot oyhuinma'ñ. Huen ajcxy Dios yajmij'aty janch cixyjot huinjot. Co pin yajmij'aty Dios janch cixyjot huinjot, ooy ajcxy oy ñajjihuiiyigixy. ⁶ Nijëjity jäy ajcxy ti ixmajtzn je Dios ytiy'ajt, ti ajcxy jipptigiyiiñi je ayuc huinma'ñ huidibi ca'p choobaady. ⁷ Ooy yi' ajcxy jayaj'ixpiga'ñ yi Dios ycötujcin, ni ca' huinjihuuyigixy huidibi ycapxcixyp, ni huidibi ajcxy ñgapxpejtpy.

⁸ Hich ajcxy nnejhuuyim co yi Dios ycötujcin oy yi' pen nyajtunim nej ypadyii nej ytiy'ajity. ⁹ Nejhuuyim co yi Dios ycötujcin ca' yi' tzaachytuñ oyyäydijc, jëyi tzaachytuñ pin ca' capxymidooy Dios, pin midundigooyb Dios ycötujcin. Je Dios ycötujcin chaachytumyb jäy huidibi ca' cuydungixy, jäy ajcxy huidibi ca' ytudägyity, jäy huidibi ca' capxymidoogixy Dios, jäy huidibi pocytungixy, jäy huidibi ca' huindzigi'ñ yajtungixy müid Dios, jäy ajcxy huidibi capxtigooyb, huidibi ytaj yteedy yaj'öccixy, huidibi jäy yaj'öccixy. ¹⁰ Je Dios ycötujcin chaachytumyb pin migapxtigooyb töxyjäydijc etz yëydijctijc, huidibi miyëydijc ymähua'ñ. Dios nañ chaachytumyb je jäy huidibi jäy majtzp etz toognaxy, chaachytumyb indaacpidijc etz ñihuambejtpidijc. Je Dios chaachytumyb jacjadyii jäy huidibi y'ayuc ca' ytiy'ajity nej Dios tiy'ajt müidity. ¹¹ Jadayaabi tiy'ajt huätzpi oybi tügiyb müid Jesucristo y'ayuc ytiy'ajt oybi huidibi ich nDios, je conuucxy yTeedy, ti xyyajñibicyich co ngapxhuäcxibich.

Pablo yjäygidacpy co Dios may'ajt ti tuñ müid yi'

¹² Ooy njäygidägyich co ich ajt nhuindzin Cristo Jesús ti xyajmicpicyich, yi' ti xy'ijxtiyyich, yi' ti xyajñibicyich Dios y'ayuc co ngapxhuäcxpich. ¹³ Hich jecy'ajty jibic anajty nigapxy ni'ojiiyich Jesús. N'ixhuidijty nbahuidijtyich Jesús yjäy. Hich yi' ajcxy nmidundigooyich. Ti yi Dios xypa'ayooyich com ich jadu'n anajty ti n'adich müid co nganejhuiiyich je tiy'ajt, ngamibicyich Jesús ngamijpidägyich Jesús. ¹⁴ Paady yixpí ich ajt nhuindzin Dios may'ajt oy'ajt ti tuñ mijcajee müid ich, co ti xyajmibicyich Jesús. E Jesús ti xymöyich tzojcin jihuiyin müid yi' yjäy ycxipi.

15 Ooy jada yjanchity, e nidüg'óciy jáy ajcxy jébi mibijccixy co Cristo Jesús miin ya naaxhuin co yajpocynihuadza'n pocyjädijc. E ich nigí pocy nmídidyich ca'ydí ni pinjáy. 16 Miid jada ycixpi Dios ti xypa'ayooyich ti xymimecxtucyich, jigix co jáy ajcxy ijxip nej Dios ti ytuñ miid ich, huin'it ajcxy mijpidägipy yí' y'ayuc etz ypaadipy jugy'ajtin huinixibi ma Jesús. 17 Paady chojcpy co ngómayim Dios, je rey huidibi ane'mb huinixi, huidibi niminaa yca'ó'cy, etz nipin ca'ixy. Je Dios tügajc huidibi Dios'ajtp huen ycomay'idipy cham etz tüg'óciy xi tiempo huidibi mimb cidacp.

18 Timoteo, ooy ich miich ndzocy njihuüy. Jada ayuc ich miich nyajnimaydaayb. Mihuindinähuij Dios y'ayuc ca' mhuinma'nydigoyipy. Mgyudunipy jadu'n nej Dios y'ayucnajtzcapxiybi xy'ihuijy xycapxhuijy co mdung nmimajch. 19 Mihuindinähuij Dios y'ayuc ytiy'ajt, huin'it ca' jibic mnayjihuihuüy, jadu'n nej ajcxy jadyii huidibi nejhuüyb je tiy'ajt, e ca' cuydungixy, e jadu'nyí yhuinma'nydigoyigixy. 20 Jadu'n nej Himenes miid Alejandro ajcxy jaty, huidibi ich ti nyajcidigayigixy je mujcu', jigix ajcxy yhuinma'nymedzipy, ca'ydí yajjotma'tcixy Dios.

2

Jadu'n nej jéb Dios nmibijctzoohuim

1 Yi' njatyayajimaayb co ooy ycopicyity capxtaaccixy mibijctzoogixy Dios etz yajnajxcixy Dioscojuyip miid tüg'óciy jáy ajcxy ycixpi. 2 Copicy nmibijctzoohuim ma Dios: reydiç, ane'mbidijc etz codungdjic, jigix jébi jotcujc ndzinaayim, ca' ma tzip. Co jadu'n nduunim, yi' anajty ngoduunim Dios y'ayuc, etz huin'it tiydudägy ndzinaayim. 3 Com yi' jadu'mbi huinma'n ooy yí' y'oyity, e Dios huidibi ich ajt n'alma yajnüdzoocp, oy yí' jáygidägy. 4 Dios chojcpy co tüg'óciy je jáy ajcxy huen y'alma nidzoocixy, huen ijxcixy nejhuüyigixy Dios y'ayuc ytiy'ajt. 5 Tüg je' je nHuindzin'ajtim Dios, etz tüg je' je huingapxpi huidibi jébi ytiy'ajty ma Dios miid ich ajt ycixpi, etz huidibi jéb Dios y'ayuc capxnajxy ma ich ajt: je huingapxpi, je' je' je jáy, je Cristo Jesús. 6 Cristo Jesús nayyojxi naydooci miid ich ajt nbocy ycixpi, ñaygíyeyjci huen jáy yaj'ögyii, jigix jéb ich ajt nbidzümim ma je mujcu' anajty c'am xymiid'ajtim. Jadu'n nej Dios cham jáy yajnejhuüy co je tiempo yhuaad'ajtni, 7 paady Dios ti xyajniibicyich ngapxhuäcxiyich y'ayuc ytiy'ajt, etz Jesús xy'apóstol'adyiijich. Je tiy'ajt jada ngapxpiç, ca' n'indägyich. Ti xyajniibicyich jada tung nej jéb huaad nyaj'ixpicyich, nej jéb huaad mibijccixy Dios, etz nyaj'ixpicyich Dios ytiy'ajt ma yí jáy ajcxy huidibi ca' yjudiojyity.

8 Ndzojcpiyich co yí yéydijctijc huen mibijctzoogixy ojadajticy Dios ma tüg'óciy naymujctac miid oyjot oyhuinma'n, ca' y'adzip y'ahuan'niy, ca' y'ametz yjotmetzity. 9 Nañ jadu'n ndzocypich co yí töxyjädijc huen yhuit yxojx yajtungixy nej ypadyii, huidibi quipxpaady ajcxy paatip. Huen yhuit yxojx pidaaccixy nej töxyjädijc hidib tudägyip. Huen ycohuy cüdigy caaxigy nej ypadyii, ca' ymügügtijc huinnaxtugipy miid yhuit yxojx, ca' nayxóxigixy miid oori, miid perla, e miid tijaty ooy choohuity. 10 Ca' huaad töxyjädijc ñaygómáygixy miid yhuit yxojx, huen janch yajcómáygixy miid y'oyjáy'ajtin, jadu'n nej je jáy ajcxy tungixy huidibi ti ñaygíyégigixy cixyjot huinjot ma Dios. 11 Co jáy ajcxy yaj'ixpicy Dios y'ayuc ma je naymujctac, huen töxyjädijc ajcxy amoyñi amidoo'ljtcixy miid yungnaxy yjot yhuinma'n. 12 Yi' töxyjädijc ca'p niducyich yaj'ixpigiipy jáy ajcxy ma je naymujctac. E ni

ca' ypadyii nicxy yëdyjic ane'my. Huen ajcxy amofni y'ity. ¹³ Dios jayijp yajcojy Adán, jac'axam Eva, paady ycopicy yi yëdyjictijc huen ane'my yi töxyjäydic. ¹⁴ Adán ca' yajtzu'ijxy. Eva yajtzu'ijx, je' ca' Dios capxymido. ¹⁵ Paady yi töxyjäydic ca' ypadyii nicxy nigohuajc'aty yi mibijcpidijc. Dios jotcujc ñayjihuiyii müd co jëyi y'ung'ijxcixy, etz yajmij'ajtcixy Dios, etz tzojtaaygixy ymügügtijc, etz huen ajcxy cuydungixy Dios y'ayuc ytiy'ajt, etz huen tudägy jäy'ajtcixy müd oyjot oyhuinma'ñ.

3

Nej jëbi ytungixy huidibi ajcxy nigohuajc'ajtp

¹ Tiy'ajt jada nej jäy yminaangixy. Pen ji pin najtzogiy nigohuajc'ada'ñ yi mibijcpidijc tüg yi' oybi anajty ytunamyb. ² Pin nigohuajc'ajtp yi mibijcpidijc ooy ycopicyity je' jadu'n naydijüb huidibi ca' ti tundigoy, huidibi tüg töxyjäy müd ca'p ycanaagity, huidibi huijycujc jäy'ajtp, huidibi müd oybi yhuinma'ñ etz tudägypi yhuinma'ñ, huidibi oyjäy'ajtin tumb, huidibi jajtp nej jäy ajcxy yaj'ixpigyp. ³ Pin nigohuajc'ajtp chojcpy tüg jäy huidibi ca' y'amügity, huidibi ca' yhuindzipity, huidibi yajtumb mecxtujcin, huidibi ca' chipcapxy y'ahua'ngapxy, huidibi ca' ti adzocy. ⁴ Pin nigohuajc'ajtp chojcpy tüg jäy huidibi tiydudägy tzinaayb ma yjün ytijc, huidibi y'ung y'anäg yajtzinaayb nicy yxeemy. ⁵ Pen ca' jaty nej y'ung y'anäg migapx ane'mip ma yjün ytijc, ¿nej oc'ane'ma'ñ yi mibijcpidijc? ⁶ Nañ ca'p yjëjity huidibi namni mibicy Dios y'ayuc ytiy'ajt. Ycadimjeczy nicxy ooy amij agix ñayjihuiyii, e nicxy camadägy je ane'min, e yjadipy jadu'n nej Satanäs yjajty co jibic tumb ñayyajhui'mi müd Dios. ⁷ Chojcpy tüg jäy huidibi nidüg'óciy je mayjäy oy ijaxip. Pen ca' yjadu'nity nicxy pin yxíyii, e chi jada anajty je mujcu' ti ymimadägyii co jäy jibic ñigapxiyb.

Yi mutz tungmüid nañ chojcpy huidibi oyjot oyhuinma'ñ müd

⁸ Yi mutz tungmüid huidibi yajpat ma mibijcpidijc chojcpy jäy tudägypi, huidibi nicy xeemy jäy'ajtp, huidibi ca' jäy'aty aguejtmñ aguejtxipy, huidibi ca' y'amügity, huidibi ca' y'adzocy ca' y'ameeñity. ⁹ Huen naybidáacigixy cixygot huinjot ma je tiy'ajt janchypi. Je tiy'ajt huidibi je mayjäy ca' huinjihuiy. Je tiy'ajt huidibi iich ajt nmibijcim. Je' chojcpy pinjaty huidibi ca' ti jibicpi jot'adyii huinma'ñ'adyii. ¹⁰ Pinjaty mutztung yajnicxamb, jayijp jot'ix huinma'ñ'ix pen tudägy yhuinma'ñ. Huin'it jëbi mdungmöy. ¹¹ Yi mutz tungmüidpi ytöxyijc chojcpy co huen tudägy jäy'aty, huidibi ca' ñigapx ñi'ojy ymügü, huidibi nicy xeemy jäy'ajtp, huidibi cuydundaayb tüg'óciy. ¹² Yi jäy huidibi mutztung yajnicxamb chojcpy tüg jäy huidibi picy chinaayb, huidibi ca'p müdity metz o tugüg töxyjäy, huidibi y'ung y'anäg yajtzinaayb nicy xeemy, huidibi tiydudägy tzinaayb ma yjün ytijc. ¹³ Yi mutz tungmüidpi huidibi yajxon ytung cuydungixy, cómay yi' ajcxy idipy ma mibijcpidijc. Nañ ñigi ajcxy ixpijc'idich Cristo y'ayuc.

Dios mijhuinma'ñ tuun müid iich ajt ycixpi

¹⁴ Jada necy iich miich nyajniguejxyp. Njijp'ijxypich co tzojc nnicxa'ñich jim ma miich. ¹⁵ Pen ca' y'oyiy nej tzojc nñicxibich ma miich, ti yam nyajnijayy je janchypi. Müd jada necy huaad jëbi nidüg nidüg mibijcpi yjäy'ajtigixy ma yi mibijcpidijc huidibi mijpidacp Dios juugypi, je Dios huidibi huijtz'ijtaayb etz cohuandaayb je tiy'ajt janchypi. ¹⁶ Janch tiy'ajt jada co mij

yi' yi Dios y'ayuc ytiy'ajt huidibi ti xyajnejhuuyim, je huidibi jecy'ajty ca' pin nejhuuyi. Je tiy'ajt huidibi xyajnejhuuyim co quexy y'ung ya naaxhuiñ.

Dios y'ung hue' je' yaj'ijxy müd ñinicx. Tudägy nayguëxici müd Dios yjihuiñ ymic'ajt. Je Dios y'angeles ajcxy ti ixyii. Ti yajni gapxy yajnimiydägy Dios y'ung ma huidibi ca' yjudiojäyity nañ ti jäy yajmij'ajtcixy Dios y'ung ya naaxhuiñybi. E ti ycöbigyii tzajpjoty ma yi oybi it.

4

Mayjäy ixmadza'ñ yi Dios ytiy'ajt

¹ Yi Espiritu Santo mīnaan co anajty je xii tiempo ycixa'ñ, mayjäy ixmadzaangixy yi Dios y'ayuc ytiy'ajt. Mijpidaaccixy anajty jäy ajcxy y'ayuc huidibi yi huin'ñmbi etz ca'oybi ytiy'ajt müd. ² Jada jäy ajcxy müd anii anajty naybidäacigixy nej ytudägyity, e ca' anajty yjanchity. Ca' ajcxy nej ñayjihuiyii co ajcxy ytigiiy anidaacpi. Ti jadu'n yhuinma'ñy pidaaccixy janch mic. ³ Yi' ajcxy ymīna'ñ co ca' huaad jäy ypijccixy, etz ca' huaad caaygixy nijëjity caayin uucīn. Yi caayin uucīn Dios yi' ti conucxy jigix jëbi jäy ajcxy huidibi mibijccixy etz huinjihuuygixy je tiy'ajt, jëbi yajnajxcixy Dioscojuyip ma Dios etz cöbigipy ajcxy agujc jotcujc je caayin uucīn. ⁴ Tüg'öciy huidibi Dios ti yaj'oyiy, oy yi'. Ca' huaad pin ymīna'ñ co ca' y'oyity. Agujc jotcujc ngöbjicim, jëyi nyajnajxim Dioscojuyip ma yi'. ⁵ Dios ymīna'ñ co huen huidibi caayin huidibi uucīn ooy y'oy yi'. Jëyi co nyajnajxim Dioscojuyip, e huin'it Dios conucxy je caayin uucīn.

Ca' ajcxy mmijpidägy yi nigoobi'ayucity

⁶ Pen miich ajcxy jada ayuc jada tiy'ajt myajnimaaayb yi migügtijc, oy anajty mduñ ma Cristo ytung. Co jadu'n myaj'ixpicy Dios y'ayuc janch cixy jot huinjot, chi anajty myajyegy yi mmibijcin. Ca' mjäy digoyipy yi oybi ayuc huidibi nyajnimaaayb, huidibi ayuc mbanicxyp mbayöyp. ⁷ Ca' mmijpidägy yi nigoobi'ayucity huidibi ca' choobaady ma Dios. Panicxi' payöy' Dios ytiy'ajt. ⁸ Jac'oy co n'ixpicim Dios y'ayuc, ca'ydi co ñinicx ymic'ajt nbaatim. Co yajyujctäy jäy ñinicx, chi ñinicx ymic'ajt paady jëyi. Co n'ixpicim nguyduunim Dios ytiy'ajt, chi tiy'ajt nbaatim nej ya naaxhuiñ ndzinaayim, etz nañ jadu'n nbaatim jadüg jugy'ajtin ma Jesús co anajty n'o'cim. ⁹ Jada tiy'ajt huidibi ti nyajnimäy, janch tudägy jada, jëbi ngöbjictaayim, e nidüg nidüg jëbi mibijccixy. ¹⁰ Paady nduunim n'ayoohuim oy pin xyca'ixaanim. Njijp'ijxim co je Dios huidibi jugy'ajtp xyajnidzögaanim n'alma. Jëyi yajnidzögipy ajcxy y'alma huidibi mijpidaacip Dios y'ayuc.

¹¹ Yajnimä' yi migügtijc huen cuydundaaygixy jada ayuc. Yaj'ixpic jada tiy'ajt. ¹² Huen jäy ajcxy m'ayuc ymijpidaaci, oy miich mutz anäcinity. Myegipy ijxpejt ma migügtijc nej jëb huaad ycapxcixy ymiydaaccixy, nej jëb huaad ytungixy, jadu'n nej jëb huaad oyjäy'ajtin tungixy, jadu'n nej jëb huaad mibijcin yajtungixy ma Dios, jadu'n nej jëb huaad huadz yhuinma'ñ müd'ajtcixy. Co jadu'n mdunipy, huin'it ajcxy mijpidägyipy miich m'ayuc. ¹³ Mabaad iich anajty nicxy ma miich, capx Dios ñecy ma yi naymujectac, capx-huäc etz yaj'ixpicy yi tiy'ajt. ¹⁴ Yajtun yi huij'ajt cujc'ajt huidibi Dios xymoy je taabi je mibijcpidijc mijtungmüdpī xycinixajy, e xy'ayucmoy xymic'ajtmoy ajcxy müd je Espiritu Santo ymic'ajt.

¹⁵ Naybidägyi yajcopijc tüg'öciy huidibi ti nyajnimäy, e niguëxigipy mayjäyduum co ti yajxon m'ixpicy je tiy'ajt. ¹⁶ Nayguend'adii miich ooy

ci'm, nañ jadu'n naygüend'adii ma yi Dios ytiy'ajt, ca' m'ixmach Dios y'ayuc. Co miich jada mdunipy ci'm anajty nayyajnñdzögyii, nañ jadu'n anajty myajñdzooccixy huidibi anajty ajcxy amidoo'ijtp miich m'ayuc.

5

Nej jëbi huaad migügtjic m'ihuijipy mgapxhuijipy

¹ Ca'p huinjijp m'o'jip mij'anäctjic. Oy'amy ihuijicy capxhuijicy jadu'n nej jihuüy mdeedy'adyii. Nañ jadu'n yi yujcyecytjic ihuijicy capxhuijicy oy'amy jadu'n nej jihuüy mgi'mjuugy mgi'mmigüg. ² Yi mij'anäctjic ajcxy töxyjäybi nañ jadu'n oy'amy m'ihuijicy capxhuijicy, jadu'n nej jihuüy yi' ajcxy mdaj'adyii mdzitz'adyii. Yi töxy'anäctjic ajcxy mutz'anäcnip müd'ijtcixy müd tudägyi mjot mhuinma'ñ.

³ Huen yi mibijcpidijc ajcxy yajmij'adipy etz pubedipy yi töxyjäydijc ajcxy co'ögyi, huidibi janch ni ypin ycaca'ty. ⁴ Pen jim töxyjäydijc co'ögyi huidibi müd y'ung etz y'oc'ung, huen ajcxy jaty nej ytaj ñambiid yajmij'adipy, huen oybi yajhuimbidity müd ytaj etz ñambiid. Com yi jadu'mbi huinma'ñ Dios yjäygidacpy. ⁵ Je töxyjäy co'ögyi ca'p pin tim müdity, yi' yjijp'ijxyp co Dios ypubediiyb etz Dios ymibijctzooyb y'ojadajtpy jabom jabom xim tzuum. ⁶ Je co'ögy töxyjäy huidibi tzinaayb müd mayñax xondaacin, jadu'n Dios yajnaxyii jadu'n nej jihuüy y'ögity ytigoyity. ⁷ Yajñima' ajcxy huen cuydungixy Dios ytiy'ajt, jigix ca' jibic ajcxy yajñigapxy. ⁸ Pen ji pin huidibi yajmij'ajtp Dios, e ca' pubeda'ñ y'amigüg, pen ca' y'ung ytöxyijc yajxon ixxy may'aty, ca' yi' cuyduni Dios y'ayuc ytiy'ajt. Nigi anajty yjibicity nej ti y'idäch ca'ydi jadu'n nej huidibi ca' ymibicy.

⁹⁻¹⁰ Yi töxyjäy co'ögyi ajcxy tiibi ytugi'px jimijtiy, jëbi mgojayiiyi yxii ma yi lista huidibi yi mibijcpidijc ypubedamyb. Yi mibijcpidijc ypubedamyb pen tüg ñay anajty müddzinäy, pen oyjot oyhuinma'ñ ymüd, pen ti y'ung yajxon yajyeegy, pen ti migügtjic m'oyjäy'aty, pen ti may'ajt tuñ müd Dios yjäy, pen ti pa'ayooy huidibi ayooob huidibi jottigooyb, pen ti yajtüyöy yajxon nej ytiy'ajtity.

¹¹ Yi co'ögy töxyjäy mutz'anäcnibi ca' mgojayiiyipy yxii ma yi lista huidibi yi mibijcpidijc ypubedamyb. Pen capxytumb co tuna'ñ müd Cristo ycipxi tijaty tung ma naymujctac, ycayjcyity co je oybi anajty yam y'octumyb, chi nijot'ajtni ypigaaani, chi ytung ixmajtznip. ¹² Co yi mibijcpidijc ajcxy ca' jäygidacpi yi' ytung, chi jibic ñayjihuiyii co ca' cuyduñ y'ayuc nej ti ycapxytuñ müd yi Cristo Jesús. ¹³ Jadügnax ca' ytung yajcopicy, jëyi yhuidijtni jayjin jaydjic, e ca' yi'yity, nañ jadu'n ymigüg nigapxni ni'ojiiyñi, capxni mydaacni huidibi ca' y'oyity. ¹⁴ Ndzojcpyich co yi töxyjäy co'ögy mutz'anäcnibi huen pijcixy, huen tzinaaygixy jugy'ajtcixy yajxon, huen ung'ijxcixy anäc'ijxcixy, huen yajxon cuend'ajtcixy yjin ytiy, jigix ca' ajcxy nihuambediiyb ni'ojihuiyb huidibi ca' Dios y'ayuc ixaani midohuaani. ¹⁵ Nijëjity töxyjäy ajcxy co'ögyi ti ixmajtzcixni Dios y'ayuc ytiy'ajt, e ti ajcxy jijptigiyiygixni yi mujcu' yhuinma'ñ.

¹⁶ Pen ji mibijcpidijc yëydijcpi o töxyjäybi müdity y'ajuugy y'amigüg co'ögyi, yi' je' paatip ixipy may'adipy je y'ajuugy y'amigüg co'ögyi, e ca' yaj'idipy ma yi mibijcpidijc nigixp. E jadu'n je' huaad je mibijcpidijc ajcxy pubejtcixy co'ögyi ca' p ti tim müdity.

¹⁷ Yi' ajcxy huidibi nigohuajc'ajtp yi mibijcpidijc huidibi yajxon tumb capxpaady y'idipy. Nigi ajcxy capxpaady y'idipy huidibi Dios y'ayuc capxhuäcxip

etz yaj'ixpicy. ¹⁸ Jadu'n yjaybetyity ma Dios y'ayuc: "Ca' huaad huajyuub y'ajen nbidaacim ma yam ten moody trigo miy co yajpajc'ada'n yi trigo tiim." Nañ jadu'n jadüg'it yjaybetyity: "Yi huidibi tumb paatip yi' ymuju'n." Jadu'n jada ayuc yhuimbizimy: Yi' huidibi yaj'ixpicp Dios y'ayuc paatip huen yajmujuy.

¹⁹⁻²⁰ Ca' mic'amy mdiydunipy pin tungmidpi ma yi mibijcpidijc pen tügpajc huidibi xihuip. Ca' mdiydunipy pin tungmidpi ixti cooni metz o tugig testigo yquexigipy pen janch ti ytundigooy. Pen ytundigooy yi' huidibi nigo-huajc'ajtp, capxpidzim mayjäydumb jigix jacjadyii chigi'n pijccixipy. ²¹ Jada tiy'ajt miich nyajmaayb, Dios Cristo Jesús etz yi' y'angeles ajcxy huidibi Dios ti huin'ijxcixy ñidiy'ajt'ajtcixy co yjanchity jada ayuc. Co mbanicxip jada tiy'ajt, ca' huin'ixpety mdiydunip mdzaachytunip mibijcpidijc. ²² Ca' mic'amy mginixajipy co myajtungbiga'nip jäy huidibi ca' m'ixy'adyii. Ycajcyity ypocytunipy, e tú'ciy mbocycähuaangixy miich müid yi'. Miich nayguend'adü jigix ca' mbocycähuiipy.

²³ Miich Timoteo, pen pijcp mjot, tzoy'adü hueen vino, com jac'oy yi' ca'ydi co m'ügipy huadz ni.

²⁴ Jadyii jäy huidibi jibic-huinma'n müid yajnejhuihuipy yi' ajcxy yjibic-huinma'n ma anajty ca'ni yajtiydungixy. Jacjadyii jäy ca' yajnejhuüy yjibic-huinma'n ixti cooni yajtiydungixy. ²⁵ Nañ jadu'n jadyii jäy yajnejhuihuip co oyjäy'ajtin anajty ti tungixy, jacjadyii jäy ca' mic'amy yajnejhuihuipy co oyjäy'ajtin ti tungixy. Yi' oyjäy'ajtin ca'p yi' yhuimipy coyüch.

6

¹ Tüg'óciy tumbidijc huidibi ajcxy mibijcp huidibi ajcxy ijtp cojuuyy codoogiy, huen yajxon yajmij'ajtcixy yhuindzin. Pen ca' jadu'n tungixy, chi je huinjäydijc jibic nigapxaani ni'ojihuaani yi' Dios etz yi' ytiy'ajt. ² Pen yi' tumbi müid yhuindzin huidibi yajmij'ajtp Dios, ca' y'oyity co nixigipy yajxigipy yhuindzin. Huen ajcxy nigä yajxon yajmij'ajtcixy, com hue' je' Dios yjäy. Yi' huidibi nihuindzin'ajt ypadamyb je oybi huidibi je' ytumbi ytung'ajtpy. Jada tiy'ajt yaj'ixpic etz capxhuäcx.

Jotujc'ajtin nbaatim ma Dios ytiy'ajt

³⁻⁴ Pen ji pin huingbi tiy'ajt yaj'ixpicy huidibi ca' ñaybadyii müid je Huindzin Jesucristo y'ayuc ytiy'ajt, e ni ycanaybadyii müid je tiy'ajt huidibi iich ajt nmijpidaacim, hue' jada nej tüg jäy huidibi amij agixip huidibi ca' ni ti nejhuüy. Chachnijot'aty tzip capx, e jadu'n yhuimbizimy jada tzip capxy co migüg ca' yaj'oy'ixy, chi ñaymidziptzoongixy nihuambejtcixy etz jibic nigapxcixy ymigügtijc. ⁵ Yi' jadu'mbi jäy huidibi ca' mijpidägy Dios ytiy'ajt cojpy ymacxpy tzip capxy huidibi ca' ycixy ytigoy. Yhuinma'nydigoy ajcxy, ca' huinjihuüyigixy ytiy'ajt. Hue' ajcxy yaj'ixpicy Dios y'ayuc müid co ycomeen'adaangixy. Puhuäctuat müich jadu'mbi jäy ajcxy. ⁶ Co Dios y'ayuc ytiy'ajt nguudunim, huin'it jotujc ndzinaayim, etz nbaatim oy'ajt mijpi. ⁷ Ni ti iich ajt ya naaxhuin ca' ti nmimiinim co nma'xung'ajtim, nañ ni ti ngaminicxim co n'o'cim. ⁸ Pen müid'ajtim caayin uucin huit tucxy, jebi njotujc'ajtim müid yi'yi. ⁹ Je' ajcxy huidibi ooy nijot'aty comeen'adü, hue' je' ajcxy jibic tumb ajcxy yähua'n. Je' ajcxy chachtunamyb huidibi ca' oyhuinma'ñity, huidibi nayjotmayduunip. Ayo'n ajcxy ypadamyb, tigoyamb ajcxy y'alma. ¹⁰ Yi' meeñy'adzojin yi' je' yi' jibic-huinma'n cop'ajtip. Müid

yí meeñy'adzojcin may yí jáy huídibi jáydgoy Dios ytiy'ajt. Hue' je' ajcxy nayjotmayduunip.

Timoteo, tiydudägy mdzinähuipy miich

¹¹ Timoteo, Dios yjáy, cöguëg yí jáy huídibi müd yí jadu'mbi jibic-huinma'ñ. Tiydudägy mdzinähuipy, cuyduni Dios y'ayuc ycötujcin, mijpidäg Dios y'ayuc ytiy'ajt, tun oyjáy'ajtin, mihuindina' yí tung, müd'at mjot mhuinma'ñ yung naxy. ¹² Míc mjot mhuinma'ñ pidäg ma Dios ytiy'ajt, ca' mjotmetzcäy. Tun jadu'n nej jáy huídibi nayboyicquípxigixy naymic'íjxigixy. Nijot'at cixyjot huinijot yí jugy'ajtin huídibi m'alma ypadamyb ma Dios. Dios xyajñibicy jigix mgapxhuäcxip jada tiy'ajt. Ti miich mgapxypidzimy nej mmübicy mayjáyjoty.

¹³ Dios je huídibi yajjugy'ajttaayb tüg'óciy, yí' nidiy'ajt'aty co ooy ycopicyity jada ayuc jadu'n nej cham nyajñimaayb. Nañ jadu'n je Cristo Jesús je huídibi tiy'ajt capxypidzim ma Poncio Pilato ñidiy'ajt'ajt co oy ycopicyity jada ayuc jadu'n nej cham nyajñimaayb. ¹⁴ Copicy cuydun jada ayuc ane'min. Huädz mguydundähuipy, huädz myaj'ixpigipy je tiy'ajt jigix ca' pin jibic ni'ojihuipy Dios ytiy'ajt. Jadu'n mdunipy ixti cooni iich ajt nHuindzin Cristo Jesús ñayguëxigüyb ya naaxhuiñ jadüg'oc. ¹⁵ Dios yajñiguëxigamyb Cristo Jesús mina anajty je tiempo yhuaad'aty. Dios je' je mij'ane'mbi, je mijpi rey, etz je mijpi huindzin. Yí' je' je Huindzin Dios huídibi ane'mdaayb. ¹⁶ Yí' je' tügpaic je jugy'ajt cop ymüid. Yí' ijtp ma je tücxin je jajin huídibi ca' pin huaad ninej mihungoñ. Janch ni tüg jáy ti ca' icy, e ni ca' ixa'ñ. Yí' je' cömay'idipy etz yí' ane'mdaayb tüg'óciy. Amén. Jadu'n jada.

¹⁷ Yí' comeeñdjic huídibi jadachambi tiempo tzinaayb jugy'ajt, nima' miich yí' ajcxy co ca' huaad amij agix ñayjihuiyigixy, ni ca' nīgi adzojccixy anaxy yí meeñ huídibi jadu'ñiyi tigoydaayb. Huen ajcxy mijpidägy yí Dios huídibi xy-mooyim tüg'óciy mijmay mijcajee jigix njotcujc'ajtim. ¹⁸ Huen yí comeeñdjic oybi tungixy, jigix ajcxy cömay ypidzimipy co oyjáy'ajtin tungixy. Huen ajcxy pa'ayoogixy ymígügtijc huídibi ca' ti müdity müd oyjot oyhuinma'ñ. ¹⁹ Co ajcxy jadu'n tungixpy, chi padaangixy je oybi huídibi müimb gidaacp. Ypadamyb ajcxy je jugy'ajtin huñixibi.

Timoteo, mijpidäg jada tiy'ajt

²⁰ Timoteo, mijpidäg jada ixpijcin huídibi ti myajñibic'aty. Ca' mmijpidägipy yí nigoobi y'ayucity, yí huídibi ca' Dios huindzigüy. Ca' mmijpidägipy yí jáy huídibi ajcxy naybidaacp jadu'n nej jihuñy ooy ycohuinma'ñity, e ca' yjanchity, huídibi midzip'ajtp Dios ytiy'ajt. ²¹ Jadu'n nej nije' ajcxy panicxcixy jada ca'pi ytiy'ajity, e jadu'ñi ñitigoy.

Huen Dios je oy'ajtin tuñ müd miich. Amén. Jadu'n jada.

2 TIMOTEO

Yi Mimetzpi Necy Huidibi San Pablo Yajniguejx Timoteo

¹ Hich Pablo, Dios ti xyajñibicyich huen Cristo Jesús xy'apóstol'adyiijich. Yi ti xyquexyich co yi' y'ayuc ngapxhuäcxibich. Dios ti yajhuinhuaniiygixy yi jäy co pin mijpidägipy Cristo Jesús yajjugypigipy co anajty ti y'ögy. ² Ooy ich miich ndzocy njhuüy nej ngi'm'ung'adyi. Dios Teedy etz ich ajt nHuindzin Cristo Jesús huen tuñ oy'ajt may'ajt müd miich, huen xypa'ayooy, huen xyyajjotcugiy.

Pablo jotcujc co Timoteo ti mijpidägy Dios y'ayuc

³ Nyajnajxypich Dioscojuyip ma Dios co miich ti mmijpidäg yi' y'ayuc. Nmibijctzooybich Dios müd miich ycixpi jabom jabom xim tzuum. Janch cixyot huinjot nyajmij'atyich Dios, paady ooy oy nayjihuiyijich. Nañ jadu'n n'ap ndeedy jecy'ajty janch cixyot janch huinjot yajmij'ajty Dios. ⁴ Ooy miich nicxy njaco'ixihua'n jigix njotcugihuibich. Ooy njajäymejtzcodyiijich nej miich mjüy myaax müd ich ycixpi je taabi jim ndzooñich. ⁵ Njäymejtzpich jadu'n nej miich mmijpidägy yi Dios janch cixyot huinjot co xymiid'ityich. Nañ njäymejtzpich co jayijp mnambiüd Loida etz yi mdaj Eunice mijpidacy Dios janch cixyot huinjot. Minambich co chambaad miich mmijpidägy Dios janch cixyot huinjot.

⁶ Jada nyajjäymejtzcooty: Nijot'at yi mic'ajtin huidibi Dios ti xymöy, je taab anajty Dios ytung mnimadzaani co ngi'nixajy, jigix Dios ytung jacyajxon mduunipy. ⁷ Dios ca' xyajhuindzigy'aty, hue' xyajjotmic'ajtp. Müd Dios ymic'ajt jeb mnaychöjcgixy mnayjihuiyigixy, jeb oyjot oyhuinma'n myajtu-ungixy. ⁸ Paady ca' mmidzöyduñiyb ich ajt nHuindzin Cristo Jesús ytiy'ajt. E nañ ca' xymidzöyduñiybich co ti nbujxtijc iñäyich müd ich ajt nHuindzin Cristo Jesús ytiy'ajt ycixpi. Mecxtuc yi ayo'n yi tzaachypi huidibi myajnajxpy co mgapxhuäcxy yi Cristo Jesús ytiy'ajt. Dios xyajjotmicpigipy. ⁹ Canan paady ti xyajñidzoozim n'alma co ajt ndzach'oyjäyity. Com Dios jadu'n ti yajnihuinmayy tuna'n oy'ajtin müd ich ajt ycixpi co quejxy Cristo Jesús ya naaxhuiñ. Dios jayijp ti huinmay co quexa'n je Cristo Jesús ca'ni anajty pin ya naaxhuiñ. ¹⁰ Dios ti cham jada oy'ajtin yajnigüexigy co yaj'ijxy ya naaxhuiñ ich ajt nnihuambi nyajñidzooçpi, je Cristo Jesús, huidibi ti yajcödögy yi o'cin. E ti yajnejhuüy yi jäy müd yi' ytiy'ajt nej jeb huaad ndzinaayim huinxi ma yi Dios y'it oybi.

¹¹ Dios ti xyajñibicyich co y'ayuc ngapxhuäcxich, etz xy'apóstol'adyiijich jigix nyaj'ixpigipyich yi huidibi ajcxy ca' yjudíojäyity. ¹² Paady ycixpi tzaachypi nbaadyich. Per ca' ndzo'yduñich, com ich nejhuñiyb pin mmijpidacpyich, nejhuñiybich co yi' ymiid cötujcin etz mic'ajt jeb xycuend'adipyich, ixti huin'it xii mnaa Cristo Jesús tiyduna'n yi naaxhuiñjäy.

¹³ Mijpidäg je tiy'ajt tiydudägypi huidibi ti nyaj'ixpicy, jada je' tiy'ajt iixpejt nej jeb mbanicxy mbayöy. Yajmij'at Cristo Jesús, ca' m'ixmajtzi yi' ytiy'ajt, mdunipy oyjäy'ajtin jadu'n nej yi' tzocy. ¹⁴ Mihuinäna' yi oybi ayuc tiy'ajt huidibi ti nyaj'ixpicy. Huen je Espíritu Santo huidibi miich müd jotjoty huinma'ñjoty xypubedipy xypudigihuipy.

¹⁵ Ti jada' mnejhuïy co tûg'óciy yi mibijcpidijc jim Asia naaxjot ti ixmach je tiy'ajt jadu'n nej ti nyaj'ixpicyich. Yi Figelo etz Hermógenes etz jacjadyii jadu'n ajcxy ti y'adiutzcixy. ¹⁶ Yi Huindzin Jesús yi' pa'ayoohuipy yi Onesífero yjuugy ymigûg, com ooy ïch mij xypa'ayooyich etz xypubejtyich, ca' xymidzo'yduyijich co nmach'ïñayich. ¹⁷ Co Onesífero oya'ty ya Roma, chi mictägy xy'ixtaayich cooni xypatyich. ¹⁸ Huen yi Huindzin Dios ypa'ayoohuïgy Onesifero co anajty Cristo Jesús tyduna'n naaxhuiñyäj. Huädz miich mnejhuïy nej yi Onesífero xypubejtyich jim Efeso.

2

Huen Cristo Jesús may'ajt tunipy miid miich Timoteo

¹ Miich Timoteo, jadu'n njihuïy nej ngi'm'ung ngi'm'anäg. Huen Cristo Jesús may'ajt tunipy ma miich, huen xyajjotmicpigipy. ² Miich ti mmidoy may'ayuc tiy'ajt huidibi ti nyaj'ixpicy. Jada ayuc mayjäy midoy e jëb ajcxy nidiy'ajt'ajtcixy. Jada tiy'ajt miich mgapxnaxipy mgapxhuäcxipy ma jacjadyii yëydijctjic huidibi oyhuinma'n ymiid, jigix yi' ajcxy nañ jadu'n capxnaxipy ma jacjadyii jäy.

³ Miich mimadäg yi ayo'n yi tzaachypi huidibi mminajxyp myajnajxyp, jadu'n nej tûg Cristo Jesús ysoldado huidibi oy tumb. ⁴ Yi soldado huidibi soldad'ajtp ca' huaad huingbi tung nicxy tuñ, jigix je' yjotcujc'adipy pin anajty ti ypidägyii soldado, nañ jadu'n miich adügijp Dios ytung mdunipy. ⁵ Pin jäy nayboyicquipxip ca' yi' premio pada'n, oy ti yjamadägy, pen ca' cuyduñ yi tiy'ajt. Nañ tzocy co miich mguydunipy yi tiy'ajt. ⁶ Je jäy huidibi tumb ma ycam ytu' je' jayijp huidib huen yajpidigy yi utztäm huidibi ti y'ity. Nañ jadu'n miich co Dios ytung mduunip mbaadip yi oy'ajtin. ⁷ Yajxon mhuinmayipy huidibi nyajnimayb, yi Huindzin Cristo Jesús xyajnejhuiydähuipy tûg'óciy je' ytiy'ajt.

⁸ Jäymetz jadu'n nej Jesucristo, yi David y'ap y'oc, y'o'cy, chi Dios yajjuygypijcy jadügtecy. Jada je' je ayuc tiy'ajt oybi huidibi nnajtzcaxiïybich. ⁹ Miid yi' ycixpi n'ayooyich etz tzaachypi nyajnajxyich. Nbuixtjic ïñayich jadu'n nej jihuïy njibicjäyich. Oy njapujxtjic ïñayich ca' ñejity, Dios y'ayuc ca' yi' mach y'ity, yajcapxhuäcx'adiutzp nigi. ¹⁰ Paady ïch tûg'óciy jada tzaachypi ngöbijctäy nmeextujctäy, jigix jëbi je jäy ajcxy huidibi Dios ti yhuin'ixigixy chinähuipy ajcxy huinixi ma yi' y'it oybi, Cristo Jesús yajnädzögüib yi' ajcxy y'alma.

¹¹ Tiy'ajt jada ayuc:

Pen ti ïch ajt n'o'cim miid Cristo ycixpi, yi' miid ndzinaayim tzajpjoty.

¹² Pen nyajnajxim tzaachypi ayo'n miid Jesús ycixpi, nañ quipxyi miid yi' n'ane'maanim. Pen ca' ya Jesús y'ayuc ngöbijcim, nañ ca' jüib tzajpjoty xycöbigaanim.

¹³ Oy ïch ajt nyajmij'ajtim Cristo Jesús o ngayajmij'ajtim, Dios ycuydundaayb yi' y'ayuc. Com ca' huaad yci'm ayuc yajxigy.

Naybidägü cixyjot huinijot ma Dios ytiy'ajt

¹⁴ Yajjäymejtzcood yi mibijcpidijc jada tiy'ajt huidibi ti nyajnimäy. Nima' je jäy ajcxy co je Huindzin Dios ca' oy'ixy tzip capxy ayuc huidibi ca' choobaady. Miid yi tzip capxy ca' ni ti oybi nbaatim, jëyi yajhuinma'nydigoy huidibi amidoo'ijtp. ¹⁵ Naybidägü cixyjot huinijot ma Dios y'ayuc ytiy'ajt, nej jëb huaad cömay mbidzimy ma Dios, jadu'n nej Dios ytumbi huidibi ca'

ni ti midzöyduyüi, huidibi Dios y'ayuc ytiy'ajt yajxon yajhuinjihuiydaayb ymügütjic. ¹⁶ Ca' mgöbigipy yi ayuc huidibi ca' ytiy'ajtiy, yi nigoob ayuc huidibi yajtüyöyp mayjäy ajcxy, yi tiy'ajt huidibi ca' Dios ytiy'ajt'adyii. ¹⁷ Yi huidibi ajcxy y'ayuc ca' ytiy'ajtiy yajhuinma'ñyidigooyb ymügütjic. Yi' ajcxy müd jibic ayuc yajhuinma'ñyidigoy yi mayjäy ajcxy, jadu'n nej pützpa'm huidibi ninícx jicxp oñydağy. Jadu'n nej ti yjaty müd Hemeneo etz Fileto co ajcxy yhuinma'ñyidigooy. ¹⁸ Yi' ajcxy anajty Dios y'ayuc cuyduuna, chi oyhuinma'ñyidigooyñi. Chi ajcxy ymináangixni co je tñibi y'öccixni, ti ajcxy je' yjugypicy, e jadu'n ajcxy yajhuinma'ñyidigoy nijëjity jäy. ¹⁹ Huidibi Dios ti cojy ti macxy, nimiraxii ycacixy ycatigooy, com yi' ytiy'ajt ijtp yi' huinixii. Tiy'ajt jada co yi Huindzin Dios y'ijxcajpy pinjaty yjäy'ajtpy. Tüg'öciy pin mijpidaacp yi nHuindzin Jesucristo y'ayuc, huen jiphuäctüdy yi jibic-huinma'ñ yi jibic-tung.

²⁰ Ma tüg mij comeñyidjic jim oori taasi, oori texy, etz oori cuchara, etz tijaty oyjatypi. Nañ ymüid jim naax taasi, naax texy, quipy cuchara etz jactijaty ca'p y'oyjatyi. Yajtuñ yi oori taasi etz oori texy ma tügi caayin uucin oybi. Yajtuñ yi naax taasi etz naax texy oyñiminaa. ²¹ Jadu'n yi' pin jäy jibic-huinma'ñ ixmajtzp etz tuñ oyhuinma'ñ, jadu'n yi' nej oori taasi oori texy. Cömay'idip yi' ma yi Dios. Huädz yi' yjot yhuinma'ñ, jëbi nHuindzin'ajtm Dios yajtunipy ma tüg'öciy oybi tung.

²² Ixmatz müich yi yujcyec'anäg ajcxy yjibic-huinma'ñ. Tudägy mdzinähuipy. Yajmij'ajtcix Dios cixyot huinijot. Mdunipy oyjäy'ajtin. Ixmatz yi' tzip. M'ojadadipy yi' Huindzin Dios müd oyjot oyhuinma'ñ. ²³ Ixmatz yi' nigoobi'ayuucity tzipcoj capxycoj yi'. ²⁴ Yi' Huindzin Dios ca' yi' tzocy co yi' ytumbidjic nicxy tzip capxy yajtzondägy. Hue' janchtiy tzocy huen jäy'ajtcixy yung naxy müd tüg'öciy jäy etz pe'cy y'idipy müd yaj'ixpjcjin. Nañ chojcpy co mimecxtugipy ymügütjic ajcxy. ²⁵ Müich müid yung naxy mjot mhuinma'ñ capxhuij je jäy huidibi midzip'ajtp je tiy'ajt. Ycadimjeyity co Dios ytiy'ajt nijothuimbjtcixipy, e nejhuyigixipy je tiy'ajt oybi. ²⁶ Co anajty ajcxy ti ymejtcixy yhuinma'ñ, chi ajcxy ycöguëgyb je mujcu' huidibi ajcxy ycapxymidooyb ma anajty ymüid'ajtcixy cijoty etz ycapxymidoogixpy yi Dios.

3

Jäy jotmay müd y'idaangixy

¹ Müich mnejhuüyb ma je xii tiempo anajty ycixaani jadaanip ayo'n, je jäy ajcxy jotmay müd y'idaangixy. ² Ji adipy jäy huidibi adzojcp, huidibi amij agix nayjihuiyip, jäy huidibi ameeñ, jäy huidibi ci'm naygömayiib, huidibi oyñinej capxtigooyb ma Dios, jäy huidibi ca' capxymidohua'ñ ytaj yteedy, jäy huidibi ni ti ca' jäygidäga'ñ, jäy huidibi ca' yajmay'aty Dios. ³ Co anajty tiempo ycixaani, ji adipy jäy huidibi ca' ymügüg ixa'ñ tzoga'ñ, jäy huidibi ca' pa'ayo'n müdity, jäy huidibi ymügüg nñhuambejtp, jäy huidibi oy ahua'nity, jäy huidibi midzip'ajtp yi oybi. ⁴ Ji adipy jäy huidibi ymügüg agojiix midundigooyb, jäy huidibi ytunamay ti ytunamayb, ca' ajcxy tuñ cuendi capxhuijin, jäy huidibi amij agix nayjihuiyip, huidibi tzachnijot'ajtcixy mayñaxy xondaacin, e ca' cuyduna'ñ Dios ytiy'ajt. ⁵ Ji adipy jäy huidibi naybidáacigixp jadu'n nej jihuiy ajcxy mijpidaaccixp Dios ytiy'ajt e ca' yjanchity. Chi ma ajcxy chinaayin ma ajcxy yjugy'ajtin ñiguëxícp co ca' tiy'ajt yajtuñ. Cöguëg yi' jadu'mbi jäy. ⁶ Ma yi' jadu'mbi jäy ajcxy jim chooñity huidibi coyöyüib conaxiib ma je töxyjäy

huidibi ca' ytudägity, huidibi oy ypocyjäyity, huidibi jibic-huinma'n nijot'ajtp. ⁷ Yi jadu'mbi töxyjäy ajcxy panixp payöyp canaagnax huinma'n, e niminaa ajcxy cahuinjihuihuipy yi Dios ytiy'ajt. ⁸ Jadu'n nej Janes etz Jambres midziptzoon je Moisés, yi jadu'mbi yëdjic ajcxy nañ jadu'n midziptzoonip yi tiy'ajt. Jibicjot jibic-huinma'n ajcxy ymüid. Ñaybidägüib ajcxy jadu'n nej jihuiy cuydungixy yi tiy'ajt, e ca' cuydungixy. ⁹ Ca' ajcxy mimadägipy nej huin'ñnipy Dios yjäy. Niguëxigipy yi' ajcxy yjibic-huinma'n jadu'n nej Janes etz Jambres yjajty.

Tüg'óciy Dios ñecy Dios ci'm ti huinma'ñymöy je huidibi jaay

¹⁰ Miich ti mhuinjihuiydäy nej ñich ti nyaj'ixpicy Dios y'ayuc nej njäy'atyich, nej nhuinma'n nduüñich, nej Dios nmijpidägüich cixyjet huinjot, nej ñich jäy nmimecxtucyich, nej oyjäy'ajtin nduüñich, nej ti nmihuindinäyich Dios ytung. ¹¹ Miich m'ijxyp mnejhuüyb nej ti nyaj'ixhuidityich nej ti nyaj-pahuidityich, miich mnejhuüyb je ayo'n je tzaachypi huidibi ti nminaxyich ti nyajnaxyich jim Antioquía, jim Iconio, etz jim Listra. Jadu'ñyibaad yi ayo'n tüibi nbaadyich Dios ti xyñihua'ñ ti xycohua'ñich. ¹² Huen pin huidibi yajxon cuydumb Dios ycapxy y'ayuc jadu'n nej Cristo Jesús ti xyaj'ixpicyich, nañ tim jadu'n ajcxy yaj'ixhuididipy yajpahuididipy. ¹³ Yi jibic jäydjic huidibi naybidáacigixp jadu'n nej jihuiy cuydungixy yi tiy'ajt, e ca' yjanchity, ñigi jibic y'idídzangixy. Huin'inaangixy ymügügtijc ajcxy, e ñayhuin'ñnánagixy ci'm.

¹⁴ Miich Timoteo, ixmatz yi jadu'mbi jäy ajcxy etz panixp yi tüibi m'ixpicy, yi tüibi myajñibic'aty. Mnejhuüyb co ñich ti nyaj'ixpicyich je tiy'ajt. ¹⁵ Com miich pi'cni mutzni ti mjaty ti mnejhuüy yi Dios ñecy. Jada necy ti xyajnejhuüy nej huaad mijpidägy yi Cristo Jesús, e ñigi jadu'n jëb huaad yi m'alma nñdzoocin paady. ¹⁶ Tüg'óciy Dios ñecy Dios ci'm ti huinma'ñymöy je huidibi jaay. Paady jëbi nyajtuunim co jäy nyajni'ixüyim nyaj'ixpijcm. Jëb nyajtuunim co njijpcogapxüyim huidibi ca' ytiy'ajtity, etz co n'ihuijim ngapxhuijim. Jëb nyajtuunim co nyaj'ixpijcm nej jëb huaad tiy'ajt nbanixim, ¹⁷ jigix yi jäy ajcxy huidibi mijpidacp Dios ytiy'ajt, jëb ni'ixi' y'idipy, tunipy tüg'óciy oybi huinma'ñ oybi tung.

4

¹ Ooy ycopicyity mido'mbic jada ayuc jadu'n nej cham ñich miich nijayiy. Dios etz ñich ajt nHuindzin Cristo Jesús tiy'ajt yejc co copicy jada ayuc. Cristo Jesús ytiydunamyb yi jäy ajcxy juugypi etz yi jäy ajcxy tüibi y'o'ccixy, e chi yajjugypigipy jadüg'oc ajcxy. Yi' yajtiydunamb ajcxy co anajty ymiñ ya naaxhuiñ pidäga'ñ y'ane'min. ² Nyajñibijcypy mgapxhuäcxip Dios y'ayuc ytiy'ajt hueñyitiminaajity, oy pin midoohua'ñ co camidoohua'ñ. Copicy co mjijpcogapxühuipy huidibi ca' ytiy'ajtity, capxhuij pin yinjaty huenjaty camadacp, ñhuij capxhuij yi jäy ajcxy müid Dios y'ayuc ytiy'ajt. Mímecxtuc etz yaj'ixpic yi jäy ajcxy. ³ Minip je xü je tiempo ma jäy ajcxy ca' cöbiga'ni oybi tiy'ajt. Nijëjity müid yci'mdzojcin müid yci'm-huinma'ñ ixtähuij ajcxy yhuindzin huidibi yaj'ixpigüib nej ajcxy jäygidägy, oy ca' ytiy'ajtity. ⁴ Chi ajcxy anajty jijphuäctütcixni camidoohuaängixni je Dios y'ayuc ytiy'ajt. Mijpidaacni anajty ajcxy ñigi yi nigoobi'ayucity. ⁵ Miich huivy ucujc m'idipy. Mecxtucta' nej jäy ajcxy xy'ixhuidity xypahuidity. Yajñima' jäy ajcxy Dios ytiy'ajt, jëb ajcxy mijpidägipy etz jothuimbidity ajcxy Dios. Yaj'ixpic Dios y'ayuc ytiy'ajt nej ypadyii.

⁶ Jadu'n miich cham njacnimäy, je' co ti yhuaad'ajtni je tiempo minaa nd-zonaanich ya naaxhuiñ xyaj'ögaamich jäy, ti nayxoxyiiijich naydogyiiijich müid Cristo Jesús ycxpi. ⁷ Ti iich ooy mic nmihuindinäy Dios y'ayuccapxhuäcxii ma anajty ypadyii. Ti nyajcixy nyajmayich je tung huidibi anajty xypatpich. Ooy ti nyajmij'atyich Cristo Jesús, ni ca' ti n'ixmajchich yi' y'ayuc ytiy'ajt. ⁸ Cham njijp'ijxypich co Cristo Jesús je tiydumbi tudägyi xycömayipyich jilby tzajpjoty, müid co tiydudägy ti ndzinäyich ti njugy'atyich.

Pablo pijctzoy may'ajt ma Timoteo co tzojc yminipy ma ya'i'

⁹ Tun may'ajt tzojc yminipy ma iich. ¹⁰ Yi Demas ti iich yam xycögueecni co yjactzocpy yi mayñax xondaacin ya naaxhuiñ. Hue' ti ñicxy jim Tesalónica. Crescente nañ hue' ti ñicxni Galacia. Yi Tito ti ñicxy Dalmacia. ¹¹ Jëyi naydügpajc Lucas yam müid iich. Co mminipy, müidminipy Marcos, com ooy ti xychachpubetyich ma Dios ytung. ¹² Yi Tíquico ti nguexyich jim Efeso. ¹³ Je jöcxhuit huidibi nyajhui'mäyich jim Troas ma Carpo ytijc miminipy. Nañ jadu'n mimindähuipy je necy. Je' ooy ytimycopicyity yi pergamino necy.

¹⁴ Alejandro je ca'tzpi ti yi' ooy mij xymidundigooyich. Yi nhuindzin'ajtim Dios paatip nej yajmidzogyii. ¹⁵ Naygüend'adü ca' miich yi' mmijyöybedipy, com ooy mic ti jippcogapxiy Dios y'ayuc huidibi iich ajcxy nyaj'ixpijcpy.

¹⁶ Co yi' oga'n xyxäyich ma je mij tungmüidpi, naydüg ayuc nmihuindinaayich. Nipin xycapubetyich, nigü ajcxy xycögueectaayich. Huen Dios ocmeecxy nej ajcxy ti y'idüztzixy. ¹⁷ Ca' y'ocnejity Dios ti xypubetyich ti xypudigiyich. Dios ti xyajjotmicpicyich, jigix ngapxhuäcxtähuibich ytiy'ajt ma tüg'óciy jäy. Jëb tüg'óciy jäy huidibi ca' yjudiojäyity huen mido'mbijctaaygixy Dios ytiy'ajt. Dios ti xyñihua'ñich ti xycohua'ñich ma yi o'cin. ¹⁸ Yi Huindzin Dios yi' xyñihua'ñ xycohua'ñibich ma tüg'óciy jäy huidibi ajcxy jibic-huinma'ñ müid. Yi'xycuend'adipich, ca' ni ti xyjadipyich, cooni anajty njädyich jilby tzajpjoty ma y'ane'my. ¡Huen Dios cömay idipy janch huinixii huinitempo!

Pablo ymigügtijc capxpooocxin yajniguexy

¹⁹ Yajnax iich ngapxpooocxin ma yi Prisca etz ma Aquila etz ma Onesífero yjuugy ymigüg. ²⁰ Erasto ti je' yhui'my jim Corinto. Je Trófimo com pijcip anajty, iich je' n'ixmajch jim Mileto. ²¹ Tzojc mjatyminipy ma ca'ni tüchpy ymini. Yquejxyp ajcxy capxpooocxin ma miich, je Eubulo, je Pudente, je Lino, je Claudia etz jacjadyii migügtijc.

²² Huen je Huindzin Cristo Jesús xypubedipy xypudigihuipy. Huen Dios tuñ may'ajt müid miich ajcxy. Amén. Jadu'n ngapxcixyich.

TITO

Yi Necy Huidibi San Pablo Yajniguejx Tito

¹ Hich Pablo, Dios jada mïd nduunïch, Jesucristo xy'apóstol'ajtpich. Yi' ti xyquexyich ma yi jäy ajcxy huidibi Dios ti yhuin'ixyï, jigix ajcxy mibigipy yi' ytiy'ajt. Nañ nyajnimähuibich nej jëb ajcxy cuyduuni Dios ytiy'ajt. ² Jadu'n nduunïch jigix co anajty y'o'ccixy, chi jadüg'oc yjugypïccixipy e tzináaygixipy huinixii. Dios yajhuinhuanïy je jäy ajcxy je jugy'ajtin huinixiibi, ca'ni anajty naaxhuiñybi chondägy. Jada tiy'ajt jëb nmijpidaacim com Dios ca' yi' y'anïdägy. ³ Jada jugy'ajtin huidibi ijtp huinixii, Dios ti yajnejhuïy je jäy ajcxy cham co je tiempo ti yhuaad'ajtni, mïd yi' y'ayuc huidibi ngapxhuäcxibich. Je Dios huidibi xyajnidzoocim ñich ajt n'alma ti xyajniñycyich co yi' y'ayuc ngapxhuäcpxyich. ⁴ Miich Tito, cham nijayïy jadu'n nej jihuiy nijayïyich ngi'm'ung. Com tú'ciy nmij'ijxim nmijpidaacim Dios. Huen Dios ñich ajt nDeedy tzajpjtopy etz Cristo Jesús ñich ajt nihuambi yajtzoocpi tuñ may'ajt oy'ajt mïd miich, huen xypa'ayooy etz xyajjotujc'adipy.

Myajniñigipy yëdyjc huidibi jëb nigohuajc'aty ymigügtjic

⁵ Paady ñich miich jim Creta ñaaxjot nyajhui'my, jigix mjacyajniñihuiipy je migügtjic jadu'n nej ñich ca' ti nyajni'ixiydäyich ajcxy. Tügpi cajp nidüg nidüg myajniñigipy yëdyjctjic huidibi nigop'adïb nigohuajc'adïb yi mibijcpïdijc, jadu'n nej ti nyajnimäy. ⁶ Yi' myajniñigipy yi' huidibi ca' ti tundigoy; huidibi tüg töxyjäy mïd, ca'p ycanaagity; huidibi y'ung ajcxy ca' nijot'aty mayñaax tzinaayin; huidibi y'ung ajcxy ycapxymïdooyb. ⁷ Copicy huidibi nigohuajc'adamb yi mibijcpïdijc huen jäy'aty tiydudägy, ca' huaad ti tundigoy; huen yajxon cuend'adipy huidibi Dios yje'ajtpy; jäy huidibi ca' ycojuuñity; huidibi ca' yhuindzipity; huidibi ca' y'amügity; huidibi ca' chip'ixtäy; huidibi ca' y'adzocy. ⁸ Yi' jëbi myajniñigipy huidibi oyyäy'ajtin tuñ mïd hueñyitimpyñity; huidibi ooy y'amigügtjic; huidibi huijycujc; huidibi tiydudägy yhuinma'ñ; huidibi huindzigïb Dios; huidibi ci'm yajxon naygüend'ajtip. ⁹ Huen cixyot huinijot naybidäacigixy ma je ayuc tiy'ajt huidibi ti xpjccixy, jigix jëbi ajcxy jot'amijmöhuiipy jacjadyii jäy ajcxy mïd tiy'ajt janchypï, e capxjotcidägipy ajcxy je pin ajcxy ca' ixa'ñ Dios y'ayuc.

¹⁰ Com ji may judiojäy huidibi ca' ycapxymïdoogixy, huidibi nigooobi tijaty ayuc tzachnimiydacp; huidibi ajcxy huin'imb ymigügtjic, jadu'n nej yi' ajcxy huidibi minamb co copicy tüg'ócïy mibijcpi huen yajtiy'ajtiy ymang ajcxy, jadu'n nej judiojäy tungixy. ¹¹ Copicy co mgapx'adugipy yi' ajcxy huidibi ymigügtjic yajco'ñnyb tüg jïin tüg tijc; huidibi ajcxy yaj'ixpïjcp mujuy; huidibi ca' tiy'ajt yaj'ixpïccixy.

¹² Nidüg yi' ajcxy cohuinma'ñybi nigapxy ymigügtjic ymina'ñ co yi' Creta jäy ooy ajcxy y'anïjity, ooy ajcxy huinducity, ooy ajcxy ñuuxity, ooy ajcxy ycaaxity. ¹³ Tiy'ajt jadu'n nej jada cohuinma'ñyjäy ymina'ñ. Yaj'oj ajcxy mïctägy, huen huinjihuïygyx yajxon Dios y'ayuc. ¹⁴ Ca'p ajcxy mijpidaacipy yi' judiojäy ycostumbre etz ni ca' ajcxy mijpidaacip yi' y'ane'min huidibi jäy ci'm ti nihuinma'ñ'aty, huidibi ajcxy ti jippyöduatni Dios y'ayuc ytiy'ajt.

¹⁵ Pin jäy huädz yjot yhuinma'ñ mïd, oy ti jacuyduñ costumbre, o oy ca' ti cuyduñ, Dios yjäygidacpy yi' co oyjot oyhuinma'ñ mïdity. Pin jäy ca' huädz yjot yhuinma'ñ mïdity, oy ti jacuyduñ costumbre, Dios ca' jäygidägy yi' com

jibic ajcxy yjot yhuinma'n miiidity, ca' ajcxy nej ñayjihuiyigixy. ¹⁶ Yi jadu'mbi jāy hue' ñaybidáacigixy jadu'n nej jihuiy nej ooy Dios ytiy'ajt ajcxy mijpidaaci, chi ma huidibi ajcxy ytumyb ji yajniuguéxcixy co ca' ajcxy cuydungixy Dios ytiy'ajt. Dios ca' yi' oy iix ajcxy yhuinma'n, ca' ajcxy capxymidoogixy Dios, ca' ajcxy Dios ytung mihuaadity.

2

Nej jéb huaad chinaaygixy yjugy'ajtcixy

¹ Miich huadz myaj'ixpiğıpy yi migügtijc nej jéb huaad cuydungixy Dios ytiy'ajt. ² Miich m'ihuijip mgapxhuijip yi mijjäydijc huen ca' ajcxy y'amügyjäy'adipy; huen huujycujc jāy'ajtcixy; huen miid'ajtcixy oyjot oy-huinma'n; huen mijpidaaccixy Dios ytiy'ajt cixyjt huinjot; huen oyyäy 'ajtin tungixy miid huentimypinjäyity; huen ajcxy mecxtujcin yajtungixy ma yi chinaayin. ³ Nañytimyjadu'n mijjäydijc ajcxy töxyjäybi huen ajcxy jadu'n jāy'ajtcixy nej huidibi ajcxy Dios yajmij'ajtp; ca'p ajcxy ymigügtijc nigapxip ni'ojihuiy, ni ca' ajcxy nihuambedipy; nañ ni ca' ajcxy y'amügyjäy'adipy; huen ymigügtijc ihuijicixy capxhuijicixy miid ayuc oybi tudägyi. ⁴⁻⁵ Yi mijjäydijc ajcxy töxyjäybi huen ihuijicixy capxhuijicixy yi mutz'anäg töxyjäydijc ajcxy nej jéb huaad chinaaygixy yjugy'ajtcixy; nej jéb huaad ytijc ñay yajmij'ajtcixy; nej jéb huaad tzojccixy jihuiyigixy y'ung y'anäg; nej jéb huaad oyjot oyhuinma'n yajtungixy. Ihuij capxhuij yi töxyjäy mutz'anäcpi co huen tiydudäy chinaaygixy, ca' ti jibic-huinma'n ajcxy mibidzimipy. Huen ihuij capxhuij ajcxy nej jéb huaad yjin ytijc cuend'ajtcixy yajxon; nej jebi y'amigüg'ajtcixy, nej jéb huaad capxymidoogixy ñay. Pen jibic-huinma'n anajty ajcxy ytumyb, chi anajty Dios ytiy'ajt yajni gapxy yajni'ojiy.

⁶ Miich Tito, nañ jadu'n jaty ihuij jaty capxhuij yujcyeepidijc etz anaetijc nej jéb huaad oyjot oyhuinma'n yajtungixy, ca' huaad ytundigooygixy ycapxtigooygixy. ⁷ Tito, tiydudäy mdzinähuipy, oyjot oyhuinma'n myaj-tunipy. Jim yi migügtijc iixpejt pigipy ma miich, nej jéb huaad ytungixy. Huadz ajcxy myaj'ixpiğıpy yi tiy'ajt, huujycujc m'idipy. ⁸ Tito, m'ihuijip mgapxhuijip yi migügtijc miid oy'ayuc oyhuinma'n, jigix co pinjäy jipcogapxihaanip miich m'ayuc, chi tzo'ydu'n jihuihua'n, e jadu'n ca' jadipy nej jibic xyñigäpxcixipy xyñi'ojiygixipy.

⁹⁻¹⁰ Je tumbidijc huidibi ijt cojuyiy codoogiy, huen yhuindzin imidoogixy capxymidoogixy nej ypaduyi. Huen tungixy nej huaad yhuindzin jäygidägy, ca' adzo'nmay yjäy'adipy. Ca' meedzip tijaty yhuindzin yjé'ajtpy, huen yajmij'adipy yajxon yhuindzin, huen yajxon ytung tundaayi. Pen jadu'n ajcxy yhuindzin midungixy yajxon, huin'it cömay y'idipy yi Dios ytiy'ajt, je Dios huidibi xyajni dzoocin ajt n'alma.

¹¹ Cham n'ixim nnehuiyim nej Dios may'ajt ti tuñ miid tüg'óciy jāy ajcxy ycixpi, co ti yaj'oyiy nej jéb huaad hueñypinity pinjaty mijpidaacip yi' y'ayuc, ypadamyb ajcxy y'alma ñdzooocin co anajty y'o'ccixy. ¹² Dios cham ti xyajnejhuiyim pen tzo'gamb ich ajt n'alma, chojcpy co n'ixmajtzim je jibic-huinma'n huidibi Dios ca' jäygidägy. Ca' huaad ooy nijot'ajtim yi mayñaxpi tzaaayin ma jadachambi xi tiempo yjacyöy. Copicy ndzinaayim huujycujc etz tudägy, e nudayunim Dios y'ayuc ytiy'ajt. ¹³ Njijp'ixim mina Jesucristo, je huidibi xy'ane'mdaayim, ymiina'n ya naaxhuiñ jadüg'oc miid ich ajt ycixpi. Njotcugiyim ich ajt co n'ixim ymiin miid y'oy'ajtin ymic'ajtin, yi Dios huidibi yajni dzögam ich ajt n'alma. ¹⁴ Yi Cristo Jesús ti ñayoxyii ti

ñaydoogyi co y'o'cy ma yi cruudz müid ñich ajt ycixpi. Yi' ti xyjuybidzimim ma anajty yi mujcu' ci'am xymüid'ajtim, co anajty ti nbocytuunim. Yi' ti xyajpocyñihuâtzaayim nidüg'óciy, jigix Dios xyjäy'ajtimip müid huädz jot huädz huinma'ñ, jëb nduunim oyjäy'ajtin cixyot huinjot.

¹⁵ Tito, jada tiy'ajt migügtjic myajnimaydáhuipy. M'ñhuijip mgapxhuijip ajcxy yajxon. Dios ti xymöy cötujcin co m'ojipy pinjaty xycacapxmidoob, jëb ajcxy yi m'ane'min xyajmij'ajtip.

3

Huen mijnicxpejticy yi gobierno ytungmüidpi

¹ M'ñhuijip mgapxhuijip yi migügtjic huen capxymidoogixy yi gobierno ytungmüidpi etz cajpjäy ytungmüidpi. Huen capxymidoogixy jadu'n nej y'ane'myii ajcxy. Huen tungixy huidibi tiydudägyip huidibi ajcxy yaj'ane'mip. ² M'ñhuijip mgapxhuijip yi migügtjic ajcxy ca'p ajcxy ni pin nigapx ni'ojñhuip, nañ ni ca' tzipcapxy ajcxy ixtáhuip, huen ñaybidáacigixy amigü, huen mímecxtujtaayigixy yi ymigügtjic ajcxy, huen nicy xyeemy jäy'ajtcixy müid yi mayjäy ajcxy.

³ Jecy'ajty ma ca'ní anajty nmijpidaacim Cristo Jesús, hue' anajty nyajpaatim müid jibic-huinma'ñ. Ca' anajty n'ñmidoohuim ngapxmidoohuim. Je mujcu' anajty ti xyhuin'ñnim, paady anajty nnüidigooyim ndüidigooyim. Ndzachnijot'ajtim mayñaxpi tzinaayin, ni ngajajtim anajty nej n'ixmajtzim yi jadu'mbi huinma'ñ. Jibic-huinma'ñ nduunim. Jadu'n njäy'ajtim nijot anajty n'idüitzim, nga'oy'ixxim anajty nmigügtjic. Paady jäy anajty xymüiddziptzoonim, chi naymijotma'tcootim miñ xyipy. ⁴ Jadu'n anajty nduunim ixti cooni Cristo Jesús ñayguëxigüiyb ya naaxhuin, etz nnejhuüyim jadu'n nej Dios ñich ajt nihuambi yajtzoocpi may'ajt oy'ajt ti tuñ müid tüg'óciy jäy ajcxy ycixpi. ⁵ Yi' xyajnidzoocim ajt n'alma canan co ñich ajt ndzach'oyjäyity. Hue' je' jadu'n ti tuñ müid co pa'ayo'n ti yajtuñ müid ñich ajt ycixpi. Ninigoob ti tuñ may'ajt oy'ajt müid ñich ajt ycixpi. Chi yaj'oy'ñyñi ajt njot nhuinma'ñ huinjemy müid je Espiritu Santo huidibi xyajtigüiyim njot nhuinma'ñ, e jadu'n ajt njogy'ajtin ndzinaayin chondaacni huinjemy. ⁶ Dios ti yecy yi Espiritu Santo janch mijcajee ma ñich ajt njot nhuinma'ñ. Jadu'n Jesucristo xytuunim, je huidi ñich ajt nihuuanim yajtzoocim. ⁷ Yi' ti xyaj'ahuimbijtim tudägy müid je may'ajtin oy'ajtin huidibi ti tuñ co yi' ti y'ögy müid ñich ajt ycixpi. Jëyi cham y'oy'ahuixnity mina anajty nbadaanim je jugy'ajtin huidibi Dios müid huidibi ca' ycixipy ni minaa xi.

⁸ Jada ayuc jada tiy'ajt ndzocpyich co miich mnigapxpedipy. Ooy ycopicity co yi' ajcxy huidibi mijpidacp Dios huen oyjäy'ajtin tungixyp. Ooy y'oyity co oyjäy'ajtin tungixyp ajcxy. Yjäygidägipy yi jäy ajcxy müid je oyjäy'ajtin huidibi anajty ajcxy ytumy etz ypaadipy ajcxy oy'ajt. ⁹ Ixmatz yi jäy ajcxy huidibi nigapxy nimiydägy yi nigoo'ayucity, yi huidibi ca' choobaady. Nañ jadu'n yi' ajcxy huidibi nigapx nimiydacp huidibi ñi'ap'ajtpy ñideedy'ajtpy. Ca' mijiptigiyñhuipy yi tzip capxy ma yi judiojäy ycötujcin huidibi ajcxy ypanicxyp. Yi jadu'mbi tzip capxy ninigoob yi', ca' yi' ni ma choobaady, ca' jugy'ajt müidity.

¹⁰ Yi jadu'mbi jäy huidibi tzip capxy ixtaayb, müid tüg'oc mejtz'oc myaj'ojipy pen ca' ycapxöbicy, tim ix'oj, huen nicxy. ¹¹ Mnejhuüyb co yi jadu'mbi jäy ajcxy ti ixmajtcixy je tiy'ajt, tundigooyb yi' ajcxy, ci'm jadu'n nayya-jpocycáhuügixy.

Pablo nimay Tito co miid naybadaanip

¹² Nyajni guexipich nidüg, aver huidibi iich anajty n'ocquejxyp yi Artemas o yi Tiquico. Co yi jim yjadipy, chi miich xyjatyñimipyich mic'amy jim Nicópolis com jim nyajnaxa'ñich yi tich poj tiempo. ¹³ Co yi Zenas, yi huingapxpi, etz Apolo ajcxy jim yjadipy, quejxnajxcix miich yi', e mooygixy ytu'amgixpi ca'ydi ti yajmayjajtcixy tü'am. ¹⁴ Huen yi nmigügtijc'ajt ixpijccixy nej jäy y'oyjäy'aty, huen pubejtcixy pin tijaty yajmayjajtp. Pen ca' jadu'n tungixy, Dios ca' yi jäygidaacip yi' ajcxy yhuinma'ñ.

Pablo ycapxycixy miid Tito

¹⁵ Yi migügtijc'ajcxy huidibi ya yquejxyp ajcxy capxpoocxin ma miich. Nquejxpich ngapxpoocxin ma tüg'óciy yi nmigügtijc'ajt huidijaty jim yajmij'ajtp Cristo Jesús. Huen Dios mij may'ajt tunip miid miich ajcxy ycixpi. Amén. Jadu'ñyi ngapxcixyich.

FILEMÓN

Yi Necy Huidibi San Pablo Yajniejx Filemón

¹ Hich Pablo etz Timoteo, ñich ajt nmigüg, nijayñybich miich Filemón huidibi ooy ndzocyich, huidibi quipxyi mïid nduunim. Nmach'iññayich mïid co nyajmij'atyich Cristo Jesús. ² Nañ jadu'n nijayñybich yi Apía, ñich ajt nmigüg töxyjäybi, etz yi Arquipo, huidibi capxhuäcx Dios y'ayuc tú'ciy mïid ñich ajcxy, etz tüg'óciy yi migügtjic huidibi naymújcigixp ma miich mdjic Dios ojadajtcixy. ³ Huen Dios Teedy etz yi Huindzin Jesucristo tuñ may'ajt oy'ajt ma miich ajcxy etz xyajjotcugñyigixipy.

Pablo capxpaady Filemón co mijpidägy Dios

⁴ Nyajnajxpyich Dioscojuyip ma Dios mïid miich ajcxy ycixpi. Njatytmjâymejtzpich miich ajcxy jabom jabom co Dios nmibijctzooyich. ⁵ Ti ñich ayuc nmïdoy jadu'n nej miich mdzocy mjihuüy yi Huindzin Jesús etz tüg'óciy pinjaty yajmij'ajtp Jesús. ⁶ Nañ jadu'n nmibijctzooybich Dios mïid miich ajcxy ycixpi, huen oyjäy'ajtin mdunipy mïid je migügtjic, jadu'n nej Dios ti xyajnejhuüy yi tiy'ajt jigix ajcxy tiy'ajt paadipy ma miich nej jëb ajcxy cuyduñ Cristo y'ayuc. ⁷ Hermano, ti ñich ooy njotcugñyich mïid yi m'oyjäy'ajtin huidibi miich mdumyb co ti mbubety yi Dios yjäy.

Pablo pijctzoy tüg may'ajt ma Filemón mïid Onésimo ycixpi

⁸⁻⁹ Njapijctzoohuamybich tüg may'ajt ma miich. Oy njamïdidyich cötujcin huidibi Jesús xymooyich jëb nja'ane'my co miich mgöbigipy Onésimo oy'amy. Per ca' jadu'n n'ane'mañ mïid co ooy ndzocy ooy njihuüyich miich. Paady cham may'ajt nbijctzooyich ma miich co mgöbigipy yi Onésimo oy'amy. Hich Pablo, ti nmijjäyññich. Cham jäy ti xypidägyich pujxtigoty mïid co ngapxhuäcxich Jesús y'ayuc ytiy'ajt. ¹⁰ Cham may'ajt nbijctzooyich ma miich co mba'ayoohuipy yi Onésimo. Jadu'n njihuüyich nej n'ung'adyiijich mïid co yi' ti mijpidägy Jesús ya ma ñich nbujxtijc'iññayich co ti nyajnimäyich Dios y'ayuc.

¹¹ Tiibi xii tiempo ñaxy co yi Onésimo ca' yi' ti xy'ïmïdoy ti xycapxymïdoy. Jadachambi janchtiy capxymïdoohuam jadu'n ma miich etz jadu'n ma ñich. ¹² Cham nyajnieguexy Onésimo. Ooy njajihuüyich co yam nguexyich. ¹³ Ooy ñich yam njayaj'ida'ñich ma ñich jigix ixipy yam xymïdтуñich. Ytimyñipaatpy ixipy jadu'n nej miich xymïdтуñich ma yam nbujxtijc'iññayich mïid co ngapxhuäcxych je jemybi oybi ayuc nej Jesucristo yjaty ayoo. ¹⁴ Per ca' ñich n'a'ixiyich nixy nyajhu'myich, pen ca' miich jadu'n mina'ñ. Ca'p ndzocyich adzip ahua'ñ tijaty miich mdunipy. Jëyi ndzocyich co miich oy'amy xypubedipyich. ¹⁵ Ca' yjegyity paady ycixpi ti xycöguëgy jëbi mijpidägy Jesús. Hueeni xii tiempo ti y'ity ya, e cham co yhuimbidity ma miich, mïid y'idipy jim huinixii. ¹⁶ Ca' jadu'n m'ocmïd'ajtnip cham jadu'n nej jac'oyñipin cojuyiy codoogiy tumbi. Hue' je' mmi'adip jadu'n nej Jesús yjäy huidibi ooy mdzocy mjihuüy. Pues ooy ñich yi' ndzocy njihuüyich. Jac nigí cham miich mdzogipy mjihuüy mïid co yi' cham y'oyjäyity, etz co cham mijpidägy yi Huindzin Jesús.

¹⁷ Pen janch miich xymigüg'adyiijich cöbic yi Onésimo jadu'n nej ñich miich ixipy xycöbicyich. ¹⁸ Pen ti yi' yinjaty huenjaty xymïdundigoy o

xymínucx'adyii ìch miich nmigüedipy. ¹⁹ ìch Pablo, ìch miich njaaybìch nfirmajìyich mïdich ngi'mgi' ngi'mletra. Hermano, nmigüedipyich nej Onésimo xymínucx'adyii. Oy ìch yam ca' n'ìbaady ngapxpaady co miich xymínucx'adyiijich mïd co Dios ytiy'ajt ti mbaady ma ìch. ²⁰ Xypubedipìch mïd Onésimo. Yi nHuindzin'ajtim Jesús yjägüedägipy pen jadu'n mduñ. Mdunipy may'ajt mïd Onésimo mïd Jesús ycixpi, e jadu'n ìch jëb huaad njotcujc'atyich.

²¹ Nnejhuìybìch co ooy m'ìimïdoy mgapxmïdoy, e jadu'n nej yam njacni-jayìy, jac'anaxy mduna'ñ. ²² Nañ jadu'n yam nimäy. Tun may'ajt ni'ixi tüg jättac. Njijp'ijxypìch co nbujxtijcpidzimipyich tzojc mïd co miich ajcxy Dios mibijctzoogixy mïd ìch ycixpi, e jadu'n jëbi nìcxibìch ma miich.

Pablo ycapxycìjxy mïd Filemón

²³ Nañ nbïdacpyich necyjoty yam. Xycapxpoocxp Epafras ìch nmibujxtijc jäy mïd Cristo Jesús ycixpi. ²⁴ Nañ xycapxpoocx Marcos, Aristarco, Demas etz Lucas. ìch yi' ajcxy xypubejtp ya. ²⁵ Huen yi nHuindzin'ajtim Jesucristo may'ajt oy'ajt tunipy ma miich ajcxy, jëb miich ajcxy oy m'ity. Amén. Jadu'n ngapxcìxyich.

HEBREOS

Yi Necy Huidi Pinjaty Yajnigiejx Je Hebreo jäy

1 Jecy'ajty Dios ayuc yejcy ma ajt nmij'ap nmijteedy canaag'oc etz canaag-nax müid je yprofetas ajcxy, je' ajcxy huidibi najtzcapxiy Dios y'ayuc. ² E jadachambi ma xii tiempo yhuingooni co je naaxhuiñybi ycixani, Dios ayuc yecy ma iich ajt müid je' y'ung. Dios müid y'ung yaj'oyiyy je naaxhuiñybi etz tüg'óciy tijaty huidibi yajpatp. E Dios ti y'ung yajmigo'ixmadziydäy tüg'óciy. ³ Dios y'ung ymüid Dios y'oy'ájtin, yi' je' Dios ytücxin'ajtpy yjajin'ajtpy. Yi' je' codinaayb etz yajnigüexigy nej je' je Dios. Dios y'ung huijtz'ijtaayb tüg'óciy müid je' y'ayuc etz ane'min mic'ajt müidpi. Co Dios y'ung ti xyajhuaatzim ajt nbocy, chi cöbijcy je mij'ane'min jüiby tzajpjoty, jadu'n nej jihuüy y'ixtacy a'oy'amy ma je mijpi Dios ymijc jüiby tzajpjoty.

Dios y'ung jacmij yi'ca'ydi ángeles ajcxy

4 Je Dios y'ung jac mij je' ymic'ajt y'ane'min müidity, ca'ydi je ángeles ajcxy. Com yi' je' Dios y'ung, paady ycixpi mic'ajt müidity jaydëbi ane'my huidibi Dios yje'ajtpy, e ca'ydi yi' ángeles ajcxy yi' jadu'mbi mic'ajt müid. ⁵ Com Dios ca' yi' ni tüg'ángel nimay:

hich müich n'ung'ajtpy. hich müich ti nyajpi'c'aty jadachambi xii.

Nañ jadu'n ca' Dios ni tüg'ángel nimay:

Müich xyteedy'adüibich, iich müich n'ung'adüiyb.

⁶ Co Dios y'ungoob oy quexy ma naaxhuiñyjäy chinäy, chi yi' ane'min pidacy: Huen je ángeles ajcxy nidüg'óciy huindzigihuiipy pa'tjihuihuiipy je' y'ung.

⁷ E müid je ángeles ycixpi, Dios ymina'ñ:

Yi ángeles jadu'n yi' ajcxy nej poj. Yi' ajcxy huidibi tzajpjoty tzinaayb, jadu'n yi'ajcxy nej huidezuc, nej jüinye'n.

⁸ Jadu'n Dios yminañ müid y'ung ycixpi:

Müich, Dios'ajtp, müich m'ane'min huinixii huinitiempo yi' y'idipy. Müid mdudägy'ajtin müich m'ane'mipy.

⁹ Ti mdzocy je tiy'ajt tiybi, e ca' ti m'ixañ je jibicpi. Paady ycixpi Dios, müich mDios, ti xyhuin'ixy, e ti yejctäy nigü ma müich je jotcuyc'ajtin je xondaacin, ca'ydi ma yi' mmi'ane'mbidijc.

¹⁰ Dios nañ jadu'n ymina'ñ:

Müich, Huindzin Dios, oga'n'aty mbidac nej naaxhuiñybi chondacy, e müid müich mmi'c'ajt myaj'oyiyy je tzajp.

¹¹ Cijxtähuiy yi' naaxhuiñybi etz yi' tzajp, per müich huimüp huinixii huinitiempo. Jadu'n yi' naaxhuiñybi etz yi' tzajp y'amijyidähuiipy nej huit.

¹² Jadu'n müich yi' naaxhuiñybi etz yi' tzajp m'anëgipy nej tüg' huit yaj'anëgyin. Jadu'n müich yi' naaxhuiñybi etz yi' tzajp myajtigadzipy nej jäy ajcxy yajtigach yhuit. Chi müich je'ni m'idipy, je mxii mjimijt ni mina ycacixipy ycatigoyipy.

¹³ Ni camina Dios canimay ni tüg' je ángeles ajcxy:

hña' ma iich nmijc a'oy'amy, ixti mabaad iich müich je mmidzip nmimadactäyich, jadu'n yi'ajcxy nipaadipy nej yi' müich mddecypocpejt'adyii.

14 Tüg'óciy je ángeles ajcxy ac espíritu yi' ajcxy, e ytungixy ma Dios, yquexyöygixy jigix pubedipy je jáy ajcxy huidibi ajcxy y'alma padam ñidzoocin.

2

Ca' n'ijxnajx nmídonajxim nígooyi pocyhuinteexin

1 Míid jadayaabi tiy'ajt ycixpi, oy co yajxon n'ocjáyugüiyim Dios ytiy'ajt huidibi ti nmídoohuim, jigix ca' njijpyöyduutim je Dios ytiy'ajt huidibi jadu'n nipatp nej tü'aa oybi. ² Pen je ayuc tiy'ajt huidibi ángeles ajcxy yejc jecy'ajty, hui'm je' co yjanchity. E pinjaty pocytumb, e ca' cuyduuni Dios ytiy'ajt, Dios chaachytunipy je' nej padyii míid ypocy ycixpi. ³ ¿Nej tity ñich ajt co Dios ycastigo nga'ocpaatim, pen je' je' yam ca' nmijpidaacim je Dios ytiy'ajt jadu'n nej jébi xyajnidzoocim ajt n'alma? Yi Huindzin Jesús jayjip'aty ci'm nígapxy Dios ytiy'ajt jadu'n nej jébi Dios xyajnidzoocim ajt n'alma. E jac'axam je discípulos ajcxy nañ jadu'n najtzcapxiy Jesús y'ayuc, e nígapxpejty ajcxy co yjanchity je Jesús y'ayuc, e chi capxnajxy ajcxy jada tiy'ajt ma ñich ajt. ⁴ Jadu'n anajty capxhuäcxixy Jesús y'ayuc ma ñich ajt, chi Dios yajnigüexcp Jesús y'ayuc co yjanchity co tuñ ijxpejt, mijhuinma'ñ etz milagro. E co Dios xymooyim je yjihui'ñ ymic'ajt, chi nije' nije' nbaatim mic'ajt ma Dios. E jadu'n Dios tuñ nej yi' tzocy.

Jesucristo jadu'n je' anajty nej ajcxy yjuugy ymigüg

⁵ Dios ca' yi ángeles ajcxy ti cötujcin möy co y'ane'mity ya naaxhuiñ, jadu'n nej xii tiempo min cidägy, je xii je tiempo huidibi ñich ajt nnimiydaacim. ⁶ Hue' janchity ji tüg'it yjaybetyity ma Dios ñecy, ma ymína'ñ:

Miich Dios, ¿ti yi' je naaxhuiñjyá, co miich yi' ajcxy mijmedziyby? ¿Ti yi' je naaxhuiñjyá, co miich je' ajcxy njotmay'adyii?

⁷ Janch con xii tiempo miich ti mmöy yi naaxhuiñjyá ajcxy e nañ ti mmöy jacminacy ymic'ajt y'ane'm'ajt ca'ydi yi ángeles ajcxy. Per jac'axam miich mmöhua'ñ naaxhuiñjyá ajcxy nígi ymic'ajt y'ane'm'ajt, ca'ydi je ángeles ajcxy. Tüg'óciy huidijaty miich ti myaj'oyiy anajty ti mbidactähuiy yi' ma yi naaxhuiñjyá ajcxy ane'min.

⁸ E co anajty ti mbidactäy anajty ma yi' ajcxy y'ane'min, jadu'n nipaady nej jihuiy tüg'óciy tijaty huidibi ti myaj'oyiy, y'idipy ma yi' ajcxy ytecpa't. E jadu'n yi', co Dios moyday ane'min je Cristo. Dios ni ti yi' ca'ixmach níxxy yca'ity ma yi' y'ane'min. Oy ixypiy ca'ni cham n'ijxim co tüg'óciy tijaty ya naaxhuiñ etz tzajpjoty ca'ni amugi' ycapxycöbigyii. ⁹ Dios ti xyaj'ijxim co Jesús míid mij'ajt ane'm'ajt. Je ángeles ajcxy nígi mic'ajt oy'ajt anajty míidity, ca'ydi Jesús co yi' chinay ya naaxhuiñ. Jadu'n Dios tuñ jaydëbi Jesús y'ögy míid jáy ajcxy ypocy ycixpi. Jadachambi Dios ti möy Jesús mij oy'ajtin, etz mij ooy ti cömay míid je tzaachy o'cin huidibi ypaat.

¹⁰ Tüg'óciy huidijaty ya yajpatp, ji'ajtp yi' míid Dios ycixpi etz Dios ymic'ajt yaj'ijtaayb tüg'óciy huidibi ji'ajtp. Dios tudägy ytuun co yajca'pxi Jesucristo y'oy'ajtin míid je tzaachypí huidibi ti minaxy ti yajnaxy. Míid co Jesucristo tzaachypí ti minaxy ti yajnaxy, paady ycixp jáy ajcxy padaangixy Cristo y'oy'ajtin. ¹¹ Míid co Jesucristo, je huidibi jáy ajcxy yajpocyníhuuatzp, jiby mic'ajt ti paady ma Dios Teedy, paady ycixp yi' ajcxy huidibi patcixp pocyníhuuatzin nañ jim mic'ajt patcixy ma Dios Teedy. E míid co Jesucristo etz yi' jyá mic'ajt patcixy ma Dios Teedy, paady ycixp Dios y'ung je Jesucristo

ca' ti tzo'ydu'n jihuüy co yi' ymina'n co je mibijcpidijc jadu'n nipaady nej yi' yjuygtijc ymügügtijc. ¹² Paady je Cristo ymina'n ma yjaybetyity: Miich Dios, ñch miich ngapxadipyich ma nmügügtijcich. N'ihuipyich iy müid miich ycixpi ma je jäy ajcxy ti nayyöymüjcgixy.

¹³ Nañ jadu'n Cristo ymina'n ma yjaybetyity: Nmijpidägibyich Dios.

E jadüg'oc yminaanip:

Cha ñch, müid je ung anäg ajcxy tiibi Dios xymöyich.

¹⁴ Ma jäy ajcxy ytügquëx'ajtcixy, tügpi yxiixy, tügpi ni'py je' ajcxy. Nañ jadu'n Jesús ymüid je' anajty yxiixy ñi'py jadu'n nej jäy ajcxy ymüidity jigix jëbi y'ögy, e jadu'n je' yajhuindigoydähuipy je huidibi anajty jamic'ajtmüid co jäy yaj'ögüyb, je' je' je' mujcu'. ¹⁵ E jadu'n je Cristo yajnihuädzictuty tüg'öciy pinjaty anajty cojuuy codoogiy y'ijtp ma je mujcu', müid co tzigüygixy yi' y'o'cin. ¹⁶ Janch co Jesús ymiin ya naaxhuiñ, ca' nminaanim co pubedañ je ángeles ajcxy, je' janchtiy ypubedamyb Abraham y'ap y'oc. ¹⁷ E müid jada ycixpi, Jesucristo jadu'n anajty müidity ñinicx etz yjugy'ajtin tú'ciy müid je jugytijc ymügügtijc ninicx etz jugy'ajtin, jigix jëbi yi' naydügpajc codinäy naaxhuiñjäy ajcxy ma Dios yhuinduu müid tudägy'ajt etz pa'ayoohuin. Etz nañ jadu'n jigix jëbi huindzigüy Dios müid ycim ñinicx müid jäy ajcxy ypocy ycixpi, e jadu'n yajpocyhuaatzähuip yi' mayjäy ajcxy. ¹⁸ Com Jesucristo cim tzaachypi minajx yajnax, etz nañ jadu'n je mujcu' Jesucristo jot'ijxy huinma'n'ijxy, paady ycixp Jesucristo jëbi pubety pinjaty jadu'n tzaachypi minajxp yajnaxp, etz ma yjot'ixyii yhuinma'n'ixyii je mujcu'.

3

Jesús jacnigi mijity yi' ca'ydi Moisés

¹ Müid co Jesucristo jadu'n ti tuñ, paady ycixp miich ajcxy mügügtijc huidibi cixyjot huinjot mijpidacp Jesucristo, je huidibi ajcxy Dios ti xyhuin'ijxcixy co xyje adaanigixy. Pidaaccix mhuinma'n yajxon ma je Cristo Jesús, je huidibi nejhuüyim co Dios ti quexy ya naaxhuiñ, je huidibi tügpajc mijtungmüid ma Dios, huidibi tügpajc xycodinaayim ma Dios. ² Jesús tudägy yi' ti y'ity ma Dios yhuinduu, je Dios huidibi ti yajnibigyii je mijtung, tim jadu'n nej Moisés y'ijty tudägy ma je ytung müid tüg'öciy jäy huidibi anajty ti cöbiccixy Dios ycötujcin ma Moisés. ³ Jesús ymihuaad nigü huindzigüñ etz cömayin, ca'ydi Moisés. Tim jadu'n nej pin tüg tijccoipi je' je' ijtp cömay, ca' nminaanim je tijc ijtp cömay. ⁴ Tüg tüg tijc jim je' pin cojp. Per Dios yi' ti yajcojtäy yaj'oyiydäy tüg'öciy huidibi ji'ajtp. ⁵ E jadu'n je Moisés tudägy je' ytuuñ müid tüg'öciy jäy huidibi ti paady Dios ycötujcin ma yi'. Je Moisés je' ytung'ajti yejcy je tiy'ajt huidibi anajty Dios jac'axam yegamyb. ⁶ Je Cristo tudägy ytuñ müid tüg'öciy ñch ajt huidibi mijpidacp Dios, tim jadu'n nej tüg jäy y'ung tudägy ytuñ ma yteedy ytijc yteedy ypidägy. Jadu'n ñch ajt nbaady nej Dios ytijc, e Cristo tudägy ytuñ müid ñch ajt, pen tudägy nmibijcim Dios agujc x'ayuc, ca' n'ixmajzim ajt nmibijcin. Pen nmijpidaacim Dios agujc jotcujc ixti mabaad n'o'cim müid je' ycixpi huidibi njijp'ijxim ma Dios.

Dios yjäy ajcxy ypooxün

⁷ Paady ycixp jadu'n yjaybetyity ma Dios ñecy ma je Espíritu Santo jadu'n yminañ: Jadachambi pen midooyb miich ajcxy nej Dios ymina'n,

⁸ ca' ajcxy m'ijtcixy jotjuuñ jadu'n nej je' anajty ajcxy jotjuuñ y'ity, je' ajcxy huídibí mibidígy Dios jecy'ajty (co ajcxy y'ijty jim m'ijtigíduum). Je xii je tiempo jecy'ajty co ajcxy jot'ijxy huinma'n'ijxy Dios.

⁹ Chi Dios ymína'n:

Miich ajcxy mmij'ap mmijteedy ajcxy jim m'ijtigíduum xyjot'ijx xyhuinma'ny'ijxich ajcxy jecy'ajty. Ca' ajcxy jáymech co ajcxy y'ijxy anajty canaag m'ijhuinma'n huídibí ndumybich anajty müd yi' ajcxy ycixpi huixchiguijpx jimijt.

¹⁰ Paady n'jotma'tyich müd miich ajcxy mmij'ap mmijteedy jecy'ajty, e nmínaañich: "N'idígoy t'udígoy ajcxy jabom jabom ma yjot yhuinma'n. E ca' ajcxy nejhuíhuaangixy anajty ich nni'aa ndü'aa."

¹¹ Paady yi' ajcxy nmijotma'tyich, e janch janch nmímaayich ajcxy, e ca' n'indágyich, co ca' ajcxy ytigíhuipy ma ich nboocxtac.

¹² Migügtijc, naygüend'ájtigix nidüg nidüg co ni tüg miich ajcxy mgam'id'adip jibicjot jibic-huinma'n, e ni m'ga'ixmájtzcixipy Dios juugypi y'ayuc, müd co ca' mmibijccixy. ¹³ Hue' janchtiy nayjot'amijmóoyigixy miñ xyipy jabom jabom namí xii tiempo yjacn'icxñi. Jadu'n miich ajcxy mdunipy, ca'ydi ajcxy yi' pocytuní xyhuin'ingixy, e chi anajty mnaybidáacigixy jotjuuñ.

¹⁴ Pen mmibijcim nmijpidaacim Cristo y'ayuc tiibi nbaatim oga'n'aty, e ca' n'ixtigíhua'cim mabaad n'o'cim, chi jébi n'ijtim müd Cristo.

¹⁵ Je' je' je huídibí jaybetyity ma Dios y'ayuc:

Cham, pen mmidooyb miich ajcxy nej Dios ymína'n, ca' ajcxy m'ijtcixy jotjuuñ, jadu'n nej je' anajty ajcxy huídibí Dios mijotma'tp anajty müd co ajcxy mibidígy Dios.

¹⁶ ¿Pinjaty ajcxy huídibí jecy'ajty midou Dios y'ayuc e mibidígy Dios? Nidüg'óciy je' ajcxy huídibí tzomb Egipto naaxjot jecy'ajty müd Moisés.

¹⁷ ¿Pinjaty je Dios ymijotma't jadu'n huixchiguijpx jimijt? Je huídijaty ajcxy tundigoy müd Dios tyi'ajty, e je' ajcxy cijx y'óctaaygixy jim m'ijtigíduum.

¹⁸ ¿Pinjaty Dios ñimay co ni camina ytigíhuipy ma je Dios y'it ylugar ma jébi ypoocxcixy müd yi'? Je' ajcxy huídibí ca' ycapxymidoy. ¹⁹ Paady nnejhuíyim co janch ca' ajcxy jaty nej ytigíygyixyipy ma Dios y'it ylugar müd co ajcxy ca' mibijcy Dios y'ayuc.

4

¹ Com nmüdni ajty Dios y'ayuc, jadu'n nej ti xyaj'ahuaníyim co ndigíyim ma yi' chinaydac yjugy'ajttac, e nboocxim müd yi'. Paady ooy tzocy co ndzigíyim Dios. Ca' jecyity co nidüg miich ajcxy ca' mdigíhuipy müd co ca' mmibijccixy Dios y'ayuc. ² Nañ jadu'n ti ich ajty nmidoohuim je Dios y'ayuc oybi, tim jadu'n nej yi' ajcxy jecy'ajty ti midooy. Per ca' Dios y'ayuc ma ti ypubydyi ajcxy co ti jamidoogixy je tyi'ajty. Com hue' ajcxy ymidou, e ca' ajcxy mijpidacy. ³ Ich ajty com ti mmibijcim je Dios y'ayuc oybi, ich ajty je' tigíyimip ma je it huídibí Dios ti tijy ma jébi nboocxim müd yi'. Com Dios jadu'n ymína'n:

Paady yi' ajcxy nmijotma'tyich, e nmímayich ajcxy, n'íbaadyich ngapx-paadyich n'ayuc, co ni camina xii yi' ajcxy ypoocxtac capaadyipy ma ich. Tüg'óciy huídibí Dios yajcojy yaj'oyíy, hue' ti yajcojy ti yaj'oyíy jayijpni ca'ni anajty naaxhuiñybi chondacy. ⁴ Com ma yjaybetyity je tyi'ajty jilby muumity nigapxy je mihuixtujcxíibi ma jadu'n ymína'n:

Dios ypoocxy je mihuixtujcxíibi müd je' ytung ycixpi tiibi anajty tuñ.

⁵ E jadüg it yjaybetyity ma Dios ñecy ma jadu'n ymína'n:

Ca'p yi' ajcxy ytiġiygixipy ma iich nbocxtac.

⁶ Hue' janchtiy Dios yjacmüd'ajtyñi it lugar ma y pocxtac ma jēbi pinjaty ytiġihuiip. Yi' ajcxy huidibi tzinay jecy'ajty huidibi jayijp midou Dios y'ayuc, ca' je' ajcxy ytiġiay ma Dios y pocxtac, müid co ajcxy capxycōmidoodacy Dios.

⁷ Paady ycixpi Dios ti pidägy tüg xii tüg tiempo mina jēbi pinjaty tiġihuiipy ma yi' y pocxtac. Je' jadachambi xii tiempo Dios ti pidägy. Dios ti xyñimaayim nej David yminañ tzach com jecy, nej müñ jaybety huidibi ti yajniġapxy co jadu'n ymina'ñ:

Jadachambi pen midooyb müich ajcxy nej Dios ymina'ñ, ca' ajcxy mnaybidäacigixy jotjuuñ.

⁸ Co Josué je Israel jāy ajcxy camoy je pocxin, ca' Dios canigapxy huingbi xii mina ytiġihua'ñ ajcxy ma Dios y pocxtac. ⁹ Paady ycixp, jadu'n yjac-hui'myñi jadüg xii tiempo mina Dios y jāy ytiġihua'ñ ma Dios y pocxtac. ¹⁰ Com pinjaty tiġiayb ma Dios y pocxtac hue' je' y pocxy müid je' y tung ycixpi tiibi anajty tuñ, tim jadu'n nej Dios y pocxy je mihuixtujcxiiibi müid je' y tung ycixpi tiibi anajty tuñ. ¹¹ Hue' tzocy co naymic'ijxim nej huaad ndigiiyim ma je Dios y pocxtac, ca' yjecyity co nijējity müich ajcxy mbaduunipy nej ajcxy y'idiich huidibi ajcxy ca' mibijcy Dios y'ayuc, e ca' mdigiiygixipy ma Dios y pocxtac.

¹² Com yi' Dios y'ayuc ijtp yi' huinixii huinitempo, e y müid mic'ajt. Niġi yajtiġiyñajtäy ninicx, jot almi, ca' ydi tüg espada huidibi mejtz'adu'm'amy jijp etz yjijpxu'ñity. E Dios y'ayuc nejhuiydaayb nej jāy ajcxy yjot yhuinma'ñ müidity, e tüg'óciy tijaty ajcxy ñijot'ajtcixyp. ¹³ Ca' ji ni ti huidibi Dios ti yajcojy nicxy ñayyüchyii ma yi' yhuinduu. Tüg'óciy nej ajt njot nhuinma'ñ nmüidity ñigüexictähuip yi' ma Dios, je Dios ma iich ajt nguendi ngiiyegaanim, yi' ijxtaayb ajt njot nhuinma'ñ.

Jesús yi' je' je mihuingapxpi ma Dios

¹⁴ Jesús, je Dios y'ung, yi' je' tüg pajc jacmij tung müid huidibi xycodinaayim ma Dios müid ajt nbocy ycixpi. E Jesús ti ytiġiy ma Dios yhuinduu, paady ycixp tzoc ijtim tudägy ma ajt nmibijcin. ¹⁵ Pues com Jesucristo, je huidibi tüg pajc mij tung müidip ma Dios, je huidibi xycodinaayim etz xyhuingapxim ma Dios, com Cristo tzaachyp etz ijxta'ni canaagnax ti yajnaxy, tim jadu'n nej iich ajt tzaachyp etz ijxta'ni nyajnajxim, per je' ca' ma ti bocy tuuñ. Paady ycixpi jēbi Cristo ajt xypa'ayoohuim co ajt nyajnajxim tzaachyp etz ijxta'ni. ¹⁶ Tzoc aguc jotcujc nmihuingoonim je Dios y'ane'mdac e 'ojadajtim nmibijctzoohuim Dios, jaydēbi co anajty jotmay nmüid'ajtim, chi Dios may'ajt oy'ajt tunipy müid iich ajt ycixpi.

5

¹ Tüg tüg mij tung müidpi huidibi huingapxp jāy ajcxy ma Dios, hue' je' yajhuin'ijxp ma yēydijctijc, etz yajniġapxpejty, jaydēbi yhuingapx jāy ajcxy ma Dios etz yajnaxipy Dioscojuyip müid jāy ajcxy ma Dios, etz yēiipy huindzigi'ñ ma Dios müid jāy ajcxy y pocy ycixpi. ² Je mij tung müidpi jāy ajcxy yajniġijc huidibi huingapxp jāy ajcxy ma Dios, jēbi yi' ajcxy pa'ayooy huenpinity huidibi pocy y müid, com nañ jadu'n yi' ajcxy pocy jihuiy. ³ E müid yci'mbocy ycixpi copicy yēiipy huindzigi'ñ ma Dios etz müid jacjadyii jāy ajcxy y pocy ycixpi.

⁴ Ni pin huaad ci'm ycanaymöyii je jadu'mbi tung co yhuingapxity ma Dios. Dios yhuin'ijxpy pinjaty huingapxip ma yi' müid jāy ajcxy ycixpi, tim jadu'n nej Dios huin'ijxy Aaron jecy'ajty etz yajniġijcy yi' jadu'mbi tung. ⁵ Jadu'n

yajaty müid je Cristo, ca' ci'm nayñibijctzoohuüi ma yi jadu'mbi tung. Dios yajñibijci co huingapxip müid jäy ajcxy ycixpi, e ti ymöyüi je mij'ajt jadu'n nej anajty ti nimäy:

Miich je' ñich n'ung. ñich miich mjogy'ajt ti mmöy cham.

⁶ Nañ jadu'n ymina'ñ jadüg'it ma Dios ñecy:

Miich je' mhuingapxyp je jäy ajcxy ma Dios huinixi huini tiempo, tim jadu'n nej Melquisedec ytuñ.

⁷ Co Cristo chinay ya naaxhuiñ, chi ooy mijuydägy minucxtägy Dios, chi ooy mibijctzoy janch mic je Dios huidibi jëbi ycohua'ñyüi ma je o'cin. Müid co ooy mibijcy ooy huindzigüy Dios müid yung naxy yjot yhuinma'ñ, paady Dios ymidoohüi. ⁸ Je Cristo oy je' anajty Dios ja'ung'adyüi, yajti nej ycapxymidoohüpy Dios, müid je' ycixpi nej anajty ti y'ayoy ya naaxhuiñ. ⁹ Co Cristo yajca'pxy yi' y'oy'ajtin müid je tzaachypüi huidibi yminajxy yajnaxy, chi ni'ixi' anajty y'ity jëbi cop'adyüi alma nïdzoocin huinixi, jaydëbi tüg'óciy pinjaty capxymidoob Cristo, ypaadip ajcxy y'alma nïdzoocin. ¹⁰ Dios jadu'n yajñibijcy Jesús co yajñicxip je jac mijpi tung ma yi' co huingapxip jäy ajcxy ma Dios, tim jadu'n nej Melquisedec ytuñ jecy'ajty.

Je ayo'n co njippyöyduutim yi mibijcin

¹¹ Ooy ñich miich ajcxy mij nmüidmüydäga'ñ ma jada yaabi tiy'ajt, per ooy chachchip nimüidaacñity, com ca' miich ajcxy mic'amy mhuinjihuihüpy Dios ytiy'ajt. ¹² Jadu'n nej jada xü tiempo ti yjeçni ma miich ajcxy oga'n ti mmibicy. Hue' miich ixypy ajcxy mniyaj'ixpiçni Jesucristo ytiy'ajt je tziptaty. Per miich ajcxy mdzojcyñi co myajnajtçapxihüpy huijemy je Dios y'ayuc huidibi ca' chipity. Ti miich ajcxy m'ahuimbijttaaygixy ca' mic majaa ma mmibijcin. Hue' jëyi miich ajcxy jadu'n nipaady nej pi'ctijc huidibi leche uucp, e ca' jadu'n paady nej mij'anäctijc huidibi caagy caayb. ¹³ Pinjaty yajpatp ma jada ixpiçin huidibi ca' chipity, jadu'n yi' nej ma'xungdijc com ca' jajtçixy je ayuc tiy'ajt tybi. ¹⁴ Je' tziptaty tiy'ajt je je' winjihuiyigixp, je' huidibi ymibijkin mij may mid'ajtkixpin, jidu'n nej je' huidibi y'aa ytiitz jim ajkixy in je' tizpi jich kaagy je' ykaaygixpy, je' ko yjajtkixpy je' nej winjiwüygixichin je' huidibi oy, etz je' huidibi ka'oyin.

6

¹ Paady tzoc nigi yajyucpejtüm n'ixpiçin ma Dios ytiy'ajt, tzoc ajt yajyeecim nmibijcin, jigix jadu'n nipaadip jadu'n nej jäy tiibi yhuinma'ñ yca'pxtaayñi. Ca' n'agapxiyocim canaag'oc jabom jabom je tiy'ajt huidibi ti nbaatim co oga'n nmibijcin Cristo. Ca' janam jatzojc n'ixpiçocim huidibi oga'n ti n'ixpiçin jadu'n nej co njothuimbijtim nej anajty ndunim jibicpi huidibi xyajñicxim ma yi o'cin, e jadu'n nej nmibijcin Dios oga'n. ² Ca' jadüg'oc n'ixpiçocim je ixpiçin müid je niibejtin ycixpi, etz jadu'n nej yajcñixajy je mibijcpiçijc jaydëbi paadip ajcxy je Dios yjihui'ñ ymic'ajt, etz jadu'n nej yi öcpi ajcxy yjugypigipy co anajty ti öccixy, etz jadu'n nej Dios tzaachytuna'ñ huinixi pocyjäydijc. ³ Chi njac'ixpiçim Dios y'ayuc je tziptaty, pen Dios jadu'n tzojçy.

⁴ Com pinjaty ti huiñihüy Dios y'ayuc ytiy'ajt, e jäygidägy huidibi Dios yejçy, etz müidty Dios yjihui'ñ ma y'ay yjot, jadu'n je' nipaady nejñihüy chinay ma jin ytiçxin. ⁵ Etz ti ajcxy jäygidägy Dios y'ayuc ytiy'ajt, e ti jihuiyigixy Dios yjihui'ñ ymic'ajt huidibi yajtzinaayip ajcxy y'alma ma je xü je tiempo huidibi müimb cidacp. ⁶ Yi jadu'mbi jäy, pen tundigooyb ajcxy

jadüg'oc müd Dios ytiy'ajt, e ixmach ajcxy nej anajty ti mibijccixy Jesucristo, ca'p jëbi jadüg'oc jothuimbijtcixy ma Dios müd pocy ycixpi e pijtzoogixy pocyhuinmeecxin jadüg'oc. Co ixypy jadu'n ajcxy tuñ, chi huimbidzimy nej ajcxy jadüg'oc yajcruudzpejtcixy je Dios y'ung müd ajcxy ypocy ycixpi, e nixiiccixy yajxiiccixy nej Jesucristo y'o'cy müd ajcxy ypocy ycixpi. ⁷ Jadu'n yi' ajcxy nej naax ni'uuctich naag'oc naag'oc ytu'y. E pen je naax yecpy ooy cosecha ma pin ti ñpy ti ytuñ, Dios je' anajty yconuucxin ymüid. ⁸ Pen actim apy etz actim jibic utz ypidzimy ma je naax, ca' je' ti tzoohuity, e Dios je' yajtigoyamb etz nõctähup ma je mij jin. (Jada naax jadu'n jada' nipaady jadu'n nej jäy huidibi ti ixmach ymibijcin.)

Yi huidibi nmibijcim yi' xyhujtz 'ijtim tudägy

⁹ Migütiyc ajcxy huidibi ooy ndzocyich, oy ich ajcxy jadu'n njamüdmüydägyich müich ajcxy, janch nejhuüybich co ca' ajcxy ti m'ixmach yi mibijcin, etz nejhuüybich co oybi conuucxin mbaadaangixyp ma Dios etz m'alma ajcxy nidzoocin paadaangixy. ¹⁰ Com Dios ooy yi' ytudägyity, e ca' yi' jäydgoy huidibi müich ajcxy mdumyb müd yi' ycixpi, jadu'n nej oyjäy'ajtin ti mdungixy müd jacjadyii mibijcpidijc, e chambaad jadu'n mdungixy. ¹¹ Hue' ich ajcxy ndzocyich co müich ajcxy nidüg nidüg mnixondaaccix tungix oyjäy'ajtin ixti mabaad m'öccixy, jigix mbaadipy ajcxy tüg'öciy huidibi ajcxy mijjp'ijxyp ma Dios. ¹² Ca' ich ajcxy ndzojccixy co müich ajcxy m'ahuimbidipy nuux. Padungix müich ajcxy jadu'n nej ajcxy ytungixy huidibi mibijcp Jesucristo etz huidibi yajtungixp mecxtujcin, jaydëbi mbaatcixy tübi Dios xyaj'ahuanüygixy.

¹³ Co jecy'ajty Dios moy Abraham je' y'ayuc, ci'm je' nigapxpejty y'ayuc, com ca'anajty ji jac mijpi pin nigapxpedipy je' y'ayuc. ¹⁴ Chi Dios Abraham nimay: "Janch co ich müich ngonucxip, e nmöhüipy may m'ap'ung m'apmang." ¹⁵ E jadu'n Abraham y'ahuüjxy müd mecxtujcin, e jadu'n ycidigüiyi huidibi anajty Dios ti yaj'ahuanüyüi. ¹⁶ Co ajcxy jäy ycapxcixy co yjanchity, jim je' pin ñigapxpejtp je y'ayuc, je pin jacmijip, je' nigapxpejtpy jada ayuc. E co nigapxpety je' y'ayuc, chi je ayuc y'ity, e ca' huaad pinjaty ymina'n co ca' yjanchity. ¹⁷ Paady ycixpi Dios nigapxpejty yci'm'ayuc, müd co anajty yajnejhuühua'n je jäy ajcxy co cuyduna'n y'ayuc tübi ahuanüy. ¹⁸ Ji yajpaady mejtnax Dios y'ayuc huidibi ca' huaad capxtigach, e Dios ca' y'anüdügy nimina. E co Dios jadu'n tuñ, chi xyajjotcugüiyim mij, ich ajt huidibi n'ixtaayim e ndzojcim yi' ypubejtin. E ti nmijpidaacim yi' y'ayuc jadu'n nej jijp'ijxim co xymöhuaanüm ajt n'alma jugy'ajtin huidibi ca' ycixipy ytigoyipy ni mina. ¹⁹ E müd co njijp'ijxim co Dios xymöhuaanüm ajt n'alma jugy'ajtin huidibi ca' ycixipy ytigoyipy, paady ajt n'alma jotcujc ijtim ca' ma tzigi'n jihua'n. Jadu'n Dios y'ayuc nipaady müd ich ajt ycixpi nej tüg pujx huidibi je barco huon'ijtp mejryoty, ca'ydi nej yjaty je barco. Ich ajt njijp'ijxim co ndigihuaanüm ma Dios y'it tzajpjoty, tim jadu'n nej je judío sacerdote mijtungmüidpi ytigüy anajty jecy'ajty ma Dios y'it ma je Dios ytiyc, je it huidibi anajty adyducyip müd huit. ²⁰ Tigihuaanüm ich ajt ma je Dios y'it tzajpjoty ma Jesús ytigüy müd ich ajt ycixpi, Jesús ti yaj'ahuäch nej jëbi ndigüiyim ma Dios y'it. E jadu'n Jesús naydügpajc huingapxy etz codinäy mayjä ma Dios yhuinduo huinixü huinitempo. Jesús ytung tim jadu'n nipaady nej Melquisedec ytuñ jecy'ajty.

7

Yi Jesús tim jadu'n ymijity nej Melquisedec

¹ Je Melquisedec hue' je' anajty rey'ajtp ma je cajp huidi yxii Salem, e je' anajty huingapxp ma je mijpi janchypi Dios tzajpjotyipi. Co anajty Abraham yhuimbity co anajty oy ti chiptuñ, ma anajty je reydyjc oy ti yajquee-huäcxtäy ti mimadactäy, chi Melquisedec chooñ oy jipcoyöyiy Abraham, e chi ooy Dios mijudyacy minucxtacy müd Abraham ycixpi. ² Huidibi anajty Abraham ti paady ma anajty oy ti chiptuñ, chi je' pijc-huäcxy majcpiçy, chi pugoñ tüg-piçy mooy je Melquisedec. Melquisedec yxii hue' yhuimbizimy "rey tudägypi". E com co anajty yrey'aty jim Salem, hue' Salem yhuimbizimy "jotucj'ajtin", paady jëbi nmînaanîm jadu'n, "je rey huidibi jotucj'ajtin yejcp". ³ Je Melquisedec ca'p anajty yajnejhuïy ytaj yteedy, ni y'ap yteedy. Ni ycajajnimidyägy nej ypi'c'ajty etz nej y'ögy. Tim jadu'n je' anajty yajpaady nej je Dios y'ung, tüg huidibi huingapxp jäy ajcxy ma Dios huinixii huinîtiempo.

⁴ Occuenditungixy miich ajcxy nej je Melquisedec anajty ooy ymijity. Je Abraham, iich ajt nmij'ap nmijteedy ci'm mooy Melquisedec je tüg piçyipi huidibi anajty ti pijci je rey ajcxy ma oy chiptuñ. ⁵ Nej Moisés ycötujcin y'ane'my je' anajty ajcxy yhuingapxy ma Dios ytijc je pinjaty Levî y'ung'ajtpy y'anäc'ajtpy, y'ap'ung'ajtpy y'apmang'ajtpy. Je' ajcxy cötujc müid co jäy ajcxy yajcuend'adipy tügpicy je majc-piçyipi huidibi xii diezmo. Oy je' anajty ajcxy ja'ajugy'adyii ja'amigüg'adyii, com hue' anajty ajcxy Abraham y'ap y'oc nidüg'öçiy. ⁶ Per Melquisedec oy je' anajty ca' Levî ap'adyii teedy'adyii, yajcujt je Abraham tügpicy je majc-piçyipi. Je' je' anajty huidibi cidigüiyi tiibi anajty Dios yaj'ahuanîyii. Jadu'n Melquisedec yajpuhanîy Dios je Abraham. ⁷ Ni pin ycamina'ñip co ca' yjanchity co je pin conuucxin yejcp, jac mij je', ca'ydi je pin yajconuucxp. ⁸ Ya ma iich ajt, pin cidigüiyip tügpicy je majc-piçyipi (diezmo), hue' je' ajcxy jäy huidibi öcp. Per jadu'n nej anajty Melquisedec, jadu'n ymîna'ñ ma yjaybetyity co je' yjactzînaayni. ⁹ E jëbi yajmîna'ñ co je Levî etz jadu'nyibaad je y'ap y'oc huidibi ajcxy huingapxp ma Dios, e yajcujtcixy Israel jäy huidibi Dios patip, nañ jadu'n nipaady nej jihuïy ymigüety je' ajcxy je Melquisedec huin'it co Abraham ymigüejti. ¹⁰ Jadu'n nipaady nej jihuïy Abraham ñigix'ajtyñi y'ap'ajtin yteedy'ajtin Levî etz jacjadyii je huidibi anajty ajcxy ca'ni ypi'c'atyñi yma'xung'atyñi co oy Melquisedec yjipcobadîyii.

¹¹ Je Israel cajp yajcidigüiyi je' je' Dios y'ane'min ycötujcin je Levita ajcxy huidibi anajty huingapxp je mayjäy ma Dios, je' je' anajty ajcxy Aarón y'ap y'oc. Chi jada' co jada ajcxy janch ca'ocyaj'ahuimbijttäy tudägy pinjaty anajty je Dios ycötujcin payöyb, ca'p tim je' anajty ycopiçyity co ycajacquëxigy jadüg huidibi codinähuiç je mayjäy ma Dios, ca' y'ocje'jiñ ma ymiñ Aarón y'ap y'oc. Je jadügpi huidibi codinähua-myb je mayjäy ma Dios, hue' copicy co tü'çiy naybadîyib müid Melquisedec. ¹² Co ytigadzipy pinjaty huingapxp ma Dios, nañ jadu'n ytigadzip je tiy'ajt je cötujcin. ¹³ Iich ajt nHuindzin Jesucristo, je huidibi ñimidyacpy ma Dios ñecy co huingapxa'ñ je mayjäy ma Dios, huingbi ap huingbi Teedy je' anajty, ca' y'ocLevijin. E ni tüg yi' y'amigüg ca' yhuingapxy ma Dios. ¹⁴ Huädz yajnejhuïy co iich ajt je nHuindzin Jesús hue' je' anajty ymij'ap'ajty ymijteedy'ajty je Judá. Moisés ca' yi' capxpaty Judá y'ap y'oc co nimidyacy pinjaty anajty huingapxp je mayjäy ma Dios ytijc.

¹⁵ Jacnigüëxîcp jada ooy co jadüg ytigüy huidibi tumb ma Dios, huidibi tü'çiy naybaatip müid Melquisedec. ¹⁶ Ca'p Jesucristo yajtungbijci co huingapxp je mayjäy ma Dios müid je cötujcin huidibi mînaamb co yi' y'amigüg'tijc patip yi' jadu'mbi tung, je huidibi ajcxy yjugy'ajtin cixip tigoyip. Hue' je Jesucristo

chinaayin yjugy'ajtin ca' ycixipy ytigoyipy ni mina, paady ycixp Jesucristo yajtungbijci huingapxi je mayjäy ma Dios. ¹⁷ Com müd je' ycixpi jadu'n Dios tiy'ajt yejcy co jadu'n ymina'n:

Miich je' cham mhuingapxyp je mayjäy ma #ch. Tüg nax miich mhuingapxin nej Melquisedec anajy yhuingapxy.

¹⁸ E jadu'n je oga'nbi je ane'min cötujcin huidibi Moisés yejc, ca' y'octuni cham, ca' jac ti mic'ajt müdity co jaydëbi yajtzögipy jäy ajcxy y'alma. ¹⁹ Je Dios ycötujcin huidibi Moisés jayhui'm jecy'ajty, ca'p je' ni ti yaj'oybidzimy yajhuätzpidzimy. Müd je huingapxpi ycixpi huidibi nmüd'ajtim cham jac'oy yi' huidibi njjip'ixim ma Dios.

²⁰ Co Dios Jesucristo yajtungbicy, chi nigapxpejty yci'm ayuc co yjanchity.

²¹ Jacjadyii ajcxy huidibi anajy tungixp ma Dios ytjic, hue' je' ajcxy tungmooyi, e ca' Dios nigapxpejty yi' ajcxy y'ayuc. Per co Jesucristo ytungbijcy, chi Dios nigapxpejty yci'm'ayuc. Com jaybety jadu'n ma Dios ñecy ma jadu'n ymina'n:

Je Huindzin Dios ti nigapxpejty yci'm'ayuc, e ni mina ycajotmetzcihuipy.

Jadu'n Dios nimay y'ung:

Miich mhuingapxamyb etz mgodinähuamyb je mayjäy ma #ch huinixii huinítiempo. Jadu'n miich mdunipy nej Melquisedec ytuuñ.

²² Com Dios ñigapxpejty yci'm'ayuc co yjanchity co Jesucristo ytungbijcy, paady yi' Jesús yi' je' majamoy mic'ajtmoy je jemybi ayuc huidibi yajhui'm müd jäy ajcxy ycixpi, je jac'oybi cötujcin. ²³ Jacjadyii huidibi anajy yhuingapxciy ma Dios ytjic, nimay anajy ajcxy ooy. Com co tüg y'o'cy, chi huingbi ytigiy ma je' ytung. ²⁴ Jesús com ca' yi' yjugy'ajtin ycixipy ytigoyipy ni mina, paady ca' ytung ixmach, etz ca' yi' ytungmöy ni pin. ²⁵ Müd je' ycixpi Jesucristo mic'ajt müdity jaydëbi yajnizzoocipy jäy ajcxy y'alma huinixii huinítiempo, pinjaty mibijctzooyb Dios ma Jesucristo yxi. Jesucristo jëbi tunipy jadu'n, com yi' yjugy'ajtin ca' ycixipy ytigoyipy ni mina. E yi' Dios mibijctzodib müd jäy ajcxy ycixpi jabom jabom huinixii huinítiempo.

²⁶ Je Jesús je' je' tügpajc je mijtungmüdpj ma Dios, huidibi #ch ajt nyajmayajtim, je huidibi müd huädz yjot huädz yhuinma'n, e ca' je' müdity ni ti jibicpi ni ti pocy. Je' ca' tügnax y'ity müd pocytumbidijc. Nigi je' ymajity ycixity, ca'ydi jac ti huidibi yajpat tzajpjoty. ²⁷ Ca' Jesús yjadu'nity nej ajcxy jacjadyii huidibi tuun ma Dios ytjic jecy'ajty, co yaj'öccixy iyujc, e je' ajcxy yejcy huindzigi'n jabom jabom, midüg co je' ajcxy ñayyajpocynihuächyii, e chi jada' müd jäy ajcxy ypocy ycixpi. Jesús tügtecpajc je' yejc huindzigi'n müd mayjäy ycixpi, co je' ci'm ñayyejci ma yi' o'cin jadu'n nej tüg huindzigi'n. ²⁸ Je Dios ycötujcin huidibi Moisés yjayhui'm jecy'ajty, hue' y'ane'my co huen tungmöy jäy ajcxy huindzigi'n pocy müd, co mijtungmoy ma Dios ytjic. Chi jac'axam Dios yajhui'my jemybi ayuc jemybi cötujcin, e nigapxpejty yci'm'ayuc co yjanchity. E müd je jemybi ayuc Dios tungmoy yci'm'ung, huen yajnicxip je mijpi tung ma yi' y'it, je Dios y'ung huidibi ijtp huinixii ca' ti bocy müdity.

8

Jesús yi' je' je' mijhuingapxpi ma yi' Dios y'ayuc jemybi

¹ Huidibi ooy nigi ycopicyity, huidibi yajnimydaacp, co #ch ajt nmüd'ajtim pin xycodinaayim ma Dios, je' je' je' Cristo, je huidibi jiiby ijtp mij'ane'mbi tzajpjoty, jadu'n nipaady nej jihuüy yi' y'ñäy a'oy'amy ma Dios ymijc. ² Jiiby je' ytuñ ma je janchyp Dios y'it ylugar, je amaaybi, huidibi oyhuindzigi'y ijtp. Je it huidibi Dios yajcoj, e ca' nmünaanin jäy ajcxy yajcoj. ³ Tüg'öciy pinjaty

huingapxp ma Dios, yajnibicy je' paady, e copicyity co cïyegipy ofrenda etz tijaty huindzigi'ñ ma Dios müd jäy ajcxy ypocy ycixpi. Paady ooy ycopicyity nañ jadu'n co Jesucristo yegipy ofrenda etz huindzigi'ñ ma Dios müd jäy ajcxy ypocy ycixpi. ⁴ Co Jesucristo ixipy ya y'ocaypaady naaxhuiñ, ni ycahuingapxy ixipy mayjäy ma Dios. Com jiini ya yajpaady pin huingapxp ma Dios ytjic, pin yejcp ofrenda etz huindzigi'ñ jadu'n nej Moisés ycötujcin y'ane'my. ⁵ Jadayaabi huingapxpi ajcxy ytungixy ma Dios ytjic ya naaxhuiñ. Je' je' tüg ijxpejt nej Dios y'it jiiby tzajpjoty, jadu'n y'i' nipaady nej tüg anecpi huidibi tzomyb jiiby tzajpjoty. Co Moisés jecy'ajty Dios ytjic je' coji müd huit, chi Dios ñimaayi: "Cuenditun yajxon co anajty ngojy je' tijc tügnax jadu'n nej je' ijxpejt huidibi nyaj'ijx jim copcïxy." ⁶ Per je' mijtung huidibi Jesús ytumyb ma Dios müd jäy ajcxy ycixpi, jac'oydung y'i' ca'ydi je' tung huidibi je' jäy ajcxy ytumyb huidibi mijtung müd ma Dios ytjic ya naaxhuiñ. Com jemybi etz jac'oy etz jacnic'ajt müd je' cötujcin huidibi Dios ymoy Jesús, ca'ydi je' cötujcin huidibi Dios ymoy Moisés jecy'ajt. Com hue' je' jac'oy alma nidzoocin Dios yaj'ahuanüy jäy ajcxy ma je' jemybi cötujcin.

⁷ Co je' jayijp'atypi cötujcin huidibi Moisés ymooyi cayaj'oyiydaayi jäy ajcxy ypocy müd Dios, ca' y'i' ixipy ycopicyity je' mimetzpi cötujcin huidibi Dios ymoy jäy huinjemy. ⁸ Per Dios y'ijx co je' jäy ajcxy ca' yajxon cuydungixy je' cötujcin huidibi Moisés ymoy, jadu'n nej ymina'ñ ma yjaybetyity ma Dios ñecy müd je' ajcxy ycixpi, ma jadu'n ymina'ñ:

Jadu'n je' Huindzin Dios ymina'ñ: "Mimb xii tiempo ma huingbi cötujcin nmöhuibich yi Israel jäy etz Judä jäy ajcxy.

⁹ Ca' y'ocjadu'niñ nej ñich ngötujcin huidibi nmooyich je' ajcxy y'ap yteedy jecy'ajty, je' huin'it tiempo taabi nyajtzoönich ajcxy jim Egipto naaxjot. Ca'p je' ajcxy cuyduñ je' cötujcin huidibi ajcxy nmooyich, e paady ca' nduuñich cuendi y'i' ajcxy." Jadu'n ymina'ñ je' Huindzin Dios.

¹⁰ Jadu'n je' Huindzin Dios ymina'ñ:

Je' cötujcin huidibi nyegaamybich ma Israel jäy ajcxy co anajty yjadu'mbi xii tiempo ti ñaxy, jadu'n je'. Nbidägibich ngötujcin ma y'i' ajcxy yhuinma'ñ, e jadu'n nipaady nej jihuüy ti njay'ich n'ayuc ma ajcxy y'ay yjot. E ñich y'i' ajcxy xyDios'adib, e y'i' ajcxy njäy'adiybich.

¹¹ Tüg'ócïy ajcxy nejhuihuipy pin ñich. Ni pin ji cayaj'ixpigipy pin je' je' Huindzin Dios, ni pin, ni ymigüg, ni ymijjin ymidijc, ni pi'ctijc ni mij'anactijc. Com nidüg'ócïy ajcxy nejhuihuipy pin ñich; ypi'city ymutzity, ymijjäyity, etz ymij'anacity.

¹² E ñich y'i' ajcxy nmeecxip yjibicjäy'ajtin, ni camina ngajac'ajihuihuüybich ajcxy ypocy. Jadu'n Dios ymina'ñ.

¹³ Co Dios je' ycötujcin jemybi nimiydägy, je' je' co yaj'amijüyñi je' jayijp'atpyi cötujcin. Je' huidibi amijüyñip ca' je' y'octuunip, tzojc y'i' yaj'ijxtigoyaani.

9

Je' Dios ytjic huidi ya naaxhuiñ etz Dios y'it huidi tzajpjoty

¹ Je' Dios ycötujcin jayijp'atpyi ymüd je' anajty ñidiy'ajt nej huaad ytuñ ma Dios ytjic ya naaxhuiñ, ma jäy ajcxy huindzigi'huipy Dios. ² Je' Dios ytjic jadu'n je' ycojity. Je' jayijpi cuarto hue' anajty xijity Lugar Santo, jiiby anajty y'ity je' candelero etz je' mesa ma tzajcaagy y'ity ma Dios yhuinduu. ³ Jixci'py'amy ma je' mimetzpi huit y'agiyducyity jiiby jadüg'it huidibi xijip Lugar Santísimo (ma Dios ni'ixcidägy je' jäy). ⁴ Jiiby anajty tüg mij mesa ac tim ori je' anajty

ma ajcxy ypoomjojccixy, e ma je' jim anajty y'ity tüg cajoon ac ori je' anajty yñinixc huidityi. Jiiby cajoonjoty anajty y'ity tüg tu'tz ac ori huidibi anajty müid je jicxy iixpejt huidibi Dios Israel jäy ajcxy ymooy jecy'ajty. Etz jiiby anajty Aarón ytajc huidibi huijip huam. Etz jiiby anajty je tzaa y'ity ma je' anajty yciyxjayity Dios y'ane'min. ⁵ Ma je cajoonnïcx jim anajty je querubines ñügojtüdyity huidibi Dios y'oy'ajtin müid. Je querubines anajty codinaayb Dios, e je' anajty ajcxy yajnidigooyb müid yqueec je cajonnïcx ma ajcxy je huidzig'i'ñ ñi'py ypidacy müid jäy ajcxy ypocy ycixpi. Ca' huaad yjacyajnimydcy mijcajee jadachambi tijaty huidibi anajty yajpatp jiiby ma Dios ytijc.

⁶ Jabom jabom co anajty jadu'n y'ijttäy ni'ixi', chi je huingapxpi ytiigiygixy ma Dios ytijc ma je jayijpi cuarto, je Lugar Santo, tuñ ajcxy huindzig'i'ñ etz cuydungixy yi' ajcxy ytiy'ajt müid Dios ycixpi. ⁷ Jimijt jimijt ma je mümetzpi cuarto huidibi je huit adiydujcp, jiiby ytiigiy tügtecypajc je huingapxpi huidibi jacmijtungmüid ma Dios ytijc. E co jiiby ytiigiy, chi midigiy huaj ñi'py, huidibi müid huindzig'i'y Dios müid yci'mbocy ycixpi etz müid tüg'óciy jäy ajcxy ypocy ycixpi etz müid ajcxy ypocy ycixpi co ca' nejhuiigiy co ytundigooygixy. ⁸ Müid jada ycixpi je Espiritu Santo xyajnejhuiyim co je tungmüidpi huidibi huingapxi je mayjäy ma Dios, ma ajcxy jacyajtungixy anajty je jayijp cuarto ma Dios ytijc, chi ca'ni je' anajty y'ahuächñi nej jëbi pinjaty ytiigiy ma je it lugar Santísimo ma Dios yhuinduu. ⁹ Je Dios ytijc huidibi ijtp anajty ya naaxhuiñ ca' je' yjëjity je janchypi. Hue' je' anajty iixpejt'ajtp huiid Dios y'it'ajtpy tzajpjoty. Jiiby je tungmüidpi huindzigiy Dios müid ofrendas etz müid huindzig'i'ñ. Per jada huindzig'i'ñ ca' yajtigoy je pocytuni ma je jäy ajcxy yjot yhuinma'ñ. ¹⁰ Je judíoäy ytiy'ajt huidibi tuun ma Dios ytijc jecy'ajty, hue' je' ñigapxy caayin uucin, etz jadu'n nej ajcxy ñayajpocyñihuáatzigixy müid ñi etz caanaq costumbre huidibi ajcxy cuydumy. Jadu'n ajcxy ytuñ ixti cooni Dios yajtigajtzatay tüg'óciy yi' ycotujcin.

¹¹ Per ti y'oy ya naaxhuiñ je Cristo, e yi' je' cham ijtp jacmijtungmüidpi ma Dios, yi' ti mimiñ jemybi cötujcin jac'oybi. E yi' je' codinaayb je mayjäy ma Dios y'it tzajpjoty, je it jac'oybi jacmijpi, jacca'pxypi, ca' nminaanim jäy ti cojy, e ca' yaajity naaxhuiñ. ¹² Cristo ti ytiigiy ma je Dios y'it, je lugar Santísimo. Ca' ti ytiigiy müid co jiiby yajquëxiga'ñ pi'cchivo ñi'py o toro ñi'py, hue' yci'mni'py jiiby yejcpy ma Dios. Jadu'n ti ytiigiy tügtecy tiigiy huinixi huinitempo, etz xyajnidzocim ajt n'alma huinixi. ¹³ Ooy yjanchity co yi toro ñi'py etz je chivo ñi'py etz yi cuyjam co ajcxy nöccixy huaj ñix ma je Dios ojadajttac, co ajcxy je pocyjäy yajñihuáxcixy je ni'py etz yajñixidujtcixy je cuyjam ymüid mic'ajt co yajpocyhuáatzigixy ñinïcx, per jotjoty ca' yajhuäch. ¹⁴ (Je huingapxpi huidibi tumb ma Dios ytijc ya naaxhuiñ ca' ymadägy co jäy yajpocyhuádzipy müid toro ñi'py), Jesucristo ñigi ti ymadägy yajpocyhuäch jäy ajcxy müid yci'mni'py. Com Jesucristo ymüid je Dios yjihui'ñ ymic'ajt huidibi ca' ycixipy ytiigoyipy ni mina, chi ñaygiyejci ci'm ma Dios müid Dios yjihui'ñ ymic'ajt, jadu'n nej tüg huindzig'i'ñ huätzpi, com ca' ni ma ni ti tundigoy. E müid yci'mni'py Jesucristo xyajhuuatzim je jibicpi ma ajt njot yhuinma'ñ, ca'ydi ndunim huidibi Dios ca' jäygidägy, e jadu'n ajt huaad ndunim ma je Dios juugypi ytung.

¹⁵ Paady yi Jesucristo yi' je' huingapx'ajtp ma Dios müid ñich ajt ycixpi müid je jemybi ycotujcin huidibi Dios yajhui'm. Yi Jesucristo co y'o'cy, yi' ajt je' nbocy xymeexim tiibi ndundigooyim ma je jayijp'atyp cötujcin huidibi Moisés jayhui'm. E jigix pinjaty Dios ti yhuin'ixiyi, jëbi ajcxy yciidigiyi je tzainaydac

ma jëbi n'ijtim huinixi. Je tzinaydac huidibi Dios ti xy'ahuan'iyim. ¹⁶ Co tüg jây jijp'ixy y'o'cin, e yajcojy tüg testamento, ooy ycopicyity co yajnejhuihuipy pen janch je' ti y'ögy je pin yajcoj je tiy'ajt jigix je' yti'ghuipy tumbi je tiy'ajt. ¹⁷ Co tüg jây jijp'ixy y'o'cin e yajcojy tüg testamento, ca' je' ti mic'ajt müidity je testamento pen jugy'ajtni pin je' anajty ti yajcojy. Huin'itni janchity co anajty ti y'ögy, huin'it je testamento mic'ajt müidity. Je jemybi tiy'ajt huidibi Dios xyajhui'my jadu'n yi' nipaady nej jây testamento yajcojy co anajty jijp'ixy je y'o'cin, e co Jesús y'o'cy, huin'it mic'ajt moy je Dios ytiy'ajt je jemybi. ¹⁸ Paady ycixpi jecy'ajty co Dios Moisés moy cötujcin, yajtzoobaat je' müd iyujc ñi'py. ¹⁹ Moisés je' capxhuäcx je Dios ytiy'ajt ma tüg'öciy mayjây. Chi jada' huijtzigy tüg lana tzaptzpi müd tüg quipy aacx huidibi ooy oy yxuugy. Je' yajxooc ma huaj mang ñi'py etz chivo ñi'py teemhuidity müd nâi, chi Moisés yajñhui'ch je libro müd je ni'py, je libro huidibi anajty ti capxy etz nañ jadu'n jây ajcxy yajñhui'ch je ni'py. ²⁰ Co Moisés jadu'n ytuuñ, chi yminañ: "Jada je' je ni'py huidibi yajtzoobatp je ane'min je tiy'ajt huidibi Dios ti yecy ma müch ajcxy." ²¹ Moisés nañ jadu'n ñi'pyñhui'ch je cochac tijc ma anajty yDios ojadajtcixy, e tüg'öciy tumbejt huidijaty jiihy tumb. ²² Dios ycötujcin, je jecyip, yminañ co tüg'öciy huidijaty yajtungixyp co Dios ojadajtcixy, copicy yajhuädzipy müd ni'py. E pen ca' ajcxy teemy yocy ni'py, Dios ca' huinmexa'ñ yi' ajcxy ypocy.

Co Cristo y'o'cy müd ajt nbocy ycixpi, yi' yajniexy ajt nbocy

²³ Ooy jada anajty ycopicyity iyujc ñi'py huindzigi'ñ, jigix yhuädzip huidijaty tumb ma Dios ytijc ya naaxhuiñ, je huidibi ijxpejt'ajtp anajty nej Dios y'it jiihy tzajpjoty. Per je Dios y'it huidibi jiihy tzajpjoty chojcpy jac'oybi huindzigi'ñ ca'ydi huidi ya naaxhuiñ. ²⁴ Com Cristo ca' je' yti'gy ma Dios ytijc huidibi jây ajcxy ti cojy. Je tijc huidibi jây ajcxy ti cojy, je' je' ñigojtuutin je it lugar janch janchypî huidi jiihy tzajpjoty. Cristo tigi'gy ma je Dios y'it ylugar jiihy tzajpjoty, ma je' cham xycodinaayim ma Dios yhuinduu. ²⁵ Je judío mijtungmüdpî huidibi huingapxp ma Dios ytijc, huinjämijity yti'gy ma je Dios ytijc co yecy ni'py huidibi ca' ci'mni'py'adyii. Cristo ca' yi' ñay'ahuan'iyii y'ögipy canaag'oc, jëyi tügtecpajc yti'gy ma Dios y'it müd yci'mni'py. ²⁶ Co ixypiy ca' yjadu'nity, canaag'oc Cristo ixypiy patni chaachy'öcin maabi naaxhuiñybi chondagy. Per jadachambi ma xii tiempo ycixaani ytigoyaani, Cristo tügtecpajc ñayguëxiçi ya naaxhuiñ, jigix codinähuiipy tüg'öciy jây ma Dios müd ajcxy ypocy ycixpi. Jadu'n Cristo tuuñ jigix yajtigoyipy pocytunî. ²⁷ Dios ane'min pidac ya naaxhuiñ co nidüg nidüg jây paadip yi' o'cin tügtecpajc. E Dios ti pidägy je xii je tiempo mina tiyduna'ñ nidüg nidüg jây müd ypocy ycixpi. ²⁸ Je Cristo jotcujc tügtecpajc nayyejci ma je o'cin co yajpocyñihuaatztäy je mayjây. Chi jada' ñayguëxiga'ñyii je mîmejtz'ocpi ya naaxhuiñ, e ca' nmînaanîm co yajpocyñihuaatzaanip jadüg'oc je mayjây, hue' je' nihua'namyb ycohua'namyb tüg'öciy pinjaty jijp'ixxip cixyot huinjot co je' müina'ñ müd yi' ajcxy ycixpi.

10

¹ Je Dios ycötujcin huidibi Moisés jayhui'my jecy'ajty, hue' je' anajty ñidiy'ajt je oybi huidibi müinamb. Ca'p je' anajty yjëjty je oybi. Paady je cötujcin huidibi Moisés yjayhui'm ca' je' jëbi huädz yaj'ahuimbity pinjaty pocy ytumb, pinjaty mijhuäcp anajty ma Dios müd je iyujc huidibi ajcxy Dios yajhuindzigi'yb, huidibi ytun'ahuimbijtcixyp jimijt jimijt. ² Co ixypiy je cötujcin y'ocmadägy huidibi Moisés yjayhui'm yaj'ahuimbity ixypiy huädz

ajcxy je pocy ytumbi, ca' icyipy je jadu'mbi huindzigi'n̄ y'ocyajtuuni jimijt jimijt. Com pin je jadu'mbi huindzigi'n̄ wejcp, co icyipy je' ypocy yajnicxtäy, ca'p je' ma ñajihuihuiyb ti bocy müidity jadüg'oc. ³ Co jadu'n yaj'öccixy je iyujc müid ypocy ycixpi, je' je' je' tiy'ajt co ajihuiygóotigixy ypocy jimijt jimijt. ⁴ Com yi huaj mang ñi'py etz yi chivo ñi'py ca' mic'ajt müidity co pocoyajnicxtáhuipy nimina.

⁵ Paady co Cristo ymiñ ya naaxhuiñ, chi nimay je Dios:

Ca' müich ni ti huindzigi'n̄ mdzocni ma ymiñ iyujc'ögy, ti müich xyñi'ixiiyich tüg ninicx.

⁶ Ca' m'ocjäygi daacni huindzigi'n̄ iyujc huiðibi yajno'cp. Ca' müich m'ocjäygi daacni co jäy xyajhuindzigi'y iyujc müid ypocy ycixpi.

⁷ Chi m'ina'ñich: "Dios, cha nmiñich jigix müich mdzocin yajcuydunipy, jadu'n nej yjaybetyity ma müich mnecy müid iich ycixpi."

⁸ Tim jayijp, Cristo ym'ina'ñ co Dios ca' octzocni, ni cajäygidägy je iyujc ögy huiðibi yajhuindzigi'yip, ni je huiðibi yajno'cp, jigix je pocyñicxtáhuipy, oy yi' yjayjity huiðibi ñigapxy yajtunipy ma je Dios ycötujcin huiðibi Moisés yjayhui'm. ⁹ Chi jada' jadüg'it yjaybetyity co Cristo jadu'n ym'ina'ñ: "Cha iich nmiñ, jigix müich mdzocin yajcuydunipy, müich huiðibi Dios'ajtp." Hue' m'inaanim, yajtigoy je cötujcin huiðidi ane'mb co jäy ajcxy huindzigi'y iyujc müid ypocy ycixpi, etz mic'ajt mo' je jemybi cötujcin huiðibi Jesucristo xymooyim. ¹⁰ Dios jadu'n ti xyajhuaatzim ajt nbocy, com Jesucristo ti tuuni Dios chojcin co ci'm ñinicx tügtecpajc wejcy ma yi o'cin müid tüg'öciy jäy ypocy ycixpi.

¹¹ Tüg'öciy judío sacerdote huiðibi tungmüid ma Dios ytijc jabom jabom jadu'n tun'ahuimbijtcixy tügpi huindzigi'n̄, huiðibi ni camina yajnicxtaayä jäy ajcxy ypocy. ¹² Yi Jesucristo tügtecpajc yi' wejcy ñinicx ma yi o'cin huinixi huinitempo, chi jada' y'ixtacy a'oy'amy ma Dios ymijc ma ane'mdäy tüg'öciy. ¹³ Jiiby tzajpjoty Jesucristo cham y'ahuixy, ixti cooni Dios yi' ymidzip m'adactaayip, e jadu'n ajcxy nipaadipy nej jihuiy Jesucristo ytecpocxpejt. ¹⁴ Müid tüg'pajc je huindzigi'n̄ huiðibi Jesucristo wejc, tudägy yaj'ahuimbijttäy huinixi huinitempo pinjaty ti ypocyhuäch. ¹⁵ Yi Espíritu Santo nidiy'ajtp ma iich ajt jadu'n nej Cristo ti tuñ. Com jaybety müiñ ma Dios ñecy ma Dios jadu'n ym'ina'ñ:

¹⁶ Je huin'it xii je huin'it tiempo nyajmihui'maamybich je Israel jäy jemybi ayuc jemybi tiy'ajt. Nbiðägibich ngötujcin ma ajcxy yjot, e njayamybich ngötujcin ma ajcxy yhuinma'ñ.

¹⁷ Chi jac'axam Dios ym'ina'ñ:

Ni camina njäymedzaanich ajcxy ypocy, etz jadu'n nej ajcxy ytundigooy.

¹⁸ Co je pocy ti yajhuinmecxtäy, ca'p ycopicyity yjacyajtunipy tijaty huindzigi'n̄ müid pocyhuinmecxin ycixpi.

Chojcpy nmihuingoonim yi Dios

¹⁹ Paady müich ajcxy migügtijc, jëbi iich ajt ndigüyim agujc jotcujc ma Dios yajpaady müid co Jesucristo ti temy ti yocy ñi'py müid iich ajt nbocy ycixpi.

²⁰ Cristo ti yaj'ahuäch je ni'aa je tü'aa müid iich ajt ycixpi müid yci'm ninicx, je ni'aa tü'aa jemybi oybi huiðibi tigüyb ma Dios y'it. E je' yñinicx jadu'n nipaady nej je huit huiðibi anajy adujc je Lugar Santísimo ma Dios ytijc ya naaxhuiñ, je huit huiðibi cichhuäch co Cristo y'o'cy. ²¹ Jesucristo yi' je' je' m'ijtungmüidpi huiðibi xycodinaayim ma Dios ytijc jiiby tzajpjoty. ²² Paady ycixpi jëbi nmihuingoonim Dios müid oyjot oyhuinma'ñ, etz müid je m'ibicjin janchypi.

Cristo ajt ti xyajhuaatzim njot nhuinma'ñ co ñi'py temy vojcy müd ajt nbocy ycixpi jigix ca'ydi nayjihuiyim pocymüd, jadu'n nej jihuiy ti ndziihuim müd huadz nü. ²³ Tzoc tudägy n'ljtim ma nmibijcin, ca' nyajtigajtzim nmibijcin, com Dios cuydunipy yi' tüibi xyaj'ahuanüyim. ²⁴ Tzoc nhuinma'ñypidaacim co njot'amijmooyim ajt nmigügtjic, jaydëbi naychojcin nayjihuiyim miñ xyipy, e nduunim oyjäy'ajtin. ²⁵ Ca' n'ixmajtzim je nayoöymugüi, jadu'n nej ajcxy nijëjity costumbre müdity co ca' ajcxy yöy ma naymujtac. Nigi tzoc nayjot'amijmooyim, e jadu'n nej cham yaj'ijxni co yhuingooni ma je Huindzin Jesucristo ymiinaani jadüg'oc ya naaxhuiñ, chona'ñ tzajpjoty.

²⁶ Pen ñich ajt jacpocytunim tzojcingixy ma anajty ti nejhuiyim Dios ytiy'ajt, ca'p ji huingbi huindzigi'ñ huidibi xyajpocyhuaatzim. ²⁷ Je' janchtiy njacjip'ijxim müd tzigi'ñ jihuiñ je tzaachypi co anajty Dios xtytydunim, e xypidaacim mijjünjoty huidibi yajhuindigoydähuamb Dios ymidzp. ²⁸ Co pin cacuyduun Dios ycötujcin huidibi Moisés yjayhui'm, e jim metz o tugüg testigo co yjadu'nity, yajmoy je' y'o'cin ca' müd'ajty ti pa'ayoohuin. ²⁹ ¿Nej müich ajcxy minaangixy? ¿Nej cay jac'öctiy je tzaachypi mühuaad'ajtcixy? Je pinjaty ca' ixa'ñ Dios y'ung etz nixiici yajxiici Cristo ñi'py huidibi yajpocyñihuaatzp, jadu'n nej je jemybi ayuc ymina'ñ huidibi Dios yajhui'm. Etz nañ jadu'n ajcxy ni'ojiygixy Dios yEspiritu huidibi may'ajty oy'ajt tumb müd je' ajcxy. ³⁰ Nejhuiyim co je Huindzin Dios ymina'ñ: "Fich xypatp ndzaachytunipyich jäy ajcxy müd ypocy ycixpi. Fich yi' nyajcomidohuipy ajcxy ypocy." Etz nañ jadu'n yjaybetyity ma Dios ñecy: "Yi Huindzin Dios yi' yjäy tydunipy." ³¹ ¡Ooy chach mij y'ayo'nity pen je Dios juugypi xychaachytunim müd ajt nbocy ycixpi!

³² Per ajihuiyigixy müich ajcxy je xii je tiempo tüibi ñaxy, je taabi müich anajty ajcxy ti xycidigüygixy je tiy'ajt janchypi, ñipaty je' anajty nej tüg tücxin jajin ajcxy müdity. Ti ooy mhüindinaaygixy mjijptinaaygixy tzaachypi ayo'n müd yi' mmibijcin ycixpi. ³³ Nijëjity müich ajcxy ti myajhuingapxnajxcixy, e ti myaj'ojcixy mayjäyduum. Nañ jadu'n jacjadyi ti abaatcixy tzaachypi jadu'n nej je tüibi ajcxy ooy yajtzaachytungixy. ³⁴ Ti müich ajcxy myajtungixy pa'ayo'n ma pinjaty anajty pujxtigotyip, e janch agujc jotcujc ajcxy ti myajtungixy mecxtujcin co ajcxy xypjci tüjaty anajty ajcxy müd. Nejhuiyim co jiiy tzajpjoty müich ajcxy müdity ti jaty jac'oybi huidibi huinixi huini'tiempo ijtp. ³⁵ Jacmijpidaaccixy Dios, ca' mjotmetzcüygixy. Co mmijpidaaccixipy Dios, huin'it ajcxy mbaadipy oybi may'amy ma Dios. ³⁶ Chojcpy co müich ajcxy myajtungixipy mecxtujcin co mguydunaangixy nej Dios tzocy, e Dios xyajc'idigüygixip huidibi yi' ti ahuanüy. ³⁷ Jaybety jadu'n ma Dios ñecy ma jadu'n ymina'ñ:

Tzojc, janch tzojc ymiina'ñ je huidibi tzonamb tzajpjoty, e ca'p je' jecyñity.

³⁸ Jadu'n Dios ymina'ñ:

Pinjaty ñich ti ngöbicy co ytudägyjäyity, tzinähuip je' müd ymibijcin. E pen ixtigihua'cp ma ymibijcin, ca' jadu'n njotcujc'adipyich müd je'.

³⁹ Ca'p ñich ajt njëjity huidibi ixtigihua'cp ma nmibijcin, e ytiogoy y'alma, je' ñich ajt pin mibijcp, e jadu'n n'alma paadipy nüzoozin.

11

Yi mübijcin

¹ Jotcujc nayjihuiyim jadu'n co huidibi nmibijcin janch yi', oy co ca' n'ijxim. Je huidibi nmibijcin je' xymooyim jotcujc'ajtin müd huidibi njijp'ijxim ma

Dios. Je huidibi nmibijcim nejhuuïyim co janch janch jadu'n, oy ca' n'ijxim. ² Com müd co ajt nmij'ap nmijteedy ajcxy mibijci Dios y'ayuc paady Dios cöbijcy ajcxy jadu'n nej tudägyjäy.

³ Müd ajt nmibijcin ycixpi nejhuuïyim co Dios oyduñ tüg'ócïy huidibi jii'ajtp müd y'ayucti'ajty, jigix huidibi cham n'ijxim je' yi' yaj'oyuïy huidibi ca' yaj'ixy.

⁴ Müd co Abel mibijcy Dios, paady Abel ymoy Dios huindzigi'ñ jac'oybi ca'ydi Caïn, e Dios cöbijci Abel yhuindzigi'ñ, e müd je' ycixpi Abel ooy ycömaybidzimy ma Dios co anajty ytudägyity. E jadu'n oy Abel ti yja'o'cini, jadu'n nipaady nej jihuïy yjacmiydägyñi chambaad. Com müd je mibijcin huidibi anajty ymüd yejc ijxpejt ma #ch ajt.

⁵ Müd co Enoc mibijcy Dios paady yajnicxi jadügpi tzinaydac ni yca'o'cy, ni ca' ajcxy paty, com Dios anajty ti yajnicxyii. Jadu'n ymina'ñ ma yjay-betyity ma Dios ñecy, ca'ni anajty yajnicxyii: “Dios jäygidacpy anajty Enoc chinaayin.” ⁶ Pen ca' nmüd'ajtim mibijcin ni jadu'ñyi, ca' Dios jäygidägy ajt chinzinaayin. Com co nmihungonaanim Dios, hue' tzocy co nmibijcim co Dios yjiijity, e co yaj'ahuimbidity oybi müd pin mibijcip.

⁷ Müd co Noé mibijcy Dios, paady Dios ñimaayi jayijp co ytuna'ñyii yjada'ñyii mijnügom huidibi anajty ca'ni yaj'ixy. Co Dios ymigapxi, chi Noé yjotmaybaady e yaj'oyiy je barco ma yi' etz y'ung y'anäg ñügomdzögipy. Müd co anajty Noé müdity mibijcin, paady yajpocycäy je naaxhuñjyäj ajcxy ca'pi ymibicy. Chi Dios cöbijcy Noé jadu'n nej tudägyjäy müd co mibijci Dios y'ayuc.

⁸ Müd co Abraham anajty Dios mibicy, paady Dios yhuin'ijxi e ycapymidouhui. Chi je' chooñ ma ñaax ycapin ñicxy ma je it lugar huidibi Dios anajty möhuaanip co je'adiyb. Choñ, ni ca' anajty nejhuuïy ma ñicxy. ⁹ Müd co Abraham mibijcy Dios, paady chinaydacijcy nej tüg huingjäy ma je naax huidibi Dios yaj'ahuanüyi, huidibi ca' yjëjity. Chinay ma huittijc, nañ jadu'n ajcxy y'idich Isaac etz Jacob huidibi ajcxy nañ jadu'n Dios yaj'ahuanüyi je naax. ¹⁰ Abraham je' anajty y'ahuixjpy mina jëbi chinaydacijcy ma Dios y'it ylugar huidibi jadu'n nipatp nej tüg cajp huidibi müd y'ijx ta'tzpcy y'oyduñity, je huidibi Dios ñihuimmayiy, je huidibi Dios yajcojy yaj'oyiyb.

¹¹ Sara hue' anajty pumäy, ti anajty ymijäyüyñi, ti ñajxni tiempo mina jëbi y'ung'ixy. Per müd co mibijcy Dios y'ayuc huidibi ti ñimaayi co y'ung'ixa'ñ anajty, chi paty mijaa co y'ungdzimigip. E chi y'ung'ijxy com ymibijc co Dios anajty cuyduna'ñ tübi ahuanüy. ¹² Müd tügpi jäy, je Abraham, ti choondacy tügpicy y'amigügtijc huidibi oy ti ymayiy. Abraham, oy anajty je' ti yjahungoni mina y'ögaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamicho'nity.

¹³ Tüg'ócïy je jäy ajcxy huidibi ya yajnimiydacp, öctay ajcxy ni ycacidigüy ti je tzinaydac huidibi anajty Dios ti yaj'ahuanüyii. Müd co ajcxy mibijcy Dios, paady nejhuuïy ajcxy co jacjiini Dios ymöhuuïyb je huidibi ti yaj'ahuanüyii. Com ymibijc ajcxy Dios, paady jotcuje ñajjihuüyi co Dios möhua'ñyii jacjiini huidibi ti yaj'ahuanüyii. Yminañ ajcxy co anajty y'adzinaaygixy ya naax-huñ. ¹⁴ Pinjaty jadu'n minamb co adzinaaybi ajcxy yajpaady, hue' yajhuimbidity ma chinaydac yjugy'ajttac ajcxy y'ixtaayb. ¹⁵ Co ixypiy ajcxy jäymejtzó'cigixy je naax ma anajty ti choongixy, janch ycahuimbijty ajcxy jam jadüg'oc. ¹⁶ Per je' ajcxy nigü anajty nijot'ajtcixy it lugar jac'oybi, je' je' je

tzajpjoty. M̄id jada ycixpi Dios ca' y' cho'yduñ co ñaydiyii Dios ma je' ajcxy. Com ti ni'ixiyyi ajcxy chinaydac jilby tzajpjoty.

¹⁷ Abraham m̄ibijcy Dios, e co Dios Abraham y'ijxmajtzi, chi yajmiñ Isaac co anajty yajhuindzigihua'ñ Dios. E janch cixyjot je y'ung tūgpajc anajty yecy, je y'ung huidibi Dios ti yaj'ahuan̄iyii anajty. ¹⁸ Dios ñimay Abraham co m̄id Isaac m̄id'ada'ñ may y'ap y'oc. ¹⁹ Abraham yhuinmaayb anajty ooy co Dios tūgpajc cōtujcm̄idip yajjugypigipy ōcpi. Paady jēbi iich ajt nminaanim co Abraham ycidiḡiyyi jadūg'oc y'ung co anajty ti yjugypicy co anajty ti y'ōgy.

²⁰ Isaac m̄ibijcy Dios, paady Isaac Dios m̄ibijctzoy m̄id Jacob etz Esau ycixpi co huen ajcxy oybi paadip ma je tiempo huidibi mim cidacni. ²¹ Jacob m̄ibijcy anajty Dios, paady co anajty y'ōgaani, chi ahuan̄iy conuucxin ma nidūg nidūg José y'ung y'anāg. E jadu'n Dios ooy huindzigiy ojadajty yam ñaygodajc'adyii m̄id ytajc co anajty ooy ti ym̄ijjāyiyñi. ²² José co anajty Dios m̄ibicy ma anajty y'ōgaani, yminañ co Israel jāy ajcxy anajty ypidzimaangixy comjey jim Egipto, chi yajhu'i my tiy'ajt nej ypajc ytun̄iyb co anajty choñ ajcxy jim Egipto.

²³ M̄id co anajty ajcxy m̄ibicy Dios, paady co Moisés yma'xung'ajty, chi ytaj yteedy yūtzī tugig po'. Com co ajcxy ijxy co anajty ooy y'oyity je ma'xung, ca' ajcxy anajty tzigiy je rey y'ane'min co anajty yaj'ōctāhua'ñ tūg'ōciy ungma'xung yēdyjcpī. ²⁴ M̄id co Moisés m̄ibijcy Dios, paady co oy ym̄ij'anāccojni, ca' tzojcy co ñaydiyiyb co rey ñix y'ung'ad̄ib. ²⁵ Hue' janchtiy Moisés ñigi nijot'ajty co ayo'n tzaachypī minaxipy yajnaxipy quipxy m̄id Dios yjāy, ca'ydi co nixondāgipy je jugy'ajtin ma je rey ytijc huidibi Dios ca' jāygidāgy. ²⁶ Moisés ñigi ñayjihuiyyi jotcuyc co tzaachypī ayo'n anajty minaxy yajnaxy m̄id Cristo ycixpi, ca'ydi co m̄id'ajttāhuipy jugy'ajt comeñ'ajt jim Egipto. Com Moisés ti anajty yhuinma'ñyidāgy co Dios yega'ñ je oybi. ²⁷ M̄id co Moisés m̄ibicy anajty Dios paady choñ jim Egipto, ni catzigiy co anajty rey yjotmādy, jadu'n y'ijty tudāgy nej jihuīy ixy je Dios ca'pi yaj'ixy.

²⁸ M̄id co m̄ibijcy Dios paady Moisés tuuñ je pascuaxi, chi ni'ane'md̄iy co huen tijc'aguu tūg tūg yajni'pyīy, jigix co je ángel huidibi yaj'ōcp, ca'p' je' je israelitajāy y'ungoob yaj'o'cipy. ²⁹ M̄id co ajcxy m̄ibijcy Dios paady je israelitas ajcxy yajnaxy je tzaptz mejy jadu'n nej jihuīy ñajxcixy huind̄itztuuy, e co ajcxy je Egipto jāy nañ jadu'n yjanaxañ, cijx ajcxy ñi'o'ctāy.

³⁰ M̄id co ajcxy m̄ibijcy Dios, paady ycidāday je poch ma je Jericógajp, taab anajty je israelitas ajcxy ti jūhuidijtcixy huixtujc xi. ³¹ M̄id co Rahab, je tōxyjāy jibic tzinaaybi, m̄ibijcy Dios, paady ca' y'o'cy quipxy m̄id je huidibi anajty ca' capxym̄idoogixy Dios. Com co je' yajjāctacy ma ytijcin je huidibi anajty ti choongixy ma Israel jāy ajcxy anajty yajpaady, co anajty ayūch ameech yajc̄iyōgyxy yajtecyōgyxy Canaán naaxjot.

³² ¿Ti njacm̄iydāgibich? Nyajtigoy'idaamybich tiempo co nim̄iydāgibich Gedeón, Barac, Sansón, Jefe, David, Samuel, e jacjadyii Dios y'ayucnajtzcax̄iyybi. ³³⁻³⁴ M̄id co ajcxy m̄ibijcy Dios, paady ym̄imadac ajcxy ymidzip canaag picy, ane'my ajcxy yajxon yi cajp̄jāy, ypaat ajcxy pubejtin huidibi Dios anajty ti yaj'ahuan̄iyigixy. Yaj'adujc ajcxy caa y'ahuac, yajxeem ajcxy jin huidi anajty ooy ym̄ijity, tzooc ajcxy co anajty yaj'ōgaangixy m̄id espada. Pijnaty anajty pumāyip ypaat je' ajcxy ymic'ajt ym̄ijaa, mij je' ajcxy ooy y'ijtcixni ma chiptungixy, e ym̄imadactay ajcxy maymidzip.

³⁵ Jim anajty tōxyjāy yjājtigixy huidibi ajcxy cidiḡiyyi y'ung juugy huidibi anajty ti jugypicy co anajty ti y'ōgy. Jadyii ajcxy y'o'cy ahuoni' agidzi', ca'p

ajcxy paty nǎdzoočin. Jadu'n ajcxy paty o'cin, jaydēbi patcixy jugy'ajtin etz tzinaayim jac'oybi ma Dios. ³⁶ Jadyii Dios y'ayucnajtzcaxpñybi ooy ñixiici yajxiici, yajc'ajty, etz tzumy mach ypujxtijc'iñāy. ³⁷ Jadyii Dios y'ayucnajtzcaxpñybi y'o'cy ajcxy tzaagögäch, jadyii yaj'ajidiy ajcxy janch tim cup y'ijxmajtz ajcxy, jadyii yaj'o'ci mǎid espada. Ymiñ xyijpy xñi yaa yhuidihtcixy ymǎid ajcxy ñinix yũch mǎid cōbixy'ac etz mǎid chivo'ac, ayoob jāy ajcxy, jotmay mǎid, yajtzaachytungixy yajca'oydungixy. ³⁸ Yi jadu'mbi Dios y'ayucnajtzcaxpñybi ajcxy ni je naaxhuiñyājy anajty camihuaadity. Mǎid ymidzip pahuidijtcixy, paady yhuidihtcixy anajty tǎtznaxtuum etz yuugjoty, chinaaygixy naaxpa'tci'py etz majaty ang. ³⁹ Nidũg'ōciy je' ajcxy oy cōmay ajcxy yjanajxy mǎid co mǎibijcy ajcxy Dios, ca' ajcxy paty tǎibi anajty Dios y'ahuanỹ. ⁴⁰ Com Dios jac'oybi je' anajty yegamyb mǎid ñch ajt, paady ca' ajcxy paty je oybi tǎibi Dios y'ahuanỹ. Ti anajty Dios nihuinmayỹ co yajca'pxaani y' ajcxy ytudāgy'ajtin quipxyi mǎid ñch ajt co Cristo y'o'cy mǎid ñch ajt nbocy ycixpi.

12

Tzoc ñch ajt nhuinma'ñybi daacim ma Jesús

¹ Com nmǎid'ajtim canaag iixpejt nej jāy jecy'ajty mǎibijcy Dios, paady ñch ajt jadu'n nipaady nej jihuỹ huinduy jajixci'py nmǎid'ajtim jāy huidibi ti yajniğũxĩgy ymibijcin. Paady ycixp tzoc ahuing pidaacim je huidihty xy'adzijpim ma ajt nmibijcin, e nañ jadu'n tzoc ahuing pidaacim je pocy huidibi xyajhuinma'ñydiğooym, e tzoc naymic'ijxim cuyduunim yi tiy'ajt mǎid meextujcin ma ajt ndzinaayin, jadu'n nej jāy ñaymic'ijxigixy co nay-boyc'quípxigixy. ² Tzoc nhuinma'ñybi daacim ma Jesús. Jim iixpejt nbaatim ma Jesús nej jēbi nmibijcin Dios. Jesús y'i' je' ti xyajnejhuỹim Dios ytiy'ajt. Yi Jesús y'i' y'ayoo anajty ma je cruudz, ni ca' y'i' tuñcuendi je jadu'mbi o'cin oymidzo'yduunip. Com co Jesús ñejhuỹib anajty co jadu'n y'oc'ayoohuipy, chi ypaadipy jotcuje'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³ Huinmaaygixy miich ajcxy je Jesús y'ijxpejt, nej pocyājdyjc chaachytuungixy etz ñi'ojijygixy, etz ca' y'ixaani, paady ca' mdzĩjpcigixy ni mgamijotmetzcĩygixy. ⁴ Ca'ni miich ajcxy ayo'n tzaachypĩ myajnaxy mabaad ni'py ajcxy mxĩbidiyĩ jadu'n nej Cristo yjajty. ⁵ ¿Nej ti miich ajcxy mjādydiğooygixy je capxhuijin huidibi Dios ti xymooygixy nej jihuỹ yci'm'ung? Jadu'n ymĩna'ñ ma Dios ñecy:

Miich n'ungich, ca' mbidāgy nej jihuỹ ca' ytim ytiijity je tzaachypĩ huidibi Dios mǎid xycapxhuijy, ni ca' mjotmetzcĩhuipy co xyaj'ojipy.

⁶ Dios ycapxhuijy y'i' pinjaty chojcpy yjihuỹyb. Dios chaachytumby y'i' ajcxy co ytundĩgooy, pinjaty y'i' ti cōbicy nej jihuỹ yci'm'ung.

⁷ Mĩmadaaccix miich ajcxy je castigo, com Dios jadu'n y'i' xymĩdity ajcxy nej jihuỹ yci'm'ung. ¿Nej ji jada' tũg ung, e ca' yteedy chaachytunỹyb co ytundĩgooy? ⁸ Pen ca' miich ajcxy Dios ti tzaachypĩ xymooygixy, jadu'n nej y'i' moy castigo tũg'ōciy y'ungdiyc y'anāctijc, ca' miich ixyipy ajcxy Dios xy'ung'adyii tiydudāgy. Jadu'n miich ajcxy m'idiipy nej tũg pi'c'anāg huidibi yteedy ca' y'ixa'ñyĩ. ⁹ Jadũg nax, taabi anajty ajt nb'i'cnity, ñch ajt ndeedy ya naaxhuiñ xy'ñhuijim xycapxhuijim anajty, e xychaachytuunim co ca' ngapxymĩdoohuim nhuindziğĩyĩm ajcxy. ¿Nej co ca' huaad n'ijtim

ane'my ma ajt ndeedy huidibi tzejppjoty jajpatp? E jadu'n jëbi nbaatim je jugy'ajtin huidibi ca' ycixipy ytigoyipy nimina. ¹⁰ Ich ajt ndeedy ya naaxhuiñ xy'ihuijim xycapxhuijim anajty müid jada conbi jugy'ajt ycixpi, jadu'n nej je' anajty ajcxy oy'ixy. Nañ jadu'n Dios ich ajt xychaachytuunim müid ajt n'oy'ajt ycixpi etz jigix nmüid'ajtim huädz jot huädz huinma'ñ nej Dios ymüidity huädz yjot huädz yhuinma'ñ. ¹¹ Oy yjanchity co ca' ti tzaachypí ndzojcm ma yam nbaatim je tzaachypí, com ooy ndzachjihuiyim je tzaachypí, e ca' jotcuyc najjihuiyim. Per pinjaty xpijcpí Dios chojcin müid je tzaachypí ycixpi, chi je' yhuimbizimiygixy tüg jugy'ajtin tädägyptz jotcuycpi.

Je huidibi ayo'ngojp co Dios y'ayuc ngacöbigaanim

¹² Paady müich ajcxy jotmicpíjccix ma mmibijcin, jadu'n nipaadip nej jihuiy myajpidiccixy mgi' tüibi y'anucxiyñi, etz mgoxcohuajc mic'ajt paady huidibi anajty ca' mic'ajt müidity. ¹³ Ixtaaygix ni'aa tü'aa tüybi ma mdzinaayin, jadu'n nipaadip nej jihuiy yi mdecy huidibi mädipti chögy, e camina jadüg'oc yhuuidip.

¹⁴ Tzinaaygix müid oyjot oyhuinma'ñ müid nidüg'óciy jäy. Ca' mdúngixipy ti tzip. Müid'ajtcix tüg tzinaayin huätzpi, pen ca' jadu'n mdungixy, ni pin ca'ixipy je Huindzin Jesucristo. ¹⁵ Ooy cuenditungixp co ni pin cajijpyöydüdipty je pubejtin huidibi Dios ti ahuaníy, jigix nañ jadu'n ni pin ycajajpaadipy janch mät yjot yhuinmañ, e yajhuindigoydäy yajmättäy jacjadyi ymügügtjic, tim jadu'n nej tüg ujtz ta'mbi ypa'mduñ. ¹⁶ Ni tüg müich ajcxy ca' huaad ti ayuc müid'aty müid huingbi töxyjäy huidibi ca' müich mdöxyijc'adyi. Ca' nañ jadu'n m'ixtijipy je ayuc huidibi Dios yajhui'my müid müich ajcxy ycixpi, jadu'n nej y'idich Esaú. Müid tüg caayin uucin Esaú toocnax je huidibi anajty möhuaanip yteedy co y'unggoobity. ¹⁷ Müich ajcxy mnejhuiyb co Esaú tocy huidi anajty paatip co japada'ñ je conuucxin huidibi anajty yteedy möhuaanip, ca' jadu'n Dios cöbijcy, chi Esaú ooy yjayaaxni, per ca' anajty ñihuinma'ñ nej yjothuimbidipt müid je' ycixpi tüibi anajty tuñ.

¹⁸ Ca' müich ajcxy ti mjaty ti m'ixy, nej jecy'ajty yi israelitas ajcxy yjajty etz y'ixy co ajcxy mihuingoñ je cop Sinaí ma anajty Dios ti pidägy mij jin, ma anajty ooy yhuidzucy yjidity etz mijpoj mijtigoy ñaxy, ma anajty ooy y'agoodziy anaxy. ¹⁹ Ni mgamido yajcxy je trompeta ni je Dios y'ayuc huidibi anajty ajcxy je' migapxip. Pinjaty je' midou je ayuc ypijctzou ajcxy may'ajt co ca' huaad yjacmigäpxigixy com ooy anajty chigüygixy. ²⁰ Je' je' anajty ycixpi co anajty ca' mímadağaangixy je ane'min cötujcin huidibi anajty minamb: "Pin anajty ytecy pidacp ma yi cop, hue' yi' y'oyyaj'o'cnity cögäch müid tzaa o müid quipyjixpu'ñ, oy ixipy y'iyujcity." ²¹ Oy chigüyñi huidibi anajty yaj'ijxp, Moisés ci'm minaan: "Tziyuuybich yam müid tziği'ñ."

²² Per müich ajcxy jadu'n nipaady nej jihuiy ti mmihuingoongixy yi cop huidibi yxi Sión etz je Dios juugypí ycajp. Je' je' je' Jerusalén tzejppjotypí ma canaag mil je ángeles ajcxy yöymujccixy. ²³ Ti müich ajcxy mmihuingoongixy ma ti yöymujccixy je jaccómaaybi jäy huidibi ajcxy yxi cojaay ma Dios ñecy jüiby tzejppjoty, je huidibi ajcxy huin'ib huingapxtacp Dios. Ti müich ajcxy mihuingoongixy Dios je huidibi nijuez'ajtp tüg'óciy. Nañ jadu'n ti müich ajcxy mihuingoongixy je' ajcxy je oyjäydjc y'espíritu huidibi Dios ti yaj'ahuimbijttäy tudägy. ²⁴ Müich ajcxy ti mihuingoñ yi Jesús, yi huidibi xycodinaayim ma Dios müid je jemybi cötujcin huidibi Dios yajhui'my müid ich ajt ycixpi. Yi Jesús huidibi mic'ajtmoy je Dios y'ayuc jemybi, co ñi'py teemy vojcy müid ajt nbocy ycixpi. Yi Jesús co ci'm ñi'py teemy vojcy müid jäy

ajcxy ypcocy ycixpi, niġi oy yi' ca'ydi co Abel iyujc ñi'py teemy yojcy mïid ypcocy ycixpi.

²⁵ Paady ycixp ooy cuenditungix miich ajcxy, ca'ydi yaj'ixtijy Dios, je pin ti xyajmihui'mim jemybi y'ayuc. Je jāy ajcxy huidibi tzinay jecy'ajty, ca'p je' ajcxy chocy co ajcxy ixtijy Dios co jecy'ajty yjamigapxi ajcxy ya naaxhuñ. O'ctiy iich ajt ca' ndzoocim, pen nmooyim ajt njiix je Dios, je pin y'ayuc xyajmihui'mim huidi tzoon tzajpjoty.

²⁶ Co Dios y'ayuc yejcy jecy'ajty, chi yajtziyuuy ooy naax. Jadachambi Dios ymina'n: "Jadügtecpajc nyajtziyuya'ñich je naax, e ca' nmīnaanīm naaxti'ajty, nañ jadu'n nyajtziyuya'ñich je tzajp." ²⁷ Co jadu'n Dios ymina'n: "Jadügtecpajc nyajtziyuya'ñich je naax." Hue' yajhuinjihuüy co ytigoydāhuipy huidijaty yūcxp huidibi Dios yaj'oyi, e je' hui'mip je huidijaty ca' yu'cxy. ²⁸ Paady je Jesucristo ycötujcin huidibi Dios xyajmihui'mim, ca' yi' huaad ytigoy. Tzoc yajnaxim Dioscojuyip mïid Jesús y'ayuc ycixpi, e nyajmij'ajtim n'ojadajtim Dios mïid tudägy'ajt etz mïid huindzigi'ñ nej je' jāygidägyin. ²⁹ Hich ajt nDios jadu'n yi' nej tüg jün huidibi nöctaayb tüg'óciy.

13

Nej jēbi nyajjāygi daacim Dios

¹ Miich ajcxy huidibi mibijcp Jesucristo, ca' mjäydiġooygixy co ajcxy mnaychóġcixipy miñ xyipy nej jihuüy ajcxy mdüġquēxyity. ² Ca' ajcxy mjäydiġóoygixipy co oyjāy'ajtin mdüġgixipy mïid pinjaty ajcxy xycojädāyib. Mïid co oyjāy'ajtin ajcxy tuuñ, chi nijējity ajcxy yajjättacy ángeles ajcxy, ni ca' ajcxy huinjihuüy co ángeles anajty ti yajjättaaccixy.

³ Mjāymedzip ajcxy pinjaty tzumy'iñaayb mach'iñaayb jadu'n nej jihuüy miich ajcxy nañ jadu'n mdzumy'iñaaygixy mmach'iñaaygixy quipxy mïid je' ajcxy. Jāymeedzip miich ajcxy pinjaty tzaachypi ayo'n minajxp yajnaxp, com nañ jadu'n miich ajcxy mïidity je ninēx huidibi jēbi y'ayoy.

⁴ Huen nidüg'óciy jāy huindzigi'yigixy yajmij'ajtcixy je pijcin casada'ajtin. Huen je yēydijc etz je ytōxyijc naymïdtzināayigixy yajxon, com Dios yi' tzaachytunipy pinjaty tundigooyb mïid huingbi tōxyjāy.

⁵ Ca' m'adzojccixy meeñ. Mijotujc'ajtcixy ti ajcxy iī mïid. Dios ti je' ymina'n: "Camīna xii iich miich ajcxy n'ixmadzip, ni iich miich ajcxy ngajäydiġoyipy."

⁶ Jadu'n jēbi nmīnaanīm agujc jotcujc: "Yi' Huindzin Dios yi' xypubejtpich, ca' ndzigi'hua'ñich jāy nej xyjatuna'ñich."

⁷ Jāymejtcix miich ajcxy je pinjaty ti xyñigohuajc'ajtcixy, je pinjaty ti xyajmïidmīydaaccixy Dios y'ayuc ytiy'ajt. Huinmaaygix nej je' ajcxy anajty ytudägy'aty, padungix nej je' anajty ajcxy mïidity ymbijcin.

⁸ Jadu'n nej Jesucristo oybi tuñ jecy'ajty, nañ tim jadu'n oybi tuñ chambaad, etz oybi tuna'ñ huinēxi huinētiempo, ca' yi' yajtigadzip yi' yhuinma'ñ ni mīna.

⁹ Ca' miich ajcxy myajhuin'ingixy mïid canaag ipxijcin huidibi ca' ytüġnaxity mïid Jesucristo ytiy'ajt. Niġi oy co ajt nbidaacim nhuinma'ñ ma je Dios y'ayuc, nej yi' xychojcm xyjihuiyim, nej yi' may'ajt tuñ mïid iich ajt. Ca' mbidaacim mhuinma'ñ ma je cötujcin huidibi adujcp nijējity caayin uucin. Ni ti jotcujc'ajt ajcxy capaty pinjaty panēcxp yi' jadu'mbi cötujcin.

¹⁰ Je judío tungmïdipi huidibi huindzigi'ñ tumb anajty ma Dios yhuittijc je jecyip, ca' yi' jēbi yjactuuni ma iich ajt nmibijcin jadu'n nej Jesucristo tuñ huindzigi'ñ mïid iich ajt ycixpi. ¹¹ Je judío mījtungmïdipi ma Dios ytiyc ypidac iyujc ñi'py ma je Lugar Santísimo nej tüg huindzigi'ñ huidibi

yajpocyn̄huaatzp je mayjāy. Je iyujc ögy ñin̄icx jiguem je' yajnögy, ca' jiiubyity cajpjoty ma je Dios anajty huindzigiyyigixy. ¹² Tim jadu'n nej je judío sacerdote yajnögy je huindzigi'ñ iyujc ñin̄icx cajp ñinaxy, nañ tim jadu'n Jesús paty tzaachy'o'cin cajp ñinaxy jigix müid je' yci'mni'py pocyn̄iuhädzip je mayjāy. ¹³ Tzoc m̄ijpidaacim je Jesús tiibi y'ögy cajp ñinaxy müid ñich ajt nbocy ycixpi. Tzoc minajxm yajnaxim je canayyajmij'adii je canay'ixa'nii, tim jadu'n nej Jesús minajx yajnax je canayyajmij'adii je canay'ixa'nii. ¹⁴ Ya naaxhuiñ ca' ya ajt nm̄idity tüg ciudad ma jēbi n'ijtim huinixii huinitiempo, je' ñich ajt njijp'ijxim je tzinaayin huidibi miimb cidaacp. ¹⁵ Paady ycixp chojcpy co Dios n'ojadajtim nm̄ibijctzoohuim jabom jabom huinixii müid Jesucristo yxii. Co jadu'n n'ojadajtim nm̄ibijctzoohuim Dios jadu'n nipaady nej tüg huindzigi'ñ nmooyim. Tzoc ii m̄ibijctzoohuim, tzoc ojadajtim müid ajt ngi'm'ahuac ngi'm'ayuc. ¹⁶ Ca' mjäydigöogyixipy co oybi mdúngixipy etz naybubéjtigix naybudigiiyigix miñ xyipy. Co jadu'n mdúngixipy jadu'n nipaady nej tüg huindzigi'ñ ti myejccixy ma Dios huidibi yi' ooy jäygidägy.

¹⁷ Capxymidogix pinjaty xyñigohuajc'ajtcixp etz yajmij'ajtcixp, com yi' miich ajcxy xycuend'ajtp yi' m'alma. Nejhuuyim co c̄iyegaangixy ycuendi ma Dios nej ajcxy ti xycuend'aty. Pen oybi miich ajcxy mdumyb müid yi' ajcxy, jotcujc ajcxy ñayjihuihuuyb. Pen jibic miich ajcxy mduñ müid yi' ajcxy, tajip mayip ajcxy. E pen yi' ajcxy tajp maayb, chi miich ajcxy ca' ni ti jotcujc'ajt nm̄iid'adipy.

¹⁸ M̄ibijctzooxix Dios müid ñich ycixpi etz je pinjaty xym̄idhuidijtpich. Jatytim naymic'ijxibich tudägy nduuñich ma tüg'óciy ñich ndung, paady ycixp jotcujc nayjihuihuuyich. ¹⁹ May'ajt nbijctzooybich ma miich ajcxy co Dios nm̄ibijctzooxix müid ñich ycixpi, jigix Dios a'ixihuipy co ñicxibich tzojc ma miich ajcxy.

Oy'ajt etz capxpoox̄in huidibi cogixiiyñip je necy

²⁰ Dios nm̄ibijctzooybich müid miich ajcxy ycixpi. Je Dios huidibi yajjugypijc jadüg'oc ñich ajt nHuindzin Jesucristo co y'o'cy, je huidibi cuend'ajtp je maym̄ibijcp̄idijc. Co Jesucristo ñi'py teemy yojcy, chi mic'ajt moy je jemybi cõtuc̄in huidibi Dios ti xyajmihui'mim. Dios ti pidägy Jesucristo jadu'n nej je cuend'ajtpi jac'oybi ma je maym̄ibijcp̄idijc. Jadu'n yi' nipaady nej tüg cöbixy cuend'ajtpi huidibi cuend'ajtp may ngöbixy. ²¹ Je Dios huidibi xyajjotcujc'ajtim je' huen xyaj'ahuimbijtcixy huädz etz oyjāy ma tüg'óciy ajcxy nm̄ibijc̄in etz ma tüg'óciy ajcxy mdzinaayin, jigix ajcxy mdunipy nej yi' tzocy. Dios huen tuñ ma ñich ajt njot nhuinma'ñ müid Cristo ymic'ajt nej yi' tzocy. ¡Huen Cristo y'idipy mij cōmay huinixii huinitiempo! Amén. Jadu'n jada.

²² Nm̄igügtijc, nbijctzooybich may'ajt yajtungixy mecxtujc̄in ma jada ayuc capxhuijin. Ti ajcxy ii con nijayiiygixy. ²³ Nejhuuyigix miich ajcxy co ajt nm̄igüg Timoteo y'ity ahuäztuum. Pen tzojc yjādy ya ma nyajpaadyich, chi yi' xym̄idñicxibich co ñich anajty miich ajcxy ñicxy n'ijxcixy.

²⁴ Nguejxpyich ngapxpoox̄in ma nidüg'óciy pin ajcxy xyñigohuajc'ajtp etz je migügtijc ajcxy huidibi m̄ibijccixyp. Je migügtijc huidibi ajcxy yajpatp ya Italia yquejxyp ajcxy capxpoox̄in ma miich ajcxy.

²⁵ Dios ajcxy xyconuucxip nidüg'óciy miich ajcxy. Amén. Jadu'n jada.

SANTIAGO

Yi Necy Huidi Santiago Yajniguejx Je Judío

Mibijcpidijc

¹ Ich Santiago, ndzojcingix ich nduñ ma Dios etz je Huindzin Jesucristo ytung. Cham jada necy nyajnigueyich yi Israel jäy huidi ajcxy yajmij'ajtp Dios, huidi ajcxy xim yam yajpatp cajp cajp müd co yquecpidzimy ajcxy Judea naaxjot co ymidzip ajcxy chach'ixhuididyii chachpahuididyii ajcxy.

Je t'ij'ajt huidib tzoon ma Dios

² Migügtijc ajcxy co yi mmidzip ajcxy xychach'ijxmadzaangixy nej miich ajcxy mjot mhuinma'n müdity, co yi' ajcxy xy'ixhuidijtcixy xypahuidijtcixy, co xyñigapxcixy xyñi'ojñygixy, co xyajhuinma'ñyidigoyaangixy, ca' mdajipy mmayipy ajcxy, jotcujc ajcxy mnayjihuihuuyb. ³ Miich ajcxy mnejhuuygixyp co jadu'n mmimecxtujccixyp je tzaachyp' ay'o'n huidibi mminajxcixyp myajnajxcixyp müd co ti mmijpidaaccixy Jesucristo, huin'it mbáatcixipy mic'ajt, jigix jēbi mīmadactaygixy tūg'óciy jibic-huinma'n. ⁴ Copicy miich ajcxy mīmadactāaygixipy tūg'óciy jibic-huinma'n, ca' ma mundidigóoygixipy, e huin'it huädz mjot mhuinma'n mmüd'adipy ajcxy, ca' ti myajtigoy y'idipy ajcxy.

⁵ Pen nidüg miich ajcxy myajmayjaty oyhuinma'n, co jäy ajcxy xy-chach'ijxmadzaani mjot mhuinma'n nej müdity, mibijctzou Dios huen xymöy je oyhuinma'n, com yejcpy yi' oyhuinma'n müd tūg'óciy jäy co pijctzoy. Ca' yi' cohuindugyii, ca' huaad xy'ojim co nbjctzoohuim oyhuinma'n. ⁶ Copicy pijctzohui Dios huij'yajt cujy'ajt cixyjot huiniñot, ca' y'ametz yjotmetzity. Pijnaty ametz jotmetz Dios mibijctzoob, ca' t'uciy müdity yjot yhuinma'n, janam jatzoj yajtigach yhuinma'n jadu'n nej je mejy co ypidigy y'ixtägy müd je poj. ⁷ Co jäy ajcxy ametz jotmetz mibijctzoogixy Dios, Dios ni ti jadu'n cayecy. ⁸ Yi jadu'mbi jäy ajcxy ametz jotmetzpi canaagnax yhuinma'n ajcxy müdity, ca' tūgijp yhuinma'n pidaaccixy ma Dios.

⁹ Yi ayoobitijc huidibi mijpidaaccixyp Dios, ooy jäygidägaangixy co Dios ypudediyyb ypudigihuiyb. ¹⁰ Yi comeñyjäy ajcxy huidibi mijpidaacp Dios, ooy jotcujc ajcxy ñayjihuihua'nyii co ajcxy ymeen' ytictähuiipy jadu'ñyi. Com yi' ajcxy ymeen' tigoyamb yi' jadu'n nej tūg pijy co ñiicxni müd xii an. ¹¹ Co xii ypejtni, chi ooy y'andaacni mic, e chi je jinboj ypidizimy, chi je pijyquipy ytich, chi yhuingädaayñi je pijy, e jadu'ñyi ytigoydäy je pijy oy'ajtin. Jadu'n nej yjaty yi pijy, ñan tim jadu'n yjada'n comeñydijc ajcxy, jadu'ñyi ñitigoyaangixy yjuy'ajtin.

Co yjot yhuinma'n chach'ijxmadza'ñyii

¹² Jotcujc pinjaty mīmecxtujctāayb jadu'n nej ajcxy yjot yhuinma'n chach'ijxmadza'ñyii. Co jadu'n mīmecxtujctāaygixipy, Dios möhuib ajcxy jugy'ajtin huinixibi, huidibi yajhuinhuaniy tūg'óciy jäy ajcxy huidijaty Dios tzojcp yajmij'ajtp. ¹³ Co pin nijot'aty co tuna'n ti jibicpi, ca' ymina'nipy co Dios anajty jadu'n yajtundigoyaanip. Dios ca' ti jibicpi tuñ müd jäy ajcxy. E nañ ni pin ca' huaad ijxmach Dios nej yjot yhuinma'n ymüdity. ¹⁴ Ci'm ajcxy jadu'n ñaydunyii, co tzachnijot'ajtcixy canaagnax jibic-huinma'n. ¹⁵ Co jäy

ajcxy nijot'ajtcixy jibic-huinma'n, pocy anajty ytungixy. Ti ajcxy anajty ooy ypocyñbejtni co nicxy y'ó'ccixni.

¹⁶ Migügtijc ajcxy, huidibi ooy ndzocy njihuïyich, ca' mnayhuin'ñnigixy. ¹⁷ Ich ajt nDios Teedy huidibi tzajpjoty tzinaayb, yi' huidibi yajcojtaay xii madza' huidibi jajp tixcp, y' je' yejctaayb tüg'ociy tijaty oybi, tüg'ociy yhuinma'n huidibi ich ajt nmüd'ajtm. Dios ca' yi' yjot yhuinma'n yajtigach jadu'n nej yi xii madza' yjajin ytixcin ytigach. ¹⁸ Dios y'oydumby huinjemy ich ajt njot nhuinma'n müd yi' y'ayuc yti'ajt, jigix jébi ich ajt nmi'ljtm oyjot oyhuinma'n. Yi jáy ajcxy huidibi yajmij'ajtcixp Jesucristo, Dios nigi tzocy ajcxy ca' jac ti huidibi oyduñ.

Je tiy'ajt tiydudäcypi

¹⁹ Migügtijc huidibi ich ooy ndzocy njihuïyich, mnejhuñhuipy müch ajcxy jada co ooy ycopycity mmido'mbijctähuiipy ajcxy Dios y'ayuc yti'ajt, ca' mjäydgóoygixipy, ca' mgapxmayiigixipy, pen mjotmätcotp ajcxy ca' anajty mguydungixy Dios yti'ajt. ²⁰ Je jáy huidibi jotma'tp, ca' je' tuñ huidibi Dios yjäygidacyp. ²¹ Ixmajtztaaygix yi jibic ayuc, ca' mnijot'ajtcixy yi jibic-huinma'n. Cöbijccix müd oyjot oyhuinma'n yi Dios y'ayuc yti'ajt, yi huidibi Dios ti yajnicödugiy, huin'it jébi ajcxy m'alma nüdzoocin paady.

²²⁻²⁴ Cuydungix ajcxy Dios y'ayuc yti'ajt, ca' ajcxy mjotcuje'adipy müd yi'yi co m'amidoo'ijtcixy, hue' anajty nigoo mnayhuin'ñnigixy. Peni nigooob Dios y'ayuc m'amidoo'ijtcixy, e ca' mmijpidaaccixy ca' mguydungixy, naadigi' anajty m'amidoo'ijtcixy. Jadu'n müch ajcxy nipaady nej pin yhuin'yijp aa'ijxnajxp ma tügi iix. Co ñay'aa'ijxnajxtäyii, chi yjihuäy, e mic'amy jäydgoydäy nej yhuin'yijp ti ixy. Naadigi' anajty ti ñay'aa'ijxnaaxyii. ²⁵ Pen müch ajcxy yajxon m'ixpijcp Dios yti'ajt, je tiy'ajt huidibi yaj'oyihuip ajcxy mjot mhuinma'n, pen mmijpidaaccixyp, pen mguydungixyp Dios y'ayuc, e ca' mjäydgóoygixy, chi jada' Dios xyconuucxip ajcxy müd jégixpi huidibi anajty mguydungixyp.

²⁶ Pen ji pin ñayjihuiyii co cuyduni Dios yti'ajt, e ca' ñay'ahujtzügyii, ci'm anajty ñayhuin'ñnyii, tundigooyb anajty, e ca' yjanchity co mijpidaaci Dios yti'ajt. ²⁷ Pen müch ajcxy huadz mijpidaaccixy Dios etz mguydungixy yi' yti'ajt jadu'n nej jébi Dios jäygidäy, hue' tzocy co mbubéjtcixipy mba'ayóogixipy co'ögy'ungdijc, etz co'ögy ytöxyjäydijc ma ayo'n jotmay ajcxy patcixy. E ca' huaad jibic-huinma'n mjactungixy, jadu'n nej jadyii naax-huñjáy y'idütcixy, huidi ca' mijpidaaccixy Dios.

2

Ca' huin'ijxpety migüg myajmij'ajtcixipy

¹ Migügtijc ajcxy, co m'ojadajtcixy co mmijnicxpejtcixy ich ajt nHuindzin Jesucristo, yi huidibi tzajpjoty ane'm, ca' ajcxy huin'ijxpety migügtijc myajmij'ajtcixipy. ² Pen jim jáy ytigiy ma mnayyöymújcgixy comeenybi müd oori cijiit, etz müd yhuin yxojx janch oybi, etz pen nañ tigiyb tüg jáy ayooob huidibi yhuin ytucxy ciitz tuc nübüdy ixpüdy. ³ Chi müch ajcxy je' jac nigi myajmij'ada'n je comeenybi huidibi oyxoxy, e chi mnimähua'n: "Iña' müch ya ma jada oybi iñaaybejt." E je ayooob jáy mnimähuaangixy: "Iña' naaxcxy o jim jadu'n tina'." ⁴ Co jadu'n m'iditzip ajcxy, ca'p anajty jadu'n yti'ajfity. Mdungidooygixy anajty ma Dios yti'ajt co huin'ijxpety ajcxy migüg mdzogipy. Hue' anajty myajtungixyp jibic-huinma'n co jadu'n m'ixtjicixipy jáy huidibi ayooob.

⁵ Migügtijc ajcxy, Dios ti huin'ixy yi ayoobitijc, jëbi ajcxy mijpidägy Dios etz jëbi ajcxy paadipy it lugar ma Dios y'it tzajpjoty. Jadu'n Dios ya-jhuinhuaniiy pinjaty tzojciy jihuiiyip co it lugar möhua'n jüby tzajpjoty. ⁶ Myajtzo'yduungixyp müich ajcxy ayoobitijc. ¿Nej cayi comeeñjyäj ajcxy huidibi müich ajcxy yxhachxip ma cötujctac, e xyajnicxcixy ma tungmüdpri yhuinduu, oy ajcxy mdzocy mgatzocy? ⁷ ¿Nej ca yjëjity ajcxy huidibi jibic nigapxp ni'oñyib Jesucristo, je oyyäj huidibi müich ajcxy myajmij'ajtcixyp?

⁸ Pen janch müich ajcxy mguydungixy je tiy'ajt huidibi jaybety ma Dios ylibro: "Mdzogipy mjihuñhuipy mmigügtijc hueñyitimypinaty, jadu'n nej miich ajcxy ci'm mnaychogyii mnayjihuiiyii." Pen jadu'n anajty mdungixy, tüg anajty oybi mdungixyp. ⁹ Pen huin'ijxpety ajcxy anajty jäy myajmij'ajtcixy jadu'n nej yhuut yxoxy ajcxy müidity, mdundigooygixp, e ti anajty mnayyapocycähuigixy ma Dios ytiy'ajt. ¹⁰ Pen tüg jäy cuydundaayi Dios ycötujcin, co nicxy tüg cacuyduñ, jadu'n nipaady nej jihuiy anajty janch ni tüg cötujcin ti cacuyduñ. ¹¹ Je Dios je cötujcin ti pidägy co ca' huaad mmigapxtigooyipy töxyjäydijc, etz nañ ti cötujcin pidägy co ca' huaad njäyyaj'o'cim. Pen mmigapxtigooyb töxyjäydijc, oy ca' ti mjäyyaj'ögy, ti anajty mdundigooy mij ma Dios ytiy'ajt. ¹² Capxcix miydaccix, tungix nej jëbi huaad jäygidägy iich ajt nHuindzin Jesucristo nej je' cuyduñ yi' ytiy'ajt. ¹³ Ca' ti pa'ayoohuin paadipy ma Dios, pin ca' tuñ ti pa'ayoohuin ma ymigügtijc. Pin pa'ayoohuin tumb ma ymigügtijc, je' capxpaady y'idip co anajty Dios tiyduñ yi' yjäy.

Je mibijcpi etz je oyyäj'ajtin

¹⁴ Migügtijc ajcxy, ni ti m'alma capada'n pen müich mmänaamb co myajmij'ajtpy Dios, e pen ca' myajnigüexigy ni ma co oybi mduñ. Ca' Dios yajnidzöga'n yi m'alma müid co nigooob mmäna'n co Dios mmijpidägy, e ca' mguyduni yi' ytiy'ajt. ¹⁵⁻¹⁶ Pen müich ajcxy müid tüg migüg yëydijcpi o töxyjäybi huidibi yajmayajtp yhuut ytucxy caayin uucin, e chi nigoo müich ajcxy mnimähuipy: "Nicx agujc jotucj, Dios xypubedipy xypudigihuiy, ca' mdich'ögipy ca' myuu'ögipy." E müich ca' anajty ti ti mmöy huidijaty yajmayajtpy. ¿Ti oyyäj'ajtin anajty ti mduñ? ¹⁷ Pen müich minamb co myajmij'ajtpy Dios, e ca' oyyäj'ajtin mduñ müid mmigügtijc, ytimyñipatyp jadu'n nej ixypy ca' mmibicy yi Dios ytiy'ajt.

¹⁸ Ca' yjeczyty co tüg jäy xyñimähuibich jadu'n: "Müich mdzachmijpidacpy yi Dios ytiy'ajt, e iich ndumybich oybi." Ich n'adzohuipyich yi jadu'mbi jäy co ca' jadu'n ytiy'ajtity nej müich mina'n. Pen ca' müich mmijpidägy Dios y'ayuc, ca' mjadipy nej mdunipy oybi jadu'n nej Dios huaad jäygidägy. Co iich oybi nduñ, jadu'n ñigüexigy co mmijpidägyich Dios. ¹⁹ Müich mmibijcpy co Dios ji tügpajc, e oy jadu'n co mmibicy. Nañ jadu'n yi ca'oybi ajcxy mibijcp etz chigiyb ajcxy Dios. ²⁰ Loci müich, ca' mhuinjihuñhua'n je tiy'ajt. Co pinjaty mibicy Dios, e ca' yajnigüexigy co oybi tuñ, ca' tiydudägy mibicy Dios. ²¹ Je Abraham yejc tüg ijxpejt nej jëbi huaad ngapxymidoohuim Dios co jecy'ajty je' ymang Isaac ceyejcy nej tüg huindzigi'n ma Dios. ²² Je Abraham ymibijc co Dios yjiijity etz nañ ycapxymidou nej Dios ñimaayi. Paady nejhuuiym co yjanchity co Abraham mijpidacy je' Dios müid co cuyduñ jadu'n nej Dios ñimaayi. ²³ E jadu'n oy cuydunäy nej yjaybetyty ma Dios ñecy: "Yi Abraham ymijpidac Dios, paady Dios ymecxtaayi ypocy, e ycöbijci jadu'n nej jihuiy ca' anajty ytundigoy." Paady ycixpi Abraham oyñaydiyii: "Co Dios minaymigüg'adyii."

²⁴ Cham nejhuuygix co Dios ycöbicipy jäy huidibi cuydungixp yi' ytiy'ajt, e ca' nmînaanîm müid jëyi co ymibijccixy. ²⁵ Tim jadu'n nej Abraham yjajty, nañ tim jadu'n yjajty müid je töxyjäy huidi anajty yxi Rahab, huidibi anajty ooy ti ytundigoy müid mayyëydijc. Je Rahab ycoyüdz ma ytijc nimetz jäy huidibi anajty Israel jäy yaj'ijx'ijtyp, e chi yajqueegiy ma huingbi tü'aa, e jadu'n ajcxy yajtzoocy ma ymidzîp. Müid co jadu'n oyyjäy'ajtin tuñ müid je Israel jäy, chi Rahab ooy paady je nidzoocin ma Dios. ²⁶ Je ninicx huidibi ca' alma müidity, ca' ni ti mic'ajt müidity. Nañ tim jadu'n pinjaty mibijcp co Dios yjiijity, e ca' cuyduñ Dios ytiy'ajt, yi' ymibijcin ca' Dios cuendipecy.

3

Co pinjaty nigapxy ni'ojiy ymigüg

¹ Migügtijc ajcxy, huinmaygix yajxon pen janch mnajtztzogiygixy co ajcxy mnihuindzin'adaangixy Dios y'ayuc. Com iich ajt huidibi nyaj'ixpijcin Dios y'ayuc, pen tundigooyim nigî mij nyajtydunaanîm. ² Nidüg'öciy iich ajt ndundigooyim minaaajity. Pen ji pin ca' y'iidigooy ycapxtigooy, yi' tiydudägy anajty yjây'aty, jëbi ñaygüend'adyii yajxon, e ca' huaad y'ocjactundigooyñi. ³ Ypidacpy jäy freno ma cohuay y'ahuac jigix jëbi ane'my je cohuay nej tzocy. Nañ jadu'n tzocy co jäy ajcxy huen y'ahuac ahuijtzcixy jadu'n nej jäy cohuay ane'my müid freno. ⁴ Nañ jadu'n yi barco ooy mabaad ooy yjamijity, per ooy poj ytijminyî ytijxibyîi. Je barco yaj'ane'm yajxon müid tüg pi'c pujx yindi'cni huidib xijip timón. Yajxon ytüyöy je barco ma je' timdzocy je huidibi ane'mip. ⁵ Nañ jadu'n yjaty müid yi tootz, janch tim yindi'cni yi', per ooy mij cajee tuñ jibicpi, jëbi y'iidigooy ycapxtigooy mij cajee. M'ijxyp müich ajcxy nej tim yindi'cni jün mij ooy nögy quipychaa miy'ujtz. ⁶ Yi jäy ajcxy y'ahuac nañ tim jadu'n nej pi'c jün, müid nhuin n'ahuac mijcajee n'iidigooyim ngapxtigooyim. Co jadu'n n'iidigooyim ngapxtigooyim, chi jëbi mijcajee midundigooyim mayjäy. Co n'iidigooyim ngapxtigooyim, etz nayya-jpocycähuim, chi ñiguëxigy canaagnax jibic-huinma'ñ huidibi nmüid'ajtim. Jada jibic-huinma'ñ jim yi' nbaatim ma je mujcu' huidibi tzinaayb ma yi inferno. ⁷ Yi naaxhuiñyây ti mimadaaccixy yi iyujc animal huidibi queegicp queec-huidijtp, naag iyujc ahua'nbi, etz iyujc nüjotyp. Ti ooy yajmaxiygixy yajxon iyujc huindzicipi etz ahua'nbi. ⁸ Yi naaxhuiñyây ooy ti mimadaaccixy yi iyujc animal, per nitüg ycaca'ty pin yajxon y'ahuac ahuijtzigipy, ac'iidigooyigixp capxtigooyigixp ajcxy. Pin ymigüg nigapxy ni'ojiyb, huin'it je ymigüg ooy jibic ñayjihuihua'ñyîi, jadu'n nej jihuify veneno ti möy ymigüg. ⁹ Müid jada' nhuin n'ahuac ajt ngapxpaatim iich ajt nHuindzin Jesucristo etz iich ajt nDios Teedy. Nañ jadu'n müid nhuin n'ahuac nigapx ni'ojiyim nmigügtijc. Dios ti yajcojy yi jäy müid ooyot oyhuinma'ñ jadu'n nej yi' ooyot oyhuinma'ñ müidity, paady ca' y'oyity co n'iidigooyim ngapxtigooyim. ¹⁰ Müid nhuin n'ahuac ajt müid ngapxim oybi ayuc etz jibic ayuc. Müid nhuin n'ahuac yi' müid ngapxpaatim etz ni'ojiyim nmigügtijc. Ca' jadu'n y'oyity co jadu'n n'adüitzim. ¹¹ ¿Nej jëbi jada' ma tüg nügop ypidzimy nü päcpi etz nü ta'mbi? ¹² Migügtijc ajcxy, ¿nej jëbi jada' yi higuery ytiim'aty aceituna etz yi muuxy'aadz ytiim'aty higos? Nañ tim jadu'n ma nü ymuxy tamtzpi, ca' jim ypidzimy nü päcpi. Paady ycixp ca' y'oyity co jäy ajcxy capxcixy oybi etz jibicpi.

Je tiy'ajt janchypî

¹³ Pen miich ajcxy huijycujc mnayjihuiy, pen oyhuinma'n ajcxy mmid, yajtungix m'oyhuinma'n ma mdzinaayin mjuy'ajtin. Ca' huaad ci'm naygomayigixy. Miid je oyjay'ajtin huidibi ajcxy mdumyb huen jay ci'm nejhuiyigixy co oyhuinma'n miich ajcxy mid'ajtcixyp. ¹⁴ Pen ta'm mjet mhuinma'n mjihuiyigixy, pen mga'oy'ijxcixyp ymigutjic, pen mhuinnaxtugaangixyp ymigutjic, pen jadu'n mjihuiyigixy mhuinmaayigixy, hui'nit ca' huaad mnaygomayigixy ci'm co mdzachcuydungixy Dios ytiy'ajt, com ca' yjanchity, nigoo m'aniidaaccixy. ¹⁵ Jada jibic-huinma'n ca' jada choon ma Dios huidibi tzinaayb tzajpjoty. Ya naaxhui'n jada jibic-huinma'n yajpaady, miid co jay tzachnijot'ajtcixy jibic-huinma'n. Yi mujcu' yejcy jada jibic-huinma'n, e ca' nminanim co Dios yecy jada jibic-huinma'n. ¹⁶ Paady ycixp co jay ajcxy ycanay'ixa'nyii, co huinnaxaangixy ymigug, chi ca' oy y'ijtcixy, oy ajcxy naymidundigooyigixy mijcajee. ¹⁷ Je huijy'ajt cujc'ajt huidibi Dios yejcy, ooy yi'. Yi Dios huidi tzinaayb tzajpjoty oyhuinma'n ymiid. Pen nyajtuunim je tiy'ajt huidibi Dios ti xymooyim, chi jotcujc ndzinaayim, ca' ma tzip capxy, etz nmimecxtujcim nmigutjic, etz yung naxy jot huinma'n nmid'ajtim, etz nba'ayoohuim nmigutjic, etz nduunim oyjay'ajtin, etz tudagy nhuinma'n nmid'ajtim. E ca' nigoo naybidaacim jadu'n nej jihuiy nmijpidaacim Dios, e ca' yam yjanchity. ¹⁸ Co nyajtuunim je huijy'ajtin cujc'ajtin huidib Dios yejcy, chi jotcujc ndzinaayim miid tudagy njot nhuinma'n, jadu'n nej jeb Dios jaygidagy.

4

Co pinjaty nijot'ajtcixy mayñax tzinaayin

¹ ¿Ma'amy ajcxy mdijy choon je tzip capx huidibi yajpatp ma miich ajcxy? Tug'ociy yi jadu'mbi jibicpi yajpatp ma ajcxy mjet mhuinma'n, paady ycixp mganay'ayuc-huinhuiyigixy, e tzipcapxy myajcojcxixy myaj'abadayigixy. ² Ooy miich ajcxy tijaty mjaztojccixy, e ni ti mgapaatcixy, e hui'nit mjayyaj'ocixy. Ooy m'adzojccixy tijaty migug yje'ajtp, paady ycixpi mdziptungixy, etz mganay'ixaanigixy. Ca' ti jotcujc'ajtin mbaatcixy, com ca' ajcxy mbijctzoogixy ma Dios. ³ Co mjamibijctzoogixy Dios, chi ca' ti mbaatcixy, miid co mbijctzoogixy miid jibic-huinma'n. Mbijctzoogixyp co myajtunaangixy ma ca' ypadyi. ⁴ Mdundigooyb ajcxy. ¿Nej ca' mnejhuiyigixy co Dios ca' jaygidagy pen mdzachnijot'ajtp ajcxy yi mayñax tzinaayin? Pinjaty nijot'ajtcixyp yi mayñaxpi tzinaayin, jadu'n yi' ajcxy nej yi jacjadyii jay ya naaxhui'n huidibi ca' yajmij'ajtcixy Dios ytiy'ajt. Hue' je' ajcxy y'ahuimbity Dios ymidzip. ⁵ Nej miich ajcxy mdijy, naadigi' ymi'n jaybety ma Dios yñecy: "Je Espiritu Santo huidibi Dios ti xy'adiguyim ti xyjottiguyim ooy xychojcim xyjihuiyim mijcajee." ⁶ Dios ninigoobi may'ajt oy'ajt tuun miid iich ajt ycixpi, paady ycixpi ymina'n ma Dios ñecy co ca' yi' oy'ixy pinjaty amij agix nayjihuiyip. Dios yejcy may'ajt oy'ajt ma yi jay ajcxy huidibi yung naxy jot huinma'n midity. ⁷ Naybidacigix cixy'ajt huinjot ma yi Dios. Mic mihuindinaaygix yi mujcu', e jihuaigipy yi' ma miich ajcxy. ⁸ Ojadajtcix Dios miid oyjot oyhuinma'n, e Dios xypubedipy xypudigihuiy ajcxy. Miich ajcxy pocyjajdjic, ixmajtcix yi jibic-huinma'n. Yajhuaatcix yi mjet yi mhuinma'n miich ajcxy huidibi ametz jotmetz mijbjcp. ⁹ Tajcix maygix, amutzciyigix. Huen yi mxiiicn yi mxondaacin ahuimbity jiyin yaaxin. E yi mjetcujc'ajtin huen ahuimbity tajii mayii. ¹⁰ Pidaccix yung naxy yi mjet yi mhuinma'n ma yi mhuindzin Dios, e yi' may'ajt oy'ajt tunipy miid miich ajcxy ycixpi.

Ca' huaad nigapxcixy ni'ojiiygixy ymigiigtijc

¹¹ Migügtijc ajcxy, ca' mnayñigápaxigixy mnayñi'ojiiygixy miñ xyipy. Pen mnigapxyp mni'ojiiyb mmigügtijc, hue' mnixiicpy myajxiicpy Dios ytiy'ajt huiidibi minaab co myajmij'adipy yi mmigüg jadu'n nej mnayajmij'adyii ci'm. Pen mnixigamyb myajxigamyb Dios ytiy'ajt, ca' anajty mguyduñ yi tiy'ajt, e jadu'n yhuimbizimyb nej ixypy miich minañ co Dios ytiy'ajt ca' yi' y'oyity. ¹² Dios tügpajc huiidibi ane'min pidägy, e yi' je' tügpajc huiidibi tiydunamb pocyjäy. Yi Dios tügpajc huiidibi yajtzögip o yajtigoyip jäy ajcxy y'alma. Paady ycxipi miich ajcxy ca' ypadyii nicxy migüg mnigapxcixy mni'ojiiygixy.

Dios tügpajc nejhuiy nej je jabombi mimb cidacp

¹³ Tungix cuendi iich n'ayuc miich ajcxy huiidibi minamb: "Cham o jabom nnicxim ma yijimbi naax cajp, e jim nyajnajxim jimijt agujc jotcujc, jim negocio nduunim, ooy mijcajee nbaatim." ¹⁴ E miich ajcxy ni mganejhuiiygixy ti je' anajty je jabombi mimb cidacp. Je jugy'ajtin ni pin ca' nejhuiy nej pin chinahua'n yjugy'adañ. Jadu'n miich ajcxy mjugy'ajtin nej joc co y'ocquëxigy cham, e tim tügxaxigy ti ñitigooyñi. ¹⁵ Jac'oy ajcxy minañip: "Pen Dios jadu'n tzojp, pen xymooyim jugy'ajtin, jëbi cham o jabom nduunim tijaty." ¹⁶ Miich ajcxy ci'm mdzachyajnihuinmaaygixy ti mdunamyb, ci'm mdzachnaygömayyii ajcxy. Ca' jadu'n y'oyity co ci'm mnaygömaayigixy; co ci'm mnaybidääcigixy amij agix, ni Dios mgamibijccixy. ¹⁷ Pin janejhuiiyb je oybi, e ca' tuñ, pocytumb anajty.

5

Je comeñyjäy yjugy'ajtin nitigoyam

¹ Comeñydijc, oc'amidoo'ijtcix nej cham minañiich. Amutzciygix, tajcix maygix co xyñiminaanigixy ayo'n. ² Miich ajcxy mmeñ etz ajcxy mjugy'ajt ñitigoyamb yi', miich ajcxy mhuit mducxy ti uucxyting yjicxtäyii. ³ Miich ajcxy m'oori, ajcxy mplata, ajcxy mmeñ naadigi' ti myujpijccixy ti m'amay'ajtcixy. Ti ixypy myajtungixy miid oyjäy'ajtin. Co ti myujpijccixy ti m'amay'ajtcixy ji jadu'n je tiy'ajt co mdundigooygixy ma Dios. Miid co yi mmeñ ca' ti myajtungixy miid oyjäy'ajtin, paady ycxipi ayo'n mbadaangixy miid je xii tiempo huiidibi mimb cidacp, mina Dios tiydunaangixy pocyjäydijc. Nitigoyamb miich ajcxy m'oy'ajtin. ⁴ Mdundigooygixyp co ca' capxy ti mmujuuygixy mdumbidijc huiidibi ti myajtungixy ma ajcxy mgamdu'. Yi mdumbidijc cham ooy miich ajcxy xiy ma Dios. Yi Dios, je Huindzin mijpi, huiidi ane'mdaayb tüc'ociy jiiyb tzajpjoty etz ya naaxhuiñ, yi' ñejhuidayb nej miich mdumbi ajcxy yminaanigixy. ⁵ Ti miich ajcxy agujc jotcujc mdzinaanigixy ya naaxhuiñ miid mayñax xondaacin. Ti miich ajcxy mgüxyii mbedyii, ti ajcxy mjotcujc'ajtcixy. Cham m'ahuijxcixyp yi tzaachypi yi ayo'n huiidibi ajcxy mbadamyb ma Dios, jadu'n nej huañ nicxpi ahuixy co jäy ajcxy chüdzal'nyii. ⁶ Miich ajcxy comeñyjäydijc ti miich ajcxy mxigixy mñihuambejtcixy, mdzaachyungixy ti myaj'öccixy jäy ajcxy tudägypi, e ca' yi' ajcxy xymihuibijty.

Je mecxtujcin etz je capxtägii

⁷ Migügtijc ajcxy, yajtungixy mij yi mecxtujcin mabaad anajty je Huindzin Jesús ymiñ jadügtecy ya naaxhuiñ. Tim jadu'n nipaady nej naymidumbidijc ahuijxcixy je tiibi nidungiiygixy, ahuijxcixy miid mecxtujcin je oga'n tuu etz je poj tuu huiidi miid je' ypidägy yhuindihuiy. ⁸ Miid'ajtcix nañ jadu'n

ooy mecxtujcín, etz ca' mjetmetzcüygixy, com huingomb je tiempo mina ymiinañ je Huindzin Jesús ya naaxhuiñ jadügtecy. ⁹ Migügtijc ajcxy, ca' jadüg jadüg mnayñigápaxigixy nayñi'ojüygixy. Pen jadu'n mdungixy Dios miich ajcxy xyajpocycáhuipy, com tim huingonip je xii je tiempo mina Dios tiydunañ jäy ajcxy müid ypocy ycixpi. ¹⁰ Migügtijc ajcxy, pijccix je iixpejt jadu'n nej tzaachypi minajxy yajnaxxy je profetas ajcxy huidibi ajcxy ihuácxp capxhuácxp je Huindzin Dios y'ayuc. ¹¹ Minaanim jadu'n, müid co ajcxy ooy mímecxtucy nej jäy jibic ytuuñ müid y' ajcxy, e chi jotcujc cham yajpaady ma Dios. Ti jada' mjatymidoogixy je ayuc nej Job ayo'n tzaachypi minajxy yajnaxxy, e ymímecxtujc je'. Müid co ooy anajty mijpidägy Dios, paady Dios pa'ayoy Job, e conuucx mijcajee.

¹² Migügtijc ajcxy, co tijaty ayuc m'adzohuimbidipy, tiydudägy ajcxy m'adzohuipy: "Janch jadu'n o ca' yjadu'nity", ca' ajcxy m'indägipy. Ca' Dios nigoo m'ibaadipy mgapxpaadipy. Ni ca' m'ibaadipy mgapxpaadipy yi naaxhuiñybi o tijaty ya naaxhuiñ. Huin'it ca' mnayyajpocycáhuüyb ma Dios.

¹³ Pen ji pin ma müich ajcxy ti ayo'n müidity, huen mibijctzoogixy Dios müid yi jäy ycixpi huidibi ayo'n müid. Pen müich ajcxy jotcujc nayjihuiyiy, huen huin'ügixy Dios. ¹⁴ Pen ji pin nidügti ypiyyii ma müich ajcxy, huoomiingix yi' huidibi ajcxy nigohuajc'ajtp yi mibijcpidijc, jigix ajcxy mibijctzoohuipy Dios müid je pa'mjäy ycixpi, etz pidägipy hueeni aceite ma je jäy ycohuajc etz capxpaadipy yi Huindzin Jesús yxi. ¹⁵ Müid co müich ajcxy mmijpidaaccixy e mmibijctzoogixy Dios, paady ycixpi tzögipy yi pa'mjäy. Chi je Huindzin Dios yejcnip mic'ajt oy'ajt, etz ymecxtaayipy yi' ypocy huidibi anajty ti tuñ. ¹⁶ Capxpizim yi mbocy nidüg nidüg. Ñayñibijctzoohuüyigix nidüg nidüg ma Dios, jigix ajcxy mdzögipy. Pen tüg tudägypí jäy ymibijctzooyb yi Dios cixyot huinijot, madägipy yi' müid y'oración. ¹⁷ Elías nañ tim jadu'n anajty yjothuinmañ müidity nej üich ajt. Janch cixyot huinijot mibijctzooy Dios ca'jity ytüy, e ca' je' jadu'n ytuuy tugüg jimijt ja tudujc po'. ¹⁸ Chi jadüg'oc Elías mibijctzoy Dios co huen tüy, chi Dios yajtuuy, e chi ya naaxhuiñ yhuindüy je jäy ajcxy ypidägy.

¹⁹⁻²⁰ Migügtijc ajcxy, pen ji müich ajcxy nidüg ñüdigoy ytüdigoy ma yi Dios ytiy'ajt, e huin'it tüg quëxigipy pin ymügüg yajhuimbidipy ma Dios ytiy'ajt, nejhuüyigix müich ajcxy co pin huidi yajhuimbijtp ymügüg ma Dios ytiy'ajt, huidibi ti ñüdigooy ti ytüdigooy, ti je' anajty tüg alma yajtzögy ma yi o'cin, e ti anajty yajpocyñihuaatzäy.

1 PEDRO

Yi Necy Huidibi San Pedro Yajnguejx Je Judio Mibijcpidijc

¹ Ich Pedro, Jesucristo ti xyajñibicyich ngapxhuäcibich yi' y'ayuc. Jada necy nyajnguejxyp miich Israel jäy huidibi adzinaayb xim yam jim Ponto naaxjot, jim Galacia naaxjot, jim Capadocia naaxjot, jim Asia naaxjot etz jim Bitinia naaxjot. ² Miich ajcxy migügtijc Dios Teedy ti xyhuin'ijxcixy, jayijp Dios ti nejhuyi co xyjäy'adañyii ajcxy. Dios ti yajtigiyi y' yjihuiñ ymic'ajt ma miich ajcxy mjot mhuinma'ñ, huen oyjot oyhuinma'ñ myaj-tunipy ajcxy jadu'n nej Dios huinma'ñ xymooygixy. Dios miich ajcxy ti xyhuin'ixy jigix mgapxymidohuipy Jesucristo, je huidib ñi'py teem cuy müd miich ajcxy ycixpi. Pidaaccix mhuinma'ñ co mgapxymidohuaangixy Dios jadu'n nej jecy'ajty je Israel jäy ytuñ, je taab anajty Moisés yaj'ögy iyujc etz yajñixidicxy ajcxy nidüg nidüg je ni'py, je' anajty ajcxy ytiy'ajt'ajtipy co capxymidohuaangixy Dios. Huen Dios may'ajt oy'ajt mijcajee tunipy ma miich ajcxy, chi jotcujc mdzinäaygixipy.

Jijp'ijxcix jugy'ajtin huinixibi

³ Yi Dios, ich ajt nHuindzin Jesucristo yTeedy, huen capxpaady y'ity, müd co may'ajt oy'ajt ti tuñ müd ich ajt co ti oyduñ huinjemybi ich ajt njot nhuinma'ñ, jébi n'ijtim Dios yjäy. Jadachambi ooy njijp'ijxim je jugy'ajtin huinixibi, müd co Jesús yjugypijcy huinjemy ma anajty ti y'ögy. ⁴ Nañ ooy njijp'ijxim tijaty Dios xymöhuuanim jilby tzajpjoty, huidibi ca' yhuindigoy, huidibi ca' yjibiciy, etz huidibi ca' ycixy ytigoy. ⁵ Dios xycuend'adip ajcxy müd yi' ymic'ajt, ixti jiini co anajty ajcxy je m'alma nidzoocin padaangixy, co anajty je naaxhuñ ycixy ytigoy. Mbadaangixy m'alma nidzoocin müd co ti mmijpidaaccixy Dios ytiy'ajt.

⁶ Paady miich ajcxy ooy jotcujc'ajtcixp. Oy cham tzaachyp: m'ocminajxcixy m'ocyajnajxcixy müd co jäy tzach'ijxmadza'ñ miich ajcxy mjot mhuinma'ñ. Nigi ooy jotcujc nayjihuiyigixy co ajcxy yi' m'alma nidzoocin padañ. ⁷ Dios y'ixamyb ñejhuihuamyb pen janch miich ajcxy cixyot huinjot mmijpidaaccixy yi' y'ayuc. Paady miich ajcxy ayo'n tzaachyp: mminajxcixy myajnajxcixy jébi nigi myajhuaatzcixy mjot mhuinma'ñ, tim jadu'n nej jäy yajhuaatzcixy yi' oori müd jün. Dios nigi tzocy miich ajcxy huidib yi' ytiy'ajt mijpidaaccip, ca'ydi oori. Pen tudägy miich ajcxy mhuinma'ñ, pen ca' mhuinma'ñyigajtcixy co tzaachyp: mminajxcixy myajnajxcixy, chi capxpaady ajcxy m'idipy etz mbaadipy ajcxy jotcujc'ajtin co anajty Jesús ñaygüexigyii jadügtecy ya naaxhuñybi.

⁸ Oy miich ajcxy ca' ti m'ijxcixy Jesucristo, per myajmij'ajtpy ajcxy, e cham oy ca' m'ijxcixy Jesucristo, myajmij'ajtip ajcxy yi' ytiy'ajt. Co ajcxy mmijpidaaci Jesucristo ytiy'ajt, chi ajcxy ooy mnayjihuyii nigi jotcujc anaxy. Je jotcujc'ajtin huidib mmüd Dios je' yejcp. ⁹ Paady ycixpi ti mmijpidaaccixy Jesucristo co ajcxy m'alma xyajñidzögaani.

¹⁰ Jadu'n nej Jesucristo xyajñidzögaani miich ajcxy m'alma je Dios y'ayuc najtzcaxiybi ooy anajty jecy'ajty janejhuihuaangixy nej Dios y'ayuc ñigüejy, e ca' ajcxy huinjihuuyi, je huin'it tiempo anajty ajcxy capxhuäcxp Dios y'ayuc jadu'n nej Dios may'ajt tuna'ñ müd miich ajcxy ycixpi.

11 Je Dios y'ayucnajtzcaxpiybi jecy'ajty ooy ajcxy jahuinmay, ooy ajcxy jahuinjihuihuaañ nej yhuimbizimye je ayuc huudibi ajcxy ymüd jotjoty huinmañyoty, je ayuc huudibi Jesucristo yajmiguejx yi' yjihuiñ ymic'ajt, je Espiritu Santo, jadu'n nej ajcxy najtzcaxpiy co je Cristo tzaachypí minaxa'ñ yajnaxa'ñ, etz co ñicxa'ñ jadüg'oc tzajpjoty. 12 Dios yajnejhuuyi yi' y'ayucnajtzcaxpiybi co je' huudib ajcxy ycapxhuäcx jiini je' ytunañyii yjadañyii, ca' ajcxy ixa'ñ. Migüti'c ajcxy, Dios ti yajtuunyii ti yajjadyii ma miich ajcxy je mxii mdiempo nej anajty je' y'ayucnajtzcaxpiybi najtzcaxpiy jecy'ajty je tiy'ajt. E jadachambi jadu'n nej Dios ti yajtuñyii ti yajjadyii ti jäy capxhuäcxtäy ma iich ajt nidüg'ocy. Je jäy huudibi capxhuäcx je tiy'ajt ymüd anajty ajcxy je Dios yjihuiñ ymic'ajt huudibi Dios anajty yajnjigexip, chooñ tzajpjoty. Ixti je ängeles huudibi ajcxy tzajpjoty tzinaayb yjanejihua'ñ nañ jadu'n nej Dios ti yajtuñyii ti yajjadyii ma miich ajcxy, e ni ca' ajcxy nejhuüy.

Chojcypy Dios co tudägy ndzinaayim

13 Paady ycixp ni'ixi pidaaccix mjot mhuinma'ñ. Huijy ycuyc ajcxy mdzinähuip. Jijp'ijxcix je may'ajtin oy'ajtin huudibi Dios tunamyb müd miich ajcxy ycixpi co anajty Jesucristo yhuimbity ya naaxhuiñ. 14 Capxymidoogix Dios jadu'n nej pi'c'anäg capxymidoogixy ytaj yteedy. Ca' huaad m'octundigöoygixni jadu'n nej anajty mdundigooygixy co anajty ca'ni mnejhuuyigixy Dios ytiy'ajt. 15 Oyjot oyhuinma'ñ ajcxy myajtunipy jadu'n nej Dios oyjot oyhuinma'ñ yajtuñ, je huudibi ti xyhuinixy ajcxy. 16 Com jadu'n ymiin jaybety ma Dios ñecy, jadu'n Dios migapxy je' yjäy: "Mi'idip ajcxy oyjot oyhuinma'ñ jadu'n nej iich nmi'ityich oyjot oyhuinma'ñ."

17 Miich ajcxy m'ojadajtpy je Dios Teedy. Dios ca'p tzaachytuna'ñ yi jäy ajcxy huin'ixpety. Hue' je' chaachytunipy ajcxy nidüg nidüg jadu'n nej ajcxy yhuinma'ñymüidity, pen jibic-huinma'ñ ymüd, chi tzaachytunipy ñigi. Paady ycixp tiydudägy ajcxy mdzinähuipy. Tzigiigix Dios. 18 Je Dios canan hue' ti xyajpocyñihuaatzim co ti cojuy iich ajt nbocy müd oori o plata, jadu'n nej anajty nbocytuunim co nmijpidaacim n'ap ndeedy y'ayuc ytiy'ajt huudibi ca' ytiy'ajtiy. 19 Hue' janchtiy Dios ti xyajpocyñihuaatzim müd Cristo co y'o'cy cruudzcixy, e chi ñi'py teemy vojcy müd iich ajt nbocy ycixpi. Jadu'n nej anajty Israel jäy ñayajpocyñihuaatzigixy co yaj'ögy tüg boregi ung, huudibi ca' anajty ti jibicpi müdity, e chi ñi'py teemi cuji. 20 Jadu'n nej Cristo y'o'cy müd iich ajt nbocy ycixpi, Dios jayijpni jadu'n yajnihuinmayiy co jadu'n tuna'ñ, ca'ni anajty naaxhuiñybi chondägy. Jecy'ajty ca'ni anajty pin nejhuüy, e jadachambi Dios ajt ti xyajnejhuuyim. 21 Paady ycixp miich ajcxy mijpidägy Dios. Dios yajjugypijc huinjemy je Cristo co y'o'cy, e Cristo cömay ooy ypidizimy jiiby tzajpjoty. Yajmij'ajtcix Dios etz jijp'ijxcix co Dios xyajnidzögaanip ajcxy m'alma.

22 Ti myajhuaatzicixy mjot mhuinma'ñ co ti mmijpidaaccixy Dios ytiy'ajt. Naychöjigix nayjihuiyigix nidüg nidüg cixyot huinjot, ca' y'ametz yjot-metzity. 23 Com ti Dios oyduñ miich ajcxy mjot mhuinma'ñ huinjemybi müd yi' y'ayuc ytiy'ajt, co ti mmijpidaaccixy je tiy'ajt huudibi tudägyip, je huudibi ca' ycixy ytigoy, huudibi huinixii ijtp, je tiy'ajt huudibi jugy'ajt yejcyp. 24 Jadu'n ymiin jaybety ma Dios y'ayuc: Je jäy ninicx nidigooyb yi' etz je ninicx y'oy'ajtin nidigooyb yi'. Tim jadu'n nej tüg pijy co ñidecy ytätzn, chi je pijy jadu'ñyi yca'ni, e chi jadu'ñyi je pijy y'oy'ajtin ytigoy.

25 Dios y'ayuc ytiy'ajt huinixii y'ity, ca' ycixy ytigooy nimina.

Jada je ayuc je tiy'ajt huidibi Dios yjāy ycapxhuäcxyp ma miich ajcxy.

2

¹ Paady ycixp copicy co m'ixmájtzcixipy yi jibic-huinma'n nej migüg ajcxy jibic mnigapxcixy. Ca' m'an'üdäaccixipy. Ca' ajcxy mnaybidägüyb jadu'n nej jihuiy ooy m'oyjäyity, e ca' yjanchity. Ca' mmigüg ajcxy ti myajca'oy'ixipy. Ca' ajcxy m'üdigoypy mgapxtigoyipy. ² Jadu'n nej yi ma'xungdijc tzocy chüd, nañ tim jadu'n miich ajcxy tzojccixy jot'ajtcixy Dios y'ayuc ytiy'ajt, jigix jēbi ca'pxy yi mhuinma'n mi'idipy ajcxy miid je ixpijcin huidibi Dios xymooygixp, e chi ajcxy m'alma paadipy nidzoocin. ³ Nidzögip miich ajcxy m'alma, peni janch ti mmijpidaaccixy je Huindzin Jesucristo y'ayuc, etz ti mnejhuüiygixy nej Dios may'ajt oy'ajt ti tuñ miid miich ajcxy ycixpi.

Cristo je tūgpajcpi jaccopicyip

⁴⁻⁵ Yajmij'ajtcix yi Huindzin Jesucristo. Dios ti yhuin'ixyii jēbi yHuindzin'aty ma naaxhuiñyāy etz ooy tzocy. Yi naaxhuiñyāy ca' ajcxy ti tuñcuend, tim jadu'n nipaady nej tūg tzaa huidibi pojtzpidijc ninigoob ca' yajtuna'n ma yi tzaadijic ycojy. Yajmij'ajtcix miich ajcxy je Huindzin Jesucristo. Dios yaj'oyi huamyb miid miich ajcxy tūgpicy jāy huidibi yi' yjāy'adaanip, huidibi ojadadaangixp Dios, huidibi Dios ytung tunaangixp.

⁶ Jadu'n yjaybetyity ma Dios ylibro, Dios jadu'n ymina'n:

Jim ma Israel jāy nbidägibich tūg mij'ame'mbi huidibi ti nhuin'ixyich, huidibi ooy ndzocyich, e pinjaty je' mijpidacp ooy njāygidägibich. Je mij'ame'mbi jadu'n je' nipaady nej tūg tzaa oybi huidibi tigihuamb ma tijtaatz co tzaadijic ycojy.

⁷ Miich ajcxy huidibi mijpidacp Jesús, miid miich ajcxy je mij'ame'mbi ooy je' ymjity yjanchity. Per yi' ajcxy ca' mijpidägy Jesús, je' yi' ajcxy ycuydumyb nej ymina'n ma jaybetyity:

Pinjaty ca' capxymidohua'n Dios, ca' ajcxy ixaangixy je Cristo, e jadu'n ajcxy nipaady nej pojtzpidijc huidibi ca' yajtunaangixy tūg tzaa oybi co tzaadijic cojicy. Yi Cristo yi' je' je' mij'ame'mbi huidibi ane'mdāhuamb tūg'ócy.

⁸ Nañ jadu'n yi' ajcxy huidibi ca' mijpidägy Jesús cuydumyb nej ymina'n ma yjaybetyity:

Jadu'n je Cristo nipaady nej tūg tzaa ma jāy ajcxy ycōnejpcixy etz ycidaagixy. Je jāy ajcxy huidibi ca' mijpidägy Jesús, jadu'n nipaady nej jihuiy ycōnejpcixy ma tūg tzaa co ajcxy ca' tungixy cuendi Jesús y'ayuc, paady ycixpi padaangixy tzaachypi miid ypocy ycixpi, jadu'n nej Dios ti yajcōducy.

Je huidibi Dios yjāy'adyii

⁹ Miich ajcxy huidibi yajmij'ajtp Jesucristo, ca' miich ajcxy mjadu'nity nej yi' ajcxy huidibi ca'capxymidoy Dios. Dios miich ajcxy ti xyhuin'ijxcixy. Je rey Jesús je' miich ajcxy ytung mduunip. Oyjot oyhuinma'n miich ajcxy myajtumyb. Dios miich ajcxy xyjāy'ajtp. Miich ajcxy je' xypaat mnidy'ajf'adipy jadu'n nej Dios ti xyajpidzimgixy ma anajty mdundigooygixy, e ti xya-jhuinjihuüiygixy je' ytiy'ajt nej jēb huaad mguydungixy. Jadu'n nipaady nej jihuiy Dios ti xyajtzoongixy agootztuuyb, e ti xyajtigiüygixy ma ytiicxy yjajy. ¹⁰ Co anajty ca'ni mmijpidaaccixy Jesucristo, ca' anajty Dios xytungixy cuendi. Cham co ti mmijpidaaccixy Jesucristo, Dios ti xypa'ayoogixy. Dios miich ajcxy xyjāy'ajtp cham.

Yajtungix Dios y'ayuc ma mdzinaayin

¹¹ Migügtijc ajcxy huidibi ooy ndzocy njihuüyich, jada nyajnimaaaygixyp, jadu'n nej tüg adzinaaybi huidibi ca' chinäy ma ycajp, huidibi nihuidijtp, ca' tüg it mdzinaaygixy, copicy co ca' mnijot'adipy ajcxy yi jibic-huinma'n, jadu'n nej je jäy ajcxy ma m'adzinaaygixy nijot'ajtcixy jibic-huinma'n. Je jibic-huinma'n ca' ñaygodigüüygixy müid oyhuinma'n. ¹² Tiydudägy mdzinähuipy ajcxy, yajtungix oyhuinma'n müid je jäy ajcxy ma müich ajcxy m'adzinaaygixy, je jäy ajcxy huidibi ca' nejhüüygixy Dios ytiy'ajt. Oy ajcxy ca' xy'ixaangixy etz jibic xyñigapxcixy xyñi'ojüygixy, müid co oyjäy'ajtin mdungixyp, chi ajcxy jäygidägy, etz müich yi' ajcxy xycapxpátcixipy ma Dios, mina anajty Dios ñinmiñyii ajcxy.

¹³ Müid je Huindzin Jesucristo ycixpi, capxymidoogixy tüg'óciy gobierno tungmüidpi etz cajt tungmüidpi y'ane'min ycötujcin, nañ capxymidoogixy jadu'n nej je mij'ane'mbi y'ane'my. ¹⁴ Nañ capxymidoogix tungmüidpi ajcxy huidibi je mij'ane'mbi yquejxyp jigix tzaachytunipy je' ajcxy huidibi tundigooyb etz capxpaadipy je' ajcxy huidi oyhuinma'n ytumyb. ¹⁵ Dios chojcyp co tiydudägy mdzináaygixipy, jigix jébi je jäy ajcxy huidibi ca' huinjihuüygixy Dios ytiy'ajt, huidibi tzuu huinma'n müid, ca' ajcxy mihuinma'nybaady nej jibic xyñigapxp.

¹⁶ Tzinaaygix jadu'n nej jäy chinäy huidibi cuydumb Dios ytiy'ajt, huidibi ti ixmach yi ayuc tiy'ajt huidibi ca' ytüyity. Pen mmidundigooyb ajcxy tunmüidpi y'ane'min ycötujcin, ca' huaad mnaybidáacigixy jadu'n nej jihüüy Dios xylugarmooygixy jigix jébi mdundigooygixy. Copicy mdzinähuipy ajcxy jadu'n nej Dios ytumbi huidibi oy tumb. ¹⁷ Migü'adii ajcxy tüg'óciy jäy. Naychójcigix nayjihüüygixy nidüg nidüg huidijaty yajmij'ajtp Dios. Yajmij'ajtcix Dios. Capxymidoogix yi mij'ane'mbi.

Jadu'n nej Cristo tzaachypi yajnajx

¹⁸ Tumbidijc ajcxy, imidoogix capxymidoogix mhuindzindijc. Pen oyjäy yi mhuindzin huidibi yung naxy yjot yhuinma'n müidity, o pen ahua'njäy jibicjäy, ca' yñejity, capxymidoogix. ¹⁹ Yjäygidägy Dios pen mmecxtujtaaygixyp nej jäy ajcxy xychaachtungixy müid co oyhuinma'n müich ajcxy mmüidity. ²⁰ Pen ti anajty mdundigooygixy, e paady anajty mayjtaachytungixy, ca' pin xycómáaygixipy xycapxpáadygixipy, oy ti mjamecxtujtaaygixy huidijaty tzaachypi. Pen ooy mdungixy etz tzaachypi mbaatcixy, chi janchtiy Dios jäygidägy nej mmimecxtujtaaygixy. ²¹ Dios chojcyp co mmecxtujtáaygixipy je tzaachypi huidibi mmínajxyp myajnajxcixyp müid co oybi mdungixy. Paady ycixpi je Cristo tzaachypi ayo'n minajxy yajnajxy müid ich ajt ycixpi, e yejc ijxpejt jadu'n nej jébi huaad mmínajxcixy myajnajxcixy tzaachypi ayo'n, nañ nej jébi huaad mbanicxcixy mbayöygixy yi' y'ijxpejt. ²² Je Cristo ca' je' ma ytundigooy, e nañ ca' pin huin'ññ. ²³⁻²⁴ Je Cristo co jäy ajcxy y'oji, ca' je' y'adzouhuimbijty; e co jäy ajcxy chaachytuuni, ca' mijotmäthuimbijty je jäy ajcxy, ñigi Dios yajpuhuanüy. Com Dios je' paatip nej chaachytuna'n huidi ajcxy tundigooyb. Je Cristo ci'm yajnicx ich ajt ndzaachypi co y'o'cy cruudzcixy. E müid co jadu'n y'o'cy cruudzcixy müid ajt nbocy ycixpi, chi jébi n'ixmajtzim jibic-huinma'n etz tudägy jébi ndzinaayim. Müid co Cristo je tzaachypi minajxy yajnajxy müid ich ajt nbocy ycixpi, paady nüdzoocim ajt n'alma. ²⁵ Müich ajcxy jecy'ajt mnüidigooyb mdüidigooyb anajty ajcxy ma Dios, mgi'mhuinma'n anajty ajcxy myajtumyb nidüg nidüg, jadu'n

nej jây yborregi ñiidigoy ytüdigoy ma yuugjot. Cham miich ajcxy ti mni-
jothuimbijtcixy Dios, ti ajcxy mhuinma'ñymech ti mmijpidaaccixy Jesucristo
je huidibi xycuend'ajtp ajcxy.

3

Nej huaad chinaaygixy pinjaty ti pijccixy

1-2 Jadu'n nej tumbidijc capxymidooy yhuindzin, nañ tim jadu'n miich
ajcxy töxyjäydijc capxymidoogixy mñây. Pen mñây ca' capxymidooy Dios, ca'
mijpidağa'ñ Jesucristo, miid co miich oyjot oyhuinma'ñ myajtunipy miid yí',
ycadimjetyity huin'it mñây yhuinma'ñymedzip etz mijpidägipy Jesucristo, co
y'ixipy nej miich mmidity tudägy'ajtin. ³Töxyjäydijc ajcxy, ca' mnyagömayiyyb
miid mhuit mxojx oyjatpyi tzoujatpyi, miid oori çjiituz etz oori taatztiy, miid
co mgöhuay mdzachcüdägy miid cüd oyjatyp. ⁴Hue' janchtiy jây miich ajcxy
xycömayip miid co oyjot oyhuinma'ñ anajty myajtungixy, miid co yung naxy
mjot mhuinma'ñ ajcxy miidity. Co jadu'n mdungixipy jada je' oy jäygiäacni
ma Dios huinixii. Yi mhuit yí' mxojx etz oori taatztiy cixip tigoyip yí'. ⁵Nañ
tim jadu'n anajty jecy'ajty je töxyjäydijc huidibi anajty ajcxy cömay ijtp,
yajtuuñ anajty ajcxy oyjot oyhuinma'ñ, ymijpidacyp anajty ajcxy Dios, nañ
ycapxymidooyb anajty ajcxy ñây. ⁶Jadu'n nej Sara capxymidooy Abraham.
Sara xiigoyäxy Abraham: "Tich nhuindzin." Pen myajtumyib miich ajcxy
oyjot oyhuinma'ñ jadu'n nej Sara, jadu'n miich ajcxy anajty nej jihuüy Sara
ajcxy xy'ung'adyii, pen ooybi mdunipy ajcxy, ca' ti ajcxy mdzigihuiipy.

⁷Nañ jadu'n miich ajcxy yëydijctijc, yajtungix pa'ayo'n miid mdöxyijc,
yajmij'ajtcix. Com jac mic miich ajcxy ca'ydi yi töxyjäydijc. Dios may'ajt ti tuñ
tú'ciy miid miich ajcxy, paady ycixpi copicy yajxon naymiiddzinäayigix jigix
Dios cuendipigipy etz xymöhuipy tijaty ajcxy myajmibijctzooyb.

Co pinjaty xymidundigooy, ca' myaj'ahuimbidity

⁸Jada ayuc cham njacyajnimaydaayb nidüg'öciy miich ajcxy. Tú'ciy mjot
mhuinma'ñ mi'ijtcix, naymigüg'ajtigix yajxon, naychójcigix nayjihuiyigix
nidüg nidüg, nayba'ayouhuigix nidüg nidüg, pidaaccix yung naxy mjot
mhuinma'ñ. ⁹Co ajcxy migüg xymidundigoyipy, ca' myaj'ahuimbidity jadu'n
nej anajty ti xytuñ. Co ajcxy migüg xyñi'o'jihuiipy, ca' myaj'ahuimbidity jadu'n
nej anajty ti xyñi'o'jiiy. Nigi nibijctzohui' ma Dios miid yí' ajcxy ycixpi, nigi
mi'oyjây'at mmigüg. Huin'it nigi Dios xyconuucxip. ¹⁰Com jiiyby ymiñ jaybety
ma Dios ñecy:

Pinjaty jotcujc tzinähuamb e yajnaxa'ñ xii tiempo agujc jotcujc,
nay'ahuijtziigiib ca'ydi y'idigooy ycapxtigooy, ca'ydi y'anidägy.

¹¹Huen jihuägy ma je jibicpi e huen oyjây'ajtin tuñ. Huen ixmach tüg'öciy
tzicapaxy, ca' tzicapaxy ixtähuiipy.

¹²Je Huindzin Dios ycuend'ajtpy yí' je jây huidibi tiydudägy tzinaayb
etz ypubejtcixyp ypuedigiyigixyp migügtijc co tijaty mibijctzoy. Dios
ymijotma'tpy je jây ajcxy huidibi jibic-huinma'ñ tumb.

¹³Pen mdumyb oyjot oyhuinma'ñ ajcxy, huin'it ca' pin ajcxy
xymijotmädiipy. ¹⁴Co oyjot oyhuinma'ñ myajtunipy ajcxy e huin'it jây
ychaachytungixy, huin'it Dios xyconuucxip ajcxy, e ca' mdzigiyigixipy, ni
ca' mhuinma'ñyidigöoyigixipy. ¹⁵Mijpidaaccix yí' Jesucristo ich ajt nHuindzin
Dios cixyot huinijot. Pen ji jây xy'amidoogixy: ¿Ti co mdzachmijpidaaccixy
Jesucristo? Tiydudägy m'adzouhuipy miid yung'ajt nax'ajt jadu'n nej

mjiip'ijxcixy co Jesucristo xyajndzögaani ajcxy yi m'alma. ¹⁶ Ca' mgapxixy ajcxy je ayuc huidibi xyajtzo'yduunip. Pen jäy ajcxy xymi'iidigooygixp xymigapxtigooygixp, chi ajcxy jihuihuamby tzo'ydu'n müd co ca' yjanchity nej ajcxy ymina'n com oybi anajty ti mdungixy. ¹⁷ Pen Dios müch ajcxy jadu'n xyajnijot'ajt co tzaachyp mminajxcixipy myajnajxcixipy, jac'oy co tzaachyp mminajxcixipy myajnajxcixipy müd yi m'oyjäy'ajtin ycxipi, e ca' anajty tzaachyp mminajxcixy myajnajxcixy müd co anajty ti mdungiooygixy.

¹⁸ Je Cristo nañ jadu'n tzaachyp minajxy yajnajxy co y'o'cy cruudzcixy müd jäy ajcxy ypocy ycxipi. Oy je' anajty ca' tibocy müdity, chi je' ti codinäy je jäy ajcxy ypocy, e jadu'n üch ajt ti naymi'oyüim müdi Dios. Oy je Cristo ñinix y'o'cy, per je' y'alma ca' je' y'o'cy, jugypijcy je' jadügtecy müd jemybi ninix. ¹⁹ Huin'it co Cristo y'o'cy, chi je' y'alma ñicxy, e capxhuäcxy yi' y'ayuc ma jäy y'alma ajcxy huidibi jibictuuyb ijtp. ²⁰ Je jäy ajcxy je' jüby y'alma ijtp jibictuuby huidibi anajty ca' capxymidooy Dios. Je taab Noé yajcojy je mij barco, ooy Dios ajcxy jecy ymamecxtujci, huen tijy cayjothuimbijty ajcxy. Jëyi niductujc je jäy choocy ma je mijtuu je mijñigom. Je' co je jacjadyii ca' ajcxy yjothuimbijty. ²¹ Jadu'n nej je niductujcpi ajcxy mijpidacy Dios y'ayuc, e chi ajcxy choocy, nañ tim jadu'n üch ajt co nniibejtüm je' üch ajt ndiy'ajt'ajtim co nmijpidaacim Jesucristo je huidibi co y'o'cy jugypijc müd jemybi ninix, etz ti xyajhuaatzim njot nhuinma'n jigix ooy oy nayjihuiyim, etz nañ jadügtecy co anajty n'o'cim xyajjugypijcim müd jemybi ninix. Co nniibejtüm, je' je' je tiy'ajt co Dios ti xyajhuaatzim njot nhuinma'n. ²² Je Cristo ti je' ñicxy tzajpjoty. Jüby je' cham y'ity mij'ane'mbi ma Dios, yi' je' ane'mb je ángeles ajcxy huidi tzajpjoty tungmüd etz huidijaty mic'ajt müd tzajpjoty.

4

Yajtungix je mic'ajt huidibi Dios ti xymooygixy

¹ Je Cristo ayo'n tzaachyp minajx yajnajx co yhuidijty ya naaxhuiñybi, e chi yajtuuñ oyjot oyhuinma'n müd jäy ajcxy ycxipi. Paady ycxipi copicy müch ajcxy myajtunipy oyjot oyhuinma'n müd migügtajc jadu'n nej Cristo yajtuuñ. Pen müch ajcxy mminajxyp myajnajxyp tzaachyp müd co oyjot oyhuinma'n myajtuñ, chi ca' mjacnijot'ajtip ajcxy jibic-huinma'n. ² Jadu'n nej ajcxy mjactzinähua'n mjacjugy'ada'n, ca' huaad mjacnijot'ajtcixy je jibic-huinma'n. Hue' janchtiy mdunipy ajcxy jadu'n nej Dios tzocy. ³ Jecy'ajty co anajty ca'ni mnejhuüygixy Jesucristo ytiy'ajt, jibic-huinma'n anajty ajcxy myajtummy ma mdzinaayin mjogy'ajtin, jadu'n nej jäy ajcxy jacjadyii huidibi ca'ni nejhuüygixy Dios ytiy'ajt. Chi anajty myajtungixy canaagnax je jibic-huinma'n, ooy ajcxy mnijot'ajtcixy maynax jibic-huinma'n. Ooy anajty anaxy mdzach'üccixy vino, huin'it anajty ooy ajcxy ymügyii. Ooy anajty mnixondaaccixy coodz huididi, huin'it anajty ooy m'uuccixy anaxy. Ooy mnijot'ajtcixy xü, ooy anajty m'ojadajtcixy tzaadzech quipychech huidibi Dios ca' jäygidägy. ⁴ Paady ycxipi je jäy ajcxy huidibi ca' nejhuüygixy Dios ytiy'ajt, ca' ajcxy jäygidägy co ca' müch ajcxy cham jadu'n m'idich jadu'n nej yi' ajcxy y'idich, chi ajcxy jibic xyñigapxcixy xyñi'ojiygixy. ⁵ Ca' mdungixy cuendi yi' ajcxy, com Dios paatip nej ytiyduna'n ajcxy. Je Dios je' tiydunamb nidüg'öciy jäy ajcxy huidibi cham jugy'ajtp, etz tiibi y'öccixy. ⁶ Paady ycxipi ti yajnimäy Jesucristo ytiy'ajt je jäy tiibi y'öccixy jigix yajtiyidunipy ajcxy müd Dios ytiy'ajt jadu'n nej yajtiyduna'n yi' ajcxy huidibi jacjugy'ajtp cham. Jëbi huaad ajcxy yjugypijccixy jadügtecy etz y'idipy ajcxy jadu'n nej Dios y'ity.

⁷ Ti ytimyhuingoni je xii je tiempo mina ycixaani ytigoyaani tüg'óciy tijaty ya naaxhuiñybi. Paady ycixp tzocy co tiydudägy etz huijycujc mdzinaygixipy, etz tzocy co mjac'ojadadipy mjacmibijctzoohuipy ajcxy Dios. ⁸ Ooy ycopicyity co jacnaychójcigix jacnayjihuiñyigix nidüg nidüg. Miiid co mnaychójcigixy, paady ycixpi jëbi mnayméecxigixy. ⁹ Naymi'oyjäy'ajtigix nidüg nidüg agujc jotcujc, ca' y'ametz yjotmetzity. ¹⁰ Yajtungix miiid je migügtijc jadu'n nej Dios xymoogygixy xpijcin nidüg nidüg. Naybubéjtigix naybudigiiyigix miñ xyipy jadu'n nej jäy ajcxy huidibi yajxon Dios ytiy'ajt padungixp. ¹¹ Pen Dios ti xymoogygixy xpijcin jigix jëbi capxhuäcxy yi' y'ayuc, yajxon Dios y'ayuc mgapxhuäcxip. Pen miich xypaat pujigii jëdzigii, yajxon mdunipy ajcxy jadu'n nej Dios huinma'ñ ti xymoogygixy. Co yajxon Dios ytiy'ajt mguyduunipy, huin'it Dios cömay'a'ñ miich ajcxy, miiid co ti mmijpidaaccixy Jesucristo. Je Jesucristo je' cömay'idip etz ane'mip huinixii huinitiempo.

Mimecxtujccixy tzaachypi ayo'n

¹² Migügtijc ajcxy huidibi ooy ndzocy njihuñyich, ca' ooy mhuinmay'ahuidijtcixy co jäy xy'ixhuidijtcixy xypahuidijtcixy, co jäy xychaachytunaangixy jigix jëbi ñiguëxigipy pen janch mmibijccixy Jesucristo. ¹³ Ca' ajcxy mdajipy mmayipy, jotcujc ajcxy mnayjihuiñyib jigix jëbi nañ jadu'n tzaachypi mminajxcixy myajnajxcixy nej Cristo minajxy yajnajxy tzaachypi. Co anajty jadügtecy Jesucristo ñayguëxigyii ya naaxhuiñ miiid ymic'ajt y'oy'ajt, jëbi ajcxy jotcujc mnayjihuiñyib. ¹⁴ Pen xymi'iidigooyb xymigapxtigooyb jäy ajcxy, miiid co miich ajcxy ti mmijpidaaccixy Jesucristo, jotcujc mnayjihuiñyib, miiid co miich ajcxy miiid je Dios yjihui'ñ etz Dios ymic'ajt ma mjet mhuinma'ñ. ¹⁵ Pen nidüg miich ajcxy ayo'n tzaachypi mbaatcixy, oy ca' anajty ti mjäy'aj'öccixy, oy anajty ca' ti mmeetzixy, oy anajty ca' ti mdundigoogygixy, oy anajty ca' ti mnaybidäacigixy ma huingjäy ti ytundigooy, ¹⁶ pen miich ajcxy tzaachypi mminajxyp myajnajxyp miiid co ti mmijpidaaccixy Jesucristo, ca' ti tzo'ydu'n mjihuñhuipy, ñigi Jesucristo cömay'idipy.

¹⁷ Ti xii tiempo tim paatni mina Dios tiyduna'ñ je jäy ajcxy huidibi cuydumb je' ytiy'ajt. Pen Dios iich ajt huidi nmibijcim xytyduunim e nbaatim hueeni tzaachypi, ñigi tzaachypi padaangixy ajcxy huidibi ca' mijpidaaccixy Dios. ¹⁸ Pen je jäy huidibi oyjot oyhuinma'ñ miiid mic tzaach padaangixy je' y'alma nüdzoocin, çti jada ytunaangixy pinjaty jibic-huinma'ñ miiid, pinjaty pocytungix? ¹⁹ Pen tzaachypi mminajxyp myajnajxyp ajcxy miiid co Dios jadu'n chojcyp, ca' ajcxy mjetmetzcihuipy, ñigi ajcxy panicxcix payöyigix oyhuinma'ñ, ñigi cixy'jot huinijot mijpidägipy ajcxy Dios; com yi' miich ajcxy xyajcoj, e yi' xycuend'ajtcixp; com Dios yi' je' tudägy etz ñidinaayb je' y'ayuc.

5

Pedro capxhuijp je mibijpidijc

¹ Jada iich miich ajcxy yajnimaaayb huidibi nigohuajc'ajtp je mibijcpidijc, iich nañ jadu'n nigohuajc'ajtpyich mibijcpidijc. Iich n'ixyich co je Cristo ayo'n tzaachypi minajty yajnajxy. Nañ jadu'n iich yi' nmiiid'idaamybich jadüg'oc co anajty ymiñ ya naaxhuiñ miiid y'oy'ajtin ymi'ajtin. ² Jada iich miich ajcxy nyajnimaaayb: yaj'ixpijccix etz cuend'ajtcix Dios yjäy agujc jotcujc. Ca' myaj'ixpigipy ajcxy ametz jotmetz, cuend'ajtcix Dios yjäy, tim jadu'n nej jäy ycöbixy cuend'aty. Ca' meeñgixy myaj'ixpigipy ajcxy. Miiid oyjot

oyhuinma'n myaj'ixpijccixy. ³ Ca' adzip ahua'n m'ane'mi'py Dios yjāy. Hue' janchtiy iixpejt oybi yejccix. Cuydungix Dios ytiy'ajt. ⁴ Co anajty Jesucristo, je huidibi nihuindzin'ajttaayb tūg'óciy, ñayguéxigyyi ya naaxhuin' jadūg'oc, chi cōmay miich ajcxy mbidzimipy. Tim jadu'n nej jāy ajcxy co y'iyigixy e co ymadaaccixy, chi cōmay ypidzim ajcxy. Miich ajcxy cōmay nañ jadu'n m'idipy huinixii.

⁵ Myajmij'adipy anāctijc ajcxy, je' ajcxy huidibi nigohuajc'ajtp je mibijcpidijc. Ooy ycopicyity co nidūg'óciy miich ajcxy mnayajmij'ajtigixipy miñ xyipy miid oyjot oyhuinma'n. "Dios ca' je' jāygidāgy pinjaty amij agix jāy'ajtigixy. Dios ypubejtyp miid y'oyjot pinjaty yung naxy yjot yhuinma'n miid." ⁶ Mgapxcōbigipy ajcxy tiydudāgy Dios, je mij'ane'mbi, chi Dios xycōmayipy mina anajty. ⁷ Mibijctzougix Dios miid tūg'óciy tijaty jotmay ajcxy miid'ajtyp, chi jēbi Dios xypubedipy xypudigihuipy ajcxy.

⁸ Huijycujc m'idipy ajcxy. Nixi' m'idipy ajcxy. Com je mujcu' huidibi xymidzip'ajtm, ooy je' xy'ix'ixim xypa'ixim. Hue' xyajhuinma'ñy digoyaanim, tim jadu'n nej je caa co ixtay ti chūdzaamby. ⁹ Huindina' jijptina' ajcxy je mujcu'. Yi jacjadyi jāy huidibi mijpidaaccixy Jesucristo, nañ yminajxcixyp yajnaxcixyp tzaachyp nañ jadu'n. ¹⁰ Co anajty ajcxy hueeni tzaachyp ti m'ocyajnaxy, huin'it Dios xyaj'oyi'ipy ajcxy yi m'jot yi mhuinma'n, xyajmibigip ajcxy yi' ytiy'ajt, xyajjotmicpigip ajcxy. Com Dios yi' je' huidibi may'ajt ti tuñ mijcajee miid nidūg'óciy jāy ajcxy. Yi' je' huidibi ti yaj'oyi' nej jēbi cōmay huinixii n'ijtm miid Jesucristo jibby tzajpjoty. ¹¹ Huen Dios y'oy'ajtin etz ymij'ajtin idipy huinixii.

Capxpoox'in yajnajxp

¹² Jada necy nyajniguejxy ajcxy miid Silvano iich ajt nmigūg huidibi ndijpyich co ooy yajmij'aty Jesucristo. Hueeni jada ayuc huidibi nyajni-jayiyb, nañ ti nbidāgyich necyjoty capxhuijin etz ti nbidāgyich necyjoty yi Dios ytiy'ajt tudāgy, nej Dios may'ajt oy'ajt tuuñ miid miich ajcxy ycixpi. Mijpidaaccix nig'i Dios ytiy'ajt, ca'ydi mhuinma'ñy digooogyixy.

¹³ Je jāy huidibi ya Babilonia huidibi ajcxy yajmij'ajtcixp Jesucristo, je jāy ajcxy huidibi Dios ti huin'ixy, xyajniguejxp ajcxy capxpoox'in. Nañ jadu'n Marcos iich nmigūg, je huidibi njihuuybich nej jihuiy ngi'm'ung'adyiijich xyajniguejxp capxpoox'in nañ jadu'n. ¹⁴ Naygapxpóocxigix xic xon nidūg nidūg miñ xyipy. Je' je' je tiy'ajt co mnaychójcigixy mnayjihuiyigixy miñ xyipy.

Jotcujc mnayjihuihuuyb ajcxy nidūg'óciy huidib yajmij'ajtp Jesucristo. Amén.

2 PEDRO

Yi Mimetzpi Necy Huidibi San Pedro Yajniejx Yi Mibijcpidijc

¹ Ich Simón Pedro, tumbich ma Jesucristo ytung. Yi' xy'apóstol'ajtpich etz ngapxhuáčxpyich yi' y'ayuc. Cham ich miich ajcxy jada necy nyajnijayiygixy huidibi ajcxy ti mbaatcixy mibijcin janch oybi, tim jadu'n nej ich ajcxy ti nbaatcixyich mibijcin janch oybi. Ich ajt nDios je Jesucristo huidibi xyajnidzoocim ajt n'alma tudägy je', e tudägy ytuñ müd ich ajt nidüg'óciy. ² Huen Dios mijmay'ajt tunipy müd miich ajcxy, etz jotcujc'ajtin xymöhuipy mijcajee, müd co tiy'ajt ti mbaatcixy ma Dios etz ma je Jesús ich ajt nHuindzin.

Je mibijcpidijc chinaayin jugy'ajtin

³ Dios müd je' ymij'ajt ti xymooyim tüg'óciy huidibi nyajmayajtim ma ajt njugy'ajtin, nej huaad nguuyduunim yi' ytiy'ajt etz nej yi' huaad nyajmij'ajtim. Dios jadu'n mijmay'ajt tuun müd ich ajt ycixpi co ti xyajnejhuüyim Jesucristo y'ayuc ytiy'ajt. Je Jesucristo ti xyhuin'ixxin jigix jébi nmüd'ajtim yi' ymij'ajtin y'oy'ajtin, etz jigix jébi nduunim oyjäy'ajtin nej Jesucristo tuuñ.

⁴ Dios ti xymooyim huidibi janch oydi'cni e janch copicyip jigix jébi miich ajcxy mbaatcixy Dios yjihu'iñ ymic'ajt huidibi xyajtzinaaygixy müd huádz jot huinma'n, etz jigix jébi müd jada ycixpi tiibi xyaj'ahuaniyim, miich ajcxy mijjpyöyduutcixy je jibicpi huidibi naaxhuiniyjäy ajcxy ñijot'ajtcixyp. ⁵⁻⁷ Com Dios müd ymic'ajt ti xymooyim huidibi nyajmayajtim, paady ycixp miich ajcxy naymic'ixigixy co ajcxy mmibijcin mjacyajmijtigüygixipy tudägy'ajtin; e müd mdudägy'ajtin mjacyajmijtigüygixipy ajcxy Dios y'ixpijcin; e müd je Dios y'ixpijcin mjacyajmijtigüygixipy yi Dios yjihu'iñ ymic'ajt ma ajcxy mjot mhuinma'n huidibi müd mmimadägyipy ajcxy yi jibicjot jibic-huinma'n; e müd je mic'ajt ma ajcxy mjot mhuinma'n jacyajmijtigühuipy ajcxy mecxtujcin; e müd je mecxtujcin mnejhuüyigixipy nej jéb huaad myajmij'ajtcixy etz mdzigüygixy Dios; e müd je mecxtujcin mjacyajmijtigüygixipy je tzojcin je jihuiyin müd migügtijc; e nañ mijtigühuipy nañ jadu'n je mibijcin nej jéb huaad Dios myajmij'ajtcixy etz nej jéb huaad cixyot huinijot mjacyajtungixy oyjäy'ajtin.

⁸ Pen ma miich ajcxy mdzinaayin mjugy'ajtin yajpattäy e ymijiy ymayiy, yi mjugy'ajt ajcxy ca' yi' ñaadigi'aty; nañ ca' anajty ajcxy naadigi' ti mmibijccixy ich ajt nHuindzin Jesucristo, ti mnejhuüyigixy yi' y'ayuc ytiy'ajt. ⁹ Pin jada ca' capxymidooy tüg'óciy jadayaabi capxhuijin ma yjugy'ajtin, jadu'n yi' nipaady nej tüg huintzpi o huidibi y'ixxin con, ti jäydigoy co Jesucristo ti yajpocynihuaatzp. ¹⁰ Paady ycixp miich ajcxy migügtijc, naymic'ixigixy tungix tüg'óciy jada jigix mnejhuühuipy ajcxy tiydudägy co Dios ti xyajmibijccixy e ti xyhuin'ixxcixy. Pidaaccix mhuinma'n co jada tiy'ajt huen copicy, huen tictztigiy ma miich ajcxy mjugy'ajtin. E pen mdumyab ajcxy jadu'n, nimina mgapocycägixipy. ¹¹ E jadu'n miich ajcxy myajmöhuipy tiydudägy tigiydac mijpi ma ich ajt nHuindzin Jesucristo y'ane'my, je huidibi xyajnidzoocim ajt n'alma. E yi' y'ane'min ca' ycixipy ytigoyipy nimina.

¹² Paady ycixp ich miich ajcxy jatyimy yajjäymejtzcoodaangixy jada tiy'ajt. Oy miich ajcxy jada tiy'ajt majajtcixy mjanejhuüyigixy, e tudägy

ajcxy mmibijccixy etz mmi'ijtcixy je tiy'ajt huidibi miich ajcxy cham muid. ¹³ Minaambich co yjanchity nami njactzinaayñich co ñich miich ajcxy nmöhuipy capxhuijin. ¹⁴ Hich ajt nHuindzin Jesucristo ti xyajne-huiyich co tzojc n'ixmadzipyich jada njugy'ajtin (n'ögibich). ¹⁵ Paady ycixp naymic'ixyijich mictägy ma miich ajcxy co ngapxhuijccixy jigix co anajty n'ögyich mjäymetzäyb ajcxy tüg'óciy jada tiy'ajt.

Y' ajcxy huidibi y'ijxy je Cristo ymij'ajtin y'oy'ajtin

¹⁶ Hich miich ajcxy ti nyaj'ixpicy je tiy'ajt maabi nHuindzin Jesucristo, jadu'n nej Dios ymij'ajt müdity, e jadu'n nej je' yhuimbidañ jadüg'oc ya naaxhuiñ. E ca' ñich ajcxy nyaj'ixpicy nigoo'ayuc anii'ayuc huidibi ci'm ti ngojyich ti nmacyich. Müd ñich ngi'mhuini ti n'ijxcixyich je Huindzin Jesús ymij'ajtin. ¹⁷ N'ijx ñich ajcxy co je Dios Teedy mooy ajt nHuindzin Jesucristo oy'ajt etz mij'ajt. E nañ nmidooyich ajcxy ayuc choñ ma je oybi Dios y'it, xyñimaayi: "Jada je' ñich n'ung huidibi ooy ndzocyich njhuiyich, e ooy jotcuyc nayjihuiyijich müd yi' ycixpi." ¹⁸ Hich ajcxy nañ jadu'n ci'm ti nmidöogixyich je ayuc huidibi anajty tzomb tzajpjoty. Jim ñich ajcxy anajty quipxyi müd je Huindzin Jesús ma je amay gop.

¹⁹ Nañ jadu'n nmüd'ajtim je ayuc jac'oybi jactäybi. Je' je' je tiy'ajt je ayuc huidibi ajcxy yjay je Dios y'ayucnajtzcaxxiybi jecy'ajty. Oy miich ajcxy oybi mduñ co m'amidoo'ijtcixy je oybi tiy'ajt maabi Jesucristo huidibi jadu'n nipaady nej tüg'jin tücxp agootztuum etz jadu'n nipaady nej je xii co yxñimiydäy, etz jadu'n nipaady nej je mijmadza' jayhuixtucpi co ypidzimy. Jada tiy'ajt xycodiicxip ajcxy mjot mhuinmañ. ²⁰ Cuendtungix miich ajcxy jada: tüg'óciy je tiy'ajt, huidibi Dios ytiy'ajtmüdpj yejc huidibi ijtp jaybety ma Dios ylibro, ca' huaad pin yajniגעip müd yci'mhuinmañ. ²¹ Com je Dios y'ayucnajtzcaxxiybi camina je' ajcxy ayuccapxhuäcxy müd yci'mdzojcin yci'mhuinmañ. Dios anajty ajcxy huin'ixyip jebi ayuccapxhuäcxy müd Dios ycixpi com je Espíritu Santo anajty ajcxy mooyip ayuc huidibi ajcxy ycapxhuäcxyp.

2

Y' ajcxy huidibi yaj'ixpijcp anii

¹ Per nañ ji anajty nañ jadu'n ayucnajtzcaxxiybi huidibi anajty ajcxy anüdaacp ma je Israel jäy. E nañ jadu'n yji'adipy ayuccapxhuäcxpi huidibi anii yaj'ixpijcp ma miich ajcxy. Je' ajcxy ayüch ameech yaj'ixpijcp yci'm'ayuc yci'mhuinmañ huidibi ajcxy yajhuinmañyidigooyipy je mibijcpidijc. Yminañ ajcxy co ca' yjanchity je Huindzin Jesús y'ayuc, je huidibi yajniäzooc ajt n'alma, e jadu'n ci'm ñay'ayo'nmöoyigixy müd Dios mic'amy. ² Mayjäy ooy panicxañ je jibicpi huidibi ajcxy ytungixyp, e müd je' ajcxy ycixpi yajniäpaxipy yajnimiydägy ajcxy jibic je huidibi ajcxy cuydumb je tiybi ayuc, je Jesucristo y'ayuc oybi. ³ Müd co anajty tzach'adzocjccixy meeñ, chi anajty xyhuimbijccixy xyhuimmeetzcixy müd ajcxy y'ixpijcin ca'p yjanchity. Per je pocycähuin ajcxy ahuijxip, ca' ma ñidzooy. Ti yjejni maabi ajcxy ypocyc'añi ma Dios. Dios tzaachytunüib ajcxy müd ypocy ycixpi.

⁴ Dios ca' je' huinmecxxy je ángeles ajcxy huidibi tundigoogyixp. Hue' janchity ycotijnajxtaayb ayoodactuuyb etz yajhui'my agootztuuyb, cadenijiy y'ijtcixy cuend'aty, ixti cooni anajty paady xii tiempo co anajty yajtiydunañ

naaxhuifñyäjy müd ypocy ycixpi. ⁵ Nañ ni ca' Dios huinmeecxy je naaxhuifñyäjy huidibi tundigooy jecy'ajty. Chi quejxy ayo'nduu etz mijñigom ma je jibicjäydijc. Jëvi yajtzoocy je Noé huidibi capxhuäcx je tiy'ajt. Quipxy müd Noé yajtzoocy jahuixtujc y'amigügtijc. ⁶ Dios nañ jadu'n tzaachytuñ müd ypocy ycixpi etz yajhuindigooy müd jñn metz cajp, Sodoma etz Gomorra, ixti cooni yajhu'i my accuyjam jigix y'idipy je ijxpejt ma je jibicjäydijc huidibi ajcxy jac'axam jactzinähuaam jacjugy'adam. ⁷ Dios yajtzooc je Lot, hue' je' anajty janch oyjäy, e janch ymüd anajty jotmay co anajty je jibicjäydijc ajcxy ijxi chinaayin yjugy'ajtin janch jibic. ⁸ Jabom jabom anajty je Lot, je jäy oyjäybi huidibi anajty tzinaayb quipxy müd je jibicjäydijc, ni ca' anajty yjotcujc'aty co anajty icy midoy nej anajty ytundigooygixy je jäy ajcxy ca'pi ytudägyity. ⁹ Dios müd mic'ajt jëbi nihua'ñ yajtögy pinjaty mibijccixp cixyot huinijot co je mujcu' yjot'ixxigixy huinma'ñ'ixxigixy. Nañ jadu'n Dios mic'ajt müdity jigix jëbi yaj'ijtcixy je jibicjäydijc müd tzaachyp'i ayo'n, huidibi ymöhuaamy co anajty naaxhuifñyäjy tyduñ müd ypocy ycixpi.

¹⁰ Dios ymüd mic'ajt jëbi tzaachytunipy pinjaty tumb jibic-huinma'ñ nej ñiniñx nijot'ajtcixy, e ca' ixaangixy je Huindzin Jesús y'oy'ajtin ymi'ajtin. Amij agix etz jotmic ajcxy nayjihuiyüi. Ytumb ajcxy yci'mjot yci'mhuinma'ñ. Ni ycatzigüygixy co oyñinej ajcxy ni'ojñiygixy pinjaty mic'ajt müd ma Dios ytung. ¹¹ Oy je ángeles ajcxy müdity mijcötujcin etz ane'min, ca'p je' ajcxy yjot yhuinma'ñ müdity nicxy ni'ojñiygixy ma Dios yhuinduu pinjaty mic'ajt müd ma Dios ytung.

¹² Per jadayaab jibicjäydijc ajcxy jadu'n ajcxy yi' nej iyujc, ca' yhuinma'ñ; nigoob ytmyhuidity etz yma'xun'ajtcixy jigix jäy ymadzñyb etz yaj'ögñyb. Ñixiicpy yajxiicpy ajcxy yi' huidib ca' hujñihuiy. Per nañ tim jadu'n ajcxy y'ögipy nej iyujc y'ögy ytigoy. ¹³ Cobadñhuaangixy jadu'n nej ti ytundigooygixy. Hue' nayjihuiygixy capin yjadu'nity, yxondaaccixy tüg jaxicyjaty. Jadayaab jäy ajcxy pocy ypa'tcipy ajcxy yi' chinaaygixy yjugy'ajtcixy. Tüg tzo'ydu'n co ajcxy nañ jadu'n xymijyöybejtcixy ma m'amugñygixy.

¹⁴ Co ajcxy huindñcxcixy töxyjäydijc, chi ajcxy ooy nijot'ajtcixy co müd tundigoya'ñ. Ca'p ajcxy chjipigixy y'anucñygixy müd pocytnüi. Yajtundigooygixy pinjaty amúzip ma mibijcin, ooy ajcxy yhuijity ycuycity ycohuinma'ñity ma meeñ'adzoogñi. Dios yajtigoyñib ajcxy y'alma. ¹⁵ Tigoyjäy yi' ajcxy, je' co ti ñiidigajtcixy ti ytüdigajtcixy ma je tñybi je janchyp'i tiy'ajt. Je' ajcxy ypanicxy ypayöyp je profeta Balaam y'ijxpejt, je Beor y'ung, co ooy ymeeñybada'ñ anajty müd yjibic-huinma'ñ. ¹⁶ Chi Balaam oy yaj'ojyüi ypocy tüg töxyburro, ycapxy jadu'n nej tüg jäy, e jadu'n je' yajhuäcxijpy je profeta Balaam müd je' ylocihuinma'ñ.

¹⁷ Com jada jäy ajcxy ca' panicxcixy je janchyp'i tiy'ajt, paady ycixp jadu'n ajcxy nipaady nej tüg ñipozojut ca'pi ññi müdity, etz jadu'n ajcxy nipaady nej joc huidibi poj yajyöyip (ca' ytu'y). Dios möhuñib ajcxy tzaachyp'i müd ypocy ycixpi, idam ajcxy agootztuuyb huinixñi huinitiempo. ¹⁸ Com ycapxyp ajcxy ayuc huidibi ca' choubaad. E müd je jibic-huinma'ñ ycixpi huidibi ajcxy chachnijot'ajtpy yajtundigooygixy pinjaty tiibi choongixy ma je huidibi ajcxy tzinaayb müd jibic-huinma'ñ. ¹⁹ Yi' ajcxy yaj'ixpijcp je mayjäy co jëbi tungixy huentim ti huidibi ajcxy ñijot'ajtpy. Per yi' ajcxy huidib jibic-huinma'ñ yaj'ixpijcp, ci'm ajcxy ñay'ijtigixy pocy pa'tcipy, je pocy tzach'ane'mb ajcxy yjot yhuinma'ñ, ixti jadu'n nipaady nej jihuiy ajcxy ane'my y'ity. ²⁰ Pinjaty ti

ymibijccixy ti ñejhuuigixy je Huindzin Jesucristo ytiy'ajt huídibi yajnídzooc ajcxy y'alma, e jadu'n ti yjihuáccixy ma je naaxhuíñyá yjibictzinaayin yjibicjugy'ajtin, pen jadüg'oc anajty y'ayöyiyñip ma je jibicpi, e je jibicpi ymámadágyii ajcxy, o'ctiy anajty nigi yhuí'ngixy ca'ydí nej je jayijp'atypi. ²¹ Nigi oy co ixypiy je' ajcxy ca' ytimnejhuuigixy je janchypí tiy'ajt. Com ti ocnejhuiigixyp, e chi jada' y'ixtigíhuáccixy ma je huátzpi Dios y'cötuyin huátzpi Dios ytiy'ajt tibi anajty y'ocjamóoyigixy. ²² Per je' yí' ajcxy ytimcuydumy nej je ayuc y'ity: "Je uc yci'm'ich ñihuimbijtpy, e je idzim huídibi namdziidaayb, nicxy je' yajtnip yquitníp mo'ntzjoty jadüg'oc."

3

Je Huindzin Jesús huimbidaamb ya naaxhuíñ

¹ Miich ajcxy migügtijc huídibi ich ooy ndzocyich ooy njihuíyich, jada je' je mímetspi necy huídibi ajcxy nyajnijayiyb. Ma jada metzpi necy hue' ich ndzogañich co nyajhuinmañymedzip ajcxy ma Dios ytiy'ajt müid jada capxhuijin huídibi ti njaayich. ² Ti nnijayiygixy jigix m'ajihuíhuíyb ajcxy je ayuc huídibi ajcxy pa'tcipy'aty ñajtzcapxiy je Dios y'ayucnajtzcaxxiybi ajcxy huídibi huádz yhuinmañ anajty ymüd. Nañ ajihuíyigix je Huindzin Jesucristo je' y'ane'min huídibi yajnídzooc ajt n'alma, je ane'min huídibi apóstoltijc miich ajcxy xyajniimaayb.

³ Nejhuiigixy miich ajcxy jada jayijp ma yam ca'ni yhuaad'ajtni mina naaxhuíñ y'ixip, miinip jáy ajcxy huídibi nixigip yajxigip huídibi Dios yjé'ajtpy. Chínaaygixy yjugy'ajtcixy anajty müid jibic-huinmañ huídibi ci'm ñijot'ajtcixyp. ⁴ Chi ajcxy ymina'nip: "¿Ti co mdzachmibijccixy co Cristo yhuimbidañ jadüg'oc ya naaxhuíñ? Nej ajcxy je' y'o'ctay je mij'ap je mijteedy, je'ni y'ijttáy tüg'óciy jadu'n nej naaxhuíñybi chondacy. Paady ca' yjanchity co je Cristo yhuimbidañ jadüg'oc ya naaxhuíñ," jadu'n ymánaangixy. ⁵ Yí' ajcxy ca' huinjihuíhuaangixy cuendtunaangixy co müid Dios y'ayuc yí' tzajp jí'ajtp anajty yí' tzachjeyip, e müid Dios y'ane'min huin'it je naax oy yguéxigiy huídibi ijtp anajty ñijoty. ⁶ Nañ jadu'n müid Dios y'ayuc je jecy'ajtpy naaxhuíñyá y'ayo'nbaty, ñijicxatay nidüg'óciy e ytigoyday ñijoty. ⁷ Per Dios müid yí' y'ayuc yaj'ijtpy jada naaxhuíñybi etz tzajp huídibi cham jí'ajtp ixti coon yajtigoydáhuip müid jin. Je jin huin'it je' noctáhuañ co anajty yhuaad'ajtni ma Dios tiydunañ je camadacpidijc je jibicjäydijc, etz yajtigoyañ ajcxy y'alma.

⁸ Jadügnax miich ajcxy migügtijc huídibi ooy ndzocy njihuíyich, ca' mjáydigooygixy co ma yí' Huindzin Dios, tüg xii jadu'n yí' nej tüg mil jimijt, e tüg mil jimijt jadu'n yí' nej tüg xii. ⁹ Ca' nmínaaním co yí' Dios ya-jhuácxibaamyñi yí' mina cuydunañ huídibi yí' ti ahuaníy, jadu'n nej nijéjity jáy a'ixiigixy. Dios yajtumy mecxtujcin müid miich ajcxy, com hue' yí' tzocy co ni tüg jáy ayo'n paadipy. Yí' chojcpy co nidüg'óciy jáy huen jothuimbijtcixy etz ixmajtzcixy pocytuni.

¹⁰ Co anajty je Huindzin Jesús ymiñ jadüg'oc ya naaxhuíñybi chaachytunipy je' tüg'óciy jibicjäydijc, hue' je' ytuníyb yjadíyb ma anajty ca' pín jijp'ixy, jadu'n nej tüg meetzpi ymiñ coodz co meedzañ tijaty. Huin'it je tzajp yhuindgoydáhuip müid tüg ne'min jidijtin oychiyñip. E tüg'óciy huídibi müid ndzinaayim njugy'ajtim toydáhuip yí' müid jin, yí' naax toydáhuip yí', etz tijaty yajpatp ya naaxhuíñ toydáhuip nañ jadu'n.

11 Com tũg'óciy tijaty huídibi ji'ajtp yhuindigoydáhua'n̄ m̄id j̄in, paady ycixpi n̄gi copicy miich ajcxy co mdzinaaygixp tudágy e myajmij'ajtcixyp Dios. 12 Ahuixcix ajcxy je x̄ii tzuu m̄ina Dios anajty yajhuaad'aty co yajhuindigoya'n̄ je naaxhuĩñybi. Naymic'lj̄xigix co tzojç yminiipy yi jadu'mbi x̄ii tzuu. Co yhuaad'ajtnip huin'it x̄ii, je tzajp yhuindigoydáhuip m̄id j̄in; je x̄ii po', je pojç xemembi, je tuu enee jadu'ñyi yticxtáhuipy yjyidáhuipy j̄in̄joty. 13 Per ñch ajt n'ahuixim je jemybi tzajp jemybi naax huídibi Dios ti xyaj'ahuan̄iyim, tũg tziinaaydac janch'oybi ma ca' ti jibicpi.

14 Paady ycixp miich ajcxy migũgtjç huídibi ñch ooy ndzocyich njihuĩyich, nam̄i m'ahuijxyp miich ajcxy co Dios yajhuindigoyaanip jada naaxhuĩñ, naymic'lj̄xigix ma tũg'óciy ajcxy yi mdzinaayin co mguydunipy ajcxy Dios ytiy'ajt jigix ajcxy Dios xypaadipy, ca' ajcxy ti tzip ti gapxy, ni ti jibicpi, e ni ti pocy, ac huádz jot huádz huinma'n̄ anajty m̄id'ajtcixy. 15 Cuenditungix je mecxtujcin huídibi ñch ajt nHuindzin Jesucristo yajtumyb m̄id ñch ajt jigix j̄ebi xyajnidzoocim ajt n'alma. Nañ jadu'n yi', ñch ajt nmigũg Pablo huídibi ooy ndzojçim, ti miich ajcxy xyñijaȳiygixy, jadu'n nej ixpijcin Dios ti ym̄oyii ma yi' y'ayuc. 16 Ma tũg'óciy Pablo ñecy tiibi xyajniguejxcixy, jada tiy'ajt ti xyajm̄idm̄iydaaccixy. Nij̄jity Pablo ñecy ooy chachchiphuinjihuĩyñity, e nij̄jity j̄ay ajcxy tigach ajcxy huinjihuĩy Pablo y'ayuc, ca' ajcxy huinjihuĩy nej Pablo yjam̄ina'na'n̄. Huingjaty ajcxy ñiguej Pablo y'ayuc, e ci'm̄ ñayyajhuinma'ñydidigóoyigixy.

17 Paady ycixp miich ajcxy migũgtjç huídibi ooy ndzocy njihuĩyich, miich mnejhuĩydaaygix jada tiy'ajt. Nayguend'ajtigix ca'ydi jibicj̄aydjç m̄id y'an̄i xyajnidigajtcixy xyajt̄udigajtcixy, e ca'ydi m'ixtigihuāaccixy ma ajcxy mm̄ibijcin jadu'n nej tiydudágy ti mm̄ibijccixy. 18 Huen ñch ajt nHuindzin Jesucristo huídibi yajnidzoocp ajt n'alma n̄gi may'ajt oy'ajt tunipy m̄id miich ajcxy, e nañ n̄gi yujcpedipy ajcxy yi m'ixpijcin ma yi' ytiy'ajt. Huen Jesucristo cōmay y'idipy etz m̄'idipy oy'ajtin mij'ajtin jadachambi x̄ii tiempo etz jadu'n nej x̄ii tiempo miimb cidacp. Jadu'n ngapxyçixyich. Amén.

1 SAN JUAN

Yi Jayijpi Necy Huidibi San Juan Yajniguejxy Je Mibijcpidijc Nidüg'óciy

¹ Dios y'ayuc jiiyim anajty co naaxhuiñybi chondacy. E tiy'ajt nyejcy pich jadu'n nej nmidooyich ci'm yi' y'ayuc, jadu'n nej n'ixyich m'id ngi'mhuiñich, jadu'n nej nhuindiiçxyich yi' ci'm, e nañ jadu'n nej nnidoñich m'id ngi'mgñijich. Nyajnijayiiybich miich ajcxy jada necy jadu'n nej je Cristo je Dios y'ung yjygy'ajtin yegañ huidibi ca' cixañ tigoayañ niminaabi. ² Ti ñayguëxigyii ya naaxhuiñ je Dios y'ung huidibi ym'id jugy'ajtin huidibi ca' niminaabi ycixipy ytigoyipy. Ti n'ixyich ajcxy jigix jëbi tiy'ajt nyéjccixyich co ti ñayguëxigyii ya naaxhuiñ, etz ti n'ixyich jigix jëbi nyajnimaaigyxy nej jëbi huaad huingbi jugy'ajtin nbaatim co anajty ti n'o'cim. Je Dios y'ung, je huidibi jiiyby ijtp ma Dios Teedy, nayguëxici je' ma iich ajcxy. ³ Je huidibi iich ajcxy n'ixyich nmidohuich, cham miich ajcxy nyajnimaaigyxy jigix jëbi ajt tú'ciy n'ijtim ma Dios ytiy'ajt, etz nañ jigix jëbi tú'ciy ajt n'ojadajtim Dios etz je' y'ung. ⁴ Paady ycixp jada tiy'ajt nyajnijäyiy ajcxy jigix ajcxy jotcuç'ajtin mbattäaygixipy m'id jada ayuc tiy'ajt.

Dios yi' je' je tücxin jájin

⁵ Jadayaabi Dios y'ayuc ytiy'ajt Jesucristo ti xyajnimäyich e nañ cham iich miich ajcxy nyajnimaaigyxy. Dios huädz ytiy'ajt m'idity, ca' ma Dios anidägy. Jadu'n Dios nipaady nej tüg jün ytiçxy ma tüg it e ni ca' ni mina ypiç. ⁶ Co nminaanim co Dios ajt m'id n'ijtim tú'ciy, e ca' yjanchity, ca' anajty ajt Dios ytiy'ajt nyajtuunim, jadu'n nipaady nej jihuüy ndzinaayim agootztuum. Nigoo n'indaacim, ca' anajty ajt nguyduunim Dios ytiy'ajt. ⁷ Co nguyduunim Dios ytiy'ajt jadu'n nej yi' ytiy'ajt m'idity, jadu'n nipaty nej jihuüy ndzinaayim ma jün ytiçxy. Huiñit jëbi ajt n'ijtim tú'ciy miñ xyipy, e Dios xyajpocynihuaatztaayim co Jesucristo y'o'cy etz ñi'py teemy gujy m'id iich ajt nbocy ycixpi.

⁸ Co ixypy nminaanim co ca' nbocytuunim, nigoob nayhuin'iinim ci'm, e ca' jadu'n Dios ytiy'ajt yajpaady ma iich ajt njot nhuinmañ. ⁹ Pen ngapxy pidzimim ajt nbocy ma Dios, yi' ñidinaayb yi' y'ayuc huidibi ti xyajnimaaayim co ymexxam ajt nbocy, e nañ tudägy ytuñ m'id iich ajt ycixpi. Dios xyhuinmeeçxim ajt nbocy etz xyajhuaatzim njot nhuinmañ jëbi n'ixmajtzim jibic-huinmañ. ¹⁰ Co ajt nminaanim co ca' nbocytuunim, hue' anajty Dios nyajnajxim anii, e ca' anajty ti ngöbijcim cixyot huinijot yi' ytiy'ajt.

2

Cristo, iich ajt nhuingapxi ma Dios

¹ Miich ajcxy migügtijc huidibi ooy ndzocy njihuüyich jadu'n nej ixypy ngi'm'ungich ngi'm'anäcich, cham jada tiy'ajt nyajnijayiiygixy, jigix ca' ajcxy mdundigóoygixipy. Pen ji nidügti miich ajcxy huidibi tundigooyb, jada migüg huidibi tundigooyb huen mibijctzoy Dios ma Jesucristo yxi m'id ypocy ycixpi. Jesucristo yi'je' huingapxi ma Dios Teedy m'id ajt nbocy ycixpi. Tudägy je', e jëbi xyhuingapxim ma Dios Teedy. ² Com Jesucristo ti y'ögy m'id iich ajt nbocy

ycixpi, paady ycixp jëbi capx'oyiÿ ma Dios müd ïch ajt ycixpi e xycapx'oyiÿim ïch ajt nbocy etz nañ capx'oyiÿip tüg'óciy naaxhuiñy jáy ajcxy ypocy, yi jáy ajcxy pinjaty yi' y'ayuc ytiy'ajt mijpidaacip.

³ Co Jesucristo ytiy'ajt nguyduunim yajxon, huin'it nejhuiÿim tiydudägy jadu'n nej Dios may'ajt oy'ajt ti tuñ müd ïch ajt ycixpi. ⁴ Co ixypiy pinjaty ymina'ñ co ñejhuiÿi Jesucristo ytiy'ajt e ca' cuychinaayi yi' ytiy'ajt hue' yi' tzach anüdaacpi, e ca' müdity Dios ytiy'ajt. ⁵ Yi jáy ajcxy pinjaty cuychinaayb cuyjugy'ajtp yajxon Jesucristo y'ayuc ytiy'ajt, janch tiydudägy anajty yajmij'aty Dios. Co nguychinaayim nguyjugy'ajtim yajxon Jesucristo ytiy'ajt, huin'it jëbi nejhuiÿim co nyajmij'ajtim Dios. ⁶ Yi jáy ajcxy pinjaty minamb co ymüid Jesucristo y'ayuc ytiy'ajt ma je' y'ay yjot, copicy ajcxy chinaaygixyipy jugy'ajtcixipy tim jadu'n nej Jesucristo chinay jugy'ajty.

Je jemybi ane'min

⁷ Miich ajcxy migügtjic huidibi ooy ndzocy njihuiÿich, ca' nmïnaanim jemybi tiy'ajt ajcxy nyajnimähuamy ma jada necy. Je' jada je tiy'ajt huidibi jecy'ajty ti mnejhuiÿigixy co oga'n ajcxy mmijpidacy Jesucristo. Jada tiy'ajt jecy'ip jada je' huidibi cham ajcxy mmidooyb jadüg'oc. ⁸ Nañ jemy jada tiy'ajt nañ jadu'n huidibi nyajnimaaaygixyp ma jada necy. Jada je'je tiy'ajt huidibi Jesucristo ymüid ma yjot yhuinma'ñ etz nañ ïch ajt nmüid ma ajt njot nhuinma'ñ. Yi jecy'ip ayuc huidibi ca' ytiy'ajty, ti yi' ñaxy e cham Dios ytiy'ajt tiydudägy nyajtuunim, jadu'n nej jihuiÿi je coodzpi ti ñaxy e cham ti yximÿy.

⁹ Yi jáy ajcxy huidibi minam co Dios y'ayuc ytiy'ajt ajcxy cuyduuni e ca' ixáangixy ymigügtjic, ca' yi' ajcxy tiydudägy Dios y'ayuc yajtuuni, jadu'n yhuimbizimy jadu'n nej jihuiÿi agootztuuy ijtcixy. ¹⁰ Yi jáy ajcxy pinjaty tzojcp jihuiÿyb ymigügtjic hue' yi' yajpaatcixy müd Dios ytiy'ajt ma ajcxy yjot yhuinma'ñ, jadu'n nipaady nej jihuiÿi y'ijtcixy ma xii ytiÿcxy, ca' ajcxy ñidigoy ytüdigoy ma Dios ytiy'ajt. ¹¹ Yi jáy ajcxy pinjaty ca' ymigüg ixaangixy, ca' yi' ajcxy Dios ytiy'ajt ajcxy yajtuuni, jadu'n nipaady nej jihuiÿi agootztuuby y'ijtcixy, ca' ajcxy chinaaygixy nej Dios ytiy'ajt yja'ané'migixy, ca' ajcxy nejhuiÿigixy huidibi tiy'ajt jëbi yajtungixy, com jibic-huinma'ñ chachtuumyb ajcxy huidibi ca' Dios tiy'ajt'adyii.

¹² Miich ajcxy migügtjic huidibi ooy ndzocy njihuiÿich ajcxy jadu'n nej ixypiy ngi'm'ung ngi'm'anäcïch, com Dios ti miich ajcxy mbocy xy-huinmexctayi co Jesucristo y'o'cy müd ajcxy mbocy ycixpi, paady ycixp cham nnijayÿygixy. ¹³ Cham nnijayÿygixy miich ajcxy mij'anäctjic, com ti mmijpidaaccixy Jesucristo huidibi jii'ajt co naaxhuiñybi oga'n choondacy etz chambaad yjii'atyñi. Cham nnijayÿygixy miich ajcxy anäctjic, com ti mmimadaaccixy je ca'oybi.

Cham nnijayÿygixy miich ajcxy pi'ctjic mutztjic com ti mmijpidaaccixy Dios Teedy. ¹⁴ Cham nnijayÿygixy miich ajcxy mij'anäctjic, com ti mmijpidaaccixy ajcxy Jesucristo huidibi jii'ajt co naaxhuiñybi oga'n chondacy etz yjii'atyñi chambaad. Cham nnijayÿygixy miich ajcxy anäctjic, com mic mjot mhuinma'ñ müdity ajcxy etz Dios ytiy'ajt yajpatp ma ajcxy mjot mhuinma'ñ, paady ycixp ajcxy ti mmimadaaccixy yi' ca'oybi.

¹⁵ Migügtjic, ca' anaxy m'adzójccixip yi' huidibi müd ndzinaayim ya naax-huiñ. Yi jáy ajcxy huidibi adzojtaayb anaxy yi' huidi müd ndzinaayim, ca' ajcxy Dios Teedy yajmij'ajtcixy. ¹⁶ Ca' anaxy m'adzójctähuiy ajcxy tüg'óciy huidijaty ya naaxhuiñ yajpatp, jadu'n nej njot nhuinma'ñ tzojcm, jadu'n nej tijaty n'ijxim, jadu'n nej huidibi amij agix müd ndzachnayjihuiÿim. Com

yi jadu'mbi huinma'n ca' yajpaady ma Dios Teedy, hue' yi' yajpaady ya naaxhuiñ. ¹⁷ Huidijaty ya naaxhuiñ yajpatp cixipy tigoyipy yi', nañ jadu'n ytigoya'n huidijaty yi huinma'n y'adzocpy. Yi jāy ajcxy pinjaty Dios ytiy'ajt yajtuunip jadu'n nej Dios tzocy, jugy'adipy ajcxy e co y'ó'ccixipy, ca' ajcxy y'alma ytigóoygixipy.

Je tiy'ajt etz je anü

¹⁸ Miich ajcxy migügtjic huidibi ooy ndzocy njihuüyich nej ixypy ngi'm'ung ngi'm'anäcich, tim cijxnip tiempo ya naaxhuiñ. Ti jada mnejhuüyigixy co miinaam jāy ajcxy huidibi nayyajnaxaanip nej Cristo' e ca' yjanchity. Miid co cham ji mayjāy ajcxy huidibi nayyajnajxip jadu'n nej Cristo, paady nejhuüyim co tim cijxnip yi tiempo miid ich naaxhuiñyāy ajt ycixpi. ¹⁹ Yi jāy ajcxy huidibi nayyajnaxaanip jadu'n ixypy nej Cristo, naybijc-huäcxaanip yi' ajcxy miid ich ajt, ca' anajty ajcxy ytügüy yi' ajcxy yhuinma'n miid ich ajt nhuinma'n, tügmucy ixypy ajt xymid'ijtim. Ji jadu'n ñiguëxigy co ca' ytügüy yhuinma'n miid ich ajt nhuinma'n co ti ajcxy xypuhuäctuutim.

²⁰ Ti miich ajcxy xy'adigüy xyjottigüy Dios yjihui'n ymic'ajt, paady miich ajcxy mhuinjihuüy tüg'óciy Dios y'ayuc ytiy'ajt. ²¹ Ca' nminaanim paady miich ajcxy nijayüygixy co ca' mhuinjihuüyigixy Dios ytiy'ajt. Paady nnijayüygixy miich ajcxy jigix mnejhuüyigixyip Dios ytiy'ajt etz mnejhuüyigixyip co yi jāy ajcxy huidibi indaacp, ca' yi' ajcxy Dios ytiy'ajt müidity.

²² Yi' je' indacp huidibi minamb co Jesús ca' yi' yjējity je Cristo huidibi Dios yquejx. Yi indacpi je'midzip'ajtp Jesucristo etz ca' mibicy Dios Teedy etz nañ ca' mibijci Dios y'ung. ²³ Je jāy ajcxy huidibi indacp minam co Jesús ca' yjējity je Cristo, e nañ ca' ajcxy müidity Dios Teedy ytiy'ajt. Yi jāy ajcxy huidibi minam co Jesús yjējity je Cristo je Dios y'ung, nañ ymiid ajcxy Dios Teedy ytiy'ajt.

²⁴ Je ayuc tiy'ajt huidibi miich ajcxy mmidou co oga'n ajcxy mmijpidacy Jesucristo, jada ayuc tiy'ajt mguydüngixyipy e ca' mjäydgóoygixipy. Pen mmi'ijtcixp yi ayuc huidibi Dios yjāy oga'n ajcxy xyaj'ixpijc, huin'it jēbi miich ajcxy myajpatcixy ma Dios y'ung etz je' yajpaady ma Dios Teedy. ²⁵ Dios ti xyajhuinhuanüyim co xyajtzināhuaanim ajt n'alma huinixii huin'tiempo.

²⁶ Jada tiy'ajt ajcxy nyajnijayüyb jigix ca' mmijpidäaccixipy yi' ajcxy y'ayuc huidibi xyajhuinma'ñydgoyaaam ajcxy. ²⁷ Yi Dios yjihui'n ymic'ajt huidibi ti xy'adigüygixy ti xyjottigüygixy ijttüb yi' ma miich ajcxy mjot mhuinma'n. Paady ycixp ca' myajmayajtcixy pin xyaj'ixpigip ajcxy com je Espíritu Santo xyaj'ixpigip ajcxy. Je Espíritu Santo xyajni'ixiydaayb ajcxy tüg'óciy Dios ytiy'ajt, tiyudägy yi', ca' yi' y'aniijity. E jadu'n nej je' xyajni'ixiüygixy, jadu'n mguydünyipy ajcxy. Mi'ijtcix Dios yjihui'n ymic'ajt ma mjot mhuinma'n ajcxy.

²⁸ Miich ajcxy migügtjic, mi'idipy ajcxy Jesucristo ytiy'ajt ma mjot mhuinma'n jigix co ñayyajniguëxigüyb Jesucristo ya naaxhuiñ jadüg'oc, huin'it jotcujc ajt nnayjihüüyim etz ni ca' jbic nayjihüüyim co anajty xyñimiinim. ²⁹ Ti mnejhuüyigixy co yi' Jesucristo tiyudägy ytuñ, e ti mnejhuüyigixy nañ jadu'n co tüg'óciy yi jāy huidibi tiyudägy tumb, yi' je' ajcxy Dios y'ung'ajtip.

3

Dios ich ajt xy'ung'ajtim

¹ Jihui'ñybijccix tüg'óciy je mijpi may'ajt Dios Teedy ti tuñ miid ich'ajt ycixpi jigix jēbi naydijam Dios y'ung. Yi naaxhuiñyāy ajcxy huidibi ca'

mijpidaaccixy Jesucristo ca' ajcxy nejhuuigixy huijnihuigixy Jesucristo ytiy'ajt, paady ycixp ca' ajcxy nejhuuigixy huijnihuigixy co Dios xy'ung'ajtim. ² Miich ajcxy migügtijc huidibi ooy ndzocy njihuigixy, jadachambi Dios ich ajt xy'ung'ajtim. Jadachambi ca'p y'ocniguëxigiyüni nej ich ajt jini n'idaanim. Co anajty Jesucristo ymiin jadüg'oc ya naaxhuin, hui'nit nguipxyatatyim mid je', com n'ixaanim ajt Jesucristo jadu'n nej je' yajpaady. ³ Tüg'ócüy jäy ajcxy huidibi jip'ixp co Jesucristo ymiina'n jadüg'oc ya naaxhuin, copicy yajhuädzipy ajcxy yjot yhuinma'n. Huen mi'ijtcixy oyjot oyhuinma'n jadu'n nej Jesucristo mi'ity oyjot oyhuinma'n.

⁴ Tüg'ócüy jäy ajcxy huidibi pocytumb, hue' ajcxy ymidundigooyb Dios ycotujcin. Co ajcxy ytundigoy, ca' ajcxy ymadägy nej cuydunipy Dios ycotujcin. ⁵ E mnejhuuyb miich ajcxy co yi Jesucristo ti ñayguëxigiyi ya naaxhuin jigix jëbi xyajpocyñihuaatzim. Jesucristo ca' anajty ti pocy müdity, ca' anajty ma ti ytundigoy. ⁶ Tüg'ócüy jäy ajcxy huidibi cuydundahuam Jesucristo ytiy'ajt, ca' huaad pocytuñ. Yi jäy ajcxy huidijaty pocytundib, ca'ni icy ajcxy yi Jesucristo, nañ ca'ni ajcxy huijnihuigixy yi ytiy'ajt. ⁷ Miich ajcxy migügtijc huidibi ooy ndzocy njihuigixy jadu'n nej ngi'm'ung ngi'm'anäcixh, ix ni pin xycahuin'ngix. Yi jäy ajcxy huidibi oyjot oyhuinma'n yajtumb, tiydudägy yi' ajcxy chinäy yjugy'ajty, tim jadu'n nej Jesucristo tiydudägy chynad yjugy'ajty. ⁸ Yi jäy ajcxy huidibi tzachpocytundibni, yi' ajcxy mujcu' yjäy'ajtip. Com jadu'n nej chondacy je naaxhuin'byi oga'n yi mujcu' jëni anajty jadu'n chachpocytuñ. Paady ycixp Dios quejxy y'ung ya naaxhuin co je mujcu' yhuinma'n yajcödigoayaani.

⁹ Yi jäy huidibi Dios ajcxy ti ymöyü jemybi jot jemybi huiinma'n, ca' ajcxy ypocytundiy com je'co tü'ciy ajcxy yjot yhuinma'n müdity, jadu'n nej anajty Jesucristo yjot yhuinma'n müdity, ca' huaad ajcxy ypocytundiy com Dios ti ymöyü ajcxy jemybi jot jemybi huiinma'n. ¹⁰ Paady ycixp yñiguëxigy yi jäy ajcxy pinjaty Dios y'ung'ajtip etz pinjaty mujcu' ung'ajtip. Yi huidibi ajcxy ca' tiydudägy cuydungixy Dios ytiy'ajt etz ca' ajcxy ixa'n ymigügtijc, etz ca' ajcxy tzocy jihuy ymigügtijc, hue' ca' ajcxy Dios ymöyü jemybi jot jemybi huiinma'n, mujcu' ajcxy y'ung'ajtip.

Naychojcin nayjihuyim miñ xyipy

¹¹ Jada je' je ayuc tiy'ajt huidibi miich ajcxy ti mmidoogixy co oga'n ajcxy mmijpidacy Jesucristo co copicy naychojcin nayjihuyim nidüg nidüg. ¹² Ca' huaad jadu'n n'idätzim nej Cañ y'idich co anajty mujcu' huiinma'n müdity, chi y'uch yaj'o'cy. ¿Nej co y'uch yaj'o'cy? Je' co anajty je' jibic-huinma'n yajtuñ, e je' y'uch oyhuinma'n anajty yajtumyb paady ycixp je y'uch yaj'o'cy.

¹³ Miich ajcxy migügtijc, ca' ooy mdzachhuinmaay ajcxy co ca' yi naaxhuinjäy ajcxy xy'ixa'n, huidibi ajcxy ca' Dios y'ayuc mijpidaaci. ¹⁴ Com ich ajt nnejhuuyim co je nmigügtijc ajcxy ndzojcin njihuuyim co n'ocim, hui'nit njugypigaanim e ndzinahaanim jüby tzajpjoty huiinixi huiinätiepmo. Yi jäy ajcxy pinjaty ca' ymigügtijc ixa'n ajcxy co ajcxy y'ögipy, hui'nit ca' ajcxy chinähua'n jüby tzajpjoty. ¹⁵ Huenpinjäyity huidibi ca' ymigüg ixa'n, nipatpy nej ytundigoy jadu'n nej jäy'aj'ocpi ytundigoy e nañ jadu'n nejhuuyim, co je y'ögipy, ca' chinähua'n jüby tzajpjoty. ¹⁶ Ya icyipy jëbi ich ajt iixpejt nbijcin nej huaad migügtijc ndzojcin njihuuyim, jadu'n nej Jesucristo iixpejt yejcy co ñayyojxi ñaydooci co y'o'cy müd ich ajt nbocy ycixpi. Paady ycixp ich ajt jëbi huaad ndzojcin njihuuyim nmigügtijc, oy jada ndimco'öguyim. ¹⁷ Janch pinjaty yjamid ymadaacin, e yja'ixp co ymigüg tigati yajmayjaty,

e amij agix ñayjihuiyii, ca' pa'ayo'n müidity, ca' pubeda'n ymigüg, ca' je' anajty tzocy jihuiy ymigüg jadu'n nej Dios chogyii yjihuiyii. ¹⁸ Miich ajcxy migügtijc huidibi ooy ndzocy njihuiyich jadu'n nej ixypiy ngi'm'ungich, müid oyyä'yajtin etz müid Dios ytiy'ajt tzoc yajxon naychojcim nayjihuiyim miñ xyipy. Ca' nmīnaanim nigoo ngapxim nmīydaacim ahuac aguuy.

Cixyjt huinjot naybidaacim ma Dios

¹⁹ Co nyajtuunim oyyä'yajtin müid ich ajt nmigügtijc, huin'it nejhuiyim co Dios ytiy'ajt nguyduunim e jotcuje nayjihuiyim co Dios n'ojadajtim. ²⁰ Co jibic njot nhuinma'n ajt njihuiyim, müid co ca' oyyä'yajtin nduunim, jac nigī Dios jibic ñayjihuiyii com yi' jacmijhuinma'n müid, ca'ydi ich ajt, e yi' nejhuiydaayb tüg'óciy tijaty ajt nduunim. ²¹ Miich ajcxy migügtijc huidibi ooy ndzocy njihuiyich, co ca' ti jibicpi njihuiyim ma ajt njot nhuinma'n müid co oybi nduunim, huin'it jotcuje ajt n'ijtim müid Dios. ²² E huentimtiijity huidibi ich ajt Dios nyajmibijctzoohuim, yi' xymooyim müid co yi' y'ayuc nguyduunim, e nduunim je huidibi yi' yjāygidacpy. ²³ Dios jada ti xyajnajtz'ane'miym co tzoc mibijcim mijpidaacim yi' y'ung Jesús etz tzoc naychojcim nayjihuiyim miñ xyipy, jadu'n yi' ti xyajnajtz'ane'miym. ²⁴ Yi jāy ajcxy pinjaty cuydumb Dios ytiy'ajt, yajpatp ajcxy ma Jesucristo e nañ Jesucristo yajpatp ma je' ajcxy. Nejhuiyim co Jesucristo ytiy'ajt yajpaady ma ich ajt müid co je Dios yjihui'n ymic'ajt ti xy'adigiym xyjottigiym.

4

Dios yjihui'n ymic'ajt etz je ca'oybi yjihui'n

¹ Miich ajcxy migügtijc huidibi ooy ndzocy njihuiyich, ca' ajcxy mmibijctahuipy tüg'óciy jāy huidibi Dios y'ayuc capxhuäcxip. Mido'mbijccixy jayjip peni janch ajcxy müidity Dios yjihui'n ymic'ajt. Com ji mayjäy ya naaxhuiñ huidibi minam co Dios y'ayuccapxhuäcxi yi' ajcxy e ca' yjanchity. ² Jada je' je tiy'ajt ma huaad mjihui'ñybijccixy pen janch müidity ajcxy Dios yjihui'n ymic'ajt, yi' ajcxy huidibi Dios y'ayuccapxhuäcxi: tüg'óciy jāy huidibi capxhuäcxp co Jesucristo yma'xung'ajty ya naaxhuiñ müid ñinīcx, Dios yi' ytiy'ajt ymüid. ³ E tüg'óciy jāy ajcxy huidibi ca' ñigapxpety ajcxy co Jesucristo chinäy ya naaxhuiñ müid ñinīcx, ca' yi' Dios ytiy'ajt müidity. Ti miich ajcxy ayuc midoogixy oga'n co miinaam yi' naaxhuiñyjäy ajcxy müid je mujcu' yjihui'n ymic'ajt, huidibi midzip'ajtp Jesucristo. E ti je'du'n ajcxy ymiingixy. Jada je'du'n ajcxy huidibi ca' nigapxpejtcixy co Jesucristo yma'xung'ajty ya naaxhuiñ müid ñinīcx.

⁴ Migügtijc huidibi Dios yjihui'n ymic'ajt ti xy'adigiygixy ti xyjottigiygixy, e ti miich ajcxy mmimadaaccixy yi' huidibi ajcxy nigapxpejtp co Jesucristo ca' ma'xung'ajty ya naaxhuiñ müid ñinīcx. Com Dios huidibi miich ajcxy xy'ane'mb, jac mī yi' ca'ydi je mujcu', paady miich ajcxy ti mmimadaaccixy je mujcu'. ⁵ Je huiidi ajcxy jadu'n jamīnaamb co Dios y'ayuc capxhuäcxi e ca' yjanchity ya naaxhuiñ ajcxy tiy'ajt ti patcixy ma je mujcu', paady ycixp yi' naaxhuiñ yhuujy'ajtin ajcxy tzachcapxhuäcxi, e yi' naaxhuiñyjäy tzachmijpidaaccixy etz amidoo'ijti ajcxy y'ayuc. ⁶ Ich ajt tiy'ajt ti nbaatim ma Dios. Tüg'óciy jāy ajcxy huidibi Dios ytiy'ajt huinjihuiyip, y'amidoo'ijtyp ajcxy ich ajt n'ayuc. Yi jāy ajcxy huidibi ca' Dios ytiy'ajt müidity, ca' ajcxy amidoo'ijtcixy ich ajt n'ayuc, paady ycixp n'ijxcapim je jāy ajcxy huidibi tudägyip, etz je jāy ajcxy huidibi nigoo tzach'anīdaacp.

Dios ooy xychojcim xyjihuiyim

7 Miich ajcxy migügtijc huidibi ooy ndzocy njihuüyich, tzoc oy yajxon naychojcim nayjihuiüyim miñ xyipy. Dios ti yecy ymic'ajt ma ajt njot nhuinma'n jigix jëbi ajt naychojcim nayjihuiüyim miñ xyipy. Tüg'óciy jäy huidibi ymigügtijc chojccixyp yjihuiüyixyp, ti Dios yjihui'n y'adigüyigixy yjottigüyigixy etz ñejhuiüyip yhuinjihuüyip ajcxy Dios y'ayuc ytiy'ajt. ⁸ Pinjaty ca' ymigüg tzocy jihuiy, ca' yi' nejhuiüyi huinjihuüyi Dios ytiy'ajt, com Dios tüg'óciy yi' tzojctäy. ⁹ Jada je'je tiy'ajt co Dios ajt xychojtaayim co je y'ung huidibi tügpajcpi ymiid, quejxy ya naaxhuiñ jigix ñich ajt nbaatim Dios yjihui'n ymic'ajt miid yi' ycixpi. E Dios yjihui'n ymic'ajt ca' ycixa'n ytigoya'n nimina, paady ñich ajt njugy'ajtin ca' ycixa'n ytigoya'n. ¹⁰ Dios ti xychojcim ti xyjihuiüyim, paady quejxy y'ung ya naaxhuiñ jigix jëbi xycodinaayim ma yi' Dios ycötujctac miid ñich ajt nbocy ycixpi. Ca' nminaanim miid co Dios ti ndzachmijpidaacim ooy mijcajee, hue' janchtiy yi' ninigoob may'ajt tuñ miid ñich ajt ycixpi.

¹¹ Miich ajcxy migügtijc huidibi ooy ndzocy njihuüyich, miid co Dios jadu'n ajt ti xychojcim ti xyjihuiüyim mijcajee oga'n, paady ycixp tzoc ñich ajt naychojcim nayjihuiüyim miñ xyipy. ¹² Ni minaabi pin ca' ixyni Dios. Co naychojcim nayjihuiüyim miñ xyipy, huin'it Dios yjihui'n ymic'ajt jittiy ma ñich ajt njot nhuinma'n. Jadu'n Dios yjihui'n ymic'ajt xypubejtım xypudigüyim, jëbi nigi naychojcim nayjihuiüyim nidüg nidüg jadu'n nej Dios jäygidägy. ¹³ Nejhuiüyim ñich ajt co nyajpatim ma Dios, e nañ jadu'n Dios yajpaady ma ñich ajt, miid co yi' yjihui'n ymic'ajt ti xy'adigüyim ti xyjottigüyim. ¹⁴ E ñich ajcxy, ti ñich ajcxy yi' Jesucristo n'ixyich, paady ñich ajcxy nidiy'ajt'ajtyich co je Dios Teedy quejxy y'ung ya naaxhuiñ co yajnıdzöga'n tüg'óciy naaxhuiñjäy co anajty Dios nbocy ajt xyajcomidoohuanim. ¹⁵ Tüg'óciy jäy huidibi nigapxp co Jesús je' yi' Dios y'ung, Dios yajpatp ma yi' e nañ yi' yajpatp ma Dios.

¹⁶ Ñich ajt nnejhuiüyim etz nmijpidaacim jadu'n nej Dios ajt xychojcim xyjihuiüyim nidüg'óciy. Dios chojtaayb yi' nidüg'óciy yi' jäy. Pinjaty tzojccixp jihuiüyigixp ymigügtijc, hue' yajpatp yi' ajcxy ma Dios e nañ Dios yajpatp ma yi' ajcxy. ¹⁷ Miid co yajxon nmijpidaacim Dios paady jotcuje nnaxaanim ma Dios ycötujctac, mina anajty xyajcomidouhuım ajt nbocy. Com tú'ciy ñich ajt nyajpaatim ya naaxhuiñ, tim jadu'n nej yi' Jesucristo. ¹⁸ Co nmijpidaacim Dios, huin'it ca' ajt nmıdzıgüyim nmıdzo'yduunim. Peni yajxon nmijpidaacim Dios, huin'it jëbi tzigı'n nyajqueecim. Yi' jäy ajcxy huidibi tzigüyb etz tzo'ydum, ca' ajcxy Dios mijpidägy yajxon.

¹⁹ Com Dios jayıjp ti xychojcim ti xyjihuiüyim, paady ycixp tzoc ajt naychojcim nayjihuiüyim nidüg nidüg etz nañ nmijpidaacim Dios. ²⁰ Yi' jäy ajcxy pinjaty jadu'n minamb co mijpidaaccixy Dios, e ca' ymigüg tzo-gaangixy ixaangixy, hue' je' ajcxy anıdaacp. Com peni ca' jajtciy nej tzojccixipy jihuiüyigixipy yi' ymigügtijc huidibi ajcxy ixıy'ajtpy, ca' ajcxy jadıp nej mijpidaaccixipy Dios huidibi ca' ixıy'ajtigixy. ²¹ E Dios ñich ajt xyñajtz'ane'mııyım co pin Dios mıbijcp mijpidacp, huen nañ jadu'n ymigügtijc tzocy jihuiy.

5

Yi pin huidibi ca' ıxa'n midohua'n Cristo y'ayuc

¹ Tüg'óciy jäy huidibi mıbijccixp co Jesús je' je' je Cristo huidibi Dios yquejx ya naaxhuiñ, Dios ajcxy y'ung'ajtip. Tüg'óciy jäy huidibi mıbijccixp

mijpidaaccixp Dios Teedy, nañ jadu'n huen tzojccixy yjihuiiygixy je' ajcxy huídibi Dios y'ung'ajtíp. ² Co ndzojcm njihuiyim huídibi Dios y'ung'ajtíp, je' jada je' je' iixpejt co nañ jadu'n jébi nmijpidaacim Dios etz jébi nguyduunim nej xyñajtz'ane'miüyim. ³ Co nmijpidaacim Dios, huin'it nguyduunim jadu'n nej Dios xyñajtz'ane'miüyim e yi' y'ayuc ca' ooy chipity co nguyduunim. ⁴ Com tüg'óciy yi' jáy ajcxy huídibi Dios ti y'adigiyii ti yjottigiyii yjihui'ñ ymic'ajt, ymihuindinaayb ajcxy yi' jibic-huinma'ñ ya naaxhuiñ. Co nmibijcm Dios, huin'it jébi mihuindinaayim yi' jibic-huinma'ñ ya naaxhuiñ. ⁵ Yi' jáy ajcxy pinjaty mibijcp co Jesús Dios je' y'ung, yi' ajcxy mihuindinaayb yi' jibic huinma'ñ ya naaxhuiñ.

Je ayuc huídibi nidíy'ajt yi' Dios y'ung

⁶ Yi' Jesucristo je' je' huídibi miin ya naaxhuiñ, je' je' huídibi nibejt etz ñi'py teemy gujy co y'o'cy miid jáy ajcxy ypocy ycixpi. Ca' nminaanim jéyi anajty ti ñibety, hue' nañ jadu'n ti y'ögy miid ajt nbocy ycixpi. ⁷ E yi' Espiritu Santo yi' tiy'ajt yejcp co Dios Jesús y'ung'adyii, com je' Espiritu Santo yi' Dios ytiy'ajt ymiid. ⁸ Ji tugügnax huídibi tiy'ajt yejcp co Dios Jesús y'ung'adyii: je Espiritu Santo, je nibejtin, etz Jesús ñi'py co teemy cujy miid ñch ajt nbocy ycixpi. E jadu'n nidugüig ñaybaatigixy tügnax, e tügnax ytiy'ajt yejccixy. ⁹ Mijpidaacim ñch ajt jáy y'ayuc co Dios Jesús y'ung'adyii, nigí copicy co nmijpidaacim Dios ytiy'ajt huídibi ti yecy miid y'ung ycixpi, com jac mic'ajt miid yi' ca'ydi jáy ajcxy. ¹⁰ Yi' jáy huídibi mijpidaaccixp Dios y'ung, ymi'ijtpy ajcxy je tiy'ajt ma yjot yhuinma'ñ. Yi' jáy ajcxy huídibi ca' mibijccixy mijpidaaccixy je Dios y'ayuc ytiy'ajt, hue' ajcxy yajnaxcixy Dios nej aniidägyin co ca' mibijccixy yi' Dios ytiy'ajt co y'ung nigapxy. ¹¹ Jada je' tiy'ajt co Dios ti xymooyim ajt n'alma yjugy'ajtin huídibi ca' ycixipy ytigoyipy nimina. Dios y'ung ca' y'alma ycixipy ytigoyipy nimina, paady yi' ti yaj'oyiy nej jébi ajt n'alma y'ijtim huinixii huinitiempo. ¹² Pinjaty ti mijpidaaccixy Dios y'ung, yi' ajcxy y'alma ca' ycixipy ytigoyipy nimina. Pinjaty ca' mijpidägy Dios y'ung, yi' ajcxy y'alma cixipy ytigoyipy co y'ögipy.

Capxycijxin etz capxhuijin

¹³ Jadayaabi ayuc ajcxy nyajnijayiygixp ma jada necy jigix jébi mijpidáaccixipy Dios y'ung, etz jébi mnejhuiygixy tiydudägy co mjugypijccixipy jadügtecy co anajty ti m'o'ccixy e ca' ajcxy m'alma ycixipy ytigoyipy.

¹⁴ Jada jotcuje'ajtin ñch ajt nmíid'ajtim co nmibijctzoohuim Dios jadu'n nej Jesucristo xyñajtz'ane'miüyim, yi' ñch ajt jébi xymidouhuim. ¹⁵ Miid co nnejhuiyim co yi' ajt xymidouhuim ma tijaty Dios nyajmibijctzoohuim, paady ycixp nejhuiyim co nmíid'ajtim tijaty anajty ti nyajmibijctzou.

¹⁶ Co pinjaty icy co ymígüg ypocytuñ huídibi huaad jébi Dios meecxy, huen mibijctzooyi' Dios miid yi' ycixpi, e Dios yajtzinähuiyb pen ca' anajty ooy ymijpocytity je tübi anajty tuñ. Com ji tüg mijpocy huídibi Dios ca' huinmecxy. Pen ti mijpocytuñ ca' huaad Dios ocjacmibijctzooni com ca' yi' y'oc-huinmecxaani. ¹⁷ Tüg'óciy jibic-huinma'ñ huídibi jáy ytumyb, pocy yi', per ji jibic-huinma'ñ huídibi jáy ytumyb, huídibi jébi Dios huinmecxy e ca' y'alma ytigoyip.

¹⁸ Nejhuiyim co tüg'óciy pinjaty Dios ti ymöyii jemybi jot huinma'ñ, ca' yi' y'ocpocytuni. Yi' Dios y'ung, huídibi ti ymöyigixy jemybi jot huinma'ñ, cuend'ajtíp yi' ajcxy, ca'ydi je mujcu' xayjhuinma'ñyidigóoyigixy.

¹⁹ Nejhuuyim ich ajt co Dios jadu'n xy'ane'mim njot nhuinma'ñ etz nejhuuyim co tüg'óciy jacjadyi naaxhuiñjáy huidibi ca' mijpidaaccixy Dios, je mujcu' jadu'n yjot yhuinma'ñ y'ane'mip ajcxy.

²⁰ E nejhuuyim co yi Dios y'ung ya y'oy naaxhuiñ e ti xyajnejhuuyim yi' y'ayuc yti'ajt, jigix jébi nejhuuyim huiñjhuuyim yajxon je Dios janchypi tudägypi. Nmi'ijtim ma ich ajt ndzinaayin je janchypi je tudägypi je Dios y'ung je Jesucristo. Jada jédu'n je tydudägypi Dios, etz je Dios yjugy'ajtin caminaabi ycacixy ycatigoy. ²¹ Miich ajcxy migügtijc huidibi ooy ndzocy njhuuyich jadu'n nej ixypy ngi'm'ung ngi'm'anácich, ca' nigoo mdzachDios'ájtigixy tijaty huidibi ca' ni ti mic'ajt m#dity, jadu'n nej Dios Teedy tzajpjotypi ymic'ajt m#dity.

2 SAN JUAN

Yi Mimetzpı Necy Huidibi San Juan Yajniguejx Tüg Mibıjcpı Töxyjäybi

¹ İch Juan huidibi nigohuajc'ajt Dios yjäy. Nyajniguejxpıch miich töxyjäy jada necy, miich Dios xyjäy'ajtp, e ti mmıjpdägy Jesucristo. Nañ nya-niguejxypıch jada necy tüg'óciy miich m'ung m'anäc ajcxy. Ooy ndzojcy njihuıyich miich ajcxy. Ca' nminaanım #ch naydügpajc ndzojcy njihuıybıch miich ajcxy, nañ jadu'n tüg'óciy jäy ajcxy, huidibi huinjihuıygıxp Dios ytiy'ajt, xchojccıxp xyjihuuıygıxp ajcxy. ² İch miich ajcxy ndzojccıxyp njihuıygıxyp com Dios ytiy'ajt yajpatp ma #ch ajt njot nhuinma'ñ, etz yi' ijtp huinixı ma #ch ajt. ³ Huen Dios Teedy etz #ch ajt nHuindzin Jesucristo, yi' Dios y'ung oy'ajt may'ajt tuñ mıid miich ajcxy, huen xypa'ayoogıxy huen xyajjotcugıygıxy mıid co mguydungıxy yi' ytiy'ajt etz mnaychócgıxy mnayjihuuıygıxy miñ xyıpy.

⁴ Ti nminaybadyıjıch nijjıty miich m'ung m'anäc, e ooy njotcugıyich mıid co tıydudägy ajcxy payöyı Dios ytiy'ajt, jadu'n nej Dios Teedy ajt ti xyñajtz'ane'mııyım. ⁵ Cham njacnımäyıch miich ajcxy co jëbi ajcxy mnaychócgıxy mnayjihuuıygıxy miñ xyıpy. Ca' nminaanım huinjemy jada tiy'ajt huidibi cham nyajnijayıygıxıpy. Je' jada je ayuc huidibi oga'n'aty ti nbaatım co ti nmıbjıcm Jesucristo. ⁶ Co ndzojcm njihuıyım nmıgügtıjc, jada je' tiy'ajt co nguyduunım nej Dios ajt ti xyajnajtz'ane'mııyım. Jada huidibi Dios ti xyajnajtz'ane'mııyım huidibi miich ajcxy ti mbaatcıxy, co oga'n' ti nmıbjıccıxy Jesucristo, copıcy co ajcxy mnaychócgıxıpy mnayjihuuıygıxıpy.

Yı jäy ajcxy huidibi anıdaaccıxp

⁷ Com ji mayjäy ya naaxhuıñ huidibi huin'ımb yı jäy ajcxy. Yı' ajcxy ti puhuäctüdy mıbjıcpıdjıc, yajıxpijcp ajcxy co Jesucristo ca' ñayguëxıci ya naaxhuıñ mıid ñinıcx. Jadayaabi jäy ajcxy yhuin'ımyb yhuëñypıntıy etz Jesucristo ymıdzıp'ajtp ajcxy. ⁸ Naygüendi'äjtgıxı cı'm. İx mgamıjpdıaacıxy yı' ajcxy y'ayuc. Co ajcxy myajhuin'ıngıxıpy, huin'ıt anajty myajtigoogyıxy je oy'ajt huidibi mbadaangıxyp ma Cristo. Co mguydungıxıpy Jesucristo ytiy'ajt, huin'ıt mbáatcıxıpy tüg oy'ajt ca'pxypı jııby tzajpjoty.

⁹ Tüg'óciy jäy huidibi ca' cuydungıxy je Jesucristo y'ayuc ytiy'ajt, ca' ajcxy mııdıty Dios ytiy'ajt ma ajcxy yjot yhuinma'ñ. Je jäy ajcxy huidibi cuydundııb je Cristo y'ayuc ytiy'ajt, ymıd ajcxy Dios Teedy etz je y'ung ytiy'ajt ma ajcxy yjot yhuinma'ñ. ¹⁰ Penı ji pınjaty ñıcxı ma miich ajcxy huidibi yajıxpijcpıch huidibi ca' ytiy'ajtıty, ca' ajcxy mgöbıguıpy ma mdıjcm, e nı ca' ajcxy mjıjp'ıxıhuıpy. ¹¹ Com Dios yjäy pınjaty anajty jıjp'ıxııyb je jäy ajcxy huidibi yajıxpijcpıch huidibi ca' ytiy'ajtıty, hue' je' tundıgooyb ma Dios ytiy'ajt. Hue' je' anajty paady jadu'n nej jıhuıy ti jıjptıgıyñı ajcxy je huıngbı ıxpıjcmıch huidibi ca' ytiy'ajtıty.

Capıycıjın

¹² Oy #ch ooy mıj may miich ajcxy njamıdmiydägaangıxy per ca' miich ajcxy jadu'n nijayıhuaangıxy necy'am. Hue' janchtıy njıjp'ıxyıch co cı'm

nninixaaŋixy jīm, e nmīd mīydāgaangixy au'am jigix ajcxy ooy jotcuje
mnayjihūiyigixipy.

¹³ Je mdzi' y'ung ajcxy huīdibi ya yajpatcixp xyajniguejxp ycapxrocxiŋ,
je huīdi ajcxy Dios nañ jadu'n ti yhuin'ijixigixy. Jadu'n ngapxycixyich mīd
mīich. Amén.

3 SAN JUAN

Yi Necy Huidibi San Juan Yajniejx Gayo

¹ Señor Gayo:

Nguejxypich capxpoçxin ma miich. Hich miich nyajniejxyp jada necy. Nnigohuajc'ajtypich ma je mibijcpidijc. Ooy ndzocy njihuïyich miich.

² Miich migüg, ooy nmigüg'adyii. Dios nmibijctzooybich mïd miich ycixpi, huen agujc jotcujc mdzinähuïpy etz mmic'idipy m'oy'idipy. Nejhuïybich co oy m'ity ma Dios. ³ Com oy ti njotcugïyich co je mibijcpidijc ajcxy ymiiñ ya huidibi jim tsoon ma miich ajcxy, e yi' ajcxy xytiy'ajtmooyich jadu'n nej tiydudägy mdzinäy e nañ jadu'n nej yajxon mguyduni Dios ytiy'ajt. ⁴ Ooy njotcújicydich jac nigi co tiy'ajt nbaadyich jadu'n nej nmigügtijcich cuydungixy Dios ytiy'ajt.

⁵ Miich migüg huidibi ooy ndzocy njihuïyich, ooy njäygidägyich co oyyäy'ajtin mduñ mïd je migügtijc. Nigi oy co oyyäy'ajtin mduñ mïd je migügtijc huidibi ca' m'ixy'adyii. ⁶ Yi mibijcpidijc, huidibi ti chooñ ma miich ajcxy, ti tiy'ajt yejccixy ma je mibijcpidijc ya jadu'n nej miich oyyäy'ajtin mdzachtuñ. Ooy oy mduñ co mmöy yi migügtijc yi ytü'amgixpi e mguejxnaxy yajxon jadu'n nej Dios jäygidägy. ⁷ Yi jadu'mbi jäy huidibi mguejxnajxyp anajty hue' Dios y'ayuc ycixpi yhuidity, e ca' yi' ajbcy ti pijctzoy ma je jäy ajcxy huidibi ca' Dios ytiy'ajt nejhuïyi. ⁸ Copicy nbubejtim ajcxy je mibijcpidijc ajcxy huidibi Dios y'ayuc ycixpi yhuiditycixy. Co jadu'n nbubejtim, chi jadu'n paady nej jihuïy tú'ciy nduunim mïd yi' ajcxy ma Dios y'ayuc capxhuäçxi.

Je Diótfrefes yjibic-huinmañ

⁹ Ti nnijayïyich jayhuin je mibijcpidijc huidibi nayoöymújigixp jim. Jim yajpaady tüg jäy huidi xii Diótfrefes huidibi ca' cöbiga'ñich n'ayucich etz ngötújcinich. Amij agix jada jäy chachñayjihuiyii, yi' ci'm tzach'ane'mam ma miich ajcxy. ¹⁰ Paady ycixp co nníçxibich jim ma miich ajcxy nyajnimähuamy ajcxy tüg'ócïy yi jibic-huinmañ huidibi Diótfrefes ytumyb, jadu'n nej jibic xyñigapxy xyñi'oïyich etz jadu'n nej anii yaj'ixpicy. E nañ ni yi' ca' mmüidity jotcujc'ajtin jadu'n nej chach'idïch. Nigi ytundigoy co ca' yajjättäga'ñ ajt nmigügtijc huidibi Dios mïd ycixpi yhuidity. E co ñich ajt nmigüg pinjaty yajjättäga'ñ, chi yi' capx'aduc e yajpidzimy je mibijcp huidibi jäy yajjättäc, e ca' je' cöbiga'ñ ma miich mnayoöymujctac.

¹¹ Miich hermano, huidibi ooy ndzocy njihuïyich, ca' mguydunipy jada jibic-huinmañ. Cuydun janchtiy yi oybi huinmañ. Yi jäy ajcxy huidibi oybi tungixp, yi' ajcxy ymïd Dios ytiy'ajt ma yjot yhuinmañ. Yi jäy ajcxy huidibi jibic tungixp, ca' yi' ajcxy Dios ytiy'ajt nejhuïyi.

Je Demetrio tüg y'ijxpejt oybi

¹² Yi jäy, huidibi yxii Demetrio, tüg'ócïy jäy ajcxy yminaangixy co ooy y'oyjäyity, e janch yajpaady ma Dios ytiy'ajt. Hich nañ jadu'n mnina'ñich co ooy y'oyjäyity yi Demetrio, e miich mnejhuïyb co ñich ajt ndiy'ajt janch janch yi'.

Capxycijxin

¹³ Ooy ïch anajty miich mijcajee ayuc njayajmïdmiydäga'ñ. Per ca' ni-jayïhua'ñ necy'am. ¹⁴ Hue' janchtiy njijp'ixyich co nnicxa'ñich tzojc ma miich ajcxy, e nmïdmiydäga'ñich miich ajcxy ci'm.

¹⁵ Jotcujc'ájtciç. Yi mibijcpiðijc ajcxy huidibi ya yajpatp yajnaxpy ajcxy capxrocxin ma miich ajcxy. Tun may'ajt yajnájxigich ngapxrocxin ma nmigügtijcich jim nidüg nidüg etz xiibety xiibety. Cham ngapxycíxyich, Juan je Apóstol.

SAN JUDAS

Yi Necy Huidibi Judas Nijayiy Je Huidibi Dios Ti Huin'ijxigixy

¹ Ich Judas, tumbich ma Jesucristo ytung, Jacobo xy'uch'ajtpich. Nijayiybich miich ajcxy nidüg'óciy huidibi Dios Teedy ti huin'ijxcixy jébi mibijccixy yi' y'ayuc huidibi jébi xyajpocyñihuaatzcixy. Nijayiybich miich ajcxy tajjee'óciy huidibi Jesucristo ycuend'aty ymüd. ² Huen Dios miich ajcxy mijcajee xypa'ayoogixy etz xyajjotcugüygixy etz chojccixy xyjihüygixy.

Yi' ajcxy huidibi yaj'ixpjcpanü

³ Miich ajcxy migügtijc huidibi ooy ndzocyich njihuüyich, müd je nüdzoocin ycixpi müd ajt n'alma huidibi miich ajcxy etz ich cham nmüd'ajtm, ooy chachycopicity co nijayihuibich miich ajcxy müd yi' mibijcin ajcxy ycixpi, e ngohuanüyb ajcxy co jébi mic m'ijtcixy ma ajcxy yi' mibijcin e ca' m'ixtigihua'ccixy ma yi' ayuc tiy'ajt huidibi Dios yejc ma tüg'óciy naax-huin'yäy. ⁴ Naagity jäy ajcxy ti ytigüygixy ma miich ajcxy ayüch ameech müd anü. Jecy'ajty Dios tiy'ajt yecy ma yi' y'ayuc co yi' jadu'mbi jäy tigoyam ajcxy y'alma müd ypocy ycixpi. Hue' yi' ajcxy jibic jäy huidibi ca' huindzigüygixy Dios. Anüdaacp yi' ajcxy co yminaangixy co Dios ti xypa'ayoohuim etz ti xyhuinmeecxim ajt nbocy paady ycixpi jébi nduunim huen tiijity huidibi nijot'ajtm. Ca' cöbijccixy je Dios huidibi nHuindzin'ajtm, etz ca' cöbijccixy ich ajt nHuindzin Jesucristo.

⁵ Oy miich ajcxy ti mjanejhuiydaagyxxy jada tiy'ajt, per nyajjäymetzcodamy ajcxy jadu'n nej Dios jayijp yajpidzimy jecy'ajty jim Egipto je Israel jäy ajcxy, e jac'axam tzaachytuun müd o'cin je huidibi anajty ajcxy nüjéjty ca' ymibijccixy. ⁶ Je ángeles huidibi ajcxy ca' yhu'i'my ma Dios ytung huidibi ajcxy capxycómiodacy Dios, y'ixmajtztay ajcxy y'it chinaydac. Dios je' cham müd'ajtp ajcxy ahuing. Mach ajcxy y'ity agoodztuuby huinixü huinitiempo irti cooni je mij xii anajty Dios ti yajhuaad'aty, mina anajty tiyduna'n naax-huin'yäy ajcxy müd ypocy ycixpi. ⁷ Jadu'n nej Sodoma etz Gomorra etz jacjadyii mij cajp huinduy agonbi ytundigoyday ajcxy ma jejimbi cajp ycu-ydungixyp ñinücx chojcin, naygüyejci ajcxy ma je jibic-huinma'n. Yéydijctijc ytundigoogyxxy müd huingbi yéydijc. Je' jadu'n hui'm ijxpejt ma tüg'óciy jäy co je tzaachypi ajcxy paatcixy.

⁸ Jim yajpaady ma miich ajcxy jäy huidibi nejhüüyb co Dios jecy'ajty tzaachytuun ángeles ajcxy etz cajp jäy huidibi ajcxy tundigooy. Yi' ajcxy chinaayn jadu'n yi' nej tüg cumäy. Yajjibicüygixy je ñinücx müd pocytonü. Jijpcogapxüygixy je Dios ycotujcin, nigapxcixy ni'ojüygixy je huidibi ajcxy Dios mooyip mij'ajtm. ⁹ Je arcángel, Miguel, je ángel huidibi mij'ane'min müd, co anajty ychiptuñ müd je mujcu', yajcapxyoongixy yaj'ayucyoongixy je Moisés ñinücx, ca'p je' müd'ajty huinma'n nücx yajpcycäy je mujcu' müd nay'ojü. Jéyi janch co nimay: "Yi' Huindzin Dios miich xy'ix'ojp." ¹⁰ Per jada jäy ajcxy jibic ooy nigapxcixy huidibi ca' nejhüüygixy. Tüüyb müdity yhuinma'n müd iyujc animal yhuinma'n, etz iyujc animal ca' ajcxy müdity huinma'n tiydudägy. Ci'm jada jäy ajcxy ñayyajhuinma'ñydidgüoygixy, e jadu'n ajcxy y'alma yajtigoyangixy.

11 Ypadamyb ajcxy tzaachypɪ mijcajee mɪid pocy ycɪxpɪ com je' yɪ' ajcxy ypadumyɪb nej Caɪn y'idiɪch. Mɪid co meeɲ tzach'adzojccɪxy, paady ɲɪidigooygɪxy ytɪdigooygɪxy jadu'n nej Balaam ɲɪidigoy ytɪdigoy jecy'ajty, e jadu'n ajcxy y'ayoogɪxy jadu'n nej Coré, co y'o'cy co ycacapxymidohuaɲ anajty co Moisés oy y'ayucɪjpcogapxɪyɪ. 12 Yɪ jadu'mbi jɪy tzo'ydu'n yejcp ma miɪch ajcxy co mɪgaaygɪxy m'uuccɪxy tɪgmucy mɪid yɪ' ajcxy, e jadu'n iɪxpejt yejccɪxy co mnaychócgɪxy. Caaygɪxp uuccɪxp tɪgmucy mɪid miɪch ajcxy agujc jotcujc per ni ca' ajcxy mɪidɪty huɪndzigi'ɲ mɪid ymɪgɪgtɪjc. Jadu'n ajcxy nɪpaady nej cōbɪxycuend'ajtpɪ huɪdɪbɪ cɪ'm ɲaygüend'ajtigɪxy, e ca' tungɪxy cuendi je cōbɪxy. Jadu'n ajcxy nej joc huɪdɪbɪ ca'pɪ nɪ mɪidɪty, huɪdɪbɪ je poj jajhuɪdɪjtɪp. Jadu'n ajcxy nej quipy huɪdɪbɪ ca' ytiɪm'aty mɪna yɪpadyɪi, jajyɪp y'ocniɪcxy, e chi jada ytiɪch, e ytimypidɪgy mɪid ɲidictz. 13 Yɪ' ajcxy ytundigoyɪ ooy cho'ydu'n yecy, tim jadu'n nɪpaady nej je meɪy y'oobɪgy co ypidɪgy. Jadu'n ajcxy nɪpaady nej madza' huɪdɪbɪ ytu' tɪ yajtigach. Hue' y'ɪjtcɪxy pocypa'tcɪ'py huɪnɪxɪ huɪnɪtiempo, mij'agootztuuyb y'ɪdɪpy ajcxy.

14-15 Naɲ jadu'n Enoc, je mihuɪxtujcpɪ co anajty Adán tɪ yjayɪp'aty, ymɪnaɲ co Dios yhuɪnma'ɲymooyɪ mɪid jada ycɪxpɪ, e ymɪnaɲ: "N'ɪjxɪch je Huɪndzin Dios co anajty ymɪɲ mɪid janch canaag mil je huɪdɪbɪ ajcxy tudägyɪ etz huätzɪp. Co anajty tɪyduna'ɲ ajcxy tɪg'ócɪy naaxhuɪɲjɪy mɪid ypocy ycɪxpɪ, chi jajpocycähua'ɲ je jɪbɪc jɪyɪdɪc ajcxy jadu'n nej ajcxy tɪ ytundigooygɪxy mɪid yjɪbɪcɪjɪy'ajɪ etz mɪid jɪbɪc ayuc tɪbɪ mɪid nigapxcɪxy nɪ'ojɪygyɪ Dios." 16 Jada jɪbɪc jɪyɪdɪc ca' ajcxy ni tɪ mɪjotcujc'ajtcɪxy, ooy nigapxcɪxy nɪ'ojɪygyɪ ymɪgɪgtɪjc. Jɪyɪ ajcxy yci'm jotcujc'ajɪ ixtaaygɪxy. Ycapxcɪxy amɪj agɪx. Ooy oy nigapxcɪxy nɪjɪjɪty jɪy mɪid co tɪ oybɪ padaangɪxy ma je' ajcxy.

Judas capxhuijp je' ymɪgɪgtɪjc ajcxy

17 Per miɪch ajcxy mɪgɪgtɪjc huɪdɪbɪ ɪch ooy ndzocy, jɪymejtcɪx je ayuc huɪdɪbɪ jécyɪp tɪ najtcapxɪygyɪ je Huɪndzin Jesucristo y'apóstoles ajcxy. 18 Je apóstoles miɪch ajcxy xyɲɪmay: "Ma anajty xɪ tiempo ycɪxaani, jɪ'adɪp jɪy ajcxy huɪdɪbɪ nɪxɪgɪp yajxɪgɪpy huɪdɪbɪ Dios yje'ajtpy, e chináaygɪxɪpy jadu'n nej yɪ' ajcxy cɪ'm tzachnɪjot'ajtcɪxy jɪbɪc-huɪnma'ɲ." 19 Je' ajcxy jajnaybɪjɪc-huäcxɪb mɪbɪjcpɪdɪc co ca' ajcxy mɪidɪty je Dios yjɪhuɪ'ɲ ymɪc'ajɪ.

20 Per miɪch ajcxy mɪgɪgtɪjc huɪdɪbɪ ooy ndzocyɪch nɪjɪhuɪyɪch, jɪtcɪx mɪch ajcxy tudägy ma yɪ mɪmɪbɪjcin. Jɪymejtcɪx mɪbɪjctzoogɪc Dios mɪid je Espírɪtu Santo ypubejtɪn. 21 Naygüend'ajtigɪx jɪgɪx jɪbɪ Dios xychojccɪxy xyjɪhuɪygyɪ ajcxy, e ahuijxcɪx je xɪ mɪna anajty ɪch ajɪ nHuɪndzin Jesucristo xymöhuaaniɲ je jugy'ajɪn huɪdɪbɪ ca' ycɪxɪpy ytɪgoyɪpy ni mɪna mɪid co tɪ xypa'ayoohuɪm.

22 Capxjotcɪdaaccɪx pɪnjaty ca' tɪ mɪjɪpɪdägy janchypɪdägy. 23 Yajmɪidmɪydaaccɪx jacjadyɪi mɪgɪgtɪjc jɪgɪx ajcxy jɪb paatcɪxy naɲ jadu'n nɪdzooɪcɪn mɪid ajcxy y'alma. Jadu'n anajty paady nej jɪhuɪy myajpɪdzɪmgɪxy jɪɲjoty. Yajtungɪx pa'ayo'o mɪid jacpɪnjaty pocytumbɪ. Naygüend'ajtigɪx ma yɪ' ajcxy ypocytunɪɪ, ca' mbocytungɪxy naɲ jadu'n. Jadu'n yɪ' ajcxy ypocytunɪɪ nɪpaady nej huit huɪdɪbɪ tɪ yjɪbɪccɪ'y.

Judas capxycɪxy mɪid je' ymɪgɪgtɪjc

24-25 Je Dios tɪgpajcpɪ, je Dios huɪdɪbɪ xyajɲɪdzooɪcɪm ajɪ n'alma, je huɪdɪbɪ yjajtaayb ɲɪjɪhuɪydaayb, ymɪid je' mɪc'ajɪ etz cōtujcɪn jɪbɪ miɪch ajcxy xy-cuend'adɪpy jɪgɪx ca' mbocycägɪxɪpy, etz je' ymɪid mɪc'ajɪ jɪgɪx jɪbɪ xyajja'tcɪxy agujc jotcujc ma Dios yhuɪnduu, ma yɪ' yajpaady mɪid y'oy'ajɪn ymɪj'ajɪn ca'

ti mbocymiidity ajcxy. Yi' paatip je oy'ajtín etz mij'ajtín etz mic'ajt etz cõtujcín
míid nHuindzin Jesucristo ycixpi, tiyíp etz cham etz huinixíi. Amén. Jadu'n
ngapxycíxyich.

EL APOCALIPSIS O Je Huidibi Dios Yajhuin'ijx San Juan

¹ Jayhui'my ity ma jada necy je Jesucristo y'ayuc ytiy'ajt huidibi ca' pín nejhuiy huinjihuïy jecy'ajty. Dios moy Jesucristo jada tiy'ajt jigix ya-jni'ixiydähuiipy je Dios ytumbi ajcxy ti anajty tunaanip jadaanip ya naaxhuiñ, e ca' ooy jecy yhuäcxiba'ñ mina ytuna'ñyii yjada'ñyii. Jesucristo yquejxy jada ayuc tiy'ajt miid tüg ángel ma Juan. E je ángel yajhuin'ijxy Juan jada y'ayuc etz ijxpejt. ² E Juan yejcy tiy'ajt janchypi tüg'óciy jadu'n nej anajty ti huin'ixy ti huinmidoy. E Juan ñidiy'ajt'ajtpy jada Dios y'ayuc etz nañ jadu'n nidiy'ajt'aty je ayuc tiy'ajt huidibi Jesucristo yajnejhuïyi.

³ Janch jotcujc je' pinjaty capxp jada necy etz pinjaty mido'mbiyc jada Dios y'ayuc huidibi Juan nidiy'ajtpy etz ñajtzcapxiiyb. E jotcujc je' pinjaty cuydumb tüg'óciy huidibi jaybety ma jada necy, com je xii je tiempo huingooniñ je' mina ytuna'ñyii yjada'ñyii.

Juan nijayiiy huixtujc'itpi mibijcpidijc

⁴ Hich Juan nijayiiybich yam je mibijcpidijc huixtujcpi:cypyi huidibi yajpatp jim Asia naaxjot. Huen Dios etz je huixtujcpi espíritu huidibi yajpatp ma je' y'ane'mdac may'ajt oy'ajt tunipy miid miich ajcxy etz xymóoygixipy jotcujc'ajtin. Dios je' huidibi cham ijtp, je huidibi jecy'ajty ijt, etz je huidibi miinaamb. ⁵ Huen Jesucristo may'ajt oy'ajt tunipy miid miich ajcxy etz xymóoygixipy jotcujc'ajtin. Jesucristo je huidibi tiydudägy Dios ytiy'ajt yejci, je yajijpi jäy huidibi ti yjugypicy jadüg'oc co y'o'cy, je' nigohuajc'ajtp tüg'óciy pinjaty jugypigip jadüg'oc co anajty ti y'óccixy. Jesucristo nigohuajc'ajtp etz ane'my tüg'óciy reydiyjc huidibi ane'mb ya naaxhuiñ. Je Cristo, huidibi xychojcm xyjihuiyim, ti xyñihuaanim miid ñi'py ma je tzaachypi huidibi mihuaad'ajtim miid ajt nbocy ycixpi. ⁶ Jesucristo ti xycótujcmooyim etz ti xytungmooyim miid Dios Teedy, huidi yi' yteedy'ajtpy. Jadu'n ich ajcxy ndung etz ngótujcin nipaady nej je tung etz cötujcin huidibi reydiyjc etz teedytjic ajcxy ymiid. Huen Jesucristo y'idipy cömay huinixii huini'tiempo etz huen yi' y'ane'min cötujcin y'idipy huinixii huini'tiempo. Jadu'n jada. Amén.

⁷ Cuendtungix ich n'ayuc, ¡Cristo miinaamb jocjoty e tüg'óciy je mayjäy y'ixa'ñyii! E y'ixamyb je' ajcxy huidijaty Cristo yaj'ayoo yajtzaachypijc. Tüg'óciy naaxhuiñjyäj yjihuihua'ñ yäxa'ñ ytaja'ñ ymaya'ñ miid je'ycixpi. Jadu'n jada. Amén.

⁸ Jadu'n je mijpi Dios huidibi tüg'óciy mic'ajt miid ymina'ñ:

—Hich je' huidibi yajtzondacp je naaxhuiñybi, je tzajp etz je huidibi jac-cogixiiyb. Jadu'n ich nej letra A huidibi yajtzondacp je alfabeto etz je letra Z huidibi cogixiiyb ma je alfabeto. Hich je' huidibi cham'ijtp, etz huidibi jecy'ajtpy ijt etz huidibi miinaamb.

Juan ijxy yi Cristo oybi ymijity

⁹ Hich Juan, miich ajcxy mmigüg, quipxyi miid miich ajcxy nminaxy nyajnaxyich ayo'n tzaachypi. Quipxyi miid miich ajcxy ndzinäyich ma Dios y'ane'my. Etz quipxyi miid miich ajcxy nyajtuñich je mecxtujcin ma ndzinaayin huidibi Jesucristo ti xymooyim. Jim ich anajty mach n'ityich ma je naax huidibi mejy agujc, huidibi xii Patmos, miid Dios y'ayuc ytiy'ajt ycixpi, je ayuc tiy'ajt huidibi Jesucristo xyajnejhuïyim. ¹⁰ Jadu'n tügtecy ti njatyich,

hue' anajty tüg domingo xii co ñich Dios n'ojadajty'ich, e Dios yjihui'ñ ymic'ajt ti anajty xymimadactay'ich ntot nhuinma'ñich. Chi nmidooy'ich jixci'py'amy tüg huidibi mic capx, jadu'n yi' ycapxin nmidooy'ich nej tüg trompeta yxüxy.

¹¹ Chi je huidibi xymigapxpich anajty ymínañ:

—ñich je' huidibi yajtzondacp etz je huidibi yajcogixi'iyb tüg'óciy tijaty ya naaxhuiñybi etz tzajpjoty. Jadu'n ñich nej je letra A huidibi yajtzondacp je alfabeto etz je letra Z huidibi yajcogixi'iyb je alfabeto. Cojaay miich ma tüg libro huidibi mhuin'ixyyp, e quex je necy jim Asia naaxjot ma je huixtujc picypí mibijcpidijc ma je huixtujcpi capj: Efeso, Esmirna, Pérgamo, Teatira, Sardis, Filadelfia etz Laodicea.

¹² Chi n'ixhuimbityich n'ixa'ñich pin ñich anajty xymigapxpich. Co nrayji'ixich, huin'it nhuin'ixy'ich huixtujc candelero ac tim oori. ¹³ E cujc'amy ma je huixtujc candelero nhuin'ixy'ich tim jadu'n nej je jäy huidibi tsoon tzajpjoty (je Cristo), yxoxy'ity müd tüg huit yjädy anajty mabaad ytecy, e yhuññity ma ycaach müd tüg oorihuñ. ¹⁴ Yi' ycohuajc etz ycohuay janch poob, jadu'n nej lana huidibi janch poob, jadu'n nej nieve ypoobity, e je yhuñ jadu'n nej jñnye'n. ¹⁵ Je' ytecy tim jadu'n nej latón huidibi janch oy, nej jihuiñ jñnjoty ornojoty yam ypidzimy. E je ymiydaacin janch mic, tim jadu'n nej canaag mijñi y'a'ñich y'agimimy. ¹⁶ E müd anajty ma a'oygi' huixtujc madza'. E ypidzimy ma y'ahuac tüg espada mejtz'adu'm'amy yjijpity. E yhuñyijp jadu'n anajty nej xii janch mic y'añ.

¹⁷ Co je' nhuin'ixy'ich, chi janch ögy oy ngidägy'ich ma ytecy ymijc, chi xycñixajy'ich müd y'a'oygi', chi xyñimaay'ich:

—Ca' mdzig'iy, ñich je' Huidibi jayijp'ajtp ya naaxhuiñ etz tzajpjoty etz ñich je' je huidibi cogixi'huamb. ¹⁸ Jugy'ajtp'ich; ti n'ögy'ich, e ti njugypicy'ich jadüg'oc, e jugy'adip'ich huinixii huiniempo. Nmüidich mic'ajt jigix ane'mibich yi'oc'in etz je it ma je öcpi ajcxy y'alma ity. Jadu'n nipaady nej jihuiñ nmüdidy'ich je öcpi it ahuaazti. ¹⁹ Cojay cham tijaty mhuin'ixy'ich mhuinmidooyb, jadu'n nej huidibi tunaanip jadaanip jadachamb; xii tiempo, etz huidibi tunaanip jadaanip jacjiini. ²⁰ E jadu'n yhuimbizimy je tiy'ajt janchypí huidibi ca' pin nejhuiñ maabi je huixtujcpi madza' tiñi mhuin'ixy ma ñich n'a'oygi', etz je huixtujcpi oricandelero. Je huixtujcpi madza', je' je' je ángeles ajcxy huidibi cogapxy'ajtp müd Dios ycixpí ma je huixtujcpi'icypí mibijcpidijc. E je huixtujcpi candelero huidibi ti m'ixy, je' yi' je huixtujcpi'icypí mibijcpidijc.

2

Je ayuc huidi yajmoy yi mibijcpidijc jim Efeso

¹ Nijay' miich je ángel huidibi cogapxy'ajtp jim ma je huidibi ajcxy mibijcp jim Efeso: “Ñima' ajcxy co jadu'n ymínañ je huidibi huixtujc madza' müd ma y'a'oygi', je huidibi jim yajpatp agujc'amy ma je huixtujcpi candelero, je' jadu'n minamb: ² ñich nejhuñy'ich tüg'óciy ti miich ajcxy mdumy, jadu'n nej mictägy mdungixy ma Dios ytung, etz jadu'n nej mmimecxtujccixy migügtijc. Nejhuñy'ich co ca' m'ocmimexctugaani ajcxy jibicjädydjc, e ti m'ixxmajtzicixy je ajcxy huidibi naydijp co Cristo ti huin'ixy'ixy, per ca' je' ajcxy ytudägy'ity, e miich ajcxy ti mnejhuiñ co ajcxy ooy y'anñidaaccixy. ³ Nejhuñy'ich co ooy ayo'n mij miich ajcxy mmijnajcixy myajnajcixy müd ñich ycixp, etz ooy mij mecxtujc'in ajcxy myajtungixy, etz ooy janch mic mdungixy müd ñich ycixp, e ca' ti mmidz'ijpigixy ñich ndung. ⁴ Per nejhuñy'ich ma miich ajcxy mdundigoy. Ca' miich ajcxy xyajmij'aty'ich mijcajee, jadu'n

nej anajty xyajmij'aty'ich ajcxy mijcajee co oga'n ajcxy mibijcy. ⁵ Miiid jada ycixpi jaymetz miich ajcxy ma oy m'aganajxcixy. Jothuimbijtcix, e tungix nej anajty m'octungixp co oga'n ajcxy mmibijcy. Pen ca' ajcxy jadu'n mdungixy, chi tzojc n'icxibich ma miich ajcxy, chi huingbi nbidagibych ma miich ajcxy xyjapaady, tim jadu'n nipaady nej jihuiy nbicy'ich yi mgandelero. Jadu'n ndunipy'ich pen ca' anajty mjothuimbity ajcxy. ⁶ Per njaygidaacy'ich jadu'n nej miich ajcxy m'ixtigitoydaaygixy mjaydigoydaaygixy je jibicjajdyjc ajcxy yhuinma'n. Nej je nicolaitas ajcxy ytungixy, miich ajcxy ca' njaygidaaccixy e nañ jadu'n iich ca' njaygidagy'ich. ⁷ Pinjaty ytadzac miiid huen amidoo'ity nej je Espiritu Santo ymina'n ma je mibijcpidijc huidibi yajpatp xi ya. Pinjaty madacp ma ymibijcin, iich yi' nmohuipy tzinaayin jugy'ajtin ma Dios y'ane'my, jaydeb jotcujc chinahuipy ma Dios y'it, jadu'n nipaady nej jihuiy ajcxy jixcy je quipytim ma Dios y'it huidibi jugy'ajtin yejcp."

Je ayuc huidi yajmoy yi mibijcpidijc ajcxy jim Esmirna

⁸ Nijayi' je angel, je cogapxy'ajtpi huidibi yajpatp ma je mibijcpidijc jim Esmirna: "Jadu'n ymina'n je huidibi yajtzondac je naaxhuiñybi etz tzajp etz huidibi cogixihuip, je huidibi o'c e yjugy'aty jadug'oc: ⁹ Iich nejhuiybich tug'ociy ti miich ajcxy mdumyb. N'ixcajpy'ich nnejhuybich je m'ayo'n mjotmay ajcxy, jadu'n nej ti myaj'ixhuidijtcixy ti myajpahuidijtcixy. Nejhuybich co ayoob jay miich ajcxy, per miiid miich ajcxy Dios y'oy'ajtin, e jadu'n nipaady miich ajcxy nej comeeydjic. Nejhuybich co nijejity jay miich ajcxy xyñigapxyp xyñi'oñiyb. Naydiyii ajcxy co yjudiojy'ity, e ca' yjanchity. Hue' ajcxy miiid y'ijtcixy je mujcu'. ¹⁰ Ca' ni ti mdzigiy miich ajcxy nej mjadaangixy m'ayoohuaangixy. Yi mujcu' miich ajcxy nijejity xyajpuxtijccahuamb, m'ocyaj'ixmadzangixy pen janch miich ajcxy nidug'ociy myajpatcixy ma Dios. Jadu'ny' miich ajcxy m'ayohuipy majc xii. Ijtcix tudagy mabaad ajcxy m'ocixy. E iich miich ajcxy je jugy'ajtin huinixiibi nmohuipy jadu'n nej premio co ti mmadaaccixy ma mmibijcin. ¹¹ Pinjaty miiid ytadzac, huen mido'mbijccixy nej je Espiritu Santo nimay je pinjaty mibijcp Dios. Pinjaty mimadacp cuyduñ Dios y'ayuc ytiy'ajt, ca' je' y'alma ayoohuipy ayoodactuuyb, ca' y'oga'n mimejtz'ocpi."

Je ayuc huidi yajmoy yi mibijcpidijc jim Pérgamo

¹² Nijayi' je angel huidibi cogapxy'ajtp jim ma je mibijcpidijc ajcxy jim Pérgamo: "Nijayi' je ayuc co jadu'n ymina'n je huidibi y'espada miiid mejtz'adu'm'amyb yjijpity: ¹³ Iich nejhuydaaybich jadu'n nej miich ajcxy mdzinaaygix mjgy'ajtcix. Nejhuybich co miich ajcxy mdzinaaygixy mjgy'ajtcixy ma tug'cajp ma je mujcu' y'ane'my. Per mi'ijtyñi je nxij'ich, e ca' m'ixmach je mmibijcin ma iich. Ni mga'ixmajch je mmibijcin je huin'it xii co Antipas yaj'o'ci jim ma miich ajcxy, tug' iich nmigug, je tudagy'pi testigo, jim je' y'o'cy ma mujcu' chinay. ¹⁴ Nmiiidich tigati huidibi ca' n'oy'ixy'ich ma miich ajcxy huidibi mdumyb ajcxy jim Pérgamo. Nijejity miich ajcxy ca' m'ixmadza'n je Balaam y'ixpijcin, je huidibi yaj'ixpijc jecy'ajty co huen jicxcixy je huidibi anajty tzaadzech quipychech ti yajhuindzigiygixy. E nañ jadu'n yaj'ixpic co huen tundigooygixy miiid huingbi töxyjy. ¹⁵ Nañ jadu'n miich ajcxy mmiiidity nije' jay huidibi ajcxy ca' ixmadzaangixy nicolaitas y'ixpijcin, je ixpijcin huidibi iich ca' ndim'ixa'ñich. ¹⁶ Paady jothuimbijtcixy miich ajcxy, yajt'ajgtzn ajcxy mjot mhuinma'n. Pen ca' jadu'n mdunipy, n'icxibich jim tzojc ma miich ajcxy. Chi jada' ndziptunipy'ich miiid yi' ajcxy huidibi midundigooyb iich ngotujcin huidibi ngapx'ich. Iich n'ayuc jadu'n

nipaady nej espada. ¹⁷ Pin ytädzac müid, huen mido'mbicy je ayuc huidibi je Espiritu Santo ñigapxyp ma je huidibi ajcxy Dios y'ayuc ytiy'ajt mibijcip. Pin jada tiydudägy mimadacp cuyduunni Dios ytiy'ajt, ñich yi' nmöhuipy oy'ajtin huidibi Dios yjē'ajtpy. Jada oy'ajt jadu'n nipaady nej maná huidibi yüch ijtp ma Dios chinaydac. Nañ jadu'n ñich yi' nmöhuibich tüg pi'cpoobtzaa, e ma je poobtzaa jim yjaayity tüg xii jemybi huidibi ca' ni pin ijxcabipy, jeyi janchtiy ijxcabip je xii pin anajty cöbijcp je tzaa."

Je ayuc huidi yajmoy yi mibijcpidijc jim Tiatura

¹⁸ Nijayi' je ängel huidibi cogapxy'ajtp ma je mibijcpidijc jim Tiatura: "Nima' ajcxy, jadu'n je Dios y'ung ymina'ñ, je huidibi yhuin müid jadu'n nej jihuiy jiiñye'n, e ytecy jadu'n müidity nej bronze tübi ytoyhuäch ma jiiñ: ¹⁹ Jadu'n yi' ymina'ñ: Nejhuüybich tüg'óciy ti ajcxy mdumyb. Nejhuüybich jadu'n nej müich ajcxy mijcajee myajmij'ajtcixy Dios etz mdzojccixy mjhuiygyxy ymügügtijc; jadu'n nej mmibijccixy mmijpidaaccixy Dios y'ayuc ytiy'ajt; jadu'n nej mictägy mdungixy ma Dios ytung; etz jadu'n nej myajtungixy mecxtujcin ma mdzinaayin; etz nejhuüybich co cham niği mdungixy ma Dios ytung, ca'ydi jadu'n ajcxy nej myajtzondacy. ²⁰ Ji tüg huidibi müich ajcxy mdumyb huidibi ñich ca' n'oy'ixyich. Mdzachmimexxtujccixy yi töxyjäy Jezabel huidibi naydijp co ycapxyp Dios y'ayuc e ca' yjanchity. Je' yajniidigooyb yajtüdigooyb ñich ndumbi müid anii. Jadu'n je' ymina'ñ co jēbi huingbi töxyjäy migapxtigooygixy e co jēbi caaygixy jicxcixy je huidibi ajcxy jahuindzigüyb quipychech tzaadzech. ²¹ Ti ñich je Jezabel nmöy tiempo co ixypy yjothuimbity, per yi' ca' ixmadza'ñ yjibic-huinma'ñ. ²² Jadachambi nyajcähua'ñich je Jezabel cijx'am müid pa'm, e jadu'n ajcxy nmöhua'ñich ayo'n je yēydijc ajcxy huidibi müid chachtundigoy. Jadu'n ndunipyich pen ca' ajcxy yjothuimbity nej ajcxy chachpadungixy je jibic-huinma'ñ huidibi je Jezabel ymüid. ²³ E nyaj'öctähuibich tüg'óciy ajcxy pinjaty panixp cixyot huinjot je Jezabel y'ixpijcin jigix nidüg'óciy je mibijcpidijc ajcxy nejhuüydähuipy co ñich je' nejhuüydaayb tüg'óciy jäy ajcxy yjibic-huinma'ñ. Chi nmöhuibich oybi nidüg nidüg jäy pen ti anajty oybi tuñ, o nmöhuibich nidüg nidüg jibicpi pen ti anajty jibicpi tungixy. ²⁴ Per jacjadyii müich ajcxy jim Tiatura ca' mbanicxcixy mbayögyxy Jezabel y'ixpijcin, e ni ca' mmijpidaaccixy huidibi ajcxy ytijpy mujcu' y'ixpijcin huidibi tzip huinjhuüyb. Hich müich ajcxy nimaayb co ca'p ñich müich ajcxy huingbi ixpijcin njacmöogyxipy. ²⁵ Mi'ijtcixy je Dios ytiy'ajt huidibi müich ajcxy müid, ixti cooni anajty nhuimbityich. ²⁶ Pin madacp ma ymibijcin etz pin cuydumb ñich ndiy'ajt mabaad anajty je' y'ögy, ñich je' nmöhuibich je cötujcin, jaydēb ane'my naaxhuüñjäy ajcxy. ²⁷ Hich je' nmöhuipy je ane'min cötujcin ma naaxhuüñjäy huidibi Dios Teedy, ñich NDeedy, ti xymöyich. E je' ane'mipy müid Dios ymic'ajt. E je' yajhuindigoydähuipy naaxhuüñjäy y'ane'min, tim jadu'n nej jäy püy pochutu'tz müid pujxtajc. ²⁸ Nañ jadu'n ñich je' nmöhuipy ñich nmic'ajt huidibi nipaady nej je madza' jayhuixtujc. ²⁹ Pin ytädzac müid, pin midoohuamb, huen midoy nej je Espiritu Santo ymina'ñ ma yi mibijcpidijc nidüg'óciy."

3

Je ayuc huidi yajmoy yi mibijcpidijc jim Sardis

¹ Nijayi' je ängel huidibi cogapx'ajtpi ma yi mibijcpidijc ajcxy huidibi yajpatp jim Sardis: "Jadu'n ymina'ñ je pin müid je huixtujcpi Dios y'espíritu, huidibi müid je huixtujcpi madza': Hich nejhuüyb ti mdumyb. Nejhuüybich co

cömay ajcxy m'ijtcixy co mmüidity yjugy'ajtin huinixiibi e ca' yjanchity. Jadu'n miich ajcxy nipaady nej öcpi. ² Cuenditungix miich ajcxy yi mmibijcin, com jago jago ajcxy mgayajtgoydäy yi mmibijcin. Jayajmicpjcixy yi mmibijcin huidibi ajcxy mjacmüidity. Ti ich n'ixy co huidibi ajcxy mdumy b ca' yi' yhuädzity ytudägyity ma Dios yhuinduu. ³ Jäymejtzcootcixy je Cristo ytiy'ajt je tiibi m'ixpjcixy, je tiibi mmidoogixy. Paniccix Cristo ytiy'ajt e jothuimbijtcixy ma yi oybi. Pen ca' mgüendtungixy yi mmibijcin, nicxibich ma miich ajcxy jadu'n nej tüg meetzpi, ni mganejhuühygyixy anajty nnicxyich. ⁴ Miich jacmüdni mibijcpi ajcxy jim Sardis huidibi ca'ni ajcxy ymbijcin yajtgooygixy, ca'ni ajcxy ytundigooygixy, tim jadu'n nipaady nej jihuiy ajcxy müidity poob huit huidibi ca' yjibicüy. Yi' ajcxy xymüid'ipich müid huädz jot huädz huinma'n, tim jadu'n nipaady nej ypoob huit ajcxy müidity, com ajcxy ypadyyi jadu'n. ⁵ Pin mimadacp cuyduñ etz mjüpidägy Dios y'ayuc ytiy'ajt, ymüid'adipy ajcxy je huätzpi jot huinma'n, huidibi jadu'n nipatp nej poob huit ajcxy müidity. E ni ca' ajcxy yxi jayjödzip ma je libro ma ycojaayity je tudägyi jäy ajcxy yxi. E ich yi' ajcxy ngapxquëxcixy yxi ma nDeedyich yhuinduu, e nañ jadu'n ma nDeedyich y'angeles yhuinduu ajcxy. ⁶ Pin midoohuamb, pin ytäz Zac müid, huen midoy nej je Espiritu Santo ymina'n majaty je huidibi ajcxy Dios y'ayuc ytiy'ajt mibijcip."

Je ayuc huüdi yajmoy yi mibijcpidijc jim Filadelfia

⁷ Nijayi' je ängel huidibi capxy'ajtp ma je mibijcpidijc jim Filadelfia: "Jada ayuc tiy'ajt ñgapxyp je tügpaicpi huätzpi, tügpaicpi janchypi, huidibi ane'my Dios yjäy jadu'n nej David ane'my Dios yjäy jecy'ajty. Je huidibi yaj'ahuatp e co yaj'ahuäch ni pin ca' huaad yaj'aducy. Je huidibi yaj'aducp e co yi' yaj'aducy, ni pin ca' huaad yaj'ahuäch: ⁸ Cuenditungix nej nmina'nich: Ich nejhuüybich nej mdungixy. Ti nyecyich mic'ajt ma miich ajcxy huidibi nipaady nej tüg tigiydac ahuätzpi ma miich mhuinduu, huidibi ni pin ca' huaad yaj'aducy. Nejhuüybich co hueeni Dios yjihui'n ymic'ajt miich ajcxy müidity. Per ti mguydungixy ich n'ayuc, e ca' nxüjich xycoyützi. ⁹ Cuenditungix nej nmina'nich. Yi' ajcxy huidibi mjüpidacp Satanás y'ayuc, je huidibi anüidacp ajcxy co ñaydijigixy judiojy, e ca' yjanchity. Ich yi' ajcxy nmimadägibich jigix yi' ajcxy miich xyhuingojxtinähuiipy xyajmij'adipy. E chi nejhuühuip ajcxy co ich miich ajcxy ti ndzocy. ¹⁰ Müid co ti myajtungixy mecxtujcin ma mdzinaayin, ti mguydungixy ich n'ayuc n'ane'min. Paady ich nihua'nip yajtzögip miich ajcxy ma anajty jäy ajcxy mictägy xyjot'ixcixy xyhuinma'n'ixcixy ajcxy. Miinipy je xi je tiempo mina je mujcu' jot'ixipy huinma'n'ixipy tüg'öcüy je mayjäy huidibi yajpatp ya naaxhuiñ. ¹¹ Ich tzojc nnicxa'nich jüby naaxhuingixy. Mi'ijtcixy yi Dios y'ayuc huidibi miich ajcxy müid jigix ni pin xycapicp ajcxy mbremio, huidibi ti mganar'ajtcixy ma Dios. ¹² Pin mimadacp cuyduñ Dios y'ayuc ytiy'ajt etz cuyduñ yajxon, ich yi' nbidägibich mij'ane'mbi ma ich nDios y'it, jadu'n yi' nipaadip nej tüg pilar huidibi midinaayb jemxypi ma Dios ytiyc. E yi' ni camina ypidzimipy ma Dios y'it, e njayüybich ma yi' ñinix ich nDios yxi, e nañ jadu'n njäayibich je ich nDios ycajp yxi, je Jerusalén jemybi huidibi tzoön tzajpoty ma Dios yajpaady. E nañ jadu'n njäayibich nxü jemybi ma yi' ñinix. ¹³ Pin ytäz Zac müid huen midoy ti je Espiritu Santo ñgapxyp ma tüg'öcüy je mibijcpidijc."

Je ayuc huüdi yajmoy yi mibijcpidijc jim Laodicea

¹⁴ Nijayi' je ángel huidibi cogapxy'ajtpi ma je mibijcpidijc jim Laodicea: "Jadu'n ymina'n je huidibi janchip tudägyip, je huidibi tudägy yejcp Dios ytiy'ajt e ca' yajtigach y'ayuc, je huidibi yajtzondac tüg'óciy tijaty huidibi Dios ti oyduñ: ¹⁵ Nejhuüybich nej mdungixy. Nejhuüybich co miich ajcxy mibijccixy huenjaty, ca' myajtigoydaygixy yi mmibijcin, e ni ca' ooy mij mmibijccixy. Jadu'n miich ajcxy nipaady nej niñ huidibi ni ca' ytichity, e ni ca' y'anity. Jac'oy ixypy co ooy mij mmibijccixy, o co ca' ixypy mdimmibijccixy. ¹⁶ Miid co tim yinjaty tim huenjaty ajcxy mmibijccixy, ca' ooy mmibijcin ymijity ajcxy, e ni ca' ajcxy mmibijcin ytigoydaaygixy, miid jada ycipi ñich miich ajcxy njijpcogapxihuipy miid je ndzip n'éjcinich, tim jadu'n nej jäy ajcxy ixtzujy huidibi y'ahuac yca'tzojcpy. ¹⁷ Miich ajcxy minamb co ooy ajcxy mgomeeñity, ooy ajcxy mij mdzinaayin mjuy'ajtin mmidity, e ca' ti ajcxy myajmayajtcixy, e ni ca' miich ajcxy nejhuüygixy co ayo'nduum myajpatcixy. Jadu'n miich ajcxy nipaady nej ayoobitijc, nej huiintzpi, nej huidibi niñhuädz ixhuädz huidijtp. ¹⁸ Paady ñich miich ajcxy nimaaygixy co copicy ajcxy mbaadip ma ñich Dios ytiy'ajt janchypi, huidibi jadu'n nipaadipy nej jihuüy ajcxy mjuuygixy huädz oori ma ñich, huidibi ti y'oybidzimy miid jin jigix mgomeeñ'ajtcixip. Nañ jadu'n ñich miich ajcxy nnimaaygix co copicy ajcxy mbaatcixip pocyhuinmeecxin ma ñich, huidibi jadu'n nipaady nej jihuüy huit oyjatypi poopjatypi mjuuygixy ma ñich, jigix mxóxcixipy mninix ca'ydi tzo'ydu'n mbaatcixipy. Nañ jadu'n ñich miich ajcxy nnimaaygix co mbaadip tiy'ajt ma ñich nlibro, huidibi jadu'n nipaady nej jihuüy huindzooy mjuuygixy, jigix mdzoydúngxixipy mhuin e huin'it ajcxy m'ijxcixipy huädz. ¹⁹ N'ojypich etz ndzaachytumyb tüg'óciy pinjaty ndzojcpyich njihuüybich, paady ycipi miich ajcxy mhuindina'mjijptina' mic ñich ndiy'ajt etz jothuimbijtcix nej mbocytungixy. ²⁰ Cuenditungix nej cham nnimaaygix. Jadu'n nipaady nej jihuüy ndinayich ma nidüg nidüg jäy ytiyc'aguu e ngojxnojcich ajcxy ytiyc agi'. Nbijctzooybich co xyajtigihuüybich ajcxy ma ytiycin. Pinjaty xyyöcmidobich, e yaj'ahuäch ytiyc, tigihuüybich ma yi', e cayipich miid yi', e yi' miid ñich. ²¹ Pinjaty cuydundaayb Dios y'ayuc ytiy'ajt, ñich je' nmöhuipy it lugar tzajpjoty quipxy miid ñich ma ñich n'ane'mdac. Ti nguydundaayich Dios y'ayuc, e nmidich it lugar ma ñich nDeedy y'ane'mdac, paady ycipi jëbi nmöhuüybich miich ajcxy it lugar ma nyajpaadyich. ²² Pin ytädzac miid, pin midoohuamb, huen midoy huidibi je Espiritu Santo ycapxyp majaty mibijcpidijc huidibi canaagpicy yajpatp."

4

Hbaatcixy capxpaatcixy yi Dios huidibi tzajpjoty tzinaayb

¹ Co jada jadu'n yjajti, chi nhuindicxyich tzajpjoty, e nhuin'ijxyich tüg tijc aguu ahuädz jiiy tzajpjoty. E nmidooyich tüg ayuc janch tim jadu'n nej tüg trompeta yxüxy huidibi ñich anajty jayijp ti xy'ocmigapxpi, xyñimäyich:

—Pet ya ma ñich, cham nyajni'ixihua'n tijaty copicy tunaanip jadaanip co anajty jadaayaabi xi tiempo ñaxy.

² Chi Dios yjihui'n ymic'ajt xymimadactaayich njot nhuinma'ñich, e nhuin'ijxyich tüg ane'mdac jiiy tzajpjoty. E ma je ane'mdac jim anajty tüg ñäy. ³ E je huidibi anajty jim ñäyab ma je ane'mdac, jadu'n anajty yquëxigy nej tüg tzaa janch oybi janch adicxp. E jühuidity ma je ane'mdac je Dios yhuätz'ajt quëxigy nej tüg i'ñch janch oycolor huidibi janch adicxp nej tüg tzaa tzuxjatypi. ⁴ Nañ jadu'n jühuidity ma je ane'mdac jiiy anajty

iipx madaax silla, e ma je silla iñäy iipx madaax mijjäy, ac poob huit müid. E ymüid anajty ajcxy ma ycohuajc coroni ac tim oori. ⁵ Ma je ane'mdac anajty ypidzimy huizuc, e ooy anajty enee yjidjtin ñe'my. E ma je ane'mdac huinduu jüby anajty Dios yjhuiñ ymic'ajt je huixtujcpi, huidibi quëxig nej huixtujc tzinhuaty huidibi ooy mic ytiicxy. ⁶ E je tigot ma je ane'mdac huinduu jadu'n quëxigy nej vidrio mej, janch huadz janch adicxp.

E cujc'amy jühuidity ma je ane'mdac madaax iyujc huidibi müid mayhuin jahuinduuy jajixcipy. ⁷ Je midügpi iyujc tim jadu'n anajty nej tüg jamгаа. Je mimetzpi iyujc tim jadu'n nej tüg huajmang. Je midugiigpi tim jadu'n anajty yhuinijip nej jäy. Je mimadaaxpi tim jadu'n nej me'ty yqueec-huidityin. ⁸ Je nimidaaxpi iyujc ymüid anajty ajcxy nidüg nidüg tudujc yqueec, e ymüid anajty ajcxy yhuin queecnigixy etz queecpa'tci'py. E ca' anajty ajcxy ypocxy xim tzuum, chachminaangixy:

Santo, Santo, Santo, je Huindzin Dios huidibi tüg'óciy nejhuydaayb, huidibi tüg'óciy mic'ajt müid, je huidibi anajty ji'ajtp, je huidibi cham ji'ajtp, etz je huidibi miinaamb.

⁹ Je iyujc ajcxy huin'igixy etz huindzigüygixy etz yajmij'ajtcixy Dios, etz yajnajcixy Dioscojuyipy ma Dios je huidibi anajty iñaayb ma je ane'mdac, je huidibi tzinaayb jugy'ajtp huinixi huinitempo, e ni camina y'ögipy. ¹⁰ Co je iyujc ajcxy jadu'n ytuñ, chi je iipx madaaxpi mijjäy ycojxtinaydaaccixy ma je yhuinduu huidibi anajty iñaayb ma je ane'mdac. E ooy anajty huindzigüygixy je huidibi tzinaayb huinixi huinitempo. Pidaaccixy anajty ajcxy ycorona ma je yhuinduu, cham chachminaangixy:

¹¹ Miich, ich ajt nHuindzin, ich ajt nDios, miich mihuaad co mmüidity tüg'óciy oy'ajtin mij'ajtp etz mic'ajtin, mihuaad co miich nyajcömayip, mihuaad co miich müid'ity tüg'óciy mic'ajt etz mij'ajtp. Jadu'n miich mihuaad, com miich ti myajcojy, ti myaj'abadäy tüg'óciy huidibi ji'ajtp. Com miich jadu'n ti mdzocy, paady ycixpi tüg'óciy tijaty ji'ajttäy.

5

Je libro etz je Dios y'ung, je Cordero

¹ Chi jada' nhuin'ijxyich ma je huidibi anajty iñaayb ma je ane'mdac müidity anajty ma y'a'oygi' tüg libro abugucy, yjaayity jotjoty'amy etz nigixy'amy, yco'aducyity müid huixtujc selli. ² Chi nañ jadu'n nhuin'ijxyich tüg ängel huidibi mij cötujcin müid, yajty müid ycapxin janch mic:

—¿Pin jada' janch tudägyip co yaj'ahuädzip jada libro etz migüdzzydähuipy yi yselli?

³ Ni tzajpjoty, ni naaxhuiñ, ni naaxpa'tci'py ycacá'ity pin tudägyip huidibi mihuaad je libro co yaj'ahuädzip, o oy nigoodi'ajty ja'ixaanip. ⁴ Ich janch yaaxpich müid tajin mayin anajty, com ca' anajty yajpaady pin je libro mihuaad co yaj'ahuädzip, o oy nigoodi'ajty huindicxip. ⁵ Chi nidüg je mijjäy xyñimaayich:

—Ca' myäxy. Chi je' je mic'ajt müidpi ma yi judiojäy, je David y'ap y'oc huidibi nipatp nej tüg ama'ycaa, yi' ti mimadactäy tüg'óciy jibicpi. Yi' mihuaad yi libro yaj'ahuädzip, etz miguejyidähuipy je huixtujcpi yselli.

⁶ Chi nhuindicxpejtyich, e agujc'amy ma je ane'mdacin, etz agujc'amy ma je madaaxpi iyujc, etz agujc'amy ma je mijjäydijc ajcxy, jim anajty ytinäy je Dios y'ung, je Cordero. Ooy anajty ñiguëxigy chaachi'au nej anajty ayo'n tzaachypi ti yajnaxy. Ymüid anajty huixtujc ymu'n, e huixtujc yhuin, je' je' je

huixtujcpi Dios yjihu'i'ñ ymic'ajt huidibi yquejx huindu'my naaxhuin'. ⁷ Chi je Cordero, je Dios y'ung, ninicxy je huidibi anajty iñaayb ma je mij'ane'mdac, e chi oy cychoy je libro huidibi je mij'ane'mbi anajty ymiid ma je a'oy'amybi yci'. ⁸ Co je' anajty ti cychoy je libro, chi je mīdaaxpi iyujc etz je iipxmīdaaxpi mijjāy ycojxtinay'ahuiyday ajcxy ma je Dios y'ung, je Cordero, yhuindu. Ymiid anajty ajcxy nidūg nidūg y'arpa etz oori cop'i utzity mīd poom, je' je' anajty nipaady nej ajcxy chajpcapxy capxy je huidibi ajcxy mībijcp Dios. ⁹ Janch y'iiyb anajty ajcxy iy jemybi, ymīnaangixy:

Miich mīhuaad co mgīyīgy yi libro, e mmīguejīydaayi je huixtujcpi yseli. Com miich ti myaj'ōgyii, ti mgojuy jāy ajcxy ypocy ma Dios mīd mgī'mni'py. Ti mgojuy ma Dios nidūg'ōciy jāy ajcxy ypocy, huen huidibi razity, pinjaty capx huen huidibi ayucity, pinjaty tzomb huen huidibi cajpity huen huidibi naciōnity.

¹⁰ Miich ti xymōoygixyich ane'min etz je tung mijpi nej huaad iich ajcxy n'ojadajtcixy nmībijctzoogixy Dios, jigix jēbi iich ajcxy n'ane'mgixy yi naaxhuin'yāy etz n'ojadajtcixy nmībijctzoogixy Dios mīd jāy ajcxy ycixpi.

¹¹ Chi iich oy nhuin'ixyich e nhuinmīdooyich may ángeles ajcxy ycapxin ymīydaacin jūhuidity ma je ane'mdac, ma je iyujc ajcxy yajpatcixy, etz ma je mijjāy ajcxy yajpatcixy. E janch canaag millon je ángeles anajty ajcxy. ¹² Janch mic'je' anajty ajcxy chachmīnaangixy:

Je Dios y'ung, je Cordero, je huidibi ōc mīd jāy ajcxy ypocy ycixpi, yi' mīhuaad paadip ane'm'ajtin, comeen'ajtin, ixpijcin, mic'ajt, cōmayin, oy'ajt mij'ajt, etz huen'ihuin huinyaaxin.

¹³ E tūg'ōciy iyujc animal je huidijaty Dios ti yajcojy ti yaj'abadīy huidibi jūby tzajpjoty, etz huibi ya naaxhuin' etz naaxpa'tci'py, huidibi jūby mejjoty, nhuinmīdooyich co tūg'ōciy ajcxy chachmīnaangixy:

Tzoc huin'ihuim tzoc cōmayim, tzoc mooyim oy'ajtin etz mij'ajtin huinixii huinitempo je Dios y'ung, je Cordero, etz je huidibi iñaayb ma je ane'mdaacin.

¹⁴ Je mīdaaxpi iyujc anajty chachmīnaangixy:

—Jadu'n huen tuñyii jadyii. Amén.

Chi nañ jadu'n je iipxmīdaaxpi je mijjāy ajcxy ycojxtinaygidactay, chi ajcxy ooy huindzigīy patjihuīy je huidibi huinixii huinitempo tzinaayb.

6

Je huixtujcpi selli

¹ Huin'it nhuin'ijxyich je Dios y'ung, je Cordero, quejtzcih tūg selli ma je huixtujcpi chi nmīdooyich, co nidūg je mīdaaxpi iyujc ycapxy, jadu'n nmīdooyich nej enee yjidity, chi ymīnañ:

—Min ya, e chi m'ixipy.

² Chi nhuindixpejtyich, chi nhuin'ijxyich tūg poob cohuay. E je huidibi yaj'iñaayb je poob cohuay ymajtz'ijtpy anajty tūg tip ma yci'. Chi je' yajmoy tūg coronī co yrey'adipy. Chi jada' choñ tziptunaangixy jigix jacmīmadāgipy ymidzip.

³ Co je Dios y'ung, je Cordero, yaj'ahuaach je mīmetzpi selli ma je necy, huin'it nmīdooyich je mīmetzpi iyujc ma je mīdaaxpi ymīna'ñ:

—Min ya, e chi m'ixipy.

⁴ Chi ypidzim jadüg cohuay tzaptzpi ycolor. E huidibi yaj'ñaayb je cohuay chaptzpi, yčidigüi cötujcin co je naaxhuiñjyä canayyajotcujc'adib ajcxy, e ñayyaj'öcigixipy miñ xyipy. E yajmooy tüg espada mijpi.

⁵ Co je Dios y'ung, je Cordero, agüztzuudy je midugügpí selli ma je necy, chi nhuimidooyich je midugügpí iyujc ma je madaaxpi, ymina'ñ:

—Min ya, e chi m'ixipy.

Chi nhuindicxpejtyich, chi nhuin'ijxyich tüg cohuay tzixypi. E je huidibi anajty yaj'ñaayb je cohuaychixy, ymüid tüg pujxtzim ma yci'. ⁶ Huin'it nhuimidooyich tüg ayuc choñ ma je madaaxpi je iyujc ajcxy yajpaatcixy, ymina'ñ:

—Tüg denario meeñ choñüü tüg libra trigo; nañ jadu'n tüg denario meeñ choñüü tudujc libra cebada, ca' myaj'ayoohuipy aceite etz vino.

⁷ Co je Dios y'ung, je Cordero, yaj'ahuaach je mimadaaxpi selli ma je necy, chi nhuimidooyich co je mimadaaxpi iyujc ma je madaaxpi ymina'ñ:

—Min ya, chi m'ixipy.

⁸ Huin'it nhuin'ijxyich tüg cohuay nitzuxy pu'tz, e je huidibi anajty yaj'ñaayb je cohuay, hue' anajty yxií öcpi. Axam anajty ymiñ je huidibi ane'mb je it ma je öcpi ñümucy. Chi ajcxy yajmoy cötujcin je huidibi yaj'ñaayb je cohuay, jigix yaj'ó'ccixipy je tügpicypí ma je madaaxpicypí naaxhuiñjyä ajcxy. Chi yaj'ögip ajcxy müid tzip, müid yuuba'm, etz müid iyujc ahua'nbi huidibi ya naaxhuiñ.

⁹ Co Dios y'ung yaj'ahuaach je mimigooxpi selli ma je necy, chi nhuin'ijxyich pa'tci'py'amy ma y'ane'mdac yhuinduu, je' ajcxy y'alma huidibi ajcxy yaj'öcpat müid Dios y'ayuc ycixpi, huidibi anajty ajcxy capxhuäcxixp etz nidiy'ajt'ajtcixp Dios y'ayuc. ¹⁰ Je' anajty ajcxy huidibi yaj'ögy patp müid Dios y'ayuc ycixpi chachminaangixy janch mic:

—Huindzin, janch mijpi janch huätzpi, huidibi cuydundaayb yi m'ayuc huidibi meyc ma ich ajcxy. ¿Jadu'ñyi jada' njac-huäcxiba'ñ mina anajty yi jäy ajcxy mdiydunaangixy mdzaachytunaangixy müid ypocy ycixpi huidibi xyaj'oc'ich ajcxy, yi' ajcxy huidibi tzinaayb naaxhuiñgixy?

¹¹ Huin'it ajcxy yajmoy nidüg nidüg poobhuit, e yajnimay ajcxy co huen jacpooxcixy jayinjaty jahuenjaty, ixti cooni anajty yajca'pxy je mibijcpidijc micho'n, je' ajcxy huidibi quipxy müid miich ajcxy tumb ma Dios ytung, je' ajcxy huidibi yaj'ögy paadipy müid Dios y'ayuc yti'y'ajt ycixpi, tim jadu'n nej miich ajcxy ti mbaatcixy yaj'ögy.

¹² Chi n'ijxyich co je Dios y'ung, je Cordero, yaj'ahuaach je midudujcpi selli ma je necy, huin'it ooy naax yhuñixijty, chi je xii yjajty janch tzixy, jadu'n nej tzixyhuit huidibi co'ögytiyc ypidacpy, e je po' y'ahuimbijty nej ni'pyin.

¹³ Chi madza' ooy yca'y naaxcixy tim jadu'n nej piidztim tzuxpi ycäy co micpoj mixidiy. ¹⁴ Chi je tzajp yjihuäcni jadu'n nej tüg libro'abidity. Tüg'öciy tungop huidibi naaxhuiñgixy etz huidibi mejy'agujc, cijx chondägy ypidictäy ma anajty y'ity. ¹⁵ Huin'it ñayyützaayi je reydiyc, je mijtungmüidpídjic, generaltiyc, comeñyidijc, pinjaty ymic'ajt müid, je tumbidijc etz je midumbidijc ñayyützaayi ajcxy nidüg'öciy majaty tzaajut tzaa'ang. ¹⁶ Tzachnimaaygixy anajty tungop tzaajot:

—Nigägootchich nigägootchich, ca'ydi ich ajcxy njac'ijxi yhuñiyjijp je huidibi ññaayb ma Dios y'ane'mdac, e nañ ca'ydi nbäatcixyich je tzaachypí ayo'n huidibi yegamyb Dios y'ung, je Cordero.

17 Com ti je xii je tiempo yhuaad'ajtni mina Dios etz Dios y'ung y'ahua'ndägaangixy etz tzaachytunaangixy naaxhuiñjáy. ¿Pin je' ocmimadägip ajcxy chip y'ejcin?

7

Huidibi anajty ajcxy tiy'ajtmüd ma je Israel jäy ajcxy

1 Chi co jadu'n yjajti, chi nhuin'ijxyich madaax ángeles ajcxy ytinaaygixy ma madaax'itpi naaxhuiñybi ytatzcüy. Adujccixy anajty je midaax'it poj ca'ydi ypojy ya naaxhuiñ, ni ma mejoy, ni ma quipy. 2 Chi nhuin'ijxyich jadüg ángel ymiiniy anajty xibidzimy'amy, müdity ma yci' je Dios juugypi yseli. Jadayaabi ángel ooy mic miyaaxy je jamidaaxpi ángeles ajcxy huidibi anajty ajcxy ti yčidigiigixy je mic'ajt je cötujcin nej huaad yajhuindigooygixy tijaty ya naaxhuiñ etz ma nii mejoy.

3 Chi je ángel yminañ:

—Ca' ti ayo'n mdungixy naaxhuiñ, ni ma mejoy, ni ma quipy chaa, ixti cooni anajty Dios ytiy'ajt y'ijxpejt nbidaacim ma je' ajcxy yhuimbocin, je tiibi ajcxy huin'ixy huidibi tungixp ma Dios ytung.

4 Chi nmidooyich jadu'ñyi je' tiibi anajty ajcxy Dios ytiy'ajt y'ijxpejt ti ymóoyigixy. Migo'px jahuixchigui'px midaax mil je' ñaybaati huidibi anajty ajcxy tiy'ajt müd ma yhuimboc ma nidüg'óciy Israel jäy ajcxy. 5-8 Majmetz mil anajty ajcxy tiy'ajt y'ijxpejt müdity je Judá jäy, majmetz mil je Rubén jäy, majmetz mil je Gad jäy, majmetz mil je Aser jäy, majmetz mil je Neftalí jäy, majmetz mil je Manasés jäy, majmetz mil je Simeón jäy, majmetz mil je Leví jäy, majmetz mil je Isacar jäy, majmetz mil je Zabulón jäy, majmetz mil je José jäy, etz majmetz mil je Benjamín jäy.

Je mayjäy ajcxy huidibi yxoxip müd poob huit

9 Chi jada' nhuin'ijxyich janch mayjäy choon ma canaag nación, hue' ajcxy canaagnax raza'adyii, e capxy ajcxy canaagnax ayuc, etz choon ajcxy ma canaag cajp. Hue' je mayjäy ytinay'ahuiyday ma je mij'ane'mdac huinduu, etz ma Dios y'ung, je Cordero yhuinduu. Janch mayjäy ñumujcy ma je Dios y'ung yhuinduu, ni pin je' anajty huaad camichoudäy ajcxy. Ac poob huit anajty ajcxy müd yxoxyity, e ymüd anajty ajcxy tiixy'aay ma yci'. 10 E janch mic anajty ajcxy miyaaxcixy Dios, chachminaangixy:

ñich ajt nDios yi' je' tügpajc huidibi xyajpocyhuaatzim. ñich ajt nDios yi' je' huidibi ane'mdaayb tüg'óciy, e nañ jadu'n yi' y'ung, je Cordero.

11 E nidüg'óciy je ángelestijc anajty ajcxy ytinaaygixy jühuidityi ma je Dios y'ane'mdac. E cham je mijjäy ajcxy etz je midaaxpi iyujc huíjoj'ihuiiy ajcxy ma je ane'mdac huinduu, huindzigüygixy yajmij'ajtcixy je Dios.

12 Chachminaangixy:

Jadu'n jada. Amén. ñich ajt nDios, je' miñhuaad huinixiñ huinítiempo tüg'óciy je ñhuin, je xondaacin, je oy'ajtin, je ixpijcin, je jäygidacin, je cömayin, je ane'min, je mij'ajtin. Amén. Jadu'n jada.

13 Huin'it nidügti je mij jäy ycapxy, e xy'amidooyich:

—¿Pin jada ajcxy jada' huidibi poob huit müd yxoxyity, e ma yi' jada' ti choongixy?

14 Chi ñich je' n'adzooy:

—Huindzinich, miich mnejhuñyb.

Huin'it je' xy'adzooyich:

—Jada je' ajcxy tibi je mij ayo'n minajxcixy yajnajxcixy, e ti ypocy-huaatzcixy mid je Dios y'ung, je Cordero ni'py, tim jadu'n nej jihuy yhuut ti yajhuaatzcixy janch poob ma Dios y'ung ni'py. ¹⁵ Paady yi' ajcxy yajpaady ma Dios chinaydac yjugy'ajttac, e ytungixy xim tzuum ma Dios ytjc tza-jpoty. E yi Dios y'ung huidibi inaayb ma je mij'ane'mdac, yi' yi' mi'ijtaayb cuend'aty ma yi' yhuinduu. ¹⁶ Ca'p ajcxy jacjihuyigixipy yuu tidzibi, ni xii'an ycajacnogyib ajcxy, ni anbi ycajacyajtzibuyb ajcxy. ¹⁷ Com je Dios y'ung, je Cordero, huidibi cujc'amy yajpatp ma je Dios y'ane'mdac, je' yi' cuend'ajtp ajcxy, jadu'n nej jihuy cobixy cuend'aty, e yajnicxip ma je ni huatzpi ymuxy huidibi yejcp jugy'ajtin. Dios yajquegipy yi' ajcxy ytajin ymayin jigix ca' yjaciyigixipy yjacyaaxcixipy mid tajin mayin.

8

Je mihuixtujcpi selli etz je poomjogi'ñ ac oori

¹ Co Dios y'ung, je Cordero, yaj'ahuaach je mihuixtujcpi selli, huin'it y'ijty oy jahuengi cup hora amofi jibby tzajpoty. ² Chi nhuin'ixyich Dios y'angeles huixtuc ajcxy ytinaaygixy anajty ma Dios yhuinduu, e yajmoy ajcxy huixtuc trompeta. ³ Huin'it jadug angel miiñ, chi je' ytinaay'ihuuy ma mesi huinduu ma je Dios ojadajttac. Je angel ymid anajty tug poomjogi'ñ ac oori. Chi ymooyi poom may'amy huidibi jojcp. E je poomjoc tiguyb ma Dios yhuinduu quipxi mid juydacin nuucxtacin huidibi je jay ajcxy ytumyb huidibi Dios ti huin'ixy ajcxy. ⁴ Ma je angel yci'am jim je poomjoc choon nixy ma Dios yhuinduu quipxy mid je angel hidibi ajcxy ytumyb je tibi ypocyhuaatzcixy. ⁵ Huin'it je angel majch je poomjogi'ñ, chi yaj'ujch mid jibnabj huidibi anajty jim ma je Dios ojadajttaacin, chi najtzjibibuy naaxcixy, huin'it ooy yajmidooy jidijtin micpi etz hidzuc e je naax ooy yucxy.

Je maytrompeti

⁶ Je huixtujcpi angeles ajcxy huidibi anajty mid je huixtujcpi trompeti, ñayni'ixiyi ajcxy co yajxuxaangixy.

⁷ Je midugpi angel yajxuxy je ytrompeti, e huin'it ooy eneedit yca'y mihuidibi jin etz ni'py. Chi oy yca'y naaxcixy. E jahueengi cujc-huäcxy oy nögy je naax, je quipy etz je aay ujt tzuxjatyp etz nöctay miy.

⁸ Je mimetzpi angel yajxuxy ytrompeti, chi ooy yca'y mejyoty jadu'n nej tug mijcop janch tooyb anajty mid jin, e jahuengi cujc-huäcxy je mejy oy y'ahuimbity ni'py. ⁹ E jahueengi cujc-huäcxy oy y'ögy hidijaty anajty tzinaayb ma je mejy. E je maybarco hidijaty anajty ma je mejy, nañ jadu'n jahueengi cujc-huäcxy oy ytimyhuindigoydäy.

¹⁰ Chi je midugpi angel yajxuxy je' ytrompeti, e huin'it oy tug madza' mijpi yca'y. Je madza' jadu'n nipaady nej tug mijjin hidibi nayajcodicxim. Je madza' oy yca'y ma jahuen cacujc-huäcxy mijni, etz ma ni muxy. ¹¹ Je madza' hue' je' anajty xii'adyii ta'm'ujtz. E je ni jahuen cacujc-huäcxy oy yajajtni ta'm, jadu'n yta'mity nej ta'm'ujtz, e ooy jay may y'o'cy mid je ni ycxipi co anajty ti y'ahuimbity ta'm.

¹² Je mimadaaxpi angel yajxuxy je' ytrompeti, e huin'it jahuen cacujc-huäcxy je xii' oy yhuindigooy, e nañ jadu'n je po' etz je madza' jahueeng cacujc-huäcxy oy yhuindigooy. E mid jadu'n ycxipi je po' etz je madza' yhui'ngixy jahuen cacujc-huäcxy agootz, e jahuen cacujc-huäcxy ytiicxin ocyejcn ajcxy xim tzuum.

13 Chi nhuin'ijxyich tüg me'ty anajty yqueec-huidity cuptzajp, e nmidooyich co ymîna'ñ janch mic:

—¡Ay! ¡Naaxhuiñjây ajcxy ayoo bidijc! co anajty trompeti yajxüxy je jatugüigpi ángeles ajcxy, huin'it ayo'n ypada'ñ je naaxhuiñjây ajcxy, ayo'n ypadamy ajcxy, ayo'n ypadamy ajcxy.

9

1 Chi je mîgooxpi ángel yajxuxy je' ytrompeti, chi nhuin'ijxyich tüg madza' anajty ti ycäy naaxcîxy. E chi je madza' yajmoy je ahuaasti huidibi mîid yaj'ahuädzip je ayoodac ma Dios cuend'aty mîidity je ca'oybidijc. 2 Chi je ángel yaj'ahuaach je jut ma je ayoodac, e ma je jut jüiby ypidzîmy jadu'n nej jîinjoc huidibi pidzim ma tüg horni. 3 E ma je joc ypidzîmy ooy maymu' naaxhuiñyîxy chachqueec-huidijtcîxy ooy, e je mu' ajcxy ymooyi mic'ajt, jadu'n nej ca'ty mîidity ytijp. 4 Chi je' ajcxy yajcôtujcmoy co ca' ni ti aay ni ti ujtz yajhuindigóoygîxipy huidibi yajpatp naaxhuiñ, ni ujtz ni quipy. Jÿvi janchtiy ycôtujcin mooyi co huen yajtzaachîhuipy je jây ajcxy huidibi ca' mîidity Dios ytiy'ajt y'ijxpejt ma yhuimboc. 5 Ca' ajcxy yajcôtujcmoy co yjâyaj'ó'ccîxipy, jÿvi co janchtiy ayo'n ajcxy yegipy mîgoox po'. E je ayo'n huidibi anajty ajcxy yejcpy jadu'n je' nej co ca'ty jây yajtzaachÿ mîid ytijp. 6 Je huin'it xîi je huin'it tiempo jây ajcxy ooy anajty o'cin ja'ixtaaygîxy e ni ca' pátcîxipy. Ooy anajty janijot'ájtçîxy o'cin, e cöguëgîib ajcxy je o'cin.

7 Je maymu' jadu'n je' anajty yquëxîgy nej maygohuay huidibi ni'ixî'ijtcîxp co yajnicxáanigîxy ma tzip ytuna'ñyîi. Ymîid anajty je maymu' ma ycohuajc jadu'n anajty quëxîgy nej oori coroni. E je maymu' yhuin'ijjip jadu'n yquëxîgy nej jây yhuin'ijjip. 8 Je maymu' ymîid anajty ycöhuay jadu'n nej töxyjây ycöhuay, e ytîitz jadu'n nej jamгаа ytîitz. 9 E je maymu' ymîid anajty ajcxy jadu'n nej pujx huidibi mîid ñinîcx cohuangîxy. E co ajcxy queec-huidity, ooy ajcxy yqueec yaj'amüy jadu'n chachne'mÿy nej je carro huidibi cohuay ajcxy yjugujcpy co ñîxcîxy ma tzip ytuñyîi. 10 Je maymu' ymîid anajty ajcxy ypîxy tim jadu'n nej ca'ty ypîxy, e ma ajcxy ypîxy ymîid anajty ytijp. E ma ajcxy ypîxy mîidity anajty je mic'ajt co jây ajcxy yajtzaachîhuipy mîgoox po'. 11 E je maymu' je' ajcxy yrey'ajtpy je ángel huidibi ygohuajc'ajtp je ayoodac, hue' xîi'adyîi hebreo'amy Abadón, e griego'amy yxîjiti Apolión, hue' je yxîi yhuimbîdzîmy: je huidibi yajhuindigooyb.

12 Najx je' je ayo'n jayjîpi, e ytîgoy'ity je jametzpi ayo'n co je jayjîpi ti y'ocjadyîi.

13 Je mîdudujcpi ángel yajxuuxy je ytrompeti, chi nmidooyich tüg ayuc chooñ ma je mîdaaxpi huaj mu'n ity ma je altar ac óoribi, huidibi anajty ijtp ma Dios yhuinduu. 14 Je ayuc ymîna'ñ:

—Ñîma' je mîdudujcpi ángel huidibi anajty trompeti mîid: “Najtzmadzi' yî mîdaaxpi ángeles huidibi ajcxy coxoch ijtp ma Eufates mîjnîiba'.”

15 Huin'it oy yajcoguejtuttcîxy je mîdaaxpi ángeles, jîgîx yjâyaj'ó'ccîxipy jahuen cacujc-huäcxy huidibi yajpatp ya naaxhuiñ. Je mîdaaxpi ángeles ni'ixî' je' anajty y'ijtcîxy, je huin'it hori, je huin'it xîi, je huin'it po', je huin'it jîmîjt co anajty yaj'ögaangîxy jahuen cacujc-huäcxy je naaxhuiñybi jây ajcxy. 16 E nmidooyich co ajcxy michoy je soldadtîjc huidibi anajty ajcxy cohuaygîx. E hue' mejtz mîgo'px millón anajty ajcxy ñaybattáayigîxy je soldados ajcxy.

¹⁷ Jadu'n nhuin'ijxy'ich je cohuay ajcxy, e m'iid je ñijäy ajcxy hu'idibi anajty yaj'iñaayb. E je ñijäy ym'iid anajty ajcxy pujx ma ycaach, je' m'iid ñin'icx cohuaangixy. E je pujx hue' anajty ycolor tzaptz, azul etz pu'tz. Je cohuay ajcxy jadu'n anajty ycohuajc nej jamгаа ycohuajc, e ma ajcxy y'ahuac ypidzimy nej jün, nej jünjoc, etz nej azufre. ¹⁸ E m'iid jada jahueuc cacucix-huäcxy naaxhuiñyäj chach'o'cy ajcxy m'iid je jün, je jünjoc etz je azufre yci'xi hu'idibi anajty pidzimb ma je cohuay ajcxy y'ahuac. ¹⁹ Je cohuay ajcxy ym'iid anajty mic'ajt ma y'ahuac etz ma pi'xy. Com je' ajcxy ypi'xy jadu'n je' anajty nej xoox m'iid ycohuajc, e je cohuay ajcxy chach'ahua'ndaaccixy m'iid ypi'xy.

²⁰ E je jacjadyii jäy ajcxy hu'idibi ca' y'o'cy m'iid jadayaabi ayo'n, ca' ajcxy yjothuimbijty ma Dios, ca' ajcxy ixmajch je jibicpi hu'idibi ytungixp. E ni ca' ajcxy ixmajch nej ajcxy je ca'oybi huindzig'iygixy. Nañ jadu'n ca' ajcxy ixmajch nej ajcxy huindzig'iygixy hu'idijaty ajcxy oyduñy'ip m'iid plata, m'iid bronce, etz tzaadzech etz quipychech. Je hu'idijaty ajcxy y'oydumyib etz ñidzejtztuutcixy, ni yca'ijxcixy, ni ycamidoogixy, ni yca'yöygixy. ²¹ E ni ca' je jäy ajcxy yjothuimbijtcixy ma Dios, ca' ajcxy ixmajch jadu'n nej ajcxy chachjäy'aj'o'ccixy, jadu'n nej ajcxy tzachaxpojcixy ym'ig'itijc, jadu'n nej ajcxy huingbi töxyjäy tzachm'igapxtigooygixy, etz jadu'n nej ajcxy chachmeetzcixy.

10

Je ängel m'iid je mutz libro

¹ Nhuin'ijxy'ich co choon' tzajpjoty tög ängel mic'pi ñiducyity m'iid joc, e m'iidity i'ñch ma ycohuajc. E yhuin'yjip yquëxigy nej xii. Je' ytecy jadu'n yquëxigy nej mijjñy'e'n. ² E ma yci' m'iidity tög libro yëphuäcxy, e pidacy y'a'oydecy mejyhuingixy, e y'anajtytecy pidacy naaxhuiñgixy. ³ Chi je ängel oy janch mic yaaxquency jadu'n nej tög jamгаа yäxy. E co anajty jadu'n ti yaaxquëgy, chi oy yajmidoy huixtujc jidijtin hu'idibi ycapx yci'm'ayuc. ⁴ Co je huixtujcpi jidijtin oy ycapxtaaygixy, chi ñich anajty njaaya'ñich hu'idibi ti capxy. Chi nmidooy'ich tög ayuc choon' tzajpjoty xyñimäy'ich:

—M'i't jada ayuc yüch hu'idibi yi huixtujcpi jidijtin ti capxy, ca' mjaay.

⁵ Chi je ängel hu'idibi nhuin'ijx'ich co mejyhuingixy etz naaxhuiñgixy ytinäy, yujcxajy yci' a'oy'amybi tzajpcixy. ⁶ Chi je ängel capxcödujcy co je Dios hu'idibi jugy'ajtp huinixii huin'itempo, je hu'idibi yajcojy je tzajp, je naaxhuiñybi, je mejy etz tög'óc'iy hu'idibi jiiby yajpattaayb; e je Dios jadu'n ymina'ñ:

—Ca' jada yjac-huäcxibani mina nguexa'ñich tzaachyp'i ayo'n ya naaxhuiñ.

⁷ Co yhuaad'ajtnip je xii je tiempo ma anajty je mihuixtujcpi ängel yxuux yajxutzondägy, chi cuyduunip je Dios y'ayuc yti'ajti hu'idibi ca'pin anajty huinjihuñy, je ayuc hu'idibi je Dios ytumbidijc je profetas ajcxy ñajtzcapxi'y jecy'ajty.

⁸ Je ayuc hu'idibi nmidoohu'ich, je hu'idibi anajty ti choon' tzajpjoty, ycapxy je' jadüg'oc, e xyñimaay'ich:

—Ñicx miich etz ci'yig yi libro hu'idibi yëphuäcxy yi ängel ym'iid ma yci'. Je' je' je ängel hu'idibi anajty tinaayb mejyhuingixy etz naaxhuiñgixy.

⁹ Chi n'öy'ich ma je ängel nbijctzooy'ich co huen xymöy'ich je pi'clibro, chi je' xyñimaay'ich:

—Matz e cojicxnax, e xyajta'mm'iy'ip mjot e ma miich m'ahuac mjihuñhuipy päg jadu'n nej ceripäg.

¹⁰ Huin'it ñich je pi'clibro ngiy'igy huidibi je ángel anajty ym'íd ma yci', e chi ñich je' ngöjicxnajxy. Ma ñich n'ahuac njihu'iyich janch päg jadu'n nej ceripäg. Co oy ngojicxnajxtäyich, chi oy y'ahuimbijtni janch ta'm ma ñich njot. ¹¹ Chi mic'amy nyajnímaayich:

—Nícx miich capxhuácx jadüg'oc je ayuc huidibi Dios ti xymöy, je huidibi ti mgapxhuácxxy ma je mayñaax maygajp, ma je mayñaciones, huidibi canaag ayuc capxcixp, etz ma je reydi'jc ajcxy.

11

Je metzpi testigo

¹ Chi jada' nyajmooyich tüg paxy, jahuengi jadu'n anajty yquëx'igy jadu'n nej baari huidibi quipx yajhuamb. Chi ajcxy xyñímaayich:

—Pid'ig e quipxta' yi Dios ytíjc, nañ jadu'n quipx je mesi ma Dios yahhuindzig'iy, etz nañ jadu'n michou naag jäy ajcxy jii'by Dios huindzig'iygixy.

² Je Dios ytíba' ahuing miich je' pidäg, ca' mguipxipy. Com yi' yi' ti yci'dig'iyii yi jäy ajcxy huidibi ca' yjudío'jäyity. Yi jäy ajcxy huidibi ca' yjudío'jäyity ymimadägamyb ajcxy je Jerusaléngajp ma Dios m'iidity tzinaydac etz ane'mamb ajcxy jii'by huixchigui'px metz po'. ³ Íich metz testigo nguexipy'ich ma je cajp ma Dios m'iidity tzinaydac, e yi' ajcxy capxhuácxamb ñich n'ayuc tüg mil jametz'migo'px jatugi'px xii. Yxoxy'ity ajcxy m'íd huit nícu'yaam íxcuyjaam.

⁴ Je metzpi testigo jadu'n nipaady nej je metzpi olivo cop etz je metzpi candelero huidibi tinaaygixp ma je Dios yhuinduu, je huidibi ñaaxhuiñybi ane'mb. ⁵ Pen ji pin nej jaty midundigoya'ñ je metzpi testigo, je' ajcxy yajpidzimip je' ajcxy jii'n ma y'ahuac, yjicxtähui'py yjii'ndähui'py je' ymidzip. E jadu'n je' y'ögipy pinjaty anajty je metzpi testigo midundigooyb. ⁶ Je metzpi testigo ym'íd yi' ajcxy cötujc co ahuáctú'jccixity je tzajp, ca'ydí ytüy jadu'ñyi tiempo anajty ñhuácx'icxy capxhuácx'icxy Dios y'ayuc ytí'y'ajt. E nañ jadu'n ym'íd ajcxy cötujcin co ñii yaj'ahuimbijtcixipy ni'py. Yi' ajcxy yajtun'ib yaj'jadib canaagnax ayo'n ya naaxhuiñ, naag'oc anajty ytimdzó'jccixy. ⁷ E co anajty je metzpi testigo ajcxy yajmaaygixy ytung, chi je iyujc huidibi anajty pidzim'ib ma je ayoodac, je abismo, je' je' tziptuunip m'íd je metzpi testigos etz yaj'öctähui'p je metzpi testigo. ⁸ Chi je metzpi testigo ñini'cx ajcxy yhui'mipy mijni'gucj mijtügucj jim ma je mij ciudad ma je Huindzin Jesucristo yajcrudzpejti, je cajp huidibi tundigooy m'íd Dios tim jadu'n nej Sodoma etz Egipto ytundigooy jecy'ajty. ⁹ Nijéjity jäy ajcxy huidibi xi ya conaaxip cogajpíp, oy ypinjáyity, oy ti ayuc capxcixy, y'ixipy ajcxy tug'ig xii'jagup je metzpi testigo ñaaxni'cx mijtügucj, e ni ca'a'ixihui'py ajcxy co yajnaaxti'gihui'yb. ¹⁰ Huidijaty ajcxy tzinayyb ya naaxhuiñ ooy yxondáaccixipy etz yjotcug'iygixipy m'íd je' ycxipi co je metzpi Dios ytestigos ajcxy anajty ti y'o'ccixy. Chi je mayjáy ajcxy miñ xyipy ñaymóoyigixipy tijaty, e ñayyajniguéjigixipy tijaty. Com je metzpi yéydjic huidibi nidí'y'ajt'ajtp anajty Dios ytí'y'ajt, ti anajty ooy ayo'n yejccixy ma naaxhuiñy'jáy ajcxy. ¹¹ Codug'igxii jacup naxy, chi Dios cixj yajjugypijctäy je metzpi öcpi, e chi ajcxy jadüg'oc ypid'igy, e pinjaty je' íjx, ooy je' ajcxy chachchig'iy. ¹² Je metzpi testigo huidibi nidí'y'ajt Dios, midoy ajcxy tüg ayuc janch mic jii'by tzajpjoty anajty ñimáayigixy:

—Pejtcix yeeby cix.

Chi ajcxy ypa'ttig'iy tzajpjoty ma tüg joc, e íjxi ajcxy ymidziptíjc. ¹³ E janch huin'itíy ooy naax yücxxy m'íd tüg mic ujx. E tüg picypí je majc picypí jäy jim

Jerusalén oy ymähüüygixy. E müd je uyx ycixpi y'o'cy ooy mayjäy, ñaybaati je öcpi huixtujc mil yëdyjc. E jacjadyii jäy ooy chigüygixy yjihüüygixy, e öjadajtcixy mibijctzoogixy ooy je Dios tzajpjoty.

¹⁴ Ti ñaxy je mimetzpi ayo'n, chi tzojc ymiin je midugügp.

Je mühuixtujcpi trompeti

¹⁵ Chi je mühuixtujcpi ängel yajxuxy je' ytrompeti, e huin'it oy yajmidooy may'ayuc tzajpjoty mic yminañ:

Je ane'min huidibi ya naaxhuiñ, yi' je' cham müd ajt nHuindzin Dios etz yi' yCristo, e yi' je' ane'mip huinixii huin'itempo.

¹⁶ Je iipxmidaaxpi mijjäy huidibi anajty ajcxy iñaayb ma y'ane'mdac ma Dios yhuinduu, cijx je' ajcxy yhuioj'i huیداایگixy, e chi ajcxy ooy Dios üбаты capxpaty, yminaangixy:

¹⁷ Huindzin Dios, Dioscojuyip nyajnáxcixpich ma miich, huidibi jac mic'ajt müd ca'ydi jac pin. Müich tüg'óciy mdundaayb mjahtaayb mnehüüydaayb. Müich je' huidibi ijtnaayb, e ti m'ijtnäy, e m'ida'ñyi, com müich ti m'ijxcugüy je mgötujcin, e ti mbidägy m'ane'min.

¹⁸ Mayñaax maygajp mayñaaxhuiñyjäy ooy yjotmäty ajcxy, müd co ti xii hori paady co müich mdzachtuna'n je jäy ajcxy müd ypocy ycixpi. Ti je xii je hora paady co müich mdiyduna'n je jäy ajcxy tübi y'o'ccixy. Ti je xii je hori paady co müich mmöhua'n je mdumbidijc ypremio, je mdumbidijc huidijaty najtzcapxiy ajcxy müich m'ayuc, huidijaty tudägy'ajtin ti patcixp ma müich, je huidijaty müich mxii xychigüyüp, huen ymij'ana'city huen ymutz'ana'city. Ti je xii je hora paady co müich myajügoya'n je pinjaty yajhuindigoogixyp naaxhuiñyjäy ajcxy.

¹⁹ Je huin'it tiempo oy Dios je ytjic y'ahuäch jüby tzajpjoty, e chi nhuin'ijxyich je caax ma Dios ycötujcin y'ity. Nañ jadu'n oy nhuin'ijxyich huidzuc, etz nmidooyich co ooy ñe'my, etz nmidooyich enee yjidijtin, etz njhüüyich tüg uyx, etz ooy yca'y eneedütz mijatypi.

12

Tüg töxyjäy etz je ama'y tza'ñ

¹ Je huin'it hora oy yquëxigy tzajpcixy tüg ijxpejt mijpi. Tüg töxyjäy ñidigooyity müd xii, jadu'n nej jihüüy müd tüg huit ñümoçity, e jadu'n yquëxigy nej jihüüy anajty po' yajhuäcpey, e ymüd ma ycohuajc tüg corona ac oori huidibi majmetz madza' müd. ² Jadayaabi töxyjäy hue' anajty ungmijäy'ajtp, e janch yaaax tinaayb je' anajty müd je tzaachypi, müd co y'ung anajty yajma'xung'ada'ñ. ³ Huin'it oy yquëxigy jadüg tiy'ajt ijxpejt tzajpcixy. Tüg ama'y tza'ñ janch mij, tzaptz ycolor, e müdity huixtujc ycohuajc, majc ymu'n, e tüg corona majaty ycohuajc. ⁴ Je mij tza'ñ müd je' ypixy jugujcmujcy jahueng cacujc-huäcxy je madza' jim tzajpcixy. Chi je' najtzyemiyday je maymadza' naaxhuiñygixy. Je mij tza'ñ oy yhuäcxipy ma je töxyjäy yhuinduu huidibi anajty ungbadamb tzojc, chi tzüda'ñ je pi'c'ungma'xung janch tim jëyi anajty yajma'xung'aty. ⁵ Chi je töxyjäy yajma'xung'ajty tüg pi'cyëdyjc, huidibi ane'mip müd Dios ymic'ajt, ymüd yi' tüg pujxtajc huidibi ijxpejt ajt co mij ane'min müdity ya naaxhuiñ. E yajpijcy je y'ung, chi yajnicxi ma Dios etz ma je' y'ane'mdac. ⁶ Chi je töxyjäy yqueecy ñicxy mijtig'iduum, ma anajty Dios ti ñi'ixiyii y'it ylugar co jim y'idipy, e jim ymöhüüyb ycaayin y'uucin tüg mil jamejtzmigo'px jatugi'px xii.

⁷ Je huin'it tiempo tüg tzip yjajti tzajpjoty müd je' ycixpi. Chi Miguel huidi mij cötujcín müd, müd jadyii y'ángeles ajcxy, ooy chiptuñ müd je ama'y tza'ñ etz yi' y'ángeles ajcxy. ⁸ E ca'p je ama'y tza'ñ ajcxy ymadacy ma je tzip, e ca'p je' ajcxy müd'ajty tigiydac tzajpjoty. ⁹ E jadu'n Dios yajqueecy je mujcu', je ama'y tza'ñ mijjáybi, jüby tzajpjoty. Je' je' je ama'y tza'ñ huídibi xii'ajtp diablo etz Satanás, je huídibi huin'imb tüg'óciy naaxhuiñyjáy. Je mujcu', je ama'y tza'ñ, müd je' y'ángeles ajcxy oy yajcötijnajxtäy ya naaxhuiñ.

¹⁰ Je huin'it hora nhuinmidooyich tüg ayuc janch mic tzajpjoty chooñ, yminañ:

—Ti je xii je tiempo nigoody mina Dios ti nihua'ñ ti yajnidzögy jáy ajcxy ma je mujcu'; mina Dios ti yajnigüëxigy yi' ymic'ajt; mina Dios ti yajnigüëxigy yi' y'ane'min; etz mina Cristo ytigüy ane'mbi müd ymic'ajt. Com ti Dios cötijnaxy je mujcu' huídibi tzachxip ich ajt nmigügtijc, je mibijcpidijc. Je mujcu' anajty tzachxip ajcxy xiiim tzuum ma Dios. ¹¹ Ich ajcxy nhermanotijc ti yi' mimadaaccixy je mujcu' müd je Dios y'ung ñi'py, etz müd je' y'ayuc ytiy'ajt tüibi mibijccixy, je huídibi ajcxy nidiy'ajtcixp ma yi mayjáy. Ca' ajcxy tzigüy anajty co yjugy'ajt ytigóoygixip. Nigi ni'ixi' y'ijtcixy anajty müd ymibijcín oy ytimy'ó'ccixipy. ¹² Jotcujc'ajtcix etz jotcugüygixy huídibi jüby tzinaaygixp tzajpjoty. Ayo'n ypadamyb ajcxy huídibi tzinaayb naaxhuiñygixy etz mejyjoty. Com je mujcu' ti je' ycidägy ma müch ajcxy müd chip y'ejcín. Com je mujcu' ñejhuüyb co tim jayinjaty jahuenjaty xii tiempo jacmüdity.

¹³ Co je mujcu' ijxy co ti yajcötijnaxy ya naaxhuiñygixy, chi ooy pahuidijttacy je töxyjäy huídibi anajty ti yajpi'c'aty pi'cyëdyjic. ¹⁴ Chi je töxyjäy metz me'tyqueec mijpi yajmoy, jigix cóguëgipy je ama'y tza'ñ, ñicxip agueëgiccp mijtigüduum ma je ama'y tza'ñ ca' ñijädüby. Jim mijtigüduum yajmoy ycaayin y'uucín tugüjgimijtja cup. ¹⁵ Chi je ama'y tza'ñ ooy nü yajpidzimy ma y'ahuac, jigix y'ahuimbidipy mij nü huidi je töxyjäy pagujip mij nijoty. ¹⁶ E yi naax ooy je töxyjäy pubejty, chi je naax y'ahuäcxy, e uucti'ztay je nü huídibi anajty je ama'y tza'ñ ti yajpidzimy ma y'ahuac. ¹⁷ Müd jada ycixpi je ama'y tza'ñ ooy y'ahua'ndacy müd je töxyjäy, chi ñicxy tziptumbi müd je töxyjäy y'ap y'oc huídibi jacjimip, je' ajcxy huídibi cuydumb Dios y'ane'min ycötujcín, je' ajcxy huídibi cuydumb je ayuc huídibi Jesucristo anajty capxhuäcxy.

13

Je metzpi ca'oy'iyujc

¹ E jim ndinay'ihuüyich ma püjot mejypäbi. Chi nhuin'ijxyich co tüg iyujc janch oy chigüyñi ypidzimy mejyjoty ymüd anajty huixtujc ycohuajc, e majc ymu'n. E ma ymu'n müdity majc corona. E ma ycohuajc müdity anajty cojaay yxii huídibi yajjotma'tp Dios. ² Jadayaabi ca'oy'iyujc huídibi nhuin'ijxyich, jadu'n anajty yquëxigy nej tüg cuuxyubijy. E ytecy jadu'n anajty yquëxigy nej osi ytecy, e y'ahuac jadu'n anajty yquëxigy nej jamгаа y'ahuac. Chi je ama'y tza'ñ oy cötujc möy, mic'ajt möy, mij'ane'min möy, je ca'oy'iyujc. ³ E n'ijxyich tüg ycohuajc ma je ca'oy'iyujc co mij chaachijty, nej jihuüy je' yaj'ögüib. Chi je chaach'au oy choogy, e tüg'óciy naaxhuiñyjáy ooy janch jihuiyigixy huinmaaygixy müd jada ycixpi co ti choocy. Chi je mayjáy ajcxy panicy je ca'oy'iyujc. ⁴ Je mayjáy ajcxy ooy huindzigüygixy je ama'y tza'ñ, je mujcu', com je' co anajty ti möy cötujcín ane'min je ca'oy'iyujc. Chi ajcxy nañ jadu'n ooy huindzigüygixy je ca'oy'iyujc, chachminaangixy:

—¿Pin jada' ocjadu'nip nej jadyaabi ca'oy'iyujc, e pin jada' octziptuunip m'iid yi'? Ca' pin.

⁵ Chi je ca'oy'iyujc yajmooyi mic'ajt, jaydēbi amij agix capxip etz nigapxip Dios oy jibic, nej huaad Dios yajjotmāty. E nañ jadu'n mic'ajt moy, jaydēbi m'iid'adipy ane'min cōtujcin huixchiguīpx metz po'. ⁶ E jadu'n je' tuuñ. Nigapxy ni'oñy ooy Dios. Nigapxi Dios yxii oy ca'oy, etz nigapxi ni'oñy Dios ytijc. Nañ jadu'n nigapxy ni'oñy huidibi ajcxy jilby tzinaayb tzajpjoty. ⁷ Chi mic'ajt ymooyi, jigix chiptuunip m'iid je huidijaty mibijcp Dios, huidijaty m'iid ity Dios, ixti mibaad mimadaaccixy. Nañ jadu'n mooyi cōtujcin mic'ajt, jigix ane'mip naaxhuiñyāy huen huidibi razaity huen huidibi cajpity, huidibi capxcixp huen huidibi ayucity. ⁸ Tüg'óciy mayñaaxhuiñyāy ajcxy huidijaty janch ni ycamiiñ yxii jaybety ma je jugy'ajt libro huidibi je Dios y'ung, je Cordero, ym'iid. Dios yhuinma'ñypidacy jayijp ca'ni naaxhuiñybi anajty chondāgy co y'ung y'oga'ñ m'iid jāy ajcxy ycixpi, jaydēbi cijxjaayj ajcxy yxii ma yi jugy'ajt libro.

⁹ Pinjaty tād'ac m'iid, pinjaty mido'mbigamb jada ayuc, huen mido'mbijccixy. ¹⁰ Pen Dios ti yhuinma'ñypidāgy co pinjaty ymīgūg yajnicx mach, nañ jadu'n je' ajcxy nicxip mach ci'm. Pinjaty ymīgūg yaj'ōcp nañ jadu'n y'ōgip jadu'n nej ymīgūg anajty yaj'ōgy. Paady ycixp yi' ajcxy huidijaty mibijcp Dios, huen yajtungixy m'iid ymīgūgtijc mecxtujcin etz mibijcin.

¹¹ Huin'it nhuin'ixyich jadūg ca'oy'iyujc chooñ naaxjoty, e ym'iid anajty metz ymu'n, tim jadu'n nej pi'ccōbixymang ymu'n. E je' jadu'n anajty ycapxy nej je ama'y tza'ñ ycapxy. ¹² Je m'imetzpi ca'oy'iyujc ym'iid ane'min huidibi je jayijpi ca'oy'iyujc ti ymōyii. Je m'imetzpi ca'oy'iyujc jadu'n ane'my co je poj naaxhuiñ etz je naaxhuiñyāy huen ojadajtcixy huindzig'iyigixy je jayijp'atypj ca'oy'iyujc huidibi anajty je chaach'au ti chōgy. ¹³ Nañ jadu'n ooy anajty tijaty mijhuinma'ñ tuñ, ixti j'in yajcōdig'iyb tzajpcixy, yajcāy naaxcixy ma jāy ajcxy yhuinduu. ¹⁴ E m'iid je mijhuinma'ñ huidibi je m'imetzpi ca'oy'iyujc ytuñ ma je jayijpi ca'oy'iyujc yhuinduu, chi je' huin'iiñ huidijaty ajcxy tzinaayb naaxhuiñ. Nañ jadu'n je' pidacy y'ane'min co yajni'gojtúutcixipy je ca'oy'iyujc huidibi anajty tzachijip m'iid espada, e ca' y'ōgy, jadu'n anajty jactzināy. ¹⁵ Je m'imetzpi ca'oy'iyujc yajmic'ajtmoy co yajjugy'adip je tzaadzech tūibi anajty yajni'gojtúutcixy, jigix je' ycapxipy etz nañ jadu'n jigix je' ane'min pidāgipy co yaj'ōctāhuipy pinjaty ca' y'ojadadyii. ¹⁶ Chi je m'imetzpi ca'oy'iyujc ane'my yi pi'ctijc, mij'anāctijc, mijjāydijc, comeeñydijc, ayoobitijc, tumbidijc, midumbidijc etz jac pinjaty co huen ajcxy tiy'ajt iixpejt jadu'n pidaaccixy ma ajcxy y'a'oygi', o pen ca', ma yhuimboc. ¹⁷ Jadu'n ytuñ jigix ni ca'p anajty pin huaad ti juy toogy, pen ca' je' ajcxy ym'iid je ca'oy'iyujc tiy'ajt y'ixpejt, o yxii, o je' yxii ñinúmero. ¹⁸ Jadyaabi ayuc chojcpy ipijcin, pinjaty huinjihuñyib jēbi m'ihuinma'ñybaady ti número je ca'oy'iyujc m'iid. Je' je' je número huidibi tūg jāy m'iidity. Je jāy ñinúmero hue' je' tudujc m'igo'px jatugūpx tudujc.

14

Je nimigo'px jahuixchiguīpx milbi yēydijc ajcxy y'iy

¹ Chi jada' nhuin'ixyich cumāyoty je Dios y'ung, je Cordero, anajty ytināy ma je cōgop huidi yxii Sión. Ym'iid anajty migo'px jahuixchiguīpx madaax m'iid jāy huidibi anajty ajcxy m'iid cojay ma yhuimboc je Dios y'ung yxii, etz yi' yTeedy yxii, je Dios Teedy. ² Nhuinmidooyich tūg ayuc chooñ tzajpjoty, jadu'n nmidooyich nej mijñii y'a'ich, nej enee yjidity. Hue' je' anajty nmidooyich

nej mayjä y'arpa yajcoogixy. ³ Ooy anajty ajcxy igixy tüg iy jemybi ma je mij'ane'mdac yhuinduu, ma je midaaxpi iyujc jugy'ajtmüdpí yhuinduu, nañ jadu'n ma je mijjäy ajcxy yhuinduu. Jac ni pin je' anajty ca' huaad ixpicy je iy, jeyi ajcxy je huixchiüipx midaax milbi jëbi ixpijccixy je iy, je huidibi ajcxy Dios ti yhuin'ixyii etz ti yajnidzögy ya naaxhuiñ. ⁴ Jada je' ajcxy huidibi ca' ajcxy migapxtigoogixy töxyjäydijc, huadz tudägy ajcxy yjot yhuinma'n müidity, ca' ajcxy pijccixy. E ypanixcyp ajcxy je Dios y'ung, je Cordero, oy tim ma'amy ñicxy. Yi' ajcxy je jayijp'atypi jäy ya naaxhuiñ huidibi Dios ti yjuybidzimy ma anajty ijtcixy codoogiy müid ypocy ycixpi. Jadu'n ajcxy nipaady ma Dios Teedy etz ma je' y'ung, je Cordero, nej je tim jayijpi je almas ajcxy huidibi ti yajpidzimy ya naaxhuiñ. ⁵ Ni ti anii ti ycayajpaady ma je' ajcxy. Com ca' ajcxy tibocy müidity, ca' ti xihuin ajcxy müidity ma Dios y'ane'mdac.

Je nidugügpí ángeles ajcxy y'ayuc ytiy'ajt

⁶ Chi nhuin'ijxyich jadüg ángel yqueec-huidity cuptzajp, e ymüid anajty Dios ytiy'ajt jemybi oybi huidibi ijtp huinixii. Hue' je' yajcapxhuäcxip ma huidibi anajty ajcxy tzinaaygixp naaxhuiñ, huindu'my nación, huen huidibi jäyity, huidibi capxp huen huidibi ayucity, huidibi tzinaayb ma huen huidibi cajpity. ⁷ E je ángel ymína'n anajty janch mic:

—Tzigüygix Dios, huin'igix huinyaaxcix cömaygix Dios. Ti paady je xii je hori mina Dios tyduna'n yajtigoya'n yi' ajcxy huidibi jibic tumb. Ojadajtcix je huidibi yaj'oyiiy je tzajp etz je naax, je mejy etz majaty nii ymuxy.

⁸ Co je midügpi ángel ycapxtaay, chi je mimetzpi ángel ymínañ:

—Ti ymic'ajt ytigoydäy je Babilonia je mijpi cajp. Yi Babilonia jäy ti yajhuinma'ñydygoydäy je naaxhuiñyjäy müid yjibic-huinma'n, paady yi Babilonia jäy ayo'n müidity cham, com je Dios ti ymijotmättäyii ajcxy. Jadu'n Babilonia nipaady nej tüg töxyjäy huidibi huin'imb yëdyjctijc müid anii etz jocnii.

⁹⁻¹⁰ Co je mimetzpi ángel ycapxtay, chi je midugügpí ángel ymínañ janch mic:

—Pen pinjaty huindzigüyb yajmij'ajtip je ca'oy'iyujc etz je ñügojtutin etz nañ jadu'n cöbijccixy je ca'oy'iyujc ytiy'ajt y'ijxpejt ma yhuimboc o ma yci', hue' Dios tzaachytunüyb yi jadu'mbi jäy ajcxy mictägy, ypaadip ajcxy Dios chip y'ejcín. Tim jadu'n nipaady nej jihuiy Dios yaj'ügyii ajcxy je vino nii huidibi yi' ti ni'ixy. Dios ti ni'ixy je it ma ajcxy ayo'n pada'n, tim jadu'n nipaady nej je tasi ma Dios yvinonii ijtp. Chi je' ajcxy ayo'n paadipy ma tyoy je mijjin müid azufre ma je Dios y'ángeles yhuinduu etz je Dios y'ung, je Cordero, yhuinduu.

¹¹ Je jünjoc huidibi anajty pidzimb ma anajty je mayjäy ayo'n paatcixy, pidzimip je' huinixii huinitempo. E ni pöocxin ycaca'ty xiiim tzuum müid je pinjaty anajty huindzigüyb pa'tjihuiyib je ca'oy'iyujc etz müid y'ahuinax, o pen ycöbijcipy anajty je ca'oy'iyujc yxii ycojayity ma yhuimboc o ma yci'.

¹² Com Dios chaachytunamyb je jäy ajcxy huidibi ijtp müid je ca'oy'iyujc, paady ycixp copicy co yi jäy ajcxy huidibi ijtp müid Dios huen cuydungixy yaxon Dios y'ane'min ycötujcín etz huen mibijccixy mijpidaaccixy tudägy Jesús, etz nañ jadu'n yajtungixy mecxtujcín ma ajcxy chinaayin.

¹³ Nmidoohuich tüg ayuc tzajpjoty choon xyñimäyich anajty:

—Cojay jada ayuc: “Jadachambi etz jacnicxpi xii tiempo, jotcujc ajcxy huidijaty öccixp co mibijccixy je Huindzin Jesús.” Je Espíritu Santo ymínañ co jadu'n tunamb jadamb, pocxnip ajcxy nej ytungixy, e co ajcxy yjadipy

tzajpjoty, chi ajcxy nejhuñhuip je' ajcxy tzajpjoty tzinaaybi jadu'n nej je miñijcpi ajcxy anajty oybi ti tungixy.

Co Jesús anajty miñ t̄yduñ tzaachytuñ jibicj̄ȳdijc

14 Chi jada' nhuin'ijxyich t̄üg joc janch poob. E ma je joc n̄c̄x iñäy t̄üg yquëx̄igy nej je j̄äy huidibi t̄zoon tzajpjoty (je Cristo). Je' ym̄id anajty ma ycohuajc t̄üg corona ac oori, e ma yci' m̄idity t̄üg hoz janch j̄ijpi. 15 E ypidzimy ma je Dios chinaydac jadüg ángel, je' tzachm̄iyäxy anajty janch mic je huidibi anajty iñaayb jocn̄iḡixy, ymina'ñ:

—Pidäg ȳi mhoz, e yajpid̄iḡy ȳi cosecha, com ti paady je x̄ii je hori etz je cosecha ti chamni j̄iiby naaxhuñ.

16 Huin'it je' pidacy je' yhoz ya naaxhuñ, je huidibi anajty iñaayb jocn̄iḡixy, chi ya naaxhuñ yajpid̄iḡy je ycosecha.

17 Nañ tim jadu'n huin'it jadüg ángel ypidzimy ma je Dios chinaydac j̄iiby tzajpjoty. Nañ jadu'n je' anajty m̄idity yhoz janch j̄ijp. 18 Chi jadüg ángel ypidzimy ma je Dios ojadjttac huidibi anajty c̄otujc m̄id ma je j̄iin. Chi yaaxi janch mic je huidibi anajty je' yhoz janch j̄ijpi m̄id, chi n̄imay:

—Pidäg ȳi mhoz janch j̄ijpi ma ȳi muuxycha'm cosecha huidibi yajpatp j̄iiby naaxhuñ, com ti ooy chamni.

19 Chi je ángel yajnaxy je' yhoz naaxhuñ, chi yajpid̄iḡy je camuuxy-cha'm cosecha, chi t̄üg'it̄iy yajn̄iḡidacy ma huaad yajhuinm̄ic̄xy. Hue' je' yhuimb̄idzimy co je' je' je' mij ayo'n je' mijtzaachyp̄i huidibi Dios yquexamyb m̄id j̄äy ajcxy ypocy yc̄ixpi. 20 Je camuuxycha'm hue' je' oy yajhuinm̄ic̄xy Jerusalén cajppa'. Ma anajty ti y'ocn̄iḡidacpi ypidzimy ooy n̄i'py janch com, ycoody mabaad je cohuay ajcxy m̄idity yfreno, e ym̄ijhuin'ajt̄in hue' anajty m̄idity tuḡiḡ migo'px kilómetro.

15

Ȳi ángeles ajcxy m̄id je huixtujc̄nax̄p̄i ayo'n

1 Huin'it nhuin'ijxyich jadüg t̄iy'ajt̄ ijxpejt̄ janch mijpi tzajpjoty, e janch oy huinmaayñi. Huixtujc̄ ángeles anajty m̄idity c̄i'am je huixtujc̄pi tzaachyp̄i ayo'n huñdi coḡix̄iyñip, e m̄id jadu'n yc̄ixa'ñ yt̄igoya'ñ Dios chip y'ejc̄in.

2 E nhuin'ijxyich jadu'n nej t̄üg mejy ac vidrio, e je vidrio miñuidid̄i j̄iin. E jim anajty je j̄äy ajcxy huñdijaty madac co ca' huñdziḡiy anajty je ca'oy'iyujc etz je' y'ahuinax, je huñdijaty ca' ajcxy c̄öbijc̄i je ca'oy'iyujc yx̄ii ñinúmero. E jim anajty ajcxy yt̄inaayḡixy n̄iḡixy ma je mejy ac vidrio huidibi janch ad̄ic̄xp̄ ajajp anajty, ym̄id ajcxy je arpas huidibi ajcxy Dios mooyi. 3 Ooy anajty ñiḡixy je Moisés y'iy, je Dios ytumbi etz nañ jadu'n anajty ñiḡixy je Dios y'ung, je Cordero, y'iy huidibi minamb:

Mij ooy, etz janch mijhuinma'ñ huñdibi miich ti mduñ. Huñdzin, miich Dios huñdibi jac mic'ajt̄ m̄idip ca'yd̄i jac pin. Janch tudägy miich mn̄i'aa mdu'aa. Miich rey'ajtp̄ huñdu'myñaaaxhuñ huñix̄ii huñit̄iempo.

4 ¿Pin miich xyca'octziḡihuamb, Huñdzin? ¿Pin miich xyca'occ̄ömayaanip mx̄ii? Tug'óc̄iy naaxhuñȳj̄äy xyajm̄ij'ad̄ipy xyhuñdziḡihuipy, com miich nayd̄uḡpajc je huñtz̄pi Dios, com miich nyaj'ijxp̄ mḡötujc̄in co ytudäḡity.

5 Co jadu'n yjajti, chi n'ijxyich co y'ahuaach je Dios y'it j̄iiby ma Dios yt̄ijc̄ huñdibi yajpatp tzajpjoty, ma y'ity je tzaa ma yjaybetȳity Dios yc̄otujc̄in. 6 E ma je Dios yajhuñdziḡiy yajpa't̄ihuñy, j̄iiby ypidz̄im̄y huixtujc̄ ángeles. Ym̄id

anajty ajcxy yci'am huixtujc ayo'n tzaachypi. Hue' anajty ajcxy yxoxity miiid huit janch oybi janch huätzpi, e janch adücxp ajajp anajty. Ymiiid anajty ajcxy oorihuün mabaad ycaachyjijp. ⁷ Nidüg je midaaxpi iyujc jugy'ajtmiiidpi moy je huixtujcpi y'ángeles huixtujc tasi ac tim oori, janch ujtz je tasi miiid je Dios chip y'ejcin. ⁸ E je it ma Dios yajhuindzigüy yajpa'tjihuiy yajpa'tjihuiy ujtztay je' miiid je jünjoc huidibi jadu'n ñipaty nej je Dios y'oy'ajtin etz Dios ymic'ajtin. E ni pin anajty huaad ca' jiiiby ytigüy ma je Dios ytijc jiiiby tzajpjoty, ixti cooni je' yciixtähuipy je huixtujcpi ayo'n, je tzaachypi huidibi je huixtujcpi ángeles ajcxy ymiiid.

16

Je tasi huidibi ujtz miiid ayo'n tzaachypi

¹ Chi nmidooyich tüg ayuc choon ma Dios ytijc jiiiby tzajpjoty, nimay anajty janch mic je Dios y'ángeles nihuixtujcpi:

—Nixc ajcxy yajyojctuuicix jiiiby naaxhuiñ yi huixtujcpi tasi huidibi ujtztay miiid Dios chip y'ejcin.

² Chi ñicxy je midügpi y'áangel, chi je' ytasi yajtemduty jiiiby naaxhuiñ ujtz miiid may'ayo'n. E tüg'óciy je mayjäy huidibi anajty ajcxy miiid ma yhuimboc je ca'oy'iyujc ytiy'ajt, pinjaty anajty je ñigojtuutin huindzigüy yip pa'tjihuiy yip, chi je' ajcxy ypaati ñibidzim tüg nibüdz janch jibicpi, e huidibi janch pijcp.

³ Je mimetzpi y'áangel yajyojctuty je' ytasi huidi anajty ujtz miiid ayo'n mejyhuingüxy. Chi je mejy y'ahuimbijty ni'py, jadu'n nej jihuiy öcpi ñi'py. E huidijaty iyujc jiiiby tzinaayb mejyjoty, cijx je' y'öctäy.

⁴ Je midugüigpi y'áangel yajyojctuty je' ytasi huidi anajty ujtz miiid may'ayo'n maajaty je mijñi, etz maajaty nii ymuxy, nañ jadu'n ac ñi'py je' y'ahuimbijttay. ⁵ Chi nmidooyich co je ángel ymina'ñ huidibi ane'mb je nii:

—Huindzin Dios, tudägy mduñ co ti mdiyduñ je naaxhuiñjy äy ajcxy miiid ypocy ycixpi, e jadu'n ti mguexy mij ayo'n ya naaxhuiñ, Huindzin Dios, janchypi huätzpi miich, huidibi ijtnaayb etz ti m'ijtnäy. ⁶ Com je naaxhuiñjy äy ajcxy tundigooy co ajcxy teemi yojci je mibijcpi dijc ñi'py, je huidibi mhuin'ijx, je huidibi ajcxy miich m'ayuc najtzcapxiyb anajty. Paady ycixp miich je nii huidibi yi naaxhuiñjy y'uuccixyp, ti myaj'ahuimbity ni'py, com jadu'n ajcxy mihuaadity je tzaachypi miiid ajcxy ypocy ycixpi.

⁷ Nmidooyich co pinjaty ma je it ma yajhuindzigüy Dios, ymina'ñ:

—Janch jadu'n, Huindzin Dios, huidibi tüg'óciy mic'ajt miiid, miiid mdiy'ajt etz miiid mdudägy'ajtin, ti mdiyduñ je naaxhuiñjy äy ajcxy miiid ypocy ycixpi.

⁸ Je mimadaaxpi Dios y'áangel yajyojctuty ma je xii je' ytasi huidi anajty ujtz miiid Dios chip y'ejcin. Chi je xii yajmoy ymic'ajt co jäy nögüib miiid je' yjiin. ⁹ E tüg'óciy jäy ajcxy yxiidzaydaayi janch mic. E ni ca' ajcxy yhuinma'ñ yajtigajch, ni ca'ojadajtcixy ni ca' cömaygixy Dios. Nigi ajcxy ooy jibic Dios nigapxy ni'ojiiy, je Dios huidibi ane'mdaayb tüg'óciy ayo'n miiid ymic'ajt.

¹⁰ Je mimigooxpi y'áangel yajtemduty je ytasi, huidi anajty ujtz miiid Dios chip y'ejcin, ma je ca'oy'iyujc y'ane'my etz ma tüg'óciy it lugar ma je ca'oy'iyujc y'ane'min, e huin'it oy ycoodziygidactäy. Yi jäy ajcxy ooy ytoodz oc'adzützmüjccixni miiid je ayo'n tiibi anajty ytuñiy yjaduyi. ¹¹ Per ni jadu'n ajcxy ca'ixmajch je jibicpi huidibi anajty ajcxy ytuñiy. Nigi ajcxy ooy oyñinej ycapxcixy etz ni'ojiiy gixy Dios tzajpjotypi miiid je jübi pa'mii etz je nibüdz ycixpi.

¹² Je midudujcpi y'áγγελ yajtemduty je ytasi huidi anajty ujtz m̄id Dios chip y'ejc̄in ma je Eufrates mijñi. Chi je mijñi yt̄ich jigix jēbi ajcxy je reydičj ñaxy huidibi ajcxy tzoomb x̄ibidzim'y'amy.

¹³ Chi nhuin'ijxyich co yp̄idzimy ma je ama'y tza'ñ y'ahuac, etz ma je ca'oy'iyujc y'ahuac, etz ma je profeta falso y'ahuac yp̄idzimy tuḡig ca'oybi. E je tuḡigpi ca'oybi jadu'n anajty yquēx̄igy nej tuḡig Tuc. ¹⁴ E je tuḡigpi Tuc hue' ajcxy ca'oybi ym̄id, e tungixy anajty mijhuinma'ñ m̄id je mujcu' ymic'ajt. E oy ajcxy huoomucy huidijaty anajty rey'ajtp huindu'my naaxhuiñ, jigix je' ajcxy chiptungixipy m̄id je mijpi Dios huidibi t̄ug'óciy mic'ajt m̄id, co anajty je x̄i je tiempo yhuaad'ajtni huidibi Dios ti yajniōduḡiy. ¹⁵ Jadu'n Dios ymina'ñ:

—Cuenditungix iich n'ayuc. Ameerch nhuimbida'ñich naaxhuiñ jadu'n nej meetzpi ameech nicxy meech tijaty. Paady yc̄ixp jotcujc p̄injaty ni'ix̄i xy'ahuixpich, je huidibi ypocy ti ymēxyii, e tudāgy'ajtni ti paady ma iich jigix ca' jadu'n paadip nej t̄ug jāy huidibi yhuitt ti meechyii, e jadu'n je' yhu'i'my nihuadz, e tzo'ydu'n jihūy co jāy yhuindicxyii. ¹⁶ Chi je tuḡigpi ca'oybi huoomujctay ajcxy je reydičj ma t̄ug it huidibi yx̄i Hebreo'amy Armegedón.

¹⁷ Je mihuixtujcpi angel yajyojctuty je' ytasi jim pojoty, e ma je it ma ajcxy huindzičgy Dios etz ma je' y'ane'mdac tzajpjoty, jiiby t̄ug ayuc chooñ janch micpi ymina'ñ anajty:

—Ti ytuñyii yjadyii.

¹⁸ Huin'it ooy yjati huidzuc, ne'm̄in micpi etz j̄idijtn, ooy naax ȳucxy m̄id t̄ug uyx janch micpi, nim̄inaabi jadu'n ycajadyii maabi jāy chinay'ljtigixy naaxhuiñ. ¹⁹ Chi je mij ciudad, je Jerusalén, oy yhuācxy tuḡig p̄icy, nañ jadu'n je may ciudad huidibi huindu'myñaxhuiñ, cijx ym̄ijāhuidyāy. Chi Dios jāymejtzcoty je Babilonia cajp nej je jāy ajcxy jim ytundigooygixy, e chi quejxy may ayo'n jim m̄id chip y'ejc̄in yc̄ixpi. ²⁰ T̄ug'óciy je naax mejy'agujcpi ytigoyday. Etz t̄ug'óciy tungop naaxhuiñygixy cijx je' ytigoydāy. ²¹ Nañ jadu'n ooy ycāy chooñ tzajpjoty eneed̄itz mijjatyp̄i majaty jāy ajcxy, janch jempxy anajty je eneed̄itz, t̄ugiatyp̄i huixchigūpxy kilo. Chi jāy ajcxy ooy oyñinej nigapxy ni'oj̄iyy je Dios m̄id je eneed̄itz yc̄ixpi, com ooy je' mij chachjati je ayo'n je castigi.

17

Je tōxyjāy jibictzinaaybi chaachyp̄i ycastigi

¹ Nid̄ug je huixtujcpi ángeles huidibi anajty ajcxy m̄id je huixtujcpi ytasi ymiñi. Chi ajcxy ymiydacy m̄id iich, xyñimaaygixich:

—M̄in yam, miñ n'ayjni'ix̄iyy je tzaachyp̄i huidibi ypadamyb je tōxyjāy pocyumbi, huidibi iñaaay mejyhuingixy. ² Je reydičj ya naaxhuiñ ti ooy ytundigooygixy m̄id jada tōxyjāy, e je naaxhuiñjāy ajcxy ti ooy huinma'ñyidigooygixy m̄id jada tōxyjāy ypocytun̄i huinma'ñ, jadu'n nej jihūy ajcxy ooy ti ym̄ucigixy.

³ E Dios yjihui'ñ ymic'ajt xyajcumāyich e cumāyjoty xyajnicxyich je áγγελ m̄ijtiḡiduum. E jim n'ijxyich t̄ug tōxyjāy yaj'iñāy t̄ug ca'oy'iyujc huidibi ycolor tzaptz, e janch n̄iducy m̄id p̄injaty yx̄i cojaayip huidibi yajjotma'tp Dios, e ym̄id anajty huixtujc ycohuajc etz majc ymu'n. ⁴ Je tōxyjāy hue' anajty yxojax m̄idit̄y m̄id huit janch oyjatyp̄i, ycolor uc̄y etz tzaptz, ooy anajty yaj'oyguēx̄igy m̄id oori, m̄id pi'ctzaa janch oybi etz perla. Ym̄id anajty ma yci' t̄ug tasi ac tim̄ oori janch ujtz je' anajty m̄id jibic-huinma'ñ huidibi ca'

y'oyjyãgidaacnity, huídibi pocytoni huinma'n mïd. ⁵ E ymïd anajty cojaay tũg xii ma yhuimboc huídibi ca' pin huinjihuïy. Je letra jadu'n ymïna'n: "Je mijpi Babilonia, huídibi nigop'ajtip pocytoni huinma'n etz tũg'ócïy tijaty ca' y'oyjyãgidaacnity ya naaxhuiñ." ⁶ Mic'amy ïich oy nhuinma'n nyajmiñ nyajmech co je tũxyjãy hue' je' anajty ti yaj'o'ccïxy je huídibi ajcxy mïbijcp Dios etz huídibi ajcxy Jesús yjã'y'ajtip, e jadu'n nipaady nej jihuïy je tũxyjãy ti ooy ymũgyii mïd je mïbijcpidijc ñi'py. Co jadu'n nhuin'ijxyich, chi ooy ngïjxy ngũejtyich njihuïy nhuinmaayich. ⁷ Chi je ángel xyñimaayich:

—¿Nej co mgïxy mgũety? ïich miich nyajnimãhuipy nej yhuimbidzïmy huídibi ca' pin huinjihuïy ma yi tũxyjãy etz ma yi ca'oy'iyujc huídibi yaj'ïñaayb, huídibi ycohuajc huixtujc mïd etz majc ymu'n. ⁸ Yi ca'oy'iyujc huídibi ti m'ixy, je' yi' tïibi chinãy e cham ca'p je' ma. Chi ypidzïmipy ayoodactuuyb, jayijp ma anajty ca'ni nicxy y'ayoy ytigoy tũcci'yi. E je jãy ajcxy huídijaty tzïnaayb naaxhuiñ, e ca'p yxi' y'ity cojaay ma je jugy'ajt libro huídibi oyïy ca'ni anajty naaxhuiñybi chondãgy. Ooy je' ajcxy huinmãaygixipy jihuïygixipy co ïjcxixipy je ca'oy'iyujc huídibi jecyïp ti y'octzïnaaybi, e cham ca' je' ma, e chi jada' jadũg'oc yhuimbida'n.

⁹ Ya ii tigati pin jëbi huinjihuïy je huixtujcpi cohuajc, je' je' je huixtujcpi copjot ma je cajp y'ity. E je cajp jadu'n je' nipaady nej jada tũxyjãy pocytumbi. ¹⁰ Je huixtujcpi cop jadu'n ajcxy nej huixtujcpi rey. Ma je huixtujcpi rey migoox je' ajcxy tïibi ymic'ajt ytigooygixy. Nidũg je' cham y'ane'my. Je jadũgpi ca'ni je' ymïiñ. E co je' ymïinipy je huídibi cogixïyb, ca'p je' mijcajee yhuãcxïbipy. ¹¹ Je ca'oy'iyujc huídibi jecyïp tzïnay, e cham ca' ma, je' je' je miductujcpi rey, oy je' yjãjëjity nidũg ma je nihuixtujcpi rey. Huin'it je' ñïcxnipy ayooobi jottigoooybi tũcci'yi ayoodactuuby.

¹² Je majcpi mu'n tïibi m'ixy, je' je' je majcpi rey huídibi ca'ni ajcxy ytigũygixy ane'mbi. E cidigihuiib ajcxy ycõtujcin co yrey'ajtcixipy tũg hora quipxyi mïd je ca'oy'iyujc. ¹³ Jada majcpi rey ajcxy tú'ciy ajcxy y'ijtcixy, tú'ciy ajcxy yhuinma'n, e yegipy ajcxy y'ane'min ycõtujcin ma je ca'oy'iyujc. ¹⁴ Tzïptuunip ajcxy mïd je Dios y'ung, je Cordero. E je Cordero ymïmadactãhuipy je' je majcpi rey ajcxy. Com je' je' tũgpajc Huindzïnip ma pin janaydïjip huindzïn. Je' je' tũgpajc reyïp jac mic'ajt mïdipi ma je reydiãc ajcxy. E pinjaty Cristo mïd y'ity, Dios je' ti huin'ixy, e tudãgy je' panicxy Dios y'ung.

¹⁵ Nañ jadu'n je ángel xyñimaayich:

—Yi mejy tïibi m'ixy ma je tũxyjãy pocytumbi ïñãy, hue' je' jadu'n nipaady nej maygajp, nej mayñaciön ma mayjãy chinaygixy huídibi capxcïxp canaagnax ayuc. ¹⁶ Je majcpi mu'n tïibi m'ixy ma je ca'oy'iyujc, je' ajcxy ca'ixa'nip catzoga'nip je tũxyjãy pocytumbi. Chi ajcxy ix'ïjxnip je tũxyjãy pocytumbi, yajhui'mipy ajcxy nihuãdz. Chi ajcxy je tũxyjãy pocytumbi ñinïcx tzu'tzïpy, e nõccixipy mïd jïin. ¹⁷ Dios ti pidãgy ma ajcxy y'aa yjot huen tungixy nej Dios tzocy, mïd co anajty ti pidaaccixy tú'ciy yhuinma'n. E cõtujc mõhuaangixy ane'min mõhuaangixy co yrey'adipy je ca'oy'iyujc, ixti cooni yajcuydundãhuipy je ayuc huídibi Dios anajty ti capxy. ¹⁸ Je tũxyjãy tïibi mhuin'ixy, je' je' je mij cajp huídibi ane'mdaayb je reydiãc ajcxy huindu'myñaxhuiñ.

¹ Co jada jadu'n yjajti, chi nuhin'ijxy'ich jadüg ángel ycidägy naaxhuiñgixy, chooñ tzajpjoty müid ymij'ane'min ymijcötujcin, e ooy je naax yaj'aniiy müid je ytiicxin yjajin. ² Chi je ángel ooy mic yaaxqueecy ymina'n anajty:

—Ti ymic'ajt ytigooy, ti ymic' ajt ytigooy je mijpi Babilonia cajp, e hue' ti y'ahuimbity mujcu' chinaydac, etz canaagnaxpi ca'oybi ymaadac chinaydac, etz ti y'ahuimbity joonmaadac joondzinaaydac, je joon ajcxy huidibi ca' yhuädzity, huidibi ca' y'oyjäygi daacnity. ³ Com ti je mayjäy huidibi tzinaayb ma tüg'óciy nación yhuinma'nydigooogyixy müid je Babilonia yjibic-huinma'n pocytunüi huinma'n. Ti je reydiyc huidibi ane'mb ya naaxhuiñ müid ytundigooogyixy je Babilonia. Nañ jadu'n je ajuybi adoocpi ajcxy, huidibi ya naaxhuiñ yajpatcixy, ti oy ymeefybatcixy müid je Babilonia pocytunüi ñegocio. Je Babilonia jadu'n yi' nej tüg töxyjäy jibic-huinma'n müidpi.

⁴ Chi nmidooy'ich jadüg ayuc chooñ tzajpjoty, e ymina'n anajty:

—Pidzimgix ma yjiibi cajp com üich müich ajcxy njé'ajtpy, jigix müich ajcxy ca' m'aminmugipy ma yi' ajcxy ypocy, e ni xycapaadip müich ajcxy je ayo'n tzaachypi huidibi Dios yquexamyb ma je Babilonia cajpjäy. ⁵ Yi' jadu'mbi cajpjäy ypocy ti oy mayyüñi e Dios yi' ajcxy tzachytunüib müid ajcxy ypocy ycipxi. Dios yjäymejchp yi' yjibic-huinma'n ajcxy huidibi ti tungixy. ⁶ Dios ymoayhuimbiditye je tzaachypi je Babilonia cajpjäy, jadu'n nej ajcxy yi' je tzaachytuñ Dios yjäy ajcxy, Dios ymoayhuimbiditye je Babilonia cajp tzaachypi mejtz jadu'ni ca'ydi jadu'n nej yi' ti yecy. ⁷ Mo' yi' Babilonia cajp yi' tzaachypyi ayo'n, tim jadu'n nej yi' ti ñaymöyüi ma yi' chinaayin etz ñayjihüüiyi amij agix. Yi' ymina'n jotjoty huinma'nyjoty: “Fich mij'ane'mbi üich. Ca' nyajpaady'ich nej tüg co'ögytöxyjäy müidity tajin mayin. Ni nga'ixipyich jüüyin yaaxin.” ⁸ Müid je' ycipxi tügxiüi ymiinipy je mij'ayo'n o'cin, tajin mayin, jüüyin yaaxin etz yuuba'm ma je Babilonia cajp. Chi ninögihuiipy je Babilonia cajp müid jün. Com yi' Huindzin Dios ooy yi' ymijity, e yi' ti yajpocycäy yi' Babilonia cajp, huidibi nipatp nej tüg töxyjäy pocytumbi.

⁹ Je reydiyc ya naaxhuiñ huidibi jibic-huinma'n pocytunüi huinma'n tungixp quipxy müid je Babilonia jäy, chi ajcxy ytáxcixipy ymágyixipy yjügyixipy yáaxcixipy co anajty ijxcixyp je Babilonia cajp jünjoty co anajty ytooybicy. ¹⁰ Jiguem ajcxy yjacmij'ijxcixipy müid co anajty chigügyixy co páatcixipy ayo'n quipxy müid Babilonia, e ymináangixipy:

—¡Ay, müich Babilonia mij cajp, huidibi ooy mgapxpaadyity, ooy mmijity, ooy mmic'ajt müidity! Per janch tim tüg jaxigy ti xyñimiiñ je' ayo'n huidibi Dios ti quexy müid mbocy ycipxi.

¹¹ Je ajuybidijc adoocpidijc huidibi ajcxy naaxhuiñ jügyixipy yáaxcixipy ajcxy müid je Babilonia cajp ycipxi, com ca'p anajty pin juuyip ajcxy yjuy ytoocy. ¹²⁻¹³ Je ajuybidijc adoocpidijc ajcxy ymüid oori, plata, tzaa oyjatypi, perla oyjatypi, lino huit oyjatypi, sedí huit oyjatypi, rey yhuít, huit color tzaptzi, nañ jadu'n ymüid ajcxy canaagnaxpi quipy huidibi oyjaty xuucp, pajc vaso, quipy vaso oyjatypi, cobre vaso, pujx vaso, marmol vaso. Ymüid ajcxy canela, etz tijaty ooy oy xuucin müidity, poom, mirra, perfume, vino aceite, trigo tim, iyujc animal huidibi tzimy yajyöyb, cöbixy, cohuay, carreti, tumbi huidibi codoogiyip, etz jacjadyii jäy juugypi. ¹⁴ Je ajuybidijc adoocpidijc ajcxy ñimähuiy je Babilonia jäy ajcxy:

—¡Ca' ajcxy m'ocmüidñ je tim tza'm huidibi ajcxy mjot yjatzojcpy, ca' ma anajty y'ocyajpatni. Ti tigoydäy müich ajcxy mjogy'ajt, je mgomeeñ'ajt, etz m'ijxin huidibi anajty müich ajcxy mmüid, ca' ma ocyajpatnip jadüg'oc!

15 Je huidijaty anajty huit itxaayb meñ itxaayb, e ti ycomeeñygojcixy ma yijimbi cajpin, jiguem ajcxy yhui'mdähuiipy müid tzig'iñ jihui'ñ, co nañ jadu'n je tzaachypi castigi padaangixy. Yäxip ajcxy etz nidäjcixipy nimäaygixipy je Babilonia cajp. 16 Chi ajcxy ymīnaanipy:

—¡Ay! ¡Miich mij cajp huidibi ayo'n patp! Jadu'n miich anajty nej tüg töxyjäy huidibi xoxyip müid huit oyjatypi, huidi ycolor ucy etz tzaptz, yaj'oyguëxigy müid oori, müid pi'ctzaa oyjatypi, müid perla. 17 ¡Janch tim tüg jaxigy, janch tim tüg hori, ti yxicy miich mmijjygy'ajtin mmijcomeeñ'ajtin!

Tüg'óciy pinjaty nihuindzin'ajtp barco etz pinjaty barcojoty viajetumb, marinerotijc ajcxy etz huidibi ajcxy tumb ma je mejy, ti je' ajcxy yhui'mdaaygixy jiguëgy. 18 Co ajcxy ijxy nej anajty ytoy yjocy je mij ciudad, chi ajcxy ymīnañ:

—¿Huidibi cajp jada' ji jadu'nip nej jada anajty jadayaabi mij cajp?

19 Chi ajcxy ooy naax ñayyajcöhuoogiiyi müid jotmay, cham ooy yaaxcixy, ytajcixy ymaygixy, e mic chachmīnaanangixy:

—¡Ay! ¡Je mijpi oybi cajp huidibi ayo'n patp, ma je tüg'óciy pinjaty anajty ymīd barco ma mejy, ti ycomeeñygojcixy anajty müid je'! ¡Janch tim tüg mij jaxigy, tim tüg hori, ti yhuindigoydäy miich mmijjygy'ajtin mgomeeñ'ajtin!

20 Jotcugiiygix müid je Babilonia cajp ycixpi, miich tzajpjoty tzinaayb ajcxy, etz miich ajcxy huidibi Dios xyhuin'ijx co jēbi m'apóstol'ajtcixy, etz nañ jadu'n miich ajcxy huidibi najtzcapxiy Dios y'ayuc ytiy'ajt, etz nañ jadu'n pinjaty ijtp ma Dios. Com co Dios ti yajpocycāy Babilonia cajp, je' yi' ti yaj'adigach jadu'n nej ajcxy xymīddundigoy.

21 Huin'it tüg ángel janch mic'ajtmīdipi conigy tüg tzaa, jadu'n nej tüg molino paandzaa mijpi, chi je' cogādziy mejyjoty, e ymīnañ:

—Nej jada tzaa ti ytigooyin, nañ tim jadu'n je mijpi oybi Babilonia cajp ytigoydähuiipy. E janch ni mina pin cajac'ixipy. 22 E ni camīna ajcxy mga-jac'mīdohuiipy jim Babilonia co pin arpi coob etz flauta yajxuuxp trompeti yajxuuxp mijñi mijtu'. E ca' jacyajpaadip pinjaty ti dung ii jajtp, ti oficio jajtp, ni mgamīdohuiipy je molino paandzaa ñe'min. 23 Ni mina ti ycatūcxipy jadüg'oc ma je Babilonia cajp. Ni mina ycayajmīdohuiipy jadüg'oc je xii je xondaacin huidibi jajtip co jāy ypicy. Oy je Babilonia ajuuybi y'adoocpi ajcxy anajty ooy yjamīcjāyity ya naaxhuin', e ti ajcxy huin'iiñ mayñāaxhuin'ijy müid ajcxy brujerías.

24 Jim ma je Babilonia cajp jim yajpaady je' ajcxy ñi'py je tiibi ajcxy Dios y'ayuc najtzcapxiyi, je huidibi ajcxy huin'ixyip ma Dios etz tüg'óciy mībijcpidijc tiibi yaj'ögyaatcixy naaxhuin'igyxy.

19

1 Co jadu'n yjajti, chi nmīdooyich may'ayuc micpi co mayjäy ajcxy ooy ycapxcixy ymiydaaccixy tzajpjoty, ymīnañ ajcxy:

¡Aleluya! ¡Ich ajt nDios yi' tügpaic ti xyajñidzoocim ajt n'alma. Yi' je' tügpaic mij'oy'ajt müid.

2 Com janch etz tudägy Dios y'ane'min ycotujcin. Ti je' möy ycastigo je Babilonia cajp huidibi ti yajhuinma'ñydidogoy je naaxhuin'ijy müid je ycatudägy'ajtin ycixpi. Yi' je' ti yaj'adigach ma je Babilonia cajp je Dios ytumbi, huidibi yaj'ögy ajcxy, pat jim.

3 Chi ajcxy jadüg'oc ymīnaanipy:

—¡Aleluya! Je j̄injoc huídibí j̄im Babilonia co ytoy je cajp, pa'ttiḡihuij tzejpc̄ixy huinix̄i huínitiempo, ca' yj̄in yp̄idz̄ip ni m̄ina.

⁴ E je iipx madaaxp̄i m̄ijj̄ay etz je madaaxp̄i iyujc, huídibí jugy'ajt m̄id ñaygojxtinaygidaaci naaxc̄ixy, chí ajcxy ooy Dios ojadajty huídibí anajty ane'mb ma je m̄ij'ane'mdac, e ym̄inaanḡixy:

—¡Jadu'n jada! ¡Aleluya!

⁵ Huin'it yajm̄idooy j̄iiby ma je Dios y'iñaydac yc̄otujctac t̄ug ayuc ym̄ina'ñ: Huindziḡiyiḡix̄ iibatc̄ix capxpatc̄ix̄ iich ajt nDios nid̄üg'óc̄iy pinjaty tumb m̄id yi', pinjaty yi' tziḡiyb, huen mutzt̄ijc̄ity huen ym̄ij'anact̄ijc̄ity.

Je jotcujc'ajtin huídibí nbadaanim co anajty Cristo yj̄ay nim̄iñ

⁶ Nm̄idoohuich nañ jadu'n nej jihuiy ooy mayj̄ay ycapxy ym̄iyd̄agy, nej canaag m̄ijn̄i y'a'ich, nej enee m̄ic̄pi yj̄idity, ym̄inaanḡixy:

¡Aleluya! Ti y'ane'mdiḡiy j̄iiby naaxhuin̄ je Huindzin Dios huídibí t̄ugpajc m̄ij̄ip.

⁷ Agujc'ajtim jotcujc'ajtim, tzoc c̄omaayim Dios, tzoc mooyim m̄ij'ajt. Com ti paady je x̄i je tiempo m̄ina Dios y'ung naybadáaniḡixp t̄umugáaniḡixp m̄id yi' yj̄ay, tim jadu'n nej jihuiy yp̄iga'ñ m̄id yi' ajcxy. Ti Cristo yj̄ay ñayñi'ix̄iiḡixy, jayd̄ebi ñaybátiḡixip yt̄ügm̄ijcc̄ixip m̄id yi', tim jadu'n nej t̄ug j̄ay ñayxoxyii co yp̄iga'ñ.

⁸ Dios ti a'ix̄iy co Cristo yj̄ay ajcxy ñayxox̄iyb m̄id yhuít oyjatypi, huídibí ad̄icxp ajajp.

Je huit xojx oyjatypi jadu'n nipaady nej je tud̄agy'ajtin huídibí je m̄ibijcp̄idijc̄ ti paatc̄ixy ma Dios.

⁹ Chi je ángel xyñimaayich:

—Jaay jada ayuc. “Jotcujc ajcxy pinjaty huooyip ma yajhuinx̄iduna'ñ Dios y'ung, je Cordero, co nayd̄ügmugáaniḡixy m̄id yi' yj̄ay ajcxy.”

Chi je ángel xyñimaayich:

—Jada je' Dios y'ayuc janchypi.

¹⁰ Chi ngojxtinay'ihuiyich ma je ángel yhuinduu co njahuindziḡihuaañich. Chi je' xyñimaayich:

—Ca' jadu'n m̄id̄ich. Dios iich xytumbi'ajtp jadu'n nej miich etz nej jacjadyii miḡügt̄ijc̄ huídibí m̄ijpidaacc̄ixp c̄ixyot huini'jot je ayuc tiy'ajt janchypi huídibí Jesús ycapxhuac̄x. Huindziḡi' Dios.

Jadayaabi ayuc tiy'ajt janchypi huídibí Jesús ñid̄iy'ajt'ajt, yi' je' je Dios y'ayuc huídibí je profetas ajcxy ñajtzcapx̄iy.

Je m̄ij'ane'mbi huídibí poobcohuay yaj'iñaaay

¹¹ Chi nhuin'ijxyich tzajp'ahuadz, chí yqūex̄gy t̄ug poobcohuay, e je pin anajty yaj'iñaaay hue' anajty nayd̄ijyii je tud̄agyp̄i je janchypi. Je huídibí tiydumb naaxhuin̄yj̄ay m̄id tud̄agy'ajtin etz huídibí tziptumb m̄id tud̄agy'ajtin. ¹² E je' huídibí yaj'iñaaayb je poobcohuay, je' yhuin̄ jadu'n je' nej j̄inye'n, e ym̄id anajty ma ycohuajc maycoroni huídibí nid̄iy'ajt'ajtp co yrey'aty ma t̄üg'óc̄iy j̄ay. E je' ym̄id anajty t̄ug x̄i cojaay, e je' anajty nayd̄ügpajc nejhūiyb yx̄i ca' jac pin. ¹³ Hue' anajty yxoxyity m̄id huit y'uucyity m̄id ni'py, e je' yx̄i hue' anajty x̄i'adyii Dios y'ayuc. ¹⁴ Je ángeles ajcxy huídibí soldad'ajtp tzajp̄joty ypayóyii anajty ajcxy ac poobcohuayḡixp̄i, yxoxyity ajcxy m̄id sedi huit janch oybi, poobi etz huatzp̄i. ¹⁵ Je huídibí yaj'iñaaayb je poobcohuay, ma yi' y'ahuac yp̄idz̄imy anajty t̄ug espada janch j̄ijp̄i, e je' m̄id yajtzaach̄ihua'ñ je maynaaxhuin̄yj̄ay. E je' ane'ma'ñ m̄id Dios

ymic'ajt. E müd yi' y'ayuc castigi möhua'ñ je mayjäy müd ypocy ycixpi huidibi tzinaayb ma je may it lugar ya naaxhuiñ. Yi' y'ayuc jadu'n yi' nej tüg espada janch jiji. E yi' müd'adaanip je mijpi Dios chip y'ejin, je Dios huidibi tüg'óciy mic'ajt müd. E mictägy tzaachypí castigi yega'ñ ma je mayñaaxhuiñyäjy müd ypocy ycixpi, jadu'n je maynaaxhuiñyäjy nipaady nej jihuñ Dios y'ung tenmicx uvas müd ytecy. ¹⁶ E ymüid anajty cojaay ma yhuut etz ma ypuu jadayaabi ayuc: "Reydijc ajcxy yrey. Huindzindijc ajcxy yHuindzin."

¹⁷ Huin'it nhuin'ijxyich tüg ángel ytinäy xi'aguic, chi ooy janch mic miyaaxy tüg'óciy je joon huidijaty queec-huidijtp tzaajpujc yminañ:

—Miingix naymujctáayigix ma Dios adzui'ibi yecy. ¹⁸ Miingix, jigix mdzüdzcixipy reydijc ajcxy ñinícx, capitán ajcxy etz micjäydijc ajcxy ñinícx, cohuay chüch etz nañ jadu'n je' ajcxy ñinícx huidibi yaj'ñaayb. Mdzüdzip tüg'óciy jäy ñinícx: tumbidijc midumbidijc, je huindzindijc, comeeñdyjc etz je ayoobidijc.

¹⁹ Chi nhuin'ijxyich je ca'oy'iyujc etz je rey ajcxy huidibi yajpatp ya naaxhuiñ müd tüg'óciy ypubejtpidijc ysoldadotijc ajcxy. Nhuin'ijxyich co ti ñayyömyúcgixy co chiptunaangixy midziptzonaangixy je huidibi poob-cohuay yaj'ñaayb quipxy müd je' ypubejtpidijc ysoldadtijc ajcxy. ²⁰ Chi je ca'oy'iyujc ymachycäy quipxy müd je profeta ca'pi yjanchity, je tiibi anajty tuñ mijhuinma'ñ ma je ca'oy'iyujc yhuinduu. Müd je mijhuinma'ñ ycixpi je profeta, ca'piy yjanchity, ti anajty ooy huin'ññ tüg'óciy je huidijaty ajcxy nayyejci co je ca'oy'iyujc ytiy'ajt ijxpejt cöbijci ma yhuimboc etz co huindzigiñy je ñidzejtztuutin. Jadu'n je ca'oy'iyujc etz je profeta, ca'piy yjanchity, yajcötijnajxy ajcxy ma jin ytoy müd azufre, jadu'n je jin nej tüg meyj huadz jin. ²¹ Jacjadyii jäy hue' ajcxy o'cin patcixy müd espada huidibi anajty pidzimb ma je' y'ahuac je huidibi anajty poobcohuay yaj'ñaayb. E tüg'óciy je joon etz luud huidibi ajcxy queec-huidijtp cijx je' ajcxy ytimycuuxtäayigixy ytimypejtáayigixy müd may öcpi chüch.

20

Je mil jimijtpi

¹ Huin'it nhuin'ijxyich tüg ángel ycidägy choon tzaajpoty müdity je ahuasti huidibi müd yaj'ahuäch je mij jut huidibi oy ycicyity, ymüid anajty nañ jadu'n tüg mijcadena ma yci'. ² Jadayaabi ángel majch je ama'y tza'ñ huidibi yajtiijp mujcu' etz Satanás, chi yajcadenitigiñy, e yajhui'my mach tüg mil jimijtp. ³ Chi je ángel cötijnajxy je mujcu' ma je mij jut, chi cö'agiñy. Chi tüg selli pidacy ma je mij jut aguü. Pidacy je mujcu' ma je mij jut, ca'ydi jac-huin'ññ je mayñaaxhuiñyäjy, icti cooni tüg mil jimijtp yca'pxipy. E co jadu'n anajty mil jimijtp ti ñaxy, ooy ycopicyity co yajnajtmadzñhuipy je mujcu' tzojccixy.

⁴ Chi canaag ane'mdac nhuin'ijxyich ma anajty ajcxy iñäy tiibi ajcxy patcixy cötujcin co tiydúngixipy naaxhuiñyäjy. Nañ jadu'n nhuin'ijxyich ajcxy y'alma huidibi anajty ajcxy ti yajyöctzujctuatcixy müd co ajcxy capx-huächy je Dios y'ayuc ytiy'ajt huidibi Jesús ñidiy'ajt'ajt. Ca'p je' ajcxy anajty huindzigiñyigixy je ca'oy'iyujc, ni je' ñidzejtztuutin. E nañ jadu'n ni ca' ajcxy cöbijci je ca'oy'iyujc ytiy'ajt ma yhuimboc ni ma yci'. Co ajcxy y'o'cy, chi yjugypigipy ajcxy jadüg'oc etz ane'mip ajcxy quipxy müd Cristo tüg mil jimijtp. ⁵ Je jacjadyii je öcpi, huidibi ca'p mijpidacy Cristo, ca' je' ajcxy yjugypigipy, icti cooni anajty ti ñaxy tüg mil jimijtp huin'itni. Co tüg'óciy je mibijcpidijc

yjugypigipy jadüg'oc, jada je' je ogá'nibi tiempo mina öcpi ajcxy yjugypijccixy, e ca' y'oc'ó'ccixnñp jadügtecy. ⁶ Jotcujc etz huädz, ca' tibocy müidity, je' ajcxy öcpidijc huidibi jugypigipy co Jesús yajjugypigipy yi tügpicy öcpi huidibi jayijp'adamb. Je mimetzpi o'cin ca' ni ti mic'ajt müidity ma je' ajcxy. Hue' janch ajcxy ytung'adiyb huingapxi ma Dios etz Cristo. E je' ajcxy Cristo quipxy müid y'ane'mip tüg mil jímijt.

⁷ Co anajty ti ñaxy je mil jímijt, huin'it je Satanás yajcoguejtütüdy ma ymach'ity. ⁸ Chi Satanás nicxy huin'ññ je mayñaaxhuifñyäjy huindu'mybi ñaaxhuiñ. Je' nicxy huin'ññ Gog jäy etz Magog jäy. E yi' ajcxy y'ane'mbidijc yajmujctähua'ñ soldado ajcxy, jigix chiptúngixipy müid je Dios y'ung. Jadu'n je' ajcxy soldados ymayity jadu'n nej pu' ymayity huidibi mejypá'ám. ⁹ E jadu'n ajcxy ypediyy ma ymijhuinüity naax, chi ajcxy yajnaadujcy je it ma chinaaygixy huidibi Dios ti huin'ijxigixy etz yajnaadujccixy je ciudad huidibi Dios chojcpy. Chi Dios quejxy jün huidibi tzoomb tzajpjoty, huidibi oy ñöcigixy huädz huädz je may soldados ajcxy. ¹⁰ Je mujcu', huidibi anajty ti huin'ññ je mayjäy, oy yajcötijnaxy ma je mij jün ytoy müid azufre. Ma anajty ti yajcötijnaxy je ca'oy'iyujc etz je profeta, ca'piy yjanchity. Jiiby je' ajcxy ayo'n tzaachypi paadipy xim tzuom huinixi huinitiempo.

Je tyduunin ma je mij'ane'mbi yhuinduu

¹¹ Nhuin'ijxyich tüg mij'ane'mdac janch poob, müid je huidibi anajty iñaayb ma je'. Ma je' yhuinduu naax etz tzajp queectigoyday yajxon, ni ca' y'ocyajpatni it lugar ma je naax etz tzajp y'ijtcixipy. ¹² Chi nhuin'ijxyich je öcpi ajcxy, mij'anäcpi mutz'anäcpi, ytinaaygixy ma Dios yhuinduu. Chi yajciyhuäcxtay maylibro. E nañ jadu'n yajciyhuäcxy jadüg libro huidibi müid je jäy yxi cojay huidijaty ajcxy jugy'ajtñ huinixi müid. Chi je' ajcxy yajtyduñ je öcpi ajcxy nej anajty ajcxy ti chinaaygixy ya naaxhuiñ, jadu'n nej yjabyetyty ma je maylibro. ¹³ Je mejy yciyejctay je' je öcpi ajcxy huidibi anajty jiiby yajpatp. E je o'cin etz je öcpijut yciyejctay je' je öcpi huidibi jiiby yajpatp, e tüg'öciy je' yajtydunday nidüg nidüg nej anajty ti chinaaygixy. ¹⁴ Je o'cin etz je it ma je öcpi y'ity yajnajtztijyday jünjoty ma je mijjün ytoy. Je' je' je mimetzpi o'cin ma je mijjün ytoy. ¹⁵ E huidijaty anajty ajcxy ca' yxi ymiñ ma je libro huidibi jugy'ajtñ huinixibi müid, hue' je' ajcxy yajnajtztijy jünjoty ma je mijjün ytoy.

21

¹ Huin'it nhuin'ijxyich tüg tzajp jemybi etz tüg naax jemybi, com je jayijpi tzajp etz je jayijpi naax ti je' anajty ytigoydäy, e ni ma anajty mejy ycacädy. ² Ich, Juan, nhuin'ijxyich je ciudad huätzpi jemybi, je Jerusalén, ycidägy anajty choon' tzajpjoty ma Dios yajpaady, janch oyduñ anajty, jadu'n nej tüg töxyjäy ñay'oyduñiyi ñayxoxyii co ypiga'ñ müid yëdydj. ³ Nmidoohuich tüg ayuc micpi choon' anajty tzajpjoty, e ymínañ:

—Cuenditun ich n'ayuc. Dios tzinaydac pigamb ma naaxhuifñyäjy ajcxy. Yi' tzinähuiy müid yi' ajcxy, e yi' ajcxy Dios yjäy'adiyb. E Dios ci'm idaamb müid yi' ajcxy jigix yi' ajcxy Dios'adiyb. ⁴ Dios yajquëgiib ajcxy ytajin ymayin etz yajtídzib ajcxy yhuinnü, e ca'p yjadiib o'cin ni jiyin ni yaaxin, ni jotmay, ni pin ycajihuihuip je ju'pin je pa'min. Com je huidibi anajty ijtnaayb, ti je' ñaxy.

⁵ Huin'it je' ymínañ huidibi anajty iñaayb ma je mij'ane'mdacin:

—Cuenditungix ich n'ayuc. Huinjemy ngojtigadza'ñich tüg'öciy huidibi jii'ijtp.

Nañ jadu'n ymīnañ:

—Jaay jada ayuc. Com jadyaabi ayuc ooy jada yjanchity, e ooy yi' jot'amij'ajt mīdity.

⁶Huin'it je mij'ane'mbi xyñīmaayich:

—Tī tūg'óciy ytunyī yjadyī. Ich je' nyajtzondacp tūg'óciy tijaty, etz ich nyajcogixiyb tūg'óciy tijaty, tim jadu'n nej je letra A huīdibi yajtzondacp je alfabeto etz je letra Z huīdibi yajcogixiyb je alfabeto. Pinjaty tzojcp jemybi jugy'ajtin ich yi' nmōhuip. Jadu'n nipaady nej jihuīy ajcxy ytidziyigixy, e nyaj'ūgich ma ymuxy je nī huīdibi yejcp jugy'ajtin, ni ca' ajcxy mīmeeñyduunip ni jadu'ñi. ⁷Pinjaty mīmadactaayb jibic-huinmañ etz pocytnūi, yi' je' cidigihūiib huīdibi njē'ajtpy, e ich yi' xyDios'adiib, e yi' ich n'ung'adiyb. ⁸Je huīndzīctijc ajcxy, pinjaty ca' ymībicy ich ndiy'ajt, pinjaty tumb huīdibi ca' y'oyjāygidaacnity, pinjaty jāy yaj'ōcp, pinjaty mīgapxtigooyb tōxyjāydijc, pinjaty tumb capxpogīi, pinjaty mījpidacp huījyāy yhuīnmañ, pinjaty huīndzīgīyb quipychech tzaadzech, etz pinjaty anīdacp, je' ajcxy nidūg'óciy nibidzimīb ñicxipy ma mījijn toyo mīd azufre, huīdibi quēxīcp nej jīnmejy. Je' je' je mīmetzpi o'cīn.

Yi jemybi Jerusalén

⁹Huin'it nidūg ángel je nihuixtujcpi huīdibi anajty mīd huixtujc tasi ujtjatypī mīd je huixtujcpi ayo'n tzaachypī huīdibi jac'axam tunaanip jadaanip, je' xyñīmaayich:

—Min, e cham nyajni'ixihuañ je mībijcpīdijc huīdibi tūgmugamb mīd Dios y'ung, je Cordero, jadu'n nej tūg yēydijc ytūgmucy mīd ytōxyjic co ajcxy ypīcy.

¹⁰Je huīdibi Dios yjihui'ñ ymīc'ajt xyaj'ijxich cumāyjoty, chi je ángel cūmāyjoty xyajnicxyich ma tūg cop mījpi etz cīxpi, chi xyaj'ijxyich je mījpi ciudad santa. Je ciudad santa hue' je' yxī Jerusalén, e ycidāgy anajty chooñ tzajpjoty jīiby ma Dios yajpaady. ¹¹Je mīj ciudad santa janch adīcxp je' anajty mīd Dios y'oy'ajtin. Jim jadu'n anajty y'adīcxp nej tūg tzaa janch oybi nej mármol, janch yaj'ijxnajxp nej ijxin. ¹²Jūhuīdityi anajty mīdity je ciudad santo ac poch janch mīj etz cīxy. Je poch ymīd anajty majmetz y'aguu. E ma je majmetzpi y'aguu majmetz ángel ajcxy y'ijtcīxy, tūgpi ángel ma tūgīaty ciudad aguu. Etz yjaybetyity je' ajcxy yxī je majmetzpi Israel tribu, tūgpi tribu yxī yjaybetyity ma tūg tūg poch y'aguu. ¹³Tugīg anajty y'aguu mīdity xībidzim'amy, tugīg y'aguu ma tichypoī ymīnīy, tugīg y'aguu ma jīnboī ymīnīyin, etz jatugīg y'aguu ma xīgīdāgy'amy. ¹⁴Je poch huīdibi anajty ymīd je cajp, ymīd anajty majmetz tzaa huīdibi y'ijx'ajtip, e majmetzpi tzaa ymīd anajty cojaay je nimajmetzpi apóstoles ajcxy yxī huīdibi Jesús, je Cordero, yhuīn'ijx, tūgpi apóstol yxī ma tūg tūg tzaa.

¹⁵Je ángel huīdibi anajty mīydacp mīd ich, ymīd anajty tūg quīxp ac tim oori je' anajty. Je' anajty mīd quīpxañ je cajp, je poch y'aguu, etz je poch. ¹⁶Je cajp, je ciudad, hue' je' anajty cuadradi; nej anajty yoñ'ajt, nañ jadu'n anajty y'agon'ajt, etz nañ jadu'n ycīx'ajt. Chi je ángel quīpxy je ciudad santa mīd je' yquīpx. E hue' quīpxy mejtz mil jamejtz mīgo'px kilómetros, y'ayoñ'ajtin ycīx'ajtin etz y'agon'ajtin quīpxjaty je' anajty. ¹⁷Huin'it je ángel quīpxy je poch, hue' quīpxy mīgo'px jahuīxchīgūīpx mīdaax cīnuux, jadu'n nej naaxhuīñyāy ajcxy ycīnuux, huīdī je ángel yajtumyb.

¹⁸Je poch hue' je' anajty ypochity mīd tzaa oyjatypī, e je cajp hue' je' anajty ac tim oori, yguēxīgy nej ijx huātzpi. ¹⁹⁻²⁰Je tzaa huīdibi je poch

y'ix'ajtip hue' je' anajty y'oyduñity huidi müd y'oyguëxigy, tzaa janch oyjatypí canaagnax color. Je jayjipi poch y'ix hue' anajty y'oyduñity müd jaspe tzaa, je mimetzpi poch y'oyduñity müd safiro tzaa, je midugügpi poch y'oyduñity müd ágate tzaa, je mimadaaxpi y'oyduñity müd esmeralda tzaa, je mimigooxpi poch y'oyduñity müd ónice tzaa, je midudujcpi poch y'oyduñity müd coralina tzaa, je mihuxtujcpi poch y'oyduñity müd crisólito tzaa, je mituctujcpi poch y'oyduñity müd berilo tzaa, je midaxtujcpi poch y'oyduñity müd jacinto tzaa, je mimajmetzpi poch y'oyduñity müd amatista tzaa. ²¹ Je majmetzpi poch'aguu hue' anajty y'oyduñity müd tügpí perla. E je mijtu' huidibi najxp cajcujc hue' y'oyñy müd oori huätzpi, e yquëxigy nej vidrio huätzpi yaj'ixnaxp.

²² Ma je Jerusalén cajp jemybi ca'p nhuin'ixyich ni tüg templo, ni tüg tijc ma jäy ajcxy Dios ojadajtcixy. Com je Huindzin Dios, yi huidibi tügpajc mijip, etz je' y'ung, je Cordero, jadu'n yi' ajcxy nipaady nej tüg templo nej tüg it ma mayjäy ajcxy y'ojadajtigixy Dios etz je' y'ung. ²³ Je jemybi Jerusalén ca'p je' anajty yajmayjaty xii po' huidibi yaj'anihuip yajtixihuip je ciudad, com je Dios y'oy'ajtin etz je' y'ung y'oy'ajtin yi' je' ajcxy nej je' tixcin jajin huidibi amb tixcp ma je Jerusalén jemybi. ²⁴ Je mayñaaxhuifñyäj huidibi ti patcixy y'alma nidzoocin naxípy tighuipy ajcxy müd je jemybi Jerusalén ytixcin yjajin huidi anajty ti ymöyii. Je ane'mbidijc ajcxy ya naaxhuifñ ymimünipy ajcxy mij'ajt, oy'ajt, etz cōmay'ajt ma je jemybi Jerusalén. ²⁵ E je cajp aguu ni camina je' agíy yca'idipy xim, com jim ca' jim ycoodz'idipy, paady ni mina yca'agi' y'idipy. ²⁶ Jim je naaxhuifñyäj, canaag agajp, minicxip ajcxy ymij'ajt y'oy'ajt ycōmay'ajt ma je Jerusaléngajp, je jemybi. ²⁷ Ca'p jim ytighuipy ni pin huidibi ca' ypocayñihuächñi, ni pin huidibi tumb ca'pi y'oyjygi daacnity, etz huidijaty jäy huin'imb. Jëy jim tighuip pinjaty ijtp yxii cojay ma je libro huidibi Dios y'ung, je Cordero, ymüd, ma cojay y'ity je jäy ajcxy yxii huidibi ymüd jugy'ajtin huinixiibi.

22

¹ Huin'it je ángel xyajni'ixiiyich tüg mijñi huätzpi, je nii huidibi yejcp jugy'ajt huidibi ca' ycixip ytigoyip. Janch huádz janch tixc je' anajty je nii nej tüg iixin. E je nii jim anajty ymuxy ma Dios etz je Cordero y'ane'mdac. ² Jada mijñi hue' je' anajty ñaxy cuidad mijtügujc, etz ma je mejtz'adu'm'amybi mijñiiba', jim anajty je quipy huidibi jugy'ajt müd, huidibi tım'ajt majmetz'oc tügpí jimajt, po' po' ytım'aty, e je quipy y'aay hue' anajty ytuñ jigix huaad naaxhuifñyäj choocixy. ³ Ca'p jim y'adipy ni t ayo'n ni ti jotmay müd pocytnii ycxipi. Je Dios etz je' y'ung je' jim y'ane'mdac ycötujctac yajpaadipy. E je' ytumbidijc je' ajcxy jim yajmij'adñib ojadadñib. ⁴ Y'ixxipy ajcxy je Dios y'ung yhuifñyijp etz yminicxip ajcxy je' yxii ycojay ma ajcxy yhuimboc. ⁵ Ca'p jim ycootzihuity. E pinjaty jim tzinaayb ca'p ajcxy yajmayjadipy linterna jin, lamparajin, ni xiidicxpi, com Dios ñch ajf nHuindzin yi' yi' ajcxy codicxñib. Je Huindzin Dios etz je' y'ung je' ajcxy jim ane'mip huinixii huin'ittempo.

Huigoonñ yi Jesucristo ymin'aa

⁶ Huin'it je ángel xyñimaayich:

—Jadayaabi ayuc tiy'ajt ma jada necy, ooy jada yjanchity, e jëbi miich myajmij'adipy. Je Huindzin, je Dios huidibi ayuc moy je profetas ajcxy jecy'ajty, quejxy y'ángel jigix yajni'ixihuipy je' ytumbidijc tijaty tzojc tunaanip jadaanip.

⁷ Jesucristo jadu'n ymīnañ:

—¡Miimbich tzoj! Jotcuje pinjaty tumb cuendi etz cuydumb Dios y'ayuc ytiy'ajt huiidibi jaybetyip ma jada libro.

⁸ Hich Juan, nmīdoohuich etz nhuin'ixich jadayaabi huiidibi jaybety ma jada necy. E co oy jadu'n nhuin'ixyich, chi nhuijoj'ihuuyich ma je ángel ytecmajc huiidibi anajty yam xyajni'ixiybich. ⁹ Chi je' xyñimaayich:

—Ca' jadu'n m'īdich. Hich, Dios xytumbi'ajtp jadu'n nej miich etz jacjadyii migügtjic huiidibi Dios y'ayuc najtzcaxhuyip, e tüg'óciy pinjaty tumb cuendi huiidibi jaybetyip ma jada necy. Huindzigi' etz ojadat Dios.

¹⁰ Chi je' xyñimaayich:

—Capxhuācxī je Dios y'ayuc huiidibi ti mjay ma jada necy, ca' myūdzip. Com ti yhuingoñ je tiempo mina Dios cuyduna'ñ yi y'ayuc huiidibi yjayhuim ma jada necy. ¹¹ Pinjaty ca' ytuđägyity, huen jadu'n jacyajpaady miid ycatudägy'ajt. Pinjaty jibicjot jibic-huinma'ñ tumb, huen niği jibicjot jibic-huinma'ñ tuñ. E pinjaty tudägyi tumb, huen jactuñ tudägy'ajtin. Pinjaty huādz yjot huādz yhuinma'ñ miid, huen huādz yjot huādz yhuinma'ñ jacm'ity ma Dios.

¹² Chi je Cristo ymīnañ:

—Timetiini nhuimbīdipyich jadüg'oc naaxhuiñ. Co anajty ti nmiñich, huin'it nyajjotcugihuibich pinjaty oybi ti tuñ, e ndzaachytunipyich pinjaty jibicpi ti tuñ. ¹³ Hich je' ti njayijp'atyich ya naaxhuiñ, etz ich je' cogixihuamb, tim jadu'n nej je letra A chondägy ma je alfabeto etz je letra Z ycocixiy ma je alfabeto. Hich ti nyajtzondacyich je naaxhuiñ etz nyajcixipyich.

¹⁴ Jotcuje ajcxy pinjaty ti ypocynihuäch, jadu'n nipaady nej ajcxy yhuīt ti pujcixy e miid ajcxy yhuīt huätzpi. Com ti ajcxy ypocynihuaatzcixy, paady jēbi jīcxcixip je ujtz tza'm huiidibi jugy'ajt yejcpy huiidibi ca' ycixipy ytigoyipy ni mina, e jadu'n jēbi ytiğiy ma je jemybi Jerusalēngajp. ¹⁵ Dios ca' yi' ajcxy cōbiga'ñ ma je jemybi Jerusalēn etz huimip ajcxy cajppa' tüg'óciy pinjaty huiidibi jibic-huinma'ñ miid, pinjaty ca' mibicy Dios, pinjaty mijpidacp huijyāy yhuinma'ñ brujo yhuinma'ñ, pinjaty ajcxy migapxtigooyb midundigooyb töxyjāydijc, pinjaty ajcxy jāy yaj'öcp, pinjaty ajcxy huindzigiyyb quipychech tzaachech, etz tüg'óciy pinjaty tzachnixondacp anī ayuc.

¹⁶ Hich Jesús huiidibi capxp. Ti nguexyich n'ángel ma miich jigix jada tiy'ajt capxticixipy majaty mibijcpidijc ma tüg tüg cajp. Hich je' iix'ajtp cop'ajtp ma je rey David miñ. Etz ich je' nmij'ap'ajtpyich nmijteedy'ajtpyich je rey David. Jadu'n ich nipaady nej je mijmadza' huiidibi yajtijp jayxim.

¹⁷ Je Espiritu Santo etz je mibijcpidijc huiidibi jadu'n nipatp nej Cristo ytōxyijc ymīnaangixy:

—Min ma Jesucristo.

E pin amīdoo'ijtp ich n'ayuc ymīnāangixipy:

—Min ma Jesucristo.

E pin tzojcp jugy'ajtin huiidibi ca' ycixipy ytigoyipy nimina, jadu'n nej jihuiy ytidziyīi e tzocy jada ni, huen miñ, e nmōhuibych jugy'ajtin, jadu'n nej jihuiy nyajni'ügich je ni huiidibi jugy'ajtin miid e ni ca' mīmeeñyundipy ni jadu'ñyi.

¹⁸ Tüg'óciy pinjaty amīdoo'ijtp Dios y'ayuc ytiy'ajt huiidibi jaybetyip ma jada libro, ich miich ajcxy nīmaaybich co pinjaty jacyaj'anajxp jada ayuc ma jada necy, Dios jac'anaxy mōhuib tzaachypī ayo'n, ca'ydi huiidibi jaybetyip ma jada libro. ¹⁹ E pin puuhujtzip hueeni jada Dios y'ayuc huiidibi jaybetyip ma jada Dios ylibro, Dios yi' jōtzīb yxi huiidibi cojaayip ma je jugy'ajt libro. Nañ jadu'n

ypuhuidzñiyb huidi anajty japaatip ma je jemybi Jerusaléngajp, huidi jada libro ñimiydacpy.

²⁰ Yi Jesucristo huídibi jada ayuc capxp, yi' minamb:

—Ca' ooy jecy njac-huácxiba'ñich co nhuimbidiipyich naaxhuiñ jadüg'oc.

Jadu'n jada. Amén. ¡Min, Huindzin Jesús!

²¹ Huen je nHuindzin Jesucristo may'ajt oy'ajt tunipy mñid miich ajcxy huídibi mibijcp. Jadu'n ngapxycíxyich. Amén.